


Desano



Desano: Goāmu Yare Wereripū New Testament

Desano

Desano: Goãmu Yare Wereripũ New Testament

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source files dated 1 May 2025

17771afc-c309-57fd-9ff3-2d5a0cd59ff1

Contents

SAN MATEO	1
SAN MARCOS	101
SAN LUCAS	161
SAN JUAN	262
HECHOS	335
ROMANOS	425
1 CORINTIOS	469
2 CORINTIOS	512
GALATAS	539
EFESIOS	555
FILIPENSES	570
COLOSENSES	579
1 TESALONICENSES	589
2 TESALONICENSES	598
1 TIMOTEO	603
2 TIMOTEO	615
TITO	623
FILEMÓN	628
HEBREOS	631
SANTIAGO	664
1 PEDRO	675
2 PEDRO	687
1 JUAN	694
2 JUAN	704
3 JUAN	706
JUDAS	708
APOCALIPSIS	712

San Mateo

Jesucristo Goãtm̄ magu ĩgu acawererã iribojegue majarã erã waĩre were gojam̄htañumi Mateo

¹ Jesucristo ñecũ sũmarã iribojegue majarã árĩñuma. Eropigu ĩgu ñecũ mũru iribojegue majagu Davi waĩcũgu árĩmũriñumi. Ĩgu árĩboro core erã ñecũ Abrahã waĩcũgu árĩmũriñumi.

² Abrahã Isaa pagu árĩñumi. Isaa Jacobo pagu árĩñumi. Jacobo Judá sã pagu árĩñumi.

³ Judá porã Fares Zara sã árĩñuma. Erã pago Tamar waĩcũgo árĩñumo. Fares Esrom pagu árĩñumi. Esrom Aram pagu árĩñumi.

⁴ Aram Aminadab pagu árĩñumi. Aminadab Naasón pagu árĩñumi. Naasón Salmón pagu árĩñumi.

⁵ Salmón Booz pagu árĩñumi. Ĩgu pago Rahab árĩñumo. Booz Obed pagu árĩñumi. Ĩgu pago Rut árĩñumo. Obed Isaí pagu árĩñumi.

⁶ Isaí Davi pagu árĩñumi. Davipu Israe majarã tauro opu árĩñumi. Ĩgu Uria waĩcũgu mũru marapore ĩgu marapocũra pũhrũ Salomo waĩcũgure porãcũñumo igo.

⁷ Salomo Roboam pagu árĩñumi. Roboam Abías pagu árĩñumi. Abías Asa pagu árĩñumi.

⁸ Asa Josafat pagu árĩñumi. Josafat Joram pagu árĩñumi. Joram Uzías pagu árĩñumi.

⁹ Uzías Jotam pagu árĩñumi. Jotam Acaz pagu árĩñumi. Acaz Ezequia pagu árĩñumi.

¹⁰ Ezequia Manase pagu árĩñumi. Manase Amón pagu árĩñumi. Amón Josia pagu árĩñumi.

¹¹ Josia Jeconia sã pagu árĩñumi. Erã árĩrisubure Israe yeba majarãre Babilonia majarãpũ ñeagãñuma erã ya yebague peresu iimorã.

¹² Eropi Babilonia yeba erã ejara pũhrũ, Jeconia marapo Salatiere porãcũñumo. Salatie Zorobabe pagu árĩñumi.

¹³ Zorobabe Abiud pagu árĩñumi. Abiud Eliaquim pagu árĩñumi. Eliaquim Azor pagu árĩñumi.

¹⁴ Azor Zadoc pagu árĩñumi. Zadoc Aquim pagu árĩñumi. Aquim Eliud pagu árĩñumi.

¹⁵ Eliud Eleazar pagu árĩñumi. Eleazar Matán pagu árĩñumi. Matán Jacobo pagu árĩñumi.

¹⁶ Jacobo José pagu árĩñumi. José María marapũ árĩmũriñumi. Mariãpũ Jesu pago árĩmo. Jesupũ masare taubu árĩgu Cristo erã arĩ piyudigu árĩmi.

17 Eropirã Abrahãre mari queonugacũ, ne Daviguere mari queotucũ, oã árĩpehrerã árĩrã catorce cururi gohra árĩñuma. Eropirã mari dipaturi Davire queocũ, ne Babiloniague Israe majarãre erã aĩgãboro core queotucũ catorce cururi gohra dipaturi árĩñuma. Eropiituhaja Babiloniague erã ejara pũhrũ mari queonugacũ ne Cristo ĩgu masa dehyoacũgue mari queotucũ catorce cururi gohra árĩñuma daja.

*Jesucristo ĩgu masa dehyoarare wereñumi Mateo
Lc 2.1-7*

18 Eropigu Jesucristo õpa masa dehyoapũ. ĩgu pago Mariapũ José mera mojoto diribo árĩpo. Eropigo igo ĩgu mera marapũcũboro core Espĩritu Santo ĩgu turari mera majigu bocapo. Eropigo igo basi majigu opawahgũriñere masipo igo.

19 Eropigu José igore mojoto diribodigu irire masigu, diaye árĩrire ĩgu iigu árĩgu igore cóãbu iiripũ. Igore guhyasĩuro iidiabigu, masa erã masibiricũ ta igore cóãbu iiripũ.

20 Irire ĩgu pepirisubu Goãmũ anyupũ quẽroque Josere dehyoagu, õpa arĩpũ.

—José, Davi mũrũ pãrami, María mera guhyasĩriro mariro mojoto dirique. Igo Espĩritu Santo ĩgu turari mera ne nijipo árĩ wahgãrigo ãhrimo. Eropigu guhyasĩriro mariro igore mojoto dirique.

21 Igo porãcũgocumo. ĩgu igo magũ ta ĩgu ya maca majarãre erã ñeri iira dipuwajare taubu árĩgũcumi. ĩgu eropa taubu árĩcũ Jesu waĩyegũca mũhu ĩgugãre, arĩpũ anyu Josere.

22 I árĩpehreri eropa wayoro iribojegue majagu Goãmũ ya weremũhtadigu ĩgu arĩ gojadiro dopa ta. Irire ĩgure Goãmũ gojadoreñumi. Õpa arĩ gojamũriñumi Goãmũ yare:

23 Nómeo mũmũ mera árĩbigo, majigugãre bocago porãcũgocumo igo magugãre. Eropigu Emanuel waĩcũgũcumi ĩgugã, arĩ gojañumi Goãmũ yare gojayudigugue.

Emanuel arĩdiaro “Goãmũ mari mera ta ãhrimi,” arĩdiaro ĩiaa.

24 Goãmũ yagu anyu Josere eropa arĩ werera pũhrũ Josépũ wahgã anyu ĩgu dorediro dopa ta María mera mojoto diripũ.

25 Igo magugãre igo porãcũboro core Josépũ igo mera árĩnibiripũ. Igo pũ porãcũpo pare. Eropigu ĩgũpũ igo magugãre Jesu waĩyepũ.

2

Abe m̄uririro majarã õaro masirã Jesure ïarã ejañuma

¹ Judea yeba árĩri maca Belén waĩc̄uri maca Jesu masa dehyoap̄u. Irisubu Herode Judea yeba majarã erã tauro op̄u árĩp̄u. Ìḡu eropa masa dehyoara p̄hr̄u necãre buherã necãre õaro masirã abe m̄uririr̄op̄u majarã ahri, Jerusaléngue erañorã.

² Eropa erarã, masare ero majarãre serẽpiñorã:

—¿Judio masa erã tauro op̄u árĩbu dohpaguere nohogue masa dehyoayuri ìḡu? Abe ìḡu m̄uririro majarãgue árĩrã, ne necãm̄u dehyoacũ ïab̄u. Eropa ìḡu dehyoacũ ïha “Op̄u masa dehyoaḡu iicumĩ,” arĩ masiab̄u ḡua. Eropa ìḡu ne dehyoacũ ïarã ḡua yujuro mera ìḡure umupeorã arirã iib̄u õgue, arĩ wereñorã necãre buheri masa masare.

³ Erã eroparĩcũ pee erã op̄ure Herodere irire wererã wañorã. Eropiḡu gajiḡu op̄u masa dehyoarare erã werecũ peeḡu Herodep̄u guñaric̄up̄u. Eropirã árĩpehrerã Jerusalén majarã sã ìḡu iro dopa ta guñaricũñorã erã sã.

⁴ Eropiḡu Herodep̄u árĩpehrerã pahia oparãre, judio masare buherã sãre sihupehocãp̄u. Ìḡu sihubeora p̄hr̄u erã gamenerepehrecũ ïha, erãre serẽpip̄u ìḡu:

—¿Nohogue masa dehyoaḡuc̄uri Goãm̄u beyediḡu Cristop̄u m̄ua pepicũ? arĩ serẽpip̄u ìḡu erãre.

⁵ Õpa arĩ wereñorã erã ìḡure:

—Belén, Judea yebague árĩri macague Cristo masa dehyoaḡuc̄umi. Õpa arĩ gojam̄uriñumi Goãm̄u yare werem̄htadiḡu:

⁶ Belén waĩc̄uri macague yujuḡu op̄u dehyoaḡuc̄umi. Ìḡu Goãm̄u yarãre Israe majarãre dorebu árĩḡuc̄umi. Eropiro Belén Judea yeba árĩri macari watope bu árĩri maca árĩquerero gajĩ macari tauro árĩroca, arĩ gojam̄uriñumi Goãm̄u yare gojayudiḡugue, arĩ wereñorã erã Herodere.

⁷ Erã eropa arĩra p̄hr̄u Herode masa erã peebirogue abe m̄uririr̄op̄u arinirãre sihubeop̄u. Ìḡu pohrogue erã ejara p̄hr̄u, erãre ìḡu serẽpira p̄hr̄u, erã necãm̄ure erã ïaran̄ure wereñorã erã ìḡure.

⁸ Erã eropa werera p̄hr̄u Herodep̄u erãre Beléngue obeoḡu õpa arĩp̄u erãre:

—Ìḡugãre õaro amaque. Ìḡugãre m̄ua bocajara p̄hr̄u yu sãre wererã ariq̄ue m̄ua. Ìḡugãre umupeoḡu wabu iiaa yu sã, arĩ were obeorip̄u erãre Herodep̄u.

⁹ Ìḡu eropa arĩra p̄hr̄u, erã waha wañorã. Erã eropa wacũ abe m̄uririr̄op̄u erã ïadiru necãm̄up̄u erã core

wamũhtaniguicãyoro. Eropiro majigugã ïgu árĩro weca dujanugaja wayoro iriru necãmũ.

¹⁰ Eropirã necãmũ dujanugajacũ ïarã, bũrigã mucu-biriñorã erã.

¹¹ Majigugã ïgu árĩri wihigue eja, ñaja wañorã erã. Eropa ñajajarã majigugãre ïgu pago mera árĩgure ïañorã erã. Eropirã erã mereja, ïgure umupeoñorã. Umupeotuhaja, erã ya comorire aĩbeo, pãgũñorã erã ïgugãre aĩgãrirare omorã. Eropirã orore, buirire, poresuri sãre aĩwiu, ïgugãre waja mariro oñorã.

¹² Irire otuhara pũhrũ carĩa wañorã erã. Erã eropa carĩcũ quẽroque Goãmũ werepũ erãre: “Herode pohro dujabiricãque,” arĩ werepũ Goãmũ erãre quẽroquere. ïgu eropa arĩ werera pũhrũ, erãpũ wahgãñorã. Erã eropa wahgãra pũhrũ gajĩ mague erã ya yebague dujarã dujaa wañorã.

José sã Jesugãre aĩ duhrigã wañuma Egiptogue

¹³ Erã eropa wara pũhrũ Goãmũ yagũ anyu quẽroque Josére dehyoagu, õpa arĩ werepũ:

—Wahgãque. Herodepũ majigugãre wejẽbu amagũcumi dohpaguere. Eropigu majigu sãre ïgu pago sãre Egiptogue duru aĩ duhrigãque. Eroguere yũ dipaturi mũre werecũgue dujarique, arĩ werepũ anyu Josére.

¹⁴ ïgu eroparĩcũ peegũ, Josépũ ñami ta wahgã, majigu sãre ïgu pago sãre Egiptogue aĩ duhrigã wapũ.

¹⁵ Egiptogue eja, Herode ïgu ojocaripõ ta eroguere árĩñorã erã. Eropa wayoro iribojegue majagu Goãmũ ya weremũhtadigu ïgu arĩ gojadiro dopa ta. Irire ïgure Goãmũ gojadoreñumi. Õpa arĩ gojamũriñumi Goãmũ yare gojayudigugue: “Egiptogue árĩgure yũ magure sihubeoabũ,” arĩ gojamũriñumi Goãmũ yare weremũhtadigugue.

Herode majirãre wejẽdoreñumi

¹⁶ Eropigu necã buherã erã duhri dujaacũ peegũ Herodepũ guatariacãpũ. Eropigu Belén majarãre, iri maca pohro majarã sãre erã porãre ũa porãgãre wejẽpehocãdorepũ ïgu. Ne dehyoarãre wejẽnugadore pe bojori oparãre wejẽtudorepũ ïgu. Nere necãre buheri masa necãmũre erã ïaranũre wereñorã Herodere. Erã eroparĩcũ peegũ ïgu Jesu masa dehyoarĩnũre masigu, “I nũcũ bojori ta ïgu opacumi,” arĩgu majirãre pe bojori oparãre wejẽtudorepũ.

¹⁷ ïgu eropiicũ iribojegue majagu Jeremia Goãmũ yare weremũhtadigu ïgu arĩ gojadiro dopa ta eropa wayoro. Õpa wereyu gojañumi ïgu:

18 “Ramá waĩcurogue busuro carabu. Buringã bujawereri mera orerã carama. Raquel acawererã Israe masa marasã nome erã porãre buringã orerãcoma. Erã porã sīricũ ĩarã ne bujawere duhosome,” arĩ gojañumi iribojeguere Herode majirãre wejẽdoreboro core.

19 Eropi Herode ĩgu sīrira pũhrũ Egiptogue árĩdigũre Josere Goãmũ yagu anyu quẽroque dehyoapũ daja. Eropa dehyoagu õpa arĩpũ Josere:

20 —Majigũgãre wejẽdianirã mura sīria waháma. Eropigu ĩgu majigũre, ĩgu pago sãre Israe yebague aĩ dujaaque mũhũ, arĩ werepũ anyu Josere.

21 ĩgu eropa arĩra pũhrũ wahgã, majigũgãre ĩgu pago mera ta Israe yebague aĩ dujaa wapũ.

22 Arquelao Herode magũ ĩgu pagũre gohrotodigu ĩgu árĩcũ pee, Joserpũ Judea yeba árĩgu gũipũ. Eropigu dipaturi ta Goãmũ quẽroque ĩgũre werenemopũ. ĩgũre Judeague dipaturi dujadorebiripũ. ĩgu eropa werera pũhrũ erã Galilea yebague waha wañorã.

23 Iri yebaguere Nazare waĩcũri macague eja árĩñorã erã. Eropa iĩñorã erã Goãmũ yare weremũhtanirã erã gojadiro dopa ta. Õpa arĩ wereyumũriñuma: “‘Cristo Goãmũ beyedigũ Nazare majagu ta ãhrimi,’ arĩrãcoma masa,” arĩ gojamũriñuma iribojegue majarã.

3

Ñu waĩyegu masare wereñumi

Mr 1.1-8; Lc 3.1-9, 15-17; Jn 1.19-28

1 Eropi irisubure Ñu Goãmũ yarãre waĩyeri masũ árĩpũ. Judea yeba masa marirogue ĩgu Goãmũ yare werenũgapũ.

2 Õpa arĩ werepũ masare ĩgu pohro ejarãre.

—Mũa ñero iirare bujawere duhucãque. Ūmaro majagu Goãmũ mũa opũ ĩgu árĩboro merogã duhyaa, arĩ werepũ ĩgu Ñu.

3 Iribojegue majagu Isaia Goãmũ yare weremũhtadigu Ñu eropa waburire õpa arĩ gojayuñumi:

Masa marirogue werenigui gaguiniguigu õpa arĩ buhegũcumĩ ĩgu: “Mari Opũ ĩgu ariburi mare amuro dopa ta ĩgu ariboro core õarã árĩyuque mũa ĩgũre peemorã,” arĩ wereniguigũcumĩ, arĩ gojañumi Isaia.

4 Ihĩ Ñu camello ya gasirire suhri sañagu, waibũgu ya gasirodare tũadiudigu árĩpũ. Eropigu poreroare bamũripũ. Eropárĩcũ nũgu majarã momere bapũ.

5 Jerusalén maca majarã, árĩpehrero Judea yeba árĩrã, dia Jordán waĩcũriya pohro árĩrã sã ĩgũre peerã wañorã.

⁶ Erã eropa pee, erã ñero iirare bujawere, Goãmure irire weretarimuriñorã erã. Erã eropa werecũ peegu dia Jordán waĩcariyague Ñu erãre waĩyepũ.

⁷ Eropigu bajarã fariseo masa, saduceo masa sã ĩgure waĩyedorerã ejacũ ĩagu Ñu werepũ erãre:

—Mũa ñero iiricurã āhraa mũa. “Goãmure gua ñeri dipuwaja moabiricāporo,” arĩrã, ¿mũa yũre waĩyedorerã ahriri?

⁸ ĩgu mũa ñero iira dipuwajare moabiricũ òpa iique mũa. Diaye ta mũa ñeri iirare bujawererã árĩrã, òarire gohrotorã árĩrã, òarire iique mũa.

⁹ Òpa arĩ pepibiricāque: “Abrahã mari ñecu mũaru árĩmũripũ. Eropirã Goãmũ mera òhaa,” arĩ pepibiricāque mũa. Mũare arĩgu tĩaa. Abrahã pãramerã mũa árĩri duhpiburi árĩbeaa. Goãmũ gamegu i utãyeri mera gajirãre iimasimi Abrahã acawererãre. Eropirã Abrahã pãramerã mũa árĩri bu gohra ta āhraa.

¹⁰ Òpa āhraa: Mari masa yucu iro dopa āhraa. Goãmũpu come opagu iro dopa āhrimi. Eropigu ñeri dũcacuri yucure pa cohã, iri nuguri sãre tabetagucumi. Tabetatuhaja, peamegue cóãgucumi ĩgu iri yucure, iri nuguri sãre. Eropa ta iigucumi mũa sãre ĩgure gamebirãre.

¹¹ Yũ pũhrũ yũ tauro turagu arigucumi. Òtariagu āhrimi. ĩgu iro dopa òagu árĩbeaa yũpũ. Eropigu ĩgure pepigu “Yũ tamera bu gohra árĩgu āhraa,” arĩ pepia yũhũ. Mũa ñero iirare bujawerera pũhrũ, yũpũ deco mera waĩyea. Yũ pũhrũ arigupũ yũhũ tauro iigucumi. Espĩritu Santore ogucumi masa mera árĩniguibure. Eropigu peamegue ĩgu ñerire soewearo dopa ta ĩgupũ mũa ñero iirire coegucumi.

¹² Yũ pũhrũ arigu trigo gasirire cóãgu iro dopa āhrimi. Gasirire cóãgu ĩgu sihburu mera árĩpehreri trigo yeri gasirire sũha weami. ĩgu eropa sũha weara pũhrũ trigo gohra yeripũre ĩgu diburĩ wihigue dibugucumi. ĩgu sũha weara gasiripũre ĩgu soegucumi. Òpa ii beyegucumi yũ pũhrũ arigupũ. Òarire gohrotonirãpũre ĩgu mera árĩniguicũ iigucumi. Erã ñerire bujawerebirãpũre peamegue yaribiri peamegue cóãgucumi, arĩ werepũ Ñu.

Ñu Jesure waĩyeñumi

Mr 1.9-11; Lc 3.21-22

¹³ Pũhrũ Jesu Galileague árĩdigũ wapũ. Jordán waĩcariyague ejapũ Ñure “Yũre waĩyeque,” arĩgu.

¹⁴ Negohraguere Ñu ĩgure waĩyediabiriripũ.

—Cue, m̄p̄u yu tauro turagup̄are yure mu waĩyecũ ðaboaya. Mure waĩyebu árĩbeaa yuh̄u, arĩ yuh̄rip̄u Ñu Jesure.

¹⁵ Jesup̄u yuh̄rip̄u ĩgure:

—Yure waĩyeque. Mari ðpa iirã Goãmu ĩgu dorediro dopa ta iirã iiaa, arĩp̄u Jesu. ĩgu eroparĩcũ peegu,

—Áu, arĩ yuh̄rip̄u Ñu.

¹⁶ Eropa arĩtuhaja Jesure waĩyep̄u. Waĩyetuhajacũ Jesu diague niguidigu majanugajap̄u. ĩgu majanugajacũ ta, umusi ĩgure p̄arima wayoro. Eropigu Goãmu yagu Espĩritu Santo buja iro dopa bejagu ĩgu weca ĩgu dijaricũ ĩap̄u ĩgu basi.

¹⁷ Eropiro umarogue wereniguiro cariyoro:

—Ihĩ yu magu yu mahigu aħrimi. ĩgu mera b̄urigã mucubiria, arĩro cariyoro umaroguere.

4

Watĩ ñerire iidoreriñumi Jesure

Mr 1.12-13; Lc 4.1-13

¹ Eropi Espĩritu Santop̄u Jesure masa marirogue wadorep̄u erogue watĩ ĩgure ñerire iidoreboro dopa.

² Erogue ejagu, cuarenta nuri gohra baro mariro árĩp̄u Jesu. Eropiro p̄uhr̄guere ĩgure oa p̄uriyoro pare.

³ ĩgu oaboacũ ĩagu watĩp̄u ĩgu pohrogue ejagu ðpa arĩp̄u:

—Muh̄u Goãmu magu árĩgu ðpa ĩhmuque. Iyerire ut̄ayerire bari poyacũ iique, arĩrip̄u ĩgu Jesure.

⁴ ĩgu eroparĩcũ peegu Jesu gamebirip̄u. Eropigu Jesu ðpa arĩ yuh̄rip̄u:

—Goãmu yare erã gojarapũ ðpa aħraa: “Masare bari mera dihta ojocaribiro gahmea. Árĩpehreri Goãmu ĩgu ya wereniguiro mera arĩro gahmea,” arĩmi Goãmu, arĩ yuh̄rip̄u Jesu watĩre.

⁵ ĩgu eropa arĩ yuh̄rira p̄uhr̄u watĩp̄u Jerusalén waĩc̄uri macague Jesure aĩgãp̄u. Erogue eja, Goãmu ya wihi wecague Jesure aĩ m̄urijap̄u ĩgu.

⁶ Aĩ m̄urijatuha, ĩgure ðpa arĩrip̄u:

—¿Diaye ta Goãmu magu gohra ta aħriri muh̄u? Goãmu yare erã gojarapũ ðpa aħraa:

“Goãmu ĩgu yarã anyuare mure ĩhadibudoregucumi.

Eropirã erãp̄u mure ĩhadiburãcoma mugue ut̄aye weca mehbejari arĩrã,” arãa ĩgu gojarapũ.

Erã mure eropa ĩhadibumorã árĩcũ muh̄u Goãmu magu ta árĩgu ðgue buhrima dija ĩhmuque yure. Mure erã itamucũ ĩhmuñata yure, arĩrip̄u watĩp̄u.

⁷ Īḡu eroparĩcũ peegu gamebiripu Jesu. Ōpa arĩ yũhripu ĩḡure:

—Goãmũ yare erã gojarapũ ōpa arãa: “Goãmũ mũa Opũ ĩḡu arĩrare ‘¿Diaye ta āhriri?’ arĩ masidiarã Goãmũre ii ĩhmudoremaabiricãque,” arãa Goãmũ yare erã gojarapũ, arĩpu Jesu.

⁸ Īḡu eropa arĩ yũhrira pũhrũ umadigũgue utãḡũgue Jesure aĩ mũriapu daja. Irigũ wecague mũri bejaja, árĩpehreri macarire i umũ majare ĩhmupũ Jesure. Erã opari sãre ĩhmupũ.

⁹ Eropa ĩhmũḡu Jesure ōpa arĩpu:

—Yũre mereja, “Mũhũ yũ opũ āhraa,” arĩ umupeoque mũhũ yũre. Mũhũ yũre eropa iicũ mũre árĩpehreri i macarire mũre ogũra, arĩ wereripu watĩ.

¹⁰ Īḡu eroparĩcũ Jesu ōpa arĩ yũhripu daja:

—Satana, waque mũhũ. Ōpa arãa Goãmũ yare erã gojarapũ: “Mũ Opũ Goãmũ dihtare umupeoque. Īḡu ya doreri dihtare iique,” arãa Goãmũ yare erã gojarapũ, arĩpu Jesu watĩre.

¹¹ Īḡu eroparĩcũ peegu watĩ waha wapũ. Īḡu wara pũhrũ anyuapũ eja, Jesure itamuñorã. Īḡure barire oñorã.

Galilea yeba Jesu buhenũgañumi

Mr 1.14-15; Lc 4.14-15

¹² Eropi Ñure peresu erã iicũ peegu, waha wapũ Jesu. Galilea yebague ejarũ.

¹³ Ero árĩri macague Nazaregue waha, tarigã, Capernaum waĩcũri macague ejarũ. Galilea waĩcũri ditaru pohro árĩbũ Capernaum. Iri maca Zabulón yeba pohro, Neftalí yeba pohro árĩbũ Capernaum. Erogue eja arĩpu Jesu.

¹⁴ Eropa ta iipu Jesu iribojegue majagu Goãmũ yare weremũhtadigu Isaia ĩḡu arĩ gojadiro dopa ta. Ōpa arĩ gojajuñumi:

¹⁵ Zabulón yeba pohro, Neftalí yeba pohro, ditaru waro, Jordán waĩcũriya gajipu masegue Galilea yeba āhraa. Iri yeba judio masa árĩbirã ya yeba āhraa.

¹⁶ Ero majarã Goãmũ yare ōaro masibeamã. Eropa masibiriquererã ta ōagũre ĩarãgue masirãcoma. Erãpu Goãmũre ne masibeamã. Eropirã peamegue wamorã ta árĩrimã. Eropigu yujugu erãre Goãmũ yare masicũ iigũcumĩ, arĩ gojañumi Isaia Jesu eraboro coregue.

¹⁷ Erogue árĩḡu Goãmũ yare werenũgarũ Jesu:

—Mũa ñeri iirare bũjawereque. Eropa iirã ōaripũre gohrotoque. Ūmaro majagu Goãmũ árĩpehrerã tauro ĩḡu opũ árĩboro merogã dũhyaa, arĩ werenũgarũ ĩḡu.

Wapicurã wai wejẽrãre ïgu mera majarã árĩmorãre sihuñumi Jesu

Mr 1.16-20; Lc 5.1-11

¹⁸ Eropi Galilea waĩcũri ditaru tũrogue ejagu, Simore, ïgu pagu magu Andre mera bocajapu Jesu. Simo ta Pedro erã arĩ piyugu arĩpu. Erã wai wejẽri masa árĩñorã. Erã ya wejẽri yucure mehyurã iĩñorã iri ditaru wũari ditarugue.

¹⁹ Erãre boca õpa arĩpu Jesu:

—Yu mera majarã árĩmorã arique mua. Yu mera mua aricũ waire ñeha gameneorã mua árĩro dopa ta, Goãmũ yarã árĩmorãre masare sihu gameneomorã arĩcũ iigura mũare. Yu mera mua aricũ eropa iimorãre amugura mũare. Eropirã yũ mera arique, arĩpu ïgu erãre.

²⁰ Eropa ïgu arĩcũ peerã ta erã ya wejẽdi yucure apicãa, Jesu mera waha wañorã.

²¹ Eropirã erã Jesu mera tarigã, Santiagore ïgu pagu magu Ñu sãre bocañañorã daja. Erã Zebedeo porã árĩñorã. Erã yaru dohodirugue erã pagu mera erã sã erã ya wejẽdi yucure amurã iĩñorã. Erã perãre ïgu sihubeopũ.

²² ïgu eropa sihubeocũ pee, erãpu erã pagure, dohodiru sãre api Jesu mera waha wañorã.

Bajarã masare buheñumi Jesu

Lc 6.17-19

²³ Eropi arĩpehrerogue Galilea yebare Jesu buhe curipu. Judio masa gũa buheri wirigue õari buherire, umaro majagu ïgu opu arĩricũrre buherũ. Eropigu dorecũrãre õarã iigu arĩpehreri dorecũrre cõãpu ïgu.

²⁴ ïgu eropa iicũ peerã Siria yeba majarã arĩpehrerogue iri yeba arĩrã ïgure masinũgañorã. Eropa masirã, gajiropa arĩri dore oparãre, watẽa ñajasũnirãre, pũriri dorecũrãre, sũriri mũra dorecũrãre, dupu turabirã sãre aĩ eñañorã Jesu pohrogue. Eropigu arĩpehrerãre erãre õarã wacũ iipu Jesu.

²⁵ ïgu eropa iicũ ïarã, Galilea yeba majarã Decapoli yeba majarã, Jerusalén majarã, Judea yeba majarã, Jordán waĩcũriya gajipu masepu majarã, bajarã masa ïgu mera wañorã.

5

Utãgugue mũria, ero buheñumi Jesu masare

¹ Masa bajarã ïgu pohro erã ejacũ ïagu Jesu utãgugue mũriaru. Mũrija, ero doajaru. Ero ïgu doacũ ïgu buherã ïgu pohrogue eñañorã.

² Erã ejacũ ïagu õpa arĩ buhenũgaru:

Ōpa árĩrã àhřima mucubirĩrã, arĩ buheñumi Jesu

Lc 6.20-23

³ —Erã ñerire bujawererã, Goãmure gamerã mucubirĩrã àhřima. Ŭmaro majagu erã opu árĩroguere warãcoma erã. Ŭmaro maja erã ya àhřaa. Eropirã buřigã mucubirĩrãcoma.

⁴ “Orerã sã mucubirĩrã àhřima. Erãre mucubiricũ iimi mari Pagũ. Eropirã mucubirĩrã árĩrãcoma.

⁵ “Gajirãre tarinugadiabirã eropa árĩca arĩbirã mucubirĩrã àhřima. Goãmũ “Ogũra,” ĩgu arĩrare oparãcoma. Eropirã erã sã mucubirĩrã árĩrãcoma.

⁶ “Goãmũ ĩgu dorero dopa iidiarã, ðarire iidiarã mucubirĩrã àhřima. Goãmũ ĩgu itamucũ erã ðarire ii ojo-gorocurãcoma. Eropirã mucubirĩrã árĩrãcoma.

⁷ “Gajirãre mojomoro ĩarã mucubirĩrã àhřima. Erã eropa mojomoro ĩacũ Goãmũ erã sãre mojomoro ĩagucumi. Eropirã mucubirĩrãcoma.

⁸ “Erã ñerire cóãñirã, mucubirĩrã àhřima erã. Goãmure ĩarãcoma erã. Eropirã mucubirĩrãcoma.

⁹ “Gajirãre gamequeacũ bosarã mucubirĩrã àhřima. Erãre “Yũ porã àhřima,” arĩgucumi Goãmũ. Eropirã mucubirĩrãcoma.

¹⁰ “Goãmũ dorerire erã iira waja gajirã mera ñero tarinirãpu ũmaro majagu erã opu árĩroguere ĩgu yare oparãcoma erã. Eropirã mucubirĩrãcoma.

¹¹ “Yahare mũa iira waja gajirã mũare erã turiquerecũ ta mucubirĩrã àhřaa mũa. Mũare erã ñero iicũ mucubirĩrã àhřaa mũa. Yaharã mũa árĩri waja mũare arĩpehreri ñeri quere goroweoquerecũ ta mucubirĩrã àhřaa mũa.

¹² Goãmũ yare weremuhtanirãre mũa core arĩñirãre erãguere ta ñero iimuhtañuma. Mũa sãre erãre iidiro dopa iicũ mucubirique. Ōaro sĩporãcũque. Eropigu ũmarogue mũa ejacũ wũaro ðaro iigucumi mũare Goãmũ. Eropirã mucubirique mũa, arĩ wereru Jesu.

Moa iro dopa, boyoro iro dopa àhřima Jesu yarã, arĩ buheñumi

Mr 9.50; Lc 14.34-35

¹³ Eropi Jesu buhenemopũ:

—Moa waibũgu dihire iri ñero wabiricũ iiro dopa ta mũaru yaharãpu arĩpehrerã gajirãre ñerire erã iidibiricũ iiaa. Moa ñeri wacũ dipaturi ðari iimasiya mara. Iri moa ne ðabeaa. Iri eropa wacũ iri moare cóãcãro gahmea. Irire cóãra puhrũ weca ejama. Ne duhpiburi arĩbeaa iri erã cóãra. Iri duhpiburi arĩbiro dopa ta arĩbiricãque mũa. Goãmũ yapũre iiniguicãque, arĩ wereru Jesu.

¹⁴ Eropi ĩgu buhenemopũ:

—Boyoro marire ihamasicũ iiro dopa ta mũapũre ya-harãpũre i yeba majarãre Goãmũ yare wererã erãre masicũ iiro gahmea. Utãgu weca árĩri macare duhmasiya mara.

¹⁵ Eropi sihãgodirure masa sihãgorã gajino docague dibubeama. Irure sihãgogũ ɔmarogue duhpomi iri wihi majarã árĩpehrerã erã iaboro dopa.

¹⁶ Eropirã mũa sã mũa Goãmũre mũa umupeorire dibu-biricãque. Ōaro wereque. Eropirã ōarire iique. Mũa eropa iicũ iarã masa erã mari Pagũ ɔmaro majagũre umupeorãcoma. “Īgu turagũ, ōagũ àhrimi,” arĩrãcoma, arĩ werepũ Jesu.

Goãmũ ĩgu dorerire ĩgu gojarare wereñumi Jesu

¹⁷ Eropa arĩtuhaja, erãre werenemopũ:

—Ire mũa masicũ gahmea yũhũ. Goãmũ ĩgu dorerire Moisere ĩgu apirare, ĩgu yare weremũhtanirã erã gojara sãre cóãgu arĩgu iibiribũ. Iri dorerire mũare ōaro were amugũ arĩgu iibũ. Goãmũ yare erã werediro dopa ta iigu aribũ.

¹⁸ Diaye ta mũare arĩgu iiaa. I yeba ɔmaro árĩropẽ ta ĩgu doreri sã árĩroca. Goãmũ ĩgu dorerare iipehogucumi.

¹⁹ Eropirã iri dorerire yujurãyeri tarinũgarã, gajirãre eropa ta iidorerã bu árĩrã árĩrãcoma. Ʋmaro majagũ opũ ĩgu árĩroque bu árĩrã iro dopa árĩrãcoma. Yujuñe doreriñe árĩquerecũ ta erã tarinũgarã bu árĩrã iro dopa árĩrãcoma erã. Gajirãpũ ĩgu dorerire ōaro iirã, gajirãre erã iiro dopa iidorerã ɔmaro majagũ ĩgu opũ árĩroque oparã iro dopa árĩrãcoma erã.

²⁰ Mũare arĩgu tiiaa yũhũ. Masare buherã, fariseo masa sã Goãmũ gamerire queoro iibeama. Erã tauro Goãmũ gamerire iique mũa. Mũa eropa iibirã, ĩgu opũ árĩroguere ne ejasome mũa, arĩ werepũ Jesu.

Papũrĩre wereniguirire wereñumi Jesu

Lc 12.57-59

²¹ Eropa arĩtuhaja erãre werenemopũ:

—Iribojegue majarã ōpa arĩ wererare ta peenirã árĩribũ mũa: “Masare wejẽbiricãque. Masare wejẽdigũ erã dipuwaja moabu àhrimi,” erã arĩrare peenirã árĩribũ mũa.

²² I erã werera tauñariro mũapũre werenemogura. Īgu acaweregũ mera papũridigupũ masare wejẽdigũ iro dopa ta àhrimi. Eropigũ erã dipuwaja moabu àhrimi ĩgu sã. Īgu acaweregũre gameturigũ dipuwaja moadorerã pohro erã aĩgãbu ta àhrimi ĩgu sã. “Ñegũ pee masibigũ àhraa mũhũ,” ĩgu acaweregũre arĩgũre peamegue wama guhyataria ĩgũre.

23 “Mña acaweregũ mñare ãgũ ãhaturicũ ãgũ mera amumãhtaque Goãmure serẽboro core. Eropirã Goãmũ wihigue mña Goãmure umupeorã waboro core, waibũgure mña oboro core õpa iique.

24 Goãmure mña oburire duhucãnique dohpa. Mña acaweregũ pohrogue waha, “Dipaturi ãhaturibiricãrã. Irire iripẽta duhurã,” irire arĩque ãgure. Mña eropa amura pũhrũ Goãmure umupeorã waque daja ãgũ ya wihigue.

25 “Gajigũ mñare weresãdiagũ, dipuwaja moadoreri wihigue mñare ãgũ aãgãdiacũ, ãgũ mera guaro mariro árĩque. Dipuwaja moadoregũ pohrogue ãgũ aã ejaboro core ãgũ mera õaro ahmu werenigũique. Mña eropa iicũ ãagũ mñare weresãbiribocumi. Mña eropa iibiricũ eroguerẽ mñare aã ejacũ ãgũrũ dipuwaja moadoregure weresãgũcumi. ãgũ eropa weresãcũ, beyegũrũ peresu iirãguere mñare ogũcumi. Eropirã erã mñare peresu iirãcoma.

26 Erogue árĩniguirãca mña. Ne erã wajayedorerare mña wajayephocãgue wirirãca mña, arĩ werepũ Jesu.

Gajigũ marapo mera ñero iirire wereñumi Jesu

27 Õpa arĩ werenemopũ Jesu:

—Iribojegue majarã õpa erã arĩ wererare peenirã árĩribũ mña. “Gajigũ marapo mera ñero iibiricãque,” erã arĩrere peenirã árĩribũ mña.

28 I erã werera tauñariro mñare ipure werenemogura: Nomeore ñeabiriqueregũ ta yujugũ igo mera árĩdiagũ igore ñero ãaribejagũ ñero guña pepigũ ñero iituhami igo mera.

29 “Eropirã mña cuiru diayepũ árĩdiru mera ñero iirã irirure mña gorawea cóãbodiropã dopa ta iri ñerire duhucãque. Irire duhubirã peamegue warãca. Mña cuirure cóãcũ iri cuiru dihta dederea. Mña ñerire duhubirãpũ peamegue waha ñetariaro tarirãca. Eropirã iri ñerire duhucãque.

30 Eropirã mña mojoto diayepũ maja mojoto mera ñero iirã iri mojtore tabeta cóãbodiropã dopa ta iri ñerire duhucãque. Irire duhubirã peamegue warãca. Mña mojtore mña cóãcũ iri mojoto dihta dederea. Mña ñerire duhubirãpũ peamegue waha ñetariaro tarirãca. Eropirã iri ñerire duhucãque, arĩ werepũ Jesu.

Erã marasã nomere cóãrere wereñumi Jesu

Mt 19.9; Mr 10.11-12; Lc 16.18

31 Õpa arĩ werenemopũ Jesu:

—Iribojegue i sãre arĩñuma: “Ígũ marapore cóãdiagu ígũ cóãburire wereripũ mera igore cóãmasimi,” arĩñuma iribojeguere.

³² I erã werera tauñariro mũapũre ire weregũra: Yu-jugũ ígũ marapo mũmũ mera ñero iibiriquerecũ ta igore cóãbocumi. Ígũ eropa cóãdigo gajigũ mera marapũcũgo ñero iigo iicumo gajigũ mera árigo. Eropigũ igo marapũ igore cóãdigũ igore gajigũ mera ñero iicũ iimi. Eropigũ ígũ cóãdigo mera marapocũgu igo mera ñero iigu iimi ígũ sã, arĩ werepũ Jesu.

Waĩpeo arĩrare wereñumi Jesu

³³ Ōpa arĩ werenemopũ Jesu:

—Iribojegue majarãre erã ōpa arĩ wererare peenirã árĩribũ mũa: “Mũa arĩdiro dopa ta eropa iique. ‘Goãmũ mera diaye ta eropa iigũra,’ mũa arĩdiro dopa ta iique,” erã arĩ wererare peenirã árĩribũ mũa.

³⁴ I erã werera tauñariro mũare weregũra. “Ūmaro mera diaye ta arĩgũ iiaa,” arĩ mũmaro mera arĩ waĩpeo arĩbircãque. Ūmaropũ mari Opũ ígũ árĩro āhraa. Bu árĩro árĩbeaa. Ero eropa árĩro árĩcũ iarã eropa arĩmaabircãque.

³⁵ I yeba mera ne waĩpeo arĩbircãque. I yeba sã Goãmũ ya yeba ta āhraa. Ero eropa árĩro árĩcũ iarã eropa arĩmaabircãque. Jerusalén mera ne waĩpeobircãque. Turagũ mari Opũ ya maca āhraa Jerusalén. Bu árĩro árĩbeaa. Eropirã eropa arĩmaabircãque.

³⁶ “Yũ dipuru mera diaye arĩgũ iiaa,” arĩ waĩpeobircãque. Mũa poari borecũ iimasibea mũa. Iri ñiri wacũ sãre iimasibea mũa. Eropa iimasibirã árĩrã “Yũ dipuru mera diaye arĩgũ iiaa,” arĩ waĩpeobircãque.

³⁷ “Iirãra,” arĩrã waĩpeoro mariro diaye ta irire arĩniguicãque. “Iisome,” arĩrã sã waĩpeoro mariro arĩniguicãque. Mũa waĩpeo arĩrã watĩ ñegũ ígũ dorero dopa ta iirã iica, arĩ werepũ Jesu.

Erã basi gamediarire wereñumi Jesu

Lc 6.29-30

³⁸ Ōpa arĩ werenemopũ daja Jesu:

—Iribojegue ōpa erã arĩ wererare peenirã árĩribũ mũa. “Mũre gajigũ mũ cuirure ígũ patĩadiro dopa ta mũ sã ígũre patĩa gameque. Mũ gũcũrirure ígũ panuadiro dopa ta mũ sã ígũre ígũ gũcũrirure panua gameque,” erã arĩ wererare peenirã árĩribũ mũa.

39 Erã werera tauñariro weregura daja mũare. Mũare ñero iidigũre eropa ñacãque. Yujupũ mũ wayuporãre pacũ, “Gajipũ sãre padiagu paque,” arĩque ñgũre.

40 Gajigũ mũre dipuwaja moagũre ñgũ weresãcũ, ñgũ dipuwaja moagupũ mũhũ camisa mera mũre weresãdigũre wajayedorebocumi. Ñgũ eropa wajayedorecũ ñgũre oque. Iriñere otuhaja mũ weca majañe suhriro sãre onemoque ñgũre.

41 Yujugũ surara gajinore yuju kilómetro mũre aĩgãbasadorecũ, gaji kilómetro aĩgãnemobasaque daja ñgũre.

42 Mũre serẽdigũre ñgũ serẽropẽ ta oque ñgũre. Eropigũ gajigũ mũre wayudorecũ wayuque ñgũre ñgũ wayudorerare, arĩ werepũ Jesu.

Mũare ñhaturirãre mahique, arĩ wereñumi Jesu

Lc 6.27-28, 32-36

43 Ōpa arĩ werenemopũ daja Jesu:

—Masa ōpa arĩmũrima: “Mũa mera majarãre mahique. Eropirã mũare ñhaturirãpũre ñhaturi gameque daja,” erã arĩrare peenirã árĩribũ mũa.

44 Erã werera tauñariro weregura mũare daja: Mũare ñhaturirãre mahi umupeoque. Mũare ñero iirãre ōaro árĩdoreque. Mũare ñhaturirãre ōaro iique. Eropirã mũare ñero wereniguirãre mũare ñero iirã sãre “Erã sã ōaro árĩporo,” arĩrã Goãmũre serẽbasaque.

45 Mũa eropa iirã mari Pagũ mũmaro majagũ Goãmũ porã ãhraa mũa. Goãmupũ yujuropa ta iimi masare. Ñerãre, ōarã sãre abere asicũ iimi ñgũ. Eropigũ Goãmũ ñgũ dorerire iirã sãre, iibirã sãre deco merecũ iimi ñgũ. Masare yujuropa ñgũ iiro dopa ta mũa sã masare iique.

46 Mũare umupeorã dihtare mũa umupeocũ ne duhpiburi árĩbeaa iri. Ñerã masa wajasea corerã sã eropa ta iima. Eropirã árĩpehrerãre umupeoque.

47 Mũa acawererã dihtare mũa ōaro bocatĩricũ ne duhpiburi árĩbeaa iri. Goãmũre masibirã sã eropa ta iima. Eropirã árĩpehrerãre ōaro bocatĩrique.

48 Ñeri marirã árĩque mũa. Mari Pagũ mũmaro majagũ ñgũ ñeri marigũ ñgũ árĩdiro dopa ta mũa sã ñeri marirã árĩque, arĩ werepũ Jesu.

6

Ōari iirire wereñumi Jesu

¹ Dipaturi ñgũ werenemopũ:

—Goãmũ ya árĩburire òarire iirã árĩrã, “Goãmũ yare iipehorã àhraa gũa,” arĩ werebircãque gajirãre. Mũa eropa arĩ wererã mũa òaro iira ne duhpiburi árĩbeaa. Eropigu Goãmũ umaro majagu òarire mũa iira wajare mũare osome.

² “Eropirã mojomorocũrãre itamurã, irire masare ii ìhmubircãque. Masa erã ìabiro itamuque erãre. Gajirã iro dopa iibircãque. Erã masa bajarã watope mojomorocũrãre itamura. Mague niguirã watope mari buheri wirigue árĩrã watope sãre ii ìhmuma. Erã eropa iiquererã erã mari pũrũpũre ñero iicorerã àhrima. Eropa masa watope òarire ii ìhmurã erã, “Òarã àhrima erã,” masare arĩdorerã iima. Erã eropa iirã masa umupeori mera wajatatuhama. Eropigu Goãmũrũ ne wajayesome erãre.

³ Eropirã mojomorocũrãre itamurã, irire yayarogã iique. Mũa wapi mera árĩquererã ta ìgu ìabiro irire iique.

⁴ Masa erã ìabirogue mojomorocũrãre itamuque. Masa ìabirogue mũa itamuquerecũ Goãmũrũ ìhami. Eropigu mari Pagũrũ mũare wajayegũcumi, arĩ werepũ Jesu.

Goãmũre serẽriñere buheñumi Jesu

Lc 11.2-4

⁵ Dipaturi ìgu werenemopũ:

—Goãmũre serẽrã, mari pũrũpũ ñero iicorerã iiro dopa iibircãque mũa. Erã mari buheri wirigue nigui, mague sãre nigui, Goãmũre serẽ ìhmuma erã masare. Eropa serẽ ìhmurã diaye masa erãre umupeori mera erã mucubirituhama. Eropigu Goãmũ erãpũre umupeosome.

⁶ Mũarũ Goãmũre serẽmorã mũa ya taribugue biha ñajaque. Biha ñaja mari Pagũ ìasũya marigũre serẽque. Mũa eropa iicũ masa erã ìabiro árĩquerecũ ta mari Pagũrũ mũare ìagũcumi. Eropa peegu mũare òaro iigũcumi ìgu.

⁷ “Eropirã Goãmũre serẽrã, pepiro mariro mũa serẽrare ta dipaturi serẽ maji dujabircãque. Eropa ta iima Goãmũre masibirã. “Bajasuburi yuju disiro ta gũa serẽcũ gũare peegũcumi,” arĩ pepima erã.

⁸ Erã iiro dopa iibircãque. Mũa serẽboro core mari Pagũ mũa gamerire masituhami.

⁹ Eropirã òpa arĩ serẽro gahmea Goãmũre. Gũa Pagũ umaro majagu mũ òagu árĩrĩre árĩpehrerã umupeoporo.

¹⁰ Dohpaguere árĩpehrerã weca opũ árĩque. Ùmaroguere mũ dorero dopa ta erã iiro dopa ta i yeba majarã sã eropa iiporo.

¹¹ Eropigu umuri nũcũ gũa baburire oniguicãque gũare.

¹² Gajirã gũare erã ñero iirare gũa cãdijiro dopa ta mũ sã gũa ñero iirare cãdijique.

13 Eropigu gua ñero iiborare cãhmotaque. Eropigu guare ñerire iibiricãcũ iique. Mũhu gua Opu turagu eropa árĩniguigũca. Árĩpehrerã mure eropa umupeonigu-icãrãcoma, arĩ serẽque Goãmure, arĩ werepũ Jesu.

14 “Gajirãre mũare erã ñero iirare mũa cãdijicũ ñagu, mari Pagu umaro majagu mũa ñero iira sãre cãdijigucumi.

15 Gajirã mũare erã ñero iirare mũa cãdijibiricũ mari Pagu mũa ñero iira sãre cãdijisome, arĩ werepũ Jesu.

Goãmure umupeomorã ba duhurire buheñumi Jesu

16 Eropigu ñgu erãre werenemopũ:

—Goãmure umupeomorã ba duhurã bujawererã iro dopa ii ñmubiricãque. Eropa iima mari purũpũ ñero iicorerã. Erã erã diaporire bujawererã iro dopa ãhrima. Erã eropãricũ erã ba duhucũ ñha masima masa. Diaye ta mũare arĩgu iiaa. Masa erãre umupeocũ gahmema erã. Eropirã erãre umupeocũ ñarã mucubirituhama. Eropigu Goãmũpũ erãre õaro iisome. Eropirã erã iiro dopa ii ñmubiricãque mũa.

17 Mũa sã ba duhurã mũa árĩniguiro dopa ta árĩque. Mũa ya dipure yũ mera sũcã õaro wũapocãque. Mũa diapori sãre coecãque.

18 Mũa eropa iicũ mũa ba duhucũ ñha masisome masapũ. Goãmũ dihta ñha masigucumi. Mũa seyaro mũa árĩcũ ñgũpũ mũa mera ãhrimi. Eropa ñagu ñgu mũare õaro iigucumi, arĩ werepũ Jesu.

ũmaro majare guñadoreñumi Jesu

Lc 12.33-34

19 Jesu werenemopũ daja:

—I yeba majare aĩ gameneobiricãque. Õ maja boa waboca. Iri boabiricũ yajari masũ aĩbocumi irire. Ñgu yajabiricũ mega tũabocomã. Eropiro i yeba maja dederema guhya ãhraa. Eropirã i yeba majare bũrigã gamebiricãque.

20 ũmaro majapũre turaro gameque mũa. ũmaro majare mega tũamasibeama. Eroguẽ mũa opaburi ne boabeaa. Eroguere yajari masũ ne aĩmasibeamĩ.

21 Eroguẽ mũa opaburi iri árĩcũ, umaro majare Goãmũ yare bũrigã guñarãca mũa, arĩ werepũ Jesu.

Masa erã pepiro dopa ta iima, arĩ wereñumi Jesu

Lc 11.34-36

22 Eropi buhegu õpa arĩ werenemopũ erãre:

—Mũa cuiiri mũa dũpũre sihãgodiru iro dopa ta ãhraa, arĩ werediãcũ õpa ãhraa. Mũa pepiro dopa ta iiaa. Mũa õaro mera pepirã árĩrã õarire iiaa.

²³ Mũa ñerire pepirã árĩrã ñeri dihtare i mũa. Ũmaro majare mega tuamiaa. Eropirã mũa ñeri dihtare mũa pepiniguicãcũ iri ñeripũ ñetariari áhraa, arĩ werepũ Jesu.

Niyerure gamerã, Goãmũpũre gamebeama, arĩ wereñumi Jesu

Lc 16.13

²⁴ Eropigu ĩgu erãre werenemopũ:

—Yujugu Goãmũpũre guñagu niyerupũre guñabeami. Niyerupũre burigã guñagu Goãmũpũre guñabeami. Eropigu niyeru dihtare gamegu árĩgu Goãmũre mucubiricũ iibeami. Goãmũ sãre niyeru sãre peñere gametarimaja masiya mara mũare, arĩ werepũ Jesu.

Goãmũ ĩgu porãre ĩhadibumi, arĩ wereñumi Jesu

Lc 12.22-31

²⁵ Eropigu erãre werenemopũ:

—Eropigu mũare ire arĩgu iiaa. Mũa árĩricũre mũa barire, ihririre, suhri sãre wũaro guñaricũbiricãque. Mũa deyoro moagu bari dihtare bamorãre, suhri sañamorã dihtare Goãmũ iibiripũ mũare. Mũa iri dihtare guñacũ gamebeami.

²⁶ Mirimagũ porãre Goãmũ ĩgu ĩhadiburire masique mũa. Erã poeri moorã áhriima. Eropiro erã bari dihburu wiri erãre mara. Mari Pagupũ erãre erã baburire ohomi. Mirimagũ porã tauro mũapũre mahimi Goãmũ. Eropigu mũa sãre ĩhadibugũcumi ĩgu.

²⁷ Wũaro mũa pepiri mera iri mũare pagarã wacũ iibea. Eropiro mũa wũaro pepiri duhpiburi árĩbea.

²⁸ “¿Eropirã duhpĩrã mũa suhri sañaburire wũaro guña bujawere pepicãri? Nũgu maja gori iri gorire pepique. Iri gori ne iiro mariro õari goricũ. Iri gori õari suhri iro dopa õari gori dehyoaa.

²⁹ Salomo opũ mũrũ õari suhri opagu ĩgu árĩquerecũ ta iri goripũ ĩgu ya suhri tauro õari gori áhraa.

³⁰ Iri gorire õari gori iimi Goãmũpũ. Iri gori bajamenũrigã árĩra pũhrũ ñaidija pehrea wahaa. Mero áhri, gajinũ peamegue soe cóacãma. Iri eropa mata pehrequerecũ ta iri gori iri õari gori árĩcũ iimi Goãmũ. Eropigu Goãmũ iri gorire ĩgu õari gori ĩgu iidiro tauro mũa sãre õaro iigũcumi. Suhrire ogũcumi. Goãmũre daberogã umupeoa mũa.

³¹ Eropirã mũa baburire, mũa ihriburire, mũa suhri sañaburire wũaro guñabiricãque.

³² Goãmũre masibirãpũ irire eropa amaniguicãma. Mari Pagũ umaro majagu árĩpehreri mũa gamerire masimi. ĩgu eropa masicũ mũa ya árĩburire wũaro guñabiricãque.

³³ Goãmũ mua Opũ ïgũ árĩborore gamemũtaque mua. Mua eropa iira pũhrũ Goãmũpũ mua gameri duhyacũ ogucumi.

³⁴ Eropirã ñamigãre mua dohpa warocuri arĩ wũaro bujawere ne pepibiricãque. Dohpagãre mua ñero tariboro árĩtuhaa. Eropirã dohpagã maja dihtare pepique. Gajinũ majare wũaro bujawere pepinembiricãque. Goãmũpũ mũare itamugucumi, arĩ werepũ Jesu.

7

Gajirãre “Ñerã ãhrima,” arĩbiricãque, arĩ wereñumi Jesu

Lc 6.37-38, 41-42

¹ Eropigũ ïgũ erãre werenemopũ:

—Gajirãre “Ñerã ãhrima,” arĩ erã iirare werewũabiricãque mua. Mua eropa arĩ werewũabiricũ Goãmũ mua sãre “Ñerã ãhrima,” arĩsome.

² Gajirãre “Ōaro iibeama,” mua arĩ pepidiro dopa ta Goãmũpũ mua sãre eropa ta arĩ ïagucumi. Mua gajirãre beyero dopa Goãmũpũ mua sãre eropa ta beyegucumi.

³ Mari werenigui queori mera buhecũ õpa iirã ãhraa mua. Mua acaweregũ ïgũ cuirugue miri pogañegã mehñajacũ iri pogañegãre õaro ïhaa mua. Mua ya cuiripũre wũarimiji árĩquerecũ ta irimijire ne pepibeaa mua. Eropirã gajigũre miri pogañegãre mua ïaro dopa ta mua acaweregũ ïgũ ñero iiripũre õaro ïhaa mua. Mua basi turaro ñerire iiquererã ta irire eropa pepicãa mua. ¿Dohpa árĩronore eropa ãhriri mua?

⁴ Ōpa arĩ wereniguia mua acawererãre: “Acaweregũ, ñerire iigũ iica mũhũ. Eropigũ irire duhucãque,” arĩ wereniguia mua. Eropa ïgũre ñerire iidorebiriquererã mua sã ñerire duhubeaa. ¿Duhpirã irire ñerire iinirã árĩquererã ta irire pee masibeari mua?

⁵ Eropa iirã masa erã pũrupũre ñero iicorerã ãhraa mua. Mua ñero iiripũre duhumũtaque. Mua eropa iira pũhrũ mua acawererãre “Mua ñero iirire duhucãque,” arĩ weremasia mua.

⁶ Diayea iro dopa árĩrãre ñetariarãre Goãmũ ya õatariarire erã umupeobirire werebiricãque erãre. “Erãgue ñero wereya ñero arĩri,” arĩrã werebiricãque erãre, arĩ werepũ Jesu.

Mari Pagũre mari serẽre wereñumi Jesu

Lc 11.9-13; 6.31

⁷ Eropigũ ïgũ erãre werenemopũ:

—Goãmure mari Pagure serêque mua. Mua eropa serêrã mua aĩrãca. Mua serêrire bocarãca. Goãmure eropa serêniguicãque mua. Mua eropa iicũ ãgu mũare ogucumi.

⁸ Árípehrerã Goãmure serêrã aĩrãcoma. Eropirã erã serêrare bocarãcoma. Eropigu árípehrerã Goãmure eropa serêniguicãrãre ãgu erãre ogucumi.

⁹ “¿Mua porã barire mũare serêcũ utãyepure obocuri mua erãre? Obiriboya.

¹⁰ ¿Mua porã waire mũare serêcũ añapure obocuri mua erãre? Obiriboya mua.

¹¹ Mua ñerã áríquererã ta mua porãre ðarire omasia mua. Eropigu mari Pagu mua tauro ðarire ohomi mũare ãgu porãre ãgure mua serêrire.

¹² “Gajirã mũare ðaro iicũ gahmea mua. Erãre mua ðaro iicũ gamero dopa ta ðaro iique erã sãre. Erã ðaro iibiriquerecũ ta mũarũ erãre ðaro iique. Eropa ta iidorea Moise dorerigue, Goãmũ yare weremũhtanirã erã gojarague sã, arĩ werepũ Jesu.

Miri disiporogã queorire wereñumi Jesu

Lc 13.24

¹³ Eropigu ãgu queorire werenemopũ erãre ðpa arĩgu:

—Goãmũ pohrogue wadiarã ãgu yare iiro gahmea mũare. Eropirã ãgu yare eropa iimaabiricãro gahmea. Miri disiporogãque mua wadiacũ diasa ãhraa. Eropiro diasa ãhraa Goãmũ pohrogue mua wadiacũ. Peamegue masa erã wacũ diasabeaa. Wũari disiporogue mari ñajacũ diasabeaa. Iri disiporogue ta masa erã ñajaboro dopa ta peamegue masa erã wacũ diasabeaa. Eropirã masa bajarã erogue warã iima.

¹⁴ Goãmũ pohrogue wadiacũ diasa ãhraa. Bajamerãgã masa erogue warãcoma. Erogue warã mũuri mũcũ Goãmũ mera árniguirãcoma, arĩ werepũ Jesu.

Yucũgu dũcare masirã dipagũ sãre masiro dopa ta masa erã iirire ãarã erã árnícũrre masia mari, arĩ wereñumi Jesu

Lc 6.43-44

¹⁵ Eropigu ãgu werenemopũ erãre:

—Õaro pee masique. “Goãmũ yare weremũhtarã ãhraa,” arĩ gũyarãre pebiricãque mua. Erã ðarire iirã iro dopa aririma mua pohrogue. Erã pepirigue ñerã áhrima erã.

¹⁶ Erã ñero iicũ ãarã ñerã erã árnícũ masirãca mua. Erã ðaro iicũ ãarã, ðarã erã árnícũ masirãca mua. Aña poragu dipãtõrre dũcacũbeaa. Poracũdigũ sã higuera dipure dũcacũbeaa.

¹⁷ Õadigũ yucũgu ðarire dũcacũ. Ñedigũpũ ñerire dũcacũ.

18 Yucugũ ðadigũ ñerire ne ducacumasibirica. Eropiro ñedigũ sã ðarire ducacumasibirica.

19 Õarire ducacubiriri yucure pa cóãcã, peamegue soecãma. Eropa ta iigucumi Goãmũ ĩgũ gamerire iibirãre.

20 Eropirã “Goãmũ yare weremuhtarã àhraa,” arĩrã erã gũyacũ ðpa masirãca. Erã iiricũre ĩaque. Erã ðarire iirã árĩcũ ĩha “Goãmũ ya wereniguirã ta àhrima,” arĩ ĩha masirãca. Erã ñerire iirã árĩcũ ĩha “Goãmũ ya wereniguirã árĩbeama. Eropirã gũyarã àhrima,” arĩ ĩha masirãca, arĩ werepũ Jesu.

“Mũare ne masibeaã,” arĩgũca yũhũ bajarã masare, arĩ wereñumi Jesu

Lc 13.25-27

21 Eropigũ ĩgũ erãre werenemopũ:

—Bajarã yure “Yũ tĩgũ,” arĩrã árĩquererã ta umaro majagũ Goãmũ ĩgũ árĩroguere wasome erã. Yũ Pagũ umaro majagũ ĩgũ gamerire iirã dihta ĩgũ opũ árĩroguere warãcoma.

22 Pehrerinũ árĩcũ bajarã masa ðpa arĩrãcoma yure: “Gũa tĩgũ, mũ yare gũa buheabũ. Mũ waĩ mera pũririre, watẽare cóãbũ. Eropirã mũ turari mera baja deyoro moarire iiabũ gũa,” yure arĩrãcoma.

23 Erã eropa arĩquerecũ ðpa arĩ yũhriũca erãre: “Mũare ne masibeaã. Ñerire iirã àhraa mũa. Yũ pohro aribiricãque,” arĩgũca yũhũ erãre. Eropirã Goãmũ gamerire iique yũ pohro aridiarã, arĩ werepũ Jesu.

Pe wihi iira queorire wereñumi Jesu

Lc 6.47-49; Mr 1.22

24 Eropigũ queori mera werepũ Jesu erãre buhegũ:

—Eropi árĩpeherrerã i yũ wereniguirire peenirã yũ dorerire iirã, ðaro pee masigũ wihi iidigũ iro dopa àhrima erã. ĩgũ ãhcãri goberire seha, wihire nugunũgapũ.

25 ĩgũ wihire ĩgũ tuhajara pũhrũ deco buriã ahri, dia miritaria wayoro. Miruñe buriã weãyoro. Eropa waquerecũ ta iri wihi ãhcãro ĩgũ nugura wihi árĩro ne mihrua dijabiriyoro.

26 Eropirã árĩpeherrerã yũ wereniguirire peenirã árĩquererã ta yũ dorerire iibirãpũ pee masibigũ ĩgũ wihi iigu iro dopa àhrima. ĩgũpũ ĩgũ wihire dia tũro maja imiporo weca nugu, ðaro iibiripũ.

27 ĩgũ wihire tuhajara pũhrũ, deco buriã ahri, dia miritaria waha, miruñe buriã weãyoro. Eropa weãro iri wihire weã mehpicãyoro, arĩ werepũ Jesu.

28-29 Īḡu eropa arī buhecũ peerã, peemaria wañorã masa. “Īḡu marire opu Īḡu buhero dopa ta buhemi Īḡu. Marire buherã iro dopa buhebeamí,” arī pepiñorã erã.

8

Jesu camí boagũre ðagũ wacũ iĩñumi
Mr 1.40-45; Lc 5.12-16

¹ Jesu utãḡugue buhe doadigũ dijaa warũ. Īḡu dijacũ ĩarã masa bajarã ĩḡure nũrusiañorã.

² Ero ĩḡu wadiro yujugũ camí boagũ mague ĩḡure nũrusiaja eja, mereja, ĩḡure serẽpũ.

—Gua tĩḡu, mũhu yũre ðagũ iidiagũ iique, arĩpũ.

³ Īḡu eroparĩcũ peegũ ĩḡu mojoto mera Jesu ĩḡure mohmeripũ.

—Áu, mũre ðagũ wacũ iiaa, arĩpũ Jesu ĩḡure.

Īḡu eroparĩcũ ta iri camí boara yarima wayoro.

⁴ Eropa iituhaja Jesu ĩḡure arĩpũ daja:

—Yũhu mũre ðpa iirare ne gajirãre werebircãque. Mũ ya dũpũre ðarare pahire ĩhmugũ waque, “Õaro ãhrimi,” arĩdoregũ. Tuhajanugu Moise dorerire Goãmũ ĩḡu apidiro dopa ta iique. Eropigũ Goãmũ ya wihigue mirimagũre asũ wahgã apique mũ dore tarirare masa árĩpehrerã erã masimaja ðaro, arĩpũ Jesu.

Surara opu ĩḡu pohro majagũ dorecũcũ Jesu ðagũ iĩñumi
ĩḡure

Lc 7.1-10

⁵ Ero pũhrũ Jesu Capernaum waĩcũri macague ĩḡu ejacũ surara opu ĩḡu pohro eja, ĩḡure turaro ðpa arĩ serẽpũ:

⁶ —Gua tĩḡu, yũ pohro majagũ ne bũhari mera dorecũḡu wamasibiriniyagũ, ĩḡure bũrigã pũricũ pepigũ yaha wihigue oyacumi ĩḡu, arĩpũ ĩḡu Jesure.

⁷ Īḡu eroparĩcũ pee:

—Áu, arĩ, ĩḡure ĩḡu dorecũrĩre taugũ wagũra, arĩpũ Jesu.

Īḡu eroparĩcũ ðpa arĩpũ surara opu:

⁸⁻⁹ —Opu, ðaroca. Aribita. Ñegũ ãhraa yũhu. Yaha wihire mũre ñajaridorebuno árĩbeaa yũhu. Yuju diaye ta mũ turari mera dorebeoque. Mũ eropa iicũ yũ pohro majagũ ðagũ wagũcumi. Yũre yũ weca árĩrã gajirã oparã dorema. Yũ sã surarapũre dorea. Yujugũre “Waque,” yũ arĩcũ ĩḡu wahami. Gajĩḡure “Arĩque,” yũ arĩcũ ahrimi. Yũ pohro majagũre “Ire iique,” yũ arĩcũ irire iimi. Eropigũ mũ ĩḡure mũ dorero dopa ta ĩḡu dorecũḡu tarigũcumi, arĩpũ ĩḡu.

¹⁰ Jesu ĩḡu eroparĩcũ pee uca wa bajarã masa ĩḡu mera nurusiarãre õpa arĩpu:

—Diaye ta mũare arĩḡu iiaa. Ihĩ surara opu Israe masu árĩbiriqeregũ Goãmũre bũrigã umupeomi. ĩḡu pohro majagũre yũ õagũ wacũ iiburire masituhami. Ne Israe masare ihĩ iro dopa umupeorãre ĩanibea.

¹¹ Mũare arĩḡu iiaa. Bajarã ihĩ iro dopa árĩrã árĩpehrero majarã umaro majagũ ĩḡu opu árĩrogue eja, erogue árĩrã mera barãcoma. Mũa ñecũ sũmarã mũra Abrahã, Isaa, Jacobo mera barãcoma erã.

¹² Masa gajirãpu “Opu ĩḡu árĩrogue wamorã ãhraa gũa,” erã arĩquerecũ ta ñerogue naitĩarogue cóãgãḡucumi erãre. Erogue ĩḡu cóãnirã bũrigã ore, bũjawereri mera erã ḡucũrire cũridihurãcoma, arĩ werẽpu Jesu.

¹³ Irire eropa arĩtuhaja surara opũre arĩpu:

—Dujaaque mũ ya wihigue. Mũ pohro majagũ tarĩḡucumi. “Diaye ta tarĩḡucumi,” arĩ mũ pepidiro dopa ta tarĩḡucumi, arĩpu Jesu.

Ĩḡu eroparĩcũ ta ĩḡu pohro majagũ pu õha warũ.

Pedro mũñecore dorecũgore tauñumi Jesu

Mr 1.29-31; Lc 4.38-39

¹⁴ Pũhrũ Jesu Pedro ya wihigue eja, Pedro mũñeco dorecũcũ ĩapu ĩḡu. Nimacũri árĩcũ oyapo igo.

¹⁵ Igo eropa dorecũcũ ĩanijaḡu igo mojtore mohmeripũ. ĩḡu eropa mohmeripũ ta nimacũri taria wayoro. Taricũ pepigo igopũ wahḡã, erãre barire ejopo.

Jesu bajarã dorecũrãre tauñumi

Mr 1.32-34; Lc 4.40-41

¹⁶ Eropi ñamicague bajarã watẽa ñajasũnirãre masa aĩ ejañorã Jesu pohrogue. Erã eropa aĩ ejacũ ĩagũ mata ĩḡu watẽare cóãcũ masa õha wañorã. Eropigũ árĩpehrerãre dorecũrãre erã aĩ ejanirãre taupehocãpu Jesu.

¹⁷ Eropa ta ĩpu ĩḡu iribojegue majagũ Goãmũ yare weremũhtadigũ Isaia ĩḡu arĩdiro dopa ta. Õpa arĩ gojañumi: “Mari dorecũrire taucãmi ĩḡu. Marire pũririre cohãmi ĩḡu,” arĩ gojañumi Isaia Jesu ariboro coregue.

Yujurãyeri Jesu mera majarã árĩdiariñuma

Lc 9.57-62

¹⁸ Jesu masa bajarã ĩḡu pohro árĩcũ ĩagũ,

—Wũariya gajipũ masegue ina taribujarã, arĩpu ĩḡu buherãre.

¹⁹ Erã taribujaboro core judio masare buheḡu Jesu pohrogue eja, õpa arĩpu:

—Buheḡu, mũ mera wadiaa noho mũ waro, arĩpu.

²⁰ Jesu õpa arĩ yũhripũ:

—Yũ mera árĩcũ diasa ãhraa. Nũgu majarã diayea erã carĩburi toreri opama. Mirimagũ porã sã erã ya suhri opama. Yũpũre Goãmũ ïgu obeodigũpũre ne yaha wihi mara. Eropirã yũ mera árĩrã ñero tarirãca mũa, arĩ yũhripũ Jesu.

²¹ Eropi gajigũ Jesu buhegu õpa arĩpũ:

—Gũa opũ, yũ pagũ ïgu sĩricũ yaatuhajagũ mũ mera wagũra, arĩpũ ïgu Jesure.

²² Jesu yũhripũ:

—Yũre gamebirã sĩrinirã iro dopa ta ãhrima. Erãpũ sĩrinirãre yaaporo. Eropigũ mũpũ yũ mera majagũ árĩbu arique dohparagã, arĩpũ ïgu.

Jesu miruñere yũsũdoreñumi

Mr 4.35-41; Lc 8.22-25

²³ Eropa arĩtuhaja dohodirugue ñajapũ. Eropirã ïgu buherã sã ïgu mera waha ñajañorã.

²⁴ Ero erã taribujarisubu iriyague miruñe bũrigã ariyoro. Eropiro pãgũri dohodirure miucãriyoro. Eropa miruñe weãquerecũ ta Jesupũ carĩgu iipũ.

²⁵ Eropa wacũ ïarã erã ïgũre wahgũñorã. Wahgũ õpa arĩñorã:

—Opũ, mirimorã iica mari. Miruñere tauque, arĩñorã.

²⁶ Erã eroparĩcũ Jesu yũhripũ:

—¿Duhpirã gũimaacãri mũa? Yũre merogã umupeorã ãhraa mũa, arĩpũ Jesu erãre.

Eropa arĩgu ta wahgãnũgaja miruñere pãgũri sãre “Yũsũque,” arĩpũ. ïgu eroparĩcũ miruñe, pãgũri sã yũsũdijapehrea wayoro.

²⁷ ïgu eropa iicũ ïha uca, õpa arĩ wereniguiñorã erã basi.

—¿Ñehmũno masũ ãhriri ihĩ? I miruñe, pãgũri sã yũhriũgu ãhrimi, arĩñorã erã.

Watẽa ñajasũnirãre tauñumi Jesu

Mr 5.1-20; Lc 8.26-39

²⁸ Erãre eropa wara pũhrũ taribujaja, Gerasa majarã ya yebague ejapũ. Erogue erã ejacũ perã mũa Jesure bocatĩriñorã. Masa goberi watopegue árĩnirã árĩñorã. Erã watẽa ñajasũnirã árĩrã gorowererã gũhyarã árĩñorã. Eropirã erogue masa ne wabiriñorã.

²⁹ ïgũre bocatĩri õpa arĩ gaguiniguiñorã:

—¿Mũhũ Goãmũ magũ duhpibu ahriri mũhũ gũa pohroguere? ¿Gũare Goãmũ dorero ejabiriquerecũ ta dipuwaja moagũ ahriri mũhũ? arĩ gaguiniguiñorã erã watẽa mera.

³⁰ Ero pohro bajarã yesea ahma barã iĩñorã.

³¹ Eräre ïanijarã, watëapũ õpa arĩ burigã serëñorã Jesure: —Guare oã umare cóãgũ soã yesea pohrogue wadoreque guare. Erã mera guare árĩdoreque, arĩ serëñorã erã Jesure.

³² —Áũ, waque, arĩpũ Jesu.

Ïgũ eroparĩcũ watëa perã masa mera árĩnirã waha, yesea pohrogue ejañorã. Eräre ñajacũ ta yesea gorowere, dipaturugue oma buha, wuariyague yuriñaja yuhria, miri sĩripehrea wañorã.

³³ Erã eropa wacũ ïarã yeseare ïhadiburãpũ güi, omagã wañorã. Macague eja yesea erã mirirare were-siripehocãñorã erã. Watëa erã ñajasünirãre Jesu ïgũ cóãra sãre werepehocãñorã erã.

³⁴ Erã eropa weresirira pũhrũ iri maca majarã árĩpehrerã Jesure ïarã ejañorã. Eropirã ïgũre ïara pũhrũ turaro mera wiriadoreñorã ïgũre erã ya yebare.

9

Dũpũ buhadigũre õagũ wacũ iĩñumi Jesu

Mr 2.1-12; Lc 5.17-26

¹ Erã eropa wadorera pũhrũ Jesu dohodirugue ñaja, wuariyague taribujaa, ïgũ ya macague ejaãpũ.

² Erogue gajirã dũpũ buhadigũre pũgũ mera coã aĩ wahgã erañorã Jesu pohro. “Jesu ïre ïgũ dorecũrire taricũ iigũcumi,” arĩ pepiñorã erã. Erã eropa arĩ pepicũ masigu Jesu dorecũgũre õpa arĩpũ:

—Mucubirique mũhũ. Mũ ñero iirare cóãtuhabũ yũhũ, arĩpũ ïgũ.

³ Ïgũ eroparĩcũ peerã yujurãyeri masare buherã õpa arĩ pepiriñorã erã basi: “Ihĩ eropa arĩ ïgũ wereniguiri mera Goãmũre ñero arĩgũ iimi,” arĩ pepiñorã erã buherã.

⁴ Erã eropa arĩ pepicũ masigu, õpa arĩpũ Jesupũ:

—¿Duhpirã eropa arĩ ñero pepiri mũa?

⁵ “Mũ ñero iirare cóãbũ,” yũ arĩcũ “Gũyagu ãhrimi,” arãa mũa masibiriquererã ta. Ïgũre “Wahgãñugajaque. Curique,” yũ arĩcũ yũ arĩra diaye árĩri árĩcũ mata mũa ïha masirãca.

⁶ Yũhũ masũ Goãmũ ïgũ obeodigu i yeba majarã erã ñero iirire cóãmasia yũhũ. Mũa ire masiborore õpa ta ïgũ wahgãñugacũ iigũra, arĩpũ Jesu.

Eropa arĩtuhaja dũpũ buhadigũre õpa arĩpũ:

—Wahgãñugajaque. Mũ pũgũre aĩ, mũ ya wihigue dujaaque, arĩpũ ïgũre.

⁷ Ïgũ eroparĩcũ ta peegu dũpũ buhadigu wahgãñugaja, ïgũ ya wihigue dujaa wapũ.

⁸ Masa ĩġu eropa wacũ ĩarã ġuĩñorã. Eropirã Jesure Goãmu ĩġu turarire opacũ ĩarã Goãmure umupeo, õaro wereniguiñorã.

Jesu Mateore sihuñumi

Mr 2.13-17; Lc 5.27-32

⁹ Erã eropa iira pũru Jesu erogue árĩdigu wiria, yure Mateore bocatĩrimi. Oparã ya árĩburire masare wajasea coreġu árĩribu. Eropigũ irisubure yu mohmeri taribugue doabu. Ero yu doacũ ĩagu, õpa arĩmi yure:

—Yu mera majagu árĩbu arique, arĩmi yure Jesu.

Īgu eroparĩcũ pee, wahġãñugaja ĩgu mera wabu.

¹⁰ Pũru yaha wihigue Jesu sã barã erama. Bajarã wajasea corerã “ñero iirã” erã arĩã ġua mera ta bama.

¹¹ Erã mera ġua bacũ ĩarã, fariseo masa Jesu buherãre õpa arĩma:

—¿Duhpigũ mũare buheġu wajasea corerã ñero iirã mera bahari? arĩma erã ġuare ĩgu buherãre.

¹²⁻¹³ Erã eroparĩcũ peegu Jesupu õpa queori mera yũhrimi:

—Dorecũbirã duhturure amabeama. Dorecũrã dihta duhturure ahmama. Dorecũrã duhturu amaro dopa ta “Ñerã ãhraa,” arĩã yure amarãcoma. Eropigũ “Ñerã ãhraa,” arĩã dihtare erã ñero iirare bujaweredore õaripure gohrotocũ iigu aribu yũu. Erã basi “Õarã ãhraa ġua,” arĩ pepirãre itamugu aribiribu. Goãmu ĩgu arĩrare erã arĩ gojarare masique mũa. “Waimũrãre wejẽ soemujurã yure eropa umupeocũ ne gamebeaa. Gajirãre mũa mojomoro ĩacũpũre ġahmea,” arĩmi Goãmu, arĩ gojañumi. I eropa arĩrire masique mũa. Irire õaro buhenemorã waque, arĩmi Jesu fariseo masare.

Ba duhurire serẽpiñuma Ñu buherã Jesure

Mr 2.18-22; Lc 5.33-39

¹⁴ Pũru Ñu waĩyegu ĩgu buherã ġua pohro eja Jesure serẽpima:

—ġua Ñu buherãpu bajasuburi Goãmu ya árĩburire iirã ba duhua. Fariseo masa sã eropa ta ba duhuma. ¿Duhpirã mũ buherãpu ba duhubeari? arĩma erã Jesure.

¹⁵ Jesu erãre õpa arĩ yũhrimi:

—Õpa ãhraa iri: Mojoto diridigu ĩgu bosenu iicũ ĩgu mera majarã bujawererã ba duhurã árĩbeama. Īgu mera arĩrã mucubiri barã iima. Eropa ta yu buherã sã yu mera arĩrã ba duhumasibeama. Yujunũ yure Goãmu aĩcãġucumi. Eropa ĩgu yure aĩra pũru yu buherã mera árĩsome yũu. Irisubugue ta yu buherã ba duhurãcoma, arĩ yũhrimi Jesu.

16 Erã iribojegue maja buheri mama buheri mera erã peñe buhemorediacũ ãagũ õpa arĩ werenemomi Jesu erãre:

—Ne mama gasiro suhri gasiro mera murañe suhrirore seretu masiya mara. Eropa seretura pũhrũ mama gasiro mari coecũ mura suhriro árĩro yehguea wa daja, tara gameneo, wũatariaro yehgueacũ iiaa. Eropa ta mura buheri mama buheri mera wapi moa buhebircãro gahmea.

17 Eropirã ne igui deco imisĩri decore waibũgũ gasiro ajuro mura ajuro mera diyebircãro gahmea. Eropiicũ igui deco imisĩri pahmura pũhrũ mura ajurore yeguedija wahaa. Iri ajuro yehguecũ igui deco sã, ajuro sã cohmoa wahaa. Eropirã igui deco waibũgũ gasiro mama ajuro mera diyero gahmea. Eropiicũ igui deco pahmuro õaro iri ajuro sãraa. Eropa ta mama buheri mura buheri mera buhebircãro gahmea, arĩ weremi Jesu erãre.

Jairo magore õago ii, behreri opaniguigo sãre õago wacũ iĩñumi Jesu

Mr 5.21-43; Lc 8.40-56

18 Ìgũ eropa arĩ wererisubu gũa judio masa buheri wihi opũ Jesu pohrogue erami. Eraa, mereja, õpa arĩmi:

—Yũ mago negãgue sĩria wahãmo. Iгоре mũ mojtore duhpeogu arique. Mũ eropa iicũ masagocumo, arĩmi ãgũ Jesure.

19 Ìgũ eroparĩcũ peegũ Jesu wahgãnũgaja, ãgũ mera wami. Gũa ãgũ buherã sã ãgũ mera wabũ.

20 Gũa erogue waniguicũ ero nomeo Jesu pũrũpũ eja, ãgũ suhriro ojogorore mohmepiñamo. Doce bojori gohra mũmuri nũcũ behreniguigo árĩpo.

21 Õpa arĩ pepipo igo eropa iigo: “Ìgũ suhriro dihtare mohmepiñago õago dujagoca yũhũ,” arĩ pepipo igo. Eropigo igo mohmepicũ mata igo di wirira purumujuyoro.

22 Igo eropa iicũ masigũ Jesu majinũgaja, igrere arĩmi:

—Mucubirique mũhũ. Mũhũ yũre umupeori mera õago dujaa, arĩmi ãgũ.

Ìgũ eroparĩcũ ta õha wamo igo.

23 Eropa iituhaja Jesu gũa mera opũ ya wihigue ejami sĩridigo pohro. Ñajajagũ bajarã masa i wihigue árĩrã turaro busucũ ãami. Gajirã ñehamere orerãre gaguiniguirãre ãami. Gajirã igogãre yaaboro core tarisu iro dopa árĩrire purirãre ãami.

24 Erã eropa iicũ ãagũ masare õpa arĩmi:

—Wiriaque mũa. Sĩribeamo igo. Carĩgo iimo, arĩmi erãre.

Īgᵐ eroparīcū peerā, “Eroparīcāgᵐ iimi ihī,” arīrā masa īayema īgᵐere.

²⁵ Īgᵐerᵐ erāre disiporogue wiupehocāmi. Tuhajanugu sīridigo pohrogue eja, igo mojtore ñeapᵐ. Īgᵐ eropa ñeañacū ta masa bejaja, wahgānugajapo igo.

²⁶ Īgᵐ eropa iirare peerā, ero majarā masa árīpehrerā masa werewñañorā.

Perā cuiri ĩhajibirāre ĩacū iĩñumi Jesu

²⁷ Ero árīnirā gᵐa Jesu mera wacū, perā cuiri ĩhajibirā īgᵐere piyu nᵐrᵐsiama:

—Opᵐ Davi pārami masare taugᵐ, gᵐare mojomoro ĩaque mᵐhᵐ, arī gaguiniguima erā.

²⁸ Erā eroparīcū Jesu gaji wihigue ñajami. Īgᵐ eropa ñajacū masirā cuiri ĩhajibirā īgᵐ pohrogue ñaja wama. Erā eropa ñajacū ĩagᵐ īgᵐerᵐ erāre serēpimi:

—¿Marire ĩacū iigᵐcumi īgᵐ, arī pepiri mᵐa yᵐre? arīmi īgᵐ.

—Opᵐ, eropa ta arī pepia gᵐa, arī yᵐhrima erā.

²⁹ Erā eropa yᵐhricū ta erā cuirire ñapeomi. Ñapeogᵐ, ōpa arīmi:

—Yᵐre “Eropa iigᵐcumi,” mᵐa arī pepidiro dopa ta eropa ta iigᵐa, arīmi Jesu.

³⁰ Īgᵐ eroparīcū ta erā cuiri ōha wabᵐ. Eropi Jesu ōpa arīmi erāre:

—I yᵐ ōpa iirare gajirāre ne werebircāque, arīrimi Jesu.

³¹ Īgᵐ eropa arīquerecū ta waha, i yeba majarāre weresirindirā árīma īgᵐ eropa iirare erā.

Wereniguimasibigᵐere wereniguicū iĩñumi Jesu

³² Iri wihire erā cuiri ōha wanirā wiriarisubū gohra yu-jugᵐ wereniguimasibigᵐere aĩgārima Jesu pohro masa. Watī īgᵐere ñajasūdīgᵐ īgᵐere wereniguimasibiricū iidi árīmi.

³³ Erā aĩ ejacū ĩagᵐ watīre Jesu cóāmi. Īgᵐ eropa watīre cóācū wereniguimasibiridīgᵐerᵐ wereniguia wami. Īgᵐ eropa iicū ĩarā árīpehrerā ĩhamaria wama.

—Ne i yeba Israe yebaguere ōpa iirāre ĩabirimᵐrabᵐ mari, arī wereniguima masa erā basi.

³⁴ Fariseo masa gajiropa arī wereniguima:

—Watēa opᵐ īgᵐ turari mera watēare cohāmi ihī, arī wereniguima erā.

Masare mojomoro ĩañumi Jesu

³⁵ Eropi árīpehreri macari ero árīri macarire, paga macari sāre buhe curigᵐ wami Jesu gᵐa mera. Ōari buherire erā buheri wirigue buhegᵐ wami īgᵐ. Eropigᵐ

Goãmũ ĩgũ opũ árĩborore weremi. Árĩpehreri dorecũri sãre ero majarãre taumi ĩgũ.

³⁶ Erã masa bajarã ñero tarirã, itamuri moorã, oveja dibuya marirã iro dopa erã árĩcũ ĩapũ Jesu erãre. Eropa ĩagũ Jesu erãre mojomoro ĩami.

³⁷ Eropigũ õpa arĩmi ĩgũ gũare ĩgũ buherãre:

—Ojodũca baja iri buगतुहजაცუ baja árĩcũ mohmeri wũaro ãhraa. Mohmeri masapũ bajamerãgã ãhrima. Eropa ta õari buherire peemorã bajarã árĩcũ wũaro ãhraa mari mohmeri. Iri eropa árĩquerecũ ta mari masare buhemorã bajamerãgã ãhraa.

³⁸ Eropirã õari buherire buhemorãre gajirãre ĩgũ obeomorãre serẽque Goãmũre mũa, arĩmi Jesu gũare.

10

*Jesu doce gohra beyeñumi ĩgũ buhedoregũ obeomorãre
Mr 3.13-19; Lc 6.12-16*

¹ Pũhrũ doce gũare ĩgũ buherãre Jesu sihubeo, turarire omi gũare. Watẽare gũa cóãmasiburire, árĩpehreri dorere gũa taumasiburire omi gũare.

² Õpa waĩcurã árĩbu gũa Jesu ĩgũ apinirã: Simo arĩmi. ĩgũre ta Pedro arĩ piyumi Jesu. Simo pagũ magũ Andre arĩmi. Santiago ĩgũ pagũ magũ Ñu mera arĩmi. Erã pagũ Zebedeo waĩcũmi.

³ Felipe, Bartolomé, Toma, yũhũ Mateo árĩbu gũa. Yũpũ oparã ya árĩburire masare wajaseabasa coredigũ árĩribũ. Gũa mera gajigũ Santiago arĩmi. ĩgũ Alfeo magũ arĩmi. Eropigũ Lebéo sã arĩmi. ĩgũpũ Tadeo erã arĩ piyudigũ arĩmi ĩgũ.

⁴ Simo celote ya curu majagũ, Juda Iscariote sã arĩma. Judapũ Jesure ĩhaturirãre ĩhmubu arĩmi.

*Jesu ĩgũ buherãre buhedoregũ obeoñumi
Mr 6.7-13; Lc 9.1-6*

⁵ Eropi gũare ĩgũ buherãre docere obeogũ, “Õpa iique,” arĩ wereseremi gũare:

—Judio masa árĩbirã pohroguere wabiricãque. Ne Samaria yeba maja macarigue sãre wabiricãque.

⁶ Israe yeba majarã pohroguerpũre waque. Goãmũre maĩbirã ãhrima erã.

⁷ “Õmaro majagũ opũ árĩboro merogã dũhyaa,” arĩ buheque erãre.

⁸ Eropirã camĩ boarãre, gajĩ baja gajiropa arĩri dore oparã sãre õarã wacũ iique. Sĩrinirãre masuque. Watẽa ñajasũnirãre cohã wiuque erã watẽare. Mũare iri turarire

ogũ iiaa. Eropirã mũa sã yũ eropa odirõ dopa ta masare wajasearo mariro õarã wacũ eropa iicãque.

⁹ “Mũa warã ne niyerure aĩbiricãque.

¹⁰ Ne mũa ajure, ne peñe camisare, ne peba zapaturi sãre aĩgãbiricãque. Mũa buheroguere ero majarãpũ mũaare barire oporo.

¹¹ “Iri macariguere ejarã, mũa carĩborore masa õaro umupeogũ pohrogue amaque. Eropirã ãgũ ya wihi ta dujanique. Ne warãque wiriaque iri wihire.

¹² Eropirã wihigue ñajarã “Ãhriri,” arĩque iri wihi majarãre.

¹³ Mũaare erã gamecũ, “Goãmũ mera õaro árĩque mũa,” arĩque erãre. Mũaare erã gamebiricũ, “Goãmũ mera õaro árĩque,” mũa arĩbiricãque erãre.

¹⁴ Eropirã mũaare erã gamebiricũ, erã mũa buherire peedibiricũ ãarã iri wihire wiria waque. Eropa wiriarã, guburi maja nicure moje siripique erã ãaro, erã ya dipuwajare ãhmumorã. Iri maca majarã mũaare gamebiricũ eropa ta iique erã sãre.

¹⁵ Diaye ta mũaare arĩgũ tiiaa. I umũ pehrecãguere Sodoma majarã Gomorra majarã mũa bũrigã dipuwajacũrãcoma. Erã eropa dipuwajacũro tauro mũaare gamebirãpũ dipuwajacũrãcoma. arĩ weremi Jesu guare.

Jesu yarãre gajirã erã ñero iĩborore wereñumi Jesu

Eropa arĩtuha õpa arĩnemomi guare ãgũ buherãre:

¹⁶ —Yũre peeque mũa. Oveja iro dopa árĩrãre mũaare yeea guarã iro dopa ta ñerã árĩrã watopegue obeogũ iiaa. Eropirã mũaapũ õaro pee masirã árĩque. Eropirã gariboro mariro õaro árĩque erã mera.

¹⁷ Õaro iique mũa. Masa mũaare erã oparãre orãcoma mũaare dipuwaja moadorerã. Erã buheri wirigue sãre parãcoma mũaare.

¹⁸ Eropirã mũa yaharã mũa árĩri dipuwaja macari majarã oparã pohrogue erã tauro oparã pohrogue sãre aĩgãrãcoma mũaare dipuwaja moadoremorã. Eropirã mũaare erogue erã aĩgãcũ judio masa árĩbirã oparã sãre õari buherire wererãca mũa.

¹⁹⁻²⁰ Mũaare oparã pohrogue erã aĩgãcũ erãre mũa wereniguiburire wũaro pepibiricãque. Mũaare erã serẽpicũ ta mũa erãre yũhriburire masirãca Goãmũ mera. Eropa masirã mũa irire mũa gamero wereniguisme. Goãmũpũ mari Pagũ ãgũ Espĩritu Santo mera mũaare wereniguicũ iigũcumĩ.

²¹ “Irisubure erã tĩrã erã pagũ porã Jesu yarã árĩcũ ãha wejẽdore wiarãcoma oparãre. Erã pagũ sumarã erã

porã Jesu yarã erã árĩcũ ìha wejẽdore wiarãcoma oparãre. Erã porãpũ erã pagũ sumarã erã Jesu yarã erã árĩcũ ìha wejẽdore wiarãcoma oparãre.

²² Eropirã masa árĩpehrerã yũre mũa umupeora dipuwaja ìhaturirãcoma mũare. Erã mũare erã ñero iiquerecũ ta mũare erã ñero iirare yujuro bojerã yũre duhubiricũ Goãmũ mũare taugũcumi. Eropigũ ìgũ pohrogue mũare opagũcumi.

²³ Yuju maca mũare erã ñero iicũ gaji macague duhri wahgãque. Diaye ta mũare arĩgũ tiiaa. Israe yeba árĩri macarire mũa buhepehoboro core, yũhũ masũ Goãmũ ìgũ obeodigũ i yebague dujarigũra.

²⁴ “Buherã erãre buhegũre masi taribeama. Eropigũ pohro majagũ sã ìgũ opũ weca árĩbeami.

²⁵ Yujugũ buhegũre ìgũre weredigũ iro dopa dujaro gahmemi ìgũ. Pohro majagũ sãre ìgũ opũ iro dopa ta dujami. Mũapũ yũ buherã àhraa. Eropirã yũre iidiro dopa ta mũa sãre iirãcoma. Eropirã yũre “Watĩ Beelzebú àhrimi,” arĩ weresãrã, mũa sãre yaharãre ñero arĩ wereniguirãcoma erã, arĩ weremi Jesu guare.

¿Nihinore gũicũ õhari? arĩ wereñumi Jesu

Lc 12.2-7

²⁶ Eropa arĩra pũhrũ Jesu õpa arĩnemomi guare:

—Eropirã mũare erã ñero iidiarãre gũibiricãque. Masa erã yayasãrare pũhrũ gajirã masirãcoma. Erã dibura sãre gajirã masirãcoma.

²⁷ Eropirã mũare yayarogã yũ wererare bajarã masa watope wereturiaque mũapũ.

²⁸ Mũare wejẽrã mũa dũpũ dihtare wejẽmasima. Mũa sĩporãpũ sĩribeaa. Eropirã mũare wejẽdiarãre gũibiricãque. Goãmũpũre gũique. ìgũ mũa dũpũ mũa sĩporãri sãre peamegue dedeomasimi mũare. Eropirã ìgũpũre gũique.

²⁹ “Perã mirua wajamarima. Erã eropa wajamariquerecũ ta Goãmũ õaro mahi ìhadibumi erãgãre. Goãmũ dorebircũ ne sĩribeami yujugũgã.

³⁰ Eropigũ mũa poarire ne yuju poadagã duhyaro mariro masipehomi Goãmũ. Eropa ta mũa árĩricũri sãre masipehomi Goãmũ. Eropa masigũ mũare ìhadibuniguicãmi.

³¹ Miruare ìgũ ìhadiburo tauro mũapũre ìhadibumi Goãmũ. Eropirã wũaro bũjawere guñaricũbiricãque mũa, arĩ weremi Jesu.

Jesure mña umupearire wereque masare, arĩ wereñumi

Lc 12.8-9

³² Eropigu gña sãre werenemomi:

—Yujugu “Jesucristo yagu ãhraa,” masare igu arĩ werecũ yu sã igure “Yahagu ãhrimi,” arĩ weregura yu Pagu umaro majagugure.

³³ Yujugu masare güigu “Jesucristo yagu árĩbeaa,” masare igu arĩ werecũ yu sã “Yahagu árĩbeami igu,” arĩ weregura yu Pagugure umaro majagugure, arĩ weremi Jesu.

Jesu yu buhecũ masa erã basi game dũca warirãcoma, arĩ wereñumi

Lc 12.51-53; 14.26-27

³⁴ Eropa arĩtuhaja òpa werenemomi masare:

—¿Dohpa arĩ pepiri mña yure? ¿Yuhu masare yu buhegu aricũ yu buheri mera masa ìhaturisome, arĩ pepiri mña? Eropa árĩbeaa. Masa yu buherire peerã pe curu erã basi dũca warirãcoma. Yujurãyeri yu buherire peerãcoma. Gajirãpũ irire gamebirã erãre ìhaturirãcoma. Eropirã yujuro mera árĩsome masa.

³⁵ Mũrã yu buherire erã peera dipuwaja erã porã erãre ìhaturirãcoma. Mũrã nome erã yu buherire peera dipuwaja erã porã nome erãre ìhaturirãcoma. Erã mũñecosã nome yu buherire erã peera dipuwaja erã beposã nome erãre ìhaturirãcoma.

³⁶ Eropirã masa erã acawererãre yu buherire peecũ ìarã erãre ìhaturirã árĩrãcoma.

³⁷ “Yure erã mahibodiro tauro erã pagu sumarãpũre mahitarinũgarã yaharã árĩsome erã. Yure erã mahiborono tauro erã porãpũre mahitarinũgarã yaharã árĩsome erã.

³⁸ Eropirã crusague yu sĩridiro dopa ta yaharã erã árĩra waja ñero tarirãcoma erã sã. Eropa ñero taridiabirã yaharã árĩsome.

³⁹ Masa yure guñaro mariro erã gamero iirã peamegue warãcoma erã. Yaha árĩburipũre erã guñarã árĩpehrerinũri Goãmũ mera òaro árĩniguicãrãcoma, arĩ weremi Jesu.

Mari wajataburire wereñumi Jesu

Mr 9.41

⁴⁰ Eropa arĩtuhaja òpa werenemomi gña sãre:

—Mũare yaharãre yujugu òaro mera bocatĩrigu, yu sãre bocatĩrigu iimi igu. Eropigu yure òaro bocatĩrigu yure obeodigu sãre bocatĩrigu iimi.

⁴¹ Eropigu Goãmũ yare weredigu wajatagucumi. Igure òaro iigucumi Goãmũ. Eropigu igu yahare igu weregu

árĩcũ ĩagu yujugu ĩgure õaro bocatĩrigu weredigu iro dopa ta wajatagucumi ĩgu sã. Eropi gajigu õaro iidigu wajatagucumi. Eropigu ĩgu õaro iigu ĩgu árĩcũ ĩagu yujugu ĩgure õaro bocatĩrigu õaro iidigu dopa wajatagucumi ĩgu sã.

⁴² “Jesu yagugã ta ãhrimi,” mua arĩ ĩarã ĩgugãre itamudi-arã deco yusari mera dihta tĩaquerecũ, diaye ta mua sãre õaro iigucumi Goãmũ, arĩ weremi Jesu.

11

Ñu wãiyegu ĩgu buherãre Jesure serẽpidoregu obeoñumi Lc 7.18-35

¹ Gũare ĩgu buherãre ĩgu eropa arĩ werera pũru ero pohro árĩri macarigue buhegu waha wami ĩgu.

² Eropigu Ñu peresugue árĩgu Jesu ĩgu iiricũre pee-beopũ. Eropa peegu Ñu ĩgu buherãre Jesure serẽpidoregu obeopũ.

³ Eropirã gua pohrogue eja, Jesure serẽpima erã Ñu buherã.

—Ñu õpa arĩ serẽpidoreami mũre: “ ‘¿Yu pũru gajigu ĩgu arigucumi,’ yũ eropa arĩdigu ta ãhriri mũhũ? ¿O gajigure corerãcuri gua?” arĩ serẽpi doreami Ñu, arĩma erã Jesure.

⁴ Erã eroparĩcũ peegu Jesu yũhrimi:

—Dohpaguere mua peerare, mua ĩarare Ñure wererã waque.

⁵ Õpa arĩque: “Jesu mera cuiri ĩhajabirã ĩhama. Curi-masibirã cuhrima. Cami boanirã õarã wahama. Pee-jabirinirã peea wahama. Sĩrinirã masa wahama,” arĩ wereque. Eropirã mojomorocũrãre õari buherire yũ wererare wereque ĩgure. Eropa arĩ weretuhaja õpa arĩ wereque Ñure.

⁶ “Yũre peegu ‘Diaye ta ãhraa,’ arĩgu ĩgu mucubirigu ãhrimi,” arãmi Jesu, arĩ, Ñure wererã waque, arĩmi Jesu.

⁷ Ñu buherã erã wara pũru, Jesu Ñu árĩricũre werenugami masa bajarãre.

—Masa marirogue Ñu pohrogue warã ero majare taare miru weãcũ ĩarã ejabiribu mua.

⁸ Õari suhricũgu sãre ĩabiribu mua. Õari suhricũrã oparã ya wirigue ãhrima.

⁹ Masa marirogue ejarã Goãmũ yare weremũhtadigupure ĩarã ejabũ mua. Diaye ta Ñu Goãmũ yare weremũhtagu ãhrimi. Gajirã Goãmũ yare weremũhtanirã tauro árĩgu ãhrimi Ñupũ.

10 Iribojegue Goãmũ yare erã gojarapũ õpa arĩ wereyuyuro Ñure.

Mari Pagũ ãgu magure õpa arĩpũ. “Mũ core mũre wereyubure obeogu iiaa,” arĩmi Goãmũ, arĩ gojañuma Ñure.

11 Mũare diaye ta arĩgu iiaa. Masa árĩpehrerã tauro ãhrimi Ñu waĩyegu. Irisubure ãgu eropa árĩquerecũ ta umaroguere Goãmũ ãgu opu árĩroguere árĩpehrerã docanugagupũ Ñu tauro árĩgucumi.

12-13 “Ñu waĩyegu ãgu eraboro core Moiserẽ ãgu apira doreri mera Goãmũ marire doremi. Goãmũ ya weremũhtanirã mũra erã gojara sã eropa ta árĩribũ marire dorera. Dohpaguerpũre Ñu õari buherire, Goãmũ opu ãgu árĩrĩre buhemi. ãgu eropa buhecũ pee masa erã ejatuharo erã turari mera Goãmũ erã opu árĩcũ burigã gahmema.

14 “Elia arigucumi,” iribojegue erã arĩdigũ ta Ñupũ ãhrimi. “Iribojegue majarã erã arĩrare diaye ta ãhraa,” arĩdiarã Ñu ãgu erã eropa arĩdigũ árĩcũ masirãca mũa.

15 Õaro peeque mũa ire, arĩmi Jesu.

16 Eropigu õpa arĩnemomi masare:

—¿Mũa dohpague majarã masa ñehmarano iro dopa ãhriri mũa pepicũ? Mũa majirã iiro dopa õpa ãhraa. Doberi duarogue bira doarã, õpa arĩ dũyasoma erãgã erã basi:

17 “Mũa bayaburire tarisu purirabũ gua. ¿Duhpirã mũa mucubiri bayarã aribirari? Eropirã gua burigã ñehamere orerabũ. ¿Mũapũ duhpirã gua mera orebirari?” arĩma dũyasorã. Erã majirã arĩ dũyasorã iro dopa ta iirã õpa iiaa mũa dohpague majarã.

18 Ñu waĩyegu Goãmũ ya árĩburire ba duhugu vinore ihribirimi. ãgu eropa ihribiricũ ãarã “Pee masibigu ãhrimi,” arĩribũ mũa ãgũre.

19 Yũpũ masũ Goãmũ ãgu obeodigu árĩgu yũhũ baha, ihria. Yũ eropa iicũ ãarã õpa arãa mũa yũpũre. “Íaque. Ihĩ wũaro bagũ, merericũgu sã ãhrimi. Wajasea corerã ñero iirã erã wapicũgu ãhrimi ãgu,” arãa mũa yũre. Mũa gamero dopa gua iibiricũ ero wabeaa mũare. Mũa masibiriquererã ta gua iirare ãarã, Goãmũ masirire gua opacũ masirãca mũa, arĩmi Jesu erãre.

Iri macari majarãre turiñumi Jesu erã ñerire bujawerebiricũ ãagu

Lc 10.13-15

20 Pũhrũ ero maja macari majarãre turipũ Jesu. Iri macarire gajĩ macari sãre Goãmũ turari mera tauro deyoro

moarire ii ïhmudi árïrimi ïgu. ïgu eropa ii ïhmuquerecũ ta erã ñero iirire duhubirinirã árïma erã. Eropigu erãre õpa arïpu ïgu.

21 —Corazín maca majarã mũa ñero tarirãca. Betsaida majarã mũa sã ñero tarirãca. Mũa ya macaguere yũhũ Goãmũ turari mera deyoro moarire iirabu. Mũa peebirabu. Iribojegue Tiro waïcũri macare, Sidón waïcũri maca sãre yũ deyoro moarire yũ iicũ ïarã ero majarãpu erã ñerire bũjawereboañuma. Eropa iirã õaripũre gohrotoboañuma. Bũjawererã bũjawereri suhrire saña, erã basi peame witũ mera mohsiripeoboañuma erã ñero iirare bũjawere ïhmumorã. Mũapu eropa iibeaa.

22 Eropigu mũare arïgu tiiaa. Dipuwaja moarinũ árĩcũ, Goãmũ Tiro majarã mũra, Sidón majarã mũra tauro ñerã mũa árĩri waja mũare ñero gohra dipuwaja moagũcumi ïgu.

23 Mũa Capernaum majarã, mũa ejatuharo Goãmũ pohrogue wadiarabu. Mũa Goãmũ yare iidiabiricũ mũare Goãmũ peamegue cóagũcumi. Mũa ya macague Goãmũ turari mera deyoro moarire ii ïhmurabu. Mũa yũre peebirabu. Iribojegue Sodoma waïcũri macare deyoro moarire yũ eropa iicũ iri macapu dohpaguere árĩboca.

24 Eropigu mũare arïgu tiiaa. Dipuwaja moarinũ árĩcũ Goãmũ Sodoma maca majarã mũra tauro, mũapũre mũa ñeri dipuwaja dipuwaja moagũcumi, arïpu Jesu iri macari majarãre.

Yũ pohrogue soorã arique, arĩnumi Jesu

Lc 10.21-22

25 Irisubu ïgu Pagu mera wereniguigu õpa arĩmi Jesu.

—Ahũ, mũhũ umaro majarã tauro opu, i yeba majarã tauro opu ãhraa. I mũ buherire “Masituhaja gua,” arĩrãre masicũ iibeaa. Mũ yare masipehobirãpũre masicũ iibabu mũhũ. Mũhũ eropa iicũ “Õhaa,” arãa yũhũ mũre.

26 Eropa ta ãhraa, Ahũ. Erã masibirãpũre erã masicũ gahmeabu mũhũ, arĩmi Jesu ïgu Pagure.

27 Eropigu masare gua sãre õpa arĩ werenemomi:

—Yũ Pagu arĩpehreri yũ iiborore apimi yũre. ïgu dihta yũre õaro masimi. Yũ sã ïgũre masia. Yũ beyenirã sã ïgũre masima yũ ïgũre masidorerã árĩrã. Erã nũcu ta yũ Pagure masia gua.

28 Goãmũ mera õaro árĩdiarã baja dorerire iiraa mũa. Iri doreri nũcũrire omaro iro dopa ta ãhraa. Eropirã gariborea wahaa mũa iri dorerire iirã. Eropa gariborerã yũre serẽque. Mũare soocũ iigura.

²⁹ Yũhũ pũriro mera doregũ árĩbeaa. Nijiyajaro doregũ ãhraa. Eropirã yũ doreripũre iique. Eropa iirã dipuwaja marirã õaro árĩrãca mũa.

³⁰ Eropiro yũ itamuri mera yahare iicũ diasabeaa. Eropirã yũ dorerire iirã nũcũrĩre pepiro mariro õaro árĩrãca, arĩmi Jesu.

12

Judio masa erã soorinũ árĩcũ trigo pororire tũrĩñuma Jesu buherã

Mr 2.23-28; Lc 6.1-5

¹ Merogã ãgũ eropa arĩ buhera pũhrũ Sabado árĩcũ gũa Jesu mera trigo otera pohegue ãha tariabũ. Eroque tariarã gũa ãgũ buherã oaboarã, trigo pororire tũrĩ aĩ babũ gũa.

² Gũa eropa iicũ ãarã, fariseo masa Jesure õpa arĩma:
—Peenique gũare. ¿Duhpirã erã mari soorinũ árĩquerecũ ta mohmeri? Mari dorerire tarinũgarã iima erã, arĩma erã.

³⁻⁴ Erã eroparĩcũ peegũ Jesu “Yũ buherã tarinũgarã iibeama,” arĩgũ õpa arĩmi erãre:

—Iribojegue Davi ãgũ mera majarã mera oaboagũ Goãmũ ya wihigue ñaja, iri wihi árĩri panre bañumi ãgũ mera majarã mera. Iri pan pahia dihtare badorera árĩyoro. Goãmũ doreri gajirãre iri panre badorebiriyo. ¿Davi irire ãgũ iirare Goãmũ yare erã gojarapũgue buhebirari mũa? Davi iri panre bagũ Goãmũre tarinũgagũ iibiriñumi. Dohpagãre yũ buherã sã trigo yerire tũrĩ barã Goãmũre tarinũgarã iibeama.

⁵ Eropi Goãmũ ya wihi mohmerã pahia ne soobeama mari soorinũrĩre. Eropa soobiriquererã Goãmũ dorerire tarinũgarã árĩbeama. ¿Irire buhebirari mũa Goãmũ Moiserẽ ãgũ apirapũre?

⁶ Mũare arĩgũ tiiaa: Goãmũ wihire umupeorã iri wihi mohmerã erã soobiricũ ãarã “Õhaa,” arãa mũa. Erã tauro yũrũre umupeoro gahmea.

⁷ Goãmũ yare erã gojarapũ õpa ãhraa: “Waimũrãre wejẽ soerã yũre mũa eropa umupeocũ gamebeaa. Gajirãpũre mũa mojomoro ãacũ gahmea yũhũ,” arĩmi Goãmũ, arãa ãgũ yare gojarapũre. ãgũ eropa arĩrãre mũa õaro masirã, yũ buherãre erã dipuwaja mariquerecũ ta erãre weresãmasibiriboya mũa.

⁸ Yũhũ masũ Goãmũ ãgũ obeodigũ inonũ soorinũ sãre masa erã iiburire doremasia, arĩmi Jesu fariseo masare.

Mojoto bũhadigũ õaro wañumi

Mr 3.1-6; Lc 6.6-11

⁹ Īḡu eropa arīra pūhrū waha ḡua judio masa buheri wihigüe ejabū ḡua Jesu mera.

¹⁰ Ero mojoto buhagū árīmi. Eropirā fariseo masapū Jesure weresāmorā, ĩḡure serēpima:

—Sabadonū mari soorinūre masare ḡarā wacū iidore-beami Goāmū. ¿Eropa ta āhriri mū pepicū? arī serēpima erā.

¹¹ Jesu yūhrimi erāre:

—Mūa yagū oveja mari soorinū árīquerecū gobegüe ĩḡu yuhriñajadigüre ĩḡure aī wiurāca mūa.

¹² Oveja tauro āhrimi masapū Goāmū ĩacū. Eropiro mari soorinū árīcū masare taucū ḡapūrica, arī yūhrimi Jesu erāre.

¹³ Īḡu eropa arīra pūhrū mojoto buhagūre ḡpa arīmi:

—Mū mojotore sīsīrābeoque, arīmi ĩḡu.

Īḡu eroparīcū mojoto buhagupū sīsīrābeomi. Īḡu eropa sīsīrābeora pūhrū ta ḡari mojoto dujabū.

¹⁴ Erā soorinū ĩḡu eropiicū ĩarā fariseo masa waha, erā basi ḡpa arīñorā:

—¿Dohpa ii mari Jesure wejērācuri? arīñorā erā erā basi.

Isaia Goāmū yare weremūhtadigū iribojegüe majagū Jesure wereyuñumi

¹⁵ Jesu erā eropa arīrire masigū waha wami. Īḡu eropa wacū bajarā masa ĩḡure nūrusiama. Eropigū ĩḡupū árīpehrerā erā mera majarā dorecūrāre ḡarā wacū iimi.

¹⁶ Eropigū dorecūnirāre erāre ĩḡu taurare gajirāre were-dorebirimi ĩḡu.

¹⁷ Eropa dorecūrāre ḡarā wacū iigū Goāmū yare weremūhtadigū Isaia iribojegüe ĩḡu arī gojadiro dopa ta iigū iimi Jesu. Ḗpa arī gojañumi Isaia mūmū:

¹⁸ Ḗpa arīmi Goāmū: “Ihī yū pohro majagū āhrimi. ĩḡu yū beyedigū āhrimi. ĩḡure mahia. Eropigū ĩḡu mera mucubiria. Yū Espíriture ĩḡure ogūra. Eropigū yū turari mera árīpehrerā masare diaye iirire wereḡucumi ĩḡu.

¹⁹ Eropigū ĩḡu ne game dūyasosome. Eropigū gaguiniguisome. Eropigū masa bajarā watope ĩḡu burīgā gaguinigui weresome.

²⁰ Guaro mariro masaremojomorocūrāre itamugūcumi ĩḡu. Daberogā ũjuri peamere yaubiro dopa ta masare turabirāre ḡaro iigūcumi ĩḡu. Sīporā marirāre ḡaro sīporācūcū iigūcumi. Eropa ta iiniguigūcumi ĩḡu watīre ĩḡu tarinūgaboro core.

²¹ Eropirā masa bajarā ĩḡure umupeorācoma,” arīmi Goāmū ĩḡu magū iiburire, arī gojañumi Isaia.

Jesu watĩ turarire opami, arĩ weresãñuma masa

Mr 3.19-30; Lc 11.14-23; 12.10

22 Yujunũ watĩ ñajasũdigũre masa aĩgãrima gũa pohrogue Jesure taudorerã. Īgũpũ watĩ ñajasũdigũ wereniguimasibirimi. Eropigũ cuiri ĩhajabirimi. Erã ĩgũre eropa aĩ eracũ ĩha õagũ wacũ iimi Jesu ĩgũre. Īgũ eropa iicũ õaro ĩha, wereniguimi pare.

23 Īgũ eropa wacũ ĩarã, masa ĩhamaria wama.

—¿Ihĩ Davi mũrũ pãrami masare tauba āhriri? arĩma erã erã basi.

24 Erã eroparĩquerecũ Jesu watẽare ĩgũ cóãrare peerã fariseo masapũ õpa arĩ pepiñorã:

—Beelzebú, watẽa opũ, ĩgũ turari mera watẽare cohãmi Jesu, arĩ pepiñorã erã.

25 Erã eropa arĩ pepicũ masigũ, Jesu õpa arĩ weremi erãre werenigui queori mera:

—Yuju yeba majarã erã basi gamequeãrã iri yeba majarã pehrea wabocoma. Yuju maca majarã erã basi gamequeãrã iri maca majarã pehrea wabocoma. Yuju wihi majarã sã gamequeãrã eropa ta wabocoma.

26 Eropigũ Beelzebú watẽa opũpũ yũre watẽare cóãdoregũ ĩgũ basi ĩgũ yarãre cóãboñumi ĩgũ. Eropirã erã sã wapehrea waboñuma.

27 Ōpa arĩ weresãa mũa yũre: “Īgũ Beelzebú itamuri mera watẽare cohãmi,” arĩ weresãa mũa yũre. Mũa mera majarã sã watẽare cohãma. Eropirã erã “Watĩ ĩgũ turari mera erãre cohãa gũa,” arĩbeama. “Goãmũ ĩgũ turari mera watẽare cohãa,” arĩma. Eropirã mũa yũre “Watĩ turari mera watẽare cohãmi,” mũa arĩra diaye árĩbiricũ mũa mera majarã wererãcoma.

28 Eropigũ yũpũ watẽare cóãgũ Goãmũ ĩgũ Espíritu Santo turari mera cohãa. Yũ eropa cóãcũ ĩarã õpa arĩ masirãca mũa: “Goãmũ ĩgũ opũ árĩri i yebaguere árĩtuhajaa dohpa-guere,” arĩrãca mũa.

29 “Ōpa ta āhraa watĩ turagũ tarinũgari werediacũ: Wihi opũ turagũre diribigũ yajagũ ĩgũ ya wihigue ñajaja yajamasibeami. Īgũre ĩgũ dirira pũhrũ tamerare yajamasimi ĩgũre, arĩ weremi Jesu.

Eropa arĩ weremi watĩre ĩgũ tarinũgarare weregũ. Watĩ turagũ árĩquerecũ ta Jesu ĩgũre tarinũgami watẽare cóãgũ.

Eropa arĩtuhaja õpa arĩ werenemomi Jesu masare gũa sãre:

30 —Yujugũ yũre gamebigũ, yũre ĩhaturigũ āhrimi. Yu-jugũ yũre itamubigũ, yũre teboricucũ ĩgũ iimi.

31 “Eropigu mũare diaye arĩgu tiaa yũhũ. Árípehreri ñerire masa erã iicũ erã wereniguicũ sãre Goãmu cãdijimasimi. Eropa cãdijiqueregu Espíritu Santore erã ñero arĩ wereniguicũ Goãmu iri tamerare ne cãdijisome.

32 Yũ masũre Goãmu ĩgu obeodigũre erã ñero arĩ wereniguicũ iri ñerire cãdijimasimi Goãmu. Espíritu Santopũre erã ñero arĩ wereniguicũ irire ne cãdijisome Goãmu. Dohpaguere pehrerinũ pũhrũ sãre erã eropa arĩrãre ne cãdijisome ĩgu, arĩ buhemi Jesu erãre.

Yucũ dũcare masiro dopa ta masa erã wereniguirire peerã erã árĩricũre masia mari, arĩ wereñumi Jesu

Lc 6.43-45

33 Eropigu õpa arĩ werenemomi erãre werenigui queori mera:

—Õadigu yucũgu õarire dũcacũa. Ñedigu yucũgu ñerire dũcacũa. Yucũgu dũcare masirã “Irigũ dũca ta ãhraa,” arĩ masia mari. Mari eropa masiro dopa ta masa erã wereniguirire peerã erã árĩricũre masia mari.

34 Añaa iro dopa ñerã ãhraa mũa. Mũa ñerã árĩrã, õarire wereniguimasibea mũa. Mari guñarigue mari pepidiro dopa ta mari wereniguiã.

35 Õagu õarire pepimi. Eropigu õarire wereniguimi. Ñegũ ñerire pepimi. Eropigu ñerire wereniguimi.

36 Mũare arĩgu iiaa. Õaro pepi wereniguirã árĩque mũa. Õaro wereniguibirinirã dipuwaja moarinũ árĩcũ, mũa eropa arĩmaacãrãre Goãmũre wererãca.

37 Mũa queoro wereniguirare masigu, “Õarã ãhrima,” arĩ beyegũcumĩ Goãmũ. Eropigu mũa ñero wereniguirare masigu, “Ñerã ãhrima,” arĩ beyegũcumĩ ĩgu daja, arĩmi Jesu erãre.

Masa ñerã Jesure deyoro moarire iidoreñuma

Mr 8.12; Lc 11.29-32

38 ĩgu eropa arĩra pũhrũ masare buherã, fariseo masa sã ĩgũre õpa arĩma:

—Buhegu, Goãmũ ĩgu obeodigu arĩgu Goãmũ turari mera ii ĩhmuque gũare, arĩrima erã.

39 Jesu yũhrimi:

—Mũa dohpague majarã ñerã, Goãmũre gamebirã ãhraa. Yũhũ diaye arĩgu árĩcũ mũa masidiarã Goãmũ turari mera deyoro moarire iidorerãa yũre. Mũa eropa dorequerecũ Goãmũ yare weremuhtadigu Jona iribojegue majagu Goãmũ turari mera ĩgu iira dihtare ĩhmumi Goãmũ mũare.

40 Jona uhrenu gohra waimu wuagu paru pohecaguere arĩñumi. Īgu iidiro dopa ta yu sã masu Goãmu Īgu obeodigu uhrenu arĩguca yeba pohecaguere.

41 Iribojegue majarãpu Nínive maca majarã Jona Goãmu yare ĩgu wererare peerã, erã ñero iirare bujawereñuma. Ōarire gohrotoñuma. Dohpaguere mua watopegue Jona tauro arĩgu ahraa yuhu. Yuhu Goãmu yare muare werequerecũ ta mua ñero iirare bujawerebeaa. Eropirã Nínive majarã murapu erã ñero iirare bujawerenirãpu dipuwaja moarinu arĩcũ mua ñerire bujawerebirinirãre “Ñerã ahrima,” arĩ weresãracoma muare.

42 Iribojegue majago, sur majago, opo buro igo sã mua dohpague majarãre weresãgocumo dipuwaja moarinu arĩcũ. Igo Salomo opu ĩgu masire peediago yoarogue aridigo Salomo opure peego ejañumo. Eropigo ōaro iigo iĩñumo dohpague majarã tauro. Muare arĩgu tiiaa. Dohpaguere mua watopegue Salomo tauro masigu ahraa yuhu. Yuhu mua mera arĩquerecũ mua yu masire peediabeaa. Mua eropa peediabirira waja igo opo buro muare “Ñerã ahrima,” arĩ weresãgocumo, arĩmi Jesu erãre.

Watĩ dipaturi masugure ĩgu ñajara queorire wereñumi Jesu

Lc 11.24-26

43 Eropigu dipaturi Jesu queori moa weremi masare.

—Yujugu watĩ masu mera arĩdigu waha, ĩgu deco mariri yebague cuhri, ĩgu sooborore amariñumi.

44 Eropa bocabigu ōpa arĩ pepiñumi ĩgu. “Masare yu cóadigu mera ta dipaturi arĩgu wagura,” arĩ pepiñumi ĩgu. Eropa arĩ pepigu ĩgu dujaa waha ĩgu cóadigure ta bocañumi daja. Īgu bocaboro core masupu ōagu arĩriñumi.

45 Eropigu watĩ gajirã siete watẽare ĩgu tauro ñerãre sihugu wañumi. Īgu eropa sihucũ erã arĩpehrerã ĩgu mera arĩñuma. Masupu ero core yujugu watĩre opagu ñegu arĩñumi. Puhru bajarã watẽare opagu ñetariagu arĩñumi. Eropa dohpague majarã Goãmure gamebirã, yu buherire peediabirã ñetariarã ta warãcoma, arĩmi Jesu erãre.

Jesu acawererã ĩgu pohro erañuma

Mr 3.31-35; Lc 8.19-21

46 Masare ĩgu eropa arĩ wereniguirisubu ĩgu pago ĩgu pagu porã mera disiporo nigui, ĩgure weretamudiañorã.

47 Eropigu yujugu Jesure weremi:

—Mu pago mu pagu porã mera disiporo niguima mure weretamudiarã, arĩmi.

48 Īḡu eroparīcũ peegũ ero árĩrãre õpa arĩmi Jesu erãre buhebu:

—¿Noa àhriri yũ pago gohra? ¿Noa ta yũ pagũ porã gohra àhriri mua ĩacũ? arĩmi.

49 Eropa arĩḡu, ḡuare ĩḡu buherãre sĩpu, õpa arĩmi:

—Oã àhrima yũ pago yũ pagũ porã iro dopa árĩrã.

50 Erã yũ Pagũ umaro majagũ ĩḡu gamerire iima. Eropa irĩrã yũ pagũ magũ, yũ pagũ mago, yũ pago iro dopa ta àhrima, arĩmi Jesu erãre.

13

Jesu oteri masũ ya queorire wereñumi

Mr 4.1-9; Lc 8.4-8

1 Irinũ ta Jesu wihigue árĩḡu wiriami ḡua mera. Wiri, wũariyague waha, iriya tũro pohro doami.

2 Īḡu eropa doacũ ĩarã bajarã masa ĩḡu pohrogue gamenerema. Eropa cũhñacũ ĩagũ dohodirugue ñajaa, irirugue doami ĩḡu. Masapũ imiporogue niguima.

3 Eropigũ baja queori mera weremi ĩḡu erãre. Õpa arĩmi:

—Oteri masũ otegũ wañumi.

4 Īḡu eropa otecũ gajiyeri ma tũro yuri merejayoro. Ero mehmerejarayerire mirimagũ porã ahri bacãñuma.

5 Eropi gajiyeri utã watope yuri merejayoro. Ero utã watope nicu mariñariro árĩro mata puhriyoro.

6 Eropa puhriira árĩquerero, abe ĩḡu bũrigã asicũ, nuguri marinijaro ñaiñaja sĩria wayoro.

7 Gajiyeri pora watope yuri merejayoro. Porapũ puhri iri tiataria wa, oterayeripũre wejẽcãyoro.

8 Gajiyeri õari yebapũ yurimerejayoro. Õaro puhri dũcacũyoro. Gajisari cien yeri, gajisari sesenta yeri, gajisari treinta yeri dũcacũyoro.

9 Irire õaro peeque mũa, arĩmi Jesu.

Jesu werenigui queori mera ĩḡu buherire wereñumi

Mr 4.10-12; Lc 8.9-10

10 Īḡu eropa arĩra pũhrũ ḡua ĩḡu buherã ĩḡu pohro eja, serẽpibũ ĩḡure:

—¿Ne, duhpigũ masare queori mera were buheri mũhũ? arĩ serẽpibũ ḡua.

11 Jesu yũhrimi:

—Um̃aro majagũ masa tauro opũ ĩḡu árĩrĩre iribo-jegue majarã erã masibirirare mũare masicũ iimi Goãmũ. Gajirãpũre eropiibeamĩ ĩḡu.

12 Eropigu masirãre masinemocũ iigucumi iġu. Eropirã erãpu ðaro masirãcoma. Masibirãpũre merogã erã masiquerẽcũ erãpũre masibiricũ iigucumi iġu.

13 Eropigu queori mera buhea. Yũ eropiicũ ðpa wahaa. Dohpague majarã ãaquererã pee masisome. Eropirã peequererã masibeama. Irire peebirinirã iro dopa ãhrama erã.

14 Eropa árĩrã Isaia iribojegue majagu iġu arĩ gojadiro dopa ta iima erã. Õpa arĩ gojañumi:

Õpa arĩmi Goãmũ: “Goãmũ yare peerãca mũa. Eropa peequererã ne masisome mũa.

15 Mũa dipuru bũri ãhraa. Eropirã mũa gamiro giberire bihaa peeri arĩrã. Mũa cuirire cuumitĩa ãhari arĩrã. Eropa iibirã ðaro ãarã masiboaya mũa. Eropirã peerã masiboaya mũa. Mũa guñarigue ðaro masiboaya. Eropirã yũre Goãmũre gameboaya mũa. Mũa eropa yũre gamecũ mũa ñerire cãdiji, mũare tauboaya,” arĩmi Goãmũ, arĩ gojañumi Isaia, arĩmi Jesu.

16 Mũarũ peerã masia. Eropirã mucubirirã ãhraa mũa.

17 Mũare ta arĩġu iiaa. Dohpague mũa ãarire mũa peerire iribojegue majarã Goãmũ yarã bũrigã ãadiariñorã. Goãmũ yare weremũhtanirã sã irire bũrigã ãadiariñorã. Ne ãabiriñorã. Dohpague mũa peeri sãre bũrigã peediariñorã erã. Ne peebiriñorã. Erã eropa masidiaquerẽcũ ta Goãmũ erãre masidorebiripũ irisubuguerẽ, arĩ weremi Jesu ġuare iġu buherãre.

*Jesu oteri masũ queorire were amuñumi iġu buherãre
Mr 4.13-20; Lc 8.11-15*

18 Pũhrũ Jesu ġuare werenemomi:

—Peeque mũa. Oteri masũ queorare mũare were amugũra. Yũre peerã ðaro masique.

19 Oteriyeri ðari buheri iro dopa ãhraa. Eropiro ma tũro mehmerejarayeri ðari buheri iro dopa ta ãhraa. Eropirã masa ðari buherire peequererã ta ne masibeama. Eropigu masa ðari buherire erã peecũ ãagu ñegũpu watĩ ahri, iri buherire ðari buherire masidorebeamĩ masare. Mirimagu porã iriyerire erã dote aĩ badiro dopa ta iimi.

20 Eropi utã watope yuri merejarayeri ðari buheri iro dopa ta ãhraa. Eropirã masa ðari buherire pee, mucubiriri mera mata irire pee aĩma.

21 Eropa pee aĩquererã utã watope árĩri yucũ nuguri mariri yucũ iro dopa ta oã masa sã turabeama. Eropa turabirã yaha ðari buherire erã peera dipuwaja gajirã erãre ñero iicũ yahare duhucãma. Gajirã erãre erã ñero iicũ irire yujuro bojebiri, yahare duhucãma.

22 Eropi pora watope yuri merejarayeri õari buheri iro dopa ta āhraa. Eropirā masa õari buherire peequererā i yeba majare wuaro pepiri mera niyerure gametarima. Erā eropa iicū iripū õari buherire cāhmotaa. Iri cāhmotacū masa Goāmū gamerire iibeama.

23 Eropi õari yeba yuri merejarayeri õari buheri iro dopa āhraa. Eropirā masa õari buherire peerā irire õaro masima. Eropa masirā árīrā, Goāmū gamerire iima erā. Yujurāyeri wuaro õarire iima cien yeri ducacuro dopa ta. Gajirā erā docañariro õarire Goāmū yare iima sesenta yeri ducacuro dopa ta. Gajirā merogā õarire iima treinta yeri ducacuro dopa ta, arī weremi Jesu guare.

Trigo watopegue taa tiara queorire wereñumi

24 Eropi dipaturi gaji queorire gūa säre weremi Jesu.

—Umaro majagū ĩgū opu árīrīre werediacū õpa āhraa: Pohe opu ĩgū ya pohegue õariyerire ĩgū otediro dopa ta āhraa umaro majagū ĩgū opu árīri.

25 Pohe opu trigo otera puhru árīpehrerā ĩgū mera majarā sã erā carīrisubu ĩgure ĩhaturigū arīñumi. Eropa arigū trigo yeri erā oterayeri watope ñeri taare oteñumi. Otetuhaja waha wañumi.

26 Puhru trigo sari puhri iiriyoro. Eropiro iri ducacuboro core árīcū iri ñeri taa sã puhri iri pohere tiha wacū iiyoro.

27 Eropirā pohe opure mohme corerā ĩgū pohrogue eja serēpiñuma: “Opu, ¿õariyeri dihtare mū ya pohere otequerecū duhpiro ñeri taa sã tiari iri pohere?” arīñuma erā.

28 “Yure ĩhaturigū āhrañumi iri taare otegu,” arīñumi pohe opu. “¿Taare gūa curacū gahmeri mūhū?” arīñuma ĩgure mohme corerā.

29 “Taare curabiricāque, taare curanijarā trigopure curari,” arīñumi.

30 “Trigo iri ñeri taa mera puhricāniporo. Iri ñairisubu dūca aĩräre õpa arīrā: ‘Iri ñeri taare cura game-neopimūhtaque irire soemorā. Puhru trigore turīque. Turīpeho, irire yū diburi wihigue apique,’ arīrā eräre,” arīñumi pohe opu, arīmi Jesu queori mera weregū.

Mostazayegā queorire wereñumi Jesu

Mr 4.30-32; Lc 13.18-19

31 Eropi gaji queori guare õpa arī buhemi daja.

—Umaro majagū ĩgū opu árīri werediacū mostazayegā iro dopa āhraa. Iriyegā miriyegā gohra āhraa. Iriyegā yujugū oteri masū ĩgū pohegue oteami.

³² Iriyegāre ĩḡu pohegue otera pũhrũ õaro puhria. Eropiro yucũḡu wuatariadigũ wahaa. Eropa wacũ mirimagũ porã bajarã irigũ dupũrigue suhri suama. Eropa ta umaro majagũre mari Opũre masirã bajamerãḡã erã árĩmũhtaquerẽcũ ta pũhrũguere erã bajarã warãcoma, arĩ weremi Jesu

Pan buḡari queorire wereñumi Jesu

Lc 13.20-21

³³ Eropi gaji queori mera ḡuare õpa arĩ buhemi daja:

—Um̃aro majagũ ĩḡu opu árĩri pan buḡacũ iiburi iro dopa āhraa. Yujugo nomeo panre iigo pan buḡacũ iiburi pohgare merogã moremo trigo pohga mera. Igo eropa ĩicũ pan buḡacũ iiburi pohga merogã árĩquerero ta trigo pohgare õaro seyapehrea wahaa. Eropa ta umaro majagũre mari Opũre bajarã masa árĩpehrero majarã masirãcoma, arĩmi Jesu.

Queori mera Jesu ĩḡu buherãre wereñumi

Mr 4.33-34

³⁴ I árĩpehreri buherire queori mera weremi Jesu. Queori mariro werebirimi ĩḡu masare.

³⁵ Eropa ta iimi ĩḡu Goãmũ yare weremũhtadigũ ĩḡu arĩ gojadiro dopa ta. Õpa arĩ gojañumi iribojegue:

Queori mera wereḡura. Goãmũre i yebare ĩḡu ĩhacũnugura pũhrũ, ne masare ĩḡu werebirirare wereḡura, arĩ gojayuñumi Jesu iiborore.

Jesu trigo watopegue ñeri taa tiara queorire were amupehoñumi

³⁶ Eropi masare goerisereḡu, wihigue ñajaa wami Jesu. Eropirã ḡua ĩḡu buherã ĩḡu pohrogue eja, serẽpibũ ḡua:

—Trigo watopegue ñeri taa tiara queorire werepehoque ḡuare, arĩbũ ḡua ĩḡure.

³⁷ Jesu yũhrimi ḡuare:

—Pohe opu õariyerire otediro iro dopa ta āhraa yũhũ. Yũhũ masũ Goãmũ ĩḡu obeodigũ āhraa.

³⁸ Pohepu i yeba iro dopa ta āhraa. Õariyeri puhriro umaro majagũ ĩḡu opu árĩrogue árĩmorã iro dopa ta āhrima. Ñeri taapu watĩ yarã iro dopa ta āhrima.

³⁹ Pohe opũre ĩhaturigũ ñeri taare otedigũ watĩ iro dopa ta āhrimi. Iri ñairisubũ pehrerĩnũ iro dopa āhraa. Eropirã trigore aĩrã anyua iro dopa ta āhrima.

⁴⁰ Iri ñeri taare erã curarare soe peamegue cóãdiro dopa ta pehrerĩnũ árĩcũ watĩ yarãre peamegue cóãrãcoma.

41 Yũhu masũ Goãmu ïgu obeodigu yaharã anyuare obeogura. Yu obeocũ anyuapũ ñeri iidorenirãre, ñerire iinirãre yũ dorerogue gameneorãcoma.

42 Gameneotuhaja peamegue cóãrãcoma erãre. Erogue erã bũrigã ore, bũjawereri mera gũcũri cũridihurãcoma.

43 Eropirã Goãmu yarã erã Pagũ erã Opũ ïgu árĩroque árĩrãcoma. Ero árĩrã, òaro mucubiriri mera árĩrãcoma erã. Ire òaro peeque mũa, arĩ weremi Jesu.

Niyeru wũaro diburare ïgu bocara queorire wereñumi

44 Eropi gaji queori mera weremi daja:

—Ûmaro majagu ïgu opũ árĩri niyeru wũaro diburare bocadiro iro dopa ãhraa. Eropigu yujugu masũ curigu wagu iri niyerure guñaña mariro bocañumi yuju yebague. Eropa bocagu bũrigã mucubiriñumi ïgu. Bocatuhaja waha iri yebague dipaturi dujara irire òaro dibunemoñumi. Eropigu ïgu bocarare aĩbu iri yebare asũdiañumi. Eropigu ïgu yare duapeho, iri yebare asũñumi. Ûmaro majagu opũ ïgu árĩri ïgu bocadiro dopa ta ãhraa. ïgu bocarare ïgu bũrigã gamediro dopa ta ãmaro majagu masa weca opũre òaro erã masira pũhrũ masa bũrigã gahmema ïgure, arĩ weremi Jesu.

Waja pagariyere asũra queorire wereñumi

45 Eropi gaji queori mera weremi daja:

—Ûmaro majagu ïgu opũ árĩri waja pagariye perla waĩcũriyere asũdigũ iro dopa ãhraa.

46 Iriyere amagu òataririyere bocañumi. Bocagu iriyere gametarigu árĩpehreri ïgu yare duapehogũ wañumi. Eropa duatuhaja iriyere waja pagariyere asũñumi. Iriyerire bũrigã ïgu gamediro dopa ta ãmaro majagu masa weca opũre òaro erã masira pũhrũ masa bũrigã gahmema ïgure, arĩmi Jesu.

Wejẽdigũ mehyura queorire wereñumi Jesu

47 Eropi gaji queori mera Jesu weremi daja gũa sãre:

—Ûmaro majagu ïgu opũ árĩri wejẽdigũ erã mehyudigu iro dopa ta ãhraa. Irigu wejẽdigũ mera bajarã waire gajiropa árĩrãre ñeama.

48 Irigu Ʃjutũria wacũ wai wejẽrãpũ irigũre wejẽdigũre imiporogue tara majaa òarã waire beyema. Òarãre erã pũirigue beye sãma. Ñerã waire cóãcãma.

49 Pehrerinũ árĩcũ òpa ta árĩroca. Anyuapũ masare beyerãcoma. Ñerãre beye aĩ wiurãcoma òarã watope árĩrãre.

50 Aĩ wiu, erãre peamegue cóârãcoma. Erogue erã ore, buřigã bujawereri mera guçuri cūridihurãcoma ñerãpũ, arĩ weremi Jesu.

Mũra buherire, mama buheri sãre wereñumi Jesu

51 Īgu eropa arĩ werera pũhrũ guare serẽpimi ĩgu:

—¿I árĩpehrerire peeri mũa? arĩ serẽpimi ĩgu.

—Peeã guã, arĩ yũhribũ.

52 Guã eroparĩcũ ĩgu weremi guare:

—Judio masare buherã watope yujugu mũmaro majagu ĩgu opu árĩrĩre buhenugagu iri mama buherire buhegu iribojegue maja sãre masigu weremi. Īgu wihi opu iro dopa ãhrimi. Īgu ĩgu ya wihi diburare ðarire aĩ wiugu, mamare, mũara sãre aĩ wiumi ĩgu, arĩmi Jesu guare.

Jesu Nazaregue ĩgu ya macague wañumi

Mr 6.1-6; Lc 4.16-30

53 Iri queori bajare ĩgu buhera pũhrũ ĩgu mera guã waha wabũ.

54 Waha, ĩgu masara macague ejabũ. Erogue eja, guã buheri wihigue buhemi ĩgu. Īgu eropa buhecũ peerã, pee uca wama erã.

—¿Nohogue masiyuri ihĩ i buherire? ¿Dohpa ii ĩgu i deyoro moarire iimasiri? arĩ wereniguima erã erã basi.

55 Ihĩ taboa mohmeri masũ magũ ta ãhrimi ĩgu. Eropi ĩgu pago María ãhrimo. Eropi Santiago, José, Simo, Juda ĩgu pagũ porã ãhrima.

56 Dohpaguere ĩgu pagũ porã nome i maca ãhrima. Eropigu ĩgu mari iro dopa ta árĩgu ãhrimi. ¿Eropa árĩqueregu ta nohogue peeyuri i buherire? arĩ wereniguima erã erã basi.

57 Eropirã erã ĩgure umupeobirima. Erã eropa umupeobiricũ ĩagu ðpa arĩmi Jesu erãre:

—Árĩpehroogue Goãmũ yare weremũhtagure gajirã umupeoma. Īgu ya maca majarã ĩgu ya wihi árĩrã dihta ĩgure umupeobeama. Eropirã yũre umupeobeaa mũa ohũ yũhũ masadigu árĩcũ, arĩmi ĩgu erãre.

58 Eropigu erã ĩgure umupeobiricũ, iri macare baja deyoro moarire iibirimi Jesu.

14

Ñu waĩyegu sĩrirare werera

Mr 6.14-29; Lc 9.7-9

1 Irisubure Herode Galilea majagu opu Jesu ĩgu iirare peebeopũ.

2 Eropa peegu ðpa arĩripũ:

—Ñu waĩyeri masu s̄iridigu dipaturi masa dehyoagu iicumi. Eropa masadigu ár̄igu ĩgu turarire opami ĩgu deyoro moarire iigu, ar̄irip̄u Herode ĩgu pohro majar̄are. Jesure “Ñu m̄uru ta āhrimi,” ar̄i pepirip̄u ĩgu Ñure ĩgu wejedorera p̄hru.

³⁻⁵ Eropigu Ñure ĩgu wejedoroboro core Herode ĩgu pagu magu Felipe marapore ehma igo mera marapoc̄up̄u. ĩgu eropa iicũ ĩagu Ñu waĩyegu Herodep̄u ģpa ar̄i wereniguip̄u:

—Mu pagu magu marapore marapoc̄ugu Goãmu dorerire tarinugagu iiaa m̄uhu, ar̄irip̄u Ñu ĩgure. ĩgu eropa ar̄ira waja Herode ĩgure wejediariip̄u. “ ‘Ñu Goãmu yare werem̄htagu āhrimi,’ ar̄i pepima judio masa,” ar̄igu er̄ap̄ure güip̄u Herode. “Ñure yu wejẽcũ er̄a guabocoma,” ar̄igu er̄are güip̄u. Eropa güigu Ñure wejediabiririp̄u. Eropa wejebiriqueregu ta ĩgure ñeha diridore, peresu iip̄u. ĩgure eropa iicũ gamepo ĩgu marapo Herodia.

⁶ Eropi Herode ĩgu masa dehyoaranu ár̄icũ bosenu iip̄u ĩgu. ĩgu eropa bosenu iicũ ĩgu marapo mago bosenu eranir̄a er̄a ĩhuro baya ĩhmupo igo. Igo eropa baya ĩhmucũ Herode mucubirip̄u. Eropa mucubirigu igore ar̄ip̄u:

⁷ —Goãmu mera diaye ta ar̄igu iiaa. Yure mu ser̄erop̄e ta ogura yuh̄u m̄ure, ar̄ip̄u pare Herodep̄u ĩgu marapo magore.

⁸ ĩgu eropar̄icũ ĩgu marapo igo magore igo ser̄eburire werepo igore. Igo eropa werecũ igo magop̄u ģpa ar̄i ser̄epo Herodere.

—Ñu waĩyegu dipurure tabetadoreque. Eropigu soropa mera ĩgu dipurure yure oque, ar̄ipo igo.

⁹ Igo eropar̄icũ peegu Herode burigã bujawerep̄u. Masa er̄a peero “Mu ser̄ero m̄ure ogura,” ar̄ituhap̄u ĩgu. Eropigu ĩgu ĩgu eropa ar̄irare guhyas̄irigu “M̄ure osome,” ar̄imasibirip̄u igore. Eropigu igo ĩgure dorero dopa ta Herodep̄u ĩgu pohro majar̄are Ñure wejedorop̄u.

¹⁰ Eropigu Ñu dipurure tabetadorec̄ap̄u pare peresugue ar̄igure.

¹¹ Tabetatuhaja, soropa mera ĩgu dipurure aĩgariñorã er̄a. ĩgu marapo magore ĩgu dipurure er̄a ocũ, igop̄u igo pagoguere aĩ taupo.

¹² Er̄a eropa iira p̄hru Ñu ĩgu buhenir̄a ĩgu d̄up̄u m̄urarore aĩgã wañorã. Eropa yaatuhajarã, er̄a irire Jesure wererã arima.

*Cinco mil masare bari oñumi Jesu
Mr 6.30-44; Lc 9.10-17; Jn 6.1-14*

13 Ñu sîrirare peegu Jesu gua mera dohodirugue ñaja, masa marirogue sihu wami. Jesu erogue wacũ peerã, masa erã ya macarire wiri, marigue waha ïgu core ejatuhãnorã.

14 Eropiro Jesu ïgu wadiru dohodiru tuhajara pũhrũ ïgu bajarã masa árĩcũ ïha, mojomoro ïami erãre. Eropa mojomoro ïagu erã mera bajarã dorecũrãre õarã wacũ iimi.

15 Ñamicague gua ïgu buherã õpa arĩbũ:

—Ñamicague ãhraa. Ohõ masa marirogue ãhraa. Õgã árĩri macarigue masare wadoreque. Erã baburire asũrã waporu, arĩribũ gua ïgure.

16 Jesu yũhrimi guare:

—Wabiricãporo erã. Mũa basi ta barire oque erãre, arĩmi guare.

17 —Cinco pan dipurure, perã ta wai sãre iripẽta opaa gua, arĩ yũhrĩbũ gua.

18 —Irire yũre aĩgãrique mũa, arĩmi guare.

19 Gua irire ora pũhrũ, taa weca masare ïgu doadoremĩ pare. Erã eropa doarĩsubu cinco pan dipurure aĩ, perã wai sãre aĩ, umarogue ïhamuju, ïgu Pagure “Õhaa,” arĩmi. Õpa arĩtuhaja iri pan dipurure nuha, guare ïgu buherãre omĩ. ïgu eropa ocũ guapũ iri barire masare guerebũ.

20 Eropirã árĩpehrerã õaro baha yapia wama. Erã ba dũharare doce puiĩ gohra aĩ gameneo, ỹjũtu dobobũ gua.

21 Ero irire banirã ỹma dihtare queocũ cinco mil ỹma arĩma. Nome, majirã sã arĩma.

Jesu deco weca curĩñumi

Mr 6.45-52; Jn 6.16-21

22 Pũhrũ guare ïgu buherãre Jesu dohodirugue ñajadore wũariyague taribuja yuudoremĩ masare ïgu goerisererĩsubu.

23 Goeriseretuhaja, ïgu basi utãgugue mũria, ïgu Pagu Goãmũ mera serẽgu wapũ ïgu seyaro.

24 Irisubure wũariya deco gohra gua taribujacũ miruñe burigã ahri, pãgũri pagari wahgã, dohodirure deco paa ñajabũ.

25 Eropa wacũ boyomũririboro core cãreña wahgãrisubũ Jesu deco weca cũhrapi wahgãrimĩ gua pohrogue arĩgu.

26 Gua pohrogue ïgu aricũ ïarã gũibũ gua. Eropa gũirã gaguĩguirĩbũ.

—Sĩridi mũrũ watĩ ãhrimi, arĩ gaguĩnguĩbũ gua.

27 Gua eropa gũicũ Jesu õpa arĩmi:

—Ne yũre ïha ỹcabiricãque. Yũhũ ta ãhraa. Gũibita, arĩmi guare.

28 ïgu eroparĩcũ peegu Pedro arĩmi ïgure:

—Yũ tĩgu, diaye ta mũhu ta árĩgu, deco weca curi wahgãdoreque yũre mũ pohrogue, arĩmi ĩgu.

²⁹ —Arique, arĩ yũhrimi ĩguũ.

Ĩgu eroparĩcũ Pedropũ dohodirugue árĩdigũ wiria, deco weca Jesu pohrogue niguigãrimi.

³⁰ Miruñe iri bũrigã aricũ ĩagu gũimi. Eropa gũigu diha dija warimi.

—Yũre tauque, arĩ gaguiniguimi ĩgu Jesure.

³¹ ĩgu eroparĩcũ ta Jesu ĩgu mojtore ñeha,

—Merogã umupeoa mũhu yũre. ¿Duhpigũ yũre guñaturabeari mũhu? arĩmi ĩgu Pedrore.

³² Eropa arĩra pũhrũ dohodirugue ñajama erã. Erã eropa ñajara pũhrũ, miruñe taria wabũ.

³³ Eropirã gũa ĩgu buherã dohodirugue árĩrã Jesure umupeobũ.

—Diaye ta mũhu Goãmu magũ ta ãhraa, arĩbu gũa ĩgũre.

Genesare majarã dorecũrãre tauñumi Jesu

Mr 6.53-56

³⁴ Eropi taribujaja, Genesare waĩcũri yebague ejabũ.

³⁵ Ero majarã Jesure ĩha masima. Eropa masirã erã pohro árĩrãre dorecũrãre aĩgãridorema. Eropirã erã dorecũrãre ĩgu pohrogue aĩ erama.

³⁶ —Mũ suhriro tũro dihtare gũare mohmepiñadoreque, arĩ serẽma erã Jesure. Eropirã árĩpehrerã dorecũrã ĩgu suhrirore mohmepiñanirã dihta õarã wama.

15

Masa ñerã wacũ iirire wereñumi Jesu

Mr 7.1-23

¹ Eropi Jerusalén majarã, fariseo masa, masare buherã mera Jesu pohrogue erarã, serẽpima ĩgũre:

² —¿Duhpirã mari ñecũ sũmarã mũra erã dorediro dopa iibeari mũ buherãpũ? Erã mari dorero dopa ta erã baboro core mojo coe ĩhmubeama, arĩma erã Jesure.

³ Jesu yũhrigu serẽpimi erãpũre:

—¿Mũapũ duhpirã Goãmu doreripũre iibeari? ¿Duhpirã mũa ya dõreri dihtare iiri mũapũ?

⁴ Őpa arĩmi Goãmu: “Mũa pagũ sũmarãre umupeoque,” arĩmi. Eropigu “Ĩgu pagũ sũmarãre ñero werenigui coredigũre erã dipuwaja moarã wejẽbu árĩgũcumĩ,” arĩmi Goãmu.

⁵ ĩgu eropa arĩquerecũ ta mũapũ õpa arĩdorea masare erã pagũ sũmarãre. “ ‘Mũare itamumasibeaa. Mũare yũ oborare Goãmu ya árĩburire opehocãbũ,’ arĩque mũa pagũ sũmarãre,” arĩ buheraa mũa.

⁶ Mũa eropa buherã erã pagu sũmarãre erã umupeobiricũ iiaa mũa. Mũa eropa iirã Goãmũ buherire tarinũgarã iiaa mũa mũa ya doreri dihtare iirã.

⁷ Masa erã ãbiropũre ñero iicorerã ãhraa mũa. Goãmũ ya weremũhtadigũgue Isaia mũare diaye ta were gojamũriũnumi iribojeguerẽ:

⁸ Oã masa yũre õaro wereniguiquererã yũre õaro umupebeama. Erã ya siporãripũ gajipũgue ãhraa.

⁹ Goãmũ ya dorerire arĩbodirore erã ya werenigui dihtare buhema erã. Eropirã yũre umupeo erã sĩbuipeori duhpiburi árĩbeaa, arĩ gojaũnumi Isaia, arĩmi Jesu fariseo masare, masare buherã sãre yujuropa ta.

¹⁰ Eropa arĩtuhaja ãgu pohrogue masare sihubeo, õpa arĩmi:

¹¹ —Peeque mũa. Mũa disirorire ñajaripũ mũa baripũ masare ñerã masa wacũ iibeaa. Mũa wereniguiripũ mũa ya disiro wiriripũ mũare ñerã árĩcũ iiaa, arĩmi Jesu.

¹² ãgu eropa arĩ buhera pũhrũ gua ãgu buherãpũ ãgure werebũ:

—Mũ eroparĩcũ peerã fariseo masa guama, arĩ werebũ gua ãgure.

¹³ Irire pee õpa arĩ yũhrimi gũare:

—Erã otera iro dopa ãhrima. Yũ Pagũ umaro majagu árĩpehreri oterare ãgu otebirirare nuguri mera ta cura cõagũcumĩ.

¹⁴ Erãre eropa ãacãque. Erã Goãmũ yare masibirã masa cuiri ãhajabirã iro dopa ãhrima. Cuiiri ãhajabirã seyaro erã basi game tũagã erã perãgue ta mehtua yuhridijarãcoma gobegue. Eropa erã Goãmũ yare masibiriquererã ta gajirãre masibirãre buhediarima. Eropirã erã erã buherã sã peamegue warãcoma, arĩmi Jesu.

¹⁵ ãgu eroparĩcũ peegu Pedro arĩmi:

—Ĩne queoriñere erã disiro wiriri queorire werenemoque gũare daja, arĩmi ãgu Jesure.

¹⁶ Jesu yũhrimi:

—¿Ne, peenibeari mũa?

¹⁷ Masa erã barire bacũ erã ya disiro ñajaa. Eropiro erã parugue ñajaja, pũhrũ erã dupũpũ ñerire cohãa. Ibu gohra ãhraa. Mari bari marire ñerã wacũ iibeaa. ¿Ire masibeari mũa?

¹⁸ Masa ya disiro wiriri, erã wereniguiripũ erã pepiri ãhraa. Erã ya pepiripũ ñeri árĩro masare ñerã árĩcũ iiaa.

¹⁹ Erã pepirigue õpa ñeri nũgaa: Ñeri pepiri, masare wejẽri, gajigũ marapo mera ñero iiri, ñero iirã nome mera ñero iiri, yajari, gũyari, masare ñero quere iiri, masa erã pepirigue nũgaa.

20 Iri ñeripũ masare ñerã árĩcũ iiaa. Masa erã dorerire m̃rague erã iim̃ridiro dopa ta mojoto coebiriquererã ta erã bacũ iri masare ñerã masa árĩcũ iibeaa, arĩmi Jesu.

Judio maso árĩbigõ Jesure umupeoñumo

Mr 7.24-30

21 Eropa arĩ buhetuhaja gũare sihu waha wami daja. Tiro waĩcũri maca pohrogue Sidón waĩcũri maca pohrogue ejabũ gũa.

22 Gũa erogue ejacũ Canaa yeba majago ero árĩgo Jesu pohrogue eja, turaro mera wereniguimo:

—Opũ Davi pãrami, masare taugũ yũre mojomoro ñaque m̃hũ. Yũ mago watĩ ñajasũdigo ñetariaro tarimo igo, arĩmo.

23 Igo eropa arĩquerecũ ta Jesu igore yũhribirimi. Ĩgũ eropa iicũ ñarã gũa ĩgũ buherãpũ ĩgũre õpa arĩribũ:

—Wadoreque igore. Ñe gariboro busacumo, arĩribũ gũa.

24 Gũa eroparĩcũ peegu ĩgũ yũhrimi igore:

—Israe majarã oveja dederenirã iro dopa árĩrã dihtare itamudoregũ obeomi yũ Pagũ yũre, arĩmi ĩgũ.

25 Ĩgũ eroparĩcũ ta Jesu guburi pohro merejamo igo.

—M̃hũ eropa arĩqueregũ itamuque yũre, arĩmo igo.

26 Jesu yũhrimi igore:

—Wihi opũ porã ya barire diayeare ocũ õabeaa. Eropa arĩgũ, Israe masa yare gaji yeba majarãre yũ ocũ õabeaa, arĩ weremi Jesu igore.

27 —Eropa ta ãhraa, Opũ. Eropa arĩquerecũ barisubu dijarire diayea sã bacohrema. Gaji yeba majago yũ arĩquerecũ ta yũ sãre itamuque m̃hũ, arĩ yũhrimo igo.

28 Igo eroparĩcũ ĩgũ yũhrimi:

—M̃hũ nomeo, yũre bũrigã umupeoa. Mũ gamero dopa ta eropa waroca, arĩmi Jesu igore.

Ĩgũ eroparĩcũ ta igo mago mata õago wapo.

Bajarã dorecũrãre õarã wacũ iĩñumi Jesu

29 Eropa arĩtuhaja gũare sihu waha, Galilea waĩcũriya tũro pohrogue sihu ejami daja. Pũhrũ utãgũgue m̃ria, erogue doajami.

30 Ero ĩgũ doacũ masa bajarã erama. Eropirã bajarã dorecũrãre aĩ erama. Curimasibirãre, cuiiri ñhajabirãre, yujupũ ñero guburucũrãre, apayuriri árĩrãre, wereniguimasibirãre, bajarã gajirã dorecũrãre ĩgũ pohrogue aĩ erama masa. Eropa aĩ erarã Jesu guburi pohrogã apima erã. Erã eropa duhupira pũhrũ õarã wacũ iĩmi Jesu erãre.

31 Ĩgũ eropa iicũ ñarã masa ñhamaria wama. Wereniguimasibirinirã erã wereniguicũ ñarã, apayuriri árĩnirã erã

ōarā wacū ĩarā, curimasibirinirā erā curicū ĩarā, cuiiri ĩhajabirinirā erā ĩacū ĩarā, ĩhamaria wama erā. Eropirā ōpa arīma:

—Mari Israe majarā mari Opu Goāmū turagu ōagu āhrimi, arī umupeoma erā Goāmure.

*Cuatro mil gohrare masa bajarāre barire oñumi Jesu
Mr 8.1-10*

³² Īgu eropa iira pūhrū Jesu guare ĩgu buherāre sihubeo arīmi:

—Oā masa yu mera ũhrenu gohra árĩtuhajama. Erāre bari pehrea waca. Eropigu erāre mojomoro ĩhaa. Erā babiriquererā erā ya wirigue dujaacū gamebirica. Mague warā erā oaboarā turabiribocoma. Eropigu erāre bari ejotudiaca, arīmi ĩgu.

³³ Īgu eroparĩcū gua ĩgu buherā ĩgure serēpibū:

—¿Duhpii mari ōguere masa mariroguere barire bococuri erā bajarā masare ejoburire? arībū gua ĩgure.

³⁴ —¿Dinucū dipuru pan dipurure opari maa? arīmi guare.

—Siete pan dipuru, bajamerāgā waire opaa, arī yāhrībū gua.

³⁵ Gua eroparĩcū peegu ĩgu masare taa weca doadoremī.

³⁶ Tuhajanugu siete pan dipurure, waigā sāre aī, ĩgu Pagure “Ōhaa,” arī serētuhaja, pan dipurure nuha, guare ĩgu buherāre omī. Eropirā gua ĩgu buherā iri barire masare guerebū.

³⁷ Eropirā masa irire baha, yapia wama. Erā ba dūharare siete puiri gohra aī gameneo ũjatu dobobū gua.

³⁸ Ero banirāre ũma dihtare queocū cuatro mil gohra arīma. Nome, majirāgā sā árĩma.

³⁹ Erā eropa batuhajacū Jesu masare goerisere, dohodirugue ñaja, Magdala waĩcūri yebague guare sihu ejami.

16

Fariseo masa, saduceo masa sā Goāmū turari mera deyoro moarire Jesu iicū ĩadiariñuma

Mr 8.11-13; Lc 12.54-56

¹ Eropi fariseo masa, saduceo masa mera Jesu pohroque erama. “Īgu Goāmū ĩgu obeodigu árĩbeami,” arī ĩadiariñuma. Eropirā ĩgure Goāmū turari mera deyoro moarire ĩgu ii ĩhmucū gamerima. Īgu ii ĩhmmasibiricū “Goāmū obeodigu árĩbeami,” arĩdiarima.

² Erā ĩgure deyoro moarire eropa iidorecū Jesu yāhrimi erāre:

—Ñami wacũ necã õaro boyocũ ïarã “Õari ñami áriroca,” arãa mũa.

³ Eropirã boyoropũre ñipicũ ïarã, “Deco ariroca,” arãa mũa. Ûmarore ïhamemujurã, “Õpa waroca,” arĩ masia mũa. Eropa õaro masiquererã ta dohpague Goãmũ turari mera mũare yũ ii ïhmuquerecũ ta ne irire õaro masibea mũa.

⁴ Dohpague majarã ñetariarã Goãmũre gamebirã Goãmũ turari mera ii ïhmurire ïadiarima. Deyoro moarire ii ïhmusome yũhũ. Goãmũ yare weremũhtadigũ Jona mũrũ ïgũre wadirore masituhã mũa. Iri dihtare ïhmugũra mũare, arĩ yũhrimi Jesu.

Eropa arĩ weretuhaja gũare sihu waha wami daja.

Fariseo masa saduceo masa erã ñeri buherire wereñumi Jesu

Mr 8.14-21

⁵ Wũari ditarugue gũa taribujarã panre cãdijicãnirã árĩribũ.

⁶ Eropigũ Jesu gũare weremi:

—Fariseo masa saduceo masa erã pan buãacũ iiburire õaro masique mũa. Gũhya ãhraa, arĩ weremi gũare:

⁷ ïgũ eroparĩcũ pee wisirã gũa basi irire wereniguibũ.

—Mari panre mari aĩgãribiricũ ïagũ eropa arĩcumĩ ïgũ, arĩ pepiribũ gũa.

⁸ Gũa eropa arĩrare masigũ, gũare serẽpimi:

—¿Duhpirã panre mũa cãdijirare guñari mũa? Merogã gohra yũre umupeoa mũa.

⁹ ¿Masinibeari mũa? ¿Cinco mil ãmare cinco pan dipurure yũ nuha orare guñabeari mũa? ¿Erã baha yapira pũhũ doce puiĩ gohra mũa ãjũtu doborare guñabeari mũa?

¹⁰ ¿Eropirã daja siete pan dipurure nuha, cuatro mil ãmare yũ ora sãre guñabeari mũa? ¿Erã baha yapira pũhũ dinũcũ puiĩ gohra mũa ãjũtu doborare guñabeari mũa?

¹¹ ¿Eropirã pan buãacũ iiburire yũ wercũ duhpirã õaro peebeari mũa? Eropa arĩgũ pan gohrare arĩgũ iibea. Fariseo masa, saduceo masa erã pan buãacũ iiburire õaro iique, arĩgũ pan gohrare arĩgũ iibea, arĩ weremi ïgũ gũare.

¹² ïgũ eropa arĩ wercũ gũa masibũ. “Pan buãacũ iiburire,” arĩgũ pan gohrare arĩgũ iibirimi. Eropa arĩgũ fariseo masa, saduceo masa erã buherire arĩgũ iidĩ árĩrimi gũare. “Erã ya buherire pebiricãque,” arĩgũ iimi.

*Jesu diaye ta Cristo ïgũ árĩrĩre wereñumi Pedro
Mr 8.27-30; Lc 9.18-21*

13 Eropi Jesu mera warã Cesarea Filipino waĩcũri maca pohro árĩri macague ejabu gũa. Eropigu iri macague gũa ejara pũhrũ Jesu guare ĩgu buherãre serẽpiĩami:

—¿Nihino árĩcuri yũhũ masa erã pepicũ? arĩ serẽpimi ĩgu.

14 —“Ñu waĩyegũ ãhrimi,” arĩma mũre gajirã. Gajirã “Elia ãhrimi,” arĩma. Gajirãpũ “Jeremia árĩbocumi o gajigu Goãmũ yare weremuhtanirã mera majagu árĩbocumi,” arĩma, arĩ yũhribũ gũa ĩgure.

15 —¿Mũarũ pepicũ nihino árĩcuri yũhũ? arĩ serẽpimi ĩgu guare daja.

16 Simo Pedropũ yũhrimi:

—Mũhũ Cristo Goãmũ obeodigu ãhraa. Goãmũ ojocarigu magũ ãhraa mũhũ, arĩ yũhrimi Simo Pedro.

17 —Simo, Jona magũ, mũhũ mucubirigu ãhraa. Őpa arĩ mũ yũre yũhrira masa erã werera árĩbeaa. Yũ Pagũ umaro majagũpũ irire mũre masicũ iiami.

18 Mũre arĩgu tiiãa. Mũhũ Pedro waĩcũgu ãhraa. (Pedro arĩgu utãye arĩgu iipũ.) Iye utãye weca wũari wihire yũ iibodiro dopa ta yaharãpũre yuju curu wũari curu árĩcũ iigũca yũhũ. Eropigu watĩ ĩgu yarã mera yaharãre tarinũgasome. Eropirã yaharã ne peamegue wasome.

19 Őmaro majagu mari Opũ ĩgu árĩro maja sawire mũre ogũra. Eropigu i yebaguere mũ iidorebircũ yũ sã umarogue árĩgu iidoresome. I yebaguere mũ iidorecũ umarogue yũ sã iidoregũra, arĩmi Jesu.

20 ĩgu eropa arĩra pũhrũ guare ĩgu buherãre weremi:

—Yũre “Cristo ãhrimi ĩgu,” ne arĩ weresibiricãque gajirãre, arĩmi guare.

Jesu ĩgu sĩriburiĩhere, ĩgu masa mũriaburiĩe sãre wereĩumi

Mr 8.31–9.1; Lc 9.22–27

21 Irisubure ta Jesu guare ĩgu buherãre õaro werepehonũgami:

—Jerusalẽngue yũre waro gahmea dohpaguere. Erogue majarã, mũrã, pahia oparã, mari masare buherã sã yũre ñero iirãcoma. Eropirã yũre wejẽrãcoma. Eropa ta ñero tariro gahmea yũre. Eropigu uhrenũ pũhrũ ta masa mũriagũca, arĩ weremi guare ĩgu.

22 ĩgu eroparĩcũ peegu Pedropũ gajipũ ñarigã Jesure aĩgã, ĩgure õpa arĩmi:

—Opũ, eropa arĩbiricãque. Mũ arĩro dopa wabiricãporo. Mũre erã wejẽbiricãporo, arĩrimi ĩgu Jesure.

23 ĩgu eroparĩcũ peegu Jesu majinũgaja, ĩgure õpa arĩmi:

—Satana iro dopa wereniguigu iiaa mũhũ. Eropa arĩbiricãque. Mũ pepiri masa ya pepiri ãhraa. Goãmu ya pepiri árĩbeaa. Eropigu yũ iiborore cãhmotadiaa mũhũ, arĩmi Jesu Pedrore.

²⁴ Ìgu eropa arĩra pũhrũ guare weremi:

—Yujugu yũ mera majagu árĩdiagu, ìgu gamero iidiarire duhucãgũcumi. Eropigu ìgu yũ mera majagu árĩri dipuwaja ñero tarigũcumi. Eropa ñero tariqueregu ta yahare iinigu-icãgu árĩgũcumi.

²⁵ Yujugu masũ ìgu ya árĩburi dihtare pepigu ìgu dederea wagũcumi. Eropigu yujugu masũ yaha árĩburi dihtare iigu árĩpehrerĩnũri yũ mera umarogue òaro árĩgũcumi ìgu.

²⁶ Yujugu masũ i yeba majare árĩpehrerire opaqueregu peamegue wagu òarire wajasome. Eropigu i yebague opaburi dihtare guñagu, ìgu sĩrigũ waburire guñabigu ìgu sĩporã mera peamegue dederegũcumi.

²⁷ Yũhũ masũ Goãmu obeodigu yaharã anyua mera i yebague dujarigũca. Yũ Pagũ ìgu goesiriri mera dujarigu árĩpehrerã masare erã ñeri iira dipuwaja dipuwaja moagũra. Erã òaripũre erã iicũ òaro iigũra erãre.

²⁸ Diaye arĩgu tiiaa. Yujurãyeri mua òguere arĩrã mua sĩriboro core yũre yũ opu arigu árĩcũgue ãarãca, arĩ weremi Jesu.

17

Jesu ìgu dũpũre gohrotoñumi

Mr 9.2-13; Lc 9.28-36

¹ Eropi seis nũri pũhrũ Jesu Pedrore, Santiagore, ìgu pagu magũ Ñũ sãre umadigu utãgũgue erã dihtare sihumũriapũ.

² Umarogue erã mũrijara pũhrũ erã ìhabeoro ìgu dũpũre gohrotopũ. Ìgu diapo abe umũ majagu iro dopa gohra goesiriyoro. Eropiro ìgu suhri goesiriri suhri òaro boreriñe wayoro.

³ Mata iribojegue majarã Moise mũrũ Elia mũrũ sã dehyoãnorã. Eropirã Jesu, Moise, Elia mera ìgu weretamucũ ããnorã erã urerã ìgu buherã.

⁴ Eropigu Pedro Jesure arĩpũ:

—Opu, mari ohõ árĩcũ òadiaa. Mũ gamecũ uhre wihigã iirã. Mũ ya wihigã, Moise ya wihigã, Elia ya wihigã iirã mari, arĩpũ.

⁵ Ìgu eropa arĩ wereniguirisubu, imica curu òaro goesiriri curu erãre cãhmotacãyoro. Eropa wacũ imica curu pohecague Goãmu ìgu wereniguirĩ busũyoro:

—Ihĩ yu magu yu mahigu aħrimi. Īgu mera mucubiria. Īgure peeque, arĩri busuyoro.

⁶ Eropa arĩro caricũ peerã Īgu buherã uca mehmereja wañorã.

⁷ Erã eropa wara pũru Jesu erã pohrogue eja, erãre buacare ñahrũ:

—Wahgãnuɗaque mua. Gũbircãque, arĩpu Īgu erãre.

⁸ Īgu eroparĩcũ erã ihabeo, Jesu dihtare ñañorã. Gajirãre ñabiriñorã.

⁹ Eropirã utãɗugue erã dijaricũ Jesu erãre turaro mera arĩpu:

—Dohparagã yure eropa warare gajirãre ne werebircãque. Yũhu masu Goãmu Īgu obeodigu yũhu sĩri masa m̄ariara pũru irire gajirãre wereque mua, arĩpu Jesu.

¹⁰ Īgu buherãpu Īgure serẽpiñorã:

—“Cristo Goãmu beyedigu Īgu ariboro core Eliare arimũhtaro gahmea,” arĩma masare buherã. ¿Dohpa arĩronore eropa arĩri erã? arĩ serẽpiñorã erã Īgure:

¹¹ Jesu yũhrĩpu:

—Diaye ta aħraa. Eliare arimũhtadoremĩ Goãmu arĩpehrerire amumũhtabure.

¹² Ōpa arĩgu mũare arĩgu iiaa. Elia eratuħajami. Īgu eropa eraquerecũ ta erã Īgure ne ñha masibirima. Eropirã erã gamero dopa ñero iinirã arĩma Īgure. Eropa ta iirãcoma yu masure Goãmu Īgu obeodigure. Erã eropa iicũ ñero tarigũca yũhu, arĩpu Jesu.

¹³ Īgu eropa arĩ werecũ erã peeñorã. “Elia,” arĩgu, Ñu waĩyegure weregu iipũ. Irire masiñorã pare erã.

Jesu ñama sĩriri m̄urare dorecũgure tauñumi

Mr 9.14-29; Lc 9.37-43

¹⁴ Eropirã utãɗugue m̄arijanirã erã urerã Jesu mera dijararã gũa pohrogue erama bajarã masa arĩrogue. Erã eracũ ñagu yujugu umu Jesu pohrogue eja, merejami.

¹⁵ —Opũ, yu magure mojomoro ñaque. Īgu ñama sĩriri m̄urare dorecũgu aħrimi. Eropigu Īgu ñetariaro tarimi. Bajasuburi peamegue mehmerejamũrimi Īgu. Yujuyerisuburi diaguere yuri ñajamũrimi.

¹⁶ Eropigu mu buherã pohrogue aĩ erarabũ. Erã Īgure ōagu wacũ iimasibirama, arĩmi Īgu Jesure.

¹⁷ Jesu arĩmi ero arĩrãre:

—Dohpague majarã mua ñerã aħraa. ¿Yure ne umupeo-birigohracãri? Yoari boje mũare buherabũ yũhu. ¿Dipẽ yoari boje yure mua garibori? Īgure aĩgãrique yure, arĩmi Jesu.

18 Īḡu majiḡure erã ai eratuhaġacũ ĩha Jesu watĩre tuhri cõãmi. Eropiḡu mata õaḡu wami ĩḡu maḡu.

19 Pũhrũ ḡua ĩḡu buherã ḡua seyaro árĩrã Jesure serẽpibũ:
—¿Duhpirã ḡuarũ ĩḡu maḡure watĩre cõãmasibirayuri? arĩ serẽpibũ ḡua.

20 Jesu yũhrimi:

—Yũre daberogã umupeoa mũa. Diaye ta mũare wereḡu ĩiaa. Goãmũre “Diaye ta iḡu ãhrimi,” mũa arĩ umupeorã miriyegã mostazaye pegã mũa umupeoquererã iriḡu utãḡure “Sohõḡue waque,” mũa arĩcũ, waha waroca. Goãmũre eropa umupeorã árĩpehrerire iimasia mũa.

21 Ino watĩre mũa cõãdiarã Goãmũre bũriḡã serẽro ḡahmea mũare. Eropirã ba duhuo ḡahmea Goãmũre serẽmorã, arĩmi Jesu ḡuare.

Dipaturi Jesu ĩḡu sĩriburiñere ĩḡu masa mũriaburiñe sãre wereñumi

Mr 9.30-32; Lc 9.43-45

22 Eropi Galilea yebague ḡua curicũ, Jesu ḡuare weremi:

—Yũhũ masũ Goãmũ ĩḡu obeodigũ ãhraa. Masa yũre ñeha, ḡajirãḡuere yũre wiarãcoma.

23 Eropa yũre erã wiara pũhrũ wejẽrãcoma erã. Eropa erã wejẽdigũ uhrenũ pũhrũ masagũca, arĩmi ĩḡu ḡuare.

Īḡu eropa arĩ werecũ pee bũriḡã bujawerebũ ḡua.

Goãmũ wihi maja wajayeburire serẽpiñuma ḡajirã

24 Eropirã Capernaum macague ḡua ejacũ, Goãmũ wihi maja wajayeburire wajasea corerã Pedro pohroḡue eja, ĩḡure serẽpiñama:

—¿Mũare buheḡu Goãmũ wihi maja árĩburire wajayeri ĩḡu? arĩ serẽpima erã.

25 —Wajayemi ĩḡu, arĩ yũhrimi Pedro.

Īḡu eropa arĩra pũhrũ wihigũ ĩḡu ñajacũ ta Jesu Pedrore serẽpimũhtami:

—Simo, ¿dohpa arĩ pepiri mũhũ? ¿I yeba majarã oparã ñehmarãpũre waja aĩri mũ pepicũ? ¿Erã mera majarãre wajaseari? ¿O ḡaji yeba majarãpũre wajaseari? arĩ serẽpimi ĩḡu Pedrore.

26 —ḡaji yeba majarãpũre wajaseama, arĩ yũhrimi Pedro.

Īḡu eroparĩcũ Jesu weremi:

—Eropiḡu opu ĩḡu ya yeba majarãre wajaseabirimũririmi.

27 Eropa árĩquerẽcũ ta wajasea corerãre ḡuacũ iidiabea mari. Eropirã wajayerãca. Ditarugũ waque. Eroḡue eja wejericãrore mehyuque. Eropiḡu waimũ bamũhtadigũre tara suaque. Eropiḡu ĩḡu waimũ disiroḡue niyerusere

bocajaguca mũhũ. Irise queoro wajacuroca. Yũre, mũa sãre Goãmũ wihi maja árĩburire erã wajaseacũ ðaro queoro sihajaroca irise. Irisere bocajagu mari wajamoriñere wajayepehogu waque, arĩmi Jesu Pedrore.

18

Jesu ïgu buherãre erã weca opu árĩbure wereñumi

Mr 9.33-37; Lc 9.46-48

¹ Irisubure gũa Jesu buherã ïgu pohrogue eja serẽpibu ïgure:

—¿Umaro majagu ïgu opu árĩroguere gũa mera majagu nihino wabocuri árĩpehrerã weca opu? arĩ serẽpibu gũa.

² Gũa eroparĩcũ Jesu majigũgãre sihubeo, ïgũgãre gũa watope duhudobomi. Duhudobotuhaja gũare arĩmi.

³ —Diaye mũare were purumujugũra. Oã majirãgã Goãmũre erã opu gohra pepima. Eropirã mũa sã erã iro dopa ta pepirã, ðarire gohrotorã umaro majagu opu árĩroguere warãca. Erã iro dopa pepibirã opu ïgu árĩroguere wasome mũa.

⁴ Eropigu umaro majagu ïgu opu árĩroguere eropa pepicãgu, ihĩ majigũgã dopa pepigu ta gajirã tauro opu wahami.

⁵ Eropirã yahare iimorã ðpa árĩgũgãre gamerã, yũ sãre gahmea mũa, arĩ weremi Jesu gũare.

Ñerire iicũ gũhya ãhraa arĩ wereñumi Jesu

Mr 9.42-48; Lc 17.1-2

⁶ Eropigu ðpa werenemomi:

—Ïgã dopa árĩgu yũre ne umupeogure weregũra mũare. Yujugu ïgã iro dopa árĩgure ñerire iidoredigu ïgu ñetariaro tarigucumi. Gajigure masa ïgu wunugure wũariye utãye mera dirisiu, wũariyague ïgure cóãcũ ñero wabocumi ïgu. Eropigu ïgã dopa árĩgure ñerire iidoredigupũ wũariyague erã cóãdigũ tauro ñero tarigucumi. Ïgu turaro dipuwaja moasũgucumi.

⁷ Masare ñerire iicũ iiri ãhraa. Irire iirã i yeba majarã ñero tarima. Gajirã ñerire iidorema gajirã masare. Erã ñerire iidorenirãpũ erã tauro ñetariaro tarirãcoma.

⁸ “Mũ mojoto mera ñero iigu iri mojotore mũ tabe cóãbodiropũ dopa ta iri ñerire duhuque. Irire duhubigu peamegue wagũca. Eroguere ne peame yaribea. Mũ mojotore mũ cóãcũ iri dũca dihta cohmoboya. Eropigu mũpũ epasi árĩqueregũ ta pũhrũ Goãmũ mera árĩgũca. Mũ pe mojoto mera árĩgure peamegue ïgu cóãcũ ñetariaro tarigũca. Eropigu iri ñeri iiripũre duhuque. Mũ guburu mera ñero iigu iri guburu sãre mũ tabe cóãbodiropũ dopa

ta iri ñerire duhuque. Irire duhubigu peamegue waguca. Eroguere ne peame yaribea. Mũ guburure mũ cóãcũ irisi dihta cohmoboya. Eropigu epasi árĩqueregu ta puhru Goãmũ mera árĩgũca. Mũhũ pe guburu mera árĩgũre mũre peamegue cóãcũ mũ ñetariaro tarigũca. Eropigu iri ñeri iiripũre duhuque.

⁹ Mũ cuiru mera ñero iigu irirure mũ gorawea cóãbodiropo ta iri ñerire duhuque. Irire duhubigu peamegue waguca. Eroguere ne peame yaribea. Mũ cuirure cóãcũ iriru dihta cohmoboya. Yujupũ cuiru mariquerecũ ta puhru Goãmũ mera árĩgũca. Mũre pe cuiru mera árĩgũre peamegue mũre cóãcũ, mũ ñetariaro tarigũca. Eropigu iri ñeri iiripũre duhucãque, arĩmi Jesu.

Oveja dederedigu queorire wereñumi Jesu

Lc 15.3-7

¹⁰ Eropigu gũa sãre werenemomi:

—Ne, oã majirãgãre doobiricãque. Mũare arĩgu tiiaa. Erãgãre ñhadiburã anyua umarogue yũ Pagũ pohroguero epa árĩnguima.

¹¹ Yũhũ masũ Goãmũ ñgu obeodigu i yebague dederebonirãre taugu arigu iibu yũhũ, arĩ weremi Jesu.

¹² Eropa arĩtuha òpa arĩ queorire ahmu wereniguimi.

—Ovejare ñhadibugũ cien ovejare opagu yujugũ oveja dederea wacũ ñagu òpa iigũcumu erãre ñhadibugũpũ. Gajirã ovejare noventa y nueve ovejare erã bari campogue duhudo, dederedigure amagu wagũcumu.

¹³ Diaye ta arĩgu iiaa mũare. Ñgũre bocagu burigã mucubirigũcumu ñgu. Gajirã noventa y nueve duhyarã mera mucubiridigu árĩqueregu erã tauro ñgu bocadigũpũre mucubirigũcumu.

¹⁴ Eropa ta mari Pagũ umaro majagu oãgã iro dopa árĩrã sãre erã dederecũ gamebeami, arĩmi Jesu.

Mũ acaweregu mũre ñero iicũ òpa iique, arĩñumi Jesu

Lc 17.3

¹⁵ Eropa arĩtuhaja òpa werenemomi Jesu:

—Mũ acaweregu mũre ñero iicũ ñgu mera weretamugu waque. Mũa seyaro irire weretamuque. Mũ eropa iicũ ñgu mũre peebocumi. Ñgu peecũ “Mũre dipaturi ne òpa iisome yũhũ,” ñgu arĩcũ mũ acaweregu dipaturi wapicũ iigũca mũhũ.

¹⁶ Mũre ñgu peediabiricũ tamerare yujugũ mera wadiagu, o perã mera wadiagu, erãre wapicũgã dipaturi ñgũre wereniguigu waque daja “Erã sã peeporo,” arĩgu.

¹⁷ Eropigu mũ mera majarã sãre ñgu peediabiricũ árĩpehrerã Jesu yarã mera gamenere ñgũre weresãque.

Eropirã Jesu yarã gamenererã sãre ïgu peediabiricũ ïarã Goãmure masibigu ñegu árïro dopa iique ïgure.

18 “Diaye ta mware arïgu iiaa. I yeba mua yaharã yaha dorerire oparãca. Eropirã mua i yebare iidorebirirare yu sã ãmarogue arïgu iidoresome. I yeba mua iidorerare yu sã ãmarogue iidoregũca.

19 “Dipaturi mware ire weregura daja: Mua perã Goãmure sererã, yujuro mera pepirã árïcã, yu Pagu ãmaro majagu irire mware ogucumi.

20 Perã o ãrerã yaharã yahare iimorã erã gamenerecũ yu sã erã mera ãhraa, arï weremi Jesu.

21 Pũhrũ Pedro Jesu pohrogue eja serẽpimi:

—Opũ, ¿yu acaweregũ mu yagu ïgu dinucusuburi yure ñero iicũ ïagu irire cãdijitugucuri yũhũ? ¿O siete suburi ïgu iicũ cãdijitugucuri yũhũ? arï serẽpimi Pedro.

22 Jesu yũhrimi:

—Sietesuburi dihta mure ïgu ñero iirare mu cãdijicũ ero wabeaa. Bajasuburi ïgu mure ñero iicũ sãre cãdijique, arïmi ïgure.

Pohro majagu gajigu ïgu wajamorare ïgu cãdijidiabirira queorire wereñumi Jesu

23 Eropigu Jesu õpa werenemomi guare:

—Õmaro majagu opu árïri werediacũ õpa ãhraa. Yujugu opu ïgu pohro majarãre erã ïgure wajamorare wajayephe dorediariñumi.

24 Erã wajamorare ïgu queonugacũ, ïgure mohme corerãpu wũaro wajamogure ïgu pohrogue aïgãriñuma. Wajamogupũ wũaro wajamoñumi opure.

25 Eropigu ïgu wajayemasibiricũ ïagu ïgu opu ïgure, ïgu marapore, ïgu porã sãre pohro majarã acu, erãre gajirãre duadiariñumi ïgu wajamofire wajaseagu.

26 ïgu eropa duadiacũ wũaro wajamogupũ mereja, ïgu opure turaro serẽñumi: “Opũ, guare gajirãre duabiricãque. Mojomoro ïagu corenique. Mure wajayephehogũca,” arïñumi ïgu ïgu opure.

27 ïgu eroparicũ peegu ïgure mojomoro ïagu, ïgu wajamorare eropa ta cãdijipehocãñumi.

28 “ïgu eropa iira pũhrũ wajamodigupũ waha, gajigu pohro majagure bocajañumi. ïgupũ merogã wajamoñumi ïgure wajamodigupure. Eropa bocajagu yojaro mera ñeañumi ïgure. “Yure mu wajamorare wajaye purumujuque duru,” arïñumi ïgu ïgu mera majagure.

29 ïgu eroparicũ gajigu pohro majagupũ mereja ïgure burigã sereriñumi: “Yure mojomoro ïaque. Merogã

corenique. Mure wajayepehogura," arĩriñumi gajigu pohro majagu ĩgure.

³⁰ ĩgu eropa arĩ serēquerecũ ta ĩgu yuhribiriñumi. Eropigu ĩgu gajigu pohro majagupure peresu iidoreñumi ne ĩgu wajayepehocũgue.

³¹ Wũaro wajamodigu ĩgure merogã wajamogupure ĩgu eropa iicũ ĩha papũri, gajirã pohro majarãpũ erã opure weresãrã wañuma.

³² Erã eropa arĩ weresãcũ peegu erã opu erãre weresãdigure sihubeo õpa arĩñumi: "Mũhu ñetariagu ãhraa. Mũhu yure burigã serēcũ mu wajamorare cãdijipehocãrabugũ yũhu mure.

³³ Mure yũ eropa iiquerecũ ta mũpũ merogã wajamogupure cãdijibirayoro mũhu. Mu wajamorare yũ cãdijidiro dopa ta ĩgu sãre mu cãdijicũ õatariaboya. ¿Duh-pigu ĩgure mojomoro ĩabirari ĩgure eropa iigu mũhu?" arĩñumi ĩgu opu ĩgure.

³⁴ Eropa arĩgu burigã guagu, peresu iĩñumi ĩgu pohro majagure ne ĩgu wajayepehocũgue, arĩ weremi Jesu.

³⁵ Eropigu õpa arĩ i queorire weretumi:

—Eropa ta iigucumi yũ Pagu umaro majagu mũare. Mũa árĩpehrerã mũa acawererã mũare ñero iirare õaro mũa cãdijipehobiricũ ĩgu mũare dipuwaja moagucumi, arĩmi Jesu.

19

*Erã marasã nomere erã cóãcũ õabeaa, arĩ wereñumi Jesu
Mr 10.1-12; Lc 16.18*

¹ Irire ĩgu eropa arĩ werera pũru ĩgu Galilea árĩdigu Judea yebague guare sihu wami. Dia Jordán waĩcũriya gajipũ masegue ejabu.

² Eroque gua wacũ bajarã masa guare nurusiagãma. Erã mera majarãre dorecurãre õarã wacũ iimi ĩgu.

³ Eropi yujurãyeri fariseo masa gua pohro erama. Jesure weresãdiarã, ñero ĩgu wereniguicũ peediarã, ĩgure õpa serẽpima:

—¿Mari marapore mari gamero cóãcũ õhari? ¿Mari doreripũ eropa ta iidoreri mu pepicũ? arĩ serẽpima erã.

⁴ Jesu yuhrimi.

—¿Goãmũ yare erã gojarapũgue ne ire buhebiriniari mũa? Õpa arĩ gojara ãhraa: "Negohraguere i yebare ĩhacũnugudigu mũũ, nomeo sãre iipũ," arĩ gojañumi Moise.

⁵ Õpa ãhraa ĩgu arĩ gojanemora: "Eropigu mũũ ĩgu pagu sũmarãre cohã wiria, ĩgu marapo mera árĩgucumi. Eropirã

erã perã árĩquererã ta yuju dũpũ iro dopa ta árĩrãcoma," arĩ gojañumi.

⁶ Eropirã erã perã iro dopa árĩbeama. Yuju dũpũ iro dopa ta árĩrã iima. Goãmũ doreri mera mojoto dirima. Eropirã duhubiricãro gahmea erãre, arĩmi Jesu erãre.

⁷ Īgũ eroparĩcũ fariseo masa serẽpima daja:

—Mũhũ eropa werequerecũ ta õpa arĩ gojañumi Moiserũ: "Mũ marapore cóãdiagũ paperapũgue irire gojaque. Eropa gojagũ iripũre mũ marapore mũ ora pũhrũ igore cóãmasia mũhũ," arĩ gojañumi Moise. ¿Mũ arĩro dopa arĩquerecũ ta duhpigũ Moiserũ eropa arĩ gojayuri? arĩ yũhrima erã ĩgũre.

⁸ Jesu yũhri gamemi erãre:

—Goãmũ dorerire mũa ñecũ sũmarã erã iidiabiricũ ĩagũ "Eropa ta wacuraporo," arĩgũ, "Mũa marapore cóãmasia," arĩ gojañumi Moise. Īgũ eropa arĩ gojara árĩquerecũ ta negohraguere mũa marasã nomere cóãcũ gamebiripũ.

⁹ Mũare arĩgũ tiiaa: Masũ ĩgũ marapo igo gajigũ mera ñero iibiriquerecũ ta igore cóãgũ, gajigo mera marapocũgũ, ĩgũ gajigo mera ñero iigũ iimi. Eropigũ ihĩ cóãdigo mera marapocũgũ sã igo mera ñero iigũ iimi, arĩmi Jesu.

¹⁰ Īgũ eroparĩcũ peerã, gũa ĩgũ buherãpũ õpa arĩbũ:

—Eropa mũmũ ĩgũ marapo mera erã game cóãbiricũ, maripũre ne marapo marirã árĩcũ õaboca gũare, arĩbũ gũa.

¹¹ Jesu yũhrimi gũare:

—Mũa arĩro dopa ta árĩpehrerã árĩmasibeama. Goãmũ marapocũdorebirinirã dihta eropa árĩmasima.

¹² Ũma marapocũmasibirã yujurãyeri ãhrima. Yujurãyeri mũma ero ta poyari masa mata nomere gamebirã masa dehyoama. Gajirã masa erã ãpiritõ diuri erã weanirãpũ marapocũmasibeama. Gajirã mũma mũmaro majagũ erã Opũ yare itamudiarã marapocũbeama. Eropirã oã marapocũdiabirã eropa ta pepicãrã, eropa ta erã árĩ ojogorocũcũ õhaa, arĩmi Jesu gũare.

*Majirãgã ya árĩburire Goãmũre serẽbasañumi Jesu
Mr 10.13-16; Lc 18.15-17*

¹³ Eropi masa majirãgãre Jesure mohmepiñadoremorã Jesu pohrogue aĩ erama. Eropa aĩ erarã, erã Jesure ĩgũ mojtore erãgãre mohmepidorediama. Eropirã erãgãre erã õaro árĩburire Goãmũre serẽbasadorediama Jesure. Erã eropa iicũ ĩarã gũa ĩgũ buherã erãre turiribũ.

¹⁴ Gũa eropa turicũ ĩagũ, gũare Jesu õpa arĩmi:

—Majirãgã yũ pohrogue ariporo. "Waque," arĩbiricãque erãgãre. Erãgã Goãmũre erã opũ pepima. Eropirã ĩgũ

umaro majagu ĩgu opa áriroguere oãgã iro dopa pepirã áhrima eroguere, arĩmi Jesu.

15 Eropa arĩtuhaja erã majirãgãre mohmepituhaja waha wami.

Doberi opagu Jesu mera weretamuñumi

Mr 10.17-31; Lc 18.18-30

16 ĩgu eropa iira puhru yujugu masu mamu Jesu pohroguere eraa, serẽpimi ĩgure:

—Ne muhu ðagu buhegu áhrraa. ¿Yu arĩpehrerinuri Goãmu mera arĩdiagu, ðarire iidiagu dinopare iibocuri yuhu? arĩmi ĩgu.

17 —¿Dohpa arĩronore yure ðagu arĩ piyuri muhu? Goãmu dihta ðagu áhrrimi. Áripehrerinuri Goãmu mera arĩdiagu ĩgu dorerire iique, arĩmi Jesu.

18 —¿Di doreripure arĩgu iiri? arĩ serẽpinemomi ĩgu.

Jesu yuhrimi:

—Masare wejẽbircãque. Gajigu marapo mera arĩbita. Yajabita. Guyabita.

19 Mu pagu sumarãre umupeoque. Mu basi mahiro dopa ta mu pohro arĩgu sãre mahique. I dorerire iiro gahmea, arĩmi Jesu.

20 —I dorerire ne tarinugabirimurabu yuhu. ¿Ñeheno duhyari yu iinemoburi yu arĩpehrerinuri Goãmu mera arĩdiagu? arĩmi ĩgu Jesure.

21 ĩgu eroparĩcũ peegu Jesu werenemomi:

—Muhu Goãmu mera ðaro arĩdiagu mu yare arĩpehrerire duagu waque. Eropa duagu arĩpehreri niyerure mu wajatarare mojomorocãre oque. Mu eropa iicũ wuaro mu ya umaroguere Goãmu pohroguere arĩyuroca. Mu eropa iira puhru yu mera majagu arĩbu arique, arĩ weremi Jesu.

22 ĩgu wuaro opagu arĩpu. Eropigu Jesu ĩgure eroparĩcũ peegu ĩgu oparire mojomorocãre odiabigu, turaro bujawere suabiri waha wami.

23 ĩgu eropa wacũ Jesu guare ĩgu buherãre werenemomi:

—Diaye ta muare arĩgu iiaa. Doberi oparã Goãmure ĩgu opa áriroguere erã wadiacũ diasa áhrraa.

24 Muare werenemogura: Camellopu awiru gobegãgue ĩgu ñajatariwereadiacũ masiya mara ĩgure. Eropa ta doberi opagu Goãmu opa ĩgu áriroguere wacũ diasataria, arĩmi ĩgu.

25 ĩgu eroparĩcũ gua ñhamaria wa gua basi ðpa arĩbu:

—Yaho. Īḡu arĩro dopa ta diaye árĩcũ, ne yujugu masure Goãmũ taubiribocumi Īḡu pohro waborore, arĩbu gũa gũa basi.

²⁶ Gũa eroparĩcũ Jesu gũare ĩhabeo, õpa weremi:

—Masa erã bocatĩuro erã õaro iira mera Goãmũ pohroguere wamasibeama. Goãmũpũ masare peamegue wabonirãre taumasimi. Īḡu árĩpehrerire õaro ĩimasipehocãmi, arĩmi Īḡu gũare.

²⁷ Īḡu eroparĩcũ Pedro ĩḡure arĩmi:

—Peenique. Gũapũ gũa ya árĩpehrerire apipehocãbu mũ mera warã. ¿Gũa õpa iirã dohpa árĩrĩre wajatarãcuri gũa? arĩmi Īḡu.

²⁸ —Mũare diaye arĩḡu tĩaa: Pehrerinũ pũhrũ árĩpehreri mama gohrotoroca. Irisubuguere yũhũ masũ Goãmũ ĩḡu obeodigũ yũ opũ doaro gosesiro doagũca yũhũ. Yũhũ ero doacũ mũa sã doce gohra árĩnirã oparã árĩri mera doarãca. Eropirã Israe masare doce cururi majarãre beyerãca õarã sãre ñerã sãre.

²⁹ Eropirã mũa árĩpehrerã õari buherire yaha árĩburire ĩimorã, mũa wirire, mũa pagũ porãre, mũa pagũ sũmarãre, mũa porãre, mũa poerire apicãnirã wũaro wajatarãca. Eropirã árĩpehrerinũri Goãmũ mera õaro árĩrãca.

³⁰ Dohpaguere bajarã oparã árĩnirã mũra irisubuguere bu árĩrã dujarãcoma. Eropirã dohpaguere bajarã bu árĩnirã mũra irisubure oparã gohrotorãcoma daja, arĩ weremi Jesu gũare ĩḡu buherãre.

20

Īḡu pohe mohmerã queorire wereñumi Jesu

¹ Eropi dipaturi Jesu queorire weremi daja õpa arĩḡu:

—Õmaro majagu opũ ĩḡu árĩri werediacũ pohe opũ iro dopa ãhraa. Īḡu pohe opũ boyo pãri merejacũ ĩḡu pohere mohmemorãre sihũḡu wañumi.

² “Yujuse niyerusere yujunũ mohmeri wajare wajayegũra yujunũre,” arĩñumi. “Áũ,” arĩñuma mohmemorã. Erã eroparĩcũ pohegue mohmedoreḡu obeoñumi ĩḡu erãre.

³ Eropigũ umũgue nueve árĩcũ doberi duarogue wañumi daja. Eroque ejagũ, gajirã mohmehirãre ĩañumi.

⁴ Eropa ĩagũ erãre arĩñumi: “Mũa sã yaha pohere mohmerã waque. Õaro wajayegũra,” arĩñumi ĩḡu.

⁵ Eropirã erã pohegue mohmerã wañuma. Eropi pohe opũ goeri boje árĩcũ, ñamicague tres árĩcũ sãre gajirãre mohmedoreñumi daja.

⁶ Eropi ñamicague cinco árĩcũḡue doberi duarogue ĩḡu wañumi daja. Eroque eja gajirã mohmeri moorãre

ĩañumi. Erãre arĩñumi: “¿Ne gajino iibiriquererã yujunure ïaniguineacãri mua?” arĩ serẽpiñumi erãre.

⁷ “Ne guare mohmeri mara,” arĩ yuhriñuma erã. “Mua sã yaha pohere mohmerã waque,” arĩñumi erãre. Eropirã ïgu arĩdiro dopa ta ïgu ya pohere mohmerã wañuma.

⁸ “Eropi ñamicague mohme duhurisubugue árĩcũ pohe opu ïgu mohmerãre coregure õpa arĩñumi: “Mohmerãre sihuque. Erã eracũ erãre wajayeque. Erã pũhrũgue mohmedorenirãre wajayemũhtaque. Erãre wajayetuha, gajirã sãre wajayetuha, yũ mohmedoremũhtanirãre wajaye ojogorocũque,” arĩñumi ïgu.

⁹ Eropigu cinco árĩcũ mohmenũganirãre yujuse niyeruse wajayeyñumi.

¹⁰ ïgu eropa wajayecũ ïarã, “Guare tauñariro wajayegũcumi,” arĩ pepiriñuma ïgu doremũhtanirãpũ. Erã sãre yujuropa ta wajayecãñumi.

¹¹ Eropirã erãre niyerure ïgu wajayetuhajacũ erã opu mera papũri ïgure arĩñuma:

¹² “Oã gua pũhrũgue mũ mohmedorenirãpũ yuju hora ta mohmeama. Guapũ yujunũ õaro mohmeneacarabũ. Ñero abe asiama guare. Gua eropa yoari boje mohmequerecũ ta gua pũhrũgue mohmenũganirã sãre yujuropa wajayecãbũ mãhũ,” arĩ guañuma erã ïgu mera.

¹³ Erã eroparĩcũ peegu yujugu erã mera majagure pohe opu yuhriñumi: “Ne acaweregũ, yujuse niyerusere wajayegũra, arĩrabũ mũare. Yũ eroparĩcũ yuhriabũ mua. Eropigu yũ arĩdiro dopa ta mũare wajayeabũ yũhũ. Queoro wajayeabũ mũare. Ne yajabirabũ mũare.

¹⁴ Eropigu yũ wajayerare aĩ wihigue dujaaque. Ìre pũhrũ yũ mohmedoredigu sãre mũare yũ wajayediropẽ ta wajayegũra.

¹⁵ Yaha niyeru ãhraa i. Eropigu yũ gamero dopa ta i mera wajayegũra. ¿Gajirãre tauñariro yũ wajayecũ ïhaturiri mãhũ?” arĩñumi ïgu pohe opu, arĩ weremi iri queorire Jesu.

¹⁶ Eropa arĩgu werenemomi ïgu:

—I queori arĩro dopa ta yaharã árĩmũhtanirãre erã pũhrũ yaharã árĩnirã sãre yujuro mera ogũcumi Goãmũ ïgu ya õarire. Eropirã árĩmũhtanirãpũ “Guare onemogũcumi,” arĩmasibeama, arĩ weremi Jesu.

Dipaturi Jesu ïgu sĩriburiñere ïgu masa mũriaburiñere wereñumi

Mr 10.32-34; Lc 18.31-34

¹⁷ Eropi Jerusaléngue warã yujuro mera ta waniguirã, guare ïgu buherãre sihubeotuha, gajipũgue guare gua seyarore aĩgãmi Jesu. Gua seyaro gua árĩcũ weremi.

18 —Peeque yũre. Dohpaguere Jerusalengue warã iiaa mari. Erogue yũ masure Goãmũ ïgu obeodigure ñeha, gajirãre orãcoma. Pahia oparãre, masare buherã sãre yũre orãcoma. Eropirã yũre wejẽdorerãcoma erã.

19 Eropa wejẽdorerã judio masa árĩbirãre yũre orãcoma. Erã eropa ora pũhrũ erãpũ yũre wereya, tãrarãcoma. Tuhaja, crusague pabiarãcoma yũre. Eropigũ yũ sĩrira pũhrũre uhrenũ waboro gohra masa mũriaguca, arĩ weremi Jesu.

*Santiago, Ñũ mera erã pago erãre serẽbasapo Jesure
Mr 10.35-45*

20 Eropigo Zebedeo marapo Santiago, Ñũ igo porã mera Jesu pohrogue eja, merejapo ïgũre serẽbo arigo.

21 —¿Dohpa yũ iicũ gahmeri mũhũ? arĩpũ Jesu igore.

—Mũhũ opu ñajagu yũ porã sãre dorerã acunque. Eropa acugũ mũ pepari erãre doboque, arĩ serẽpo igo igo porã mera.

22 Jesu õpa arĩpũ:

—Mũa ñero tariborore masibiriquererã ta eropa serẽa mũa. ¿Dohpaguere yũ ñero tariboro dopa ta mũa sã ñero tarirã yujuro bojebocuri mũa? arĩpũ Jesu igo porãre.

—Yujuro bojerãca, arĩ yũhriñorã Santiago Ñũ mera.

23 —Diaye ta ãhraa. Yũ ñero taridiro dopa ta ñero tarirãca mũa sã. Eropa mũa tarimorã árĩquerecũ ta yũ mera doremorãre mũare yũhũ beyemasibea. Yũ Pagupũ amutuhami irire. Eropirã ïgu beyenirã dihta yũ diayepũre, yũ copupũre doarãcoma, arĩpũ Jesu erãre.

24 Eropirã gũa gajirã diez ïgu buherãpũ erã oparã árĩburire Jesure serẽcũ Santiago, Ñũ sã mera guabũ gũa.

25 Gũa eropa guacũ ïagu Jesu árĩpehrerã ïgu buherãre sihu gameneo, õpa arĩ weremi gũare:

—Goãmũre masibirã oparãpũ masare dorerã, pũriro mera dorema.

26 Mũapũ eropa iisome mũa basi. Mũa mera majagu opu árĩdiagu, árĩpehrerã ïgu mera majarãre itamugũ árĩporo.

27 Eropigũ árĩpehrerãre doregũ árĩdiagu pohro majagu iiro dopa ta árĩporo.

28 Eropa árĩgu ta ãhraa yũ sã. Masare dorebiragu arigu iibiribũ. Yũhũ masũ Goãmũ ïgu obeodigu árĩqueregũ ta i yebaguere masare itamugũ arigu iibũ. Eropigũ bajarã masa erã ñero iira dipuwajare sĩribasagu arigu iibũ. Eropigũ masa peamegue wabonirãre taugũ arigu iibũ, arĩmi Jesu gũare.

*Perã cuiiri ñhajabirãre ñacũ iĩnumi Jesu
Mr 10.46-52; Lc 18.35-43*

²⁹ Eropi Jericógue árñirã gua wacũ bajarã masa Jesure nurusiamã.

³⁰ Eropi Jesu ïgu tarigãcũ perã cuiri ïhajabirã ma turo doanirã peema. Eropa peerã õpa arĩ gaguiniguinemoma:

—Opũ Davi mũrũ pãrami, masare taubu, guare mojomoro ïaque, arĩ gaguinima.

³¹ Erã eropa gaguiniguicũ masapũ erãre turima.

—Ejarimaricãque, arĩma masa erãre. Erã eropa arĩquerecũ ta erã gaguiniguidero tauro gaguiniguinemoma daja.

—Opũ Davi mũrũ pãrami, guare mojomoro ïaque, arĩ gaguiniguima daja.

³² Erã eroparĩcũ peegu Jesu nũgaja erãre sihubeo serẽpimi,

—¿Dohpa yũ mũare iicũ gahmeri? arĩ serẽpimi.

³³ —Opũ, guare ïacũ iique, arĩ yũhrima erã.

³⁴ Erã eroparĩcũ Jesu erãre mojomoro ïami. Eropa mojomoro ïagu erã cuirire mohmepimi. ïgu eropa mohmepicũ ta erã õaro ïha wama. Eropa ïanirã ïgure nũrusia wahãma.

21

Jerusaléngue ejañumi Jesu

Mr 11.1-11; Lc 19.28-40; Jn 12.12-19

¹ Eropi Jerusaléngue gua ejaboro core Betfagé waĩcũri macague ejamũhtanibũ gua Jesu mera. Betfagé utãgu Olivo waĩcũdigũ gubuye árĩbũ. Eroque ejagu, guare perãre ïgu buherã mera majarãre Jesu ïgu core obeomũhtami.

² Õpa doremi erãre:

—Si macague waque. Eroque ejarã, mata burrore ïgu magugã mera erã dirinugudigũre bocajarãca. Erãre boca, ïgure diriradarire pãa aĩgãribasaque yũre.

³ Mũa eropa iicũ ïagu, burro opũ “¿Duhpimorã burrore pãri mũa?” ïgu arĩcũ peerã õpa arĩ yũhrique: “Mari ïgu burrore gamebeoniami dohpa. Eropigu dohparagã wiagũcumĩ ïgu,” arĩ yũhrique ïgure, arĩdore obeomi Jesu perã ïgu buherãre.

⁴ Eropa iimi Goãmũ yare weremũhtadigu ïgu arĩ gojadiro dopa ta. Õpa arĩ gojañumi iribojegue:

⁵ Jerusalén majarãre õpa arĩ wereque: “Ïaque mũa. Mũa Opũ mũa pohroque ahrimi. ïgu ta masare õaro iigu ahrimi. Burro magugã weca arigũcumĩ,” arĩ wereque Jerusalén majarãre, arĩ gojañumi iribojeguere.

⁶ Jesu ïgu obeonirã perã iri macague eja, ïgu iidoreldiro dopa ta iĩnorã erã.

⁷ Burragore igo magugã sãre aĩgãrima. Aĩgãrituhaja gũa weca maja suhrire tuwea aĩ, erã weca peobũ gũa. Gũa eropa iira pũhrũ Jesu ĩgugã weca mũribejami wabu.

⁸ Mũribejatuha, ĩgugã weca Jerusalengue wami. ĩgu eropa aricũ ĩarã masa bajarã ĩgu wari maha deco erã ya weca maja suhrire tuwea aĩ, sãopi mũhtama Jesure umupeorã. Gajirãpũ pũricũri dupũrire mare apimũhtama “ĩgu wari maha õari maha árĩporo,” arĩrã.

⁹ Eropirã ĩgu core warã, ĩgu pũhrũ nurũsiarã mera õpa arĩ gaguiniguima:

—Davi mũrũ pãramire marire itamubure umupeorã. Ihĩ Goãmũ ĩgu obeodigu õaro arĩporo. Ūmaro majagure “Turagũ àhrimi,” arĩ umupeorã, arĩ gaguiniguima masa.

¹⁰ Eropirã Jerusalengue erã eropa ejacũ ero majarãpũ ĩhamaria wama.

—Cue, ¿nihino àhriri ihĩ? arĩ game serẽpima erã basi.

¹¹ Gajirã masa yũhrima:

—Ihĩ Goãmũ yare weremũhtagũ Nazare majagũ Jesu waĩcũgũ àhrimi, arĩ werema erã masare.

Goãmũ wihigue ejañumi Jesu

Mr 11.15-19; Lc 19.45-48; Jn 2.13-22

¹² Pũhrũ Goãmũ wihigue ejami Jesu gũa mera. Iri wihigue eja ñaja wami. Ñajaja masa duadoarãre asũrã sãre bocajagũ erãre cohã wiucãmi iri wihigue. Eropigũ niyerure game gohroto doarã ya mesarire yomemuju, aĩ majipi beomũrimi. Bujare duarã erã doari pẽrori sãre eropa ta iimi.

¹³ Eropa iigu õpa arĩmi:

—Goãmũ yare erã gojarapũ õpa àhraa: Goãmũ arĩmi: “Yaha wihi Goãmũ mera wereniguiri wihi waĩcũroca,” arĩmi Goãmũ, àhraa ĩgu gojarapũ. Mũapũ i wihire Goãmũ wihire duadoarã game yajarã iiaa, arĩmi ĩgu erãre.

¹⁴ ĩgu eropa iira pũhrũ cuiri ĩhajabirã, curimasibirã sã Goãmũ wihiguere ĩgu pohroque erama. Erã eropa eracũ erãre õarã dujacũ iimi ĩgu.

¹⁵ Eropa õarire ĩgu iicũ ĩarã, pahia oparã, masare buherã sã guama ĩgu mera. Eropirã majirãgã sã Jesure, “Davi mũrũ pãrami, masare itamubu, turagũ àhraa mũhũ,” erã arĩ umupeocũ peerã guanemoma dipaturi erã.

¹⁶ Eropa guarã õpa arĩma Jesure:

—¿Erã eroparĩcũ peebeari mũhũ? Eropa arĩbiricãporo, arĩ dorema erã Jesure.

—Erã eroparĩcũ peea. ¿Goãmũ yare erã gojarapũre ire ne buhebiriri mũa?

Majirāgāre Goāmure ōaro umupeocũ iibũ mũhũ, āhraa Goāmũ yare erā gojarapũ, arĩmi Jesu erāre.

17 Eropa arĩtuha erāre cóāgā, Betania waĩcũri macague eja, iri ñamire ero árĩmi.

Jesu yucũgure higueragure sīridoreñumi

Mr 11.12-14, 20-26

18 Gajinũ boyorogue Jerusaléngue gũa dujaacũ, oaboami Jesu.

19 Eropa oaboagũ, ma tũro niguidigu higueragure ñhanijagũ, irigu dũcare omagũ warimi. Dũca maribũ irigũpũ. Pũri dihta árĩbũ. Dũca maricũ ĩagũ Jesu ōpa arĩmi:

—Irigũ yucũgũ ne dipaturi dũcacũsome, arĩmi ĩgũ.

Ĩgũ eroparĩcũ irigũpũ mata ñaidija wabũ.

20 Irigu eropa wacũ ĩarā, gũa ĩgũ buherā ĩhamaria wabũ.

—¿Duhpiro mata irigu ñaidija wahári? arĩ serēpibũ Jesure.

21 Jesu yũhrimi:

—Ire guñaque mũa. Goāmure ōaro guñatura umupeoque. “Diaye ta eropa ta iigũcumi ĩgũ,” arĩrā, “Goāmũ iisome,” arĩbirā, yũhũ irigũre iidiro dopa ta iimasirāca mũa sã. Eropirā irigũre yũ sīridoreldiro dopa ta tauro diasarire doremāsirāca mũa Goāmure guñatura umupeorā. Irigu utāgũ sãre “Dua aĩ, wũariyague cóādigũ árĩporo,” Goāmure mũa arĩcũ irigu utāgũ dija waroca.

22 Goāmũ irigu diague dijacũ iigũcumi. Goāmure mũa umupeocũ,” Yũ serēro dopa ta eropa waroca,” mũa arĩ guñacũ, mũa serēldiro dopa ta Goāmũ iigũcumi, arĩmi Jesu.

Jesure doredigũre serēpiñuma pahia oparā, masare buherā, mũrā mera

Mr 11.27-33; Lc 20.1-8

23 Eropi Goāmũ wihigue dujaja buhemi ĩgũ. ĩgũ eropa buhecũ pahia oparā, masare buherā, mũrā mera ĩgũ pohroque eraa serēpima:

—¿Noa doreri mera ire eropa iigũ iiri mũhũ? ¿Noa mure Goāmũ wihigue árĩnirāre cóāldoreari? arĩ serēpima erā.

24 Erā eroparĩcũ Jesu yũhrimi:

—Mũare yũhũ sã serēpigũra. Ōaro mũa yũre yũhricũ yũ sã mũare yũhri gamegũra.

25 ¿Ñu masare ĩgũ waĩyecũ noano ĩgũre waĩyedoremũriyuri mũa pepicũ? ¿Goāmũ doreyuri? ¿O masapũ doremũriyuri mũa pepicũ? arĩ serēpimi Jesu erāre.

Ĩgũ eroparĩcũ erāpũ erā basi game wereniguima:

—¿Dohpa arĩ yũhrirãcuri mari? “Goãmũ Ñure doreñumi,” mari arĩcũ, “¿Goãmũ Ñure ïgũ dorequerecũ ta duhpirã ïgũ wererare peebirari mũa?” arĩbocumi Jesu marire.

²⁶ Oã masapũ “Diaye ta Ñu Goãmũ yare weremũhtadigũ árĩmi,” arĩ pepima erã. Erã eropa pepirã “Ñu ïgũ waĩyecũ Goãmũ ïgũre dorebiriñumi,” mari arĩcũ peerã masapũ guarãcoma mari mera, arĩma erã erã basi.

²⁷ Erã eropa arĩ werenigui amura pũhrũ Jesure yũhrima erã.

—Ñure waĩyedoredigũre gũa masibea, arĩma erã.

Erã eroparĩcũ peegũ õpa arĩmi Jesu:

—Irisubu tamerare yũ sã mũa serẽpirare werebea mũare. Yũ iirire doregũre werebea mũare, arĩmi ïgũ erãre.

Yujugũ porã iira queorire wereñumi Jesu

²⁸ ïgũ eropa arĩra pũhrũ Jesu queori moa werenemomi erãre:

—¿Dohpa arĩ pepirãcuri yũ õpa arĩ werecũ? arĩmi Jesu erãre. Perã pagũ árĩñumi. Tĩgũpũre õpa árĩñumi erã pagũ: “Mahgũ, pohegue mohmegũ waque,” arĩñumi.

²⁹ “Wabea,” arĩ yũhririñumi ïgũ magũ negohrare. Eropa arĩqueregũ ta pũhrũguere pohegue wadiariñe árĩyoro daja ïgũre. Eropigũ wañumi ïgũ.

³⁰ Eropigũ erã pagũ ïgũ magũ dũhyagũ pohrogue eja, ïgũ tĩgũre ïgũ arĩdiro dopa ta pohegue wadoreriñumi. “Áũ,” arĩriñumi dũhyagũpũ. Eropa arĩqueregũ ta wabiriñumi ïgũ.

³¹ ¿Nihinopũ ïgũ pagũ ïgũ dorediro dopa ta iiyuri? arĩ serẽpimi Jesu.

—Ïgũ tĩgũpũ iĩñumi, arĩ yũhrima erã.

Erã eroparĩcũ Jesu weremi:

—Mũare diaye arĩgũ tiiaa. “Ñetariarã ãhriima,” mũa arĩnirãpũ Goãmũ opũ ïgũ árĩroguere mũa wabodiro arĩquerecũ ta erãpũ warãcoma.

³² Ñu waĩyeri masũ buhegũ arigũ mũare “Õaro iirã árĩque,” arĩ wererimi. Eropa ïgũ werequerecũ ta ïgũre peebiribũ mũa. Eropirã ïgũ dorerire yũhribiribũ. Erã ñerã árĩnirãpũ wajasea corerãpũ, nome ñero iiricũnirãpũ ïgũre peenirã árĩma. Erã eropa pee gohrotorare ïabũ mũa. Mũa eropa ïaquererã ta mũapũ ne gohrotodiabirabũ. Eropirã peebirabũ mũa, arĩmi Jesu pahia oparãre, mũa sãre.

Ñerã mohme corerã queorire wereñumi Jesu

Mr 12.1-12; Lc 20.9-19

33 Eropi Jesu dipaturi ĩġu pepiri mera õpa arĩ queorire moa erāre buhenemomi:

—Gajisubu m̄are werenigui queoriñere yu werencũ peeque daja, arĩmi. Yeba opu arĩñumi. ĩġu ya pohere igu-ıdarire oteñumi. Otetuha, s̄arirore nugu, iguire erā c̄ahra bujuburi gobere seañumi. Pohe decogue ımari wihigā s̄are iĩñumi ĩhadibumaja õaro. Eropigũ gajirāre ĩġu ya pohe deco mera apiñumi erā mohme corera waja. Eropigũ iri pohere erāre mohme coredoretuhaja gaji yebague waha wañumi ĩġu.

34 Igui ñirisubu arĩcã opu ĩġu pohro majarāre ĩġu ya pohe mohme corerā pohrogue obeoñumi. Pohe maja ĩġu oteri đucare ĩġu ya sero maja đucare aĩdoreġu obeoriñumi.

35 Eropirā pohere mohme corerāpũ ĩġu pohro majarāre ñero iĩñuma. Yujugũre turaro paa, gajigũre wejẽ, gajigũre utā mera deañuma.

36 Pũhrũ pohe opu dipaturi ĩġu pohro majarāre ĩġu obeom̄htanirā tauñariro arĩri curu majarāre obeoriñumi daja. Eropirā pohere mohme corerā m̄araro ta iĩñuma erā s̄are daja.

37 “Eropigũ ĩġu obeotudigũ ĩġu magũ arĩñumi. “Yu magũpũre umupeorãcoma,” arĩġu ĩġure obeoriñumi.

38 ĩġu eropa arĩ pepiquerecũ ta pohere mohme corerā ĩġu magũ ĩġu aricũ ĩarā, õpa arĩñuma: “Pohe opu magũ ahrimi ĩġu. ĩġure wejẽ cóacārā mari. Eropiro i pohe mari ya pohe đujaroca,” arĩriñuma erā basi.

39 Eropa arĩrā ĩġure ñeha pohe t̄urogue aĩgā, wejẽcãñuma erā ĩġure, arĩmi Jesu erāre. Eropa arĩtuhaja Jesu erāre serẽpimi:

40 —¿Pohe opu arigũ dohpa iigũcuri ĩġu ya pohere mohme corerāre? arĩ serẽpimi Jesu pahia oparāre, m̄urā s̄are.

41 —Ĩġu gajirāre pohere mohme coremorāre gohroto-ġucumi. Arĩm̄htanirāre ñetarianirāre wejẽġucumi. ĩġure đucare queoro wiamorāpũre mohmedoreġucumi, arĩ yũhrima erā.

42 Erā eroparĩcũ Jesu werenemomi erāre:

—¿Goãmũ yare erā gojarapũ ire yũre ĩġu arĩ gojarare buhebiriri m̄aa?

Ihĩ Cristo utāye iro dopa ta ahrimi. Masa Cristore gamebirãcoma. Erā gamebiriquerecũ Goãmũ ĩġure beye opu acumi. Goãmũpũ irire iimi. ĩġu eropa iicũ ĩarā “Õataria,” arĩ pepia mari, arĩ gojañuma iribojeguerẽ.

¿Irire ne buhebiriri m̄aa?

⁴³ Eropigu mũare arĩgu tiaa yũhũ. Goãmũ ãgu dorerire iirã ãgu õari orire opaboya mũa. Mũa iibiricũ ãha gajirãpũre ogucumi Goãmũ. Gajirã masapũ ãgu dorero dopa ta iirãcoma.

⁴⁴ Yũre gamebirãpũ yũ dipuwaja moamorã ñero tarirãcoma, arĩmi Jesu pahia oparãre, mũrã sãre.

⁴⁵ Iri pohe opũ queorire ãgu arĩcũ peerã, “Ãgu iri queori mera ‘Ñerã mohme corerã iro dopa ãhrima,’ marire arĩgu weresãgu iicumi ãgu,” arĩ pepiñorã erã.

⁴⁶ Eropa arĩ pepirã, ãgũre ñeadiariñorã oparãpũ. Masapũ Jesure umupeo “Goãmũ yare weremũhtadigũ ãhrimi ãgu,” arĩmũriñorã erã. Erã eropa arĩrã arĩcũ pahia oparã sã masare gũirã, Jesure ñeabiriñorã.

22

Wũari bosenu queorire wereñumi Jesu

¹ Eropi dipaturi gaji queori mera erãre buhenũgami Jesu:

² —Umaro majagu ãgu opũ arĩri werediacũ i queori iro dopa ãhraa. Yuju yeba majagu tauro opũ arĩñumi. Eropigu ãgu magũ ya arĩburi bosenu iĩñumi. ãgu mojoto diriri bosenu arĩyoro.

³ Eropigu opũ ãgu pohro majarãre bosenu ãarã arimorãre sihudore obeoriñumi. Erãpũ aridiabiriñuma.

⁴ Eropigu gajirãre sihudoregũ obeoriñumi daja ãgu pohro majarãre. “Yũ sihubeorãre õpa arĩ wereque. ‘Mari baburire iituhama. Wecũare, wecũagã õaro diicũrãre wejẽ amutuhajama. Eropiro arĩpehreri bosenu majare iituhajama. Eropirã bosenu majare barã arique,’ arĩ wereque erãre,” arĩ obeoriñumi ãgu opũ ãgu pohro majarãre.

⁵ Erã eropa werera pũhrũ ãgu sihubeonirã eropa pepicãñuma. Bosenure ãarã wabiriñuma. Yujugũ ãgu pohegue waha, wañumi. Gajigu ãgu mohmerire ãagu wañumi.

⁶ Gajirãpũ ãgu pohro majarãre erãre wererã eranirãre ñeha, erãre ñero iĩñuma. Eropii wejẽcãñuma.

⁷ Erã eropa iicũ peegũ, opũpũ guañumi. Gua, erã eropa wejẽra dipuwaja dipuwaja moadoregũ ãgu surarare obeoñumi. Eropirã surara erãre wejẽpehocã, erã ya macare soecãñuma.

⁸ Erã eropa iira pũhrũ, opũ ãgu pohro majarãre õpa arĩñumi: “Bosenu majare amutuharama. Yũ sihumũhtanirã yũ bosenure ãabonirã aribeama. Ñerã ãhrima erã.

⁹ Eropirã macare wari marigue mũa bocajarãre bosenure ãamorãre sihuque,” arĩñumi ãgu ãgu pohro majarãre.

10 Īḡu eroparīcū ĭḡu pohro majarā marigue waha, árīpehrerā erā bocajarāre, ñerāre, õarāre wereñuma. Erā eropa sihura p̄hr̄u ejañuma erā bajarā. Ōaro bosenu erā iiri taribure masa űj̄t̄ritaria wañuma.

11 “Ero erā doacū op̄p̄u yujuḡre mojoto diririn̄u majañe suhriro sañabiḡre ĩañumi.

12 “Ne, acawereḡu, ¿duhpiḡu mojoto diririn̄u majañe suhrirore sañabiriquereḡu ñajarari m̄h̄u?” arī serēpiñumi op̄u. Īḡu eropa serēpicū mas̄p̄u werebirin̄umi.

13 Īḡu eropa werebircū ĩaḡu ĭḡu pohro majarāre õpa arīñumi op̄p̄u: “Īre ñeha ĭḡu mojotorire dirique. Īḡu guburi s̄are dirique. Dirituha aī wiria, disiporogue nait̄arogue ĩḡure cóãque. Eroque ĭḡu turaro ore, b̄j̄awereri mera ḡuc̄uri c̄uridihuḡcumī,” arīñumi op̄u, arī weremi Jesu.

14 Īḡu eropa arīra p̄hr̄u õpa arītumi ĭḡu:

—I queori wadiro dopa ta Goãm̄u bajarā masa ĭḡu sihubeonirā árīquererā ta bajamerāgā ĭḡu mera dujarācoma, arī weretumi Jesu.

Oparā ya wajare wajayeburire gajirā serēpiñuma Jesure Mr 12.13-17; Lc 20.20-26

15 Īḡu eropa arīra p̄hr̄u fariseo masa waha, ĩḡure weresāburire erā basi weretamuñorā erā. Erā ĩḡure baja serēpiri mera erāre ĭḡu gajiropa yuhricū weresāmorā iiriñorā.

16 Eropirā erā mera majarāre, Herode ya curu majarā s̄are, Jesure serēpidorerā obeoñorā. Erāp̄u ḡua pohroque eraa, Jesure serēpima:

—Buheḡu, diaye wereniguḡu ḡuyari mariḡu m̄u árīcū masia ḡua. Eropiḡu op̄u árīcū s̄are bu árīḡu ĭḡu árīcū s̄are m̄h̄u yujuropa ĩhaa. Eropiḡu Goãm̄u yare diaye m̄u werecū s̄are ḡua masia. Masa suacū s̄are erā suabircū s̄are queoro werea.

17 Eropiḡu ḡuare wereque. ¿Roma majarā árīpehrerā tauro op̄u árīḡure gobierno majare marire wajayero gahmeri m̄u pepicū? ¿Mari dorerip̄u irire wajayedoreri? arī serēpima Jesure.

18 Jesup̄u erā ĩḡure ñero weresādiarire masiḡu õpa arī yuhrimi:

—ḡuyaricurā āhraa m̄ua. ¿Duhpirā yu ñero wereniguicū peediarī m̄ua?

19 Dohparagā niyerusere oparā yare wajayeburisere aīrique. Irisere ĩarā, arīmi ĭḡu.

Īḡu eroparīcū peerā niyerusere aīḡarima erā.

20 Erã irisere aĩ eracũ ãagũ ãgũ serẽpimi erãre:

—¿Nihino gohra masũ waĩcũgũ tuhyari irisere? ¿Noa waĩ tuhyari? arĩ serẽpimi ãgũ.

21 —César waĩcũgũ masa tauro opũ masũ ãgũ waĩ sã tuhyami iriseguere, arĩ yũhrima erã.

Erã eroparĩcũ peegũ Jesu weremi:

—Irisibu tamera masa tauro opũ yare ãgũre oque. Goãmũ yare Goãmũpũre oque, arĩmi Jesu.

22 ãgũ eroparĩcũ peerã, pee ¼ca wa, waha wama.

Saduceo masa Goãmũ ãgũ sĩrinirãre masurire serẽpiñuma Jesure

Mr 12.18-27; Lc 20.27-40

23 Eropi irinũ ta yujurãyeri saduceo masa Jesure ãarã erarã gũa pohrogue erama. Saduceo masa “Goãmũ sĩrinirãre masusome,” arĩ pepirã árĩma. Eropirã õpa arĩma erã ãgũre:

24 —Buhegũ, õpa arĩ gojañumi Moise: “Yujugũ ãgũ tĩgũ marapocũgũ porã mariqueregũ ta ãgũ sĩricũ ãgũ pagũ magũre ãgũ tĩgũ marapo árĩdigore marapocũro gahmea. Eropigũ ãgũ tĩgũ mũrũ ãgũ porãcũbodiro dopa ta porãcũro gahmea ãgũ pagũ magũre. Eropirã igo porã ãgũ tĩgũ mũrũ porã iro dopa ta árĩrãcoma,” arĩ gojañumi Moise, arĩma erã saduceo masa.

25 Irire eropa arĩ weretuha i queorire werenemoma erã Jesure:

—Yujugũ porã siete gohra árĩñorã. Erã tĩgũpũ marapocũ, porã marĩgũ ta sĩria wapũ. Eropigũ gajĩgũ ãgũ pagũ magũ sã ãgũ tĩgũ marapo árĩdigore marapocũpũ.

26 ãgũ eropa marapocũra pũhrũ ãgũ sã ãgũ tĩgũ mũrũ iro dopa ta porã mariqueregũ ta sĩria wapũ. Eropigũ ãgũ pagũ magũ ãgũ tĩgũ mũrũ iro dopa ta porã mariqueregũ ta sĩria wapũ. Eropa dihta wañorã yujugũ porã gohra. Ne porã mariquererã ta sĩripehrea wañorã erã.

27 Erã marapo sã erã pũhrũ sĩria wapo pare, arĩ õpa serẽpima Jesure:

28 ¿Ne, Goãmũ árĩpeherrerãre ãgũ sĩrinirãre masucũ nihino marapo árĩgocuri igo? Erã siete árĩpeherrerã igore marapocũnirã árĩñorã. ¿Eropigo nihino marapo gohra árĩgocuri igo? arĩ serẽpima erã.

29 Jesu yũhrimi erãre:

—Goãmũ yare erã gojarapũ wereniguirire ne masibea mũa. Eropirã Goãmũ ãgũ turari sãre ne masibea mũa. Eropiro mũa pepiripũ ne diaye árĩbeaa.

30 Sĩrinirã erã masa mũriara pũhrũ erã anyua iro dopa ãhrima. Erã ¼ma nome mera marapocũbeama eroguerẽ.

31 Sīrinirā mura erā masa mūriaboropure weregura. ¿Goāmū iribojegue īgū arīrare ne buhebiriri mūa? Ōpa arīñumi īgū:

32 “Yūhū Abrahā, Isaa, Jacobo erā opu āhraa,” arī wereñumi Goāmū iribojegue. Erā sīrira pūhrugue “Erā opu ta āhraa,” arī wereñumi Goāmū. Eropirā erā sīrinirā mura īgū masunirā árīrā erā ojocarirā āhrima, arīmi Jesu.

33 Īgū eropa arī buhecū peerā bajarā masa pee ūca wama.

Ōatariariñere doreriñere wereñumi Jesu

Mr 12.28-34

34 Eropi saduceo masa Jesure erā yūhrimasibiricū peerā, fariseo masapū gūa pohrogue gamenerema daja.

35 Eropigū erā mera majagū, masare buhegūpū Jesu īgū ñero arīcū peediagū gūya serēpirimi īgūre.

36 —Buhegū, ¿Goāmū ya doreri ōatariaro doreripū diñe doreripū āhriri? arī serēpimi īgū.

37 Jesu īgūre yūhrimi:

—“Būrigā mūa sīporā mera, mūa turari mera, mūa ōaro guñari mera Goāmūre mūa Opure mahique,” arīmi Goāmū.

38 Iñe doreriñe ōatariariñe āhraa.

39 Iñe doreriñe pūhrū gajiñe doreriñe sā ōataria: “Mū basi mahiro dopa ta mū pohro árīrā sāre mahique,” arīmi Goāmū.

40 Iñe peñe doreriñere iirā árīpehreri gaji dorerire iipehorā iiaa mari. Goāmū yare weremūhtanirā iribojegue erā gojara sāre iirā iiaa mari eropa iirā, arī weremi Jesu.

¿Noano acaweregū āhriri Cristo? arī serēpi iañumi Jesu

Mr 12.35-37; Lc 20.41-44

41 Eropi fariseo masa ero gamenererā erā árīcū Jesu erāre serēpimi:

42 —“Cristo mari Pagū īgū obeodigū āhrimi,” arāa mūa. ¿Nihino āhriri īgū ñecū iribojegue majagū, mūa pepicū? arīmi īgū.

—Cristo Davi mūrū pārami árīgūcumī, arī yūhrima erā.

43 Jesu weremi:

—¿Davipū Cristo ñecū árīqueregū ta duhpigū opuāturiayuri Cristore? ¿Duhpigū eropa opuādoreyuri Espiritu Santo īgūre? Ōpa arīñumi Davi mūrū:

44 Goāmū yū opure ōpa arīmi: “Ohō yū diayerū dorebu doaque. Eropigū mūre ihaturirāre mūre tarinūgabasagūra yūhū mū pohro majarā dopa árīmorāre,” arīmi Goāmū yū opure, arī gojañumi Davi mūrū.

45 Eropa arĩ gojagu ta Davi muru opacuñumi Cristore. Cristo Davi muru opu aħrimi. ¿Eropigu Davi muru Cristo ñecu arĩqueregu duhpigu opacuyuri Cristore? arĩ weremi Jesu.

46 Īgu eropa arĩ werecu erã ĩgure ne yuħrimasibirima. Eropirã iripeta serēpi duhcama erã ĩgure. Eropirã ĩgure güirã dipaturi serēpi ĩabirima ĩgure pare.

23

Masare buherã, fariseo masa sã erã ñero iirire wereñumi Jesu

Mr 12.38-40; Lc 11.37-54; 20.45-47

¹ Eropi masa bajarãre gua sãre Jesu weremi daja.

² —Masare buherã, fariseo masa sã Goãmu doreri Moisere ĩgu apirare wererã aħrima erã.

³ Erã eropa wererã arĩcũ muare erã dorerare ipehoque mua. Eropa iiquererã ta erãre ĩhacübircãque mua. Erã buhero dopa ta iibeama erã.

⁴ Masare baja dorema erã bocatũbiririre. Eropa dorequererã ta erã dorero dopa ta masa erã iimasibiriquerecũ ĩarã erãre itamubeama.

⁵ Masa erã ĩacũ dihta õaro ii ĩhmuma erã. Goãmu yare erã gojarapũri erã duhsãri comogãre pagañari comogãre erã diaporire dirituma masare erãre ĩadorerã. Erã dũca sãre dirituma iri comogãre. Eropirã erã suhri sãre gajirã ya tauro yoari arĩriñe ahmu sañama, “Gua Goãmure umupeotaria,” arĩ ĩadorerã.

⁶ Eropirã bosenuri arĩcũ oparã erã doarigue doadama. Eropirã mari buheri wirigue sãre õari doari dihtare doadama erã.

⁷ Eropirã doberi duarogue gajirã õaro umupeori mera erãre bocatĩri serẽcũ gahmema erã. Erãre “Buhegu,” arĩ piyucũ gahmema.

⁸ “Muapure “Buhegu,” arĩ gajirã piyucũ iibircãque. Mua arĩpehrerã yuju curu majarã aħraa. Eropigu muare buhegu yuħu yujugu ta aħraa.

⁹ Eropirã i yeba majarãre “Mari pagu,” arĩrã erãre umupeorã iica. Ne eropa arĩ iibircãque. Umaro majagu dihta mari Pagu aħrimi. Īgu dihtare umupeoro gahmea marire.

¹⁰ Eropirã masure “Opu,” arĩbircãque. Mua opu yuħu Cristo yujugu ta aħraa.

¹¹ Pohro majagu iro dopa muare itamugu ĩgu ta arĩgucumi opu arĩbu.

¹² Yujugu opu arĩdiagu docanugaja arĩcorecãro gahmea. Eropigu docanugagu “Bu arĩgu aħraa yuħu,” arĩ pepigu ĩgu ta arĩgucumi opu arĩbu, arĩ weremi Jesu.

Judio masare buherã, fariseo masa mera erã gũyarire wereñumi Jesu

13 Īgu eropa arĩra pũhrũ erãre werenemomi:

—Mũa masare buherã, fariseo masa sã ñero tarirãca. Gũyaricũrã ãhraa mũa. Gajiropa mũa arĩ buhecũ peerãpu Goãmũ ĩgu opu áriroguere wasome. Mũa sã eroguerere wasome. Eropa arĩ buherã eroguerere wadiarãre cãhmotaa mũa.

14 “Mũa masare buherã, fariseo masa sã ñero tarirãca. Gũyaricũrã ãhraa mũa. Wapeweyarã nome erã wajamocũ ĩha erã ya wirire emacãa mũa erã nomere. Eropa erãre mójomoro ĩabiriquererã masa erã ĩhuro yoari boje Goãmũre serẽ ĩhmuraa mũa masare. Mũa eropa ĩira dipuwaja gajirã tauro dipuwaja moagũcumi mũare.

15 “Mũa masare buherã, fariseo masa sã ñero tarirãca. Gũyaricũrã ãhraa mũa. Wũariyague taribuja, yoaro maja macarigue wahaa mũa mũa dorerire iibure omarã. Mũa dorerire iibure boca, ĩgũre buhea. Mũa eropa ĩicũ ĩgũpũ mũa tauro ñero ĩinũgagũcumi. Eropirã ĩgũre peamegue wabu áricũ ĩiaa mũa.

16 “Mũa ñero tarirãca. Cuirĩ ĩhajibirã erã ĩhajibiro dopa ta masibirã ãhraa mũa. Eropa áriquererã ta gajirãre buheraa mũa. Ōpa arĩ buheraa mũa: “ ‘Goãmũ wihi mera ĩigũra,’ arĩ waĩpeogũ ĩgu arĩdiro dopa ta iibiricũ òaroca,” arĩ buheraa mũa. “ ‘Goãmũ ya wihi maja oro mera ĩigũra,’ arĩ waĩpeodigũpũre ĩgu arĩdiro dopa ta ĩi ojogorocũro gahmea,” arĩ ĩri sãre buheraa mũa.

17 Cuirĩ ĩhajibirã erã ĩhamasibiro dopa ta masibirã ãhraa mũa. Pee masibirã ãhraa. ¿Dinopũre umupeoro gahmeri? Orore umupeobiricãro gahmea. Goãmũpũ ĩri orore ĩgu ya wihi áricũ òari ĩimi ĩrire. Eropirã ĩgu ya wĩpũre umupeoro gahmea mũare. Eropiro mũa buheripũ queoro wabeaa.

18 ĩ sãre buheraa mũa: “ ‘Goãmũ wihi maja mesa mera ĩigũra,’ arĩ waĩpeodigũ ĩgu arĩdiro dopa ta ĩgu iibiricũ òacãroca,” arĩ buheraa mũa. “ ‘ĩri mesa weca mari aĩgã apira ta mera ĩigũra,’ arĩ waĩpeodigũpũre ĩgu arĩdiro dopa ta ĩi ojogorocũro gahmea,” arĩ buheraa mũa queoro buhebirã.

19 Cuirĩ ĩhajibirã erã ĩhamasibiro dopa ta masibirã ãhraa mũa. ¿Dipũ ĩri gohra ãhrĩri mũa pepicũ? Goãmũre masũ ĩgu ora mũra ĩri gohra áribiriñaria. ĩri mesa weca Goãmũre ĩgu ocũ, òari wahaa ĩri mesa weca áriri. Eropiro ĩri mesa bu áriri mesa áribeaa. Goãmũre erã ora weca tauro òari mesa ãhraa.

20 Eropigu “Goāmũ wihi maja mesa mera iigũra,” yujugũ arĩ waĩpeogũ, iri mesa weca apira mera iigũ eropa arĩgũ iicumi. Eropiro mũa buheripũ queoro wabeaa.

21 Goāmũ iigũ ya wihi majagũ āhrimi. Eropigu “Goāmũ wihi mera eropa iigũra,” arĩ waĩpeogũ diaye ta Goāmũ waĩ mera eropa arĩgũ iicumi.

22 Goāmũ ɯmaro majagũ āhrimi. Eropigu “ɯmaro mera iigũra,” yujugũ arĩ waĩpeogũ, Goāmũ mera ta eropa arĩgũ iicumi. Eropiro mũa buheripũ queoro wabeaa.

23 “Mũa masare buherã, fariseo masa sã ñero tarirãca. Gũyaricũrã āhraa mũa. Bari sũricũ iirisarire menta, anis, comina waĩcũrisarire aĩ deara pũhrũ diez quẽri iiaa. Eropa iira pũhrũ yujuquẽ ta aĩgã apia Goāmũ wihigue Goāmũ dorerire iimorã. Mũa eropa iri dorerire iiquererã ta tauro õaro iirire guñabeaa mũa. Diaye iirire, mojomoro ïarire, Goāmũre umupeorire ne guñabeaa mũa. Dũcare mũa aĩrãre merogã Goāmũ wihire apicũ õhaa. Eropa iirã õpa iinemoque: Diaye iirire, mojomoro ïarire, Goāmũre umupeorire iique.

24 Cuiiri ïhajibirã erã ïabiro dopa ta diaye majare masibirã āhraa mũa. Õpa iiaa mũa. Mũa dorerire iidorerã árĩpehrerire õaro iidiaa yujuñegã dũhyaro mariro. Mũa eropa iiquererã ñeripũre duhubeaa.

25 “Mũa masare buherã, fariseo masa sã ñero tarirãca. Gũyaricũrã āhraa mũa. Mũa dorero dopa ta mũa soroparire, mũa ihriri parire mũa coeweaa mũa õarire ii ïhmurã. Eropa coequererã ta mũa sĩporãripũre coebeaa. Eropirã mũa árĩricũrere mũa pepiripũre ne õarire gohrotobeaa. Gajirã yare yajadiarã, mũa basi dihta pagarire aĩdiarã árĩrã, eropa dihta pepia mũa.

26 Cuiiri ïhajibirã erã ïhajibiro dopa ta masibirã āhraa mũa fariseo masa. Mũa pepirire gohrotomũhtaque mũa. Eropirã õaripũre iique. Mũa eropa iirã masa erã ïhuro sãre õarã gohra árĩrãca pare mũa.

27 “Mũa masare buherã, fariseo masa sã ñero tarirãca. Gũyaricũrã āhraa mũa. Masa comorore boreri mera erã sũhuma. Eropirã masa iri comorore erã ïacũ õari comoro dehyoa. Iri comoro eropa õaro deyoquerecũ ta, poheca majague iigũ boara gõariguere ïaya mara.

28 Eropa ta mũa sã masa erã ïhabeoro õarã dehyoa mũa. Eropa õarã deyorã mũa árĩquerecũ ta mũa pepiriguere ñeri gũyaricũrã árĩtariacã boanirã iro dopa, arĩ weremi Jesu.

Judio masare buherã, fariseo masa sãre iigũ dipuwaja moaborore wereñumi Jesu

Eropa arĩtuhaja õpa arĩnemomi daja:

29 —M̄ua masare buherã, fariseo masa sã ñero tarirãca. Ḡuyaricurã ãhraa m̄ua. Goãm̄u yare werem̄htanirã iribojegue majarã erã masa goberire ðaro amuraa m̄ua. Eropirã iribojegue majarãre ðaro iinirã m̄urare erã wéanugunirã m̄urare ðaro amuraa m̄ua.

30 Eropa iirã ðpa arĩ wereniguiraa m̄ua: “Iribojegue mari ñec̄u s̄umarã m̄urague erã iidiro dopa ḡuap̄u iibiriboya. Irisubugue ár̄inirãre Goãm̄u yare werem̄htanirãre ḡuap̄u wejëbiriboya,” arĩ wereniguiraa m̄ua.

31 Eropa arĩrã árĩrã, m̄ua ñec̄u s̄umarã m̄ura Goãm̄u yare werem̄htanirã m̄urare erã wejëbirã erã ár̄ic̄u wererã iica. Erã wejëbirã p̄aramerã m̄ua ár̄iri sãre m̄ua basi weresãrã iica m̄ua.

32 M̄ua ñec̄u s̄umarã m̄ura iidiro dopa ta ii ojogoroc̄uque.

33 “Añaa iro dopa ñerã ãhraa m̄ua. Añaa porã iro dopa ãhraa m̄ua. Goãm̄u m̄ua ñeri dipuwajare ïḡu peamegue ïḡu cóãboro core duhrimasibea m̄ua.

34 Eropiḡu Goãm̄u yare werem̄htarãre, gajirã masirãre, gajirã m̄uare buhemorãre m̄ua pohro obeoḡura. Ȳu eropa obeoc̄u m̄uap̄u yujurãyeri erãre wejërãca. Gajirãre crusague pabiarãca. Gajirãre m̄ua buheri wirigue tãrarãca. Erãre macari n̄ec̄u n̄urusiarãca.

35 M̄ua eropa iirã ár̄ipehrerã ñeri marirãre m̄ua wejëra dipuwaja dipuwajacurãca. Abel m̄urare Caín ïḡu wejëra dipuwajare dipuwajacurãca m̄uap̄u. Ár̄ipehrerã ïḡu puhru ár̄inirãre ðarãre erã wejëra dipuwaja sãre dipuwajacurãca m̄ua sã. Eropirã Goãm̄u wihi pohro waimurãre m̄ua soeburi mesa pohro Zacariare m̄ua acawererã m̄ura wejëñorã. ïḡup̄u Berequias maḡu ár̄ip̄u. Eropirã ïḡu sãre erã wejëra dipuwaja dipuwajacurãca m̄ua.

36 Diaye m̄uare wereḡu ta iiaa. Erã ár̄ipehrerãre erã wejëra dipuwaja dohpague majarã dipuwajacurãcoma, arĩ weremi Jesu.

Jerusalén majarãre burigã bujawereñumi Jesu

Lc 13.34-35

37 Eropa arĩtuhaja ðpa werenemomi Jerusalén majarãre bujawere ïaḡu:

—M̄ua Jerusalén majarã, m̄ua acawererã m̄ura Goãm̄u yare werem̄htanirãre wejëm̄rinirã ár̄ima. Eropirã Goãm̄u obeonirãre, utã mera deam̄rinirã ár̄ima. Cãreña b̄uro igo igo porãre igo quëdup̄uri mera igo coã oyaro dopa ta bajasuburi opadiarab̄u m̄uare. M̄uap̄u irire ne ȳure gamebirab̄u.

38 Dohpaguere m̄ua ár̄iri maca cóãra maca ár̄iroca.

39 Diaye m̄uare ar̄iḡu tiiaa. P̄uhrugue dujariḡuca daja yuh̄u. Eropa ȳu dujaric̄u ïarã m̄ua ȳure “Goãm̄u turari

mera arigu ñaro ariporo," arĩrãca. Yũre mua irire arĩboro core, dipaturi yũre ñasome mua, arĩmi Jesu.

24

Goãmũ wihi cóãra wihi árĩroca arĩñumi Jesu

Mr 13.1-2; Lc 21.5-6

¹ Eropi Goãmũ wihire Jesu ñgu wiriara pũhrũ gua ñgu buherã iri wihi maja wirire ñarã,

—Ñatariari wiri ãhraa. Ñaque mũ sã, arĩbũ gua ñgũre.

² Jesu yãhrimi:

—I wihi majare dohpaguere ñaraa mua. Mũare weregu tiiaa. I wihi árĩpehreri mua ñara i utã sã cohmopehrea waroca. Ne yujuye utãye dujasome, arĩmi ñgu gũare.

I mũũ pehreburiñere wereñumi Jesu

Mr 13.3-23; Lc 21.7-24; 17.22-24

³ Pũhrũ Olivo waĩcũdigũ utãgũgue eja, erogue doami Jesu. Ero ñgu doacũ gua ñgu buherã gua seyaro ñgu pohrogue eja serẽpibũ.

—Wereque gũare. ¿Dohpãrĩcũ eropa warocuri mũ arĩdiro dopa waro? ¿Pehrerinũ coregã mũ dujariboro coregã dohpa wanũgacũ ñarãcuri gua? arĩ serẽpibũ gua.

⁴ Jesu yãhrimi:

—Ñaro iyuque mua. Eropirã gajirã mũare erã gũyarire peebiricãque.

⁵ Bajarã masa "Cristo ãhraa yũhũ," arĩ gũyarã árĩrãcoma. Erã eropa gũyacũ peerã bajarã masa Goãmũ yare duhurãcoma.

⁶ Mũa pohrogã gajirã masa erã gamewejẽcũ peerãca mua. Eropirã yoarogue majarã erã sã erã gamewejẽcũ peebeorãca. Eropa peequererã ta ne wũaro irire pepibiricãque. Eropa ta wamũhtaroca. Eropa wacũ pehreburiñũ duhyaniroca dohpa.

⁷ Irisubure yuju yeba majarã gaji yeba majarã mera gamewejẽrãcoma. Eropirã yujugũ opu yarã gajigũ opu yarã mera gamewejẽrãcoma. Eropirã masa bajarã oa mera sĩrirãcoma. Gajirã dorecũ ñero tarirãcoma. Eropiro bajasuburi i yeba ñohmeroca.

⁸ Eropa ñero tariquererã i yeba majarãre tauro erã ñero tariboro duhyaa dohpa. Ñero tarinirãcoma dohpa.

⁹ "Irisubure gajirã mũare ñeha ñero ñero iidorerã orãcoma mũare gajirã oparãre. Erã eropa ocũ mũare wejẽrãcoma. Yaharã mua árĩri dipuwaja árĩpehrerã mũare ñaturirãcoma.

¹⁰ Irisubure bajarã yaharã árĩnirã yũre cóãrãcoma. Eropirã erã mera majarãre Jesu yarãre erã ñaturirãcoma.

Eropirã erã mera majarã erã árĩquerecũ ta ìhaturirãcoma. Eropirã erã mera majarã erã árĩquerecũ ta erãre ñero iimorãre erãre orãcoma.

¹¹ Irisubure bajarã “Goãmũ yare weremũhtarã ãhraa,” arĩ gũyarã árĩrãcoma. Eropirã bajarã masa erã gũyarire peerã árĩrãcoma.

¹² Irisubure ñetariaro iirãcoma masa. Eropirã erã mera majarãre mahinemosome.

¹³ Eropirã mũare erã ñero iiquerecũ ta mũare erã ñero iirare yujuro bojerã yare duhubiricũ Goãmũ mũare taugũcumi. Eropigũ ãgũ pohrogue mũare opagũcumi.

¹⁴ Eropiro i õari buheri árĩpehreroguerere i yebaguere erã wereburi buheri árĩroca. Goãmũ ãgũ opa árĩrĩre árĩpehrerãre wererãcoma árĩpehrerã iri buherire erã masiboro dopa. Eropa werera pũhrũ pehrerinũ nũgaroca.

¹⁵ “Ñetariagũ Goãmũ yare goroweogũ aribure weremũriñumi iribojegue Daniel mũrũ Goãmũ yare weremũhtadigũ. Irisubure ãgũ ñetariagũ Goãmũ wihigue ãgũ niguicũ ãarãca mũa. (Irire buhegũ peeporo.)

¹⁶ Ero ãgũ niguicũ ãarã, Judea yeba árĩrãpũ utã yucũgue oma duhrĩporo.

¹⁷ Irisubure masa ñero tarirãcoma. Eropirã yojaro mera duhrirã waporo. Irisubure erã wiri weca maja pũurigue árĩrã wihi pohecague erã yare aĩrã ñajabiricãporo.

¹⁸ Eropirã irisubure gajirã erã poerigue árĩrã erã ya suhrire wihigue árĩri suhrire aĩrã pihabiricãporo.

¹⁹ Irisubure nijiposã nome, erã porãre mihrirãre oparã nome sã mojomorocurã nome dujarãcoma.

²⁰ Eropirã Goãmũre õpa arĩ serẽque: “Puhiró árĩcũ gũa judio masa soorinũ árĩcũ sãre gũa oma duhriburinũ árĩbiricãporo,” arĩ serẽque mũa Goãmũre.

²¹ Irinũrĩre masa ñero tarirãcoma. I yebare ãgũ ìhacũnugura pũhrũ masa ñero tarimũriñuma. Iri eropa árĩquerecũ ta árĩpehreri pũriri erã ñero taridiro tauro ñetariaro tarirãcoma masa pehreburinũ coregãre. Eropa ñero erã tarira pũhrũ, dipaturi eropa ñero tarisome i yeba pare.

²² Eropigũ Goãmũ irinũrĩre bajamenũrigã árĩcũ iigũcumi. ãgũ eropa iibiricũ ne yujugũ masũ taribiribocumi. Eropigũ ãgũ beyenirã erã tariborore bajamenũrigã ñero tariburinũrĩre apigũcumi Goãmũ.

²³ Irisubure gajirãre pee masi ãaque: “ãaque. Ohõ ãhrimi Cristo,” erã arĩcũ erãre peebiricãque. “Ero ãhrimi Cristo,” erã arĩcũ sãre peebiricãque.

24 “Cristo ãhraa,” arĩ gũyarã, “Goãmu yare weremuhtarã ãhraa,” arĩ gũyarã árĩrãcoma irisubure. Eropirã Goãmu ãgũ beyenirãre gũyarã, erã deyoro moarire ii ãhmurãcoma. Goãmu yare erãre cóãcũ iidarã iirãcoma erã gũyari masa.

25 I árĩpehrerire wereyumũhtaa mũare iri eropa waboro core. Eropirã ðaro pee masiyuque mũa.

26 Gajirã masa mũare ðpa arĩcũ, “Masa marirogue ãhrimi Cristo,” erã arĩcũ eroguerẽ ãarã wabiricãque. Eropirã erã “Ohõ iri wihigue ãhrimi ãgũ,” erã arĩcũ sãre erãre peebiricãque.

27 Yũhu masũ Goãmu ãgũ obeodigu guñaña mariro dujarigũra. Bupu ãgũ miacũ mũarore, abe mũririrogue, abe ñajarogue yojaro mera ãgũ miabeoro dopa ta eropa ta dujarigũra yũhu.

28 Masa erã ñeri erã iiniguirogue erogue Goãmu erãre erã ñeri dipuwaja dipuwaja moagũcumi erãre, arĩ weremi Jesu.

*Cristo i yebague ãgũ dujariborore wereñumi ãgũ
Mr 13.24-37; Lc 21.25-33; 17.26-30, 34-36*

29 Eropigu gũare werenemomi:

—Masa ñero erã tariranũri pũhrũ abe mũmu majagu, ñami majagu sã boyo duhurãcoma. Erã eropa wacũ necã dipu yuri dijariroca. Eropiro mũmaro maja sã yeba sã bũrigã ñohmeroca.

30 Irisubu ta yũhu masũ Goãmu ãgũ obeodigu yũ dehyoacũ masa ãarãcoma. Eropirã árĩpehreri cururi majarã orerãcoma. Eropirã yũ turari mera, yũ gosesiriri mera, mũmaro maja imica curu weca i yebaguere yũ dujaricũ ãarãcoma masa.

31 Corneta busũroca. Eropigu yaharã anyuare árĩpehrero i yebaguere obeogũra. Eropirã árĩpehreroguerẽ yaharãre yũ beyenirãre erã ã gameneorãcoma.

32 “Higueragu irigu waricũrĩre masia mũa. Irigu yucũgu pũcũcũ ãarã, “Bojori merogã duhyaa,” arĩ masia mũa.

33 Eropa ta irigu waro dopa ta masique mũa. I árĩpehreri yũ arĩra eropa wacũ ãarã, “Cristo dujariboro merogã duhyaa,” arĩ masique mũa.

34 Diaye arĩgũ tiiaa mũare. Irisubu majarã erã sĩriboro core árĩpehreri yũ arĩdiro dopa ta eropa waroca. Mũmaro i yeba sã pehrea waroca.

35 Yũ wereniguiripũ ne pehreesome. Árĩpehreri yũ arĩdiro dopa ta eropa waha ojogorocũroca.

36 “Irinũre yũ dujariburinũre, iri hora sãre masibea yũhu. Anyua sã irire masibea. Masa sã ne masibea. Yũ Pagũ dihta irire masimi.

37 “Noé ĩḡu árĩrasubu majarã erã árĩdiro dopa ta i yeba majarã yu dujariboro coregã eropa ta árĩrãcoma.

38 Yeba miriboro core masa baha, ihri, iĩnuma. Eropirã mojoto diriĩnuma. Noé sã erã wuadiru dohodirugue erã ñajaboro core mũraro ta iimũririĩnuma masa.

39 Mata turaro deco ahri, guñaña mariro yeba miria wayoro. Masa sã miripehrea wañuma. Guñaña mariro ero miridiro dopa ta, yũhu masu Goãmũ ĩḡu obeodigũ i yebaguere guñaña mariro dujarigũca.

40 Irisubure yũre umupeorãre beye gameneodoregũca. Eropigũ poheguere perã mohmerã árĩcũ yujugũre aĩrãcoma yu mera árĩbure. Eropigũ gajigũ ero dujagũcumi.

41 Irisubure nome perã nome erã yujuro erã ojodũcare erã biurã árĩcũ yujugore aĩrãcoma. Eropigo gajigo ero ta dujagocumo.

42 “Ōaro guñamasi coreque. Yũhu mũa opu yu dujariburinũre ne masibea mũa.

43 Ire guñaque. Yajari masu ĩḡu wihigue ĩḡu ñajaa ĩḡu yajaborore wihi opu masigũ, iri ñamire ĩḡu carĩbiriboñumi yajari masũre coregũ. Eropigũ yajari masũre ĩḡu ya wihire ñajaridorebiriboñumi.

44 Wihi opu ĩḡu ya wihire corero dopa ta mũa sã yu ariburire core árĩque. Yũhu masu Goãmũ ĩḡu obeodigũ i yebare dujarigũ guñaña mariro arigũca. Eropirã yahare eropa iiniguirã yũre coreque, arĩmi Jesu.

Yujugu mohme coregũ ĩḡu opuere ōaro umupeorire, gajigu ĩḡu ōaro umupeobiriri sãre wereñumi Jesu

Lc 12.41-48

45 Eropi Jesu ōpa arĩ queorire moami buhenemobu:

—Mohme coregũ ĩḡu opuere umupeogu pee masigũ ōpa ta aħrimi. Opu curigũ wagu, mohme coregũre ĩḡu wihire apimi. ĩḡu apigupu doregũ árĩḡucumi. Eropigũ barisubu árĩcũ mohme coregũ gajirã mohmeri masare barire gueremi.

46 Eropigũ opu ĩḡu ya wihi dujarami. ĩḡu dujaracũ ĩagu mohme coregũ ĩḡu opu ĩḡu dorediro dopa ta iipehogũ árĩḡu, mucubirigũ árĩḡucumi.

47 Diaye mũare arĩḡu tiaa. ĩḡu eropa iicũ ĩagu ĩḡu opu arĩpehreri ĩḡu yare ĩhadibugũ apigũcumi ĩḡure.

48-49 Ñegũ mohme coregũ ōpa ta aħrimi. “Yu opu yoja deyobeami,” arĩḡu, gajirã mohme corerãre paa, wũaro baha, ihri, mererã mera mereḡucumi.

⁵⁰ Īḡu eropa iirisubu ĭḡu opu guñaña mariro dujaragucumi. Īḡu dujararinure ne masibeami mohme coreḡu.

⁵¹ Eropa dujaragu ñegḡu ĭḡu iirare pee ĭḡure turaro dipuwaja moagucumi. Eropiḡu ḡuyaricurā erā warogue ĭḡure cóagucumi. Eroguere ĭḡu turaro ore, bujawereri mera ĭḡu ḡucuri cūridihugucumi, arīmi Jesu.

25

Diez nome iira queori mera buheñumi Jesu

¹ Eropi Jesu dipaturi opa arī queorire weremi buhenemogḡu daja:

—Umaro majagu ĭḡu opu árri diez nome erā wadiro dopa āhraa: Diez nome árñuma. Yuju ñami erā, erā sihāgori dipuru mera mojoto diridigure bocatīrirā wañuma.

² Erā mera majarā nome cinco nome pee masibirā nome árñuma. Gajirā nomepu cinco nome pee masirā nome árñuma.

³ Pee masibirā nomepu erā sihāgori dipurure uyḡu dicuri dipurure aīquererā erā gohrotoburire aīabiriñuma.

⁴ Pee masirā nomepu erā sihāgori dipurure dicuri dipurure aī gajī uyḡu dipuru säre erā gohrotoburire aīañuma.

⁵ Eropirā mojoto diridigḡu ĭḡu yoja deyobiricū erā nome waja pūricū carīa wañuma.

⁶ Eropiro ñami deco gaguinigḡu cariñumi: “Peeque, mojoto diridigḡu arigḡu carimi. Īḡure bocatīrirā arique,” arī gaguinigugḡu cariñumi.

⁷ Īḡu eroparicū peerā erā nome wahgā, erā sihāgori dipurure amuñuma.

⁸ Eropirā pee masibirā nomepu, gajirā nomere pee masirā nomere opa arñuma: “Ḡua sihāgori dipuru yariro iiaa. Eropirā merogā mḡa ya uyḡure oque ḡuare,” arī sereriñuma erā nome.

⁹ Erā eropa arī serēquerecū ta pee masirā nomepu opa yḡhriñuma: “Ḡua ya uyḡu mḡare ocū árīpehrerāre sihajabiriboca. Eropirā uyḡu duarā pohro mḡa basi asūrā waque,” arī yḡhriñuma pee masirā nomepu.

¹⁰ Eropirā pee masibirā nome asūrā wañuma. Erā eropa wara pḡhrḡu mojoto diridigḡu erañumi. Īḡu eracū ĭha, erā amutuhanirā nome pee masirā nome ĭḡure bocatīriñuma. Īḡu mojoto diriri bosenuḡue ĭḡu mera ĭarā wañuma. Eropirā erā bosenu erā iri wihigue ñajara pḡhrḡu, disiporore biacāñumi.

¹¹ Pḡhrḡue pee masibirā nomepu erariñuma. “Opḡu, ḡuare pāḡūque,” arīriñuma erā nome.

12 “Diaye mũare arĩḡu tiaa. Mũare masibea yũhũ,” arĩñumi ĩḡu erã nomere.

13 Yũ dujariburinũre iri hora sãre ne masibea mũa. Eropirã pee masirã nome erã yare õaro amutuha erã corediro dopa ta õarã, ñeri marirã ãhri coreque mũa sã, arĩ weremi Jesu.

Niyeruseri oroseri queorire wereñumi Jesu

14 Eropa arĩ weretuha õpa arĩ queorire moa buhenemomi daja ḡuã sãre:

—Irisubu yũ dujariburinũ ĩḡu wihi opũ iidiro dopa árĩroca. Wihi opũ árĩñumi. ĩḡu gajipũḡue curiḡu wagu, ĩḡure mohme corerãre sihubeoñumi. Eropiḡu erãre ĩḡu yare coredoreñumi.

15 Eropa coredoreḡu erã dibu masiopẽ erãre niyeruserire wajapagariserire oñumi. Yujugũre cinco mil seri oroserire oñumi. Gajigũre pe mil seri oñumi. Gajigũre yuju mil seri oñumi. Erãre otuha waha wañumi.

16 Eropiḡu cinco mil seri ĩḡu odigũ mata iriseri mera gajinore asũñumi. ĩḡu asũra mera duagu gaji cinco mil seri wajatanemoñumi ĩḡu. Eropiḡu diez mil seri mera dujañumi.

17 Eropiḡu pe mil seri ĩḡu odigũ mata ĩḡu ora pũhrũ ta iriseri mera gajinore asũñumi. ĩḡu asũra mera duagu gaji pe mil seri wajatanemoñumi. Eropiḡu wapiçuri mil seri opañumi.

18 Yuju mil seri ĩḡu odigũpũ gobe seha, iri gobegue dibuñumi iriserire dibugũ.

19 “Pũhrũ yoara pũhrũ erã opũ goerañumi. Eropa eragu ĩḡu niyeruseri mera erã wajatanemorare queobu ĩḡure mohme corerãre sihubeoñumi.

20 Eropiḡu cinco mil seri ĩḡu odigũ ĩḡu opũ pohrogue eja, diez mil seri wiañumi ĩḡure. “Cinco mil seri yũre ohabũ mũhũ. ĩañatagu. Iriseri mera gaji cinco mil serire wajatanemoabũ,” arĩñumi ĩḡure.

21 “Õaro iiaya mũhũ. Mũhũ õagu yũ dorediro dopa ta iidigũ ãhraa. Eropiḡu dohpaguere wũaro mũ mohmeborore apigũra. Eropiḡu yũ mera mucubirique,” arĩñumi ĩḡu opũ ĩḡure.

22 Eropiḡu pe mil serire aĩdigũ sã ĩḡu opũ pohrogue eja, wereñumi ĩḡure: “Pe mil seri yũre ohabũ mũhũ. ĩañatagu. Iriseri mera gajiseri pe mil seri wajatanemoabũ,” arĩñumi ĩḡu.

23 “Õaro iiaya mũhũ. Mũhũ õagu yũ dorediro dopa ta iigũ ãhraa. Merogãre õaro iiaya mũhũ. Eropiḡu

dohpaguere wuaro mu mohmeborore apigura. Eropigu yu mera mucubirique mahu," arĩnumi igu opu.

24 "Eropigu yuju mil serire aĩdigupu, igu opu pohrogue eja, wereñumi igure: "Opu, mahu turaro mohmedoregu aħraa. Eropigu gajirare mohmedorequeregu oteri moogu arĩqueregu ta mu dihta iri ducare aia.

25 Mahu eropa arĩgu arĩcã mure güiabu. Eropa güigu gobe seha, iri gobegue mu niyuserire dibucãbu. İañatagu. Ohõ aħraa mu ya niyuseri," arĩnumi igu igure.

26 "Mahu ñegu butagu aħraa. Yure, 'Mahu gajirare mohmedorequeregu mu dihta iri ducare aia,' arãa mahu yure.

27 ¿Mahu yure eropa arĩqueregu ta, duhpigu yu óraserire niyeru diburi wihigue dihburirari mahu? Mu erogue dibugu iriseri mera wuaro wajatanemoboaya. Irire mahu iicã dujaragu wajatanemoboaya yuhu," arĩnumi opu igure.

28 Eropa arĩgu gajirã igure mohme corerare doreñumi igu: "Niyuserire emaque igure. Diez mil seri opagupure oque.

29 Arĩpehrerã baja oparare onemogura. Moorãpüre merogã erã opaquerecã ta erare emapehocãgura.

30 Ihĩ mohme coregu duhpibu arĩbeamı. Naitãarogue ñerogue cóacãque igure. Erogue igu turaro ore, bujawereri mera igu gucari cüridihugucumi," arĩnumi opu, arĩ weremi Jesu.

Dipuwaja moaborore wereñumi Jesu

31 Eropı Jesu werenemomi:

—Yuhu masu Goãmu igu obeodigu arĩpehrerã anyua mera doregu dujariguca. Eropa dujarigu opu doarogue yu gosesiriri mera doaguca.

32 Eropa yu doacã, yaharã anyua i yeba majarare arĩpehrerare yu pohro gameneorãcoma. Erare gameneora puhru pe curu ducã wagura erare. Oveja İhadibugu igu iiro dopa igu cabrare igu ducã waro dopa ta masare ducã wa dobogura.

33 Eropa ducã wagu oveja dopa arĩrãre ðarãre yu diayepu dobogura. Eropigu cabra dopa arĩrãre, ñerãre yu corupu dobogura.

34 Yu eropa iira puhru yuhu arĩpehrerã tauro opu yu diayepu doarare õpa arĩ weregura: "Yu Pagu muare ðaro iigucumi. I yebare İhacünugudigugue ta mua ya arĩburire igu opu arĩrore amuyutuhami Goãmu. Eropirã dohpaguere igu amuyudiroguere arĩrã arique.

35 Yũ oaboacũ ĩarã mua yũre barire obu. Yũ ñemesibucũ mua yũre tĩabũ. Mua pohro yũ curicũ yũre ĩha masibiriquererã yũre õaro bocatĩribũ mua.

36 Suhri marigũ yũ árĩcũ ĩarã muaũ yũre suhrire sãbũ. Dorecũcũ mua yũre ĩarã aribũ. Peresu yũ árĩcũ sãre yũre ĩarã aribũ," arĩgura õarãre.

37 Yũ eroparĩcũ peerã õarãũ yũre serẽpirãcoma: "Opũ, ¿dohpárĩcũ mũ oaboacũ mũre barire ori gua? ¿Dohpárĩcũ mũ ñemesibucũ mũre tĩari gua?"

38 ¿Dohpárĩcũ mũre ĩha masibiriquererã õaro bocatĩriri gua? ¿Dohpárĩcũ mũ suhri marigũ mũ árĩcũ mũre suhri sãri gua?"

39 ¿Dohpárĩcũ mũ dorecũcũ o peresugue mũ árĩcũ sãre mũre ĩarã ejari gua?" arĩrãcoma yũre.

40 Erã eropa arĩ serẽpicũ peegũ yũhũ õpa erãre yũhriꝑuca: "Diaye mũare arĩgũ tĩiaa. Oã yaharã mera majagũ bu arĩgũ arĩquerecũ ta, mua ĩgũre eropa ta õaro iibũ. Eropa arĩgũre eropa iirã, yũre iiro dopa iirã tĩiaa mua," arĩ werẽgura erãre.

41 "Õarãre yũ eropa arĩ werera pũhrũ, copũũ arĩrãre ñerãre yũ arĩpehrerã tauro opũ õpa arĩgura: "Goãmũ ĩgu dipuwaja moamorã ãhraa mua. Yũ mera dujabiricãque. Peamegue waque mua. Iri peame ne yaribea. Watĩ, ĩgu yarã anyua sã erã arĩborore iri peamere iimi Goãmũ.

42 Yũ oaboacũ mua yũre barire obiribũ. Yũ ñemesibucũ mua yũre tĩabiribũ.

43 Mua pohro yũ curicũ yũre masibirã bocatĩribiribũ. Eropa ĩacãbũ. Suhri marigũ yũ arĩquerecũ ta, yũre suhri sãbiribũ mua. Dorecũgũ yũ árĩcũ, peresu yũ árĩcũ sãre eropa ĩacãbũ mua yũre," arĩ werẽgura erãre ñerãre.

44 Yũ eroparĩcũ peerã erã yũre serẽpirãcoma: "Opũ, ¿mũ oaboacũ, mũ ñemesibucũ, gua masibigu mũ árĩcũ, suhri marigũ mũ árĩcũ, dorecũgũ mũ árĩcũ, peresugue mũ árĩcũ, dohpárĩcũ gũarũ mũre itamubiriri?" arĩ serẽpirãcoma yũre.

45 Erã eropa arĩ serẽpicũ yũhũ erãre õpa arĩ werẽgura: "Diaye mũare arĩgũ tĩiaa. Oã yaharã mera majagũre bu arĩgũre mua ne itamubiribũ. Eropa arĩgũre mua itamubirã, yũre ta itamubeaa mua," arĩ werẽgura erãre.

46 Eropigũ erãre eropa dipuwaja moaniguicãgũcumi Goãmũ. Erã eropa dipuwajacũri ne pehresome. Eropirã õarãũ ɸmũri nũcũ õaro arĩrãcoma, arĩ weremi Jesu.

Pahia oparā, mūrā mera Jesure wejēdiañuma

Mr 14.1-2; Lc 22.1-2; Jn 11.45-53

¹ Iri árīpeherrerire ĩgu buhera pũhrũ Jesu guare ĩgu buherāre weremi:

² —Penũ pũhrũ Pascua árĩroca. Irire mua masia. Irisubure yũhũ masure Goãmũ ĩgu obeodigure ñearācoma. Ñeha yũre crusague wejērācoma, arĩmi ĩgu guare.

³ Irisubu ta pahia oparā, mūrā sã gamenereñorā. Caifa pahia opu ya wihi gamenereñorā erā.

⁴ Ero gamenere, erā guýari mera Jesure ñeha erā wejēburire game weretamurā iĩñorā.

⁵ —Bosenũ árĩcũ ĩgure ñeabiricārā. Masa gua ĩgure ñeacũ ĩarā gua gamenerenijarā gamequeãbocoma, arĩrā iĩñorā erā erā basi.

Nomeo poresuri mera Jesure pipeopo

Mr 14.3-9; Jn 12.1-8

⁶ Irisubure Simo cami boadigu ya wihi arĩmi Jesu. Gua sã arĩbũ. ĩgu arĩri maca Betania waĩcũri maca arĩbũ.

⁷ Iri wihi ĩgu baro watope yujugo nomeo poresuri aĩgãri, Jesu dipuru weca pipeomo. Iri poresuri alabastro waĩcũdiru dicũri deco, igo pipeori deco wajapagari deco arĩbũ.

⁸ Igo eropa pipeocũ ĩarā gua Jesu buherā guarā õpa arĩnũgabũ:

—¿Duhpigo igo irire eropa iisirimaacãri?

⁹ Iri poresurire duaboañumo. Eropa duago wũaro niyerure wajataboañumo. Eropa wajatago, mojomorocũrãre iri niyerure oboañumo, arĩbũ gua ĩgu buherā.

¹⁰ Gua eroparĩcũ ĩagu, Jesu guare weremi:

—¿Duhpirã eropa arĩri mua igore? Yũre õaro iigo iimo.

¹¹ Mojomorocũrãpũ mua mera eropa arĩniguirācoma. Eropirã mua erãpũre omasia. Yũpũ i yebare mua mera eropa arĩniguisome.

¹² Yũre erã yaaboro core yũ dupũre amuyugo, poresuri mera sũhumo yũre.

¹³ Eropigu diaye ta muare arĩgu iiaa. Árĩpehrero i yebaguere õari buherire erã wererogue igo õpa iirare wererācoma. Erã eropa werecũ peerã masa bajarã igore guñarācoma, arĩ weremi Jesu guare.

Juda Iscariote Jesure ĩhaturirãre ĩgu ĩhmuburire erã mera weretamuñumi

Mr 14.10-11; Lc 22.3-6

¹⁴ Irisubure yujugu gua mera majagu Juda Iscariote pahia oparā pohroque ejaũ.

15 Eja, erāre serēpipu.

—¿Jesure mware yu ihmucũ dipẽ wajayerãcuri yure mua? arĩ serēpipu erāre.

Īgu eroparĩcũ, erā ĩgure treinta seri plataserire oñorã.

16 Erā eropa ocũ Judapu Jesure ĩgu ihmuburĩnure corenipu.

Jesu ĩgu buherã mera ĩgu baturĩnũ arĩyoro

Mr 14.12-25; Lc 22.7-23; Jn 13.21-30; 1Co 11.23-26

17 Eropi bugabiriri panre erā baburĩnũ bosenu arĩnugarĩnũ arĩbu. Eropirã gua Jesu buherã ĩgu pohrogue waha serēpibu ĩgure:

—¿Nohonogue bosenu mari baburire amudoregu obeori mũhu guare? arĩbu ĩgure.

18 Gua eroparĩcũ ĩgu guare weremi:

—Jerusalengue waque. Ero mua bocagure opa arĩ wereque: “Marire buhegu mre opa arĩ weredoreami: ‘Yu ñero tariboro merogã duhyanijaa. Pascua arĩcũ yũhu, yu buherã mera mu ya wihi gua barãca,’ arĩ weredore obeomi guare,” opa arĩ wereque iri wihi opure, arĩ obeomi Jesu guare.

19 Eropirã guare ĩgu dorediro dopa ta iirã, Pascua arĩcũ gua baburire amubu gua.

20 Eropi iri ñamire gua mera doce ĩgu buherã mera bagu arĩmi Jesu.

21 Gua barisubu ĩgu guare weremi:

—Diaye ta mware arĩgu iiaa. Yujugu mari mera majagu ta yure ihaturirãre ihmugucumi yure, arĩ weremi ĩgu guare.

22 Īgu eroparĩcũ peerã guapu burigã bujawererã, ĩgure serēpinagabu gua yujurãyeri.

—Opu, ¿yu ãhriri mre ihmubu? arĩ serēpibu.

23 Gua eropa arĩ serēpicũ ĩgu yuħrimi:

—Yu baripare yu mera yoso bagu ta ãhrimi yure ihaturirãre ihmubu.

24 Iribojegue erā yure arĩ gojadiro dopa ta yũhu masu Goãmũ ĩgu obeodigu sĩriguca. Yure ihaturirãre ihmudigupu ñetariaro tarigucumi. Eropiro ĩgupure ĩgu masa dehyoabiricũ oaboya. Ñero taribiriboñumi, arĩmi Jesu.

25 Īgu eroparĩcũ ĩgure ihaturirãre ihmubu Juda ĩgure serēpimi:

—Buhegu, ¿mre ihmubu ãhriri yũhu? arĩ serēpimi ĩgu.

—Ë u. Mũhu ta ãhraa, arĩmi.

26 Eropa arĩ weretuhaja gua barisubu Jesu panre aĩ, Goãmure “Õhaa,” arĩmi. Eropa arĩtuha irire nuha guare ĩgu buherãre gueremi.

—Ire aĩ, baque. I yu dupu āhraa, arĩmi ĩgu.

27 Eropa arĩtuha ĩgu ihriripare aĩ, Goāmure “Ōhaa,” arĩ, guare omi.

—Mua árĩpehrerã ire ihrique.

28 I yu di āhraa. Bajarã ñero erã iirare cóabu siringuca. Eropigu yu di cóaguca. Eropa siringu Goāmu yu Pagu “Masare ñaro iigura,” ĩgu arĩdiro ii ojogorocuguca.

29 Muare arĩgu tiiaa. Yu Pagu ĩgu opu árĩrogue mua mera igui deco mama decore ihriguca. Mari erogue ihriboro core i igui decore dipaturi ihrinemosome yuhũ, arĩmi Jesu guare.

Pedro “Jesure masibea,” ĩgu arĩ guyaburiñere wereñumi Jesu

Mr 14.26-31; Lc 22.31-34; Jn 13.36-38

30 Eropirã yujuñe Goāmure bayariñere bayatuhajarã wiriabu. Utãgu Olivo waicudigugue wabu gũa.

31 Erogue gũa ejacũ Jesupu guare weremi:

—Dohpagã ñami mua árĩpehrerã yure cóagãrãca. Mua yure cóaborore ñpa ta arĩ gojañuma Goāmu yare erã gojarapũ: “Ovejare ĩhadibugure erã wejẽcũ iiguca. Yu eropa iicũ oveja ĩgu yarã ĩgure cohãgã wasiria warãcoma,” arĩ gojañuma.

32 Eropigu Goāmu yure ĩgu masura puhru mua core Galileague wamãhtaguca, arĩmi ĩgu.

33 ĩgu eroparĩcũ peegu Pedro ñpa arĩrimi:

—Yu mera majarã árĩpehrerã erã mure cóagãquerecũ ta yurũ mure ne cóãsome, arĩmi ĩgu.

34 Jesu yũhrimi:

—Diaye arĩgu tiiaa mure. Dohpagã ñami cãreña ĩgu wereboro core uhresubu “Yuhũ Jesure masibea,” arĩgũca mũhũ, arĩmi ĩgu Pedrore.

35 ĩgu eropa arĩquerecũ ta Pedro ñpa arĩ yũhrimi:

—Mu mera yure erã wejẽquerecũ ta, “Jesure masibea,” ne arĩsome yuhũ, arĩ yũhrimi Pedro.

Eropirã gũa sã gajirã ĩgu buherã Pedro ĩgu arĩro dopa ta arĩribũ gũa Jesure.

Getsemanigue Goāmure serẽñumi Jesu

Mr 14.32-42; Lc 22.39-46

36 Eropi Getsemaní waicuri gorogue Jesu gũa ĩgu buherã mera waha, erogue eja, guare arĩmi:

—Ohõ doayugue. Mua ohõ doaropẽ sohõgue Goāmu mera wereniguigu wagu iiaa, arĩmi ĩgu guare.

37 Eropa arĩtuha Pedrore, perã Zebedeo porãre, erã urerãre sihgãmi. Eropigu ĩgu turaro bajawere, ñero siporãcupũ.

38 Eropa bujaweregu ĩgu mera majaräre ĩgu sihugäniräre arĩpu:

—Burigã ñero sĩporãcua yũũ. Yũre turaro pũriro dopa ta pepigu iiaa. Sohõñari wanigu iiaa. Ohõ dujanique mũa. Eropirã yũ mera ta tũyũque mũa sã, arĩpu ĩgu eräre.

39 Eropa arĩtuha ero core merogã wanemo, yeba mereja, Goãmũre arĩpu:

—Ahũ, yũ ñero tariburire iidiabigu iibiricãque. Yũ eropa arĩquerecũ ta yũ gamero dopa iibita. Mũpu masia. Mũ gamero dopa iique, arĩpu ĩgu Goãmũre.

40 Eropa arĩtuha, urredã ĩgu buherã pohrogue eranijagu erã carĩ oyaräre ĩapu. Eräre ĩagu Pedrore õpa arĩpu:

—¿Yuju hora gohra yũ mera ta tũyũtamubirari?

41 Ōaro iique mũa. Mũa pepiri mera õarire iidiaraa mũa. Mũa seyaro irire iidiaquererã ta irire bocatũbeaa. Eropirã Goãmũre serẽniguique ñero mũa iibiriboro dopa, arĩ werepu Jesu.

42 Eropa arĩtuha dipaturi waha, Goãmũre serẽpu daja:

—Ahũ, yũ ñero tariburire iidiagu iique yũre. Mũ gamero dopa ta iique, arĩpu ĩgu.

43 ĩgu buherã pohrogue urredã pohrogue dipaturi erapu daja. Eropa eragu carĩ oyaräre ĩapu daja. Wũa pũritaricãyoro eräre.

44 Eropigu dipaturi eräre apicã dipaturi waha, Goãmũ mera werenigui pu daja. ĩgu ero core ĩgu arĩdiro dopa ta arĩpu.

45 Eropa arĩtuha ĩgu buherã pohrogue eraa, eräre arĩpu:

—¿Mũa carĩrã soorã iiri dohpa? arĩpu ĩgu. Eropa arĩtuha masa erã aricũ ĩagu õpa arĩpu:

—Iripẽta ãhraa. Dohparagã yũ masure Goãmũ ĩgu obeodigure ñeräre orãcoma yũre.

46 Wahgãque. Ina warã. ĩaque. Yũre ĩhaturiräre obu ohõ ahrimi, arĩpu ĩgu.

Jesure ĩhaturirã ĩgure peresu iĩnuma

Mr 14.43-50; Lc 22.47-53; Jn 18.2-11

47 ĩgu eropa arĩ wereniguirisubu gua mera majagu mũrupũ Judapu erami. Eropirã masa bajarã ñoserimijiri yucũ dũcari opanirã ĩgu mera yujuro mera erama. Erã pahia oparã, erã mũrã sã erã obeonirã árĩma.

48 Negohrare Jesure ĩhaturiräre wiabu õpa arĩ weresere-tuhapu Juda: “Yũhũ wayuporäre mimigu ĩgu ta árĩgũcumi mũa ñeabu. ĩgure yũ mimira pũhrũ ñeaque,” arĩpu Juda eräre.

49 Eropigu eragu Jesu pohrogue mata wapurumujumi.

—Buhegu, ¿ãhriri mũhũ? arĩ ĩgure wayuporã mimimi.

50 Īḡu eropa mimicũ Jesu õpa arĩmi:

—Yũ mera majagu, ¿duhpigu õguere ahriri mũhu? arĩmi ĩḡure.

Eropirã erã Jesure ñeama.

51 Erã eropa iicũ ĩagu Jesu mera majagu ĩḡu matamijire tũãwea aĩ, pahi opu pohro majagure ĩḡu gamirore tabe corodijucãmi.

52 Īḡu eropa iicũ ĩagu Jesu ĩḡure weremi.

—Mũ matamijire dibuque. Gajirãre ñosenirã árĩrã, erã ñose gamecũ sĩrirãcoma.

53 Yũ Pagure yũ itamudorecũ ĩḡupu bajarã anyuare doce cururire yũ pohro obeobocumi. ¿Irire masibeari mũa?

54 Eropa itamubodiro árĩquereḡu ta ĩḡure yũre itamudoresome yũhu. Yũ eropa dorebircũ Goãmu yare erã gojarapũ arĩdiro dopa ta eropa waroca, arĩmi ĩḡu.

55 Eropa arĩtuha masare weremi ĩḡu:

—¿Mũa ñoserimijiri mera, yucu ducari mera arirã yajari masare iro dopa mũa yũre ñearã arirã iari? Ʋmuri nũcu Goãmu wihigue yũhu mũare buhe doacũ, mũa yũre ne ñeabiribu.

56 Dohpaguere mũa yũre eropa iirã i árĩpehreri Goãmu yare weremũtanirã erã arĩ gojadiro dopa ta iiaa mũa, arĩmi Jesu erãre.

Īḡure eropa ñeacũ ĩarã gũa ĩḡu buherã árĩpehrerã ĩḡure cohã omagã wabũ gũa.

Judio masa oparã Jesure serẽpiñuma

Mr 14.53-65; Lc 22.54-55, 63-71; Jn 18.12-14, 19-24

57 Eropi ĩḡure ñeanirã pahi tauro opu Caifa waĩcũḡu ya wihigue aĩ ejañorã ĩḡure. Iri wihi ta masare buherã, mũrã sã gamenereñorã.

58 Pedropũ yoarogue erãre ĩhanũrusiapũ. Eropa ĩhanũrusiagu Caifa ya wihire cãhmotara sãrirore eja, iri sãriro pohecague ñajaa wapũ. Ñajaja, iri wihire corerã surara mera doapũ. “Jesure duhpiicũ ĩagũra,” arĩḡu doapũ Pedro.

59 Eropirã pahia oparã, gajirã oparã mera gamenerã Jesure wejẽdorediarã, ḡuyari mera erã ĩḡure ñero dipuwaja moaborore ḡuñamaariñorã.

60 Erã eropa weresãburire ḡuñabocabiriñorã. Eropa ḡuñabocabiriquererã ta masa bajarã ĩḡure eropa weresãmorã amañorã. Eropirã perã ĩḡure weresãmorã erañorã. Ʋpa arĩñorã:

61 —Ihĩ õpa arĩmi: “Goãmu wihire cóãmasia. Eropa cóãḡu uhrenũ puhũrũ iri wihire dipaturi iigũra,” ĩḡu arĩcũ peebũ gũa, arĩ weresãmaacãñorã Jesure.

62 Erã eropa arĩra pũhrũ pahia tauro opũ wahgãnũgaja, Jesure serẽpipũ:

—¿Oã mũre weresãquerecũ ta erãre yũhri gamebeari mũhũ? ¿Mũre erã weresãrire dohpa arĩ yũhri gahmeri mũhũ? arĩpũ opũ.

63 Īgũ eroparĩcũ peequeregũ ta Jesu eropa pepicãpũ. Īgũ eropa yũhribiricũ ĩagũ pahia tauro opũ ĩgũre dipaturi serẽpipũ daja:

—Goãmũ ojocarinigucãgũ mera diaye arĩque mũhũ. Mũhũ eropa arĩbiricũ mũre ĩgũ dipuwaja moagũcumĩ. Wereque gũare. ¿Cristo Goãmũ magũ ta ãhriri mũhũ? arĩ serẽpipũ daja.

64 Īgũ eroparĩcũgũe ta Jesu yũhripũ:

—Īgũ ta ãhraa. Mũare diaye weregũ tiiaa. Pũhrũ yũhũ masũ Goãmũ ĩgũ obeodigũ Goãmũ yũ Pagũ turagũ pohro ĩgũ diayerũ doacũ ĩarãca mũa. Eropirã mũmaro maja imica weca yũ dujaricũ sãre ĩarãca, arĩ yũhripũ Jesu.

65 Īgũ eroparĩcũ peegũ pahia opũ, ĩgũ basi ĩgũ sañarañe suhrirore yeguecãpũ gajirãre “Guatariacãmi,” arĩdoregũ.

—Īre weresãrãre gajirãre gamebeaa pare. Īgũ basi Goãmũre ĩgũ ñero werenigucũ peea mari. Eropirã ĩgũ ñero iira dipuwajare masituhãa mari.

66 ¿Eropirã dohpa iirãcuri mari dohpaguere ĩre? arĩ serẽpipũ ĩgũ gajirã oparãre.

—Īgũ ñeri dipuwaja wejẽcãro gahmea, arĩ yũhriñorã erã.

67 Erã eropa arĩra pũhrũ ĩgũ diapore disico ehosũ, ĩgũre pañorã erã.

68 Gajirã ĩgũ cuirire diricãhmota õpa arĩ wereyañorã ĩgũre:

—¿Noa mũre pari? Cristo Goãmũ beyedigũ árĩgũ ĩabiriqueregũ ta wereque gũare, arĩ pañorã erã.

—*Īgũre masibea, arĩ gũyañumi Pedro Jesure*

Mr 14.66-72; Lc 22.56-62; Jn 18.15-18, 25-27

69 Eropi iri wihi pohro árĩri pũũ õari pũũ Pedropũ doapũ. Īgũ eropa doacũ ĩago pahia opũ pohro majago ĩgũ pohroque erago õpa arĩpo:

—Mũ sã Jesu Galilea majagũ mera ãhrabũ, arĩpo igo.

70 Igo eroparĩcũ peegũ Pedro õpa arĩpũ:

—¿Dohpa arĩmaacãgo iiri mũhũ? Mũ arĩgũre ne masibea yũhũ, arĩpũ Pedro árĩpehrerã erã peero.

71 Igo eropa arĩra pũhrũ iri pũũ maja sãriro disiporo pohroque wapũ Pedro. Ero ĩgũ árĩcũ gajigo pohro majago ĩgũre ĩago, ero arĩrãre õpa arĩpo igo sã:

—Jesu Nazare majagu mera āhrami ihī, arīpo igo Pedrore daja.

⁷² Igo eroparīcū peegu Pedro yuhripu:

—Goāmū mera diaye arīgu iiaa. Īgu mū arīgure ne masibea yūhū, arī yuhripu Pedro.

⁷³ Eropi merogā pūhrū ta ero niguinirā Pedro pohrogue waha, īgure ōpa arīñorā.

—Diaye ta āhraa. Jesu mera majarā mera majagu ta āhraa mū sā. Erā iro dopa ta wereniguia mūhū, arīñorā erā Pedrore.

⁷⁴ Erā eroparīcū Pedro yuhripu:

—Diaye ta Goāmū mera arīgu iiaa mūare. Yū diaye arībiricū Goāmū yūre dipuwaja moaporo. Īgu mūa arīgure ne masibea yūhū, arī yuhripu īgu erāre.

Īgu eroparīcū ta cāreña wereru.

⁷⁵ Īgu werecu peegu Jesu īgure arīrare guñapu. “Cāreña īgu wereboro core ‘Jesure masibea,’ arīgūca mūhū. Ūhresubu eropa arīgūca mūhū,” Jesu īgure arīrare guñapu Pedro. Eropā guñagu iri sārīrore wiria turaro orepū.

27

Pilato pohrogue Jesure aīgāñuma

Mr 15.1; Lc 23.1-2; Jn 18.28-32

¹ Eropirā boyodi merero ta pahia oparā, mūrā sā Jesure erā wejēdoreborore game weretamuñorā.

² Erā eropa weretamura pūhrū īgure dihri, Pilato waīcūgu opu pohrogue aīgā, īgure oñorā Pilatore. Pilatopū iri yeba majarā opu árīmi.

Juda Iscariote sīria wañumi

³ Eropigu Jesure erā wejēdorecū īagu Judapu Jesure īgu īhmurare guña turaro bujawereru. Eropā bujaweregu treinta seri niyeruserire īgu ñearaserire wiagu wagu, pahia pohrogue, mūrā pohrogue eja, ōpa arīpu:

⁴ —Jesu mūare yū īhmudigu ñeri marigu īgu árīquerecū ta erā wejēdoreama īgure. Eropigu mūare īgure īhmugu ñero iigu iiaa yūhū. Eropigu i niyeruserire mūare wiagu iiaa, arīpu Juda erāre.

Īgu eropa arī werera pūhrū erā yuhriñorā:

—Eropa ta iicuraporo. Mū eropa arīri guare duhpiburi árībeaa. Mū dihta eropa arī pepia irire, arī yuhriñorā erā īgure.

⁵ Erā eropa arī yuhriira pūhrū erā árīri wihi Goāmū wihigue Juda īgu niyeruserire mehsiripicāpu. Mehsirituha

waha wapɛ. Waha, yuradare dirisiu, ĩɣɛ basi ĩɣɛ wɛnɛɣɛ tuhbiu, buhrimadija, sĭria wapɛ pare.

⁶ Eropirã pahia oparã niyeruserire aĩrã õpa arĩñorã:

—I niyerure Goãmu wihi maja comorogue niyeru diburi comorogue mari apimasibea. I niyeru mera ta masure wejẽdorema. Eropiro mari doreri marire eropa árĩri niyerure dibudorebeaa Goãmu wihigue, arĩñorã erã erã basi.

⁷ Erã eropa arĩra pɛhrɛ, “Õpa iirã,” erã arĩ weretamura pɛhrɛ mátasorori mohmegɛ ya yebare asũrã wañorã. Iriseri mera asũñorã. Gajipɛ majarã iri macague eranirã sĭricũ erãre yaaburi yebare asũñorã.

⁸ Eropirã iri yebare “Di cóari yeba,” arĩ waĩyema masa. Dohpague sãre eropa ta waĩcua.

⁹ I árĩpehreri eropa wayoro iribojegue majagɛ Jeremia ĩɣɛ “Eropa waroca,” ĩɣɛ arĩdiro dopa ta. ĩɣɛ Goãmu ya weremɛhtadigɛ árĩñumi. Õpa arĩ gojañumi ĩɣɛ: “‘Treinta niyeruserire plataserire iripẽta wajayerãra gua ĩɣure ñeaborore,’ arĩrãcoma Israe masa.

¹⁰ Eropirã iriseri mera mátasorori mohmegɛ ya yebare asũrãcoma erã. Õpa ta yure iidoremi Goãmu,” arĩ gojañumi Jeremia iribojegue.

Pilato Jesure serẽpiñumi

Mr 15.2-5; Lc 23.3-5; Jn 18.33-38

¹¹ Eropi Pilatore erã Jesure ora pɛhrɛ ĩɣɛpɛ ĩɣure serẽpipɛ:

—¿Diaye ta judio masa erã opɛ ta àhriri mɛhɛ? arĩ serẽpipɛ Jesure.

—Mɛ arĩro dopa ta ĩɣɛ ta àhraa, arĩ yɛhrɪpɛ Jesu.

¹² Eropa arĩ yɛhriquerɛɣɛ ta, pahia oparã, mɛrã sã erã weresãcũ yɛhribiripɛ.

¹³ ĩɣɛ eropa yɛhribiricũ ĩagɛ Pilato serẽpipɛ:

—¿I árĩpehreri erã weresãrire peebeari mɛhɛ? arĩ serẽpipɛ ĩɣɛ Jesure.

¹⁴ ĩɣɛ eropa arĩ serẽpique-recũ ta Jesu ne yuju disiro yɛhribiripɛ. ĩɣɛ eropa yɛhribiricũ ĩagɛ Pilato ɛca wapɛ.

Jesure wejẽdoreñuma

Mr 15.6-20; Lc 23.13-25; Jn 18.38-19.16

¹⁵ Bojori nɛcɛ Pascua árĩcũ peresu árĩdigure yu-juɣare masa “ĩɣure wiuque,” erã arĩɣure Pilato eropa wiubasamɛripɛ.

¹⁶ Irisubure Barrabá waĩcɣɛ peresugue árĩpɛ. ĩɣure masiñorã masa.

¹⁷ Eropigɛ erã gamenerecũ Pilato serẽpipɛ erãre:

—¿Nihipure mware wiubasacuri yuhū? ¿O Barrabáre o Jesure “Cristo” erā arīgure wiubasacuri yuhū? arī serēpipu Pilato Jesure wiudianijagu.

18 Jesure masa erā mahicū ĩarā judio masa oparā ĩgure ĩhaturirā ĩñorā. Eropa ĩhaturirā ĩgure oñorā Pilatore. Irire erā ĩhaturirare masigu Pilato Jesure wiudiaripu.

19 Eropi Pilato masare ĩgu beyeri pēro ĩgu doacū ĩgu marapo ĩgure quere obeopo: “Dohpagā ñamire Jesure quēgo burigā ñero pepiabū ĩgure ñero iiburire. Eropigu ĩgure ñeri marigure ne gajiropa iibiricāque mūhū,” arī werebeopo ĩgu marapo Pilatore.

20 Pilato Jesure eropa wiudiaquerecū ta pahia oparā, mārā sã masare ōpa arĩdoreñorā: “Barrabápure wiudoreque. Jesupure wejēdoreque,” arĩdoreñorā masare.

21 Eropigu Pilato masare serēpipu daja:

—¿Oã perāre nihipure mware wiubasacuri yuhū? arī serēpipu.

—Barrabápure wiubasaque gware, arī yuhriñorā.

22 —¿Ihĩ Jesu, “Cristo” erā arīgupure dohpa iigucuri yuhū? arī serēpipu ĩgu.

—Crusague pabia wejēque ĩgure, arī yuhriñorā masa árĩpehrerā.

23 —¿Ñehenore ñerire iiari ihĩ mua eroparĩcū? arĩpu ĩgu. ĩgu eroparĩcū peerā erā turaro mera gaguinigu-inemoñorā:

—Crusague pabia wejēque ĩgure, arī gaguiniguñorā daja masa ĩgure.

24 Erā eropa arī gaguiniguicū peegu, ĩgure erā peedia-biricū ĩagu, “Masa gua gamequeãbocoma,” arĩgu, yuhrigu ta ōpa iipu Pilato. Decore aĩgãridoretuhaja masa erā ĩhuro ĩgu mojo coepu. Eropa mojo coegu ōpa arĩpu:

—Īre wejēra dipuwaja, yaha dipuwaja árĩsome. Mua ya dipuwaja árĩroca, arĩgu mojo coepu.

25 ĩgu eroparĩcū peerā árĩpehrerā masa ōpa arĩñorā:

—Īre gua wejēdorera dipuwaja gua porā sã gua ya dipuwaja ta árĩporo, arĩñorā masa.

26 Erā eroparĩcū peegu Pilato Barrabáre peresugue arĩdigure wiudorepu masa erā gamegure. Eropa iituha Jesupure yuradari mera tãradore, ĩgure crusague pabia wejēdoregu wiapu surarare.

27 ĩgu eropa wiacū Pilato ya wihigue ĩgu surara aĩ ejañorā Jesure. Eropirā erā surara árĩpehrerāre Jesu pohrogue gameneoñorā.

28 Eropirā ĩgu suhrire tuwea aĩ, opu ya suhriro dopa bejariñere Jesure sãñorā.

29 Eropa sātuha, pora berore iituha, ĩġu dipuru weca duhpeoñorã. Eropa duhpeotuha, yucugure diayepu mohsuañorã. Mohsuatuha, õpa arĩ wereyañorã erã ĩġure ĩġu pohro merejarã:

—Umupeorã arique. Judio masa opu õaro árĩporo, arĩ wereyañorã ĩġure.

30 Eropirã ĩġure disico ehosũñorã. Erã mohsuadigure ĩġure tuãwea aĩ, ĩġu dipurure pañorã irigũ mera.

31 ĩġure eropa wereyara puhrũ erã sãra suhrirore tuwea aĩ ĩġu ya suhriropure sãñorã daja. Eropirã crusague pabia wejẽmorã ĩġure aĩ wiria wañorã.

*Erã Jesure crusague pabia wejẽñuma
Mr 15.21-32; Lc 23.26-43; Jn 19.17-27*

32 ĩġure aĩgã, Simo waicugure Cirene majagure bocatĩri, ĩġure Jesu ĩġu coãra crusare coãtamudorema.

33 Coãgã Gólgota waicurogue ejama. Gólgota arĩro, mari ya mera “Dipu pero” arĩro iiaa.

34 Eropirã vinore suĩri deco mera erã morera decore Jesure orima erã. Iri decore ihriña, ihribirimi ĩġu.

35 Eropirã ĩġu suhrire tuwea aĩra puhrũ ĩġure crusague pabiamã erã. Eropa pabiatuha ĩġu suhri mũrare, “¿Noa yañe árĩrocuri iñe?” arĩ masimorã erã basi game deamehtu birama. Eropa iirã Goãmũ yare weremuhtadigũ ĩġu arĩdiro dopa ta iirã iima erã. Õpa arĩ gojañumi ĩġu: “Yaha suhrire erã basi aĩmorã, ‘¿Noa yañe árĩrocuri iñe?’ arĩ masimorã erã basi game deamehtu birama erã,” arĩ gojañumi iribojegure.

36 Deabiratuha ĩġure ĩhadoacurima erã.

37 ĩġu dipuru weca crusague õpa arĩ gojarapũre pabia tuma erã ĩġure weresãra wererapũre. “Ihĩ judio masa tauro opu aĩhrimi,” erã arĩ gojarapũre pabia tuma.

38 Eropirã perã yajari mũrare Jesu pohro gajĩ crusarigue pabia tuma erã sãre. Yujugũ ĩġu diayepu, gajigure ĩġu copu pabia tuma erã.

39 Crusari pohro tarigãrã Jesure ĩha, erã dipure yurerã, ñero arĩ wereniguima ĩġure:

40 —“Goãmũ wihire cohã, uħrenũ puhrũ iri wihire amugura daja,” arĩ wereniguidigũ árĩribũ mũhũ. Goãmũ magũ árĩġu mũ basi dijaque. Eropigũ mũ basi itamuque. Eropigũ tari weregũca mũhũ, arĩma masa.

41 Eropa ta pahia oparã, masare buherã sã eropa arĩ wereyama.

42 —Īḡu gajirāre taudigū árīquereḡu ta ĩḡu basi taumasibeami. “Israe masa opu āhraa,” arīrimi ĩḡu. Eropirā ĩḡu basi ĩḡu دچارicū ĩarā ĩḡure umupeorāca.

43 Īḡupu Goāmure umupeorimi. Eropigū “Goāmū magu āhraa,” arīrimi ĩḡu. Īḡu eropa arīḡu árīcū Goāmupu ĩḡure itamuporo, arī wereyama erā.

44 Yajari mura ĩḡu pohro erā pabianirā eropa ta ĩḡure wereya ñero wereniguima erā sã.

Jesu sīria wañumi

Mr 15.33-41; Lc 23.44-49; Jn 19.28-30

45 Eropi goeri boje árīcū ũhre hora gohra árīpehrerogue naitīa wabu.

46 Eropigū irisubu naitīa wari subure Jesu turaro gaguinimi:

—Elí, Elí, ¿lema sabactani? arīmi ĩḡu. Eropa arīḡu ōpa arīḡu iimi mari ya mera: “Yū Goāmū, yū Goāmū, ¿duhpigū yure cohāri mūhū?” arīḡu iimi.

47 Īḡu eroparīcū peenirā yujurāyeri ero niguinirā ōpa arīrima:

—Goāmū ya weremūhtadigūre Eliare sihugū iicumi, arīrima erā.

48 Eropigū yujugū erā mera majagū mimi aīri yasū mera vino suīrire yosotuha, aī omagā, yucugū ojogorore diritu, Jesure simujumi.

49 Īḡu eropa iicū ĩarā gajirā simujugūre ōpa arīma:

—Corenique. Elia ĩḡure ĩḡu itamucū ĩanirā dohpa mari, arīma erā.

50 Erā eropa arīra pūhrū dipaturi Jesu turaro gaguiniguī sīria wami.

51 Īḡu sīricū ta Goāmū wihi majañe suhriro ero erā cāhmotara suhriro deco mera yehguea wayoro. Eropiro yeba sã ñohmebu. Eropa ñohmecū ũtā sã pagayeri sã wahria wabu.

52 Eropirā masa goberi pāricū, bajarā Goāmū yarā árīnirā iribojegue sīrinirā mura masa wiriañorā.

53 Masa wiriarā iri goberire cóacā ōari macague Jerusalengue wañorā erā. Erogue erā wacū masa bajarā erāre ĩañorā.

54 Eropirā yeba ñohmecū ĩarā, sīrinirā mura erā masa wiriacū ĩarā, surara opu ĩḡu surara mera ũca wama. Erā Jesure crusague árīḡure corerā árīma. Ũca wa, ōpa arīma:

—Diaye ta āhraa. Ihī Goāmū magū ta āhrañumi, arīma erā.

55 Eropirā Galileague Jesu mera arinirā ĩḡure itamunirā nome árīma. Yoarogue crusague tuyagūre ĩhabeo niguibuḡa erā mera.

56 Erã nome mera María Magdalena árĩmo. Gajigo María waĩcũgo sã árĩmo. Igoꝝ Santiago, José sã pago árĩmo. Gajigo Zebedeo marapo árĩmo.

*Jesu dũꝝre masa gobegue apiñumi José
Mr 15.42-47; Lc 23.50-56; Jn 19.38-42*

57 Eropi ñamicague José Arimatea majagu doberi opagu ero árĩmi. Īgu Jesu buhegu árĩmi.

58 Eropigu Pilato pohrogue eja, Jesu dũꝝre serẽꝝ. Īgu eropa serẽcũ peegu Jesu mura dũꝝre odoreꝝ Pilato.

59 Īgu eropa dorera pũꝝre Joséꝝ Jesu mura dũꝝre aĩ, diju, õari suhriro guhriari mariri suhriro mera ĩgu dũꝝre omapũ.

60 Omatuha, José ĩgu ya masa gobegue apĩꝝ ĩgu dũꝝre. Iri gobe erã utãyegue erã seara gobe mama gobe árĩyoro. Iri gobegue apituha, wũariye utãyere taragãꝝ iriye mera bihabu. Bihatuha, waha warũ.

61 Eropirã María Magdalena, gajigo María mera iri gobeguerẽ ĩhadoo coreñorã.

Jesure erã apira gobere surara coreñuma

62 Eropi gajinũ, Pascua árĩburire erã amuranũ pũꝝre Sabado árĩcũ pahia oparã, fariseo masa sã Pilato pohro gamenerẽñorã.

63 Gameneretuha õpa arĩñorã erã Pilatore:

—Opũ, irire guñaã gua. Īgu guyaricũgu Jesu ojocarinigũ õpa arĩꝝ ĩgu: “Uhrenũ pũꝝre masa mũriagũca yũhũ,” arĩꝝ ĩgu.

64 Īgu eropa arĩdigũ árĩcũ ĩgu buherãꝝ ĩgu dũꝝre yajabocoma. Eropa yajarã masare õpa arĩbocoma: “Jesu masa mũriami,” arĩbocoma erã. Īgu Jesupũ masare guyagũ iimi. Īgu buherã sã “Īgu masa mũriami,” arĩã guyarã iirãcoma. Eropirã Jesu ĩgu guyadiro tauro erã guyaripũ ñetariaroca. Eropa yajari arĩgu uhrenũ gohra mũ surarare coredoreque erã ĩgu mũꝝre apidirogue, arĩñorã erã Pilatore.

65 Pilato yũhriꝝ:

—Áũ. Yaharã surara coreporo. Eropirã mũã bocatĩuropẽ iri gobere õaro coreque, arĩꝝ ĩgu erãre.

66 Īgu eroparĩcũ erã waha, iri gobere bihariye merague ta pihatuñorã masa erã ñajacũ ĩha masimorã. Eropirã surarare iri gobere coredoreñorã.

28

*Jesu masa m̄riañumi**Mr 16.1-8; Lc 24.1-12; Jn 20.1-10*

¹ Eropi judio masa soorinup̄ Sabadonup̄ irin̄ taricũ, Domingo árĩcũ ñamiñarigã árĩcũ María Magdalena gajigo María mera Jesu masa gobere ñarã wañorã.

² Eropiro mata yeba turaro ñohme purumujuyoro. Eropa ñohmecũ mari Op̄ ñgu anyu umarogue aridiḡ dijari, masa gobere bihariyere ut̄ayerẽ tarabeo iriye weca doap̄.

³ Ñgu anyu bupu miaro dopa õaro gosesiriḡ, ñgu suhri yaji poari iro dopa õaro boreri suhricuḡ arĩp̄.

⁴ Ñgu eropa dehyoacũ, surara iri gobere corerã, ucataria wa, naragã, weca gohrare s̄irinirã iro dopa wañorã.

⁵ Eropiḡ anyup̄ erã nomere õpa arĩp̄:

—Yure güibiricãque. Crusague erã pabiadiḡure Jesure m̄a amacũ masia yuh̄.

⁶ Ñgu dohpaguere õre marimi. Ñgu arĩdiro dopa ta ñgu masa m̄ria wami. Erã ñgu d̄up̄re erã apidirore ñarã arique.

⁷ Tuhaja ñgu buherã pohrogue um̄diaro waha, õpa arĩ wererã waque: “Ih̄ Jesu s̄iridiḡ masa m̄riami. Eropiḡ m̄a core Galileague ñgu wam̄htaḡucumi. Erogue ñgure ñarãca m̄a,” arĩ wererã waque m̄a. I yu arĩrare guñaque m̄a, arĩp̄ anyu erã nomere.

⁸ Ñgu eropa arĩra p̄hr̄ erã nome masa gobegue ar̄inirã nome yojaro mera wiria, erã ñarare güiquererã ta, mucubiriri mera Jesu buherãre wererã warã, omañorã.

⁹ Eropa warã nomere Jesu bocat̄irip̄:

—¿Noho wahari m̄a? arĩ ser̄ip̄ ñgu. Ñgure ñha erãp̄ ñgu pohrogue eja, ñgu guburire ñeha ñgure umupeoñorã.

¹⁰ —Güibiricãque m̄a. Yu paḡ porãre “Galileague waque,” arĩ wererisa. Erogue yure ñarãcoma, arĩp̄ Jesu erãre.

Masa gobere corerã surara erã ñarare wereñuma

¹¹ Erã nome wererã warisubu surara watope yujurãyeri masa gobere corenirã surara Jerusalengue pahia oparãre wererã wañorã. Jesu ñgu masa gobegue ñgu m̄riarare werepehocãñorã.

¹² Erã eropa arĩ werecũ pahia oparã, m̄rã mera gamenereñorã. Gamenere weretamuñorã. Eropirã surarare ḡyadorerã niyerure wajayeñorã.

¹³ —Õpa arique m̄a masare: “Ñami ḡa car̄ra p̄hr̄, ñgu buherãp̄ masa gobegue eraa, ñgu d̄up̄re aic̄anirã ãhrama,” arĩ wereque masare.

¹⁴ Mũa eropa arĩ werecũ Pilatopũ mũa carĩtariarare peecãbocumi. Ĩgũ eropa peecũ, ĩgũre wererãra gũa. “Erãre dipuwaja moabiricãque,” arĩ wererãra gũa ĩgũre, arĩñorã erã surarare.

¹⁵ Erã eropa arĩra pũhrũ surarapũ niyerure ñeha, erãre erã gũyadorediro dopa ta masare wererã wañorã erã. “Jesu buherã aĩcãnirã ãhrama ĩgũ mũrũ dũpũre,” arĩñorã erã. Eropirã eropa Jesu ĩgũ dũpũ aĩrare wereniguima judio masa. Dohpague sãre eropa ta arĩ werema erã.

Jesu ĩgũ buherãre ĩgũ yare ĩgũ iidorerera apiñumi

Mr 16.14-18; Lc 24.36-49; Jn 20.19-23

¹⁶ Eropi gũa Jesu buherã once buherã Galileague waha Ƴtãgũgue Jesu ĩgũ wadoredigũgue wabũ gũa.

¹⁷ Eroque eja Jesure ĩarã umupeobũ gũa ĩgũre. Eropa umupeoquererã ta gũa yujurãyeri “Ihĩ Goãmũ magũ árĩbiribocumi,” arĩ pepiribũ dohpa.

¹⁸ Ĩgũrũ õpa arĩmi gũare:

—I yebaguere, Ƴmaro sãre Goãmũ árĩpehrerã tauro turarire omi yũre.

¹⁹ Ĩgũ eropa ocũ mũare õpa iidorea: Árĩpehrero majarãre yahare buherã waque erã yaharã erã waboro dopa. Eropirã mari Pagũ waĩ mera, yũ waĩ mera, Espĩritu Santo waĩ mera erãre waĩyeque.

²⁰ Eropirã mũare yũ dorerare erã iipehoburire buheque erãre mũa. Eropirã ire yũ arĩrare guñaque: Árĩpehrerinũri nũcũ mũa mera árĩgũca ne i Ƴmũ pehrecũgue, arĩ weremi gũare Jesu.

San Marcos

Ñu waĩyegũ buhenũgañumi

Mt 3.1-12; Lc 3.1-9, 15-17; Jn 1.19-28

¹ Goãmũ magũ Jesucristo ñũ iirare, ðari buherire wereri ðpa árĩnũgayoro.

² Goãmũ yare weremũhtadigũ Isaia ñũ iribojegue go-jadiro dopa ta i wereri ãhraa. Òpa arĩ gojañumi ñũ: Goãmũ ñũ magũre ðpa arĩpũ: “Mũ core mũre wereyubure obeogu ñaa.

³ Eropigũ ñũ masa marirogue árĩgũcumi. Ñũre peerãre weregũ busũro mera arĩ werenĩguigũcumi: ‘Mari Opũ ñũ ariburi mare amuro dopa ñũ ariboro core ðarã árĩyũque ñũre peemorã,’ arĩ werenĩguigũcumi,” arĩpũ Goãmũ, arĩ gojañumi Isaia, Ñu waĩyegũ ñũ masa dehyoaboro coregue.

⁴ Eropigũ Ñu waĩyegũ masa marirogue masare buhemũripũ. Òpa arĩpũ:

—Mũa ñero iirire bujawereque. Dohpaguere ðaripũre gohrotoque. Eropirã waĩyenirã árĩque. Mũa eropa gohrotocũ ñagũ mũa ñero iirare Goãmũ cãdijigũcumi, arĩ buhemũripũ ñũ.

⁵ Eropirã árĩpehrero Judea yeba majarã, Jerusalén majarã mera ñũ pohrogue peerã ejañorã. Eropigũ Ñu erãre waĩyepũ Jordán waĩcũriyague. Erã ñero iirare weretarituhacũ ñha ñũ erãre waĩyemũripũ.

⁶ Eropigũ Ñu camello ya gasiro suhrirore suhricũpũ. Waibũgũ ya gasirore ta tuãdiuridacũgũ árĩpũ. Poreroa, mome sã ñũ bari árĩyoro.

⁷ Eropigũ ðpa arĩ buhemũripũ:

—Yũ pũhrũre yũ tauro turagũ arigũcumi. Òtariagũ ãhrimi ñũ. Ñũ iro dopa ðagũ árĩbeaa yũpũ. Eropigũ ñũre pepigũ, “Yũ tamera bu árĩgũ ãhraa yũhũ,” arĩ pepia yũhũ.

⁸ Masare waĩyegũ deco mera waĩyeya yũpũ. Ñũpũ yũ tauro iigũcumi. Mũare Goãmũ yarã iigũcumi ñũ. Espĩritu Santore masa mera árĩnĩguicũ iigũcumi, arĩ buherũ Ñu.

Ñu Jesure waĩyehũmi

Mt 3.13-17; Lc 3.21-22

⁹ Eropi irisubure Jesu Nazaregue, Galilea yeba árĩri maca árĩdigũ, dia Jordán waĩcũriyague ejarũ. Ñũ eropa ejacũ Ñu waĩyepũ ñũre.

¹⁰ Īḡu waiyetuhajacũ Jesu diague niguidigũ, majanugaja umarogue ĩhamujupũ. Umusi pãrimaa wayoro. Ero pãrimaacũ ta Espĩritu Santo buja iro dopa bejagu ĩḡu weca dijibejajapũ.

¹¹ Eropiro umarogue wereniguiiri busuyoro.

—Mũhu yũ magũ yũ mahigũ aħraa. Mũ mera burigã mucubiria, arĩro cariyoro umarogue.

Satana ñerire iidoreriñumi Jesure

Mt 4.1-11; Lc 4.1-13

¹² Irisubure Espĩritu Santo Jesure masa marirogue wadorepũ.

¹³ Erogue ejagu cuarenta nãri gohra arĩpũ. Erogue ĩḡu arĩcũ, Satanapũ Jesu ĩḡu ñero iirire ĩadiagu ñerire iidoreripũ ĩḡure. Eropigũ Jesu waimurã nugũ majarã watope arĩpũ. Eropirã anyuapũ ĩḡure itamu ĩḡure bari oñorã.

Jesu Galilea yebague buheñumi

Mt 4.12-17; Lc 4.14-15

¹⁴ Eropi Ñure erã peresugue erã biha dohora puhũ, Jesupũ Galileague õari buherire Goãmũ ĩḡu opũ arĩrĩre werẽḡũ wapũ.

¹⁵ Ōpa arĩ werepũ:

—Dohpaguere õpa aħraa: Goãmũ ĩḡu opũ arĩboro merogã duhyaa. Mũa ñeri iirire bujawereque. Eropirã õarire gohrotoque. Ōari buherire peeque mũa, arĩ buhemuripũ Jesu.

Jesu wapicurã wai wejẽrãre ĩḡu mera majarã arĩmorãre sihuñumi

Mt 4.18-22; Lc 5.1-11

¹⁶ Eropigũ Galilea waĩcũriya tũrogue ejagu, Simore ĩḡu pagũ magũ mera bocajapũ. Erã wai wejẽdi masa arĩñorã. Erã wejẽdi yucũre mehyurã iĩñorã erã iri ditaru wũari ditarugue.

¹⁷ Erãre arĩpũ Jesu:

—Yũ mera majarã arĩmorã arique mũa. Yũ mera mũa aricũ mũa waire mũa ñeha gameneorã mũa iiro dopa ta, Goãmũ yarã arĩmorãre sihu gameneomorãre iirã arĩcũ iigũra mũare. Yũ mera mũa aricũ eropa iimorãre apigũra mũare. Eropirã yũ mera arique, arĩpũ Jesu.

¹⁸ Īḡu eroparĩcũ peerã, erã wejẽdi yucũre apicã ĩḡu mera waha wañorã.

¹⁹ Eropirã erã merogã tarigã Santiagore ĩḡu pagũ magũ Ñũ sãre bocañañorã daja. Erãpũ Zebedeo porã arĩñorã. Erã ya dohodirugue erã wejẽdi yucũre amurã iĩñorã.

20 Erã perãre ĩġu sihubeoru. ĩġu sihubecũ pee erãru erã pagure ĩġure itamurã mera dohodirugue apicã Jesu mera waha wañorã.

Watĩ ñajasũdigu Jesure bocatĩriñumi

Lc 4.31-37

21 Eropi erã Capernaum waĩcari macague ejañorã. Eropigu Sabado árĩcũ judio masa erã buheri wihigue buhegu ñajaru.

22 Eropigu ðaro masipehogu buhegu, judio masare erã buherã iro dopa árĩbiripu ĩġu. ĩġu eropa buhecũ iri maca majarã pee uca wañorã.

23 Irisubure iri wihire yujugu watĩ ñajasũdigu árĩru. Eropigu ðpa arĩ gaguiniguipu Jesure:

24 —Muhu Jesu Nazare majagu garibobiricãque guare watẽare. ¿Duhpibu ðpa iiri guare? ¿Muhu guare dederecũ iibu iiri? Goãmu magu mu ðagu árĩcũ gua masia, arĩ gaguiniguipu ĩġu Jesure.

25 ĩġu eroparĩcũ peegu Jesu turipu watĩre:

—Ejarimaricãque. ĩġure cohã wiria waque, arĩru Jesu.

26 Eropigu watĩ masure yeba mehmereja tũrucũ iiru. ĩġu gaguiniguicũ ta wiriaru ĩġure.

27 Eropirã árĩpehrerã iri wihi doanirã ĩġu eropa wacũ ĩha ucataria waha ðpa arĩñorã:

—Yaho. ¿Ñehe buheri ãhriri ii? ¿Mama buheri ta ãhriri? ĩġu opu iro dopa ta doremi watẽare. ĩġu dorecũ watẽaru tarinugabeama ĩġure, arĩ wereniguĩñorã iri wihi doarã erã basi.

28 Eropirã bajamenurigã pũhrugã ta, árĩpehrerã Galilea yeba majarã irire ĩġu eropa iirare masipehrea wañorã.

Jesu Simo Pedro muñecore ðago iĩñumi

Mt 8.14-15; Lc 4.38-39

29 Eropi Jesu sã judio masa erã buheri wihigue árĩnirã wiria wañorã. Erã eropa wiriara pũru Jesu, Santiago, Ñu mera, Simo ĩġu pagu magu Andre sã ya wihigue ñajaru.

30 Irisubure Simo muñeco nimacuri dorecũgo camague igo oyacũ wereñorã Jesure.

31 Erã eropa werecũ peegu, ĩġu igo pohrogue eja, igo mojtore ñeha, igore tara wahgũ dobopu. ĩġu tara wahgũ dobocũ ta igore nimacuri taria wayoro. Taricũ pepigo igopu wahgã erãre bari ejopo.

Jesu bajarã dorecũrãre ðarã iĩñumi

Mt 8.16-17; Lc 4.40-41

32 Ñamicague abe ñajara puhrugue masa árïpehrerã dorecurãre, gajirã watëa ñajasünirãre, püriri dorecurãre Jesu pohrogue añ ejañorã.

33 Eropirã árïpehrerã iri maca majarã gamenereñorã Jesu árïri wihi disiporore.

34 Eropigũ Jesu bajarã dorecurãre, baja dore oparãre òarã wacũ iipũ. Masa bajarãre watëare wiupũ. Eropigũ watëa Jesu Goãmũ magũ ïgu árïrire erã masicũ ïagu Jesupũ erãre irire weredorebiripũ.

Galilea yebague Jesu buheñumi

Lc 4.42-44

35 Eropigũ ñamiñarigã árïcũ boyoboro core, ïgu wahgãra puhru masa marirogue ïgu Pagũ Goãmũre serëgu warũ.

36 ïgu eropa wacũ ïarã Simo sã ïgure amarã ejañorã.

37 Eropirã ïgure bocatïri òpa arïñorã:

—Masa árïpehrerã mure ahmama, arïñorã erã ïgure.

38 Erã eroparïcũ peegu òpa arïpũ Jesupũ.

—I macare buhegu ahrabũ yũhũ. Eropirã gajï macari sãre ògã maja macari sãre buherã warã mari. Yũhũ iri macari sãre buhegura, arïpũ Jesu.

39 Eropigũ árïpehrero Galilea yebare buhecuripũ. Eropigũ macari nũcu erã ya buheri wirigue ñajaja buhepũ. Püriri dorecurã sãre püririre cóapũ. Watëare masare ñajanirãre cohã wiupũ.

Jesu camï boagure òagu iïñumi

Mt 8.1-4; Lc 5.12-16

40 Eropi gajigũ camï boagu Jesu pohrogue eja, mereja serëpũ:

—Mũhũ yure òagu wacũ iidiagu, yure òagu wacũ iimasia, arïpũ camï boagupũ Jesure.

41 ïgu eroparïcũ peegu Jesu ïgure mojomoro ïapũ. Eropigũ Jesu ïgu mojoto mera mohmepipũ. Mohmepigũ ta òpa arïpũ:

—Irire iidiaca. Òagu árïque mũhũ, arïpũ Jesu.

42 ïgu eroparïcũ ta ïgu camï boara yaria wayoro. Òagu warũ ïgu.

43 ïgu eropa wacũ ïagu Jesu ïgure turaro mera wererũ:

44 —Yũhũ mure òpa iirare gajirãre ne werebircãque. Eropa werebiriqeregu ta mũ dupure òaro warare pahire ïhmugũ waque, “Òagu ãhrimi,” arïdoregu. Goãmũ doreri Moiserẽ ïgu apidiro dopa ta iique. Eropigũ mirimagugãre oque pahire mũ òagu warare masare mũ ïhmuburire, arïpũ Jesu ïgure. Òpa arïtuhaja waque, arïpũ ïgure.

⁴⁵ Īgũ eropa masare weredorebiriqerēcũ ta ĩgũpũ waha árĩpehreri macari majarãre Jesu ĩgũre õagũ wacũ iirare wererũ. Īgũ eropa werera pũhrũ Jesu masa bajarã erã árĩroguere wamasibiripũ. Eropigũ ĩgũ masa bajamerãgã árĩroguere árĩpũ. Eroguere ĩgũ árĩcũ baja macari majarã ĩgũ pohroguere ejañorã.

2

Jesu dũpũ bũhadigũre õagũ wacũ iĩũumi
Mt 9.1-8; Lc 5.17-26

¹ Bajamenũri pũhrũ Jesu Capernaumgue dujaa warũ. Wihigũre ĩgũ árĩcũ masa masiñorã.

² Eropirã masa ero bajarã gamenere iri wihire Ƴjũtũria waha ðisiporogue wirinũgajañorã. Eropigũ Jesu erãre õari buherire wererũ.

³ Eropirã gajirã sã Jesu pohro ejariñorã. Erã wapicũrã Ƴma dũpũ bũhadigũre aĩ ejañorã.

⁴ Eropa ejarã masa bajarã árĩcũ ĩarã Jesu pohroguere aĩ ñajamasibiriñorã. Eropirã erã dũpũ bũhadigũre aĩ muju wihi weca aĩ weasiri ñajaa Jesu ĩgũ nigũiro weca pihri dijuñorã. “Jesu ihĩ ĩgũ dorecũrire taricũ iigũcumĩ,” arĩ pepiñorã erã.

⁵ Erã eroparĩ pepicũ masigũ Jesupũ dorecũgũre õpa arĩ wererũ:

—Mahgũ, mũ ñero iirare cóãtuhabũ, arĩpũ Jesu dũpũ bũhadigũre.

⁶ Īgũ eroparĩcũ peerã erogũre doarã judio masare buherãpũ erã basi õpa arĩ pepiñorã:

⁷ “Ihĩ eropa arĩ werenigũibiricãporo. Goãmũre ñero wereniguigũ iimi ihĩ. Īgũ masũ mari iro dopa árĩgũ ãhrimi ĩgũ sã. Eropigũ ĩgũ mari ñero iirare cóãmasibeamĩ. Goãmũ ðihta masa erã ñero iirire cóãmasimi,” arĩ pepiñorã erã.

⁸ Erã eropa arĩ pepicũ ĩagũ, Jesu erã pepirire masigũ õpa arĩpũ erãre:

—¿Duhpirã mũa eropa arĩ pepiri?

⁹ “Mũ ñero iirare cóãtuhabũ,” yũ arĩcũ pee “Gũyaricũgũ ãhrimi,” arãa mũa yũre masibiriqererã ta. Ihĩ dũpũ bũhadigũre “Wahgãñũgajaque,” yũ arĩcũ ĩgũ wahgãñũgajacũ ĩarã yũ arĩra ðiaye árĩcũ masirãca mũa.

¹⁰ Yũhũ masũ Goãmũ ĩgũ obeodigũ árĩgũ i yebaguere masa erã ñero iirire cóãmasia yũhũ. Mũa irire masiboro dopa ĩgũre wahgãñũgajacũ iigũra, arĩpũ Jesu judio masare buherãre.

Eropa arĩtuhaja dũpũ bũhadigũre õpa arĩpũ:

11 —Mure arĩgu iiaa: Wahgãnugajaque. Curique. Mũ pũgure aĩ waque mũ ya wihigue, arĩpu ĩgure Jesu.

12 ĩgu eroparĩcũ peegu dũpu buhadigũpu wahgãnugaja, ĩgu pũgure aĩ arĩpehrerã masa erã ĩhuro wiria waha warũ. ĩgu eropiicũ ĩarã erã arĩpehrerã ĩhamaria wañorã.

—Goãmũ ðagu turagu ãhrimi. Ne ðpa iirire ĩabirimurabu mari, arĩñorã erã basi.

Jesu Levĩre ĩgu mera majagu arĩbure sihuñumi
Mt 9.9-13; Lc 5.27-32

13 Eropi dipaturi Jesu ditaru tũrogue warũ. Eropigu masa bajarã ĩgu pohrogue eja gamenerecũ ĩagu ĩgu erãre buherũ.

14 Eropa iituha, erogue arĩdigũ wagũ, Levĩre Alfeo magũre ĩgu mohmeri taribugue bocajaru. Gajirã mera oparã ya arĩburire wajasea corerã mera arĩpu Levĩ. ĩgure bocajagu ðpa arĩpu:

—Yũ mera majagu arĩbu arique mũhũ, arĩpu Jesu Levĩre.

Ĩgu eroparĩcũ peegu Levĩpu wahgãnugaja Jesu mera waha warũ.

15 Pũhrũ ĩgu ĩgu buherã mera Levĩ ya wihire mesague ba doacũ bajarã wajasea corerã “Ñero iirã ãhrima,” masa erã arĩrã erã mera ba doañorã.

16 Erogue erã doara pũhrũ, gajirã judio masare buherã, fariseo masa sã Jesu ñero iirã mera ĩgu bacũ ĩañorã. Eropa ĩarã ðpa arĩñorã:

—¿Duhpigũ ñero iirã wajasea corerã mera bahari Jesu? arĩ serẽpiñorã judio masare buherã Jesu buherãre.

17 Erã eroparĩcũ peegu ðpa arĩ yũhripũ Jesupu:

—Dorecũrã dihta duhturure ahmama. Dorecũrã duhturure amaro dopa ta “Ñegu ãhraa yũhũ,” arĩrã yũre amarãcoma. Eropigu “Ñegu ãhraa,” arĩrã dihtare erã ñero iirare bujaweredore ðarĩpũre gohrotocũ iigu aribu yũhũ. Erã basi “Õarã ãhraa gũa,” arĩ pepirãpũre itamugu aribiribũ, arĩpu Jesu erãre.

Ba duhurire serẽpiñuma gajirã Jesure
Mt 9.14-17; Lc 5.33-39

18 Irisubure Ñũ buherã, fariseo masa sã Goãmũre umu-peomorã ba duhumũriñorã. Eropirã masa Jesu pohro eraa ĩgure serẽpiñorã.

—Erã Ñũ buherã, fariseo masa buherã sã Goãmũ ya arĩburire iirã, ba duhumũrama. ¿Duhpirã mũ buherãpu ba duhubeari? arĩñorã erã Jesure.

19 Erã eroparĩcũ pee Jesu erãre ðpa arĩ yũhripũ:

—Ōpa āhraa iri: Mojoto diridigu ĩgu bosenure iicũ ĩgu mera majarã bujawererã ba duhurã iibeama. ĩgu mera árĩrã mucubiri barã iima. Eropa ta yu buherã sã yu mera árĩrã ba duhumasibeama.

²⁰ Yujunũ Goãmu yure aĩcãgucumi. Eropa ĩgu aĩgãra puhru yu buherã mera árĩsome yuhũ. Eropirã irisubugue tamerare yu buherã ba duhurãcoma, arĩpu Jesu.

²¹ Erã iribojegue maja buheri mera mama buheri mera erã buhe morediacũ ĩagu ōpa arĩ werenemopũ Jesu werenigui queori mera:

—Ne mama gasiro suhri gasiro mera murañe suhriore seretu masiya mara. Eropiicũ mama gasiro mari coera puhru murañere suhriore taragameneo, wuatariaro yehgucũ iiaa. Eropa ta mama buherire mura buheri mera wapi moa buhebiricãro gahmea.

²² Eropirã ne igui decore imisĩri decore waibugũ gasiro ajurore mura ajurore pisãbiricãro gahmea. Eropiro igui deco pahmutarirogue mura ajurore yehgue dija wahaa. Iri ajuro yehgucũ igui deco sã cohmo, ajuro sã cohmoa wahaa. Eropirã igui decore mama ajuro mera pisãro gahmea. Eropiicũ igui deco sã cohmobea. Ajuro sã cohmobea. Eropa ta mama buheri, mura buheri mera more buhebiricãro gahmea, arĩ buhepu Jesu erãre.

*Sabado árĩcũ Jesu buherã trigo pororire turĩñuma
Mt 12.1-8; Lc 6.1-5*

²³ Gajinu Sabado árĩcũ Jesu sã trigo pohegue ĩha taria wañorã. Eroge tariatã ĩgu buherãpu trigo pororire turĩ tari wahgãñorã.

²⁴ Erã eropiicũ ĩarã ōpa arĩñorã fariseo masa Jesure:

—Peenique guare. ¿Duhpirã mu buherã Sabadonu mari soorinu árĩquerecũ Goãmu ĩgu mohmedorebiririnure mohmeri erã? Mari dorerire tarinugarã iima, arĩñorã erã Jesure.

²⁵⁻²⁶ Erã eroparĩcũ peegu yu buherã tarinugarã iibeama arĩgu ōpa arĩpu erãre:

—Iribojegue Davi ĩgu mera majarã mera oaboagu Goãmu wihigue ñaja iri wihi árĩri panre Goãmu ya panre bañumi. Eropigu ĩgu mera majarã sãre badoregu iri panre oñumi. Iri panre pahia dihtare badorera árĩyoro. Goãmu doreri gajirãre iri panre badorebiriyoro. Irisubure Abiata waĩcũgu pahia opu árĩñumi. ¿Davi sã irire erã iirare Goãmu yare erã gojarare buhebirari mura? Davi iri panre bagu Goãmure tarinugarũ iibiriñumi. Dohpagãre yu buherã sã i trigo yerire turĩ barã Goãmure tarinugarã iibeama, arĩpu Jesu.

27 Eropa arĩtuhaja õpa arĩnemopu:

—Goãmu masare iituhajagu soorinu doreñumi “Masa sooporo,” arĩgu. Eropa iigu masa inuere iiburire weregu aħrimi. Masapu inuere eã iiburire wererã arĩbeama.

28 Eropigu yuħu masu Goãmu igu obeodigu inonu soorinu sãre masa eã iiburire doremasia, arĩpu Jesu eãre.

3

Mojoto buhadigu õaro wañumi

Mt 12.9-14; Lc 6.6-11

1 Gaji Sabado arĩcũ Jesu judio masa eã buheri wihigue eja ñajapu daja. Eropigu mojoto buhadigu sã ero arĩpu. Eropirã iri wihi arĩrã Jesure iħanũgũñorã iguere weresãmorã.

2 Sabado arĩcũ Jesu mojoto buhadiguere igu õagu iicũ iarã, “Mari soorinuere Jesu mohmegu iimi,” arĩ weresãdiañorã Jesure.

3 Eropigu õpa arĩpu Jesu mojoto buhadiguere:

—Wahgãnuɗaque. Arique õgue, arĩpu.

Õpa arĩtuha iri wihi arĩrãre werepu:

4 —¿Sabado arĩcũ õarire iicũ õabeari? ¿Ñerire iicũpũre õhari muu pepicũ? Sabado arĩcũ masure masucũ õapũrica. Masure wejẽcũpũre õabeaa, arĩ werepu Jesu eãre.

Igu eropa arĩquerecũ ta yuħribiriñorã.

5 Eã eropa yuħribiricũ iagu Jesu eãre iħamehtu eã mera guapu. Eã iguere peediabiricũ iagu Jesu eã mera bujawerapu. Eropigu mojoto buhadiguere arĩpu:

—Mu mojotore sĩsirãbeoque, arĩpu iguere.

Igu eroparicũ peegu igu mojotore sĩsirãbeopu igu. Igu eropiicũ ta õari mojoto wayoro.

6 Igu ya mojoto õari mojoto wacũ iarã fariseo masa wiria wañorã. Wiria Herode curu majarã mera gamenere, “¿Dohpa ii ihĩ Jesure wejẽrãcuri?” arĩ weretamuñorã eã eã basi.

Masa bajarã ditaru tũrogue arĩñuma

7-8 Eropi Jesu igu buherã mera ditaru tũrogue wapu. Eã erogue wacũ iarã Galilea majarã masa bajarã eã puħru nuusiañorã. Eropirã Judea yeba majarã, Jerusalén majarã, Idumea yeba majarã, Jordán waicũriya gajipu masegue majarã, Tiro majarã, Sidón majarã iguere iarã wañorã igu iirare peenijarã.

9 Eropirã bajarã arĩñorã Jesu pohore. Tuucãhmota nuɗajacãñorã. Eropigu Jesu igu buherãre gasirure amuyudorepu igu doaborore.

10 Bajarã dorecurãre ïgu õarã wacũ iicũ ïarã gajirã dorecurã sã ïgure pëhrediañorã.

11 Eropirã watëa ñajásünirã Jesure ïarã ïgu pohro mereja arñorã:

—Mũhũ Goãmũ magũ ähraa, arñ gaguinigiñorã erã ïgure.

12 Eropigu erãre Goãmũ magũ ïgu árĩrire turaro mera gajirãre weredorebiripũ Jesu.

Jesu ïgu buherãre doce gohra beyeñumi

Mt 10.1-4; Lc 6.12-16

13 Eropigu Jesu utãgugue muria ïgu gamerãre sihupũ. ïgu eropa sihubeocũ peerã ïgu pohrogue ejañorã.

14 Eropigu doce umare ïgu mera majarãre, ïgu obeomorãre beyepũ. Gaji macarigue ïgu yare buherã wamorãre beyedobopũ Jesu.

15 Eropigu watëare erã cóãburire apipũ erãre.

16-19 Oã árñorã doce gohra uma ïgu beyenirã. Simo, Santiago Zebedeo magũ, ïgu pagũ magũ Ñũ, Andre, Felipe, Bartolomé, Mateo, Toma, Santiago Alfeo magũ, Tadeo, Simo celote ya curu majagũ, Juda Iscariote, oã nãcure Jesu beyedobopũ. Jesu Simore Pedro waĩyepũ. Santiagore, Ñũ mera Boanerges waĩyepũ. Boanerges mari ya mera “bupu masa” waĩcũma. Juda Iscariote Jesure ïhaturirãre ïhmubu árĩpũ. Erãre beyedobotuha Jesu dijaha wihigue ñaja warũ.

—Jesu watĩ turari opami, arñ weresãñuma masa

Mt 12.22-32; Lc 11.14-23; 12.10

20 Eropi ero dipaturi masa bajarã gamenereñorã daja erã pohro. Eropirã ïgu ïgu buherã sã ne bamasibiriñorã.

21 Eropirã Jesu acawererã ïgu iirare peebeoñorã. “Jesu goroweregũ wagũ iimi,” masa arñcũ peeñorã. Eropirã ïgu pohrogue eja ïgure aĩgãridiariñorã.

22 Gajirãpũ õpa arñorã:

—Beelzebú ïgure eropa iicũ iicumi. ïgu watëare cóãgu Beelzebú watëa opũ turari mera erãre cohãmi, arñorã Jerusaléngue arinirã judio masare buherãpũ.

23 Erã eroparñcũ peegũ Jesupũ erãre sihubeo werenigui queoriñe mera werepũ erãre.

—Watĩ ya turari mera watëare cóãgu iibea. Watëa erã basi cóãmasibeama.

24 Eropirã yuju yeba majarã erã basi gamequeãrã iri yeba majarã pehrea wacoma.

25 Eropirã yuju wihi majarã erã basi erã gamequeãrã iri wihi majarã pehrea wacoma.

26 Eropigu ĩgu Satana watĕa opupu watĕare yure cadoregu, ĩgu basi ta gamequeĕgu iibocumi. Eropigu ĩgu pehrea wabocumi.

27 Őpa ta āhraa watĭ turagure tarinugari werediacũ: Wihi opure turagure diribigu, yajari masu ĩgu ya wihire ñajaja yajamasibeami. ĩgure ĩgu dirira puhru tamerare ñajaja yajamasimi ĩgure, arĭ werepu Jesu. Eropa arĭ werepu watĭre ĩgu tarinugarare weregũ. Watĭ turagu arĭquerecũ ta Jesu ĩgure tarinugami watĕare cohã wiugu.

28 Eropigu arĭnemopu Jesu:

—Diaye arĭgu iiaa mware. Arĭpehreri masa erã ñeri iicũ sãre, erã wereniguicũ sãre Goãmu cãdijimasimi.

29 Eropa cãdijiqueregu ta Espĭritu Santore erã ñero wereniguicũ iri tamerare ne cãdijisome. Erã eropa arĭra waja eropa dipuwajacuniguicãrã arĭrãcoma, arĭpu Jesu erãre.

30 Jesu Espĭritu Santo turari mera mohmequerecũ erãpu “Watĭ turari mera mohmemi,” arĭñorã. Erã eropa arĭra waja Jesu eropa arĭ werepu erãre.

Jesu acawererã ĩgure sihurã erañuma

Mt 12.46-50; Lc 8.19-21

31 Eropirã Jesu pagu porã ĩgu pago mera erañorã. Eropa erarã disiporogue niguirã gajirãre sihudoreñorã ĩgure.

32 Eropirã masa ĩgu pohrogue doarã wereñorã ĩgure.

—Mu pago mu pagu porã mera disiporogue sihuma mure erã, arĭñorã.

33 Erã eroparĭcũ peegu õpa arĭpu Jesu erãre buhebu:

—¿Noa āhriri yu pago yu pagu porã sã mua ĩacũ? arĭpu.

34 Eropa arĭgu ĩgu pohro doarãre ĩagu õpa arĭpu:

—Oã āhrima yu pago, yu pagu porã dopa arĭrã.

35 Goãmu gamerire iima oã. Eropa ta iirã yu pagu magu, yu pagu mago, yu pago iro dopa āhrima, arĭ buhepu Jesu erãre.

4

Jesu oteri masu queoriñere buheñumi

Mt 13.1-9; Lc 8.4-8

1 Eropi dipaturi ta daja Jesu ditaru turogue buhenugapu. Eropa eroguerer buhenugagu masa bajarã ĩgu pohrogue gamenerecũ ĩagu Jesu dohodirugue ñaja buhe payapu. Eropirã masapu yebague ditaru turogue niguiñorã ĩgure peemorã.

2 Eropigu Jesu baja werenigui queorire erãre buhepu.

3 —I queoriñere peeque mua, arĭpu erãre.

—Oteri masu otegu wañumi.

⁴ Īḡu eropa otecũ gajiyeri ma turo yurimerejayoro. Ero mehmerejarayerire mirimagu porã ahri bacãñuma.

⁵ Eropi gajiyeri utãyeri watope yurimerejayoro. Ero utãyeri watope nicu mariñariro arĩquerecũ ta, mata puhriyoro.

⁶ Eropa puhri arĩquerero, abe ĩḡu buriḡã asicũ, nuguri marinijaro ñaiñaja sĩa wayoro.

⁷ Gajiyeri poracurogue yurimerejayoro. Porapu puhri tiataria waha oterayeripure wejẽcãyoro. Eropiro iri dũca mariyoro.

⁸ Gajiyeri õari yebapu yurimerejayoro. Õaro puhri dũcacũyoro, gajisari treinta yeri, gajisari sesenta yeri, gajisari cien yeri dũcacũyoro, arĩ buhepu Jesu.

⁹ —Irire õaro peeque mua, arĩnemopu Jesu.

Jesu ĩḡu werenigui queorare ĩḡu buherãre wereñumi
Mt 13.10-17; Lc 8.9-10

¹⁰ Eropirã puhru erã seyaro arĩrã, doce buherã gajirã Jesu mera arĩrã iri queorañere masidiarã Jesure serẽpiñorã.

¹¹ Erã eropa serẽpira puhru Jesu õpa arĩ werepu:

—Goãmũ masa tauro opu ĩḡu arĩrire, iribojegue majarã erã masibirare mũare yu buherãre masicũ iimi Goãmũ. Gajirãpũ eropiilbeamĩ ĩḡu. Eropigu erãre werenigui queori mera buhea.

¹² Eropirã erã ñaquererã, pee masibeamã. Eropirã peequererã ta masisome. Erã masirã õaripure gohro-toboñuma. Erã eropa gohrotocũ ĩḡu erã ñero iirare cóãboñumi Goãmũ. Eropa arĩquerecũ ta erãpu ne peediabeama, arĩpu Jesu.

Jesu oteri masũ queoriñere were amuñumi
Mt 13.18-23; Lc 8.11-15

¹³ ĩḡu eroparĩra puhru, õpa arĩnemopu erãre:

—¿Ñe queoriñere peenibeari mua? ¿Mua ñe queoriñere peebirã dohpa gajĩ queorire peerãcuri mua? arĩpu Jesu erãre.

Eropa arĩtuhaja õpa arĩ werepu erãre.

¹⁴ —Oteri masũ ĩḡu oteriyeri õari buheri iro dopa ãhraa.

¹⁵ Eropiro ma turo mehmerejarayeri, õari buheri iro dopa ta ãhraa. Eropigu masa erã õari buherire erã peecũ ĩḡu Satanapu iri õari buherire masidorebeamĩ erãre. Mirimagu porã iriyerire erã dote aĩdiro dopa ta iimi.

¹⁶ Eropi utã watope mehmerejarayeri õari buheri iro dopa ta ãhraa. Eropirã masa õari buherire pee, mucubiriri mera mata irire pee aĩma.

17 Eropa pee aĩquererã ta, ıtã watope árĩrisari, nuguri maririsari iro dopa ta oã masa turabeama. Eropa turabirã yaha õari buherire erã peera waja gajirã erãre ñero iicũ iarã yahapure duhucãma. Gajirã erãre ñero iicũ irire bocatĩubirã yahare duhucãma.

18 Eropi pora watope yurimerejarayeri õari buheri iro dopa ta ãhraa.

19 Eropirã masa õari buherire peequererã, i yeba majare wũaro guñaricurã niyerure mahima. Gajino sãre baja gamenemoma. Erã eropiicũ iripũ õari buheripure cãhmotaa. Iri eropa cãhmotacũ masa Goãmu gamerire iibeama.

20 Eropi õari yeba mehmerejarayeri õari buheri iro dopa ta ãhraa. Eropirã masa õari buherire peerã irire masima. Eropa masirã árĩrã Goãmu ĩgu gamero dopa ta iima erã. Yujurãyeri merogã õarire iima treinta yeri dũcacũro dopa ta. Gajirã wecañari õarire iima sesenta yeri iri dũcacũro dopa ta. Gajirã wũaro õarire iima cien yeri dũcacũro dopa ta, arĩ werepũ Jesu erãre.

Jesu sihãgodiru queoriñere buheñumi

Lc 8.16-18

21 Eropa arĩtuha õpa arĩnemopũ:

—Ne, sihãgodirure masa sihãgorã mátasorobu docague buhapibeama. Irirure sehro doca apibeama. Irirure sihãgorã ımarogue duhpeoma õaro boyoweadorerã.

22 Árĩpehrerã masa erã masibirirare puhru masirãcoma. Sihãgodiru boyocũ mari ĩhamasiro dopa ta, iribojegue erã masibirirare masirãcoma masa.

23 Irire õaro peeque mua, arĩpũ.

24 Eropigũ erãre arĩnemopũ daja:

—Merogã masidiarã merogã masirãca. Wũaro masidiarã wũaro masirãca. Eropirã peerã õaro peenũruque.

25 Óaro peenũrugũ õaro masigucumi. Peenũrubigu “Merogã peea,” ĩgu arĩquerecũ ta, iripũ dederea waroca ĩgure, arĩpũ Jesu erãre.

Jesu coye puhri queoriñere buheñumi

26 Jesu erãre werenigui queori mera buherũ daja:

—Goãmu ĩgu opũ árĩri werediacũ ojudũcare otera iro dopa ãhraa. Yujugũ coyere ojudũcayeri otemi.

27 Otetuhaja mũraro ta carĩ wahgã ĩagu wamũririmi. Irisubu ĩgu oterayeri puhri wiriaca. “¿Dohpa puhri?” arĩ ĩha masibeami irire otedigũ ĩgu basi.

28 Iri otera iri yeba mera iri gamero dũcacua. Erapũgã deyomũhta, puhru dipa poro puhri wiria wahaa.

29 Dũca buġatuhajacũ ĩaġu iri pororire pehami. "Pearisubuno ta āhraa," arĩmi. ĩġu otera iri buġarare ĩġu masibiridiro dopa ta masa Goāmũ yarā erā dohpa wacũ sãre masibeama masa, arĩ buhepũ Jesu.

Mostazayegã queoriñere wereñumi Jesu

Mt 13.31-32; Lc 13.18-19

30 Eropã arĩtuha buhenemopũ:

—¿Goāmũ ĩġu opũ árĩri werediacũ ñeheno iro dopa āhriri mũa pepicũ? Iri werenigui queoriñe mera irire wereġura.

31 Mostazayegã iro dopa āhraa Goāmũ ĩġu opũ árĩri. Iriyegã ĩġu otecũ miriyegã gohra āhraa.

32 Eropã arĩquerero iriyegã õaro puhri wiria. Eropiro yucũġu wuadigũ wahaa. Eropirã irigũ dũpũri paga dũpũri buġacũ ĩarã mirimagũ porã iri dũpũrigue suhri suama. Mostazayegã wuataridiġu buġaro dopa ta umaro majagũ mari Opũre masinũgarã bajamerãġã erã arĩquerecũ ta, pũhrũġuere erã bajarã warãcoma, arĩpũ Jesu.

Queori mera ĩġu buherire wereñumi Jesu

Mt 13.34-35

33 Eropiġu iri werenigui queori iro dopa baja queorire erã masiopẽ õari buherire buhepũ erãre.

34 Queoriñe mariro werebiripũ erãre. Pũhrũ erã seyaro arĩrãre õaro were amuphocãpũ Jesu ĩġu buherãre.

Jesu miruñere yũsũdoreñumi

Mt 8.23-27; Lc 8.22-25

35 Eropi irinũ ñamica Jesu ĩġu buherãre õpa arĩpũ:

—Ina sipũ maseġu, arĩpũ erãre.

36 ĩġu eroparĩcũ peerã, yebague niguirãre goeriseretuharã dohodirugue ñajaa, Jesure aĩ taribuja wañorã. Eropirã gajirã gaji gasi mera erã pũhrũ taribujañorã.

37 Erã taribujacũ iriyague miruñe buřigã weãyoro. Eropiro miruñe ariro pãġuri dohodirure miucãriyoro. Deco turaro ñajayoro. Merogã dũhyayoro erã miriboro.

38 Eropã warisubu Jesu dohodiru auturogue suhri pore wecague carĩġu ĩpũ. Eropirã erã ĩġure wahġũñorã.

—Buheġu, ¿mũhũ ĩabeari? Mirirari ĩaa mari, arĩñorã erã Jesure.

39 Erã eroparĩcũ peegũ Jesu wahġã miruñere, pãġuri sãre,

—Yũsũque, arĩpũ.

ĩġu eroparĩcũ ta miruñe pãġuri sã yũsũdija pehrea wayoro. Õaro dujayoro.

40 Eropiġu Jesu arĩpũ ĩġu buherãre:

—¿Duhpirã güimaacãri mua? ¿Mua yure umupeobeari? arĩpu Jesu erãre.

⁴¹ Eropa wacũ ãarã erã ãhamaria wañorã.

—¿Ñehmuno masu ãhriri ihĩ miruñe, pãguri sã yuhrisũgu? arĩñorã erã basi.

5

*Watẽa ñajasũdigure ðagu wacũ iĩnumi Jesu
Mt 8.28-34; Lc 8.26-39*

¹⁻² Eropi erã sipu masegue Gerasa majarã ya yebague taribujajañorã. Eropigu Jesupu dohodirugue sañadigu majanugajapu. Ñgu majanugajara puhru, watẽa ñajasũdigu masa goberi utã goberi watopegue árĩdigu wiriri ñgu pohrogue aripu.

³ Ñgu watẽa mera goroweregu masa goberi watope árĩgu árĩmuriyu. Gajirãpu ñgure ñeha comeda wuarida mera dirimasibirimuriñorã.

⁴ Ñgu burigã gorowerecũ ãha bajasuburi masa ñgure guburi diriri berori mera comedari mera dirimuririñorã. Eropigu ñgupu comedarire nuha tuãtasiricãmuriyu. Eropirã ñgu turagu árĩro mera masapu ñgure ñeha dirirã bocañubiriñorã.

⁵ Eropigu ñami árĩcũ, umu sãre masa goberi watopegue, utã yucugue sãre, eropa gaguinigui curicãmuriyu ñgu. Eropigu utã mera ñgu basi dotemuriyu.

⁶ Eropigu yoarogue Jesure ãhabeo ñgu pohrogue omagãripu. Eraa merejapu Jesu core umupeobu.

⁷⁻⁸ —Watẽa, duhuque ñgure, arĩpu Jesu.

Ñgu ðpa arĩcũ peegu, watẽa ñajasũdigu ðpa arĩ gaguiniguiyu:

—¿Jesu Goãmu turagu magu, ñehenore iibu iiri muhu yure? Goãmu ñgu ãaro serẽa yuhu mure. Yure ñero iibiricãque, arĩ gaguiniguiyu watẽa ñajasũdigu Jesure.

⁹ —¿Dohpa waĩcari muhu? arĩpu Jesu ñgure.

—Gua bajarã ãhraa. Eropirã “Bajarã watẽa” waĩcua, arĩpu Jesure.

¹⁰ Eropigu Jesure turaro serẽpu:

—I yeba árĩrãre gua watẽare gajipugue wadorebiricãque, arĩñorã watẽa masu mera árĩñirã.

¹¹ Irisubure bajarã yesea árĩñorã erã pohrore. Utãgu gubuye ahma barã iĩñorã.

¹² Ero erã baniguicũ ãarã ðpa arĩ serẽñorã watẽa:

—Soã yesea pohrogue wadoreque guare. Erã mera árĩdoreque guare, arĩ serẽñorã watẽa masure ñajanirã.

13 Erã eroparĩcũ peegu yesea pohrogue wadorepũ Jesu erãre. Īgu eropa dorecũ watẽa masũre duhu yesea dos mil gohra árĩrãpũre ñajañorã. Erã pohrogue erã ejara pũhrũ yeseapũ gorowere árĩpehrerã dipaturũgue oma buha, ditarugue yuriñajaa sĩripehrea wañorã.

14 Yesea erã eropa wacũ ĩarã, erãre ĩhadibunirãpũ gũi omagã wañorã. Macague eja, iri maca majarãre campo majarã sãre erã ĩarare weresiripehocãñorã. Erã eropa werecũ peerã masapũ bajarã Jesu ĩgu iirare ĩarã ariñorã.

15 Eropirã Jesu pohrogue erarã, watẽa ñajasũdigũre, suhri saña, pee masigu ĩgu ero õaro doacũ ĩarã ĩha Ʃca wañorã erã.

16 Eropirã watẽa ñajasũdigũre, yesea sãre erã eropa warare ĩanirã gajirãre werepehocãñorã.

17 Erã eropa werepehocũ peerã ero majarã Jesure turaro mera wadoreñorã.

18 Eropigu Jesu ĩgu dohodirugue ĩgu ñajacũ ĩagu “Mũ mera wadiaca,” arĩ burigã serẽripũ watẽa ñajasũdigũpũ Jesure.

19 Īgu eropa arĩquerecũ Jesu ĩgũre wererũ:

—Yũ mera aribita. Mũ ya wihigue waha, mũ pohro árĩrãre yũhũ mũ opũ mũre õaro iirare weregũ waque. Mũre yũ mojomoro ĩarare wereque erãre, arĩpũ Jesu ĩgũre.

20 Īgu eroparĩcũ pee watẽa ñajasũdigũpũ Decapoli waĩcũri macague Jesu ĩgũre õaro iirare werenũgapũ. Īgu eropa arĩ werecũ peerã, masa árĩpehrerã pee Ʃca wañorã.

Jairo magore õago ii, ne behrego sãre õago iĩnumi Jesu Mt 9.18-26; Lc 8.40-56

21 Eropi dipaturi ta Jesu gajipũ masegue ĩgu taribujajacũ masa bajarã ĩgu pohrogue wũariya tũrogue gamenereñorã.

22 Eropigu judio masa erã buheri wihire ĩhadibugũ Jairo waĩcũgũ erapũ. Jesure ĩha, ĩgu guburi pohro mereja õpa arĩ serẽpũ:

23 —Yũ mago sĩrigo ii amo. Eropigu igore mũ mojoto mera duhpeogũ, igore dore taugũ arique. Mũhũ eropiicũ igo masagocumo, arĩpũ ĩgu Jesure.

24 Īgu eroparĩcũ pee Jesu ĩgu mera wapũ. Īgu wacũ masa bajarã nurũsiagãñorã ĩgũre.

25 Eropigo nomeo doce bojori gohra eropa Ʃmũri nũcũ behreniguigo ero árĩpo. Ero core bajarã duhturuua igore ñero taricũ iĩñorã igore ocoyerã.

26 Eropigo duhturuare igo niyeru árĩpehrerire wajayepituhapo igo ocoyedorego. Erã eropa ocoyequerecũ igo mũraro ta árĩniguicãpo. Eropigo igo ero core igo árĩdiro tauro ñero wapo.

27 Igo eropa ñero taririsubu Jesu ïgu masare òarã iirire peerã gajirã wereñorã igore. Eropigo igo Jesu pũhrũ ta masa bajarã watope aripo. Ahri Jesu suhrirore mohmepiñapo.

28 “Yũhũ ïgu suhriro dihtare mohmepiñago òago dujagoca,” arĩ pepipo igo.

29 Eropi igo mohmepicũ mata igo di wirira purumujudija wayoro. Igo dũpũre òari dũpũ wacũ pepipo.

30 Eropigu Jesu ïgu turari mera dorere ïgu taurare masigu, masa watope maji ïapũ.

—¿Noa yaha suhrirore mohmepiari? arĩpũ.

31 ïgu eroparicũ peerã ïgu buherãpũ òpa arĩñorã.

—Cũhña ãhraa. Eropirã masa bajarã mũre pẽhregãma. “¿Noa yũre mohmepiñari?” arĩgu, ¿dohpa arĩgu iiri mahũ? arĩ serẽpiñorã ïgure.

32 Eropigu Jesu ïgure mohmepidigore amapũ.

33 ïgu amaro watope igopũ igo dũpũ òaro wacũ pepigo güi, naragã merejapo ïgu pohro.

34 Eropigo igo diaye ta werepehopo ïgure. Igo eropa arĩ werera pũhrũ Jesu werepũ igore:

—Mahgo, mahũ yũre umupeori mera òago dujaa dohpa-guere. Mucubiriri mera waque. Dore mariro árĩque, arĩpũ Jesu igore.

35 Erã òpa arĩ wereniguiro watope ta Jairo ya wihi majarã erañorã,

—Mũ mago sĩria wahámo. Eropigu buhegure sihubita pare, arĩñorã.

36 Erã eropa arĩquerecũ ta Jesu Jairore òpa arĩ werepũ:

—Bujawere pepibita. Yũre guñaque. Umupeoque iri dihtare, arĩpũ ïgure.

37 Eropa arĩtuha, Santiago, ïgu pagũ magũ Ñũ, Pedro, erã dihtare “Yũ mera arique,” arĩpũ Jesu.

38 Eropigu Jairo ya wihigue ejapũ. Iri wihiguere masa bajarã burigã ñehamere orerã iĩñorã. Erã eropa orecũ ïha erãre arĩpũ Jesu:

39 —¿Ñero arĩ ñehamere orebircãque mua. Igo majigo sĩribeamõ. Carĩgo iimo, arĩpũ Jesu erãre.

40 ïgu eroparicũ peerã erã “Eroparicãgu iimi ihĩ,” arĩrã ïgure ïayeñorã. ïgũpũ erãre disiporogue wiupehocãpũ. Majigo pagũ sumarã mera, Jesu ïgu mera majarã igo pohrogue sihuñajapũ.

41 Eropigu Jesu igo mojtore ñeha arĩpũ igore:

—Talita cumi, arĩpũ ïgu. Talita cumi mari ya mera “Majigo wahgãque,” arĩdiaro iiaa.

⁴² Īgũ eroparĩcũ ta igo majigo s̄iridigo mũro wahgãnũgaja curipo. Doce bojori opago árĩpo igo. Iгоре ĩgũ eropa iicũ ĩarã ũcataria wañorã.

⁴³ Eropigũ Jesu irire ĩgũ iirare weresiridorebiripũ. Eropi-ituha igore bari ejodorepũ.

6

*Jesu ya maca majarã Nazare majarã Jesure umupeo-
biriñuma*

Mt 13.53-58; Lc 4.16-30

¹ Eropigũ ero árĩdigũ waha wa, ĩgũ buherã mera ĩgũ ya yebague ejapũ.

² Eropigũ Jesu Sabado árĩcũ judio masa erã buheri wihigue buhenũgarũ. ĩgũ eropa buhecũ masa bajarã ĩgũre ĩha masirã ĩgũre pee ũca wañorã. Őpa arĩñorã:

—¿Dohpa ii masiyuri ihĩ i buherire? ¿Dohpa ii ĩgũ deyoro moarire ii masiri?

³ Ihĩ taboa mohmeri masũ María magũ áhrimi. Santiago, José, Juda, Simo, erã tĩgũ áhrimi. Eropirã ĩgũ pagũ porã nome i maca áhrima. Eropigũ ĩgũ mari iro dopa árĩgũ áhrimi, arĩñorã erã Jesure peenjarã. Eropirã Jesure umupeobiriñorã.

⁴ Erã umupeobiricũ ĩagũ õpa arĩpũ Jesu:

—Árĩpehrerogue Goãmũ yare weremũhtadigũre gajirã umupeoma. Erã eropa umupeoquerecũ ta ĩgũ ya maca majarã, ĩgũ acawererã, ĩgũ ya wihi árĩrã dihta umupeobeama ĩgũre. Eropirã yũre umupeobeaa mũa ohõ yũhũ masadigu árĩcũ ĩarã, arĩpũ Jesu erãre.

⁵ Eropigũ iri maca árĩgũ Jesu Goãmũ turari mera baja deyoro moarire iimasibiripũ. Dorecũrã bajamerãgã dihtare ĩgũ mohmepi taupũ erã dorere.

⁶ Eropigũ ero majarã Jesure erã umupeobiricũ ĩagũ, “¿Dohpa árĩrono mera yũre gamebeari erã?” arĩgũ ũca warũ ĩgũ. Eropigũ Jesu ero pohro árĩri macarigue buhegu waha warũ.

Jesu ĩgũ buherãre buhedore obeoñumi

Mt 10.5-15; Lc 9.1-6

⁷ Eropi Jesu doce ĩgũ buherãre sihubeo perãyeri dihta obeopũ erãre macariguere buhedoregũ. Eropigũ ĩgũ dorerire ópũ erãre watẽare masa ñajanirãre erã cõãburire.

⁸ Erãre obeogũ gajinore aĩadorebiripũ. Doberire, barire, niyerure aĩgãadorebiripũ erãre. Erã tuari yucũ dihtare aĩgãadorepũ erãre.

⁹ Eropigũ gaji zapaturire aĩadorebiripũ erãre. Yujuñe ta suhriore sañadorepũ. Peñe sañadorebiripũ erãre.

10 Eropigu õpa arĩ werepũ erãre:

—Árĩpehreri macarigue erã mũare carĩro ocũ, iri wihi ta carĩque. Ne warãgue wiriaque iri wihire.

11 Eropirã gaji macari majarã mũare erã gamebircũ, erã mũa buherire peediabircũ iha iri macare tari wahgã waque. Eropa warã, mũa guburi maja nicure moje siripique mũa erã ya dipuwajare masicũ iimorã erãre, arĩpũ Jesu erãre.

12 Eropirã erã doce buherã waha masare buherã, erã ñero iirare bajaweredoreñorã. Ōaripũre iidoreñorã erãre.

13 Eropirã bajarã watẽare masare ñajanirãre cóãñorã. Dorecũrãre uyũ mera sũrã òarã wacũ iĩñorã.

Ñu waĩyegũre gajirã wejẽñuma

Mt 14.1-12; Lc 9.7-9

14 Eropirã Jesu iũ õaro iirare masa bajarã masiñorã. Eropigu opũ Herode sã irire peebeopũ. Eropa peebeogu õpa arĩ guñapũ iũ Jesure:

—Ñu waĩyemũridigu sĩridigu mũrũ dipaturi masa dehyoagũ iicumi daja ihĩ Jesu. Eropa masadigu árĩgu iũ turarire opami iũ deyoro moarire iigu, arĩ pepiripũ Herode. Jesure “Ñu mũrũ ta ãhrimi,” arĩ pepiripũ iũ Ñure wejẽdorera pũhrũ.

15 Gajirã õpa arĩ pepiriñorã:

—Elia ãhrimi, arĩ pepiriñorã. Gajirãpũ:

—Goãmũ yare weremũhtadigu iribojegue majarã dopa ãhrimi iũ, arĩ pepiñorã Jesure.

16 Erã eropa arĩ pepiquerecũ, Herodepũ Jesu iũ iirare peegu õpa arĩ pepipũ:

—Jesu Ñu mũrũ ta árĩcumi. Ñu dipurure yũ tabedigu masa dehyoagũ iicumi daja, arĩ pepipũ.

17-18 Ero core Herode iũ pagũ magũ marapo Herodia waĩcũgore ehma igo mera marapocũpũ. Iũ eropa iicũ Ñu Herodepũre õpa arĩ wereniguipũ:

—Mũ pagũ magũ marapore marapocũgũ Goãmũ dorerire tarinũgagũ iiaa mũhũ, arĩpũ Ñu Herodere.

Iũ eropa arĩra dipuwaja Herode Ñure ñeadore pere-sugue acumũripũ. Iũre eropa iicũ gamepo iũ marapo Herodia.

19 Eropigo Herodiapũ Ñure ihaturinijago iũre wejẽdore-diaripo. Eropiidaquerego ta wejẽdoremasibiripo Herode opũpũ gamebircũ.

20 Herodepũ “Ñu òarire iigu òagũ ãhrimi,” arĩ pepi Ñure gũipũ. Eropigu Herode Ñu wereniguirire iũ peegu

guñaturabiripũ. Eropa guñaturabiriqueregu ta mucubiriri mera ĩgure peegu wejẽdorebiripũ ĩgu Ñure.

21 Irisubu ta Herodia igo ĩgure wejẽdorera ejayoro. Irisubure Herode ĩgu masa dehyoaranũ árĩcũ ĩgu gobierno majarãre, ĩgu surara oparãre, Galilea majarã oparã sãre sihu bosenu iipũ ĩgu.

22 Eropigo ĩgu marapo mago bosenu ĩago erago erã ĩhuro baya ĩhmupo. Igo baya ĩhmucũ ĩarã Herode ĩgu sihunirã mucubiriñorã. Erã eropa mucubiricũ ĩagu õpa arĩpũ Herode igore:

—Mũ gamerire serẽque yũre. Eropigu mũ serẽrire mũre ogura.

23 Goãmũ mera diaye arãa mũre. Mũ serẽropẽ yahare deco mera ogura mũre, arĩpũ ĩgu igore.

24 ĩgu eropa arĩcũ peego igo pago pohrogue waha serẽpipo:

—¿Ñehenore serẽgocuri yũhũ? arĩ serẽpipo igo pagore.

—Ñũ waĩyegu dipurure serẽque, arĩpo pagopũ.

25 Igo eroparĩcũ peego umũdiaro mera opũ Herode pohrogue eja arĩpo:

—Dohparagã Ñũ waĩyegu dipurure tabetadoreque. Eropigu soropa mera ĩgu dipurure oque yũre, arĩpo igo.

26 Igo eroparĩcũ opũ Herode burigã bujawerepũ. ĩgu masa erã peero, “Mũ serẽrire mũre ogura,” arĩtuhapu ĩgu. Eropigu ĩgu ĩgu eropa arĩrare guhyasirigu “Mũre osome,” arĩmasibiripũ igore. ĩgu sihunirã ĩhuro “Iibea,” arĩmasibiripũ.

27 Eropigu mata surarare peresu árĩrãre coregure Ñũ dipurure tabeta aĩgãridorepũ.

28 ĩgu eropa dorecũ peegu surarapu waha, ĩgu dipurure tabeta, soropa mera aĩgãripũ. Aĩgã nómeore ĩgu marapo magore ópũ. Eropigo igo iripare ñeha igo pagore o taupo daja.

29 Eropirã Ñũ buherã irire peenijarã erogue waha, ĩgu dũpũre aĩ masa gobegue aĩgã apiñorã.

Jesu cinco mil masare barire oñumi

Mt 14.13-21; Lc 9.10-17; Jn 6.1-14

30 Eropi Jesu ĩgu buhedore obeonirã ĩgu pohrogue duja-jañorã daja. Erã iirare erã buherare wereñorã erã ĩgure.

31 Irisubure masa bajarã eropa majiniguirã erãre ne baro iibirĩñorã. Eropigu õpa arĩpũ Jesu ĩgu buherãre:

—Masa marirogue mari seyaro soonirã warã, arĩpũ erãre.

32 Eropirã erã seyaro gasiru mera masa marirogue wariñorã.

33 Erã eropa wacũ ĩarã masa bajarã erãre masiñorã. Eropa masirã baja macari majarã mague waha, Jesu ĩgu ejaborogue omajatuhañorã.

34 Erã eropa ejacũ Jesu tuhajapa, gasirugue sañadigu majanugajagu ĩgu bajarã masare ĩapũ. Oveja ĩhadibugu moorã iro dopa árĩñorã erã Jesu ĩgu ĩacũ. Eropigu erãre mojomoro ĩagu baja buhepũ erãre.

35 Ñamicague doce ĩgu buherã Jesu pohrogue eja õpa arĩñorã ĩgure:

—Ohõ maca marirogue ãhraa. Ñamicague ãhraa.

36 Ögã árĩri macarigue masare wadoreque. Erã baburire asũrã waporo, arĩñorã erã Jesure.

37 —Mũa basi ta barire oque erãre, arĩpũ Jesu erãre.

Ĩgu eroparĩcũ peerã õpa arĩ yũhriñorã:

—¿Wũaro niyerupũri mera gũa dohpa ii asũbocuri panre masa bajarã erã baburire? arĩñorã erã Jesure.

38 —¿Di nũcũ pan ãhriri õguere? ĩarã waque, arĩpũ ĩgu erãre.

Ĩgu eroparĩcũ erãpũ barire boca õpa arĩñorã:

—Cinco dipuru ãhraa pan. Wai perã ãhrima, arĩñorã.

39 Erã eroparĩcũ peegu Jesu masare dipa cururi ero taa árĩro weca doadorepũ masare.

40 ĩgu eroparĩcũ peerã erã dipa cururi doañorã. Yuju curure cien gohra árĩñorã. Gaji curure cincuenta gohra árĩñorã.

41 Erã doapehrecũ ĩha Jesu cinco dipuru pan dipurure aĩ, erã perã waire aĩ, ãmarogue ĩhamemuju Goãmure “Õhaa,” arĩpũ. Eropa arĩ serẽtuha iri pan dipurure nuha ĩgu buherãre õpũ masare gueredoregu. Eropigu wai perãre gueredorepũ árĩpehrerãre.

42 Eropirã árĩpehrerã baha yapia wañorã.

43 Erã ba ðuarare doce puiri gohra sea gameneo ãjũtu doboñorã erã wai sãre eropa ta.

44 Eropirã panre banirã ãma dihtare queocũ cinco mil gohra árĩñorã.

Jesu deco weca curiñumi

Mt 14.22-27; Jn 6.16-21

45 Irisubu ta Jesu ĩgu buherãre dohodirugue ñajajadore, gajipũ masegue Betsaida yebague ĩgu core taribuja yudorepũ. Eropigu erã taribuja wara pũhrũ Jesupũ masare goeriserepũ.

46 Goeriseretuhaja utãgugue muria ĩgu seyaro Goãmure serẽgu waha wapũ.

47 Pũhrũ ñamicague árĩcũ dohodirupũ ĩgũ buherã wadiru ditaru deco árĩyoro. Erã ero payacũ Jesu yujugũ ta erã taribujaridirogue árĩpũ.

48 Miruñe dũrũro weã dujuyoro erãre. Eropigũ erã ñero tari wejacũ ĩhabeopũ Jesu erãre. Eropigũ boyo mũririboro core cãreña wahgãrisubu erã pohro wagũ deco weca cũhrapi wahgã wapũ. Erãre ĩgũ tarigãripũ.

49 ĩgũ tarigãquerecũ ta, ĩgũ deco weca aricũ ĩarã ĩha uca wañorã. "Sĩridigũ mũrũ watĩ ãhrimi," arĩ pepi gaguiniguñorã.

50 Erã árĩpehrerã ĩgũre ĩarã ĩha bũrigã uca wañorã. Erã eropa ĩha ucacũ ĩagũ Jesu werepũ erãre:

—Ne yũre ĩha ucabiricãque. Yũhũ ta ãhraa. Gũibita, arĩpũ erãre.

51 Eropa arĩtuha ĩgũ erã mera dohodirugue ñaja wapũ. ĩgũ ñajara pũhrũgã ta miruñe taria wayoro. Eropa wacũ erãpũ ucataria wañorã.

52 ĩgũ pan dipurure baja iirare guñabiriñorã erã. ĩgũre õaro masibiriniñorã.

Jesu Genesare majarãre dorecũrãre õarã wacũ iĩñumi
Mt 14.34-36

53 Eropĩ erã taribujaja, Genesare yebague eja, tũrogãgue payañorã.

54 Eropirã erã dohodirugue árĩnirã erã majacũ ta masapũ Jesure ĩha masiñorã.

55 Eropa ĩha masirã árĩpehrerogue erã ya yebague omaja, dorecũrãre erã pũyucũ mera aĩgãriñorã. "Jesu erogue ãhrimi," masa erã arĩcũ pee eroguerẽ aĩ ejañorã.

56 Eropirã árĩpehrero ĩgũ waroguerẽ paga macariguere, mũta macarigãguere, campogue, erã wari mariguere erã masa dorecũrãre aĩ apiñorã Jesure coremorã. Eropirã Jesu erã pohro ĩgũ ejacũ mohmepiñadiarã turaro serẽñorã ĩgũre.

—Mũ suhriro ojogoro dihtare mohmepiñadoreque guare, arĩ serẽñorã erã.

Eropirã ĩgũ suhrirore mohmepinirã nũcũ õarã wañorã.

7

Masa ñerã wacũ iirire wereñumi Jesu
Mt 15.1-20

1 Eropĩ Jerusalengue arinirã judio masare buherã, fariseo masa mera Jesu pohrogue gamenereñorã.

2-4 Fariseo masa árĩpehrerã, gajirã gũa acawererã judio masa mera erã ñecũ sũmarã dorediro dopa ta erã mojotorire coero mariro babirimuriñorã. Eropirã doberi

duarã pohrogue wanirã duजारã erã dorerire iimorã, erã mojotorire coero mariro babirimuriñorã erã. Eropirã baja gajã erã dorerire erã ñecũ sũmarã iidorerire iimuriñorã erã. Tasa parire yujuropa coe, máticasorore coe, comesorore coe, erã iiguaro dopa ta iimuriñorã erã judio masa “Goãmũ eropa gahmemi,” arĩrã. Eropirã Jesu pohrogue gamenererã Jesu buherã erã ñecũ sũmarã dorediro dopa ta erã mojo coebiricũ ñañorã fariseo masa.

⁵ Eropa ñatuhajarã Jesure serẽpiñorã:

—Mũ buherã mari ñecũ sũmarã mũra erã dorediro dopa ta erã baboro core erã mojo coebeama. ¿Duhpirã mari dorerire iibeari erã? arĩñorã erã Jesure.

⁶ Erã eroparĩcũ peegũ werepũ Jesu erãre:

—Masa erã ñabiropũre ñero iicorerã ãhraa mũa. Goãmũ yare weremũhtadigũ Isaia mũare iribojegue diaye ta weremuriñumi. Ōpa arĩ gojañumi Goãmũ ya wereniguirire:

Oã masa yũre ōaro wereniguiquererã ne yũre umupebeama. Erã ya siporãripũ gajipũgue ãhraa. Yũre ne mahibeama.

⁷ Goãmũ ya doreri wereniguibodirore erã ya werenigui dihtare buhema erã. Eropirã yũre umupeo erã sĩbuipeori duhpiburi arĩbeaa yũre, arĩmi Goãmũ, arĩ gojañumi Isaia iribojegue.

⁸ Iri diaye ta ãhraa. Goãmũ dorerire iibeaa mũa. Mũa ñecũ sũmarã mũra arĩricũri dihtare iiaa, arĩpũ Jesu erãre.

⁹ Eropigũ erãre wereniguinemopũ daja:

—Mũa ñecũ sũmarã mũra arĩricũrere iiduhubirã ta Goãmũ yapũre cohãa mũa.

¹⁰ Iribojegue ōpa arĩñumi Moise Goãmũ dorerire: “Mũa pagũ sũmarãre umupeoque. Yujugũ ñgũ pagũ sũmarãre ñero werenigui coredigũ ñgũ wejẽbu arĩgũcumi,” arĩñumi Moise.

¹¹ Moise eropa arĩquerecũ ta, mũapũ masare ōpa arĩ weredorea erã pagũ sũmarãre. “ ‘Mũare itamumasibea. Mũare yũ oborare Goãmũ ya arĩburire opehocãbũ,’ arĩque mũa pagũ sũmarãre,” arĩ weredorea mũa.

¹² Eropa arĩ weredorerã erã pagũ sũmarãre erã umupeobiricũ iiaa mũa erãre.

¹³ Eropirã Goãmũ ñgũ dorerire tarinũgarã iiaa mũa mũa ñecũ sũmarã ya doreri dihtare iirã. Gajirãre mũa buheri dihtare peedorea mũa. Baja eropa arĩrere iiaa mũa, arĩpũ Jesu erãre.

¹⁴ Eropa arĩtuha masare sihubeo ōpa arĩpũ daja:

—Mũa arĩpehrerã peeque yũre. Yũ arĩrere ōaro masique mũa.

15 Mũa disiro ñajaripũ mũa baripũ ñerã wacũ iibea. Mũa disiro wiriripũ, mũa wereniguiripũ mũare ñerã árĩcũ iiaa.

16 Yũre ðaro peeque, arĩpũ Jesu.

17 Eropa arĩtuha Jesu masa pohro árĩdigũ waha wihigue ñajaa wapũ. Ĩgũ eropa ñajacũ ĩarã ĩgũ buherãpũ ĩgũ wererare serẽpiñorã. Erã eropa serẽpicũ peegũ ðpa arĩpũ Jesu:

18 —¿Ne peenibeari mũa sã? Mũa bari disiro ñajaripũ mũare ñerã masa wacũ iibea. ¿Irire masibeari?

19 Iri mũa pepirigue ñajabeaa. Mũa parugue ñajaja taria wahaa, arĩpũ Jesu.

Eropa arĩgũ “Árĩpehreri bari ðari bari ãhraa,” arĩgũ iipũ.

20 Òpa arĩnemopũ:

—Mũa wereniguiripũ, mũa disiro wiriripũ mũa pepiri ãhraa. Mũa pepiripũ mũare ñerã masa árĩcũ iiaa.

21 Mũa pepirigue ðpa ñeri iinũgaa: Ñero pepiri, nomere gameri, yajari, masare wejẽri,

22 gajigũ marapo mera ñero iiri, gajirã yare turaro ãaribejari, ñetariari iiri, gũyari, ñeri ãaribejari, gajirã gajinore opacũ ĩhaturiri, ñero quere wereri, gajirãre tarinũgadiari, pee masibiriri iinũgaa.

23 Árĩpehreri i ñeri mũa pepirigue árĩnũgari mũare ñerire iicũ ñerã árĩcũ iiaa, arĩpũ Jesu.

Judio maso árĩbigu Jesure umupeoñumo

Mt 15.21-28

24 Eropigũ Tiro waĩcũri maca pohrogue, Sidón waĩcũri maca pohrogue wapũ. Erogue ejagũ ero árĩri wihigue ñajaa wapũ. Eropigũ gajirãre ĩgũ árĩri wihire ne weredorebiripũ. Ĩgũ eropa duhridiaqueregũ ta duhrimasibiripũ.

25 Ĩgũ ejacũ pee mata yujugo nomeo ĩgũ pohro ejapo. Igo mago watĩ ñajasũdigo árĩpo. Gajirã Jesu iira querere peedigo árĩpo. Igo Jesu pohro eja ĩgũ guburi pohro merejapo.

26 Igo judio maso árĩbigu Grecia majago árĩpo. Siro Fenicia árĩyoro igo masa dehyoara maca. Jesu pohro mereja ĩgũre turaro serẽpo:

—Watĩre wiubasaque yũ magore, arĩ serẽpo igo Jesure.

27 Igo eroparĩcũ peegũ ðpa arĩpũ Jesu igore:

—Negohrare wihi opũ porã bamũhtaporo. Erã porã ya barire diayeare ocũ ero wabeaa. Israe masa yare gaji yeba majarãre yũ omũhtacũ ero wabeaa, arĩpũ Jesu igore.

28 —Eropa ta ãhraa opũ. Eropa árĩquerecũ ta barisuba árĩcũ erã diayea sã yuhridijarire bacohrema. Gaji yeba

majago yu árīquerecũ, yu sãre itamuque muhũ, arīpo igo ĩgure.

²⁹ —Muhũ eropa õaro arī yuhricũ mu magore watĩre wiubasatuhabu. Īago waque, arīpu Jesu igo.

³⁰ Īgu eroparīcũ peego waha, igo ya wihigue eja, igo magore camague oyagore watĩ moogoguere eja ĩapo.

Peebigure, wereniguimasibigure õagu wacũ iĩnumi Jesu

³¹ Irisubure Jesu sã Tiro waĩcũri maca pohrogue árīdigũ waha, Sidón waĩcũri macare eja tarigã, Decapoli waĩcũri macare eja tarigã, Galilea waĩcũri ditarugue ejañorã pare.

³² Eropirã peejabigure, wereniguibigure aĩgãriñorã gajirã Jesu pohrore.

—Mu mojoto mera mohmepiñaque ĩgure, arī serẽñorã erã ĩgure.

³³ Erã eroparīcũ peegu Jesupu peejabigure aĩgã, masa marirogue aĩ eja. Erã seyaro árĩñorã. Eropigu Jesu ĩgu mujusĩri mera ĩgu gamirire pupũ. Eropigu ĩgu disico mera ĩgu nerore mohmepiña.

³⁴ Eropiituhaja umaro ĩhamuju sĩ aĩ õpa arīpu:

—Efata, arīpu Jesu. Efata mari ya mera “Pãgũque,” arĩro iiaa. Eropa arĩgu ĩgure peedoregu iipu. Eropigu wereniguidoregu iipu.

³⁵ Īgu eroparīcũ ta ĩgu peejabigu peepũ. Īgu nero niriicũ pepigu õaro wereniguinugapu.

³⁶ Eropigu Jesu irire ĩanirãre gajirãre weredorebiripu. Eropa weredorebiriquerecũ, erãpu gajirãre burigã werepehocãñorã.

³⁷ Eropirã masa pee uca waha õpa arĩñorã:

—Árĩpehreri õaro iimi. Peejabirã sãre õaro peecũ iimi. Wereniguibirã sãre õaro wereniguicũ iimi Jesu, arĩñorã masa.

8

Cuatro mil masare bari oĩnumi Jesu

Mt 15.32-39

¹ Irisubure daja dipaturi masa bajarã erã gamenerera puhũ, bari moorã erã árīcũ ĩagu Jesu ĩgu buherãre sihubeopũ:

² —Oã masa uhrenũ gohra yu mera árĩtuhajama. Erãre bari pehrea waca. Eropigu erãre mojomoro ĩhaa yuhũ.

³ Gajirã erã mera majarã yoarogue arinirã ãhrima. Erã babiriquererã erã ya wirigue dujaacũ gamebirica. Mague warã erã oaboarã turabiribocoma. Eropigu erãre barire odiaca, arīpu Jesu ĩgu buherãre.

⁴ Īgu eroparīcũ ĩgu buherã ĩgure arĩñorã:

—¿Duhpii mari õguere masa mariroguere barire bocabocuri eräre ejomorã? arĩñorã Jesu ïgu buherãpũ.

⁵ —¿Di nãcũ dipuru pan dipuru opari mũa? arĩ serẽpirũ Jesu eräre:

—Siete pan dipuru ãhraa, arĩñorã.

⁶ Eropigu ïgu masare taa árĩro weca doadorepũ. Tuhanugu siete pan dipurure aĩ, Goãmũre “Õhaa,” arĩ serẽpũ. Eropa arĩ serẽtuhaja pan dipurure nuha ïgu buherãre õpũ gueredoregũ.

⁷ Eropirã waigã sãre bajamerãgã opañorã erã. Eropigu waigãre aĩ Goãmũre “Õhaa,” arĩ serẽ, ïgu buherãre masare gueredorepũ.

⁸ Masa irire barã yapia wañorã. Erã ba dũharare siete pui ri gohra aĩ gameneo ñjũtu doboñorã. Erã masa cuatro mil gohra árĩñorã.

⁹⁻¹⁰ Eropiituha Jesu masare goeriserepũ wagũ. Eräre goeriseretuhaja Dalmanuta waĩcũri macã pohrogue waha wapũ.

Fariseo masa deyoro moariñere ïadiariñuma

Mt 16.1-4; Lc 12.54-56

¹¹ Ero pũhrũ fariseo masa Jesu mera dũyatorã erañorã. Erã Jesure Goãmũ turari mera deyoro moariñere iidoreriñorã. ïgu ii ïhmumasibiricũ ïadiariñorã. ïgu iimasibiricũ “Goãmũ ïgu obeodigu árĩbeami,” arĩdiariñorã.

¹² Erã õpa dorecũ peegũ Jesu turaro bũjawere sĩñaja õpa arĩpũ:

—¿Mũa dohpague majarã duhpirã Goãmũ ïgu turari mera deyoro moarire ïadiari? Diaye arãa mũare. Dohpague majarã mũare ne deyoro moarire ii ïhmusome yũhũ, arĩpũ Jesu eräre.

¹³ Õpa arĩtuha waha dohodirugue ñaja gajipũ masegue waha wapũ ïgu buherã mera.

Fariseo masa, Herode ya curu majarã sã erã ñeri buherire wereñumi Jesu

Mt 16.5-12

¹⁴ Eropa warã panre cãdijiñorã. Dohodirugue yujuru ta panrure opañorã erã.

¹⁵ Eropigu Jesu gũhyaro mera werepũ ïgu buherãre:

—Õaro iique. Fariseo masa, Herode ya curu majarã sã erã pan bũgacũ iiburire õaro iique. Gũhya ãhraa iri, arĩ werepũ eräre.

¹⁶ ïgu fariseo masa sã erã buherire eroparĩcũ pee, ïgu buherãpũ peewisirã irire erã basi wereniguiñorã.

—Mari panre mari aĩgãribiricũ ãagũ eropa arĩcumi ãgũ, arĩñorã erã basi.

¹⁷ Erã eropa arĩrare masigũ õpa arĩpũ Jesu erãre:

—¿Duhpirã mua pan cãdijirare guñari mua? ¿Mua masibeari? ¿Peenibeari mua dohpa? ¿Peediabeari mua?

¹⁸ ¿Cuiricũrã arĩquererã ãabeari mua? ¿Gamiricũquererã ta peebeari mua? ¿Mua yũ iirare guñabeari?

¹⁹ ¿Yũ cinco mil ãmare cinco dipuru panre yũ nuha orare guñabeari mua? ¿Erã yapi weorare di nũcũ puiri pan dipure mua ãjutura puirire añari mua? arĩ serẽpipũ Jesu erãre.

—Doce puiri, arĩñorã erã ãgũre.

²⁰ —¿Eropi yũhũ siete pan dipurure cuatro mil masare yũ ora pũhrũ di nũcũ puiri ãjutura puiri añari mua? arĩpũ Jesu erãre daja.

—Siete puiri, arĩ yũhriñorã erã.

²¹ —¿Eropa irire ãaquererã ta masibeari mua dohpa? arĩpũ Jesu erãre.

Jesu cuiri deyobigũre ãacũ iĩñumi

²² Eropi erã Betsaida waĩcũri macague erã ejacũ ãarã, masapũ cuiri deyobigũre aĩgãriñorã.

—Ãgũre mohmepique, arĩ turaro serẽñorã erã Jesure.

²³ Eropigũ Jesu cuiri deyobigũre mojoto ñeha iri maha tũrogue ãgũre taragãpũ. Aĩ eja ãgũ cuirire purimetupũ disico mera. Eropigũ ãgũ mojoto mera ãgũre mohmepipũ.

—¿Mũhũ ãacũ dehyori? arĩ serẽpipũ Jesu ãgũre.

²⁴ ãgũ eroparĩcũ ãgũpũ ãagũ õpa arĩpũ:

—Masare ãhaa. Erãre ãaquerecũ erã curicũ yucũ iro dopa dehyoma, arĩpũ ãgũ cuiri deyobigũpũ.

²⁵ ãgũ eroparĩcũ peegũ Jesupũ ãgũ mojotori mera ãgũ cuirire mohmepipũ daja. ãgũ eropa mohmepira pũhrũ cuiri deyobigũ ãgũ turaro ãacũ õaro deyoyoro pare. Eropigũ arĩpehrerire õaro ãapũ ãgũ.

²⁶ Eropigũ Jesu ãgũre ãgũ ya wihigue omedijugũ õpa arĩpũ:

—Macague tamerare wabiricãque. Eropigũ maca majarãre i yũ iirare gajirãre weresiribiricãque, arĩpũ Jesu ãgũre.

Jesu ãgũ diaye ta Cristo arĩrere wereñumi Pedro

Mt 16.13-20; Lc 9.18-21

²⁷ Eropi Jesu ãgũ buherã mera Cesarea Filipino waĩcũri maca pohro arĩri macarigue wanemoñorã. Erogue wagũ Jesu serẽpiñapũ ãgũ buherãre:

—¿Nihino árĩcuri yũhu masa erã yũre pepicũ? arĩ serẽpiñapu ĩgu.

²⁸ ĩgu eropa arĩ serẽpiñacũ peerã ĩgu buherã yũhriñorã:

—“Ñu waĩyegu ãhrimi,” arĩma mũre. Gajirã “Elia ãhrimi,” arĩma. Gajirãpu “Goãmũ yare weremũhtanirã mera majagu ãhrimi,” arĩma, arĩ yũhriñorã ĩgu buherã ĩguere.

²⁹ Erã eropa arĩra pũhrũ Jesu serẽpinemopũ erãre:

—¿Mũaru mũa pepicũ nihino árĩcuri yũhu? arĩ serẽpirũ. Pedropũ yũhripu ĩguere:

—Mũhu Cristo Goãmũ ĩgu obeodigu ãhraa, arĩ yũhripu Pedro.

³⁰ ĩgu eroparĩcũ peegu Jesu òpa arĩpu:

—Yũre “Cristo ãhrimi ĩgu,” ne arĩ weresiribiricãque gajirãre, arĩpu erãre.

Jesu ĩgu sĩriburiñere ĩgu masa mũriaburiñe sãre weremũhtañumi

Mt 16.21-28; Lc 9.22-27

³¹ Eropigu ĩgu erãre buhenũgapũ òpa arĩ weregu:

—Yũhu masũ Goãmũ ĩgu obeodigu ãhraa. Eropigu burigã ñero tarigũca. Yũre eropa ta waro gahmea. Murã, pahia oparã, marire buherã sã yũre gamebirã yũre wejẽrãcoma. Erã yũre eropa wejẽquerecũ, ùhrenũ pũhrũ masa mũriagũca, arĩpu Jesu erãre.

³² Eropa arĩgu erã òaro peeboro dopa òaro weregu iipu erãre. ĩgu eroparĩcũ peegu Pedropũ gajipu ñarigã Jesure aĩgã ĩguere arĩpu. “Eropa arĩbiricãque,” turaro mera arĩ werepu.

³³ ĩgu eropa arĩdorebiricũ peegu Jesupu ĩgu buherãre majinũgaja, turipu Pedrore.

—Satana iro dopa wereniguigu iiaa mũhu. Eropa arĩbiricãque. Mũ pepiri masa ya ãhraa. Goãmũ ya árĩbeaa, arĩpu ĩgu Pedrore.

³⁴ Eropa arĩtuha masare ĩgu buherã mera sihubeo òpa arĩpu:

—Yujugu yũ mera majagu árĩdiagu ĩgu gamero iidiarire duhucãgũcumi. Eropigu ĩgu yũ mera majagu ĩgu árĩri dipuwaja ñero tarigũcumi. Ñero tariqueregu yahare iiniguicãgũcumi.

³⁵ Yujugu masũ ĩgu ya árĩburi dihtare pepigu ĩgu dederea wagũcumi. Eropigu gajigu yaha árĩburi dihtare iigu, òari buheri sãre iigu, árĩpehrerĩnũri yũ mera ùmarogue òaro árĩgũcumi.

³⁶ Yujugu masũ i yeba majare árĩpehrerire opaqueregu, peamegue wagu òarire wajatasome.

37 Eropigu i yebague opaburi dihtare guñagu, ìgu sîrigu waburire guñabigu ìgu sîporã mera peamegue dederegucumi.

38 Dohpaguere ñerã Goãmure gamebirã erã ejatuharo iiri árïro iiaa. Eropirã yujurãyeri yure, yu buheri sãre masiquererã “Masibea,” arïbocoma guhyasîrirã. Erã eroparïcũ ïagu yu sã erãre guhyasîrigu “Erãre masibea,” arïguca. Yũhu masu Goãmũ ìgu obeodigu ðarã anyua mera yu Pagu gosesiriri mera dujariguca. Yu dujarigu yu waïre arïdia guhyasîrisânirãre guhyasîrisãguca yu sã, arï werepu Jesu.

9

1 Eropa arïtuhaja ðpa arïnemopu Jesu:

—Diaye arïgu tiiaa muare. Yujurãyeri mua õguere árïrã, mua sîriboro core Goãmũ ìgu opu árïroguere yu ñajacũ ïarãca, arïpu Jesu.

Jesu ìgu dupure gohrotoñumi
Mt 17.1-13; Lc 9.28-36

2 Eropi seis nuri puhru Jesu Pedrore, Santiagore, ìgu pagu magure Ñure utãgugue umadigugue erã dihtare sihu mariapu. Umarogue erã murijara puhru erã ïhabeoro ìgu dupure gohrotopu.

3 Eropiro ìgu suhri gosesiriri suhri ðaro boreriñe wayoro. I yeba majarã nome suhri coerã nome ne eropa borerire iimasibeama.

4 Mata iribojegue majarã Moise muru Elia muru sã dehyoañorã. Eropirã Jesu, Elia, Moise mera weretamucũ ïañorã erã urerã ìgu buherã.

5-6 Eropirã erã burigã güiñorã. Eropa güigu dohpa arïmasibirinijagu ðpa arïpu Pedro:

—Opu, mari ohõ arïcũ ðadiaa. Uhre wihigã iirã. Mu ya wihigã, Moise ya wihigã, Elia ya wihigã iirã, arïpu ìgu Jesure.

7 Eropiro erã weca erãre imica curu cãhmotayoro. Iri eropa cãhmotacũ ta imica curu pohecague Goãmũ ìgu werenigüiri busayoro:

—Ihï yu magu yu mahigu ahrimi. Peeque ìgure, arïri busuro cariyoro.

8 Eroparïcũ peerã Pedro sã maji ïarã Moisere, Eliare ïabiriñorã pare. Jesu dihtare ïañorã.

9 Eropi utãgugue erã دچارicũ Jesu erãre werepu:

—Dohparagã yure eropa warare gajirãre ne werebiricãque. Yũhu masu Goãmũ ìgu obeodigu yu sîri masa mariara puhru irire gajirãre wereque mua, arï werepu Jesu.

¹⁰ Eropirã erã ĩgu dorediro dopa werebiriñorã gajirãre. Eropirã erã, erã basi õpa arĩ serẽpi wereniguiñorã:

—“Yũhu sĩridi masa mũriara pũhrũ,” ĩgu arĩgu ¿duhpigu eropa arĩri ĩgu? arĩ wereniguiñorã erã.

¹¹ Eropirã Jesure õpa arĩ serẽpiñorã:

—Cristo Goãmu beyedigu ĩgu ariboro core “Eliare arimũhtaro gahmea,” arĩma masare buherã. ¿Dohpa arĩronore eropa arĩri erã? arĩ serẽpiñorã Jesure ĩgu buherã.

¹²⁻¹³ Jesu yũhripũ:

—Diaye ta ãhraa. Eliare arimũhtadoremĩ Goãmu árĩpehrerire amumũhtabure. ĩgu eropa iiborore arĩ gojayura ãhraa Goãmu yare gojarapũgue. Yũ sãre arĩ gojauñuma. Yũhu masũ Goãmu ĩgu obeodigu bajasuburi ñero tarigũca. Gajirã yũre gamebirã yũre ñero iirãcoma. ¿Iri sãre masiri mũa? Eropigu õpa arĩgũra mũare: Elia eratuhami. ĩgu eracũ erã ĩgũre erã gamero dopa ñero iima. Iribojegue erã arĩ gojayudiro dopa iima ĩgũre, arĩpũ Jesu.

Jesu majigure õagũ iĩñumi

Mt 17.14-21; Lc 9.37-43

¹⁴ Eropĩ dijari ĩgu buherã dujanirã pohrogue eja, bajarã masare ĩarpũ. ĩgu buherãpũ judio masare buherã mera game dũyatorã iĩñorã.

¹⁵ Masa Jesure ĩarã árĩpehrerã ĩhamaria wañorã. Eropirã ĩgu pohrogue omagã ĩgu pohrogue eja, “¿Ahrari?” arĩñorã ĩgũre.

¹⁶ “Ahrabũ,” arĩtuhaja erãre serẽpipũ:

—¿Ñehenore game wereniguirã iiari mũa eropa dũyatorã? arĩ serẽpipũ ĩgu.

¹⁷ ĩgu serẽpicũ peegu masa watope niguidigu werepũ ĩgũre:

—Buhegu, yũ magũre watĩ ñajãsũdigũre mũre aĩgãrirabũ. Watĩpũ ĩgũre wereniguidorebeamĩ.

¹⁸ Yũ magũre ĩgu ñajacũ yebague mehmereja wahami. ĩgu disirore sumutua, ĩgu gũcũrĩre cũridihu buha wamũramĩ ĩgu. Eropigu mũ buherãre watĩre yũ magũre ñajadigũre cóãdorerabũ. Erã cóãmasibirama, arĩ werepũ ĩgũre.

¹⁹ ĩgu eroparĩcũ peegu õpa arĩpũ Jesu masare:

—¿Ne yũre umupeobirigohracãri mũa? Yoari boje mũare buherabũ yũhu. ¿Dĩpa boje yũhu mũare yujuro bojebocuri? ĩgũre aĩgãrique, arĩpũ Jesu.

²⁰ ĩgu eroparĩcũ peerã watĩ ñajãsũdigũre Jesu pohro aĩgãriñorã. Erã Jesu pohro aĩ ejacũ ta watĩpũ ĩgu majigure

mehmerejacũ iipũ. Īgu eropiicũ ĩgu yebague mehmereja warũ. Tũru, naragã, buhacũ iipũ. Eropii ĩgu disiro sumutua warũ. Jesu ĩgu pagure serẽpirũ:

21 —¿Dipa boje eropa aħrari ĩgu? arĩ serẽpirũ Jesu majigu pagure.

—Majigugãgue ta ĩgu eropa arĩnugami, arĩ yuhripũ ĩgu pagurũ.

22 Eropigu watĩpũ ĩgure peamegue, diague sãre cóãmuririmi ĩgure wejediagu. Eropigu mũhũ itamumasigu mojomoro ĩha itamuque guare, arĩpũ majigu pagurũ Jesure.

23 Īgu eroparĩcũ peegu õpa arĩpũ Jesu ĩgure:

—Mũhũ yũre umupeocũ ĩagu Goãmũ arĩpehrerire iiphocãmasimi mũ ya arĩburire iigu, arĩpũ Jesu ĩgure.

24 Īgu eroparĩcũ majigu pagũ õpa arĩ gaguiniguipũ:

—Mũre umupeoa yũhũ. Yũ umupeobiricũ ĩagu itamuque yũre yũhũ mũre umupeoboro dopa, arĩpũ ĩgu.

25 Eropiicũ masa bajarã erã pohro omagãriñorã. Erã gamenerecũ ĩagu Jesu watĩre õpa arĩ turipũ:

—Mũhũ wereniguimasibiricũ iidigu, gamiri bihadigu ĩre duhuque. Eropigu dipaturi ĩgure garibobiricãque, arĩpũ Jesu.

26 Īgu eroparĩcũ peegu majigure ñajadigu watĩ gaguinigui, majigure yebague mehmereja, tũru naragãcũ ii duhurũ ĩgure. Īgu eropiicũ majigurũ sĩrigũ dopa warũ.

27 —Īgu sĩria wami, arĩñorã masa bajarã.

Erã eropa arĩquerecũ ta Jesupũ ĩgu mojtore ñeha ĩgure tara wahgũ nugurũ. Īgu tara wahgũ nugucũ wahgãnugajapũ ĩgurũ.

28 Pũhrũ Jesu wihigue ñajajacũ ĩarã ĩgu buherã erã seyaro serẽpiñorã Jesure:

—¿Duhpirã guapũ majigure watĩ opagure cóãmasibirayuri mũ pepicũ? arĩ serẽpiñorã erã.

29 —Īno watĩre cóãdiarã burigã Goãmũre serẽro gahmea. Eropirã Goãmũre serẽmorã ba duhuro gahmea mũare, arĩ yuhripũ Jesu erãre.

Dipaturi ta Jesu ĩgu sĩriburiñere ĩgu masa mũriaburiñe sãre wereñumi

Mt 17.22-23; Lc 9.43-45

30 Eropi erogue arĩnirã waha Galilea yebague eja, tarigãñorã. Irisubu Jesu ĩgu buherãre buhegu iipũ. Eropigu erã warore gajirã masicũ gamebiripũ Jesu.

31 Erogue ejagu ĩgu buherãre buhepũ. Õpa arĩ buhepũ:

—Yuhũ masũ Goãmũ ïgũ obeodigu ãhraa. Masa yũre ñeha gajirãguere yũre wiarãcoma. Erã wiara pũhrũ yũre wejẽrãcoma erã. Eropa erã wejẽra pũhrũ ùhrenũ pũhrũ masa mũriagũca, arĩpũ Jesu.

32 Ìgũ õpa arĩcũ õaro peebiriñorã. Eropirã güirã ïgũre irire serẽpibiriñorã.

Jesu ïgũ buherãre erã yagũ opu áribure wereñumi
Mt 18.1-5; Lc 9.46-48

33 Eropi erã Capernaumgue ejara pũhrũ wihigue erã arĩcũ Jesupũ serẽpipũ erãre:

—¿Maguere arirã dohpa arĩ dũyaso wereniguirã iiari mũa? arĩ serẽpipũ erãre.

34 Ìgũ eroparĩcũ erã yũhribiriñorã. Mague arirã õpa arĩ dũyaso wereniguiñorã erã basi:

—¿Nihi ãhriri mari áripehrerã wecague? arĩ dũyaso wereniguiñorã erã. Eropirã erã eropa arĩrare Jesure werediabiriñorã.

35 Erã eropa yũhribiricũ ïagũ Jesu doaja ïgũ buherãre sihubeo õpa arĩpũ:

—Áripehrerã wecague opu áriðiagu áripehrerã ojogoro majagu áriro dopa ta erã pohro majagu áriro gahmea mũare, arĩpũ Jesu erãre.

36 Eropa arĩgũ majigũgãre erã watope duhudobopũ. Duhudobotuha ïgũgãre aĩ coã õpa arĩ werepũ:

37 —Yahare iidiarã, ïgũgãre bu árigũre gamerã yũ sãre gahmea mũa. Mũa eropiirã yũre gamerã, yũre obeodigu Goãmũ sãre gahmea mũa, arĩpũ Jesu erãre.

Marire ïhaturibigu árigũ mari mera majagu ãhrimi, arĩ wereñumi Jesu

Mt 10.42; Lc 9.49-50

38 Ero pũhrũ ïgũ buhegu Ñũ õpa arĩpũ Jesure:

—Buhegu, yujugu mũ waĩ mera watẽare cohã wiucũ gũa ïhabũ. Ìgũ mari mera majagu ïgũ áribiricũ ïarã, ïgũre irire iidorebirimũrabũ gũa, arĩpũ ïgũ.

39 Ìgũ eroparĩcũ peegu Jesu erãre werepũ:

—Eropa arĩbita mũa ïgũre. Yujugu yũ waĩ mera deyoro moarire iigu, pũhrũguere yũre ñero wereniguimasibeami.

40 Marire ïhaturibigu árigũ, ïgũ mari mera majagu ãhrimi.

41 Mũare diaye ta arãa. Yaharã mũa arĩcũ ïarã gajirã mũare itamucũ ïagũ Goãmũ erãre õaro itamugũcumi. Yuju coaru mera decore mũare erã tĩacũ merogã áriquerẽcũ, erãre õaro iigũcumi Goãmũ erã õaro iira waja, arĩpũ Jesu.

*Ñerire iicũ guhya ãhraa, arĩ buheñumi Jesu
Mt 18.6-9; Lc 17.1-2*

⁴² Eropigu Jesu majigugãre igu basi coã aĩ erãre weren-
emopu:

—İgã yure umupeogugãre weregura mware: Yujugu
igã iro dopa arĩgure ñerire iidoredigu, igu ñetariaro
tarigucumi. Gajigure masa igure wunugure wuariye utãye
mera dirisiu, wuariyague igure cóãcũ ñero wabocumi igu.
Eropigu igã dopa arĩgure ñerire iidoredigupu wuariyague
erã cóãdigu tauro ñero tarigucumi. İgu burigã dipuwaja
moasugucumi.

⁴³⁻⁴⁴ Mu mojoto mera ñero iigu, iri mojtore mu tabe
cóãbodirop dopa iri ñerire duhuque. İrire duhubigu
peamegue waguca. Eroguere ne peame yaribea. Eropirã
beca sã üjuquererã ne sĩribeama. Mu mojtore mu cóãcũ
iri dũca dihta cohmoboya. Eropigu mupu epasi arĩqueregu
ta puhru Goãmu mera arĩguca. Mu pe mojoto mera arĩgure
peamegue igu cóãcũ ñetariaro tariguca. Eropigu iri ñeri
iiripure duhuque.

⁴⁵⁻⁴⁶ Mu guburu mera ñero iigu mahu iri guburu sãre mu
tabe cóãbodirop dopa ta iri ñerire duhuque. İrire duhubigu
peamegue waguca. Eroguere ne peame yaribea. Eropirã
beca ne sĩribeama. Mu guburure mu cóãcũ irisi dihta
cohmoboya. Eropigu epasi arĩqueregu ta puhru Goãmu
mera arĩguca. Mu pe guburu mera arĩgure mure peamegue
cóãcũ mu ñetariaro tariguca. Eropigu iri ñeri iiripure
duhuque.

⁴⁷⁻⁴⁸ Mu cuiru mera ñero iigu irirure mu gorawea
cóãbodirop dopa ta iri ñerire duhuque. İrire duhubigu
peamegue waguca. Eroguere ne peame yaribea. Eropirã
beca sã ne sĩribeama. Mu cuirure cóãcũ iriru dihta
cohmoboya. Yujupu cuiru mariqueregu ta puhru Goãmu
mera arĩguca. Mure pe cuiri mera arĩgure peamegue mure
cóãcũ mu ñetariaro tariguca. Eropigu iri ñeri iiripure
duhuque.

⁴⁹ “İ yeba arĩrã ñero tarirãca mu. Peamegue mari üjucũ
marire pũrirop dopa ta ñero tarirãca mu.

⁵⁰ Moa õaro acaa. Moa acabiricũ usuriri iimasiya mara.
Moa acabiro iri moa ne õabeaa. İri moa acabiricũ
dohpagohra iimasiya mara. Eropirã moa õaro acarop dopa
mu sũarã arĩque. Eropirã gajirã mera õaro mera arĩque.

10

*Erã marasã nomere erã cóãcũ õabeaa, arĩ wereñumi Jesu
Mt 19.1-12; Lc 16.18*

1 Eropigu ĩgu erogue árĩdigu waha, Judea yeba pohrogue eja, dia Jordán waĩcũriya gajipu masegue eja. Erogue ĩgu ejacũ ĩarã masa bajarã ĩgu pohrogue gamenereñorã daja. Erã gamenerecũ ĩagu ero core ĩgu buhediro dopa ta dipaturi buhepu daja.

2 ĩgu eropa buherisubu fariseo masa erañorã. Jesure ĩgu ñero wereniguicũ peediañorã. Eropa peediarã erã Jesure õpa arĩ serẽpiñorã:

—¿Mari marapore cóacũ õhari? ¿Moise doreripu eropa ta iidone õabeaa. Iri moa acabiricũ reri mu pepicũ? arĩ serẽpiñorã.

3 —¿Dohpa doreyuri Moise mũare? arĩ yũhripũ Jesu.

4 —“Mũ marapore cóadiagu paperapũgue irire gojaque. Eropa gojagu iripũre mu marapore otuhajanijagugue igore cóãmasia,” arĩ gojañumi Moise, arĩ yũhriñorã fariseo masa.

5 Erã eroparĩcũ peegu õpa arĩ werepu Jesu:

—Mũa ñecu sũmarã Goãmu dorerire iidiabiricũ ĩagu, “Eropa ta wacuraporo,” arĩgu, “Mũa marapore cóãmasia,” arĩ gojañumi Moise.

6 ĩgu eropa arĩ gojara árĩquerecũ ta, negohraguere Goãmu mũa marasã nomere cóacũ gamebiriñumi. I yebare ĩhacũnugugũ mũmũ, nomeo sãre iĩñumi.

7 Eropigu mũmũ ĩgu pagu sũmarãre cohã wiria ĩgu marapo mera árĩgucumi.

8 Eropirã erã perã árĩquererã ta, yuju dũpu iro dopa árĩrãcoma. Eropirã erã perã iro dopa árĩbeama. Yuju dũpu iro dopa ãhrima erã.

9 Eropirã Goãmu ĩgu doreri mera mojtodirima. Eropirã game cóãbiricãro gahmea erãre, arĩpu Jesu erãre.

10 Eropa arĩtuha ĩgu buherã mera wihigue ñajaa wapũ. Wihigue ñajajarã erã marasã nomere cóãrire serẽpinemoñorã daja ĩgu buherã.

11 Erã eropa serẽpiñacũ ĩgu yũhripũ:

—Ĩgu marapore cóadigu gajigo mera marapocũgu, ĩgu igo gajigo mera ñero iigu iimi.

12 Eropigo nomeo sã igo marapũre cóãgo, gajigu mera marapucũgo, ĩgu gajigu mera ñero iigo ãhrimo, arĩpu Jesu erãre.

*Majirãgã ya árĩburire Goãmure serẽbasañumi Jesu
Mt 19.13-15; Lc 18.15-17*

13 Eropi majirãgãre Jesure mohmepidoremorã erãgãre Jesu pohrogue aĩ erañorã. Erã eropiicũ ĩgu buherãpu erãgãre aĩgãrirãre bocatĩri turiñorã.

14 Erã eropa turicũ ĩagu Jesu papũrigu õpa arĩpu erãre:

—Eropa ĩacãque. Majirã yu pohroque ariporo. Waque, arĩbircãque erãgãre. Erã Goãmure erã opure masima. Eropirã Goãmũ ĩgu opu árĩroguere oãgã iro dopa pepirã àhrima eroguere.

¹⁵ Diaye arĩgu ĩaa mũare. Oãgã Goãmure gamediro dopa ta mũa Goãmure gamebirã ĩgu pohroque wasome mũa. Mũa wabiricũ mũa opu árĩsome ĩgu, arĩpu Jesu.

¹⁶ Eropa arĩtuha Jesu majirãgãre aĩ coãgu erãre mohmepi erã òaro árĩburire Goãmure serẽbasagu òpa arĩpu:

—Oãgã òarã waporo, arĩ serẽbasapu Goãmure.

Doberi opagu Jesu mera weretamuñumi

Mt 19.16-30; Lc 18.18-30

¹⁷ Eropi Jesu ĩgu mague wacũ, yujugu masu omagã wa ĩgu guburi pohro mereja Jesure serẽpiru.

—Mũhu buhegu òagu àhraa. ¿Yũhu árĩpehrerĩnũri Goãmũ mera árĩdiagu duhpigũcũri? arĩpu ĩgu Jesure.

¹⁸ ĩgu eroparĩcũ Jesu ĩgure yũhrĩpu:

—¿Dohpa arĩronore yũre “Òagu” arĩ piyuri mũhu? Goãmũ yujugu ta òagu àhrimi.

¹⁹ ĩgu Goãmũ dorerire masia mũhu. “Masare wejẽbircãque. Gajigu marapo mera árĩbircãque. Yajabita, gũyabita, gajirã yare gũya aĩbita, mũ pagu sũmarãre umupeoque,” ire doremi Goãmũ. I dorerire iro gahmea mũre, arĩ werepu Jesu ĩgure.

²⁰ —Buhegu, irire árĩpehrerire majigugãque ta tari-nũgabirimũribũ yũa, arĩpu ĩgu Jesure.

²¹ Jesu ĩgure ĩhamehtu mahĩpu. Eropigu òpa arĩpu:

—Merogã dũhyaa mũre mũ ĩpehoboro. Árĩpehrerire mũ yare duaque. Eropigu árĩpehrerĩ mũ wajatarare mojomorocũrãre oque. Mũhu eropiicũ baja òari umarogue Goãmũ pohroguere árĩyuroca. Tuhajanugu yũ mera majagu árĩbu arĩque, arĩpu Jesu ĩgure.

²² Wũaro opagu arĩpu ĩgu. Eropigu Jesu ĩgure eroparĩcũ peegu ĩgu oparire mojomorocũrãre odiabigu, turaro bujawere, suabirĩ waha wapu.

²³ ĩgu bujawere wacũ ĩagu Jesu majinũgaja ĩgu buherãre ĩha òpa arĩpu:

—Doberi oparã Goãmũ ĩgu opu árĩroguere erã wadiacũ diasa àhraa, arĩpu erãre.

²⁴ ĩgu eroparĩcũ peerã erãpu pee uca waha pee masi-biriñorã. Eropa arĩtuha Jesu dipaturi werepu erãre:

—Yũ acawererã, árĩpehrerã “Yũ gamero yũ opari mera ta òaro tarĩgũca,” arĩ pepirã Goãmũ ĩgu opu árĩroguere erã wacũ diasataria.

25 Camelloꝝ awiru gobegãꝝue ĩꝝu ñajatariwereadiacũ masiya mara ĩꝝure. Eropa ta doberi opagũ ĩꝝu Goãmũ mera õaro árĩꝝu ĩꝝu opũ árĩꝝoguerẽ ĩꝝu wacũ diasa ãhraa, arĩ wereꝝu erãre.

26 ĩꝝu eroparĩcũ peenijarã ĩhamaria wanijarã, erã basi õpa arĩñorã:

—Yaho. ĩꝝu arĩro dopa ta diaye árĩcũ ne yujungũ masure taubiribocumi Goãmũ ĩꝝu pohro wamorãre, arĩñorã erã erã basi.

27 Erã eroparĩcũ peegũ Jesu erãre ĩhabeo õpa arĩꝝu:

—Masa erã bocatiuro erã õaro iiri mera tarimasibeama. Goãmũ pohrogue wamasibeama. Goãmũ dihta masare peamegue wabonirãre taumasimi ĩꝝu pohro wamorãre. ĩꝝu árĩꝝpehrerire õaro iimasipehocãmi, arĩꝝu Jesu erãre.

28 ĩꝝu eroparĩcũ peegũ Pedro ĩꝝure õpa arĩꝝu:

—Peenique. Guarũ árĩꝝpehreri gua yare apicãbũ mũ mera wamorã, arĩꝝu ĩꝝu Jesure.

29 ĩꝝu eroparĩcũ Jesu õpa arĩꝝu:

—Diaye arĩꝝu iiaa mũare. Árĩꝝpehrerã õari buherire yaha árĩburire iimorã mũa wirire, mũa pagũ porãre, mũa pagũ sũmarãre, mũa porãre, mũa poerire apirã wũaro wajatarãca mũa dohpaguere.

30 Eropirã mũa wirire, mũa pagũ porãre, mũa pagosã nomere, mũa porãre, mũa poerire ero core mũa opadiro tauro dohpaguere baja oparãca mũa ñero tarirã árĩꝝquererã. Eropirã gajirã mũare ñero iirãcoma. Eropirã pũhrũguere árĩꝝpehrerinũri Goãmũ mera árĩrãca.

31 Dohpaguere bajarã oparã árĩñirã irisubure bu árĩrã dujacãrãcoma. Eropirã dohpaguere bajarã bu árĩñirãꝝu oparã dujarãcoma daja, arĩ wereꝝu Jesu erãre.

Dipaturi Jesu ĩꝝu sĩriburiñere, ĩꝝu masa mũriaburiñe sãre wereñumi

Mt 20.17-19; Lc 18.31-34

32 Eropi erã mague majaa, Jerusaléngue majarã iĩñorã. Jesu erã coregã mũhtapũ. ĩꝝu eropa mũhtacũ ĩarã ĩꝝu buherã ĩha uca wañorã. Eropirã erã pũhrũ nũrũsuarãꝝu gũiro mera ĩꝝure nũrũsiañorã. Eropigũ Jesu doce ĩꝝu buherã seyarore sihubeo, masa ĩꝝure iiburire werenũgapũ daja erãre.

33 —Peeque yũre. Dohpaguere Jerusaléngue warã iiaa mari. Eroque masa yũ masure Goãmũ ĩꝝu obeodigũre yũre ñeha, pahia oparãre, judio masare buherã sãre yũre orãcoma. Eropirã yũre wejẽdorerãcoma erã. Eropa wejẽdorerã judio masa árĩbirãre orãcoma yũre.

³⁴ Erã eropa ora pũhrũ erã yũre wereya, disico ehosũ tãrarãcoma. Tuhaja yũre wejẽrãcoma. Eropigu yũ sũrira pũhrũ Ʃhrenũ pũhrũ masa mũriaguca, arĩ werepũ Jesu.

Santiago, Ñu mera Jesure serẽñuma

Mt 20.20-28

³⁵ Eropi Santiago, Ñu mera Jesu pohrogã ejarã erã gamerire serẽñorã ïgure. Erã Zebedeo porã arĩñorã. Eropirã õpa arĩñorã:

—Buhegũ, gũa serẽro dopa ta gũare iique mũhũ, arĩñorã erã Jesure.

³⁶ —¿Yũhũ duhpĩicũ gahmeri mũa? arĩpũ Jesu erãre.

³⁷ —Mũhũ arĩpehrerã wecague opũ arĩgũ gũare mũ waĩ mera dorerã acuque. Yujugare mũ diayerũ, gajigure copũ doboque gũare. Mũ mera oparã gũa arĩboro dopa iique, arĩ serẽñorã erã Jesure.

³⁸ Erã eroparĩcũ peegũ õpa arĩ werepũ Jesu:

—Mũa ñero tariborore masibiriqererã õpa arĩ serẽa mũa yũre. ¿Dohpaguere yũ ñero tariboro dopa ta mũa sã ñero tarirã yujuro bojebocuri mũa? ¿Yũre erã ñero iiboro dopa mũa sãre ñero iicũ yujuro bojemasibocuri mũa? arĩ serẽpipũ Jesu erãre.

³⁹ —Yujuro bojerãca, arĩ yũhriñorã.

Erã eroparĩcũ Jesu õpa arĩ werepũ:

—Yũ ñero tariboro dopa ta mũa sã ñero tarirãca.

⁴⁰ Eropa mũa tarimorã arĩquerecũ ta, yũ mera doremorãre beyemasibea yũhũ. Irire yũhũ Pagũ amutuhami. Eropirã ïgũ beyenirã dihta yũ diayerũ yũ copũ doarãcoma, arĩpũ Jesu.

⁴¹ Santiago, Ñu sã erã oparã arĩburire Jesure serẽcũ gajirã diez buherã peerã, erã mera guañorã.

⁴² Erã eropa guacũ ïagũ, Jesu ïgũ buherãre sihu gameneo õpa arĩpũ:

—Goãmũre masibirã oparãpũ erã masare dorerã, pũriro mera dorema.

⁴³ Mũapũ ne eropa iisome mũa basi. Mũa mera majagu opũ arĩdiagũ, arĩpehrerã ïgũ mera majarãre itamugũ arĩporo.

⁴⁴ Eropigu arĩpehrerãre doregũ arĩdiagũ, erã pohro majagu arĩro dopa ta arĩporo.

⁴⁵ Eropa arĩgũ tiiaa yũ sã. Masare dorebiragu arigu iibiribũ. Yũhũ masũ Goãmũ ïgũ obeodigu arĩqueregũ ta, i yebaguere masare itamugũ arigu iibũ. Eropigu masa bajarã erã ñero iira dipuwajare sũribasagu arigu iibũ. Eropigu erã peamegue wabonirãre taugũ arigu iibũ, arĩpũ Jesu erãre.

Bartimeore, cuiiri ñhajibigũre ñacũ iĩñumi Jesu

Mt 20.29-34; Lc 18.35-43

⁴⁶ Eropi erã Jericógue ejañorã. Eropirã iri macague árĩnirã Jesu ñgu buherã masa bajarã mera wañorã. Jesu wari maha turogue yujugu masu cuiiri ñhajibigu doapu. Ñgu Bartimeo waĩcugu Timeo magu árĩpu. Ñgu ma turogue doagu umuri nucu masare niyerure serẽmuripu.

⁴⁷ Eropigu ero doanijagu masa "Jesu Nazare majagu ahrimi," erã arĩcũ peepu. Eropa peenijagu opa arĩ gaguiniguipu:

—Jesu, opu Davi muru pãrami masare taubu mojomoro ñaque yure, arĩ gaguiniguipu Jesure.

⁴⁸ Ñgu eropa arĩ gaguiniguicũ peerã masa bajarã Bartimeore "Ejarimaricãque," arĩ turiñorã. Erã eropa arĩ turiquerecũ, ñgupu ñgu ero core ñgu gaguiniguidero tauro gaguiniguipu daja.

—Jesu, opu Davi muru pãrami masare taubu mojomoro ñaque yure, arĩ gaguiniguipu daja.

⁴⁹ Ñgu eroparĩcũ peegu Jesupu dujanugaja:

—Sihubeoque ñgure, arĩpu. Ñgu eroparĩcũ peerã erãpu ñgu cuiiri ñhajibigũre sihgũñorã.

—Mucubirique. Wahgãnugajaque. Ñgu mure sihumi, arĩñorã erã ñgure Bartimeore.

⁵⁰ Erã eroparĩcũ peegu ñgu omasiariñere tuweapi, buhri tarimagã Jesu pohroque ejanugajapu.

⁵¹ Eropigu Jesu serẽpipu ñgure:

—¿Dohpa yahũ mure iicũ gahmeri muhu? arĩ serẽpipu Jesu ñgure.

—Yu opu, yure cuiiri ñacũ iique, arĩpu ñgu cuiiri ñhajibigupu.

⁵² —Mu yure umupeonijagu ñagu wahaa. Eropigu wanisa, arĩpu Jesu ñgure.

Ñgu eroparĩcũ ta cuiiri ñhajibigu ñaro ñha wapu. Ñagu wanijagu Jesu mera mague nurusia wahgã wapu.

11

Jerusaléngue ejañumi Jesu

Mt 21.1-11; Lc 19.28-40; Jn 12.12-19

¹ Eropii erã Jerusaléngue ejaboro coregã, Betfagé maca pohrogã, Betania maca pohrogã ejamũhtañorã. Iri macari utãgu Olivo waĩcudigu gubuye árĩyoro. Eroque ejaqu perãre ñgu buherãre Jesu obeogu opa arĩpu:

² —Si macague waque. Eroque ejarã mata burrogãre erã dirinugudigũgãre bocajarãca. Gajirã erã peyaya

marigu árĩcumi. Īgure bocaĵa ĩgure diriradarire p̄a yure aĩḡaribasaque.

³ M̄a eropiic̄ ĩagu burroḡa opa “¿Duhpimor̄a burroḡare p̄ari?” ĩgu arĩc̄ peer̄a ōpa arĩ ȳhrique ĩgure: “Mari ĩgu burroḡare gamebeoniami dohpa. Eropigu dohparaḡa wiaḡucumi ĩgure,” arĩ wereque ĩgure, arĩ weredore obeopa ĩgu buher̄a per̄are.

⁴ Īgu dorebeonir̄a waha, wihi pohro árĩri mare burroḡare disiporo er̄a dirinugudiguḡare bocaĵañor̄a. Bocaĵa ĩgure er̄a diriradarire p̄añor̄a.

⁵ Eropir̄a ĩgure er̄a p̄ac̄ ĩar̄a ero niguinir̄a ser̄epiñor̄a:
—¿Duhpimor̄a m̄a diriradarire p̄ari burroḡare? arĩ ser̄epiñor̄a.

⁶ Er̄a eroparĩc̄ peer̄a er̄ap̄u Jesu ĩgu arĩdiro dopa ta wereñor̄a er̄are ser̄epir̄are. Er̄a eropa arĩ werec̄u peer̄a er̄a ero niguinir̄ap̄u “Aĩḡaque,” arĩñor̄a er̄are.

⁷ Eropir̄a er̄a burroḡare Jesu pohrogue aĩḡa wañor̄a. Er̄a aĩ ejara p̄hr̄u suhri ĩguḡa weca er̄a peotuhac̄ ĩagu Jesup̄u ĩguḡa wecague m̄uribeĵap̄u wabu.

⁸ Eropir̄a masa bajar̄a er̄a peyari suhrire tuwea aĩ ĩgu wari maha deco s̄eopi m̄htañor̄a Jesure umupeor̄a. Gajir̄ap̄u p̄uric̄uri d̄ur̄ire poerigue er̄a aĩḡarira d̄ur̄ire apim̄htañor̄a “Ōari maha árĩporo,” arĩr̄a.

⁹ Eropir̄a ĩgu core war̄a, ĩgu p̄hr̄u arir̄a s̄a ōpa arĩ gaguiniñor̄a:

—Īre umupeor̄a. Ihĩ Gōam̄u ĩgu obeodigu ōaro ariporo.

¹⁰ Mari ñec̄u Davi m̄ur̄u opa ĩgu arĩdiro dopa ta ōaro ariporo. “Ūmaro majagu turagu āhrimi,” arĩ umupeor̄a, arĩ gaguiniguiniñor̄a er̄a.

¹¹ Eropigu Jesu Jerusalengue eĵap̄u. Eĵagu Gōam̄u ya wi-higue ñajajagu, iri wihi majare arĩpehr̄erire ĩapehoc̄ap̄u. Īatuhaja “Ñamicague āhraa. Ūm̄ñariḡa ta āhraa. Ina war̄a,” arĩp̄u Jesu. Īgu buher̄a mera Betaniague waha wañor̄a.

Jesu higueraĵu waĩc̄udigure s̄iridoreñumi

Mt 21.18-19

¹² Eropi gajinu er̄a Betaniague arĩnir̄a Jerusalengue dujariñor̄a daja. Eropa dujaric̄u Jesup̄u oaboa wap̄u. Eropa oaboagu yoarogue niguidigure higueraĵure ōaro p̄uric̄udigure ĩanijagu irigu d̄ucare amagu warip̄u.

¹³ D̄uca mariyoro. D̄ucac̄ur̄isubu arĩbir̄iya. P̄uri dihta opayoro.

¹⁴ Eropigu d̄uca maric̄u ĩagu ōpa arĩp̄u:

—Ir̄igu d̄ucare masa ne dipaturi babiric̄aporo. Ne d̄ucac̄ubiric̄aporo, arĩp̄u Jesu.

Īḡu eroparĩcũ ĩḡu buherãpũ peeñorã.

Jesu Goãmũ wihire Goãmũ mera wereniguiri wihire iidoreñumi

Mt 21.12-17; Lc 19.45-48; Jn 2.13-22

¹⁵ Īḡu eropiira pũhrũ erã Jerusaléngue erañorã. Eragu Jesu Goãmũ ya wihigue ñajapũ daja. Ñajajagu doberi duarãre, asũrãre bocajagu cohã wiucãpũ. Eropigu niyerure game gohroto doarã ya mesarire yomemuju aĩ mehpi behomũripũ. Bujare duarã erã doari pẽrori sãre eropa ta iipũ.

¹⁶ Eropigu Jesu Goãmũ wihiguere gajinore aĩ ñajadorebiripũ masare.

¹⁷ Eropigu Jesu õpa arĩ buhepũ erãre:

—Õpa ãhraa Goãmũ yare erã gojarapũgue: “Yaha wihi Goãmũ mera wereniguiri wihi waĩcũroca. Eropiro árĩpehrero majarãgue yũ mera erã wereniguiri wihi árĩroca,” arĩ gojañuma Goãmũ wereniguirire. Goãmũ eropa arĩquerecũ ta, mũapũ i wihire Goãmũ wihire duadoarã bu game yajarã iiaa, arĩpũ Jesu erãre.

¹⁸ Īḡu eropa arĩ buhecũ árĩpehrerã masapũ pee Ʃcaphegrea wañorã. Eropirã pahia oparã, judio masare buherã mera ĩḡure güi árĩñorã. Eropirã erã ĩḡure wejẽburire guñamaañorã.

¹⁹ Erã eropiicũ ñamicague Jesu ĩḡu buherã mera iri maca árĩñirã waha wañorã.

Higueragu sĩa wayoro

Mt 21.20-22

²⁰ Eropirã boyo دچارicũ mague majarirã higueragure ãañorã daja. Irigu nugurigue sĩrinũga sĩriadigu árĩcũ ãañorã.

²¹ Irigure ãagu Pedropũ õpa arĩpũ:

—Buhegu, ãaque. Irigu higueragupũ mũ sĩridoredigupũ sĩa waya, arĩpũ Pedro.

²² Īḡu eroparĩcũ Jesu werepũ erãre:

—Goãmũre umupeoturaque mũa.

²³ Diaye arĩgu tiiaa mũare. Mũa Goãmũre õaro umupeori mera irigu Ʃtãḡure “Dua aĩ wũariyague cóãdigũ árĩporo,” mũa Goãmũre arĩcũ, mũa arĩdiro dopa ta waroca. “Yũ serẽro dopa diaye ta eropa iigũcumi,” mũa arĩ guñacũ, “Goãmũ iisome,” arĩbiricũ, mũa serẽdiro dopa ta Goãmũ iigũcumi.

²⁴ Eropigu irire wereḡura mũare. Goãmũ mera wereniguirã, ĩḡure serẽrã, “Yũ serẽro dopa ta eropa waroca yũre,” arĩ guñaque. Mũa eropiicũ ãagu Goãmũ mũa serẽrire ogũcumi.

25 Eropirã Goãmure mua serëboro core gajirãre erã mware erã ñero iirare cãdijique. Gajirã erã ñero iicũ mua guarare duhuque. Mua eropiicũ ñagu mari Pagu umaro majagu mua ñero iirare ñgu sã cãdijigucumi.

26 Mware ñero iirare mua cãdijibiricũ ñgu sã mua ñero iirare cãdijisome, arĩpu Jesu erãre.

Jesure doredigure ñgure serëpiñuma pahia oparã, judio masare buherã, murã mera

Mt 21.23-27; Lc 20.1-8

27 Ñgu eropa arĩra puhru erã Jerusalengue wañorã daja. Eropirã Jesu Goãmũ wihigue ñgu curicũ ñarã, pahia oparã, judio masare buherã, murã mera ñgu pohrogue erarã ñgure serëpiñorã:

28 —¿Noa doreri mera irinore iigu iiri mhu? ¿Noa mure Goãmũ wihi duanirãre cóadoreari? arĩ serëpiñorã erã Jesure.

29 Erã eroparĩcũ Jesu yuhripu:

—Murure serëpimuhtagura. Ōaro mua yuhricũ yu sã mware yuhrigura.

30 ¿Ñu masare ñgu waĩyecũ noano ñgure waĩyedoremuriyuri mua pepicũ? ¿O Goãmũ doreyuri? ¿O masapu doremuriyuri mua pepicũ? Yure wereque, arĩpu Jesu erãre.

31 Ñgu eroparĩcũ peerã erãpu erã basi game ōpa arĩ wereniguiñorã:

—¿Dohpa arĩ yuhrirãcuri mari? “Goãmũ Ñure doredigu arĩñumi,” mari arĩcũ, “¿Goãmũ Ñure ñgu dorequerecũ ta duhpirã ñgu wererare peebirari muru?” arĩbocumi Jesu marire.

32 Oã masapu “Diaye ta Ñu Goãmũ yare weremuhadigu arĩmi,” arĩ pepima erã. Erã eropa pepirã, “Ñu ñgu waĩyecũ Goãmũ ñgure doredigu arĩbiriñumi,” mari arĩcũ, masapu mari mera guarãcoma, arĩñorã erã basi.

33 Eropirã erã Jesure ōpa arĩ yuhriñorã:

—Ñure waĩyedoredigure gua masibea, arĩñorã erã Jesure.

Erã eroparĩcũ ōpa arĩpu Jesu.

—Irisubu tamerare yu sã mua serëpirare werebea mware. Yu iirire iidoredigure werebea mware, arĩpu Jesu erãre.

12

Ñerã mohme corerã iira queorire wereñumi Jesu buhebu
Mt 21.33-46; Lc 20.9-19

1 Eropi Jesu queori mera buhenugapũ daja erãre.

—Yeba opũ árĩñumi. Iri yebare ìgũ ya iguidarire oteñumi. Otetuha sãiroro nugu, iguire erã cãhra bujuburi gobere seañumi. Pohe decogue umari wihigã sãre iĩñumi ìhadibuma ðaro. Eropigũ gajirãre ìgũ ya pohe deco mera apiñumi erã mohme corera waja. Eropigũ iri pohere erãre mohme coredoretuhaja gaji yebague waha wañumi ìgũ.

2 Pũhrũ igui ñirisubu árĩcũ pohe opũ ìgũ pohro majagure ìgũ ya pohe mohme corerã pohrogue obeoriñumi. Pohe maja ìgũ ya oteri dũcare ìgũ ya sero maja dũcare aĩdoregũ obeoriñumi ìgure.

3 Eropirã pohere mohme corerãpũ ìgũ pohro majagure ñeha pañuma. Eropiituha ìgũ ya igui tõrire obiriquererã dujadoreñuma ìgure.

4 Eropigũ pohe opũ gajigũ ìgũ pohro majagure obeoriñumi daja. Eropirã pohere mohme corerãpũ ìgure ìgũ dipurure cami moa ñero iĩñuma ìgũ sãre.

5 Gajigũ ìgũ pohro majagure obeocũ ìgũpũre wejẽcãñuma. Gajirã sãre bajarãre eropa dihta iĩñuma. Gajirãre pa gajirãre wejẽñuma erã.

6 Eropigũ pohe opũ magũ dihta dũhyañumi. Ìgũ ta ìgũ magũ ìgũ mahigũ árĩñumi. Eropigũ ìgũ magure obeoñumi pare erã pohrogue, “Yũ magũpũre umupeorãcoma,” arĩgũ.

7 Ìgũ ðpa arĩ pepiquerẽcũ, erã pohere corerãpũ ìgũ magũ aricũ ìha, ðpa arĩ wereniguiñuma: “Pohe opũ magũ ãhrimi. Ìgure wejẽcãrã mari. Eropiro i pohe mari ya pohe dujaroca,” arĩ wereniguiñuma erã erã basi.

8 Eropa arĩrã ìgure ñeha wejẽ, pohe tũrogue aĩgã coãcãñuma erã ìgure, arĩpũ Jesu erãre.

Eropa arĩtuhaja Jesu erãre serẽpipũ:

9 —Ne, ¿pohe opũ dujarigũ dohpa iigũcuri ìgũ ya pohere mohme corerãre? arĩpũ Jesu. Òpa iigũcumi erãre, arĩpũ. Ìgũ erãre wejẽ gajirãpũre pohere mohmedoregũcumi, arĩpũ Jesu erãre.

10-11 ¿Goãmũ yare erã gojarapũgue ðpa arĩrire irire buhebiriri mũa? Òpa arĩ gojañuma:

Ìhĩ Cristo utãye iro dopa ãhrimi. Masa Cristore gamebirãcoma. Erã gamebiriquerẽcũ Goãmũ ìgure beye opũ acumi. Goãmũpũ ire iimi. Ìgũ eropa iicũ ìarã

“Òataria,” arĩ pepia mari, arĩ gojañuma iribojegure.

¿Irire ne buhebiriri mũa? arĩpũ Jesu erãre.

12 Ìgũ eroparĩcũ peerã pahia oparã, judio masare buherã, mũrã mera ðpa arĩ pepiñorã: “Jesu i queorire weregũ ‘Erã ñerã mohme corerã iro dopa ãhrima,’ marire arĩ

weresãgũ iicumi,” arĩ pepiñorã. Eropa arĩ pepirã Jesure ñeadiariñorã. Eropa ñeadiaquererã, masapũ Jesure gamerã mari mera guari, arĩrã masare güi árĩñorã. Eropa güirã ïgũre cohãgã wañorã.

Fariseo masa, Herode ya curu majarã mera gobierno maja wajayerire serẽpiñuma Jesure

Mt 22.15-22; Lc 20.20-26

¹³ Waha, erã mera majarãre yujurãyerire fariseo masare, Herode ya curu majarã sãre Jesure serẽpiñadore oboñorã daja. Erã Jesure baja serẽpiri mera ïgũ gajiropa yũhricũ weresãmorã iiriñorã.

¹⁴ Eropirã Jesu pohro eja ïgũre serẽpiñorã:

—Buhegũ, diaye mũ wereniguigũ gũyari marigũ mũ árĩcũ masia gũa. Eropigũ opũ árĩcũ sãre bu árĩgũ ïgũ árĩcũ sãre mũhũ yujuropa ïhaa. Eropigũ Goãmũ yare diaye mũhũ werea. Masa sũacũ sãre erã sũabiricũ sãre queoro werea. Eropigũ gũare wereque: ¿Roma majagũ árĩpehrerã tauro opũ árĩgũre, gobierno majare marire wajayero gahmeri mũ pepicũ? ¿Mari doreripũ wajayedoreri mũ pepicũ? arĩ serẽpiñorã erã Jesure.

¹⁵ Erã eropa arĩ serẽpicũ peegũ erã gũyarire erã ñero iidiarire masigũ õpa arĩ yũhripũ erãre:

—¿Duhpirã yũ ñero wereniguicũ peediarĩ mũa? Dohparagã niyerusere aĩgãrique irisere ïamorã, arĩpũ Jesu erãre.

¹⁶ ïgũ eroparĩcũ peerã yujuse niyerusere aĩgãriñorã. Erã irisere aĩ eracũ ïagũ Jesu serẽpipũ erãre:

—¿Nihino gohra masũ tuhyari isere? ¿Noa waĩ tuhyari isere? arĩ serẽpipũ ïgũ.

—César waĩcũgũ masa tauro opũ masũ ïgũ waĩ sã tuhyaa irisegue, arĩ yũhriñorã erã.

¹⁷ Erã eroparĩcũ Jesu werepũ erãre:

—Irisubũ tamerare masa tauro opũ árĩgũ yare ïgũre oque. Goãmũ yare Goãmũpũre oque, arĩpũ Jesu. ïgũ eroparĩcũ pee ¼ca wañorã.

Saduceo masa Goãmũ ïgũ sĩrinirã masurire serẽpiñuma Jesure

Mt 22.23-33; Lc 20.27-40

¹⁸ Eropi yujurãyeri Saduceo masa Jesu pohroguere erañorã. Saduceo masapũ “Goãmũ sĩrinirãre masusome,” arĩ pepirã árĩñorã.

¹⁹ Eropirã erã õpa arĩñorã Jesure:

—Buhegũ, marire õpa arĩ gojadigũ árĩmi Moise: “Yujugũ ïgũ tĩgũ marapocũgũ porã mariqueregũ ïgũ sĩricũ ïagũ, ïgũ pagũ magũre ïgũ tĩgũ marapo árĩdigore marapocũro

gahmea. Eropigu ĩgu tĩgu mũru ĩgu tĩgu ĩgu porãcubodiro dopa ta porãcuro gahmea ĩgu pagu magure. Eropirã ĩgu tĩgu mũru porã iro dopa árĩrãcoma,” arĩdi árĩmi Moise, arĩñorã.

²⁰ Ire erã arĩtuhaja i queorire werenemoñorã Jesure.

—Yujugu porã siete árĩñorã. Eropii erã tĩgupu marapocu, porã marigu ta sĩaria wapu.

²¹ Eropigu gajigu ĩgu pagu magu sã ĩgu tĩgu mũru marapo árĩdigore marapocupu. ĩgu eropa marapocura pũru ĩgu sã ĩgu tĩgu mũru iro dopa ta porã mariqueregu ta sĩaria wapu. Eropigu ĩgu pagu magu ĩgu ĩgu mũru iro dopa porã mariqueregu ta sĩaria wapu.

²² Eropa dihta wañorã yujugu porã. Ne porã mariquererã sĩripehrea wañorã. Erã marapo sã erã pũru sĩaria wapo pare, erã arĩtuhaja Jesure serẽpiñañorã.

²³ ¿Ne, Goãmu árĩpehlerã sĩrinirãre ĩgu masucũ nihino marapo gohra árĩgocuri igo? Erã árĩpehlerã igore marapocunirã árĩñorã. ¿Eropigo nihino marapocu árĩgocuri igo? arĩ serẽpiñorã erã Jesure.

²⁴ Jesu yũhripu erãre:

—Goãmu yare erã gojarapũ wereniguirire ne masibea mũa. Eropirã Goãmu ĩgu turari sãre ne masibea mũa, arĩpu Jesu. Eropiro mũa pepiripu diaye árĩbeaa.

²⁵ Sĩrinirã mũa erã masa mũriara pũru erã anyua iro dopa aħrima. Erã uma nome mera marapocubeama erogũere.

²⁶ Sĩrinirã erã masa mũriaboropũre mũare weregũra, arĩpu Jesu. Irire Moise õaro werepehocãñumi. Iri yucugũgũgue ũjũrisubu árĩgu Goãmu õpa wereñumi Moise: “Yũhu Abrahã, Isaa, Jacobo, erã opu aħraa,” arĩ wereñumi Goãmu iribojegue.

²⁷ Erã sĩrira pũrugue “Erã opu ta aħraa,” arĩ wereñumi Goãmu. Eropirã erã sĩrinirã mũa ĩgu masunirã árĩrã erã ojocarirã aħrima. Eropirã “Sĩrinirã masasome,” arĩ pepirã diaye pepibea mũa, arĩpu Jesu erãre.

Õatariariñere doreriñere wereñumi Jesu

Mt 22.34-40

²⁸ Eropigu yujugu judio masa erã buherã mera majagu erã pohrogue eraa, erã game wereniguicũ peepu. Jesu ĩgu õaro yũhrire peegu serẽpipu ĩgure.

—¿Goãmu ya doreri õatariaro doreripu diñe doreripu aħriri mu pepicũre? arĩ serẽpipu ĩgu Jesure.

²⁹ Jesu ĩgure yũhripu:

—Iñe doreriñe õatariariñe õpa aħraa. “Israe masa peeque. Goãmu mari Opu yujugu ta aħrimi.

30 Buriḡã mũa sīporã mera, mũa turari mera, mũa ðaro guñari mera Goãmũre mũa Opũre mahique,” arĩmi Goãmũ.

31 Iñe doreriñe pũhrũ gajĩ doreriñe sã ðataria. “Mũ basi mahiro dopa ta mũ pohro árĩrã sãre mahique,” arĩmi Goãmũ. Iri pe doreri ta árĩpehreri gajĩ doreri tauro ãhraa, arĩ werepũ Jesu ĩḡure.

32 ĩḡũ eroparĩcũ judio masare buheḡũ ðpa arĩ yũhripũ:

—Eropa ta ãhraa, buheḡũ. Diaye ta arãa mũhũ. Goãmũ yujugũ ta ãhrimi. Gajigũ ĩḡũ iro dopa árĩḡũ marimi. Mũ arĩri diaye ta ãhraa. Goãmũre turaro mari sīporã mera, mari turari mera, mari pepiri mera, mari ðaro guñari mera ĩḡure mahiro gahmea. Mari pohro árĩrãre mari basi mari mahiro dopa ta, erã sãre mahiro gahmea marire.

33 Mari Goãmũre umupeomorã waimũrã wejẽ soemujucũ ðapũrica. I tauro Goãmũre masa sãre mari mahicũ ðataria, arĩpũ ĩḡũ Jesure.

34 ĩḡũ pee masiri mera yũhricũ ĩha Jesu ĩḡure arĩpũ:

—Merogã duhyaa mũre Goãmũ mũ opũre mũ masiboro, arĩpũ Jesu ĩḡure.

ĩḡure eroparĩcũ gajirã peerã ĩḡure güirã serẽpinemo-diabiriñorã pare.

¿Noano acawereḡũ ãhriri Cristo? serẽpi ĩañumi Jesu masare

Mt 22.41-46; Lc 20.41-44

35 Eropigũ Goãmũ wihigue buheḡũ ðpa arĩpũ Jesu:

—“Cristo Davi mũrũ pãrami arigũcumĩ,” arĩ buhema marire buherã. ¿Duhpirã eropa arĩ buheri erã? Erã ðaro masiboro duhyania erãre dohpa.

36 Davi ĩḡũ basi Espĩritu Santo ĩḡure dorero dopa ta ðpa arĩ wereñumi:

Goãmũ yũ opũre ðpa arãmi. “Ohõ yũ diayerũ yũ mera dorebu doaque. Eropigũ mũre ĩhaturĩrãre mũre tarinũgabasagũca yũhũ,” arĩmi Goãmũ yũ opũre, arĩ gojañumi Davi mũrũ.

37 Eropa arĩ gojagũ Davi mũrũ opũcũpũ Cristore “Yũ opũ,” arĩḡũ. Cristo Davi mũrũ opũ ãhrimi. Eropigũ Davi mũrũ Cristo ñecũ árĩquereḡũ opũcũñumi Cristore, arĩ werepũ Jesu.

ĩḡũ eropa arĩ buhecũ bajarã masa mucubiriri mera peeñorã ĩḡure.

Jesu masare buherã erã ñero iirire wereñumi

Mt 23.1-36; Lc 11.37-54; 20.45-47

38 Eropigũ ĩḡũ buhenemogũ ðpa arĩpũ:

—Masare buherã erã ñero iirire ðaro ĩaque. Eropirã erã iiro dopa iibircãque. Erã yoari suhri saña erã masa erã

ĩhabeoro cuhrima. Doberi duarogue gajirã umupeori mera erãre bocatĩri serẽcũ gahmema erã.

³⁹ Eropirã mari buheri wiriguere õari doari dihtare doadiama. Eropirã bosenãri árĩcũ sãre oparã erã doari dihtare gahmema erã.

⁴⁰ Eropirã erã wapeweyarã nome erã wajamocũ ĩha erã ya wirire emacãma erã nomere. Eropa erãre mojomoro ĩabiriquererã erã masa ĩhurore yoari boje Goãmure serẽma, “Gua Goãmure õaro umupeoa,” arĩ gũyarã. Erã eropa iira dipuwaja gajirã tauro dipuwaja moagũcumi erãre, arĩpũ Jesu erãre.

Wapeweyo Goãmure igo apirare wereñumi Jesu

Lc 21.1-4

⁴¹ Eropigũ Jesu Goãmũ wihi maja erã amuburi niyeru gameneori comoro pohro doapũ. Ero masa erã niyeru sãcũ ĩapũ. Doberi oparã iri comorogue niyeru pagari sãa tari wahgãmuriñorã.

⁴² Eropigo wapeweyo bũro iri comorogue ahri pesegã sãpo. Pese yuju centavo maja ãhraa.

⁴³ Iriserire igo apicũ ĩagũ Jesu ĩgũ buherãre sihubeo arĩpũ:

—Diaye arĩgũ iiaa mũare. Igo wapeweyo mojomorocũgo niyeru sãri comorogue igo yare sãgo gajirã árĩpehrerã erã sãdiro tauro sãmo igo.

⁴⁴ Gajirã doberi oparã erã wũaro oquerecũ ta erã ya wũaro dũhyaa. Igo pũ mojomorocũgo árĩquerego ta, árĩpehreri igo bari asũborare Goãmũ ya árĩburire opehocãmo, arĩpũ Jesu.

13

—Goãmũ wihi cóãsũroca, arĩ yuñumi Jesu

Mt 24.1-2; Lc 21.5-6

¹ Eropigũ Goãmũ wihiguere erã wiriacũ ĩagũ yujugũ erã buherã mera majagũ õpa arĩpũ:

—Buhegũ, ĩaque. I wihi Goãmũ wihi maja wiri utã mera erã iira wiri õari wiri ãhraa, arĩpũ ĩgũ.

² ĩgũ eroparĩcũ Jesu werepũ erãre:

—I wihi maja wiri dohpaguere ĩaraa mũa. I wihi árĩpehreri mari ĩara i utã sã cohmopehrea waroca. Ne yujuye utãye dujasome iri wiri maja, arĩpũ Jesu.

I mũa pehrebore wereñumi

Mt 24.3-28; Lc 21.7-24; 17.22-24

³ Eropi Jesu Olivo waĩcudigu utāgugue Goāmũ wihi diaye maja árĩdigugue ejaꝛũ. Ero doapũ. Ero Pedro, Santiago, Ñũ, Andre mera erã seyaro árĩrã, erã ĩgũre serẽpiñorã:

⁴ —Wereque gũare. ¿Dohpárĩcũ eropa warocuri mũ arĩdiro dopa waro? ¿Pehreburinũ coregãre dohpa wanugacũ ĩarãcuri gũa? arĩ serẽpiñorã erã Jesure.

⁵ Jesu yũhripũ:

—Ōaro ii yuque mũa. Eropirã gajirã erã gũyarire peebiricãque mũa.

⁶ Bajarã masa “Cristo ãhraa yũhũ,” arĩ gũyarã árĩrãcoma. Erã eropa gũyacũ peerã masa bajarã Goāmũ yare duhurãcoma.

⁷ Mũa pohrogã gajirã masa erã gamewejẽcũ peerãca. Eropirã yoarogue majarã erã sã erã gamewejẽcũ peebeorãca mũa. Eropa peequererã ta ne irire wũaro bujawere pepibiricãque. Eropa wamũhtaroca. Eropa wacũ pehreburinũ duhyaniroca dohpa.

⁸ Irisubure yuju yeba majarã gaji yeba majarã mera gamewejẽrãcoma. Eropirã yujugu opu yarã gajigu opu yarã mera gamewejẽrãcoma. Eropiro bajasuburi i yeba ñohmeroca. Eropirã bajarã masa oa mera sĩrirãcoma. Eropa ñero tariquerecũ i yeba majarãre tauro erã ñero tariboro duhyaa dohpa. Ñero tarinirãcoma dohpa.

⁹ Ōpa wacũ ĩarã mũa basi ōaro iique. Gajirã mũare ñeha ñero iidorerã orãcoma gajirã oparãre. Eropirã mũa acawererã judio masa erã buheri wirigue sãre mũare parãcoma. Eropirã macari majarã oparã pohrogue, erã tauro oparã pohrogue sãre aĩgãrãcoma mũare mũare dipuwaja moamorã. Eropirã erã mũare erã pohrogue aĩgãcũ yaha buherire wererãca mũa erã sãre.

¹⁰ Eropiro pehrerinũ árĩboro core árĩpehrerãre ōari buherire weresũroca.

¹¹ Eropirã mũare dipuwaja moadorerã erã oparã pohrogue erã aĩgãcũ, erã oparãre mũa wereniguiburire wũaro pepibiricãque. Mũare erã serẽpicũ mũa yũhriburire Goāmũ mera masirãca. Eropa masirã mũa gamero wereniguisme mũa. Espĩritu Santopũ mũare wereniguicũ ĩigũcumi.

¹² Irisubure erã tĩrã erã pagũ porãre Jesu yarã erã árĩcũ ĩha erãre wejẽdorerã oparãre wiarãcoma. Gajigupũ ĩgũ tĩgũre wejẽdoregũ oparãre wiagũcumi. Eropi erã pagũ sũmarã erã porã Jesu yarã erã árĩcũ ĩha erãre wejẽdoregũ oparãre wiarãcoma. Eropirã erã porãpũ erã pagũ sũmarãre erã Jesu yarã árĩcũ ĩha wejẽdorerã wiarãcoma erã oparãre.

13 Yure mña umupeora dipuwaja mñare masa árĩpehrerã ñhaturirãcoma. Eropã mñare erã ñero iiquerecũ ta, mñare erã ñero iirare yujuro bojerã, yure duhubiricũ Goãmũ mñare taugũcumĩ. Eropigũ ñũ pohrogue mñare opagũcumĩ.

14 “Eropirã ñetariagure Goãmũ yare goroweogure ñarãca mña. Goãmũ wihigue ñũ niguicũ ñarãca. Ero ñũgure árĩbiricãro gahmea. Iribojegue Goãmũ yare weremũhtayugũ Daniel ñũgure were gojañumi. (Irire buhegu peeporo). Ero ñũ niguicũ ñarã Judea yebague árĩrãpũ utã yucũgue oma duhrigã wapororo.

15 Irisubure masa ñero tarirãcoma. Eropirã yojaro mera wapororo. Irisubure erã wiri weca maja pũrigue árĩrã wihi pohcaguere erã yare aĩrã wabiricãpororo.

16 Eropirã irisubure gajirã erã poerigue árĩrã erã ya suhrire wihigue árĩri suhrire aĩrã dujabiricãpororo.

17 Irisubure nijiposã nome, erã porã mihrirãre oparã nome sã mojomorocũrã nome dujarãcoma.

18 Eropirã õpa serẽque Goãmũre: “Puhiró árĩcũ eropa wabiricãpororo,” arĩ serẽque ñũgure.

19 Irinũrire masa ñero tarirãcoma. I yebare ñũ ñhacũnugura pũhrũ masa erã ñero tariri árĩmũriyoro. Iri eropa árĩquerecũ ta árĩpehreri pũriri erã ñero taridiro tauro masa ñetariaro tarirãcoma pehrerinũ coregãre. Eropã ñero erã tarira pũhrũ dipaturĩ eropa ñero tarisome i yeba pare.

20 Eropigũ Goãmũ i ñero taririnũrire bajamenũrigã árĩcũ iigũcumĩ. ñũ eropiibiricũ ne yujugũ masũ taribiribocumĩ. Eropigũ ñũ beyenirã erã tariborore bajamenũrigã ñero taririre apigũcumĩ Goãmũ.

21 Irisubure gajirãre pee masi ñaque. “Õho ãhrimi Cristo,” erã arĩcũ erãre peebiricãque. “Ero ãhrimi Cristo,” erã arĩcũ sãre peebiricãque.

22 “Cristo ãhraa,” arĩ gũyarã, “Goãmũ yare weremũhtarã ãhraa,” arĩ gũyarã árĩcãrãcoma irisubure. Eropirã Goãmũ ñũ beyenirãre gũyarã erã deyoro moarire ii ñhmurãcoma. Goãmũ yare erã cóãcũ iidiarã iirãcoma erã gũyari masa.

23 Ire árĩpehrerire wereyumũhtaa mñare iri eropa waboro core. Eropirã õaro pee masi yuque mña, arĩpũ Jesu ñũ buherãre.

Jesu i yebaguere ñũ dujariborore wereñumi

Mt 24.29-35, 42-44; Lc 21.25-36

24 Eropã arĩtuhagũ õpa arĩ werepũ Jesu erãre:

—Irinũri erã ñero tarira pũhrũ, abe mũmũ majagũ, ñami majagũ sã boyo duhurãcoma.

25 Erã eropa wacã, necã dipuru yuhridijariroca. Eropiro umaro maja sã yeba sã burigã ñohmeroca.

26 Irisubu ta yuhũ masũ Goãmũ ãgũ obeodigũ arigũca. Eropiro umarogue yũ turari mera yũ gosesiriri mera umaro maja imica weca i yebaguere yuhũ dujaricũ ãarãcoma masa.

27 Eropigũ yaharã anyuare árĩpehrero i yebaguere obeogura. Eropirã árĩpehrerogue waha yaharãre yũ beyenirãre gameneorãcoma yũ pohrogue.

28 “Higueragu irigũ waricũrre ãarã masia mũa. Irigũ yucũgũ pũricũcũ ãarã, “Bojori merogã dũhyaa,” arĩ masia mũa.

29 Eropa ta irigũ waro dopa ta masique mũa. I árĩpehreri yũ arĩra iri eropa wacã ãarã, “Cristo dujariboro merogã dũhyaa,” arĩ masique mũa.

30 Diaye ta arĩgũ ãiaa mũare. Irisubu majarã erã sĩriboro core árĩpehreri yũ arĩdiro dopa waroca.

31 Umaro i yeba sã pehrea waroca. Yũ wereniguiripũ ne pehresome. Árĩpehreri yũ arĩdiro dopa ta eropa waha ojogrocuroca.

32 “Irinũre yũ dujariburinũre, iri hora sãre ne masibea yuhũ. Anyua sã irire ne masibeama. Masa sã ne masibeama. Yũ Pagũ dihta yũ dujariburinũre masimi.

33 “Mũa sã irinũre masibea. Eropirã õaro guñatura coreque. Goãmũre serẽque.

34 Õpa coreque mũa. I queoriñe mera irire mũare buhegura. Wihi opũpũ yoarogue ãgũ curiro dopa ta ãhraa i. ãgũ ãgũ waboro coregã ãgũ pohro majarãre ãgũ wihire coredoremi. Yujurãyerire ãgũ mohmerire apimi. Yujugũre wihi disiporo ãhadibudoregũre õaro coredoremi ãgũ dujariborore.

35 Eropigũ wahãmi. ãgũ pohro majarãpũ ãgũ dujariburinũre ne masibeama. ãgũ ñamica o ñami deco, cãreña ãgũ wererisubu o boyoro ãgũ aribocumi. Erã õaro ãhacorebiricũ ãgũ guñaña mariro arigũ erãre carĩrãre bococumi. Wihi opũre erã ãgũ dujariburinũre erã masibiro dopa ta mũa sã yũ dujariburinũre masibea. Eropirã yũre õaro guña coreque.

36 Guñaña mariro yũ eraborore masirã, õaro guña coreque. Yũ dorerire yahare eropa iiniguirã árĩque. Eropirã yũre õaro coreque.

37 Eropigũ mũare yũ arĩro dopa ta árĩpehrerãre eropa arãa. Õaro guña coreque, arĩpũ Jesu ãgũ buherãre.

14

Pahia oparã, Judio masare buherã mera Jesure wejẽdiañuma

Mt 26.1-5; Lc 22.1-2; Jn 11.45-53

¹ Eropi irisubure Pascua bosenu core, bugabiriri pan erã baburinũ core penũ duhyayoro. Irisubure pahia oparã judio masare buherã mera, Jesure guyari mera erã ñeha erã wejẽburire game wereniguiñorã.

² —Bosenu árĩcũ ñgure ñehabiricãrã. Masa gua ñgure ñeacũ ñarã gua gamenerenijarã gamequeãbocoma, arĩrã iñorã erã erã basi.

Nomeo poresuri mera Jesure pipeoñumo

Mt 26.6-13; Jn 12.1-8

³ Eropi Jesu sã Betaniague Simo cami boadi ya wihigue árĩñorã. Iri wihi erã baro watope, yujugo nomeopũ alabastro mera iidirure poresuri nardo waĩcũri dicũdirure aĩrapo. Igo aĩrara wjacũri árĩyoro. Eropigo igo irirure pãgũ Jesu dipuru weca pipeopo.

⁴ Igo eropiicũ ñarã gajirã ùrugã gua wañorã.

—¿Duhpigo igo eropa iisirimaacãri?

⁵ Iri poresurire duaboañumo. Irire duago yuju bojori mohmeri waja wajataboañumo. Eropigo iri niyerure mojomorocũrãre oboañumo igo, arĩñorã erã erã basi. Eropirã igore turiñorã.

⁶ Erã eroparĩcũ peegu Jesu erãre werepũ:

—¿Duhpirã eropa arĩri igore? Garibobiricãque igore. Igo yũre ñaro iimo.

⁷ Mojomorocũrã mũa mera eropa árĩniguicãrãcoma. Eropirã mũa gamero erãre omasia. Yũpũ i yebare mũa mera eropa árĩniguicãsome.

⁸ Igo masiropẽ yũre iiamo. Yũre erã yaaboro core yũ dũpũre amuyugo poresuri mera sũhumo yũre.

⁹ Eropigu diaye mũare arĩgu iiaa. Árĩpehrero i yebaguere, ñari buherire erã wereroguere igo õpa iirare wererãcoma. Erã eropa arĩ werecũ peerã masa bajarã igo iirare guñarãcoma.

Juda Iscariote Jesure ñhaturirãre ñgu ñhmuburire erã mera weretamuñumi

Mt 26.14-16; Lc 22.3-6

¹⁰ Irisubure Juda Iscariote doce buherã mera majagu pahia oparã pohro waha õpa arĩpũ:

—Yũhũ mũare weregũra Jesu ñgu árĩrore mũa ñgure ñeacũ, arĩpũ.

¹¹ Eropirã pahia oparã irire peerã mucubiriñorã.

—Mũre niyerure orãra, arĩñorã erã Judare. Eropigu Juda Jesure ìhaturirãre ìgu erãre ìhmuburire corenipũ.

Jesu ìgu buherã mera ìgu baturinũ arĩyoro

Mt 26.17-29; Lc 22.7-23; Jn 13.21-30; 1Co 11.23-26

¹² Bũgabiriri panre erã baburinũ bosenu arĩnũgarinũ arĩyoro. Eropiro ovejare Pascua majagu arĩbure erã wejẽrinũ arĩyoro. Irisubure ìgu buherãpu serẽpiñorã Jesure:

—¿Nohonogue Pascua bosenu mari baburire amudoregu obeori mũhu guare? arĩñorã ìgure.

¹³ Erã eroparĩcũ Jesupu perã ìgu buherã mera majarãre obeopũ.

—Jerusalẽngue waque. Eroque mua ejacũ deco sorobu tuhpeogu mũare bocatĩrigucumi. ìgu bocatĩricũ ìgu mera waque.

¹⁴ Eropa warã ìgu sihu ñajari wihigue ejarã, wihi opure õpa arĩque: “ ‘¿Nohogue yũhu, yũ buherã mera Pascua maja barire bagucuri?’ arãmi gua opu,” arĩque wihi opure.

¹⁵ Mua eroparĩcũ peegu umaro maja taribure mari gameri arĩpehreri mera erã amura taribure ìhmugucumi wihi opu. Eroque mari baburire iique, arĩpu Jesu erãre.

¹⁶ ìgu eroparĩcũ erã perã ìgu buherã iri macague wañorã. Erã erogue erã ejacũ ìgu arĩdiro dopa ta wayoro. Eropirã erã Pascua arĩcũ baburire amuñorã.

¹⁷ Eropi naidijarisubu Jesu doce ìgu buherã mera erã bari taribugue eroguerẽ ejarũ.

¹⁸ Eropirã erã mesague erã ba doarisubu Jesu erãre werepu:

—Diaye arĩgu iiaa mũare. Yujugu mua mera majagu ta yũ mera bagu ta yũre ìhaturirãre ìhmugucumi, arĩ werepu Jesu erãre.

¹⁹ ìgu eropa arĩ werecũ peerã erãpu burigã bujawererã ìgure serẽpinũgañorã erã yujurãyeri.

—¿Yũhu ta arĩbocuri mũre ìhmubu? arĩñorã erã Jesure.

²⁰ —Mua yũ doce buherã mera majagu ta aħrimi ìgu. Yũ baripare yũ mera yoso bagu aħrimi yũre ìhaturirãre ìhmubu.

²¹ Iribojegue erã yũre arĩ gojadiro dopa ta yũhu masu Goãmũ ìgu obeodigu sĩriguca. Eropigu yũre ìhaturirãre ìhmudigupu ñero tarigucumi. ìgure ìgu masa de-hyoabiricũ õapũricãboya. Ñero taribiriboñumi, arĩpu Jesu erãre.

²² Eropigu Jesu erã mera barisubu panre aĩ Goãmure “Õhaa,” arĩ serẽpu. Eropa arĩgu ta irire nuha guerepu erãre õpa arĩgu:

—Ire aĩ baque. I yu dũpũ ãhraa, arĩpũ Jesu erãre.

23 Eropa arĩtuha ĩgu ihriripare aĩ, Goãmure “Õhaa,” arĩ serẽpũ. Erãre ĩgu ocũ árĩpehrerã erã irire ihriñorã.

24 —I yu di ãhraa. Bajarã masa erã ñero iirare cóabu sĩrigũca. Eropigu yu dire cóagũca. Eropa sĩrigũ Goãmũ yu Pagu “Masare ðaro iigura,” ĩgu arĩdiro ii ojogorocũgũca.

25 Diaye arĩgu iiaa mũare. Goãmũ ĩgu opu árĩrogue mama igui decore yu ihriboro core, ðre igui decore dipaturi ihrinemosome yũhũ, arĩpũ Jesu erãre.

Pedro “Jesure masibea,” ĩgu arĩ gũyaburiñere wereñumi Jesu

Mt 26.30-35; Lc 22.31-34; Jn 13.36-38

26 Eropirã yujuñe erã Goãmũ bayariñere bayatuha, utãgu Olivo waĩcũdigũgue wañorã.

27 Erogue sihu ejagu Jesu erãre werepũ:

—Dohpagã ñami mũa árĩpehrerã yure cóarãca. Mũa yure cóãborore ðpa ta arĩ gojamũhtañuma Goãmũ yare erã gojarapũgue: “Ovejare ĩhadibugũre erã wejẽcũ waro dopa ta iigũca. Yu eropa iicũ oveja ĩgu yarã ĩgure cohãgã warãcoma,” arĩmi Goãmũ, arĩ gojañuma.

28 Eropigu Goãmũ ĩgu yure sĩridigũre masura pũhrũ, mũa core Galileague wamũhtagũca yũhũ, arĩpũ Jesu erãre.

29 ĩgu eroparĩcũ peegu Pedro ðpa arĩripũ:

—Yu mera majarã árĩpehrerã erã mũre cóãquerecũ yurũ mũre ne cóãsome, arĩpũ Pedro ĩgure.

30 Jesu yũhrĩpũ:

—Diaye arĩgu iiaa mũre. Dohpagã ñamire cãreña pesubu ĩgu wereboro core, mũ uhresubu “Yũhũ Jesure masibea,” arĩgũca mũhũ, arĩpũ Jesu ĩgure.

31 ĩgu eropa arĩquerecũ Pedro ðpa arĩ turaro busuro yũhrĩpũ:

—Mũa mera yure erã wejẽquerecũ ta ne mũre cóãsome yũhũ, arĩ yũhrĩpũ ĩgu Jesure.

Pedro ĩgu eroparĩcũ peerã ĩgu mera majarã ĩgu arĩro dopa ta arĩriñorã erã sã.

Getsemanigue Jesu Goãmure serẽñumi

Mt 26.36-46; Lc 22.39-46

32 Eropii erã Getsemaní waĩcũri gorogue wañorã. Erogue ejagu ðpa arĩpũ Jesu:

—Ohõ doayunque. Mũa ohõ doaropẽ sohõgue Goãmure serẽniguigu wagu iiaa, arĩpũ ĩgu buherãre.

33 Eropa arĩtuha Pedore, Santiagore, Ñure sihugãpũ. Eropigu ñero gũinũgapũ Jesu. Eropigu ñero sĩporãcũpũ.

34 Eropa ñero pepigu ïgu mera majarãre ïgu sihugãnirãre arĩpu:

—Burigã ñero yu sĩporãcũca. Yũre turaro pũriro dopa pepica yua. Sohõñari wanigu iiaa. Ohõ dujanique. Eropirã yu mera ta tũyũque mua sã, arĩpu Jesu erãre.

35-36 Eropa arĩtuha ïgu ero core mero wanemo, yebague mereja, Goãmũre arĩpu:

—Ahũ, mũhũ árĩpehrerire iimasia. Eropigu yu ñero tariburire iidiabigu iibiricãque. Yu eropa arĩquerecũ ta yu gamero dopa iibita. Mũ basĩ masia. Mũ gamero dopa iique, arĩ serẽpu ïgu Goãmũre.

37 Eropa arĩtuha urredã ïgu buherã pohrogue eranijagu erã carĩ oyarãre ïapu. Ìha Pedrore arĩpu:

—Simo, ¿carĩgu iiri mũhũ? ¿Yuju hora gohra yu mera tũyũtamubirari?

38 Ōaro iique mua. Mũa pepiri mera õarire iidiaraa mua. Mũa seyaro irire iidiaquererã ta irire bocatũbeaa. Eropirã Goãmũre serẽniguicãque ñero mua iibiriboro dopa, arĩpu Jesu Pedrore.

39 Eropa arĩ weretuha dipaturi waha, Goãmũre serẽpu daja. Ìgu ero core ïgu arĩdiro dopa ta arĩ serẽpu daja.

40 Serẽtuha dipaturi erã pohrogue dujaripu daja. Eropa dujarigu carĩ oyarãre ïapu daja. Wũja pũritaricãyoro erãre. Eropirã erã Jesu “¿Duhpirã carĩri mua?” erãre arĩcũ yũhrimasibiriñorã.

41 Eropigu dipaturi ïgu Goãmũre serẽra pũhrũ, erã pohro eraa erãre arĩpu:

—¿Mua carĩrã soorã iiri dohpa? Iripẽta ãhraa. Si-hajagãriro iiaa. Dohparagã yũre masure Goãmũ ïgu obeodigure ñerãre erã oburisubu sihajaa.

42 Wahgãque. Ina warã. Ìaque. Yũre ïhaturirãre ïhmubu ohõ ahrimi, arĩpu Jesu erãre.

Jesure ïhaturirã peresu ñeañuma

Mt 26.47-56; Lc 22.47-53; Jn 18.2-11

43 Ìgu eropa arĩ wereniguirisubu Juda doce buherã mera majagu erapu. Eropirã masa bajarã ñoserimijirire, yucure opanirã ïgu mera yujuro mera erañorã. Erã pahia oparã, judio masare buherã, mũrã sã erã obeonirã árĩñorã.

44 Negohrare Jesure ïhaturirãre obu, õpa arĩtuharũ:

—Yu ïgu wayuporãre mimigu ïgu ta árĩgũcumĩ mua ñeabu. Ìgure yu mimira pũhrũ ñeaque. Eropirã ïgure õaro ñeaque ïgu duhribiriboro dopa, arĩ wereserepu Judapu erãre.

45 Eropigu Jesu pohrogue eragu mata wa purumujupu:

—Buhegu, ¿ãhriri mũhũ? arĩ ïgure wayuporãre mimipu.

46 Īḡu eropiicũ ĩarã erã Jesure ñeañorã.

47 Erã eropiicũ ĩagũ ĩḡu pohrogue niguinirã mera majagu ĩḡu matamijire tuãwea aĩ, pahia opu pohro majagure ĩḡu gamirore tabe corocãpũ.

48 Eropigu Jesu õpa arĩpũ:

—¿Mũa ñoserimijiri mera, yucu ðucari mera arirã, yajari masure iro dopa mũa yũre ñearã arirã iiari?

49 Æmuri nũcu Goãmũ wihigue yũhũ mũare buhedoacũ, mũa yũre ne ñeabiribũ. Dohpaguere mũa yũre eropa iirã i árĩpehreri Goãmũ yare weremuhtanirã erã arĩ gojadiro dopa ta mũa yũre iiaa, arĩpũ Jesu erãre.

50 Eropirã Jesu buherã árĩpehrerã ĩḡure cohã omagã wañorã.

51 Eropigu yujugu mamũ Jesu pũhrũ nũrusiaripũ. Omasiarĩne dihta omadigu árĩpũ.

52 Īḡu sãre erã ñeadiacũ ĩḡu ya omasiarĩnere cóacã suhri marigu oma duhrigã warũ.

Judio masa oparã Jesure serẽpiñuma

Mt 26.57-68; Lc 22.54-55, 63-71; Jn 18.12-14, 19-24

53 Eropii pahia opu pohrogue Jesure aĩ ejañorã. Iri wihiguere árĩpehrerã pahia oparã, mũrã, judio masare buherã sã gamenereñorã.

54 Eropigu Pedropũ Jesu pũhrũ yoarogue ĩha nũrusiarũ. Eropa nũrusiagu ĩḡu pahia opu Caifa waĩcũgu ya wihire cãhmotara sãriro eja, iri sãriro pohecague ñajaa warũ. Eropigu ĩḡu iri wihire corerã surara mera peame tũro sõhma doapũ.

55 Eropirã pahia oparã, gajirã oparã mera gamenererã Jesure wejẽdoremorã, ḡuyari mera erã ĩḡure dipuwaja moaborore ḡuñamaariñorã. Erã eropa weresãburire ḡuñã bocabiriñorã.

56 Masa bajarã ĩḡure erã gamero weresãmaacãquererã erã weresãri diaye árĩbiriyo. Gajigu gajiropa arĩ, gajigu sã gajiropa dihta arĩñorã.

57 Eropirã gajirã erogue eja, Jesure weresãñorã:

58 —Ihĩ õpa arĩmi: “Yũhũ i wihire masa iira wihire, Goãmũ wihire cóãḡura. Eropa cóãḡũ uhrenũ pũhrũ iri wihire dipaturi iigũra. Iri wihĩ masa erã iira wihĩ árĩsome,” ĩḡu arĩcũ ḡua peebũ, arĩ weresãñorã.

59 Erã eropa arĩ weresãquerecũ ta iri diaye árĩbiriyo. Gajigu gajiropa arĩ gajigu sã gajiropa arĩpũ.

60 Erã eropa arĩra pũhrũ pahia opu erã watope wahḡãnũgaja Jesure serẽpipũ:

—¿Oã mure weresãquerecũ ta erãre yuhri gamebeari mũhũ? ¿Mure erã weresãrire duhpigu erãre yuhri gamebeari mũhũ? arĩpũ ïgu Jesure.

61 Ìgu eroparĩcũ peequeregu ta Jesu eropa pepicãpũ. Ìgu eropa yuhribiricũ ïagu pahia opũ ïgure dipaturi serẽpipũ daja:

—¿Cristo ta ãhriri mũhũ? ¿Õagu Goãmũ magũ ta ãhriri mũhũ? arĩ serẽpipũ daja ïgu Jesure.

62 Ìgu eropa arĩcũgue ta Jesu yuhripũ:

—Ìgu ta ãhraa. Eropirã yuhũ masũ Goãmũ ïgu obeodigu yũ Pagũ turagu pohro, ïgu diayerũ yũ doacũ ïarãca mũa. Eropirã umaro maja imica watope yũ aricũ sãre ïarãca mũa, arĩpũ Jesu ïgure.

63 Ìgu eroparĩcũ ta pahia opũpũ ïgu sañarañe suhrirore ïgu basi yeguecãpũ gajirãre “Guataricãmi,” arĩdoregu.

—Ìre weresãrãre gajirãre mari gamebeaa pare.

64 Ìgu basi Goãmure ïgu ñero wereniguicũ peea mari. Eropirã ïgu ñero iira dipuwajare masituhãa mari. ¿Eropirã dohpa iirãcuri mari ïre dohpaguere? arĩpũ pahia opũ gajirã oparãre.

—Ìgu ñeri dipuwaja wejẽcãro gahmea, arĩ yuhriñorã erã arĩpehrerã oparã.

65 Eropirã erã mera majarã Jesure disico ehosũ ïgu cuirire diricãhmotacã, ïgure pañorã. Patuha õpa arĩñorã ïgure:

—¿Noa mure pari? Ìabiriqueregu guare wereque, arĩ wereyañorã erã.

Eropirã opũ yarã surara Jesure pañorã.

—*Ìgure masibea, arĩpũ Pedro Jesure*

Mt 26.69-75; Lc 22.56-62; Jn 18.15-18, 25-29

66 Eropigu Pedro iri wihi maja sãriro pohecague ïgu árĩcũ pahia opũ pohro majago erapo.

67 Igo Pedro ïgu sõhmacũ ïago ïgu dihtare ïhaniguipo.

—Nazare majagu mera Jesu mera mũ sã ãhrabũ, arĩpo igo Pedrore.

68 Igo eroparĩcũ peegu Pedropũ õpa arĩpũ:

—¿Dohpa arĩmaacãgo iiri mũhũ? Mũ arĩgure ne masibea yuhũ, arĩpũ Pedro igore.

Igo eropa arĩra pũhrũ Pedro iri pũũ maja sãriro disiporo pohrogue warũ. Eropigu ïgu ero niguicũ cãreña werepũ.

69 Ero ïgu árĩcũ ïago dipaturi werepo daja ero arĩrãre.

—Ìhĩ Jesu buherã mera majagu ãhrimi, arĩpo igo.

70 Igo eroparĩcũ peegu Pedro dipaturi arĩpũ daja.

—Ìgure masibea yuhũ, arĩpũ daja.

Eropii merogã pãhrũ ta ero niguirã Pedrore õpa arĩnorã daja:

—Diaye ta ãhraa. Mũhu Galilea majagu ãhraa. Eropigu ïgu mera majagu ta ãhraa mũhu, arĩnorã erã ïgure.

⁷¹ Erã eroparĩcũ peegu ïgu erãre yãhrĩpũ:

—Diaye ta Goãmu mera arĩgu iiaa mũare. Yũhu diaye arĩbiricũ Goãmu yũre dipuwaja moaporo. ïgure mua arĩgure ne masibea yũhu, arĩ yãhrĩpũ ïgu erãre.

⁷² ïgu eroparĩcũ ta cãreña wereru daja. ïgu wereru peegu Jesu ïgu arĩrare guãpũ. “Cãreña pesubu ïgu wereboro core mũhu yũre uãresubu ‘Jesure masibea,’ arĩgũca mũhu,” Jesu ïgu eropa arĩrare guãpũ Pedro. Eropa guãgu turaro orepu.

15

Pilato Jesure serẽpiñumi

Mt 27.1-2, 11-14; Lc 23.1-5; Jn 18.28-38

¹ Eropirã boyorogue mũrã, pahia oparã, judio masare buherã, arĩpehrerã gajirã oparã mera gamenere wereta-muñorã erã Jesure iiburire masimorã. Erã basi werenĩgui-tuha, Jesure dihri aĩgã Pilato waĩcũgure opũre oñorã ïgure.

² Erã aĩ ejaçũ ïagu Pilato ïgure serẽpipũ:

—¿Diaye ta judio masa opũ ãhriri mũhu? arĩ serẽpipũ ïgu Jesure.

—Mũ arĩro dopa ta ïgu ta ãhraa, arĩ yãhrĩpũ ïgure Jesu.

³ Eropirã pahia oparã baja weresãñorã ïgure.

⁴ Erã eropa arĩ weresãcũ peegu dipaturi serẽpipũ daja ïgure.

—Oã mũre baja weresãrã iima. ¿Erã eropa arĩ weresãquerecũ yãhrĩbeari mũhu? arĩpũ ïgu.

⁵ ïgu eroparĩcũ Jesu yãhrĩbiripũ. Eropigu Pilato ïhamaria wapũ.

Jesure wejẽdoreñuma

Mt 27.15-31; Lc 23.13-25; Jn 18.38-19.16

⁶ Bojori nũcu Pascua bosenu arĩcũ peresu arĩdigure yujugure masa “ïgure wiuque,” erã arĩgure Pilato eropa wiubasamũripũ.

⁷ Irisubure Barrabá waĩcũgu peresugue arĩpũ. ïgu oparãre cóadiarã mera majagu masare wejẽrã mera majagu arĩpũ.

⁸ Eropirã masa bajarã Pilato pohrogue eja, ïgure serẽñorã:

—Bojori nũcu mũ iidiro dopa ta iique daja guare. Yujugu peresugue arĩgure guare wiubasaque daja, arĩñorã erã.

9 Erã eroparĩcũ Pilato erãre serẽpiñapũ:

—¿Mũa yagũ opũre judio masa opũre wiucuri? arĩ serẽpipũ Pilato erãre Jesure wiudianijagũ.

10 Jesure masa erã mahicũ ãarã pahia oparã Jesure ãhaturirã árĩñorã. Eropa ãhaturirã ãgũre wejẽdorerã oñorã Pilatore. Erã ãhaturirire masigũ Pilato Jesure wiudiaripũ.

11 ãgũ eropa wiudiaquerecũ ta pahia oparã Jesu mera masare guacũ iĩñorã. Õpa arĩdoreñorã erãre: “Barrabãre wiuque. Jesure wejẽdoreque,” Pilatore arĩdoreñorã masare.

12 Eropigũ Pilatore Barrabãre erã wiudorera pũhrũ Pilato erãre serẽpipũ daja:

—¿Ihĩ “judio masa opũ” mũa arĩgũpũre duhpigũcuri yũhũ? arĩ serẽpipũ ãgũ.

13 —Crusague pabia wejẽque ãgũre, arĩ gaguiniguiñorã masa.

14 —¿Ñehenore ñerire iiari ihĩ mũa eropa arĩ gaguiniguiçũ? arĩpũ ãgũ.

ãgũ eroparĩcũ peerã erã gaguiniguiñemoñorã daja.

—Crusague pabia wejẽque ãgũre, arĩñorã daja.

15 Erã eropa arĩ gaguiniguiçũ peegũ Pilato Barrabãre wiudorepũ masare mucubiricũ iidiagũ. Eropigũ Jesure yuradarĩ mera tãradore, crusague pabia wejẽdoregũ wiapũ surarare.

16 Eropi surara ãgũ opũ Pilato wihigue pretorio waĩcũri wihigue Jesure aĩ ejañorã. ãgũre aĩ ejatuha erã gajirã surara erã mera majarãre gameneremorã sihubeoñorã.

17 Eropirã erã opũ ya suhriro dopa bejariñere Jesure sãñorã. Eropa sãtuha pora berore ii ãgũ dipuru duhpeoñorã.

18 Eropiituha õpa arĩ wereyañorã erã ãgũre:

—Umupeorã arique. Judio masa opũ õaro arĩporo, arĩ wereyañorã ãgũre.

19 Eropirã ãgũ dipurure yucũgũ mera padiu, ãgũre disico ehosũ, gũhyadiaro ãaro dopa ta mereja ãgũre ii birañorã.

20 Eropi ãgũre wereya biratuha, erã sãra suhrirore tuwea aĩ, ãgũ ya suhriropũre ãgũre sãñorã daja. Eropirã ãgũre crusague pabia wejẽmorã aĩ wiria wañorã.

Erã Jesure crusague pabia wejẽñuma

Mt 27.32-44; Lc 23.26-43; Jn 19.17-27

21 ãgũre aĩgã, Simo Cirene majagũ pohegue arĩdigũ erã pohro ãgũ eracũ ãarã surarapũ ãgũre Jesu ãgũ coãra crusare coãgãbasadoreñorã. Alejandro, Rufo sã pagũ arĩpũ Simopũ.

22 Waha Gólgota waĩcurogue ejañorã. Gólgota arĩro mari ya mera “dipu pero” arĩro iiaa.

23 Eropirã vinore suĩri deco mera erã morera decore Jesure oriñorã. Iri decore ihribiripũ ĩgu.

24 Eropirã ĩgu suhrire tuwea aĩra pũhrũ crusague Jesure pabiañorã. Erã pabiatuhaja ĩgu suhri mũrare “¿Noa yañe arĩrocuri iñe?” arĩ game deabirañorã.

25 Jesure erã pabiara pũhrũ uñre hora duhyayoro goeri boje ejaboro.

26 Eropirã crusague õpa arĩ gojarapũre pabia duhtuñorã. “Ihĩ judio masa opũ añhrimi,” erã arĩ gojaturapũ arĩyoro. Iri erã gojaturapũ Jesure erã weresãra arĩyoro.

27 Eropirã perã yajari mũrare Jesu pohro gajimijirigue crusarigue erã pabiatuñorã erã sãre. Yujugũ ĩgu diayepũ, gajigũre ĩgu copũ pabiatuñorã.

28 Erã eropiĩcũ iribojegue Goãmũ yare weremũhtanirã gojadiro dopa ta eropa wayoro. Õpa arĩ gojauñuma: “Dorerire tarinugarã mera majagu añhrimi,” arĩ pepima masa ĩgure,” arĩ gojañuma iribojegure.

29 Eropirã crusari pohro tarigãrã Jesure ĩha, erã dipurure yurerã, ĩgure ñero arĩ wereniguiñorã.

—Mũhu ta “Goãmũ wihire cohã, uñrenũ pũhrũ iri wihire amugũra daja,” arĩdigũ arĩribũ mũhu.

30 Mũ basi dijaque. Eropigũ mũ basi tarique. Eropigũ tari weregũca mũhu, arĩ wereyañorã erã.

31 Erã iro dopa ta pahia oparã sã judio masare buherã sã ĩgure eropa wereyañorã. Eropa arĩ wereyarã õpa arĩñorã erã basi:

—Ĩgu gajirãre taudigũ arĩqueregũ ta ĩgu basi tarimasi-beami.

32 “Israe masa opũ añhraa,” arĩrimi ĩgu. Eropirã ĩgu basi dijaricũ ĩarã ĩgure umupeorãca, arĩ wereyañorã.

Yajari mũra sã ĩgu pohro erã pabianirã eropa ta ĩgure ñero arĩ wereyañorã.

Jesu sĩria wañumi

Mt 27.45-56; Lc 23.44-49; Jn 19.28-30

33 Eropi goeri boje arĩcũ uñre hora gohra arĩpehrerogue naitĩa wayoro.

34 Eropigũ irisubure ero naitĩarisubu Jesu turaro gaguiniguiũ:

—Eloi, Eloi, ¿lama sabactani? arĩpũ ĩgu. Ire arĩgu mari ya mera õpa arĩgu iipũ: “Yũ Goãmũ, yũ Goãmũ, ¿duhpigu yũre cohãri mũhu?” arĩgu iipũ ĩgu Pagure.

35 ĩgu eroparĩcũ peenirã yujurãyeri ero niguinirã õpa arĩriñorã:

—Goãmu yare weremuhtadigure Eliare sihugu iicumi, arĩriñorã erã.

³⁶ Eropigu yujugu erã mera majagu mimi aĩri yusu mera vino suĩre yosotuha aĩ omagã, yucugu ojogoro diritu, Jesure simujuripu. Eropa iigu òpa arĩpu:

—Corenique. Elia ìgure itamucũ ìanirã dohpa mari, arĩpu ìgu gajirãre.

³⁷ Ìgu eropa arĩra pũhrũ dipaturi Jesu turaro gaguinigui sĩria wapu.

³⁸ Ìgu sĩricũ ta Goãmu wihi majañe suhriro ero erã cãhmotara suhriro gasiro deco mera yehguea wayoro.

³⁹ Ìgu eropa sĩricũ ìagu surara opu Jesu pohro niguidigu òpa arĩpu:

—Diaye ta ãhraa. Ihĩ Goãmu magu ta ãhrañumi, arĩpu ìgu.

⁴⁰ Eropirã yoarogue ìhaniguinirã nome sã árĩñorã Jesure ìhaniguirã. Erã nome mera María Magdalena arĩpo. Gajigo María waĩcugo sã arĩpo. Igo pu José ìgu pagu magu Santiago erã pago arĩpo. Gajigo Salomé waĩcugo arĩpo.

⁴¹ Erã nome Jesu yare òaro peerã nome árĩñorã. Erã Galilea yeba ìgu arĩcũ ìgure itamumuriñorã. Erã nome mera bajarã gajirã nome sã árĩñorã. Jerusalengue Jesu mera arinirã nome árĩñorã.

Jesu dũpũre masa gobegue apiñuma

Mt 27.57-61; Lc 23.50-56; Jn 19.38-42

⁴²⁻⁴³ Eropii irinu ìgu sĩriranu Sabado core judio masa soorinu core majanu arĩyoro. Eropiro Pascua maja arĩburire erã amurinu arĩyoro. Irinu ñamica arĩcũ José Arimatea majagu güiro mariro Pilato pohroegue ejapu. Jesu dũpũre serẽgu ejapu. José oparã mera majagu oparã erã umupeodigu arĩpu. Eropigu Goãmu ìgu opu arĩburire coregu iipu.

⁴⁴ Eropigu José Jesu dũpu mũrarore ìgu Pilatore serẽcũ Pilatoru peegu, pee uca wapu. “¿Jesu sĩrituhayuri?” arĩ pepipu. Eropigu surara opuẽre sihu òpa arĩpu ìgure:

—¿Jesu sĩria wayuri? arĩ serẽpipu ìgure.

⁴⁵ Ìgu eroparĩcũ surara opu yũhrupu:

—Sĩria wami, arĩpu.

Ìgu eroparĩcũ Pilato Josere odorepu Jesu dũpu mũrũre.

⁴⁶ Ìgu odorera pũhrũ José òariñe suhrirore asũpu. Asũtuha, Jesu dũpũre aĩ diju, iri suhriro mera omapu. Omatuhaja erã utãyegue seara gobegue ìgu dũpũre apipu. Apituha iri gobe pohro arĩriye utãyẽ wũariyere taragã tubiha nugucãpu.

⁴⁷ Eropirã Mariá Magdalena, Mariá José pago Jesure ïgu apidirore ïañorã.

16

Jesu masa m̄riañumi

Mt 28.1-10; Lc 24.1-12; Jn 20.1-10

¹ Eropirã erã soorinu Sabadonu taricũ Mariá Magdalena, Mariá Santiago pago, Salomé mera poresurire asũñorã Jesu d̄p̄ure sũmorã.

² Eropirã Domingo boyorogã Jesure erã yaara gobegue wañorã erã.

³ Warã õpa arĩñorã:

—¿Iri gobere erã biharayere noa marire pãgũbasarãcuri mari ñajaborore? arĩñorã erã erã basi.

⁴ Iri gobegue ejarã iri gobere biharayere utãyere erã pãgũ nugurayere ïañorã. W̄ariye utãyere arĩyoro.

⁵ Eropa ïarã iri gobegure ñajañorã. Eropa ñajajarã mam̄re diayeru doagure boreri suhricugure ïañorã. ïarã ïha uca wañorã.

⁶ Erã ucacũ õpa arĩpu ïgu:

—Ucabicãque. Crusague erã pabiadigure Jesu Nazare majagure amaraa m̄a. Masa m̄riatuhami. Ore marimi. Erã ïgu d̄p̄ure apidirore ïaque. ïatuhaja ïgu buherãre Pedro sãre õpa arĩ wererã waque.

⁷ “Ïgu m̄a core Galileague wam̄htagucumi. Erogue ïgure ïarãca m̄a. Ero ïgu arĩdiro dopa ta m̄a ïgure ïarãca,” arĩ wererã waque, arĩ wereru mam̄ erãre.

⁸ Ïgu eroparĩcũ erã güi, naragã, masa gobe pohro arĩñirã omagã wiria wañorã. Eropa güirã gajirãre werebiriñorã.

Jesu Mariá Magdalenare dehyoañumi

Jn 20.11-18

⁹ Eropii Domingo arĩcũ Jesu ïgu masa m̄riara p̄hr̄u Mariá Magdalenare dehyoam̄htapu. Igo siete watẽa ñajasũdigo arĩpo. Jesu ïgu s̄riboro core igore watẽare cóãpu. Eropigu igopure dehyoam̄htapu ïgu ïgu masa m̄riara p̄hr̄ure.

¹⁰ Jesu igore dehyoara p̄hr̄u igo ïgu mera majarãre werego wapo. Erã ïgu s̄rirare bujawererã orerã arĩñorã.

¹¹ “Cristo ojocariami. Ïgure ïabu,” igo arĩquerecũ peedi-abiriñorã.

Jesu ïgu buherãre dehyoañumi

Lc 24.13-35

¹² Puhru perã Jesu buherã mera majarã campogue wiri marirogue wañorã. Erã eropa waniguicũ Jesu gajiropa bejagu gũhyaro dehyoapu erãre.

¹³ Īgu eropa dehyoara puhru, waha gajirã Jesu yarãre wereñorã. “Gua Jesure ĩabu,” erã arĩ werecũ erã peedia-biriñorã daja.

Jesu ĩgu yare buhedoregu obeoñumi ĩgu buherãre

Mt 28.16-20; Lc 24.36-49; Jn 20.19-23

¹⁴ Puhru once ĩgu buherã mesa pohrogue erã doacũ erãre dehyoapu ĩgu. Eropigu ĩgure ĩanirã “Jesu masa mũriapu,” arĩ erã werecũ peediabirirare erãre turipu Jesu. ĩgure ðaro umupeobiriri dipuwaja erãre turipu.

¹⁵ Erãre turituha ða arĩpu:

—I yeba árĩpehreroguerere masare árĩpehrerãre ðari buherire buherã waque.

¹⁶ Yure umupeorãre erã waĩyenirãre erã peamegue wabonirãre taugucumi Goãmu. Eropirã yure umupeobirã Goãmu ĩgu dipuwaja moamorã, peamegue wamorã árĩrãcoma.

¹⁷ Eropirã yure umupeorã yu turari mera ðpa iirãcoma: Yu turari mera watẽa masare ñajasũnirãre cóarãcoma. Eropirã mama disirore wereniguirãcoma.

¹⁸ Eropirã añare ñeacũ, árĩpehreri nimare erã ihricũ pũrisome erãre. Eropirã dorecurã weca erã mojotorire erã mohmepi ñeacũ ðarã warãcoma, arĩpu Jesu ĩgu buherãre.

Jesu umarogue mũria wañumi

Lc 24.50-53

¹⁹ Eropa arĩ weretuha mari Opu Jesu umarogue mũria wapũ. Erogue ejagu Goãmu diayepu doapu ĩgu mera opu árĩgu.

²⁰ Eropirã ĩgu buherãpu árĩpehreroguerere ðari buherire Goãmu masare ĩgu tauburire buherã wañorã. Erã eropa buhecũ mari Opu erãre itamupu. Deyoro moarire ĩgu turari mera iimasicũ iipu erãre masare ĩgu ya buherire peedoregu. “Eropa ta árĩporo,” arãa yũhu. Iripẽta ãhraa.

San Lucas

1-2 Opu Teófilo, mure ipũre gojabeogu iiaa yũhu. Jesu gua mera árĩnigu ĩgu iirare gajirã gojanugamũhtatuhanirã árĩma. Negohraguere Jesure ĩanirã, ĩgu yare buhenirã erã arĩ werediro dopa ta gajirã irire gojanugamũhtatuhanirã árĩma.

³ Eropigu i árĩpehrerire õaro masipehodiagu yu sã erã arĩ wererare buhebu. Eropigu yu sã irire õaro gojadiaa mua buheburi árĩburire.

⁴ Jesu yare buherã mure weretuhanirã árĩma. "Iri queoro ãhraa," õaro mu arĩ masiborore ipũre mure gojabeogu iiaa.

Ñu waĩyeri masu ĩgu masa dehyoaburire anyu werepu Zacariare Ñu pagu árĩbure

⁵ Herode Judea yeba majarã opu ĩgu árĩcũ, Zacarĩa waĩcugupu pahĩ árĩpu. Zacarĩa ya curupu pahia curu Abías ya curu árĩyoro. Zacarĩa marapo sã pahĩ Aarón muru pãrameo árĩturiagogue árĩpo. Igo pu Elisabet waĩcugo árĩpo.

⁶ Erã perã Goãmũ dorerire ipehorã erã árĩcũ ĩagu, "Umuri nũcu õarire iirã ãhrima," arĩ pepidi árĩmi Goãmũ erãre.

⁷ Elisabet ne porã marigo árĩpo. Eropigo igo Zacarĩa mera porã mari muñucãpo.

⁸ Pahia Goãmũ wihigue Goãmũ ya umupeoburire mohmerã umuri nũcu erã gohrotomuriñorã. "Zacarĩa ya curu majarã dohpaguere iiporo," erã arĩra puhru ĩgu pahia erã iidiro dopa ta Goãmũ ya umupeoburire mohmegu arigu iipu.

⁹ Pahia erã iiguaro dopa ta inciensore soebure beyerã irisubure Zacariare beyeñorã. Eropigu ĩgu Goãmũ wihigue ñajaa wapu soegu wagu.

¹⁰ Goãmũ wihi pohecague ĩgu árĩrisubu, inciensore ĩgu soerisubu árĩpehrerã masapu disiporogue Goãmũ mera serẽniguiñorã.

¹¹ Irisubure Goãmũ yagu anyu incienso soero diayeru dehyoanugajapu Zacariare.

¹² ĩgu anyu eropa dehyoacũ ĩagu Zacarĩa ĩgure ĩha, uca wa, gũia wapu.

¹³ Eropa ĩgu gũicũ ĩagu anyu ĩgure werepu:

—Zacarĩa, gũibita. Goãmũ mu serẽrare peeami. Eropigo mu marapo Elisabet porãcugocumo. Mu magu masa dehyoagucumi. ĩgu eropa dehyoacũ Ñu waĩyeque ĩgugãre.

14-17 “Īḡu ḡagu āhrimi. Turagu āhrimi,” arī pepiḡucumi Goāmḡu mḡu magure. Īḡu masa dehyoara pḡhrḡu vinore, siburire iħrisome. Eropiḡu Īḡu, Īḡu masa dehyoara pḡhrḡu ta Espírġtu Santo árġri mera ḡaro turagu árġḡucumi Īḡu. Eropiḡu bajarā Israe masare Goāmḡu mari Opḡre ḡaro gamecū iḡḡucumi Īḡu. Goāmḡu yare buheḡu Elia Goāmḡu yare weremḡhtadigḡu mari Opḡu arġborore Īḡu buhediro dopa ta Goāmḡu Īḡu turari mera mḡu magḡu sā buheḡucumi. Eropa buheḡu erā pagḡu sḡmarā erā porā mera erā ḡaro game mahi árġcū iḡḡucumi. Eropiḡu dorerire tarinḡagarāre ḡaro erā umupeori mera yḡħricū iḡḡucumi. Eropa buheḡu mari Opḡu arġboro core Īḡu yarā árġmorāre amuyugḡucumi Īḡu. Eropiḡu Īḡu masa dehyoara pḡhrḡu mḡhḡu mucubirigḡu. Gajġrā sā bajarā mucubirġācoma, arġpḡu anyu Zacarġare.

18 Īḡu eroparġcū peegḡu Zacarġapḡu serēpġpḡu anyure.

—Yḡhḡu, yḡ marapo mera ḡḡa mḡrā āħraa. ¿Eropiḡu mḡ arġra diaye árġcū doħpa masigḡucuri yḡhḡu? arġpḡu Īḡu.

19 Īḡu eroparġcū anyupḡu Īḡure wererḡu:

—Yḡhḡu Gabriele waġcḡḡu āħraa. Goāmḡu pohro árġḡu āħraa yḡhḡu. Goāmḡu i ḡari querere weredoreḡu, mḡ pohro yḡre obeoami. Yḡ werediro dopa ta diaye waroca.

20 Yḡ eropa arġquerecū ta yḡre peediabeaa mḡhḡu. Eropiḡu mḡhḡu doħpaguere wereniḡuibigḡu dujagḡu. Mḡ magḡu Īḡu masa dehyoara pḡhrḡu wereniḡuigḡu daja, arġpḡu anyu Zacarġare.

21 Disiporogue masa Zacarġare corerā ġiħorā. “¿Duhpiḡu Īḡu Goāmḡu wiħigḡe árġḡu mata wirirġbeari?” arġ, corerā ġiħorā masa Īḡure.

22 Eropiḡu Īḡu i wiħigḡe árġdigḡu wirġa, erā mera wereniḡuimasġbirġpḡu. “Goāmḡu Īḡure dehyoacumi,” arġ pepġ, masiħorā erā. Eropiḡu Īḡu wereniḡuimasġbigḡu árġḡu Īḡu moħotori mera masare wereniḡuipḡu.

23 Goāmḡu wiħi Īḡu moħmeri peħrecū, Īḡu dujaa warḡu Īḡu ya wiħigḡe.

24 Pḡhrḡu Īḡu marapo Elisabet majiḡure ne bocagārġgo ġġo. Eropġgo ġgo cinco aberġ goħra masa pohro wabġrġpo.

25 Ōpa arġpo ġgo: “Doħpaguere yḡre Goāmḡu ġtamumi pare. Yḡ porā marġgo árġgo ḡḡhyasiuro tarġbḡu yḡhḡu. Goāmḡu yḡ porā marġrġre cohāmi yḡre,” arġ pepġpo ġgo.

Jesu Īḡu masa dehyoaburire wererḡu anyu Marġare

26-27 Elisabet seis aberġ ġgo nijġpo árġra pḡhrḡu, Goāmḡpḡu anyure Gabriele waġcḡḡure nómeo ḡago pohrogue obeopḡ. ġgo Nazare waġcġri maca Galilea árġri yeba árġpo. Eropġgo

igo María waĩcũgo José mera mojoto diribo árĩpo. Josépũ iribojegue majagu mũru Davi mũru pãrami árĩpũ.

²⁸ María pohroegue ejagu anyu werepũ:

—María, ¿ãhriri mũhũ? Goãmũ mũ mera árĩgu ãhrimi. Eropigu mũre ðaro iigu iimi. Árĩpehrerã nome gajirã nome tauro ðaro iimi mũre, arĩpũ anyu igore.

²⁹ Īgu eroparĩcũ peego, igo turaro guña pepipo. Anyu ĩgu wererare pepigo “¿Dohpa arĩgu yũre eropa arĩcuri?” arĩ guñaipo igo.

³⁰ Igo eropa arĩ guñacũ ĩagu anyu werepũ igore:

—María, mũre Goãmũ turaro mahimi. Eropigo gũibita.

³¹ Peeque. Majĩgũre bocagoca mũhũ. Eropigu mũ magu masa dehyoagũcumi. Īgũre Jesu waĩyegoca.

³²⁻³³ Īgu turatariagu árĩgũcumi. Eropirã ĩgũre “Goãmũ umaro majagu magu ãhrimi,” arĩrãcoma masa. Eropigu mũ magu ñecũ mũrugue Davi mũru Israe masa erã opu ĩgu árĩdiro dopa ta mũ magu sãre apigũcumi Goãmũ. Eropigu árĩpehrerinũri ĩgu Israe masare doregũcumi. Eropiro ĩgu opu árĩripũ ne pehresome, arĩpũ anyu.

³⁴ Īgu eroparĩcũ Marĩapũ serẽpipo:

—¿Duhpi umũ mera árĩbiriqũregu ta porãcũbocuri yũhũ? arĩpo igo.

³⁵ Igo eroparĩcũ anyupũ werepũ:

—Espĩritu Santo mũre porãcũcũ iigũcumi. Eropiro Goãmũ ĩgu turari imica curu iro dopa ta cãhmotaroca mũre. Eropirã “Goãmũ magu, ñerire iibigu ãhrimi,” arĩrãcoma masa mũ magũre.

³⁶⁻³⁷ Goãmũ árĩpehrerire iimasimi. Eropigo mũ acawerego Elisabet bũro árĩquerego ta majĩgũre bocãmo igo sã. Igo porãcũgocumo umũgãre. Masa igore “Porã marigo ãhrimo,” erã arĩdigo bũro dohpaguere seis aberi wahaa igo majĩgũre bocara pũhrũ, arĩpũ anyu Marĩare.

³⁸ Īgu eroparĩcũ María yũhripo:

—Yũre peeque. Mari Opu ĩgu pohro majago ãhraa yũhũ. Mũ arĩdiro dopa ta yũre eropa waporo, arĩpo igo.

Igo eropa arĩra pũhrũ anyu waha wapũ.

María Elisabere ĩago wapo

³⁹ Irinũrire María utã yucũ árĩri yebague Judea yeba árĩri macague umũdiaro waha wapo.

⁴⁰ Erogue ejago Zacarĩa ya wihi ñaja, “¿Ahriri?” arĩpo igo Elisabere.

⁴¹ Igo eroparĩcũ Elisabet igo peecũ ta, igo magupũ niji suhrirogue árĩdigũ ñohmepũ. Elisabet Espĩritu Santo árĩri mera ðaro pepigo wapo.

42 Eropigu turaro mucubiriri mera wereniguipo.

—Árīpehrerā nome tauro ōaro iimi Goām̄ m̄re. M̄ magu s̄are ōaro iimi Goām̄.

43 Cue, yu Op̄ pago yu pohro aricū ōaro iimi yure Goām̄.

44 M̄h̄ yure “¿Āhriri?” aricū, yu magup̄u nihi suhrirogue árīḡu mucubiriri mera ñohmeacumi yure.

45 “Goām̄ ĩḡu arīdiro dopa ta iipehoḡucumi,” arīgo mucubirigo āhraa m̄h̄, arīpo Elisabet Mariare.

46 Igo eroparicū María yuhripo:

Goām̄ ōaḡu, turaḡu āhrimi, arāa. Yuh̄ ōaro siporāc̄ua.

47 Goām̄ yure peamegue wabodigore itamuḡu āhrimi. Eropiḡu dohpaguere yure ōaro mucubiriri mera aricū iimi.

48-49 Yure bu árīgore ĩḡu ĩḡu pohro majagore guñadi āhrami. Goām̄ turatariaḡu ōari dihtare yure itamumi. Eropirā “Igore Goām̄ ōaro iimi,” árīpehrerā masa dohpaguere eropa arī wereniguirācoma yure. Goām̄ ñeri mariḡu āhrimi.

50 Árīpehrerin̄ari árīpehrerā ĩḡure umupeorāre ĩḡu mojomoro ĩaḡu āhrimi.

51 Goām̄ ĩḡu turari mera iiḡu āhrimi. “Gajirāre tarin̄agaa yuh̄,” arīrāre tarin̄agadi árīmi ĩḡu.

52 Oparāre erā dorero árīrare cóadi árīmi ĩḡu. Eropiḡu bu árīrāp̄ure ĩḡu oparā iro dopa ta apidi árīmi.

53 Oaboanirāre ĩḡu ōari barire ódi árīmi. Eropiḡu baja opanirāp̄ure gajino moorā wacū iidi árīmi ĩḡu.

54-55 Mari ñec̄u s̄umarā m̄urare “Masare ōaro iiḡura,” ĩḡu arī werediro dopa ta iipehodi árīmi Goām̄. Eropiḡu ĩḡu pohro majarā Israe masare ĩḡu itamudi árīmi. Mari ñec̄u s̄umarā m̄urare, Abrahā m̄urare árīpehrerā ĩḡu acawererā ĩḡu p̄h̄r̄u árīrā s̄are Goām̄ árīpehrerin̄ari eropa mojomoro ĩaniguiḡu árīm̄uridi árīmi. “Masare ōaro iiḡuca,” erāre ĩḡu werepirare cādijibiridi árīmi Goām̄, arīpo María.

56 Urerā abe gohra Elisabet mera āhri, igo ya macague goe dujaa wapo María.

Ñu masa dehyoapu

57 Elisabet igo nihi wahḡura p̄h̄r̄u igo magu masa dehyoapu.

58 Eropirā Goām̄ igore ĩḡu eropa ōaro iicū igo ya maca majarā igo acawererā s̄a igo mera mucubiriñorā.

59 Ocho n̄ari ĩḡu masa dehyoara p̄h̄r̄u, ĩḡu paḡu s̄umarā ĩḡuḡare gasiro merogā wiri aīdorerā wañorā. Eropa erā ĩirisubu erā mera majarā Zacaría wañyediariñorā ĩḡuḡare ĩḡu paḡu wañre.

60 Erã eropa waïyediaquerecũ ta ïgu pagoru õpa arïpo:
—Ïgu pagu waïre waïyebeaa. Ñu waïyerãca ïguãare,
arïpo igo.

61 —Mu acawererã ne yujugu Ñu waïcugu marimi,
arïnorã erã igore.

62 Eropirã erã mojotori mera werenigui Zacariare
serẽpiñorã erã.

—¿Muca dohpa waïyediari mu magure? arï serẽpiñorã
ïgure.

63 Erã eroparïcũ ïgu pagu gojaburimijire serẽbeo, ñeha,
gojapu: “Yu magu Ñu waïcumi,” arï gojapu Zacarìa. Ïgu
eropa arï gojacũ erãpu uca wañorã.

64 Ïgu eropa arï gojara pũhrũ ïgure wereniguicũ iipu
Goãmũ. Eropigu ïgu wereniguimasipu daja.

—Goãmũ turagu, õagu ãhrimi, arïpu ïgu.

65 Ïgu eropa arï wereniguicũ peerã ero majarã uca
wañorã. Eropirã i árïpehrerire Judea yeba majarãre utã
yucu watope árïrãre masa weresiriñorã.

66 Árïpehrerã irire peerã guñañorã. “Goãmũ turarire
ïguãã opami. ¿Eropigu ñehmano árïgucuri ïguãã?” arï
pepiñorã masa.

Zacarìa Goãmũre umupearũ

67 Eropigu ïgu pagu Zacarìa Espiritu Santo árïri mera
õaro pepigu árïgu Goãmũ yare werepu:

68 Mari Israe masa Goãmũre umupearã. Ïgu yarã ãhraa
mari. Eropigu mari pohrogue arigu, marire itamugu
õaro taumi.

69 Eropigu Goãmũ turagure marire peamegue wabonirãre
õaro taubure obeomi. Marire õaro taubu ïgu acaweregu
Davi mũru ãhrimi. Davipu Goãmũ pohro majagu
árïmũriñumi.

70 Iribojegue ïgu ya weremũhtanirã mera Goãmũ ïgu
marire taubure obeoburire wereyumũripũ.

71 Marire ïhaturirã marire ñero erã iidiacũ ïagu “Muare
itamugũra,” arï apiñumi Goãmũ marire.

72 Mari ñecu sũmarã mũrare, “Muare mojomoro ïagu
itamugũra. Muare yũ wererare guñagũra,” arï apiñumi
Goãmũ mari ñecu sũmarãre. Iribojegue ïgu eropa arïdiro
dopa ta marire dohpaguere iimi.

73-75 Eropigu Abrahãre õpa arïmũriñumi: “Mu acawererã
pũhrũ árïrã erãre ïhaturirã árïcũ cóãgũra. Eropigu mu
acawererãre itamugũra. Eropirã erã guibirã ta yũ dorerire
iimasima. Eropigu erã ñerire yũ cóãcũ, erã yũ ïhuro mũmũri

nucũ ðarã árĩniguirãcoma," arĩ werepimũriĩnumi iribojegue Goãmũ mari acaweregu Abrahãre, arĩpũ Zacarĩa.

Eropa arĩtuha ĩgu magugãre ðpa arĩpũ:

76-77 —Mahgu, mũre ðpa arĩrãcoma masa:

"Goãmũ turatariagu yare wereniguigu ãhrimi," arĩrãcoma mũre. Eropigu mũhũ mari Opũ core wayugũca. Eropa wagu ðpa arĩ wereguca. "Goãmũ mũa ñerire cóãgu, peamegue wabonirãre taugũcumĩ mũare," arĩ wereguca. Eropa arĩ weregu mari Opũ ĩgu ariborore weremũhtayugu iiguca mũhũ.

78 Goãmũpũ marire turaro mojomoro ĩagu marire ðaro iigu árĩgu, ĩgu marire peamegue wabonirãre taudiami. Marire taugu arigu Cristo mari pohro arigũcumĩ.

79 Árĩpehrerã mari peamegue wabonirãre taudiami ĩgu. Eropigu Goãmũre mari masibirã árĩcũ ĩagu marire masicũ iidiami ĩgu. Eropigu mari ðaro yujuro mera mari árĩborore weregucumĩ marire, arĩpũ Zacarĩa.

80 Eropi Ñũ Zacarĩa magũ ðaro bugapũ. Eropigu Goãmũre turaro mahipũ. Eropigu yoari boje masa marirogue árĩmũripũ. Te Israe masare buhenugagu sã erogue ta árĩmũripũ.

2

Jesu masa dehyoapu

Mt 1.18-25

¹ Irisubure árĩpehreri yebari majarã tauro opũ Augusto árĩpehrerãre queodorepũ.

² Oã masare erã ne queonugarisubu árĩcũ Cirenio waĩcũgu Siria yeba majarã opũ arĩpũ.

³ Eropirã árĩpehrerã erã ñecũ sumarã iribojegue majarã ya macarigue erã waĩre gojapeorã wañorã.

⁴ José sã Nazaregue Galilea árĩri yeba árĩri macague árĩnirã waha, Judea yebague Belén waĩcũri macague ejañorã. Opũ Davi iribojegue majagu ĩgu masa dehyoadiro árĩyoro Belén. José Davi mũrũ pãrami árĩgu Beléngue wapũ ĩgu waĩre gojapeogu wagu.

⁵ Eropigu ĩgu María ĩgu mojoto diribo árĩcũ erogue igo mera ĩgu waĩre gojapeodoregu wapũ. Igoũ majigure bocatuhadigogue arĩpo.

⁶ Eropigo Beléngue ejago igo niji wahgũpo.

⁷ Erogue masa erã carĩri wihĩ ne sihabiriyoro erãre. Eropirã erã wecũa ya wihigue carĩrã wañorã. Eropigo igo ĩgu ne dehyoagugãre porãcutuha ĩgugãre suhriro mera oma, wecũa erã bari coro weca ĩgure pihripeopo.

Anyua ovejare ñhadiburãre dehyoañorã

8 Iri ñamire iri maca turogue campogue ovejare ñhadiburã erã yarã ovejare ñhadiburã iñorã.

9 Eropigu Goãmũ ñgu obeodigu anyu erãre dehyoapũ. ñgu eropa dehyoacũ Goãmũ ñgu gosesiriri erãre boyoweayoro. Eropa wacũ ñarã, ovejare ñhadiburã güia wañorã.

10 Erã eropa wacũ anyu erãre werepũ:

—Õari querere mũare weregu ahraa. Árípehrerã masare mucubiricũ iiroca i quere. Eropirã güibiricãque mũa.

11 Dohpagã ñamire opũ mũarũ Davi ya macague mũare peamegue wabonirãre taubu, Cristo Goãmũ ñgu obeodigu mari Opũ masa dehyoatuhami.

12 Eropigu suhriro mera omadigu wecua bari coro weca erã pihripeodigu mũa bocagu ñgu ta árĩgucumi, arĩ werepũ anyu erãre.

13 ñgu eroparicũ ta bajarã mũmaro majarã árĩmũhtadigu anyu mera bayapeoñorã. Õpa arĩ bayapeoñorã erã:

14 Goãmũre mũmaro majagure umupeorã. Eropirã Goãmũ ñgu mahirã güiro mariro gamequeãro mariro ñaro árĩporo, arĩ bayapeoñorã anyua.

15 Eropa bayatuhaja mũmarogue erã mũriara pũhrũ ovejare ñhadiburãpũ erã basi game wereniguiñorã:

—Ire Goãmũ ñgu marire wererare Beléngue ina ñarã warã, arĩñorã erã erã basi.

16 Eropa arĩrã yojaro mera wañorã erã. Mariare, Josere bocaia, majigugãre wecua erã bari coro weca pihripeodigure ñañorã erã.

17 Ovejare ñhadiburã ñgure ñatuha anyu majigugãre ñgu wererare wereñorã gajirãre.

18 Erã eropa arĩ werecũ ta árĩpehrerã erãre pee uca wañorã.

19 I árĩpehrerire Mariãpũ guña pepipo.

20 Eropirã ovejare ñhadiburãpũ anyu ñgu werediro dopa árĩcũ ñañorã. “Goãmũ turagu áhrimi,” arĩ mucubiriñorã. Eropa arĩ mucubiri dujaa wañorã.

Goãmũ wihigue Jesu pagũ sũmarã ñgure aĩgãñorã

21 Yuju semana pũhrũ majigure gasiro merogã wiri aĩrire erã iidoreranũ árĩcũ erã ñgugãre Jesu waĩyeñorã. Jesure ne igo bocaboro core anyupũ “Jesu waĩyeque ñgure,” arĩ werepipũ. Eropirã ñgugãre Jesu waĩyeñorã.

22 Goãmũ doreri Moise ñgu werediro dopa ta iimorã, José, Mariã mera Jerusaléngue wañorã. Erogue Mariã porãcura pũhrũ ñago igo dupũ árĩrore ñhmurã wañorã. Eropa warã

erã Jesure aĩgã wañorã. Īgũgãre Goãmũre “Īgã mũ yagũ árĩbu ãhrimi,” arĩ ĩhmurã warã iĩñorã.

23 Ōpa iĩñorã Goãmũ yare erã gojarapũ dorero dopa ta. “Árĩpehrerã mũa porãre ne dehyoarãre Goãmũre ĩhmuque. ‘Īgã mũ yagũ árĩbu ãhrimi,’ arĩ ĩhmuque,” arĩ doremuriñumi Goãmũ ĩgũ yare gojarapũgue.

24 Eropa ĩhmutuha Goãmũ ĩgũ dorediro dopa ta mirimagũgãre erã asũtuhaja Goãmũ wihigue apirã wañorã. Ōpa doreñumi Goãmũ ĩgũ yare gojarapũgue: “Buja borerãre perã oque Goãmũre. O erã maricũ buja borewijiãrãre oque yare umupeomorã,” arĩ doreñumi Goãmũ. Eropirã ĩgũ dorediro dopa iĩñorã José María mera.

25 Jerusalengue Simeón waĩcũgũ árĩpũ. Īgũ ðagũ, Goãmũre umupeogũ árĩpũ. Goãmũ Israe masare itamuburire coregũ iipũ. Eropigũ Simeón Espiritu Santo ĩgũ mera árĩcũ ðaro pepigũ árĩpũ.

26 Eropigũ “Mũ sĩriboro core Goãmũ ĩgũ obeobure Cristore ĩagũca mũhũ,” arĩ weremũhtapũ Espiritu Santo ĩgũre Simeore.

27 Eropigũ Espiritu Santo ĩgũre dorecũ Goãmũ wihigue ñajaa wapũ. Īgũ ñajara pũhrũ Jesu pagũ sũmarã ĩgũgãre aĩ ñajañorã Goãmũ ĩgũ gojarapũ dorera dopa ta iirã.

28 Simeónpũ ĩgũgãre coã aĩ, Goãmũre umupeo, “Ōhaa,” arĩ ĩgũ mera wereniguipũ. Ōpa arĩpũ ĩgũ Goãmũre:

29-32 Opũ, dohpague tamerare masare peamegue wabonirãre taubure obeoa mũhũ. Īgũ judio masa árĩbirãre buhegũ mũre ðaro masicũ iigũcumĩ erãre. Masare taubure Israe masure mũhũ apiyoro. Mũ eropa iirare árĩpehrerã masirã, “Israe masare ðaro iimi Goãmũ,” arĩrãcoma masa. Īgã marire taubu ãhrimi. Eropigũ mũ yare arĩdiro dopa ĩgãre ĩatuhabũ. Eropigũ dohpaguere ðaro mucubirigũ sĩrigũca, arĩpũ Simeón.

33 Simeón ĩgũgãre arĩrãre peerã ĩgũ pagũ sũmarãpũ pee uca wañorã.

34 Eropigũ Simeón erãre “Ōaro árĩque mũa,” arĩgũ ĩgũ Jesu pago Marĩare werepũ:

—Goãmũ ĩgãre beyedi árĩmi. Īgũ eropa beyedigũ árĩcũ judio masa bajarã ĩgũre tarinũgarãcoma. Eropa iirã erã peamegue warãcoma. Eropigũ judio masare bajarãre taubure beyedi árĩmi Goãmũ ĩgãre. Īgũ Goãmũ turarire ii ĩhmugũ ĩgũ árĩquerẽcũ masa bajarã ĩgũre ñero arĩ wereniguirãcoma.

35 Erā eropa iicũ gajirā erā ñero guñarire masirācoma. Eropigo mũhũ turaro bũjaweregoca, arĩdocaritamupũ Simeón Mariäre.

36 Ero Goãmũ yare wereniguigo Ana waĩcũgo árĩpo. Igo Fanuel mago árĩpo. Aser mũrũ ya curu majago árĩpo. Bũro gohra árĩpo. Igo ero coregue siete bojori dihta igo marapũ mera árĩniripo.

37 Eropigo ochenta y cuatro bojori gohra wapeweyo árĩmũriipo igo. Eropigo umũre, ñami sãre Goãmũ ya árĩburire iibo, ba duhu, Goãmũ mera werenigui, Goãmũ wihire ne wiriabiripo.

38 Simeón ĩgũ wereniguero watope igo erā pohro erago, mucubirigo Goãmũre, “Ōhaa,” arĩpo. Eropigo Jerusalén majaräre taubure coreräre igo Jesu dehyoarare werepo erā árĩpehreräre.

José, María mera Jesu mera Nazaregue dujaañorā daja

39 Goãmũ ĩgũ dorero dopa ta iituhaja, erā ya macague Nazaregue dujaañorā. Galilea yeba árĩyoro iri maca.

40 Eropigũ Jesu ñaro bũga turagũ wapũ. Eropigũ ĩgũ ñaro pee masigũ árĩpũ. Eropigũ ĩgũre Goãmũ ñaro iipũ.

Jesu mama mahũa wahgãrigũ Goãmũ wihigue buherũ

41 Bojori nũcũ Jesu pagũ sũmarā Jerusaléngue Pascua bosenure ĩarā wamũriñorā.

42 Jesu doce bojori ĩgũ opacũ erā iidiro dopa ta erā árĩpehrerā Jerusaléngue wañorā.

43 Eropirā bosenu pehrecũ erā erā ya macague dujaa wañorā daja. Erā eropa dujaaquerecũ ta Jesupũ Jerusaléngue dujacãpũ. ĩgũ pagũ sũmarā ĩgũ erogue dujarare masibiriñorā.

44 “ĩgũ mari mera majarā mera árĩcumi,” arĩ pepiriñorā erā. Eropirā erā yujunũ gohra Jesu mariro wañorā mague. Eropirā erā Jesure erā acawererā watope amariñorā.

45 Ne bocabiriñorā. Eropirā Jerusaléngue ĩgũre amarā dujaañorā daja.

46 Ūhrenũ pũhrũ ĩgũre Goãmũ wihigue bocañañorā. Eropirā Jesure judio masare buherā watope bocañañorā. ĩgũ eräre pee serēpi doapũ.

47 Erā árĩpehrerā Jesure peerā ñaro masigũgã ĩgũ árĩcũ ĩarā, erā ĩhamaria wañorā.

48 ĩgũ pagũ sũmarā sã eroguerere Jesure ĩarā ĩhamaria wañorā. Eropigo ĩgũ pago ĩgũre ñpa arĩpo:

—Mahgũ, ¿duhpigũ eropa iiari mũhũ guare? Mũ pagũ, yũhũ, “ĩgũ dederea wañumi,” arĩrā ahmaa gũa mũre, arĩpo igo igo magure.

49 Igo eroparĩcũ ĩgu ĩgu pagu sũmarãre werepũ:

—¿Duhpirã yũre ahmari mũa? Yũ Pagu yũre ĩgu dorediro dopa ta iĩgu iiaa. ¿Irire masibeari mũa? arĩpũ ĩgu.

50 ĩgu eropa arĩquerecũ erã peemasibiriñorã.

51 I arĩpehreri ĩgu iirare Mariapũ ðaro guñapo. Eropigu Jesu Nazaregue dujaa wapũ. ĩgu pagu sũmarãre ðaro yũhrigu arĩmũripũ.

52 Eropigu Jesu buga, ðaro pee masigu wapũ. Eropirã Goãmũ masa sã “Õagũ ãhrimi,” arĩ ãañoã ĩgũre.

3

*Ñu waĩyeri masũ masare Goãmũ yare werepũ
Mt 3.1-12; Mr 1.1-8; Jn 1.19-28*

1 Irisubure erã tauro opu arĩgu Tiberio waĩcũgu ĩgu opu arĩra pũhrũ quince bojori wayoro. Eropigu Poncio Pilato waĩcũgu Judea yeba majarã opu arĩpũ. Eropigu Herode waĩcũgu Galilea yeba majarã opu arĩpũ. ĩgu pagu magu Felipe Iturea yeba majarã, Traconite majarã sã erã opu arĩpũ. Eropigu Lisania waĩcũgu Abilinia yeba majarã opu arĩpũ.

2 Eropirã Ana, Caifa mera pahia oparã arĩñoã. Oã arĩpehrerã erã arĩrisubure Ñu Zacarĩa magu masa marirogue arĩgũre Goãmũpũ ĩgu ĩgu yare weredorepũ.

3 Eropigu Jordán waĩcũriya tũro arĩri yeba arĩpehrerogue Ñu ðpa arĩ weregu wapũ:

—Mũa ñeri iirire bujawereque. Dohpaguere ðarire gohrotoque. Eropirã waĩyenirã arĩque. Mũa eropa iicũ ĩagu Goãmũ mũa ñerire cóagũcumĩ, arĩ weremũripũ ĩgu.

4 Ñu eropa wereniguigu Isaia iribojegue majagu Goãmũ ya weremũhtadigu ĩgu gojadiro dopa ta iĩgu iipũ. Õpa arĩ gojajuñumi Isaia Ñu iiburire:

Masa marirogue werenigui gaguiniguigu ðpa arĩgũcumĩ:
“Mari Opu ĩgu ariburi mare amuro dopa ðarã arĩyuque mũa ĩgũre peemorã.

5 Dipa gobericũrore mari diaye maja maha iidiro dopa ta, mũa ñero iirire duhuque.

6 Mũa eropa iicũ Goãmũ mũare peamegue wabonirãre ĩgu taucũ ĩarãca arĩpehreri yeba majarã,” arĩgũcumĩ ĩgu gaguinigui weregũpũ, arĩ gojamũriñumi Isaia iribojeguere Ñu ĩgu arĩboro coregue.

7 Masa bajarã Ñu pohro erarã ĩgu erãre waĩyecũ gameñoã erã. Eropigu ĩgu erãre werepũ:

—Múa ñero iiricurã áhraa múa. Goãmure “Gua ñeri dipuwaja moabiricãporo,” arĩrã ¿múa yure waïyedorerã ahriiri?

⁸ Īgu múa ñero iira dipuwaja moabiricũ õpa iique múa. Diaye múa ñero iirire bujawererã árĩrã, õarire gohrotorã árĩrã, õarire iique múa. “Abrahã mari ñecũ mũrũ árĩmũripũ. Eropirã mari Goãmũ mera õatuhajaa,” arĩ pepibiricãque. Mũare arĩgu tiiãa. Abrahã pãramerã múa árĩri duhpiburi árĩbeaa. Goãmũrũ gamegu i utãyeri mera gajirãre iimasimi Abrahã acawererãre. Eropiro Abrahã acawererã múa árĩri bu gohra ta áhraa.

⁹ Ōpa áhraa: Mari masa yucũ iro dopa ta áhraa. Goãmũrũ come opagu iro dopa ta áhrimi. Eropigu ñeri ducacuri yucure tabe cóã, iri nuguri sãre tabetagucumi. Tabetatuhaja, peamegue cóãgucumi ĩgu iri yucure iri nuguri sãre. Eropa ta iigucumi múa sãre ĩgure gamebirãre, arĩrũ Ñũ masare.

¹⁰ Īgu eroparĩcũ peerã masapũ ĩgure serẽpiñorã:

—¿Dohpa iirãcuri gua? arĩñorã erã Ñũre.

¹¹ —Peñe suhriro opagu suhriro moogure yujuñe oque. Eropirã múa bari oparã gajirã sãre oque, arĩrũ Ñũ.

¹² Bajamerãgã oparã yare wajasea corerã sã waïyedorerã erañorã. Eropirã Ñũ pohro erarã ĩgure serẽpiñorã:

—Buhegu, ¿guarũ dohpa iirãcuri? arĩñorã.

¹³ —Múa oparã erã doreropẽ ta masare niyerure wajaseaque. Guýari mera aĩnemobita, arĩ yũhripũ Ñũ erãre.

¹⁴ Gajirã surara ĩgure serẽpiñorã daja.

—¿Guarũ dohpa iirãcuri? arĩñorã erã ĩgure daja.

—Masare erã niyerure emabiricãque. Eropirã iri niyerure guya emabiricãque. Múa wajatarire iarã mucubirique, arĩ yũhripũ Ñũ erãre.

¹⁵ Masa Cristore Goãmũ ĩgu obeobure corerã iĩñorã. Eropirã õpa arĩ pepinũgañorã erã Ñũre. “Ihĩ Ñupũ Cristo árĩbocumi,” arĩ pepiriñorã erã.

¹⁶ Erã eropa arĩ pepicũ peegu Ñũ árĩpehrerãre wererũ:

—Yũ tauro turagu arigucumi. Ōtariagu áhrimi ĩgu. Īgu iro dopa árĩbeaa yũrũ. Eropigu ĩgure pepigu, “Yũ tamera bu arĩgu áhraa,” arĩ pepia yũhũ. Múa ñero iirare bujawerera pũhrũ yũrũ mũare deco mera waïyeabũ. Īgurũ yũ tauro iigucumi. Espíritu Santore ogucumi masa mera árĩniguibure. Eropigu ĩgu ñerire soewearo dopa ta ĩgu arigurũ múa ñerire coeweagucumi.

¹⁷ Yũ pũhrũ arigu trigo gasirire cóãgu iro dopa áhrimi. Gasiri cóãgu ĩgu ya sihburu mera árĩpehreri trigo yeri

gasirire sũha weami. Eropa sũha weara pũhrũ trigo yeri gohrapũre ĩgũ diburi wihigue apigũcumi. ĩgũ sũha weara gasirĩpũre ĩgũ soegũcumi. Eropa ii beyegũcumi yũ pũhrũ arigũ. Ōarire gohrotonirãpũre ĩgũ mera árĩniguicũ iigũcumi. Erã ñero iirare bujawerebirãpũre peamegue yaribiriri peamegue cóãgũcumi, arĩ wererũ Ñu.

18 Bajarãre ĩgũ eropa arĩ wereri mera masare õari buherire wererũ Ñu.

19 Eropigũ opũ Herodepũ ĩgũ pagũ magũ Felipe marapore ĩgũ emara waja, wũaro ñerire ĩgũ iira waja Ñu ĩgũ sãre wereripũ.

20 ĩgũ eropa arĩ wererũ Herodepũ Ñure peresu iipũ dipaturi ñerire iigũ daja. Eropa iigũ ĩgũ ñerire iira dipuwajacũgũ árĩnemopũ.

*Ñu Jesure waĩyerũ
Mt 3.13-17; Mr 1.9-11*

21 Ñure erã peresu iiboro core gajirã masare Ñupũ waĩyegũ iipũ. Erãre waĩyegũ Jesu sãre waĩyerũ. Eropigũ Jesu diague niguigũ Goãmũre ĩgũ serẽrisubu umũsi pãrimaa waya.

22 Eropa pãrimaara pũhrũ Espĩritu Santo buja iro dopa bejagũ Jesu weca dijaripũ. ĩgũ dijaricũ umarogue wereniguiro cariyoro:

—Mũhũ yũ magũ yũ mahigũ ãhraa. Mũ mera õaro mucubiria, arĩro cariyoro umarogue.

*Jesu ñecũ sumarã iribojegue majarã árĩñorã
Mr 1.1-17*

23 Jesu ĩgũ buhenũgarasubure treinta bojori opapũ ĩgũ. “Ĩgũ José magũ ãhrimi,” arĩ pepiriñorã masa. Josépũ Elĩ magũ árĩñumi.

24 Elĩ Matat magũ árĩñumi. Matat Levĩ magũ árĩñumi. Levĩ Melqui magũ árĩñumi. Melqui Jana magũ árĩñumi. Jana José magũ árĩñumi.

25 José Matatĩas magũ árĩñumi. Matatĩas Amós magũ árĩñumi. Amós Nahúm magũ árĩñumi. Nahúm Esli magũ árĩñumi. Esli Nagai magũ árĩñumi.

26 Nagai Maat magũ árĩñumi. Maat Matatĩas magũ árĩñumi. Matatĩas Semei magũ árĩñumi. Semei Josec magũ árĩñumi. Josec Judá magũ árĩñumi.

27 Judá Joanán magũ árĩñumi. Joanán Resa magũ árĩñumi. Resa Zorobabe magũ árĩñumi. Zorobabe Salatĩe magũ árĩñumi. Salatĩe Neri magũ árĩñumi.

28 Neri Melqui magu árĩñumi. Melqui Adi magu árĩñumi. Adi Cosam magu árĩñumi. Cosam Elmadam magu árĩñumi. Elmadam Er magu árĩñumi.

29 Er Josué magu árĩñumi. Josué Eliezer magu árĩñumi. Eliezer Jorim magu árĩñumi. Jorim Matat magu árĩñumi.

30 Matat Leví magu árĩñumi. Leví Simeón magu árĩñumi. Simeón Judá magu árĩñumi. Judá José magu árĩñumi. José Jonam magu árĩñumi. Jonam Eliaquim magu árĩñumi.

31 Eliaquim Melea magu árĩñumi. Melea Mena magu árĩñumi. Mena Matata magu árĩñumi. Matata Natán magu árĩñumi.

32 Natán Davi magu árĩñumi. Davi Isaí magu árĩñumi. Isaí Obed magu árĩñumi. Obed Booz magu árĩñumi. Booz Salmón magu árĩñumi. Salmón Naasón magu árĩñumi.

33 Naasón Aminadab magu árĩñumi. Aminadab Admin magu árĩñumi. Admin Arni magu árĩñumi. Arni Esrom magu árĩñumi. Esrom Fares magu árĩñumi. Fares Judá magu árĩñumi.

34 Judá Jacobo magu árĩñumi. Jacobo Isaa magu árĩñumi. Isaa Abrahã magu árĩñumi. Abrahã Taré magu árĩñumi. Taré Nacor magu árĩñumi.

35 Nacor Serug magu árĩñumi. Serug Ragau magu árĩñumi. Ragau Peleg magu árĩñumi. Peleg Heber magu árĩñumi. Heber Sala magu árĩñumi.

36 Sala Caina magu árĩñumi. Caina Arfaxad magu árĩñumi. Arfaxad Sem magu árĩñumi. Sem Noé magu árĩñumi. Noé Lame magu árĩñumi.

37 Lame Matusalem magu árĩñumi. Matusalem Enoco magu árĩñumi. Enoco Jared magu árĩñumi. Jared Mahalaleel magu árĩñumi. Mahalaleel Caina magu árĩñumi.

38 Caina Eno magu árĩñumi. Eno Sete magu árĩñumi. Sete Adán magu árĩñumi. Adán Goãmu iidigu árĩñumi.

4

Watĩ ñerire iidoreripu Jesure

Mt 4.1-11; Mr 1.12-13

1 Jesu Espiritu Santo igu dorero dopa ta iipehogu árĩgu, igu Jordán waicuriyague buharapu. Igu eropa buharacũ Espiritu Santopu igure masa marirogue wadorepu.

2 Eroque ejagu cuarenta nuri gohra arĩpu. Eropigu watĩpu Jesure ñerire iicũ gameripu. Eropigu ñerire iidoreripu igure. Irinurire ne Jesu babiripu. Eropigu irinuri pehrero gohra igu oaboapu.

3 Igu eropa oaboacũ iagu watĩ òpa arĩpu Jesure:

—Mũhũ Goãmũ magũ árĩgũ òpa ìhmuque. Iyere utãyere bari poyacũ iique, arĩripũ Jesure.

⁴ Īgũ eroparĩcũ peegũ Jesu gamebiripũ. Òpa arĩ yũhripũ:

—Goãmũ yare erã gojarapũ òpa àhraa: “Masare bari mera dihta ojocaribiro gahmea. Árĩpehreri Goãmũ ya ĩgũ ya wereniguirĩ mera sãre árĩro gahmea,” arĩmi Goãmũ, arĩpũ Jesu watĩre.

⁵ Īgũ eropa arĩra pũhrũ watĩpũ ĩgũre utãgũ wecague aĩ mũriagũ merogã pũhrũ ĩgũ árĩpehreri macari majare Jesure ìhmu purumujupũ.

⁶ Eropa ìhmuğũ òpa Jesure arĩpũ:

—Árĩpehreri i macari ĩgũ yũre ora àhraa. Eropigũ yũ gamegũre omasia. Eropigũ i macarire, i macari majarã doreri sãre, erã opari mera mũre ogũra.

⁷ Yũre “Mũhũ yũ opũ àhraa,” arĩ umupeoque. Mũ eroparĩcũ i macarire árĩpehreri macarire mũre ogũra, arĩ wereripũ watĩ Jesure.

⁸ Jesu òpa arĩ yũhripũ ĩgũre:

—Mũre umupeobeaa. Òpa àhraa Goãmũ yare erã gojarapũ: “Mũ Opũ Goãmũ dihtare umupeoque. Īgũ ya doreri dihtare iique,” arĩ gojañuma Goãmũ yare, arĩpũ Jesu watĩre.

⁹⁻¹¹ Īgũ eropa arĩra pũhrũ Jerusalengue watĩpũ ĩgũre aĩgãpũ. Erogue eja Goãmũ wihĩ wecague aĩ mũrijapũ ĩgũre. Aĩ ejatuhaja ĩgũre òpa arĩripũ:

—¿Diaye ta Goãmũ magũ gohra ta àhriri mũhũ? Goãmũ yare erã gojarapũ òpa àhraa:

Goãmũ ĩgũ yarã anyuare mũre ìhadibudoregũcumĩ. Eropirã erãpũ mũre ìhadiburãcoma mũgue utãyere weca mehbejajari arĩrã, arĩ gojañuma Goãmũ yare erã gojarapũ.

Erã mũre eropa ìhadibumorã árĩcũ mũhũ Goãmũ magũ ta árĩgũ ògue buhrimaa dija ìhmuque yũre. Mũre erã itamucũ ìhmuñata yũre, arĩripũ watĩ Jesure.

¹² Īgũ eroparĩcũ peegũ gamebiripũ Jesu. Òpa arĩ yũhripũ ĩgũre:

—Goãmũ yare erã gojarapũ òpa àhraa: “Mũ opũ Goãmũ ĩgũ arĩrãre, ‘¿Diaye ta àhriri?’ arĩ masidiarã, Goãmũre iĩ ìhmudoremaabiricãque,” àhraa Goãmũ yare erã gojarapũ, arĩpũ Jesu watĩre.

¹³ Eropigũ watĩ árĩpehreri ñerire Jesure iidoreripũ. Jesu ĩgũ gamebiricũ ĩagũ ĩgũre merogã duhupũ.

*Galilea yeba Jesu buhenũgarũ
Mr 4.12-17; Mt 1.14-15*

14 Puhru Jesu Galileague dujaa wapu. Eropigu igu Espiritu Santo turari mera iipu. Igu eropiicũ iarã ero arĩpehrero majarã masa igu iira quere peeñorã.

15 Judio masa buheri wiri Jesu sã buhemuripu. Eropirã arĩpehrerã masa igure ðaro wereniguiñorã.

Nazare majarã Jesure ne umupeobiriñorã

Mt 13.53-58; Mr 6.1-6

16-17 Puhru Nazaregue Jesu igu bugadirogue ta ejapu. Erogue eja, Sabado arĩcũ igu eropa iiniguero dopa ta igu judio masa erã buheri wihigue ñajajapu. Ero igu Goãmu yare erã gojarapũre buhedigu niguipu. Igu eropa niguicũ iarã ero majarãpu Goãmu yare weremuhtadigu Isaia igu gojarapũre igure oñorã. Iripũre Jesu i wererire bocagu buhepu:

18 Goãmu Espiritu Santo yu mera arĩgu yure doremi. Igu mojomorocurãre ðari buherire weredoregu obeomi yure. Eropigu ñero siporãcurãre ðaro mucubiricũ iidoregu yure obeomi. Eropigu peresugue arĩrã sãre erãre igu tauborore weredoregu obeomi yure. Cuirĩ ihajabirã erã ðaro ihajaburire, gajirã erã ñero iibirarãre wiubure yure obeomi.

19 "Mari Opu igu yarãre peamegue wabonirãre igu tauburinuri ãhraa," yure weredoregu obeomi, arĩ buhepu Jesu.

20 Eropa buhetuha Jesu iripũre bihacã, wihi majarãre wiatuha, doapu. Igu doacũ iarã ero arĩpehrerã igure ihanuruñorã.

21 Erã eropa iicũ igu erãre werenugapu:

—I dohparagã ta yu buhediro dopa Goãmu igu arĩdiro dopa sihajaro iiaa, arĩpu Jesu.

22 Igu eropa wereniguicũ peerã "Ihĩ ðagu ãhrimi," arĩ pepiñorã. Eropirã erã igu ðaro wereniguirire peerã uca wañorã. Eropirã ðpa arĩñorã erã erã basi:

—Cuena, ¿José magu arĩbeari ihĩ? arĩñorã erã erã basi.

23 Erã eroparĩcũ masigu Jesu werepu erãre:

—Iribojegue majarã erã eropa wereniguidiro dopa ta mua sã yure ðpa arĩdiarã ãhraa: "Mũhu duhturu arĩgu mu basi ocoyeque mũhu duhturu arĩrĩre ii ihmuboro dopa ta. Mũhu Goãmu igu obeodigu arĩgu mu basi igu turari mera ii ihmuyoro mũhu. Ohõ mu ya macague sãre gũare ii ihmuyoro. Diaye ta mu Goãmu igu obeodigu arĩrĩre gũa masiboro dopa ii ihmuyoro," arĩdiaa mua yure.

24 Ire weregura muare. Goãmu ya weremuhtagure igu ya yeba majarã umupeobeama. Eropirã yare umupeobeaa mua ohõ yu bugadigu ariquerecũ.

25 Eropigu diaye arigu iiaa muare. Iribojegue majarã sare Goãmu ya weremuhtanirãre erã ya yeba majarã erãre umupeobiriñuma. Eropiro Elia Goãmu yare weremuhtadigu igu arirasubure uhre bojori gaji bojori deco gohra ne deco aribiriyoro. Eropiro aripehrerogue sare ne bari mariyoro. Irisubure igu ya yeba majarã Israe majarã bajarã wapeweyarã ariquerecũ ta Goãmu erãre Eliare itamudoregu obeobiriñumi.

26 Igu ya yeba majarãre itamudorebiriqueregu gaji yeba Sidón yeba ariri maca Sarepta waicuri maca majagore itamudoregu Eliare obeoñumi Goãmu.

27 Puhru Goãmu ya weremuhtadigu Eliseo igu igu aririsubure Israe yebague bajarã cami boarã erã ariquerecũ ta ne yujugu Israe majagure igu ya yeba majagure ðagu iibiriñumi Eliseo. Igu ya yeba majagure ðaro iibigu ta gaji yeba majagu Naamán Siria majagu dihtare ðagu iñumi igu. Eropigu judio masa erã umupeobirira waja, judio masa aribirã dihtare itamuñumi Goãmu, aripu Jesu erãre.

28 Igu eroparicũ peerã aripehrerã iri wihi arirã guataria wañorã.

29 Eropirã erã wahgãnu gaja Jesure tara wiria, iri maca turo ariri tuhruque igure tumedijudiariorã.

30 Erã eropa iidiaquerecũ ta Jesu erã watope waha waru.

Watĩ ñajasũdigu Jesure bocatiripu

Mr 1.21-28

31 Puhru Jesu Galilea yeba ariri macague Capernaum waicuri macague eja, Sabado aricũ masare buhepu.

32 Igu opu iro dopa ta igu buhecũ peerã masa uca wañorã.

33 Iri wihi watĩ ñajasũdigu arigu turaro gaguiniguipu:

34 —Muhu Jesu Nazare majagu guare garibobita muhu. ¿Dohpa iibu iiri guare? ¿Muhu guare dederecũ iibu iiri? Yuhu masia Goãmu magu mu ðagu aririre, arĩ gaguiniguipu Jesure.

35 Igu eroparicũ peegu Jesu turipu watire:

—Ejarimaricãque. Duhuque igure, aripu Jesu.

Igu eropa arira puhru watipu masure yebague mehmereja tũrucũ iipu. Igu eropa iira puhru wiria waru. Igu masupu ðagu dujapu.

36 Ero arirã aripehrerã igu eropa wacũ iha uca wañorã. Eropirã erã basi ðpa arĩ wereniguiorã:

—¿Ñeheno buheri ãhriri i õpa wacũ iiri? Turaro mera opu iro dopa ta ihĩ watĩ ñajasũdigure taumi. Eropirã erã watẽa ãgu dorero dopa ta masare duhuma, arĩ wereniguiñorã erã erã basi.

³⁷ ãgu eropa iicũ ãarã iri yeba arĩpehreroguere masa Jesu ãgu eropa iirare weresiriñorã.

Jesu Simo Pedro mũñecore õago iipu

Mr 8.14-15; Mr 1.29-31

³⁸ Judio masa buheri wihire wiria, Simo ya wihigue ñajajapu Jesu. Ero Simo mũñeco dorecũgo iipo. Turaro nimacuri arĩyoro. Eropirã erã igo dorecũcũ wereñorã Jesure.

³⁹ Erã werera puhru ãgu igo pohro eja, nimacurire taridorepu. ãgu eropa taridorera puhru igore nimacuri tahria wayoro. Mata õago wapo. Igo eropa wago wahgã doaja, igo ta erãre barire ejopo.

Bajarã dorecũrãre õarã iipu Jesu

Mr 8.16-17; Mr 1.32-34

⁴⁰ Abe ñajara puhru arĩpehrerã masa ãgu pohro arirã dorecũrãre Jesu pohrogue aĩ ejañorã. Dorecũrã baja gajiropa arĩri dorere opañorã. Eropigu Jesu ãgu mojotori mera erã weca ñapeo, arĩpehrerãre erã dorere õaro taricũ iipu.

⁴¹ Watẽa ñajasũnirã sãre Jesu watẽare wiriadorepu. Erã wiricũ õpa arĩ gaguiniguiñorã:

—Mũhu diaye ta Goãmu magu ãhraa, arĩñorã erã Jesure.

Jesu Goãmu ãgu obeodigu ãgu Cristo arĩcũ watẽa ãgure masiñorã. Eropigu Jesu irire gajirãre werenidorebiripu.

Galilea yeba buhepu Jesu

Mr 1.35-39

⁴² Boyomuriricũ Jesu iri maca arĩdigu waha, masa marirogue ejaru. ãgu eropiicũ ãarã masa ãgure ahma, bocajarã, õpa arĩñorã:

—Gua ya maca dujaque. Wabita, arĩriñorã erã Jesure.

⁴³ Erã eropa arĩquerecũ ta ãgupu erãre õpa yuhripu:

—Goãmu ãgu opu arĩrĩre õari buherire gaji macari sãre buhediaa yũhu. Goãmu yũre obeomi irire werebure, arĩpu Jesu erãre.

⁴⁴ Eropigu Galilea yeba maja wiri, judio masa buheri wirigue ãgu buhe curipu.

5

Jesu ãgu buherãre bajarã waire bocacũ iipu

Mt 4.18-22; Mr 1.16-20

¹ Gajinu Jesu Genesare waĩcũri ditaru turogue ejaru. Ero ĩgu árĩcũ ĩarã bajarã masa Goãmu yare peediarã ĩgure nurusia ejañorã. Ōaro ujuturi nũgajañorã masa bajarã.

² Peeru gasiru imiporo payari gasire Jesu ĩaru. Iri gasi majarã wai wejẽnirã majanũgaja, erã wejẽdi yucare coerã iĩñorã.

³ Eropigu Jesu Simo yarugue ñajaru. Ñajatuha iriru dohodirure dia turo taramujupidorepu. Eropigu dohodirugue doa, masare buhebeo doaru.

⁴ Buhetuha, Jesu Simore õpa arĩpu:

—Deco ñari siwiuque. Eropirã mũhu, mu wapi mera mua wejẽdi yucare mehyuque wai ñeamorã, arĩpu Jesu.

⁵ ĩgu eroparĩcũ peegu Simo Jesure yũhrĩpu:

—Opũ, wai wejẽbutahmuarabu gua dohpagã ñamire. Eropiĩquererã ta waire wejẽbiraca gua. Eropa wejẽbiriquererã ta mu dorero dopa ta mehyu ĩarãra, arĩ yũhrĩpu Simo.

⁶ Eropa arĩtuha erã mehyuñorã. Erã eropa mehyucũ irigu wejẽdigure bajarã wai ñajañorã. Bajarã erã ñajacũ wejẽdigu yehguea wariyoro.

⁷ Eropa wacũ ĩarã erã gajiru majarã erã mera majarãre sihubeoñorã.

—Mua sã itamuque guare, arĩ sihubeoñorã Simo sã.

Erã eropa itamura pũhrũ peeru gasiru õaro miriparo bocañorã waire.

⁸ Simo Pedro eropa wai bajarã ñajacũ ĩagu, Jesu pohro mereja, ĩgure werepu:

—Yũ opu, mu mera árĩboqu árĩbeaa yũhu. Ñegu ãhraa. Eropigu yure duhuque, arĩpu Simo Jesure.

⁹ ĩgu árĩpehrerã ĩgu mera majarã sã wai bajarã ñajacũ ĩarã, uca wañorã erã sã.

¹⁰ Perã Simo mera majarã Zebedeo porã Santiago ĩgu pagu magu Ñu mera, erã sã ĩha uca wañorã. Eropa ucacũ ĩagu Jesu Simo Pedore werepu:

—Gũibita. Dohpaguere waire ñeha gameneogu mu árĩro dopa ta Goãmu yarã árĩmorãre sihu gameneogu árĩguca mũhu, arĩpu Jesu Simore.

¹¹ ĩgu eropa arĩra pũhrũ erã erã gasire imiporo taramujupicã, erã ya árĩpehrerire ero ta apicã, Jesu mera waha wañorã.

Jesu cami boagure õagu wacũ ĩpu

Mt 8.1-4; Mr 1.40-45

¹² Jesu gaji maca ĩgu árĩcũ cami boagu ĩgu pohrogue eraru. Eropigu ĩgu Jesure ĩagu mereja turaro serẽpu:

—Opu, muhu yure ðagu iidiagu yure ðagu iimasia muhu, arĩ serẽpu.

13 Īgu eropa arĩra puhrũ Jesu ĩgure mohmeriñagu ðpa arĩpu:

—Irire iidiaa. Dohpaguere ðagu árĩque muhu, arĩpu.

Īgu eroparĩcũ ta ĩgu cami boara mura yaria wayoro.

14 Eropigu Jesu ĩgure dorepu:

—I yu mure ðpa iirare gajirãre ne werebircãque. Mu ya dupure ðarare pahire ĩhmuqu waque, “Ōaro añrimi,” arĩdoregu. Tuhajanugu Moisere Goãmu ĩgu apidiro dopa ta iique. Eropigu Goãmu wihigue mirimagure asũwahgã apĩque mu dore tarirare masa árĩpehrerã masimaja ðaro, arĩpu Jesu cami boadigure.

15 “Werebita,” ĩgu arĩquerecũ ta árĩpehrerogue masa ĩgu iirare weresiripehoñorã. Erã eropa quere peerã masa bajarã Jesu pohrogue ejañorã. Dorecurã ðarã wadiarã erã sã ĩgu pohrogue ejañorã.

16 Erã eropa ejaquerecũ ta Jesu masa marirogue Goãmu ĩgu Pagure serẽgu waha wapũ.

Jesu dupu buhadigure ðagu wacũ iipu

Mt 9.1-8; Mr 2.1-12

17 Gajinu Jesu ĩgu buhecũ fariseo masa, judio masare buherã sã ero doañorã. Erã árĩpehrerã Galilea macari majarã, Judea macari majarã, Jerusalén majarã árĩñorã. Eropigu Jesu Goãmu turari mera dorecurãre ðarã iipu.

18 Irisubu bajamerãgã uma dupu buhadigure oyariñe mera coã erañorã. Eropirã ĩgure Jesu pohro apidiarã, wihigue aĩ ñajariñorã erã ĩgure.

19 Eropa ñajadiaquererã masa bajarã árĩcũ erã ĩgure aĩ ñaja masibiriñorã. Eropirã ĩgure wihi wecague aĩ muriya, miri gobe aĩ wea iri gobegue dupu buhadigure oyariñe mera pihri dijuñorã Jesu pohro arĩrã watope.

20 “Jesu ihĩ ĩgu dorecurire taricũ iigucumi,” arĩ pepiñorã erã. Erã eroparĩ pepicũ masigu Jesupu dorecugure ðpa arĩ werepu:

—Mahgu, mu ñero iirare yuhu cóãtuhabu, arĩpu dupu buhadire Jesu.

21 Īgu eroparĩcũ peerã fariseo masa, judio masare buherã sã erã basi ðpa arĩ pepiriñorã: “Ihĩ eropa arĩ wereniguiiri mera Goãmure ñero arĩgu iimi. Īgu masu mari iro dopa arĩgu ĩgu masa erã ñerire cóãmasibeami. Goãmu dihta masa erã ñeri iirire cóãmasimi,” arĩ pepiriñorã erã.

22 Jesu erã pepirire masigu ðpa arĩpu:

—¿Duhpirã eropa arĩ pepiri mua?

23 “Mũ ñeri iirire yũ cóãtuha,” yũ arĩcũ, “Gũyagu ãhrimi,” yũre arãa mũa masibiriquererã ta. “Wahgãnũgajaque. Curique,” yũ arĩcũ yũ arĩra diaye árĩri arĩcũ mata masirãca mũa.

24 Yũhũ masũ Goãmũ ĩgu obeodigu i yeba majarã erã ñeri iirire cóãmasia yũhũ. Mũa ire masiboro dopa õpa ta ĩgu wahgãnũgacũ iigũra, arĩpũ Jesu.

Eropa arĩtuha dũpũ buhadigũre õpa arĩpũ:

—Mũre arĩgu iiaa. Wahgãnũgajaque. Mũ oyarañere aĩgãque. Mũ ya wihigue waque, arĩpũ ĩgũre.

25 ĩgu eroparĩcũ ta mata arĩpehrerã erã ĩhuro wahgãnũgaja, ĩgu oyarañere aĩ ĩgu ya wihigue waha wapũ. Eropa wagũ ĩgu Goãmũre umupeogu mucubiriri mera õaro wereniguipũ.

26 ĩgu eropiicũ ĩarã masapũ arĩpehrerã ĩha Ʃca wañorã. Goãmũre umupeorã mucubiriri mera õaro wereniguiñorã:

—Dohpagãre gajiropa arĩrĩre ĩabũ gua, arĩñorã erã.

Jesu Levĩre sihupũ

Mt 9.9-13; Mr 2.13-17

27 Eropiituha waha, Levĩ waĩcũgũre ĩgu mohmeri taribugue ĩgu arĩgũre bocajapũ Jesu. Levĩpũ oparã ya arĩburire masare wajasea coregu arĩpũ. Eropa bocajagu ĩgũre õpa arĩpũ:

—Yũ mera majagu arĩbu arique, arĩpũ ĩgu Levĩre.

28 ĩgu eroparĩcũ Levĩpũ arĩpehreri ĩgu mohmerare duhucã, Jesu mera waha wapũ.

29 Pũhrũ Levĩ ya wihi Jesu ya arĩburire bosenu iirã iĩñorã. Ero bajarã wajasea corerã, gajirã Levĩ sã mera ba doañorã.

30 Erã mera Jesu ĩgu doacũ ĩarã bajamerãgã fariseo masa, judio masare buherã mera gua ũrugã Jesu buherãre arĩ dũyasoñorã:

—¿Duhpirã ñero iirã wajasea corerã mera bahari mũa? arĩ turiñorã erã.

31 Erã eroparĩcũ peegu Jesu yũhripũ erãre.

—Dorecũbirã duhturure amabeama. Dorecũrã dihta duhturure ahmama. Dorecũrã duhturu amaro dopa ta “Ñerã ãhraa,” arĩrã yũre amarãcoma.

32 Eropigu “Ñerã ãhraa,” arĩrã dihtare erã ñero iirare bujaweredore, õaripũre gohrotocũ iigu aribũ yũhũ. Erã basi “Õarã ãhraa gua,” arĩ pepirãre itamugu aribiribũ yũhũ, arĩpũ Jesu.

Ba duhurire Jesure serẽpiñorã gajirã

Mt 9.14-17; Mr 2.18-22

33 Eropirã bajamerã masa Jesure õpa arĩ serẽpiñorã:

—Ñu buherã bajasuburi Goãmũ ya árĩburire iimorã ba duhuma. Eropi erã bajasuburi Goãmũ mera wereniguima. Fariseo buherã sã erã iro dopa ta iima. ¿Duhpirã mũ buherãpũ Goãmũ ya árĩburire ba duhubeari erã? arĩñorã erã Jesure.

³⁴ Erã eroparĩcũ Jesu erãre õpa arĩ yũhripũ.

—Õpa ãhraa iri: Mojoto diridigu ãgu bosenu iicũ ãgu mera majarã bujawererã ba duhunirã árĩbeama. ãgu mera árĩrã mucubiriri mera barã iima. Eropa ta yũ buherã sã yũ mera árĩrã ba duhumasibeama.

³⁵ Yujunũ yũre Goãmũ aĩcãgũcumĩ. Eropa ãgu aĩra pũhrũ yũ buherã mera árĩsome yũhũ. Irisubugue ta yũ buherã ba duhurãcoma, arĩpũ Jesu.

³⁶ Iribojegue maja buheri mama buheri mera erã buhemoresũdiacũ ãgu õpa arĩ werenemopũ Jesu erãre.

—Ne mama suhrirore miri gasirogã yehgue aĩ, mũrañe suhrirore seretuma masiya mara. Mari eropa seretura pũhrũ mama gasirore mari coecũ, mũra gasiro árĩro tara gameneo yehgueacũ iiaa. Eropirã mũra buheri mama buheri mera wapimoa buhebircãro gahmea.

³⁷ Eropirã ne igui decore imisĩri decore waibũgu gasiro ajurore, mũra ajurore diyebircãro gahmea. Eropa iicũ igui deco pahmuro mũra ajurore yehgue dija wahaa. Iri ajuro yehguecũ igui deco iri ajuro sã cohmoa wahaa.

³⁸ Eropirã igui deco mama decore mama ajuro mera diyero gahmea. Eropa ta mama buheri mũra buheri mera buhebircãro gahmea.

³⁹ Vino deco mũra decore masa erã ihrira pũhrũ mama decore gamebeama erã. Õpa arĩma masa. “Vino mũra deco mama decore õatarinũgaa,” arĩma masa, arĩpũ Jesu erãre.

6

*Sabado árĩcũ Jesu buherã trigo pororire tũrĩñorã
Mt 12.1-8; Mr 2.23-28*

¹ Gajinũ Sabado árĩcũ Jesu ãgu buherã sã trigo pohegue ãha tariañorã. Erogue tariarã, ãgu buherãpũ trigo pororire tũrĩ, gasiri cohro bañorã iriyerire.

² Erã eropa iicũ ãarã bajamerãgã fariseo masa erãre serẽpiñorã:

—¿Duhpirã mũra Sabado mari soorinũ árĩquerecũ ta mohmeri? Mari dorerire tarinũgarã iiaa, arĩñorã fariseo masa.

Erã eroparĩcũ peegũ Jesupũ “Yũ buherã iri dorerire tarinũgarã iibeama,” arĩgu õpa arĩpũ erãre:

3-4 —Iribojegue Davi ĩḡu mera majarã mera oaboagu Goãmũ wihigue ñaja, iri wihi árĩri panre bapũ. Eropa bagu ĩḡu mera majarã sãre badoregu iri panre ópũ. Iri pan pahia dihtare badorera árĩriyoro. Goãmũ doreri iri panre gajirãre badorebiriyo. ¿Davi irire ĩḡu eropa iirare Goãmũ yare erã gojarapũgue buhebirari mũa? Davi i panre bagu Goãmũre tarinũgagu iibiriñumi. Dohpagãre yũ buherã sã i trigo yerire turĩ barã Goãmũre tarinũgarã iibeama.

5 Yũhu masu Goãmũ ĩḡu obeodigu inonu soorinu sãre masa erã iiburire doremasia, arĩpu Jesu.

Mojoto buhadigu õagu wapu
Mt 12.9-14; Mr 3.1-6

6 Gajinu Sabado árĩcũ Jesu judio masa buheri wihigue ñaja buhepu masare. Ero mojoto diayepu buhadigu arĩpu.

7 Ero árĩrã sã bajamerãgã masare buherã, fariseo masa sã Jesure ĩhanũñorã ĩḡure weresãdiarã. Ópa arĩ pepiñorã: “Sabadonu árĩcũ ihĩ masure õagu iibocumi Jesu. ĩḡu eropiicũ ‘Mari soorinu Jesu mohmegu iimi,’ arĩ weresãrãra,” ari pepiñorã.

8 Jesu erã pepirire masigu, mojoto buhadigure õpa arĩpu: —Wahgãnũgajaque. Ohõ arique, arĩpu ĩḡure.

Ĩḡu eropa arĩra pũhrũ mojoto buhadigupu wahgãnũgaja, ero nigupũ.

9 Eropigu Jesu erãre serẽpipũ.

—Mũare serẽpigura: ¿Mari soorinu árĩcũ õarire iicũ õabeari? ¿Ñerire iicũpũre õhari? ¿Soorinu árĩcũ masure masucũ õhari? ¿O soorinu árĩcũre masure wejẽcũpũre õhari? arĩpu Jesu erãre.

10 Eropa arĩḡu Jesu erãre ĩhametupeho, mojoto buhadigure õpa arĩpu daja:

—Mũ mojotore sĩsirãbeoque, arĩpu ĩḡu.

Ĩḡu eroparĩcũ ta mojoto buhadigupu sĩsirãbeo, õari mojoto wayoro.

11 ĩḡu eropa iicũ ĩarã erã ĩḡu mera turaro guañorã.

—¿Dohpa iirãcuri mari ĩre? arĩñorã erã basi.

Jesu ĩḡu buherãre doce gohra ĩḡu apimorãre beyepũ
Mt 10.1-4; Mr 3.13-19

12 Irinũrĩre Jesu utãḡugue Goãmũre serẽḡu mũria wapu. Eroque árĩḡu, ñamire Goãmũ mera werenigui butahmua wapu.

13 Boyorogue ĩḡu buherãre ĩḡu pohro sihubeopũ. Si-hubeotuha erã mera majarãre doce gohra ĩḡu apimorãre beyepũ.

14 Oã árĩñorã Jesu ĩḡu beyenirã: Simore Jesu Pedro piyudigũ, Simo pagũ magũ Andre, Santiago, Ñu, Felipe, Bartolomé,

15 Mateo, Toma, Santiago árĩñorã. Santiagopũ Alfeo magũ árĩpũ. Eropirã Simo celote ya curu majagũ árĩḡũ,

16 Juda Santiago pagũ magũ sã, Juda Iscariote sã árĩñorã ĩḡu beyenirã. Juda Iscariotepũ Jesure ĩhaturirãre ĩhmubu árĩpũ.

Jesu bajarã masare buhepũ

Mr 4.23-25

17 Eropii Jesu ĩḡu buherã mera utãḡũ weca árĩnirã di-jaricũ, bajarã gajirã ĩḡu buherã mera õari pũḡue niguiñorã erã. Gajirã masa sã bajarã árĩñorã. Erã árĩpehrero Judea yeba macari majarã, Jerusalén majarã, Tiro waĩcũri maca majarã, Sidón waĩcũri maca majarã, wũariya tũro árĩri macari majarã ĩḡu pohrogue eranirã árĩñorã.

18 Erã Jesu buherire peerã erarã, erã dorecũrire taudorerã erarã árĩñorã. Watẽa ñajasũnirã sã ĩḡu pohrogue eraa, õarã wañorã.

19 Jesu ĩḡu turari mera õarã wacũ iipũ erãre. Eropirã erã árĩpehrerã ĩḡure mohmepĩnarã erañorã.

Jesu mucubiririre, bũjawereri sãre buhepũ

Mt 5.1-12

20 Pũhrũ Jesu ĩḡu buherãre ĩha, werepũ:

—Mũa mojomorocũrãpũ Goãmũ ĩḡu opũ árĩroguere warãca mũa. Eropirã mũa mucubirirãca.

21 “Dohpaguere mũa oaboarãpũ yapirã árĩrãca. Eropirã mucubirirãca.

“Mũa dohpaguere bũjawere orerãpũ mucubirimorã ãhraa. Eropirã pũhrũguere ĩayerãca. Eropirã mucubirirãca.

22 “Yũhũ masũ Goãmũ ĩḡu obeodigũ ãhraa. Eropirã yaha árĩburire mũa iiri dipuwaja gajirã mũare ĩhaturicũ mũapũ mucubirirãca. Mũare erã cóacũ sãre mucubirirãca. Mũare erã ñero wereniguiquerecũ ta, “Ñerã ãhrima,” mũare arĩquerecũ ta mũapũ mucubirirãca.

23 Mũare erã eropa iinirãre umarogue mũa ejacũgue Goãmũ mũare wũaro õaro iigũcumĩ. Eropirã turaro mucubirirã árĩque. Õaro sĩporãcũrã árĩque. Mũare ĩhaturirã ta erã acawererã mũra iribojegue majarã eropa ta ñero iimũriñuma Goãmũ yare weremũhtanirãre.

24 “Eropirã mũa dohpaguere baja oparãpũ i yebaguere mũa õaro árĩtuhabũ. Eropirã ñero tarirã árĩrãca mũa.

25 “Dohpaguere yapirãpũ mũa oaboarãca. Mũa eropa árĩrã ñero tarirãca.

“Dohpaguere mũa mucubirirã árĩrãpũ pũhrũguere bujawere orerãca. Eropirã ñero tarirãca.

²⁶ “Goãmũ yare weremũhtarã àhrraa,” arĩ gũyarãre “Õarã àhrrima,” arĩriñuma bajarã iribojegue majarã. Mũa mera majarãre eropa ta “Õarã àhrrima,” arĩbocoma masa. Eropa arĩnirã árĩrãpũ ñero tarirãca mũa sã, arĩ buhepũ Jesu.

Mũare ñaturirã erã árĩquerecũ erã sãre mahique

Mt 5.38-48; 7.12

²⁷ Eropigũ òpa arĩ buhenemopũ Jesu:

—Yũre peediarãre, mũare arĩgu tiiaa. Mũare ñaturirã erã árĩquerecũ erã sãre mahique. Mũare ñaturirãre òaro iique.

²⁸ Mũare ñero árĩdorerã erã árĩquerecũ ta òadoreque erãre. Mũare ñero iirã erã árĩquerecũ ta, “Erã sã òaro árĩporo,” arĩ serẽbasaque Goãmũre.

²⁹ Yujugũ mũa wayuporã pacũ, “Gajipũ sãre padiagu paque,” arĩque ñũre. Mũa weca majañe suhrĩrore ñũ emacũ mũa camisa sãre ocãque ñũre.

³⁰ Mũare serẽgũre ñũ serẽropẽ ta oque ñũre. Mũa yare ñũ aĩcũ ñũre dipaturi serẽpibita irire.

³¹ Gajirã mũare òaro iicũ gahmea mũa. Erãre mũa òaro iicũ gamero dopa ta òaro iique erã sãre. Erã òaro iibiriquerecũ ta mũapũ erãre òaro iique.

³² “Mũare umupeorã dihtare mũa umupeocũ iri ne duhpiburi árĩbeaa. Ñerã sã eropa ta iima.

³³ Eropirã mũare òaro iinirã dihtare mũa òaro iicũ iri sã ne duhpiburi árĩbeaa. Irire ñerã sã iima.

³⁴ Eropiro gajirãre wayurã “Yũre wiaque,” arĩcũ mũa wayuri sã ne iri duhpiburi árĩbeaa. Ñerã sã gajirãre wayurã ero pũhrũ wiapehodorerã ohoma.

³⁵ Eropirã mũapũ mũare ñaturirãre mahi umupeoque. Eropirã erãre òaro iique. Eropirã mũa yare mahibirã ta wayuque erãre. Mũa eropa iicũ Goãmũ mũare òaro iigũcumĩ. Goãmũpũ ñũre umupeobirã sãre, ñerã sãre òaro iimi. Eropa ta iique mũa sã. Mũa eropa iirã wũaro wajatarãca. Eropirã Goãmũ turatarigũ mũmaro majagũ porã árĩrãca.

³⁶ Mari Pagũ mũmaro majagũ ñũ mojomoro ñadiro dopa ta mũa sã masare mojomoro ñaque.

Gajirãre “Ñerã àhrrima,” arĩbircãque, arĩpũ Jesu

Mt 7.1-5

³⁷ Eropigũ erãre werenemopũ:

—Gajirãre “Ñerã àhrrima,” arĩrã erã iirare werewũabircãque. Mũa eropa arĩ werewũabircũ Goãmũ mũa sãre

“Ñerã áhrima,” arísome. Gajirã mware erã ñero iirare, erã ñero aríra sãre cãdijique. Mwa eropa cãdijicũ ïagũ Goãmũ mwa sãre mwa ñero iirare cãdijigũcumi.

³⁸ Gajinore oparã gajirãre oque. Mwa eropa ocũ Goãmũ mware ogũcumi. Eropa ogũ mware ðaro queoro wwaro ogũcumi. Òaro wajayegũcumi. Gajirãre mwa orañepẽ ta mwa sãre Goãmũ ogũcumi, arĩpũ Jesu erãre.

³⁹ Eropa arĩtuha Jesu buhenemogu òpa arĩpũ werenigui queori mera:

—Cuiru ïhajabirã erã seyaro erã basi game tãagãrã erã perãgue ta mehtuha yuriñaja warãcoma gobegue. Eropa ta erã cuiru ïhajabirã iro dopa ta Goãmũ yare masibirã sã gajirãre buhediarima. Eropirã erã erã buherã sã peamegue warãcoma.

⁴⁰ Buherã erãre buhegure masitarinũgabeama. Eropirã árĩpehrerã buherã erãre ðaro buhepehora pũhrũ erãre buhegũ iro dopa ta masirãcoma. Eropirã erãre buherã masibirã árĩbiricãporo, arĩpũ Jesu.

⁴¹ Eropa arĩtuha gajũ buheri mera buhepũ daja:

—Mari werenigui queori mera buhecũ òpa iirã áhraa mwa: Mwa acaweregũ ïgũ cuirugue miri pogañegã mehñajacũ iri pogañegãre ðaro ïhaa mwa. Mũ yaru cuirupũre wwarimijiro árĩquerecũ irimijipũre ne pepibea mwa. Eropirã miri pogañegãre mwa ïaro dopa ta mwa acaweregũ ïgũ ñero iiripũre ðaro ïhaa mwa. Mwarũ mwa ñero iirire turaro iiquererã ta irire eropa pepicãa. ¿Dohpa árĩrono eropa áhriri mwa?

⁴² Òpa arĩ wereniguia mwa acawererãre: “Acaweregũ, mwa ñerire iigũ iica. Eropigũ iri ñerire duhucãque,” arĩ wereniguia mwa. Eropa ïgũ ñerire duhudorequerã mwarũ iri ñerire iirã duhubeaa. ¿Duhpirã mwa ñerire iiquererã ta irire eropa pepicãri mwa? Masa erã pũrũpũre ñero ii corerã áhraa mwa eropa iirã. Mwa ñero iiripũre duhumũhtaque. Mwa eropa iira pũhrũ mwa acaweregure “Mũ ñero iirire duhucãque,” arĩ weremasia, arĩ buhepũ Jesu.

Masa erã wereniguirire peerã erã árĩricũrere masia mari, arĩ werepũ Jesu

Mt 7.17-20; 12.34-35

⁴³ Eropigũ buhenemogu òpa arĩ werenemopũ erãre werenigui queori mera:

—Yucũgũ ðadigũ ñerire dũcacũbeaa. Eropiro ñedigũ sã ðarire dũcacũbeaa.

44 Yucugũ dũcare masirã “Irigũ dũca ta ãhraa,” arĩ masia mari. Poracũdigũ higuera dipure dũcacũbeaa. Eropiro añã poragũ igui tõrire dũcacũbeaa.

45 Eropa ãhrima masa sã. Ōagũ ãgũ pepiri õari ãhraa. Eropigũ ãgũ õarire wereniguimi yucugũ õadigũ irigũ õarire dũcacũro dopa ta. Ñegũre ãgũ pepirigue ñeri ãhraa. Eropigũ ãgũ ñerire wereniguimi yucugũ ñedigũ irigũ ñerire dũcacũro dopa ta. Mari pepirigue iri árĩro dopa ta wereniguia mari, arĩpũ Jesu.

Pe wihi iira queori werepũ Jesu

Mt 7.24-27

46 Eropigũ erãre werenemopũ:

—Mũã yũre “Opũ,” arãã. Eropa arĩquererã ta yũ dorerire iibeaa mũã. ¿Duhpirã eropa iibeari mũã?

47 Árĩpehrerã yũre gamerã yũ wereniguirire peema. Eropirã yũ dorerire tarinũgabeama. Ōpa ãhrima yũre tarinũgabirã:

48 Wihi õaro nugudi iro dopa ta ãhrima erã. ãgũ ãhcãri goberire seha, wihire nugunũgami. Iri wihi õaro ãgũ ãhcãro nugura wihi árĩro dia miricũ turaro deco turaquerecũ iri wihi õaro turaniguia.

49 Eropirã yũ wereniguirire peenirã arĩquererã ta yũ dorerire iibirãpũ wihire õaro nugubigũ iro dopa ãhrima. Iri wihire wecagã nugu, õaro iinũgabeami. ãgũ eropa iira wihi árĩro dia miricũ deco turacũ iri wihi mata cohro yuhria wahaa. Eropiro iri wihi cohmorehrea wahaa, arĩpũ Jesu.

7

Surara opũ pohro majagũre ãgũ dorecũcũ Jesu õagũ iipũ ãgũre

Mt 8.5-13

1 Iri queori masare weretuha Jesu sã Capernaumgue ejañorã.

2 Ero árĩgũ cien surara opũ árĩgũ ãgũ pohro majagũre turaro mahipũ. ãgũ pohro majagũ dorecũgũ árĩgũ sĩriro pohrogue árĩpũ.

3 Eropigũ Jesu ãgũ iirare peegũ, judio masa mũrãre sihu Jesu pohrogue obeopũ opũpũ.

—Yũ pohro majagũre dorecũgũre õacũ iigũ arique, arĩ weredoregũ obeopũ opũ mũrãre.

4 Erã Jesu pohrogue ejarã, õpa arĩ bũrigã serẽñorã ãgũre:

—Surara opũ gũare mũ pohro obeoami. “Yũ pohro majagũre dore taubasagũ ariporo,” arĩ weredoregũ obeoami. ãgũ opũ õagũ ãhrimi. ãgũ eropa árĩcũ itamuque ãgũre.

⁵ Mari ya maca majarāre ĩḡu mahimi. Eropiḡu ĩḡu ḡua buheri wihire ḡua iira waja wajayemi, arĩñorā mārā Jesure wererā.

⁶ Erā eropa arĩ werēcũ peegũ Jesupũ erā mera warũ. Surara opũ ya wihi pohro ĩḡu ejabu iicũ gohra opũrũ ĩḡu mera majarāre Jesure õpa arĩ weredoreḡu obeopũ:

—Opũ, õaroca. Aribita. Őaḡũ árĩbeaa yũhũ. Yaha wihi mure ñajaridorebuno árĩbeaa yũhũ.

⁷ Eropiḡu mũ pohro wabirabũ. Yuju diaye ta mũ turari mera dorebeoque. Mũ eropiicũ yũ pohro majagũ õaḡũ wagũcumi.

⁸ Yũre yũ weca árĩrā gajirā oparā dorema. Eropiḡu yũ sã surarare dorea. Yujugũre “Waque,” yũ arĩcũ ĩḡu wahami. Gajigũre “Arique,” yũ arĩcũ ĩḡu ahrimi. Yũ pohro majagũre “Ire iique,” yũ arĩcũ irire ĩḡu iimi. Eropiḡu mũ sã mũ dorero dopa ta ĩḡu dorecũḡũ tarigũcumi, arĩ weredorepũ surara opũ.

⁹ Jesu irire peegũ, uca wa, bajarā masare ĩḡu mera nũrũsiarāre majinũga werepũ:

—Diaye ta mure arĩḡũ iiaa. Ihĩ surara opũ Israe masũ árĩbiriqũreḡũ Goãmũre bũrigã umupeomi. ĩḡu pohro majagũre yũ õaḡũ wacũ iiburire masituhami. Israe masare ne sihĩ iro dopa umupeorāre ãanibeeaa, arĩpũ Jesu.

¹⁰ ĩḡu eropa arĩra pũhrũ surara opũ Jesu pohro ĩḡu obeonirā erā opũ ya wihigue dujaa wañorā. Dujaja dorecũdigũre õaḡũ ĩḡu árĩcũ ãañorā erā.

Jesu wapeweyo magũre masupũ

¹¹ Pũhrũ ñari Naĩn waĩcũri macague Jesu warũ. ĩḡu buherā bajarā masa sã ĩḡu mera wañorā.

¹² Iri macare ñajaro pohro ĩḡu ejacũ sĩridigũre masa aĩ wiririñorā yaarā warā. Sĩridiḡũ pago wapeweyo árĩpo. Yujugũ ta árĩḡũ igo magũ sĩria warũ. Eropirā ero majarā masa bajarā igo mera wañorā.

¹³ Igo eropa wacũ ãaḡũ Jesu igore mojomoro ãapũ.

—Orebita, arĩpũ Jesu igore.

¹⁴ Eropa arĩḡũ sĩridiḡũ ĩḡu masa porere eja mohmepipũ. ĩḡu eropa mohmepicũ ãarā iri porere coãrãpũ nũgajañorā.

—Mahḡũ, yũhũ mure õpa arãa. Wahgã doajaque, arĩpũ Jesu.

¹⁵ ĩḡu eroparĩcũ ta sĩridiḡũ mũrũ wahgã doaja, wereniḡupũ. Eropiḡũ Jesu ĩḡũre ĩḡũ pagore wiapũ.

¹⁶ Eropirā erā árĩpehrerā ḡũirā warā Goãmũre umupeo õpa arĩñorā:

—Goãmũ yare weremũhtagũ masitarigũ dohpague tamereare mari watope ahrimi, arĩñorā erā.

—Goãmũ marire ïgũ yaräre itamugũ eratumami, arĩnorã gajirã.

17 Eropirã árĩpehrerã Judea yeba majaräre ero tũro árĩri macari majaräre Jesu ïgũ iirare masa weresiripehoñorã.

*Ñu waĩyeri masũ ïgũ buheräre Jesure serēpidorepũ
Mt 11.2-19*

18 Eropi Jesu ïgũ iirare ïarã Ñure peresu árĩgũre wereñorã ïgũ buherã. Eropa erã werecũ peegũ peräre ïgũ pohro sihubeo,

19 Jesure serēpidoregũ obeopũ Ñu. Õpa arĩ serēpidorepũ:

—“Yũ pũhrũ gajigũ arigũcumi,” ¿Ñu ïgũ arĩdigũ ta àhriri mũhũ? ¿O gajigũre corerãcuri gũa? arĩ serēpidorepũ Ñu perã ïgũ buheräre.

20 Eropi erã Jesu pohro eja, serēpiñorã ïgũre:

—Ñu waĩyeri masũ mũre õpa serēpidoregũ obeoami gũare. “Yũ pũhrũ gajigũ arigũcumi,” ¿Ñu arĩdigũ ta àhriri mũhũ? ¿O gajigũre corerãcuri gũa? arĩ serēpiñorã erã Jesure.

21 Irisubu ta bajarã dorecũräre, watẽa ñajasũniräre, cuiiri ïhajabiräre õarã iipũ Jesu.

22 Eropigũ Ñu ïgũ obeoniräre Jesu yũhrípũ:

—Dohpaguere mũa ïarare mũa peerare Ñure wererã waque: Õpa arĩque: “Jesu mera cuiiri ïhajabirã ïhama. Curimasibirã cuhrima. Cami boanirã õarã wahama. Peejabirinirã peea wahama. Sĩrinirã masa wahama,” arĩ wereque. Eropirã mojomorocũräre õari buherire yũ wererare wereque ïgũre.

23 Eropa arĩ weretuhaja õpa arĩ wereque Ñure: “Yũre peegũ ‘Diaye ta àhraa,’ arĩgũ ïgũ mucubirigũ àhrimi, arĩmi Jesu,” Ñure arĩ wererã waque, arĩpũ Jesu.

24 Ñu buherã erã wara pũhrũ Jesupũ Ñu árĩricũrire werenũgapũ bajarã masare:

—Mũa masa marirogue Ñu pohrogue warã, ero majare taare miru weãcũ ïarã ejabiribũ mũa.

25 Õari suhricũgũ sãre ïabiribũ mũa. Õari suhricũrã waja pagarire suhri sañarã oparã ya wirigue àhrima.

26 Masa marirogue ejarã Goãmũ yare weremũhtadipũre ïarã ejabũ. Diaye ta Ñu Goãmũ yare weremũhtagũ àhrimi. Gajirã Goãmũ yare weremũhtanirã tauro árĩgũ àhrimi Ñupũ.

27 Iribojegue Goãmũ yare erã gojarapũ Ñure õpa arĩ wereyuyorõ:

Mari pagu ĩgu magure ōpa arĩpu: “Mu core mure wereyubure obeogu ĩaa,” arĩmi Goãmu, arĩ go-jañuma iribojegure Ñure.

28 “Diaye arĩgu ĩaa. Masa árĩpehrerã tauro ãhrimi Ñu. Isubure ĩgu eropa árĩquerecũ ta umaroguere Goãmu ĩgu opu árĩroguere árĩpehrerã docanugagupu Ñu tauro árĩgucumi, arĩpu Jesu masare.

29 ĩgu eroparĩcũ peerã masa, wajasea corerã mera Ñu ĩgu waĩyenirã árĩrã ōpa arĩ pepiñorã Goãmure: “Goãmu diaye ĩgu ãhrimi,” arĩ pepiñorã erã.

30 Fariseo masapu, judio masare buherã sã Ñu ĩgu waĩyenirã árĩdiabirinirã árĩñorã. Eropirã Goãmu erãre ĩgu itamudiarire erã gamebiriñorã.

31 Eropigu Jesu dipaturi werepu:

—¿Dohpague majarã masa ñehmarano iro dopa ãhriri mua pepicũ?

32 Erã majirã iro dopa ãhrima. Erã majirã doberi duarogue bira doarã, ōpa arĩ duyasoma erãgã erã basi: “Mua bayaburire tarisu gua purirabu. ¿Duhpirã mua mucubiri bayarã aribirari? Eropirã gua burigã ñehamere orerabu. ¿Mupu duhpirã gua mera orebirari?” arĩma duyasorã. Erã majirã arĩ duyasorã iro dopa ta iirã ōpa arãa mua dohpague majarã.

33 Ñu waĩyeri masu Goãmu ya árĩburire ba duhugu, vinore ihribirimi. ĩgu eropa ihribiricũ ĩarã “Pee masibigu ãhrimi,” arĩrabu mua ĩgure.

34 Yupu masu Goãmu ĩgu obeodigu árĩgu yuhu baha ihria. Yu eropa iicũ ĩarã ōpa arãa mua yupure: “Íaque. Ihĩ wuaro bagu merericugu sã ãhrimi. Wajasea corerã ñero iirã erã wapicugu ãhrimi ĩgu,” arãa mua yure.

35 Eropa masibiriquererã ta gua iirare ĩarã, Goãmu masirire gua opacũ masirãca mua, arĩ werepu Jesu erãre.

Fariseo masu Simo waĩcugu ya wihĩ arĩpu Jesu

36 Fariseo masu Simo waĩcugu ĩgu ya wihigue badoregu sihupu Jesure. ĩgu eropa sihucũ Jesu ĩgu ya wihigue eja, erã bari mesague doajapu.

37-38 Iri macaguere ñeri iigo árĩpo. Jesu fariseo masu ya wihigue ĩgu árĩcũ igo peepo. Eropa peego alabastro mera iidirure poresuri dicudirure aĩ, Jesu purupu eranugara puhru orepo. Eropa orego, Jesu guburire igo codeco mera webo, igo poari mera niucóãpo. ĩgu guburi bojocũ ĩha igo ĩgu guburire mihmi, iri poresuri mera pipeopo.

39 Igo eropa iicũ ĩagu fariseo masu Jesure sihudigu ĩgu basi ōpa arĩ pepiripu: “Igo ĩgure mohmepiñago ñerire

iigo āhrimo. Ihī Jesu Goām̄ ya weremuhtagu árīgu irire masiboñumi,” arī pepirip̄.

40 Īgu eropa arī pepirire masigu Jesu werep̄u ĩgure:

—Simo, dohpague tamerare m̄re werediaa, arīp̄u Jesu.

—Buhegu, ¿ȳre dohpa arī werediari m̄h̄u? arī ȳhrip̄u Simo.

41 Īgu eroparīc̄u Jesup̄u òpa arī buhebu ȳhrip̄u:

—Op̄re per̄a wajamor̄a árīñuma. Yujugu w̄aro wajamogu quinientos niyuseri wajamoñumi. Gajigup̄u meroḡa cincuenta niyuserire wajamoñumi.

42 Eropir̄a er̄a wajamorire er̄a wajayegohrabiric̄u ĩagu ĩgu er̄a wajamorire c̄adijic̄añumi. ¿Īgu eropiic̄u dohpague tamerare nihip̄u er̄a op̄re mahitarinugayuri m̄u pepic̄u? arī serēpip̄u Jesu.

43 Simo ȳhrip̄u:

—Ōbaa, w̄aro wajamodigu meroḡa wajamodigu tauro ĩgu op̄re mahibocumi, arīp̄u Simo.

—Diaye ȳhria m̄h̄u ȳre, arīp̄u Jesu.

44 Eropa arītuha ĩgure pipeodigore maji ĩha, Jesu Simore werenemop̄u:

—Igore ĩaque m̄h̄u. M̄u ya wihire ȳh̄u ñajarara p̄hr̄u ȳu guburi coeburi decore obirab̄u m̄h̄u. Igo p̄u ĩgo ya codoco mera yaha guburire coemo. P̄hr̄u ĩgo ya poari mera tucoeamo.

45 M̄up̄u ȳre bocat̄iri mimibirab̄u. Igo p̄u oh̄o ȳu doarop̄e ȳu guburire mihmimo.

46 M̄up̄u ȳu dipurure ñȳu mera pipeobirab̄u. Igo p̄u ȳu guburire poresur̄i mera pipeoamo.

47 Eropa arīgu m̄re weregu ta iiaa. Igo ĩgo ñero iira baja gohra āhraa. Eropigu ĩgo ñero iirare c̄adijiab̄u. Ȳu eropa iic̄u ĩgo turaro mahiamo ȳre. Er̄a ñero iirare meroḡa bujawere guñar̄ap̄u meroḡa ȳre c̄adijidorema. Eropir̄a er̄a ñero iirare meroḡa c̄adijis̄unir̄a meroḡa mahima ȳre, arīp̄u Jesu Simore.

48 Eropa arītuha ĩgu igore werep̄u:

—Dohpague tamerare m̄u ñero iirare coh̄ab̄u, arīp̄u Jesu.

49 Īgu eroparīc̄u peer̄a Jesu mera doar̄a er̄a basi òpa arī wereniguiñor̄a:

—Ihī diaye ta “Ñerire cóagu iiaa,” arīmi. ¿Dohpa árīgano āhriri ĩgu ñero iirire cóagu? arīñor̄a er̄a er̄a basi.

50 Eropigu Jesu nomeore òpa arī werep̄u:

—Ȳre m̄u umupeoc̄u m̄re peamegue wabodigore taua. Güiro mariro waque, arīp̄u Jesu igore.

8

Nome Jesure itamuñorã

¹ Pũhrũ paga macarigue mũta macarigãgue sãre eja, Goãmũ ĩgu opũ árĩrire, ðari buherire werepũ Jesu. Doce ĩgu buherãpũ ĩgu mera árĩñorã.

² Eropirã nome sã watẽa ñajasũnirã nome, dorecũnirã nome, Jesu ðarã ĩgu iinirã ĩgu mera árĩñorã. María waĩcũgo Magdalena erã arĩ piyudigo Jesu mera curipo. Igo siete watẽare Jesu ĩgu cóadigo árĩpo.

³ Juana sã Cuza waĩcũgu Herodere itamudigu marapo sã Jesu mera curipo. Susana waĩcũgo sã gajirã nome mera baja erã gajino opari mera ĩgure itamuñorã.

Jesu oteri masũ queorire werepũ

Mt 13.1-9; Mr 4.1-9

⁴ Eropi baja macari majarã Jesu pohrogue gamenereñorã. Erã gamenerera pũhrũ Jesu ĩgu werenigui queori mera erãre werepũ buhebu:

⁵ —Oteri masũ otegu wañumi. ĩgu eropa otecũ gajiyeri ma tũro yuri merejayoro. Eropirã iriyerire masa curadiuñuma. Eropirã mirimagũ porã bajarã ahri iriyerire bañuma.

⁶ Eropi gajiyeri utã watope yuri merejayoro. Erore yeba deco mariyoro. Eropiro iriyeri puhri wiriri nigui ñañia wayoro.

⁷ Gajiyeri pora yucũ watope yuri merejayoro. Pora yucũpũ puhri tiataria wa, oterayeripũre wejẽcãyoro.

⁸ Gajiyeri ðari yeba yuri merejayoro. Ōaro puhri dũcacũyoro. Eropiro baja dũcacũyoro, arĩpũ Jesu.

Eropa arĩtuha ðpa arĩnemopũ:

—Ire ðaro peeque mũa, arĩpũ ĩgu.

Jesu werenigui queori mera ĩgu buherire werepũ

Mt 13.10-17; Mr 4.10-12

⁹ Pũhrũ ĩgu buherã iri werenigui queorire masidiarã, Jesure serẽpiñorã:

—¿I queori mera dohpa arĩ buhegu iiri mũhũ? arĩ serẽpiñorã erã.

¹⁰ Erã eroparĩcũ Jesu yũhrĩpũ:

—Goãmũ ĩgu opũ árĩrire iribojegue majarã erã masibirare mũare masicũ iimi Goãmũ. Gajirãpũre eropa iibeami ĩgu. Eropigu erãre werenigui queori mera buhea. Yũ eropa iicũ erã yũ buherire peequererã masisome, arĩpũ Jesu ĩgu buherãre.

Jesu oteri masũ queorire were amupũ ĩgu buherãre

Mt 13.18-23; Mr 4.13-20

11 Eropā arītuha erāre werenemopu:

—Ōpā arī werea i werenigui queorire: Oteriyeri ōari buheri iro dopa āhraa.

12 Eropiro ma turo yuri merejariyeripu ōari buheri iro dopa āhraa. Eropiro masa erā ōari buherire peecū īagu watīpu ahri, iri buherire masidorebeamī masare. Īgu eropa iibiricū erā Goāmure umupeoboñuma. Erā eropa umupeocū īagu Goāmuru erāre peamegue wabonirāre tauboñumi.

13 Ūtā weca yuri merejarayeri ōari buheri iro dopa āhraa. Eropirā masa ōari buherire pee, mucubiriri mera irire pee aīma. Eropā pee aīquererā ta ūtā weca arīri yucu nuguri mariri yucu iro dopa ta oā masa sā turabeama. Eropā turabirā yaha ōari buherire erā peera dipuwaja gajirā erāre ñero iicū iarā yahapure duhucāma.

14 Eropi pora yucu weca yurimerejarayeri ōari buheri iro dopa āhraa. Eropirā masa ōari buherire peequererā ta, i yeba majare wuro pepirā, niyerure gamerā, i yeba majare gahmema erā. Eropirā iripu ōari buherire cāhmotaa. Iri cāhmotacū masa Goāmū gameripure iibeama.

15 Eropi ōari yeba yurimerejarayeri ōari buheri iro dopa āhraa. Eropirā masa ōari buherire ōaro mera pee peenurucāma. Eropirā duhuro mariro Goāmū īgu gamero dopa ta ōarire iima, arīpu Jesu.

Jesu sihāgodiru queorire buhepu

Mr 4.21-25

16 Eropā arītuha gajī queori mera buhepu Jesu.

—Ne sihāgodirure masa sihāgora puhru mātatoro doca dibubeama. Eropirā irirure cama doca dibubeama. Ūmarogue irirure duhpeomi wihigue ñajarā erā ōaro īha ñajama ōaro.

17 Mari iiraguere Goāmure duhmasiya mara. Puhrugere arīpehreri masisūroca. Sihāgodiru ñamire boyoro dopa ta iri bojgue erā masibirirare masirācoma masa.

18 Eropirā mūa peerā ōaro peenurūque. Ōaro peenurūgu, ōaro masigūcumī. Peenurūbigū “Merogā peea,” īgu arīquerecū iripu dederea waroca īgure, arīpu Jesu.

Jesu acawererā īgure sihuñorā

Mt 12.46-50; Mr 3.31-35

19 Puhru Jesu pagu porā erā pago mera īgu pohrogue warā iiriñorā. Masa bajarā arīcū īgu pohro ejabiriñorā.

20 Eropigu yujugu Jesure werepu:

—Mū pago mū pagu porā mera disiporogue niguima. Mure iarā ahrañorā, arīpu īgu Jesure.

21 Īḡu eroparīcũ õpa arī werepũ Jesu árīpehrerãre buhebu:

—Goãmũ buherire peerã, irire tarinũgabirã erã ta ãhrima yũ pago yũ pagũ porã iro dopa árīrã, arīpũ Jesu erãre.

Jesu miruñere yũsũdorepũ

Mt 8.23-27; Mr 4.35-41

22 Gajinũ Jesu ĩḡu buherã mera dohodirugue ñaja

—Ina, taribujarã, arī, erã árīpehrerã iriru mera di-tarugue taribuja wañorã.

23 Eropa taribujagũ carĩa wapũ ĩḡu. Erã eropa taribu-jarisubu turaro miruñe ariyoro. Miruñe aricũ pãgũri wahgã, erãre miucãriyoro. Eropa waro mirimaja ḡahya árīyoro erãre.

24 Eropa wacũ ĩha Ʃca wa, Jesu pohro waha, ĩḡure wahḡũnorã.

—Buheḡũ, mari mirimorã iiaa, arīñorã erã. Erã eroparīcũ Jesupũ wahgã, miruñere “Iripẽta weã duhuque,” arīpũ. Eropa arīḡũ pãgũrire “Yũsũaque,” arīpũ. Īḡu eroparīcũ ta miruñe taria wayoro. Eropiro pãgũri sã yũsũ dija wayoro.

25 Eropa wara pũhrũ Jesu erãre õpa arīpũ:

—¿Mũa yũre umupeobeari?

Erãpũ ḡũi, ĩha Ʃca, õpa arī wereniguiñorã erã basi:

—Cue, ¿ñehmũno masũ ãhriri ihĩ? Miruñe, pãgũri sã ĩḡu dorecũ tarinũgabeaa ĩḡure, arīñorã erã basi.

Watẽa ñajasũdigũre õagũ ĩpũ Jesu

Mt 8.28-34; Mr 5.1-20

26 Eropirã erã gajipũ masegue Gerasa majarã ya yebague taribujajañorã. Iri yeba Galilea yeba diaye árīyoro.

27 Ero Jesu ĩḡu majajanũgarisubu ero majagũ watẽa ñajasũdigũ ĩḡu pohrogue arīpũ. Īḡu yoari boje gorow-ereḡũ suhri marĩḡũ árĩḡũ, ĩḡu wihiguere ne árĩbirimũripũ. Eropĩḡũ masa goberi Ʃtã goberi watope arīpũ ĩḡu.

28-29 Eropirã bajasuburi watẽa ĩḡure ñearo mera ĩḡu burĩḡã gorowerecũ ĩha masa ĩḡure bihadoboriñorã. Eropĩḡũ ĩḡu peresugue árĩḡũ ĩḡu mojotorire guburire comedari mera erã diridĩḡũ árĩquereḡũ, ĩḡu iridarire nuapũ. Eropirã watẽapũ ĩḡure masa marirogue aĩḡãñorã. Eropĩḡũ ĩḡu Jesure ĩhametu turaro gaguĩḡũ, Jesu pohro merejapũ. Īḡu eropa iicũ ĩagũ Jesupũ watẽare dorepũ:

—Ihĩ mera árĩbiricãque. Waque watẽa, arīpũ.

Īḡu eroparīcũ peegũ watẽa ñajasũdigũpũ turaro gaguĩḡũ, serẽpipũ Jesure:

—Jesu, ɯmaro majagu Goãmu magu, ¿ñehenore iibu iiri muhu yure? Yure ñero iibiricãque, arĩpu watẽa ñajasũdigupu.

³⁰ Ĩgu eroparĩcũ Jesupu serẽripu ĩgure:

—¿Ñehmuno waĩcari muhu? arĩpu.

Bajarã watẽa ĩgu mera árĩnorã. Eropigu õpa arĩpu erãre opagu.

—Watẽa bajarã waĩcua gua, arĩpu watẽa ñajasũdigupu.

³¹ —Ƭhcãri gobegue guare wadorebita, arĩ, turaro serẽnorã watẽapu.

³² Irisubure ero utãgu gubuye bajarã yesea barã iĩnorã. Erã ero bacũ ĩarã watẽa õpa arĩ serẽnorã Jesure:

—Soã yesea pohrogue wadoreque guare. Erã mera árĩdoreque guare, arĩ serẽnorã watẽa masure ñajanirã.

Erã eropa arĩ serẽcũ peegu Jesu erãre yesea pohrogue wadorepu.

³³ Ĩgu eropa wadorera puhru watẽapu masu mera árĩnirã waha, yesea pohrogue ejañorã. Erã pohrogue erã ejara puhru yeseapu gorowere dipaturugue omabuha, ditarugue yuriñaja miri sĩripehrea wañorã.

³⁴ Yeseare ĩhadibunirãpu yesea eropa miricũ ĩarã, gũi omagã wañorã. Eropa omagãrã macague eja, iri maca majarãre campo majarã sãre erã ĩarare weresiripehocãñorã.

³⁵ Erã eropa werera puhru masa ĩarã wañorã. Eropirã Jesu pohro eja, watẽa ñajasũdigu muru ĩgu suhri sañadigu pee masigu ĩgu ero õaro doacũ ĩañorã erã. Iri árĩpehrerire ĩarã erã gũi árĩnorã.

³⁶ Watẽa ñajasũdigu muru ĩgu õaro árĩcũ ĩanirã gajirãre erã ĩarare wereñorã.

³⁷ Eropa pee ero majarã Gerasa yeba majarã árĩpehrerã burigã Jesure gũĩnorã. Eropirã ĩgure wadoreñorã. Erã eropa wadrecũ Jesu dohodirugue ñajapu wabu.

³⁸ Watẽa ñajasũdigu murupu Jesu ĩgu waborore ĩha turaro ĩgure serẽripu:

—Mu mera wadiaca, arĩ serẽripu.

³⁹ Ĩgu eroparĩcũ Jesu ĩgure yuħripu:

—Mu ya macague waque. Eropa wagu Goãmu mre õaro iirare wereque gajirãre, arĩpu Jesu.

Ĩgu eropa arĩra puhru ĩgu ya macague ejaqu Jesu ĩgure õaro iirare árĩpehrerãre ĩgu ya maca majarãre werepu.

Jairo magore õago iipu. Eropa árĩcũ ne behrego sãre õago iipu Jesu

Mt 9.18-26; Mr 5.21-43

⁴⁰ Sipu masegue Jesu dipaturi ĩgu taribujajacũ ĩarã masa bajarã ĩgure corenirã bocatĩri serẽnorã ĩgure.

41-42 Ero buheri wihi opu Jairo waicugu Jesu pohro eja, igu guburi pohro merejapu. Igu mago sirigo iipo. Igo yujugo ta arigo doce bojori opago aripo. Eropigu igu igu ya wihigue Jesure sihugapu. "Au," arī, igu mera wapu Jesu sā.

Igu eropa wacū masa bajarā igure nurusiarā cūriro iñnorā igure.

43 Eropigo yujugo nomeo doce bojori gohra duhuro mariro eropa behrego ero aripo. Ero corere duhturuare igo ya niyeru mera arīpehrerire wajayeripo igo ocoyedorego. Erā eropa ocoyequerecū ta mūraro ta di waniguicāyoro igore.

44 Eropigo igo Jesu puhru ahri, igu suhriro ojogorore igo ñeacū igore di wiriniguicāra pehrea wayoro.

45 Igo eropa ñeañacū Jesu pepigu serēpiru.

—¿Noa yu suhrirore mohmepiari? arīpu igu.

Arīpehrerā "Mohmepibea," arīñorā. Eropirā Pedro sā opa arī yuhriñorā:

—Buhegu, cūhña āhraa. Eropirā masa bajarā mure pēhrecāma. ¿Duhpigu eropa arī serēpiri mūhū? arīñorā erā Jesure.

46 Erā eroparīcū Jesu yuhripu:

—Dohparagā yu turari mera yujugore dore yuhū cóārare masia. Eropigu yure igo ñeañarare masia, arīpu igu.

47 Igu eroparīcū peego igo duhrimasibigo, naragāgo Jesu pohro merejapo. Eropigo arīpehrerā masa erā peero igo aripo Jesure:

—Yuhū ñeañabu mure. "Iguere ñeañacū yu dore taria waroca," arigo mure ñeañabu. Yu mure eropa ñeañago mata ōago wahabu, aripo.

48 Igo eropa arītuhajacū Jesu igore werepu:

—Mahgo, yure mū umupeiore mera ōago dujaa dohpague. Mucubiriri mera waque, arīpu igore.

49 Igu eropa arīrisubu Jairo ya wihi arīgu weregu erapu.

—Mū mago siria wahāmo. Eropigu ihī buhegure sihubita pare, arīpu igu.

50 Igu eroparīcū peegu Jairore opa arī werepu Jesu:

—Bujawerebita. Yure umupeoque. Iri dihtare iique. Mū eropa iicū ōago wagocumo, arīpu Jesu.

51 Eropa arītuha Jairo ya wihigue eja, Pedrore, Ñure, Santiagore, dorecūgo pagu sumarāre aī ñajapu. Gajirāpure Jesu ñajadorebiripu.

52 Ero arīpehrerā masa erā ñeamere orerā iñnorā. Jesu erāre arīpu:

—Orebiricāque. Iogā siribeamo. Carīgo iimo, arīpu igu.

⁵³ Īḡu eroparīcū erāpū igo sīridigo árīcū masirā “Eroparīcāḡu iimi ihī,” arīrā Jesure ĩayeñorā.

⁵⁴ Eropiḡu Jesu igo mojtore ñeha, arīpū igore:

—Majigo, wahḡaque, arīpū.

⁵⁵ Īḡu eropa arīcū igo sīridigo árīquerego igo sīporā goecū masa wapo. Irisubu ta wahḡānḡajapo igo. Igo eropa wahḡāra pūhrū Jesu igore barire odorepū.

⁵⁶ Igore eropa ĩḡu masacū ĩarā igo pagu sūmarā ĩhamaria wañorā. Eropiḡu Jesu irire gajirāre weredorebiripū.

9

Jesu doce ĩḡu buherāre buhedoreḡu obeopū

Mt 10.5-15; Mr 6.7-13

¹ Eropi Jesu doce ĩḡu buherāre sihubeo, ĩḡu turarire ópū ĩḡu erāre. Watēare erā cóāburire, dorecūrāre erā ñarā iiburire ópū ĩḡu turarire erāre.

² Eropa iituha erāre Goāmū ĩḡu opū árīrire buhedoreḡu, dorecūrāre ñarā iidoreḡu obeopū erāre.

³ Ōpa arī dorepū Jesu erāre:

—Mūa warā gajinore aībiricāque. Tuadire, ajure, barire, niyerure aībiricāque. Yujuñe suhriro ta sañaque. Peñe sañabita.

⁴ Árīpehrerogue mūare erā carīro ocū iri wihi ta dujanique. Ne warāḡue wiriaque iri wihire.

⁵ Gaji macari majarā mūare erā gamebiricū ĩarā iri macare tarigā waque. Eropa warā mūa guburi maja nicure moje siripique mūa erāre erā ya dipuwajare ĩhmumorā, arīpū Jesu.

⁶ Īḡu eropa arīra pūhrū ĩḡu buherāpū waha, árīpehreri macarigue masare ñari buherire were curiñorā. Eropirā dorecūrāre ñarā wacū iñorā.

Jesu ĩḡu iirare Herode peepū

Mt 14.1-12; Mr 6.14-29

⁷ Eropi Herode Galilea yeba majarā opū Jesu ĩḡu iirare peebeopū. “¿Noa āhriri ĩḡu Jesu?” arīquereḡu ne masibiripū. Yujurāyeri ñpa arīñorā Jesure. “Ñu waīyedi mūru dipaturi masa deyogū iicumī. Eropiḡu Jesu erā arīḡu ĩḡu ta āhrimi,” arīñorā gajirā. Erā eroparīcū peegū Herode Jesure dohpa arī masibiripū.

⁸ Eropirā gajirā “Īḡu Elia mūru dohpague dehyoagu iimi,” arīñorā. Gajirāpū “Goāmū ya weremūhtanirā mera majagū árīcumī daja masa mūrigū,” arīñorā Jesure.

⁹ Erā eropa arī wereniguiquerecū ta ñpa arī pepipū Herode: “Ñu dipurare tabetadoreḡu wejētuhabū ĩḡupure

yuhũ. ¿Eropigu masa erã werewuagu nihino árĩbocuri ĩgu?" arĩ pepi ĩgu Jesure ĩadiaripu.

Jesu masa bajarãre barire ópu

Mr 14.13-21; Mr 6.30-44; Jn 6.1-14

¹⁰ Eropi Jesu ĩgu obeonirã ĩgu pohrogue dujaja, erã iirare wereñorã Jesure. Erã weretuhacũ Jesu erã dihtare Betsaidague sihu waripu.

¹¹ ĩgu erã dihtare sihuquerecũ erã warare masirã, masa bajarã nurusiagañorã. Jesu ĩgure erã nurusiajacũ ĩagu ĩgu bocatĩri serẽpu erãre. Eropigu ĩgu Goãmũ ĩgu opu árĩrire erãre were, dorecũrãre ðarã iipu.

¹² Ñamicague doce ĩgu buherã ĩgu pohrogue eja, Jesure wereñorã:

—Ohõ masa marirogue ãhraa. Õ majaro maja wirigue oã masare obeoque. Carĩmorã erã batuburire amadoreque erãre, arĩñorã erã Jesure.

¹³⁻¹⁴ Erã eroparĩcũ Jesu yũhripũ erãre:

—Mũa basi barire oque erãre, arĩpu.

Ĩgu eroparĩcũ peerã erã yũhriñorã:

—Cinco pan dipurure, perã ta wai sãre iripẽta opaa mari. Oã masa bajarã erã baburire asũmasiya mara marire, arĩñorã ĩgu buherã.

Bajarã masa erã árĩcũ eropa arĩñorã ĩgu buherã. Eroguere cinco mil uma árĩñorã. Eropigu Jesu werẽpu ĩgu buherãre:

—Yujurãyeri cururi cincuenta gohra doadoreque. Gaji curu sãre erã nũcu ta doadoreque, arĩpu Jesu ĩgu buherãre.

¹⁵ ĩgu eroparĩcũ ĩgu buherã ĩgu dorero dopa ta iĩñorã. Árĩpehrerã masare doadoreñorã.

¹⁶ Doadoretuha Jesu cinco pan dipurure, perã wai mera aĩ, mũarogue ĩhamemuju, Goãmũre “Õhaa,” arĩpu. ĩgu eropa arĩra pũhũ pan dipurure nuha, ĩgu buherãre masare gueredoregũ ópu.

¹⁷ Eropirã erã árĩpehrerã masa baha yapia wañorã. Erã ba dũharare doce puiuri gohra aĩ gameneo mũtudoñoñorã ĩgu buherã.

Mũhũ Cristo Goãmũ ĩgu obeodigu ta ãhraa, arĩpu Pedro

Mt 16.13-19; Mr 8.27-29

¹⁸ Yujunũ Jesu yujugũ ta Goãmũre serẽgu iipu. ĩgu wereniguirisubu ĩgu buherã ĩgu pohrogue arĩñorã. Eropigu Jesu serẽpipũ erãre:

—¿Nihino árĩcũri yuhũ, masa erã pepicũ? arĩ serẽpipũ.

Ĩgu eroparĩcũ peerã ĩgu buherã yũhriñorã:

19 —“Ñu waĩyedigũ mũrũ árĩbocumi,” arĩma mũre. Gajirã “Elia mũrũ árĩbocumi,” arĩma. Gajirã, “Goãmu ya weremũhtanirã mera majagu iribojegue majagu masa mũriadi árĩbocumi,” arĩma, arĩ yũhriñorã ĩgu buherãpũ ĩgũre.

20 Erã eropa arĩra pũhrũ Jesu erãre serẽpipũ daja:

—¿Mũrapũ pepicũ nihino árĩcuri yũhu? arĩ serẽpipũ daja.

—Mũhu Cristo Goãmu ĩgu obeodigu ta ãhraa, arĩ yũhripũ Pedro.

Jesu ĩgu sĩriburiñere werepũ

Mt 16.20-28; Mr 8.30-9.1

21 Eropi Pedro “Cristo ãhraa mũhu,” ĩgu arĩrare ne gajirãre Jesu weredorebiripũ.

22 Eropa weredorebirituhagu ðpa arĩpũ:

—Yũhu masũ Goãmu ĩgu obeodigu burigã ñero tarigũca. Eropa ta tariro gahmea yũre. Eropirã pahia oparã, mũrã, judio masare buherã mera yũre gamebirã wejẽrãcoma. Erã wejẽra pũhrũ ùhrenũ pũhrũ masa mũriagũca, arĩpũ Jesu erãre.

23 Pũhrũ árĩpehrerãre ðpa arĩ werepũ Jesu:

—Yujugu yũ mera majagu árĩdiagũ, ĩgu gamero iidiarire duhucãgũcumi. Eropigu yahagu ĩgu árĩri dipuwaja ñero tarigũcumi. Ñero tariqueregu ta yahare iiniguigu árĩgũcumi.

24 Yujugu masũ ĩgu ya árĩburi dihtare pepigu dederea wagũcumi. Eropigu yaha árĩburi yũ gameri dihtare iigu árĩpehrerĩnũri yũ mera ùmaroguere ðaro árĩgũcumi.

25 Yujugu masũ i yeba majare árĩpehrerire opaqueregu peamegue wagũ ðarĩre bocosome.

26 Yujurãyeri yũ buherire werediarã, “Jesu yagu ãhraa,” arĩdiarã guhyasĩrirãcoma. Erã eropa iicũ ĩagu yũ sã erãre eropa iirãre guhyasĩrisãgũca. Yũhu Goãmu ĩgu obeodigu ðarã anyua erã goesiriri mera, yũ Pagũ ĩgu goesiriri mera dujarigu yũre guhyasĩrinirãre guhyasĩrisãgũca yũ sã.

27 Diaye arĩgu tiiaa mũare. Dohpague yujurãyeri mũa õgue arĩrã mũa sĩriboro core Goãmu ĩgu opũ árĩcũgue ĩarãca, arĩpũ erãre.

Jesu dũpũre gohrotopũ

Mt 17.1-8; Mr 9.2-8

28 Eropi ocho nũri irire ĩgu werera pũhrũ Jesu Pedrore, Ñure, Santiagore erã dihtare sihupũ. Eropi waha, Goãmu mera werenĩguirã wañorã. Ëtãgũre mũria wañorã erã.

29 Goãmũre ĩgu serẽrisubu Jesu ĩgu diapo gohrotoa wayoro. Eropiro ĩgu suhri cuimijuri suhri ðaro boreri suhri wayoro.

³⁰ Eropa warisubu perã uma ñgu pohro dehyoañorã. Ñgu mera wereniguirã iñorã. Erã iribojegue majarã Elia muru, Moise muru sã arñorã.

³¹ Erã umaro maja goesiriri mera dehyoañorã. Jesu merogã Jerusalengue ñgu sñriborore erã Jesu mera wereniguirã iñorã.

³² Pedro ñgu mera majarã sã wuja meretaria carĩrã iñorã. Eropa carĩquererã ta uca wahgã, Jesu goesiriri ñha, perã ñgu mera wereniguirã sãre ñañorã.

³³ Moise Elia mera erã warisubu Pedro Jesure òpa arĩpu: —Opu, mari òre arĩcũ òadiaa. Uhre wihigã gohra iirã. Mu ya wihigã, Moise ya wihigã, Elia ya wihigã iirãca, arĩpu Pedro.

Eropa arĩqueregu ta ñgu arĩrare ne masibiripu.

³⁴ Ñgu eropa arĩ wereniguirisubu erãre imica curu cãhmotayoro. Eropa cãhmotacũ ñarã erã güia wañorã.

³⁵ Eropiro imica curu pohecague Goãmũ ñgu wereniguiri busuyoro:

—Ihĩ yu magu yu beyedigu ãhrimi. Òaro peeque ñgure, arĩri busuyoro imica pohecague.

³⁶ Eropa arĩra puhru Jesu dihtare ñañorã erã. Puhru erã ñarare gajirãre werebiriñorã. Ne yujugure werebiriñorã dohra irisubure.

Jesu watĩ ñajasũdigure òagu iipu

Mt 17.14-21; Mr 9.14-29

³⁷ Gajinu erã utãgugue erã dijaricũ bajarã masa Jesure bocatĩriñorã.

³⁸ Eropigu erã mera majagu Jesure piyupu:

—Buhegu, mure turaro ire serẽdiaa yũhũ. Yu magu yujugu ta ãhrimi. Eropigu ñgure ñabasaque muhũ.

³⁹ Watĩ ñajasũ goroweniguicãmi. Iri watĩ ñgure ñeha, gaguiniguicũ ii, tũru naragãcũ ii, sumutua wacũ iimũraa. Eropigu ihĩ watĩ yu magure ñero taricũ ii, ne duhudiabeami ñgure.

⁴⁰ Mu buherãre iri watĩre cóãdoregu turaro serẽrabũ. Yu eropa serẽquerecũ ta erã irire ne cóãmasibirama, arĩpu ñgu Jesure.

⁴¹ Ñgu eroparĩcũ Jesupu òpa arĩpu ero arĩrãre:

—Dohpague majarã mua ñerã ãhraa. ¿Yure ne umupeo-birigohracãri? Yoari boje mure buherabũ. ¿Dipẽ yoari boje yure garibori mua? arĩ turipu Jesu.

Eropa arĩtuha watĩ ñajasũdigu pagure òpa arĩpu:

—Mu magure aĩgãrique, arĩpu.

⁴² Ñgu eropa arĩra puhru ñgu magu Jesu pohrogue ñgu aririsubu watĩ ñgure yebague mehmereja, tũru naragãcũ

iipũ. Īgũ eropa iicũ Jesu watĩre cóãpũ. Īgũ eropa cóãcũ watĩ ñajásũdigũ ðagũ warũ. Eropigũ Jesupũ ĩgũgãre wiarũ ĩgũ pagure.

⁴³ Árípehrerã masa Goãmũ turari mera ĩgũ ðagũ wacũ iirire ĩarã, Ʃca wañorã.

Dipaturi Jesu ĩgũ sĩriburiñere werepũ

Mt 17.22-23; Mr 9.30-32

Masa Jesu ĩgũ iirare ĩha Ʃca wacũ Jesupũ ĩgũ buherãre õpa arĩ werepũ:

⁴⁴ —Dohparagã yũ wereburire cãdijibiricãque mũa. Yũhũ masũ Goãmũ ĩgũ obeodigũ ãhraa. Masa yũre ñeha, gajirãguere yũre wiarãcoma, arĩpũ Jesu.

⁴⁵ Īgũ eropa arĩquerecũ ta erãpũ ĩgũ wererire ðaro peebiriñorã. Īgũ wererare erãre masiya mariyoro. Irisubu ta Goãmũ erãre irire masidorebirinipũ. Eropirã erã güirã irire ĩgũre serẽpibiriñorã.

Jesu buherã erã mera majagũre opũ acudiarĩñorã

Mt 18.1-5; Mr 9.33-37

⁴⁶ Pũhrũ Jesu buherã werenigui dũyatorã iĩñorã:

—¿Mari mera majagũ nihinopũ opũ ñajagũcuri? arĩ dũyatorã iĩñorã erã erã basi.

⁴⁷ Erã eroparĩcũ Jesupũ erã pepirire masigũ, majigũre ĩgũ pohro aĩunugu, ĩgũ buherãre werepũ:

⁴⁸ —Yaha árĩburire iimorã õpa árĩgũgãre bu árĩgũre gamerã yũ sãre gahmea mũa. Eropirã yũre gamerã, yũre obeodigũ sãre gahmea mũa. Mũa mera majagũ mũa pohro majagũ árĩgũ ĩgũ sã opũ ta árĩgũcumĩ, arĩpũ Jesu.

Marire ĩhaturibigũ árĩgũ mari mera majagũ ãhrimi, arĩ werepũ Jesu

Mr 9.38-40

⁴⁹ Pũhrũ Ñũ Jesure õpa arĩ werepũ:

—Buhegũ, mũ waĩ mera watĩ ñajásũnirãre taricũ iiami yujugũ. Īgũre gũa ĩabũ. Īgũ mari mera majagũ ĩgũ árĩbiricũ ĩarã ĩgũre irire iidorebirimũrabũ gũa, arĩpũ Ñũ Jesure.

⁵⁰ Īgũ eroparĩcũ Jesu Ñũre gajirã ĩgũ buherã sãre õpa arĩ werepũ:

—Eropa arĩbiricãque mũa ĩgũre. Marire ĩhaturibigũ árĩgũ, ĩgũ mari mera majagũ ãhrimi, arĩpũ Jesu.

Jesu Santiagore, Ñũ sã erã wererire gamebiripũ

⁵¹ Irisubure Jesu ĩgũ Ʃmũsigue ĩgũ waboro coregã “Jerusaléngue wagũra,” arĩpũ ĩgũ. Eropa arĩgũ wagũ iipũ.

52 Eropirã Jesu core ïgu obeonirã waha, Samaria yeba maja macague eja, ero Jesu ïgu ejaborore amuyudiarĩnorã.

53 Jesu Jerusalengue wabu iipũ. Eroque ïgu wabu árĩcũ peerã, iri maca majarã ïgure gamebiriñorã.

54 Irire peerã Ñu, Santiago mera wereñorã Jesure:

—Opũ, mũ gamecũ umaro maja peame mera mũre gamebirinirãre wejedorerãra Elia mũrũ ïgu iidiro dopa ta, arĩñorã erã ïgure.

55 Erã eroparĩcũ maji ïha turipũ erã perãre:

—Eropa arĩbircãque. Espĩritu Santo yarã ahraa mũa. Dohpague mũa pepiro dopa ta ïgũpũ pepibeami. Yũhũ masũ Goãmũ ïgu obeodigũ i yebaguere arigũ peamegue wabonirãre taugũ aribũ. Masare erã dederecũ iigu aribiribũ, arĩ werepũ Jesu.

56 Eropa arĩ weretuha gajĩ macague Jesu sã carĩrã waha wañorã.

Gajirã Jesu mera wariñorã

Mt 8.19-22

57 Maha erã wacũ, yujugũ masũ Jesure werepũ:

—Mũ mera yũhũ wadiaa noho mũ wadiaro, arĩpũ ïgu.

58 ïgu eropa arĩra pũhrũ Jesu yũhripũ:

—Yũ mera aricũ diasaa ahraa. Nũgũ majarã diayea erã carĩburi toreri opama. Mirimagũ porã sã erã ya suhri opama. Yũ masũre Goãmũ ïgu obeodigũpũre sooro mara. Ne yaha wihi mara. Eropirã yũ mera árĩrã ñero tarirãca mũa, arĩ yũhripũ Jesu.

59 Pũhrũ gajigũre Jesu sihurũ:

—Yũ mera majagũ árĩbu arĩque, arĩpũ.

ïgu eroparĩcũ ïgu yũhripũ Jesure:

—Opũ, yũhũ yũ pagũ sĩricũ yaanigũ wagũra. Pũhrũ mũ mera wagũra, arĩpũ ïgu.

60 ïgu eroparĩcũ Jesu werepũ:

—Yũre gamebirã sĩrinirã iro dopa ta ahrima. Erãpũ sĩrinirãre yaaporo. Eropigũ mũpũ Goãmũ ïgu opũ árĩrĩre õari buherire buhegũ arĩque, arĩpũ Jesu ïgure.

61 Eropigũ gajigũ Jesure õpa arĩpũ:

—Opũ, mũ mera wagũra. Yũ acawererãre goeriserenigu wanigũra dohpa, arĩpũ ïgu Jesure.

62 ïgu eroparĩcũ werepũ Jesu ïgure:

—Mohmebu mohmediabigũ ïgu duhpibu árĩbeami. ïgu iro dopa árĩgũ õpa ahrimi: “Goãmũ yare iidiaa,” arĩqueregũ irire ne iibeami. ïgu Goãmũ yagũ árĩbodigũ árĩbeami, arĩpũ Jesu.

10

Jesu setenta buherãre buhedoregũ obeorũ

1 Pũhrũ Jesu gajirã ĩgũ buherãre setenta buherãre beye, macarigue ĩgũ waboro core obeoyurũ. Yujuyeri macarire perã dihta obeorũ ĩgũ.

2 Eropa obeogũ õpa arĩ werepũ erãre werenigui queorire buhegũ:

—Ojodũca baja iri bũgatuhajacũ baja árĩcũ baja mohmeri ãhraa. Mohmeri masapũ bajamerãgã ãhrima. Eropa ta õari buherire peemorã bajarã árĩcũ wũaro ãhraa mari mohmeri. Iri eropárĩquerecũ ta mari masare buhemorã bajamerãgã ãhraa. Eropirã õari buherire buhemorãre gajirãre ĩgũ obeomorãre Goãmũre serẽque mũa.

3 Waque mũa. Mũare yũ obeogũ oveja iro dopa árĩrãre mũare yeea guarã iro dopa ta ñerã árĩrã watopegue obeogũ iiaa.

4 Niyeru ajure, paga aju sãre, zapature aĩbircãque. Mũa mague curirã gajirãre bocajarã wereniguibircãque. Diaye ta taria waque.

5 Árĩpehreri wirire mũa ñajari wirire i wihi majarãre, “¿Ãhriri mũa?” arĩmũhtaque.

6 Iri wihi majarã õaro mera árĩrã gamequeãro mariro erã árĩcũ õadoreque erãre. Õaro mera erã árĩbircũ iri wihi majarãre irire õadorebita.

7 Yuju wihi ñajanũgarã erã õaro árĩcũ iri wihi ta dujaque. Iri wihi majarã mũare erã ejorire baha ihrituque. Mohmegũre ĩgũ wajatarire aĩro gahmea. Eropirã mũa erãre buhera waja erã bari orire aĩque mũa sã. Eropirã yuju wihi ta mũa ejara wihi ta ñajarã, iri macare gajirã ya wirigue árĩcuribircãque.

8 Macaguere mũa ejarã ero majarãpũ mũare gamerã árĩcũ erã bari ejori árĩcũ baque.

9 Ero majarã dorecũrãre õarã iique. Eropirã õpa arĩque ero majarãre: “Goãmũ mari Opũ dohpaguere ĩgũ árĩborore wererã iiaa mũare,” arĩque erãre.

10 Gaji macague mũa ejacũ erãpũ mũare gamebiribocoma. Erã gamebircũ ĩarã iri maca decogue waha, õpa arĩque erãre.

11 “Gũa nicu imicare guburi maja imicare wejẽsiri cóãrã iiaa mũa gũare gamebiriri dipuwaja ĩhmurã,” arĩque. “Eropirã ire guña árĩque,” arĩque. “Goãmũ mari Opũ dohpaguere ĩgũ árĩborore mũare wererã arirabũ,” arĩque erãre.

12 Mũare diaye yũhũ arĩgũ iiaa. I mũũ pehrecũguere Sodoma majarã mũra bũrigã dipuwajacũrãcoma. Erã eropa

áríquerēcũ ta tauro mũare gamebirãpũ dipuwajacurã árĩrãcoma, arĩpũ Jesu.

Gaji macari majarã Goãmũre tarinũgarã árĩñorã

Mt 11.20-24

¹³ Pũhrũ Jesu õpa arĩpũ macari majarãre:

—Corazín majarã, mũa ñero tarirãca. Betsaida maca majarã mũa sã ñero tarirãca. Mũa ya macaguere Goãmũ ãgũ turari mera deyro moarire iirabũ yũhũ. Mũa pee-birabũ. Iribojegue Tiro waĩcũri macare, Sidón waĩcũri maca sãre ãgũ turari mera iri deyro moarire yũ ii ãhmucũ ãarã ero majarãpũ erã ñero iirire bũjawereboañuma. Eropa iirã õaripũre gohrotoboañuma. Mata erã bũjawererã erã bũjawererĩ suhrire saña, erã basi pea witũ mera mohsiripeoboañuma erã ñerire bũjawererire ãhmumorã. Mũapũ eropa iibeaa.

¹⁴ Eropigũ mũare arĩgũ tiiaa. Goãmũ ãgũ dipuwaja moarinũ árĩcũ Tiro majarã mũra, Sidón majarã mũra tauro mũapũre mũa ñeri dipuwaja dipuwaja moagũcumĩ ãgũ.

¹⁵ Capernaum majarã, mũa ejatuharo mera Goãmũ pohrogue wadiaribũ. Eropirã mũa Goãmũ yapũre iidia-biricũ mũare Goãmũ peamegue cóãgũcumĩ, arĩpũ Jesu.

¹⁶ Eropa arĩtuha ãgũ buherãre wererũ:

—Mũare peerã yũ sãre peema. Mũare gamebirã yũ sãre gamebeama. Eropirã yũre gamebirã, erã yũre obeodigu sãre gamebeama, arĩpũ Jesu erãre.

Setenta buherã dujarañorã

¹⁷ Pũhrũ setenta buherã mucubiriri mera dujarañorã:

—Opũ, mũ waĩ mera mũ turari mera watẽare masaguere gũa wiridorecũ erãpũ gũare yũhriama, arĩñorã erã Jesure.

¹⁸ Erã eroparĩcũ Jesu yũhrĩpũ erãre:

—Õmarogue miariñe dijarĩro dopa ta watĩ ãgũ dijaricũ ãabũ.

¹⁹ Peeque. Mũare yũ turarire ohabũ yũhũ. Eropirã añare, corebare, watĩ marire ãhaturigũre arĩpehreri ãgũ turari sãre mũa tarinũgaburire mũare ohabũ yũhũ. Eropirã erã mũare ñero iimasibeama.

²⁰ Yũ eropa oquerēcũ ta watẽa mũare erã tarinũgabiricũ ãarã iri dihtare mucubiribita. Ipũre mucubirique. Õmarogue Goãmũ yarã erã waĩre ãgũ gojaturipũgue mũa waĩre ãgũ gojatura árĩcũ masirã, iripũre mucubirique mũa, arĩpũ Jesu erãre.

Jesu mucubirĩpũ

Mt 11.25-27; 13.16-17

²¹ Irisubure Espĩritu Santo Jesure bũrigã mucubiricũ iipũ. Eropigũ Jesu õpa arĩpũ ãgũ Pagũre:

—Ahũ, mũhũ ɔmaro majarã tauro opũ, i yeba majarã tauro opũ ãhraa. I mũ buherire “Masituhaja gũa,” arĩrãre masicũ iibeaa. Mũ yare masipehobirãpũre masicũ iibũ mũhũ. Mũ eropa iicũ ãagũ “Ōataria,” arãa yũhũ mũre. Eropa ta ãhraa, ahũ. Erã masibirãpũre erã masicũ gahmeabũ mũhũ, arĩpũ Jesu.

Eropa arĩtuha gajirãre òpa arĩpũ:

²² —Yũ Pagũ árĩpeherrerire yũ iiburire apimi yũre. Yũ Pagũ dihta yũre masimi. Yũ dihta ãgũre masia. Yũ beyenirã sã ãgũre masima yũ masidorenirã árĩrã. Erã nũcũ ta yũ Pagũre masia gũa, arĩpũ Jesu.

²³ ãgũ eropa arĩra pũhrũ erã seyaro erã árĩcũ Jesu ãgũ buherãre òpa arĩpũ:

—I árĩpeherrerire ãarã mucubirirã ãhraa mũa.

²⁴ Diaye ta ãhraa. Bajarã Goãmũ ya weremũhtanirã, yebari majarã oparã sã dohpague mũa ãarire ãadiariñorã erã sã. Eropirã mũa peeri sãre peediarĩnorã. Erã eropa masidiaquerecũ ta Goãmũ erãre masidorebiripũ irisubugũere, arĩpũ Jesu.

Ōagũ Samaria majagũ queorire wererũ Jesu

²⁵ Irisubu ta judio masare buhegũ Jesu pohro eraa, Jesure ãgũ ñero wereniguicũ iidiaripũ:

—Buhegũ, ¿yũ árĩpeherrerinũri Goãmũ mera árĩdiagu dohpa iigũcuri yũhũ? arĩ serẽripũ ãgũ Jesure.

²⁶ ãgũ eroparĩcũ Jesu yũhrĩpũ ãgũre:

—¿Dohpa arĩ irire wereri Goãmũ yare erã gojarapũgue? ¿Goãmũ ãgũ arĩ gojarapũguere ãgũ mera òaro árĩdiarire dohpa arĩri mũ pepicũ? arĩpũ Jesu ãgũre.

²⁷ ãgũ eroparĩcũ ãgũ yũhrĩpũ:

—Ōpa arĩñumi Goãmũ: “Turaro mũ sĩporã mera, mũ turari mera, mũ òaro guñari mera Goãmũre mahique. Eropigũ mũ basi mahiro dopa ta mũ pohro árĩrã sãre mahique,” arĩ apiñumi Goãmũ marire, arĩpũ ãgũ Jesure.

²⁸ ãgũ eroparĩcũ Jesu yũhrĩpũ:

—Diaye ta arãbũ mũhũ. Irire iique. Eropigũ árĩpeherrerinũri Goãmũ mera árĩgũca mũhũ, arĩpũ ãgũre.

²⁹ ãgũ masare buhegũpũ “Ihĩ Goãmũ ya dorerire iipehogũ ãhrimi,” masa ãgũre erã arĩ pepicũ gamepũ. Eropa gamegũ ãgũ Jesure òpa arĩ serẽpinemopũ:

—¿Noa ãhriri Goãmũ yũre mahidoregũ? arĩpũ ãgũ.

³⁰ ãgũ eroparĩcũ Jesupũ òpa arĩ yũhrĩpũ Samaria majagũ ãgũ iirare weregũ:

—Yujunũ Jerusaléngue árĩdigũ Jericógue wagũ maha ãgũ curicũ yajari masa ãgũre ñeañorã. Eropa ñearã ãgũ

suhrirore tuwea aĩ, ĩgũre turaro pañorã. Eropa parã sĭrimerejacũ gohra duhuñorã ĩgũre.

31 Irisubu ta pahi iri mague aripũ. Eropa arigũ erã padigũre ĩaqueregũ ta maha gajipũ masepũ ĩgũre ĩhatarigã warũ.

32 Eropi Goãmũ wihi mohmegũ sã mojomorocũgũ pohro eja ĩgũre ĩha gajipũ masepũ tarigã warũ.

33 Erã eropiiquerecũ Samaria majagupũ ero waha yoañarirogue ĩha ĩgũre mojomoro ĩarũ.

34 Eropigũ ĩgũ mojomorocũgũ pohro eja, igui deco vino uyu mera morera deco mera ĩgũ camire pisũpũ. Pisũtuhaja suhri gasiro mera diricãhmotapũ ĩgũ camire. Tuhaja, ĩgũre ĩgũ yagũ burro weca duhpeo, carĩri wihigue aĩ ejarũ ĩgũre. Ero arigũ ĩgũ Samaria majagũ õaro ĩhadibupũ ĩgũre.

35 Gajinũ ĩgũ carĩri wihi opũre pese niyerusere oho, õpa arĩpũ: “Īre ĩhadibuque. Iseri sihajabiricũ dipaturi dujarigũ wajayepehogũra,” arĩpũ Samaria majagũ wihi opũre, arĩpũ Jesu.

36 Eropa arĩtuha judio masare buhegũre serẽpipũ Jesu:

—¿Oã urerã uma mojomorocũgũ pohro tarianirã ni-hinopũ arĩyuri mojomorocũgũre mahigũ? arĩpũ Jesu.

37 Īgũ eroparĩcũ buhegũpũ Jesure yũhripũ:

—Mojomorocũgũre itamudigũ arĩñũmi ĩgũre mahigũ, arĩpũ ĩgũ Jesure.

—Mũ sã masare eropa ta iigũ waque, arĩpũ Jesu buhegũre.

Marta, María sã pohro Jesu curipũ

38 Eropi Jesu ĩgũ buherã mera wacũ, gaji macague erã curicũ, Marta waĩcũgo erãre igo ya wihi ñajaridorepo.

39 Īgũ ñajara pũhrũ igo pagũ mago María waĩcũgo ĩgũ guburi pohro doa ĩgũ buherire peepo.

40 Igo eropa iicũ ĩago Marta igo mohmeri baja arĩcũ ĩago guapo. Eropigo igo Jesure werepo:

—Opũ, ¿yũhũ yujugo ta mohmecũ yũre yũ pagũ mago igo itamubiricũ õhari mũ ĩacũ? Igo yũre itamudoreque, arĩpo Marta Jesure.

41 Igo eroparĩcũ Jesu yũhripũ:

—Marta, baja mũre mohmeri arĩcũ wũaro pepia mũhũ.

42 Goãmũ ĩgũ yare peedoremi. María õarire iibo irire beyemo. Eropigũ yũre igo peecũ, “Mohmetamugo waque,” arĩbeaa igore, arĩpũ Jesu Martare.

11

Jesu Goãmure serēburire buhepu

Mt 6.9-15; 7.7-11

¹ Yujunꝯ Jesu ĩꝯu Pagure Goãmure serēꝯu iipꝯ. ĩꝯu serētuhacũ yujugꝯ ĩꝯu buherã mera majagꝯ õpa arĩꝯ:

—Opꝯ, Nũ ĩꝯu buherãre ĩꝯu buhediro dopa ta Goãmure serēire gꝯa sãre buheque mꝯhꝯ, arĩꝯ ĩꝯu Jesure.

² ĩꝯu eroparĩcũ peegꝯ Jesu erãre wererꝯ:

—Õpa arĩ Goãmure serēque: “Gꝯa Pagꝯ, ɯmaro majagꝯ mꝯhꝯ õagꝯ ãhraa. Dohpaguere arĩpehrerã weca opꝯ ãhraa. ɯmaroguere mꝯ dorero erã iiro dopa ta i yeba majarã sã iiporo.

³ Eropigꝯ ɯmuri nꝯcꝯ gꝯa baburire oniguicãque gꝯare.

⁴ Gajirã erã gꝯare ñero iirare gꝯa cãdijiro dopa ta mꝯ sã gꝯa ñero iirare cãdijique. Eropigꝯ gꝯa ñeri iiborare cãhmotaque. Gꝯa ñeri iiborare tauque,” arĩ serēque Goãmure, arĩꝯ Jesu erãre.

⁵ Pꝯhrꝯguere ĩꝯu buherãre õpa arĩ buhepu werenigui queori mera:

—Yujugꝯ ñami deco ĩꝯu acaweregꝯ wihigue waha, ĩꝯure serēꝯ: “Acaweregꝯ, ɯreru pan dipure oque yꝯre.

⁶ Gajigꝯ yꝯ acaweregꝯ curigꝯ aridigꝯ dohparagã yaha wihi erami. Eropiro ĩꝯure yꝯ oburi mara,” arĩꝯ ĩꝯu ĩꝯu acaweregꝯre.

⁷ ĩꝯu eroparĩcũ ĩꝯu acaweregꝯ wihi pohecague arĩꝯu yꝯhrĩꝯ: “Yꝯre garibobita. Disiporo bihadiro ãhraa. Yꝯhꝯ, yꝯ porã mera carĩꝯu iiaa. Wahgãro bejabirica yꝯre mꝯre barire obudi,” arĩꝯ ĩꝯu acaweregꝯ.

⁸ ¿Dohpa warocuri serēꝯꝯure? Diaye arãa mꝯare. ĩꝯu acaweregꝯ arĩqueregꝯ ta barire obudigꝯ wahgãbirĩꝯ. ĩꝯu eropa wahgãdiabiriquerecũ ta bari serēꝯꝯu gꝯhyasĩribigꝯ ĩꝯu yoari boje serēniguicũ arĩpehreri ĩꝯu serēro dopa ta pꝯhrꝯ wahgã ogꝯcumi.

⁹ Eropigꝯ ire mꝯare wererꝯ iiaa: Goãmure mari Pagure serēque. Eropa serērã mꝯa serēire bocarãca. Goãmure eropa serēniguicãque. Mꝯa eropa iicũ ĩꝯu ogꝯcumi.

¹⁰ Arĩpehrerã Goãmure serērã aĩrãcoma. Eropirã erã serērare bocarãcoma. Eropigꝯ arĩpehrerã Goãmure eropa serēniguirãre ĩꝯu erãre ogꝯcumi.

¹¹ “¿Mꝯa porã mꝯare erã pan serēcũ ɯtãyepꝯre obocuri mꝯa? Obiriboya. ¿Erã mꝯare erã waire serēcũ añapꝯre obocuri erãre? Obiriboya.

¹² ¿Eropirã mꝯa porã cãreña diuri serēcũ corebapꝯre obocuri mꝯa? Obiriboya.

13 Mũa ñerã árĩquererã ta mũa porãre ðarire omasia mũa. Eropigu Goãmũpũ mũa tauro ðarire ohomi mũare. Ĩgu mari Pagũ umaro majagu ĩgu Espĩritu Santore ogucumi ĩgũre serẽrãre, arĩpũ Jesu ĩgu buherãre.

—*Jesu watĩ turarire opami, arĩ weresãñorã masa Mt 12.22-30; Mr 3.20-27*

14 Irisubure Jesu watĩre cóãgu iipũ. Watĩpũ werenigui-masibigu árĩcũ iipũ masũre. Eropigu watĩ masũre Jesu cóãcũ masũpũ wereniguinũgarũ. ĩgu wereniguicũ peerã masa bajarã ñhamaria wañorã.

15 Erã eropa ucaquerecũ ta gajirãpũ ðpa arĩñorã:

—Ĩhĩ Jesu watẽare cóãgu Beelzebú waĩcugu watẽa opu ĩgu turari mera cohãmi, arĩñorã gajirã.

16 Gajirã “Mũhũ Goãmũ ĩgu obeodigu árĩgu Goãmũ turari mera deyoro moarire ii ĩhmuque guare,” arĩriñorã.

17 Erã eropa dorecũ peegu erã pepirire masigu, erãre ðpa arĩ werenigui queori werepũ Jesu:

—Watĩ ya turari mera watẽare cóãbeaa yũhũ. Yuju maca majarã erã basi gamequeãrã, iri maca majarã pehrea wabocoma. Eropirã yuju wihi majarã erã basi gamequeãrã, iri wihi majarã pehrea wabocoma.

18 Eropigu Beelzebú watẽa opũpũ ĩgu turari mera ĩgu watẽare yũre cóãdoregu ĩgu basi ĩgu yarãre cóãbocumi. Eropirã erã sã wapehrea waboñuma. Mũa yũre ðpa arãa. “Ĩgu Beelzebú turari mera watẽare cohãmi,” mũa yũre arĩ weresãa.

19 Mũa mera majarã sã watẽare cohãma. Eropirã erã “Beelzebú ĩgu turari mera erãre cohãa,” arĩbeama. “Goãmũ ĩgu turari mera watẽare cohãa,” arĩma. Eropirã mũa yũre “Watĩ turari mera watẽare cohãmi,” mũa arĩra diaye árĩbiricũ mũa mera majarã wererãcoma.

20 Eropigu yũpũ watẽare cóãgu Goãmũ ĩgu Espĩritu Santo turari mera iiaa. Yũ eropa cóãcũ ĩarã ðpa arĩ masirãca mũa: “Goãmũ ĩgu opu árĩri i yebaguere árĩtuhaja dohpaguere,” arĩrãca, arĩpũ Jesu.

21 —Watĩ turagu tarinũgari werediacũ ðpa ãhraa, arĩpũ Jesu. —Wihi opu turagu ĩgu mojo mera ĩgu wihire ĩhadibucũ ĩgu yare gajirã aĩmasibeama.

22 ĩgu eropa ĩhadibuquerecũ ta gajigu turatarigu ĩgũre gamequeã, ĩgũre tarinũga, ĩgu mojore emacã, ĩgu yare aĩcã gajirãre gueremi. “Watĩ turagu árĩquerecũ yũhũ turatariagu ãhraa,” arĩgu iipũ Jesu i queori mera.

23 Yujugu yũre gamebigũ yũre ĩhaturigu ãhrimi. Yujugu yũre itamubigu yũre teboricucũ iigu iimi, arĩ buhepũ Jesu.

*Watĩ dipaturi masũguere ñajara queorire werepũ Jesu
Mt 12.43-45*

²⁴ Eropigũ ĩgũ dipaturi werenigui queori mera õpa arĩ buherũ:

—Yujugũ watĩ masũ mera árĩdi waha deco mariri yeba cuhri, ĩgũ sooborore amaripũ. Eropa bocabigũ õpa arĩ pepipũ: “Masũ yũ cóãdi mera dipaturi árĩgũ wagũra,” arĩ pepipũ ĩgũ.

²⁵ Eropa arĩgũ ĩgũ dujaa waha, ĩgũ cóãdigũre ta masũre bocapũ daja. ĩgũre bocaboro core masũpũ õagũ ñeri marigũ árĩpũ.

²⁶ Eropigũ watĩ gajirã siete watẽare ĩgũ tauro ñerãre sihugũ wapũ. ĩgũ eropa sihucũ erã árĩpehrerã watẽa masũ mera árĩñorã. Eropigũ masũpũ ero core yujugũ watĩre opagũ ñetariagũ árĩripũ. Dohpaguepũre bajarã watẽare opagũ árĩgũ, ero core ĩgũ árĩdiro tauro ñegũ dujarũ, arĩpũ Jesu.

Jesu mucubirire werepũ

²⁷ Irire ĩgũ eroparĩcũ masa watope árĩgo Jesure arĩpo busuro mera:

—Mũre porãcũdigo, mũre mihudigo mucubirigo ãhrimo, arĩpo Jesure.

²⁸ Igo eropa arĩtuhacũ peegũ Jesu igore yũhripũ:

—Goãmũ wereniguirire peerã ĩgũ dorerire iirãpũ erã árĩrãcoma mucubirã, arĩpũ Jesu igore.

Masa ñerã Jesure Goãmũ turari mera deyoro moarire iidoreriñorã

Mt 12.38-42; Mr 8.12

²⁹ Eropi bajarã masa Jesu pohro erã eracũ, ĩgũ erãre werenemopũ:

—Dohpague majarã ñerã ãhrima. Yũ diaye arĩgũ árĩcũ mũa masidiarã Goãmũ turari mera deyoro moarire iidoreeraa yũre. Mũa eropa dorequerecũ ta Jona iribojegue majagũ ĩgũ iira dihtare ii ĩhmugũcumĩ Goãmũ masare.

³⁰ Jona Goãmũ yare weremũhtadigũ árĩgũ ĩgũ Ninive majarãre ĩgũ masicũ iidiro dopa ta yũhũ Goãmũ ĩgũ obeodigũ masicũ iiaa dohpague majarãre.

³¹ Dipuwaja moarinũ árĩcũ iribojegue majago opo bũro sur majago bũro igo bũro wahgãnũga mũare dohpague majarãre weresãgocumo. Igo Salomo opũ ĩgũ masirire peediago yoarogue aridigo Salomore peego aripo. Dohpague mũa watopere Salomo tauro masigũ ãhraa. Yũhũ mũa mera árĩquerecũ mũa yũ masirire peediabeaa. Mũa eropa peediabirira waja igo opo bũro mũare “Ñerã ãhrima,” arĩ weresãgocumo.

32 Eropa ta dipuwaja moarinu árĩcũ Ninive maca majarã mura sã mure dohpague majarãre “Ñerã áhřima,” arĩ weresãrãcoma erã. Jona erãre Goãmu yare ĩgu werecũ peerã, erã ñerire bujawere, òarire gohrotonirã árĩñorã erãpu. Dohpaguere mua watopere Jona tauro árĩgu áhřaa yũhũ. Yũhũ Goãmu yare werequerecũ mua ñero iirare bujawerebeaa. Eropirã Ninive majarã mura mure ñerire bujawerebirãre weresãrãcoma, arĩ werepu Jesu.

Masa erã pepiro dopa iima, arĩ werepu Jesu

Mt 5.15; 6.22-23

33 Eropigu buhenemogu òpa arĩpu erãre:

—Masa sihãgodirure sihãgorã dibubeama. Irirure sihãgorã mátasoro docague dibubeama. Irirure amarogue duhpeomi wihigue ñajarirã erã ĩha ñajama òaro.

34 “Mari cuiri mari dupure sihãgodiru iro dopa ta áhřaa,” arĩ werediãcũ òpa áhřaa. Mua pepiro dopa ta iiaa. Mua òaro mera pepirã árĩrã òarire iiaa. Mua ñero pepirã árĩrãpu ñeri dihtare iiaa.

35 Eropirã òaro iique. Mua pepirigue ñero árĩbircãporo.

36 Tuhaja mua pepirigue òari árĩcũ, ñeri ne maricũ òari dihtare pepirãca. Mua pepirigue òari árĩcũ mua òarire iirãca, arĩ buhepu Jesu.

Fariseo masare, judio masare buherã sãre Jesu tuhri werepu

Mt 23.1-36; Mr 12.38-40; Lc 20.45-47

37 Jesu ĩgu buhetuhajacũ ĩagu fariseo masũ ĩgure ĩgu ya wihigue badoregu sihupu. Eropigu Jesu ĩgu ya wihigue ñaja, erã baro erã mera doajapu.

38 ĩgu eropa doajacũ fariseo masupu Jesure ĩhanũřu judio masa moja coeniguiro dopa ta ĩgu moja coebircũ ĩagu òpa arĩ pepipu: “Cuena. ¿Ihĩ duhpigu gũa iro dopa moja coebeari?” arĩ pepipu.

39 ĩgu eropa arĩ pepicũ masigu Jesu ĩgure werepu:

—Mua fariseo masa mua dorero dopa ta mua ihririparire, soropari sãre mua coeweaa mua òarire iirire ii ĩmudiarã. Eropa coequererã ta mua siporãripure coebeaa. Eropirã mua árĩricũri mua pepiripure ne òarire gohrotobea. Mua pepiriguere gajirã yare yajadiarire ñeri dihta áhřaa.

40 Pee masibirã áhřaa mua. Goãmu mua dupure iigu mure pepiri sãre iipu. ¿Irire masibeari mua?

41 Eropirã mua Goãmu ya árĩburire iidiarã mua pepirire òarire gohrotomũtaque. Mua eropa iira puhrũ òarire iirã árĩrãca.

42 “Mua fariseo masa ñero tarirãca. Bari òaro suriburi sarire aĩ deara puhrũ diez quẽri iiaa. Tuhaja yujuquẽ ta

Goāmũ wihigue aĩgã apia Goāmũ dorero dopa ta. Eropa iri dorerire iiquererã ta diaye iirire, Goãmure gamerire mũa ne guñabeaa. Dũcare mũa aĩrare merogã Goāmũ wihire apicũ õhaa. Eropa iirã õpa iinemoque: Diaye iirire, Goãmure gameri sãre iique mũa.

43 “Mũa fariseo masa ñero tarirãca. Buheri wihigue árĩrã õari doari dihtare gahmea mũa. Doberi duarogue masa mũare õaro umupeori mera bocatĩri serẽcũ gahmea mũa.

44 “Mũa judio masare buherã, fariseo masa sã mũa guyaricurã ãhraa. Ñero tarirãca mũa. Masa gobe dibura gobe iro dopa ta ãhraa mũa. Iri gobe pohro masa tarigãrã pohecague boanirã árĩcũ masibeama. Eropa ta masa mũa pohro árĩrã mũa pepirigue ñeri árĩcũ masibeama erã, arĩpũ Jesu erãre.

45 Ĩgũ eroparĩcũ peegu judio masare buherã mera majagu Jesure werepũ:

—Buhegu, irire arĩgu, gua sãre ñero arĩgu iica mũhũ, arĩpũ ĩgu Jesure.

46 Ĩgũ eroparĩcũ Jesu yãhripũ:

—Diaye ta ãhraa. Mũa masare buherã sã ñero tarirãca. Mũa gajirãre erã bocatĩubiririre iidorea erãre. Eropa dorequererã mũapũ erãre ne merogã itamubeaa iri dorerire erã iiboro dopa.

47 “Eropirã mũa ñero tarirãca. Goāmũ yare weremũhtanirã mũra ya masa goberire õaro amuraa mũa erãre umupeoro dopa ta iirã. Mũa eropa iiquerecũ ta iribojegue majarã mũa acawererãpũ erãre wejẽñuma.

48 Erãpũ Goāmũ ya weremũhtanirãre erã wejẽdiro dopa ta mũa sã iiboya. Eropirã dohpaguere erã masa goberire amuraa mũa. Eropa amurã mũa acawererã erãre wejẽrare guñaa mũa. Erã eropa wejẽrare guñarã “Õaro iĩñuma,” arĩraa mũa, arĩpũ Jesu.

49 “Eropigu Goāmũ ĩgu masiri mera õpa arĩ wereyuñumi: “Yahare weremũhtamorãre yũ buherire buhemũhtamorã sãre obeogũra erãre. Eropirã erã yũ obeorãre gajirãre wejẽ, gajirãre ñero iirãcoma,” arĩyuñumi Goāmũ, arĩpũ Jesu.

50-51 I yebare Goāmũ ĩhacũnugura pũhrũ Caĩpũ Abelre wejẽñumi. Ero pũhrũ Goāmũ yare weremũhtanirãre wejẽñuma. Pũhrũ Zacariãre mũa acawererã mũra ta ĩgure wejẽñuma. Ĩgũ Goāmũ wihi pohro Goāmũ ya árĩburire waimurã soeburi mesa pohro árĩcũ mũa acawererã ĩgure wejẽñuma. Árĩpehrerã erãre erã wejẽra dipuwaja dohpague majarã dipuwajacurãcoma. Eropa ta ãhraa. Mũare

ta arĩgu iiaa. Árĩpehrerã erãre erã wejëra dipuwajare dohpague majarãre Goãmũ dipuwaja moagucumi.

⁵² “Mũa masare buherã, mũa ñero tarirãca. Goãmũ masirire ĩgu gojarare opaquererã ta gajirãre werebeaa mũa. Mũa basi Goãmũ yare peebeaa. Eropirã gajirã ĩgu yare erã peediaquerecũ ta irire mũa erãre peedorebeaa, arĩpu Jesu erãre.

⁵³⁻⁵⁴ ĩgu eroparĩcũ peerã judio masare buherã, fariseo masa sã ĩgu mera guarã ĩgure ñero wereniguiñorã. Eropirã Jesu ĩgu ñero arĩ yũhricũ peediarã, erã serẽpinũrũñorã ĩgure weresãdiarã.

12

Erã gũyarire Jesu werepu

¹ Eropi Jesu pohro masa bajarã gohra gamenereñorã. Cũhña taricãyoro. Ero Jesu ĩgu buherãre õpa arĩ werepu:

—Õaro guña masique mũa. Fariseo masa erã pan bugacũ iiburire ĩarã õaro masique. Erã gũyarire weregu iiaa.

² Masa erã yayasãrare puhrũ masirãcoma. Erã dibura sãre gajirã masirãcoma.

³ Eropiro gajirã peebirogue mũa wereniguirare õaro masicũ Goãmũ weregucumi. Bihara taribugue gajigure erã yayarogã erã arĩrare masa bajarã watope masicũ ĩgucumi Goãmũ.

Masa erã gũibure werepu Jesu

Mt 10.26-31

⁴ Eropigu Jesu werenemopũ erãre:

—Diaye arĩgu iiaa mũare. Masure wejërã wejëtuhã dipaturi erã wejëdigure ñero iimasibeama. Eropirã mũare wejëdiarãpũre gũibiricãque.

⁵ Dohpaguere mũa gũibure mũa umupeobure wereguã. Goãmũpũre gũĩ umupeoque. ĩgu mũa sĩrira puhrũ peamegue cóamasimi mũare. Eropa ta ãhraa. Diaye arĩgu tiiaa. Goãmũpũre gũĩ umupeoque.

⁶ Cinco mirua waja marima. Eropa waja mariquerecũ ta erãgãre Goãmũ ĩhadibumi. Ne cãdijibeami erãre. Mirua tauro Goãmũ ĩhadibumi mũapũre.

⁷ Eropigu mũa poari sãre ne yuju podagã duhyaro mariro masipehomi Goãmũ. Eropa ta mũa árĩricuri sãre masipehomi. Eropa masigu mũare ĩhadibuniguicãmi. Miruare ĩgu mahiro tauro mũapũre mahimi Goãmũ. Eropirã ĩgure umupeorã gũibiricãque mũa, arĩpu Jesu.

Jesure mũa umupeorire wereque masare, arĩpu Jesu

Mt 10.32-33; 12.32; 10.19-20

⁸ Eropi Jesu werenemopu:

—Mũare arĩgu iiaa. Yujugu “Jesu yagu āhraa,” masare ĩgu arĩ werecu ĩagu yuhu Goãmu ĩgu obeodigu sã “Īgu yahagu āhrimi,” arĩguca Goãmu yarã anyuare.

⁹ Yujugu masare güigu yure “Jesucristore masibea,” masare arĩ weregure yu sã “Īgure masibea,” arĩ weregucã anyuare.

¹⁰ “Yu masure Goãmu ĩgu obeodigure ñero arĩ erã wereniguicũ iri ñerire Goãmu cãdijimasimi. Eropa cãdijiqueregu ta Espiritu Santopare erã ñero arĩ wereniguicũ irire ne Goãmu cãdijisome.

¹¹ “Mari buheri wirigüe oparã pohro gajirã mũare aĩ ñaja weresãrãcoma. Erã eropa weresãcũ mua arĩ cãhmotaburire ne wũaro pepibircãque.

¹² Irisubu ta Espiritu Santo mua wereburire mũare weregucumi, arĩpu Jesu.

Doberi opu queorire werepu Jesu

¹³ Eropi masa watope arĩgu Jesure õpa arĩ werepu:

—Buhegu, guã pagu ĩgu sĩrira puhru ĩgu ya arĩra guare dujaa. Eropigu yu tĩgure irire yu sãre queoro dũca wadoreque, arĩpu ĩgu Jesure.

¹⁴ Īgu eroparĩcũ Jesu yahrĩpu:

—Ne irinore dũca wabuno arĩbeaa yuhu, arĩpu Jesu ĩgure.

¹⁵ Eropa arĩtuha Jesu arĩpehrerãre werepu:

—Õaro iique mua. Doberire, gajino sãre gametari-bircãque. Baja opaquererã ta iri mera ta mucubirituha-jabea mari, arĩpu Jesu.

¹⁶ Eropa arĩtuha Jesu erãre i queori mera werepu:

—Doberi opu õari yebare opapu. Eropiro iri yebare ĩgu oteri õaro dũcacuyoro.

¹⁷ Eropigu ĩgu, ĩgu basi õpa arĩ pepirĩpu: “Iri dũca yuhu diburi wihire ne sihasome.

¹⁸ Dohpaguere õpa iigura. I wihi dohpague yu dibumũhtara wihire cóacã, dohpaguere mura wihi tauro mama wihĩpare wũari wihi iigura. Iri wihire yaha oteri dũcare, arĩpehrerire dibugura.

¹⁹ Yu eropa iira puhru õpa arĩ pepigura yu basi: ‘Yu arĩpehreri opagu āhraa. Õaro soogura. Eropigu baha, ihri, mucubirigura,’ arĩ pepigura yu basi,” arĩ pepirĩpu ĩgu basi.

²⁰ Īgu eropa arĩ pepiquerecũ Goãmu ĩgure werepu: “Mũhu ne pee masibigu āhraa. Dohpagã ñami ta mũhu sĩriguca. Mũ eropa wacũ mu ya mu mahira dederea waroca mare,” arĩpu Goãmu ĩgure, arĩpu Jesu masare.

21 Irire arĩḡu masare õpa arĩ werepu Jesu:

—Eropa ta warācoma doberi oparā erā Goāmure guñabirā. Baja doberire, niyerure erā ya árĩburi dihtare diburā, Goāmure guñabirā erā mojomorocurā iro dopa árĩrācoma erā Goāmu ĩḡu ĩacũ. Eropiḡu Goāmu erāre ĩhasuabeami, arĩpu Jesu.

Goāmu ĩḡu porāre ĩhadibumi, arĩpu Jesu
Mt 6.25-34

22 Eropi Jesu ĩḡu buherāre õpa arĩ werepu:

—Ire mware arĩḡu iiaa: Mũa barire, suhri sāre wũaro guñaricubiricāque.

23 Goāmũ mware deyoro moaḡu bari dihtare bamorāre suhri sañamorā dihtare iibiriñumi mware. Mũa iri dihtare guñacũ gamebeami.

24 Mirimaḡu porāre Goāmũ ĩḡu ĩhadiburire masique. Erā poeri moorā āhrima. Eropiro erā bari dihburi wiri erāre mara. Goāmũpu erāre erā baburire ohomi. Mirimaḡu porā tauro mũapũre mahimi Goāmũ. Eropiḡu mũa sāre ĩhadibugũcumĩ ĩḡu.

25 Wũaro mũa pepiri mera iri mware pagarā wacũ iibea. Eropiro mari wũaro pepiri duhpiburi árĩbea.

26 ¿Eropirā wũaro mũa pepiri duhpiburi árĩbiriquerecũ ta, duhpirā mũa baburire, mũa ihriburire, mũa sañaburire wũaro guña bujawere pepiri mũa?

27 “Nũḡu maja gorire pepique. Iri gori ne iiro mariro õari goricua. Iri gori õari suhri iro dopa õari gori dehyoa. Salomo opu mũru õari suhri opagũ ĩḡu árĩquerecũ ta iri goripu ĩḡu ya suhri tauro õari dehyoa.

28 Iri gorire õari gori gocũ iimi Goāmũpu. ĩḡu eropa iiquerecũ ta iri goripu bajamenurigā árĩra pũhrũ ñaidija pehrea wahaa. Merogā āhri gajinu peamegue soe cóacāma. Iri eropa mata pehrequerecũ ta iri gorire iri õari gori árĩcũ iimi Goāmũ. Eropiḡu Goāmũ iri gorire ĩḡu õari gori árĩcũ ĩḡu iidiro dopa ta tauro mũa sāre õaro iigũcumĩ. Suhrire ogũcumĩ. Daberogā Goāmure umupeoa mũa.

29 Eropirā mũa baburire, mũa ihriburire wũaro guñabiricāque.

30 Goāmure masibirāpu i yeba majarāpu irire eropa amaniguicāma. Mari Pagũ mũmaro majagũ árĩpehreri mũa gamerire masimi. ĩḡu eropa masicũ mũa ya árĩburire wũaro guñabiricāque.

31 Goāmũ mũa opu ĩḡu árĩborore gamemũhtaque mũa. Mũa eropa iira pũhrũ Goāmũpu mũa gameri dũhyacũ ogũcumĩ, arĩpu Jesu.

*Ūmarogue mari baja opaa, arī masia m̄ua, arīp̄u Jesu
Mt 6.19-21*

³² Eropiḡu erāre werenemop̄u:

—Ȳu mahirā, bajamerāgā árīquererā güibiricāque m̄ua. Goām̄u ĩḡu op̄u árĩrore ĩḡu mera m̄ua árĩcũ gahmemi ĩḡu.

³³ Eropirā m̄ua yare duapehoque. Irire duacā, iri niyerure mojomoroc̄rāre oque. Eropirā ūmaro maja Goām̄u ya árĩburire mohmeque. Eropa ĩrā ūmaro maja m̄ua wajatari ne pehresome. Ūmarogue m̄ua ya árĩri ne pehrebeaa. Eroguere m̄ua yare aĩmasibeami yajari mas̄u. Eropirā mega sã irire tuamasibeama.

³⁴ Ūmarogue m̄ua ya árĩcũ Goām̄u ya dihtare pepirāca m̄ua, arīp̄u Jesu.

Jesu ĩḡu dujariborore coredeop̄u ĩḡu yarāre

³⁵⁻³⁶ Eroparĩtuhaja erāre werenemop̄u daja:

—M̄ua yare amuyunirā iro dopa árĩrā yahare eropa ĩiniguirā árĩrā coreque ȳu dujariborore. Mohme corerā erā op̄u mojoto diriri bosenuque ĩḡu wacũ ĩḡu dujariborore erā cohrema. Erā eropa corero dopa ta ȳu dujariborore coreque m̄ua sã. Op̄u ĩḡu ya wihigue eraa, disiporore ĩḡu dotecũ peerā erā mata pāgũ acuma ĩḡure.

³⁷ Mohme corerā erā op̄u eracũ ĩḡu gamero dopa ta iiyurā árĩrā mucubirirā árĩrācoma. Erā eropa iicũ ĩaḡu erā op̄up̄u mohme coreḡu iro dopa gohrotoḡucumi. Eropiḡu mohme corerāre doadore, ĩḡu erāre barire duhpeoḡucumi.

³⁸ ĩḡu erarisubu ñami deco árĩcũ, o boyorogue árĩquerēcũ mohme corerāp̄u ĩḡu erarisubure ĩḡure ðaro corerā árĩrā, mucubirirā árĩrācoma erā.

³⁹ Ire guñaque m̄ua. Wihĩ op̄u yajari mas̄u ĩḡu eraborore masiḡu, ĩḡu yajari masure coreḡu ñajadorebiriboñumi.

⁴⁰ Eropirā m̄ua sã coreque. Ȳuh̄u mas̄u Goām̄u ĩḡu obeodiḡu guñaña mariro ariḡuca. Eropirā yahare eropa ĩiniguirā árĩrā ȳure coreque m̄ua, arīp̄u Jesu erāre.

Gajiḡu mohme coreḡu ĩḡu op̄ure ĩḡu umupeop̄u. Gajiḡup̄u umpeobirip̄u, arī werep̄u Jesu

Mt 24.45-51

⁴¹ ĩḡu eroparĩcũ Pedrop̄u serēp̄ip̄u Jesure:

—Op̄u, ¿ĩ queorire wereḡu ḡuare arĩḡu iiri? ¿O árĩpehrerāre eropa arĩri? arīp̄u Pedro.

⁴² ĩḡu eroparĩcũ Jesu werenigui queoriñe mera ðpa arī buhep̄u erāre:

—Mohme coreḡu ĩḡu op̄ure umupeoḡu pee masiḡu ðpa ta āhrimi. Op̄u curiḡu waḡu, mohme coreḡure ĩḡu wihire

apimi. Īgu apiguru doregu árīgucumi. Eropigu barisubu árīcū gajirā mohmeri masare barire gueremi.

43 Eropigu opu Īgu ya wihigue dujarami. Īgu opu eracū mohme coreguru Īgu opu Īgu dorediro dopa ta iipehodigu árīgu, Īgu mucubirigu árīgucumi.

44 Diaye arīgu iiaa mware. Īgu eropa iicū ĩagu Īgu opu árīpehreri Īgu yare ĩhadibugu apigucumi ĩgure daja.

45 Ñegū mohme coreguru ōpa ta āhrimi. “Yū opu yoja deyobeami,” arīmi. Eropa arīgu gajirā mohme corerāre ũmare, nome sāre pami. Eropigu wuaro baha, ihri, meremi.

46 Īgu eropa iirisubu guñaña mariro Īgu opu dujaragucumi. Īgu dujararinure ne masibeami mohme coregu. Eropa dujaragu ñegū ĩgu iirare pee ĩgure ñero dipuwaja moagucumi. Eropigu Goāmure tarinuganirāre ĩgu cóādiroque ĩgure cóāgucumi.

47 “Eropigu mohme coregu ĩgu opu gamerire masigu árīqueregu ta irire ĩgu iibiricū, ĩgu ōaro ĩgu mohmebiricū, ĩgu opuru ĩgure burigā dipuwaja moa pagucumi ĩgure.

48 Gajigu mohme coreguru ĩgu opu gamerire masibigu árīcū ĩgu opuru ĩgure daberogā ñari ĩgu eropa árīri dipuwajare pagucumi. Goāmū ĩgu gamerire masicū iimi masare. Eropiro masigure yuhrīro gahmea. Eropiro ōaro masigure ōaro yuhrīro gahmea, arīpu Jesu.

Jesu masare game dūca waricū iimi

Mt 10.34-36

49 Eropa arītuha Jesu erāre werepu daja:

—Peame soewearo dopa ta yūhū i yebare masa erā ñero iirire cóāgu arigu iibū. Dohpague ta masa árīpehreri ñeri marirā árīcū burigā gahmea yūhū.

50 Yūhū ñero tarigūca. Yū eropa ñero tariburire coregu, ñero sīporācua yūhū.

51 ¿Dohpa arī pepiri mūa yure? Yūhū i yebaguere buhegu aricū yū buheri mera “Masa ĩhaturisome pare,” ¿arī pepiri mūa? Eropa árībeaa. Mware arīgu iiaa. Masa yū buherire peerā, pe curu erā basi game dūca warirācoma. Yujurāyeri yū buherire peerācoma. Gajirāpu irire gamebirā erāre ĩhaturirācoma. Eropirā yujuro mera árīsome masa.

52 Eropirā yuju wihi majarā sā cinco masa yū buherire peerā, pe curu erā basi game dūca warirācoma. Yuju curu ũrerā, gaji curu perā árīrācoma.

53 Īgu pagū ĩgu magure ĩhaturigucumi ĩgu yaha buherire peecū. Gajigu magū sā ĩgu pagure ĩhaturigucumi. Eropigo ĩgo pago ĩgo magore ĩhaturigocumo. Gajigo mago sā ĩgo pagore ĩhaturigocumo. Eropigo ĩgo mūñeco ĩgo

bepore ïhaturigocumo. Gajigo bepo sã igo mũñecore ïhaturigocumo. Eropa warãcoma yaha buherire erã peecũ, arĩpũ Jesu.

Jesu “Mũa yũ iirire ïaquererã yũre masibeaã,” arĩ werepũ Jesu masare

Mt 16.1-4; Mr 8.11-13

⁵⁴ Eropi Jesu masare bajarãre õpa arĩ werepũ daja:

—Abe ñajarogue imica cururi ïarã, “Mata deco ariroca,” arãa mũa. Mũa eropa arĩra pũhrũ deco ahraa.

⁵⁵ Eropirã surgue miruñe aricũ “Asirinũ árĩroca,” arãa mũa. Mũa eropa arĩra pũhrũ irinũ asia.

⁵⁶ Mũa gũyaricũrã ãhraa. Yebare ïarã, Ʃmarore ïarã “Õpa waroca,” arĩ masia mũa. Õarinũ árĩborore, ñerinũ árĩboro sãre masia mũa. ¿Eropa õaro masiquererã ta, duhpĩrã dohpague yũ Goãmũ turari mera yũ mũare ïhmuquerecũ ta ne irire õaro masibeari mũa? arĩpũ Jesu.

Mũare ïhaturigũ mera mũa gamequeãrare mũa basi amuque, arĩ werepũ Jesu

Mt 5.25-26

⁵⁷ Eropa arĩtuhaja õpa arĩ werenemopũ:

—¿Mũa diaye iiburire masibeari mũa dohpa?

⁵⁸ Gajigũ mũre weresãgũ wagũ dipuwaja moadoreri wihigue wadorebocumi. Erogue ejaboro core “Dipaturi mũre eropa iisome,” arĩ game amuque. Mũhũ ïgũre amubiricũ mũre ïgũ dipuwaja moadoreri wihigue aĩgãbocumi mũre. Eropigũ dipuwaja moadoregũpũ mũre surarare ïgũ wiacũ, mũre surara peresu iirãcoma.

⁵⁹ Mũre arĩgũ iiaa. Ne erã wajayedorerare mũ wajayepeshocũgue wirigũca mũhũ, arĩpũ Jesu.

13

Mũa ñeri iirare bũjawere, õarire gohrotoque, arĩ buherũ Jesu

¹ Irisubure bajamerãgã masa Jesure õpa arĩ wereñorã:

—Galilea majarã Goãmũre waibũgũre wejẽ, erã soe muju umupeorisubu Pilatopũ erãre wejẽpũ. ïgũ eropa wejẽcũ waibũgũ di mera masa di morera wayoro, arĩ wereñorã erã Jesure.

² Erã eropa weretuhajacũ Jesu yũhrĩpũ:

—¿Galilea majarã Pilato ïgũ wejẽnirã mũrare dohpa arĩ pepiri mũa? ¿Erã eropa sĩrirã gajirã Galilea majarã tauro ñerã árĩra dipuwaja sĩriyuri?

³ Áríbeaa. Muare arĩgu tiiaa. Muapu ñerire bujawerebirã, ñaripure gohrotobirã, mua sã sĩrirã peamegue warãca.

⁴ Eropirã sohõ árĩnirã diez y ocho masa Siloé waĩcari wihi umari wihi erã weca yuribeja wejẽpehoyoro. ¿Eropa wa sĩrirã gajirã Jerusalén majarã tauro ñerã árĩra dipuwaja sĩriyuri mua pepicũ?

⁵ Áríbeaa. Muare arĩgu tiiaa. Mua ñerire bujawerebirã ñaripure gohrotobirã, mua sã sĩrirãca. Eropirã peamegue warãca, arĩpu Jesu erãre.

Higueragu dũca maridigu queorire wereru Jesu

⁶ Eropa arĩtuhaja, Jesu i queori mera wereru erãre:

—Pohe opu ĩgu pohegue ĩgu higueragure opapu. Eropigu ĩgu irigu dũcare amagu waripu. Vocabiripu.

⁷ Vocabirinijagu ĩgu iri pohe mohmegure wereru. “Peeque yure. Uhre bojori gohra higueragu dũcare amaraa. Dũca mara. Irigu dũca maricũ irigure pa cóãcãque. Irigu yaha pohe árĩcũ gajigure otemasibea,” arĩpu pohe opu mohmegure.

⁸ ĩgu eroparĩcũ peegu mohme coregu õpa arĩpu: “Opu, irigu yuju bojori gohra niguiniporo. Yũhu irigu gubuyere seatu nujatu iigura. Tuhaja waibũgu gura mera iri gobere yaagura.

⁹ Yũ eropa iira puhru irigure gaji bojori dũcacũcũ ñaroca. Dũca maricũ mũhu padoregũca,” arĩpu mohme coregu pohe opure, arĩ wereru Jesu.

Sabadonu Jesu dorecũgore õago iipu

¹⁰ Irisubure Sabadonu Jesu judio masa buheri wihigue buhegu iipu.

¹¹ Ero pũriri dorecũgo diez y ocho bojori gohra pũriri dorecũgo árĩpo. Eropigo opatũ niguigo árĩgo, diaye niguimasibiripo.

¹² Igo eropa árĩcũ ĩagu Jesu igore ĩha, piyupu:

—Noméo, mũ dorecũri pehrea wahabu, arĩ piyupu Jesu.

¹³ ĩgu piyura puhru igore ĩgu mohmepicũ mata igo diaye niguigo wapo. Eropa wago “Goãmũ turagu, õagu aħrimi,” arĩ Goãmũre umupeopo igo.

¹⁴ Jesu igore Sabadonu árĩcũ ĩgu õago igore iicũ ĩagu iri buheri wihi opupu ĩgu mera guaru. Eropa guagu ĩgu masare õpa arĩpu:

—Seis nũri aħraa mari mohmerinũri. Eropirã mua dore õarã árĩdiarã irinũrire taudorerã arique. Sabadonũre mari soorinũre irire iibiricãro gahmea, arĩpu wihi opu.

¹⁵ ĩgu eroparĩcũ Jesu õpa arĩ yuhripu:

—Múa guyaricurã áhrraa. Múa wecuare, burro sãre oparã Sabadonũ árĩquerecũ erã diriradare pã, erãre aĩ buha ihridorea.

¹⁶ Dohpague igore Abrahã mũru acaweregore watĩ diez y ocho bojori gohra igore dorecũcũ iimi. ¿Sabadonũ árĩcũ igore õago iidorebeari mua? arĩpu Jesu.

¹⁷ Īgu eroparĩcũ erãpu gahyasĩuro wañorã. Eropirã gajirãpu árĩpehreri Jesu iirare ĩha mucubiriñorã.

Mostaza coye queorire werepu Jesu

Mt 13.31-32; Mr 4.30-32

¹⁸ Eropigu Jesu werepu daja:

—¿Goãmũ masa tauro opu ĩgu árĩri werediacũ ñeheno iro dopa áhriri mua pepicũ? I werenigui queoriñe mera weregura yũhũ.

¹⁹ Mostazayegã iro dopa áhrraa. Iriyegãre oteri masũ yujugu ĩgu ya pohegue otemi. Īgu otera puhru õaro puhria. Eropiro yucũgu wãadigu wahaa. Eropa wacũ mirimagũ porã bajarã irigu dũpũrigue suhri suama. Eropa ta umaro majagũ mari Opũre masirã bajamerãgã erã árĩmũhtaquererã puhrgũguere erã bajarã warãcoma, arĩpu Jesu.

Pan bũgari queorire werepu Jesu

Mt 13.33

²⁰ Eropigu dipaturi Jesu werenigui queoriñe mera buhepu:

—¿Goãmũ masa tauro opu ĩgu árĩri werediacũ ñeheno iro dopa áhriri mua pepicũ?

²¹ Pan bũgacũ iiburi iro dopa áhrraa. Yujugo nomeo panre iigo pan bũgacũ iiburi pohgare merogã moremo trigo pohga mera. Igo eropa iicũ pan bũgacũ iiburi pohga merogã árĩquerero trigo pohgare õaro seyapehrea wahaa. Eropa ta umaro majagũre mari Opũre bajarã masa masirãcoma, arĩpu Jesu.

Miri disiporogã queorire werepu Jesu

Mt 7.13-14, 21-23

²² Eropi Jesu paga macarigue, mũta macarigãgue buhegã, Jerusaléngue ejabu iipu.

²³ Īgu eropa warisubu masũ Jesure õpa arĩ serẽpipũ:

—Opũ, ¿bajamerãgã dihtare peamegue wabonirãre Goãmũ taugũcuri erã ĩgu pohro waboro dopa? arĩpu ĩgu Jesure.

Īgu eroparĩcũ Jesu werenigui queoriñere buhegu õpa arĩ werepu:

24 —Yu mũare òpa arãa: Bajarã Goãmũ pohrogue wadiaquererã wamasisome. Īgu pohro waburi miri disiporogã ñajaro dopa ãhraa. Eropirã mũa i disiporogãre turaro ñajadiarã iro dopa ta ĩgu yare iique.

25 Òpa iigũcumi Goãmũ bajarã masare. Īgu wihi opu iro dopa ãhrimi. Wihi opu wahgã, disiporore bihagũcumi. Īgu eropa iicũ disiporogue mũa niguirã disiporo biharisere doterãca. Doterã òpa arĩrãca. “Opũ, disiporore pãgũque guare.” Mũa eroparĩcũ wihi opũpũ yũhrigũcumi. “Mũa aridirore masibea yũhũ. Eropigu mũare masibea,” arĩ yũhrigũcumi,

26 Īgu eroparĩcũ mũa yũhrirãca. “Mũ mera gua baha, ihribũ. Gua ya maca buhebu mũhũ,” arĩrãca mũa.

27 Mũa eroparĩcũ ĩgũpũ yũhrigũcumi. “Mũa aridirore masibea. Árĩpehrerã mũa ñeri iinirã yũ pohro aribiricãque,” arĩgũcumi wihi opu.

28 Eropi Abrahãre, Isaare, Jacobore, árĩpehrerã Goãmũ ya weremũhtanirãre Goãmũ ĩgu opu árĩrore erã arĩcũ ĩarã, mũa disiporogue cóanirã árĩrã bũrigã orerãca. Eropirã mũa turaro bũjawererã, mũa gũcũrire cũridihurãca.

29 Irisubure norte majarã, sur majarã, abe mũririro majarã, abe ñajaro majarã Goãmũ ĩgu opu árĩroguere eja, mesa pohro doarãcoma.

30 Dohpague árĩrã pohro majarã árĩrã irisubure oparã árĩrãcoma. Eropirã dohpaguere “Oparã ãhraa,” arĩrã irisubure pohro majarã árĩrãcoma, arĩpũ Jesu.

Jerusalén majarãre bũrigã mahipũ Jesu

Mt 23.37-39

31 Irisubure bajamerãgã fariseo masa Jesu pohrogue ejarã, ĩgũre wereñorã:

—Herode mũre wejẽdiami. Eropigu gajipũ waque mũhũ, arĩñorã erã ĩgũre.

32 Erã eroparĩcũ Jesupũ yũhripũ:

—Herode gũyaricũgũ ãhrimi ĩgu. Òpa arĩ wereque ĩgũre: “Jesu watẽare cóãgũ iimi. Eropigu dorecũrãre òarã iigu iimi. Irire dohpagãre, ñamigã sãre iigũcumi. Eropigu ñamigã core mohmetugũcumi,” arĩ wereque Herodere.

33 Eropigu dohpagãre, ñamigãre, ñamigã core sãre Jerusaléngue curigu wagura. Ero yũre Goãmũ yare weremũhtagure wejẽrãcoma masa. Goãmũ yare weremũhtagure erã wejẽbupũre Jerusaléngue árĩro gahmea. Eropigu yũre i maca ta dujaro gahmea.

34 “Mũa Jerusalén majarã, mũa acawererã mũra Goãmũ ya weremũhtanirãre wejẽmũrinirã árĩma. Eropirã Goãmũ

obeonirãre utã mera deamurinirã árĩma. Cãreña buro igo porãre igo quẽdapuri mera igo coã oyaro dopa ta bajasuburi opadiaribu mũare. Mũapũ irire yure ne gamebiribu.

³⁵ Dohpaguere mũa árĩri maca cóãra maca árĩroca. Diaye arĩgu tiiaa mũare. Pũhrũ dujarigũca daja yũhũ. Eropa yũ dujaricũ ĩarã mũa yure Goãmũ turari mera arĩgu “Ōaro ariporo,” arĩrãca. Yure mũa irire arĩboro core dipaturi yure ĩasome mũa, arĩpũ Jesu.

14

Dorecũgure ðagu iipũ Jesu

¹ Gajĩnũ erã soorinũ Sabadonũ árĩcũ fariseo masa oparã mera majagu ya wihigue Jesu bagũ wapũ. Iri wihi árĩrã ĩgũre ĩhanurũsiañorã.

² Eropigu ñigagu bijigu ĩgu pohrogue ejapũ.

³ Eropigu Jesu judio masare buherãre, fariseo masa sãre serẽpipũ:

—¿Mari soorinũre dorecũgure ðagu iidoreri Goãmũ yare erã gojarapũ? arĩpũ Jesu.

⁴ ĩgu eropa arĩ serẽpiquerecũ ta erã yũhribiriñorã. Erã yũhribiricũ ĩagu Jesu ñigagu bijigure ðagu iipũ. Tuhanugu, “Waque,” arĩpũ ĩgũre.

⁵ Eropa iituhagu erãre serẽpipũ daja:

—¿Mũa yagu burrore o mũa yagu wecure gobegue yuhridijadigure mata aĩ wiubeari mũa mari soorinũ árĩquerecũ? arĩpũ Jesu.

⁶ ĩgu eropa arĩquerecũ ta erã ĩgu serẽpirire yũhrimasibiriñorã daja.

Mojoto dirirogue sihubeonirãre werepũ Jesu

⁷ Fariseo masũ ya wihi árĩgu iri wihi majagu ĩgu sihubeonirã oparã doarire erã beyemũhtacũ ĩapũ Jesu. Eropa ĩatuha ire werepũ árĩpehrerãre:

⁸ —Mojoto diriri bosenu árĩcũ ĩgu mũare sihubeocũ, ĩgu ya wihigue eja oparã doarire beye doabiricãque. Mũa tauro gũhyadiarãre sihuboñumi iri wihi opũ.

⁹ ĩgu eropa iicũ mũa oparã doarire doacũ “Ōã gũhyadiarãre mũa doarire oque,” mũare arĩbocumi wihi opũ. ĩgu eroparĩcũ mũa gũhyasiuro dujarãca. Eropirã bu árĩrã doarire doarã warãca.

¹⁰ Eropirã wihi opũ mũare sihubeocũ, bu árĩrã doarire doamũhtaque. Mũa eropa iicũ wihi opũ mũare oparã doaripũre “Doarã arique,” arĩgũcumĩ ĩgu mũare. Mũa eropa wacũ gajirã ĩgu sihubeonirãpũ mũare umupeori mera ĩarãcoma.

11 Yujugu ĩgu basi “Opu āhraa,” arĩ pepigu bu árĩgu árĩgucumi. Eropigu gajigu “Bu árĩgu āhraa,” arĩ pepigu, gajirāre tarinugadiabigu opu árĩgucumi, arĩpu Jesu erāre.

12 Eropa arĩtuha Jesu wihi opure werepu:

—Mũhu bosenu iigu mu pohro árĩrāre, mu pagu porāre, mu acawererāre, doberi oparāre sihubiricāque. Mũhu erāre sihucũ mure erā sã sihu gamerācoma daja. Eropa sihu gamerā mure erā wajamorire wajayerācoma.

13 Mũhu bosenu moagu mojomorocurāre, curimasi-birāre, yujupu guburu poyanirāre, cuiri ĩhajabirāre si-hubeoque.

14 Mu eropa iicũ ĩagu Goãmu mure ðaro iigucumi. Erāpu mure erā sihura wajamorire wajayemasibeamu. Eropigu ðarā sīrinirā erā masa mũriarisubu árĩcũ Goãmupũ mure wajayegucumi, arĩpu Jesu wihi opure.

Wũari bosenu iira queorire werepu Jesu

15 ĩgu eroparĩcũ peegu gajigu bari mesa pohro doadigu Jesure werepu:

—Goãmu ĩgu opu árĩro ĩgu bari mesa pohro doarā turaro mucubirirā árĩrācoma, arĩpu ĩgu Jesure.

16 ĩgu eroparĩcũ Jesu i queorire werepu ĩgure:

—Wũari bosenu iigu bajarā masare sihubeorũ.

17 ĩgu sihubeoru pũru bosenu árĩrinũ gohra mohme coregure ĩgu sihubeonirāre weredoregu obeoru. “Ma, árĩpehrerire bosenu maja árĩburire amutuhama. Eropigu mũare sihubeomi,” arĩ weredorepu mohme coregure.

18 Mohme coregu ĩgu eropa arĩ werequerecũ ta, ĩgu si-hunirāpu “Wamasibirica,” arĩnorā erā. ĩgu sihumũhtadigu ðpa arĩ werepu mohme coregure. “Dohparagā yebare asũabu. Eropigu iri yebare ĩagu wabu iiaa. Eropigu wamasibirica. Umupeoque yure. Yure masiya mara, arĩque,” arĩpu ĩgu sihumũhtadigupũ mohme coregure.

19 Gajigupũ ðpa arĩpu: “Wecũare pe mojtocu majarā dohparagā ta asũabu. Eropigu wecũare queo ĩagu wabu iiaa. Eropigu wasome. Yure wamasiya mara,” arĩpu ĩgu sã.

20 Gajigupũ ðpa arĩpu: “Yũhu dohpagā mojtoto dihriabu. Eropigu iri bosenure wamasibirica,” arĩpu ĩgu mohme coregure.

21 ĩgu eroparĩcũ mohme coregupũ dujaa wa, ĩgu opure erā arĩrare werepehorũ. ĩgu eropa arĩ werecũ ĩgu opu turaro gua, ðpa arĩpu mohme coregure. “Yojaru mera maca árĩri marigue, mojomorocurā erā árĩri marigue waque. Eropigu mojomorocurāre, curimasibirāre, cuiri

ihajabirāre, poyari masare yojaro mera aīgārique erāre,” arīpū opū.

²² Pūhrū mohme coregū werepū īgū opūre: “Opū, mū doreldo dopa ta masare sihuabū. Yū eropa sihuquerecū ta gajirā sā iri taribure sihajarācoma,” arīpū mohme coregū.

²³ Īgū eroparīcū opū īgūre dorepū: “Campogue waque. Ero paga marigue, mūta marigāgue árīrāre yaha wihigue aridoreque yaha wihi ōaro ɯjūtūrimaja ōaro.

²⁴ Diaye arīgū iiaa mūre. Oā yū sihumūhtanirā yū barire ne merogā basome,” arīpū opū, arī werepū Jesu.

Jesu mera wacū diasa āhraa

²⁵ Irisubure bajarā masa Jesu mera wañorā. Eropigū Jesu erāre maji iha werepū:

²⁶ —Yujugū yū buhegū árīdiagū gajirā tauro yūpūre mahiro gahmea. Īgū pagūre, īgū pagore, īgū marapore, īgū porāre, īgū pagū porāre īgū basire īgū mahiro tauro yūpūre mahiro gahmea.

²⁷ Yujugū yū buhegū árīdiagū yahare eropa iiniguigū árīgūcumī. Eropigū īgū yahagū īgū árīri dipuwaja ñero tariqueregū ta yūre pihrisome. Eropa ñero taridiabigū yū buhegū árīmasisome.

²⁸ Ire masiyuro gahmea mūare. Ōpa āhraa iri: Wihi iigū īgū ɯmari wihi īgū iiboro core wihi wajacūburire queomūhtanimī. Eropa iigū īgū wihire pehoborore masimi īgū.

²⁹ Wajacūburire queobigū iri wihire iipehobiribocumī. Eropirā īgūre iarā wereyabocoma.

³⁰ “Ihī īgū wihire iigū bocatūbirañumī,” arī wereyabocoma.

³¹ Opū sā gajigū opū yarā mera erā gamewejēboro core, īgū yarā surarare īgū gamewejēdoreboro core, īgū yarā surarare queogūcumī. “¿Yūhū diez mil surara mera gajigū veinte mil surara opagū mera gamewejēgū wagū bocatūbocuri?” arī pepigū queogūcumī īgū.

³² Eropa queogū “Bocatūsome,” arīgū, gajigū opū īgū surara mera gamewejēgū arīgū yoarogue īgū aricū ta, “Bocatūsome,” arīgūpū “Gamewejēbircārā,” arīdoregū obeobocumī īgū pohro majagūre.

³³ Eropirā yū buherā árīdiarā mūa iiburire mūare masiyuro gahmea. Eropirā mūa gamerire duhudiabirā yū buherā árīmasibea mūa, arī werepū Jesu.

Goāmū yare iiniguuro gahmea, arī werepū Jesu

Mt 5.13; Mr 9.50

³⁴ Eropigū erāre werenemopū:

—Moa ðaro acari áhraa. Iri moa ñeri wacũ dipaturi ðari iimasiya mara.

³⁵ Iri moa mera duhpimaja masiya mara. Iri eropa árĩcũ iri moare cóãro gahmea. Eropirã mua Goãmũ yare iiniguibirã ne duhpimorã árĩbeaa. Ire ðaro peeque mua, arĩpũ Jesu.

15

Oveja dederedigure bocara queorire werepũ Jesu

Mt 18.10-14

¹ Eropa gajinũ bajarã wajasea corerã gajirã “Ñerã áhrima,” erã arĩrã mera Jesure peerã ariñorã.

² Erã eropa iicũ ñarã fariseo masa judio masare buherã sã Jesure ñhaturirã ðpa arĩñorã erã basi:

—Ihĩ ñerã mera wapicumi. Eropigũ erã mera bahami, arĩ wereniguñorã erã erã basi.

³ Erã eropa arĩ wereniguicũ Jesu i queori mera ðpa arĩ buhepũ erãre:

⁴ —¿Cien oveja opũ yujugũ oveja dederea wacũ ñagu dohpa iigucuri ñgũ? Ñpa iigucumi. Ñgũ noventa y nueve ovejare erã bari campogue api, dederedigure amagũ wagucumi. Ovejare bocagugue dujarigucumi.

⁵ Ñgure bocagũ mucubirigucumi. Eropigũ ñgure ñgũ weca coãpeo

⁶ ñgũ ya wihigue aĩ dujaa wagucumi. Aĩ dujaja, ñgũ pohro árĩrãre, ñgũ acawererãre sihu gameneogucumi. “Yũ oveja dederedigure bocabũ. Eropirã yũ mera mucubirique,” arĩgucumi ñgũ erãre.

⁷ Oveja dederedigure ñgũ bocadiro dopa ta ðpa arĩgũ iiaa mũare. Yujugũ ñerire iigũ ñgũ ñerire bujawerecũ ðaripũre gohrotocũ ñarã Goãmũ pohro árĩrã bũrigã mucubirima. Gajirãpũ bajarã masa ðpa arĩ pepima: “Ñero iibeaa yũpũ. Eropiro yũ ñeri bujawereburi mara,” arĩ pepirima. Erã eropa arĩ pepicũ ñarã mũamaro majarã Goãmũ pohro árĩrã mucubiribeama, arĩpũ Jesu.

Niyeruse dedererare bocara queorire werepũ Jesu

⁸ Eropa arĩtuha gajĩ queori mera werenemopũ:

—¿Diez niyeruseri waja pagariseri opago yujuse dederecũ duhpibocuri igo mua pepicũ? Ñpa iigocumo igo. Sihãgodirure sihãgo, wihire oha, ðaro amapehogocumo. Irisere bocagogue duhugocumo.

⁹ Irisere bocatuha, igo pohro árĩrãre, igo acawererãre sihupehogocumo. “Niyeruse yahase dedererare bocabũ. Eropirã yũ mera mucubirique,” arĩgocumo igo.

10 Diaye arĩgu iiaa mũare. Eropa ta yujugu ñerire iigu ĩgu ñerire bujawerẽcũ õarire gohrotocũ Goãmũ yarã anyuapũ burigã mucubirĩcomã. ĩgu dederebodigu dederebeamĩ pare. Eropirã turaro mucubirĩcomã, arĩpũ Jesu.

Magũ dederedigu pagũ pohro dujajara queorire werẽpũ Jesu

11 Eropa arĩtuha Jesu gajĩ queorĩ mera werẽpũ daja:

—Bugũ porã perã arĩñorã.

12 Dũhyagupũ õpa arĩpũ ĩgu pagure: “Ahũ, mũ sĩrira pũhrũ yũre mũ oburire yũre opurumujuque,” arĩpũ ĩgu ĩgu pagure. ĩgu eroparĩcũ erã pagũ perãgue ta ĩgu porãre guerẽpũ ĩgu oparare.

13 Bajamenurigã pũhrũ dũhyagupũ ĩgu ya arĩpehrerire aĩ, yoarogue gajĩ yebague waha wapũ. Ero eja ĩgu ya niyerure iisiripehocãpũ.

14 ĩgu iisiripehora pũhrũ iri yebare ne bari marinũgayoro. Eropigu oaboapũ.

15 Eropigu iri yeba maja mohmerire amapũ. ĩgu mohmerire bocacũ ĩgu opũ yesea coregũ acupũ ĩgure.

16 Eropigu ĩgu yeseare ejo, erã barire badiaripũ ĩgu sã. ĩgu eropa badiaquerecũ ta ero majarã ĩgure barire obiriñorã.

17 Eropĩ ĩgure ero guñari ariyoro pare. “Yũ pagure mohme corerãpũ pagari barire opacomã. Erã ba dũhari sã pagari arĩca. Erã õaro arĩrisubu yũpũ ohõ arĩgu oaboagu iiaa.

18 Dohparagã yũ pagũ pohro dujagura. Yũ pagũ pohrogue ejagu õpa arĩgura ĩgure: ‘Ahũ, Goãmũre ñero iiaabũ. Mũ sãre ñero iiaa.

19 Ñegũ ãhraa. Eropigu mũ magũ diaye dopa ãabita yũre pare. Mũre mohme corerã dopa ta ãaque yũre,’ arĩgura yũ pagure,” arĩ pepipũ ĩgu.

20 Eropa arĩ pepigu wahgãnũgaja, ĩgu pagũ pohrogue dujaa wapũ. Erogue ĩgu ejadigu ĩgu dujaricũ ĩgu pagupũ ĩgure yoarogue ĩgu arĩcũ ta ĩgu magure ĩha masipũ.

“ĩgu eropa eracũ ĩagu ĩgu magure mojomoro ĩapũ. Mojomoro ĩagu ĩgure oma bocatĩri pabua, ĩgu wayuporãre mimipũ ĩgu pagũ ĩgu magure.

21 “Ahũ, Goãmũre ñero iiaabũ. Mũ sãre ñero iiaa. Ñegũ ãhraa yũhũ. Eropigu mũ magũ diaye dopa ãabita yũre pare,” arĩpũ ĩgu ĩgu pagure.

22 ĩgu eroparĩcũ peequeregu ta ĩgu pagupũ mohme corerãre sihupũ. “Yojarõ, õariñe suhrĩrore aĩgãrique.

Eropirã yu magure sãque. Sãtuha ïgu mojotore sãri berore sã, ïgu guburire zapature sãque.

²³ Sãtuha diicũgu wecure wejẽque. Bosenu iirã.

²⁴ Ihĩ yu magu sãrigu dopa ta waha wami. Eropa waqueregu ta dohpaguere ojocarimi ïgu. Dederedigu dopa árĩdigure dohpaguere bocabu. Eropirã bosenu iirã," arĩpu ïgu pagu. ïgu eropa arĩra puhru bosenu iinũgañorã erã.

²⁵ "Irisubure ïgu tĩgupu pohegue árĩpu. Pohegue árĩdigu dujarigu wihi pohro eragu, erã bayarire peepu ïgu.

²⁶ Peegu yujugu mohme coregure sihubeo ïgure serẽpipu ïgu: "¿Dohpa iirã bayarã iiari?" arĩpu ïgu mohme coregu.

²⁷ "Mu pagu magu dujarami. ïgu õagu dujaracũ mu pagu diicũgure wecure wejẽdoreami," arĩ yuhripu mohme coregu.

²⁸ ïgu eropa arĩ werẽcũ ïgu tĩgupu burigã guagu wihigue ñajabiripu. ïgu eropa ñajabiricũ ïagu ïgu pagu wiriri, "Ñajarique," arĩ turaro sihuripu ïgu magure.

²⁹ "Peeque, ahũ. Yuhu yoari boje mure mohme coregu dopa ta itamurabu. Eropigu mu dorerire ne yujusubu tarinũgabirimurabu. Yuhu mure mohme corequerecũ ta yũpũre ne obirabu mũhu. Ne yujugu waibũgure obeaa mũhu yure yu mera majarã mera yu bosenu iicũ.

³⁰ Eropigu ihĩ mu magupu ñerã nome mera mu yare iisiripehodigu árĩmi. Irire iisiripehotuha, ïgu wihigue ïgu dujaracũ diicũgu wecure wejẽabu mũhu ïgu babure," arĩpu ïgu tĩgu ïgu pagure.

³¹ "Mahgu, mũhu yu mera árĩpehrerinũri ãhraa. Eropiro árĩpehreri yaha mu ya dihta ãhraa.

³² Mu pagu magupu sãridigu dopa ta wahámi marire. Eropi ïgu dohpaguere ojocarigu ãhrimi. ïgu dederedigu dopa ta wahámi. ïgu eropa wara puhru dohpaguere ïgure bocabu. Eropiro ïgu dujaracũ mari bosenu ii mucubiricũ õhaa," arĩpu ïgu ïgu magure, arĩpu Jesu erãre iri queorire weregu.

16

Niyeru dibu coregu queorire Jesu werepu

¹ Eropi i queorire ïgu buherãre werepu Jesu:

—Doberi opu ya niyerure dibu coregu niyerure ïgu õaro dibubiricũ ïagu gajigupu weresãpu doberi opure. "ïgu mu ya niyerure iisirigu iimi," arĩ weresãpu ïgure.

² ïgu eropa weresãcũ pee niyeru dibu coregure sihubeopu. Eropigu ïgu eracũ ïagu ïgure opu werepu.

“Gajigu mũ yaha niyerure iisiririre wereami yũre. Eropigu yahare dibugu dohpaguere árĩsome mũhũ. Eropigu yahare mũ iirare werepeho gojaque. Mũre cóãgu iiaa,” arĩpũ ĩgu opa ĩgũre.

³ ĩgu eropa arĩra pũhrũ òpa arĩ pepipũ dibu coregu ĩgu basi: “Yũ opa yũre cóãbu iicumi. Yũhũ turabeaa. Eropigu turaro mohmerire bocatũbeaa. Eropigu gajirãre niyeru serẽgu guhyasiutariaro tarigũca yũhũ. ¿Eropigu dohpa iigũcuri yũhũ?”

⁴ Dohpague tamerare yũ iiburire masia yũhũ. Òpa yũ iicũ yũ mohmeri maricũ erã yũ itamurã árĩrãcoma. Eropirã erã ya wirigũ ñajadorerãcoma yũre,” arĩ pepipũ ĩgu.

⁵ Eropa arĩ pepigu ĩgu arĩpehrerã ĩgu opũre waja-monirãre sihubeopũ. Sihubeotuha eramũhtagũre òpa arĩ serẽpipũ ĩgu. “¿Yũ opũre dipẽ wajamori mũhũ?” arĩpũ ĩgu.

⁶ ĩgu eroparĩcũ wajamogũpũ yũhripũ. “Cien tambore mũyũre olivo waĩcũdigũ maja mũyũre wajamoa ĩgũre,” arĩ yũhripũ ĩgu. ĩgu eropa arĩ werecũ dibugũpũ òpa arĩ werepũ. “Ohõ ãhraa mũ wajamorire gojaturapũ. Doaque. Eropigu mũ wajamorire deco mera aĩ, deco mera gojatuque,” arĩpũ niyeru dibugũ wajamogũre.

⁷ Eropa arĩtuhaja gajigu wajamogũre serẽpipũ ĩgu. “¿Mũca dipẽ wajamori?” arĩpũ daja. “Cienaju trigo ajure wajamoca yũhũ,” arĩpũ wajamogu dibugũre. “Ohõ ãhraa mũ wajamorire gojaturapũ. Mũ wajamorire ochenta goja amuque,” arĩpũ dibugũ.

⁸ ĩgu eropa òaro guyamehrecũ ĩagu “Ihĩ guyamehregũ arĩcumi,” arĩ pepipũ ĩgu opa niyeru dibugũre. Inũ majarã Goãmũ gamebirã erã yare guya amurare erã niyerure erã diburare Goãmũ yarã tauro masicoma erã, arĩpũ Jesu.

⁹ Eropa arĩtuha Jesu werenemopũ:

—Eropigu mũare arĩgu tiiaa. Mũa oparire, i yeba majare mojomorocũrãre mũa ocũ, erãpũ mũare mahirãcoma. Mũa eropa iicũ mũa opara pehrera pũhrũ mũmũsigue mũa ejaçũ erogue mũare òaro mahirãcoma.

¹⁰ “Bu arĩrã ya mohmerire queoro iirã oparã ya mohmeri sãre queoro iirãca. Bu arĩrã ya mohmerire queoro iibirã oparã ya sãre queoro iibirãca.

¹¹ Eropirã i yebague mũa opari mera mũa òaro iibirã Goãmũ mũare iidoreri sãre òaro iisome mũa.

¹² Eropirã gajigu yare mũa òaro iibasabiricũ ĩagu mũa ya arĩburire osome mũare.

¹³ “Yujugũ Goãmũpũre guñagu bũrigã gohra niyerupũre guñabeami. Niyerupũre bũrigã guñagu Goãmũpũre

guñabeami. Eropigu niyeru dihtare gamegu árïgu Goãmupure mucubiricũ iibeami. Goãmũ sãre niyeru sãre yujuro mera gametarima masiya mara mũare. Niyerure gametarigu Goãmupure umupeomasibeami, arïpu Jesu.

14 Ìgu eroparicũ peerã fariseo masapu ìgure wereyañorã. Erãpu niyerure gametariñorã. Eropirã wereyañorã.

15 Erã wereyacũ peegu Jesu erãre werepu:

—Masa erã ìhurore mũa ðaro iiraa. Mũa eropa iicũ, “Õarã diaye ta iirã àhrima,” arïrima masa mũare. Goãmupũ mũa pepirire masimi. Masa “Õatariama,” erã arïrãre Goãmupũ gajiropa arï pepimi, arïpu Jesu.

Goãmũ ìgu dorerire, ìgu opu árïrere werepu Jesu

16 Eropa arïtuhaja ðpa werenemopũ Jesu:

—Ñu waïyegũ ìgu eraboro core Moiserẽ ìgu apira doreri mera Goãmũ marire doreami. Goãmũ ya weremũhtanirã mũra erã gojara sã eropa ta árïribũ marire dorera. Dohpaguerpũre Ñu ðari buherire, Goãmũ opu ìgu árïrere buhemi. Ìgu eropa buhecũ pee masa erã ejatuharo, erã turari mera Goãmũ erã opu árïcũ gahmema.

17 “Goãmũ Moiserẽ ìgu apira dorerire erã ìgu yare gojara sãre “Ìri duhpiburi árïbeaa,” ne arïsome. Ùmũsi, yeba sã pehrequerẽcũ Goãmũ ìgu werediro dopa ta iipehogucumi, arï werepu Jesu.

Marapore cóãrere werepu Jesu

Mt 19.1-12; Mr 10.1-12

18 Eropa arïtuhaja ðpa arïnemopũ Jesu:

—Masũ ìgu marapore cóãgũ, gajigo mera marapocũgu ìgu igo mera ñero iigu iimi. Tuhaja masũ gajigu ìgu cóãdigo mera marapocũgu ìgu sã igo mera ñero iigu iimi, arïpu Jesu.

Doberi opu, gajigu Lázaro queorire werepu Jesu

19 Eropa i queori werepu Jesu:

—Yujugu doberi opu árïñumi. Suhri wajacurire sañagu árïñumi. Eropigu mũari nũcu ðari dihtare bagũ, baja opañumi ìgu.

20 Eropigu irisubure gajigu árïñumi. Ìgu mojomorocũgu Lázaro waicũgu árïñumi. Ìgu ìgu dupure baja camicũgu árïñumi. Eropirã gajirãpu ìgure doberi opu ya wihi disiporo aïgã apimuriñuma.

21 Eropigu mojomorocũgupũ doberi opu ìgu ba duhare gamemuriñumi. “Ba duhari mera yapigũca yũhũ,” arï pepimuriñumi ìgu. Ero oyarisubu diayea ìgu pohro eja ìgu camire neremuriñuma.

22 Eropigu mojomorocugũ s̄iria wañumi. Īgu s̄iria wacũ, Abrahã pohroge paraíso waĩcuroge anyua ĩgure aĩ m̄uriañuma. Eropigu doberi opũ sã ĩgu p̄hru s̄iria wañumi. Īgu s̄iricũ ĩgure yaañuma.

23 Eropiro doberi op̄re peamegue ejagu b̄urigã teboricũnumi. Eropigu peamegue árĩgu um̄sigue árĩgure Abrahãre ĩhamujuñumi. Lázaro m̄urũ sãre ĩañumi.

24 Īatuha ĩgu Abrahãre sihubeoñumi. “Ahũ, Abrahã, mojomoro ĩaque yare. Peamegue yũhũ ñero tarigu iica. Yũ eropa wacũ Lázarore yare oboeque. Eropigu ĩgu decore ĩgu mujus̄iru mera yoso, yũ nerore deco mera nehoporo. Ir̄ire ȳsuporo ĩgu,” ar̄ĩñumi doberi opũ m̄urũ.

25 Īgu eropar̄iquerẽcũ Abrahãpũ ĩgure wereñumi: “Mahũ, ojocarigu árĩgu ar̄ĩpehr̄erire õar̄ire opabũ m̄uhũ. Lázaropũ um̄uri n̄ucũ ñero tarimi. Dohpaguere m̄ũ ñero taricũ ĩgupũ õguere mucubiriri mera ar̄icãgu iimi.

26 Eropiro mari watope ũhcãri waya ãhraa. Eropirã õre ar̄irã eroguerẽ wamasibeama. Tuhaja erogue ar̄irã õre ar̄idiaquererã ta õguere arimasibeama,” ar̄ĩñumi Abrahã doberi opũ m̄urũ.

27 Īgu eropar̄icũ doberi opũ õpa ar̄inemoñumi: “Acaweregũ, turaro serẽa m̄ure. Lázarore yũ pagũ ya wihigue oboeque.

28 Yũhũ yuju mojoto majarã pehr̄erã pagũ porãcua. Lázaro erãre wereporo. Õre erã ñero tariroguere ar̄ibir̄icãporo,” ar̄ĩñumi ĩgu.

29 Īgu eropar̄icũ Abrahãpũ yũhriñumi: “Goãmũ dorerire Moise ĩgu apirare, Goãmũ werem̄htanirã erã gojarare opama m̄ũ pagũ porã. Eropirã m̄ũ pagũ porã ir̄ire ta peeporo,” ar̄ĩñumi Abrahã.

30 Īgu eropar̄icũ doberi op̄upũ yũhriñumi: “Ahũ, Abrahã, ir̄ire opaquererã ta õaro peesome. Lázaro s̄iridigu masadigu erã pohro ĩgu ejacũ ĩarã erãpũ erã ñero iir̄ire b̄ujawere, õar̄ip̄re gohrotorãcoma. Eropirã õar̄ire iirãcoma yũ pagũ porãpũ,” ar̄ĩñumi doberi opũ m̄urũ.

31 Īgu eropar̄icũ Abrahãpũ wereñumi: “M̄ũ pagũ porã Moise ĩgu apirapũ ĩgu wererare, Goãmũ yare werem̄htanirã erã wererare peebirã ãhr̄ima. Eropirã Lázaro m̄urũ s̄iridigugue masadigu ĩgu ar̄iquerẽcũ ta erã Goãmũ yare peesome,” ar̄ĩñumi Abrahã, ar̄ĩ werepũ Jesu masare.

17

*Ñerire iicũ gũhya ãhraa
Mt 18.6-7, 21-22; Mr 9.42*

1 Eropi Jesu werepũ ĩgu buherãre:

—Mũare ñeri iidoreri baja ãhraa. Eropirã masa ñerire iima. Iri eropa arĩquerẽcũ ta masũre ñerire iidoregũpũ ñetariaro tarigũcumĩ.

2 Gajigũre masa ĩgu wũnũgũre wũariye utãyere dirisiu, wũariyague ĩgũre cõãcũ ñero wabocumi ĩgu. Eropigu oãgã mera majarãre ñerire iidoredigũpũ wũariyague erã cõãdigũ tauro ñero tarigũcumĩ. ĩgũre bũrigã dipuwaja moasũgũcumĩ.

3 Ōaro iique mũa. Mũa acaweregũ ñero ĩgu iicũ ĩarã, “ĩibita,” arĩque ĩgũre. Eropirã ĩgu ñero iirire ĩgu bũjawerecũ, õarire gohrotocũ mũapũ ĩgu ñeri iirire cãdijique.

4 Eropigu mũa acaweregũ yujunũ ta siete suburi mũare ĩgu ñero iibocumi. ĩgu eropa iicũ yujuyerisubure mũare, “Yũ ñero iirire bũjawerea. Ōarire gohrotogu iiaa,” ĩgu arĩcũ iri nũcũ suburi ĩgu ñero iirire cãdijique, arĩpũ Jesu.

Goãmũre umupeorire werepũ Jesu

5 Eropi Jesu buherã ĩgũre õpa arĩñorã:

—Goãmũre gũare õaro umupeonemocũ iique, arĩñorã Jesure.

6 Erã eroparĩcũ Jesu yũhripũ:

—“Goãmũre diaye ta iigu ãhrimi,” mũa arĩ umupeorã miriyegã mostazaye pẽgã mũa umupeoquererã irigu sicõmoro waĩcũdigũre õpa iimasia: “Irigũ yucũgu irigu basi tara duhagãporo. Wũariyague yuriñajaporo,” arĩmasia mũa. Mũa eroparĩcũ irigu yucũgũpũ mũa dorero dopa ta waroca, arĩpũ Jesu.

Mohme coregu ĩgu mohmerire werepũ Jesu

7 Pũhũ i werenigui queoriñere werepũ Jesu:

—Mũare mohme coregu poheguere tãra, mohmemi. ĩgu ovejare ĩhadibumi. ¿ĩgu eropa mohme ĩgu dujaracũ ĩarã dohpa arĩbocuri mũa ĩgũre? “Yojaro arique. Mũ bari ohõ ãhraa,” ¿arĩbocuri mũa?

8 Eropa arĩbeaa mũa. ĩgũre õpa arãa mũa: “Yũ baburire iique. Eropigu yũ baha ihricũ yũre coreque. Yũ pũhũ mũ sã baha ihrique,” arãa mũa mohme coregũre.

9 Mohme coregu ĩgu mũa mohmedorerire ĩgu iicũ ĩgũre “Ōhaa,” arĩbeaa mũa. ĩgũre mũa dorero dihtare iigu iicumĩ ĩgu.

10 Mũa sã ĩgu iro dopa ta ãhraa. Goãmũ ĩgu dorediro dopa ta iipehorã õpa arĩ pepique mũa. “Gũa mohme corerã

dihta āhraa. Gware ĩġu dorero dihtare iiabũ ġua,” arĩ pepique mũa, arĩpũ Jesu ĩġu buherãre.

Diez gohra cami boarãre õarã iipũ Jesu

11 Gajinũ Jerusalengue Jesu wagũ iipũ. Eropa wagũ Samaria yeba, Galilea yeba deco tarigãpũ.

12-13 Gaji macague wari mague ĩġu curicũ diez cami boarãpũ ĩġure bocatĩriñorã. Eropirã yoañarirogue niguirã ta piyuñorã:

—Jesu, opũ, ġware mojomoro ĩaque, arĩñorã.

14 Erã eroparĩcũ erãre ĩha, werepũ Jesu:

—Pahire mũa dũpũrire õaro warare ĩhmurã waque, arĩpũ erãre.

Īġu eropa arĩra pũhrũ erã warisubu erã dũpũ õarã wañorã.

15 Eropigũ yujugũ erã mera majagũ ĩġu dũpũ õari dũpũ wacũ ĩagũ, Jesu pohrogue maji dujariripũ. Eropa dujarigũ turaro mera Goãmũre umupeopũ. “Goãmũ turagũ, õagũ āhrimi,” arĩ umupeopũ ĩġu.

16 Eropa arĩġũ ĩġu Jesu guburi pohro mereja “Õhaa,” arĩpũ. Īġupũ Samaria majagũ árĩpũ.

17 Īġu eropa iira pũhrũ Jesu õpa arĩ werepũ:

—Diez āhrama masa õarã wanirã. ¿Gajirã nueve dũhyarãpũ nohogue árĩcuri erã?

18 Ihĩ gaji yeba majagũ dihta Goãmũre “Õhaa,” arĩġũ dujarami. ¿Duhpirã gajirãpũ aribirari? arĩpũ Jesu.

19 Eropa arĩtuha Jesu merejadigũre arĩpũ.

—Wahgãnuġajaque. Waque. Mũ Goãmũre umupeogũ õagũ wahabũ mũhũ, arĩpũ Jesu ĩġure.

Goãmũ ĩġu opũ árĩborore werepũ Jesu

Mt 24.23-28, 36-41

20 Irisubure bajamerãgã fariseo masa Jesure serẽpiñorã:

—¿Dohparĩcũ Goãmũ opũ árĩnuġagũcuri? arĩ serẽpiñorã erã.

Erã eroparĩcũ Jesu yũhripũ:

—Goãmũ ĩġu opũ árĩnuġacũ mũa ĩhamasibea.

21 “Goãmũ ĩġu opũ árĩri ohõ āhraa,” arĩmasibea. “Sohõġue āhraa,” arĩmasibea. Goãmũ ĩġu opũ árĩri masa erã pepirigũe āhraa, arĩpũ Jesu fariseo masare.

22 Eropa arĩtuha Jesu ĩġu buherãre õpa arĩ werepũ:

—Pũhrũ yũhũ masũ Goãmũ ĩġu obeodigũ yũ i yebague dujariburire bũrigã gamerãca mũa. “Īġure yujunũ gohra mari ĩacũ õaboaya,” arĩ quererã ta yũre ĩanisome mũa. Eropa mũa gamequerecũ ta irisubure arisome yũhũ.

23 Gajirã mware òpa arĩrãcoma. “Ìgure ãaque. Ìgu Cristo ãhrimi. Sihire ãaque. Cristo ãhrimi,” arĩrãcoma mware. Erã eropa arĩquerecã ta erãre peebericãque.

24 Bupu umarore guñaña mariro miaro dopa ta guñaña mariro arigũca yũhũ masũ Goãmũ ìgu obeodigũ dujarigũ.

25 Ire yũ iiboro core yũhũ turaro ñero tarigũca. Eropirã yure dohpague majarã gamesome.

26 Noé ìgu árĩrasubu majarã erã árĩmuriro dopa ta yũhũ masũ Goãmũ ìgu obeodigũ yũ dujariboro coregã eropa ta árĩrãcoma masa.

27 Noé ìgu árĩrasubure árĩpehrerã masa eropa baha, ihri iĩnuma. Eropirã mojoto dirimuriĩnuma. Noé wuadiru dohodirugue ìgu ñajaboro core Goãmũ erãre ìgu miupehoboro core iri árĩpehrerire masa muraro ta iiniguicãmuriñorã. Eropa árĩroca yũ dujaricũ sãre.

28 Lote ìgu árĩrasubu majarã sã erã árĩdiro dopa ta yũ dujaricũ árĩrãcoma masa. Lote ìgu árĩrasubure masa baha, ihri, asũ, dua, ote, wirire iĩnuma.

29 Erã eropa iirisubu ìgu ya macare Sodoma waĩcũri maca Lote ìgu waranũ umaro maja peame ùjũ dijari erãre wejẽpehocãyoro.

30 Yũhũ masũ Goãmũ ìgu obeodigũ yũhũ guñaña mariro yũ dujaricũ eropa ta waroca irisubure.

31 “Irisubure yujugũ ìgu ya wihi weca maja pũugue árĩgu wihi pohecague ìgu yare aĩgu ñajabiricãporo pobero mera duhriro dopa. Eropigũ pohegue árĩgu sã irisubure ìgu ya wihigue piharibiricãporo.

32 Lote marapo igo warare guñaque.

33 Ìgu ya árĩburi dihtare yujugũ guñagũ peamegue wagũcumi ìgu. Yaha árĩburipũre yujugũ guñagũ árĩpehrerĩnuri Goãmũ mera òaro árĩgũcumi, arĩpũ Jesu.

34 “Yũhũ mware werea. Irisubure yure umupeorãre beye gameneodoregũca. Eropigũ eropa wari ñamire yuju camare perã carĩcũ yujugũre yure umupeogũre aĩrãcoma yũ mera árĩbure. Gajigũ yure umupeobigũ ero dujagũcumi.

35 Eropa ta nome perã erã ya ojodũcare erã biucũ yujugore aĩrãcoma. Yujugo ero dujagocumo.

36 Eropigũ perã poheguere mohmerã árĩcũ yujugũre aĩrãcoma. Yujugũ ero dujagũcumi, arĩpũ Jesu.

37 Ìgu eroparĩcũ ìgu buherãpũ serẽpiñorã.

—¿Nohogue eropa warocuri? arĩ serẽpiñorã erã.

Erã eroparĩcũ Jesu yũhripũ:

—Masa erã ñeri erã iiniguĩrogue, erogue Goãmũ erãre erã ñeri dipuwaja moagũcumi, arĩpũ Jesu.

18

Wapeweyo igo dipuwaja moadorera queorire werepũ Jesu

¹ Eropi Jesu erãre Goãmũre serẽburire weregu õpa arĩpũ:

—Mũa Goãmũre serẽrã coreque ĩgu yũhriborore. Yoari boje corequererã ta bujawerebiricãque. ĩgũre serẽrã duhubita, arĩpũ Jesu.

² ĩgu eropa arĩrare buhebu i queori mera werepũ erãre:

—Gaji macague masare dipuwaja moadoregu árĩpũ. ĩgu Goãmũre umupeobiripũ. Eropigu masa sãre umupeobiripũ.

³ Eropigo wapeweyo sã erogue árĩpo. Igo ĩgu pohrogue durũro curigo õpa arĩpo: “Yũre ĩhaturigũre dipuwaja moadoreque mũhũ. Yũre arĩ cãhmotaque,” arĩ serẽniguicãpo igo ĩgũre.

⁴ Igo eroparĩcũ ĩgu bajasuburi “Iisome yũhũ,” arĩripũ igore. ĩgu eropa arĩquerecũ ta igo bajasuburi ĩgũre eropa serẽniguicãgo garibotariaro iipo. Igo garibocũ ĩagu õpa arĩpũ ĩgu basi. “Yũhũ Goãmũre masa sãre umupeobeaa.

⁵ Yũ eropa umupeobigu árĩquerecũ ta igopũ yũre garibotariacãmo. Yũre eropa garibogo yũre gariboreacũ iicumo yũre. Igo eropa arĩ weresãniguicũ igore ĩhaturigũre dipuwaja moadoregũra,” arĩpũ dipuwaja moadoregu, arĩpũ Jesu.

⁶ Eropa arĩgu Jesu erãre werenemopũ:

—Eropa arĩpũ ĩgu ñegũ dipuwaja moadoregu. ĩgu eropa arĩrare guñaque mũa.

⁷ ĩgu tauro Goãmũpũ ĩgu yarãre mũmũri nũcũ ĩgũre serẽrãre itamugũcumi.

⁸ Mũare arĩgu tiaa. Goãmũ erãre mata iigũcumi erã serẽrare. ¿ĩgu eropa yũhriũ ĩgu árĩcũ ta yũhũ masu Goãmũ ĩgu obeodigu i yebague dujarigu, Goãmũre umupeorãre ĩgũre serẽrãre bocagũcuri yũhũ? arĩpũ Jesu.

Perã Goãmũ mera erã wereniguira queorire werepũ Jesu

⁹ Eropi gaji queori mera werepũ Jesu. “Gũapũ ðarã ãhraa. Gajirãpũ ñero iirã ãhrima,” arĩ pepirãre i queori mera õpa arĩ werepũ:

¹⁰ —Goãmũ ya wihigue perã mũa Goãmũ mera wereniguirã wañorã. Yujugu fariseo masu árĩpũ. Gajigu wajasea coregu árĩpũ.

¹¹ Eropigu fariseo masũpũ nũgaja, õpa arĩ serẽ niguipũ Goãmũre: “Yũhũ gũya yajaricũgu, diaye iibigu, nome mera ñero iigu árĩbeaa. Gajirã iro dopa árĩbeaa. Ihĩ wajasea coregu iro dopa ñegũ árĩbeaa. Eropigu mũre Goãmũre õhaa, arãa.

12 Yuhũ semanari nũcũ mũ ya árĩburire iigu pesubu ba duhua. Eropigu diez niyuserire wajatagu yujuse mũre ohoa," arĩpũ fariseo masũ Goãmũre.

13 Eropigu wajasea coregũpũ yoarogue niguigu muhri siunũgaja, ĩgu ñerire bujawere, umarogue ĩabiripũ. ĩgu ñerire bujaweredigu árĩgu ĩgu coretibi pa, wereniguipũ Goãmũre: "Goãmũ, yuhũ ñegu āhraa. Eropigu mũhũ yũre mojomoro ĩaque," arĩpũ ĩgu Goãmũre.

14 Eropigu mũare arĩgu iiaa. Ihĩ wajasea coregũpũ ĩgu wi-higue ĩgu dujagu ĩgu ñerire Goãmũ mera cóãdigũ dujapũ. Gajigu fariseo masũ ĩgu ñerire cóãdigũ árĩbiripũ. "Yuhũ òagu āhraa," arĩgu Goãmũ ĩgu ĩacũ ñegu árĩmi. "Yuhũ ñegu āhraa. Eropigu yũ ñerire bujawerea," arĩgũpũre Goãmũ òagu iigũcumĩ ĩgũre, arĩpũ Jesu.

*Majirãgã ya árĩburire Goãmũre serēbasapũ Jesu
Mt 19.13-15; Mr 10.13-16*

15 Eropi masa erã porã majirãgãre Jesure mohmepi-ñadoremorã ĩgu pohrogue aĩ erariñorã. Erã eropiicũ ĩarã Jesu buherã erãgãre aĩrarãre turiñorã.

16 Erã eropa turicũ ĩagu Jesu majirãgãre sihubeopũ ĩgu pohrogue. Sihubeo òpa arĩpũ ĩgu ĩgu buherãre:

—Majirãgã yũ pohrogue ariporo. "Waque," arĩbita erãgãre. Erãgã Goãmũre erã opũ iro dopa pepima. Eropirã Goãmũ ĩgu opũ árĩroguere oãgã iro dopa pepirã āhrima eroguerẽ.

17 Diaye arĩgu iiaa mũare. Oãgã Goãmũre erã gamediro dopa ta mũa Goãmũre gamebirã ĩgu pohrogue wasome mũa. Mũa wabiricũ mũa opũ árĩsome ĩgu, arĩpũ Jesu.

*Doberi opagũ Jesu mera wereniguipũ
Mt 19.16-30; Mr 10.17-31*

18 ĩgu eropa arĩra pũhrũ judio masa oparã mera majagu Jesure serēpi erapũ.

—Ne òagu, buhegu āhraa mũhũ. ¿Yũ árĩpehrerinũri Goãmũ mera árĩdiagũ dohpa iigũcuri yuhũ? arĩpũ ĩgu.

19 ĩgu eroparĩcũ Jesu yũhripũ:

—¿Dohpa arĩronore yũre "Òagu," arĩ piyuri mũhũ? Goãmũ dihta òagu āhrimi.

20 I Goãmũ dorerire masia mũhũ. "Gajigu marapo mera árĩbiricãque. Masare wejēbiricãque. Yajabiricãque. Gũyabiricãque. Mũ pagũ sũmarãre umupeoque," arĩ doremi Goãmũ. Eropigu irire iique mũhũ, arĩpũ Jesu.

21 ĩgu eroparĩcũ ĩgu Jesure yũhripũ:

—Iri árĩpehrerire majigũgãgue ta iibũ yuhũ, arĩpũ ĩgu.

22 ĩgu eroparĩcũ peegu Jesu ĩgũre òpa arĩ wererũ:

—Yujuñe dihta duhyaa mure mu iiboro. Árīpehreri mu yare duagu waque. Eropa iigu árīpehreri niyeru mu wajatarire mojomorocurāre oque. Mu eropa iicũ wuaro mu ya ðari muhũ opaburire umaroguere Goãmũ pohroguere árīroca. Eropa iituha yu mera majagu árību arique, arīpu Jesu ĩgure.

²³ ĩgu eroparīcũ peegu ĩgupu baja doberi opagu árīgu irire mojomorocurāre odiabigu, turaro bujawere waha waru.

²⁴ ĩgu eropa bujawerecũ ĩagu Jesu ðpa arī werepu gajirāre:

—Doberi oparāre Goãmũ ĩgu opu árīroguere erã wacũ diasataria.

²⁵ Camello waicugu waibugupu ĩgupu awiru gobegāgue ĩgu ñajacũ masiya mara ĩgure. Eropa ta doberi opagu Goãmũ mera ðaro árīgu ĩgu opu árīroguere wacũ diasataria, arīpu Jesu.

²⁶ ĩgu eroparīcũ ĩgure peerã ðpa arīñorã:

—Cue. Mu arīro dopa ta diaye arīcũ, ne yujugu masure Goãmũ taubiribocumi ĩgu pohro waborore, arīñorã erã Jesure.

²⁷ Erã eroparīcũ Jesu yuhripu:

—Masa erã bocatiuro erã ðaro iira mera Goãmũ pohroguere wamasibeama. Goãmupu masare peamegue wabonirāre taumasimi. ĩgu árīpehrerire ðaro iimasipehocāmi, arīpu Jesu erāre.

²⁸ ĩgu eroparīcũ Pedro ĩgure ðpa arīpu:

—Peenique. Gua árīpehreri gua yare apicābu mu mera warã, arīpu ĩgu Jesure.

²⁹ ĩgu eroparīcũ Jesu ðpa arīpu:

—Diaye muare arīgu iiaa. Árīpehrerã mua Goãmũ yare iimorã mua wirire, mua marasã nomere, mua pagu porāre, mua pagu sumarāre, mua porāre mua apinirã mua wuaro wajatarāca dohpaguere.

³⁰ Mua apidiro tauro wajatarāca. Eropirã mua sīrira puhru árīpehrerinuri Goãmũ mera árīrāca mua, arīpu Jesu erāre.

Dipaturi Jesu ĩgu sīriburiñere ĩgu masa mūriaburiñere werepu

Mt 20.17-19; Mr 10.32-34

³¹ Eropi doce ĩgu buherã dihtare aīgã erāre werepu:

—Peeque yure. Dohpaguere mari Jerusalēgue warã iiaa. Eroguere yure Goãmũ ĩgu obeodigure Goãmũ ya weremūhtanirã iribojegue erã werediro dopa ta eropa waroca yure.

32 Ero masa yũre ñeha, judio masa árĩbirãre orãcoma yũre. Yũre erã ora pũhrũ erã yũre wereya, ñero arĩ, disico ehosũrãcoma.

33 Eropirã yũre tãratuhaja wejẽrãcoma yũre. Eropigũ yũ sirira pũhrũ Ʃhrenũ waboro masa mũriagũca yũhũ, arĩpũ Jesu erãre.

34 Ĩgũ eroparĩcũ ĩgũ buherã ĩgũ wererire ðaro pee masibiriñorã. Goãmũ irire erãre masicũ iibirinipũ dohpa.

Cuiri ĩhajabigũre ĩhajacũ iipũ Jesu

Mt 20.29-34; Mr 10.46-52

35 Eropi Jesu sã Jericó waĩcũri maca pohrogue ejañorã. Ĩgũ wari maha tũrogue yujugũ masũ cuiri ĩhajabigũ doapũ. Niyeru serẽgũ iipũ.

36 Eropigũ masa bajarã ĩgũ pohro aricũ peegũ serẽpipũ ero árĩrãre.

—¿Duhpirã masa bajarã tarigãri? arĩ serẽpipũ ĩgũ.

37 —Jesu Nazare majagũ arigũ iimi, arĩñorã gajirã ĩgũre.

38 Erã eropa arĩ werecũ peegũ ĩgũ gaguiniguinũgarũ:

—Jesu, opũ Davi mũrũ pãrami masare taubu, yũre mojomoro ĩaque, arĩ gaguiniguipũ Jesure.

39 Ĩgũ eroparĩcũ ĩgũ pohro árĩrãpũ “Ejarimaricãque,” arĩ turiñorã ĩgũre. Erã eropa arĩ turiquerẽcũ ta ĩgũ ero core ĩgũ gaguiniguidiro tauro gaguiniguinemopũ daja.

—Opũ Davi mũrũ pãrami, yũre mojomoro ĩaque, arĩ gaguiniguipũ ĩgũ.

40 Ĩgũ eropa gaguiniguicũ peegũ Jesupũ nũgaja, “Si-hubeoque ĩgũre,” arĩpũ. Ĩgũ eroparĩcũ erãpũ cuiri ĩhajabigũre sihgũãñorã. Erã eropa sihgũãcũ ĩgũ Jesu pohrogue ĩgũ ejacũ Jesupũ ĩgũre serẽpipũ:

41 —¿Dohpa yũ iicũ gahmeri mũhũ? arĩpũ Jesu.

—Yũ Opũ, yũre ĩacũ iique, arĩpũ cuiri ĩhajabigũ.

42 —Ĩaque pare. Yũre umupeonijagũ, ðagũ wahaa mũhũ, arĩpũ Jesu ĩgũre.

43 Ĩgũ eroparĩcũ ta cuiri ĩhajabigũ ðaro ĩha wapũ. Eropa ðagũ wanijagũ ĩgũ Jesu mera wapũ. “Goãmũ turagũ ãhrimi,” arĩ umupeopũ ĩgũ. Eropirã masa bajarã cuiri ĩhajabiridigũ ĩgũ ðagũ wacũ ĩarã, “Goãmũ ðagũ, turagũ ãhrimi,” arĩ umupeoñorã erã sã.

19

Zaqueo Jesure bocatĩripũ

1 Eropii Jesu Jericógue eja, iri macague tarigãbu iipũ.

2 Doberi opũ Zaqueo waĩcũgũ wajasea corerã opũ ero árĩpũ.

³ Eropigu ĩgu Jesure “¿Nihino árĩcuri?” arĩ ĩha masibu Jesure ĩadiaripu. Eropa ĩgu ĩadiaquerecũ ta ĩgu yebagugã árĩcũ masa bajarã ĩgugãre cãhmotacãñorã.

⁴ Eropigu ĩgu masare omatarigã wa, sicómoro waĩcudigu yucugugue m̃aribejapu Jesure ĩabu. Pũhrũ ñarigã Jesu irigu pohro tarigãbu iipu. Eropigu Zaqueo irigugue coregu iipu.

⁵ ĩgu eropa corero watope Jesupu irigu gubuye ejanugaja, Zaqueore ĩhamuju ĩgure werepu:

—Zaqueo, dohpaguere m̃a ya wihi dujagura. Eropigu duru dijarique, arĩpu Jesu.

⁶ ĩgu eroparĩcũ Zaqueopu amũdiaro mera dijari, mucu-biriri mera ĩgu ya wihigue aridorepu Jesure.

⁷ ĩgu eropa bocatĩricũ ĩha, masa árĩpehrerã erã basi õpa arĩ wereniguiñorã:

—Ihĩ Jesu ñegũ ya wihigue curigu wadiami, arĩ wereniguiñorã árĩpehrerã masa erã basi.

⁸ Zaqueopu bocatĩrituha ero nigui, Jesure werepu:

—Opũ, peeque yũre. Árĩpehreri yahare deco mera mojomorocũrãre ogura. Eropigu yũhu gajigure cien niyuserire guya aĩdigũ árĩgu, cuatro cientos niyuserire wajayen-emogura ĩgure, arĩpu Zaqueo Jesure.

⁹ ĩgu eroparĩcũ Jesupu werepu ĩgure:

—Dohpagãre m̃are m̃a ya wihi árĩrã sãre peamegue wabonirãre Goãmũ tautuhami. Mũ sã Abrahã m̃aru acaweregũ ta aħraa.

¹⁰ Yũhu masũ Goãmũ ĩgu obeodigu peamegue wabonirãre amagũ arigu iibu. Erogu wabonirãre õaro taugũ arigu iibu, arĩpu Jesu Zaqueore.

Niyuseri oroseri queorire werepu Jesu

¹¹ Eropi ĩgure peerãre Jesu queori mera werepu daja. Merogã duhyayoro Jerusalengue ĩgu ejaboro. Eropirã ĩgure peerã õpa arĩ pepiñorã: “Goãmũ dohpaguere opu arĩnugabu iimi,” arĩ pepiriñorã erã.

¹² Erã eropa arĩ pepicũ Jesu i queorire õpa werepu erãre:

—Yujugu gaji yebague yoarogue wabu iĩñumi. Eroguere ero majagu erã tauro opu árĩgu ĩgure ĩgu ya maca majarã opure acucũ wabu iĩñumi. Pũhrũ ĩgu ya wihigue dujarabu iĩñumi.

¹³ Nere ĩgu waboro corere diez mohme corerãre si-hubeoñumi. Eropa sihubeogu, ĩgu erãre yujurãyerire yujuse niyuseri orosere oñumi. Otuha wereñumi erãre: “Yũ maricũ i niyeru mera m̃ua wajatanemoburire amaque,” arĩñumi ĩgu mohme corerãre.

14 Īḡu ya yeba majarāpū ĩḡure gamebiriñuma. Eropa gamebirā ĩḡu opū árĭbu wara pūhrū gajirāre ĩḡure were-dorerā obeoñuma. “Mūhū ḡua opū árĭcū gamebeaa ḡua,” arĭñuma erā weredorenirāpū.

15 Eropa erā gamebiriquerēcū ta pūhrū erā opū ñajañumi ĩḡu. Eropa opū ñajatuha, ĩḡu ĩḡu ya wihigue dujarñumi. Eropa dujaragū ĩḡu mohme corerāre ĩḡu niyeru mera erā wajatanemorare masibu, erāre sihubeoñumi.

16 Īḡu eropa sihubeora pūhrū, eramūhtagū ĩḡure wereñumi: “Opū, mū niyeruse, mū yūre orase mera diez seri wajatanemoabū yūhū,” arĭñumi mohme coreḡu ĩḡu opūre.

17 “Ōaro iiabū mūhū. Ōagū mohme coreḡu āhraa. Mū merogā mera yū dorero dopa iipehogū árĭḡu dohpague diez macari majarā erā opū árĭbu wagūca mūhū,” arĭñumi opū mohme coreḡure.

18 Īḡu pūhrū eragū ĩḡu mera majagū ōpa arĭñumi: “Opū, mū niyeruse, yūre mū orase mera cinco seri wajanemoabū yū sā,” arĭ wereñumi ĩḡu opūre.

19 “Cinco macari majarā opū wagūca mūhū,” arĭñumi ĩḡu opū ĩḡure.

20 Īḡu eropa arĭra pūhrū gajigū mohme coreḡu eraa werepū: “Opū, mū niyeruse ohō āhraa. Suhri gasiro mera oma, irisere dihbuabū.

21 Mūhū turaro mohmedoreḡu āhraa. Eropigū gajirāre mohmedorequerēḡu oteri moogū árĭquerēḡu ta mū dihta iri dūcare aīa. Eropigū mūre ḡūiabū,” arĭñumi ĩḡu opūre.

22 “Mū yūre eropa arĭḡu ñegū āhraa. Yūre mū eropa arĭri dipuwajare dipuwaja moagūra yūhū. Yūhū mūre turaro mohmedoreḡu árĭcū mūhū yūre masia. Gajirā yare yūhū aĭcū yūhū otebirira árĭquerēcū iri dūcare yū aḡu árĭcū masituhabū mūhū.

23 ¿Yū eropa árĭcū ĩaquerēḡu duhpigū yū orasere niyeru diburi wihigue dibubirari mūhū? Irire erā wayura waja wajatanemoboaya mūhū. Irire mū iicū dujaragū wajanemoboaya yū sā,” arĭñumi erā opū.

24 Eropa arĭtuha ĩḡu pohro niguirāre doreñumi: “Niyeruserē emaque ĩḡure. Diez seri opagūre oque,” arĭñumi ĩḡu opū.

25 Īḡu eroparĭcū erāpū wereñuma ĩḡure: “Opū, diez seri opagū baja opatuhami,” arĭñuma erā ĩḡure.

26 Erā eroparĭcū opū yūhriñumi: “Mūare arĭḡu iiaa. Árĭpehrerā wūaro oparāre onemogūra. Moorāpūre merogā erā opaquerēcū ta erāre emagūra.

27 Dohpague tamerare yūre ĩhaturirāre yūre erā opū

árĩdorebirinirãre yu pohro aĩgãrique. Eropirã yu ãaro wejẽcãque erãre," arĩñumi opu ãgu mohme corerãre, arĩ werepu Jesu.

Jerusaléngue ejaꝑu Jesu

Mt 21.1-11; Mr 11.1-11; Jn 12.12-19

²⁸ Eropa arĩtuha Jesu gajirã core Jerusaléngue wagu iipu.

²⁹ Jerusaléngue ejaboro coregã Olivo waĩcũdigu utãgu gubuyegue ejañorã pe maca árĩroque. Yuju maca Betfagé gaji maca Betania waĩcũyoro. Eroque ejaꝑu ãgu buherã mera majarãre perãre obeogu Jesu õpa arĩpu:

³⁰ —Si macague waque. Ero ejarã, burrogãre erã dirinugudigũre bocajarãca. Gajirã ãgũre ne peyanibeama dohpa. ãgũre bocarã, ãgũre diriradare pã, aĩgãribasaque yurẽ.

³¹ Mũa eropa iicũ ãagũpu “¿Duhpirã burrore pãri?” ãgu arĩcũ peerã õpa arĩ yũhrique ãgũre: “Mari tĩgu burrore gamebeoniami dohpa,” arĩ wereque ãgũre, arĩ weredore obeopu ãgu buherãre perãre.

³² ãgu eroparĩcũ erã perãpu ãgu obeodiroque ejañorã. Erã eropa ejaꝑu Jesu árĩpehreri ãgu erãre arĩdiro dopa ta eropa wayoro.

³³ Eropirã burrogãre erã pãcũ ãgũgã oparã serẽpiñorã erãre:

—¿Duhpimorã diriradare pãri burrogãre? arĩ serẽpiñorã erã.

³⁴ —Mari tĩgu burrogãre gamebeoniami, arĩ yũhriñorã erã.

³⁵ Eropirã ãgũgãre burrogãre Jesu pohroque aĩ ejañorã. ãgũgãre aĩ ejatuhaja erã weca maja suhrire ãgu weca duhpeoñorã. Eropirã ãgu weca Jesu ãgu mũribejacũ itamuñorã erã Jesure.

³⁶ Jesu ãgu weca ãgu peyagu wacũ erã masa erã weca suhri sañari suhrire tuwea aĩ mague seõpi mũhtañorã ãgu core.

³⁷ Eropirã Jerusalén pohroque eja, Olivo waĩcũdigu dirariri mague ejañorã. Eroque ejarã Jesu buherã bajarã árĩpehrerire ãgu deyoro moarare, ãgu õari ãgu iirare erã ãarare guña mucubiri Goãmũre õaro wereniguĩgũgañorã. Goãmũre “Õagu, turagu ãhrimi,” arĩ gaguĩguĩñorã. Eropirã burigã gaguĩguĩ Goãmũre umupeo õpa arĩñorã:

³⁸ —Ìre umupeorã. Ihĩ Goãmũ ãgu obeodigu, mari opu õaro ariporo. ðmaro majarã õaro arĩporo. Goãmũ ãgu turagu arĩcũ árĩpehrerã masiporo, arĩ umupeoñorã erã.

³⁹ Erã eroparĩcũ peerã fariseo masa bajamerãgã erã watope arĩrã Jesure wereñorã:

—Buhegu, mu buheräre ejarimaricãdoreque, arĩnorã erã.

⁴⁰ Eräre yãhripu Jesu:

—Mũare arĩgu tiaa. Oã yũre umupeorã erã werenigu-ibiricã utãyeripu yũre umupeoro dopa ta gaguiniboca, arĩpu Jesu eräre fariseo masare.

⁴¹ Eropa arĩtuha Jesu Jerusalén pohroge eja, iri macare ãhabeogu orepu.

⁴² Ōpa arĩpu ãgu:

—Jerusalén majarã, dohpague tamerare mũare ðaro árĩburire mũa masicã ðatariaboya. Eropa árĩquerecũ mũa dohpaguere irire ne peediabirabu. Eropigu Goãmu mũare irire masidorebirimi.

⁴³ Mũare ãhaturirã mũa árĩri macare cãhmotarãcoma. Eropa iirã erã mũare wiriario iisome.

⁴⁴ Irisubu erã mũa ya macare cóãpehorãcoma. Mũare mũa porã sãre wejẽrãcoma. Mũare ãhaturirã ðaro weasirirãcoma mũa ya macare. Goãmu peamegue wabonirãre mũare ãgu taubure yũre mũa masidiabirabu. Mũa masidiabirira dipuwaja mũare ãhaturirãre Goãmu cóãdoregũcumu mũa ya macare, arĩpu Jesu Jerusalén majarãre.

Goãmu wihigue ejapu Jesu

Mt 21.12-17; Mr 11.15-19; Jn 2.13-22

⁴⁵ Eropi Jerusaléngue ejagu, Jesu Goãmu wihigue ñaja wapũ. Eropigu doberi duarãre iri wihigue bocajagu, eräre cohã wiucãpu. Ōpa arĩpu ãgu eräre:

⁴⁶ —Goãmu yare erã gojarapũ ðpa ãhraa: “Goãmu arĩmi: Yaha wihi Goãmu mera wereniguiwi wihi waĩcũroca,” arĩñuma ãgu yare erã gojarapũ. ãgu eropa arĩquerecũ ta mũarũ i wihire Goãmu wihire duadoarã bu game yajarã iiaa, arĩpu Jesu.

⁴⁷ Ūmũri nũcũ Goãmu wihigue Jesu buhepu. Eropirã pahia oparã, judio masare buherã mera, masa oparã sã, ãgũre erã wejẽburire guñamaañorã.

⁴⁸ Masa árĩpehrerã ãgũre eropa peenigui, ãgu buherire ðaro peenũrũrã arĩnorã. Erã eropa ðaro peenũrũcũ Jesure wejẽdiarãpu ãgũre erã wejẽburire bocabiriñorã.

20

Jesure doredigũre ãgũre serẽpiñorã

Mt 21.23-27; Mr 11.27-33

¹ Gajinũ Goãmu wihigue Jesu masare ðari buherire buhegu iipu. ãgu eropa buhecũ pahia oparã, judio masare buherã, mũrã mera ãgu pohroge erarã, ãgũre serẽpiñorã:

² —Wereque guare. ¿Noa doreri mera eropa iiri mahu? ¿Nihino mare Goamu wihigue arinirare coadoreari? arinora era Jesure.

³ Era eroparicu Jesu yuhripu erare:

—Yuhu marure serepimuhgura. Wereque yu sare.

⁴ ¿Ñu masare igu waiyecu nihinopu igure waiyedoremariyuri ma pepicu? ¿Goamu doreyuri? ¿O masapu doremariyuri? ar serepipu erare.

⁵ Igu eroparicu erapu era basi game wereniguihora:

—¿Dohpa ar yuhriracuri mari? “Goamu Nure doredigu arimi,” mari aricu, “¿Goamu Nure igu dorequerecu ta duhpira igu wererare pebirari ma?” aribocumi Jesu marire.

⁶ Oa masapu “Diaye ta Ñu Goamu yare weremuhadigu arimi,” ar pepima era. Era eropa ar pepira maripu “Ñu igu waiyecu Goamapu igure dorebiridigu arimi,” mari aricu masapu marire uta mera dearacoma, ar wereniguihora era era basi.

⁷ Eropo ar wereniguituha era Jesure yuhrihora:

—Nure waiyedoredigure gua masibea, arinora era.

⁸ Era eroparicu Jesu yuhripu:

—Irisubu tamerare yu sa yare doredigure werebea maare, aripu igu erare.

*Ñera mohme corera iira queorire werepu Jesu
Mt 21.33-44; Mr 12.1-11*

⁹ Eropi Jesu queori moa opa ar buhenugapu masare:

—Yeba opu arinumi. Igu ya pohere iguire oteñumi. Ote-tuha, iri pohere gajirare deco mera apiñumi era mohme corera waja. Eropo apigu erare iri pohere ihadibudoretuhaja gaj yebague waha wañumi. Yoari boje deyobirinumi.

¹⁰ Eropigu igui nirisubu aricu pohe opu igu pohro majagure pohere mohme corera pohogue obeonumi. Pohe maja igu oteri ducare igu ya sero majare aidoregu obeorinumi. Eropira pohere mohme corerapu igu pohro majagure bocatiri pañuma igure. Eropira era igure iguitorire obiriquerera dujadoreñuma igure.

¹¹ Eropigu pohe opu gajigu igu pohro majagure iri pohe maja ducare aidoregu obeorinumi daja. Eropira pohere mohme corera igu sare pa nero iinuma igure. Eropo iituha igu iri ducare obiriquerera dujadoreñuma daja.

¹² Igu era eropa iira puhru gajigu pohro majagure obeorinumi daja. Eropira mohme corera daja igure cami moa, iri pohe turo coacañuma igure.

13 “Erã eropa iira pũhrũ pohe opũ õpa arĩ pepiriñumi: “¿Dohpa iigũcuri yũhũ? Õpa iigũra. Yũhũ yũ magũre yũ mahigũre obeogũra. Erã ïgũre umupeobocoma,” arĩ pepiriñumi pohe opũ.

14 Eropirã ïgũ magũre ïgũ obeodigũ ejacũ ïarã mohme corerãpũ erã basi õpa arĩ wereniguiñuma: “Ihĩ pohe opũ magũ ãhrimi. ïgũre wejẽrã. Eropiro i pohe mari ya pohe dujaroca,” arĩriñuma erã erã basi.

15 Eropa arĩtuha pohe opũ magũre ñeha pohe tũro aĩgã, wejẽcãñuma ïgũre. ¿Ne pohe opũ dujaragu dohpa iigũcuri ïgũ ya pohere mohme corerãre? arĩpũ Jesu.

—Õpa iigũcumi erãre.

16 ïgũ pohere mohme corerãre wejẽgũ, gajirãpũre pohere mohme coredoregũcumi, arĩ yũhripũ Jesu ïgũ basi.

ïgũ eroparĩcũ peerã masapũ õpa arĩñorã:

—Marire eropa wabiricãporo, arĩñorã erã.

17 Erã eroparĩcũ Jesupũ erãre ïha serẽpipũ:

—¿Goãmũ yare erã gojarapũre õpa arĩra dohpa arĩro iiri mũa pepicũ?

Ihĩ Cristo utãye iro dopa ta ãhrimi. Masa Cristore gamebirãcoma. Erã ïgũre gamebiriqerercũ Goãmũ ïgũre beye erã opũ erãre taubu acumi, arĩ gojañuma.

18 Yũre gamebirãpũ yũ dipuwaja moamorã árĩrã ñero tarirãcoma, arĩpũ Jesu erãre.

*Oparã ya wajare wajayeburire gajirã serẽpiñorã Jesure
Mt 21.45-46; 22.15-22; Mr 12.12-17*

19 ïgũ eroparĩcũ peerã judio masa buherã, pahia oparã sã “Jesu iri pohe opũ queori mera ‘Erã ñerã mohme corerã iro dopa ãhrima,’ arĩgũ marire weresãgũ iicumi ïgũ,” arĩ pepiñorã erã.

Eropa arĩ pepirã erã Jesure ñeadiariñorã. Eropa ñeadiaquererã ta masa Jesure gamerã mari mera guarĩ arĩrã erã masare gũĩ árĩñorã.

20 Eropa gũirã Jesure erã ñeaburisubure corerã ïgũre ïhanũrũñorã. ïgũ ñero arĩ yũhricũ ïadiarã iiriñorã ïgũre weresãmorã. Eropirã Jesure gajino serẽpidorerã obeoñorã gũyarãre. Erãre diaye iirã dopa wereniguidoreñorã. Jesu ñero ïgũ werenicũ peerã iri yeba majagũ opũre peresu iidoremorã iiriñorã.

21 Eropirã erã Jesure serẽpiñorã:

—Buhegũ, diaye wereniguiũ, gũyari marigũ mũ árĩcũ gũa masia. Eropigũ opũ árĩcũ sãre ïgũ bu árĩgũ ïgũ árĩcũ sãre yujuropa ïhaa mũhũ. Mũhũ Goãmũ yare diaye mũ buhecũ sãre gũa masia.

22 Wereque guare: ¿Roma majagu árīpehrerã tauro opu árīgure gobierno majare marire wajayero gahmeri mu pepicã? ¿Mari doreripũ irire wajayedoreri? arñnorã erã Jesure.

23 Erã eroparĩcũ Jesu erã ñero iidiarire masigu erãre werepũ:

—¿Duhpirã yu ñero wereniguicũ peediari mua?

24 Dohparagã niyerusere aĩrique. Irisere iarã, arĩpũ.

Irisere erã aĩ eracũ ĩagu õpa serẽpipũ Jesu:

—¿Nihino gohra waĩcũgu masu tuhyari irisere? ¿Noa waĩ tuhyari? arĩ serẽpipũ Jesu erãre.

—César, masa tauro opu waĩ ĩgu masu sã tuhyami iriseguere, arĩ yũhriñorã erã.

25 Erã eroparĩcũ Jesu werepũ:

—Irisubu tamerare masa tauro opũre ĩgu yare oque. Goãmũ yapũre Goãmũre oque, arĩpũ Jesu erãre.

26 Eropirã masa erã peero Jesure ñero arĩ wereniguicũ iimasibiriñorã erã. Eropirã erã Jesu yũhririre peerã erã peemaria wañorã. Eropa peemariarã, ejarimaria wañorã.

Saduceo masa Goãmũ ĩgu sĩrinirã masurire serẽpiñorã Jesure

Mt 22.23-33; Mr 12.18-27

27 Eropi bajamerãgã Saduceo masa Jesu pohrogue erañorã. “Goãmũ sĩrinirãre masusome,” arĩ pepirã árĩñorã Saduceo masa. Eropirã erã õpa arñnorã ĩgure:

28 —Buhegu, marire õpa arĩ gojañumi Moise: “Yujugu ĩgu tĩgu marapocũgu porã mariqueregu ta ĩgu sĩricũ ĩagu ĩgu pagu magure ĩgu tĩgu marapo árĩdigore marapocũro gahmea. Eropa iigu ĩgu tĩgu mũru ĩgu porãcũbodiro dopa ta porãcũro gahmea ĩgu pagu magure. Eropirã ĩgu tĩgu mũru porã iro dopa árĩrãcoma,” arĩpũ Moise, arñnorã erã.

29 Irire arĩtuha i queorire werenemoñorã erã Jesure:

—Yujugu porã siete árĩñorã. Erã tĩgũpũ marapocu porã marigu ta sĩa wapũ.

30 Eropigu gajigu ĩgu pagu magu sã ĩgu tĩgu marapo árĩdigore ta marapocũpũ. ĩgu eropa marapocũra pũhrũ ĩgu tĩgu mũru iro dopa ta ĩgu sã porã mariqueregu ta sĩa wapũ.

31 Eropigu ihĩ pagu magu sã ĩgu tĩgu mũru iro dopa ta porã mariqueregu sĩa wapũ. Eropa dihta wañorã yujugu porã gohra. Ne porã mariquererã ta sĩripehrea wañorã.

32 Erã marapo sã erã pũhrũ sĩa wapo pare, arĩ, Jesure serẽpiñorã:

33 ¿Ne, Goãmũ árĩpehrerãre sĩrinirãre ĩgu masucũ nihino marapo gohra árĩgocuri igo? Erã siete árĩpehrerã

igore marapocunirã árĩñorã. ¿Eropigo nihino marapo gohra árĩgocuri igo? arĩ serẽpiñorã erã.

34 Erã eroparĩcũ Jesu yãhrĩpũ:

—I yeba majarã ɯma nome mera marapocũma.

35 Erã eropa iiquerecũ ta ɯmũsi majarãpũ eropa árĩbeama. Dohpaguere masare ɯmare, nome sãre diaye iirãre Goãmũ õarã iigucumi. Erã erã sĩrira pũhrũ masa mũriarãcoma Goãmũ pohrogue. Eropirã erã eroguerẽ marapocũbeama.

36 Eropirã erã anyua iro dopa ta ne sĩrisome daja. Erã Goãmũ ĩgũ masunirã árĩrã, Goãmũ porã ãhrima.

37 Dohpaguere sĩrinirã erã masa mũriaboropũre mũare weregura. Irire masia mũa ĩgũ Moise ĩgũ arĩ gojarare. “Iri yucũgũgãgue ẽjũdigũgue árĩgũ Goãmũ õpa arĩ weremi yũre,” arĩ gojañumi Moise. “ ‘Yũhũ Abrahã, Isaa, Jacobo erã opũ ta ãhraa,’ arĩ weremi Goãmũ yũre,” arĩ gojañumi Moise.

38 Erã sĩrira pũhrũgue “Erã opũ ta ãhraa,” arĩñumi Goãmũ. Eropirã erã sĩrinirã mũra ĩgũ masunirã árĩrã erã ojocarirã ãhrima. Árĩpehrerã masa sĩriquererã ojocarirã ãhrima Goãmũ ĩgũ ĩacũ, arĩpũ Jesu erãre.

39-40 ĩgũ eroparĩcũ erãpũ dipaturi Jesure serẽpidiabiñorã. Eropirã bajamerãgã judio masare buherã õpa arĩñorã:

—Buhegũ, mũhũ õaro yãhriabũ, arĩñorã erã ĩgũre.

Cristo Davi mũrũ opũ ãhrimi, arĩ werepũ Jesu

Mt 22.41-46; Mr 12.35-37

41 Pũhrũ Jesu õpa arĩ werepũ masare:

—“Cristo Davi mũrũ pãrami árĩgucumi,” arĩ buherima mũare buherã. ¿Duhpirã erã eropa arĩ buheri?

42 Davi mũrũ ĩgũ basi Salmo ĩgũ gojarapũgue õpa arĩ gojañumi:

Goãmũ yũ opũre õpa arãmi: “Ohõ yũ diayepũ dorebu doaque.

43 Eropigũ mũre ĩhaturirãre mũre tarinũgabasagũra yũhũ,” arĩmi Goãmũ yũ opũre, arĩ gojañumi Davi mũrũ.

44 Eropa arĩ gojagũ Davi mũrũ opũcũñumi Cristore. ¿Eropigũ Davi mũrũ Cristo ñecũ mũrũ árĩqueregũ ta duhpigũ Davipũ Cristore opũcũyuri? Cristo Davi mũrũ opũ ãhrimi, arĩ werepũ Jesu.

Masare buherã erã ñero iirire werepũ Jesu

Mt 23.1-36; Mr 12.38-40; Lc 11.37-54

45 Masa bajarã watope Jesupũ ĩgũ buherãre õpa arĩ werepũ:

⁴⁶ —Masare buherã erã ñeri iirire ïarã ðaro pee masique. Eropirã erã iro dopa iibiricãque. Erã yoari suhri sañama masa erãre ïaboro dopa. Doberi duarogue gajirã umupeori mera bocatĩri serẽcũ gahmema erã. Eropirã erã mari buheri wiriguere oparã ðari doari dihtare doadiama erã. Eropirã bosenuri árĩcũ sãre oparã erã doarigue dihtare doadiama.

⁴⁷ Erã wapeweyarã nome erã wajamocũ ïha erã ya wirire ehmama erã nomere. Eropa erãre mojomoro ïabiriquererã erã masa erã ïhurore yoari boje Goãmure serẽma, “Gua Goãmure ðaro umupeoa,” arĩ gũyarã. Erã eropa iira dipuwaja Goãmũ erãre gajirã tauro dipuwaja moagucumi, arĩpũ Jesu erãre.

21

Wapeweyo Goãmũ wihigue igo apirare werepũ Jesu

Mr 12.41-44

¹ Eropa arĩ weretuha Jesu Goãmũ wihi maja erã amuburi niyeru gameneori comoro pohrogue ïha doapũ. Iri comorogue doberi oparã erã niyeru sãcũ ïapũ Jesu.

² Eropa ïagũ wapeweyo mojomorocũgo igo pesegã igo oparaserigãre igo sãcũ sãre ïapũ.

³ Irire ïatuha ðpa arĩ werepũ:

—Diaye arĩgũ iiaa mũare. Igo wapeweyo mojomorocũgorũ ii comorogue igo yare sãgo gajirã árĩpehrerã erã sãdiro tauro sãmo igoa.

⁴ Gajirã doberi oparã erã wũaro oquerecũ ta erãpũre erã ya wũaro duhyaa. Igorũ mojomorocũgo árĩquerego ta árĩpehreri igo bari waja árĩborare opehocãmo igoa, arĩpũ Jesu.

—Goãmũ wihi cóãra wihi árĩroca, arĩpũ Jesu

Mt 24.1-2; Mr 13.1-2

⁵ Eropi gajirã Goãmũ wihire ïarã ðpa arĩñorã:

—Òari utã mera iira wihi, ðari wihi ãhraa. Masa Goãmũ wihire erã ora sã ðari ãhraa, arĩ wereniguirã iñorã.

Erã eroparĩcũ Jesu werepũ erãre:

⁶ —I wihi majare dohpaguere ïaraa mũa. Gajinũ árĩcũ i wihi maja árĩpehreri mari ïara, i utã sã cohmopehrea waroca. Ne yujuye utãye dujasome, arĩpũ Jesu erãre.

I mũũ pehreburiñũre werepũ Jesu

Mt 24.3-28; Mr 13.3-23

⁷ ïgũ eroparĩcũ peerã erãpũ serẽpiñorã ïgũre:

—Buhegũ, ¿dohpárĩcũ eropa warocuri mũ arĩdiro dopa waro? ¿Pehreburiñũ coregãre dohpa wanugacũ ïarãcuri gũa? arĩ serẽpiñorã erã ïgũre.

⁸ Jesu yuhripu erāre:

—Ōaro iiyuque mua. Eropirā gajirā mūare erā guyarire peebiricāque. Bajarā masa “Cristo āhraa yuhu,” arī guyarā árīrācoma. Eropa arī guyarā “Dohpaguere pehreburiñu merogā dahyaa,” arīrācoma. Erā eroparīcū erāre peebiricāque.

⁹ Eropirā mua pohrogā gajirā masa gamewejēcū, masa erā oparāre cóacū peerāca. Eropirā yoarogue majarā sã eropa iicū peebeorāca. Mua irire peerā güibiricāque. Pehreburiñu core ōpa wamūhtaroca. Eropa wamūhtacū pehreburiñu dahyaniroca dohpa, arīpu Jesu.

¹⁰ Eropa arītuha ōpa arī werenemopu:

—Irisubure yuju yeba majarā gaji yeba majarā mera gamewejērācoma. Eropirā yujugu opu yarā gajigu opu yarā mera gamewejērācoma.

¹¹ Eropiro bajasuburi i yeba ñohmeroca. Eropirā masa bajarā oa mera sīri, árīpehrero majarā masa dorecurācoma. Eropirā umaro majare deyoro moarire guhyadiarire masa ĩarā, ĩha uca warācoma. Eropa wacū mūapu güibiricāque.

¹² “I árīpehreri eropa waboro core, yaharā mua árīri dipuwaja gajirā mūare ñeha ñero iirācoma. Eropirā mari judio masa buheri wirigue mūare weresā, peresu iirācoma mūare. Erā eropa iicū macari majarā oparā pohrogue erā tauro oparā pohrogue sãre mūare aīgārācoma erā mūare dipuwaja moadorerā.

¹³ Erā eropa mūare aīgācū mūapu erāre ōari buherire wererāca.

¹⁴ Erā oparā pohrogue mūare erā aīgācū erā oparāre mua yuhriborore wūaro guñabiricāque mua.

¹⁵ Yuhu mūare wereniguicū iigura. Mūare eropa itamugu pee masirire, ōari wereniguirī sãre mua iicū iigura. Mua eropa iicū mūare ĩhaturirāpu mua wereniguirire pee bo-catūmasisome. “Iri diaye árībeaa,” arī yuhrimasisome.

¹⁶ Irisuburi mua yaharā árīcū ĩha mua pagu sumarā, mua pagu porā, mua acawererā, mua mera majarā sã mūare oparāre wejedorerā orācoma mūare. Erā eropa iicū mūare ĩhaturirā mua mera majarāre gajirāre wejērācoma.

¹⁷ Eropirā yaharā mua árīcū ĩarā, árīpehrerā mūare ĩhaturirācoma.

¹⁸ Mūare eropa iicū mūapu ne dederesome.

¹⁹ Eropirā erā mūare ñero iiquerecū ta mūare erā ñero iirare yujuro bojerā yare duhubiricū Goāmū mūare taugūcumi. Eropigu ĩgu pohrogue mūare opagūcumi.

20 “Eropirã bajarã surara Jerusalénguere erã cãhmotacũ ãarã, Jerusalénre erã cóãborore merogã duhyacũ masirãca m̃a.

21 Eropa wacũ ãarã Judea yeba árĩrãp̃ utã yucugue oma duhriporo. Eropirã Jerusalén árĩrã sã waporo. Eropirã campo árĩrã Jerusalénguere wabiricãporo daja.

22 Irinuri dipuwaja moarinuri árĩpehreri Goãm̃ yare erã gojarapũ erã arĩdiro dopa ta eropa waroca.

23 Goãm̃ oã masare turaro dipuwaja moacũ árĩpehrerogue i yebaguere ñero tarirãcoma. Eropa wacũ nijiposã nome, erã porãre mihrirãre oparã nome sã mojomorocurã nome dujarãcoma irisubure.

24 Gajirã i maca majarãre gamewejãrãcoma. Eropirã gajirã i maca majarãre árĩpehreri yebarigue aĩgã peresu iirãcoma. Eropirã judio masa árĩbirã Jerusalénre ñero iirãcoma. Eropirã erã tarinugarãcoma. Judio masa árĩbirãre “Iripẽta árĩque,” Goãm̃ ãg̃ arĩcũgue Jerusalénre ãhri duhurãcoma, arĩ werep̃ Jesu.

Jesu i yebague ãg̃ dujariborore werep̃

Mt 24.29-35, 42-44; Mr 13.24-37

25 Eropig̃ erãre werenemop̃:

—Irisubure abe um̃ majag̃, ñami majag̃, necã sã guhyaro gohrotoa warãcoma. Árĩpehrerã i yeba majarã, “Cue, sĩrirãca,” arĩ pepirãcoma. Wuariya turaro busurire pãgũri sãre turaro gũirãcoma.

26 Irisubure umaro maja sã yeba sã burigã ñohmeroca. Eropa wacũ ãarã masap̃ i yeba pehrebore corerã burigã gũirãcoma dedereri arĩrã.

27 Irisubu ta yuh̃ mas̃ Goãm̃ ãg̃ obeodig̃ Goãm̃ ãg̃ turari mera, ãg̃ gosesiriri mera umaro maja imica weca i yebaguere yu dujaricũ ãarãcoma masa.

28 Yu eropa arĩra wanugacũ ãarã gũibiricãque. Eropirã guñatura umarogue ãhamujuque. Irisubure Goãm̃ m̃are ãg̃ tauboro merogã duhyaroca, arĩp̃ Jesu.

29 Eropa arĩtuha i queori mera erãre werep̃ Jesu:

—Higuerag̃ baja gaji yucu sã iri yucu waricurire pepique m̃a.

30 Iri yucu pũricucũ ãarã, “Bojori merogã duhyaa,” arĩ masia mari.

31 Eropa ta i árĩpehreri yu arĩra iri eropa wacũ ãarã, “Goãm̃ ãg̃ op̃ árĩburisubu merogã duhyaa,” arĩ pepirãca m̃a.

32 M̃are diaye arĩg̃ iiaa. Irisubu majarã erã sĩriboro core árĩpehreri yu arĩra eropa waroca.

³³ Ʋmaro i yeba sã pehrea waroca. Ʋu wereniguiripu ne pehresome. Árĩpehreri yu arĩdiro dopa ta eropa waha ojogorocuroca.

³⁴ “Ʋu dujariburinure ne masibea m̄ua. Eropirã òaro árĩyunque. Bosenurire pagari iiniguibiricãque. Eropirã merebiricãque. I yeba maja iiburire w̄aro pepibiricãque. M̄are yu arĩdiro dopa ta iirã, guñaña mariro i yebaguere yu aricũ ne ucasome.

³⁵ Ʋuh̄u masare beyegu arigu guñaña mariro ariguca. Waibugu guñaña mariro igu weradague igu mehsihajaro dopa ta irin̄u waroca masare árĩpehrerã i yeba majarãre. I yeba majarã “Eropa waroca,” erã arĩbiririn̄u eropa waroca.

³⁶ M̄arpu òaro guñatura coreque. Eropirã Goãmure ire serẽniguicãque: “Pehrerin̄u eropa wacũ yure itamuque. Turarire oque yure òaro yu tariboro dopa. Eropigu Cristore m̄u obeogure güiro mariro yuh̄u igure bocatĩricũ iique yure,” arĩ serẽque Goãmure, arĩpu Jesu.

³⁷ Eropi irinurire Goãm̄u wihigue Jesu buhemuripu. Ñamiri n̄uca buhetuhajagu Olivo waĩcudigugue waha irigugue árĩboyotahmuamuripu.

³⁸ Boyocũ árĩpehrerã masa igure Goãm̄u wihigue peerã wamurĩñorã.

22

Pahia oparã, judio masare buherã mera wejẽdiañorã Jesure

Mt 26.1-5, 14-16; Mr 14.1-2, 10-11; Jn 11.45-53

¹ Eropi irisubure bugabiriri pan erã baburi bosenu merogã duhyayoro. Iri bosenu Pascua waĩcuyoro.

² Eropirã pahia oparã, judio masare buherã mera Jesure wejẽdiarã, erã wejẽborore guñamaañorã. Jesure wejẽdiakererã ta masapure güiñorã guari arĩrã.

³ Eropi Judapu watĩ igure ñero iidorecũ yuhripu igure. Juda doce Jesu buherã mera majagu arĩripu.

⁴ Eropigu pahia oparãre, Goãm̄u wihi majarã surara oparã mera sãre weretamugu wap̄u. Erã pohrogue eja, erãre Jesure igu ihmuborore weretamupu erã mera.

⁵ Igu erãre eroparĩcũ pee erã mucubiri, “M̄are niyeru wajayerãca,” arĩñorã erã Judare.

⁶ Erã eroparĩcũ, “Áu, m̄are igure ihmugura,” Juda arĩpu. Eropigu masa erã ñabiririsubu Jesure ñhaturirãre igu ihmuborore corenipu.

Jesu igu buherã mera igu baturin̄u árĩyoro

Mt 26.17-29; Mr 14.12-25; Jn 13.21-30; 1Co 11.23-26

7 Bugabiriri panre erã baburinũ bosenu árĩnugarinu árĩyoro. Eropiro Pascua majagu árĩbure ovejare erã wejẽrinũ árĩyoro.

8 Irisubu ta Pedro, Ñu sãre Jesu werepũ:

—Bosenu mari baburire amurã waque, arĩpũ Jesu erãre.

9 —¿Nohonogue mari baburire amudoregu obeori mũhu guare? arĩ serẽpiñorã erã.

10 Erã eroparĩcũ Jesu yãhrípũ:

—Jerusaléngue waque. Eroque mũa ejacũ deco sorobu tuhpeogu mũare bocatĩrigucumi. Īgu bocatĩricũ ĩgu mera waque.

11 Eropa warã ĩgu sihu ñajari wihigue ejarã, wihi opũre õpa arĩque: “ ‘¿Nohogue yũhũ, yũ buherã mera Pascua maja barire barãcuri?’ arãmi buhegu,” arĩque wihi opũre.

12 Mũa eroparĩcũ peegu wũari taribure, umaro maja taribure, mari gameri mera erã amura taribure ĩhmugucumi wihi opũ. Eroque mari baburire iique mũa, arĩpũ Jesu erãre.

13 Īgu eroparĩcũ erã iri macague wañorã. Eroque erã ejacũ erãre ĩgu arĩdiro dopa ta eropa wayoro. Eropirã erã Pascua árĩcũ baburire amuñorã.

14 Erã barisubu árĩcũ Jesu doce ĩgu buherã mera ba doapũ.

15-16 Eroque erã barogue doagu Jesu erãre werepũ:

—Mũare arĩgu iiaa. I Pascua bosenure mari iiaa Goãmũ ĩgu yarãre ĩgu taurare guñarã. Pũhrũ Goãmũ ĩgu opũ árĩroque ĩgu yarãre tautuhagucumi. Īgu eropa tauboro core inũno majare dipaturi basome yũhũ. Eropigu dohpague yũ ñero tariboro core i Pascua maja barire mũa mera turaro badiabũ, arĩpũ Jesu.

17-18 Eropa arĩgu Jesu ihriripare aĩ, Goãmũre “Õhaa,” arĩ serẽ, erãre werepũ:

—Mũare arĩgu tiiaa. Goãmũ ĩgu opũ árĩroque igui decore ihriboro core ne dipaturi ihrisome yũhũ. Eropirã iri vinore aĩ mũa basi ihrique, arĩpũ Jesu.

19 Eropa arĩtuha panre aĩ, Goãmũre “Õhaa,” arĩpũ. Eropa arĩtuha irirure nuha guerepũ erãre. Irirure gueregu ta erãre werepũ:

—I yũ dũpũ ãhraa. Yũ dũpũ yũre ĩhaturirãre erã oburi dũpũ árĩroca. Mũa ñeri iira wajare cóãbu sĩriguca yũhũ. Eropirã mũa yũre guñaburire ire baque, arĩpũ Jesu.

20 Eropa batuha eropa ta erãre ihriripa sãre ópũ. Eropigu erãre werepũ:

—Mũa ñeri iirare cóãbu s̄irigũa. Eropigu yũ dire cóãgũa. Eropa s̄irigũa yũ Pagũ Goãmũ “Masare õaro iigũra,” ĩgũ arĩdiro ii ojogorocũgũa.

21 “Dohpaguere peeque mũa. Yũre ĩhaturirãre ĩhmubu yũ mera ohõ doami.

22 Goãmũ ĩgũ arĩdiro dopa ta yũhũ masũ Goãmũ ĩgũ obeodigu s̄irigũa. ĩgũ eropa s̄iridorequerecũ ta yũre ĩhaturirãre ĩhmudigũpũ ñetariaro tarigũcumi, arĩpũ Jesu.

23 ĩgũ eroparĩcũ erãpũ erã basi õpa arĩ serẽpiñorã:

—¿Jesure ĩhaturirãre ĩhmubu mari mera majagu nihino arĩcuriba? arĩ serẽpiñorã erã basi.

“¿Mari mera majagu nihinopũ opũ arĩgũcuri?” arĩ wereniguiñorã Jesu buherã

24 Pũhrũ Jesu buherã õpa arĩ ðuyasoñorã:

—¿Mari mera majagu nihipũ arĩgũcuri opũ? arĩ wereniguiñorã erã basi.

25 Erã eropa arĩ wereniguicũ peegu Jesu erãre werẽpũ:

—Goãmũre masibirã oparãpũ erã masare dorerã pũriro mera dorema. Eropirã oparãre “Erã masare õaro itamurã ãhrima,” arĩrima gajirã erãre.

26 Mũapũ eropa oparã arĩdiasome mũa basi. Mũa mera majagu mũa tĩgũpũ mũa pagũ magũ iro dopa arĩporo. Mũa mera majagu opũ arĩdiagũ gajirã itamugũ arĩporo.

27 ¿Nihino ãhriri opũ mũa pepicũ? ¿Ba doagũpũ opũ ãhriri? ¿O barire duhpẽogũpũ opũ ãhriri? Ba doagũ ta arĩcumi opũ. ĩgũ eropa arĩquerecũ ta yũpũ pohro majagu iro dopa ta mũare itamugũ ahrabũ.

28 “Masa erã yũre ñero iiquerecũ ta mũapũ yũre duhubirabũ.

29 Eropigu yũ Pagũ ĩgũ yũre opũ acudiro dopa ta mũa sãre oparãre acugũra yũhũ.

30 Yũ opũ arĩcũ mũa sã yũ bari mesa ta baha ihrirãca. Eropirã mũa oparã doarire doarãca. Mũa ero doarã Israe masare doce cururi majarãre beyerãca õarã sãre ñerã sãre, arĩpũ Jesu ĩgũ buherãre.

Pedro “Jesure masibea,” ĩgũ arĩ gũyaburiñere wereñumi Jesu

Mt 26.31-35; Mr 14.27-31; Jn 13.36-38

31 Eropa arĩtuhaja Pedrore Jesu õpa arĩ werẽpũ:

—Simo Pedro yũre peeque. Watĩ Satana mũare arĩpẽhrerãre gamegũ Goãmũre serẽrami. Mũa yũre duhu ĩgũ yare iicũ gamegũ serẽrami. Trigo pohe opũ ĩgũ trigo gasirire cóãgũ puri siriro dopa mũare goroweodiami.

³² Īḡu mũare eropa gamequerecũ yũpũ mũare Goãmũre serēbasabũ. Yũre mũ umupeo duhubiriburire serēbasabũ Goãmũre. Eropigũ mũhũ yũ mera majagũ dipaturi árĩḡu mũ acawererãre yaharãre guñaturacũ iique mũhũ, arĩpũ Jesu Pedroe.

³³ Īḡu eroparĩcũ Pedro yũhripũ:

—Opũ, mũre erã peresu iiquerecũ ta, yũhũ mũ mera majagũ árĩniguigũca. Mũre erã wejēquerecũ ta mũ mera majagũ árĩniguigũca, arĩpũ Pedro.

³⁴ Jesu yũhripũ:

—Pedro, mũre arĩḡũ iiaa. Dohpagã ñami cãreña ĩḡu wereboro core uħresubu “Jesure masibea,” arĩḡũca mũhũ gajirãre, arĩpũ Jesu Pedroe.

Jesure erã ñero iinũgaboro merogã duhyayoro

³⁵ Eropa arĩtuha Jesu ĩḡu buherãre wererũ:

—¿Sohõ árĩrasubure mũa niyeru aju moorã, suhri diyeri aju moorã, zapatu moorã mũare yũ obeorasubure gajino duhyari mũare? arĩ serēpipũ Jesu.

—Ne gajino guare duhyabirabũ, arĩ yũhriñorã erã.

³⁶ —Irisubure mũare duhyabiriquerecũ ta dohpaguepũre suhri diyeri ajure, niyeru aju sãre oparã irire aĩque. Eropirã mũare matamijiri maricũ ĩarã mũa suhrire duarã irimijire asũque.

³⁷ Ire mũare arĩḡũ iiaa. Goãmũ yare erã gojarapũ erã arĩdiro dopa ta yũre eropa waro gahmea. Ōpa arĩñuma iripũque. “ Īḡu dorerire tarinũgarã mera majagũ aħrimi, ’ arĩrãcoma masa,” arĩ gojañuma yũre, arĩpũ Jesu. Erãpũ arĩñorã:

³⁸ —Īaque opũ. Pemiji matamijirire opaa guã, arĩñorã ĩḡu buherã.

—Iripēta árĩca, arĩ yũhripũ Jesu.

Getsemanigue Jesu Goãmũ mera wereniguipũ

Mt 26.36-46; Mr 14.32-42

³⁹ Eropi Jesu ĩḡu ero core ĩḡu iiguadiro dopa ta Olivo waĩcũdigũ utãḡugue waha warũ. Īḡu eropa wacũ ĩḡu buherã ĩḡu mera wañorã.

⁴⁰ Eroque ejagũ ĩḡu erãre wererũ:

—Goãmũre serēque mũa ñerire iibiriboro dopa, arĩpũ erãre Jesu.

⁴¹ Eropa arĩtuha ĩḡu seyaro merogã yujugũ ta wanemo, mereja Goãmũ mera wereniguipũ:

⁴² —Aħũ, yũ ñero tariburire iidibigũ iibiricãque. Yũ eropa serēquerecũ ta yũ gamero dopa iibita. Mũpũ masia. Mũ gamero dopa ta iique, arĩ serēpũ Jesu Goãmũre.

43 Īḡu eropa arī serēcū ʘmarogue aridigū anyu Jesure dehyoapū ĩḡure itamugū.

44 Eropigū Jesu ñero sīporācū turaro mera Goāmū mera werenigūipū. Eropiro ĩḡu ñajasiri guari di wiriro dopa ĩḡure wiridijayoro.

45 Goāmū mera wereniguituha wahgānūgaja, ĩḡu buherā pohrogue dujaa wapū. Īḡu dujajacū ĩḡu buherā b̄urigā b̄ujawererā árīrā carīrā árīñorā.

46 Eropigū Jesu erāre ōpa arī werepū:

—¿Duhpirā carīri m̄ua? Wahgāque. Goāmure serēque m̄ua ñeri iibiriburire, arīpū Jesu erāre.

Jesure ĩhaturirā ĩḡure peresu iñorā

Mt 26.47-56; Mr 14.43-50; Jn 18.2-11

47 Īḡu eropa arī wereniguirisubu masa bajarā erañorā. Juda doce buherā mera majagū árīdigū masare m̄uhtagāridigū árīpū. Eropigū ĩḡu Jesu pohro eraa, ĩḡu wayuporāre mimipū ĩḡure.

48 Īḡu eropa mimicū Jesupū ĩḡure serēpipū:

—Juda, ¿yū masure Goāmū ĩḡu obeodigure yure ĩhaturirāre ĩhmugū yū wayuporāre mimiri m̄uhū? arīpū Jesu.

49 Īḡu eropa arīra p̄uhrū Jesu buherā masa Jesure erā ñeaburire masirā ĩḡure serēpiñorā:

—Opū, ¿ḡua matamijiri mera erāre gamequeāsi? arīñorā erā.

50 Erā eropa arīra p̄uhrū yujugū Jesu buherā mera majagupū pahia opū pohro majagure ĩḡu matamiji mera ĩḡu gamirore diayepū árīri gamirore tabe coro dijucāpū.

51 Īḡu eropa iicū ĩagū Jesu ōpa arīpū:

—Iibita, arīpū.

Eropa arītuha pohro majagū gamiro árīrañere mohmepipū. Īḡu eropa iicū pohro majagupū m̄uraro ta dujapū daja.

52 Eropa iituha pahia oparāre, Goāmū wihi surara oparāre, m̄urā säre ĩḡure ñeamorāre Jesu serēpipū:

—¿M̄ua matamijiri mera, yucū d̄ucari mera arirā yajari masure iro dopa ta yure ñearā arirā iiari?

53 ʘm̄uri n̄ucū Goāmū wihigue m̄ua mera yū árīcū, m̄ua yure ñeabiribū. Eropa arīquerecū ta dohpague m̄ua ñerā yanū ta āhraa. Watī ĩḡu tarinūgaburisubu árīro iiaa, arīpū Jesu.

“Jesure masibea,” arīpū Pedro

Mt 26.57-58, 69-75; Mr 14.53-54, 66-72; Jn 18.12-18, 25-27

54 Erã Jesure ñeatuha pahia opu ya wihigue aĩgãñorã erã ĩgure. Erã aĩgãcũ Pedro yoarogue erãre ĩhanurusiapũ.

55 Opu ya wihigue ejacũ, iri wihire cãhmotara sãriro pohecague õari goro deco peame dihuñorã gajirã. Erã dihucũ ĩagũ Pedro peame pohro doarã mera doarũ.

56 ĩgu peame boyorogue doacũ yujugo pohro majago ĩgure õaro ĩhanuru gajirãre õpa arĩ werepo:

—Ihĩ sã ĩgu mera ta ãhrami, arĩpo igo.

57 Igo eroparĩcũ Pedro yũhripũ:

—Nomeo, ĩgure ne masibea yũhũ, arĩripũ Pedro.

58 Pũhrũ ñari gajigu Pedroro ĩha, õpa arĩ werepũ:

—Mũ sã erã mera majagu ta ãhraa, arĩpũ ĩgu.

—Ne, árĩbeaa, arĩripũ Pedro.

59 Yuju hora pũhrũ gajigu gajirãre õpa arĩ werepũ:

—Diaye ta ãhraa. Ihĩ Galilea majagu ãhrimi. Diaye ta Jesu mera ãhrami ihĩ sã, arĩpũ ĩgu gajirãre.

60 ĩgu eroparĩcũ Pedro yũhripũ:

—Mũ arĩgure ne masibea yũhũ, arĩ yũhripũ.

Ĩgu eropa arĩ wereniguirisubu cãreña werepũ.

61 ĩgu werecũ mari Opu Jesu wihi pohro árĩdigũ Pedroro maji ĩapũ. ĩgu eropa ĩacũ Pedropũ Jesu ĩgu arĩrare guñapũ. “Dohpagã ñami cãreña ĩgu wereboro core, uhresubu mũhũ, ‘Yũhũ Jesure masibea,’ arĩgũca mũhũ,” Jesu ĩgu arĩrare guñapũ Pedro.

62 Eropigu Pedro erogue wiriri, turaro orepũ.

Jesure wereya, pañorã erã

Mt 26.67-68; Mr 14.65

63 Eropirã Jesure corerã surara ĩgure wereya, pañorã.

64 Eropa parã ĩgu cuirire diricãhmota, ĩgure serẽpiñorã:

—¿Noa mũre pari? ĩabiriqueregũ ta wereque guare, arĩ wereyañorã erã.

65 Eropirã baja gaji ñero arĩ wereyañorã erã ĩgure.

Jesure opu serẽripũ

Mt 26.59-66; Mr 14.55-64; Jn 18.19-24

66 Eropirã boyorogue ta mũrã, pahia oparã, judio masare buherã sã gamenereñorã. Erã eropa gamenererore gajirã erã pohroge Jesure aĩgãriñorã.

67 —Wereque guare. ¿Goãmũ beyedigũ Cristo ãhriri mũhũ? arĩ serẽpiñorã erã Jesure.

Erã eroparĩcũ Jesu yũhripũ:

—Mũare yũ werecũ sãre yũre peesome mũa.

68 Mũare yũ serẽpicũ yũre yũhrisome mũa. Eropirã yũre wiusome mũa.

69 M̄ua yure wiubiriquerecũ ta p̄hru ñari umuri n̄acu yuh̄u masu Goãm̄u ïgu obeodigu Goãm̄u yu Pagu turagu ïgu diayeru doagu ár̄iguca, ar̄ipu Jesu.

70 ïgu eropar̄icũ erã ár̄ipehrerã serēpiñorã daja dipaturi: —¿Eropa ar̄igu “Yuh̄u Goãm̄u magu ãhraa,” ar̄iri m̄uhu? ar̄iñorã erã.

—M̄ua ar̄iro dopa ïgu ta ãhraa, ar̄i yuh̄ripu Jesu erãre.

71 ïgu eropar̄icũ òpa ar̄i erã basi wereniguñorã erã:

—Ïre weresãrãre gajirãre mari gamebeaa pare. Erã n̄acu ta sihajama. ïgu Goãm̄ure ïgu ñero wereniguicũ mari basi ta mari peea. Eropirã ïgu ñero iira dipuwajare masituhã, ar̄iñorã erã erã basi.

23

Pilato Jesure serēpipu

Mt 27.1-2, 11-14; Mr 15.1-5; Jn 18.28-38

1 Eropa ar̄ituha erã ár̄ipehrerã wahgãnugaja, Jesure Pilato waic̄ugu opu pohrogue aigãñorã.

2 Aĩ ejarã Jesure weresãnugañorã:

—Ih̄i mari ya yeba majarãre ñero iidorecũ peeabũ. Mari opure Césare ih̄i wajayedorebeami. Eropigu ïgu “Yuh̄u opu ãhraa. Cristo ãhraa yuh̄u,” ar̄i wereniguimi ïgu basi, ar̄i weresãñorã erã Jesure.

3 Erã eropa ar̄i weresãra p̄hru Pilato Jesure serēpipu:

—¿Diaye ta judio masa opu ta ãhriri m̄uhu? ar̄ipu ïgu Jesure.

—M̄u ar̄iro dopa ta ïgu ta ãhraa, ar̄i yuh̄ripu Jesu.

4 ïgu eropar̄icũ Pilato pahia oparãre, masa sãre wereru:

—Ïre gajino waja dipuwaja mara, ar̄ipu ïgu.

5 ïgu eropa ar̄iquerecũ ta erã turaro weresãnemoñorã:

—Ïgu, ïgu buheri mera masare gamequeãcũ iimi. Galilea yeba ïgu irire iinugami. Eropa iinugatuha ár̄ipehrero Judea yebague irire ïgu iimi, ar̄i weresãñorã erã.

Herode waic̄ugu opu Jesure serēpipu

6 Erã eropa ar̄i weresãcũ peegu Pilatopu serēpipu:

—¿Ih̄i Galilea majagu ãhriri? ar̄ipu ïgu.

7 —Ero majagu ta ãhrimi, ar̄i yuh̄riñorã gajirã.

Erã eropa yuh̄ricũ peegu Pilatopu Jesu ïgu ar̄iri yebare masigu opu Herode ïgu ya yeba majagu ïgu ar̄icũ masipu. Irire masigu Jesure Herode pohro obeopu. Irisubure Herode Jerusalén ar̄ipu.

8 Ero core Herode Jesure peem̄ripu. ïgu eropa peera p̄hru ïgure b̄arigã ñadiaripu. Jesu ïgu deyoro moarire

ĩḡu ii ĩhmucũ ĩadiaripũ ĩḡu. Eropigũ ĩḡu Jesure ĩaḡu mucubiripũ.

⁹ Eropigũ baja serẽpipũ Jesure. ĩḡu eropa serẽpiquerecũ ta Jesupũ ne yũhribiripũ ĩḡure.

¹⁰ Pahia oparã, judio masare buherã sã Herode pohro nuḡaja turaro Jesure weresãñorã.

¹¹ Erã eropa arĩ weresãra puhrũ Herode ĩḡu surara mera wereya, Jesure ñero iiñorã. Eropa wereyarã, õariñe suhrirore opu yañe dopa bejariñere sãñorã erã Jesure. Eropa wereyatuha, iri suhrirore tuwea aĩ Pilato pohro obeoñorã daja.

¹² Irinũre Herode, Pilato mera õaro erã basi game iinũgarã árĩnuḡañorã. Ero corere erã basi game ĩhaturirã árĩriñorã.

Masa Jesure wejẽdoreñorã

Mt 27.15-26; Mr 15.6-15; Jn 18.39-19.16

¹³ Eropi Pilato pahia oparãre, gajirã oparãre, masa sãre ĩḡu sihubecũ gamenereñorã.

¹⁴ Erã gamenerecũ ĩaḡu õpa arĩpu erãre:

—Ĩre yũre aĩḡãrirã, “Ĩḡu masare ñero iidoremi,” arĩraa mua yũre. Dohpague mua ĩhuro ĩre serẽpipehoabu daja. Yũ eropa serẽpira puhrũ mua ĩḡure weresãcũ ñeri dipuwaja mara yũ ĩacũ.

¹⁵ Herode sã “Ĩḡure ne ñeri dipuwaja mara,” arãmi. Eropa arĩḡu dipaturi ĩre ohõ dujuami daja. Eropiro ĩre wejẽdorero mara. Mua sã irire ĩha masia.

¹⁶ Eropigũ ĩḡure tãraradari mera tãradoreḡuca yũhu. Erã eropa tãrara puhrũ ĩḡure wiugura, arĩripũ Pilato.

¹⁷ Bojori nuçu Pascua bosenuri nuçu peresu árĩdigure yujugure masa gameḡure Pilato eropa wiubasamũripũ. Eropa iiro gameyoro ĩḡure.

¹⁸ Eropirã Pilato “Jesure wiugura,” ĩḡu arĩcũ peerã árĩpehrerã masa õpa arĩ gaguiniguiñorã:

—Ĩḡu Jesure wejẽque. Guã yagu árĩbure Barrabãpũre ḡuare wiubasaque, arĩ gaguiniguiñorã masa.

¹⁹ Ero Barrabãpu Jerusalengue oparãre ĩḡu cóãdorera dipuwaja, ĩḡu gajirãre wejẽra dipuwaja peresu iiñorã ĩḡure.

²⁰ Pilato Jesupũre wiudiaripũ. Eropigũ ĩḡu masare ĩḡu wiabure serẽpi ĩapũ daja.

²¹ ĩḡu Jesure eropa wiudiaquerecũ ta erã ĩḡure arĩñorã daja:

—Crusague pabia wejẽque ĩḡure. Wejẽcãque ĩḡure, arĩ gaguiniñorã erã.

22 Erã eroparĩcũ Pilato uħresubu waro gohra õpa arĩripũ daja erãre:

—¿Ñehenore ñerire iiari ĩgũ mũa eropa arĩ gaguiniguicũ? Ne ĩgũre ñeri dipuwaja mara. Eropigũ ĩgũre wejẽdoremasibea. ĩgũre tãraradari mera tãradoregũca. Iripẽta iidoregũca. Eropigũ ĩgũre wiugũca, arĩripũ Pilato.

23 ĩgũ eroparĩcũ ta erã turaro mera gaguininemo, Jesure crusague wejẽdoreñorã. Erã eropa arĩ gaguinicũ peegu Pilato erã gamero dopa ta iidorepũ.

24 Eropigũ erã arĩro dopa ta Pilato Jesure wejẽdorepũ.

25 Eropa doregu masa serẽdigũre wiupũ. ĩgũ peresugue ářĩgũre, masare gamewejẽcũ iidigũre, masare wejẽdigũre Pilato Barrabãpũre wiupũ. Eropigũ masa erã gamero dopa ta Pilato Jesure crusague wejẽdorepũ.

*Erã Jesure crusague pabia wejẽñorã
Mt 27.32-44; Mr 15.21-32; Jn 19.17-27*

26 Eropirã erã Jesure wejẽrã warã, aĩgãñorã. Erã eropa warisubu Simo waĩcũgu Cirene majagu pohegue ejadigu erapũ. Jerusaléngue ĩgũ eracũ ĩarã Jesure aĩgãrã ĩgũre bocatĩri, ñeha, crusare ĩgũre coãtamudoreñorã Jesu pũhrũ.

27 Eropirã masa bajarã Jesure ĩhanũrusiañorã. Eropirã gajirã nome ĩgũre erã eropa iicũ ĩarã turaro ore nũrusiañorã.

28 Erã orecũ peegu Jesu erãre maji ĩha õpa arĩpũ:

—Jerusalén majarã nome yũre orebircãque. Mũa basi, mũa porã ya arĩburire oreque.

29 Gajinũri ářĩcũ masa õpa arĩrãcoma. “Porã marirã nome dohpaguere mari ářĩcũ õatariaboaya,” arĩrãcoma masa.

30 Irisubure utãgũre õpa arĩ wereniguirãcoma masa. “ĩgũ utãgu gũa weca yuri bejaporo. Gũare wejẽcãporo,” arĩrãcoma masa.

31 Masa yũre dipuwaja marigũre erã õpa iicũ, ñeri dipuwaja oparãpũ ñetariaro warãcoma, arĩpũ Jesu.

32 Gajirã perã dorerire tarinũgarã erã ářĩcũ erã sãre Jesu mera erã wejẽmorãre aĩgãñorã erã.

33 Erã aĩgã dipu pero waĩcũrogue eja crusague Jesure pabiañorã. Eropirã gajirã perã sãre yujugũre ĩgũ diayepũ gajigũre ĩgũ copũ crusariguere pabiañorã.

34 Erã eropa iicũ Jesu õpa arĩpũ:

—Ahũ, oã dohparagã erã ñero iirire cãdijique erãre. Erã erã eropa iirire masibea. Eropigũ irire cãdijique, arĩpũ Jesu ĩgũ Pagũre.

Eropirã surara Jesu suhri mũrãre “¿Noa yañe ářĩrocuri ĩñe?” arĩ game bira wajatañorã.

³⁵ Eropirã masa ero niguirã erã ïaro judio masa oparã Jesure wereyañorã:

—Ïgũ gajirã masare s̄iribonirãre taurapũ. Eropigũ ïgũ Cristo Goãmũ ïgũ beyedigũ árĩgũ ïgũ basi tariporo, arĩ wereyañorã erã.

³⁶ Surara sã ïgũre wereyañorã. Jesu pohro ejarã, vino suĩrire erã oriñorã.

³⁷ Irire iirã õpa arĩñorã erã:

—Mũhũ judio masa erã opũ árĩgũ ta, mũ basi tarique, arĩñorã erã.

³⁸ Eropi ïgũ weca õpa arĩ gojarapũre pabia tuñorã: “Ihĩ judio masa tauro opũ árĩgũ ãhrimi,” arĩ gojaturapũ árĩyoro. Griego ya mera, Roma majarã ya mera, judio masa ya mera gojarapũ árĩyoro.

³⁹ Gajigũ ïgũ mera erã pabia tudigũ ïgũ ñero arĩ wereniguiipũ Jesure:

—¿Mũhũ Cristo árĩbeari? Mũ basi, gũa sãre tauque, arĩpũ ïgũ Jesure.

⁴⁰ Ïgũ eroparĩcũ peegu ïgũ mera majagupũ ïgũre yũhripũ:

—Eropa arĩbircãque. ¿Duhpigũ Goãmũre umupeobeari mũhũ? Marire yujuro mera dipuwaja moama erã.

⁴¹ Maripũre mari ñeri dipuwajare dipuwaja moarã diaye iirã iima erã. Ihĩpũ ñerire iibiriñumi, arĩpũ gajigũ tarinũgagupũ.

⁴² Eropa arĩgũ ïgũ Jesure õpa arĩpũ:

—Jesu, mũhũ opũ árĩrogue árĩgũ yũ sãre guñaque, arĩpũ ïgũ Jesure.

⁴³ —Mũre ire arãa. Dohpagãre yũ mera paraíso waĩcãrogue yũ mera árĩgũca, arĩpũ Jesu ïgũre.

Jesu s̄iria wapũ

Mt 27.45-56; Mr 15.33-41; Jn 19.28-30

⁴⁴ Eropi goeri boje gohra árĩcũ árĩpehrerogue uñre hora gohra naitĩa wayoro.

⁴⁵ Naitĩaro árĩrisubu Goãmũ wihi majañe suhriro cãhmotara suhriro deco mera yehguea wayoro.

⁴⁶ Eropigũ Jesu turaro gaguinipũ:

—Ahũ, yũ s̄iporãre mũre wiaa mũ dibuboro dopa, arĩ gaguinipũ Jesu.

Eropa arĩtuha s̄iria wapũ.

⁴⁷ Eropa wacũ ïagũ surara opupũ “Goãmũ turagu ãhrimi,” arĩ, “Ihĩ Jesu diaye ta õagũ ãhrañumi,” arĩpũ ïgũ.

⁴⁸ Eropirã ero gamenererã iri eropa wacũ ïarã, Jesu ïgũ s̄iricũ ïarã, erã ya wihigue dujaa wañorã. Dujaa wa, bujawereri mera waha wañorã.

49 Árípehrerã Jesu mera majarã, Galileague ĩgu mera arinirã nome sã yoarogue Jesure ĩhu niguiñorã.

Jesu dũpũre masa gobegue apiñorã
Mt 27.57-61; Mr 15.42-47; Jn 19.38-42

50-51 Irisubure José waĩcũgu ero árĩpũ. Judea yeba Ari-matea waĩcũri maca majagu árĩpũ. Eropigu ĩgu õagu, diaye iigu árĩgu, Goãmũ ĩgu opu árĩnũgaburire coregu árĩpũ. Eropigu ĩgu judio masa oparã mera majagu árĩqueregu ta Jesure erã wejẽdorecũ gamebiriripũ ĩgu.

52 Eropigu Pilato pohrogue eja, Jesu mũru dũpũre serẽpũ.

53 Serẽtuha Jesu dũpũre aĩ diju, õari suhriro mera ĩgu dũpũre omarũ. Eropa omatuha masa gobegue utãyegue erã seara gobegue apĩpũ ĩgu dũpũre. Iri gobere ne yujugu sĩridigũre yaanibiriñorã dohpa.

54 Irinũ Sabadonũ maja árĩburire erã amuyurinũ árĩyoro. Sabado judio masa soorinũ árĩboro merogã dũhyayoro.

55 Eropirã Galileague Jesu mera arinirã nome masa gobegue José wacũ ĩarã nũrũsiañorã. Masa gobegue eja, iri gobere ĩha, Jesu dũpũre ĩgu apirare ĩañorã.

56 Pũhrũ erã ya wihigue dujaa wañorã. Poresurire ĩgu dũpũre sũburire amuñorã erã. Eropirã Sabado árĩcũ Goãmũ ĩgu dorerire Moisere ĩgu apirare iri dorero dopa ta erã sooñorã.

24

Jesu masa mũriaru
Mt 28.1-10; Mr 16.1-8; Jn 20.1-10

1 Domingo árĩcũ boyorogue erã nome erã poresuri erã amurare aĩ Jesu masa gobe pohrogue aĩgãñorã.

2 Iri gobegue ejarã, iri gobere biharaye utãyere erã pãgũ nugurayere ĩañorã.

3 Eropa ĩarã erã iri gobegue ñaja wañorã. Jesu dũpũpũre ne bocajabiriñorã erã.

4 ĩgu dũpũre bocabirã, “¿Dohpa wayuri?” arĩ pepiñorã erã. Erã eropa arĩ pepi erã werenigui amaro gohra perã uma goesiriri suhricũrã erã pohro niguiñorã.

5 Ero erã niguicũ ĩha, nome gũirã merejañorã. Eropirã mũrapũ erãre wereñorã:

—¿Duhpimorã sĩridigũ mũru ĩgu árĩdirore ahmari mũa? Dohpague ĩgu ojocarigu ãhrimi.

6 ĩgu õre marimi. Masa mũriatuhami. ¿Sohõ árĩrasubure Galileague mũa mera árĩgu ĩgu arĩrere guñari mũa?

7 “Yũ masũre Goãmũ ĩgu obeodigũre wiarãcoma ñerãre. Erã yũre crusague pabia wejẽrãcoma erã yũre. Eropigu yũ

sĩrira pũhrũ Ʃhreneũ pũhrũ masa mũriagueca yũhu,” Ʃmũare ĩgu arĩrare guĩari mũa? arĩĩnorã Ʃmapũ.

⁸ Erã eroparĩcũ peerã, nomepũ ĩgu arĩrare guĩañorã.

⁹ Erã eropa arĩra pũhrũ erã dujaa waĩnorã. Once buherãre gajirã sãre irire werepehoĩnorã.

¹⁰ Erã nomepũ María Magdalena, Juana, María Santiago pago arĩĩnorã. Erã nome gajirã nome sã arĩĩnorã Jesu buherãre eropa wererã nome.

¹¹ Erã eropa arĩ werequerecũ ta Jesu buherãpũ “Erã diaye arĩbiribocoma. Eropa arĩcãrã iima oã nome,” arĩ pepiriĩnorã. Eropirã erã nomere peediabiriĩnorã.

¹² Erã eroparĩcũ peegũ, Pedropũ masa gobegue omagã, ĩagũ wapũ. Iri gobegue eja, ĩgu muhmeraja ĩhame acupũ. Jesure erã omara gasiro dihtare ĩapũ. “ƩDohpa wayuri?” arĩ pepigũ ĩgu wihigue dujaa wapũ.

Emaus waĩcũri maca maja mague Jesu dehyoapũ

Mr 16.12-13

¹³ Irinũre perã Jesu buherã mera majarã Emaus waĩcũri macague warã iĩnorã. Jerusalenre once kilõmetros yoaro ãhraa Emaure ejaro.

¹⁴ Emaugue waha, arĩpehreri Jesure eropa warare wereniguigãrã iĩnorã.

¹⁵ Erã eropa arĩ werenirisubu Jesupũ erã watope erã mera wapũ.

¹⁶ Eropirã ĩgũre ĩaquererã ta erã ĩgũre ĩha masibiriĩnorã.

¹⁷ —ƩMũa curirã warã dohpa arĩ werenigui bujawererã iiri mũa? arĩpũ Jesu.

Ĩgu eroparĩcũ erã dujanũgaĩnorã bujawererã.

¹⁸ Eropigũ Cleofa waĩcũgũpũ Jesure yũhripũ:

—ƩDohpaguere Jerusalenre erã iirare mũ dihta masi-bearĩ? arĩ serẽpipũ ĩgu.

¹⁹ —ƩDohpa wahãri Jerusalenre? arĩpũ Jesu.

Ĩgu eroparĩcũ Cleofa yũhripũ:

—Jesure Nazare majagũre erã iirare arĩrã iiaa. ĩgu Goãmũ yare weremũhtagũ arĩrimi. Eropirã ĩgu werenigu-irire peerã, ĩgu iira sãre ĩarã, “Turagũ ãhrimi,” arĩ pepirima masa. Goãmũ sã eropa arĩ pepicumĩ.

²⁰ Mari pahia oparã, gajirã oparã mera ĩgũre wejẽdorerã gajirãre ohama. Erã eropa ocũ gajirãpũ ĩgũre crusague pabia wejẽama.

²¹ “Roma majarãre cóãbu Israe masa opũ arĩbu ãhrimi,” arĩ pepiribũ gũa ĩgũre. Dohpagã mera Ʃhreneũ wahaa ĩgu sĩrira pũhrũ.

²² Bajamerãgã gũa mera majarã nome gũare Ʃcacũ iiaa. Boyoro Jesu ĩgu masa gobegue erã eja,

23 Īḡu dūpūre erā bocabirañorā. Dūpūre bocabiri erā dujara wereama. “Ḡuare anyua dehyoama. Jesu ojocariapū,” arī wereama nomerū.

24 Erā eroparīcū gajirā ḡua mera majarāpū iri gobegue eja nome erā arīdiro dopa ta ĩañorā. Erā sã Jesu mūrūre ĩabirañorā, arīpū ĩḡu Jesure.

25 Īḡu eropa arīra pūhrū Jesu werepū erāre:

—Mūa ne peebirā āhraa. ¿Goāmū yare weremuhtanirā mūra erā arīrare ðaro peebeari mūa?

26 Cristo opū árīboro core ĩḡu ũmarogue ĩḡu mūriaboro core ĩḡure ñero tariro gahmeabū. ¿Irire masibeari mūa? arīpū Jesu erāre.

27 Eropa arīḡu Goāmū yare erā gojarapūguere erā ĩḡure gojayurare Jesu werepehocāpū erāre. Moise mūrū ĩḡu gojarare Jesu werenūgarū. Eropiḡu árīpehrerā Goāmū yare weremuhtanirā erā gojara säre erāre werepehocāpū.

28 Erā erā wari macague erā ejacū Jesupū erāre tarigāḡu dopa ĩipū.

29 Īḡu eropa ĩiquerecū ta erāpū ĩḡure wadorebiriñorā.

—Ḡua mera dujaque. Ñamicague āhraa. Nairo iica, arīñorā erā Jesure.

Eropiḡu Jesu erā mera wihigue ñaja wapū.

30 Pūhrū ĩḡu erā mera erā bari mesague doaja, panre aĩ, Goāmūre “Ōhaa” arīpū. Eropa arīḡu iri panre nuha aĩ erāre ópū.

31 Īḡu eropa ĩicū ĩarā erā Jesure ĩha masiñorā pare. Erā ĩha masira pūhrū ĩḡu dederea wapū.

32 Īḡu eropa dederecū erā erā basi ópa arī wereniguiñorā:

—Mague ĩḡu marire wereniguirisubu Goāmū ĩḡu gojarare ĩḡu wereniguirisubu mari sīporā mera ðaro mucubiriri mera pepiabū mari, arīñorā erā basi.

33 Eropa arītuha erā mata Jerusaléngue dujaa wañorā. Eroque eja, once buherāre, gajirā mera gamenererāre bocañorā.

34 Erā ejacū, once buherā ópa arīñorā erāpūre:

—Diaye ta mari Opū masa mūriadi āhrami. Simo Pedro ĩḡure ĩapū, arīñorā erā.

35 Erā eroparīcū peerā Emaus wari maha wanirā sã erā ĩarare wereñorā:

—Jesu ĩḡu panre nuha ḡuare ĩḡu ocū ĩha masiabū ḡua, arīñorā gajirāre.

Jesu ĩḡu buherāre dehyoapū

Mt 28.16-20; Mr 16.14-18; Jn 20.19-23

36 Erā eropa arī wererisubu mata Jesupū erā pohro dehyoanūgarapū.

—¿Áhriri mũa? arĩpũ ãgu erãre.

37 Ìgu eroparĩcũ erã “Sĩridigũ mũrũre ãarã iiaa mari,” arĩ pepi, turaro gũĩñorã.

38 Erã eropa gũicũ ãagu ãgu erãre werepũ:

—¿Duhpirã gũiri mũa? ¿Duhpirã yũre ãarã “I diaye áribeaa, arĩri mũa?”

39 Yũ mojotorire yũ guburi sãre ãaque. Mũa irire ãarã, yũre ãha masirãca. Yũre mohmepique. Mohmepirã masirãca mũa. Sĩridigũ mũrũ dũpũ moomi. Yũpũ dũpũca, arĩpũ Jesu.

40 Eroparĩgu ãgu mojotorire, ãgu guburire ãhmupũ erãre.

41 Ìgu eropa ãhmuquerecũ ta erã bũrigã mucubiri uca warã “I diaye áribeaa,” arĩ pepiniñorã dohpa. Erã eropa arĩ pepicũ masigu Jesu erãre serẽpipũ:

—¿Õre bari áhriri? arĩpũ ãgu.

42 Ìgu eroparĩcũ waimũ mupudigũre mome imisĩri sãre oñorã ãgũre.

43 Irire aĩ erã ãhuro Jesu bapũ.

44 Batuha Jesu werepũ erãre:

—Sohõ mari áriřasubu mũa mera áriřgu yũhũ mũare werediro dopa ta dohpaguere yũre eropa wahabũ. Goãmũ doreri Moise marire ãgu apira ãgu eropa arĩ gojadiro dopa ta yũre eropa wahabũ. Goãmũ yare weremãhtanirã, Salmopũre gojanirã sã iribojegue erã yũre arĩ were gojayudiro dopa ta dohpague yũre eropa wahabũ. Eropa ta waro gahmeabũ, arĩpũ Jesu.

45 Eropa arĩtuha Goãmũ yare erã arĩ were gojarare ãgu buherãre masicũ iipũ Jesu erãre.

46 —Goãmũ yare erã gojara õpa arĩyoro: “Cristo ñero tarigũcumĩ. Eropigu uhrenũ pũhrũ ãgu sĩrira pũhrũre ãgu masa mũriagũcumĩ.

47 Ìgu masa mũriara pũhrũ áriřehrerĩ yeba ãgu yarã Goãmũ yare buherãcoma. ‘Mũa ñerire bujawererã Jesu-cristo mera mũa ñerire cãdijirã áriřãca,’ arĩ wererãcoma masare. Eropa weremorã Jerusalén werenũgarãcoma,” arĩ gojañumi Goãmũ yare erã gojarapũ, arĩpũ Jesu.

48 Eropa arĩtuhaja õpa arĩ werenemopũ:

—Mũapũ i áriřehrerire ãanirã áhřaa. Eropirã gajirãre wererãca.

49 Goãmũ “Ìgũre mũare obeogũra,” ãgu arĩdigũre yũpũ mũare obeogũra. Eropirã Jerusaléngue ãgu Espĩritu Santo mũare ãgu eraburire coreque mũa. Ìgu mũare turarire ogũcumĩ, arĩpũ Jesu ãgu buherãre.

*Jesu ɯmarogue mɯria wapu**Mr 16.19-20*

⁵⁰ Eropa arĩtuha Jesu erãre Jerusalén árĩrãre Betaniague aĩgãpɯ. Erogue eja, Jesu ĩgu mojotori mera sĩmuju, “Ōaro árĩque,” arĩpɯ erãre.

⁵¹ Eropa arĩtuha erãre api, ɯmarogue mɯria wapu.

⁵² ĩgu mɯriara pɯhrɯ erã ĩgure umupeo, “Ōagu, turagu āhrimi,” arĩ, Jerusaléngue bɯrigã mucubiriri mera dujaa wañorã.

⁵³ Ero āhri ɯmɯri nɯcɯ erã Goãmɯ wihigue Goãmure serēmɯriñorã. “Mɯhɯ ðagu āhraa,” arĩ umupeonigu-icãmɯriñorã erã ĩgure. Eropa ta árĩporo. Iripëta āhraa.

San Juan

Ñu waĩcugũ ipũre gojadigũ Jesucristore ïamuriñumi. Jesucristo i yebare buhecũ Ñu ïgũ buhegũ árĩmuriñumi. Eropigũ Jesu sĩridigũ masa mũria ïgũ Pagũ pohro mũriara pũhrugue Ñu ipũre gojañumi.

Cristo masũ ta árĩnũgañumi

¹ Negohraguere i yeba árĩboro coregue ta Cristo mata árĩmũhtamũrituhapũ. ïgũ Goãmũ mera árĩpũ. Eropigũ ïgũ Goãmũ ta árĩcãgũ ïipũ.

² Matague ta Cristo Goãmũ mera árĩpũ.

³ Eropigũ i yebare, umũsire árĩpehrerire ïhacũnugudorepũ Goãmũ ïgũre. Eropigũ masa sãre ïhacũnugudorepũ ïgũre. Eropigũ irire ïhacũnugupehopũ ïgũ Jesucristo. Eropiro irire ïgũ ïhacũnugupehobiricũ i ne mariboya.

⁴ Cristo ojocaririre ogũ ãhrimi. Boyocũ mari mari basi õaro mari ïha masiro dopa ta, ïgũ mari Pagũre õaro ïha masicũ iimi marire. Eropigũ i yebare eragũ mari Pagũre masicũ iimi masare.

⁵ I yeba majarã erã guñaricũri naitĩaro iro dopa ñeri ãhraa. Jesucristo boyogoro dopa ta masa pohro eragũ erã Goãmũ yare masicũ iimi. Eropiro naitĩariñe, boyoriñere ne tarinũgabiropũ dopa ta Cristore ñeripũ ne tarinũgabiriyoro.

⁶⁻⁷ Goãmũ Ñu waĩcugũpũre obeomũhtapũ Cristore quere aĩgã weremũhtadogũ. ïgũ obeodigũ Ñupũ eraa guare masare Cristo ïgũ ariburire weremi.

⁸ Ñupũ Cristo árĩbirimi. Eropa árĩbiriqũregũ ta ïgũ Cristore masare weryumũhtagũ árĩmi.

⁹ Cristo boyogoro dopa ta árĩgũ árĩpehrerã masare Goãmũre masicũ iibu i yebaguere aridigũ árĩmi. Diaye ta ãhraa. ïgũ masare masicũ ïigũ ta ãhrimi.

¹⁰ Eropigũ Cristo i yebare árĩdigũ árĩrimi. I yebare ïhacũnugudigũ árĩpũ. ïgũ eropa árĩquerecũ ta i yeba majarã ïgũre ne ïha masibirinirã árĩma.

¹¹ ïgũ ya yeba ïgũ masa dehyoadigũ árĩrimi. ïgũ ya yeba ïgũ masa dehyoadigũ árĩquerecũ ta ïgũ ya yeba majarãpũ ïgũre ne gamebirinirã árĩma.

¹² Erã eropa gamebiriqũrecũ ta árĩpehrerã ïgũre gamerãpũre erãre Goãmũ ïgũ porã árĩcũ iimi. ïgũre umupeorãre árĩpehrerã Goãmũ ïgũ porã árĩcũ iimi.

13 Erã Goãmũ porã ta àhrima. Eropirã masa erã gamero Goãmũ porã wabeama. Goãmũ gamero mera ìgũ porã wahama.

14 Eropigũ Cristo ìgũ masũ ìgũ árĩnũgara pũhrũ mari mera árĩmi ìgũ. Ìgũ eropa árĩcũ ìarã masare mahigũ, diaye majare ìgũ wereniguigũ árĩcũ gũa masibũ. Ìgũ dihta Goãmũ magũ árĩgũ turagũ árĩmi. Ìgũ eropa árĩgũ árĩcũ gũa masibũ.

15 Ñũ waĩyegũ ìgũ buherogue Cristo eracũ ìha õpa arĩ gaguiniguimi gũare weregũ:

—Sihĩ ahrimi yũ mũare weredigũ. Ìgũ yũ pũhrũ masa dehyoadigũ àhrimi. Eropa árĩqueregũ ta yũ tauro turagũ àhrimi. Ìgũ yũ masa dehyoaboro coregue árĩtuhapũ. Eropigũ ìgũ yũ tauro àhrimi. Yũhũ mũare eropa arĩ weredigũ ta àhrimi ihĩ, arĩmi Ñũ gũare.

16 Ìgũ Cristopũ õagũ turaro masare mahigũ árĩgũ marire árĩpehrerãre õaro iiniguicãmi.

17 Goãmũ dorerire Moisepũ apimũhtapũ marire. Jesu-cristopũ Goãmũ masare ìgũ mahĩre buhegũ árĩmi. Goãmũ ìgũ diaye wereniguiri sãre buhegũ árĩmi ìgũ.

18 Masa ne Goãmũre ìabeama. Ìgũre mari ìabiriquerecũ ta ìgũ magũ ìgũ turaro mahigũ yujugũ ta árĩgũpũ ìgũ Gũare marire masicũ iimi.

Gajirã Ñũ waĩyegũre serẽpiñuma

Mt 3.11-12; Mr 1.7-8; Lc 3.15-17

19 Judio masa oparã Jerusalén árĩrã pahiare, Goãmũ wihi mohmerã sãre Ñũ pohrogue obeoñorã. “¿Nihino àhriri mũhũ?” arĩ serẽpidorerã obeoñorã erãre. Erã eropa arĩ serẽpirã ejacũ õpa arĩ weremi Ñupũ.

20 Ne yayaro mariro weremi. Diaye ta werepehocãmi gũyaro mariro.

—Yũhũ Cristo Goãmũ ìgũ masare taudoregũ ìgũ obeodigũ árĩbeaa, arĩmi ìgũ.

21 Ìgũ eroparĩcũ erãpũ ìgũre dipaturi serẽpima daja:

—¿Mũhũ Cristo árĩbigũ Eliapũ àhriri? arĩma.

—Árĩbeaa yũhũ, arĩmi ìgũ.

—¿Gũa coredigũ Goãmũ yare weremũhtagũpũ àhriri mũhũ? arĩma erã.

—Árĩbeaa yũhũ, arĩmi Ñũ.

22 Ìgũ eroparĩcũ erã ìgũre dipaturi serẽpima daja.

—Gũare serẽpidorenĩrãre gũa õaro wereboru dopa gũare wereque daja. ¿Nihinopũ àhriri mũhũ? ¿Dohpa árĩgũno àhriri mũhũ? arĩma erã Ñũre.

23 Erã eroparĩcũ õpa arĩ yũhrimi:

—Masa marirogue õpa arĩ gaguiniguĩ ãhraa yũhũ. Goãmũ ya weremũhtadigu Isaia mũrũ ĩgu werediro dopa ta werea yũ sã: “Mari Opũ ĩgu ariboro core õarã árĩyuque ĩgũre peemorã,” arĩ masare wereyu gaguiniguĩ ãhraa yũhũ, arĩmi Ñu erãre

24 Ñure serẽpirã fariseo masa erã obeonirã árĩma.

25 Eropirã erã Ñure serẽpima daja:

—¿Mũhũ Cristo, Elia Goãmũ ya weremũhtagũ gua coregu árĩbiriqeregu ta duhpigu masare Goãmũ ya árĩburire waĩyeri mũhũ? arĩma erã.

26 Erã eroparĩcũ yũhrimi ĩgu.

—Yũ deco mera masare Goãmũ ya árĩburire waĩyea. Gajigupũ mũa masibigupũ mũa watope árĩtuhami.

27 ĩgupũ yũ pũhrũ arigu yũ tauro turagu ãhrimi. Őatariagu ãhrimi. ĩgu iro dopa árĩbeaa yũpũ. Eropigu ĩgũre pepigu, “Bu árĩgu ãhraa yũhũ,” arĩ pepia, arĩmi Ñu erãre.

28 Eropa arĩ wereniguima erã Betaniague, dia Jordán waĩcũriya gajipũ masegue, Ñu ĩgu masare ĩgu waĩyerogue.

—*Jesu Goãmũ ĩgu obeodigu cordero iro dopa ãhrimi, arĩ wereñumi Ñu masare*

29 Gajinũ Jesu Ñu pohro ĩgu aricũ ĩagu Ñu õpa arĩmi guare:

—Ĩaque. Ihĩ Goãmũ ĩgu obeodigu ĩgu cordero iro dopa ãhrimi. Cordero mari ñeri iira dipuwajare síriro dopa ihĩ sírigũ i yeba majarãre erã ñero iirare cóãgũcumĩ ĩgu.

30 Ihĩ ta ãhrimi yũ õpa arĩdigũ: “Yũ pũhrũ arigu yũ tauro turagu ãhrimi. Yũhũ masa dehyoaboro core ĩgu matague ta árĩtuhapũ. Eropigu ĩgu yũ tauro turami,” yũ arĩdigũ ihĩ ta ãhrimi.

31 Yũpũ ĩre Goãmũ magũ ĩgu árĩrire masibirinibũ. Eropa masibiriqueregu ta deco mera waĩyegu arigu iibũ yũ acawererã Israe masa ĩre erã masiborore, arĩmi Ñu.

32 Eropa arĩtuha Ñu werenemomi:

—Espíritu Santo umarogue buja iro dopa bejagu Cristo weca دچارimi. ĩgu weca ĩgu dujanugacũ ĩabũ.

33 ĩgu weca dujanugajacũ ĩha ĩgũre ĩha masibũ. ĩgu yũre masare deco mera waĩyedore obeodigu Goãmupũ õpa arĩ weremũhtatuhami yũre: “Espíritu Santo dijari ĩgu weca dujanugajagu ĩgu ta árĩgũcumĩ. ĩgupũ Espiritu Santore masa mera eropa árĩniguicũ iigu árĩgũcumĩ,” arãmi Goãmũ yũre. ĩgu yũre eropa werebircũ ĩha masibiriboya ĩgũre.

³⁴ Dohpaguere ïgure ïha masituhaa yũhũ. Eropa ïha masigu "Diaye ta Goãmũ magũ ta ährimi," arãa yũhũ mũare, arĩ weremi Ñu.

Jesu buherã ïgũ ne sihunuganirã árĩũuma

³⁵⁻³⁶ Gajinũ Ñu mera gũa perã ïgũ buherã ïgũ mera gũa niguicũ, Jesu gũa pohro tari wahgãgũ iimi. ïgũ eropa tari wahgãcũ ïagũ Ñu dipaturi õpa arĩmi gũare:

—Ïaque. Ihĩ Goãmũ ïgũ obeodigũ cordero iro dopa árĩgũ ährimi, arĩmi Ñu.

³⁷ ïgũ eroparĩcũ gũa perã ïgũ buherãpũ irire peerã Jesure nũrusiagãbũ.

³⁸ Gũa eropa nũrusiagãcũ ïagũ Jesu gũare maji ïha, serẽpimi:

—¿Nohogue wahari mũa? arĩmi ïgũ gũare. ïgũ eroparĩcũ gũa sã ïgure serẽpibũ.

—Buhegũ, ¿nohogue ähriri mũhũ? arĩ serẽpibũ gũa ïgure.

³⁹ —Yũ mera arinijarã, ïarã arique, arĩmi gũare Jesu.

ïgũ eroparĩcũ gũapũ ïgũ árĩrogue ïarã wabũ. Irisubu ñamicague cuatro hora árĩbũ. Eropirã iri ñamire ïgũ mera dujabũ gũa.

⁴⁰ Gũa perã Ñure peerã, Jesure nũrusiagãrã yũ mera majagũ Andre mera árĩbũ. Andrepũ Simo pagũ magũ árĩmi.

⁴¹ Eropigũ ïgũ mata ïgũ tĩgure ahma boca, õpa arĩ werepũ ïgure:

—Mesiare Goãmũ marire taubure Goãmũ ïgũ obeodigũre bocabũ gũa, arĩpũ Andre Simore. Mesia ero majarã ya mera arĩrã, Cristo arĩrã iima.

⁴² Eropa arĩtuha ïgũ Simore Jesu pohro aĩgãmi. ïgũ pohro erã ejacũ ïagũ Jesupũ Simore õpa arĩmi:

—Mũhũ Simo waĩcũgũ Jona waĩcũgũ magũ ähraa. Dohpaguere mure Cefa waĩyegũra, arĩmi Jesu Simore. Cefa ero majarã ya mera arĩrã, Pedro arĩma. Eropigũ Pedro waĩcũmi pare.

Felipere, Natanae sãre sihuñumi Jesu

⁴³ Gajinũ Jesu "Galilea yebague ina warã," arĩmi gũare. Eropigũ erogue eja ïgũ Felipere bocatĩri õpa arĩmi:

—Yũ mera majagũ árĩbu arique, arĩmi Jesu.

⁴⁴ Felipepũ Betsaida majagũ árĩmi. ïgũ, Andre, Pedro mera yuju maca majarã árĩma.

⁴⁵ Eropigũ Felipe Natanaere ahma, boca õpa arĩ weremi:

—Goãmũ dorerire Moise ïgũ gojarapũgue ïgũ weredigũre, gajirã Goãmũ yare weremuhtanirã sã erã

weredigure gwa bocabu. Jesu Nazare majagu José magu ĩgu ta árĩcumi, arĩmi ĩgu Natanaere.

46 —Nazareguere ne yujugu ðagu marimi, arĩmi Natanaeru.

—Īagu arique mũhu, arĩmi Felipe.

47 Eropi Natanae Jesu pohro ĩgu ejacũ ĩagu Jesupu ðpa arĩmi Natanaere:

—Ihĩ dohpague arigu diaye ta ðagu judio masu gohra āhrimi. Īgure ne gũyari mara, arĩmi Natanaepure.

48 Īgu eroparĩcũ peegu Natanae ĩgure serēpimi:

—¿Duhpigu yure ðaro masiri mũhu? arĩmi.

—Felipe, ĩgu mure ĩgu sihuboro core, higueraгу doca mu árĩcũ ĩhabu yuhu mure, arĩmi Jesu ĩgure.

49 Īgu eroparĩcũ Natanaeru ðpa arĩmi ĩgure daja:

—Buhegu, diaye ta mũhu Goãmu magu ta āhraa. Mũhu Israe masa gwa opu árĩbu āhraa, arĩmi Natanae.

50 Īgu eroparĩcũ peegu ðpa arĩ yuhripu Jesu:

—Higueraгу doca yu mure ĩarare masigu yure “Goãmu magu āhraa,” arĩ umupeoa mũhu yure. ¿Iri ta mure umupeocũ iiri? Mure yu eropa ĩara tauro Goãmu turari mera yu iicũ ĩaguca mũhu, arĩmi Jesu Natanaere.

51 Eropa arĩgu ðpa arĩ werenemomi:

—Diaye ta mure arĩgu iiaa. Yuhu masu Goãmu ĩgu obeodigu āhraa. Ūmarogue Goãmu yarā anyua erā yu weca erā dijaricũ, erā muriacũ sãre ĩaguca mũhu, arĩmi Jesu ĩgure.

2

Caná waĩcũri macague erā mojoto diriri bosenugue Jesu ĩagu wañumi

¹ Ūhrenu puhru Caná Galilea árĩri macague mojoto diriri bosenu árĩbu. Eropigo Jesu pago iri wihigue árĩmo.

² Jesu gwa ĩgu buherā sã erā mojoto dirirogue sihubeonirā árĩbu.

³ Iri bosenu maja vino pehrecũ Jesu pago ĩgure weremo:

—Dohpaguere vino pehrea wahabu erãre, arĩmo igo Jesure.

⁴ Igo eroparĩcũ peegu Jesu ðpa arĩmi:

—Meho, ¿duhpigo irire yure wereri mũhu? Masa erā yure masiboro duhyania dohpa, arĩmi Jesu ĩgu pagore.

⁵ Īgu eroparĩra puhru ĩgu pagoru mohme corerãre weremo.

—Yu magu ĩgu dorero dopa ta iique mua, arĩmo igo.

⁶ Irisubuguere gwa acawererã judio masa Goãmu yare ĩmorã masare erā dupure eropa coeniguicãdorema. Eropi

iri wihi seis gohra máta sorori, deco dicuri sorori árĩbũ. Iri deco Goãmu yare iimorã erã coeri deco árĩbũ. Iri soroburire ochenta o cien litros sihajabu decore.

⁷ Eropigu erã mohme corerãre doremi Jesu:

—I soroburire deco mera pisânemo ujutu dobopehocãque, arĩmi Jesu.

Ïgu eroparĩcũ erãpũ ðaro ujutu dobopehocãma iri soroburire.

⁸ Erã eropa iira pũhrũ Jesu erãre doremi daja:

—Dohpaguere iri decore waa aĩ, sihu bosenu iigure tĩarã waque, arĩmi.

Ïgu eroparĩcũ peerã iri decore waa aĩgã, sihu bosenu iigure tĩama erã.

⁹ Erã tĩacũ Ïgũpũ iri decore vino poyara decore ihriñami. Iri vinore “¿Noho majare aĩgãrayuri erã?” arĩ pepipũ Ïgũ. Ïgu eropa masibiriquerecũ Ïgũre mohme corerãpũ iri vinore tĩanirãpũ masima. Sihu bosenu iigu eropa masibirinijagu, mojoto diridigũre sihubeo

¹⁰ ðpa arĩ weremi:

—Gajirã masa ðari decore vino decore tĩamũhtamũrima. Masa erã ðaro ihrira pũhrũ ñequeyari vino decopũre tĩama erã. Mũpũ ðari vino decore dihbu, pũhrũgue guare tĩaa, arĩmi sihu bosenu iigu mojoto diridigũre.

¹¹ Caná Galilea arĩri macague decore vino Ïgu poyacũ iira ne Goãmu turari mera Ïgu deyoro moanũgara árĩbũ. Eropa iigu gajirãre Ïgu turarire ii ñhmúmi Jesu. Ïgu eropa ii ñhmura pũhrũ gua Ïgu buherã Ïgũre umupeoba.

¹² Pũhrũ Jesu, Ïgu pago, Ïgu pagũ porã, gua Ïgu buherã mera Capernaumgue sihugã wami. Erogue ejarã bajamenũrigã dujabũ gua.

Jesu Goãmu wihiguere ejañumi

¹³ Pascua arĩcũ gua judio masa bosenu árĩboro merogã duhyanijabu. Eropigu Jesu gua mera Jerusalengue wami.

¹⁴ Erogue ejaqu Ïgu Goãmu wihigue ñajajagu, wecuare, ovejare, bujare duarãre bocajami. Eropigu niyeru gohrotorã erã mesarigue erã doacũ bocajami.

¹⁵ Eropa bocajagu yuradari mera tãraridari ii, erãre arĩpehrerãre disiporogue tãranũru wiumi. Eropigu niyeru gohrotorã erã ya mesarire yomemuju mehpicãmi. Erã niyeru turi sãre mehsiripicãmi.

¹⁶ Eropa iituha bujare duarãre ðpa arĩmi:

—Mũa yarã bujare aĩgãque. Yu Pagũ ya wihire doberi duari wihi iibiricãque, arĩmi Jesu erãre.

17 Īḡu eropa iicũ ĩarã gũa ĩḡu buherãpũ Goãmũ ya gojarapũ erã arĩrare guñabũ. Ōpa arĩ gojanirã árĩma. “Goãmũ, mũ wihire turaro mahia. Eropa mahiḡu mũ wihire ñero erã iicũ ĩagũ turaro bujawerea yũhũ,” arĩ gojarare guñabũ gũa Jesu ĩḡu buherãpũ.

18 Jesu ĩḡu eropa iira pũhrũ judio masa oparã ĩḡure serẽpima:

—¿Duhpigũ mũhũ oãre Goãmũ wihigue árĩrãre cohã wiuari? Goãmũ irire mũre iidoregũ árĩcũ Goãmũ turari mera ii deyoro moaque gũa ĩaburire, arĩma erã Jesure.

19 Erã eroparĩcũ Jesu yũhrimi:

—I wihire mũa cóãcũ, ùhrenũ pũhrũ tuhajagũca yũhũ, arĩmi Jesu erãre.

20 —Ŭhrenũ i wihire iisome mũhũ. Cuarenta y seis bojori gohra erã iira wihi ãhraa i wihi, arĩ yũhrima erã Jesure.

21 Jesu ĩḡu eropa arĩrare erã ðaro pee masibirima. Jesu i wihire arĩḡu ĩḡu dũpũ waburire arĩḡu iirimi.

22 Eropi ĩḡu sĩrira pũhrũ, ĩḡu masa mũriara pũhrũ gũa ĩḡu buherãpũ ĩḡu eropa arĩrare guñabũ. Goãmũ yare erã gojarapũre, Jesu ĩḡu werera sãre guña, “Iri diaye ta ãhraa,” arĩbũ gũa.

Árĩpehrerã erã guñarire Jesu masiñumi

23 Pascua bosenu árĩcũ Jesu Jerusalengue árĩmi. Ero ĩḡu árĩcũ masa bajarã Goãmũ turari mera ĩḡu deyoro moarire ii ĩhmucũ ĩarã ĩḡure umupeoma.

24 Erã eropa umupeoquerecũ ta Jesu masa erã guñarire ðaro masiḡũ, “Yũre eropa umupeoniguicãrãcoma,” arĩ pepibiridi árĩmi.

25 ĩḡu masa erã guñarire ðaro masĩmi. Eropa masiḡũ masa ĩḡure erã pepirire serẽpibirimi.

3

Jesu Nicodemo mera weretamuñumi

1 Iri maca majagũ Nicodemo waĩcũḡũ, judio masa oparã mera majagũ árĩmi. ĩḡu fariseo masa ya curu majagũ árĩmi.

2 Eropiḡũ ĩḡu yuju ñami ĩḡu Jesu pohro ahri ĩḡu mera weretamũpũ:

—Buheḡũ, mũhũ Goãmũ ĩḡu buhedorediḡũ ĩḡu obeodiḡũ mũ árĩcũ gũa masia. Goãmũ mũre ĩḡu itamubiricũ mũpũ ĩḡu turari mera ne deyoro moarire ne iibiriboaya. Mũhũ bajasuburi Goãmũ turari mera ii ĩhmua, arĩpũ Nicodemo Jesure.

3 ĩḡu eroparĩcũ Jesu werepũ:

—Diaye mure arĩgu iiaa. Ne masa dehyoagu iro dopa dipaturi masa dehyoagu dihta Goãmũ yagu árĩmasimi. Mũ sã eropa ta árĩmasia, arĩpũ Jesu.

4 —Yaho. ¿Bugurũ dohpa ii dipaturi masa dehyoabocuri ĩgu? ĩgu pago niji suhriroguere ñajaa, dipaturi masa dehyoa masiya mariboca ĩgure, arĩpũ Nicodemo.

5 ĩgu eroparĩcũ Jesu yuhripũ:

—Diaye ta arĩgu iiaa mure. Ne masa dehyoagu iro dopa ta deco mera, Espĩritu Santo ĩgu turari mera dipaturi masa dehyoagu dihta Goãmũ yagu árĩmasimi.

6 Nome nijipo sã nome árĩrã, majirãgãre masa dehyoacũ iima. Espĩritu Santopũ masare Goãmũ porã árĩcũ iimi.

7 “Ne masa dehyoagu iro dopa ta dipaturi masa dehyoagu dihta Goãmũ yagu árĩmasimi,” yũ arĩcũ ne pee gorowerebita.

8 Espĩritu Santo masare Goãmũ porã ĩgu iicũ iiri miruñe iro dopa ãhrraa. Miruñe iri ariroguere ahrraa. Iri ariro caricũ mari peea. Eropa peequererã ta iri aridirore, iri waro sãre ne masibea. Eropa ta iimi Espĩritu Santo masare Goãmũ porã ĩgu, arĩpũ Jesu Nicodemore.

9 —Mũ eropa arĩrire ðaro masibea, arĩpũ Nicodemo.

10 ĩgu eroparĩcũ peegu ðpa arĩpũ Jesu:

—¿Mũhũ judio masare buhegu árĩqueregu ta, duhpigu yũ arĩrire peebeari?

11 Diaye mure arĩgu iiaa. Gũa masirare, gũa ĩarare gũa werea. Gũa eropa werequerecũ ta ne mũa gũa acawererã judio masa ne peediabirĩbũ.

12 I yeba majare yũ werenigui queoñaquerecũ ta “Diaye ta ãhrraa,” arĩbeaa mũa. Eropa arĩbirã Goãmũ yare yũ werecũ sãre “Diaye ta ãhrraa,” arĩsome mũa.

13 “Ne yujugũ ãmarogue Goãmũ pohroguere wagu ne dipaturi dujarisome. Yũhũ Goãmũ ĩgu obeodigu yũ dihta ãmarogue árĩdigũ i yebaguere aribũ. Eropigu yũ dihta Goãmũ yare mure weremasia.

14 Iribojeguere masa mariroguere Moise murũ añare come mera erã wéadigũre yucũgu erã nugudigũgue duhsiupũ. Yucũguẽguere ĩgu duhsiudio dopa ta yũre Goãmũ ĩgu obeodigũre eropa ta yũ sãre duhsiurãcoma.

15 Yũre erã eropa iicũ árĩpehrerã yũre umupeorã árĩpehrerinũri Goãmũ mera árĩniguirãcoma, arĩpũ Jesu.

Goãmũ árĩpehrerãre mahimi, arĩ gojañumi Ñũ

16 Eropa arĩtuha ðpa arĩnemopũ Jesu:

—Goãmũ árĩpehreri yeba majarãre turaro mahimi. Eropigu yũre ĩgu magũre yujugũ ta árĩgũre Goãmũ obeomi

árĩpehrerã yũre umupeorã peamegue erã wabiriborore. Eropirã árĩpehrerinũri Goãmũ mera árĩrãcoma erã.

17 Goãmũ yũre ĩgũ magũre masare dipuwaja moadoregũ obeobirimi i yebaguere. Eropigũ masare peamegue wabonirãre taubure yũre obeomi.

18 “Yũre Goãmũ magũre umupeorãre ne dipuwaja moasome Goãmũ. Yũre umupeobirãpũre Goãmũ dipuwaja moadoretuhami. Masa yũre Goãmũ magũre yujugũ ta árĩgũre erã umupeobirira dipuwaja, dipuwaja moagũcumi Goãmũ erãre.

19 Yũhũ Goãmũ magũ i yebaguere arigũ boyoriñe ðaro ĩha masicũ iro dopa ta Goãmũ yare ðaro masicũ ĩiaa masare. Yũ eropa masicũ ĩicũ ĩarã yũre umupeobirã yũre gamebeama. Erã ñerire iiripũre turaro gahmema. Erã eropa gameri dipuwaja erãre dipuwaja moagũcumi.

20 Árĩpehrerã ñerire iirã erã ñero iirire duhudiabeama. Eropirã boyoro iiriñe deyoro moaro dopa ta erã ñero iirare deyoro moari arĩrã yũre gamebeama.

21 Õarire iirãpũ yũre, yũ buheri sãre gahmema. Goãmũ yare erã iirire yũ ðaro deyoro moacũ gũhyasĩribeama erã. Eropiro yũre boyoro iro dopa árĩgũre gahmema, arĩ werepũ Jesu.

Dipaturi Ñu waĩyegũ Jesure wereñumi

22 Pũhrũ Jesu gũare ĩgũ buherãre Judea yebague sihugã wami. Eroque ejagũ ero majarã mera bajamenũrigã duja, Goãmũ ya árĩburire waĩyemi erãre.

23 Ñu sã masare waĩyegũ iipũ Enón waĩcũri macague. Enón waĩcũri maca Salim waĩcũri maca pohro árĩbũ. Ero wũaro dia árĩbũ. Ero eropa árĩcũ ero majarã masare waĩyegũ iipũ Ñu.

24 Erã ĩgũre peresu iiboro core Enóngue masare waĩyegũ iipũ Ñu.

25 Irisubure Ñu buherã mera majarã bajamerãgã judio masa mera waĩyerire wereniguirã dũyasoñorã.

26 Tuhaja erã Ñu pohroque eja irire wereñorã.

—Buhegũ, dia Jordán waĩcũriya gajipũ masegue mũ mera árĩdigũ “Īgũ ta Cristo ta árĩgũcumi,” mũ arĩdigũpũ dohpague masare waĩyegũ iimi. Īgũ eropa ĩicũ árĩpehrerã ĩgũ pohroque wahama pare, arĩñorã erã Ñure.

27 Erã eroparĩcũ peegũ Ñu yũhrĩpũ:

—Īgũ dorerire ĩgũ opacũ Goãmũ ĩgũre odi árĩmi.

28 “Cristo árĩbeaa yũhũ,” yũ arĩcũ mũa peeabũ. Eropa Cristo árĩbiriqweregũ ta ĩgũ core wereyubure Goãmũ ĩgũ obeodigũ āhraa yũhũ.

29 Ōpa āhraa iri: Mojoto diridigo igo marapũ mera árĩgo wahamo. Mojoto diridigũ mera majagũpũ diridigũ ĩgũ marapocũcũ ĩagũ ĩgũ werenicũ peegũ turaro mucubirimi. Eropigũ mojoto diridigũ mera majagũ ĩgũ mucubiridiro dopa ta yũ sã Cristo mera masa erã wacũ ĩagũ ōaro mucubiria.

30 Cristopũre umupeoro gahmea masare. Yũpũre umupeobiricãro gahmea masare, arĩ yũhriřũ Ñũ.

Goãmũ magũ ũmarogue aridigũ āhrimi, arĩ wereñumi Ñũ

31 Eropa arĩtuhagũ ōpa arĩnemopũ Ñũ.

—Ũmarogue aridigũ árĩpehrerã nemoro turagũ āhrimi. Mari masa i yeba majarã āhraa. Eropirã i yeba majare wereniguia mari. Ũmarogue aridigũpũ árĩpehrerã nemoro turagũ āhrimi.

32 ĩgũ ĩarare, ĩgũ peerare ĩgũ weremi. ĩgũ eropa werequerecũ ta masa ĩgũre ne peediabeama.

33 Ũmarogue aridigũ ĩgũ wererire masa peerãpũ, “Goãmũ diaye árĩgũ tiimi,” arĩrã iima erã.

34 Ihĩ Cristore Goãmũ ĩgũ obeodigure Espĩritu Santo ya turarire opehoñumi Goãmũ. Eropigũ ĩgũ Goãmũ ya wereniguirire wereniguimi.

35 Goãmũ ĩgũ magũre turaro mahimi. Eropigũ árĩpehrerire, árĩpehrerã sãre erã opũ árĩdoremi Goãmũ ĩgũ magũre.

36 Goãmũ magũre umupeorãpũ ũmũri nũcũ Goãmũ mera árĩniguicãrãcoma. ĩgũ magũre tarinũgarãpũ Goãmũ pohro wasome. Eropirã ũmũri nũcũ ũmaroguere árĩsome. Eropigũ Goãmũ erãre turaro dipuwaja moagũcumĩ, arĩřũ Ñũ masare.

4

Jesu Samaria majago mera weretamuñumi

1 Jesu Ñũ nemoro bajarã ĩgũ buherã ĩgũ opacũ, Ñũ nemoro masare ĩgũ waĩyecũ fariseo masa peeñorã.

2 Erã eropa peebeoquerecũ ta Jesupũ ĩgũ basi masare waĩyebirimi. Gũa ĩgũ buherãpũ masare waĩyebũ.

3 Fariseo masa erã eropa masicũ peegũ Jesupũ Judea yeba árĩdigũ Galilea yebague sihu dujaa wami gũare.

4 Galileague warã gũa “Samaria yebare tarigã warãca,” arĩbũ gũa.

5 Eropā tarigā Samaria yebague áriri macague Sica waĩcũri macague ejabũ. Iri maca pohro iribojegue Jacobo mũrũ ĩgũ magũ José mũrũre ĩgũ ora yeba árĩyoro.

6 Ero Jacobo mũrũ ĩgũ deco ihrira gobe árĩbũ. Eropigũ Jesupũ yoarogue aridigũ, ĩgũ oẽtaria wagũ iri gobe pohro doajami. Irisubu ĩgũ ero doajarisubu goeri boje gohra árĩbũ.

7-8 Gũa ĩgũ buherãpũ macague gũa barire asũrã wara pũhrũ yujugũ ta ĩgũ erore dujadoami. Eropigo Samaria majago iri gobegue igo deco waago eracũ Jesu igore deco serẽpũ:

—Deco oque yũre, arĩpũ.

9 —Mũhũ judio masũ ãhraa. Yũpũ Samaria majago ãhraa. ¿Duhpigũ yũre decore serẽri mũhũ? arĩpo igo Jesure. Judio masa Samaria majarãre game ĩadiabirã árĩñorã. Eropigo igo eropa arĩpo Jesure.

10 Igo eropa arĩra pũhrũ Jesu igore werẽpũ:

—Mũre Goãmũ ĩgũ itamudiarire masigo árigo, mũre decore serẽgũre masigo árigo, mũpũ yũpũre serẽboaya. Mũ eropa serẽcũ gajĩ decore oboaya yũhũ mũre. Iri decopũ ojocarĩguicãcũ iiri ãhraa, arĩpũ Jesu igore.

11 ĩgũ eroparĩcũ peego igo yũhripo ĩgũre:

—Ne mũre sorobu mara. I gobe sã ũhcãri gobe ãhraa. ¿Eropigũ i ojocarĩcũ iiri decore nohogue waabocuri mũhũ?

12 Gũa ñecũ mũrũ Jacobo iribojegue majagũ mũrũ i gobere gũare apimũripũ. ĩgũ, ĩgũ porã, ĩgũ ejorã sã i decore ihrimũriñorã. “Gajĩ decore oboaya yũhũ,” mũ arĩgũ, ¿Jacobo tauro turagũ ãhriri mũhũ eropa arĩ pepigũ? arĩpo igo.

13 Igo eroparĩcũ Jesu yũhripũ:

—Arĩpehrerã i decore ihrirã dipaturi ñemesiburãcoma.

14 Yaha decopũre ihrirã ne dipaturi ñemesibusome. Eropirã yaha decore ihrirã Goãmũ mera eropa árĩniguirãcoma. Maũ dipagãgue eropa deco wirĩnigũiro dopa ta yaha deco ne pehresome, arĩpũ Jesu.

15 ĩgũ eroparĩcũ nomeopũ õpa arĩpo:

—Ne dipaturi yũ ñemesibubiriboro dopa iri decore oque yũre. Eropigo dipaturi õguere ne deco waasome, arĩpo igo.

16 Igo eroparĩcũ Jesu igore werẽpũ:

—Irisubu tamerare mũ marapũre sihugo waque. Si-hutuha õgue arique ĩgũ mera, arĩpũ Jesu igore.

17 —Marapũ marigo ãhraa yũhũ, arĩpo igo.

—Diaye ta arãa mũhũ.

18 Mũhũ cincosuburi marapũcũtuharibũ. Eropigũ dohpague mũ mera árĩgũ mũ marapũ gohra árĩbeamĩ. Eropigo

“Marapũ marigo āhraa,” arĩgo, diaye ta arãa mũhũ, arĩpũ Jesu igore.

19 Īgũ eroparĩcũ peego õpa arĩpo igo:

—Ne, Goãmũ yare weremũhtagũ āhraa mũhũ yũ pepicũ.

20 Gũa ñecũ sũmarã mũra irigũ utãgũgue Goãmũre umu-peomũriñorã. Eropirã mũapũ judio masa “Jerusaléngue masare Goãmũre umupeoro gahmea,” arĩmũribũ mũa judio masa, arĩpo igo.

21 Igo eroparĩcũ Jesu yũhripũ:

—Nomeo, yũpũre penique. Pũhrũguere irigũ utãgũgue, Jerusaléngue sãre mari Pagũre umupeosome mũa.

22 Mũapũ mũa umupeorire masibea. Masare taubupũ judio masũ āhrimi. Eropirã gũa judio masapũ gũa umu-peogũre masia.

23 Dohpague pũhrũgue sãre Goãmũre diaye umupeorã erã õaro pepiri mera ĩgũre umupeorãcoma. Eropa mari umupeocũ gahmemi Goãmũ.

24 Goãmũ dupũ marigũ ta ĩgũ árĩcũ masa ĩgũre ĩabeama. Eropiro ĩgũre umupeori mera erã õaro pepiri mera ĩgũre õaro diaye umupeoro gahmea masare, arĩpũ Jesu igore.

25 Īgũ eroparĩcũ igo yũhripo:

—Mesia, “Cristo,” erã arĩgũpũ, masare tauba ĩgũ ariburire masia yũhũ. Īgũ arigũ marire árĩpeherrerire buhepehogũcumi, arĩpo igo.

26 —Yũhũ ta āhraa Cristo, arĩpũ Jesu igore.

27 Īgũ eropa arĩ weretamurisubu gũapũ ĩgũ buherãpũ erabũ. Jesu nomeo mera ĩgũ wereniguicũ ĩarã ũca wacarabũ. Eropa ũcaquererã ta “¿Dohpa gahmeri mũhũ? ¿Dohpa arĩri mũhũ igore?” arĩ serẽpiñabiribũ.

28 Eropigo nomeo igo sorobure ero duhudobocã, macague waha wamo. Eja masare werego õpa arĩpo:

29 —Yũ iirare werepehogũre ĩarã arique mũa. ¿Īgũ diaye ta Cristo árĩbocuri? ĩarã arique mũa, arĩpo igo.

30 Igo eroparĩcũ iri maca majarã Jesure ĩarã arimorã iima.

31 Irisubure gũa Jesu buherã ĩgũre turaro badoreribũ.

—Buhegũ, baque, arĩribũ gũa.

32 —Gajiropa árĩri barire opaa yũhũ. Irire mũa masibea, arĩmi ĩgũ gũare.

33 Īgũ eroparĩcũ peerã gũa basi õpa arĩ wereniguibũ:

—¿Gajirã ĩgũre barire otuhayuri? arĩbũ gũa basi. Gũa eroparĩcũ Jesu weremi:

34 —Masapũ basũama. Yũre obeodigu ĩgũ gamerire iigu sũaa yũpũ.

35 “Wapicurã aberi duhyaa mari dũca aĩboro,” pohe opu ĩgu arĩ pepimi. Mũapu “Goãmu yare gũa masare wereboro duhyania,” arĩ pepibiricãque. Diaye arĩgu iiaa mũare. Dohpague tamerare masare wererã waque. Masare ĩaque. Dohpague tamerare yũ buherire masa erã peeburisubuno árĩro tiiaa.

36 Dũcare aĩrãre erã wajayero dopa ta, yaharã árĩmorãre aĩnirãre yahare buhenirãre wajayegũra yũhũ. Erã eropiira waja õaro wajayegũra erãre. Erã eropa buhecũ peerã yũ buherire peenirã yaharãpũ Goãmu mera umũri nũcu árĩrãcoma. Eropirã erãre buhemũhtanirã, pũhrũ yaharã árĩcũ iirã sã yujuropa mucubirima.

37 “Yujugũ otemũtagũ aħrimi. Gajigũpũ dũcare aĩgu aħrimi,” arĩmũriĩnorã iribojeguerẽ. Iri diaye ta aħraa. Erã eropa arĩdiro dopa ta yujurãyeri yahare weremũhtarã aħrima. Gajirã yahare buhe yaharã árĩcũ iirã aħrima.

38 Pohe opu ĩgũre mohmerã erã otebirinirã árĩquerecũ ta erãre dũcare aĩdoregũ obeomi. Eropa ta masare buhemũhtabirinirã mũa árĩquerecũ ta erã yũre umupeocũ iidoremorãre obeoa mũare. Gajirãpũ erãre buhemũtatuhama. Erã buhenirãguere dipaturi buhenemorã, yaharã árĩcũ iirãca mũapũ. Eropirã buhemũhtarãpũ erã itamuro mera gajirãre yaharã árĩcũ iirãca, arĩmi Jesu gũare.

39 Irisubure Samaria majago, “Yũ iira mũrare ĩgu werepehoami,” igo arĩcũ peerã Samaria majarã bajarã Jesure umupeoma.

40 Eropirã Samaria majarã Jesu pohro ejarã, “Gũa mera dujanique,” arĩma ĩgũre. Erã eroparĩcũ gũa penũ ĩgu mera ero dujanibũ.

41 Gajirã sã bajarã Jesure peerã umupeoma.

42 Ōpa arĩma masa nomeore:

—Nere mũ arĩrãre peerã Jesure umupeonũgarabũ. Dohpague tamerare ĩgu wereniguirire gũa basi peerã ĩgũre õaro umupeoa. Eropirã ĩgũpũre peerã i yeba majarãre peamegue wabonirãre taubu diaye ta ĩgu árĩcũ, dohpague gũa masia, arĩma masa Samaria majagore.

Opu magũre dorecũgũre õagũ wacũ iĩũmi Jesu

43 Penũ pũhrũ Jesu gũare Galileague sihu wami daja.

44 Neguere õpa arĩmũrimi gũare Jesu: “Goãmu ya weremũhtagũre ĩgu ya yeba majarã ĩgũre umupeobeama,” arĩmũrimi Jesu.

45 Eropirã gũa Galileague ĩgu mera ejacũ ero majarã ĩgũre õaro bocatĩrima. Ero core Jerusalengue bosenu árĩcũ Jesu ĩgu iirare ĩanirã arĩma erã.

46 Eropi Caná Galilea áriri macague ĩgu decore vino wacũ ĩgu iira macague waha wabu gũa ĩgu mera daja. Caná pohro áriri maca Capernaum waĩcũri maca opu magu dorecũgu ĩpu.

47 Eropigu Jesu Judea árĩdigu ĩgu Galileague ejari querere peepũ. Irire peegu Jesu pohrogue erami.

—Yũ magu sĩrigu iiami. Eropigu ĩgure ðagu wacũ iigu arique, arĩ yojaro mera sihumi ĩgure.

48 ĩgu eroparĩcũ peegu Jesu yũhrimi:

—Goãmu turari mera yũ deyoro moarire ĩabirã, ne yũre umupeobeaa mũa, arĩmi Jesu.

49 ĩgu eroparĩcũ peegu opu opu ðpa arĩmi:

—Opu, yũ magu ĩgu sĩriboro core arique, arĩmi ĩgu Jesure.

50 —Dujaaque. Mũ magu ojocarigũcumi, arĩmi Jesu.

Ĩgu eroparĩcũ peegu, “Ĩgu arĩdiro dopa ta ojocarigũcumi yũ magu,” arĩgu opu dujaa wami.

51 Eropu dujaniguĩgure ĩgu pohro majarã ĩgure bocatĩri wereñorã.

—Mũ magu masa wahãmi, arĩ wereñorã erã ĩgure.

52 —¿Noho gohra abe árĩcũ ðagu wahãri ĩgu? arĩ serẽpirũ ĩgu pohro majarãre.

—Cãrũre goeri boje pũhrũgã ta nimacũri tahriabu ĩgure, arĩñorã erã ĩgure.

53 Erã eroparĩcũ ðpa arĩ pepĩpu ĩgu: “Jesu yũre ‘Mũ magu masa wahãmi,’ arĩ werera pũhrũ ta nimacũri tahria waya,” arĩ pepĩpu opu opu. “Diaye ta arãnumi yũre,” arĩgu, ĩgu arĩpehrerã ĩgu acawererã mera Jesure umupeoñorã.

54 Jesu Judea árĩdigu Galileague ĩgu ejara pũhrũ opu magure ĩgu ðagu wacũ ĩgu iira mera mari queocũ pesubu Goãmu ĩgu turari mera ii ĩhmũmi Jesu.

5

Curimasibigũre ðagu wacũ iĩnumi Jesu

1 Pũhrũ judio masa Goãmũre gũa umupeori bosenu árĩcũ gũa Jesu mera Jerusalengue ejabu daja.

2 Ero maca ñajari disiporo oveja waĩcũri disiporo pohro guhari gobe árĩbu. Gũa judio masa ya mera Betesda waĩcũri gobe árĩbu. Iri deco gobe pohro cinco gohra tiaya mariri tari dipabu árĩbu.

3 Iri tari dipabugue bajarã dorecũrã oyarãre ĩabu. Cuirĩ ĩhajabirã, curimasibirã, gõari marirã, erã iri gobe pohro oyama. Deco ñohmeborore corerã iĩñorã.

4 Erogue دچارĩgu iri gobe maja decore yujuyerisuburi ñohmecũ ĩpu anyu. Iri gobe maja deco ĩgu ñohmera pũhrũ

ñaja guhamuhtagupu òagu wapu. Dohpa áriri dorere opagu òagu wapu.

⁵ Eropigu ero yujugu dorecugu oyami. Īgu treinta y ocho bojori gohra dorecugu árīpu.

⁶ Ero ĩgu oyacũ ĩagu ĩgu eropa yoari boje ĩgu dorecucũ masimi Jesu ĩgure. Eropa masigu ĩgure serēpimi:

—¿Ōari dupu dore marigu árīdiari muhu? arīmi Jesu ĩgure.

⁷ Īgu eroparīcũ dorecugupu yuhrimi:

—Iri deco ñohmecũ yure decogue aĩ acugu marimi. Iri decogue yu ñajadiaquerecũ ta gajirāpu yu core yuu ñajamuhtama, arīmi ĩgu Jesure.

⁸ —Wahgānugaque. Mu omasiariñere aĩ, mu guburi mera cūhrapi wahgā waque, arīmi Jesu ĩgure.

⁹ Īgu eroparīcũ ta dorecugupu wahgānugaja ĩgu omasiariñere aĩ waha wami. Irinu Sabado gua judio masa soorinu árību.

¹⁰ ĩgu eropa òagu wadigu ĩgu omasiariñere aĩgācũ ĩarā judio masa gua oparāpu dorecudigure òpa arī wereñorā:

—Dohpagāre Sabadonu mari soorinu árīquerecũ mu yañe omasiariñere aĩ wahgāa muhu. Eropa iigu mari dorere tarinugagu iiaa, arīñorā erā ĩgure.

¹¹ —Yure yu dorecūre taudigupu òpa arāmi yure, arīpu dorecudigupu. “Mu omasiariñere aĩ, mu guburi mera cūhrapi wahgāque,” arāmi yure, arī yuhripu dorecudigu mupupu erāre judio masa oparāre.

¹² —¿Irire mure eropa arīdigupu nihino āhriri ĩgu? arī serēpiñorā erā ĩgure.

¹³ Ero bajarā masa erā árīcũ ĩagu Jesupu waha wadigu arīmi. Eropigu dorecudigupu ĩgure òagu wacũ iidigu ĩgu waire masibiripu.

¹⁴ Puhru Goāmu wihigue gua ĩgure bocatīricũ Jesu ĩgure weremi:

—Peenique muhu yure. Dohpaguere òaro dūpucua muhu. Ñerire iinmobiricāque. Dipaturi iinemogu mu dorecūdiro tauro waguca, arīmi Jesu ĩgure.

¹⁵ ĩgu eropa arīra puhru dorecudigu judio masa oparā ĩgure serēpinirā pohroque eja, werepu erāre:

—Jesu waicugu yure òagu wacũ iiami, arī werepu ĩgu.

¹⁶ Eropi Sabado árīcũ Jesu dorecugure ĩgu dorere ĩgu taucũ masirā judio masapu ĩgure ñero iinugañorā. Eropirā erā ĩgure wejēdiariñorā.

¹⁷ Eropa ñero erā iidiarire masigu Jesupu weremi erāre:

—Yu Pagu dohpaguere mohmenimi. Yu sã eropigu mohmenigu iiaa, arī weremi ĩgure ñero iidiarāre.

18 Īḡu eroparĩcũ judio masa ḡua oparã ĩḡu mera turaro guarã, ero core erã arĩdiro tauro ĩḡure wejẽdiañorã. Sabadonũre erã soorinũre ĩḡure õagũ iicũ ĩarã erã guañorã. Eropa guarã Goãmũre ĩḡu “yũ Pagũ,” ĩḡu arĩcũ peerã erãpũ tauro guañorã. “ ‘Yũ Pagũ,’ arĩḡu Jesu ĩḡu basi ‘Goãmũ mera yujuro mera ãhraa,’ arĩ ḡuñacumi ĩḡu,” arĩ pepiñorã judio masa ḡua oparã.

Jesu “Goãmũ ĩḡu obeodigũ ãhraa yũhu,” arĩ masare wereñumi

19 Eropi Jesu erãre weremi:

—Diaye mũare arĩḡu iiaa. Yũhu Goãmũ magũ yũ gamero iigũ iibeaa. Yũ Pagũ ĩḡu iirare ĩagũ irire iiaa.

20 Yũ Pagũ yũre ĩḡu magũre mahimi. Eropigũ ĩḡu iirare yũre ii ĩhmupehomi. I dohpaguere ĩḡu turari mera yũ iira tauro ĩḡu gajire iidoreḡucumi yũre. ĩḡu eropa iidorecũ ĩḡu turari mera ii ĩhmuḡuca ĩḡure yũhu. Eropa yũ ii ĩhmucũ ĩha ucarãca mũa.

21 Yũ Pagũ sĩrinirãre ĩḡu masuro dopa ta yũ sã yũ gamerãre masuḡura.

22-23 Ne yũ Pagũpũ masa erã ñeri iira dipuwaja, ĩḡu basi dipuwaja moagũ moabeami. Yũpũre irire erã ñeri iira dipuwaja dipuwaja moabure apimi. Erã ĩḡure umupeodiro dopa ta yũ sãre umupeoborore eropa apimi. Eropirã yũre ĩḡu magũre umupeobirã yũ Pagũ sãre umupeobeaa mũa. ĩḡu ãhrimi yũre obeodigũ, arĩmi Jesu.

24 Eropa arĩtuha õpa arĩ werenemomi:

—Diaye mũare arĩḡu iiaa. Yũ wereniguirire peerã yũre obeodigũre umupeorã mũari nũcu umarogue eropa árĩnigucãrãcoma. Eropigũ erãre dipuwaja moasome yũhu. Eropirã erã peamegue wabonirã tarirãcoma.

25 Diaye ta mũare arĩḡu iiaa. Peamegue wamorã yũre Goãmũ magũre erã peeburisubu dohpague ãhraa. Pũhrũ sãre erã yũre peerãcoma daja. Eropa peerã peenũrũrãpũ Goãmũ mera eropa árĩniguirãcoma.

26 Goãmũ yũ Pagũpũ erãre eropa árĩnigucũ iigũ ãhrimi. Eropigũ yũre ĩḡu magũre erãre eropa árĩnigucũ iibure árĩdoremi ĩḡu yũre.

27 Eropigũ yũhu masũ Goãmũ ĩḡu obeodigũ arĩcũ ĩḡu masare dipuwaja moadorerire apimi yũre.

28 Ire peerã, pee ucabircãque mũa. Gajinũguere árĩpehrerã sĩrinirã masa goberigue árĩrã yũ werenigucũ peerãcoma.

29 Eropa pee wahgãrã õarire iinirã mũra mũari nũcu Goãmũ mera árĩmorã masa mũriarãcoma. Ñeri iinirã

m̄rapu ñerire erã iira dipuwaja peamegue warãcoma, arĩ weremi Jesu.

³⁰ Eropa arĩtuha õpa arĩ werenemomi:

—Yu gamero ne gajinore iibea. Ne yu basi yu gamero iibea. Yure obeodigu ïgu gamero dopa ta iia. Eropigu ïgu arĩdiro dopa ta dipuwaja moaa. Eropigu masare yuhu dipuwaja moagu diaye ta iia.

³¹ “Yuhu Goãmu magu ïgu obeodigu ãhrea,” yu basi arĩ werecu, “Mu wereniguri ne diaye arĩbeaa,” arĩboca mu.

³² Gajigu ãhrimi yure weregu. ïgu Goãmu ãhrimi. ïgu yure werera diaye ta ãhrea. Irire yu õaro masia.

³³ Mu gajirãpũre Ñure yure serẽpidore obeobu. Eropigu ïgu sã diaye ta weremi muare.

³⁴ Masare yure “Goãmu ïgu obeodigu ãhrimi,” arĩ weremorãre amabeaa yũpũ. Eropa amabiriqueregu ta Ñu masu ïgu arĩquerecu ta “Yure diaye ta weremi,” arãa. Mu yure umupeoburire, mu peamegue wabonirã mu tariburire yure ïgu werera “Diaye ta ãhrea,” arĩ weregu iia.

³⁵ Ñu muare buhemũtagu bajamenũrigã buhemi muare. ïgu eropa buhecũ peerã bajamenũrigã mucubiriribu mu.

³⁶ Ñu yu arĩricũre weremi muare. ïgu wereri mera yu arĩricũre masiquererã yu iirire ãarã tauro masirãca. Goãmu yu Pagu ïgu turari mera ïgu yure iidorerare dohpague iigu iia. Ire yu iicũ ãarã diaye ta Goãmu ïgu obeodigu yu arĩcũ masirãca mu.

³⁷ Eropiro yu Pagu yure obeodigu ïgu basi yuhu ïgu obeodigu arĩrĩre arĩ weremi muare ïgu yare erã gojarapũgue. ïgu eropa arĩ werequerecu ta ïgu wereniguirire ne peebeaa mu. Eropi mu ïgure ne ãabeaa.

³⁸ Yure Goãmu ïgu obeodigure mu ne peediabeaa. Eropirã mu ne Goãmu yare gamebeaa.

³⁹ Goãmu yare erã gojarapũre mu õaro buhea. Eropa buherã “Gu ipũre buherã umuri nucũ Goãmu mera eropa arĩniguirãca,” arãa mu. Iripũ ta yure werea.

⁴⁰ Iripũ yure werequerecu ta m̄rapu yure gamebeaa. Umuri nucũ Goãmu mera mu arĩniguirire yuhu ogu arĩquerecu yure gamebiribu mu, arĩ weremi Jesu erãre.

⁴¹ Eropa arĩtuha õpa arĩnemomi:

—Yure masa erã umupeorire amabeaa yuhu.

⁴² Eropa amabiriqueregu ta Goãmure mu mahibiricũ masia yuhu.

⁴³ Goãmu yu Pagu ïgu dorero dopa ta yu arĩquerecu ta mu yure gamebeaa. Gajigũpũre Goãmu ïgu obeobiridigu ïgu arĩquerecu ta ïgũpũre gamerãca mu.

44 Gajirã masa mũare erã umupeocũ gahmea mũa. Goãmũ mũa mera ãgũ mucubiririre gamebeaa mũa. Ñgũ dihta Goãmũ gohra ãhrimi. Eropa gamebirã yãre peebeaa mũa. Yãre umupeobeaa mũa.

45 Mũare yũ Paguguere ne weresãsome yũhũ. Irire pee masique mũa. Moise ãgũ gojarapũpũ mũare weresãroca. "Iripũ maja dorerire iipehorã, Goãmũ pohro warãca mũa," arĩripũpũ mũare weresãroca.

46 Moise ãgũ gojarapũ yũpũre weremũhtayoro. Eropirã iripũre ðaro umupeorã yũ sãre umupeoboaya mũa.

47 Moise ãgũ gojarapũre mũa ðaro peebirã, yaha wereniguri sãre peesome mũa, arĩmi Jesu erãre.

6

Cinco mil umare masare bajarã gohrare bari oñumi Jesu Mt 14.13-21; Mr 6.30-44; Lc 9.10-17

1 Eropa ãgũ buhera pũhrũ Galilea waĩcũri ditaru gajipũ masegue gũa Jesu mera taribuja wabũ. Galilea ditaru ta Tiberia waĩcũbũ.

2 Ero core Galilea yeba Jesu dorecũrãre ãgũ ðarã ãgũ iicũ masa ãanirã arĩma. Erã eropa ãanirã arĩrã Jesu ãgũ taribujacũ ãarã masa bajarã ãgũre nũrusia taribujama.

3 Eroque eja, gũa ãgũ buherã ãgũ mera utãgũgue mũaria, doabũ.

4 Irĩnũ Pascua waĩcũri bosenu arĩboro judio masa bosenu arĩboro merogã dũhyabũ.

5 Eroque doagũ, Jesu masa bajarã ãgũ pohro erã aricũ ãhabeomi. Eropa ãhabeogũ Felipere serẽpimi Jesu:

—¿Oã masa erã baburire nohogue asũrãcũri mari? arĩ serẽpimi.

6 Jesu ãgũ basi ãgũ iiburire masiqueregũ ta Felipere serẽpi ãami, "¿Dohpa yũhrigũcũri?" arĩgũ.

7 Ñgũ eropa serẽpicũ Felipepũ yũhrimi:

—Doscientos niyerupũri waja mera mari asũquerecũ ta, masare yujurãyerire mũtarigã barire mari guerequerecũ ta ne sihasosome, arĩmi Felipe Jesure.

8 Gũa mera majagũ Andrepũ Simo Pedro pagũ magũpũ Jesure weremi.

9 —Cinco pan dipuru, perã wai ãhĩ majigũ ohõ opami. Iri pan dipurugã ãgũ opaquerecũ ta masapũ bajarã gohra ãhrima. Eropiro i merogã bari ne sihasosome, arĩmi Andre.

10 —Masare doadoreque mũa, arĩmi Jesu gũare ãgũ buherãre.

Ero mutarigã taacuro árĩbũ. Gũa doadorecũ masa árĩpehrerã doajapehrea wama taa weca. Uma dihtare queocũ cinco mil gohra árĩma.

¹¹ Erã eropa doajacũ ïagu Jesupũ panre aĩ Goãmure “Õhaa,” arĩmi. Eropa arĩtuha guare ïgu buherãre gueredoremi. ïgu eropa gueredorecũ guapũ erã doarãre guere wahgãbũ. Perã wai sãre aĩ guere wahgãbũ. Árĩpehrerãre erã sihajaro barire guerebũ.

¹² Eropirã masa erã yapicũ ïagu Jesu guare doremi:

—Erã ba duharire aĩque. Eropirã iri barire ne dedeosome, arĩmi.

¹³ ïgu eroparĩcũ guapũ cinco pan dipuru duhyarare gũa gameneocũ doce puiri gohra wiribũ.

¹⁴ Eropirã masa Jesu Goãmũ turari mera iri deyoro moariñere ïgu iicũ ïarã õpa arĩma:

—Diaye ta ãhraa. Ihĩ Goãmũ ya wereniguigu i yebague aridigu mari coredigu ta ãhrimi, arĩma erã.

¹⁵ Eropirã erã Jesure erã opũ árĩbure acudiarima. Jesu irire masigu dipaturi yujugu ta utãgugue waha wami.

Jesu deco weca curiñumi

Mt 14.22-27; Mr 6.45-52

¹⁶ Ñamicague gũa ïgu buherã dihta ditarugue buhabũ.

¹⁷ Eroguere buhaja dohodirugue ñaja, Capernaum waĩcũri macague taribujabũ. Gũa eropa taribujacũ ñamigue árĩbũ. Eropigu Jesu gũa pohroque arinibirimi dohpa.

¹⁸ Miruñe turaro aricũ gũa taribujariyaguere pãgũri wahgãbũ.

¹⁹ Cinco kilómetros gohra gũa taribujara pũhrũ Jesu gũa pohroque arimi. Deco weca nigui wahgãricũ ïabũ gũa ïgure. Eropa gũa pohro ïgu aricũ ïarã gũa güibu.

²⁰ Gũa güicũ ïagu ïgu guare weremi:

—Ne yure ïha ucabiricãque. Guñaturarã árĩque. Yuhũ ta ãhraa, arĩmi Jesu.

²¹ ïgu eroparĩcũ peerã gũa ïgure mucubiriri mera bocatĩri ñajadorebũ. ïgu ñajara pũhrugã gũa wara yebaguere taribujajabũ.

Masapũ Jesure amañuma

²²⁻²⁴ Gajinũ masa ero dujanirãpũ gamenerenũgañorã daja Jesure corerã. Iri ñamire gũa yaru mera gũa dihta taribujacũ ïanirã árĩma erã. Jesu gũa mera ïgu wabiricũ sãre ïanirã árĩma erã. Eropa gamenererã Jesure bocabiriñorã. Bocabiri ero pohro Tiberiague ariri gasi tuhajacũ ïañorã.

Jesu Goãmure “Õhaa,” arĩ, masare ïgu bari guerediro pohroñarigue árĩyoro. Eropirã Jesu gũa sã maricũ ïarã, iri gasigue ñaja, Capernaungue gũare nũrusia taribujajama. Jesure ahma nũrusiagãrã iima erã.

Yũhũ ojocaririre ogu, bari iro dopa árĩgu ãhraa, arĩ wereñumi Jesu masare

²⁵ Ditarure taribuja, gũa árĩroque eja, Jesure bocajanijarã erã serẽpima ïgure:

—Buhegu, ¿dohpárĩcũ ahrari mũhũ õguere? arĩ serẽpima erã ïgure.

²⁶ Erã eropa arĩ serẽpicũ, Jesu erãre weremi:

—Diaye arĩgu iiaa mũare. Deyoro moarire yũ iiquerecũ ta yũpũre umupeobeaa mũa. Yũre umupeobiriquererã ta yũre ahmaa mũa. Yũ mera pagari baha, mũa yapinirã árĩrã yũre amagãrirã iiaya daja.

²⁷ Bari ne árĩniguibeaa. Pũhrũ pehrea wahaa iri. Eropirã irire eropa amaniguibiricãque. Gaji bari gajiropa árĩri baripũre amaque mũa. Iri barire amarã mũmũri nũcũ Goãmũ mera árĩrãca. Eropiro iri bari tamera ne pehrebeaa. Iri barire yũhũ masũ Goãmũ ïgu obeodigu mũare ogũra. Goãmũ yũ Pagũ yũre irire odoregũ ãhrimi. ïgu obeodigu yũ árĩrĩre ïhmutuhami mũare, arĩmi Jesu.

²⁸ ïgu eroparĩcũ erã serẽpima ïgure:

—¿Goãmũ iidorerire iimorã dohpa iirãcuri gũa? arĩ serẽpima erã.

²⁹ —Ire Goãmũ mũare iidoremi: “Yũre ïgu obeodigure umupeoque,” arĩ doremi Goãmũ, arĩmi Jesu.

³⁰ ïgu eroparĩcũ peerã erã õpa arĩma:

—Goãmũ ïgu obeodigu mũ árĩgu ïgu turari mera ii ïhmuque gũare mũre gũa õaro umupeoborore. ¿Ñehenore iibocuri mũhũ?

³¹ Mari ñecũ sũmarã mũrague iribojegue majarã masa mariroque mana waĩcũri dipurure bamũriñorã. Goãmũ yare erã gojaripũgue õpa arĩ wereyoro: “ïgu erãre mũmaro maja dijuri barire omũripũ erã baburire,” arĩ gojañuma Goãmũ yare erã gojarapũgue. ¿ïgu eropa iidiro dopa ta iigu iiri mũ sã? arĩma erã.

³² Erã eroparĩcũ Jesu weremi erãre:

—Diaye mũare arĩgu iiaa. Moisepũ iri mũmaro maja barire mũa acawererãre obiriñumi. Yũ Pagupũ mũmaro maja barire diaye maja barire mũare ogu ãhrimi.

³³ Goãmũ ïgu bari mũmaro dijari árĩpehreri yeba majarãre ojocaririre omasia, arĩmi Jesu.

³⁴ —Opũ, mũmũri nũcũ iri barire oque gũare, arĩma erã.

35 Erã eroparĩcũ peegu Jesu weremi erãre:

—Yurũ ojocaririre ogũ bari iro dopa árĩgu ãhraa. Mari ya barire barã matagã ta oaboa wahaa mari. Ihriri sãre mari ihrira pũhrũgã ta ñemesibua daja. Yũre gamegũrũ, yũre umupeogũrũ, ne oaboabigu ñemesibubigu iro dopa ĩgu ðaro árĩri ne pehresome ĩgũre.

36 Mũarũ yũre ĩaquererã ta umupeonibea dohpa. Irire ta mũare wererabũ yũhũ.

37 Árĩpehrerã yũ Pagũ yarã árĩmorãre ĩgu aĩnirãrũ yũre gamerãcoma. Eropigu yũre gamerãre ne cóãsome yũhũ.

38 Ũmarogue arigu yũ gamero iigu arigu iibiribũ. Yũre obeodigu ĩgu gamero dopa ta iigu aribũ.

39 Ita árĩbũ yũre obeodigu ĩgu gameri gohra: Árĩpehrerã yaharã árĩmorã yũre ĩgu onirãre yũ dedeobiricũ gahmemi. Yũre obeodigu pehrerinũ árĩcũ erãre yũ masucũ gahmemi.

40 Árĩpehrerã yũre Goãmũ magure ĩarã, yũre umupeorã umuri nũcũ ĩgu mera erã árĩcũ gahmemi yũ Pagũ. Eropigu pehrerinũ árĩcũ erãre masugũra, arĩmi Jesu.

41 “Yũhũ umarogue ariri bari iro dopa árĩgu ãhraa,” ĩgu árĩcũ peerã judio masa gũa oparãrũ ĩgu mera guarã, erã basi Jesure ñero arĩ wereniguima.

42 —¿Ihĩ Jesu José magũ árĩbeari? ĩgu pagũ, ĩgu pago sãre mari masia. ¿Eropa árĩqueregu ta duhpigu “Ũmarogue aribũ,” arĩ wereniguiri ĩgu? arĩ guama erã.

43 Erã eroparĩcũ peegu Jesu weremi erãre:

—Mũa basi yũre ñero arĩ wereniguibiricãque.

44 Yũ Pagũ yũre obeodigũrũ masare yũre gamecũ iimi. ĩgu eropiibiricũ masarũ yaharã árĩmasibiriboñuma. Pehrerinũ árĩcũ yaharãre masugũca yũhũ.

45 Goãmũ ya weremuhtanirãrũ õpa arĩ gojañuma: “Goãmũ erãre buhegũcumi,” arĩ gojañuma. Árĩpehrerã yũ Pagũ ĩgu buherire peerã ĩgũre yũhrirã yũre gahmema. Eropirã yaharã ãhrima.

46 “Yũ Pagũre ne yujugũ masũ ĩabeami. Yũhũ Goãmũ ĩgu obeodigu dihta yũ Pagũre ĩabũ.

47 Diaye arĩgu iiaa mũare. Yũre umupeogu árĩpehrerinuri yũ Pagũ mera árĩniguigũcumi.

48 Yurũ ojocaririre ogũ bari iro dopa árĩgu ãhraa.

49 Mũa ñecũ sũmarã mũrague masa marirogue manare bamuriñorã. Eropa irire baquererã ta sĩria wañorã.

50 Ũmarogue ariri baripũre masũ bagũ ne sĩrisome.

51 Yũhũ umarogue ariri bari ojocaririre ori bari iro dopa árĩgu ãhraa. I barire bagũ umuri nũcũ yũ Pagũ mera eropa árĩniguigũcumi. I bari ojocaririre ori bari iro dopa árĩri yũ

dupu ta āhraa. Árīpehreri yeba majarā Goāmū mera eropa erā árīniguiburire yu dūpūre ogura. Eropa ogu sīriguca, arīmi Jesu.

⁵² Īgu eroparīcū peerā judio masapū ōpa arī wereniguima erā basi:

—¿Ihī dohpa ii ĩgu dūpūre baburi ogucuri? arīma erā erā basi.

⁵³ Erā eroparīcū peegu Jesu weremi:

—Diaye arīgu iiaa mūare. Yūhū Goāmū ĩgu obeodigu āhraa. Yu dūpūre babigu, yu dire ihribigu Goāmū mera árīsome.

⁵⁴ Yū dūpūre bagure, yu dire ihrigure, pehrerinū árīcū masugura.

⁵⁵ Yū dūpū diaye ta bari gohra iro dopa āhraa. Yu di diaye ta ihriri gohra iro dopa āhraa.

⁵⁶ Yū dūpūre bagu yu dire ihrigu yu mera mucubiriri mera árīniguigucumi. Eropigu yūhū ĩgu mera mucubiriri mera árīniguiguca.

⁵⁷ Yū Pagu yūre obeodigu eropa árīniguicāmi. Eropa árīniguigu yu sāre eropa árīniguicū iimi. Eropirā yūre eropa árīniguigure masa barā, Goāmū mera ūmaroguere eropa árīniguirācoma erā sā.

⁵⁸ Ita āhraa ūmarogue ariri bari. Mari ñecu sūmarā mūra erā bara mūra iro dopa árībeaa i bari. Erāpū iri barire baquererā ta sīria wañorā. I baripūre bagu ūmaroguere eropa árīniguicāgucumi, arīmi Jesu.

⁵⁹ Capernaum judio masa guā buheri wihi Jesu buhegu, eropa weremi.

Jesu ĩgu buherire peerā ūmarogue eropa árīniguirāca mari, arī gojañumi Ñu

⁶⁰ Īgu eropa wereniguicū peerā bajarā guā watope árīrā Jesure gamerā, ĩgure nūrusianirā ōpa arī wereniguima:

—I buheri díasa āhraa. Eropirā mari peediabiriñaria, arī wereniguima erā erā basi.

⁶¹ Erā eroparīcū Jesupū erā wereniguirire masimi. Eropa masigu ĩgu erāre serēpimi:

—¿I buherire peerā guari mūa?

⁶² ¿Yūhū masu Goāmū ĩgu obeodigu ūmarogue dujaa wacū dohpa wabocuri mūa?

⁶³ Masu ĩgu sīporāre opagu ojocarimi. Īgu dūpūpū ĩgure ojocaricū iibeaa. Masure ĩgure ĩgu sīporā ojocaricū iro dopa ta yu buheripū mūare Goāmū mera eropa árīniguicū iiaa.

⁶⁴ Gajirā mūa mera majarā ne yūre umupeobeama, arīmi Jesu.

Negohraguere Jesu ĩgũre umupeobiribonirãre masituhajapũ. ĩgũre ĩhaturirãre wiabu sãre mata masituhapũ. Eropa masigũ “Gajirã mũa mera majarã yũre umupeobeama,” arĩmi Jesu gũare.

⁶⁵ Eropa arĩtuhaja õpa werenemomi:

—Õpa arĩ wererabũ mũaare. “Yũ Pagũpũ masare yũre gamecũ iimi. ĩgũ eropa iibiricũ masapũ yaharã arĩmasibiriboñuma,” mũaare arĩrabũ, arĩmi Jesu.

⁶⁶ ĩgũ eropa arĩ buhecũ peerã bajarã Jesure gamenirã mũa ĩgũre cohã, ĩgũ mera dipaturi wabirima.

⁶⁷ Erã eropa iicũ ĩagũ Jesu gũare doce ĩgũ buherãre serẽpimi:

—¿Mũa sã yũre cóãcãrãcuri? arĩ serẽpimi gũare.

⁶⁸ ĩgũ eroparĩcũ Simo Pedro yũhrimi ĩgũre:

—Opũ, gũare gajigũ buhegũ marimi. Mũ buherire peerã Goãmũ mera eropa arĩniguirãca gũa. Mũ buheri dihta irire werea gũare.

⁶⁹ Eropirã gũa mũre umupeoa. Eropa mũhũ õagũ, Goãmũ magũ ĩgũ obeodigũ mũa arĩcũ gũa masia. Eropirã mũre cóãsome gũa, arĩmi Simo Pedro Jesure.

⁷⁰ ĩgũ eroparĩcũ peegũ Jesu weremi gũare:

—Yũpũ mũaare doce majarãre beyebũ. Yujugũ mũa mera majagũ watĩ yagũ arĩbu ãhrimi, arĩmi gũare ĩgũ buherãre.

⁷¹ Eropa arĩgũ Judare Simo Iscariote magũre arĩgũ iimi. Judapũ doce gũa mera majagũ Jesure ĩhaturirãre wiabu arĩmi.

7

Jesu pagũ porã ĩgũre peediabiriñuma

¹ Pũhrũ gũa mera Jesu Galilea yeba curigũ wami. Judea yeba majarã judio masa ĩgũre wejẽdiañorã. Erã eropa wejẽdiacũ masigũ ĩgũ iri yebare wabirimi.

² Judio masa mũa wirigã gũa iiburinũ bosenu merogã duhyabũ.

³ Eropirã Jesu pagũ porã ĩgũre werema:

—Judeague bosenure ĩagũ waque. Ero mũa yarãre deyoro moarire ii ĩhmugũ waque mũhũ.

⁴ Masare deyoro moarire ii ĩhmudiagũ mũa dibubiricãro gahmea. Deyoro moarire iigũ arĩgũ arĩpehrerã erã ĩhuro ĩique, arĩma erã.

⁵ ĩgũ pagũ porã arĩquererã ta Jesure “Goãmũ magũ ãhrimi,” arĩbirima. Eropirã eropa arĩma erã ĩgũre.

⁶ Erã eropa arĩra pũhrũ Jesu weremi erãre:

—Masa yũre erã õaro masiburisubu dũhyania dohpa. Mũarũ bosenũre ãdiarã waque.

⁷ Ero majarã mũare ãhaturibeama. Yũrũre erã ñeri iirare yũ werecũ yũre ãhaturima.

⁸ Mũa seyaro bosenũ árĩcũ waque. Yũrũre yũ waburisubu dũhyania dohpa. Eropĩgũ yũrũ bosenũre ãgũ wanibea dohpa, arĩmi Jesu erãre.

⁹ Eropa arĩgũ ãgũ Galilea dujami.

Mũa wirigã erã iirinũri bosenũ árĩcũ wañumi Jesu Jerusaléngue

¹⁰ Bosenũgue Jesu ãgũ pagũ porã erã wara pũhrũ Jesu sã gũa mera erã pũhrũ wami. Eropa wagũ masa erã ãbiririsubu wami.

¹¹ Bosenũ arĩrã judio masa gũa oparã ãgũre amañorã:

—¿Nohogue árĩcuri ãgũ? arĩ serẽpiñorã.

¹² Eropirã masa bajarã Jesure werewũañorã. Gajirã, “ãgũ õagũ ãhrimi,” arĩñorã. Gajirãpũ, “ãgũ ñegũ ãhrimi. Masare gũyagũ ãhrimi,” arĩ werewũañorã.

¹³ Eropa arĩquererã judio masa gũa oparãre gũirã, masa erã ãbirogue Jesure werewũañorã.

¹⁴ Gũa erogue ejara pũhrũ bosenũ deco Jesu Goãmũ wihigue ñajaja buhemi.

¹⁵ ãgũ eropa buhecũ judio masa Ʃca wa õpa arĩma:

—¿ãhĩ buherogue buhebigũ arĩqueregũ ta duhpĩgũ õaro masipehori ãgũ? arĩma erã ãgũre.

¹⁶ Erã eroparĩcũ Jesu weremi erãre:

—Yũ buheri yaha wereniguiri arĩbeaa. Yũre obeodigũ ya wereniguiripũ ãhraa i buheri.

¹⁷ Goãmũ gamerire iidiarã yũ buherire “Goãmũ wereniguiri ta ãhraa,” arĩ masirãcoma. Yũ buheri yaha wereniguiri dihta arĩbiricũ sãre masirãcoma.

¹⁸ Yujugũ ãgũ gamero ãgũ masiri mera buhegũ arĩgũ “Yũ dihtare umupeoque,” arĩgũ ãhrimi ãgũ. Yũre obeodigũrũre mũa umupeocũ gahmea yũrũ. Yũ eroparĩcũ peerã, “Diaye ta wereniguimi ãgũ. Ne gũyabeami,” arĩ masirãca mũa.

¹⁹ “Goãmũ dorerire Moise mũrũrũ apimũriñumi mũare. ãgũ eropa apiquerecũ ta mũa arĩpehorerã iri dorerire ne yũhribeaa. ¿Duhpirã yũre wejẽdiari mũa? arĩmi Jesu judio masare.

²⁰ —Mũ goroweregũ ãhraa. Mũre wejẽdiarã marima, arĩ yũhrima erã Jesure. Erã eroparĩcũ Jesu yũhrimi:

²¹ —Yũhũ soorinũ yujusubu Goãmũ ãgũ turari mera dorecũgũre ãgũ dorere yũ cóãcũ mũa ãha Ʃca wabũ.

²² Mari ñecũ sumarã iribojegue majarãpũ erã dũrũre merogã gasirogãre wiri arĩã erã arĩdiro dopa ta Moise

wiridoreñumi. Īgu eropa dorecũ majirãgãre ocho nuri erã masa dehyoara pũhrũ soorinũ árĩquerecũ ta erã dũpũre merogã erã gasirogãre wiri aĩmũria mũa.

²³ Mari soorinũ árĩcũ majirãgãre erã dũpũre merogã gasirogãre wihria mũa Moise doreri iimorã. ¿Mũa sã soorinũ irire iiquererã ta irinũ dorecũgũre yũ taucũ duh-pirã yũ mera guari mũa?

²⁴ Yũ iirare mũa õaro masibiriboro core, yũre ñero pepibircãque. Mũa õaro masira pũhrũ yũre mũa ñero pepicũ diaye ta árĩroca, arĩmi Jesu.

Jesu negohraguere ĩgu aridirore wereñumi

²⁵ Īgu eropa arĩ werera pũhrũ bajamerãgã Jerusalén majarã õpa arĩ wereniñorã:

—¿Ihĩ mari oparã erã wejẽdiagu arĩbeari?

²⁶ Eropigu ĩgũre erã wejẽdiaquerecũ ta arĩpehrerã masare buhegu iimi ĩgu. Eropirã ĩgũre wejẽdianirã árĩquereerã ta eropa ñacãma. Eropa ñacãrã ĩgũre “Īgu diaye ta Cristo Goãmũ ĩgu obeodigu ãhrimi,” ¿arĩ pepibocuri oparãpũ? Maripũ masia. Cristo arĩbiribocumi.

²⁷ Ihĩ Jesu ĩgu aridirore gũa masia. Cristopũ ĩgu árĩcũ ĩgu aridirore masiya mara. Eropigu Cristo gohra arĩbeamu Jesu, arĩ werewũañorã erã Jerusalén majarã.

²⁸ Erã eropa arĩrare masigu, Jesu õpa turaro busũro werenigui buhemi Goãmũ wihi:

—Yũre õpa arĩ pepia mũa: “Īgũre masia gũa. Eropirã ĩgu aridiro sãre masia,” arĩ pepiraa mũa yũre. Mũa eropa arĩ pepiquererã ta yũ gamero aribirabũ. Yũre obeodigu gohrare masibea mũa. Yũre obeodigu diaye árĩgu, diaye iigu ãhrimi.

²⁹ Īgu ta yũre obeomi. Eropigu ĩgu pohrogue aribũ. Eropigu yũhũ ĩgũre masia, arĩmi Jesu judio masare.

³⁰ Īgu eroparĩcũ peerã ĩgũre ñeadiarima. Erã eropa ñeadiaquerecũ ta Jesu ĩgu ñero tariburisubũ arĩbiriyo ro dohpa. Eropirã erã ĩgũre ñeamasibirima.

³¹ Gajirã masapũ bajarã ĩgũre umupeoma. Õpa arĩma:

—“Cristo bajasuburi Goãmũ turari mera deyoro moarire ii ĩhmugũcumi,” erã arĩ werediro dopa ta ihĩ Jesupũ bajasuburi Goãmũ turari mera ii ĩhmumi. Arĩpehrerã gajirã tauro Goãmũ turari mera ii ĩhmumi ĩgu. Eropigu Cristo Goãmũ ĩgu obeodigu ta ãhrimi Jesu, arĩma Jesure ne umupeonũgarãpũ.

Fariseo masa Jesure peresu iidoreñuma

³² Masa Jesure eropa arĩ wereniguicũ peerã pahia oparã, fariseo masa mera Jesure ñeadorerã obeoriñorã surarare.

³³ Eropigu Jesu masare õpa arĩmi:

—Bajamenarigã mũa mera árĩnigũca. Eropigu puhruñarigã yũre obeodigu pohro wagũca.

³⁴ Yũ árĩborore mũa wamasibea. Eropirã yũre amaquerã ta ne bocasome mũa, arĩmi Jesu masare.

³⁵ Īgũ eroparĩcũ peerã erã judio masa õpa arĩ wereniguiñorã:

—¿Ihĩ eropa arĩgũ nohogue wagũcuri mũa pepicũ? ¿Griego masa pohrogue judio masa wasirinirã pohrogue erã árĩri macarigue Griego masaguere buhegũ wabocuri ihĩ?

³⁶ “Yũ árĩborore mũa wamasibea. Eropirã mũa yũre amaquerã ta ne bocasome,” Īgũ arĩgũ ¿dohpa arĩronore Īgũ eropa arĩri? arĩ wereniguiñorã judio masa erã basi.

Ojocaricũ iiriyarire wereñumi Jesu

³⁷ Bosenũ ojogorocurinu irinu gũhyadiarinũ gohra árĩro iibũ. Irinu Jesu ero nigui, turaro mera weremi masare:

—Ñemesiburã decore turaro gamero dopa árĩrã umuri nũcũ Goãmũ mera turaro árĩdiarã yũre serẽque. Mũa eropa serẽcũ Īgũ yarã árĩdoregura mũare.

³⁸ Yũre umupeorãre õpa arĩ gojañuma Goãmũ yare erã gojarapũgue: “Erã sĩporãriguere ojocaricũ iiri deco eropa árĩniguicãroca,” arĩ gojañuma, arĩ turaro weremi Jesu masare.

³⁹ “Erã sĩporãriguere ojocaricũ iiri deco eropa árĩniguicãroca,” arĩgũ “Yũre umupeorã Espĩritu Santore oparãcoma” arĩgũ iimi Jesu. Īgũ umarogue Īgũ mũrianibiricũ dohpa Espĩritu Santopũ arinibirimi dohpa erãre.

Judio masa dũca wariñuma pe curu

⁴⁰ Jesu Īgũ eroparĩcũ peerã, masa bajarã õpa arĩ wereniguima:

—Ihĩ diaye ta Goãmũ yare weremũtagũ mari coredigu ta ãhrimi, arĩ wereniguima.

⁴¹ Õpa arĩma gajirã sã:

—Ihĩ Cristo marĩre taubu ãhrimi, arĩma.

Gajirãpũ õpa arĩma:

—Cristo árĩgũ Galilea majagũ árĩsome Īgũ. Ihĩ Jesupũ ero majagũ ta ãhrimi.

⁴² Cristo Davi mũrũ pãrami gajisubu majagũ arĩgũ árĩbocumi. Eropigu Davi ya maca mũraro Belén waĩcũri maca masa dehyoagũcumĩ Cristopũ. Eropa ta arĩ werea Goãmũ yare erã gojarapũ. Ihĩ Jesupũ Belén macague masa

dehyoabiripũ. Eropigũ ĩgũ Goãmũ ĩgũ obeodigũ Cristo gohra árĩbeami, arĩrima erã.

⁴³ Eropirã Jesure peenirã gajirã umupeo gajirãpũ umupeobirã árĩnijarã game dũca warima pe curu.

⁴⁴ Eropirã bajamerãgã Jesure ñeadiarima. Eropa ñeadiaquererã ta ĩgũre ñeabirima.

Judio masa oparã Jesure ne umupeobiriñuma

⁴⁵ Eropirã surara pahia oparã pohrogue fariseo pohrogue dujaa wañorã daja. Erã dujajacũ ĩarã erã surarare serẽpiñorã:

—¿Duhpirã Jesure ñeagãribirari mũa? arĩñorã.

⁴⁶ —Ĩgũ ðatariaro wereniguigũ ãhrami. Gajirã ĩgũ iro dopa wereniguirã ne marima, arĩ yũhriñorã surara erãre.

⁴⁷ Erã eroparĩcũ fariseo masapũ ðpa arĩ wereñorã:

—¿Mũare ĩgũ gũyacũ, “Diaye ta arĩgũ iimi,” arãri mũa sã?

⁴⁸ Mari oparã Jesure ne umupeobeama. Gũa sã eropirã ĩgũre umupeobeaa.

⁴⁹ Oã masa Goãmũ dorerire Moiserẽ ĩgũ apirare masibeama. Eropa masibirã árĩrã Jesure umupeoma. Erã eropa umupeori dipuwaja mari Pagũ Goãmũ erãre dipuwaja moagũcumĩ, arĩñorã fariseo masa.

⁵⁰ Nicodemo fariseo masũ Jesure weretamugũ ejadigũ ero árĩpũ erã mera. Erã eroparĩcũ peegũ ðpa arĩpũ ĩgũ erãre:

⁵¹ —Jesu ĩgũ ñero iirare masibeeaa mari. Eropa masibirã ĩgũ marire wereboro core ĩgũre dipuwaja moamasibeeaa mari. Eropa masibiriquererã ta ĩgũre dipuwaja moarã, mari ya dorerire tarinũgarã iiaa mari, arĩpũ Nicodemo erãre.

⁵² ĩgũ eroparĩcũ peerã ðpa arĩ yũhriñorã erã:

—¿Mũ sã ĩgũ iro dopa ta Galilea majagũ ta ãhriri? Goãmũ ya erã gojarapũre buhepehoque. Eropa buhegũ, “Goãmũ yare weremũhtagũ ne yujugũ Galilea majagũ marimi,” arĩ masigũca mũhũ, arĩ yũhriñorã erã Nicodemore.

⁵³ Erã eropa arĩra pũhrũ erã ya wirigue dujaa wañorã.

8

Ɔmũ mera ñero iidigore judio masa oparã dipuwaja moadiariñuma

¹ Jesupũ ĩgũ seyaro utãgũgue Olivo waĩcũdigũgue waha wami.

² Gajinũ Goãmũ ya wihigue gũa wabũ daja. Jesu ejacũ ĩarã masa bajarã ĩgũ pohro gamenerema. Erã gamenerecũ ĩgũpũ doanijagũ erãre buhenũgarũ.

³ Īḡu eropa buhero watope judio masa buherã, fariseo masa mera iri wihigue nomeore aĩ ñajajama. Igo marapucquerogo gajigu mera igo ñero iicũ bocañañorã erã igore. Eropa bocajarã igore Goãmũ wihigue aĩ ñajama erã igore dipuwaja moadorerã. Aĩ ñajatuha árĩpehrerã gũa ĩaro igore duhu nuguma.

⁴ Duhunugu õpa arĩma Jesure.

—Buhegũ, igo marapucugo árĩquerego gajigu mera ñero iigo iicũ bocajabũ.

⁵ Moise dorerire õpa ãhraa: “Ūmũ mera ñero iidigore utã mera dea wejẽcãque,” arĩyoro Goãmũ doreri. ¿Mũca dohpa arĩ pepiri ire? arĩ serẽpima erã Jesure.

⁶ Jesu ĩḡu ñero wereniguicũ peediarã iirima erã ĩḡure weresãmorã. Erã eropa serẽpiquerẽcũ ta Jesupũ muhmu-siu dija, yebague ĩḡu mujusĩru mera gojami.

⁷ Eropigu erã eropa serẽpiniguicũ peegu Jesupũ wahgã doaja, erãre weremi:

—Mũa mera majagu ñero iibigu árĩḡu igore utã mera deanugaporo, arĩmi Jesu.

⁸ Eropa arĩtuha dipaturi muhrisiu dija, yebague gojami daja.

⁹ Irire peerã igore aĩ ñajarinirãpũ erã ñeri iirare guñarã, erã tĩrãpũ wiria wamũhtama. Erã pũhrũ erã mera majarã sã wiriapehrea wama. Eropigo nomeo dihta Jesu pohro dujanugamo.

¹⁰ Eropigu Jesu wahgã doaja, igore serẽpimi.

—¿Nohogue ãhriri erã? ¿Mũre dipuwaja moadianirã mariri dohpaguere? arĩmi igore.

¹¹ —Marima, opũ, arĩ yũhrimo igo.

—Yũ sã dipuwaja moabeaa mũre. Waque. Eropigo ñerire ĩinemobircãque, arĩmi Jesu igore.

Jesu i yeba majarãre boyoro iro dopa Goãmũre masicũ ĩimi, arĩ gojañumi Ñu

¹² Dipaturi Jesu iri wihigue árĩrãre weremi:

—Boyoro iro dopa yãhũ i yeba majarãre Goãmũre masicũ ĩiaa. Yũre umupeogu Goãmũ mera eropa árĩniguicãḡucumi. Eropigu ĩḡu boyorogue árĩḡu dopa ta õarire guñagucumi. Eropigu ĩḡu ñerire guñadiabeami, arĩ weremi Jesu.

¹³ Īḡu eroparĩcũ peerã fariseo masapũ õpa arĩma.

—Mũhũ mũ basi mũ árĩricũre eropa arĩ werenigui-maacãḡu ĩiaa. Mũ õpa arĩ wereniguiiri ne waja mara, arĩma erã Jesure.

¹⁴ Erã eroparĩcũ Jesu yũhrimi:

—Yuhũ, yũ aridirore masia. Yũ waboro sãre masia. Mũapũ ne irire masibea. Eropigũ yũ basi yũ árĩricũre werequeregũ iri yũ werera diaye ta ãhraa.

15 Mũa sihajaro mũa sã ĩara dihtare masia mũa. Eropirã mũa yũre werewũaa. Yuhũ mũa iro dopa ta werewũabeaa.

16 Masa erã árĩricũre ĩagũ yuhũ yujugũ ta ĩhamasibea. Yũ tamera yũre obeodigũ mera masia. Eropigũ yuhũ masa erã árĩricũre diaye ta ĩha masia.

17 Mũare doreri erã gojarapũ õpa arĩ werea: “Masa perã erã yujuro mera erã werecũ erã wereri diaye ta ãhraa,” arĩ were gojañuma.

18 Yũre weregũ mera gũa perã ãhraa. Yuhũ, yũ árĩricũre werea. Eropigũ yũ Pagũ sã weremi yũre. Ĩgũ ta ãhrimi yũre obeodigũ, arĩmi Jesu.

19 —¿Nohogue ãhriri mũ Pagũ? arĩ serẽpima erã.

—Yũre mũa masibea. Yũ Pagũ sãre masibea. Yũre masirã, yũ Pagũ sãre masiboaya, arĩ yũhrimi Jesu erãre.

20 Jesu erãre buhegũ eropa arĩ wereniguimi Goãmũ wi-higue erã niyeru apiri comoro pohro. Ĩgũ ñero tariburisubũ ejabiribũ dohpa. Eropirã erã mera ĩgũ árĩquerecũ ta ĩgũre ñeabirima.

Yũ waboroguere mũapũ wamasisome, arĩñumi Jesu

21 Dipaturi masa mera gũa árĩrisubũ Jesu erãre weremi daja:

—Yũ aridirogue wagũca. Yũ wara pũhrũ yũre amarãca mũa. Yũ waboroguere mũapũ wamasisome. Eropirã mũa ñeri dipuwajacũrã sĩrirãca, arĩ weremi Jesu.

22 “Yũ waboroguere mũapũ wamasisome,” ĩgũ arĩcũ peerã,

—¿Ihĩ ĩgũ basi wejẽ sĩrigũcũri eropa arĩgũ? arĩma judio masa erã basi.

23 Erã basi erã eroparĩcũ Jesu weremi erãre:

—Mũapũ i yeba majarã ãhraa. Yũpũ ũmaro majagu ãhraa. I yeba dehyoanirã ãhraa mũapũ. Ʋmarogue aridigu ãhraa yũpũ.

24 Mũare yũ árĩricũre yũ werecũ “Diaye árĩbeaa,” mũa arĩrã, mũa ñeri dipuwajacũrã sĩrirãca mũa. Eropigũ “Mũa ñeri dipuwajacũrã sĩrirãca,” arĩrabũ mũare, arĩmi Jesu erãre.

25 —¿Noano ãhriri mũhũ? arĩ serẽpima erã.

—Neguere yũ mũare arĩdiro dopa ta ãhraa yuhũ.

26 Mũare yũ wereburi wũaro duhyania. Eropiro mũa ñeri dipuwajare mũare yũ wereboro wũaro duhyaa dohpa. Eropigũ yũre obeodigũre yũ peerare i yeba majarãre werea. Ĩgũ werera diaye ta ãhraa, arĩmi Jesu erãre.

27 “Yüre obeodigu,” ĩgu arĩcũ peerã “Mari Pagu árĩcumi,” arĩ pepibirima erã.

28 Erã eropa arĩ pepibiricũ ĩagu Jesu weremi erãre:

—Yüre masure Goãmũ ĩgu obeodigure mũa crusa mera pabia aĩ wahgũ nugurãca. Mũa eropa iirã, “Īgu Goãmũ ĩgu obeodigu ta ãhrimi,” arĩ masirãca yure. Eropirã yu gamero dopa ta iibigu yu árĩrire masirãca. Eropirã yu Pagu ĩgu yure ĩgu buhera dihtare weregu yu árĩcũ sãre masirãca mũa.

29 Eropigu yure obeodigupu yu mera ãhrimi. Īgu gamerire umuri nũcu iiniguia. Eropigu ĩgu yure ne cóãbeami, arĩmi Jesu.

30 Īgu eroparĩcũ peerã masa bajarã ĩgure umupeoma.

Goãmũ porãre, ñerire iirã sãre wereñumi Jesu

31 Eropirã gajirã judio masa Jesure umupeoma. Eropigu Jesu erãre weremi:

—Yu dorerire iipehorã árĩrã, diaye ta yu buherã ãhraa mũa.

32 Eropirã diaye ta masirãca mũa. Diaye árĩrire masirã, ñero iirire duhumasirãca. Eropirã pohro majarã wiunirã iro dopa árĩrãca mũa, arĩmi Jesu erãre.

33 Īgu eroparĩcũ peerã erã õpa arĩ yũhrima daja:

—Guapu iribojegue majagu mũru Abrahã pãramerã árĩturiarãgue ãhraa. Eropirã ne gajirã pohro majarã árĩbeaa gua. Eropigu “Pohro majarã wiunirã iro dopa árĩrãca,” arĩgu ¿dohpa arĩgu eropa arĩri mũhu? arĩ serẽpima erã Jesure.

34 Erã eroparĩcũ peegu Jesu õpa arĩmi erãre:

—Diaye mũare arĩgu iiaa. Árĩpehrerã ñerire iirãpu erã ñeri iirire duhumasibeamã. Eropiro iri ñeripu erãre dorea. Eropa árĩrã árĩrã pohro majarã iro dopa ãhrima erã.

35 Pohro majagupu ĩgu opu magu iro dopa árĩbeami. Doreri opabeami. Iri wihi majagu magupu umuri nũcu diaye ta ĩgu pagu doreri opami.

36 Yũhu Goãmũ magu ãhraa. Eropigu ĩgu doreri opaa. Eropirã mũa ñerire yu duhucũ iinirã árĩrã diaye ta ñerire duhunirã árĩrãca mũa.

37 Abrahã mũru pãramerã árĩturiarã mũa árĩcũ masia. Eropa árĩquererã ta yu wereripure peediabeaa mũa. Eropirã yure wejẽdiaa mũa.

38 Yu Pagu ĩgu yure masicũ iirare werea mũare. Yu eropa werequerecũ ta mũa pagu ĩgu doreripure iiaa mũa sã, arĩmi Jesu erãre.

39 —Abrahã mũru iribojegue majagu gua pagu mũru arĩmũripũ, arĩ yũhrima erã.

Erã eroparĩcũ Jesu yãhrimi:

—Abrahã mũrũ porã árĩrã ĩgũ iidiro dopa ta iiboaya mũa.

⁴⁰ Goãmũ yũre diaye ĩgũ wererire mũare yũ werequerecũ ta yũre wejẽdiaa mũa. Abrahã mũrũrũ ne eropa iibiridi árĩmi.

⁴¹ Mũa pagũ ĩgũ iidiro dopa ta iiaa mũa, arĩmi Jesu erãre.

Ĩgũ eroparĩcũ erã yãhrima:

—Mojoto diribiridigo porã árĩbeaa gũa. Yujugũ ta ãhrimi gũa pagũ. ĩgũ ta ãhrimi Goãmũ, arĩma erã.

⁴² Erã eroparĩcũ Jesu yãhrimi:

—Goãmũ mera majagũ árĩdigũ ta õguere aribũ yũhũ. Eropirã Goãmũ mũa Pagũ ĩgũ árĩcũ yũre mahiboaya mũa. Yũ gamero aribiribũ yũ tamera. Yũ Pũ Goãmũ ĩgũ obeocũ aribũ õguere.

⁴³ ¿Duhpirã yũ wereniguirire peebeari mũa? Yũ wererire yujuro bojebeaa mũa. Eropirã peebeaa mũa.

⁴⁴ Mũa pagũrũ watĩ ãhrimi. Eropirã watĩ ĩgũ gameripũre iidiaa mũa. I yeba negohraguere árĩnũgacũgue, dohpague sãre ĩgũ masare wejẽgũ ãhrimi. ĩgũre diaye maja ne mara. Eropigũ ĩgũ ne diaye majare wereniguibeami. ĩgũ negohraguere gũyanũgadigũ árĩmi. Eropigũ ĩgũ eropa gũyaniguigũ árĩgũ, gũyarire weremi.

⁴⁵ Yũrũ diaye majare werea mũare. Eropa yũ werecũ peebeaa mũa.

⁴⁶ “Mũhũ ñero iigũ ãhraa,” arĩmasibeeaa mũa yũre. ¿Diaye mũare yũ werequerecũ ta duhpirã peebeari mũa?

⁴⁷ Goãmũ porãrũ ĩgũ wereniguirire peema. ĩgũ porã árĩbirã ĩgũ wereniguirire peebeama, arĩmi Jesu erãre.

Abrahã mũrũ ĩgũ árĩboro core Cristo árĩmũhtatuhãñumi

⁴⁸ ĩgũ eroparĩcũ peerã judio masa ĩgũre õpa arĩma:

—“Mũhũ Samaria majagũ ãhraa. Eropigũ watĩ mera goroweregũ ãhraa mũhũ,” gũa arĩra diaye ta ãhraa, arĩma erã Jesure.

⁴⁹ Erã eroparĩcũ peegũ õpa arĩ yãhrimi Jesu:

—Goroweregũ árĩbeaa yũhũ. Yũ Pagũre umupeoa. Mũarũ yũre umupeobeaa.

⁵⁰ Yũre masa erã umupeorire amabeeaa yũhũ. Yũ Pagũrũ yũre umupeocũ gahmemi masare. ĩgũ tamera yũ árĩricũrĩre õaro ĩha masigũ eropa ta umupeodoremĩ. Eropigũ yũ Pagũ erã yũre gamebiriri dipuwaja, dipuwaja moagũcumĩ.

⁵¹ Diaye mũare arĩgũ iiaa. Yũ dorerire iigũ umũri nũcũ Goãmũ mera eropa árĩnĩguicãgũcumĩ, arĩmi Jesu.

⁵² ĩgũ eroparĩcũ peerã õpa arĩma erã:

—Dohpague tamerare mu watĩ mera goroweregu árĩcũ gua ñaro masia. Abrahã muru sĩaria wañumi. Goãmu yare weremuhtanirã sã sĩaria wañuma iribojegue. Eropigu “Yu dorerire iigu umuri nucu Goãmu mera eropa árĩniguigucumi,” arĩgu, ¿dohpa arĩgu eropa arĩri muhu?

⁵³ ¿Gua ñecu muru tauro turari muhu? Igu, Goãmu ya weremuhtanirã sã sĩaria wañuma iribojegue. ¿Muru nihino ãhriri eropa arĩ wereniguigu? Mu eropa arĩro dopa árĩbea muhu, arĩma erã.

⁵⁴ Erã eroparĩcũ peegu Jesu werenemomi:

—Yuhu yu basire umupeodoreri duhpiburi árĩbea. Yu Paguru yare umupeodoregu ãhrimi igu. “Gua Pagu” mua arĩguru yu Pagu ta ãhrimi.

⁵⁵ Muru yu Pagure ne masibea. Yuhu igure masia. “Iguare masibea,” arĩgu mua iro dopa ta guyaricugu árĩboaya yuhu. Diaye ta igure masia. Eropigu igu dorerire iiaa.

⁵⁶ I yebaguere yu árĩboro coregu mari ñecu muru Abrahã muru masimuhtatuhamuriñumi yare. Eropa masigu igu mucubirimuriñumi, arĩmi Jesu.

⁵⁷ Igu eroparĩcũ erã yuhrima:

—Abrahã muru iribojegue majagu ãhrimi. Muru cincuenta bojori opanibea. ¿Eropigu muhu igu murure duhpigu iha masiboyuri? arĩma judio masa igure.

⁵⁸ —Diaye mare arĩgu iiaa. Abrahã igu árĩboro core yuru árĩmuhtatuhabu, arĩmi Jesu erãre.

⁵⁹ Igu eroparĩcũ peerã erã utãyerire aĩ igure deadiarima. Erã eropa deadiaquerecũ ta Jesuru Goãmu wihigue árĩdigu duhri wiria wami.

9

Cuirĩ ihajabigure ñaro iagu wacũ iĩnumi Jesu

¹ Jesu gua igu buherã mera mague tariarã gajigure cuirĩ ihajabigure bocajabu. Igu ne masa dehyoagugue ta cuirĩ ihajabigu árĩru.

² Gua sã igure iãrã serẽpibu Jesure.

—Buhegu, ¿ihĩ duhpigu cuirĩ ihajabigu masa dehyoayuri? ¿Ñerire iimuriyuri eropa wagu? ¿O igu pagu sumarã erã ñero iira dipuwaja eropa wayuri igu? arĩ serẽpibu gua Jesure.

³ Gua eroparĩcũ peegu ñpa arĩ yuhrimi:

—Ihĩ igu pagu sumarã sã erã ñerire iira sã igure cuirĩ ihajabiricũ iibea. Goãmuru igure cuirĩ ihajabiricũ iimi. Iguare iacũ iibu masare igu turarire ii iĩmuburire apimi Goãmu.

4 Yũre obeodigu ĩgu apirare yũre iiro gahmea dohpague. Nãmiguere mari mohmemasibiro dopa ta pũhrũgue yũre obeodigu ĩgu apirare iimasibea yũhũ.

5 I yebaguere i yeba majarãre Goãmũre masicũ iiaa, arĩmi Jesu.

6 Eropa arĩtuha yebague disico ehomepimi. ĩgu disico ehomepirare nicu mera mohmore nijagu, cuiri ĩhajabigũre ĩgu cuirire sũmi.

7 Eropa sũgu õpa arĩmi Jesu:

—Siloé waĩcũri gobegue mũ cuirire coegu waque, arĩmi Jesu. Siloé ero majarã ya mera arĩrã obeora gobe arĩrã iima.

Jesu ĩgu cuiri coedoredigũpũ waha, coetuhaja, cuiri ĩagũgue dujajapũ ĩgu ya wihigue.

8 ĩgu dujajacũ ero majarã ĩgũre ĩãnorã. Ero core niyeru serẽdigũ ĩgu árĩcũ ĩanirã ĩgũre õpa arĩnorã erã basi:

—¿Ihĩ sohõ árĩdigũ niyeru serẽdoadigũ árĩbeari? arĩnorã erã.

9 —Ĩgu ta ãhrimi, arĩnorã gajirã.

—Ĩgu árĩbeami. Eropa árĩbiriqũregũ ta ĩgu iro dopa ta bejagu ãhrimi, arĩnorã gajirã.

Erã eroparĩcũ peegu cuiri ĩhajabiridigũpũ õpa arĩpũ:

—Ĩgu ta ãhraa yũhũ, arĩpũ erãre.

10 ĩgu eroparĩcũ masa ĩgũre serẽpiñorã:

—¿Cuirĩ ĩhajabiridigũ árĩdigũ dohpa ii ĩhari mũhũ? arĩ serẽpiñorã erã ĩgũre.

11 —Jesu waĩcũgu disicore nicu mera mohmore yũ cuirire sũami. Yũre sũtuhaja “Siloé waĩcũri gobegue mũ cuirire coegu waque,” arãmi yũre. ĩgu eroparĩcũ coegu ejabũ yũhũ. Eropa yũ coera pũhrũ yũ cuirĩ õaro dehyoabũ yũre, arĩ werepũ ĩgu masare.

12 —¿Mũre Eropa iidigu nohogue árĩcũri ĩgu? arĩnorã erã.

—Õba. Noho árĩgu árĩcũmi, arĩpũ ĩgu

Cuirĩ ĩhajabiridigũre fariseo masa serẽpiñuma

13 Eropa arĩ wereniguituha erã cuirĩ ĩhajabiridigũre fariseo masa pohogue aĩ ejañorã.

14 Irinũ Jesu dihta nicure mohmore cuirĩ ĩhajabigũre õagu iiranũ Sabadonũ árĩbũ. Irinũ gũa soorinũ árĩbũ.

15 Eropirã fariseo masapũ ĩgũre serẽpiñorã daja.

—¿Dohpa ii ĩhari mũhũ? arĩ serẽpiñorã erã.

—Nicu mera yũ cuirire sũami. Eropigu yũ cuirire coera pũhrũ ĩhaa yũhũ, arĩ werepũ ĩgu erãre.

16 —Ĩgu mari soorinũ mari mohmedorebiririnũre mohmeami. Eropigu ĩgu Goãmũ yagu árĩbeami, arĩnorã gajirã fariseo masa.

Gajirãpũ õpa arĩñorã:

—Ñerire iigu árĩgu õpa ïre õagu wacũ iimasibeami. Eropigu ïgu õagu árĩbocumi, arĩñorã gajirã Jesure.

Eropirã erã, erã basi pe curu dũca wariñorã.

¹⁷ Eropirã dipaturi erã cuiri ïhajabiridigũre serẽpinemoñorã daja.

—¿Mũre mũ cuirire õaro iidigũre dohpa arĩ pepiri mũhũ Jesure? arĩñorã erã ïgũre.

—Ïgu diaye ta Goãmũ yare weremũhtagũ ãhrimi, arĩpũ cuiri ïhajabiridigũpũ.

¹⁸ Negohraguere judio masa õpa arĩ pepiriñorã. “Ihĩ cuiri ïhajabiridigu árĩbeami,” arĩ pepiriñorã. Eropa arĩ pepirã cuiri ïhajabigu pagũ sũmarãre sihubeoñorã erã.

¹⁹ Sihubeo ïgu pagũ sũmarãre serẽpiñorã fariseo masa oparã.

—¿Ihĩ diaye ta mũ magũ ãhriri? ¿Mata ïgu cuiri ïhajabigu masa dehyoari? ¿Diaye ta cuiri ïhajabiridigu árĩqueregu dohpa ii ïhari dohpaguere? arĩ serẽpiñorã erã ïgu pagũ sũmarãre.

²⁰ —Ihĩ gũa magũ ta ãhrimi. Eropigu mata cuiri ïhajabigu masa dehyoami ïgu.

²¹ Irire masiquererã ta ïgu ïarare, ïgũre ïacũ iidigu sãre masibea gũa. Gũa magũre serẽpique. Bũgũ ãhrimi ïgu. Ïgu basi weremasimi ïgu, arĩñorã ïgu pagũ sũmarã.

²² Judio masa oparã ero coreguere õpa arĩtuhañorã:

—“Jesu ta Cristo mari taubu ãhrimi,” arĩrãre mari buheri wirigue ñajadoresome gũa, arĩmũriñorã judio masa gũa oparã.

Erã eroparĩcũ peenirã cuiri ïhajabigu pagũ sũmarãpũ judio masa oparãre gũi arĩñorã.

²³ Eropa gũirã “Bũgũ ãhrimi ïgu. Ïgũre ta serẽpique,” arĩñorã erã judio masa oparãre.

²⁴ Pũhrũ judio masa oparã dipaturi cuiri ïhajabiridigũre sihubeoñorã. Sihubeo õpa arĩñorã ïgũre:

—Goãmũ mera diaye wereque mũhũ. Jesure ïgu ñeri iigu ïgu árĩcũ gũa masia. Eropigu diaye wereque gũare, arĩñorã judio masa cuiri ïhajabiridigũre.

²⁵ Erã eroparĩcũ peegu õpa arĩ yũhripũ ïgu:

—Jesure ïgu ñeri iigu ïgu árĩcũ masibirica yũhũ. Yujuñe ta masia yũhũ. Iribojeguere cuiri ïhajabigu arĩmũribũ yũhũ. Dohpaguepũre ïhaa yũhũ. Iri dihtare masia yũhũ, arĩ yũhripũ cuiri ïhajabiridigũpũ erãre.

²⁶ —¿Dohpa iiari ïgu mũre? Mũ cuirire ïhajadoregu dohpa iiari ïgu mũre? arĩ serẽpiñorã erã daja.

27 —Irire ta muare weretuharabugu yuhu. Yu eropa arĩ werequerecũ ta mua ne peediabeaa yure. ¿Dohpa iidiarã yu dipaturi werecũ peediari mua? ¿Mua sã igu buherã arĩdiari? arĩpu igu erãre.

28 Igu eroparĩcũ peerã erã igure turiñorã.

—Muhu Jesu buhegu ahraa. Guapu Moise buherã ahraa.

29 Diaye ta Goãmu Moisere wereniguimuriñumi. Jesure obeodigure gua masibea, arĩñorã erã cuiri ihajabiridigure.

30 Erã eroparĩcũ yuhripu igu:

—¿Igu obeodigure mua masibiricũ, yure iacũ iidigu arĩgu Goãmu igu obeodigu arĩbiribocuri igu?

31 Goãmu ñeri iigure igu serẽrire peebeami. Iri tamerare mari masia. Ñerire iigure pebiriqeregu ta Goãmure umupeogure, igu dorerire iigure igu serẽrire peemi Goãmu.

32 Negohraguere i yeba arĩnugacũguere, mata masa dehyoagugue ta cuiri ihajabigure ne yujugupare ihajacũ iigu marimuripu.

33 Eropigu Jesu Goãmu igu obeodigu arĩbigu yure iacũ iibiriboñumi, arĩpu igu erãre.

34 Erãpu õpa arĩ yuhriñorã:

—Muhu mata ñegu arĩmuriya. ¿Eropa arĩqueregu ta guare buheri muhu? arĩñorã judio masa oparã.

Eropa arĩtuha erã igure cohã wiuñorã.

Jesu yare gamebirã cuiri ihajabirã iro dopa ahrima, arĩ wereñumi Jesu

35 Eropigu cuiri ihajabigure erã cohã wiurare Jesu peemi. Eropa peegu cuiri ihajabiridigure gua bocajacũ, igure serẽpimi.

—¿Masure Goãmu igu obeodigure umupeori muhu? arĩmi Jesu.

36 —Opu, ¿noa ahrii igu? Iguere masigu umupeogura, arĩmi cuiri ihajabiridigupu Jesure.

37 —Iguere ihatuhabu muhu. Dohpaguere mu mera wereniguigu igu ta ahraa yuhu, arĩmi Jesu cuiri ihajabiridigure.

38 —Opu, mure umupeoa yuhu, arĩmi cuiri ihajabiridigupu.

Eropa arĩgu igu Jesu pohro mereja igure umupeomi.

39 Igu eropa umupeocũ iagu õpa arĩmi Jesu masare:

—Õarã, ñerã sã erã iirare masicũ iibu aribu yuhu. Cuiiri ihajabirã erã iabiro dopa ta yu Pagure masibirã ahrima. Eropa masibirãre yu Pagure masicũ iigu aribu yuhu. “Gua õaro masia,” arĩ pepinirã sãre õaro erã masibirirare masicũ iigu aribu yuhu, arĩmi Jesu.

⁴⁰ Īḡu eroparīcū peerā bajamerāgā fariseo masa ĭḡure ōpa arīma:

—“Cuirī ĩhajibirā erā ĩhamasibiro dopa ta masibea m̄ua s̄a,” ĩarīri m̄uḡu ḡuare? arīma fariseo masa Jesure.

⁴¹ Erā eroparīcū Jesu ōpa arīmi:

—“Cuirī ĩhajibirā erā ĩha masibiro dopa ta diaye ōaro masibea ḡua,” m̄ua arīcū dipuwaja mariboya. “ḡua ōaro masirā āhraa,” m̄ua arīrā āhraa. Eropirā yure peediabirira dipuwaja m̄uare dipuwaja āhraa dohpaguere, arīmi Jesu erāre.

10

Oveja ĩhadibugū queoriñere wereñumi Jesu

¹ P̄hr̄u queoriñe mera werenigui queoḡu buhebu ōpa arīmi Jesu ḡuare gajirā masa s̄are:

—Diaye arīḡu ĩaa m̄uare. Oveja diburi s̄ariro disiporo ñajabigup̄u gajipugue ñajagup̄u yajari masu āhrimi.

² Disiporo ñajagup̄u ovejare ĩhadibugū āhrimi.

³ Disiporo coreḡu disiporo p̄ḡūmi ovejare ĩhadibugū ĭḡu ñajariborore. Ovejare ĩhadibugū eracū ĭḡu wereniguirire peerā āhrima ĭḡu oveja. Erāre sihugū, erā waī mera sihubeomi ĭḡu. Eropigū erāre s̄ariroḡue árīrāre sihu wiuniguimi disiporogue.

⁴ Īḡu yarāre árīpehrerāre sihu wiu erāre mahtanugajami. Ovejap̄u ĭḡu wereniguirire masirā, ĭḡure nurusiamā.

⁵ Gajigure erā masibigure nurusiabeama erā. Eropirā gajirā erā wereniguirire peerā, ḡui omagā wahama, arīmi Jesu masare.

⁶ Iri ĭḡu werequerecū ta irire peerā masibirima erā.

Jesu ovejare ōaro ĩhadibugū iro dopa ĭḡu yarāre ōaro ĩhadibumi

⁷ Eropigū dipaturi Jesu erāre ḡua s̄are weremi daja:

—Diaye m̄uare arīḡu ĩaa. Ovejare diburi s̄ariro disiporo iro dopa āhraa yuh̄u.

⁸ Árīpehrerā yu core arinirā ḡuyarire buherā yajari masa iro dopa āhrima. Erā eropa árīquerecū ta oveja iro dopa árīrā yaharāp̄u gajirāre ne pee wahḡabeama.

⁹ Yu ovejare diburi s̄ariro disiporo iro dopa āhraa. Iri disiporo ñajarā iro dopa ta āhrima yure umupeorā. Eropigū erāre peamegue wabonirāre taḡura. Ovejare cāhmotari s̄ariro erā cāhmotaro dopa ta yu taunirāre cāhmotagūca. Eropirā erā gamerire oparācoma, arīmi Jesu.

¹⁰ Eropa arītuha ōpa arīnemomi:

—Mũare gũya buherã ovejare yajari masa iro dopa ãhrima. Gajirã yajadiarã wejẽdiagãrima. Oveja iro dopa árĩrã yaharã árĩpehrerĩnũri Goãmũ mera árĩcũ iigũ arĩbũ yũrũ. Eropigũ yaharã Ʃmũri nũcũ erã õaro árĩcũ iibu arĩbũ yũrũ.

11 Ovejare õaro ãhadibugũ iro dopa árĩgũ ãhraa yũhũ. Ovejare õaro ãhadibugũ sĩribu árĩqueregũ ta ãgũ ovejare cãhmotaniguigũcumĩ. Yaharã Goãmũ mera erã eropa árĩniguiburire sĩrigũca.

12 ãgũ mohmeri masũrũ õaro ovejare ãhadibugũ árĩbeami. Eropirã oveja ãgũ yarã árĩbeama. Eropigũ nũgũ majagũ diaye ovejare ñeagũ ãgũ arĩcũ ãagũ ãgũ mohmeri masũrũ ovejare cóãcã gũĩ omagã wahami. ãgũ eropa cohãpigãra pũhrũ, nũgũ majagũ diaye ãgũ ovejare ãgũ ñeacũ ãarã ovejarũ omasirigã wahama.

13 ãgũ mohmeri masũrũ ãgũ wajatari dihtare gahmemi. Eropigũ ãgũ ovejare õaro ãhadibudiabeami, arĩmi Jesu.

14 Eropa arĩtuha õpa arĩnemomi queoriñe mera:

—Ovejare õaro ãhadibugũ iro dopa ãhraa yũhũ. Eropigũ yaharãre masia yũhũ. Eropirã yaharã sã yũre masima.

15 Eropa ta yũ Pagũ sã yũre masimi. Eropigũ yũ sã yũ Pagũre masia. Yaharã Goãmũ mera erã árĩniguiburire sĩrigũca.

16 Gajirã oveja gaji sãriro majarã iro dopa árĩrã gajirã masa sã yaharã árĩrãcoma. Erã sãre aĩgũca. Eropirã yũ wereniguirire pee wahgãrãcoma erã sã. Eropirã yaharã árĩpehrerã yuju curu ta árĩrãcoma. Eropigũ yũ dihta yaharãre ãhadibugũca, arĩmi Jesu.

17 Eropa arĩtuha õpa arĩnemomi daja:

—Yaharã Goãmũ mera erã árĩniguiburire sĩrigũca yũhũ. Yũ sĩrira pũhrũ masa mũriagũca. Yũ eropa iibu árĩcũ yũ Pagũ yũre mahimi.

18 Yũ wejẽdorebiricũ yũre wejẽmasibiriboñuma erã. Yũ gamero mera yũre wejẽrãcoma. Eropigũ yaharã Goãmũ mera erã ya árĩburire sĩrigũca. Sĩrimasia yũhũ. Eropigũ masa mũriamasia. Yũ Pagũ yũre irire ta iĩdoremi, arĩmi Jesu.

19 ãgũ eroparĩcũ peerã judio masa pe curu dũca warima daja. Gajirã gajiropepepi, gajirã sã gajiropepepinirã arĩma.

20 —ãgũ watĩre opami. Eropigũ goroweregũ ãhrimi. ¿Duhpirã ãgũre dipaturi peeri mũa? arĩma gajirã bajarã judio masa.

21 Gajirãpũ õpa arĩma:

—Watĩ mera goroweregũ árĩgũ eropa õaro arĩ wereniguiririboñumi. Cuirĩ ãhajabigũre ãacũ iimasibiriboñumi

watĩre opagu. Eropa árĩgu árĩgu ĩgu watĩre opabeami, arĩma gajirã judio masa.

Judio masa Jesure gamebiriñuma

²² Gajinu Jerusaléngue bosenu iirã iima dipaturi judio masa. Goãmu wihire erã Goãmu ya árĩburire erã apiri bosenu árĩbu. Irisubu yura wahgũro árĩbu.

²³ Irinu Salomo waĩcũri taribugue Goãmu wihigue árĩri taribure Jesu gua mera ĩhacurigu iimi.

²⁴ Iri taribugue ĩgu árĩcũ ĩarã judio masa ĩgu pohrogue gamenere ĩgure serẽpima daja:

—Yoatariari boje guare õaro werebeaa mũhu. Diaye guare õaro were purumujuque. ¿Cristo Goãmu ĩgu obeodigu ta áhriri mũhu? arĩma erã ĩgure.

²⁵ Erã eroparĩcũ peegu õpa arĩ yũhrimi Jesu:

—Mũare weretuhabu yũhu. Yu eropa werequerecũ ta yure peebeaa mua. Yu Pagu ĩgu dorero dopa ta ĩgu turari mera ii ĩhmurabu mũare. Eropa iigu yu Cristo árĩrire ta mũare ĩhmuğa iirabu.

²⁶ Yu eropa ii ĩhmuquerecũ ta yure peebeaa mua. Mũapu yaharã árĩbeaa. Eropirã gajigu yarã oveja iro dopa árĩrã yũpũre peebeaa mua.

²⁷ Oveja erãre ĩhadibugũre erã peediro dopa ta yaharã yure peema. Eropigu erãre masia yũhu. Eropirã erã yu mera wahama.

²⁸ Eropigu mũuri nũcu Goãmu mera árĩcũ iiaa erãre. Eropirã erãpu peamegue wasome. Eropigu yaharãre yu ĩhadibucũ gajirãpu ne yure emamasibeama erãre.

²⁹ Yu Pagu yaharãre yure odigu yu tauro turami. Eropirã yu Pagu sã yaharãre ĩgu ĩhadibucũ gajirã ĩgu sãre ne emamasibeama.

³⁰ Yũhu, yu Pagu mera yujugu ta áhrraa, arĩmi Jesu judio masare.

³¹ ĩgu eroparĩcũ peerã judio masapu ĩgure deaburi utãre dipaturi aĩma daja.

³² Erã eropa iicũ ĩagu Jesu erãre serẽpimi:

—Yu Pagu ĩgu turari mera baja deyoro moarire ii ĩhmurabu mũare. ¿Ñehenore iira dipuwaja utã mera deadiari mua yure? arĩ serẽpimi.

³³ ĩgu eroparĩcũ peerã õpa arĩma erã:

—Goãmu turari mera mu ii ĩhmuri dipuwaja mũre utã mera dea wejẽdiabeaa gua. Goãmũre mu ñero wereniguri dipuwaja mũre utã mera dea wejẽdiaa gua. Masu árĩqueregu ta mũhu “Goãmu áhrraa yũhu,” mu arĩri dipuwaja mũre utã mera dea wejẽdiaa gua, arĩ yũhrima erã.

34 Erã eropa arĩ yũhricũ peegu Jesu erãre weremi:

—Mũa sãre “Goãmarã,” arĩ piyumi Goãmũ. Eropa ta arĩ gojañuma ãgu dorerire erã gojarapũgue.

35 Goãmũ yare erã gojarapũ queoro árĩcũ mari masia. “Gũyari ãhraa,” iripũre arĩmasibea mari. Eropigu ãgu yare pepirãre diaye ta ãgu “Goãmarã,” arĩ piyumi.

36 Goãmũ yũre beyenijagu i yebaguere obeomi. Eropigu “Yũhu Goãmũ magu ãhraa,” yũ arĩra dipuwaja “Goãmũre ñero wereniguigu iimi Jesu,” arãa mũa yũre. ¿Duhpirã yũre eropa arĩri mũa?

37 Yũ Pagu ãgu gamero dopa ta ãgu turari mera yũ ii ãhmubiricũ tamerare yũ buherire “Diaye ta ãhraa,” arĩbiriboya mũa.

38 Yũ Pagu ãgu turari mera yũ ii ãhmuquerecũ ta yũpũre umupeodiabiriboca mũa. Eropa umupeodiabiriquererã ta ãgu turari mera yũ ii ãhmucũ ãarã yũ iirare “Diaye ta ãhraa,” arĩque mũa. Mũa eropa arĩrã, yũ Pagu mera gũa yujuro mera árĩcũ masirãca mũa. Eropirã yũhu, yũ Pagu mera yujuro mera yũ árĩcũ masirãca mũa. Eropirã peerãca mũa, arĩmi Jesu erãre.

39 ãgu eroparĩcũ erã ãgũre dipaturi ñeadiarima. Erã eropa ñeadiacũ ãgu duhri wiria wami.

40 Eropa wiriadigũgue ta Ñũ masare ãgu waĩyemũhtadirogue Jordán waĩcũriya sipũ majasegue gũa dipaturi wabũ daja. Erogue dujacãbũ.

41 Eropirã masa bajarã ãgũre ãarã erama. Őpa arĩma erã erã basi:

—Ñũ waĩyegũpũ Goãmũ turari mera deyoro moarire ii ãhmubirimi. Eropa ii ãhmubiriquererã ta arĩpehreri Jesure ãgu wererapũ diaye ta ãhraa, arĩma masa erã basi.

42 Eropirã masa erogue bajarã umupeoma Jesure.

11

Lázaro waĩcũgu sĩa wañumi

1 Eropi Judea yebague Betania waĩcũri maca majagu Lázaro waĩcũgu arĩmi. Iri maca ãgu pagu porã nome María, Marta mera arĩma.

2 Mariapũ Jesure poresuri mera sũbo, igo poari mera ãgũre tucoebodigo arĩmo. Igo tĩgu Lázaropũ dorecũgu iipũ.

3 Eropirã erã nome gajirãre Jesure weredorerã obeoñorã.

—Opũ, mũ mahigu dorecũgu iimi, arĩ weredorerã obeoñorã Lázaro pagu porã nome.

4 Erã gũa pohrogue eraa, iri querere wererã peegu õpa arĩmi Jesu guare.

—Dohpaguere Lázaro ïgu dorecari sîriburi árîbeaa. Goãmũ turarire masare ïhmuburire dohpaguere ïgu dorecumî. Eropirã yũ turari opagu árîcũ sãre masa ïarãcoma, arĩmi Jesu.

⁵ Jesu Martare, igo pagu mago, Lázaro sãre turaro mahĩmi.

⁶ Eropigu Lázaro ïgu dorecurire peequeregu ta ero Jesupu penũ dujanimi.

⁷ Penũ pũhrũ Jesu õpa arĩmi guare ïgu buherãre.

—Dipaturi Judea yebague dujaa warã daja, arĩmi guare.

⁸ —Buhegu, cãrugã ta mũre judio masa utã mera dea wejẽdiama. ¿Duhpigũ dipaturi dujadiari mũhu? arĩbu guã ïgũre.

⁹ Guã eroparĩcũ peegu ïgu erã wejẽmasibirirare weregu, werenigui queori mera guare õpa arĩmi:

—Wũaro guñaricũbiricãque. Yujunũre doce horari gohra ãhraa. Abe umũ majagu árîcũ õaro ïhaa mari. Eropirã umũre curirã ne cohresome mari.

¹⁰ Naitĩaro curirã cohrema. Abe umũ majagu maricũ õaro ïabeama erã, arĩmi Jesu.

¹¹ Eropa arĩgu guare werenemomi.

—Mari mera majagu Lázaro carĩgu iicumî. ïgu eropa carĩquerecũ ta yũhu ïgũre wahgũgu wagura, arĩmi guare.

¹² —Opũ, Lázaro carĩgu árĩgu tarigucumi, arĩbu guã.

¹³ Guã eropa arĩquerecũ ta Jesupu “Carĩgu iicumî,” arĩgu, “Sĩria wami,” arĩgu iidigu árĩmi. ïgu “Lázaro carĩgu iicumî,” arĩcũ peerã “Lázaro soogu iicumî,” arĩ pepiribu guapũ.

¹⁴ Guã eropa arĩ pepicũ masigu Jesu guare diaye weremi.

—Lázaro sĩria wañumi.

¹⁵ Yũ mariro ïgu sĩricũ õapũricãa. Eropirã mũa yũre umupeonemorãca. Ina ta. Mari ïarã warã ïgu pohrogue, arĩmi Jesu.

¹⁶ Toma sũhrũadigu erã arĩgupu õpa arĩmi guare:

—Mari sã Jesu mera warã. ïgũre wejẽrã mari sãre wejẽporo, arĩmi Toma.

Jesu “Eropa árĩniguicãcũ iigu masare masugu ãhraa,” arĩñumi

¹⁷ Eropi guã erogue ejara pũhrũ ero majarã õpa arĩ werema Jesure:

—Wapicũrinũ taria Lázaro mũrũre masa gobegue erã apira pũhrũ, arĩ werema ïgũre.

¹⁸ Betaniapũ Jerusalén pohrogã uhre kilómetros yoaro dujabũ.

19 Eropirã judio masa bajarã Martare, María sãre ñehamere orerã eranirã árĩma Lázaro ĩgu sĩrira pũhũ.

20 Eropigu Jesu mera gua ejaboro pohro árĩcũ peego Martapũ guare bocatĩrigo eramo. Igo bocatĩrigo wacũ Mariapũ igo ya wihi dujadigo árĩmo.

21 Eropa bocatĩrigo Marta õpa arĩmo Jesure:

—Opũ, yũ tĩgu ĩgu sĩriboro core mũhũ ohõ árĩcũ ĩgu sĩribiriboañumi.

22 Dohpague sãre Goãmũre mũ serẽcũ ĩgu mũ serẽro dopa ta iigũcumi, arĩmo Marta Jesure.

23 —Mũ tĩgu masagũcumi, arĩmi Jesu igore.

24 —I yeba pehrerinũ ĩgu masa mũriaborore masia yũhũ, arĩmo igo.

25 Igo eroparĩcũ Jesu weremi daja:

—Yũhũ sĩrinirãre masacũ iigu añraa. Masare yũ mera eropa árĩniguicũ iigu añraa. Yũre umupeogu sĩriqueregu ta eropa árĩniguicãgũcumi.

26 Eropirã árĩpehrerã Goãmũ mera árĩniguirã yũre umupeorã peamegue wasome. ¿Ire masiri mũhũ? arĩmi Jesu igore.

27 —Opũ, masia yũhũ. “Cristo Goãmũ magũ i yebague arigũcumi,” erã arĩdigũ mũ árĩcũ masia yũhũ, arĩmo Marta Jesure.

Lázaro ĩgu masa gobe pohro Jesu oreñumi

28 Marta eropa arĩtuha igo pagũ magore Mariare sihugo wamo.

—Marire buhegu mari ya macare eranijagu iiami. Mũre sihuami, arĩ yayarogã arĩ werepo Mariare.

29 Igo eroparĩcũ peego María pobero mera wahgãnũgaja, gua pohrogu árĩmo Jesure ĩago arigo.

30 Erã ya macague ejanibicarabũ dohpa. Marta guare igo bocatĩridirogue árĩnibũ gua.

31 Judio masa iri wihi Mariare ñehamere orerã iinirã árĩma. Eropirã igo pobero mera wahgã wacũ ĩarã erã igore nũrũsiagãnirã árĩma. “Igo tĩgu mũrũre erã apira gobegue orego wago iicumo igo,” arĩ pepinirã árĩrima erã. Eropa arĩ pepirã igore nũrũsiagãnirã árĩma.

32 Eropigo María gua pohrogu erago, Jesure ĩha, ĩgu guburi pohro merejamo.

—Opũ, yũ tĩgu ĩgu sĩriboro core mũhũ ohõ árĩcũ ĩgu sĩribiriboañumi, arĩmo igo ĩgure.

33 Eropigu igo judio masa igo mera arinirã sã erã oreẽcũ ĩagu Jesupũ turaro bujawere ñero sĩporãcumi.

34 —¿Lázaro mũrũre nohogue opari mũa? arĩ serẽpimi Jesu.

—Opɸ, ĩagɸ arique, arĩ sihugãma erã.

35 Erã eroparĩcũ peegɸ Jesu oremi.

36 ĩgɸ orecũ ĩha judio masa õpa arĩma erã basi:

—Lázaro mɸrɸre Jesu bɸrigã mahirañumi, arĩma.

37 Gajirãpɸ õpa arĩma:

—Cuirĩ ĩhajabigɸre ĩacũ iigɸ ãhrimi ihĩ Jesu. ¿Eropigɸ Lázaro ĩgɸ sĩriboro core masumasibiriboayuri? arĩma gajirã.

Lázarore masuñumi Jesu

38 Eropigɸ Jesu dipaturi turaro bɸjaweremi. Eropirã árĩpehrerã Lázaro mɸrɸ masa gobegue ejabɸ. Utãyegue árĩri gobegue ĩgɸ dɸpɸ mɸraro erã sĩ acura gobegue árĩbɸ. Eropi iri gobegue wɸariye utãye mera erã bihara gobegue árĩbɸ.

39 —Utãyere aĩ weaque, arĩmi Jesu.

ĩgɸ eroparĩcũ peego Marta sĩridigɸ mɸrɸ pagɸ mago õpa arĩmo:

—Opɸ, dohpague wapicɸrinɸ wahaa ĩgɸ sĩrira pɸhrɸ. Eropiro ĩgɸ dɸpɸ mɸraro ɸrĩ árĩca, arĩmo Jesure.

40 —“Yɸre umupeogo Goãmɸ turarire ĩagoca,” mɸre arĩrabɸ, arĩmi Jesu Martare.

41 ĩgɸ eropa arĩra pɸhrɸ erã utãyere aĩ weama. Erã eropa aĩ weara pɸhrɸ Jesu ɸmarogue ĩha Goãmɸre õpa arĩmi:

—Ahɸ, yɸre mɸ peetuhabɸ. Irire mɸ iicũ masigɸ mucubiria mɸre.

42 Yɸre mɸhɸ ɸmɸri nɸcɸ peeniguia. Irire masia. Eropa masiqueregɸ ta yɸhɸ mɸ obeodigɸ árĩcũ õre niguirã erã masiburire mɸre eropa arĩgɸ iiaa.

43 Eropa arĩtuha Jesu turaro gaguiniguimi:

—Lázaro, arique, arĩ gaguiniguimi ĩgɸ.

44 ĩgɸ eroparĩcũ sĩridigɸ mɸrɸpɸ ĩgɸ mojotorire ĩgɸ guburi sãre suhri gasiri mera erã diridigɸ, ĩgɸ dipurure suhri gasiri mera erã omadigɸ masa gobegue wiririmi.

—ĩgɸre dirirare pãque ĩgɸre, arĩmi Jesu

Judio masa oparãpɸ Jesure ñeadiariñuma

Mt 26.1-5; Mr 14.1-2; Lc 22.1-2

45 ĩgɸ eropa masucũ ĩarã bajarã judio masa mera majarã Marĩa mera árĩnirã Jesure umupeoma.

46 Gajirãpɸ erã mera majarã fariseo masa pohrogue eja, Jesu ĩgɸ iirare wereñorã erãre.

47-48 Eropirã pahia oparã, fariseo masa oparã sã gamenere, erã basi õpa arĩ wereniguñorã.

—Jesu bajasuburi deyoro moarire ii ĩhmumi. ĩgɸ eropa iicũ, “Irire iibita,” mari arĩbircũ árĩpehrerã masa ĩgɸre

umupeo, ĩḡu mera wabocoma. Eropirã Roma majarã oparã Goãmũ wihire cóãdorerã obeerãcoma erã yarã surarare. Mari ya yeba sãre emarãcoma erã. Mari ya yeba majarã Jesure erã opu erã apicũ ĩarã Roma majarã oparã guarã ñero iirãcoma marire. ¿Eropa iirã dohpa iirãcuri dohpa-guere? arĩ wereniguiñorã erã erã basi.

⁴⁹ Erã eropa arĩquerecũ ta gajigũ Caifa waĩcũḡu iri bojorire pahia opu árĩḡu erãre werepũ.

—Mũapũ ne masibea.

⁵⁰ Judio masa árĩpehrerã mari ya árĩburire yujugũ masu ĩḡu sĩricũ õhaa. ĩḡu sĩribiricũ mari árĩpehrerã judio masa pehrea waboca. Irire mũa masibea, arĩmi Caifa erãre.

⁵¹ Eropa arĩḡu ĩḡu gamero eropa arĩbiriñumi. Pahia tauro opu ĩḡu árĩcũ judio masa ya árĩburire Jesu ĩḡu sĩriborore Goãmũpũ Caifare eropa arĩ weredoreñumi.

⁵² Jesu ĩḡu sĩrigũ judio masa ya dihta sĩribiriñumi. Sĩrigũ árĩpehrerã Goãmũ porã i yeba árĩpehrero árĩrã sãre erã ya árĩburi sãre sĩriñumi Jesu. Erã yuju curu árĩboro dopa sĩriñumi.

⁵³ Caifa eroparĩcũ peerã erã “¿Jesure dohpa ii wejẽrãcuri mari?” arĩ wereniguirã ĩḡure wejẽmorã iĩñorã.

⁵⁴ ĩḡure erã wejẽdiacũ masigũ Jesu bajarã judio masa watope dipaturi curigũ wabirimi. Eropigũ masa marirogã Efraín waĩcũri macague ḡuare sihu wami. ḡuare iri maca sihu dujanimi Jesu.

⁵⁵ Irisubure Pascua bosenu ḡu judio masa bosenu árĩboro merogã dũhyabũ. Eropirã bosenu core masa bajarã gaji macari majarã masa Jerusalengue gamenerema. Pascua majare erã baboro core Goãmũ ya árĩburire erã basi coemorã ejanirã árĩma.

⁵⁶ Eropirã erã Jesure amarã iĩñorã. Erã eropa amacũ ĩarã Goãmũ wihigue árĩrã õpa arĩ wereniguiñorã:

—¿Bosenũre ĩagũ aribiribocuri Jesu mũa pepicũ? arĩ wereniguiñorã erã basi.

⁵⁷ Eropirã pahia oparã, fariseo masa sã õpa arĩ were-doreñorã masare:

—Jesu ĩḡu árĩrore mũa masirã wereque ḡuare. ĩḡure ñeamorã iiaa ḡu, arĩñorã oparã masare.

12

María Jesu guburire poresuri mera pipeoñumo

Mt 26.6-13; Mr 14.3-9

¹ Pascua bosenu seis nũri gohra dũhyacũ Jesu ḡu ĩḡu buherã mera Betaniague ejabũ. Lázaro Jesu ĩḡu masudigũ iri maca majagũ árĩmi.

² Gúa ejara pühru Jesu sã gúa ya bari árĩburire iima gajirã. Eropirã Lázaro, Jesu, gúa mera mesare dojabu. Gúa eropa dojara pühru Marta barire peomo guare.

³ Eropigo María poresuripure nardo waĩcari goripure yuju kilo deco aĩgãri, Jesu guburire pipeomo. Pipeotuha igo poari mera tucoemo. Igo eropa pipeora pühru iri wihi òaro poresu sehya wabu.

⁴ Igo eropa iicũ ìha gúa mera majagu, Jesure ìhaturirãre wiabu Juda Iscariotepu òpa arĩmi:

⁵ —¿Duhpigo iri poresuri eropa iisiriri igoa? Irire igo duaboañumo. Irire duago yuju bojori mohmeri wajapure wajataboañumo. Eropigo mojomorocũrãre oboañumo igo, arĩmi ìgu.

⁶ Judapu mojomorocũrãre itamudiabiriñumi. Ìgu gúa ya niyeru dibugu árĩqueregu ta yajaricugu arĩmi. Eropigu ìgu gúa ya niyeru sãre yujuyerisuburi aĩmarimi. Eropigu iri niyerure aĩdiagu arĩgu, eropa arĩñumi ìgu Mariare.

⁷ Ìgu eroparĩcũ peegu òpa arĩmi Jesu:

—Eropa arĩbita igore. Igo poresurire yure igo duarare yure pipeoamo yure erã yaaboro core yu dũpũre amuyugo. Mojomorocũrãpu mua mera eropa árĩniguicãrãcoma. Eropirã mua gamero erãre omasia mua.

⁸ Yũpu i yebaguere eropa árĩniguicãsome, arĩmi Jesu.

Pahia oparã Lázarore wejẽdiañuma

⁹ Eropirã Jesu ìgu Betaniague arĩcũ peerã judio masa bajarã ìgure ìarã arima. Ìgu dihtare ìarã aribirima. Lázaro sĩridigu Jesu ìgu masudigure ìgu sãre ìarã arirã iima.

¹⁰ Erã ìarã ejarare pahia oparã masirã Lázarore wejẽdiañorã.

¹¹ Lázaro sĩridigu Jesu ìgu masudigu arĩcũ ìarã bajarã masa Jesure umupeoma. Ìgu eropa masucũ ìarã bajarã judio masa erã pahia erã buheripure cóãma. Erã eropa cóãcũ ìarã pahia oparãpu guataria wa, Lázaro sãre wejẽdiañorã.

Jerusaléngue ejañumi Jesu

Mt 21.1-11; Mr 11.1-11; Lc 19.28-40

¹² Pascua bosenu erã iicũ bajarã masa Jerusaléngue ìarã wanirã arĩma. Gajinu Jerusaléngue Jesu ìgu waburire masa peenirã arĩma.

¹³ Eropirã bejepũre aĩgã, ìgure bocatĩrirã wama. Eropa bocatĩrirã òpa arĩ gaguiniguima erã.

—Ìre umupeorã. Ihĩ Goãmũ ìgu obeodigu òaro ariporo. Ihĩ judio masa mari opu ta àhrimi, arĩ gaguiniguima erã.

14 Jesu burrogã ĩġu bocadigũ weca peyami. ĩġu eropiigũ Goãmũ yare erã gojarapũ werediro dopa ta iimi. Őpa arĩ gojañumi Goãmũ yare wereyumũhtadigũgue.

15 Jerusalén waĩcũro majarã güibiricãque mũa. ĩaue. Mũa opu burrogã weca peyagãrimi, arĩ weremũhtañumi Goãmũ yare erã gojarapũgue.

16 Irire gũa ĩġu buherã õaro masinibiribũ. Eropa masibiriquererã ta umarogue Jesu ĩġu mũriara pũhrũ gũa erã gojara mũrare guña boca pee masibũ. Őpa arĩ pepibũ: "Goãmũ yare erã gojarapũgue Jesure weremũhtañuma. Eropiro Goãmũ yare erã gojarapũ arĩdiro dopa ta sihajabũ Jesure," arĩ pepibũ gũa basi.

17 Lázarore erã apira gobegue árĩġure Jesu ĩġu piyucũ ĩġure ĩġu masucũ ĩanirãpu weresiriniguinirã árĩma masare.

18 Eropirã Lázarore Jesu ĩġu masurare erã peenirã árĩrã masa bajarã Jesure bocatĩrirã wama.

19 Erã Jesure eropa umupeocũ ĩarã fariseo masa erã basi õpa arĩñorã.

—Árĩpehrerã Jesu yarã dihta warã iima dohpaguere. Eropirã mari dohpa iimasibea erãre, arĩñorã fariseo masa erã basi.

Bajamerãgã Griego masa Jesure amagãriñuma

20 Eropi bosenu Goãmũ wihigue Goãmũre umupeorã eranirã mera majarã bajamerãgã griego masa arĩñorã.

21 Eropirã erã Felipe pohrogue erañorã. Felipepu Betsaida waĩcũri maca Galilea yeba árĩri maca majagũ árĩmi. Eropirã ĩġu pohrogue erarã õpa arĩñorã ĩġure:

—Jesure ĩadiaca gũa, arĩñorã erã.

22 Erã eroparĩcũ peegũ Felipe Andreguere weregũ warũ. Eropirã erã perã Jesure werema.

23 Erã werera pũhrũ Jesu ġuare weremi:

—Yũhũ masũ Goãmũ ĩġu obeodigũ ãhraa. Yũre árĩpehrerã umupeoburisubu árĩro iiaa dohpaguere. Dohpaguere yũ sĩriburisubu árĩro ta iiaa.

24 Diaye mũare arĩġũ iiaa. Oteriyere yebague yaabiricũ, iriyere otebiricũ yujuye ta dujaroca. Eropiro iriyere mari otera pũhrũ bajayeri dũcasiua. Eropa ta yũ sĩrira pũhrũ yũre erã yaara pũhrũ bajarã masare Goãmũ mera eropa árĩniguimorãre iigũca yũhũ.

25 I yeba mũa árĩrĩre wũaro pepiboca mũa. Eropa pepirã Goãmũre guñabirã peamegue warãca mũa. I yeba mũa árĩrĩre eropa pepicãrã, Goãmũ mera eropa árĩniguirãca.

26 Yahare iidiarā, yu buherire ðaro peeque mua. Mua eropa iirā mua sã yu árīboroguere árīrāca. Yahare iigure yu Paguru umupeogucumi, arīmi Jesu guare.

Jesu ĩgu sīriburiñere wereñumi

27 Ōpa arīnemomi guare.

—Dohpaguere yuhu ñero sīporācua. ¿Yu Pagure dohpa arīgucuri yuhu? “¿Ahu, yu ñero tariborore tauque,” ¿arībocuri yuhu? Irire arībeaa yuhu. Ñero taribu ta i yebaguere aribu. Eropiro yu ñero tariburisubuh dohpaguere āhraa, arī weremi Jesu guare ĩgu buherāre.

28 Eropigu ōpa arīmi ĩgu Pagure:

—Ahu, mu turagu árīrire dohpaguere ĩhmuque masare, arīmi Jesu ĩgu Pagure.

Īgu eroparīcũ umarogue wereniguiro caribu.

—Turagu yu árīrire masare ĩhmutuhabu. Dohpaguere eropiigu dipaturi ĩhmuguca masare, arīro caribu.

29 Eroparīcũ peerā ero niguirā masa bajarā ōpa arīma:

—Bupu árīcumu eropa busugu, arīma masa.

—Anyu Jesure weregu iiami, arīma gajirā masa.

30 Ōpa arīmi Jesupu:

—Umarogue yure peedorero eropa busubiro carabu. Mupure peedorero eropa carabu.

31 Dohpaguere i yeba majarā erā ñeri iira dipuwaja dipuwajacurācoma. I yeba majarā erā opure watire Goāmu cóāgucumi.

32 Eropigu crusague yure erā aĩ wahgũ nugucũ bajarā masare yaharā árīmorāre iiguca yuhu, arīmi Jesu.

33 Eropa arīgu crusague ĩgu sīriborore weregu iimi Jesu masare.

34 Īgu eroparīcũ peerā masapu ĩgure ōpa arīma:

—Goāmu yare erā gojarapũ ōpa arāa: “Cristo árīpehrerinuri árīgucumi,” arī gojañuma. ¿Īgu eropa arī gojacũ mure masure Goāmu ĩgu obeodigure dohpa arīronore mure wejē crusague aĩ wahgūrācuri masa? ¿Goāmu ĩgu obeodigu noa āhriri ĩgu? ¿Cristo árībeari mahu? arī serēpima erā Jesure.

35 Erā eroparīcũ ōpa arī yuhrimi Jesu:

—Boyoriñe iro dopa árīgu masare Goāmu yare ðaro masicũ iiaa yuhu. Puhruñarigā mua mera árīsome yuhu. Mware yu buhecũ dohpaguere peeque ñerire mua iibiriburire, Goāmu mera mua eropa árīniguiburire. Yu buherire peebirā naitiāro curirā iro dopa erā waborore masibeama.

36 Eropigu boyoriñe iro dopa ta árīgu yuhu ta āhraa. Eropigu mware buhegu Goāmu yare ðaro masicũ iiaa

mũare. Dohpaguere yu waboro core yure umupeoque. Eropa umupeorã yaharã árĩrãca mũa, arĩmi Jesu.

Eropa arĩ weretuha waha wami erãre duhri wahgãgu.

Judio masa Jesure umupeobiriñuma

³⁷ Bajasuburi Goãmũ turari mera erãre Jesu ïgu deyoro moarire ii ïhmuquerecũ ta judio masa bajarã ïgure ne peediabirima.

³⁸ Goãmũ yare erã gojarapũ Isaia mũru ïgu gojadiro dopa ta eropa iirã iima erã. Őpa arĩ gojañumi Isaia:

Goãmũ, mũ buherire gũa werecũ masa peediabeama. Mũ turarire erãre mũhũ ii ïhmuquerecũ ta irire “Diaye árĩbeaa,” arĩma erã, arĩ gojañumi Isaia Goãmũ yare gojarapũgue.

³⁹ Erã eropa peediabiricũ ïagu Goãmũ erãre masibiricũ iĩñumi. Iri sãre Isaia ōpa arĩ gojañumi daja:

⁴⁰ Cuiiri ïhajabirã iro dopa árĩcũ iidi árĩmi Goãmũ erãre. Eropigu ïgu yare masibiricũ iidi árĩmi erãre. Eropirã ïgu turarire erã ïaquererã ta erã ïarare masibirinirã árĩma erã. Eropirã ïgu buherire peequererã ta irire masibirinirã árĩma erã. Goãmũ yare masirã erã ñerire cóãdoreboñuma. Eropigu erãre tauboñumi ïgu, arĩ gojañumi Isaia Goãmũ yare erã gojarapũgue.

⁴¹ Isaia Cristo turarire masiyudigu eropa arĩ gojamũhtañumi.

⁴² Gajirã Jesure erã umupeobiriquerecũ ta judio masa sã oparã mera majarã sã bajarã Jesure umupeonirã árĩma. Eropa erã umupeoquererã ta erã fariseo masare güirã gajirã masare Jesure erã umupeorire werebirinirã árĩma. Irire erã werecũ peerã gũa judio masa buheri wihigue erãre ñajadorebiriboñuma fariseo masapũ.

⁴³ Goãmũre mucubiricũ iidiaquererã ta erã tauro masapũre mucubiricũ iidianirã árĩma erã. Eropirã erã Jesure ne umupeorã “Jesu yarã ãhraa,” arĩ gajirãre werediabirinirã árĩma.

Jesu wererire erã peediabiriri dipuwaja masa dipuwajacũrãcoma, arĩ wereñumi Jesu

⁴⁴ Masa bajarã gũa pohro gamenerenirãre Jesu turaro busũro mera weremi:

—Yure umupeogu yu dihtare umupeobeami. Yure obeodigu sãre umupeomi ïgu.

⁴⁵ Eropirã yure masirã yure obeodigu sãre masima.

⁴⁶ Yũhũ boyoriñe iro dopa ta árĩgu yũhũ Goãmũ yare buhegu ahraa i yebaguere. Eropigu Goãmũ yare mũare

masicũ iiaa. Yũre umupeogu naitĩaro wagu iro dopa ñerire iiniguisome. Yũre umupeogu diaye pepigucumi.

⁴⁷ Gajirã yũ wererire peequererã ta irire yũhribeara. Erã eropa yũhribiriquerecũ ta, erã yũhribirira dipuwaja moasome yũpũ dohpa. I yebaguere dipuwaja moagu arigu aribiribũ yũhũ. I yeba majarãre peamegue wabonirãre taugu arigu aribũ yũhũ.

⁴⁸ Yũre gamebigure yũ wereri sãre gamebigure dipuwaja moari árĩroca. Īgu yũre peebirira dipuwaja i umũ pehrecũ dipuwajacugucumi.

⁴⁹ Yũhũ yũ gamero werebeaa. Yũ Pagũ yũre obeodigupũ yũre weredoremi. Eropiro yũ wereripũ ĩgu ya wereniguirĩ ãhraa.

⁵⁰ Īgu ya wereniguirire peerã Goãmũ mera eropa árĩniguirãca mũa. Eropigũ yũ Pagũ ĩgu weredoremi dopa ta werea mũare, arĩmi Jesu guare.

13

Jesu ĩgu buherãre guburire coeñumi

¹⁻³ Eropi Pascua bosenu coregã árĩbũ. Iri ñamire Jesu guã ĩgu buherã mera iri bosenure babu arĩmi. Eropigũ i yebare ĩgu wiriaborore ĩgu Pagũ pohro waburire merogã duhyacũ masidigũ arĩmi Jesu.

Gua barisubu Judare watĩ doretuhadigũ arĩmi ĩgu pepirigue. Eropigũ ĩgure Simo Iscariote magure Jesure ĩhaturirãre iri ñamire ĩgu wiaburire doretuhadigũ arĩmi. Jesu ĩgu yarãre i yeba árĩrãre burigã mahidigũ arĩmi. Eropigũ ĩgu mahirare ĩhmubu gua guburire coemi. Īgu Goãmũ pohrogu ĩgu arirare, pũhrũ ĩgu umarogue ĩgu mariaburi sãre masidigũ arĩmi. Īgu Pagũ Goãmũ ĩgure árĩpehrerã weca opũ ĩgu apira sãre masidigũ arĩmi.

⁴ Eropa masiqueregũ wahgãnugaja, ĩgu suhriro weca majañere tuwea suhriro gasiro mera ĩgu paru yũjũre dirimi.

⁵ Dirituha soropa mera decore pisã, guare ĩgu buherãre gua guburire coenugami. Guare coetuha ĩgu dirira gasiro mera tucoemi gua guburire.

⁶ Gajirã buherãre coegã, Simo Pedroguere ejami. Īgu guburire ĩgu coeboro core, Pedropũ ĩgure õpa arĩmi:

—Opũ, ¿yũ guburire coebu iiri mũhũ? arĩmi Jesure Pedro.

⁷ —Dohparagã yũhũ mũre iiburire masibeaa mũhũ. Eropa masibiriqueregũ ta pũhrũ masigũca, arĩmi Jesu ĩgure.

⁸ —Yũ guburire ne coesome mũhũ, arĩmi Pedro.

—Mũre yũ coebiricũ yahagu árĩsome mũhũ, arĩmi Jesu.

⁹ —Opu, yu guburi dihtare coebiricãque. Yu guburire, yu mojotorire, yu dipuru sãre coeque, arĩmi Pedro.

¹⁰ Īgu eroparĩcũ Jesu õpa arĩmi:

—Yujugu masu guhagu ĩgu dũpũre õaro tucoepohomi. Eropiro ĩgũre dipaturi tucoema masiya mara. Īgu guburi dihtare coero gahmea. Árĩpehrerã mua ñeri iirare coenirã mua árĩquerecũ ta yujugu mua mera majagu ĩgu ñerire coeya marigu ãhrimi, arĩmi Jesu.

¹¹ Jesu ĩgũre ĩhaturirãre wiabure masituhãnumi. Eropa masigu “Yujugu mua mera majagu ĩgu ñerire coeya marigu ãhrimi,” arĩnumi ĩgu.

¹² Gũa guburire coetuha, suhrirore sañatuha, doajami daja ĩgu doadiro ta. Tuhaja õpa arĩmi gũare:

—¿Dohparagã yũhu mũare iirare masiri mua?

¹³ Mũa yũre “Buhegu,” arĩ piyurã, “Opu,” arĩ piyurã diaye ta arĩrã iiaa yũre. Mũare buhegu, mua opu diaye ta ãhraa yũhu.

¹⁴ Eropirã yũhu mũare buhegu, mua opu árĩqueregu ta mua guburire yu coecũ mua sã mua mera majarãre guburire coeque.

¹⁵ Dohparagã mua iiburire mũare ĩhmuabu. Mũa mera majarãre mua itamuburire mũare ĩhmuabu. Mũare yu iidiro dopa ta mua sã iique.

¹⁶ Diaye mũare arĩgu ta iiaa. Mũa yu pohro majarã dopa arĩrã yu tauro árĩbeaa. Mũare buhedore yu obeorã ãhraa mua. Eropirã yu tauro árĩbeaa mua. Eropa iigu ta “Yu iidiro dopa ta iique,” arãbu yũhu mũare.

¹⁷ Ire mua masirã, yu dorerire iirã, mucubirirã árĩrãca mua.

¹⁸ “Mũare árĩpehrerãre eropa arĩbeaa. Yu beyenirãre masia yũhu. Goãmu yare erã gojarapũ arĩdiro dopa ta eropa waroca. “Yu mera bagu ta yũre wejẽdiami,” arĩ gojañuma Goãmu yare erã gojarapũgue.

¹⁹ Īgu yũre eropa wiaboro core ire wereyugu iiaa mũare. Yũre ĩgu eropa iira pũhrũ “Jesu ta Cristo Goãmu ĩgu obeodigu ãhrimi,” mua arĩburire ire mũare wereyugu iiaa yũhu.

²⁰ Diaye ta mũare arĩgu iiaa. Yu obeonirãre gamegu yu sãre gahmemi ĩgu. Eropigu yũre gamegu yũre obeodigu sãre gahmemi ĩgu, arĩmi Jesu gũare ĩgu buherãre.

*Juda Jesure ĩhaturirãre ĩgu wiaborore wereñumi Jesu
Mt 26.20-25; Mr 14.17-21; Lc 22.21-23*

²¹ Eropa arĩ weretuha Jesu turaro bujaweremi. Eropa bujaweregu õpa arĩ weremi ĩgu gũare.

—Diaye mware arĩgu iiaa. Yujugu mwa mera majagu yure ñhaturirãre wiagucumi, arĩmi Jesu.

22 Īgu eroparĩcũ peerã Jesure wiabure masibirã, gwa game ñhamehtubũ.

23 Yũhũ ĩgu buherã mera majagu Jesu ĩgu mahigupũ ĩgu pohro doabũ.

24 Eropigu Simo Pedro yure ĩgu mojoto mera sĩpu serẽpidoremi Jesure ĩgure wiabure:

25 Eropigu yũpũ Jesu pohro doadigu serẽpiñabũ ĩgure:

—Opũ, ¿nihire arĩgu iiri mũhũ? arĩbũ yahũ.

26 —Iru panrure mohwa aĩ, yahũ yoso ogũ ĩgu ta ãhrimi yure wiabu, arĩmi Jesu.

Eropa arĩtuha iriru panrure ĩgu mohwarañere yosotuha Judare Simo Iscariote magure omi.

27 Eropigu panre ĩgu ora pũhrũ watĩpũ Judare ñero iidoredigu árĩmi. Eropigu Jesu ĩgure õpa arĩmi:

—Mũ iiburire yojaro mera ii purumujuque mũhũ, arĩmi Jesu Judare.

28 Īgu eroparĩcũ peerã gwa mesague doanirã Jesu Judare ĩgu arĩrare masibiribũ.

29 Yujurãyeri gwa õpa arĩ pepiribũ: “Juda gwa niyerure dibugũ ãhrimi. Eropigu bosenu gwa baburire asũdoregu obeoami Jesu Judare. Mojomorocũrãre niyerure odoregu iiami Jesu,” arĩ pepiribũ gwa yujurãyeri.

30 Eropigu Juda iri panre ñeatuha wiria wami. Īgu wiriarasubure ñami árĩbũ.

Mama doreriñere wereñumi Jesu ĩgu buherãre

31 Īgu wiriara pũhrũ gware õpa arĩmi Jesu:

—Dohpague tamerare yũhũ masũ Goãmũ ĩgu obeodigu yũ turagu árĩrire ñhmugucumi Goãmũ masare. Eropigu Goãmũ ĩgu turagu árĩrire ñhmugũca yũpũ.

32 Eropigu Goãmũ turarire yũ ñhmucũ ĩgu yũ turari sãre dohparagã ñhmu purumujuucumi.

33 Yũ porã, yure peeque. Bajamenurigã mwa mera árĩnigũca. Yure amarãca mwa. Eropigu judio masare yũ arĩdiro dopa ta mwa sãre arãa. “Yũ waborore mũapũ wamasibea,” erãre yũ arĩdiro dopa ta mwa sãre werea.

34 Mama doreriñere mware weregura. Mwa mera majarãre mahique mwa. Mware yũ mahidiro dopa ta mwa mera majarãre mahi umupeoque.

35 Eropirã mwa mera majarãre mwa mahicũ ñha gajirã yaharã mwa árĩcũ ñha masirãcoma, arĩmi Jesu.

*“Jesure masibea,” Pedro ĩgu arĩburire wereñumi Jesu
Mt 26.31-35; Mr 14.27-31; Lc 22.31-34*

³⁶ Īgũ eroparĩcũ Simo Pedro Jesure serēpimi:

—Opũ, ¿nohogue wagũcuri mǎhũ? arĩmi Pedro. Īgũ eroparĩcũ Jesu yũhrimi:

—Yũ waboroguere dohpaguere yũ mera wamasibeeaa mǎhũ. Dohpaguere wamasibiriqueregũ ta pũhrũ yũ pohro wagũca, arĩmi Jesu Pedore.

³⁷ Pedro arĩmi:

—Opũ, ¿duhpigũ dohpaguere mũ mera wamasibiribocuri yũhũ? Yũre erǎ wejēdiaquerecũ yũhũ mũre duhosome. Itamugũca, arĩmi Pedro Jesure.

³⁸ —¿Mũ eropa arĩgũ diaye ta yũre itamugũcuri? Diaye mũre weregũ iiaa. “Jesure masibeeaa,” arĩgũca mũhũ gajirǎre. Ʋhresubu eropa arĩgũca cǎreña ĩgũ wereboro core, arĩmi Jesu Pedore.

14

Jesu Goǎmũ pohrogue wari maha iro dopa āhraa yũhũ, arĩ wereñumi

¹ Pũhrũ Jesu gũare õpa arĩ weremi:

—Ne bujawere wũaro guñaricũbiricǎque. Goǎmũre “Diaye ta ĩgũ āhrimi,” arĩ umupeoque. Eropirǎ yũ sǎre eropa umupeoque.

² Yũ Pagũ ĩgũ árĩroguere baja wiri āhraa. Mũa árĩborore amuyugũ wagũra. Iri diaye ta āhraa. Eropigũ mũare irire werea.

³ Eropigũ mũa árĩborore amutuha, dujarigũra yũhũ. Eropigũ yũ pohrogue mũa árĩmorǎre aĩgũ arigũra yũhũ daja.

⁴ Eropirǎ yũ waburi mare masia mũa, arĩmi Jesu gũare ĩgũ buherǎre.

⁵ —Opũ, mũ waborore masibeeaa gũa. ¿Eropirǎ dohpa ii mũ waburi mare masirĩcuri gũa? arĩ serēpimi Toma Jesure.

⁶ Īgũ eropa arĩ serēpicũ Jesupũ yũhrimi:

—Goǎmũ pohrogue wari maha iro dopa arĩgũ tiiaa yũhũ. Eropigũ diaye árĩrire weregũ árĩcǎgũ tiiaa yũhũ. Eropigũ umaroguere ojocaríniguicũ ĩgũ arĩgũ tiiaa yũhũ. Eropirǎ yũre umupeorǎ dihta yũ Pagũ pohrogue warĩcoma.

⁷ Nere yũre masirǎ árĩrǎ, yũ Pagũ sǎre masiboaya mũa. Dohpaguere ĩgũre ĩhaa mũa. Eropirǎ ĩgũre masituhabu mũa, arĩmi Jesu.

⁸ Īgũ eroparĩcũ Felipe õpa arĩmi:

—Opũ, mari Pagũre ĩhmuque gũare. Iripēta gahmea gũa, arĩmi ĩgũ.

⁹ Īgũ eroparĩcũ Jesu weremi:

—Felipe, ¿yoari boje yũ mera árĩqueregũ ta, mũ masinibeari yũre? Yũre ĩagũ yũ Pagũ sǎre ĩatuhami.

“Eropigũ mari Pagũre ãhmuque guare,” ¿duhpigũ eropa arĩri mũhũ yũre?

10 Yũ Pagũ mera yujugũ ta ãhraa yũhũ. Irire “Diaye árĩbeaa,” ¿arĩgũ meje iiri mũhũ? Mũare weregũ yũ gamero weregũ iibeaa. Yũ Pagũre werebasagũ iiaa. Eropigũ ãgũ yũ mera árĩgũ ãgũ turari mera ii ãhmumi.

11 Yũhũ, yũ Pagũ mera yujugũ ta ãhraa. Yũ eroparĩcũ irire “Diaye ta ãhraa,” arĩ pepique mũa. Irire “Diaye ta árĩbeaa,” arĩdiarã, Goãmũ turari mera deoro moarire yũ ii ãhmurire ãaque. Eropa ãara pũhũ yũ Pagũ mera yũ yujugũ ta árĩrĩre “Diaye ta ãhraa,” arĩ pepique mũa.

12 Diaye mũare arĩgũ iiaa. Yũre umupeogũ yũ iidiro dopa ta iigũcumĩ. Eropigũ ãgũpũ yũ tauro iigũcumĩ. Yũ Pagũ pohrogue wabu iiaa dohpaguere. Eropigũ yũre umupeogũ yũ tauro Goãmũ turari mera ii ãhmugũcumĩ.

13 Eropigũ yũre umupeorãre erã yũ waĩ mera serẽropẽ ta iigũra. Eropa iigũ yũ Pagũ ãgũ turarĩre ii ãhmugũca.

14 Yũre umupeorã mũa árĩcũ mũa serẽropẽ ta iigũra, arĩmi Jesu.

Espĩritu Santore mũare obeogũra, arĩ wereñumi Jesu

15 Eropa arĩtuha guare õpa arĩnemomi:

—Yũre mũa mahĩrã, yũ dorerire iipehorãca.

16 Yũ Pagũre serẽgũra. Yũ eropa serẽcũ yũ Pagũpũ gajigũre mũare itamubure mũare obeogũcumĩ. Eropigũ ãgũ mũare itamubupũ umũri nũcu mũa mera árĩgũcumĩ.

17 ãgũ diaye majare weregũ Espĩritu Santo ãhrimi. I yeba majarãpũ Espĩritu Santore masibeama. Eropirã ãgũre opamasibeama. ãgũ ta mũa mera árĩgũcumĩ. Eropirã mũa ãgũre oparãca. Eropirã ãgũre masia mũa.

18 Mũare cóãsome yũhũ. Mũa mera árĩbu dujarigũca yũhũ daja.

19 Merogã duhyaa yũ waboro. Yũ wara pũhũ i yeba majarã yũre umupeobirĩnĩrã yũre dipaturi ãasome. Mũapũ yũre ãarãca. Yũ ojocarĩcũ mũa sã umũri nũcu Goãmũ mera ojocarĩrãca.

20 Irĩnũ yũ dujariburĩnũre yũhũ, yũ Pagũ mera yujugũ ta yũ árĩcũ masĩrãca mũa. Eropirã yũ mera mũa árĩcũ mũa mera yũ árĩcũ sãre masĩrãca mũa.

21 Yũ dorerire iigũ yũre mahĩgũ ta ãhrimi. Eropigũ yũre mahĩgũre yũ Pagũpũ mahĩgũcumĩ. Eropigũ yũ sã ãgũre mahĩgũca. Eropigũ ãgũre yũre õaro masĩcũ iigũca, arĩmi Jesu guare ãgũ buherãre.

22 Gũa mera majagũ gajigũ Juda waĩcũgũ arĩmi Iscariote árĩbigũ. Õpa arĩmi ãgũ Jesure.

—Opu, ¿dohpa iigucuri muhu guare eropa arigu? ¿I yeba majarãre mure masicũ iibigu dohpa iigucuri muhu gua dihtare mure masicũ iigu? arĩ serẽpimi Juda.

²³ Igu eroparicũ Jesu yahrimi:

—Yure mahirã yu dorerire ðaro iima. Erã eropa iicũ yu Pagupu erãre mahigucumi. Eropirã erã mera arĩrã arĩrãca gua.

²⁴ Yure mahibigu yu dorerire iibeami. Eropiro yu wereri mua peerapu yu wereniguri arĩbeaa. Yure obeodigu ya wereniguiripu ahraa. Igu yu Pagu ta ahrimi.

²⁵ Mua mera arĩnigu ire muare werenigigu iiaa.

²⁶ Puhru yu serẽcũ yu Pagu Espiritu Santore obeogucumi muare. Eropigu Espiritu Santoru muare itamubu arigu, muare buhepohogucumi igu. Eropigu muare yu wererare guñacũ iigucumi igu.

²⁷ Muare ðaro aricũ iiguca yuhu. Yuhu ðaro arĩdiro dopa ta ðaro aricũ iiguca muare. I yeba majarã erã iidiro dopa iisome yuhu. Yu tamera diaye ðaro aricũ iiguca muare. Bujawere wuaro guñaricubiricãque mua. Eropirã güibiricãque mua.

²⁸ “Yuhu waguca. Eropigu mua mera arĩbu dujariguca daja,” muare yu eropa arĩ werẽcũ peetuhabu mua. Irire masirã arĩrã mucubiriboaya mua. Yure mua diaye mahinirã arĩrã mucubiriboaya mua. Yu Pagupu yu tauro turami. Eropirã igu pohrogue yu waborore mua masira puhru yure mahirã mucubiriboaya mua.

²⁹ Yure mua umupeoburire yu waborore wereyugu iiaa muare.

³⁰ “I yeba majarã opu watĩ doregu iimi dohpaguere. Eropigu igu eropa dorecũ yuhu mua mera wereniguituboro merogã duhyaa. Igu yu yure tarinugamasibeami.

³¹ Yure yu Pagu Igu dorero dopa ta iiaa yuhu. Eropa ta iiaa yuhu yu Pagure yu mahirire i yeba majarã erã masiburire.

“Wahgãnugajaque. Ina warã, arĩmi Jesu guare igu buherãre.

15

Jesu iguiru iro dopa ahraa, arĩ wereñumi

¹ Eropigu werenigui queori mera buhegu guare ðpa arĩmi Jesu:

—Yuhu iguiru diaye majaru iro dopa arigu ahraa. Yu Pagupu iguirure ihadibugu iro dopa arigu ahrimi.

² Iguirure iri dupari gamesuriro dopa ta mua yaharã yu mera ahraa. Dũca mariri duparire iguirure ihadibugu igu

peha cóãro dopa ta yu Pagu İgu gamerire iibirãre cohãmi. Ducasuri dũpũre iguirure İhadibugũ İgu amuro dopa ta yu Pagu İgu gamerire iirãre itamugucumi İgu “Yu gamerire inemoporo,” arİgu.

³ Yu wererire peerã, “Diaye ta ãhraa,” arãa mua. Eropigu yu Pagu mua ñeri iirare cóãtuhami.

⁴ Yũre gamesũriro dopa ta yu mera majarã arİque mua. Eropigu mua mera arİgũca. Iguiru dũpũri iguiru mera gamesũribiro arİro iri dũpũripũ dũca mara. Eropa ta yu mera majarã õaro arİbirã sã yu Pagu gamerire iimasibea mua.

⁵ Iguirure iri dũpũri gamesũriro dopa ta mua yaharã yu mera ãhraa. Iri dũpũri iguirure õaro gamesũriro arİro dũcacua. Mua sã yũre õaro gamesũrirã yu Pagu gamerire iiaa. Yũre gamesũrirã arİbirã İgu gamerire iimasibea mua.

⁶ Ñeri dũpũre turira dũpũre İgu cóãboro dopa ta yu mera majarã arİbirãre yu Pagu cóãgucumi. Iri dũpũri ñaicũ İha iguirure İhadibugũ iri dũpũre aİ gameneo peamegue soecãgucumi. Eropa ta iigucumi Goãm yu mera majarã arİbirãre.

⁷ “Yu mera majarã arİrã yu buherire cãdijibiriboca mua. Eropa cãdijibirã mua gameropẽ ta yũre serẽque. Eropigu mua serẽropẽ ta ogũra.

⁸ Yu Pagu gamerire mua iirã arİcũ İarã, “Oã Jesu yarã ãhrima,” arİ masirãcoma gajirã masa. Eropirã mũare İarã yu Pagũre umupeorãcoma.

⁹ Yu Pagu İgu yũre mahidiro dopa ta yu sã mũare mahia. Eropirã yu mahiri mera arİque mua.

¹⁰ Yu Pagu İgu dorerire iiaa yũhũ. Eropigu İgu mahigu arİniguia yũhũ. Eropa ta mua sã yu dorerire iirã yu mahirã arİniguicãrãca mua.

¹¹ “Ire mũare wereabũ yu mera mua õaro mucubiriborore. Eropirã turaro mucubirirãca mua.

¹² Õpa dorea mũare: Mũare yu mahidiro dopa ta mua mera majarãre mua sã mahique.

¹³ Yujugũ masũ İgu mera majagũ yañe arİborañe sİrigũ İgu mera majagũre bũrigã mahiami gajirã mahidiro tauro.

¹⁴ Eropirã yu dorerire iirã yu mera majarã ãhraa mua.

¹⁵ Diaye ta mua yu mera majarã gohra ãhraa. Mua eropa arİrã arİcũ arİpehererire yu iirare werea mũare. Pohro majagũ İgu opũ iiburire masibeami İgu. Eropigu “Yu pohro majarã bu arİrã ãhraa mua,” arİbeaa mũare. Yu Pagu İgu yũre wererare mũare werepehoabũ. Eropa weregũ “Yu mera majarã ãhraa mua,” mũare arãa dohpaguere.

16 Mũarũ yũre beyebiribũ. Yũrũ mũare beyebũ yũ Pagũ gamerire mũa iimorãre. Mũa eropa iicũ mũa eropa iiri ne yuju diaye gohra árĩsome. Mũa eropa iicũ yũre mũa umupeocũ yũ Pagũ mũa serẽropẽ ta mũare ogũcumi.

17 Ire mũare dorea yũhũ: Mũa basi game mahi umupeoque, arĩmi Jesu.

Jesure ĩgũ yarã sãre i yeba majarã ĩhaturirire wereñumi Jesu

18 Eropigũ gũare werenemomi daja:

—I yeba majarã mũare erã ĩhaturicũ ĩarã ire guñaque mũa: “Gũare eropa ĩhaturiboro core Jesupũre ĩhaturinũgatuhamã erã,” arĩ guñaque.

19 I yeba majarã gohra mũa árĩcũ, erã mera majarãre erã mahidiro dopa ta mũa sãre mahiboañuma erã. I yeba majarã mera mũa árĩnicũ mũare beyebũ. Eropirã dohpaguere i yeba majarã gohra árĩbeaa mũa. Mũa eropa árĩbircũ ĩarã i yeba majarã mũare ĩhaturima.

20 Mũa yaharã árĩrã “Yũ tauro árĩbeaa,” mũare yũ arĩrare guñaque mũa. Eropa yũ mera majarã árĩrã yũ ñero tariboro dopa ta ñero tarirãca mũa sã. Yũre ñero iinirã ta mũa sãre ñero iirãcoma. Yũ buherire yũhrinirã ta mũa buheri sãre yũhrirãcoma.

21 I yeba majarã yũre obeodigũre masibeama. Eropirã yũre umupeorã mũa árĩcũ ñero iirãcoma erã mũare.

22 “Erãre yũ buhegũ aribircũ erã yũre gamebirira dipuwaja mariboaya. Dohpaguere erãre yũ buhera pũhrũ “Ñeri dipuwaja mara gũare,” arĩmasibeama erã.

23 Yũre ĩhaturigũ yũ Pagũ sãre ĩhaturimi.

24 Goãmũ turari mera gajirã erã ne iibirirare ii ĩhmubũ. Eropiro erãre irire yũ ii ĩhmubircũ erã peebirira dipuwaja mariboaya. Goãmũ turari mera yũ ii ĩhmurare erã ĩara pũhrũ yũre yũ Pagũ sãre ĩhaturima erã.

25 Eropa ĩhaturirã Goãmũ yare erã gojarapũ matague ta erã arĩ gojadiro dopa ta iirã iima erã. Ópa arĩ gojañuma: “Erãre yũ ñero iibiriquerecũ ta yũre ĩhaturima erã,” arĩ gojañuma matague ta Goãmũ yare erã gojarapũgue, arĩmi Jesu.

26 Eropigũ werenemomi daja:

—Yũ pũhrũgue mũare itamubu, yũ Pagũ mera árĩgũ mũare yũ obeobu Espĩritu Santo ta ãhrimi. ĩgũ diaye majare weregũ ta ãhrimi. Eropigũ ĩgũ arigũ yũ árĩricũre weregũcumi mũare.

²⁷ Mũare yũ buhenugacũgue mũa sã yũ mera umũri nũcu árĩbũ. Mũa sã yũ árĩricũrire wererãca, arĩ weremi Jesu gũare.

16

¹ Eropa arĩtuha gũare õpa arĩ werenemomi:

—Pũhrũ yũ buherire yũ sãre mũa cóãbiriburire õpa weregũra mũare.

² Mari buheri wirigue mũa ñajadiacũ ñajadoresome mũare yaharã mũa árĩri dipuwaja. Eropirã mũare gajisubũ wejẽ “Goãmũ gamerire iirã iiaa,” arĩ pepirãcoma gajirã.

³ Yũ Pagũre, yũ sãre erã masibeama. Eropa masibirã mũare ñero iirãcoma erã.

⁴ Eropirã mũare erã ñero erã iicũ ñarã, “Erã õpa iiboro core ta Jesu gũare weremũhtayutuhami,” arĩ guñarãca mũa. Mũa eropa arĩ guñaburire dohpaguere ire weremũhtagũ iiaa mũare, arĩ weremi Jesu.

Espíritu Santo ñgũ iiburire wereñumi Jesu

Eropa arĩtuha õpa arĩ werenemomi:

—Neguere mũa mera árĩgũ ire mũare werebiribũ.

⁵ Dohpaguepũre yũre obeodigũ pohrogue wagũca. “¿Nohogue wagũcuri mũhũ?” arĩ ne yujugũ yũre serẽpibea mũa yũre.

⁶ Eropa serẽpibiriquererã ta yũ waborore mũare werecũ mũa ñero sĩporãcũa.

⁷ Mũa ñero sĩporãcũquerecũ mũare õpa diaye ta werea: Yũ wara pũhrũ mũare õacãroca. Yũ umarogue wabiricũ mũare itamubupũ aribiribocumi. Eropa wagũ eja mũare ñgũre obeogũca yũhũ.

⁸ Yũ eropa obeocũ ñgũ arigũcumi. Eropa eragũ i yeba majarãre ñerire iirã erã árĩcũ masicũ iigũcumi ñgũ. Eropigũ õaro árĩricũburire buhegũcumi ñgũ. Eropigũ Goãmũ ñgũ dipuwaja moaborore weregũcumi masare itamubupũ.

⁹ Yũre umupeobirã ãhrima i yeba majarã. Eropigũ itamubupũ masa erã ñero iiricũrire erãre masicũ iigũcumi.

¹⁰ Yũ Pagũ pohrogue wagũca. Yũ eropa wara pũhrũ masa yũre ñanisome. Eropigũ itamubupũ arigũ õaro árĩricũri sãre buhegũcumi.

¹¹ I yeba majarã opũre watĩre Goãmũ dipuwaja moadoretuhami. Eropigũ Goãmũ masare ñgũ dipuwaja moaburi sãre weregũcumi itamubupũ.

¹² “Wũaro ãhraa mũare yũ wereburi. Yũ eropa werenemodiaquerecũ ta ire yũ werecũ dohparagã masisome mũa.

¹³ Yũ eropa werenemobiricũ Espiritu Santopũ irire werenemogũ arigũcumi. Ñgũ ñgũ gamero mũare weresome.

Yü Pagu İgu weredorerare müare weregucumi. Eropigu müare diaye majare werepehogucumi. Eropiro pührugue waburire müare masicũ iigucumi İgu.

14 Eropigu İgu yare müare weregucumi. Eropa weregu yüre umupeocũ iigucumi müare.

15 Árİpehreri yu Pagu ya sã yaha ähraa. Eropigu “Espíritu Santo yahare weregucumi,” aräbu müare, arİ weremi Jesu.

Bujawererã árİquererã ta pühru mucubirirãca müa, arİ wereñumi Jesu

16 Eropa arİtuha öpa arİ werenemomi guare daja:

—Bajamenüri yüre İasome müa. Eropirã pührugã ta daja müa yüre İarãca, arİmi Jesu.

17 İgu eroparİcũ peerã, guaru bajamerãgã öpa arİ wereniguibu gua basi:

—“Bajamenüri yüre İasome müa. Eropirã pührugã ta daja müa yüre İarãca,” arİgu ¿dohpa arİgu eropa arãri marire? Eropigu “Yu Pagu pohroque waguca,” ¿dohpa arİronore eropa arãri İgu?

18 “Bajamenüri pühru,” arİgu ¿dohpa arİgu eropa arãri İgu? İgu wererare öaro pee masibea mari, arİbu gua basi.

19 Gua eropa arİ wereniguicũ Jesu İgure gua serëpidiarire masigu guare öpa arİ weremi:

—“Bajamenüri yüre İasome müa. ¿Eropirã pührugã ta yüre İarãca daja,” yu arİrare serëpidiari müa? ¿Irire yu arİrare masibeari müa?

20 Diaye müare arİgu iiaa: Yuhu sİricũ İarã müa orerãca. Eropirã burigã bujawererãca. Yüre umupeobirininirãpu mucubirirãcoma. Müaru bujawerenirã árİquererã pühru mucubirirãca müa.

21 Öpa ähraa iri: Nomeo niji wahgũgo igo ñero tariburisubu ähraa. Eropigo igo turaro bujaweremo. Eropa bujawerequerego, igo magugã dehyoacũ İago mucubirimo. Eropigo igore pürirare guñabeamo igo pare.

22 Eropa ta müa dohpaguere bujawererãca. Pühru müa yüre İarãca daja. Eropirã müa turaro mucubirirãca. Müa eropa mucubiririre gajirã müare bujawerecũ iimasisome.

23 “Irinu yüre müa İarinure yüre serëpisome müa. Yu Pagupu müa serërire ogucumi. Diaye ta müare arİgu iiaa. Yüre müa umupeocũ İagu yu Pagure yu waİ mera müa serërire İgu müare ogucumi.

24 Yu öpa waboro core müa yüre waİpeo Goãmure serënbiribu müa. Dohpaguere yüre waİpeo Goãmure serëque. Müa eropa serëcũ müare İgu ogucumi müa turaro mucubiriburire, arİmi Jesu guare.

Ñerãre Jesu ïgu tarinugarire wereñumi ïgu buherãre

²⁵ Eropa arĩtuha õpa arĩnemomi:

—Werenigui queori mera mũare weremurabu. Eropa werequeregu ta pũhrũ mũare werenigui queori mera weresome pare yũhu. Yũ Pagupũre mũa õaro peeboro dopa weregũra mũare.

²⁶ Irinũre mũa ya árĩburire mũare serẽbasasome yũhu. Yũre umupeorã yaha waĩ mera mũa basi ïgure serẽrãca.

²⁷ Mũa yũre mahirã ãhraa. Eropirã yũ Pagũ pohrogue yũ aridigu árĩcũ “Diaye ta ãhraa,” arãa mũa. Eropa arĩrã mũa árĩcũ ïagũ, yũre mahirã mũa árĩcũ ïagũ yũ Pagũ sã mũare mahimi. ïgu eropa mahicũ mũa ïgure serẽrãca.

²⁸ Yũ Pagũ pohro árĩdigu árĩgu i yebaguere aribu yũhu. Eropigu dohpaguere i yebague árĩdigu árĩgu yũ Pagũ pohrogue dujagũca daja, arĩmi Jesu.

²⁹ ïgu eroparĩcũ gũa ïgu buherã õpa arĩbu:

—Dohpague tamerare werenigui queori mariro wereniguigu õaro diaye wereniguigu iiaa mũhu gũare.

³⁰ Mũhu õaro masipehogũ mũ árĩcũ gũa dohpague ta õaro masia. Eropirã gajirã mũre buhemasibeama. Eropirã irire gũa dohpaguere õaro masia. Gũa irire õaro masirã arĩrã Goãmũ pohrogue mũ aridigu árĩcũ “Diaye ta ãhraa,” arãa, arĩbu gũa Jesure.

³¹ Gũa eroparĩcũ Jesu yũhrimi gũare:

—Dohpaguere “Diaye ta ãhraa,” ¿arĩri mũa pare?

³² Pũhrũñari mũa ya wirigue wasirirã yũre cóãrãca mũa. Mũa eropa cóãquerecũ ta yũ Pagupũ yũ mera ãhrimi. Eropigu yũhu yujugũ ta árĩbeaa.

³³ Ire mũare wereyubu yũre mũa guñaturari mera mũa õaro árĩboro dopa. I yeba árĩrisubu Goãmũre gamebirã pohrogue mũa árĩcũ mũare ñero iirãcoma erã. Erã eropa iiquerecũ ta guñaturaque mũa. I yeba majarã erã ñero iirare tarinugagũ ãhraa yũhu. Eropirã yũre guñatura mucubirique mũa, arĩmi gũare ïgu buherãre.

17

Jesu ïgu buherã ya árĩburire ïgu Pagũre Goãmũre serẽbasañumi

¹ Eropa arĩ weretuha Jesu umarogue ïhamuju õpa arĩ wereniguimi Goãmũre ïgu Pagũre:

—Ahũ, dohpaguere mũ werediro dopa ta yũre erã ñero iiburisubu ejanijaro iiaa. Yũre mũ magũre erã masare umupeocũ iique. Mũ eropa iicũ masare mũre umupeocũ iigũra yũ sã.

² Árípehrerã tauro opu apibũ mũhũ yũre. Eropigũ mũ yũre onirãre mũ mera eropa árĩniguicũ iigũca mũhũ.

³ Mũ dihta Goãmũ gohra ãhraa. Yũhũ Jesucristo mũ obeodigũ ãhraa. Eropirã árĩpehrerã mũre masirã, yũ sãre masirã mari mera ɸmaroguere eropa árĩniguicãrãcoma, arĩmi.

⁴ Eropa arĩgũ ta õpa arĩnemomi Goãmũre:

—I yebaguere mũ iidorerare iipehoabũ yũhũ. Eropa iigũ masare mũ turagũ árĩrire ãhmuabũ yũhũ.

⁵ I yeba árĩboro core mũ mera yũ árĩcũ õaro turari opabũ. Eropigũ dohpaguere mũ árĩroque irire yũ õaro turagũ árĩrire ãhmuque.

⁶ “I yeba árĩrãre yũre mũ onirãre mũre masicũ iiabũ. Mũ onirã mũ yarã ãhrima. Eropigũ erãre ohabũ mũhũ yũre. Eropirã mũ dorerire iiaa erã.

⁷⁻⁸ Yũre mũ wererare erãre buheabũ. Yũ buhecũ peerã yũ buherire gahmeama erã. Eropirã diaye ta mũ pohro aridigũ yũ árĩcũ masima erã. Eropirã mũ obeodigũ yũ árĩcũ sãre “Diaye ta ãhraa,” arĩ pepima erã.

⁹ “Erã ya árĩburi mũre serẽgũ iiaa. Gajirã ya árĩburipũre serẽgũ iibeaa yũhũ. Yũre mũ onirã mũ yarã ãhrima. Eropigũ erã ya árĩburire serẽgũ iiaa mũre.

¹⁰ Erã árĩpehrerã mũ yarã ãhrima. Eropirã mũ yarãpũ yaharã ãhrima. Yũre umupearã yũ turagũ árĩrire ãhmuma erã masare.

¹¹ “Dohpaguere i yebaguere dujasome yũhũ. Mũ pohro wabu iiaa. Yũ eropa waquerecũ ta dohpaguere yũre mũ onirã i yebaguere dujama. Ahũ, mũhũ õagũ ãhraa. Yũre mũ onirãre mũ turari mera ãhadibuque. Mũ eropa dibucũ mari yujugũ ta árĩdiro dopa ta yuju curu ta árĩrãcoma erã sã.

¹² Erã mera árĩgũ mũ turari mera erãre õaro ãhadibuabũ. Yujugũ tamera peamegue wagũcumi mũ yare erã gojarapũ werediro dopa ta.

¹³ “Dohpaguere mũ pohroque wabu iiaa. Eropigũ i yeba i árĩpehrerire mũ yarãre werea yũ mera erã õaro mucubiribore.

¹⁴ Mũ yare wereabũ erãre. Erã yũ iro dopa ta i yeba árĩwajamorã árĩbeama. Eropirã i yeba majarãpũ erãre ãhaturima.

¹⁵ “I yeba árĩrãre, yaharãre ããaque,” arĩbeaa. Eropa arĩbriqueregũ erãre õaro ãhadibuque watĩ ñerire iidoreri erãgue arĩgũ.

¹⁶ I yeba majagũ árĩbeaa. Erã sã yũ iro dopa ta i yeba árĩwajamorã árĩbeama.

17 Yaharāre m̄ buheri mera ōarā árīcũ iique erāre. M̄ wererip̄ diaye ta āhraa.

18 I yebaguere ȳre m̄ obeodiro dopa ta ȳp̄ yaharāre m̄ yare buhedoreḡu obeoa.

19 M̄ gamerire iibu árīḡu, s̄ribu árīḡu erā ya árīburire s̄ribu āhraa. Eropa s̄ribu āhraa ȳh̄u yaharā s̄ m̄ gamerire diaye erā ōaro iiburire.

20 “Yaharāre dohpague árīrā dihtare itamuque,” arī serēbeaa ȳh̄u. Yaharā gajirāre erā buhera p̄hr̄u gajirā s̄ ȳre umupeorācoma. “Erā s̄re itamuque,” arāa ȳh̄u.

21 Yaharā árīpehrerā erā yuju curu árīboro dopa itamuque. Ȳh̄u m̄ mera yujuḡu ta āhraa. Mari yujuḡu árīdiro dopa ta erā mari mera yuju curu ta árīporo. Yujuro mera ta árīporo m̄ obeodiḡu ȳ árīrire árīpehrerā masa “Diaye ta āhraa,” erā arīburire.

22 Ȳre m̄ ora turarire yaharāre ohab̄u. Iri turarire oparā yujuḡu ta mari árīdiro dopa ta erā s̄ yuju curu ta árīrācoma.

23 Ȳh̄u erā mera āhraa. Eropiḡu m̄h̄u ȳ mera āhraa. Mari eropa árīrā árīcũ mari yarā diaye ta ōaro yuju curu ta árīrācoma. Yuju curu erā árīcũ ĩarā m̄ obeodiḡu ȳ árīrire i yeba majarā masirācoma. Eropirā ȳre m̄ mahidiro dopa ta yaharā s̄re m̄ mahirire masirācoma masa.

24 “Ah̄u, i yeba árīboro core ȳre mahib̄u m̄h̄u. Eropa mahiḡu ȳ turaḡu árīrire ĩhmub̄u m̄h̄u. Eropiḡu ȳre m̄ onirā ȳ mera erā árīcũ gahmea ȳ turaḡu árīrire erā masiboro dopa.

25 Ah̄u, m̄h̄u ōaḡu āhraa. I yeba majarā ñerā m̄re masibeama. Ȳp̄ m̄re masia. Eropirā ȳh̄u m̄ obeodiḡu árīcũ masima yaharāp̄u.

26 M̄re erāre masicũ iiab̄u. P̄hr̄u s̄re m̄re erāre masicũ iiḡuca ȳre m̄ mahidiro dopa ta gajirāre erā mahiburire. Eropiḡu yaharā mera árīḡuca, arīmi Jesu mari Paḡure.

18

Jesure peresu iĩnuma

Mt 26.47-56; Mr 14.43-50; Lc 22.47-53

1 Īḡu eropa arīra p̄hr̄u Jesu ḡua s̄ ĩḡu buherā Cedrón waĩc̄uriyare taribuja, Olivo waĩc̄uri gorogue ejab̄u.

2 Bajasuburi iri gorogue Jesu mera ḡua gamenerem̄rib̄u. Eropiḡu Juda Jesure ĩhaturirāre wiabu iri gorore masími.

3 Eropa masiḡu pe curu surara mera aridí arīmi ĩḡu. Yuju curu surara gohra arīma. Gaji curu surara Goām̄u wihire corerā arīma. Pahia oparā, fariseo masa erā obeonirā

árīma surara. Eropa arirā sihāri dipurure, eropárīcū yucu mojóćma erā.

⁴ Iri gorogue gūa pohrogue erā erara pūhrū Jesu ĩgu ñero tariborore masigū, erāre bocatīri serēpimi:

—¿Noare amarā iiri mūa? arīmi Jesu.

⁵ —Jesu Nazare majagūre ahmaa, arī yūhrima erā.

—Īgu ta āhraa yūhū, arīmi Jesu.

Judapū Jesure ñeadoregū erā mera árīmi.

⁶ Eropirā Jesu “Īgu ta āhraa yūhū,” ĩgu arīcū erāpū ũca wa yebague dusirimaagā mehmereja wama.

⁷ Erā eropa wacū ĩagu dipaturi serēpimi Jesu:

—¿Noare amarā iiri mūa? arīmi.

—Jesu Nazare majagūre amarā iiaa gūa, arī yūhrima erā daja.

⁸ —Īgu ta āhraa, arīrabūgū yūhū mūare. Eropirā yūre ñearā oāre yū mera majarāre peresu iibiricāque, arīmi Jesu.

⁹ Eropa gūare mahigū ne yujugūre dederecū iibirimi. Eropa iigū ero core Goāmūre ĩgu arīdiro dopa ta iigū iimi ĩgu. “Yūre mū onirāre ne yujugūre dedeobiribū,” ĩgu arīdiro dopa ta iigū iimi Jesu.

¹⁰ Eropi Simo Pedro matamijire opagū irimijire tuāwea aī, pahia opū pohro majure Malco waicūgūre ĩgu gamirore pacoro medijucāmi. Diayerū maja gamirore pacoro medijucāmi

¹¹ Īgu eropa pacorocū ĩagu Jesu ōpa arīmi:

—Mū matamijire dibuque. Yū Pagū ĩgu yūre ñero taridorero dopa ta ñero tarigūra, arīmi Jesu Pedrore.

Pahia tauro opū pohrogue Jesure aīgāñuma erā

Mt 26.57-58; Mr 14.53-54; Lc 22.54

¹² Īgu eropa arītuhacū ta surara, erā opū mera, Goāmū wihire corerā surara sā Jesure ñeha ĩgūre dirima.

¹³ Dirituha Ana waicūgū pohrogue aīgāmūhtama erā. Anapū Caifa mūñecū árīmi. Caifapū iri bojorire pahia tauro opū árīmi.

¹⁴ “Judio masa ya árīburire yujugū masū sīricū ōhaa,” arīdigū árīmi ĩgu Caifapū.

—Jesure masibea, arīñumi Pedro

Mt 26.69-70; Mr 14.66-68; Lc 22.55-57

¹⁵ Eropigū yūhū Simo Pedro mera Jesure yoañarirogue nūrsiabū. Yūpū pahia opū ĩgu ĩha masigū árībū. Eropigū Jesu pūhrū, opū árīri wihi árīri sārīro pohecague ñajaa wabū.

16 Pedropu disiporo dujanugajami. Eropigu maji wiriri disiporo coregore serēbasabu Pedrore ai ñajabu. Yu eropa serēpiñacũ igo Pedrore ñajaridoremo. Igo ñajaridorera puhru yuhu Pedrore ai ñajaa wabu.

17 Yu eropa ai ñajajacũ iago disiporo coregoru Pedrore serēpimo:

—¿Jesu buherã mera majagu arĩbeari mahu? arĩmo igo Pedrore.

—Arĩbeaa yuhu, ai yuhrimi Pedropu.

18 Ero core ero majarã pohro majarã, surara mera erã sōhmaburi peamere dihunirã arĩma. Yusaa arĩbu. Eropirã erã iri peame turo sōhma niguima. Erã sōhmacũ iagu Pedro sã sōhmagu wami.

Pahia tauro opu Jesure serēpi iañumi
Mt 26.59-66; Mr 14.55-64; Lc 22.66-71

19 Eropi pahia tauro opu arĩgu Jesu igu buherire, gua igu buherã sãre serēpi iapu Jesure.

20 Igu eropa arĩ serēpicũ Jesupu yuhripu igure:

—Arĩpehrerãre buhegu erã core niguibu. Eropa buhegu mari buheri wiri Goãmu wihi sãre masa gamenererogue eropa buhe niguicãbu. Duhrijagu ne buhebirabu yuhu.

21 ¿Duhpigu yure serēpiri mahu? Serēpidiagu yure peenirãre serēpique. Yu wererare erã masima, arĩ yuhripu Jesu.

22 Igu eroparicũ surarapu ero niguidigu igu mojoto mera Jesure papu.

—Eropa arĩbircãque pahia tauro opure, arĩpu surara Jesure.

23 Igu eroparicũ Jesu opa arĩpu:

—Ñero arĩ yu wereniguirare wereque yure. ¿Diaye majare yu muare werequerecũ duhpigu pari mahu yure? arĩpu Jesu surarare.

24 Puhru Ana Jesure erã diridigure Caifa pahia tauro opu pohrogue obeopu.

—Jesure masibea, dipaturi arĩñumi Pedro
Mt 26.71-75; Mr 14.69-72; Lc 22.58-62

25 Eropi Simo Pedro peame turo sōhma niguigu iimi. Eropa igu sōhma niguicũ iarã ero majarã igure serēpima.

—¿Mu sã Jesu buherã mera majagu arĩbeari? arĩ serēpima erã Pedrore.

—Arĩbeaa yuhu, arĩ yuhrimi Pedro.

26 Eropigu pahia tauro opu pohro majagupu Pedro igu gamiro pacorodigu acaweregupu Pedrore serēpimi:

—¿Jesure erã ñearasubu yu árĩcũ mu sã erã mera árĩsabũ? arĩ serẽpimi ĩgu Pedrore.

27 —Yũhu ĩgu mera árĩbirabũ, arĩ yũhrimi Pedro. ĩgu eroparĩcũ ta cãreña weregũ carimi.

Jesure Pilato serẽpiñumi

Mt 27.1-2, 11-14; Mr 15.1-5; Lc 23.1-5

28 Ñamiñarigã árĩcũ Caifa ya wihigue árĩnirã Jesure aĩ wiria, iri maca majarã opu Pilato ya wihigue aĩgã wama erã. Eropa waquererã ĩgu ya wihiguere ñajabirima. Pascua árĩcũ erã bamorã árĩrã õpa arĩma: “Judio masũ árĩbeami Pilato. Eropirã mari i wihigue judio masũ árĩbigũ árĩri wihire ñajarã, mari dorerire tarinũgarãca. Eropirã mari ñajacũ ĩarã ñerã dopa ĩabocoma marire. Eropirã marire bosenu barire marire badorebiribocoma,” arĩma. Eropa arĩrã opu ya wihire ñajabirima Jesure aĩgãñirãpu.

29 Erã ñajabiricũ ĩagũ Pilato erã pohrogue wihi disiporogue wiriranũgaja, erãre serẽpimi:

—¿Ñehenore ĩre weresãdiari mua? arĩ serẽpimi Pilato erãre.

30 —Ihĩ õagũ ĩgu árĩcũ mũre ĩgure obiriboaya. Ñegũ ãhrimi ĩgu, arĩ yũhrima erã.

31 Erã eroparĩcũ Pilato õpa arĩmi:

—Mua basi ĩgure aĩaque. Eropirã mua ya doreri arĩro dopa ta ĩgure dipuwaja moaque, arĩmi Pilato erãre.

—Gua judio masapu masure wejẽdoremasibea, arĩma erã Pilatore. Eropa arĩrã Jesure wejẽdoremorã iima.

32 Erã eropa wejẽdorecũ Jesupu crusague ĩgu sĩriborore ero core ĩgu werediro dopa ta eropa wabũ.

33 Erã eropa arĩra puhrũ Pilatorũ wihigue maji ñaja, Jesure sihubeo ĩgure serẽpipũ:

—¿Judio masa erã opu ta ãhriri mũhu? arĩ serẽpipũ.

34 Jesu yũhripu ĩgure.

—¿Mũ guñaro yure eropa arĩ serẽpiri mũhu? ¿O gajirã mũre erã wererare peenijagũ yure serẽpigũ iiri mũhu? arĩpu Jesu Pilatore.

35 —Judio masũ árĩbeaa yũhu. Mũ ya yeba majarã, pahia oparã sã, mũre wiama yure. ¿Ñehenore ñero iiri mũhu erã eropa mũre dipuwaja moadiacũ? arĩpu Pilato.

36 —Yu opu árĩri i yeba maja árĩbeaa. Yũhu i yeba majarã opu árĩcũ, yaharã yure itamuboñuma judio masare ñeadorebirã. Yu opu árĩri i yeba maja árĩbeaa, arĩpu Jesu Pilatore.

37 —¿Eropigũ opu ãhraa arĩri mũhu eropa arĩgu? arĩpu Pilato.

—Mũ arĩro dopa ta opũ ta āhraa. Masa opũ árĩbu masa dehyoabũ yũhũ. Eropigũ i yebague arigũ erã opũ árĩbu aribũ. Diaye majare weregũ aribũ. Árĩpehrerã diaye árĩrire peediarã yũ wererire peema, arĩpũ Jesu.

³⁸ —¿Ñeheno āhriri diaye árĩri? arĩpũ Pilato.

Judio masa Jesure wejẽdoreñuma

Mt 27.15-31; Mr 15.6-20; Lc 23.13-25

Eropa arĩtuha Pilato judio masa pohro maji dujaa wa erãre weremi:

—Ĩre ne gajino dipuwaja mara.

³⁹ Bojori nũcũ Pascuanũ árĩcũ yujugũ peresu árĩgũre mũa wiudorea. ¿Eropigũ ĩre Jesure ta mũa opũ árĩbupũre mũare wiubasacuri yũhũ? arĩmi Pilato judio masare.

⁴⁰ Ĩgũ eroparĩcũ peerã erã judio masa õpa arĩ gaguiniguima:

—Ĩgũre wiubiricãque. Barrabápũre gũare wiubasaque, arĩ gaguiniguima judio masa Pilatore. Barrabápũ yajaricũgũ árĩdigũ árĩpũ.

19

¹ Erã eropa arĩ gaguiniguira pũhrũ Pilato Jesure tãradorepũ. Eropirã ĩgũ yarã surarapũ ĩgũre tãrañorã.

² Tãratuha pora bero iituha, Jesure ĩgũ dipuru weca duhpeotuha, oparã ya suhrĩrore ĩgũre sañorã.

³ Eropirã ĩgũ pohro nũgaja õpa arĩñorã erã õpa arĩ wereyarã:

—Õaro arĩporo. Judio masa opũ õaro arĩporo, arĩ wereya erã mojotori mera ĩgũre pañorã.

⁴ Eropigũ Pilato dipaturi waha, judio masare weremi:

—Peeque mũa. ĩre ñeri dipuwaja mara. Eropigũ irire mũa masiburire ĩgũre mũa pohro aĩgãribu iiaa, arĩmi Pilato.

⁵ Ĩgũ eropa arĩra pũhrũ Jesu pora berore peyadigũ, oparã ya suhrĩronore sañadigũ wihigue árĩdigũ wiririmi. Ĩgũ wiriricũ Pilato õpa arĩmi:

—Īaque. Ihĩ ta āhrimi ĩgũ, arĩmi Pilato.

⁶ Ĩgũ eropa arĩtuhacũ peerã pahia oparã, surara Goãmũ wihi ĩhadibu corerã sã Jesure ĩarã gaguiniguima:

—Crusague wejẽque ĩgũre. Crusague pabia wejẽque ĩgũre, arĩ gaguiniguima erã.

—Ĩgũre ne ñeri dipuwaja mara. Eropirã mũa basi ta ĩgũre aĩgãque. Eropirã mũa basi ta ĩgũre crusague pabia wejẽque, arĩmi Pilato erãre.

7 —Īgu, ĩgu basi “Goãmu magu ãhraa,” arĩmurami. Īgu eropa arĩra waja gua doreripu ĩgure wejẽdorea, arĩma erã Pilatore.

8 Erã eroparĩcũ peegu ucataria Pilatoru.

9 Eropigu dipaturi ĩgu wihigue Jesure aĩ majiñajagu Jesure serẽripu daja:

—¿Nohogue majagu ãhriri muhu? arĩpu Pilato Jesure.

Īgu eropa arĩ serẽpiquerecũ ta Jesu ĩgure ne yuhribiripu:

10 Īgu yuhribiricũ ĩagu Pilato ĩgure serẽpinemopu:

—¿Yure yuhribeari muhu? Yuhu mre peresu árĩgure wumasia. Eropigu mre crusague pabia wejẽdoremasia yuhu. ¿Irire masibeari muhu? arĩpu Pilato Jesure.

11 Īgu eroparĩcũ Jesu yuhripu daja:

—Goãmu mre dorebircũ ne iimasibiriboaya muhu. Eropigu yure ĩhaturirãre wiadigupu mu tauro ñero dipuwajacugucumi, arĩpu Jesu Pilatore.

12 Īgu eroparĩcũ peegu Pilatoru ĩgure wiudiaripu. Īgu eropa wiudiaquerecũ ta dipaturi judio masapu gaguiniguima:

—Jesu “Opu ãhraa,” arĩgu mari tauro opu árĩgure Roma majagure ĩhaturigu iimi ĩgu. Eropigu ĩgure wiugu mu sã mari tauro opu árĩgure ĩhaturigu ãhraa, arĩ gaguiniguima judio masa Pilatore.

13 Erã eroparĩcũ peegu Jesure wihigue árĩgure aĩ wiriri, ĩgu dipuwaja moadoregu ĩgu doari pẽro doajami Pilatoru. Īgu dipuwaja moadorero judio masa ya mera gabata waĩcuro empedrado waĩcubu.

14 Irinu Pascuanu bosenu árĩcũ gua baburi gua amurinu árĩbu. Irisubu goeri boje core árĩbu. Doajatuha Pilato masare õpa arĩ weremi:

—Ihĩ ta ãhrimi mua opu, arĩmi ĩgu.

15 Īgu eroparĩcũ peerã judio masa gaguiniguima daja:

—Sĩriporo ĩgu. Sĩriporo ĩgu. Crusague pabia wejẽque ĩgure, arĩ gaguiniguima erã.

—¿Mua opu árĩquerecũ ta ĩgure crusague pabia wejẽdiari mua? arĩmi Pilato erãre.

Īgu eroparĩcũ õpa arĩ yuhrima pahia oparã:

—Mari árĩpehrerã tauro opu Roma majagu ãhrimi. Gajigu opu marimi marire, arĩ yuhrima pahia oparã.

16 Erã eropa arĩ wereniguira puhru Pilato Jesure crusague pabia wejẽdoregu wiami erãre pare.

Jesure pabia wejẽñuma erã

Mt 27.32-44; Mr 15.21-32; Lc 23.26-43

Eropirã surara Jesure aĩ wiriama.

17 Erã aĩ wiriacũ Jesupũ crusare ĩgũ basi aĩ coã, dipu pero waĩcurogue ejami. Gũa judio masa ya mera Gólgota waĩcubũ.

18 Erogue eja erã Jesure crusague pabiama. Eropirã gajirã perã sãre yjugũ ĩgũ diayepũ, gajigũre ĩgũ copũ pabiama erã. Eropigũ Jesu erã deco árĩmi.

19 Pilato taboamijire goja, crusague Jesu weca pabia tuodorepũ ĩgũ gojaramijire. Ōpa arĩ gojara árĩbũ: “Ihĩ Jesu Nazare majagũ, judio masa tauro opũ ãhrimi,” arĩ gojara árĩbũ irimijire.

20 Irimijire gojagũ judio masa ya mera, Roma majarã ya mera, Griego ya mera gojara árĩbũ. Eropiro Jesure crusague erã pabianugudiro maca pohrogã árĩbũ. Eropirã bajarã judio masa Pilato ĩgũ gojarare ĩha buhema.

21 Eropirã pahia oparã iri buhetuhaja ōpa arĩrã wañorã Pilatore:

—“Ihĩ judio masa opũ ãhrimi,” arĩ gojabita. Gũa opũ árĩbeamĩ ĩgũ. Eropigũ ōpa arĩ goja amuque mũhũ. Ihĩ “Judio masa opũ ãhraa,” arĩ yjugũ ta ĩgũ basi ta eropa arĩ pepigũ ãhrimi, arĩ goja amuque, arĩñorã pahia oparã.

22 Pilatopũ yũhripũ erãre:

—Yũ gojarare ne yũ goja amusome, arĩpũ Pilato erãre.

23 Jesure erã pabiara pũhrũ wapicũrã surarapũ Jesu suhri mũrare erã basi game gueremorã iima. Erã eropa guerediaquerecũ ta ĩgũ suhriro yoari suhriro dohori mariri suhriro árĩbũ. Iri suhriro suara suhriro árĩbũ.

24 Iri suhriro eropa árĩcũ ĩarã ōpa arĩma erã basi:

—Iñe suhrirore yeguesiribircãrã. Yujugũ dihta aĩporo. Eropirã iñe suhriro aĩbure masimorã deabirãrã mari, arĩma erã basi.

Eropa deabirãrã Goãmũ yare erã gojarapũ erã gojadiro dopa ta eropa iirã iima erã. “Yũ suhrirore erã basi guerema. Eropirã yaha suhrirore aĩbure masidiarã deabirama erã,” arĩ gojañuma Goãmũ yare erã gojarapũgue. Erã gojadiro dopa ta eropa iima erã.

25 Jesu pago, Jesu bũamo María Cleofa marapo, María Magdalena mera Jesu crusa pohrogã ĩha niguima.

26 Eropigũ ĩgũ pago, yũhũ ĩgũ mahigũ sã ĩgũ pohrogã gũa niguicũ ĩagũ ĩgũ pagore yãre weremi:

—Dohpaguere ihĩ mũ magũ árĩbũ ãhrimi, arĩmi Jesu ĩgũ pagore.

27 Eropa arĩtuha yãre ōpa arĩ weremi ĩgũ:

—Dohpaguere igo mũ pago árĩbo ãhrimo, arĩmi Jesu yãre.

Ĩgũ eropa arĩra pũhrũ Jesu pagore yaha wihigue aĩ opamuribũ.

*Jesu s̄iria wañumi**Mt 27.45-56; Mr 15.33-41; Lc 23.44-49*

28 Īgu eropa arĩ werera p̄hr̄u árĩpehreri Goãm̄u ĩgure mohmedoreḡu ĩgu apirare ipehoḡu árĩḡu masip̄u Jesu. Eropa masiḡu Goãm̄u yare erã gojarap̄u iribojegue erã arĩ wereyudiro dopa ta õpa arĩmi Jesu:

—Ñemesibuca ȳure, arĩmi Jesu.

29 Ero vino s̄iri deco dic̄uri sorobu ero doab̄u. Eropirã ero árĩrã Jesu eroparĩc̄u pee mimi aĩri ȳus̄ure deco mera erã yosora ȳus̄ure yuc̄uḡu hisopo waĩc̄udiḡu ojogoro dirituma. Eropirã aĩ muju Jesu disiro s̄ituma.

30 Iri decore Jesu mimituha õpa arĩmi:

—Irip̄eta árĩca, arĩḡu ta ĩgu dipurure muhmusiudija s̄iria wami.

Yujuḡu surara Jesu patore gubuye gohra ñoseñumi ñoserimiji mera

31 Irin̄u Pascua bosenu core árĩb̄u. Iri bosenu ḡua baburire ḡua amurin̄u árĩb̄u. Eropirã gajin̄u Sabado árĩc̄u iri õari bosenu árĩc̄u crusarigue s̄irinirãre judio masa apidiabirima. Irin̄u ta bosenu ḡua judio masa bosenu w̄uari bosenu árĩro iib̄u. Eropirã erã s̄irinirã m̄ara irin̄u crusarigue árĩc̄u gamebirima. Eropirã pabianirã m̄urare erã ñigaḡu ḡõarire panuadorerã judio masa serẽnorã Pilatore erãre s̄iri purumujudorerã. Erã eropa iira p̄hr̄u erã d̄up̄u m̄urare aĩdijumorã iima.

32 Erã eropa dorec̄u surarap̄u crusari pohrogue eja, yajaric̄uḡure cop̄u árĩḡu ñigaḡure panuama: Gajip̄u árĩḡu s̄are eropa ta iima erã.

33 Eropa iiquererã Jesu ñigaḡure panuabonirã ĩgu pohro eja ĩgu s̄iridiḡu árĩc̄u ĩha panuabirima.

34 Eropa panuabirã yujuḡu surara ĩgu patore gohra gubuye ĩgure ñosemi. ĩgu eropa ñosec̄u mata ĩgu di, deco mera wirib̄u.

35 ĩgu eropa wac̄u ĩab̄u ȳuh̄u. Ȳuh̄u ip̄ure gojaḡu diaye m̄are werea. Diaye yu wereri árĩc̄u masia ȳuh̄u. M̄are irire werea m̄a sã Jesure m̄a umupeoburire.

36 Goãm̄u yare erã gojarap̄u werediro dopa ta eropa wab̄u. “Īgu ḡõare ne yuju ḡõare panuabirima,” erã arĩ gojadiro dopa ta Jesu ñigaḡu ḡõare ne yuju ḡõa panuabirima.

37 Eropiro gajip̄u sã Goãm̄u yare erã õpa arĩ gojayudiro dopa ta wab̄u: “Īgure erã ñosediḡu m̄urare ĩarãcoma erã,” erã arĩ gojadiro dopa ta ḡua Jesure erã ñosediḡu m̄urare ĩab̄u.

Jesu dũpũre masa gobegue yaañuma
Mt 27.57-61; Mr 15.42-47; Lc 23.50-56

³⁸ Īgu sĩrira pũhrũ José Arimatea majagu Jesu dũpũ mũrarore aĩ dijubu Pilatore serẽgu ejapu. Josẽpũ gajirã judio masare gũigu, Jesure umupeogu ĩgu arĩrire were-biridigu arĩmi. Eropigu ĩgu dũpũ mũrarore ĩgu serẽra pũhrũ Pilatopũ ĩgu dũpũre aĩdorepũ. Īgu aĩdorecũ José crusa pohro eraa Jesu dũpũ mũrarore aĩgã wami.

³⁹ Nicodemo sã ĩgu poresurire mohmorere treinta kilo nũcũrire aĩgãrimi Jesu dũpũ ĩgu amuburire. Yucũgu di pohga, mirra waĩcũri poresuri, yucũgu pohga mera arĩyoro ĩgu mohmorera. Īgu Jesu mera ñami weretamudigu arĩmi.

⁴⁰ Eropirã erã perã Jesu dũpũ mũrarore aĩma. Judio masa sĩrinirãre yaaro dopa ta ĩgu dũpũ mũrarore poresuri sũra pũhrũ suhri gasiri mera omama.

⁴¹ Crusague Jesure erã pabia wejẽdiro pohro pohe arĩbũ. Iri pohegue masa gobe utãyegue erã seara gobe arĩbũ. Iri gobere ne yujugu sĩridigũre cõanibirima dohpa.

⁴² Pascuanũ bosenu maja gũa judio masa baburire amurinũ arĩbũ. Eropirã iri gobe pohrogã crusa arĩcũ ero apima erã Jesu dũpũ mũrarore.

20

Jesu masa mũriañumi
Mt 28.1-10; Mr 16.1-8; Lc 24.1-12

¹ Domingo ñamiñarigã arĩcũ, boyoboro coregã María Magdalena Jesu masa gobegue ejapo. Erogue ejago iri gobere erã biharayere gajipũ tunuguraye arĩcũ ĩapo igo.

² Eropa ĩadigo arĩgo gũa pohrogue omagãrimo igo. Simo Pedro mera perã arĩbũ gũa. Eraa õpa arĩ weremo guare igo.

—Mari Opũ dũpũ mũrarore aĩcãnirã aħrama. Eropirã ĩgũre erã apidirore mari masibea, arĩmo igo guare.

³ Igo eroparĩcũ peerã, yũhũ Pedro mera gũa perã masa gobegue ĩarã wabũ gũa.

⁴ Eropa ĩarã warã gũa perã omagãabũ. Eropa omarã, yũhũ Pedrore omatarigãgu masa gobegue ejamũhtabũ.

⁵ Erogue ejagu muhmumereja ĩha acubũ iri gobere. Eropa ĩha acugu ĩgũre erã omara gasiro seyarore ĩabũ. Eropigu iri gobere ñajabiribũ.

⁶ Yũ eropa ĩara pũhrũgue Simo Pedro sã erami. Eraa masa gobegue ñajaa, ĩgu dũpũ mũrarore erã omara suhri gasirire ĩami ĩgu.

⁷ Eropigu Jesu dipurure erã omara gasiro sãre ĩami daja. Iri gasiro boje oyaro, yeguera gasiro arĩbũ.

⁸ Eropigu yu sã masa gobegue ñajabu. Jesu ïgu maricũ ïagu “Diaye ta Jesu masa m̄riañumi,” arĩ pepibu yuhũ.

⁹ Iri gobegue gũa waboro core Goãmũ yare erã gojarapũ Cristo s̄riburire erã wererare õaro gũa masinibiribu. Doh-paguep̄re iri gobere yu ïara p̄hrũ, “Diaye ta Jesu masa m̄riañumi,” arĩ pepibu yuhũ.

¹⁰ Eropa ïatuhajarã gũa wihigue dujaa wabu.

Jesu María Magdalenare dehyoañumi

Mr 16.9-11

¹¹ Eropi masa gobe disiporo María niguigo ore niguipo. Eropa orequerego ta muhmumereja igo ïhame acupo masa gobere.

¹² Eropa ïhame acugo perã anyuare boreri suhricurãre Jesu ïgu oyadiro m̄rarogue erã doacũ ïapo igo. Yujugu ïgu dipuru oyadiro doapu. Gajigu ïgu guburi oyadiro doapu.

¹³ Erãre igo ïacũ erãpũ igore serẽpiñorã:

—Nomeo, ¿dohpa ár̄ironore orego iiri m̄hu? arĩñorã erã.

—Yu Opũ d̄pũ m̄rarore aĩcãñirã ãhrama. Eropigo erã apidiore masibea yuhũ, arĩpo igo.

¹⁴ Eropa arĩtuha, majinugaja nijago Jesure ero niguigure ïapo igo. Eropa ïaquerego ta Jesure ïha masibiripo igo.

¹⁵ —Nomeo, ¿dohpa ár̄irono orego iiri m̄hu? ¿Noare amago iiri m̄hu? arĩpũ Jesu igore.

“Ih̄ i pohere ïhadibugũ ãhrimi,” arĩ pepiripo igo Jesure. Eropa arĩ pepigo õpa arĩpo igo:

—M̄hu ïgu d̄pũ m̄rarore aĩdigũ ár̄igu wereque m̄ apidiore yure. M̄ werera p̄hrũ aĩgora ïgu d̄pũ m̄rarore, arĩpo igo ïgure.

¹⁶ Igo eropa arĩra p̄hrũ Jesu õpa arĩpũ:

—María, arĩpũ.

Ïgu eropa piyucũ peego, majiñabeo igo Hebreo ya mera õpa arĩpo:

—Rabuni, arĩpo igo Jesure. Rabuni, erã ya mera arĩrã “Buhegũ,” arĩma.

¹⁷ Jesu arĩpũ:

—Yu Pagũ pohrogue m̄rianibea dohpa yuhũ. Yu eropa m̄rianibiricũ yure mohpiñabiricãque. Eropigo gajirã yaharã pohrogue waque. Erã pohrogue ejago õpa arĩ wereque: “Jesu õpa arĩdoremi m̄are: ‘Yu Pagũ pohrogue wabu iiaa. M̄a Pagũ sã ãhrimi ïgu. Goãmũ pohrogue wabu iiaa. M̄a yagu Goãmũ sã ãhrimi ïgu,’ arãmi Jesu,” arĩ wereque erãre, arĩpũ Jesu Marĩare.

¹⁸ Ïgu eropa arĩra p̄hrũ María Magdalena guare Jesu buherã pohrogue eraa weremo guare:

—Mari Opure ïabu yuhũ, arĩ Jesu igore guare weredor-
erare weremo igo.

Jesu ïgu buherãre dehyoañumi

Mt 28.16-20; Mr 16.14-18; Lc 24.36-49

¹⁹ Irinũ soorinũ ñamicague gũa Jesu buherã gũa acawer-
erãre judio masare güirã, gũa ya wihigue biha ñaja doabu
gũa. Gũa eropa doacũ Jesu gũa watope dehyoanũgaja õpa
arĩmi:

—¿Åhriri mũa? arĩmi.

²⁰ Eropa arĩtuha ïgu mojotorire, ïgu patore sãre guare
ïhmũmi. Eropirã gũa ïgure gũa opure masa mũriadigure
ïarã mucubiribũ.

²¹ Dipaturi Jesu guare õpa arĩmi daja:

—Õaro árĩque mũa. Yũ Pagũ ïgu yure obeodiro dopa ta
yũ sã mũare obeoa, arĩmi guare.

²² Eropa arĩtuhaja guare ïgu purisãmi. Eropa purisãgu
Espíritu Santore gũa ñeaburire ïhmugũ iimi. ïhmutuhaja
õpa arĩmi:

—Dohpaguere Espiritu Santore ñeaque mũa mũa mera
árĩbure.

²³ Masa erã ñeri dipuwajare bujawerecũ ïarã, “Mũa ñero
iirare cohãa,” arĩmasia mũa erãre. Erã bujawerebircũ
ïarã, “Mũa ñeri iirare cóãbiribũ,” arĩmasia mũa, arĩmi Jesu
guare ïgu buherãre.

Jesure masa mũriadigure Toma ïañumi

²⁴ Jesu gũa watope ïgu dehyoacũ Toma sũhrũadigu erã
arĩgu gũa mera marimi irisubure.

²⁵ ïgu eropa maricũ gũa ïgu mera majarã ïgure werebũ.

—Mari Opure gũa ïabu, arĩ wereribũ gũa ïgure.

Gũa eropa arĩ werequerecũ ta õpa arĩmi Toma:

—Ïgu mojotorire erã pabiara goberire ïabigu iri goberire
yũ mujusĩru mera puñabigu “Diaye ta masa mũriañumi,”
ne arĩsome. Eropigu ïgu patore gubuye árĩri gobere yũ
mojoto mera sĩ acubigu, “Diaye ta masa mũriañumi,” ne
arĩsome yuhũ ïgure, arĩmi Toma.

²⁶ Yuju semana pũhrũ gũa ïgu buherã gũa ya wihigue
árĩbũ. Irisubure Toma gũa mera árĩmi. Iri wihi bihara wihi
árĩbũ. Bihara wihi árĩquerecũ ta Jesu ñaja, gũa watope
dehyoanũgaja õpa arĩmi:

—¿Åhriri mũa? arĩmi.

²⁷ Eropa arĩtuha ïgu Tomare weremi:

—Ïaque yũ mojotorire. Eropi mũa mujusĩru mera yũ
mojotorire erã pabiara goberire puñaque. Eropigu mũa
mojoto mera yũ patore gubuye árĩri gobere sĩ acuñaque.

“Diaye árîbeaa,” arîbiricãque. “Diaye ta âhraa,” arîque m̃h̃u, arîmi Jesu Tomare.

²⁸ Īg̃u eropa arîra p̃hr̃u Toma ỹhr̃imi:

—M̃h̃u ỹu Op̃u âhraa. M̃h̃u yahag̃u Goãm̃u âhraa, arîmi Toma Jesure pare.

²⁹ —Ỹure m̃u ĩara p̃hr̃u ỹure “Diaye ta âhraa,” arãa. Gajirãp̃u ỹure ĩabiriquererã ta “Diaye ta âhraa,” arĭ umupeorãcoma. Eropirã erã turaro mucubirirã árĭrãcoma, arĭmi Jesu Tomare.

Jesure masa erã masiburire ip̃ure gojañumi Ñu

³⁰ Eropig̃u baja gajĭ sãre Goãm̃u Īg̃u turari mera ii ĩhm̃umi Jesu g̃ua mera árĭg̃u. Irire ĩg̃u iirare ip̃ure gojapehobirab̃u ỹh̃u.

³¹ Eropa gojapehobiriquereg̃u ta ip̃u ỹu wererare gojag̃u, “Jesu ta Cristo Goãm̃u ĩg̃u obeodig̃u âhr̃imi. Īg̃u diaye ta Goãm̃u mag̃u âhr̃imi,” m̃ua arĭ masiburire gojab̃u. Eropirã m̃ua ĩg̃ure umupeorã Goãm̃u mera m̃ua eropa árĭniguiburire gojab̃u ip̃ure.

21

Jesu siete ĩg̃u buherãre dehyoañumi

¹ P̃hr̃u Tiberia waĩc̃uri ditaru t̃uro dipaturi g̃uare ĩg̃u buherãre dehyoami daja. G̃uare dehyoag̃u õpa iimi ĩg̃u daja.

² Simo Pedro, Toma s̃hr̃uadig̃u erã arĭg̃u, Natanae Galilea yeba árĭri maca Caná waĩc̃uri maca majag̃u, g̃ua perã Zebedeo porã, gajirã sã perã g̃ua oã ñc̃u gamenere árĭb̃u.

³ G̃ua eropa gamenerera p̃hr̃u Simo Pedro õpa arĭmi:

—Wai wej̃eg̃u wag̃u iiaa, arĭmi ĩg̃u.

—G̃ua sã m̃u mera warãra, arĭb̃u g̃ua ĩg̃ure.

Eropa arĭtuha buha wab̃u. Eropirã dohodiru mera wab̃u. Iri ñamire g̃ua õaro boyotahmuquererã ne yujug̃u waim̃ure wej̃ebiricarab̃u.

⁴ Boyodiji merejac̃u Jesu imiporo ĩg̃u niguic̃u ĩarib̃u g̃ua. Eropa ĩaquererã ĩg̃ure ĩha masibiricarab̃u g̃ua.

⁵ Eropig̃u g̃uare õpa arĭ ser̃epimi:

—Ne, ¿wai wej̃eari m̃ua? arĭmi Jesu.

—Ne wej̃ebirab̃u, arĭ ỹhr̃ib̃u g̃ua.

⁶ —Dohodiru diayep̃u wej̃edire mehyuque. Irip̃u mehyurã wai wej̃erãca, arĭbeo niguimi g̃uare. Īg̃u eroparic̃u peerã ĩg̃u arĭdiro dopa ta mehyub̃u. G̃ua mehyura p̃hr̃u bajarã wai ñajama. Bajarã wai ñajac̃u ĩarã wej̃edig̃ure dohodirugue aĩsã turabiricarab̃u g̃ua.

⁷ Eropig̃u ỹh̃u Jesu ĩg̃u mahig̃u Pedrore wereb̃u:

—Mari Opu āhrimi sihī imiporo niguḡu, arību Pedrore.

Yu eroparīcū Jesu īḡu árīcū masiḡu, Simo Pedro īḡu suhrirore sañami. Wai wejēbu īḡu suhrirore tuweadiḡu árīmi. Īḡu suhrirore sañatuha diague yuriñajami.

⁸ Eropirā gajirā ḡua buherā dohodirugue árību. Cien metro yoaro diaguere payabu ḡua. Eropirā wejēdigure wai bajarā ñajadigure dohodiru mera taramajaabu ḡua.

⁹ Turogue tuhajarā pea niti dihta gose oyari peame weca waire īḡu mupunugupidigure ĩabu ḡua. Panru sãre ĩabu ḡua.

¹⁰ ḡua eropa ĩacū Jesu ḡuare oḡa arīmi:

—Dohparagã mua wejēnirãre bajamerãḡã aĩḡãrique, arīmi ḡuare.

¹¹ Īḡu eroparīcū Simo Pedro Jesu mera árīḡu īḡu sã dohodirugue ñaja, wejēdire tara majaami imiporogue. Pagarã wai ñajanirã ciento cincuenta y tres wai árīma. Bajarã wai ñajaquererã wejēdire ne yehguebirima.

¹² —Banirã arique, arīmi Jesu ḡuare.

—¿Noano āhriri muḡu? arī serēpiñabiribu ḡua īḡure. ḡua Opu īḡu árīcū masibu ḡua.

¹³ Eropiḡu Jesu peame pohrogue eja, panre aĩ ḡuare gueremi. Wai sãre gueremi.

¹⁴ Eropiḡu Jesu īḡu masa mურიara puḡru imiporo dehyoḡu uhresubu ḡuare īḡu buherãre dehyoḡu iimi.

Jesu Simo Pedro mera weretamuñumi

¹⁵ ḡua bara puḡru Jesu Simo Pedrore serēpimi:

—Simo, Jona magu, ¿oãre mu mahiro tauro yure mahiri muḡu? arīmi Simo Pedrore.

—Opu, mure mahia yuḡu. Mure yu mahirire masia muḡu, arī yuḡrimi Simo Pedro.

Jesu arīmi:

—Eropiḡu ovejagãre mari ejodiro dopa ta yaharãre buheque muḡu, arīmi Jesu.

¹⁶ Eropa arītuha dipaturi īḡu Simo Pedrore serēpimi daja:

—Simo, Jona magu, ¿yure mahiri muḡu? arīmi Jesu.

—Opu, mure mahia yuḡu. Mure yu mahicū masia muḡu, arī yuḡrimi Simo Pedro.

Jesu arīmi daja:

—Ovejare ĩhadibugū ovejare īḡu oaro ĩhadiburo dopa ta yaharãre oaro ĩhadibuque, arīmi Jesu Pedrore.

¹⁷ Eropa arītuha dipaturi Simo Pedrore serēpimi:

—Simo, Jona magu, ¿diaye ta yure mahiri muḡu? arīmi Jesu daja.

Uhresubu īḡu eropa serēpicū peḡu Simo Pedro turaro bujaweremi.

—Opɯ, mɯhɯ masipehoa. Mɯre yɯ mahicũ masia mɯhɯ, arĩmi Simo Pedro.

—Ovejare mari ejodiro dopa ta yaharãre buheque mɯhɯ.

18 Diaye mɯre arĩgɯ iiaa. Mɯhɯ mamɯ árĩgɯ mɯ suhrire saña, mɯ gamerogue curimɯribɯ mɯhɯ. Eropa árĩdi árĩqueregɯ ta pɯhrɯ mɯhɯ bugɯ árĩcũ, mɯ mojotorire sĩbeocũ gajigɯ mɯre mɯ suhrire sãgɯcumĩ. Eropigɯ mɯ wadiabirogue mɯre aĩgãgɯcumĩ, arĩmi Jesu Simo Pedrose.

19 Eropa arĩgɯ Simo Pedro dohpa wa ĩgɯ sĩriborore wereyugɯ iimi. Eropigɯ Simo Pedro sĩrigɯ Goãmɯre, “Ōagɯ, turagɯ ãhraa,” masa erã arĩcũ ĩgɯ iiborore wereyugɯ iimi. Eropigɯ Pedro mera weretamutuhagɯ òpa arĩmi Jesu ĩgɯre:

—Diaye ta yɯ buhediro dopa iique mɯhɯ, arĩmi Jesu Pedrose.

Jesu ĩgɯ mahigɯ ipũre gojadigɯ árĩmi

20 ĩgɯ eroparĩcũ Pedropɯ yɯre Jesu ĩgɯ mahigɯre erãre yɯ nɯrusiacũ ĩami ĩgɯ. Yɯpɯ ĩgɯ ĩagɯpɯ ero core Jesu pohrogã badoagɯ ĩgɯre òpa arĩdigɯ árĩbɯ. “Opɯ, ¿mɯre ĩhaturĩrãre wiabupɯ nihino árĩcuri ĩgɯ?” arĩ Jesure serẽpidi árĩbɯ yɯpɯ. Eropa yɯre ĩagɯ Pedro serẽpimi Jesure:

21 —Opɯ, ¿ihĩ Ñupɯ dohpa wagɯcuri? arĩ serẽpimi:

22 —Ire mɯre werebeaa. I yebaguere yɯ dujariboro core ĩgɯre árĩniguicũ yɯ iicũ irire masibea mɯhɯ. Eropigɯ ĩgɯ waborore guñabita mɯhɯ. Diaye ta yɯ buhediro dopa iique mɯpɯ, arĩmi Jesu Pedrose.

23 Irire ĩgɯ yɯre Ñure wererare peerã árĩpehrerã Jesu yarã weresiririma. Irire weresirirã òpa arĩrima erã: “Jesu ĩgɯ mahigɯ buhegɯ sĩrisome,” arĩ weresiririma yɯre Jesu yarã erã basi. Erã eropa arĩquerecũ ta “ĩgɯ sĩrisome,” arĩgɯ iibirimi Jesu. “I yebaguere yɯ dujaricũ ĩgɯre árĩniguicũ yɯ iicũ irire masibea mɯpɯ,” arĩmi Jesu Pedrose.

24 Jesu buhegɯ ire weregɯ, ipũre gojagɯ ãhraa yɯhɯ. Eropirã i wereri diaye ta árĩcũ masia mari.

25 Baja gaji sãre Jesu iimi. ĩgɯ iirare mari gojapehocũ iripũri gojarapũri baja tariari pũri waboya. Eropiro iripũrire mari dibucũ sihabiriboya i yeba. Ʋjɯtɯria waboya yɯ pepicũ. Iripẽta ãhraa.

Jesu buhedore ĩgu apinirã erã iirare wereripũ ãhraa

—*Espíritu Santo arigucumi, arĩñumi Jesucristo ĩgu buherãre*

¹⁻² Teófilo, ero core yu gojamũhtarapũ mera Jesu ĩgu iirare, ĩgu buherare mũre weretuhabu. Te umarogue ĩgu mũriarare weretubu. Jesu ĩgu mũriaboro core ĩgu Espíritu Santo turari mera dorepũ ĩgu apinirãre. Erã ĩgu beyenirã árĩñorã.

³ Eropi Jesu ĩgu crusague ĩgu sĩrira pũhrũ yujuyerisuburi dupucũgu dehyoapũ ĩgu apinirãre. Cuarenta nũri pũhrũ dehyoatupũ. Eropigu ĩgu ĩgu basi ojocarigu árĩrire ĩhmupũ erãre. Eropa dehyoagu Goãmu mari Pagu ĩgu opu árĩrire õari buherire werepũ erãre.

⁴ Gajisubu Jesu ĩgu apinirã mera árĩgu õpa arĩ erãre werepũ:

—Jerusalén ta árĩnique dohpa. “Espíritu Santore mũare obeogũra,” yu Pagu ĩgu arĩdigũre corenique. Irire ĩgu eropa arĩrare mũare wereabu yũhũ.

⁵ Ñu mũare waĩyegu deco mera mũare waĩyemi. Yũpũ ĩgu iira tauro iigũra mũare. Espíritu Santo mua mera ĩgu árĩnigũcãcũ iigũra mũare, arĩpũ Jesu.

Jesu umarogue mũriara

⁶ Eropi gajisubu utãgũgue Olivo waĩcũdigũgue Jesu erãre dehyoacũ erã serẽpiñorã ĩgũre:

—Opu, ¿i Israe yebare mari ya yebare dohpãrĩcũ guare dipaturi doreburire apibocuri mũhũ guare? ¿Dohpãrĩcũ mari acawererã gohrare opu acugũcuri mũhũ? arĩñorã ĩgũre.

⁷ Erã eroparĩcũ peegu Jesu õpa arĩpũ:

—Mari Pagu dihta irinũrire mua ya yebare mua õaro árĩborore apimasimi. Irinũrire mũare masiya mara.

⁸ Eropirã mũare Espíritu Santo ĩgu eracũ Goãmu ya turarire oparãca mua. Iri turarire mua oparã Jerusalén majarãre, árĩpehrerã Judea majarãre, Samaria majarãre, árĩpehreri yeba majarãre õari buherire buherãca mua yaha árĩburire. Yu sĩrirare, yu masa mũriarare erãre buherãca mua, arĩ werepũ Jesu erãre.

⁹ Eropa arĩ weretuhaja, Jesu umarogue mũria wapũ. Erã ĩgũre erã ĩhanũrũsia mujucũ imica cururi pohecague ñaja dedere mũria wapũ.

10 Eropirã erã Jesu ïgu m̄ariagure erã ïhanarusia mujurisubu perã anyua boreri suhricurã Jesu ïgu apinirã pohro dehyoanugajañorã.

11 Eropirã erãre õpa arĩñorã:

—M̄na Galilea majarã, ¿duhpirã ïhamuju niguirã iiri m̄na? Ihĩ Jesu umarogue m̄ariagu, ïgu m̄ariadiro dopa ta dipaturi arigucumi daja, arĩ wereñorã anyua.

Jesu ïgu apinirã Judare gohrotobure beyeñorã

12 Eropiira p̄hr̄u Jesu yarã utãgugue Olivo waicudigugue árĩnirã dijari, Jerusalengue dujajañorã. Irigu utãgu yuju kilómetro wecañari Jerusalén ejaboro pohro árĩyoro.

13 Dujaja erã umarogue erã árĩri taribugue m̄aria wañorã. Oã árĩñorã erã: Pedro, Ñu, Santiago, Andre, Felipe, Toma, Bartolomé, Mateo, Santiago, Simo, Juda árĩñorã. Santiagop̄ Alfeo magu árĩp̄u. Simop̄u celote waicuri curu majagu árĩp̄u. Judap̄u Santiago acaweregu árĩp̄u.

14 Eropirã bajasuburi oã árĩpehrerã, nome mera, María Jesu pago mera, Jesu pagu porã mera õaro gamenere, turaro mera Goãmure mari Pagure serẽmuriñorã.

15 Eropi irinurire masa bajarã ciento veinte ejaboro gohra gamenereñorã. Eropigu Pedrop̄u ïgu mera majarã Cristo yarã watope n̄ugaja, werep̄u erãre.

16 —Yu acawererã, Goãm̄u iribojegue ïgu arĩdiro dopa ta eropa wahaa. Irire Espĩritu Santo Davire weredoreñumi Juda m̄uru eropa warare. Juda Jesure ñeha wejẽmorãre ïhmudi árĩmi.

17 Juda m̄uru mari mera Jesu yare ii, gua mera majagu ta árĩrimi.

18 Judap̄u ïgu Jesure ïhmura wajare iri niyerure ïgu wiara p̄hr̄u ïgu basĩ wejẽ s̄irip̄u. Eropigu yuhridija wa, ïgu guramisida yehguea s̄iria wap̄u. ïgu wiara niyeru m̄ura mera gajirã merogã yebare asũñorã.

19 Eropirã árĩpehrerã ohõ Jerusalén majarã masipehrecãma Juda m̄uru ïgu ñero warare. Eropa masirã ïgu niyeru mera erã asũra yebare Acéldama di cóari yeba waicua, arĩma iri yebare.

20 Iribojegue erã arĩ gojadiro dopa ta eropa wahãmi Juda m̄uru. Salmo waicuripugue õpa arĩ gojañuma:

Ïgu arĩdirore cóadiro árĩporo. Eropirã gajirã ïgu arĩdirore árĩbircãporo, arĩ gojañuma.

Ohõ sãre õpa arĩ gojañuma:

Gajigu ïgu mohmerare gohrotogu árĩgucumi, arĩ gojañuma Salmogue, arĩp̄u Pedro.

21-22 “Eropirã mari yujugu beyerã Juda m̄urure gohrotobure. Ñu waĩyegu ïgu masare buherasubu árĩdigure,

Jesu mera mari mera árīdigüre beyero gahmea mari mera majagü árībure. Jesu masa müriacü sãre ñadigüre beyero gahmea. Eropä beyera pührü Jesu ñgü masa müriarare mari mera buhegücumi, arī wererü Pedro ñgü acawererãre Cristo yarãre.

²³ Ñgü eroparīcū peerã perãre beyedoboñorã erã. Yujugü José Justo waicugüre beyeñorã. Ñgü Barsabá erã arī piyugü árīpü. Eropirã gajigüre Matia waicugüre beyeñorã.

²⁴⁻²⁵ Erã perãre beyedobotuhaja, erãre Goãmure õpa arī serẽñorã:

—Mũhü gua Opü árīpehrerã masa erã pepirire masia. Oã ãhrima gua perã beyerã. Juda mürure gohrotobure nihi mü gamegüre beyeque. Juda mürü Jesure cóadigü peamegue wadigü árīmi. Eropigü ñgüre gohrotogü Jesu ñgü apidigü árīgücumi. Eropigü gua mera õari buherire buhegücumi, arīñorã erã Goãmure.

²⁶ Eropä arīrã ta utã mera deamüriñorã beyemorã. Matia yañe õaro wiricü, Matiarü Jesu ñgü apinirã once apinirã mera majagü dujarü.

2

Espíritu Santo ñgü yarã mera árīñugapü

¹ Eropii Pentecoste waicürinü árīñü erã yujuro mera árīpehrerã yuju wihi gamenereñorã.

² Irisubure ta miruñe bürigã ariro dopa ta ñmarogue büsuro cariyoro. Ero eropä büsuro caricü peeñorã árīpehrerã iri wihigue gamenere árīrã.

³ Eropiro peame porãrigã dopa bejari erã árīpehrerã dipu wecare dehyoayoro. Iri peame porãrigã nediru dopa bejari dehyoayoro.

⁴ Eropigü Espiritu Santo erapü erãre ñgü turarire ogü arigü. Eropirã Espiritu Santo erãre ñgü itamuropẽ erãpü gajirã yare õaro wereniguinugañorã.

⁵ Irinürire Jerusalén bajarã judio masa eranirã árīñorã. Goãmure umupeorã erarã árīñorã. Erã macari nücu majarã árīñorã.

⁶ Eropirã ñmarogue büsücü peerã masa bajarã Jesu buherã pohrogue gamenere wahgãñorã. Masa nücu yare Jesu buherã erã wereniguicü peeñorã. Erã eropä wereniguicü peerã, erã pee üca wañorã.

⁷⁻⁸ —Yahoo, ¿Duhpirã oã Galilea majarã árīquererã õaro mari yare wereniguiri? Erã mari masa dehyoadirogue árīnirã iro dopa ta wereniguirã iima, arīñorã erãpü.

⁹⁻¹⁰ Árīpehrerã mari yare dohpaguere wereniguirã iima. Partia majarã, Media majarã, Elam majarã, Mesopotamia

majarã, Judea majarã, Capadocia majarã, Ponto majarã, Asia majarã, Frigia majarã, Panfilia majarã, Egipto majarã, Africa majarã, Cirene majarã, Romague arirã ãhraa mari. Yujurãyeri judio masa ãhraa mari. Gajirã judio masa áribirã judio masa ya buheripure buherãgue ãhraa mari.

¹¹ Creta majarã Arabia majarã sã mari mera áhrama. Eropirã oã mari yare erã wereniguicã peea mari. Erã mari ya mera Goãmũ turari mera ãgu õaro iirare wererã iima, arĩ wereniguiñorã masa erã basi.

¹² Erã eropa arĩrã uca wañorã. Erã ãarare erã peerare õaro masibiriñorã.

—¿Dohpãrirono oã gajirã ya mera Goãmũ yare eropa õaro wereniguiñorã? arĩ game serẽpiñorã erã erã basi.

¹³ Eropirã gajirã wereyañorã.

—¿Dohpa oã siburi ihrinijarã mererã iiri? arĩ wereyañorã gajirã erã basi.

Pedro masare werepu

¹⁴ Eropigu Pedro once Jesu ãgu apinirã mera wahgãnugaja, masare werepu:

—Mũa Judea majarã, áripheerã Jerusalengue arĩrã, ire yu werecũ õaro peeque mũa.

¹⁵ Mũa pepiri diaye áribeaa. Dohpaguere nueve ãhraa. Umũgue ãhraa. Eropirã oã merebeama.

¹⁶ Oã Goãmũ iribojegue ãgu werediro dopa ta iirã iima. Irire Joere Goãmũ ya weremuhtadigure ire weredoreñumi Goãmũpu.

¹⁷ Ojogorocurinũ árĩcũ õpa árĩroca: Yũhũ Espiriture masare áripheerãre obeogura. Eropirã mũa porã Goãmũ yare wererãcoma. Eropirã mũa mera majarã mamarã Goãmũ deyoro moarire ãarãcoma. Eropirã mũa mera majarã murãpu quẽrire quẽrãcoma.

¹⁸ Eropigu yu pohro majarãre yu Espiriture obeogura. Eropirã erã yahare wererãcoma.

¹⁹ Eropigu yu turari mera iigũca umũsigue. Yebague sãre yu turari mera irire ihmũgũca. Eropigu di mera, peame mera, imica mera ihmũgũca yu turarire.

²⁰ Yu eropiicũ abe umũ majagu naitã wagũcumi. Nami majagu abe diagu gũhyaro wagũcumi. Opa waroca Cristo mũa opu ãgu dujariburinũ, yu arĩranũ core. Irinũ ãha uca warãca mũa. Eropiro irinũ gũhyarinũ árĩroca.

²¹ Eropiro õpa árĩroca: Áripheerã masa Cristore erã ñerire cóãdore serẽnirãre ãgu erãre peamegue wabonirãre taugũcumi Goãmũ, arĩ gojañumi Joe, arĩpu Pedro masare.

22 “Múa Israe masa yuhũ werecũ peeque, arĩpu daja. Jesu Nazare majagupu Goãmũ ãgũ obeodigu árĩmi. Jesure “Goãmũ obeodigu ãhrimi,” masa erã arĩ masiboro dopa Jesu Goãmũ turari mera deyoro moarire masare ii ãhmucũ iidi árĩmi Goãmũ Jesure. Múa irire masia.

23 Múa Jesure wejẽdorecũ Goãmũ iribojegue ãgũ “Eropa waroca,” ãgũ arĩdiro dopa ta eropa wahabu. Eropirã mua Jesure crusague wejẽdorerã wiabu ãgũre masa ñerãre.

24 Goãmũpu Jesu sĩridigũre masuami. Eropigũ dipaturi ne sĩrisome ãgũ. ãgũ sĩri wajabeami. Eropa ojocarinigũicãbu ãhrimi.

25 Ōpa arĩñumi Davi iribojegue majagu Cristo ãgũ arĩbodiropo dopa ta:

Yũ Orũ, yũ mera ãhraa mũhu. Ŭmũri nũcu Goãmũ yũ Orũ yũ pohro mũhu árĩcũ ãamũrabũ yuhũ gũibiriboro dopa.

26-27 Mũhu Goãmũ yũ sĩporãre sĩrinirã erã árĩroguere ne cóãsome. Yũre mũ mahigũre ñerogue yũ sĩporãre cóãsome mũhu. Yuhũ mũ pohro majagu mũre umupeogu ãhraa. Yũ dũpũre boadoresome mũhu. Eropigũ bũrigã mucubiria. Mucubiriri mera werenigũia. Eropigũ mũre Goãmũre bũrigã umupeogu árĩgũ gũiro mariro õaro árĩcãa.

28 Yũre dipaturi ojocaricũ iigũca mũhu. Yũ mera mũhu árĩcũ bũrigã mucubiria, arĩ gojañumi Davi Cristo ãgũ arĩbodiropo dopa ta, arĩpu Pedro.

29 “Acawererã, õpa õaro weregũra mũare Davire mari acaweregũ mũrũre, iribojegue majagũre, arĩnemopũ daja Pedro. ãgũ Davi sĩria wañumi. Eropigũ ãgũre erã yaara gobe dohpaguere árĩnia. Eropigũ “Yũ dũpũre boadoresome mũhu,” arĩ gojagũ ãgũ basi waĩpeo weregũ iibirĩñumi.

30-31 Iribojegue Goãmũ Davire õpa arĩñumi: “Diaye ta arĩgũ iiaa. Mũ pãramerã árĩturiarã mera majagu mũ iiro dopa ta i maca majarã weca opu árĩgũcumĩ,” arĩñumi Goãmũ Davire. Davi Goãmũ yare wereyugũ árĩñumi. Eropigũ Cristore Goãmũ ta opu acuborore masigũ, Cristo ãgũ masa mũriaborore weremũhtatuhañumi Davipũ. Ōpa arĩ wereñumi ãgũ: “ãgũ sĩrinirã erã árĩroguere árĩwajosome. ãgũ dũpũ ero boasome,” arĩñumi Davi.

32 Ìre Jesucristore Goãmũ masuami. ãgũ masudigũre gũa árĩpehrerã ãabu.

33 Eropigũ Cristo mũmarogue mari Pagũ diayepũ árĩcumĩ doregũ árĩgũ. Eropigũ ãgũ Pagũ “Espĩritu Santore yebague obeogũra,” arĩpu ãgũre. Eropigũ Cristopũ Espĩritu Santore dohpaguere obeomi gũare. Eropirã Espĩritu Santore ãgũ gũare obeorare ãarã iiaa mua. Eropirã mua peea.

34 Davipɔ Jesu ĩɔ mɔriadiro dopa ta ɔmaroguere mɔriabiriɔumi. Eropigu ĩɔ ĩɔ basi ɔpa arĩɔumi:

Goãmu arĩmi yɔ Opɔre: “Ohɔ yɔ diayerɔ doaque mɔhu.

35 Eropigu mɔre ĩhaturirãre mɔre tarinɔgabasagura yɔhu mɔ pohro majarã dopa árĩmorãre,” arĩmi Goãmu yɔ Opɔre, arĩ gojaɔumi Davi.

36 “Eropirã árĩpehrerã Israe masa ire ɔaro masique mɔa. Ihĩ Jesure mɔa crusague wejẽdigure mɔa opɔ acuami Goãmɔpɔ. ĩɔure mɔare taubure Cristore apiami Goãmɔ, arĩ werepɔ Pedro masare.

37 ĩɔ eroparĩcũ peerã buřigã bujawere, gũirã masapɔ Pedro sãre serẽpi ĩaɔorã:

—Gua acawererã, ¿dohpa iirãcuri gua? arĩ serẽpi ĩaɔorã erã.

38 Erã eropa arĩ serẽpi ĩacũ yɔhripɔ Pedro sã.

—Mɔa ñero iirire bujawererã árĩque. Ɔarire gohrotoque. Eropirã Jesu waĩ mera waĩyenirã árĩque mɔa árĩpehrerã. Mɔa eropa iicũ mɔa ñerire cãdijigucumi Goãmɔ. Mɔa eropa iicũ Espĩritu Santo mɔa mera árĩgucumi. Goãmɔ ĩɔ Espĩritu Santore eropa ocãgucumi mɔare.

39 Mɔare, mɔa porãre, mɔa pãramerã árĩturiarãre yoarogue majarãre, árĩpehrerã Goãmɔ mari Opɔ ĩɔ beyenirãre “Diaye ta itamugura mɔare,” arĩ apiɔumi Goãmɔ, arĩpɔ Pedro masare.

40 Eropa arĩtuhaja baja werenemopɔ Pedro. Eropigu turaro mera werepɔ erãre.

—I yeba majarãre erã ñero iira dipuwaja dipuwaja moagucumi Goãmɔ. Eropirã mɔapɔ Goãmɔ yarã árĩque. Mɔa eropa árĩcũ ĩɔ mɔare dipuwaja moasome, arĩpɔ Pedro masare.

41 ĩɔ eroparĩcũ peerã bajarã ĩɔ wereniguirire ɔaro peeɔorã. Eropigu ĩɔ sã erãre waĩyerɔ. Eropirã Goãmɔ yarã mera majarã tres mil masa wanemoɔorã.

42 Eropirã erã masa Cristo ĩɔ apinirã mera ɔmuri nɔcu árĩmuriɔorã. Eropirã erã buherire ɔmuri nɔcu peemuriɔorã. Erã barire game guere, Goãmure serẽ, Cristo ĩɔ apinirã mera ɔaro árĩcãɔorã erã.

Jesu yarã ne árĩnɔgarã erã árĩricurire werepɔ Luca

43 Eropii Goãmɔ ĩɔ turari mera deyoro moarire ii ĩhmuɔorã ĩɔ apinirã. Erã eropa iicũ ĩarã masa árĩpehrerã ĩha ɔca waɔorã.

44 Eropirã árĩpehrerã Jesure umupeorã gamenere, ɔaro árĩcãɔorã. Eropirã erã yare game gueremuriɔorã.

⁴⁵ Erã yare dua, árĩpehrerãre gajinore moorãre erã nũcu omuriñorã erã.

⁴⁶ Eropirã umuri nũcu erã Goãmũ wihigue gameneremuriñorã. Árĩpehrerã yujurãyeri erã wirigue yujuyeri cururi mucubiriri mera gamenere bamuriñorã.

⁴⁷ Erã eropa gamenererisubu “Goãmũ ðagũ ãhrimi,” arĩ umupeomuriñorã. Eropirã gajirã masa erãre gametarimuriñorã. Eropigũ umuri nũcu Goãmũ gajirãre ĩgu yarã wacũ iimuripũ.

3

Curimasibigũ ðagũ warũ

¹ Ñamicague tres árĩcũ Goãmũre serẽrisubu árĩcũ Pedro, Ñu mera Goãmũ wihigue warã iñorã. Iri wihi disiporo yujugũ umũ doapũ.

² Umuri nũcu iri wihi disiporo ðari disiporo waĩcũri disiporo gajirã ĩgũre aĩgãri duhudoboñorã. ĩgu umurũ ne masa dehyoagũgue ta curimasibigũ árĩpũ. Eropigũ ĩgu iri disiporo pohro doagũ niyerure serẽmuripũ iri wihire ñajarãre.

³ Eropii Pedro, Ñu iri wihigue erã ejanũgajacũ curimasibigũpũ erãre ĩha, niyerure serẽpũ.

⁴ Eropirã erã Pedro, Ñu mera ĩgũre ĩha, Pedropũ ðpa arĩpũ:

—Guare ĩaque mũhũ, arĩpũ Pedro ĩgũre.

⁵ ĩgu eroparĩcũ peegũ erãre ĩha “Niyerure orãcoma yũre,” arĩ pepiripũ.

⁶ ĩgu eropa arĩ pepiquerecũ ta Pedro ĩgũre ðpa arĩ werepũ:

—Niyerure opabeaa yũhũ. Opabiriqueregu ta ire iigũra yũhũ mũre. Jesucristo Nazare majagu ĩgu turari mera curique mũhũ, arĩpũ Pedro curimasibigũre.

⁷ Eropa arĩgu ta ĩgu mojtore diayerũ maja mojtore ñeha, ĩgũre tarawahgũ nugupũ. Irisubu ta curimasibigũ ĩgu guburire, ĩgu ñigarire turari ñajayoro.

⁸ Iri eropa ñajara pũhrũ ĩgu wahgãnũgajapũ. Eropigũ ĩgu waha buhrima mũria “Goãmũ turagu ðagũ ãhrimi,” ĩgu arĩ mucubiridiro mera erã mera Goãmũ wihigue ñajaapũ pare.

⁹ ĩgu eropa curicũ, “Goãmũ ðagũ ãhrimi,” arĩ gaguinigucũ masa árĩpehrerã ĩgũre ĩañorã.

¹⁰ Eropirã masa ĩgũre ĩha masiñorã. “Thĩ iri wihi maja disiporo ðari disiporo pohro ĩgu niyerure serẽ doagu ãhrimi,” arĩñorã erã. Eropirã ĩgu eropa curicũ ĩarã ĩhamaria wañorã.

Pedro Goãm̃ wihigue masare buhep̃

11 Eropii curimasibiridig̃ Pedro sãre ïg̃ duhubirisubu, masa árĩpehrerã ïhamaria warã Pedro sã pohro omagã, gamenereñorã. Erã Goãm̃ wihigue árĩrã Salomo waĩc̃uripugue árĩñorã.

12 Erã eropa gamenerera p̃hr̃ Pedrop̃ werep̃ erãre.

—M̃a Israe masa, ¿duhpirã ïre ïha ucari? ¿Duhpirã guare m̃a ïhanururi? Guap̃ gua ya turari mera, Goãm̃re gua umupeori mera, gua ejatuharo ïre curicũ iibirab̃ gua. Jesu irire iiami.

13 Mari ñec̃ s̃marã m̃ra Abrahã, Isaa, Jacobo m̃ra Goãm̃re umupeom̃riñorã. Erã umupeodig̃ur̃ Goãm̃ur̃ ïg̃ mag̃re Jesure turag̃, ðag̃ ïg̃ árĩcũ ïhmum̃rimi. M̃a Jesure ïhaturirãre ohab̃. Eropig̃ Pilato ïg̃re ïg̃ peresugue wiudiacũ m̃ar̃ ïg̃re ïg̃ wiucũ gamebirab̃. Pilatore Jesure ohab̃ m̃a.

14 Pilato ïg̃re wiudiarami. M̃ar̃ Jesure ðag̃re, ðaro iig̃re gamebirã gajig̃re masa wej̃dig̃ur̃re wiudoreab̃ m̃a.

15 Eropirã Jesure mari ojocaricũ iig̃re wej̃ab̃ m̃a. ïg̃ s̃ricũ Goãm̃ ïg̃re masuami. ïg̃re masudig̃re gua ïab̃.

16 Eropirã gua ïg̃re umupeorã ãhraa. Gua eropa umupeocũ ïag̃ ïre m̃a dohpague ïag̃re m̃a ïha masig̃re Jesup̃ ïg̃ turari mera ïg̃ curicũ iiami.

17 “Ỹ acawererã, mari oparã mera Jesure ðaro masibiri-quererã ïg̃re wej̃ab̃ m̃a. Irire masia ỹh̃.

18 Iribojegue majarã Goãm̃ yare werem̃htanirã Goãm̃ erãre ïg̃ weredoreldiro dopa ta wereñuma erã sã. “Cristo ñero tarig̃cum̃,” arĩ wereyũñuma erã. Erã eropa arĩ wereldiro dopa ta eropa wab̃ dohpaguere.

19 Eropirã dohpaguere m̃a ñero iirare bujawererã árĩque. Óarip̃re gohrotoque. Cristore umupeoque. M̃a eropa iicũ m̃a ñerire cãdijig̃cum̃ Goãm̃. Eropig̃ m̃are mucubiririr̃re apig̃cum̃ ïg̃. Eropirã ðaro s̃ñajarãca.

20 Eropig̃ Goãm̃ Cristore ïg̃ beyedig̃re m̃are obeog̃cum̃ daja. Cristo Jesu ta ãhrimi.

21 ïg̃ Jesu Goãm̃ pohrogue árĩcum̃ dohpa. Iribojegue Goãm̃ ïg̃ yare werem̃htanirãre wereyudoreñumi ïg̃ iiburire. ïg̃ wereldiro dopa ta árĩpehrero amug̃ iicum̃. ïg̃ amutuhaja Cristore obeog̃cum̃ daja.

22 Moise irire wereg̃ ðpa arĩñumi: “Mari mera majag̃re mari acawereg̃re Goãm̃ yare werem̃htag̃re Goãm̃ mari Op̃ obeog̃cum̃ m̃are. Ỹre ïg̃ obeeldiro dopa ta obeog̃cum̃ ïg̃ sãre. Eropirã m̃are ïg̃ werecũ peephecarãca m̃a.

²³ Ōpa áríroca. Árīpehrerā īgure peebirā, īgu dorerire iibirā īgu cóānirā árīrācoma. Goāmū yarā mera majarā árīsome erā,” arīmariñumi Moise iribojeque.

²⁴ “Árīpehrerā Goāmū yare weremūhtanirā nūcū, Samue īgu pūhrū árīrā sã i dohpague warire wereyuñuma.

²⁵ Mari ñecū sūmarāre iribojegue majarāre “Masare ōaro iigura,” arī weremariñumi. Īgu erāre werediro dopa iimi marire dohpaguere. Eropigū Abrahāre īgu arīdiro dopa ta mari sāre arī weregū iññumi. Ōpa arī wereñumi Goāmū Abrahāre: “Árīpehreri yeba majarāre ōaro iigura. Ōpa irire iigura: Mū acaweregū pūhrū árīgūpū masare ōaro iibasagūcumi yare,” arīññumi Goāmū Abrahāre.

²⁶ Maripūre Goāmū Jesure īgu magure īgu masudigure mari pohrogue obeomūhtami mari ñero iirare cóābure. Eropa iigū īgu mūare ōaro iiami, arīpū Pedro erāre.

4

Pedro, Ñu mera oparāre weretamuñorā

¹⁻³ Īgu eropa wereniguisubu pahia, Goāmū wihire corerā surara opu, saduceo masa sã erāre peeñorā. Ōpa buhepu Pedro Ñu mera masare:

—Jesu īgu sīrira pūhrū masa mūria wami. Īgu eropa masa mūriacū ĩarā, pūhrū mari sã īgu yarā mari masa mūriaborore masia mari, arī werepu Pedro sã. Erā eroparīcū peerā, oparāpū erā mera guañorā. Eropa guarā naimerecū ĩarā erā Pedrore, gajirā Jesu apinirā sāre ñeha, peresu iññorā.

⁴ Oparā eropa gamebiriqerēcū ta masa bajarā Goāmū yare Pedro sã buherire peerā “Diaye ta āhraa,” arī pepiñorā erā. Eropirā Jesu yarā bajarā wañorā. Erā ūma dihtare queocū Jesure umupeorā cinco mil masa árīñorā.

⁵ Eropii gajinū iri maca majarā mūrā, oparā, judio masa buherā mera Jerusaléngue gamenereñorā.

⁶ Eropigū pahia opu Ana waīcugū ero árīpū. Īgu acawererā sã árīñorā. Caifa, Ñu, Alejandro, gajirā mera Ana acawererā árīñorā.

⁷ Eropirā erā Pedro sāre erāre gamebeocū, surarapu peresugue erāre aīwiu oparā watopegue erāre aī ejañorā. Erā eropa iira pūhrū oparā serēpi ĩañorā Pedro sāre.

—¿Noa ya turari mera mūa curimasibigure ōagū iiarī? ¿Noa āhriri mūare irire iidoregū? arī serēpi ĩañorā erā.

⁸ Erā eroparīcū peegu Espíritu Santo īgu itamurire ōaro opagu werepu Pedro erāre.

9 —Múa oparã, múa murã, ¿gua curimasibigure gua òagu iirare serēpi ïarã iiri múa guare?

10 Ire masique múa árïpehrerã, Israe masa. Ire Jesucristo eropa iiami. Jesu Nazare majagu, múa crusague wejēdigu, Goãmũ masudigu, ïgũpũ ihĩ curimasibigure òagu wacũ iiami. Eropirã ïre dohpaguere múa ïhuro ïgu curicũ ïhaa múa. Òpa àhraa Goãmũ yare erã gojarapũgue Cristore wereyurò:

11 “Ihĩ Cristo utãye iro dopa ta Goãmũ beyedigu àhrimi. ïgu Goãmũ beyedigu árïquerecũ masa ïgure gamesome. ïgure erã gamebiriqerrecũ Goãmũ ïgure opu acuami árïpehrerãre dorebure,” arĩ gojañumi iribojegue.

12 Ne gajigu masare peamegue wabonirãre taugu ne marimi. I yebaguere Jesu dihta masare taugu àhrimi. Ne gajirã ïgu iro dopa arĩrã ne marima, arĩ werepũ Pedro erãre.

13 ïgu eropa arĩ werera pũhrũ, Pedro Ñu mera buheya marirã erã arĩcũ ïarã, güiro mariro erã buhecũ ïarã, murã, oparã, judio masa buherã mera pee uca wañorã. Eropirã Jesu iro dopa erã buhecũ ïarã, òpa pepiñorã erã. “Pedro, Ñu sã diaye ta Jesu mera majarã ta àhrima oã,” arĩ pepiñorã erã.

14 Eropigu curimasibiridigu Pedro sã mera árïpũ. ïgu, ïgu òagu arĩcũ ïañorã murã, oparã, judio masa buherã mera. Eropirã erã Pedro sãre “Ñero iirã iiaa,” arĩ weresãmasibiriñorã.

15 Eropa weresãmasibirã oparã erã gamenereri taribugue arĩrãre Pedro sãre wiriadoreñorã.

16 Erã wiriara pũhrũ erã basi weretamuñorã.

—¿Oãre dohpa iirãcuri mari? arĩ wereniguiñorã erã.

Òpa arĩ wereniguinemoñorã:

—Pedro, Ñu mera Goãmũ turari mera curimasibigure curicũ iinirã àhrama. Eropirã Jerusalén majarã árïpehrerã erã eropa òaro iirare masiama. Eropirã maripũ “Eropa iibirama erã,” arĩmasibea mari.

17 Eropirã Jesu ïgu buherare gajirãre buhedorebircãrã erãre gajirã erã buherire gameri arĩrã, arĩ wereniguiñorã erã erã basi.

18 Eropa arĩ wereniguituha Pedro sãre sihubeo òpa arĩñorã:

—Jesu ïgu buherare ne buhebircãque gajirãre. Irire ne wereniguibircãque, arĩriñorã erãre.

19 Erã eroparicũ peerã Pedro Ñu mera òpa arĩñorã erãre:

—Múa òpa aricũ muare yũhrirã Goãmũpũre tarinũgãrã iiboca gua. ¿Nihi yapũre gua werecũ gahmeri múa? ¿Múa

yapure gua iicũ gahmeri mua? ¿Goãmũ yapure gua iicũ gahmeri mua?

²⁰ Gũapure gua ãarare, gua peerare gũare yayasãma masiya mara masare, arĩ yahripũ Pedro Ñu mera.

²¹ Erã eroparĩcũ peerã oparãpũ dipaturi doreriñorã daja erãre.

—Jesu ãgu buherare mua buherã ñero tarirãca mua, arĩriñorã oparã erãre.

Erãre “Ñu, Pedro mera ñero iirã iima,” arĩmasibiriñorã erã. Eropirã masapũ curimasibiridigu ãgu ðagũ wacũ ãarã, “Goãmũ diaye ta ðagũ ãhrimi,” arĩñorã masa. Erã eroparĩcũ peerã oparãpũ Pedro sãre dipuwaja moamasi-biri, erãre wiuñorã.

²² Curimasibigu ðagũ erã iidigu cuarenta bojori opagũ arĩpũ.

Jesu yarã erã gũibiriburire serẽñorã Goãmũre

²³ Eropii, Pedro Ñu mera erã mera majarã pohrogue eja, pahia oparã, mũrã erãre erã arĩrare wereñorã.

²⁴ Erã eroparĩcũ peerã erã arĩpehrerã yujuro mera mari Pagure Goãmũre serẽñorã.

—Gua Opũ, mũhũ umarore, yebare, diarire iigu, arĩpehrerãre ojocaricũ iigu ãhrraa mũhũ.

²⁵ Mũ Espĩritu Santo gua ñecũre Davi mũrũre mũ pohro majagũre ðpa weredoreyoro mũ arĩdiro dopa ta:

¿Duhpirã judio masa arĩbirã guari? Pee masibirã ãhrima masa.

²⁶ Baja macari majarã oparã gamenere, mari Opũ Goãmũre, ãgu opũ acudigu Cristo sãre ãhaturi, ñero iidiana erã, arĩ weredoreyoro mũhũ Davire iribojegure.

²⁷ Eropa ta ãhrraa, arĩ serẽnemoñorã Goãmũre. I macare Herode, Poncio Pilato, judio masa arĩbirã, judio masa mera mũ beyedigũre Jesure ðagũ mũ pohro majagũre wejẽdia gamenereama.

²⁸ Irisubu mũ gamediro dopa ta “Eropa waroca,” mũ arĩdiro dopa ta iiaama erã. Mũ masiri mera eropa wereyoro mũhũ.

²⁹ Eropigu, gua Opũ, erã gũare “Mũa buheri waja ñero tarirãca,” erã arĩrare guñaque mũhũ. Gũare itamuque. Eropigu gũare mũ pohro majarãre gũiro mariro mũ buherire weredoreque gũare.

³⁰ Mũhũ mũ turari mera dorecũrãre ðarã iique. Eropigu mũ buherire gũiro mariro werecũ iique gũare. Eropigu mũ deyoro moarare Jesu mũ pohro majagũ ãgu turari mera ii ãhmudoreque gũare. Eropigu dorecũrãre ðarã gua

wadorecã m̃u turari mera itamuque guare, arĩ serẽñorã erã mari Pagure.

³¹ Erã eropa arĩ serẽra p̃uhr̃u, erã gamenereri wihi ñohmemaa wayoro. Ero eropa ñohmecã ta Espiritu Santo ïgu turari mera guñaturarã wacũ iip̃u erãre. Eropa warã, Espiritu Santo ïgu dorediro dopa ta iĩñorã. Güiro mariro Goãm̃u yare wereñorã erã.

Jesu yarã erã yare dũca wañorã

³²⁻³³ Eropirã Goãm̃u ïgu turari mera erã Jesu ïgu apinirã õpa arĩ wereñorã masare: Jesure Goãm̃u masudigure gua ïab̃u, arĩ wereñorã erã masare. Eropigu Goãm̃u erã arĩpehrerãre õaro itamum̃arip̃u. Eropirã Jesure umupeorã bajarã árĩñorã. Erã yujuropa ta pepirã árĩm̃uriñorã. Eropirã erã erã yare erã doberire “Yaha dihta ãhraa,” ne arĩbiriñorã. Erã arĩpehrerã erã yare gajinore moorãre erã mera majarãre dũca wam̃uriñorã.

³⁴ Eropirã erã mera majarã mojomorocurã marim̃uriñorã. Erã mera majarã yeba oparã, wiri oparã erã yare duam̃uriñorã.

³⁵ Eropa duarã erã wajasearare erã aĩgãri, Jesu ïgu apinirãre om̃uriñorã. Eropirã erãp̃u irire erã mera majarãre dũca wam̃uriñorã. Arĩpehrerã opabirãre dũca wañorã.

³⁶ Irisubure yujugu erã mera majagu José waĩcugu arĩp̃u. Jesu ïgu apinirã Josere Bernabé waĩyeñorã. ïgu waĩ Bernabé “Masare mucubircũ iigu ãhrimi,” arĩma Griego ya mera. ïgu Leví ya curu majagu Chipre nũguro majagu arĩp̃u.

³⁷ Eropigu ïgu poeri opagu arĩgu irire duap̃u. Eropigu ïgu wajasearare Jesu ïgu apinirãre óp̃u ïgu gajirãre gueredoreg̃u.

5

Ananía ïgu marapo Safira mera gũyap̃u

¹ Gajirã sã Bernabé iro dopa iim̃uririñorã. Erã Ananía waĩcugu, ïgu marapo Safira waĩcugo árĩñorã. Eropigu Ananía erã ya poerire duap̃u ïgu.

² Eropa duaquereg̃u ta ïgu wajasearare ïgu basi aĩp̃u. ïgu marapo sã ïgu eropa iirare masipo. Eropigu erã wajasea dũharare aĩgãri, Jesu ïgu apinirãre óp̃u Ananíap̃u. Eropa og̃u, “Opehog̃u iiaa,” arĩrip̃u ïgu.

³ ïgu eropa iicũ ïagu Pedro ïgure werep̃u.

—Ananía, watĩ m̃ure gũyadorecã m̃uh̃u gũyab̃u Espiritu Santore. Eropigu m̃ua ya poerire dua, m̃u wajasearare m̃u basi aĩbu ãhrab̃u m̃uh̃u.

4 Mũ duaboro core mũa ya poeri árĩribũ. Eropiro mũ duara pũhrũ mũ ya wajatari ta āhrabũ. ¿Eropigũ dohpa árĩronore eropa gũyari mũhũ? Mũhũ gua dihtare gũyabeaa. Goāmũ sãre gũyabũ mũhũ, arĩpũ Pedro ĩgũre.

5 ĩgũ eroparĩcũ peegu ta, Ananíapũ mehmereja, sĩria wapũ. Eropirã árĩpehrerã ĩgũ eropa warare masirã, bũrigã gũĩñorã.

6 ĩgũ sĩrira pũhrũ mamarã ahri, ĩgũ dũpũre suhri mera oma, disiporogue aĩgã, yaañorã ĩgũre.

7 Eropii ũhre hora pũhrũ Ananía mũrũ marapo ĩgũ sĩrirare masibigo Pedro pohrogue ñajapo.

8 Eropigũ Pedro igore ōpa arĩpũ:

—¿Mũa ya poerire duanijarã dipẽ wajatari mũa? arĩpũ ĩgũ. Eropigo igo igo marapũ mũrũ ĩgũ arĩrañepẽ ta, “Iripẽta wajatabũ gua,” arĩ wereripo igo sã.

9 Eropigũ Pedro igore wererũ:

—¿Duhpirã mũa yujuro mera Goāmũ Espĩrĩture gũya ĩhadiari mũa? Peeque dohpaguere. Mũ marapũ mũrũre yaanirã ta ahrima daja. Mũ sãre mũ dũpũre aĩrã ahrima, arĩpũ Pedro.

10 ĩgũ eropa arĩ werecũ ta igo mehmereja, sĩria wapo. Eropirã mamarã iri wihire ñajarã, igo ya dũpũ mũrarore aĩ wiria wañorã. Aĩgã, igo marapũ mũrũ dipaba yaañorã.

11 Eropirã Jesu yarã árĩpehrerã gajirã irire peerã sã, gũitariacãñorã.

Jesu ĩgũ apinirã Goāmũ turari mera ii ĩhmuñorã

12 Eropirã masa watope Jesu ĩgũ apinirã bajasuburi Goāmũ turari mera deyoro moarire ii ĩhmumũriñorã. Eropirã erã Salomo waĩcũri taribugue ōari taribugue gameneremũriñorã.

13 Eropirã gajirã erãre gũirã, erã pohrogue wabiriñorã. Eropa gũiquererã erãre Jesu ĩgũ apinirãre, “Ōarã āhrima oã,” arĩñorã masa.

14 Eropirã ũma, nome bajarã Jesure umupeonũgañorã.

15 Eropirã erã dorecũrãre aĩgãri, omasiariñe mera pũtãpi apigãñorã Pedro waburi mague erãre. Eropirã dorecũrãre ōarã wacũ gamerã Pedro erãre ĩgũ ñapeocũ gameñorã erã aĩgãñirãpũ. Erãre ĩgũ ñapeobiricũ Pedro erã weca ĩgũ watĩ merejariñe dihtare gameñorã erã. Iri dihtare gameñorã erã erã ōarã waboro dopa.

16 Eropirã Jerusalén pohro árĩri macari majarã sã, dorecũrãre, watẽa ñajasũnirã sãre aĩgãriñorã. Eropirã erã árĩpehrerã erã dũpũ ōaro wañorã.

Oparãpũ Jesu ĩgũ apinirãre ñero iidoreñorã

17 Īḡu eropa iicũ ĩarã pahia opu, ĩḡu mera majarã mera Pedro sãre peyocapu. Pahia opu mera majarã saduceo masa áriñorã.

18 Pedro sã iirare peerã erã guatarirã Jesu ĩḡu apinirãre ñehadore, peresu iinorã.

19 Eropiira puhru iri ñami ta Goãmu ĩḡu anyu pãḡũpu erãre peresugue áriřãre. Tuhajanugu erãre wiriridore õpa arĩ werepu anyu:

20 —Goãmu wihigue waque. Iri wihigue áriřã Goãmu masare ĩḡu tauburire, iri õari buherire wereque masare, arĩpu anyu erãre.

21 Īḡu eroparĩcũ peerã ñamigã ñari Goãmu ya wihigue ñaja, masare buheñorã erã.

Irinu ta pahia opu, ĩḡu mera majarã, Israe masa oparã mera gamenere, Jesu ĩḡu apinirãre peresugue áriřãre aĩḡaridoreripu surara oparãre.

22 Eropirã surara oparã peresugue doarãpãre aĩḡarirã wariñorã. Erãre bocabiriñorã. Bocabiri dujaa wañorã daja.

23 Dujaja wereñorã erã oparãre.

—Peresugue arĩri disiporori bihara disiporori ahrabu. Eropirã erã iri disiporori pohro peresu iinirãre corerã niguiama. Eropa ĩabũ gua. Eropirã gua disiporore pãḡũcũ, masa marabu, arĩ wereñorã erã.

24 Erã eroparĩcũ peerã, surara Goãmu wihire corenirã opu, pahia oparã mera irire pee uca wa, “¿Dohpa waha ojogorocurãcuri erã eropa iirã?” arĩ pepiñorã erã.

25 Eropigu erã pohroḡue gajigu ahri, erãre werepu.

—Mua peresu iinirã Goãmu wihigue ahrama. ĩarã waque bu. Iri wihigue masare buherã iama erã, arĩ werepu.

26 Īḡu eroparĩcũ pee, surara opu, ĩḡu surara mera waha, Jesu ĩḡu apinirãre dipaturi ñeagãriñorã daja. Eropa ñearã erãre surara turibiriñorã. Eropirã erãre pabonirã áriquererã, masare güirã pabiriñorã erãre. “Oãre mari pacũ gajirã masapu utã mera dearãcoma marire,” arĩ pepiñorã erã surarapu.

27 Eropirã erãre aĩḡari, oparã core duhudoboñorã erãre. Erã eropa aĩ eraa dobocũ pahia opu erãre turipu.

28 —Mũare gua weretuhabu. Jesu yare buhebircãque, arĩrabu gua mũare. Gua eropa arĩquerecũ ta mũapu arĩpehrerã Jerusalén majarãre buhea mua. Jesu ĩḡu sirira waja, gũare dipuwajacũcũ iidiarã iica mua, arĩpu pahia opu.

29 Īḡu eroparĩcũ peegu Pedropu gajirã Jesu ĩḡu apinirã mera yuhripu.

—Goãmu ĩḡu dorerapãre iimũhtarãra. Eropirã puhru Goãmu gamecũ masa erã dorerire iirãra.

30 Goãmũ mari acawererã iribojegue majarã opu Jesure masudi árĩmi. Īgu ta àhrimi mũa crusague pabia wejẽdigũ.

31 Jesure masura pũhrũ Goãmũ ĩgũre “Ōagũ àhrimi,” arĩ, ĩgu diayepũ doadoremi Jesure ĩgu Pagupũ. Eropigu Jesu masa opu, masare masugu árĩgu, Israe masare erã ñeri iirare bujawererã árĩdoregu, erã ñerire cóãdiami Jesu.

32 Eropirã guapũ Jesu ĩgu iirare ñanirã árĩrã irire werea gũa. Espĩritu Santo irire ĩhmugũ árĩgu weremi ĩgu sã. Īgũre Espĩritu Santore Goãmũ obeoami. Árĩpehrerã Goãmũ dorerire iirãre ĩgu Espĩritu Santore ohomi, arĩ werepũ erãre.

33 Īgu eroparĩcũ peerã oparãpũ guatariacãñorã. Eropirã erã Jesu ĩgu apinirãre wejẽdiariñorã.

34 Irisubure erore Gamalie fariseo masũ ero árĩgu erãre wejẽdoregu iibiripũ. Īgu oparã mera majagu, dorerire buhegu ĩgu árĩcũ, masa erã umupeogu árĩpũ. Eropigu Īgu Jesu ĩgu apinirãre merogã coredoregu gajipugue erãre aĩgãdorepũ surarare.

35 Erã eropa aĩgãra pũhrũ ĩgũpũ werepũ masare.

—Mũa Israe masa, oãre mũa iiburire òaro pepique mũague wejẽri arĩrã.

36 Guñaque Teuda mũurũ. Īgu, ĩgu basi “Masare tarinũgagu àhraa yũhũ,” arĩmi masare. Eropirã masa bajarã cuatrocientos masa ĩgu mera majarã dujama. Eropirã gajirãpũ ĩgũre wejẽnirã árĩma. Īgu sĩricũ ĩha ĩgu buherire buhenirãpũ wasiria wanirã árĩma. Eropirã erã dohpaguere marima.

37 Pũhrũ masare erã queorisubu árĩcũ Galilea majagu Juda waĩcũgu masare ĩgu buhecũ ĩgu mera masa bajarã dujama. Īgu sã sĩria wadi árĩmi. Eropii ĩgu yarã árĩpehrerã wasiria wanirã árĩma erã sã.

38 Eroparĩgu dohpaguere mũare ire arĩgu iiaa. Eropa ñacãque oãre Jesu yare wererãre. Eropii i buheri oã erã ya buheri Goãmũ ya buheri árĩbiro, pehrea waroca.

39 Goãmũ ya buheripũ árĩro, ne pehresome. I buheri Goãmũ ya árĩcũ ne ire ne dederecũ iimasibea mũa. Mũa ire dederecũ iidiarã Goãmũ mera gamequeãrã iiboca mũa, arĩpũ Gamalie erãre.

Īgu eropa arĩ werecũ peerã, “Diaye ta àhraa,” arĩ, peeñorã oparã.

40 Eropirã erã Jesu apinirãre sihubeo, erã eracũ ñarã erãre tãrañorã. “Jesu yare buhebiricãque mũa,” arĩtuhaja, erãre wadoreñorã.

⁴¹ Eropā wadorecũ peerã erã oparã pohrogue árĩnirã waha wañorã. Jesu ya árĩburire ñero tarirã burigã mucubiriñorã Jesu ĩgu apinirã.

⁴² Eropirã umuri nucu erã ya wirigue, Goãmu wihigue sãre Jesucristo yare buhe weremuriñorã erã.

6

Siete itamumorãre beyeñorã Jesu yarã

¹ Irinurire Jesure umupearã bajarã wañorã. Eropirã griego masa judio masa mera gameturiñorã erã Jesu yarã dihta árĩquererã. Griego masa wapeweyarã nomere umuri nucu erã barire òaro erã guerebiriũ ĩarã judio masare turiñorã.

² Eropirã Jesu ĩgu apinirã, docepũ Jesure umupearãre árĩpehrerãre erã pohrogue sihubeo, òpa arĩ wereñorã:

—Gua Goãmu yare buherã ahraa gua. Barire guere-morãno árĩbeaa gua.

³ Eropirã mua gua acawererã, siete umare, gajirã “Óarã,” erã arĩrãre, Espĩritu Santo oparãre amaque. Erãpũre barire gueredoreque mua.

⁴ Eropirã guapũ umuri nucu Goãmure serẽ Goãmu yare buherãca, arĩñorã Jesu apinirã erã Jesure umupearãre.

⁵ Erã eroparĩcũ peerã, “Áu, eropa ta iirã,” arĩñorã erã árĩpehrerã Jesure umupearã. Eropirã Estebanre Cristore umupegũre, Espĩritu Santo turarire wũaro opagũre beyeñorã erã. Gajirã sãre beyeñorã. Felipere, Prócorore, Nicanore, Timore, Parmenare, Nicolare bari gueremorãre beyeñorã erã. Nicolapũ judio masũ árĩbigũ Antioquía majagũ judio masa buherire gamegũ erã mera ñajadigũ árĩpũ.

⁶ Erã beyenirãre Jesu ĩgu apinirã pohro aĩ erañorã gajirã Jesu yarãpũ. Erã eropa aĩ eracũ ĩarã erã Goãmure serẽbasañorã. Eropirã erã beyenirã weca erã mojotorire duhpeoñorã Goãmu turarire orã.

⁷ Eropirã iri yeba majarã Goãmu yare masipehrenijarã iĩñorã. Eropirã Jerusalengue árĩrã Jesure umupearã bajarã wanemoñorã daja. Eropirã pahia sã bajarã Jesu yarã wañorã.

Gajirã Estebanre ñeañorã

⁸ Eropigũ Esteban Goãmu turarire opagũ árĩpũ. ĩgu Goãmu òaro iigũ árĩpũ. Eropigũ ĩgu Goãmu turari mera deyoro moarire ii ihmupũ masa erã ĩaro.

⁹ Judio masa erã buheri wihi majarã ĩgũre ĩhaturiñorã. Eropirã ĩgu mera game duyasonũgañorã. Erã Liberto waĩcũrã árĩñorã. Eropirã erã Cirene majarã, Alejandría

majarã, Cilicia majarã, Asia majarã mera bajarã árĩñorã erã Esteban mera dũyazorã.

¹⁰ Esteban masigu dopa ta, Espĩritu Santore wũaro opagu ta ĩgu wereniguicũ peerã erã yujuro bojebiriñorã ĩgure.

¹¹ Eropa yujuro bojebirã erã gajirãre ahma gũyadore, wajajeñorã erãre. Erã eropa gũyadorecũ õpa arĩ weresãñorã erã Estebanre:

—Ihĩ Goãmure ĩgu ñero wereniguicũ, Moisere ĩgu ñero wereniguicũ sãre gũa peeabu, arĩ weresãriñorã erã gũyarãpũ gajirãre.

¹² Erã eroparĩcũ peerã masa, judio masa buherã, murã sã ĩgu mera guañorã. Eropirã erã Estebanre ñeha erã oparã pohro aĩgãñorã ĩgure.

¹³⁻¹⁴ Eropirã erã gajirãre gũyanemodoreñorã. Õpa arĩñorã erãpũ:

—Ihĩ mũmũri nũcũ Goãmũ wihire, ĩgu doreri sãre ñero wereniguigũ àhrimi. Peeabu gũa ĩgure ĩgu õpa arĩcũ. “Jesu Nazare majagu Goãmũ wihire cóãgũcumi. Eropigu ĩgu Moise dorerare marire ĩgu wererare gohrotogũcumi Jesu,” arãmi Esteban gũa peecũ, arĩ gũya weresãriñorã erã.

¹⁵ Eropirã árĩpehrerã ero doarã Estebanre õaro ĩhamehtu, ĩgu diapore ĩañorã erã. Anyu iro dopa deyoyoro ĩgu diapo.

7

Esteban Jesu yare werepũ

¹ Eropii pahia opũ serẽpipũ Estebanre.

—¿Oã erã arĩri diaye ta àhriri? arĩ serẽpipũ ĩgu Estebanre.

² ĩgu eroparĩcũ peegu, Estebanpũ erãre õpa arĩ werepũ:

—Acawererã, murã, gũa pagũ sumarã, peeque. Abrahã mari ñecũ murũ iribojegue majagu Mesopotamiague ĩgu arĩcũ, Harãngue ĩgu árĩboro core, Goãmũ turagu gosesiriro dopa ĩgure Abrahãre dehyoañumi.

³ Eropa dehyoagu Goãmũ wereñumi ĩgure. “Mũ ya yebare mũ acawererã mera árĩbircãque. Eropigu gaji yebague waque. Mũ eropa wacũ mũre iri yebare ĩhmugũra yũhũ,” arĩpũ Goãmũ Abrahãre.

⁴ ĩgu eroparĩcũ peegu Abrahã sã Caldea majarã ya yeba árĩrã wañuma. Pũ Harãngue ejañuma. Eroque eja árĩñuma. Eropigu ĩgu pagũ ĩgu sĩrira pũhrũ i yeba dohpague mũa arĩri yeba Goãmũ ta árĩdoreñumi Abrahãre.

⁵ ĩgure eropa árĩdorequeregu Goãmũ Abrahã ĩgu arĩri yebare õaro gohra apibirimũriniñumi ĩgure. Ne merogã apibiriniñumi. Eropigu Abrahã ĩgu porã marigu

áríquerecũ ta Goãmũpũ ïgũre õpa arĩ wereñumi. “Mũre mũ pãramerã gaji turi majarãguere i yebare ogũra,” arĩñumi Goãmũ Abrahãre.

⁶ Eropã arĩgũ ta õpa arĩ werenemoñumi Goãmũ Abrahãre. “Mũ pãramerã gaji turi majarãgue gaji yebague waha, erogue gajirã pohro árĩrã erã pohro majarã árĩrãcoma erã. Eropirã cuatrocientos bojori gohra ero majarã ñero iirãcoma mũ pãramerã árĩturiarãguere.

⁷ Eropigũ ero majarãre erã eropa iira waja dipuwaja moagũra yũhũ. Yũhũ eropiira pũhrũ mũ pãramerã i yeba erarãcoma daja. Eropirã i yeba yũ dorerire iirãcoma erã,” arĩñumi Goãmũ Abrahãre.

⁸ Eropã arĩgũ Goãmũ “Yũ arĩdiro dopa ta iigũra,” arĩgũ Abrahã ïgũ guñaburire õpa apiñumi ïgũre. Merogã gasirogãre ïgũ dũpũre wiri aĩdoreñumi ïgũre, ïgũ eropa arĩ wereraguere guñadoregũ. Eropiira pũhrũ Abrahã Isaare porãcũñumi. Ocho nũri pũhrũ merogã gasirogãre wiri aĩñumi Isaa dũpũ sãre. Pũhrũ Isaa Jacobore ïgũ porãcũra pũhrũ wiri aĩñumi ïgũ dũpũ sãre. Eropigũ Jacobo doce gohra porãcũñumi. Erã docerũ mari cururi nũcũ oparãgue árĩmũriñuma.

⁹ “Eropirã erã Jacobo porã mari ñecũ sũmarã mũra Josere erã pagũ magũre peyocũmũriñuma. ïgũre cohã, duacãñuma Egiptogue warãre. Eropigũ Josere Goãmũ itamumũriñumi.

¹⁰ ïgũ ñero taricũ ïagũ Goãmũ ïgũre itamumũriñumi. ïgũ eropa itamucũ Joserũ õaro pee masigũ wañumi. Eropigũ faraõ Egipto majagũ opũpũ Josere ïgũ gamecũ iĩñumi Goãmũpũ. ïgũ eropiicũ faraõpũ Josere Egipto majagũ opũ, ïgũ ya wihi majagũ opũ apiñumi.

¹¹ “Eropii irisubure ta Egiptogue, Canaa waĩcũri yeba sã ne deco aribiriyoro. Eropirã ero majarã ñero tariñuma. Eropirã Canaague árĩrã Jacobo porã mari ñecũ sũmarã mũra bari bocabirimũriñuma.

¹² Eropigũ Egiptogue trigo árĩcũ peegũ, Jacobo ïgũ porãre erogue bari asũdoregũ ne obeogũ iĩñumi.

¹³ Pũhrũ Egiptogue erã ejacũ José ïgũ tĩrãre wereñumi. “Mũa pagũ magũ ta ãhraa yũhũ,” arĩñumi erãre. Eropigũ José acawererãre ne ïagũ iĩñumi opũ faraõ waĩcũgũ.

¹⁴ Pũhrũ José ïgũ tĩrãre erã pagũ Jacobore sihudoregũ obeoñumi. ïgũ acawererã setenta y cinco masa árĩñuma irisubu.

¹⁵ ïgũ magũ ïgũ sihubecũ peegũ Jacobo Egiptogue wañumi ïgũ magũ pohrogue. ïgũ magũ pohro ãhri, pũhrũ sĩria wañumi pare. Eropirã ïgũ porã mari ñecũ sũmarã mũra erogue sĩripehrea wañuma erã sã.

16 Eropirã Siquẽ waïcuri yebague erã dupure aĩ, masa goberigue seatuha yaañuma erã dupure. Abrahã ìgu asũra yebague árĩyoro iri yeba erãre yaara yeba. Ero core Abrahã iri yebare Hamor porãre asũyũnũmi niyeru mera.

17 Eropigu Goãmũ Abrahãre “I yebare ogũra mũre,” arĩmuriñumi. “Iri yebare ogũra,” ìgu arĩrasubu ejaçũ Abrahã pãramerã Israe masa bajarã masa wañuma. Egip-togue árĩñuma.

18 Egipto yeba erã árĩnicũ, gajigu opu ñajañumi. Eropigu ìgu opuũ José mũrũre masibiriñumi.

19 Eropigu ìgu mari acawererãre ñero iidia, erã porãre wejẽdia, erã porãre wejẽ cóacãdoreñumi erãre. Eropigu mari ñecũ sumarãre ñero iĩnũmi opu faraõpũ.

20 ìgu eropiirisubu Moise árĩbupu masa dehyoañumi. ìgu õagu, Goãmũ õaro ìhasuagu arĩmuriñumi. Eropirã ìgu pagu sumarã urerã abe gohra õaro ìhadibuñuma ìgugãre.

21 Moisere dibunemomasibiricũ ìgure erã cóãra puhũ opu mago ìgure boca aĩ majaa, ìgo magu iro dopa ta dibuñumo ìgure.

22 Eropirã Egipto majarã õaro masirã yare buheñuma Moisere. Eropigu güiro mariro wereniguũ opu iro dopa iigu árĩñumi Moise.

23 “Eropigu Moise cuarenta bojori ìgu opaboro core ìgu acawererãre Israe masare ìadiagu erã pohroque curigu wañumi.

24 Eropa curigu ejaçu Egipto majagu Moise acaweregure ìgu ñero iicũ Moise ìañumi. Eropa ìagu ìgu acaweregure itamuñumi Moise. ìgu acaweregure itamugu Egipto majagupure pa wejẽcãñumi ìgu.

25 Eropirgu Moise õpa arĩ pepiriñumi. Yũ acawererã erã acaweregure yũ itamucũ ìarã, ‘Goãmũ marire õaro taricũ iidoregu obeoñumi ìre,’ yũ acawererã yũre arĩ pepirãcoma,” arĩ pepiriñumi Moise. Erãpũ ne eropa pepibiriñuma.

26 Gajinu Moise ìgu acawererãre perã erã basi gamequeãrãre ìapu. Eropigu ìgu erãre bosariñumi. “¿Mũa basi arĩquererã gamequeãri mũa?” arĩñumi Moise erãre.

27 ìgu eroparicũ peegu yujugu ìgu acaweregure ñero iigu Moisere tuubeoñumi. “Mũhũ guã opu árĩbeaa. Gũare doregu árĩbeaa mũhũ.

28 ¿Carũre Egipto majagure mũ wejẽdiro dopa ta yũ sãre wejẽdiagu iiri mũhũ?” arĩñumi ìgu Moisere.

29 ìgu eroparicũ pee uca wa Moise oma duhrigã waha wapũ. Madián waïcuri yebague waha wañumi. Eroque nomeore boca perã porãcũñumi.

30 “Eropii Moise cuarenta bojori gohra ero ĩḡu árĭra pũhrũ Sinaí waĩcũdigũ utũḡũ pohro masa marirogue ĩḡu árĩcũ anyu ĩḡure dehyoañumi.

31 Eropa irigũḡã ĩḡũcũ ĩḡũ Moise ĩha uca wañumi. Iri peamere pohrogã õaro ĩḡũ ĩḡũ wacũ gohra Goãmũ ĩḡure wereñumi.

32 “Goãmũ aħraa yũhũ. Mũ ñecu sũmarã, Abrahã, Isaa, Jacobo erã Goãmũ aħraa yũhũ,” arĩñumi Goãmũ Moisere. ĩḡũ eroparĩcũ peegũ Moisepũ naragãñumi. Ne ĩha wahḡũbiriñumi.

33 Eropigũ Goãmũ wereñumi ĩḡure. “Dohparagã yũ pohro niguigũ iiaa mũhũ. Eropigũ ḡũhyadiaro mera mũ zapature tuweaque.

34 Yaharã masa Egiptogue erã ñero taricũ ĩabũ. Erã sũwererire peeabũ. Eropigũ erãre itamugũ ahrabũ. Erã eropa wacũ ĩḡũ waque mũ sã. Egiptogue mũre obeogũra erãre itamudoreḡũ,” arĩñumi Goãmũ Moisere.

35 “Erãpũ mari acawererã Israe masa Moisere gamebirituhajañuma. “Mũhũ ḡũa opũ árĩbeaa. Mũhũ ḡũare doreḡũ árĩbeaa,” Moisere eropa arĩrã gamebirã iituhajañuma. Eropa erã Moisere gamebiriqũrecũ Goãmũ ĩḡure Egiptogue obeoñumi mari acawererãre, Israe masare itamubure, erãre dorebure. ĩḡũ eropa obeogũ anyupũre ĩḡure yucũḡũḡue dehyoadigũre itamudoreñumi ĩḡure.

36 Moise ta mari acawererãre Israe masare Egiptogue árĩrãre wiudigũ arĩñumi. Eropigũ Egiptogue eja, ihĩ Moise Goãmũ turari mera ii ĩhmunũḡañumi. Eropigũ wũariya diariyague eropa ta iĩñumi daja. Pũhrũḡũere masa marirogue sãre cuarenta bojori gohra Goãmũ turari mera deyoro moarire ii ĩhmunũriñumi ĩḡũ erãre.

37 Ihĩ Moisepũ mari acawererãre Israe masare weremũriñumi. “Yũ iro dopa ta Goãmũ yare weremũhtabure Goãmũ obeogũcumĩ. Eropigũ ĩḡũ mũa mera majagũ mũa acawereḡũ árĩḡũcumĩ. ĩḡũ eropa eracũ ĩḡure õaro peeque mũa,” arĩmũriñumi Moise erãre.

38 Moise masa marirogue mari acawererã Israe masa mera árĩmũriñumi. Eropigũ mari ñecu sũmarã iribojegũ majarã mera arĩñumi ĩḡũ. Eropa árĩḡũ Sinaí waĩcũdigũ utũḡũḡue ĩḡure weredigũ anyu mera arĩñumi. Eroque Goãmũ ĩḡũ dorerire aĩdigũ arĩñumi Moise.

39-40 “Iri dorerire utũḡũḡue Moise waha aĩrisubũ mari ñecu sũmarã mũra Egiptogue dujadiarã Moisere tarĩnũḡañuma. Erã ĩḡure gamebiriñuma. Eropa gamebirã Aarõre Moise tĩḡure õpa arĩñuma: “¿ĩḡũ Moise marire Egiptogue aĩḡãridi dohpa wayuri ĩḡũ? Masibirica mari.

Eropigu goãmarã wéanirãre iique mari yarã árĩmorã. Eropirã m̃u wéanirã marire doreri mari wadiari maha marire aĩgãrãcoma," arĩñuma erã.

⁴¹ Eropa arĩra p̃uhr̃u erã wec̃ure oro mera wéañuma. Eropa iituhaja, erã waim̃urãre wejẽ, erã wéadigu pohro aĩgãri umupeoñuma ĩgure. Eropirã erã erã iidig̃ure wec̃ure ĩarã, mucubiri, bosenu iĩñuma.

⁴² Eropigu Goãm̃u erã wéadig̃ure erã umupeocũ ĩagu, erãre cóãcãriñumi. "Erã yure cóãrã gajirã umaro majarãp̃ure umupeo curaporo," arĩgu cohãgã wariñumi. Goãm̃u yare werem̃htanirã õpa arĩ gojañuma Goãm̃u wereniguirire:

M̃ua Israe masa, yure ñe ñero iiab̃u. Masa marirogue cuarenta bojori gohra árĩrã waim̃urãre m̃ua wejẽnirãre m̃ua soenirãre yure m̃ua obodiro dopa ta umupeorab̃u m̃ua. Eropirã yur̃ure umupeobirab̃u m̃ua.

⁴³ Eropirã m̃ua Molo waĩcug̃ure umupeorã árĩrã, ĩgure umupeori wihire iiab̃u m̃ua. Eropirã "Refa g̃ua goãm̃u ãhrimi," arĩrã ĩgu necãm̃u m̃ua wéadig̃ure m̃ua umupeoab̃u daja. Erã wéanirãre m̃ua iinirãre m̃ua umupeoab̃u. M̃ua eropa iira waja m̃uare Babilonia sipugue cóãbeogura yuh̃u, arĩñumi Goãm̃u ĩgu ya werem̃htanirã mera.

⁴⁴ "Eropirã masa marirogue Goãm̃u masa mera ĩgu árĩri wihire waim̃urã gasiri wihire opam̃uriñuma mari ñec̃u s̃umarã iribojegue majarã. Iri wihi Goãm̃u masa mera ĩgu wereniguiriri wihi árĩyoro. Iri wihigue Goãm̃u dorerire ĩgu gojara mijiri utã mijiri árĩyoro. Iri wihire Goãm̃u ĩgu werediro dopa ta Moiser̃e ĩgu ĩhmudiro dopa ta ii ĩhacũdoreñumi Goãm̃u Moiser̃e.

⁴⁵ P̃uhr̃ugue majarã mari ñec̃u s̃umarã Josué mera iri wihire aĩgãriñuma mari árĩri yebague erarã. Erã iri yebaguere Goãm̃u ĩgu apira yebaguere erã eraboro core iri yeba majarã m̃urare Goãm̃u cóãcãñumi. Irisubure Goãm̃ure umupeori wihire waim̃urã gasiri wihire opam̃uriñuma mari ñec̃u s̃umarã. Ne Davi m̃ur̃u ĩgu árĩcũgue opatuñuma iri wihire.

⁴⁶ Eropigu Davi m̃ur̃u Goãm̃ure mucubiricũ iĩñumi. Eropigu Goãm̃u ya wihi árĩburire iidigu Davip̃u serẽriñumi Goãm̃ure.

⁴⁷ ĩgu eropa serẽquerecũ ta Salomop̃u Davi magur̃u Goãm̃u ya wihire iĩñumi.

⁴⁸ ĩgu eropa iiquerecũ ta Goãm̃ur̃u masa erã iira wihiguere árĩbeam̃i. Õpa arĩñumi Goãm̃u wereniguirire werem̃htadig̃u:

⁴⁹ Um̃arogue ỹu doaro ãhraa. Ero doagu dorea yuh̃u. Eropiro yebap̃u ỹu guburire duhpeoro iro dopa ta ãhraa.

Yuhũ turatariagu āhraa. Yaha wihi árĩborore iimasibea mũa. Goãmũ yũ árĩcũ yũ árĩburi wihire mũa iimasibea.

⁵⁰ Yũ basi i yebare árĩpehrero iabũ yuhũ, arĩmi Goãmũ, arĩ gojañumi Goãmũ yare weremũhtadigu, arĩpũ Esteban.

⁵¹ Eropigu õpa werenemopũ Esteban erãre:

—Mũa ne yuhridiagirã āhraa. Goãmũ yare peequererã, ãgũre yuhridiabeaa. Espĩritu Santore tarinũgataria mũa. Mũa ñecũ sũmarã erã iidiro dopa ta iiaa mũa.

⁵² Mũa ñecũ sũmarã árĩpehrerã Goãmũ ya weremũhtanirãre ñero iĩnuma. Erã Goãmũ yare weremũhtanirãpũ “Pũhrũ õagũ Goãmũ yare weremũhtagu arigũcumĩ,” arĩ erã wererã árĩcũ peeñuma mũa ñecũ sũmarã mũa. Eropa arĩ werenirã mũrare wejẽmũriñuma. Eropirã “Õagũ,” erã arĩgũre mũa sã dohpaguere ãgũ ya curu majarã árĩquererã ta ãgũre wejẽabũ.

⁵³ Goãmũ dorerire anyuapũ wererĩnuma mũare. Eropirã mũa iri dorerire opariyoro. Eropirã iri dorerire tarinũgabũ mũa, arĩ wereniguitupũ pare Esteban.

Erã Estebanre utãyeri mera dea wejẽñorã

⁵⁴ ãgũ eroparĩcũ peerã erãpũ bũrigã guañorã. Eropa turaro guarã, gũhyarã wañorã.

⁵⁵ Erã eropa guaquerẽcũ ta ãgũ Espĩritu Santo ãgũ dorero dopa ta iipehogũ árĩgũ, ãgũ turarire õaro opagũ árĩgũ, umarogue ãhamemuju Goãmũ gosesiririre ãpũ Esteban. Jesu Goãmũ diayerũ ãgũ nigũicũ ãpũ ãgũ.

⁵⁶ Eropa ãagũ õpa arĩpũ

—Umarogue merogã ero tuweamaacũ Jesu Goãmũ obeodigu Goãmũ diayerũ ãgũ nigũicũ ãhaa yuhũ, arĩpũ Esteban.

⁵⁷ ãgũ eroparĩcũ peerã ta erã bũrigã gaguinigui, erã gamirire bihacã, yujuro mera ãgũ pohrogue omagã, ãgũre ñeañorã.

⁵⁸ Ñehatuhaja, ãgũre aĩgã, iri maca tũro pohrogue cõãñorã ãgũre. Eropirã utãyeri mera dea wejẽcãñorã erã ãgũre. Erã eropa wejẽboro core ãgũre utãyeri mera deamorã erã weca maja suhrire tuwea, mamũre Saulo waĩcũgũre iri suhrire opabasadoreñorã erã.

⁵⁹ Eropigu Esteban erã ãgũre utãyeri mera dea wejẽrisubũ õpa arĩpũ.

—Jesu yũ Opũ, yũ sĩporãre aĩque, arĩpu.

⁶⁰ Eropigu ãgũ mereja õpa arĩpũ:

—Opũ Jesu, oã dohpague ñero erã yũre iirire erãre dipuwaja moabita mũhũ, arĩpũ Esteban.

Eropa arĩtuhajagu ta sĩria wapũ ãgũ.

8

1 Eropigu Esteban ĩgu s̄iricũ ĩagu, "Ōhaa," arĩpu Saulo.

Saulopu Jesu yarãre ñero iipu

Eropirã irinure ta Jesu yarãre Jerusalengue arĩrãre ñero iinugañorã Jesure gamebirãpu. Erã eropa ñero iicũ Jesu yarã Judea yebague, Samaria yebague yoarogue duhrisirigã wañorã. Jesu ĩgu apinirã dihta wabiriñorã.

2 Eropirã gajirã Goãmure umupeorã Esteban dũpu mũrarore yaa, bũrigã oreñorã erã.

3 Saulopu Jesu yarãre ñetariaro iimũriripu. ĩgu erã ya wirigüe ñaja, umare, nomere ñeha, peresugue bihadobomũripu.

Samariague Jesu yare buherpu Felipe

4 Eropirã yoarogue wasirinirã Jesu yarãpu Jesu yare buheñorã.

5 Eropigu Felipe Samaria waĩcũri macague eja, Jesu yare buherpu iri maca majarãre.

6 ĩgu eropa buhecũ ero majarã ðaro peeñorã. Eropirã Goãmũ turari mera deyoro moarire ĩgu ii ĩhmucũ ĩañorã erã. Eropa ĩarã ĩgure ðaro peeñorã erã.

7 Bajarã watẽa ñajasũnirãre ĩgu pohro erã eracũ ĩagu watẽapure wadorepu ĩgu. Watẽapu bũrigã gaguinigui, duhugã waha wañorã erãre. Eropigu bajarã dũpu buhanirãre, curimasibirãre dũpu ðarã iimũripu.

8 ĩgu eropa iicũ ĩarã iri maca majarã bajarã masa mucubiriñorã.

9 Irisubure Simo waĩcũgu iri maca majagu yee arĩpu, Eropigu yeea erã iirare ii ĩhmumũripu Samaria majarãre. ĩgu eropa ii ĩhmucũ ero majarã ĩha uca wa ĩgure guhyadiaro mera ĩarã arĩñorã.

—Yũhu masipehogu ahraa, arĩpu Simopu erãre.

10 ĩgu eropa iicũ ĩarã masapu ðpa arĩmũririñorã:

—Ihĩ Goãmũ ya turari opagu ahrimi. Goãmũ iro dopa turagu ahrimi, arĩmũririñorã masa erã oparã mera. Erã arĩpehrerã ðaro peeñorã ĩgure.

11 ĩgu yeea erã iiri ĩgu purisiriri mera yoari boje ii ĩhmumũripu erãre. ĩgu eropa ii ĩhmucũ ĩarã erã uca wamũriñorã. Eropirã erã ĩgure umupeomũriñorã.

12 Felipepu erã ĩgure eropa umupeoquerecũ Goãmũ ĩgu opu arĩrire, Jesucristo yare ðari buherire werepu. ĩgu eropa werecũ erã ĩgure ðaro peeñorã. Erã eropa ðaro peecũ ĩagu ũma, nome mera waĩyerpu Felipe.

13 Eropigu Simo ĩgu yee sã Felipepe ðaro peepu. Eropigu ĩgu sãre waĩyerpu. ĩgu eropa iira pũhrũ Felipe mera dujapu

ĭġu. Felipepũ Goãmũ turari mera ii ĭhmucũ ĭagũ, dorecurã õarã ĭġu iicũ ĭagũ Simo ĭha uca wamũripũ.

14 Eropirã Samaria majarã Goãmũ yare erã bũrigã gamecũ peebeomũriñorã Jerusalengue árĩrã Jesu ĭġu apinirãpũ. Erã eropa peebeorã Pedrore, Ñu sãre obeoñorã Samariague.

15 Erogue erã ejara pũhrũ Pedro sã Goãmũre serẽbasañorã. “Oã Samaria majarã mũre umupeorã mũ Espĩritu Santore opaporo,” arĩ, serẽbasañorã erã Goãmũre.

16 Erã Samaria majarã Jesucristo waĩ mera waĩyesũnirã árĩñorã. Iri dihtare masiñorã erã. Eropirã Espĩritu Santore opabiriniñorã dohpa.

17 Eropigũ Pedro Ñu mera Samaria majarãre erã mojotorire erã weca duhpeora pũhrũ Espĩritu Santore oranũgañorã erã.

18 Eropigũ Pedro sã erã ya mojotori mera erã duhpeora pũhrũ Espĩritu Santo eracũ ĭapũ Simo yeepũ. Eropa ĭagũ árĩġu, erã turarire gamegũ niyeru mera wajayediaripũ.

19 Õpa arĩripũ Simo:

—Yũ sãre oque i turarire. Yũ sã yũ mojotori mera masa weca duhpeodiaca Espĩritu Santore erã ñeaboro dopa. Eropigũ i yũ iiburi wajare wajayediaa, arĩripũ Simo erãre.

20 ĭġu eroparĩcũ peegũ Pedro õpa arĩpũ.

—Mũ niyeru mera Goãmũ ya turarire mũ asũdiara waja mũ niyeru mera ta peamegue waque mũhũ.

21 Goãmũ mũ pepirire masimĩ. Mũhũ ñegũ árĩnia. Eropirgũ ire gũa iirire iimasibea mũhũ. I mũ iirino árĩbeaa.

22-23 Bũrigã peyocua mũhũ. Eropigũ mũ ñeri iirire ne duhumasibea mũhũ. Eropigũ ire mũhũ ñero iirare bũjawereque mũhũ. Goãmũre mũ ñero pepirire ero diaye ta serẽque mũhũ. Mũhũ eropa iicũ ĭagũ ĭġu mũ ñerire cãdijibocumi, arĩ werepũ Pedro ĭġure.

24 ĭġu eroparĩcũ peegũ Simo yũhrĩpũ ĭġure.

—Yũre serẽbasaque mũa Goãmũre mũ arĩdiro dopa yũ wabiriboro dopa. Iri waja peamegue wadiabeaa yũhũ, arĩpũ Simo ĭġure.

25 Ero pũhrũ Pedro Ñu mera Goãmũ yare wereñorã. “Jesu ĭġu masa mũriacũ ĭabũ gũa,” arĩ, Samaria yeba árĩri macarĩ majarãre õari buherire buheñorã. Erãre Goãmũ yare buhetuhaja Jerusalengue dujaa wañorã.

Felipe Etiopía yeba majagũre buherũ

26 Eropii Goãmũ ĭġu obeodigũ anyu Felipere werepũ:

—Dohpaguere òdoca surgue waque. Jerusalén pohro árĩri mague Gazague wari mague waque, arĩ werepũ anyu Felipere. Iri maha masa marirogue árĩyoro.

27 Īgu eroparĩcũ peegu ĩgũpũ iri mague waha wapũ. Pũhrũ iri mague yujugũ masũre bocatĩribu iipũ. Īgu bocatĩribu árĩpũ Etiopía yeba majagũ opu. Eropigu Candace waĩcũgo Etiopía majago opo bũro yare niyerure árĩpehrerire ĩhadibugũ árĩpũ. Eropigu ĩgu Jerusaléngue mari Pagure umupeogu ejadi árĩpũ.

28 Īgu ya macague tũrudiru mera dujaagu irirugue waqueregu ta buhegu iipũ. Goãmũ yare weremuhtadigu Isaia ĩgu gojarapũre buhegu iipũ.

29 Eropigu Espiritupũ Felipere òpa arĩ werepũ.

—Sihĩ tũrudirugue wagu pohrogue waque, arĩpũ Espiritu Santo ĩgũre.

30 Īgu eroparĩcũ peegu, Felipepũ tũrudiru pohrogue omagã, Isaia ĩgu gojarare Etiopía majagũ ĩgu buhecũ peepũ. Eropu peegu Felipe serẽpipũ ĩgũre.

—¿Mũ buherire masiri mũhũ? arĩpũ ĩgu.

31 Īgu eroparĩcũ peegu Etiopía majagũ òpa arĩ yũhripũ:

—Gajigu yũre weretaugu maricũ òaro masibea yũhũ. Ohõ yũre weredoagu ariqũ yũhũ dipaba, arĩ yũhripũ ĩgu Felipere.

—Áũ, arĩ, doajapũ ĩgu pohro.

32 Eropii Goãmũ yare Etiopía majagũ ĩgu buheripũ òpa árĩyoro:

Ovejare erã ñeha wejẽdiro dopa ta ĩgu sãre ñeha wejẽrãcoma masa. Eropigu ovejagãre ĩgu poare erã seacũ ĩgu gaguiniguibiro dopa ta ĩgu masũ sã ejari mariro árĩgũcumĩ.

33 Īgũre erã wereyarãcoma. Eropirã ĩgu ĩgu ñero iibiriquerecũ ta erãpũ ñero iirãcoma ĩgũre. Īgu i yebague ĩgu árĩcũ erã ĩgũre wejẽrãcoma. Eropigu ĩgu porã marigu sĩria wagũcumĩ, arĩ gojara árĩyoro.

34 Iripũ eroparĩcũ ĩagu, Etiopía majagũ Felipere serẽpipũ:

—Wereque yũre. ¿Òpa Isaia ĩgu arĩgu nihino árĩcuri ihĩ? ¿Isaia ĩgu basi weregu iicuri? ¿O gajigũre weregu iicuri? arĩ serẽpipũ Etiopía majagũ.

35 Īgu eropa serẽpi ĩacũ peegu Felipe iripũre ĩha, Jesu yare werepũ Etiopía majagũre.

36 Eropirã erã iriru mera waha, maugãgue ejañorã.

—Īaque. Ohõ maugã ãhraa. I maugãgue yũre waĩyeque, arĩpũ Etiopía majagũ.

37 —Jesure m̄h̄h̄ ðaro umupeoc̄ũ ĩagu m̄re waĩyegura, arĩp̄ Felipe ĩgure.

—Jesure umupeoa ȳh̄h̄. ĩgu Cristo Goãmu magu āhrimi. Irire ðaro masia ȳh̄h̄, arĩp̄ Etiopía majagu.

38 Eropa arĩgu ta ĩgu t̄rudiru autugure yaudorep̄. Iriru ȳsumerejara p̄hr̄h̄ wiriañorã erã. Wiria waha, iriyagãgue eja, ñumu wiri n̄gajañorã. Ero ñumun̄gaja, Felipep̄ ĩgure waĩyep̄.

39 Waĩyetuhaja erã majajan̄gajac̄ũ Goãmu ĩgu Espiritu Felipere aĩgã wap̄. ĩgu eropa wara p̄hr̄h̄ Etiopía majagu ðaro mucubirigu ĩgu ya yebague dujaa wap̄. ĩgu eropa iira ũjut̄yac̄ũ ne dipaturi Felipere ĩabirip̄.

40 Felipep̄ eropa iituhaja Azotogue ejar̄p̄. Eropigu baja macarire ðari buherire buher̄p̄ masare. P̄ Cesareague buhetum̄rip̄.

9

Saulo Jesucristore ĩagu ĩgure umupeon̄gar̄p̄

1 Irisubure Saulo Jesu yarãre ĩhaturigu, “Erãre wejẽgura,” arĩgu, ĩgu op̄ pohrogue wap̄.

2 Erogu ejaгу ĩgu gojarap̄ũr̄ire serẽp̄ pahia op̄re. Ōpa arĩp̄:

—Damasco maca maja wirigue mari buheri wirigue Jesu yarãre, ũmare, nomere ȳh̄h̄ erãre bocaia, ñeha dihri, Jerusalẽgue aĩgãrigura. Iri wirigue arĩrãre ȳ erãre ñeaburip̄re paperap̄re ȳre goja oque, arĩ serẽp̄ pahia op̄re.

3 Irip̄re aĩtuhaja, waha, ĩgu Damasco pohro ĩgu ejabu iic̄ũ gohra ũmaro maja goesiri medijuyoro ĩgure.

4 Eropa goesiri medijuc̄ũ ta ĩgu yebague mehmerejagu, wereniguic̄ũ peep̄.

—Saulo, Saulo, ¿duhpigu m̄h̄h̄ ȳre ñero iiri? arĩro cariyoro.

5 —Op̄, ¿nihino āhriri m̄h̄h̄? arĩp̄ Saulo.

—Ȳh̄h̄ m̄ ñero iigu ta āhraa arĩp̄ Jesu. M̄h̄h̄ ȳ mera guagu ȳre ȳh̄ribigu, m̄ basi ta ñero tariaa, arĩp̄ Jesu Saulore.

6 ĩgu eroparic̄ũ Saulo güiri mera naragãnijagu ōpa serẽpip̄:

—Op̄, ¿dohpa ȳh̄h̄ iic̄ũ gahmeri m̄h̄h̄? arĩp̄ Saulo.

Ĩgu eroparic̄ũ ōpa arĩp̄ Jesu ĩgure:

—Wahgãn̄gajaque m̄h̄h̄. Macague waque. Iri macague ejac̄ũ ero majagu m̄ iiburire wereḡcum̄i m̄re, arĩp̄ Jesu Saulore.

7 Īḡu eroparĩcũ Saulo mera majarãpu ĩḡu wereniguiri dihtare peeñorã. Jesupure ĩabiriñorã. Īḡu eropa wacũ ĩarã güirã erã wereniguimasibiriñorã.

8 Eropiḡu Saulo yebague oyadigũ wahgãnuḡaja, ĩḡu ĩacũ ĩḡu cuiři deyobiriyorõ. Eropirã erã ĩḡu mojtore ñeha, Damascogue tuã wahgã wañorã erã ĩḡure.

9 Eropiḡu ĩḡu uñrenũ gohra ne ĩabiri, babiri, ne ihribiripũ.

10 Eropii Jesu ĩḡu buheḡu Ananía waĩcuḡu Damasco arĩpu. Eropiḡu Jesu dehyoapu Ananiare. Eropa dehyoagu piyupu ĩḡure:

—Ananía, ¿ãhriri? arĩpu Jesu ĩḡure.

—Ãhraa yũ, arĩ yuhripũ Ananía ĩḡure.

11 Īḡu eroparĩcũ Jesu ĩḡure werepu.

—Diaye waĩcũri mague waque. Eropa wagu Juda ya wihigue Tarso majagure Saulo waĩcuḡure amaque. Īḡu Goãmure serẽniguigu iicumi.

12 Eropiḡu quẽro dopa ta ĩḡu ĩarare ĩagu iicumi eroguere. Őpa arĩrire ĩagu iicumi. Muñũ mũ mojtore ĩḡu weca duhpeo, ĩḡu cuiři õaro wacũ ĩagu iicumi ĩḡure dehyoarare, arĩpu Jesu Ananiare.

13 Īḡu eroparĩcũ peegu Ananiaru õpa arĩpu:

—Opũ, ĩḡu mũ yarãre õarãre Jerusalén majarãre ñero ĩiapũ. Bajarã masa yũre eropa arĩ wereama.

14 Eropiḡu õre ĩḡu arĩpehrerã mũre umupeorãre peresu iigu arigu ĩiapũ. Pahia oparã ĩḡure eropa iidoreañorã, arĩpu Ananía Jesure.

15 Īḡu eropa arĩquerecũ Jesupu werepu ĩḡure.

—Īḡu Saulopũ yũ beyedigũ ãhrimi. Īḡu yaha buherire baja macari majarãre, oparãre, Israe masa sãre buheḡucumi.

16 Eropiḡu bajasuburi yahare ĩḡu buheri waja ĩḡu ñero tariguicumi. Irire ĩḡure masicũ iiguara. Eropiḡu waque muñũ, arĩpu Jesu Ananiare.

17 Īḡu eropa arĩra puñru Ananiaru, waha eja, Saulo ĩḡu arĩri wihigue ñaja wapũ. Ñajaja, ĩḡu mojtore Saulo weca duhpeo, werepu ĩḡure:

—Acawereḡu Saulo, mari Opũ Jesupu mague mũre dehyoadigũ yũre obeoami mũ cuiři mũ ĩaboro dopa. Espĩritu Santore mũ opaboro dopa, ĩḡu dorediro dopa mũ iaboro dopa yũre obeoami mũ pohroque, arĩ werepu Ananía Saulore.

18 Īḡu eroparīcā ta ĩḡu cuirire wai nūturī dopa bejarire ĩḡu cuirire cohrodijacā ĩarū pare Saulo. Īḡu eropa ĩatuhara pūhrū ĩḡu wahḡānūgajacā gajigūpū waīyerū ĩḡure.

19 Eropigū ĩḡu, ĩḡu bara pūhrū turagū warū.

Saulo Damascogue Jesu yare buhenūgarū

Eropii bajamenūri Damascogue Jesu yarā mera árīmūripū Saulo.

20 Eropigū irisubure ta ĩḡu judio masa buheri wiri árīḡu, Jesu yare buhepū masare. “Jesu Goāmū magū ta āhrimi,” arī werepū Saulo.

21 Īḡu eropa werecū ĩarā árīpehrerā ĩḡure peerā ũca wañorā.

—Īhī Goāmū yarāre Jesure umupeorāre ñero iidigū āhrimi. Eropigū ĩḡu erāre ñeha, dihri, pahia oparāre odiadigū árīrimi. Eropiidiagū ōguere aridigū árīrimi, arīñorā masa ĩḡure peerā.

22 Erā eroparīquerecū Saulo güiro mariro turaro mera buhenūgarū. Judio masare Damasco majarāre ōaro werepū. “Īhī Jesu diaye ta Cristo marire taubu āhrimi,” ĩḡu arī werecū erāpū ĩḡure “Gūyagū iimi ihī,” arīmasibiriñorā ĩḡure.

Saulo duhri wahḡāpū judio masare

23 Eropirā bajanūri pūhrū judio masa ĩḡure wejēdiañorā. Eropirā erā basi gamenere ĩḡure erā wejēburire wereniguiñorā.

24 Eropirā ĩḡure wejēdiarā, iri maca maja disipororire ũmūre ñami sāre coremūriñorā. Saulo wiricū ĩha wejēmorā coreñorā. Erā eropa wejēdiaquerecū Saulo erā wejēdiarire masipū ĩḡu mera majarā mera.

25 Eropirā ñamigue Saulo buherā ĩḡure puibu wūari puibu mera aīsā, iri maca maja sāriro pūḡpūḡue duhudi-jucāñorā ĩḡure.

Saulo Jerusalén árīpū

26 Eropigū Saulo Jerusaléngue ejagū, erogue Jesu yarā mera ĩḡu árīdiaripū. Īḡu eropa árīdiacū erā ĩḡure “Jesure umupeogū árībeami ihī,” arīñorā. ĩḡure güi árīñorā.

27 Erā eropa güiquerecū ta Bernabépū ĩḡure aīḡāpū Jesu ĩḡu apinirā pohrogue. Eropigū Saulo mague Jesure ĩḡu ĩarare, Jesu mera ĩḡu wereniguirare, Damascogue güiro mariro Jesu yare ĩḡu buhenūgarare werepū Bernabépū.

28 Īḡu eropa werera pūhrū Saulo erā mera ñajagū, Jerusaléngue erā mera árīmūripū.

29 Eropigū ĩḡu güiro mariro Jesu yare buhepū. Eropigū ĩḡu judio masare Jesu yare weretarinūgagū iipū. Erā judio

masa griego masa ya wereniguirã árĩñorã. Eropirã Saulo ïġu eropa weretarinuġari waja ïġure wejẽdiañorã.

³⁰ Erã eropa wejẽdiacũ ïarã, Saulo mera majarã Jesu yarãpũ ïġure Cesareague aĩduhrigã waha wañorã. Eroque ïġure sihu árĩniguri Tarsogue obeoñorã erã ïġure.

³¹ Eropi árĩpehrerogue Judea yebague, Galilea yebague, Samaria yebague Goãmũ yarã õaro árĩmuriñorã. Irisubure ne masa ñero iibirimuriñorã erãre. Eropirã õaro buheñorã erã. Eropirã erã Goãmure ġuhyadiaro ïañorã. Espiritu Santo erãre ïġu itamucũ erãpũ Jesure umupeorã bajarã wañorã.

Pedro Eneare õaġu wacũ iipũ

³² Eropii Pedro árĩpehreri macarigue wagũ, Jesu yarã Lida majarã pohroque sãre ejarũ ïġu.

³³ Eroque ejaġu Enea waĩcuġure bocajarũ. Enea dupũ buhadigũ árĩġu, ocho bojori gohra erã pũtãpidi oyamuriũ.

³⁴ Eropiġu Pedropũ ïġure õpa arĩpũ:

—Enea, Jesucristo õaġu árĩcũ iimi mũre. Wahġãnuġaque. Mũre pũtãpira gasirore amuque, arĩpũ Pedro ïġure.

Ïġu eroparĩcũ ta ïġu wahġãnuġaja waha wapũ.

³⁵ Eropirã árĩpehrerã Lida majarã, Sarón majarã ïġure ïarã, erã erã ñeri iirare duhu, Jesure umupeoñuġañorã.

Dorca waĩcuġore masupũ Pedro Jesu turari mera

³⁶ Eropii Jope waĩcũri macague Jesure umupeogo Tabita waĩcuġo árĩpo. Igo waĩ Tabita griego ya wereniguri mera Dorca àhraa. Igo õarire iigo baja omuriipo masare.

³⁷ Eropigo irisubure igo dorecũ wahġũ, sĩaria wamuriipo. Igo sĩricũ ïarã, erã igo dupũ mũrarore õaro coe, umaro maja taribugue apiñorã igore.

³⁸ Lida waĩcũri maca Jope pohroque árĩyoro. Ero eropa árĩcũ Jesure umupeorã Jope maca majarã Pedro Lidague ïġu árĩcũ peebeoñorã. Eropa peebeorã perã umare obeoñorã Pedro pohroque. Ïġu pohroque ejarã wereñorã Pedrore erã.

—Yojaro mera waque ġua árĩroque, arĩ wereñorã erã.

³⁹ Erã eroparĩcũ peegũ erã mera waha wapũ ïġu. Eroque ïġure erã aĩ ejara pũhrũ umaro maja taribugue sĩridigo pohro aĩmũria wañorã ïġure. Pedro árĩcũ ïha árĩpehrerã wapeweyarã nome oregã ïġu pohro ejanuġamuriñorã. Tabita erã mera árĩnigogue baja suhrire iibasamuriipo. Eropirã erã igo eabasara suhri mũrare ïhmuñorã Pedrore.

40 Pedro erāre iri taribugue árĩrāre wiriadorepũ. Erā wiriara pũhrũ ĩgũ mereja, Goāmũre igore serēbasapũ. Eropigũ igo dũpũ mũrarore maji ĩha,

—Tabita, wahgãque, arĩpũ ĩgũ.

Ĩgũ eroparĩcũ ta igopũ ĩha wahgũ, Pedrore ĩha, wahgã doajapo.

41 Igo eropa wahgã doajacũ ĩha, ĩgũ igo mojotore ñeha tarawahgũ nugupũ igore. Eropigũ ĩgũ ero majarāre Jesu yarāre, wapeweyarāre sihubeo, igore ojocarigore wiapũ erāre.

42 ĩgũ eropa iira pũhrũ árĩpehrerā Jope majarā irire masirā bajarā masa Jesure umupeonũgañorā.

43 Pũhrũ Jopegue Simo waimũrā gasirire amugũ mera bajanũri Pedro ĩgũ mera árĩpũ.

10

Pedro Corneliore Jesu yare werenũgapũ

1 Irisubure Cesareague Cornelio waĩcũgũ árĩgũ. ĩgũ cien surara opũ árĩpũ. Erā surarapũ erā ya curu Italiano waĩcũyo ro.

2 Cornelio ĩgũ ya wihi majarā mera mari Pagũre umupeorā, gũhyadiaro ĩarā árĩñorā. Eropigũ ĩgũ judio masa mojomorocũrāre itamugũ baja gajinore omũripũ. Eropigũ ĩgũ Ʃmũri nũcũ mari Pagũre serēmũripũ.

3 Eropii ñamicague tres árĩcũgue Goāmũ yagũ anyu ĩgũre dehyoapũ. Eropa dehyoagũ Cornelio pohrogue ñajajapũ.

—Cornelio, arĩ piyupũ anyu ĩgũre.

4 Eropigũ Cornelio ĩgũre ĩha gũigũ õpa arĩpũ:

—Opũ, ¿ñehenore gahmeri? arĩpũ ĩgũ.

—Masare mũ orare, mari Pagũre mũ serēniguirare Goāmũ peeami.

5 Eropigũ Jopegue mũ Ʃmare obeoque. Erogue Simo Pedro waĩcũgũ āhrimi. ĩgũre aĩgãridoreque mũ Ʃmare.

6 ĩgũ gajigũ Simo waimũrā gasiri amugũ pohro, wũariya tũro árĩri wihi ta āhrimi, arĩpũ anyu Corneliore.

7 Anyu eropa arĩtuhaja, wiria waha wapũ. ĩgũ wiriara pũhrũ Cornelio perāre ĩgũre itamurāre yujugũ ĩgũ surara mera majagũre sihupũ. Surarapũ Goāmũre umupeogũ árĩgũ, Ʃmũri nũcũ Corneliore itamudigũ árĩpũ.

8 Eropigũ Cornelio erāre werepeho, Jopegue obeopũ erāre.

9 Eropi gajinũ Jopegue erā warisubu goeri boje gohra árĩcũ Pedropũ wihi wecague Goāmũre serēgũ wapũ.

10 Eropigũ ĩgũre oa pũricũ badiapũ. Eropigũ gajirā barire erā moarisubu ĩgũpũ dehyoacũ ĩapũ.

11 Ɔmarore p̄arimaac̄ũ, w̄uari gasiro wapic̄urisubu pep̄uri ojogorori dirira gasiro dijaric̄ũ ĩap̄ũ.

12 Iri gasiro pohecague bajarã waimurã n̄ugũ majarã, yebague paha curirã, mirimagũ porã majarã árĩnorã.

13 Irire ĩgu ĩara p̄uhrũ, Pedrore wereniguiro caric̄ũ peep̄ũ.
—Pedro, wahgãn̄ugajaque. Oãre wejẽ baque, arĩro cariyoro ĩgure.

14 ĩgu eroparĩc̄ũ peequeregũ ta Pedro õpa arĩp̄ũ:

—Op̄ũ, ne erãre babeaa yuhũ. Ñerãre, Goãmu ĩgu badorebirinirãre ne babirimurabu yuhũ, arĩp̄ũ Pedro.

15 Eropigu Pedro dipaturi wereniguiro caric̄ũ peep̄ũ.

—Goãmu, “Õarã ãhrima,” ĩgu arĩnirãre “Ñerã ãhrima,” arĩbiricãque m̄uhũ erãre, arĩro cariyoro Pedrore.

16 Eropii uhresubu eropa arĩ wereniguira p̄uhrũ iri gasiro umarogue m̄aria wayoro daja.

17 Eropigu Pedro burigã guña “¿Dohpa arĩdiari iiri yure eropa dehyoaro?” arĩ pepip̄ũ ĩgu ĩgu basi. ĩgu eropa pepirisubu Cornelio uma ĩgu obeonirãp̄ũ Pedro ya wihigue ejañorã. “¿Simo ya wihi nohogue ãhriri?” arĩ, erã serẽpira p̄uhrũ ĩgu ya wihigue ejañorã erã.

18 Eropirã erã serẽ ĩha purumujuñorã. “¿Simo Pedro waĩcũgu i wihire ãhriri?” arĩ serẽpi ĩañorã erã.

19 Eropigu Pedro ĩgu pepirisubu Espiritu Santo ĩgure werep̄ũ:

—Ĩaque. Ɔrerã uma m̄ure amarã iima.

20 Wahgãn̄ugajaque. Dijaque. Erã mera waque. “¿Dohparĩri?” arĩ pepibigu ta waque õaro mera. Yurũ erãre õguere obeoabu, arĩp̄ũ Espiritu Santo Pedrore.

21 ĩgu eroparĩc̄ũ peegũ Pedro erã pohroque dija wa,

—Ĩaque. Ohõ ãhraa yuhũ m̄ua amagãrigũ. ¿Duhpirã arirã iiari m̄ua yũ pohro arirã? arĩp̄ũ Pedro erãre.

22 ĩgu eroparĩc̄ũ ta erãp̄ũ õpa arĩñorã.

—Cornelio cien surara op̄ũ, õarire iigu, mari Pagure guhyadiaro mera umupeogu, arĩpehrerã judio masa “Õagu” erã arĩgu m̄ure sihugãridoregu obeoami guare. Goãmu õagu anyu Corneliore m̄ure sihudoreap̄ũ. Őpa arãp̄ũ: “Pedrore m̄ua ya wihigue aĩgãridoreque mu umare. Eropii ĩgu m̄ure weregucumi,” arĩ, sihudoreap̄ũ anyu Corneliore, arĩ wereñorã Cornelio Pedrore ĩgu sihudorenirãp̄ũ.

23 Erã eroparĩc̄ũ Pedrop̄ũ erãre ñajaridore, bari oho, ĩgu ya wihigue carĩdorep̄ũ erãre. Eropigu gajinu Pedro wahgã, erã mera waha wap̄ũ. Eropirã gajirã Cristo yarã Jope majarã Pedrore wapicũgãñorã.

24 Gajinũ erã Cesareague ejañorã. Eropigu Corneliopũ ïgu acawererãre, ïgu mera majarã sãre sihu gameneo, Pedrore corepũ.

25 Eropigu Pedro Cornelio ya wihi pohrogue ïgu aricũ ïagu Corneliopũ ïgure bocatĩri wiria, ïgu guburi pohro merejapũ.

26 ïgu eropa iicũ Pedropũ ïgure aĩ wahgũnugupũ.

—Niguique mũhũ. Yũ sã mũ iro dopa ta árĩgu ãhrraa. Goãmũ árĩbeaa, arĩpũ Pedro ïgure.

27 ïgu eropa arĩtuhajara pũhrũ Cornelio ïgure aĩñaja wapũ ïgu ya wihigue. Erogue ñajajagu masa bajarã iri wihigue gamenere ïgure corerãre ïapũ Pedro.

28 Eropigu Pedro erãre werepũ:

—Judio masũ árĩqueregu ta gaji curu majarã mera árĩgu gũa dorerire tarinũgagu iiaa yũhũ. Irire õaro masia mũa. Eropigu gaji curu majarãre “Ñerã ãhrima,” arĩdorebirami Goãmũ. Õpa arĩ wereami ïgu yũre.

29 ïgu eroparĩcũ peegu õguere mũa pohroguere ahrabũ. Mũa yũre sihubeocũ “Ne wasome,” arĩbirabũ. ¿Dohpa árĩronore yũhũ õgue aricũ gahmeari mũa? arĩpũ Pedro erãre.

30 ïgu eroparĩcũ peegu Corneliopũ õpa arĩpũ:

—Tres árĩcũ i horano gohra ta mari Pagũ yagu anyu yũre dehyoami. Wapicũrinũ wahaa ïgu yũre dehyoara pũhrũ. Irinũ ta mari Pagũre yũ serẽniguirisubu cuimijuri suhricũgu yũ pohro dehyonũgajami.

31 Eropigu ïgu yũre õpa arãmi: “Cornelio, mũhũ mari Pagũ mera mũ serẽcũ ïgu peeami. Eropigu mojomorocũrãre erã gamerire mũ ocũ ïagu mari Pagũ mũ mera mucubirigu itamugũcumi.

32 Eropigu Jopegue mũ ãmare obooque Simo Pedro waĩcũgure mũ pohrogue erã aĩgãricũ. ïgu gajigu Simo waimurã gasiri amugu ya wihi, wũariya tũro pohro árĩri wihi ãhrimi ïgu. ïgu mũ pohro eragu mũre weregũcumi,” arĩ wereami ïgu yũre.

33 ïgu eroparĩcũ peegu yũ ãmare mũre aĩgãridoregu oboobũ yũhũ. Eropigu õaro iigu ahraya mũhũ gũa pohroguere. Eropirã gũa árĩpehrerã õre mari Pagũ ïgu ïhabeoro árĩrã iiaa gũa. Árĩpehrerire mari Pagũ Goãmũ mũre ïgu weredorera peediarã, cohreabũ gũa, arĩpũ Cornelio Pedrore.

Pedro Jesu yare werepũ Cornelio ya wihi majarãre

34 ïgu eroparĩcũ peegu, Pedro õpa arĩ werepũ:

—Dohpague masia pare. Diaye ta áhrra. Goãmũ yujuropa ta ðaro iimi marire.

³⁵ Eropigũ árĩpehreri macari majarã Goãmũre guhyadiaro erã íacũ, ðarire erã iicũ, Goãmũpũ erãre mucubirimi.

³⁶ Goãmũ gũa judio masa pohro Jesucristore obeomi. Masa Goãmũ mera ðaro erã árĩboro dopa Jesupũ ðari buherire weremi. Iri buherire mũa masia. Jesucristopũ árĩpehrerã masa opũ áhrimi.

³⁷ Ñu waĩyegũ “Mũa ñerire bujawereque. Eropirã waĩyenirã árĩque,” masare ígũ eropa arĩ werera pũhrũ Galileague ðari buherire Jesupũ werenũgami. Pũhrũ Judea yebague iri buherire werepehomi.

³⁸ Ihĩ Jesu Nazare majagũre Goãmũpũ ígũ turarire, Espĩritu Santo mera ígũ iimasiburire odi árĩmi Jesure. Eropigũ Jesu ðaro iigũ wami. Eropa wagũ watẽa ñajasũnirãre, ñero tarirãre, árĩpehrerãre ðarã wacũ iimi. Mari Pagũ Jesu mera árĩdi árĩmi.

³⁹ Judea yeba, Jerusalén sãre árĩpehreri ígũ iirare gũa íabũ. Pũhrũ erã crusague pabia wejẽma ígũre.

⁴⁰ Eropigũ uhrenũ waboro Goãmũ ígũre masudi árĩmi. Eropigũ Jesure ígũ masura pũhrũ gajirãre dehyoacũ iidigu árĩmi mari Pagũ.

⁴¹ Irisubu Jesure árĩpehrerã íabirima. Gũare bajamerãgãre dehyoami. Mari Pagũ ígũ gamerãre, Jesure íamorãre iribojegue Goãmũ gũare beyepũ. Gũapũ Jesu ígũ sĩridi masara pũhrũ ígũ mera baha, ihribũ.

⁴² Eropigũ ígũ gũare doremi ðpa arĩgũ: “Masare wereque. Yũhũ Jesu árĩpehrerã ojocarirãre, sĩrinirãre erãre dipuwaja moabu yũ árĩcũ iiami yũre Goãmũ. Eropirã irire wereque,” arĩ doremi Jesu gũare.

⁴³ Árĩpehrerã Jesure erã umupeocũ íagũ Goãmũ erã ñerire cãdijigũcumi. Irire árĩpehrerã Goãmũ ya weremũhtanirã iribojegue majarã wereyuñuma, arĩ werepũ Pedro.

Judio masa árĩbirã Espĩritu Santore opanũgañorã

⁴⁴ Iri árĩpehrerire ígũ eropa arĩ wererisubu, árĩpehrerã irire peerã mera Espĩritu Santo árĩnũgamũripũ.

⁴⁵⁻⁴⁶ Eropirã erã judio masa árĩbirã peeyamariri wereniguirĩ mera mucubiriri mera wereniguinũgañorã. Erã ya wereniguirĩ mera “Goãmũ turagũ, ðagũ áhrimi”, arĩrã iĩñorã. Erã eroparĩcũ peepũ Pedro ígũ acawererã judio masa mera. Eropirã Espĩritu Santo judio masa árĩbirã mera ígũ árĩnũgacũ íarã judio masapũ uca wañorã. Eropigũ Pedro ðpa arĩ werepũ judio masare:

47 —Mari iro dopa ta Espíritu Santore opama oã sã. Erã eropa opacũ ãarã oãre waïyedoremasia mari, arĩpũ Pedro erãre.

48 Eropa arĩtuhaja Jesu waĩ mera judio masa árĩbirãre waïyedorepũ Pedro. Erã eropiira pũhrũ “Gua mera baja-menurigã dujanique,” arĩñorã erã Pedro sãre.

11

Pedro Jerusalén majarãre Jesu yarãre werepũ

1 Eropii judio masa árĩbirã sã Goãmũ yare erã õaro gamecũ Jesu ãgu apinirãpũ erã acawererã Judeague árĩrã mera peebeñorã.

2 Eropirã Pedro Jerusaléngue ãgu dujacũ ãarã judio masa Jesu yarã bajamerãgã ãgure õpa arĩñorã:

3 —¿Judio masa árĩbirã pohro duhpigũ ejari mũhũ? ¿Dohpa árĩronore erã mera bahari mũhũ? arĩ turiñorã erã Pedrove.

4 Erã eroparĩcũ peegu Pedro ãgu iirare werepehopũ erãre.

5 Õpa arĩ werepũ:

—Yũhũ Jopegue árĩgu Goãmũre serẽgu iibũ. Eropigu yure õpa dehyoabũ. Yũhũ ãacũ wuãri gasiro wapicũrisubu pepũri dirira gasiro umarogue yũ pohroque dijaricũ ãabũ.

6 Eropigu iri gasirore õaro ãabũ “¿Ñeheno iri gasiroguere ãhriri?” arĩbũ. Eropigu ãabũ iri gasiroguere árĩrãre. Waimurã nũgu majarãre, yebague paha curirãre, mirimagũ porã majarãre ãabũ.

7 Eropigu Goãmũ ãgu yure wereniguirire peebe. “Pedro, wahgãnũgaque. Wejẽ baque oãre,” arĩgu carimi yure.

8 ãgu eroparĩcũ peegu õpa arĩbũ yũhũ. “Opũ, ne erãre babeaa yũhũ. Ñerãre Goãmũ badorebirinirãre ne babirimurabũ yũhũ,” arĩbũ yũpũ.

9 Eropigu umarogue yure dipaturi wereniguigu carimi daja. “Goãmũ ãgu ‘Õarã ãhrima,’ ãgu arĩrãre ‘Ñerã ãhrima,’ arĩbircãque mũhũ,” arĩgu carimi yure.

10 Eropigu uhresubu ãgu eropa arĩ wereniguira pũhrũ iri gasiro dipaturi muria wabũ daja.

11 Yũ eropa ãarisubu ta urerã uma gua árĩri wihigue ejanirã árĩma. Erã Cesarea majagu ãgu obeonirã árĩnirã árĩma.

12 Eropigu Espíritu Santopũ yure erã mera wadoregu “‘Erã ñerã ãhrima,’ arĩbircãque erãre,” arĩ weremi ãgu yure. Eropirã oã seis mera yũ acawererã mera Cesarea majagu ya wihigue ñajajabũ gua.

13 Eropigū īgū guare ōpa arī weremi. “Anyu yaha wihi dehyoacū ĭabū yūhū. Ōpa weremi yūre. ‘Jopegue Simo waīcūgure aīgāridoreque.

14 Īgū mūre mū acawererā mera mūare árīpehrerāre peamegue wabonirāre mūa tariborore weregūcumī,’ arīmi anyu yūre,” arī weremi yūre Cesarea majagū.

15 Eropiī yūhū erāre wereniguirisubu Espírītu Santopū erā mera árīnūgami marire īgū iimūhtadiro dopa ta.

16 Eropigū Jesu īgū wererare guñabū yūhū. Ōpa arī weremi īgū: “Ū mūare waīyegū deco mera waīyemi. Yūpū iri tauro iīgūra mūare. Pūhrū Espírītu Santore mūa mera árīniguicū iīgūra,” arī weremi.

17 Eropigū Jesucristo mari Opūre mari umupeocū ĭagū Goāmū īgū Espírītu Santore ohāmi marire. Eropigū Goāmū marire īgū Espírītu Santore īgū odiro dopa ta judio masa árībirā sāre īgū ohāmi. Goāmū īgū eropa iicū ĭagū īgūre tarinūgamasibea yūhū, arīpū Pedro erāre judio masare Jesu yarāre.

18 Īgū eroparīcū peerā, erā īgūre ne arīnemobiriñorā. Īgūre erā turimasibiriñorā. Eropirā erā Goāmūre mucubirirā,

—Goāmū ōagū, turagū āhrimi, arīñorā.

Ōpa arīnemoñorā erā:

—Judio masa árībirā sā erā ñerire bujawererā árīrā Goāmū īgū taunirā árīrācoma. Eropa īgū taunirā árīrā erā sā ūmūri nūcū īgū mera árīniguirācoma, arīnemoñorā erā.

Antioquía gajirā Jesu yarā árīñorā

19 Eropiī Estebanre erā wejēra pūhrū masa Jesu yarāre ñero iīñorā. Erā eropa iicū ĭarā Jesu yarā duhrisirīgā wañorā. Eropirā erā Feniciague, Chipregue, Antioquíague waha, judio masa dihtare Goāmū yare wereriñorā erā.

20 Gajirāpū Jesu yarā mera majarā Chipre majarā, Cirene majarā Antioquíague eja, judio masa árībirāre Jesu yare buheñorā Goāmū erāre īgū tauboro dopa.

21 Eropigū mari Opū erāre itamupū. Eropirā masa bajarā Jesure umupeo, ōarīpūre gohrotoñorā.

22 Eropiī “Antioquía majarāgue Jesure gamecoma,” arī peebeoñorā Jerusalén majarā Jesu yarā. Erā eropa peebeora pūhrū Jerusalén majarā Bernabé waīcūgure Antioquíague obeoñorā.

23 Eropigū īgū Antioquíague ejagū, Goāmū itamuri mera judio masa árībirā īgū yarā erā wacū ĭagū, būrigā mucubiripū. Eropigū īgū ero majarāre ōpa arī werepū:

—Jesure eropa umupeoniguicãque. Īḡu yare ne duhubir-icãque, arĩ werepu ĩḡu árĩpehrerãre erãre.

²⁴ Bernabé ðagũ árĩḡu, Espíritu Santore wũaro opagũ árĩḡu, Jesu doreldo dopa iĩḡu árĩḡu Jesure ðaro umupeodigũ árĩḡu. Eropirã ĩḡu buhera pũhrũ bajarã masa Jesure umupeoñorã.

²⁵ Pũhrũ ĩḡu Tarso waĩcũri macague Saulore amagu wapu.

²⁶ Eroque ĩḡure bocajapu. Īḡu bocajara pũhrũ Antioquíague aĩḡãpu Saulore. Eroque erã ejara pũhrũ yuju bojori gohra erã Goãmũ yarã mera gamenere, bajarã masare buhemũriñorã erã. Eropirã Antioquíague Cristo yarã Cristiano waĩcũnũgañorã.

²⁷ Irisubure Goãmũ ya weremuhtarã Jerusalén árĩnirã waha, Antioquíague ejañorã.

²⁸ Eropigũ erã mera majagu Agabo waĩcũḡu Jesu yarã watope nĩguĩḡu, Espíritu Santo ĩḡu turari mera werepu erãre. “Árĩpehreri yebaguere burigã oanũ waroca,” arĩ wereyupu ĩḡu. Irisubure bari maririsubu árĩcũ árĩpehrerã weca opu Claudio árĩḡu.

²⁹ Eropirã Jesu yarã árĩpehrerã erã oparopẽ erã acawererãre odlarã erã basi game wereniguĩñorã. “Judea yeba majarãre Jesu yarãre niyerure obeorã,” arĩñorã erã basi.

³⁰ Erã eropa arĩra pũhrũ Bernabé Saulo mera erã iri niyerure aĩḡãbasañorã. Eroque ejarã Judea majarãre Jesu yarãre wiañorã iri niyerure.

12

Pedrore peresu iĩñorã

¹ Irisubu opu Herode yujurãyerire Jesu yarãre ñero iĩnũgapu.

² Eropigũ ĩḡu Ñũ tĩḡure Santiagopũre matamiji mera ĩḡu wejẽdorecũ gajĩḡupu ĩḡure wejẽpu. Santiagore ĩḡu wejẽcũ judio masa mucubiriñorã.

³ Erã mucubiririre Herode masigũ, “Eropa dihta iicũ gahmema erã,” arĩḡu Pedro sãre peresu iĩpu. Irinũrere buḡabiriri pan erã bari bosenu Pascua árĩyoro.

⁴ Eropigũ Herode Pedrore ñeha, peresu iĩpu. Eropigũ diez y seis surarare ĩhadibudorepu ĩḡure. Wapicũrã surara ĩḡure ĩhadibuñorã. Pũhrũ wapicũrã erã gohrotonirã ĩḡure ĩhadibumũriñorã. Eropa ta iĩñorã erã diez y seis surara. Herodepu Pascua pũhrũ Pedrore peresugue árĩḡure masa core duhudobodiaripu ĩḡure wejẽdorebu.

⁵ Eropigũ Pedro peresugue árĩḡu. Īḡu erogue árĩcũ ta Jesu yarãpu Goãmũre burigã serẽbasañorã ĩḡure.

Goãmũ peresugue árĩgũre Pedrore wiupũ

⁶ Iri ñamire ta Pedro comedari peda mera erã diridigu perã surara watope carĩgu iipũ. Eropirã perã surara disiporo coreniguiñorã ĩgũre. Eropigu iri ñami boyoro Herode Pedrore judio masa core duhudobodiaripũ ĩgũre wejẽdorebu.

⁷ Eropigu Goãmũ anyupũ Pedro carĩgu pohro ĩgu niguicũ ĩgu peresu árĩri taribu boyopehrea wayoro. Eropigu anyu Pedro pohro niguigu ĩgu patorere puucarepũ ĩgũre.

—Duru wahgãque, arĩpũ ĩgu Pedrore. ĩgu eroparĩcũ ta ĩgu mojotorire erã dirira comedari pãrisiri dija wayoro.

⁸ Eropigu anyu ĩgũre werepũ:

—Mũ ya suhrire sañaque. Mũ zapatu sãre sañaque, arĩpũ ĩgu.

Ĩgu eroparĩcũ Pedropũ ĩgu arĩro dopa ta iipũ.

—Mũ weca majañe suhrirore saña, yũ mera arique, arĩpũ anyu.

⁹ ĩgu eroparĩcũ iri taribugue árĩdigũ wiria anyu pũhrũ waha warũ ĩgu. Eropa waqueregũ ta õpa arĩ pepiripũ ĩgu. “¿I diaye árĩbiricuri? ¿O quẽgũ iicuri yũhũ?” arĩ pepiripũ ĩgu.

¹⁰ Eropirã erã ĩgu árĩri taribu pohro niguirã surarare tarigã, gajirã yoañariro niguirã sãre tarigã, wũari disiporogue ejañorã. Iri disiporo macague wari mare cãhmotayoro. Iri biharise irise basi pãricũ erã wiriañorã. Wiria wa erã mague waha wañorã. Anyupũ waha warũ. Eropigu Pedro yujugũ ta dujarũ.

¹¹ Eropa ĩgu anyu ĩgu wara pũhrũ ĩgu iirare Pedro masipũ pare. Ópa arĩ pepirũ ĩgu. “Anyu Goãmũ ĩgu obeodigu peresugue árĩgũre yũre wiugũ erami. Dohpague irire masia ĩgu eropa iirare. Judio masapũ yũre erã ñero iidiarare Goãmũpũ erãre iidorebirami. Eropigu yũre Herode ĩgu peresu iidigũre wiuami,” arĩ pepirũ Pedro.

¹² ĩgu eropa arĩ pepira pũhrũ María Ñu pago ya wihigue ejarũ Pedro. Ñupũ Marco waĩcũgũ arĩpũ. Iri wihigue masa bajarã gamenere, Goãmũre serẽrã iĩñorã.

¹³ Eropigu Pedro disiporore eraa dotepũ. Rode waĩcũgo pohro majago ĩgu dotecũ peego, ĩago ejapo igo.

¹⁴ Eropigo Pedro igore piyucũ peego ĩgu wereniguirire pee masi, burigã mucubiri disiporore pãgũbiripo. Eropa mucubirigo ĩgũre pãgũbodio cãdija wapo. Pedro ero niguicũ ta igo majinũgaja oma ñaja wapo.

—Pedro disiporogue erami, arĩ werego ñajapo.

¹⁵ Eropirã iri wihi árĩrã igo eroparĩcũ peerã,

—Eropa arĩmaacãgo iiaa mũhũ, arĩñorã erã igore.

—Diaye ta āhraa. Diaye ta arīgo iiaa, arīpo igo. Igo eroparīcū peerā,

—Īḡu árībīricumi. Īḡu sīporā mūraro eraro iica, arīñorā erāpū.

¹⁶ Erā eropa arīrisubu Pedro disiporore eropa ta dotenigu-icāpū. Īḡu eropiicū peerā, erā disiporore pāḡū, īḡure īha, ũca wañorā.

¹⁷ Eropiḡu Pedro īḡu mojoto mera “Ejarimaricāque,” arīḡu, Goāmū peresugue īḡure īḡu wiurare werepū erāre.

—Ire wereque Santiagore gajirā Jesu yarā sāre, arīpū Pedro.

Eropa arī weretuhaja, īḡu gajipugue tarigā waha wapū.

¹⁸ Eropii boyodijiricū surara Pedrore īhadibunirā īḡu dohpa ii wiriarare ne masibiriñorā. Eropa masibirā ũca wañorā.

¹⁹ Eropiḡu Herode Pedrore amadoreripū. Eropiḡu īḡu surarare peresu corerāre īḡu serēpira pūhrū erāre wejēdorepū Herodepū. Eropii Herode Judeague árīdigu waha Cesareague árīḡu waha wapū.

Herode sīria wapū

²⁰ Ero pūhrū Tiro waīcūri maca majarā mera Sidón waīcūri maca majarā mera sāre Herode guapū. Īḡu eropa guacū īarā iri macari majarāpū Herode mera amurā wañorā. Īḡu erā mera īḡu guarare wereniguirā wañorā. Ejaa Herodere īaboro core Herode itamugū Blasto waīcūḡu mera weretamuñorā. Eropirā erā īḡu Blasto īḡu itamuri mera Herode pohro ejañorā. Īḡu pohro ejarā ōpa arīñorā:

—Mari ōaro árīrā. Mari basi īhaturibiricārā, arī serēñorā erā Herodere.

Erā ya yeba majarā Herode ya yeba barire bocamūriñorā. Eropirā Herode erāre īhaturicū gamebiriñorā erā.

²¹ Eropiḡu Herode erā īḡure īarinū īḡu queoranū árīcū, opū īḡu sañari suhri ōari suhrire sañamūripū īḡu. Eropiḡu īḡu īḡu doaro doanijagū, masare werenigui ihmumūripū.

²² Īḡu eropa werenigui ihmucū peerā masapū gaguiniguñorā:

—Ihī wereniguigu masū árībeami. Goāmū āhrimi, arī gaguiniguimūrirīñorā erā Herodere.

²³ Erā eropa arīra pūhrū Goāmū īḡu anyu Herodere dore ōpū. “Goāmū árībeaa yūhū,” ne arībīripū Herode. Īḡu eropa arībīrira dipuwaja anyu īḡu dorecūcū iipū. Īḡu eropa dorecūcū īḡure beca ba wejēcāñorā.

²⁴ Eropii Jesu yarā masa bajarāre Jesu ya buherire buheñorā.

²⁵ Eropirã Bernabé, Saulo mera Jesu yarãre itamupehohaja Jerusaléngue árĩnirã Antioquíague dujaa wañorã. Eropirã Ñure Marco waĩcũgũre erã aĩgãñorã erã mera.

13

Jesu yarã Bernabére Saulo mera Goãmũ yare buhedore obeoñorã

¹ Irisubure Antioquíague Jesu yarã gamenererã mera majarã, Goãmũ yare weremuhtarã árĩñorã. Masare buherã ta árĩñorã erã sã. Bernabé, Simo Negro waĩcũgũ, Lucio Cirene majagu, Manaén, Saulo mera erã árĩñorã. Manaénpũ opũ Herode murũ mera erã perã yujuro mera ta masanirã árĩñorã.

² Eropirã erã Goãmũ yare erã buherisubu, erã ba duhurisubu, Espíritu Santopũ werepũ erãre:

—Bernabére, Saulo mera apique yũ gamero dopa iimorãre. Irire iimorãre beye apigũ iiaa erãre, arĩpũ Espíritu Santo.

³ Īgũ eroparĩcũ erãpũ ba duhu Goãmũre serẽ, Bernabé weca Saulo weca erã mojotorire duhpeoñorã. Eropa duhpeorã erãre buhedorerã obeoñorã.

Chipregue Jesu ĩgũ apinirã buheñorã

⁴ Eropirã erã Espíritu Santo ĩgũ obeonirã árĩrã, Seleuciague eja, iri macare tarigã, Chipre waĩcũri nũgũrogue ejañorã erã.

⁵ Eropirã Salamina waĩcũri peramague ejañorã. Iri maca judio masa buheri wirigue Goãmũ yare werenũgañorã erã. Eropigũ Ñu Marco sã erã mera waha, erãre itamupũ.

⁶ Eropirã erã iri nũgũro ojogoro maja. Pafo waĩcũri macague ejarã, yeere bocañañorã erã. Īgũ judio masũ Barjesu waĩcũgũ arĩpũ. Barjesu griego ya mera Elima erã arĩ piyugũ arĩpũ. “Goãmũ yare weremuhtagũ ãhraa yũhũ,” arĩ masare gũyaniguicãgũ arĩpũ ĩgũ.

⁷ Eropigũ ĩgũ Sergio Paulo waĩcũgũ mera majagu arĩpũ. Sergio Paulopũ iri nũgũro majarã opũ masipehogũ arĩpũ. Eropigũ Goãmũ yare peediagu erãre Bernabé, Pablo mera bocatĩripũ ĩgũ.

⁸ Eropigũ Elima yeepũ erãre buhedorebiriripũ. Īgũ Sergio Paulo Jesu yare ĩgũ umupeocũ gamesãbiripũ yeepũ. Sergio Paulore Goãmũ yare ĩgũ peecũ cãhmotadiaripũ.

⁹⁻¹⁰ Īgũ eropa buhedorebiriqerercũ ta Saulo, Pablo waĩcũgũ Espíritu Santore ðaro opagu árĩgũ yeere ðaro ĩadihupi ĩgũre werepũ:

—Muhũ guyaricũgu, ñegu, watĩ ĩgu dorerire iigu, ðarire ĩhaturigu āhraa muhũ. ¿Duhpigũ mari Opũ yare “Ñeri āhraa. Guvari āhraa,” eropa arĩniguicāri muhũ?

¹¹ Muhũ eroparĩra waja Jesu mari Opũ mure ĩgu pēhrecũ cuirĩ ĩhajabigu arĩgũca muhũ. Eropigu bajamenurigā muhũ inurire ĩarisome, arĩpũ Pablo.

Īgu eroparĩcũ ta ĩgu yeepũ imica iro dopa arĩrire ĩamũhtagũ, naitĩaro dihtare ĩapũ ĩgu. Eropigu ĩgure tuā curibure amapũ ĩgu.

¹² Īgu eropa wacũ ĩagu, Sergio Paulopũ Jesu yare “Diaye ta āhraa,” arĩ masipũ. Mari Opũ yare ĩgu pee, uca wa, Jesure umupeonũgarũ.

Pablo Bernabé mera Antioquía Pisidia yebague arĩri macague arĩñorā

¹³ Eropi Pablo sã Pafogue arĩnirā dohodiru mera waha, Pergegue ejañorā. Perge Panfilia yebague āhraa. Erogue eja, Ñu Marcopũ erāre cohā wahgā, Jerusalengue waha wapũ.

¹⁴ Erāpũ Pergegue arĩnirā waha, Antioquíague ejañorā. Antioquía Pisidia yebague āhraa. Erogue ejarā, Sabadonũ arĩcũ erā judio masa buheri wihigue ñajaja, erogue doañorā.

¹⁵ Eropirā iri wihi majarā oparā Goāmũ dorerire, Moisegue marire ĩgu apirare, Goāmũ yare weremũhtanirā erā gojarare erā buhera pũhrũ erā sihubeoñorā Pablo sāre.

—Acawererā, ¿masare mũa werediarā iiri? Irire werediarā wereque dohparagā, arĩñorā iri wihi majarā oparā.

¹⁶ Erā eroparĩcũ peegu, Pablo wahgānũgaja, “Werenigu-ibiricāque,” arĩgu ĩgu mojoto mera paaturũ. Erā ejari-maricũ ĩha, ĩgu ðpa arĩpũ:

—Israe masa, mũa mari Pagure umupeorā, peeque.

¹⁷ Mari ñecũ sũmarā mũa Goāmũre umupeomũriñuma. Erā mũrare Goāmũ beyemũriñumi. Eropirā erā mari ñecũ sũmarā yoari boje Egiptogue arĩmũriñuma gajirā arĩquererā. Erogue erā arĩcũ Goāmũ ðaro iimũriñumi erāre. Eropirā bajarā masa pore arĩñuma erā. Ōpa iĩñumi erāre. Erāre Egiptogue arĩrāre ĩgu turari mera aĩ wiuñumi Goāmũ.

¹⁸ Īgu eropa wiura pũhrũ erā cuarenta bojori gohra masa marirogue curimũriñuma. Erogue ĩgure erā tarinũgacũ Goāmũ eropa ta pepicāñumi.

¹⁹ Eropigu Canaa waĩcũri yebaguere siete cururi majarāre cõatuhaja, Goāmũ iri yebare oñumi Israe masapũre.

²⁰ Iri yebare otuhaja cuatrocientos cincuenta bojori gohra masare doremorāre apimũriñumi Goāmũ Israe masare.

—“Goãmũ ïgũ apinirã Samue ïgũ árĩcũgue árĩtumuriĩnuma. Samuepũ Goãmũ yare weremũhtagu árĩmuriĩnumi.

21 Samue árĩrisubu Israe masapũ erã opũ árĩbure amamuriĩnuma. Eropirã Goãmũre serẽmuriĩnuma. Erã eropa serẽcũ ïagu Goãmũ Saulore apimuriĩnumi. Saulo Cis magũ árĩĩnumi. Benjami ya curu majagu árĩĩnumi. Eropigu cuarenta bojori gohra erã opũ árĩbure apiĩnumi Goãmũ ïgũre.

22 Eropigu Goãmũ Saulore ïgũ cóãra pũhrũ Davire apimuriĩnumi ïgũ. Ōpa arĩĩnumi Goãmũ Davire. “Davi Isaí magũre bocabũ yũhũ. ïgũre mucubiria yũhũ. ïgũ yũ gamerire iipehogũcumĩ,” arĩĩnumi Goãmũ.

23 Ihĩ Davi ïgũ pãrami árĩturiagu ãhrimi Jesu. Goãmũ Jesure apidigu árĩmi Israe masare itamubure. “Masare õaro iigũca,” arĩĩnumi Goãmũ. ïgũ arĩdiro dopa ta iidi árĩmi ïgũ Jesu.

24 ïgũ eropa iiboro core Jesu ïgũ ariboro core Ñu waĩyegũ õpa arĩ buhepũ: “Mũa ñerire bujawereque. Ōaripũre gohrotoque. Eropirã waĩyesũnirã árĩque,” arĩ buhepũ Ñu árĩpehrerã Israe masare.

25 Eropigu Ñu ïgũ buhetuboro core, ïgũ sĩriboro core õpa arĩ weremuriĩpũ. “¿Nihino ãhriri yũhũ mũa pepicũ? Iribojegue majagu Goãmũ yare weremũhtadigu árĩbeaa yũhũ. Cristo árĩbeaa yũhũ. Gajigu ãhraa. Cristo yũhũ árĩbiriqũrecũ yũ pũhrũ yũ tauro turagũpũ arigũcumĩ. ïgũpũ õatariagu ãhrimi. ïgũ iro dopa árĩbeaa yũhũ,” arĩ werepũ Ñu masare, arĩpũ Pablo.

26 “Acawererã, Abrahã pãramerã, árĩpehrerã mari Pagũre gũhyadiaro ïarã, marire i ïgũ tauborore wereri buherire obeodi árĩmi mari Pagũ.

27 Jerusalén majarã erã oparã mera Jesu erãre taugu ïgũ árĩcũ masibirinirã árĩma. Sabadonũri árĩcũ Goãmũ yare weremũhtanirã erã gojarare buhequererã ta Jesure masibirinirã árĩma. Eropa masibirã Jesure wejẽdoreñorã. Eropa iirã Goãmũ yare weremũhtanirã erã gojadiro dopa ta iirã iĩñorã.

28 ïgũre erã wejẽboro core erã Jesure weresãriñorã. ïgũ ñerire iibiriquerecũ ta erã Pilatore Jesure wejẽdoremorã serẽñorã.

29 Eropirã iribojegue majarã erã gojadiro dopa ta Jesure iituhaja, ïgũre crusague árĩgũre aĩdiju, masa gobegue utãyegue erã seara gobegue apiñorã erã ïgũre.

30 Eropa erã ïgũre wejẽquerecũ ta Goãmũ masudi árĩmi ïgũre.

31 Eropirã Galileague arinirã Jerusaléngue ïgũ mera ejanirã bajanuri ïgũre sïri masa deyodigũre ïañorã. Eropirã dohpaguere ïgũre erã ïarare masare werema erã.

32-33 Eropa masare wereniguigũ òpa arĩ werenemopũ daja Pablo:

—Eropirã òari buherire werea gũa mũare. Goãmũ mari ñecũ sũmarãre “Masare òaro ïigũca,” iribojegue ïgũ arĩdiro dopa ta dohpaguere marire erã acawererãre iiami. Irire ïgũ wererare òpa iiami ïgũ. Goãmũ Jesure masudi árĩmi. Eropirã Jesure ïgũ masurare werea gũa mũare. Salmopũgue iribojegue ïgũ òpa arĩ gojadiro dopa eropa wayoro Jesure: “Mũhũ yũ magũ àhraa. Dohpagãre mũre dehyoacũ iiabũ,’ arĩmi Goãmũ ïgũ magũre,” arĩ gojañumi iribojegue.

34 Eropigũ Goãmũ Jesure ïgũ masuburire dipaturi ïgũ sïribiriborore weregũ òpa arĩ were gojadoreñumi Salmopũgue: “Davire yũhũ mojomoro ïadiro dopa ta diaye ta òaro ïigũra mũa sãre,” arĩ gojadoreñumi.

35 Eropigũ gaji Salmo sãre òpa ta arĩ wereñumi: “Goãmũ mũ òagũ ïgũ ðũpũre boadorebirabũ mũhũ,” arĩ gojañumi.

36 Eropigũ Davi Goãmũ ïgũ gamediro dopa ta ïgũ árĩrasubu majarãre itamumuriñumi. Pũhrũ ïgũ sïria wañumi. ïgũ sïrira pũhrũ ïgũ pagũ sũmarãre erã iidiro dopa ta yaañuma ïgũ sãre. Eropigũ ïgũ boa wañumi.

37 Eropigũ ihĩ Jesu Goãmũ ïgũ masudigũpũ ne boabiridi árĩmi.

38 Eropirã mũa, yũ acawererã, ire masique: Goãmũ mũa ñerire ïgũ cóaborore mũare ire werea gũa. Jesupũ mũa ñerire cóabu àhrimi.

39 Eropigũ ïgũre umupeorãre erã ñero iirare cãdijicãgũcumĩ ïgũ. Moisere ïgũ apira dorerire mũa iira mera Goãmũ pohrogue wasome mũa. Eropigũ iri dorerire iiri mera taridiarãre erã ñerire cóasome Goãmũ.

40 Eropirã òaro iique. Mũa òaro iibiricũ Goãmũ ya weremũhtanirã erã gojadiro dopa ta mũare waroca. Òpa arĩ gojañuma:

41 Peeque mũa queoricurã. Yũre ïhaturirã àhraa mũa. Yũ òpa iicũ gũique mũa. Eropirã peamegue waque. Mũa árĩrinũrĩre mũare ii ïhmũgũra. Yũ eropa ii ïhmũcũ ïaquererã “Diaye ta àhraa,” arĩsome mũa. Gajigũ irire mũare ïgũ òaro werequerecũ ta “Diaye ta àhraa,” arĩsome mũa, arĩ gojañumi Goãmũ yare weremũhtadigũ, arĩ werepũ Pablo erãre.

42 ïgũ eropa arĩ werera pũhrũ judio masa buheri wihigue erã wiriara pũhrũ judio masa árĩbirãpũ erãre serẽñorã.

—Gaji semanague Sabado árĩcũ ire buheba daja guare, arĩ serẽñorã erã Pablora.

43 Eropirã iri wihigue árĩnirã wiria, judio masa bajarã, judio masa árĩbirã sã Pablo, Bernabé sã mera wañorã. Judio masa árĩbirã judio masa yare buherã árĩñorã. Erã erã mera wacũ Pablo Bernabé mera õaro wereñorã erãre. “Goãmũ mũare mahimi. Eropirã ïgũre umupeorã árĩniguicãque,” arĩ buheñorã erã.

44 Eropirã gaji semanare Sabado árĩcũ árĩpehrerã Jesu yare peediarã gamenereñorã.

45 Eropirã judio masapũ bajarã masa Jesu yare peediarã gamenerecũ ïarã guañorã. Eropa guarã, erã gajiropa arĩ werenigui, Pablora ñero quere goroweoñorã. “Mũare ïgũ buheri diaye árĩbeaa,” arĩñorã erã.

46 Erã eroparĩcũ peerã, Pablo, Bernabé mera erãre quere goroweonirãre güiro mariro wereñorã.

—Goãmũ ïgũ doreldiro dopa ta mũare judio masare buhemũhtarabũ gũa. Mũapũ ïrire gamebirituhabũ. Æmuri nũcũ Goãmũ mera árĩniguicũ sãre gamebirituhabũ mũa. Eropirã gũapũ judio masa árĩbirãpũre buhenũgarãca.

47 Õpa ta doreñumi mari Opũ guare:

Mũa judio masa árĩbirãre buherã erãre Goãmũ yare õaro masicũ iirãca mũa. Eropigũ mũa yoarogue árĩrãre mũa buhecũ peerãre erãpũre peamegue wabonirãre taugũca yũhũ, arĩ wereñumi Goãmũ guare ïgũ yare gojarapũgue, arĩ werepũ Pablo, Bernabé mera.

48 Erã eroparĩcũ peerã judio masa árĩbirãpũ mucubirĩñorã. “Mari Opũ yapũ õari ãhraa,” arĩñorã erã. Eropirã Goãmũ ïgũ gamenirã, æmuri nũcũ ïgũ mera erã árĩniguiborore ïgũ odianirã Jesure umupeonũgañorã.

49 Eropirã mari Opũ Cristo yare iri yebague werepehoñorã.

50 Erã eropa iicũ ïarã judio masa suabiria wañorã. Erogue mari Pagũre umupeorã nome, õarã nome árĩñorã. Eropirã judio masa Pablo sãre ñero wereniguiñorã. Erã eropa wereniguicũ peerã erã nome Pablo mera Bernabé mera guañorã. Eropirã iri maca majarã oparã sã erã mera guañorã. Eropa quarã ero majarã ñero iĩñorã Pablo sãre. Erã eropiira, pũhrũ Pablo sãre erã ya yebague árĩrãre cohã wiucãñorã.

51 Erã eropa iicũ ïarã, Pablo Bernabé mera erã guburi maja nicure pasiripiñorã iri maca majarã erã ñeri wajare ïhmurã. Eropa iituhaja erã Iconiogue waha wañorã.

52 Eropirã erã Jesu yarã wũaro mucubiri, Espĩritu Santo wũaro ïgũ doreldiro dopa iirã iĩñorã.

14

Pablo Bernabé mera Iconiogue árĩñorã

¹ Eropirã Iconiogue árĩrã Pablo Bernabé mera judio masa buheri wihigue ñaja, Jesu yare wereñorã. Eropirã judio masa bajarã Jesure umupeonugañorã. Eropirã judio masa árĩbirã sã Jesure umupeoñorã.

² Judio masa Jesu yare peediabirãpũ judio masa árĩbirãre Jesu yarã mera erã guacũ iĩñorã daja. Erã eropa iicũ judio masa árĩbirã ñero pepiñorã Jesu yarãre.

³ Erã eropa pepicũ ñarã Jesu yarãpũ Pablo sã erogue yoari boje árĩrã, güiro mariro mari Opũ yare õari buherire buheñorã. Goãmũ masare ñgũ mahirire buheñorã. Erã eropa buherisubũ Goãmũ turari mera deyoro moarire ii ñhmuñorã, "I buheri diaye ta ãhraa," arĩ ñhmurã.

⁴ Eropirã iri maca majarã deco mera judio masa yare gamerã dujañorã. Deco mera ta Jesu yare gamerã sã dujañorã. Erã pe curu dũca wariñorã.

⁵ Eropirã Jesu yare gamebirãpũ judio masa sã árĩbirã, judio masa sã erã oparã mera gamenere Jesu ñgũ apinirãre ñero iidiariñorã. Utã mera dea wejẽdiariñorã erãre.

⁶ Erã eropa iidiarire masirã, Pablo, Bernabé mera Licaonia yebague duhrigã waha wañorã. Iri yeba árĩri macari tari wahgã Listra waĩcũri macare Derbe waĩcũri maca sãre ejañorã.

⁷ Erogue ejarã, õari buherire buheñorã daja erã.

Listrague Pablora utã mera deañoñorã

⁸ Eropii Listrague curimasibigũ doapũ. Ñgũ ne masa dehyoagũgue ta curimasibiridigũ árĩpũ.

⁹⁻¹⁰ Eropigũ ñgũ Pablo ñgũ buhecũ peepũ. Ñgũ peerisubũ Pablopũ ñgũ dihtare ñapũ. Ñgũre ñanũrũ õpa arĩ pepipũ: "Ñhĩ Jesure umupeomi. Eropigũ 'Jesu yare dũpũ õacũ iimasimi,' arĩ pepigũ iicumi," arĩ pepipũ Pablo curimasibigũre. Eropa pepigũ turaro mera õpa arĩpũ Pablo ñgũre:

—Wahgãñgajaque, arĩpũ Pablo ñgũre.

Ñgũ eroparĩcũ peegũ ta curimasibigũpũ buhrimanũgaja, wapũ.

¹¹ Pablo ñgũ eropa iicũ ñarã masa gaguiniguiñorã. Erã Licaonia ya mera õpa arĩ gaguiniguiñorã:

—Goãmarã masa dopa bejarã umarogue árĩrã mari pohrogue dijarama, arĩ gaguiniñorã erã.

¹² Eropirã erã Bernabé "Mari goãmũ Zeus ãhrimi," arĩ piyuñorã. Eropirã Pablo buhemũhtadigũ opũ iro dopa ñgũ árĩcũ ñarã "Mari goãmũ Hermes ãhrimi," arĩ piyuñorã erã ñgũre.

13 Eropirā Zeure umupeorā ya wihi iri maca turo pohro árīyoro. Eropigu Zeus yarā erā pahipu iri wihigue árīgu macague ñajariri disiporo pohrogue wecuare, gori amurare aīgāripu. Iri mera Pablöre Bernabére “Mari goāmarā āhrima,” arī umupeodiariñorā. Eropirā erā wecuare soemuju Pablöre, Bernabére umupeodiariñorā.

14 Erā eropa iidiacū iarā Pablo, Bernabé mera erā basi erā ya suhrire yehguenugañorā erā bujawererire masare ihmurā. Erā yehguenugara pūhrū masa watope omagā, gaguiniguñorā erā.

15 —Mua ōpa iibiricāque. Gua sã mua iro dopa ta masa āhraa. Mua ōpa iiri ne duhpiburi árībeaa. Eropirā mware ōarire buherā ahrabu. Ōpa iirire duhudorerā arirā iibu. Oã mua goāmarāre mua wéanirāre ñerāre cóacāque. Eropirā Goāmure ojocarigupure umupeoque. Goāmupū umarore, yebare, wuariyare, árīpehrerire, árīpehrero majarāre iigu āhrimi.

16 Eropigu ĩgu iribojegue árīpehreri macari majarā erā gamero iirare eropa ĩacāñumi.

17 ĩgu eropa ĩacāqueregu ĩgu árīricurire ihmumi marire. ĩgu masare ōarire ii, deco aricū ii, ducare oo, masare barire oniguimi. ĩgu eropa ocū masa mucubirima. Eropa ta ĩgu árīricurire ihmumi masare, arīpu Pablo, Bernabé mera.

18 Eropirā erā eroparīcū peequererā ta masa wecuare wejē soemuju erāre umupeodiariñorā. Eropa erā umupeodiacū iarā erāre eropa iidorebiriñorā Pablo sã. Erā eropa iirire duhudiabiriquererā duhuñorā.

19 Eropii gajirā judio masa Antioquía majarā, Iconio majarā sã Listrague ejañorā. Erogue ejarā, Pablöre ñero wereniguñorā ero majarāre. Erā eropa wereniguicū peerā masa ĩgu mera guanugañorā. Eropa guarā masapu utā mera deañorā Pablöre. Utā mera ĩgure deatuhaja, “Thī sīria wahámi,” arīrā, iri maca turo pohrogue ĩgure taragā mehpicā, waha wañorā.

20 Erā eropiiquerecū Jesu yarā Pablo pohro erā gamenerenugajacū gohra Pablo masa wahgānugaja, erā mera macague waha wapū. Eropirā gajinu ĩgu Bernabé mera Derbegue wapū.

21 Eropirā erā erogue erā ōari buherire bajarā masare erā werera pūhrū, erā Listrare eja daja iri macare tarigā, Iconiore eja daja iri macare tarigā, Antioquía Pisidia yebague árīri macare ejañorā daja.

22 Iri macarigue ejarā, ero majarā Jesu yarāre ōari buherire wereñorā daja. Erāre ōaro sīporācucū iñorā.

Eropirã Jesure umupeodorenigucãrã õpa arĩ wereñorã erãre.

—Goãmũ árĩroguere mari wadiarã, buriã marire ñero tariro gahmea, arĩ wereñorã erã.

²³ Eropirã macari nũcũ majarãre Jesu yarãre erã oparã árĩmorãre apiñorã Pablo Bernabé mera. Eropirã erã ba duhura pũhrũ Goãmũre serẽñorã.

—Opũ, oã mũ yarãre ñhadibuque, arĩ serẽbasañorã erã Goãmũre erã umupeogũre.

Pablo Bernabé mera Antioquíague erã árĩmũhtara macague dujaa wañorã

²⁴ Erã eropa iira pũhrũ erã Pisidia yebague tariara pũhrũ waha wañorã Panfilia yebague.

²⁵ Eropirã Pergeguere erã buhetuhaja Atalia waĩcũri macague buha wañorã.

²⁶ Eropirã iri macague eja, Antioquíague dujaarã, dohodiru mera waha wañorã. Iri maca coregue erã árĩnicũ Jesu yarã Goãmũ yare buhedorerã Pablo sãre obeoñorã. Eropa obeorã Goãmũre õpa serẽñorã:

—Goãmũ, mũ mahiri mera oãre ñhadibuque, arĩ serẽ, obeoñorã erã.

Eropirã erã buhedorerare buhepehonirã árĩrã Pablo Bernabé mera dujaniñorã iri macare.

²⁷ Eropirã erã Antioquíague erã dujajara pũhrũ Goãmũ yarã mera gamenere, Goãmũ ñũ turari mera erã iirare werepehoñorã erã. Judio masa árĩbirã sã Goãmũ yarã erã warare wereñorã erã.

²⁸ Eropirã Pablo sã eroguererã Jesu yarã mera yoari boje árĩcãmũriñorã.

15

Jerusaléngue Jesu yarã gamenereñorã

¹ Eropi Judea yeba majarã bajamerãgã Antioquíague ejarã, Jesu yarãre õpa arĩ buhenũgañorã erã.

—Goãmũ ñũ dorerire Moisererã apĩũ õpa arĩ apimũriñumi. Árĩpehrerã erã dũpũre miri gasirogã erã wiri aĩborore were apimũriñumi Moisererã. Mũa irire iibiricũ Goãmũ mũare tausome, arĩ buheñorã erã ero majarãre.

² Erã eropa arĩ buhecũ peerã Pablo Bernabé mera gamebiriñorã. Iri buherire buriã game dũyasoñorã Judea yeba majarã mera. Erã eropa game dũyasora pũhrũ Jesu yarãpũ Pablora, Bernabére, gajirã ero majarã sãre Jerusaléngue obeoñorã. Judea yeba majarã erã buherire

Jesu ĩġu apiniräre Jesu yarä oparä säre serēpi ĩadorerä obeoñorä Pablo säre.

³ Eropirä Jesu yarä eräre erä obeocü waha, Fenicia yebare eja tarigä, Samaria yebague ejañorä. Iri macarigue ejarä, judio masa árĭbirä Goämu yare erä gemenugarare wereñorä erä ero majaräre. Erä eropa werecü peerä ero majarä Jesu yarä burigä mucubiriñorä.

⁴ Eropirä erä Jerusalengue ejacü ĩarä ero majarä Jesu yarä Jesu ĩġu apinirä, ĩġu yarä oparä mera mucubiriri mera öaro bocatiriñorä eräre. Eropirä Pablo, Bernabé gajirä mera Goämu ĩġu turari mera erä iirare wereñorä Jerusalén majaräre. Judio masa árĭbirä Jesu yarä erä wara säre wereñorä erä.

⁵ Erä eropa werequerecü erogue fariseo masa Jesu yarä bajamerägä árĭñorä. Eropirä erä eroguererä wahgänugaja, öpa wereñorä.

—Eräre judio masa árĭbiräre erä dupere miri gasirogäre wiriro gahmea. “Goämu Moisererä ĩġu dorerare iique mua sä,” arĭro gahmea eräre, arĭñorä erä fariseo masa.

⁶ Erä eroparĭcü pee, Jesu ĩġu apinirä, Jesu yarä oparä mera irire amudiarä, gamenereñorä.

⁷ Eropirä erä yoari boje erä wereniguira pühru Pedro wahgänugaja, werepü eräre.

—Acawererä, iribojegue yuhu mua mera árĭgure Goämu öpa iidoregu yure apimi. ĩġu yure öari buherire judio masa árĭbiräre weredoregu apimi. Eräre Jesure umupeodoregu yure eräre buhedoremi.

⁸ Eropigu Goämu masa erä pepirire masimi. Eropigu ĩġu judio masa árĭbiräre ĩġu yaräre ĩġu iirare ĩhmubu ĩġu Espiritu Santore ohämi eräre marire ĩġu iidiro dopa ta.

⁹ Erä eropa ogu ĩġu marire erä säre yujuropa ta öaro iimi. Erä ĩġure umupeocü erä ñerire cadijimi ĩġu.

¹⁰ Maripü Moise dorerire yujuro bojebeaa. Mari ñecu sumarä mura sä irire yujuro bojebirimuriñuma. ¿Eropa mari yujuro bojebiriquererä duhpirä Jesu yaräre judio masa árĭbiräre irire Moise dorerire iidorediari mua? ¿Duhpirä Goämu judio masa árĭbiräre ĩġu yarä wacü ĩġu iirare “Ero wabeaa,” arĭri mua?

¹¹ Erä eroparĭcü mari öpa pepia. Dohpaguere judio masa árĭbirä iro dopa ta mari säre mari Opü Jesu mahiri mera Goämu taugucumi, arĭpü Pedro eräre.

¹² ĩġu eroparĭcü peerä árĭpehrerä ejarimaria wañorä. Eropirä Pablo Bernabé mera judio masa árĭbirä watope Goämu turari mera erä ii ĩhmurare wereñorä eräre.

¹³ Erä eropa erä weretuhajara pühru Santiago sä werepü.

—Acawererä, peeque yure.

14 Goãmũ judio masa árĩbirãre ãgu yarã árĩmorãre ãgu ne iirare weretuhajami Pedropũ.

15 Iribojegue Goãmũ ya weremũhtanirã erã werediro dopa ta eropa wahabũ judio masa árĩbirãre. Ôpa arĩ Goãmũ wereniguirire gojañuma erã iribojeguerẽ:

16 Iribojeque Davi mũrũ ya curu majarã erã oparã árĩra pehrea wabũ. Pũhrũ dujarigũca yũhũ. Eropigũ dipaturi ãgu ya curu majagũre opũ acugũca.

17 Yũ eropa acura pũhrũ árĩpehrerã judio masa árĩbirã yũre erã opũre gamerãcoma erã. “Yaharã árĩque,” yũ arĩ sihubeorãpũ yũre gamerãcoma.

18 Eropa ta arĩmi mari Opũ. Iribojegue ãgu ire masare weremũripũ, arĩ gojañuma Goãmũ ya weremũhtanirã.

19 “Eropigũ ôpa pepia yũhũ, arĩpũ daja Santiago. Judio masa árĩbirãre Goãmũ yare ne gamenũgarãre baja iidorebircãrã mari.

20 Eropirã erãre goja, obeorã mari. Ôpa arĩ gojabeorã. “Goãmarã wéanirãre erã umupeora barire babircãque. Eropirã nome mera ñero iibircãque. Nome sã uma mera ñero iibircãque. Eropirã wũũnũgu mohwejẽnirãre waimũrãre babircãque. Dire ihribircãque,” iripẽta arĩ were gojabeorã. Iri doreri Moise apira doreri sã ãhraa.

21 Yoari boje judio masa buheri wirigue Sabado árĩcũ Goãmũ Moiserẽ ãgu apira dorerire buhemũrima masa. Eropii árĩpehreri macarigue Moise dorerire buhemũrima masa. Eropirã yũ arĩdiro dopa ta judio masa árĩbirãre Jesu yarãre were gojabeocũ, judio masapũ pee, “Gua iiguari ta ãhraa,” arĩrãcoma, arĩpũ Santiago.

Judio masa árĩbirãre erã gojarapũ obeoñorã

22 Eropirã Jesu ãgu apinirã, Jesu yarã oparã árĩpehrerã Jesu yarã mera Santiago arĩrare peerã, “Eropa ta iirã,” arĩñorã. Tuhajanugu erã mera majarãre beyeñorã erã obeomorã. Antioquíague Pablo, Bernabé mera erã wamorãre erã beyeñorã. Eropirã erã Judare, Sila mera beyeñorã erã obeomorã. Judapũ Barsabá peñe waĩcũpũ. Erã beyerã acawererã Jesu yarã erã umupeonirã árĩñorã.

23 Erãre erã beyera pũhrũ Jesu yarã gojabeorapũre obeoñorã erã mera. Ôpa arĩ gojañorã erã:

—Jesu ãgu apinirã, Jesu yarã oparã, mũa acawererã Jesu yarã mera gua ñadorea mũare. Árĩpehrerã judio masa árĩbirã Antioquíague, Siriague, Ciliciague árĩrãre mũare Jesu yarãre ñadorea gua.

24 Gua mera majarã mũa pohrogue ejarã, mũare baja dorerire iidoreañorã. Eropirã mũare gariboañorã. Erã

Goãmũ dorerire Moiserẽ ĩgũ apiraguere, mũa dupũ merogã gasirogãre wiriri sãre iidoreañorã. Guapũ erãre irire buhedorerã obeobirabũ.

²⁵⁻²⁶ Eropirã gũa árĩpehrerã mũa pohrogue obeomorãre gũa beyeabũ. Mari mera majarãre, mari mahirãre, Pablo, Bernabé mera Cristo Jesu mari Opũ yare güiro mariro erã buhecũ bajasuburi gajirã erãre wejẽbocuriñorã. Erã eropa wejẽbocuricũ merogã mera tarimariñorã erã. Erã Pablo, Bernabé mera gũa beyenirãre dohpaguere obeoa.

²⁷ Eropirã Juda, Sila mera mũa pohrogue obeoa. Gũa gojabeorare erãpũ muare wererãcoma.

²⁸ Espiritu Santo ĩgũ guñaro dopa ta gũa sã pepia. Ōpa ãhraa iri: Gaji doreriguere apibea muare. I doreri dihtare apirãca muare.

²⁹ Goãmarã wéanirãre erã umupeora barire babiricãque. Dire ihribiricãque. Wũnũgũ mohwejenirãre waimurãre babiricãque. Eropirã nome mera ñero iibiricãque. Nome sã ũa mera ñero iibiricãque. I gũa eropa dorera iibirã õarire iirã iica mũa. Iripẽta ãhraa muare gũa werediari, arĩ gojabeoñorã Jesu yarã Jerusalengue árĩrã.

³⁰ Iripũre gojatuhaja, wiañorã Antioquíague warãre. Erã wiara pũhrũ waha, Antioquíague ejañorã. Erã erogue ejara pũhrũ bajarã masare gameneredore, erã gojarapũre wiañorã erãre.

³¹ Iripũre erã buhera pũhrũ, iri õarire erã werebeorare peerã, õaro mucubiriñorã.

³² Juda, Sila mera Goãmũ yare weremũhtarã árĩñorã. Eropirã yoari boje Jesu yarãre Goãmũ erãre ĩgũ weredorere wereñorã. Erã eropa werecũ peerã, Jesu yarãpũ mucubiri õaro siporãcũñorã.

³³ Eropirã Juda, Sila mera erogue bajamenũrigã erã árĩra pũhrũ erã dujaricũ, ero majarã erã goeriserecũ, “Ōaro waque mũa,” arĩñorã Antioquía majarã. Eropirã Juda sãre obeonirãre õadorebeoñorã. Erã eropa arĩra pũhrũ Juda waha wapũ.

³⁴ Silapũ dujapũ Antioquíague.

³⁵ Eropirã Pablo Bernabé sã bajamenũri dujañorã iri maca ta daja. Eropirã erã gajirã bajarã mera Jesu yare buhe wereñorã.

Dipaturi Pablo õari buherire buhecurigũ wapũ daja

³⁶ Eropii bajamenũri pũhrũ Pablo werẽpũ Bernabére.

—Ina, árĩpehrerãre mari buhenũganirãre ĩhacurirã warã daja, arĩpũ Pablo.

³⁷ Eropigũ Bernabépũ Ñure erã mera aĩgãdiaripũ. Ñu Marco peñe waĩcũpũ.

³⁸ Pablop̄ ïgure aïgãdiabirip̄. Ero core ïgu erã mera Panfiliague ejagu erãre cohã dujaa wap̄. Eropiḡu ïgu erã iirire yujuro bojebiri dujaa wap̄. ïgu eropa yujuro bojebiricũ ïagu Pablo dipaturi ïgure aïgãdiabirip̄.

³⁹ ïgu aïgãdiabiricũ ïagu Bernabé Pablo mera erã basi perã burigã arĩ game erã basi purumujucãñorã. Erã eropa arĩra p̄hr̄u Bernabép̄u Chipre waïcari nũgurogue Marcure aĩtaribuja wap̄.

⁴⁰ Pablop̄u Sila mera waha wap̄. Eropirã erã buherã waboro core Jesu yarã erãre obeorã, "Goãm̄u mũare ðaro ïhadibuporo," arĩñorã. Erã eropa arĩra p̄hr̄u, Pablo Sila mera waha wap̄.

⁴¹ Eropa warã, Siria yeba, Cilicia yeba sãre eja, erogue Jesu yarãre ðaro siporãc̄u iri erã mucubiricũ iñorã erã.

16

Timoteo Pablo Sila mera wapicũgãp̄u

¹ Erã eropa iira p̄hr̄u Pablo sã Derbegue, Listrague ejañorã. Erogue ejagu Timoteore bocajap̄u. Timoteo Jesu yagu árĩgu, judio maso magu árĩp̄u ïgu. ïgu pago sã Jesu yago ta árĩpo. ïgu pagup̄u Griego masu árĩp̄u.

² Eropirã Lистра majarã, Iconio majarã, Jesu yarã Timoteore masa "Õagu ãhrimi," arĩ weremuriñorã.

³ Eropiḡu Pablo Timoteore aïgãdiap̄u. Eropirã iri yeba majarã judio masap̄u Timoteo pagu griego masu ïgu árĩcũ masiñorã. Eropiḡu Pablo judio masare guarĩ arĩgu, Timoteo d̄up̄ure miri gasirogã wiri aĩp̄u. Judio masa doreri iri arĩro dopa ta iip̄u ïgure.

⁴ ïgu eropa iira p̄hr̄u waha erã ejari macari majarãre erã gojabeorapũ majare wereñorã. Iripũ Jesu ïgu apinirã, Jesu yarã oparã mera Jerusaléngue árĩrã erã gojabeorapũ árĩyoro. Eropirã erã iri dorerire ðaro wereñorã ero majarã Jesu yarãre.

⁵ Erã eropa werecũ peerã, Jesu yarãp̄u Jesure umupeonemoñorã. Eropirã Jesu yarã umuri n̄c̄u bajarã waniguicãñorã.

Pablo quẽroque Macedonia majagure ïap̄u

⁶⁻⁷ Eropiḡu Asia yebaguep̄ure ðari buherire buherã wadobirip̄u Espiritu Santo erãre. Eropirã erã Frigia yebare taria, Galacia yebare taria, Misia yeba turo pohro ejañorã. Bitinia yebap̄u wadiariñorã erã. Eropiḡu Espiritu Santop̄u erãre eroguerẽ wadobirip̄u.

⁸ ïgu eropa dorera p̄hr̄u erãp̄u Misia yebare tarigã, Troague erañorã.

⁹ Erogue ĩgu erara pũhrũ iri ñamire õpa quẽpũ Pablo. Macedonia yeba majagu ĩgu pohro niguicũ ĩapũ ĩgu. “Gũare Macedonia yeba majarãre itamugũ arique,” arĩ, sihupũ ĩgu Pablöre.

¹⁰ ĩgu eropa quẽra pũhrũ wahgã, gũa yare amutuhaja, Macedoniague waha wabũ gũa. “Goãmũ iri yebare õari buherire buhedoregũ iimi marire,” arĩ pepibũ gũa.

Pablo, Sila mera Filipogue árĩpũ

¹¹ Eropirã gũa Troague árĩrã dohodiru mera Samotracia waĩcũri nũgũrogue taribujajabũ gũa. Eropirã gajinũ Neápoligue wabũ gũa.

¹² Iri macare taria, Filipogue Roma majarã ya macague ejabũ gũa. Iri maca Macedonia yeba árĩri maca árĩbũ. Gũhyadiari maca árĩro iibũ. Eroguere bajamenũrigã gũa árĩbũ.

¹³ Eropirã Sabado árĩcũ gũa iri maca tũro pohrogue, dia weca pohrogue ejabũ. Ero Goãmũ mera erã wereniguiro árĩbũ. Ero doarã ero gamenererã nome mera weretamubũ gũa.

¹⁴ Yujugo gũare peego Tiatira majago Lidia waĩcũgo árĩmo. Eropigo igo õari suhri wjacũri suhrire duago árĩmo. Mari Pagũ Goãmũ sãre umupeego árĩmo. Eropigu Pablo ĩgu wererire õaro peecũ iimi Goãmũ igo.

¹⁵ Eropii igo igo ya wihi majarã mera waĩyemi Pablo. ĩgu eropa waĩyera pũhrũ õpa arĩmo igo:

—“Jesu yago ãhraa,” arãa mũa sã yũre. Eropirã yaha wihi ñajarinique mũa. Yũ mera dujanique, arĩmo igo gũare.

Igo eroparĩcũ peerã igo ya wihi dujanibũ gũa.

¹⁶ Gajinũ Goãmũ mera erã wereniguirogue gũa wacũ watĩ ñajasũdigo bocatĩrimo gũare. Igo gajirã pohro majago árĩmo. Eropigo igo masare “Õpa waroca mũare,” arĩ wereyugo árĩmo. Irire masare werego wũaro watabasamo igo oparãre.

¹⁷ Eropigo Pablo mera gũa wacũ, gũare nũrusia, gaguiniguimo igo.

—Oã Goãmũ turatarigũ ĩgu itumurã ãhrima. Mari sĩrira pũhrũ Goãmũ marire ĩgu õaro tauborore werema erã, arĩ gaguiniguimo igo.

¹⁸ Bajanũri eropa arĩ garibomo Pablöre. Igo eropa arĩ gaguinigucũ daja Pablo gamebigũ maji ĩha, õpa arĩmi watĩre:

—Jesucristo turari mera dorea mũre. Igo duhuque. Wanisa mũhũ, arĩmi Pablo.

Ĩgu eroparĩcũ ta watĩpũ waha wapũ.

19 Watĩ igore eropa wara pũhrũ igo õago dujago masa erã waburire werego árĩbirimo pare. Eropirã igo oparãpũ niyerure igo wajatabigo igo wacũ ãarã, erã Pablo Sila mera ñeama. Ñehatuhaja, erãre taragãma iri maca decogue oparã pohroge.

20 Eropa aĩgãrã, dipuwaja moadorerã pohroge erãre apima erã õpa arĩrã:

—Oã judio masa mari ya macare gariborã iima.

21 Erã mari dorerire cóadorerã, gaji buherire buherã iima. Mari ya dorerire tarinũgacũ iidiarã iima. Mari Roma majarã árĩrã oã erã wereripũre iimasibea mari. Eropirã erã buherire mari gamebeaa, arĩma igo oparã dipuwaja moadorerãre.

22 Erã eroparĩcũ peerã masa bajarã Pablo sã mera guatariacãma. Eropirã dipuwaja moadorerãpũ Pablo Sila sã ya suhrire erã yehgue cóara pũhrũ mũta yucũgã mera tãradorema erãre.

23 Bũrigã erã tãrara pũhrũ peresu iima erãre. Erã eropa peresu iira pũhrũ peresure coregũre õaro ãhadibudoreñorã erã.

24 Erã eropa dorera pũhrũ erãre coregũpũ iri wihi poheca maja taribugue erãre api, taboamiji goberigue sãhacu erã guburire bihacãpũ.

25 Ñami deco Pablo, Sila mera Goãmũre serẽ ãgũre bayapeoñorã. Erã eropa bayacũ peeñorã gajirã peresugue árĩrã.

26 Erã eropa bayacũ ta iri wihi bũrigã ñohmeyoro. Ero eropa ñohmecũ yujuro mera árĩpehleri disiporori pãrimaapehrea wayoro. Peresugue árĩrãre erã diriradari sã pãrisiri dija wayoro.

27 Eropa wacũ ãagũ, iri wihire coregũpũ wahgã, ãgũ ñoserimijire aĩbeo, ãgũ basi ñosediaripũ.

28 ãgũ eropa iicũ ãagũ Pablo ãgũre bũrigã gaguinigui õpa arĩpũ.

—Mũ basi ñero iibiricãque. Árĩpehlerã õre ãhraa gũa, arĩpũ ãgũ erãre coregũre.

29 ãgũ eroparĩcũ peegũ erãre coregũpũ sihãgodore, erã pohroge omagã Pablo, Sila guburi pohroge naragã merejapũ ãgũ.

30 Eropigũ ãgũ erãre iri taribugue árĩrãre aĩ wiria, serẽpipũ erãre.

—¿Dohpa iigũcuri yũhũ Goãmũ ãgũ yũre taucũ gamegũ? arĩ serẽpipũ ãgũ.

31 —Jesucristore umupeoque mũhũ. Mũ acawererã sã ãgũre umupeoporo. Mũa eropa iicũ Goãmũ mũare taugũcumi ãgũ pohro mũa waboro dopa, arĩ wereñorã erã.

32-33 Erã eropa arĩrisubu ñami deco pũhrugã árĩyoro. Erã eropa arĩra pũhrũ erãre coredigũ ĩgu ya wihigue aĩgãpũ erãre. ĩgu ya wihigue aĩa, erã camire coerpũ ĩgu. ĩgu eropa coetuhajara pũhrũ ĩgu acawererã mera Goãmũ yare buherũ Pablo sã. Erãre ĩgu buhera pũhrũ waĩyerũ.

34 Erãre waĩyetuhajara pũhrũ erãre coredigũ Pablo sãre bari peopũ. Eropirã ĩgu ĩgu acawererã mera õari buherire erã peera pũhrũ burigã mucubiriñorã. Goãmũre masinũgañorã.

35 Boyodiji merecũ ĩarã oparãpũ erã surarare peresugue obeoñorã Pablo sãre wiudorerã.

36 Erã eropa wiudorera pũhrũ iri wihire coregũpũ Pablo sãre werepũ.

—Oparã mũare wiudoreañorã. Eropirã güiro mariro wirique, arĩpũ ĩgu Pablo sãre.

37 Eropa erã wiudiaquerecũ ta Pablo werepũ surarare:

—Gua ñero iibirabũ. Eropirã gua ne dipuwaja mara. Bu gohra ta erã oparãpũ masa bajarã erã ĩhurore yucu mera tãrama guare. Gua Roma majarã gua árĩquerecũ ta guare tãrama. Tãratuhaja peresu iiama guare. Eropirã dohpaguere masa erã ĩabiro wiudiana guare, guare erã ñero iirare guhyasiuro tariri, arĩrã. Oparã erã basi ta ahri aĩ wiurã ariporo guare, arĩpũ Pablo surarare.

38 ĩgu eropa arĩ werecũ peerã dujaa wereñorã oparãre surarapũ. Erã eropa arĩ werera pũhrũ Pablo Sila mera Roma majarã erã árĩcũ masirã oparãpũ güi árĩñorã.

39 Eropirã erã Pablo sã pohro ejarã, õpa arĩñorã:

—Ñero iiabũ gua mũare. Ne eropa dipaturi iisome, arĩñorã oparã Pablo sãre.

Eropa arĩtuhaja oparã erãre peresugue aĩ wiu, erã ya macare wiridoreñorã.

40 Eropirã Pablo Sila mera peresugue árĩnirã wiri, Lidia waĩcũgo ya wihigue eja, Jesu yarãre bocatĩriñorã. Eropirã erã Jesu yarãre õaro wereñorã. Õaro sĩporãcũcũ iiñorã erãre. Erã eropa iira pũhrũ Pablo Sila mera waha wañorã.

17

Tesalónica majarã guañorã Jesu yarã mera

1 Eropirã erã Anfĩpoligue eja taria, Apoloniague eja taria, Tesalónicague ejañorã erã. Ero judio masa buheri wihi árĩyoro.

2 Eropigũ Pablo iri buheri wihigue wapũ ĩgu iiguaro dopa ta gajĩ macarigue árĩgũ. Erogue eja, uñre semana gohra erã soorinũrire Sabadonũrire Goãmũ yare iribojegue erã gojarare masare buhe, irire erã mera werenigũpũ Pablo.

³ Eropigu ĩgu Goãmu yare werepu ðpa arĩgu:

—Judio masa, mua Opu mua coregu Cristo árĩpu masa ya árĩburire ñero taribu. Eropigu ĩgu sĩaria waha masa mariapu. Eropigu ihĩ Jesu yahu arĩ weregu, ĩgu Cristo gohra ta àhrimi marire taubu. ĩgu ta àhrimi mua coregu. Eropa ta werea Goãmu yare erã gojarapũ, arĩ werepu Pablo.

⁴ ĩgu eroparĩcũ peerã bajamerãgã ero árĩrã “Diaye ta àhraa,” arĩñorã. Eropirã erã Pablo sã mera wañorã. Eropirã gajirã sã griego masa bajarã Goãmure umupeorãpu, Pablore peerã erã mera majarã nome sã, bajarã oparã nome sã, ĩgure peerã Jesu yarã dujañorã. Eropirã Pablo sã mera wañorã.

⁵ Judio masapu erã eropa iicũ ĩarã erãre ĩhaturiñorã. Eropirã erã ñerãre mohmebirãre bajarãre sihu gameneo, ðpa arĩdoreñorã: “Pablo ĩgu mera majarã mera ñero iirã iima,” arĩ gaguiniguideñorã erãre iri maca majarãre. Eropa gaguiniguirã árĩpehrerã iri maca majarãre guacũ iñorã Pablo sã mera. Eropirã erã judio masa Jasõ ya wihigue ñaja Pablo sãre amariñorã erãre masaguere omorã.

⁶ Eropa amarã erãre bocabiriñorã. Eropirã Jasõre, gajirã Jesu yarã sãre ñeha tarawiriañorã erãre. Oparã pohroque aĩ eja, ðpa arĩ weresãñorã erã.

—Pablo sã masare árĩpehreroguere garibotariañorã. Eropirã dohpaguere mari ya macaguere eratuhaama.

⁷ Eropigu ihĩ Jasõ erãre ĩgu ya wihigue ñajaridoreami. Erã árĩpehrerã mari weca opu Roma majagu ĩgu dorerire tarinugama. “Gajigu mua opu àhrimi. Jesu ĩgu ta àhrimi,” erã erĩcũ mari opu César dorerire tarinugama erã, arĩ weresãñorã judio masa erã oparãre.

⁸ Erã eropa arĩ weresãcũ peerã, árĩpehrerã masa, oparã sã gua “¿Dohpa wahari?” arĩ pepiñorã.

⁹ Eropirã oparã Jasõre, ĩgu mera majarã sãre niyerure wajayedore, wiucãñorã.

Pablo Sila mera Bereague ejañorã

¹⁰ Iri eropa wacũ iri ñami ta mata Jesu yarã Pablo sãre dihbu obeocãñorã Bereague. Eroque eja judio masa buheri wihigue ñaja wañorã.

¹¹ Judio masa Berea majarãpu Tesalónica majarã tauro Goãmu yare ðaro peerã árĩñorã. Eropirã erã Jesu yare erã peera puhru “¿Diaye ta àhriri?” arĩ masidiarã, umuri nucũ Goãmu yare erã gojarapũre eropa buheniguicãñorã erã.

¹² Eropirã erã bajarã Jesure umupeoñorã. Griego masa sã, uma, oparã nome mera Jesure umupeoñorã.

¹³ Eropirã Pablo Bereague Goãmu yare ĩgu buhecũ sãre peebeo Tesalónica majarã judio masa Bereague ejañorã.

Erogue ejarã, Berea majarãre quere goroweoñorã. Pablo sã mera guacũ iñorã erã.

14 Erã eropa iicũ ïarã Jesu yarã Pablöre yojaro mera wariya turogue obeoñorã. Eropigũ Sila, Timoteo mera Bereague ta dujañorã.

15 Eropirã gajirã Pablöre Atenague aĩgã soñorã. Īgure sotuhaja maji dujaa wañorã. Erogue ejarã,

—Yojaro mera waha, wapicurã waque Pablöre, arĩ wereñorã Silare, Timoteo sãre. Eropa arĩ weredorepũ Pablo erãre.

Pablo Atenague árĩpũ

16 Eropigũ Pablo Atenague coregũ iipũ Sila, Timoteo sãre. Eropigũ Atena majarã erã goãmarã wéanirãre bajarã erã opacũ ïagũ Pablo bũrigã bũjawerepũ erã mera.

17 Eropa bũjaweregũ judio masa buheri wihigue judio masa mera dũyaso wereniguipũ ĩgũ. Eropigũ daja judio masa árĩbirã mera sãre wereniguipũ ĩgũ. Erã yujurãyeri Goãmure umupeorã árĩñorã. Eropigũ Pablo iri maca deco umuri nũcũ ĩgũ pohrogue eropa curimaji ñajarã mera wereniguipũ.

18 Gajirã epicúreo yare buherã, estoico yare buherã sã Pablo mera wereniguiñorã.

—¿Ihĩ wereniguirĩ pehrebĩgũ dohpa arĩ wereniguigũ iiri ĩgũ? arĩñorã erã.

Pablo Jesu yare, ĩgũ masa mũriarare ĩgũ werecũ peerã õpa arĩ pepiriñorã erã masa. “Īgũ gajirã goãmarãre weregũ iicumĩ,” arĩ pepiriñorã erã.

19 Erã peera pũhrũ erã wereniguirogue Areópago waĩcurogue Pablöre aĩgãñorã.

—I buheri, mama buherire mũhũ dohpague wererare masidiaa gũa.

20 Mũ buheri gajiropa ãhraa. Eropirã gũa irire masidiaa, arĩñorã erã Pablöre.

21 Árĩpehrerã Atena majarã umuri nũcũ mama buherire wereniguidiañorã. Eropirã irire peediañorã. Gaji yeba majarã sã Atenague erarã eropa dihta iidiañorã. Eropirã Pablo ĩgũ wererire peediañorã erã.

22 Eropigũ Pablo Areópago waĩcuro wahgãnũgaja õpa arĩ werepũ:

—Atena majarã, bajarã goãmarã wéanirãre mũa bũrigã umupeocũ masia yũhũ.

23 I maca mũa ya macare goãmarã wéanirãre mũa umupeori gororire ĩhacuriabũ yũhũ. Eropa ĩhacurĩgũ yũ sã yuju gorogue mũa goja apirare buheabũ. “Goãmũ, mari masibĩgũ yare umupeori goro ãhraa,” arĩ gojarare buheabũ

mua irire apiroguere. Mua ïgure masibiriquererã ïgure umupeoabu mua. ïgure ta mua masibigure weregũ iiaa yũhũ muare.

²⁴ “Goãmũ árïpehreri yebare, yeba maja sãre deyoro moañumi. ïgũ umarore, yebare opu árïgũ ïgũ masa erã iira wiri árïbeamĩ.

²⁵ Eropigũ ïgũ mari árïricũre ogũ mari itamurire game-beamĩ. ïgũ mojomorocũgũ árïbeamĩ.

²⁶ “ïgũ yujugũ umũ mera árïpehreri yeba majarãre masare iĩñumi. Eropigũ árïpehreri yebaguere marire apiñumi ïgũ. “Ipẽ yoari boje õguere árïrãcoma,” arïgũ queo apiñumi marire.

²⁷ “Erã amarã yũre bocarãcoma,” arĩ pepiñumi Goãmũ. Eropigũ Goãmũ yorogue árïbeamĩ. Mari mera ta ãhrimi. Õpa arĩ gojañumi gajigũ.

²⁸ “Marire árïcũ iimi ïgũ. ïgũ maricũ mariboya mari sã. Eropigũ masa nũcũre eropa árïnigũicãmi ïgũ,” arĩ gojañumi. Mua mera majarã iribojegue majarã bayarire õaro gojarã erã gojara ãhraa iri. “Mari sã Goãmũ porã ãhraa,” arĩ gojañorã erã.

²⁹ Eropirã mari ïgũ porã árïrã, goãmarã wéanirãre, oro, plata, utã mera mua gamero mua iinirãre “Goãmũ ãhrimi,” arĩ pepibiricãque mua.

³⁰ Iribojegue masa masibirã erã árïnicũ erã ñero iiquerecũ ta Goãmũ eropa ïacãniñumi. Eropa iiqueregũ dohpaguepũre árïpehreri yeba majarãre erã ñerire bujaweredoremi Goãmũ.

³¹ Pũhrũ ïgũ queorinũ árïpehreri yeba majarãre diaye ta beyegũcumi Goãmũ õarãre, ñerãre. ïgũ beyedore ïgũ apidiro dopa Jesupũ beyegũcumi. Jesure sïridigũguere masupũ ïgũ. Eropa masugũ “Ihĩ yũ apidigũ ãhrimi,” arĩ, ïhmugũ iipũ Goãmũ masare, arĩ werepũ Pablo Atena majarãre.

³² ïgũ eroparicũ sïrinirã masa mũriarare ïgũ werenigũicũ peerã gajirã ïgũre wereyañorã.

Gajirãpũ õpa arĩñorã:

—Dipaturi ire mũ werecũ gũa peediaa daja, arĩñorã erã Pablore.

³³ Erã eropa arĩra pũhrũ Pablo waha wapũ.

³⁴ Eropirã bajamerãgã ïgũ mera árïrã Jesure umupeonũgãñorã. Dionisio Areópago majagũ oparã mera majagũ Jesure umupeonũgapũ. Dãmari waicũgo sã, gajirã mera Jesure umupeonũgapo.

18

Pablo Corintogue árĩpũ

¹ Eropigũ Pablo Atenague árĩdigũ waha Corinto waĩcũri macague ejapũ.

² Erogue ejagũ judio masũ Aquila waĩcũgũre bocaچارũ ĩgũ. Arĩpehrerã weca opũ Claudio waĩcũgũ judio masare Romague árĩrãre ĩgũ cóãcũ Aquilapũ ĩgũ marapo Priscila mera waha, Corintogue ejapũ. Aquilapũ Ponto waĩcũri yeba masa dehyoadigũ árĩpũ. Eropirã erã Corintogue árĩcũ Pablo erã pohrogue ejapũ.

³ Aquila sã suhri wirire iirã árĩñorã. Pablo sã suhri wirire ĩgũ ta árĩpũ. Eropigũ ĩgũ erã mera mohme ero dujarũ.

⁴ Eropigũ Pablo Sabado árĩcũ semanari nũcũ judio masa erã buheri wihigue judio masare, judio masa árĩbirã sãre Goãmũ yare werepũ.

—Ihĩ ĩgũ werenĩgũiri diaye ta ãhraa, arĩñorã masapũ erã peera pũhrũ.

⁵ Eropigũ Sila, Timoteo mera Macedoniague árĩnirã Pablo pohrogue ejañorã. Erogue erã ejara pũhrũ, Pablo suhri wiri mohmerire duhcã Ʃmũri nũcũ judio masare buhemũripũ.

—Jesucristo marire taubu mari coredigũ ta ãhrimi, arĩ werepũ erãre.

⁶ ĩgũ eropa arĩ buhequerecũ ta judio masapũ ĩgũre peediabiriñorã. Eropirã erã ñero quere goroweoñorã ĩgũre. Erã eropa iicũ Pablo erãre ĩgũ turibodiro dopa ta, ĩgũ suhri maja mera pasiri mehripũ.

—Mũa ya dipuwaja peamegue warãca. Goãmũ ĩgũ dorediro dopa ta mũare buherabũ yũhũ. Mũapũ yare peediabirabũ. Dohpaguere yũpũ judio masa árĩbirãre buhegũ wagũra, arĩpũ Pablo judio masare.

⁷ ĩgũ eropa arĩra pũhrũ ĩgũ erogue árĩdigũ waha, Tito Justo waĩcũgũ ya wihigue ejapũ. Justo Goãmũre umupeogu árĩpũ. ĩgũ ya wihipũ judio masa buheri wihi pohro árĩyoro.

⁸ Eropirã Crispo waĩcũgũ iri buheri wihi opũ, ĩgũ marapo, erã porã mera mari Opũ Jesure umupeoñorã. Eropirã gajirã Corinto majarã bajarã Goãmũ yare peerã, Jesure umupeoñorã. Erã eropa umupeorã árĩcũ erãre waĩyerũ.

⁹⁻¹⁰ Yuju ñami Goãmũ quẽrogue werepũ Pablore. ĩgũre õpa arĩpũ:

—Mũ mera ãhraa. I macare yaharã bajarã ãhrima. Eropirã gajirã masa mũre ñero iimasibeamã. Eropigũ gũibita mũhũ. Eropigũ yahare bũrigã wereque. Eropa pepibircãque, arĩ werepũ Goãmũ Pablore.

¹¹ Eropigũ yuju bojori õaro gaji bojori deco gohra ero majarãre Goãmũ yare buhe, árĩmũripũ Pablo.

12 Īġu eropa árīrisubu Galiō waīcūġu Acaya yeba majarā opu Īġu árīcū, judio masa árīpehrerā yujuropa ta Pablöre ñero weresārā erañorā. Īġure ñeha dipuwaja moadorerā pohrogue aīgāñorā erā Galiō pohrogue.

13 Aīgā ōpa arī weresāñorā Īġure:

—Ihī masare Goāmure umupeodoreġu i yeba maja doreripure cóadoremi, arī weresāñorā judio masa dipuwaja moadorerāre.

14 Erā eropa arī weresācū peegū Pablopū erāre werediaripū. Eropiġu Galiō opupū judio masare werepū.

—Ihī ñerire iidigū árīcū ġua Romano majarā ya dorerire tarinūgagū árīcū, mūare yūhriboaya yūhū.

15 Mūa ya doreripure ihī tarinūgagū Īġu árīcū mūa basi ire amuque. Ire masibea yūhū mūa mera, arī werepū Īġu judio masare.

16 Eropa arīġu ta erāre Pablöre weresānirāre Īġu ya taribugue árīrāre cohā wiucāpū Īġu.

17 Īġu eropa cohā wiura pūhrū árīpehrerā iri wihi árīrā Sóstenere judio masa buheri wihi opure Jesu yagure ñeha, dipuwaja moadorerā pohrogue pañorā Īġure. Erā eropa pacū ĩagū Galiō eropa ĩacāpū.

Pablo Antioquíague dujaa wapū daja

18 Eropiġu Pablo Corintogue yoari boje árīdigū “Wagu iiaa,” arī goeriserepū Īġu Jesu yarāre.

Īġu eropa arīra pūhrū Īġu Priscila, Aquila mera Siria yebague árīri macague taribuja wapū. Cencrea waīcūri macague erā taribujara pūhrū Pablo Goāmure “Ōpa mure iibasagura,” Īġu arīrare iituhajagū árīpū. Eropiġu eropa iigū judio masa erā iiro dopa ta Īġu poarire wūapehocādorepū.

19 Eropirā erā Efeso waīcūri macague eja, Priscilare, Aquila sāre apipū Pablopū. Erāre ero api, Īġupū judio masa erā buheri wihigue wapū. Iri wihigue eja, Goāmū yare werepū. Eropa werēġu judio masa mera dūyaso wereniġupū.

20 Īġu eropa werera pūhrū Īġure erā mera dujadoreriñorā erā. Erā eroparīquerecū,

—Dujabeaa mūa mera, arīpū Pablo erāre.

21 Eropa arīġu ta,

—Jerusaléngue yure waro gahmea. Bosenure ĩagū wabu iiaa. Eropiġu wagū iiaa. Goāmū gamecū dipaturi dujariboca, arīpū erāre.

Īġu eropa arītuhaja Efesogue árīdigū taribuja wapū.

²² Eropigu Cesareague taribujaja tarigã, Jerusaléngue ejaꝑu. Erogue eja, ero majarã Jesu yarãre “¿Ne áhriri mua?” arĩ, erãre íha taria Antioquíague ejaꝑu daja.

²³ Ero bajamenuri áripu. Ero áridigu tariapu. Galacia yeba áriiri macarigue, Frigia yeba áriiri macarigue dipaturi eja, iri macari majarãre Jesu yarãre buhe ðaro mucubiricũ iipu.

Apolo waĩcugu Efesogue buhepu

²⁴ Irisubure, judio masu Apolo waĩcugu, Alejandría maca majagu Efesogue ejaꝑu. Igu ðaro weremehregu áripu. Eropigu igu Goãmu igu gojarare ðaro masipu.

²⁵ Gajigu igure Goãmu yare weretuhamuripu. Eropigu igu Nu waĩyegu igu buheri dihtare masipu. Eropa áriqueregu igu burigã mucubiriri mera Jesu yare ðaro buhepu.

²⁶ Eropigu judio masa erã buheri wihigue igu güiro mariro erãre buhenugapu. Igu eropa buhecũ erã peera puhru Priscila Aquila mera igure erã mera aĩgãñorã. Goãmu yare ðaro diaye ðaro igu werepehobiricũ iarã diaye werepehocãñorã erã igure.

²⁷⁻²⁸ Eropigu igu Apolopu Acaya yebague igu wadiacũ Jesu yarã igure “Õaro waque,” arĩ, erã gojarapũrire oñorã igure. Iripuri Acayague áriã Jesu yarãre Apolore ðaro bocatiridoreripuri áriyoro. Eropigu Apolo erogue ejaꝑu ero majarãre Jesure umupeorãre Goãmu mahiri mera ðaro itamupu. Judio masare iri maca áriãre ðpa arĩ werepu:

—Goãmu igu obeodigu mua coredigu áhrimi Jesu. Cristo gohra áhrimi, arĩ werepu judio masare gajirã masa erã iaro.

Igu eroparicũ, Goãmu wereniguri gojarapũre ðaro queroro werecũ erã pee “Diaye áribeaa,” arĩmasibiriñorã erã. Eropigu Jesu mahiri mera Jesure umupeorãre igu ðaro itamupu erãre Apolo.

19

Pablo Efesogue wapu

¹ Corintogue Apolo igu áriisubu, Pablop uã yucugue muri taria, Efesogue ejaꝑu. Erogue eja, yujurãyeri Jesu yarãre bocajapu.

² Erãre igu bocajara puhru igu erãre serẽpi iapu.

—¿Mua Jesure umupeora puhru muapu Espiritu Santore opanugari? arĩ serẽpi iapu Pablo.

Igu eroparicũ peerã igure ðpa arĩ wereñorã erã:

—“Espiritu Santo áhrimi,” arĩ ne werebirama guare, arĩ wereñorã erã.

³ Erã eropa arĩ werera pũhrũ Pablo erãre serẽpi ãapũ daja:
—¿Noa ya buherire mũa peera pũhrũ waĩyeari mũare?
arĩpũ ãgũ daja.

—Ñũ ya buherire gũa peera pũhrũ waĩyeama gũare, arĩ wereñorã erã.

⁴ Erã eroparĩcũ peegũ õpa arĩpũ Pablo:

—Masa erã ñeri iirare erã duhucũ ãagũ waĩyerũ Ñũ. Eropiro ãgũ waĩyeripũ erã ñeri iirare erã duhurare masare ãhmuburi áriyoro. Eropigũ gajino sãre werenemopũ Ñũ. “Yũ pũhrũ aribure ãgũre umupeoque mũa,” arĩpũ Ñũ masare. Eropa arĩgũ Jesure ta umupeodoregũ iipũ, arĩ werepũ Pablo erãre.

⁵ ãgũ eroparĩcũ erã peera pũhrũ, Jesu waĩ mera waĩyerũ erãre.

⁶ Eropigũ Pablo erã yujurãyeri weca ãgũ mojotorire ãgũ duhpeocã, Espĩritu Santopũ erapũ erãguere. ãgũ eropa erara pũhrũ erãpũ peeyamariri yare werenigui, Goãmũ yare wereñorã.

⁷ Erã áripehrerã doce ũama erã áriñorã.

⁸ Pũhrũ Pablo judio masa erã buheri wihigue ñaja, urredã abe gohra güiro mariro Goãmũ ãgũ opũ áriřare were, wereniguiũ erã mera. ãgũre erã eropa peera pũhrũ “I diaye ta ãhraa,” arĩñorã erã.

⁹ Gajirãpũ peediabiriñorã. Eropirã erã masa erã peeuro iri õare buherire ñero arĩ werenigui ãhmuñorã. Erã eroparĩcũ peegũ Pablopũ Jesu yarãre sihu wiria, gajipũgue waha wapũ. Waha, Tirano waĩcũgũ ya buheri wihigue ũamuri nũcũ masare Goãmũ yare werepũ ãgũ.

¹⁰ Pe bojori gohra buhepũ erãre. ãgũ eropa buhecũ áripehrerã Asia yeba majarã judio masa, judio masa áriřirã mera mari Opũ Jesu yare peeñorã.

¹¹ Eropigũ Goãmũ turari mera Pablo bajasuburi deyoro moarire ii ãhmupũ.

¹² Pablo ãgũ suhri gasirore, ãgũ suhrirore ãgũ dupũ pẽhrera gasirore dorecũrãre aĩgãñorã gajirãpũ. Masa dorecũrã iri suhrire pẽhrerã õarã wañorã. Eropirã watẽa ñajasũnirã iri suhrire erã pẽhrera pũhrũ watẽa wiria wañorã erãre.

¹³⁻¹⁴ Gajirã judio masa eropa curiniguirã watẽare cóãrã judio masa yea áriñorã. Esceva waĩcũgũ siete ãgũ porã áriñorã. Escevapũ judio masũ pahia opũ arĩpũ. Eropirã erã Pablo ãgũ iidiro dopa ta Jesu turari mera watẽare cóãdiariñorã. Eropirã watẽa ñajasũdigũre boca watẽare doreriñorã erã.

—Jesu Pablo ĩḡu wereḡu ĩḡu turari mera dorea m̄are. Duhuque ĩre, arĩñorã erã.

¹⁵ Watẽare erã wadorera p̄hr̄u, watẽap̄u masuḡuere õpa arĩñorã erãre.

—Jesure masia. Pablo sãre masia. M̄ap̄ure masibea, arĩñorã watẽa erãre.

¹⁶ Erã eroparĩcũ ta watẽa ñajasũdigup̄u b̄urigã erãre ñehamaa wap̄u. Eropiḡu erãre ñetariaro iip̄u. ĩḡu eropa iira p̄hr̄u suhri marirã, camicurã oma wiriañorã erã iri wihire watẽa cóãdiarãp̄u.

¹⁷ Erã eropa iira p̄hr̄u árĩpehrerã Efeso majarã, judio masa, judio masa árĩbirã mera irire pee, gũitariacãñorã erã. Eropirã mari Op̄u Jesu yare wereyaro mariro wereniguiñorã masap̄u.

¹⁸ Eropirã masa bajarã Jesure umupeorã erã ñero iirare wererã arĩñorã.

¹⁹ Erã mera majarã bajarã yea árĩñorã. Eropirã erã erã gojarap̄urire purisiriri wererip̄urire erogue aĩḡãri, masa erã ĩaro irip̄urire soe cóãcãñorã erã. Irip̄uri wajacurare erã queocũ, árĩpehrerip̄uri cincuenta mil plata árĩrip̄uri wajacuriyoro irip̄uri.

²⁰ Eropirã Goãm̄u yare gamerã bajarã wañorã. Goãm̄u turari mera ĩḡu yarã wañorã.

²¹ Erã eropa wara p̄hr̄u Pablo õpa arĩ pepip̄u: “Macedonia yeba ejam̄hta, iri yebare taria Acaya yebaguere ejagura. Iri yebare yu ejara p̄hr̄u Jerusalengue wagura. Iri macare yu ejara p̄hr̄u Romague ĩaḡu wagura,” arĩ pepip̄u Pablo.

²² Eropiḡu perãre ĩḡure itamurãre ĩḡu core obeom̄htap̄u Macedonia yebague. Timoteo Erasto sã árĩñorã erã. Eropiḡu Pablop̄u yujuḡu ta dujar̄u Asia yebague.

Efesogue masa gua gaguinigiñorã

²³ Irisubure Efesogue Jesu yare gajirã gamebirã Pablo sãre ĩhaturiñorã.

²⁴ Yujuḡu platare mohmeḡu Demetrio waĩcuḡu árĩp̄u. ĩḡu plata mera erã goãm̄o Artemisa waĩcuḡo umupeori wihi wẽara wirire m̄uta wirigãre iiḡu árĩp̄u. Eropiḡu ĩḡu gajirã plata mohmerã mera erã wẽanirãre w̄aro dua wajatamuriñorã erã.

²⁵ Eropiḡu Demetrio gajirã plata mohmerãre sihu game-neo, werep̄u erãre.

—Peeque m̄ua. I mohmeri mera mari wẽanirã mera w̄aro mari wajatarare masia m̄ua.

²⁶ Ihĩ Pablo ĩḡu iirare ĩḡu buhera sãre masia m̄ua. Õpa arĩ buhemi ĩḡu: “Goãmarã wẽanirã masa erã iinirã ojocarã

áríbeama,” arĩ weremurami ĩgu. ĩgu eroparĩcũ peerã, Efeso majarã, árĩpehrero Asia yeba majarã sã ĩgu buherare “Diaye ta ãhraa,” arãñorã irire.

²⁷ Eropa arĩrã mari mohmerire mari wéarare masa gamesome. Eropirã mari goãmo wãago Artemisa ya wihire cóãbocoma. Eropirã árĩpehrerã Asia yeba majarã, árĩpehreri yeba majarã igore umupeosome pare. Eropirã masa igore masibirã mari wéarare asũsome, arĩpu Demetrio erãre.

²⁸ ĩgu eroparĩcũ peerã burigã gua, gaguiniguĩñorã:

—Artemisa Efeso majarã yago goãmo turago ãhrimo, arĩ gaguiniguĩñorã erãpu.

²⁹ Erã eropa gaguiniguicũ Efeso majarã árĩpehrerã sã gaguiniguitaria wa pee masiri pehrea wañorã. Eropa warã Gayore, Aristarco sãre ñeha, masa erã gamenererogue erãre taragãñorã. Gayo, Aristarco mera Macedonia majarã árĩñorã. Pablo mera curirã árĩñorã.

³⁰ Erãre ñeacũ ĩha Pablopũ masa pohro weregu wadi-
aripũ. Jesu yarãpu ĩgure wadorebiriñorã.

³¹ Eropirã gajirã sã iri yeba majarã oparã, Pablo mera majarã arĩrã erã pohro majarãre weredoreñorã Pablore:

—Masa erã gamenererogue wabiricãque, arĩ weredoreñorã oparã Pablore.

³² Eropirã ero gamenererã mera majarãpu bajarã “¿Duh-
pimorã mari gamenererã iiri?” arĩ masibiriñorã. Eropirã erã gaguiniguĩñemoñorã. ĩpugue arĩrã gajiropa arĩ gaguinigui, gajirã sã gajiropa arĩ gaguiniguĩñorã.

³³ Eropirã judio masapu Alejandro waĩcugure masare weredoreñorã. Eropigũ Alejandro “Ejarimaricãque,” arĩgu ĩgu mojoto mera paatupu. “Oã guare judio masare turirã iima,” arĩ pepigũ judio masare cãhmotadiagu wereniguiripu.

³⁴ ĩgu eropa wereniguidiaquerecũ judio masu ĩgu árĩcũ ĩarã masa árĩpehrerã yujuro mera pe hora gaguiniguĩñorã.

—Artemisa, Efeso majarã yago mari goãmo turago ãhrimo, arĩ, gaguiniguĩñorã erã.

³⁵ Erã eropa arĩ gaguiniguicũ ĩagu Efeso majarã oparãre itamugu masare “Ejarimaricãque,” arĩ, werepu erãre.

—Mũa Efeso majarã peeque. Mari Efeso majarã turago Artemisa ya wihi corerã mari árĩcũ árĩpehreri yeba majarã masima. Eropirã igo wéarare umarogue dijaridigore diburã mari árĩcũ sãre masima masa.

³⁶ Eropirã “I diaye árĩbeaa,” arĩmasibeama. Eropirã guabiricãque mũa. Óaro pepique mũa.

³⁷ Oã mua ñeagãrirã mari goãmore ñero arĩ wereniguibirama. Eropirã erã goãmarã ya wiriguere ñaja, yajabirama. Eropirã ðaro iique mua.

³⁸ Demetrio, plata mohmerã mera oãre mua ñearãre weresãdiarã, dipuwaja moaropũre wereporo erã. Erã oparãre oãre weresãmasima.

³⁹ Mua gajino iidiarã, ðaro mera irire gamenere iique. Mua iiro dopa iinemobiricãque.

⁴⁰ Dohpagãre mua gua, gaguinirare mari oparã peerã, erã marire weresãbocoma. “Marire cóarã iicoma,” arĩ pepirãcoma oparã marire. Eropirã mari arĩ gaguinuirare erãre ðaro diaye weremasibea mari, arĩpũ oparãre itamugũpũ masare.

⁴¹ Eropa arĩ weretuhaja, “Iripẽta ãhraa. Waque,” arĩpũ ãgũ masare.

20

Macedonia yebague sãre, Grecia yebague sãre Pablo ejarũ

¹ Erã eropa wara pũhrũ, Pablopũ Jesu yarãre sihu gameneo werepũ. Weretuhaja, mojoto ñeha, goeriserepũ. Goeriseretuhaja, Macedoniague waha wapũ.

² Eroque eja were, ero majarã Jesu yarãre mucubiricũ iipũ ãgũ. Erãre weretuhaja, Greciague ejarũ ãgũ.

³ Erore ãgũ urerã abe gohra árĩpũ. Ero árĩgũ Siria yebague taribuja wadiaripũ. Eropirã judio masa duhri, ãgũre ñeadiariñorã. Irire pee Pablo gaji mague Macedonia wari mague waha wapũ.

⁴ Eropa wagũ Asiague ta ejarũ. Ero Berea majagũ Sópater waĩcũgũ Pablora wapicũgãpũ. Eropirã Tesalónica majarã Aristarco, Segundo sã ãgũre wapicũgãñorã. Eropirã Asia majarã Tíquico, Trófimo sã Asiague ãgũre wapicũgãñorã. Derbe majagũ Gayo waĩcũgũ Timoteo sã ãgũ mera wañorã.

⁵ ãgũ mera majarã ãgũ core waha, Troa waĩcũri macague ãgũre coreñorã.

⁶ Erã eropa corecũ bugabiriri panre bari bosenu pũhrũ gũapũ Filipogue árĩnirã dohodiru mera waha, cinco nũri taribujarã Troague gũa ejabũ. Siete nũri gohra árĩbũ gũa eroguerẽ.

Troague Pablo curigũ wapũ

⁷ Soorinũ árĩcũ Jesu yarã gamenere panre duhpeoñorã Goãmũ yare bocatĩrimorã. Erã eropa iiboro core Pablo erãre buherũ. Eropigũ Pablo gajinũpũre wabu árĩgũ yoari boje ãgũ buherũ. Ñami deco mera buhe duhubu iiripũ.

⁸ Eropirã erã umaro maja taribugue baja dipu sihãgori dipu áriri taribugue gamenereñorã.

⁹ Pablöre erã peerisubu mamũ Eutico waĩcũgũ ventana weca mũribejaja doapũ. Eropigũ Pablo erãre yoari boje buhenemocũ ĩgũ mamũre wũja ariyoro. Eropigũ ĩgũ carĩa wa uhre caya wecague doadigũ majimadija wapũ. ĩgũ eropa yuhridijara pũhrũ erã ĩgũre sĩriadigũguere aĩwahgũ doboñorã.

¹⁰ Erã eropa iicũ ĩagũ Pablo dijari, mamũre papeopũ. ĩgũ eropa iira pũhrũ Jesu yarãre werepũ ĩgũ:

—Sĩporã ñebiricãque. Sĩribeamĩ ihĩ. Ojocarimi, arĩpũ Pablopũ.

¹¹⁻¹² ĩgũ eroparĩcũ mamũpũ sĩridigũpũ masa wapũ. ĩgũ masacũ ĩha erã mucubiritaria wañorã. Eropa mucubirĩã umaro maja taribugue mũria, panre duhpeñorã bocatĩrimorã. Erã eropa iira pũhrũ yoari boje Pablo erãre buhepũ daja. Boyoboro coregã erãre buheduhupũ. Buhetuhajacã waha wapũ Pablo.

Pablo Troague árĩdigũ waha, Miletogue ejapũ

¹³ Pablo core dohodiru mera Asogue gũapũ ejamũhtabũ. Pablopũ mague wadiami. Pablo ĩgũ arĩdiro dopa ta Asogue ĩgũre gũa bocatĩribũ.

¹⁴ ĩgũre gũa bocatĩricũ, gũa mera ñajami dohodirugue. Iriru mera waha, Mitilenegue gũa ejabũ.

¹⁵ Eroguere eja taria gajinũ Quĩore tariabũ gũa. Gajinũ Samogue ejabũ gũa. Gũa carĩa pũhrũ gajinũpũre Miletogue ejabũ pare gũa.

¹⁶ Pablo Pentecostenũ gohra Jerusalenguere ejadiami. Eropigũ Asia yebague yoari boje árĩdiabirimi. Eropigũ Efesore diaye taria, Miletogue ejatuhajabũ gũa.

Pablo Efeso majarã Jesu yarã oparãre werepũ

¹⁷ Eropigũ Pablo Miletogue árĩgũ, Goãmũ yarã Efeso majarã Jesu yarã oparãre sihubeomi ĩgũ.

¹⁸ Eropa ĩgũ sihubeora pũhrũ erã Pablo pohrogue erama. Erã eracũ ĩagũ erãre Pablo weremi.

—Asiague ne eragũ mũa mera yũ iirare masia mũa.

¹⁹ Mũa mera árĩgũ ne gajiropa arĩro mariro Jesu mari Opũ yare iimũribũ yũhũ. Eropigũ mũare mojomoro ĩabũ. “Mũare tarinũgaa,” arĩbirimũribũ yũhũ. Judio masa erã yũre ñero iiquerecũ ta Goãmũ yare iimũribũ yũhũ.

²⁰ Eropigũ mũa õaro waburi dihtare mũare buhepehocãbũ yũhũ. Masa erã ĩaro mũa wirigue sãre buhebũ yũhũ.

²¹ Eropigu judio masare, judio masa árĩbirã sãre yujuropa ta buhebũ yũhũ. “Mũa ñerire bujawereque. Goãmu yare gohrotoque. Eropirã Jesu mari Opũre umupeoque,” arĩ weremuribũ yũhũ.

²² Eropigu Espĩritu Santo ĩgu dorediro dopa ta dohpaguere Jerusalengue wagu iiaa. Yũ erogue wagu yũ gajiropa waborore masibea yũhũ.

²³ Ōpa arãmi Espĩritu Santo yũre: “Jerusalengue mũhũ ñero tarigũca. Eropirã mũre peresu iirãcoma,” arãmi Espĩritu Santo yũre. Dohpaguere yũ ejara macari nũcũgue eropa arĩ wereama yũre. Jerusalengue wagu Espĩritu Santo ĩgu werera dihtare masia.

²⁴ Eropigu ōari buherire, Goãmu ĩgu mahiri buherire werebu aħraa yũhũ. Jesu mari Opũ ĩgu ya árĩburire iipehodiaa yũhũ. Ire iigu árĩgu, yũ sĩriborore gũibea yũhũ.

²⁵ “Eropigu mũa mera árĩgu Goãmu ĩgu opu árĩrare weremuribũ yũhũ mũare. Mũa yũ eropa arĩ buhenirãre ne dipaturi mũare ĩasome yũhũ. Ire masia yũhũ.

²⁶⁻²⁷ Eropa masigu dohpagãre ire werea mũare. Árĩpehleri Goãmu yare werebu yũhũ mũare. Eropirã árĩpehlerã mũa mera majarã Goãmu yare gamebirã erã árĩcũ yaha dipuwaja árĩbeaa.

²⁸⁻²⁹ Mũa basi ōaro iique. Eropirã mũa Jesu yarãre Espĩritu Santo mũare ĩgu ĩhadibudorerare ĩhadibuque. Ovejare ĩhadiburã ovejare erã ĩhadiburo dopa ta Goãmu yarã sãre ĩhadibuque mũa. Goãmu magũ ĩgu sĩrigũ ĩgu di cõaro mera Goãmu erãre ĩgu yarã árĩmorã iidi árĩmi. Yũhũ ōre wara pũhrũ gajirã ñerãpu mũa pohro ahri erã buheri mera mũare goroweo dũca waricũ iirãcoma. Eropirã Jesu yarãre ōaro ĩhadibuque.

³⁰ Pũhrũguere gajirã mũa mera majarã ta Jesu yarãre gũya, gaji buherire peedorerãcoma. Erã eropa peedorecũ erã peerãcoma.

³¹ Eropirã ōaro iique mũa. Ŭmũri nũcu, ñamiri nũcu mojomoro ĩari mera buhemuribũ yũhũ mũare. Ŭhre bojori gohra ōaro buhebũ mũa árĩpehlerãre. Irire yũ buhera ōaro guñaniguicãque mũa.

³² “Dohpaguere yũ wara pũhrũ Goãmu mũare ĩhadibugũcumi. ĩgu mahiri buherire mũa buherã ōaro árĩrãca mũa. Goãmu ĩgu buheri mera mũare ĩgu yarãre ōaro itamumasimi. Eropigu ĩgu yarã dihtare ĩgu iidiadiro dopa ta mũa tamerare ōaro iigũcumi.

³³ Mũa niyeru oparire, mũa suhri opari sãre “Yũre oque,” arĩbirimuribũ.

³⁴ Yũ basi mohme wajatabũ yaha árĩburire. Eropigu yũ gamerire, yũ mera majarã erã gameri sãre yũ mohme wajatara mera aĩmũribũ. Yũhũ eropa iirare masia mũa.

³⁵ Mari õpa bũrigã mohmerã gajino moorãre itamuro gahmea marire. Ire mũare ii ãhmũmũribũ yũhũ. Jesu mari Opu ãgu arĩrare guñaque mũa. “Ígu ocũ ñeadigu tauro odigũpũ mucubirimi,” arĩpũ Jesu ãgu basi, arĩ weremi Pablo Jesu yarãre.

³⁶ Eropa arĩtuhaja Pablo erã mera mereja, Goãmũre serẽma.

³⁷ Ígu eropa serẽtuhajacũ erã árĩpehrerã Pablõre pabua wayuporã mimi ore goeriserema.

³⁸ “Mũare dipaturi ãasome yũhũ,” ãgu arĩcũ peerã bũrigã bũjawerema erã. Eropirã erã ãgũre tuunũrusia buhama peramague. Eroque ãgũre ãhanũrusiama gũa wacũ.

21

Pablo dipaturi Jerusaléngue wapũ

¹ Jesu yarãre “Wagũ iiaa,” arĩ, dohodiru mera, Cos waĩcũri nũgũrogue diaye waha taribujabũ gũa. Gajinũ Roda waĩcũri nũgũrogue taribujaja, taria, Pátara waĩcũri macague ejabũ gũa.

² Pátara árĩrã, Feniciague waburidirure dohodirure boca-jabũ gũa. Eropirã iriru mera wabũ gũa.

³ Eropa warã Chipre waĩcũri nũgũrore diaye ta ãha tariabũ gũa. Copũ dujabũ iri nũgũro. Iri nũgũrore taria, Siria waĩcũri yebague ejabũ gũa. Eropirã dohodiru maja doberire dohodiru majagũ Tiro waĩcũri maca ãgu durimujucũ, ero payanibũ.

⁴ Ero Jesu yarãre ãarã, siete nũri gohra dujanibũ gũa iri maca ta. Eropirã ero majarã Jesu yarã Espĩritu Santo ãgu werediro dopa ta erã Pablõre Jerusaléngue wadorebiririma.

⁵ Erã eropa arĩquerecũ iri macare siete nũri gũa árĩra pũhrũ, waha wabũ daja. Gũa waboro coregã árĩpehrerã Jesu yarã, erã marasã nome mera, erã porã mera, maca tũro pohro gũare ãhadujarã wama. Eropirã árĩpehrerã gũa imiporogue eja, mereja Goãmũre serẽbũ.

⁶ Gũa eropa serẽra pũhrũ, “Warã iiaa,” arĩ, erãre pabuatuhaja goeriseretuhaja waha wabũ gũa. Gũa wacũ ãhanũrusia, erãpũ majaa wama erã ya wirigue.

⁷ Tiro waĩcũri macare maja tariabũ gũa. Eropirã Tolemaidague tuhajabũ gũa. Ero ta wũariyare watubũ. Iri macare eja, Jesu yarãre “Acawererã, ¿ãhriri mũa?” arĩ, ujunũ erã mera árĩribũ.

⁸ Eropirã iri maca ma buharo árĩcũ gajinu daja Pablo mera mague wabu gwa Cesarea waĩcũri macague warã. Erogue eja, õari buherire weregũ Felipe waĩcũgu ya wihigue ejabu. Eropirã ĩgu mera dujabu gwa. Felipe Jesu yarã erã siete beyenirã mera majagu árĩmi.

⁹ Eropigu ĩgu wapicũrã nome pagu árĩmi. Erã nomepu Goãmu yare wererã nome árĩma.

¹⁰⁻¹¹ Erogue gwa bajamenũri gwa árĩra puhru, Agabo waĩcũgu Goamu yare weremuhtagu Judeague árĩgu guare ĩagu erami. Eropigu ĩgu Pablo yadare tuãdiuridare aĩ, ĩgu basi ĩgu guburire, ĩgu mojotorire diri ĩhmu wereyũmi.

—Õpa arĩmi Espĩritu Santo. “Idare opagu Jerusalengue ĩgu ejacũ, judio masa eropa ta dirirãcoma ĩgure. Dirituhaja, judio masa árĩbirãre orãcoma erã ĩgure,” arĩmi Espĩritu Santo, arĩ wereyũmi Agabo.

¹² ĩgu eroparĩcũ peerã, gwa Cesarea majarã mera Pablore burigã mahibu. ĩgure “Jerusalengue wabiricãque,” arĩribu.

¹³ Gwa eroparĩcũ Pablopũ yuhrimi:

—¿Dohpa arĩ orerã iiri mua? Yũpũre bujawerecũ iiaa mua. Erã yure peresu iicũ õaroca. Yũhu Jerusalengue Jesu mari Opũ yare yũ iira waja yũ sĩricũ õaroca, arĩmi Pablo guare.

¹⁴ “Wabeaa,” ĩgu arĩcũ peediarã iiribu gwa. ĩgu “Wagura,” ĩgu arĩcũ, eropa pepicãbu gwa. Õpa arĩbu:

—Mari Opũ ĩgu gamero dopa ta iiporo, arĩbu gwa.

¹⁵ Irire weretamutu, gwa yare ahmu, waha wabu daja Jerusalengue warã.

¹⁶ Erogue gwa wacũ bajamerãgã Cesarea majarã Jesu yarãpu gwa mera wama. Eropirã Jerusalengue eja erã mera majagu Mnasón waĩcũgu ya wihigue ejabu gwa. Mnasón Chipre majagu ĩgu yoari boje Jesu buhegu árĩmi. Eropirã ĩgu ya wihi gwa árĩguri wihi árĩbu. Eropirã Jerusalengue ejabu gwa.

Pablo Santiagore ĩagu wapũ

¹⁷ Jerusalengue gwa ejacũ, ero majarã Jesu yarãpu “¿Erararĩ?” arĩ, mucubiriri mera bocatĩrima guare.

¹⁸ Gajinu Pablo gwa mera Santiagore ĩagu ejami. Gwa erogue ejacũ ero arĩpehrerã Jesu yarã oparã árĩma.

¹⁹ Eropigu Pablo erãre ĩgu mojoto ñeara puhru judio masa árĩbirãre ĩgu buherare werepehomi. Goãmu ĩgu itamuri mera ĩgu iirare werepehomi Pablo Jesu yarãre.

²⁰ ĩgu eropa arĩ werecũ peerã,

—Goãmũ òagũ, turagũ àhrimi, arĩ umupeoma erãpũ. Eropã arĩtuhaja erã Pablora òpa arĩ werema.

—Acaweregũ, dohpaguere bajarã judio masa Jesure umupeorã àhrima. Mũhũ irire masia. Eropirã erã òpa arĩ pepima: “Goãmũ ìgũ dorerire, Moisegue marire ìgũ apirare marire iipehoro gahmea,” arĩrã iima.

²¹ Òpa arĩnemoma erã. “Gajipugue árĩrãre judio masa árĩbirã watope árĩrãre judio masare Goãmũ Moiserẽ ìgũ apirare ‘Iibiricãque,’ arĩ doremi Pablo,” arãma ò majarã judio masa mũre. “Pablo judio masa porãre mari dorero dopa miri gasirogãre wiri aĩdorebeamĩ,” arãma erã mũre. “Judio masa erã iidorerire Pablo duhudoremi,” arĩ i sãre werewũama mũre.

²² Eropirã mũhũ òre eracũ peerã erã gamenererãcoma mũre turimorã. Eropigũ òpa iiro gahmea mũre.

²³ Mũre gua dorero dopa ta iique. Dohpague òre wapicũrã ỹma Goãmũre umupeorã “Òpa iirãra,” arĩrã àhrima.

²⁴ Erã mera waque. Eropirã Goãmũ Moiserẽ ìgũ dorediro dopa ta erã basi Goãmũ yare iiburire iimorã erã ñeri iirire coerã iima. Mũ sã eropa ta iique. Eropa iigũ erã eropa iira wajare wajayeque mũpũ. Mũhũ eropa wajayera pũhrũ erã poarire wũadoremã erã. Mũ eropa iicũ ìarã masa mũre erã arĩra iri gũyara árĩcũ masirãcoma erã árĩpehrerã. Goãmũ Moiserẽ ìgũ apira dorerire iigũ mũ árĩcũ masirãcoma erã.

²⁵ Judio masa árĩbirã Jesu yarãpũre gua gojarapũre obeotuhajabũ. Òpa arĩ gojabũ gua. “Goãmarã wéanirãre umupeora barire, dire, wũnũgũ mohwejẽnirã waimũrãre babiricãque mũa. Eropirã nome mera ñero iibiricãque. Nome sã ỹma mera ñero iibiricãque,” arĩ were gojabũ gua gojarapũre, arĩma erã Pablora.

Goãmũ wihigue judio masa Pablora ñeañorã

²⁶ Erã eropa arĩ werenigũira pũhrũ gajinũ Pablopũ wapicũrã ỹma mera erã basi Goãmũ yare iimorã erã ñeri iirire coemorã, Goãmũ wihigue ñaja wañorã. Iri wihigue ñajajagũ, erãre werepũ Pablo: “I nũcũ nũri dũhyaa mũa coeboro,” arĩ werepũ ìgũ wapicũrãre. Eropirã erã coeturinũ erã nũcũ Goãmũre waimũrãre erã oburinũ árĩbũ.

²⁷ Eropii erã coepethodiro merogã dũhyacũ gohra Goãmũ wihigue Pablo ìgũ árĩcũ Asia yeba majarã judio masapũ ìañorã ìgũre. Eropa ìarã gajirãre iri wihi árĩrãre Pablo mera guacũ iĩñorã erã. Eropa guarã judio masa Pablora ñeha òpa arĩ gaguinigũñorã:

²⁸ —Mũa gua acawererã Israe masa guare itamurã arique. Ihĩ àhrimi. Moise dorerire i wihi sãre cóadore buhemi

árīpehrerāre. Eropīgu īgu Goāmū wihiguere judio masa árībirā sāre aññajadi āhrami. Eropīgu i wihire ñeri mariri wihire īgu goroweoadi āhrami, arī gaguiniguñorā judio masa Asia yeba majarā ero majarāre.

²⁹ Ero core Jerusalén Pablo Trófimo mera īgu árīcū judio masa ñañorā. Trófimo Efeso majagu judio masu árībiridigu árīmi. Īgu eropa árīcū masirā ōpa arī pepiñorā erā: “Pablo Trófire Goāmū wihire aññajagu iicumi,” arī pepiñorā judio masa.

³⁰ Masare erā eropa arī were erā gaguiniguira puhrū iri maca majarā árīpehrerā burīgā guañorā. Bajarā omagāri, Goāmū wihi árīgure Pablöre ñeha tarawiria wañorā. Tuhanugu iri wihi disipore bihañorā erā īgugue ñajariri arīrā.

³¹ Eropirā erā īgure wejēmorā iiriñorā. Erā eropa iicū ñarā gajirāpu wererā wañorā surara opure. “Árīpehrerā Jerusalén majarā gamenere gua, gaguiniguirā iama,” arī wererā wañorā surara opure.

³² Erā eroparīcū peegu opupu īgu surarare, erā dorerā sāre gameneo, erā mera Pablöre wejēdiarā pohrogue omagā ejañorā. Surara erā ejacū ñarā Pablöre panirā pa duhuñorā.

³³ Eropīgu surara opu Pablo pohrogue eja, īgure ñeha, peda comeda mera diridorepu. Erā dirituhajacū ñha, opu Pablöre serēpipu masare:

—¿Nihino āhriri ihī? ¿Ñeheno dipuwaja īgure eropa iiri muu? arī serēpipu īgu erāre.

³⁴ Īgu eropa serēpicū peerā masapu “Ōpa iami īgu,” arī, gajirā sã gajiropa arī, gaguinigu wereñorā surara opure. Erā eropa gaguiniguicū surara opu ōaro peebirīpu. Eropīgu īgu surara ya wihigue Pablöre aīgādorepu.

³⁵ Iri wihigue eja, Pablo mūriariñere īgu mūriacū masapu īgure padiarā cāhmotañorā. Erā eropa iicū surarapu īgure aīcoā mūria wañorā.

³⁶ Masa bajarā erāre nūrusia, gaguinigu nūrusiañorā.

—Īgure wejēcāque, arī gaguiniguñorā erā Pablöre.

Pablo “Ne masare ñero iibea yuhū,” arī werepu

³⁷ Eropii Pablöre iri wihigue erā peresu iiboro core, Pabloru opure serēpipu.

—Yuhū mu mera weretamudiaca, arī serēpipu Pablo.

—¿Muhū griego masa yare wereniguiri?

³⁸ ¿Sohō árīdigu, Egipto majagu árībeari muhu? Īgu masare īgu oparāre cóādoregu, cuatro mil masa gamewejērāpūre masa marirogue aīgāapu. ¿Īgu árībeari muhu? arīpu opu Pablöre.

³⁹ Īgũ eroparĩcũ peegu Pablo yũhrĩpũ.

—Īgũ árĩbeaa yũhũ. Judio masũ āhraa. Tarso Cilicia yeba árĩri maca masa dehyoabũ yũhũ. Bu árĩri maca majagu árĩbeaa yũhũ. Yũhũ oã masa mera wereniguidiaa, arĩpũ Pablo ĩgũre.

⁴⁰ Īgũ eroparĩcũ peegu opũpũ wereniguidorepũ masa mera. Eropĩgũ Pablo mũriariñegue nigui, ĩgũ mojotori mera “Ejarimaricãque,” arĩpũ masare. Īgũ eropa iicũ ĩarã, ejarimaripehrea wañorã. Erã ejarimaripehrecũ ĩha, Pablo judio masa ya mera werepũ erãre.

22

¹ Yũ acawererã, yũ iirare weregũra mũare. Yũhũ werecũ peeque mũa, arĩpũ Pablo.

² Īgũ eroparĩcũ Pablo judio masa ya mera ĩgũ wereniguicũ peerã masa ejarimariro dujañorã. Eropĩgũ Pablo erãre werepũ:

³ —Yũhũ judio masũ ta āhraa. Tarso waĩcũri maca, Cilicia yeba árĩri maca masa dehyoabũ yũhũ. Eropĩgũ i maca ta Jerusalén ta masabũ yũhũ. Eropĩgũ yũre Gamalie waĩcũgũ buhemũrimi yũre. Eropĩgũ yũhũ mari ñecu sũmarã mũra dorerire õaro buhebũ. Dohpaguere Goãmũre mũa umupeoro dopa ta yũ sã umupeoniguia.

⁴ Eropĩgũ Jesure umupeorãre ñero iimũricarabũ yũhũ. Yujurãyeri erãre wejẽcãmũricarabũ yũhũ. Ñmare, nome sãre ñeha, peresu iimũribũ yũhũ.

⁵ Pahia opũ, mũrã mera yũ eropa arĩri “Diaye ta āhraa,” arĩ weremasima mũre. Erã gojaripũrire Jesu yarãre ñeadoreburipũrire yũre gojabasama. Mari acawererãre Damasco majarãre iripũre ĩhmubu iiribũ Jesu yarãre ñeabu. Erãre ñeha, aĩgãri peresu iibu iiribũ. Jerusaléngue erãre aĩgãdiaribũ erãre dipuwaja moabu, arĩpũ Pablo.

Pablo Jesu yagu ĩgũ warare werepũ

⁶ Eropa arĩtuhaja õpa werenemopũ:

—Jesu yarãre ñeari masũ wadĩgũ árĩqueregũ goeri boje árĩcũ, Damascogue yũ ejaboro pohro gohra árĩcũ umarogue gosesiri medijubũ yũre.

⁷ Ero eropa wacũ yebague mehmerejacarabũ yũhũ. Yũ mehmerejara pũhrũ wereniguigũ carimi yũre. “Saulo, ¿duhpĩgũ yũre ñero iiri mũhũ?” arĩgũ carimi yũre.

⁸ “Opũ, ¿nihino āhrĩri mũhũ?” arĩ serẽpĩbũ yũhũ. “Yũhũ Jesu Nazare majagu, mũ ñero iigũ ta āhraa yũhũ,” arĩ yũhrimi ĩgũ yũre.

⁹ Yũ eropa wacũ yũ mera majarã boyorore ãama. Eropirã yũ mera ãgu wereniguicũ peebirima erã.

¹⁰ “Opũ, ¿dohpa iigũcuri yũhũ?” arĩ serẽpibũ Jesure. “Wahgãnũgajaque. Damascogue waque. Ero mũhũ wacũ, mũre arĩpehreri yũ iidoreburire gajigũ weregũcumĩ mũre,” arĩmi ãgu yũre.

¹¹ Bũrigã ero cuimijuro wacũ yũ cuiri boboa wacarabũ yũhũ. Eropirã yũ mera majarã yũ mojtore ñeha, Damascogue tũã wahgãma yũre.

¹² “Ero Ananía waĩcũgu, Goãmũre umupeogu, marire Goãmũ dorerire iipehogũ arĩmi. Ero majarã judio masa arĩpehrerã erã umupeogu arĩmi.

¹³ Eropigu ãgu yũ pohro eranũgara yũre weremi. “Acaweregũ Saulo, ãaque dipaturi daja,” arĩmi ãgu. ãgu eropa arĩra pũhrũ dipaturi ãabũ yũhũ daja. Eropigu ãgure ãabũ yũhũ.

¹⁴ Yũ eropa ãacũ ãgu Ananía yũre weremi. “Mari Pagũ ãgu gamerire õaro masibure iribojegue beyetuhapũ mũre. Eropigu ‘Yũ magũ õagũre ãha peegũcumĩ,’ arĩ weremũhtarũ mũre mari Pagũ iribojegue mũ arĩboro core. ãgu ãhrimi mari ñecũ sũmarã mũra erã umupeodi.

¹⁵ Eropigu mũ ãarare mũ peerare weregũca arĩpehrerãre.

¹⁶ Eropirã dohpaguere yoari boje arĩbiricãrã. Wahgãnũgajaque. Eropigu waĩyedigu arĩque. Jesure mũ serẽcũ mũ ñerire cõãgũcumĩ,” arĩmi ãgu yũre, arĩpũ Pablo.

Pablo judio masa arĩbirãre ãgu buherare werepũ

¹⁷ ãgu eropa arĩtuhaja Pablo masare werenemopũ:

—Eropa iituhaja yũhũ Jerusalẽngue dujari, Goãmũ wi-higue Goãmũre serẽgũ ejabũ.

¹⁸ Yũhũ ero arĩcũ yũ Opũ Jesu yũre dehyoami. Eropa dehyoagu yũre weremi. “Jerusalẽn majarã yahare mũ werecũ peediabeama. Eropigu duru gajipũgue waque,” arĩmi yũ Opũ Jesu yũre.

¹⁹ ãgu eroparĩcũ peegu werebũ ãgure: “Opũ, mũ yarãre judio masa buheri wiri arĩrãre yũ ñeha para sãre, pere-sugue erãre iimũrirare masima Jerusalẽn majarã.

²⁰ Eropigu mũ yare weregũre Estebanpũre erã wejẽcũ ãagu õaro iirã wejẽma, arĩribũ. ãgure erã wejẽcũ erã ya suhrire opabasabũ yũhũ. Iri sãre masima i maca majarã,” arĩ werebũ yũhũ Jesure.

²¹ Yũ eroparĩcũ peegu yũ Opũ yũre weremi: “Yoarogue judio masa arĩbirãre buhebure obeogũra mũre. Eropigu waque mũhũ,” arĩmi yũre yũ Opũ, arĩpũ Pablo masare.

Surara opu Pablo mera weretamupu

22 Īgu weremūhtara dihtare ōaro peeriñorā masa. Eropa peequererā judio masa árībirā pohro Jesu Pablora Īgu obeoburire Īgu werecū peerā erā gua gaguiniguinūgañorā daja.

—Ihī dohpague tamerare sīricuraporo, arī gaguiniguñorā erā.

23 Eropirā erā gaguiniguinemo, guari mera erā suhrire wejēsiribeo, nicu mera deañorā.

24 Erā eropa iicū ĩha surara opu surara ya wihigue Pablora aññajadorepu Īgu surarare. Eropigu surara opu “¿Duhpirā Pablo mera gua eropa siari gaguiniguirā ĩiri masa?” arī serēpidiaripu. Pablora irire serēpibu, yuradari mera tāradoreripu Īgure.

25 Īgu tāradorequerēcū Īgure erā dirira pūhrū, Īgu pohro árīgure surarare werepu Pablo.

—Yuhū Roma majagu āhraa. Eropirā “Ñero iigu āhrimi,” yure arīmasibea mūa. Eropirā yuradari mera tāramasibea mūa, arīpu Pablo Īgure.

26 Īgu eroparīcū surara Īgu opu are weregu wapu.

—Ihī Roma majagu āhrimi. Eropigu ōaro iique ĩre, arī werepu Īgu Īgu opu.

27 Īgu eropa arīra pūhrū surara opu Pablora serēpigu wapu.

—¿Diaye ta mūhū Roma majagu āhriri? Wereque yure irire, arīpu Īgu.

—Īgu ta āhraa yuhū, arī yuhripu Pablo.

28 Īgu eroparīcū peegu opu Īgure werepu.

—Yuhū Roma majagu árīdiagu niyeru wūaro wajayebu, arīpu Īgu.

—Yuhū Roma maja macague masa dehyoabu. Eropigu Roma majagu āhraa, arīpu Pablo.

29 Īgu eroparīcū peerā Īgure tārabonirā waha wañorā. Eropigu Pablo Roma majagu Īgu árīcū masigu, Īgure comedari mera erā dirirare guñagu, güi arīpu surara opu.

Pablo judio masa opu werepu

30 Eropigu surara opu judio masa Pablora erā weresārare ōaro masidiapu. Eropa masidiagu gajinūgue comedarire Īgure Īgu pādorera pūhrū pahia oparāre, judio masa erā mūrā mera gamenedorepu surara opu. Īgu eropa gamenedorera pūhrū Īgu erogue Pablora aīgā, erā core duhudobopu Īgure.

23

1 Eropigu Pablo judio masa mūrā oparāre ĩabocatĩunugaja wererũ:

—Acawererā, Goāmu ĩgu ĩaro umuri nucũ ðaro iiniguicābu yũhũ, arĩpu Pablo.

2 ĩgu eroparĩcũ peegu árĩpehrerā pahia weca árĩgu opu Ananíapu Pablo disirore padorepu.

3 ĩgu pohro niguirāre padorepu. ĩgure erā para puhru Pablo Ananíare turipu.

—Masa erā ĩaro dihtare ðaro iigu āhraa mũhũ. “Goāmu dorerire tarinugagu iiaa,” yure arĩqueregu ta yure padorea mũhũ. Eropa padoregu mupu dorerire tarinugagu iica, arĩpu Pablo ĩgure.

4 ĩgu eroparĩcũ peerā Pablo pohro niguirā ðpa arĩñorā ĩgure:

—Goāmu ĩgu beyedigu pahia opure ñero wereniguibiricāque mũhũ, arĩñorā erā Pablöre.

5 Erā eroparĩcũ peegu Pablo arĩnemopũ:

—Acawererā, ĩgu, ĩgu pahia weca opu ĩgu árĩrire masibirabu yũhũ. Eropigu eroparĩmaacābu yũhũ. Goāmu ya erā gojarapũ ðpa arĩ werea ĩgure: “Mua maca majarā opure ñero arĩ wereniguibiricāque,” arĩ gojara āhraa, arĩpu Pablo erāre.

6 Eropirā ero pe curu majarā arĩñorā. Yuju curu saduceo masa arĩñorā. Gaji curupu fariseo masa arĩñorā. Pe curu erā árĩcũ masigu, Pablo erāre busuro mera wererũ:

—Acawererā, yũhũ fariseo masũ āhraa. Fariseo masũ magũ ta āhraa yũ sã. “Sĩrinirā masa mũriarācoma,” yũ arĩ wereri dipuwaja yure ñero iidiaa mua, arĩpu Pablo.

7 ĩgu eroparĩcũ peerā fariseo masa, saduceo masa erā basi gameturiñorā. Eropirā erā basi pe curu duca wariñorā.

8 Saduceo masa ðpa arĩrā arĩñorā: “Sĩrinirā masa mũriasome. Espiritua anyua sã ne marima,” arĩrā arĩñorā. Eropirā fariseo masapu erā arĩro dopa arĩbiriñorā. Eropirā Pablo “Sĩrinirā masa mũriarācoma,” ĩgu arĩcũ erā erā basi gameturiñorā.

9 Eropa gameturirā, buriḡā gaguinigiñorā. Eropirā fariseo masa mera majarā judio masa buherā wahḡanugaja, tuhri, wereñorā:

—Ihĩ Pablo ñero iibirami. Eropigu Espiritu, o anyu diaye ĩgu mera wereniguigu arĩbocumi. Eropirā ĩgure dipuwaja moarā Goāmure ĩhaturirā arĩboca mari. Eropiibiricāque, arĩñorā erā.

10 Erā eropa arĩra puhru erā árĩpehrerā gameturi, buriḡā guañorā. Erā eropa buriḡā guacũ ĩha gũisāpu Pablöre surara opupu. “Pablöre patasiricārācoma,” arĩgu ĩgu

ya wihigue aīgāridoregū īgū masa watope īgū surarare obeopu.

¹¹ Gaji ñami Jesu mari Opū Pablo pohro dehyoa, werepū īgure:

—Güibiricāque. Dohpague õre Jerusaléngue yaha buherire wereabu mūhū. Eropigū Romague sāre õpa ta iigu waque, arīpū mari Opū Pablore.

Judio masa Pablore wejēdiariñorā

¹² Gajinū ñamiñarigā árīcū judio masa bajamerā gamenereñorā.

—Õpa iirā, arīñorā. Pablore wejēcārā. Eropirā īgure mari wejēboro core ihribiricārā. Babiricārā. Īgure wejēbirā oa mera sīrirā. Īgure mari wejēbiricū Goāmū marire wejēporo, arīñorā erā.

¹³ Erā eropa arīrā cuarenta weca ñari judio masa árīñorā.

¹⁴ Erā eropa arī wereniguira pūhrū erā pahia oparāre, murā sāre wererā wañorā:

—Pablore gūa wejēboro core barire babeaa gūa.

¹⁵ Eropirā mūa, mari murā mera õpa arī sihubeoque. “Pablore dipaturi serēpidiaca,” arībeoque surara opūre. Mūa eropa arīra pūhrū surara opūre aīgāridoreque Pablore. Eropirā Pablo īgū õre īgū eraboro pohro gohra árīcū īgure wejērāca gūa, arīñorā erā pahia oparāre.

¹⁶ Eropigū Pablo tīgo magū erā eropa arī wereniguicū peepū. Erā eroparīcū peegū waha, surara ya wihigue Pablore weregū ñajapū.

¹⁷ Īgū eropa werera pūhrū Pablopū yujugū surarare sihubeo, werepū īgure.

—Ihī mamūre mū opū pohrogue aīgāque. Ihī mū opūre werediagu iimi, arīpū Pablo.

¹⁸ Īgū eroparīcū peegū surarapū Pablo tīgo magūre īgū opū pohrogue aī eja, werepū.

—Peresugue árīgū Pablopū yūre sihubeo, ĩre mamūre mū pohrogue aīgāridoreami. Ihī mūre weregū arīgū iiami, arīpū surara īgū opūre.

¹⁹ Īgū eroparīcū peegū opūpū mamūre īgū mojotore ñeha tuāgā, masa marīrogue īgure serēpi ĩapū.

—¿Dohpa arību iiari mūhū yūre? arīpū īgū Pablo tīgo magūre.

²⁰ Īgū eropa serēpicū peegū õpa arī werepū.

—Judio masa yujuro mera, “Õpa iirā,” arī, werenigu-
iama. Ñamigāre judio masa oparā pohrogue mūre Pablore aīgādorerācoma. “Murā dipaturi Pablore serēpidiama,” arī gūyarācoma.

²¹ Eropirā cuarenta weca ñari masa ïgure wejēdiarā mague duhrinjarā corerācoma. Erā ïgure wejēboro core barire basome. Eropirā ihrisome. “Ïgure mari wejēbircū, Goām̄ marire wejēporo,” arāma erā erā basi. Eropirā dohpaguere m̄re Pablöre aïgāridorerā erāp̄ duhri core-tuhajama Pablöre wejēmorā. Eropiḡ erā wererā eracū erāre ȳhribita m̄h̄, arī werep̄ mam̄ surara op̄re.

²² Ïḡ eroparīcū peeḡ surara op̄ ðpa arīp̄:

—Ȳre m̄ wererare gajirāre werebircāque, arī werep̄ mam̄re. Eropa arītuhaja mam̄re “Wahanisa,” arīp̄.

Pablöre op̄ Feli waīcuḡ pohrogue obeop̄

²³ Eropiḡ surara op̄ perā ïḡ surarare sihugā, erāre dorep̄:

—Doscientos surarare, setenta cabayu peyarāre, doscientos ñoseri mijiri oparāre Cesareague wamorāre erā yare amudorerā waque. Eropirā dohpagā ñami nueve árīcū m̄a waborore coreque.

²⁴ Eropirā Pablöre cabayuare ïḡ peyamorāre amubasaque. Op̄ Feli pohrogue, Cesareague ðaro sorā waque ïḡre, arīp̄ surara op̄.

²⁵ Eropa arītuhaja papera gojap̄. Òpa arī gojap̄ ïḡ:

²⁶ “Ȳh̄ Claudio Lisia m̄re turaḡ op̄ Felire ðadorea.

²⁷ Judio masa ïre ñeha, wejērama. Eropiḡ ïḡ Roma majaḡ ïḡ árīcū masiḡ, ȳ surara mera ïḡre itamuḡ ejab̄.

²⁸ Eropiḡ ïḡre erā weresārare masidiaḡ judio masa oparā pohro aïgāb̄ ïḡre.

²⁹ Eropiḡ ïḡ judio masa ya doreri dihtare ïḡ tarinugacū, mari ya dorerire ïḡ tarinugabiricū ïaḡ, ïḡre peresugue apidiabirab̄. Ñeha dipuwaja sīriro mara ïḡre.

³⁰ Eropiḡ judio masa ïḡre wejēdiarā, erā duhri corecū ïaḡ gajiḡ wereami ȳre. Ïḡ eropa werera p̄hr̄ Pablöre dohpaguere m̄ pohro obeoḡ ïiaa. Eropiḡ ïḡre weresānirāre ïḡ ñero iirare m̄re weredoretuhajab̄ ȳh̄,” arī gojap̄ surara op̄.

³¹ Eropirā surara erā op̄ ïḡ dorediro dopa ta ïiñorā. Iri ñamire Antípatri waīc̄uri macague Pablöre aī ejañorā.

³² Gajin̄ gajirā surara cabayua weca peyabirā iri maca ta dujariñorā erā ya macague. Gajirā surara cabayua peyarā dihta ïḡre aī tarigāñorā.

³³ P̄ Cesareague aī ejañorā Pablöre. Eropirā surara op̄ ïḡ obeorap̄re op̄ Felire wiañorā. Eropirā Pablöre aī ejañorā op̄ pohrogue.

34 Erã eropa wiara pũhrũ iripũre ãgu ãara pũhrũ ãgu gajirãre serẽpi ãapũ:

—¿Di yeba majaguã ãhriri ihĩ Pablo? arĩ serẽpi ãapũ.

—Cilicia yeba majaguã ãhrimi, arĩ wereñorã ãgure.

35 Erãre serẽpituhaja, Feli Pablöre werepũ:

—Mũre weresãnirã õre erã eracũ mũ wererire peegura, arĩpũ Feli Pablöre.

Ãgu eropa arĩra pũhrũ Herode ya wihigue ãgure apipũ. Eropiguã ãgu ãmare ãgure corepũ ãgu opũ.

24

Pablo “Ñero iibirabũ,” arĩ werepũ Felire gajirã weresãra pũhrũ

1 Cinco nũri pũhrũ Ananía pahia opũ, judio masa erã mārã, dorerire weremehregũ Tértulo waĩcũgu mera Cesareague ejañorã. Eropirã erã Pablöre weresãdiarã, opũ Feli pohrogue ejañorã.

2 Eropiguã Pablöre erã gamenererogue erã aĩ ejara pũhrũ Tértulo ãgure weresãnũgapũ. Eropa weresãnũgaguã õpa arĩpũ Felire:

—Mũhũ õaro masiguã, gua opũ mũhũ õaro dorecũ gua i yeba majarã õaro árĩcãa gua gamequeãro mariro. Mũ doreri mera õaripũre gohroto iiaa i yeba.

3 Eropirã gua õaro árĩcãrã mucubiria. Eropirã mũ mera õaro mucubiria.

4 Dohpague merogã mũre garibogura yũhũ. Merogã mũ mera weretamudiaca. Guare peenique dohpa.

5 Ihĩ guare garibotariami. Árĩpehreri yebari majarãgue judio masare erã gua gaguiniguicũ iimi ihĩ. Eropiguã masa erã basi gameturicũ iimi ihĩ. “Oparãre cóarã,” arĩrã mera majaguã ãhrimi ihĩ. Eropiguã nazareno waĩcũri curu opũ ãhrimi.

6 Eropiguã Goãmũ wihire ñero ãgu iidiacũ ãarã gua ñeabũ ãre. Gua ñeara pũhrũ gua ya dorerire ãgu tarinũgaguã árĩcũ ãgure dipuwaja moadiarabũ gua.

7 Eropa moadiaquerecũ surara opũpũ Lisia waĩcũgu ãgure guare turaro mera emacãmi.

8 Pũhrũ ãgure weresãnirãre mũ pohrogue wadoreami Lisia. ãgu eroparĩcũ peerã ahrabũ gua. Mũ tamera ãre serẽpigũ, árĩpehrerire ãgu ya dipuwajare masiguãca mũhũ, arĩpũ Tértulo Felire.

9 ãgu eropa arĩra pũhrũ gajirã judio masa Tértulo ãgu arĩdiro dopa ta “Diaye ta ãhraa,” arĩñorã erã sã.

10 Erã eropa arĩ weresãra pũhrũ opũ Feli Pablöre were-dorepũ. Õpa arĩ werepũ Pablo:

—Baja bojori i yeba majarāre mu dorerare masia yuhu. Eropigu yu iirare mure weregu mucubiria.

¹¹ Doce nuri ta wahaa Jerusalengue Goamure yu umupeora puhru. Muhu i diaye aricu masidiagu gajirare serēpi iaque.

¹² Judio masa yure Goamu wihiguere boca erā ñeacū masare arī gaguiniguigu iibirabu. Eropigu “Oparare cóaque,” arigu iibirabu. Eropigu judio masa buheri wirire, erā ya maca sare ne ñero iibirimurabu.

¹³ Eropirā yure weresānirāpu erā weresārare “Ōpa iiami ihī,” arī weremasibeamā mure.

¹⁴ Dohpague yu iirare weregura mure. Matague ta gua ñecu sumarā erā umupeodiro dopa ta Goamure umupeoa yu sā. Eropigu Goamu yare iiaa Jesu ya ōari buheri iri arīro dopa ta. Oā “Jesu ya guyabirari āhraa,” arī wereniguima oā judio masa. Eropigu Goamu doreri, Moiseguere igu apirare iri sare umupeoa yuhu. Eropigu Goamu ya weremūhtanirā erā gojara sare umupeoa yuhu.

¹⁵ Oā gajirā judio masa mera ta “Goamu arīpehrerā masare sīrinirāre ōarā, ñerā mera erā masa mūriacū iigucumi,” erā arī pepiro dopa ta yu sā eropa ta arī pepia.

¹⁶ Eropigu dipuwaja mara yuhu. Goamu irire masimi. Eropirā masa sā irire masima. Eropigu diaye ta werea yuhu mure.

¹⁷ “Gaji bojorire gajipugue yuhu curigu arigu dujarabu Jerusalengue. Yu acawererā Jerusalén majarā mojomorocarare niyeru ogu arigu iiahu.

¹⁸ Dujara, Goamure umupeobu igu ya wihigue ejarabu. Eropigu Goamu igu coedorero dopa yu basi iira puhru waibugure odiarabu Goamure umupeobu. Eroque yu aricu oā judio masa yure bocama. Erā bocacū gajirā yu mera majarā marama. Gua gaguiniguirā marama.

¹⁹ Eropirā gajirā judio masa Asia yeba majarā ero āhrama. Erā yu ñero iicū ñanirā arirā weresārā ariporo ōguere.

²⁰ Oā ōgue arirāpu judio masa oparā gamenererogue yu aricu ñanirā yu erogue ñero iirare masirā, erā sā weresāporo.

²¹ Gaji tamerare yure erā weresāmasima: Erā mera arigu ōpa arī buringā gaguiniguibu yuhu: “‘Sīrinirā masa mūriarācoma,’ yu arira waja dipuwaja moaa mūa,” arību erāre, arī werepu Pablo Felire “Ñero iibiribu,” arigu.

²² Igu eropa arī werera puhru Feli ōpa arī werepu Pablore:

—Dohpaguere iripēta āhraa. Surara opu Lisia igu erara puhru mure yu iiborore masigūca yuhu, arīpu Feli Pablore. Felipu Jesu yarā erā iirare ōaro masipehogu arīpu.

²³ Eropa arĩtuhaja, Pablöre coregure surarare Feli õaro ïhadibudorepũ peresugue árĩgũ duhriri arĩgũ. Eropa ïhadibudorequeregũ õaro iidorepũ ïgure. Eropigũ merogã ópũ ïgũ curiborore. Pablo mera majarãre ïgure peresugue árĩgure itamudoregũ eropa dorepũ Feli.

²⁴ Bajamenũri pũhrũ Feli ïgũ marapo Drusila waĩcũgo mera ahri, Pablöre sihuñorã daja. Feli marapopũ judio maso árĩpo. Pablöre erã sihura pũhrũ, Jesucristore ïgũ umupeorire Pablopũ werepũ erãre.

²⁵ Eropa weregũ, õarire, õaro guñamasirire, ñerire gamebiririre, pehrerinũ árĩcũ masare Goãmũ dipuwaja moaborore werepũ Pablo. ïgũ eropa arĩ werecũ peegũ Feli güigũ, Pablöre werepũ:

—Dohpaguere waque. Pũhrũ yãre mohmeri maricũ sihugũra daja, arĩpũ Pablöre.

²⁶ Eropa arĩgũ, Pablo ïgure niyeru ocũ gameripũ Feli. Eropigũ ïgũ niyerure gamegũ, bajasuburi Pablöre sihu, ïgũ mera wereniguimũripũ Feli. Niyerure ïgũ wajayecũ ta Pablöre wiuboñumi gajisubu arĩgũ.

²⁷ Pe bojori pũhrũ Porcio Festo waĩcũgũ Felire gohrotogu árĩpũ. Eropigũ Felipũ opũ árĩgũ judio masare mucubiricũ iidipũ. Eropigũ ïgũ Palore peresu árĩdorepũ dohpa.

25

Festore Pablo ïgũ irare werepũ

¹ Eropii Festo iri yebague ùhrenũ ïgũ opũ ñajara pũhrũ, Cesareague árĩdigũ waha, Jerusaléngue ejapũ.

² Ero ïgũ ejacũ ïha pahia oparã, judio masa oparã mera Pablöre erã weresãrare wereñorã Festore.

³ Pablo ïgũ mague wacũ iri mague ïgure cohre, wejẽdiariñorã ïgure erã. Jerusalén mague aricũ gameriñorã ïgure wejẽmorã. Eropirã erã õpa Festore ùpũtũ serẽriñorã:

—Pablöre õguere Jerusaléngue obeoque, arĩ serẽriñorã erã Festore Pablöre wejẽdiarã.

⁴ Erã eroparĩcũ peegũ, Festo werepũ erãre:

—Dohpaguere Pablo Cesareague peresu ãhrimi. Dohpaguere yũhũ erogue wabu iiaa.

⁵ Pablo ïgũ ñero iigũ árĩcũ, mua oparã Cesareague yu mera waha, ïgure weresãque, arĩpũ Festo.

⁶ Eropigũ Festo ocho o diez ñari erã mera ïgũ árĩra pũhrũ Cesareague dujaa wapũ. Gajinũ ïgũ dipuwaja moadoreri wihi doagũ, Pablöre aĩgãridorepũ.

⁷ Eropirã Pablo Festo pohrogue ïgũ eracũ, judio masa Jerusaléngue arinirãpũ Pablo pohro nigui, ïgure bũrigã

weresānugañorā. Eropa weresāquererā “Ihī ĩḡu ñero iicũ ĩabu,” arī weresāmasibiriñorā.

⁸ Erā eropa arī weresāra pũhrũ Pablo ĩḡu iirare werepũ:

—Judio masa erā dorerire, Goāmũ wihi maja dorerire, Roma opũ ĩḡu dorerire ne tarinũgabirabũ, arīpũ Pablo.

⁹ Festopũ judio masare mucubiricũ iidiagũ, Pablore serēpipũ.

—¿Jerusaléngue wadiari mũhũ? Mũ iirare yũre erogue weregũca mũhũ, arīpũ Festo Pablore.

¹⁰ ĩḡu eroparĩcũ Pablo yũhripũ:

—Arīpehrerā weca opũ ĩḡu ya wihi dipuwaja moadoreri wihi āhraa dohpaguere. I wihino ta ohō sã āhraa. Eropigũ yũ iirare ohō ta amu purumujuque. Judio masare yũ ñero iibirirare ñaro masia mũhũ.

¹¹ Ñerire iĩḡu dorerire tarinũgagũ árĩḡu “Yũre wejēbiricāque,” arībiriboaya. Eropigũ oã weresāripũ ḡuyari iri árĩcũ yũre weresānirāre yũre omasibeeaa mũhũ. Yũ iirare arīpehrerā weca opũre Césare weregũ wadiaca yũhũ, arīpũ Pablo.

¹² ĩḡu eroparĩcũ peegũ Festopũ ñaro masi wererāre serēpituhaja, werepũ Pablore.

—Mũhũ arīpehrerā weca opũre mũ iirare mũ werediacũ, ĩḡu pohrogue Romague obeorāra mũre, arīpũ Festo Pablore.

Pablo opũ Agripare ĩḡu iirare werepũ

¹³ Festo opũ ñajara pũhrũgue opũ Agripa, Berenice waĩcũgo mera Cesareague Festore ĩarā ejañorā.

—¿Ne, erarari mũ sã? arīñorā erā Festore bocatĩri serērā.

¹⁴ Ero bajamenurĩgã erā árĩra pũhrũ Festo werepũ Agripare Pablore erā iirare.

—Õre Feli ĩḡu peresu iidigũ āhrimi.

¹⁵ Eropirā Jerusaléngue yũ wacũ judio masa erā pahia oparā, erā mũrã mera ĩre weresāma. “ĩḡu ya dipuwajare wejēque ĩḡure,” arī serēama erā yũre.

¹⁶ Erā eroparĩcũ peegũ yũ õpa wereabũ: “Ḡua Roma majarãpũ peresu erā ĩnirāre masare eropa ta ocābirimũribũ. Eropigũ ĩḡure osome mũare. Ḡua ñeadigũre ĩḡure weresānirã ḡuare wereniguiboro core ĩḡure dipuwaja moamasibeeaa ḡua. ĩḡu basi sã ĩḡu iirare ĩḡu werenibiricũ ĩḡure dipuwaja moamasibeeaa ḡua,” arãbũ erāre.

¹⁷ Eropigũ õre erā weresārã eracũ ĩagũ yoari boje iibirabũ yũhũ. Eropigũ ḡajinũre masa dipuwaja moadoreri wihi yũ doagũ, erā weresādigũre sihubeoabũ.

¹⁸ Eropirā iri wihi ĩḡu eracũ ĩarã ĩḡure ĩhaturirã wahḡānũgajama. Erā eropa wahḡānũgajacũ ĩagũ ñetariaro

arĩ weresārācoma arĩ pepirabũ yũhũ erāre. Īgũre weresādiaquererā weresāmasibirama erā.

¹⁹ Eropirā ĩre Goāmũ yare ĩgũ werera dipuwaja judio masa ĩgũre ĩhaturiamā. “Jesu waĩcũgũ ĩgũ sĩridigũ masa mĩariadi árĩmi,” arĩ ĩgũ werera waja weresāma ĩre. I dihtare weresāma.

²⁰ Ire masibigũ ĩgũre ðaro serēpi ĩabu. “¿Jerusaléngue wadiacuri yũ mera? Erogue wereque mũ iirare yũre,” arĩrabũ ĩgũre.

²¹ Yũ eroparĩcũ peegũ ĩgũrũ wadiabirami. “Yũ iirare árĩpehrerā weca opũre werediaca,” arāmi ĩgũ yũre. Īgũ eropa arĩra pũhrũ ohõ ta ĩgũre coredoreabũ árĩpehrerā weca opũ pohro ĩgũre yũ obeoboro core, arĩrũ Festo Agripare.

²² —Yũ basi peediaca ĩgũre, arĩrũ Agripa Festore.

—Ñamigā ta ĩgũre peegũca mũhũ, arĩ yũhrĩrũ Festo.

²³ Eropirā gajinũ árĩcũ Agripa, Berenice mera masa dipuwaja moadoreri wihigue eja, “Oparā āhraa gũa,” arĩrā gũhyadiaro ii ĩhmuñorā erā, surara oparā, iri maca majarā oparā mera. Eropa ii ñajarā iri wihiguere ñajañorā. Erā ñajajara pũhrũ Pablöre sihubeopũ Festo.

²⁴ Eropigũ Festo ðpa werepũ:

—Opũ Agripa, mũa árĩpehrerā i wihire gamenererā peeque. Ōre ihĩ bajarā judio masa erā weresāgũ āhrimi. Jerusaléngue Cesareague sāre erā ĩgũre weresāma. “Īgũre wejēque,” eropa arĩniguicārā iima erā.

²⁵ Erā eropa arĩquerecũ ta ðpa arĩ pepia yũhũ. Ihĩ ne ñero iidigũ árĩbeami. ¿Ñehe dipuwaja mari wejēbocuri ĩgũre? Eropigũ árĩpehrerā weca opũre César Augustore ĩgũ iirare ĩgũ werediacũ árĩpehrerā opũ pohrogue obeogura ĩre.

²⁶⁻²⁷ Eropigũ ihĩ ĩgũ iirare masibirinica yũhũ dohpa. Eropa masibirinigũ mari opũre were gojamasibirica. Eropigũ mũare ĩgũ werecũ peedoregũ iiaa dohpaguere. Opũ Agripa, dohpague tamerare ihĩ āhrimi mũ serēpi ĩabu. Mũ serēpi ĩatuhaja mari masira pũhrũ ĩre erā weresārare ðaro were gojagura. Ihĩ ĩgũ ñero iirare yũ masibiriqueregũ ta opũ pohrogue ĩgũre yũ obeocũ ðabeaa. Eropigũ dohpaguere erā weresārare ðaro masidiagũ iiaa, arĩrũ Festo erāre.

26

Pablo Agripare ĩgũ iirare werepũ

¹ Īgũ eropa arĩra pũhrũ Agripa Pablöre arĩrũ:

—Mu basi ta wereque, arĩpu ĩgu Pablore. ĩgu eropa arĩra pũhrũ Pablorũ, “Ejarimaricãque,” arĩgu ĩgu mojotorire aĩ wahgũbeo, ĩgu iirare werenũgarũ:

² —Opũ Agripa, yũre judio masa erã weresãrare, yũ iirare mũre weregu, dohpaguere ðaro sĩporãcũa.

³ Gũa judio masa gũa iiricũre, gũa buheri sãre mũhu ðaro masicũ tamerare mucubiria yũhu. Eropigu mũhu yũre ðaro peeque, arĩnũgarũ Pablo.

Pablo Jesu yagu ĩgu arĩboro core ĩgu arĩricũrare werepu

⁴ Eropa arĩtuhajagu ðpa arĩnemopũ ĩgu:

—Mamũ arĩgu yũ arĩricũrare arĩpehrerã judio masa masima. ðmũri nũcũ yũ masa dehyoara pũhrũ yaha yebaguere, Jerusalengue sãre yũ arĩrare masima erã.

⁵ Negohraguere fariseo masũ arĩribũ. Eropigu fariseo masa erã dorerire, erã iirinore yũhu ipehodigu arĩcũ erã masima. Erã mũre werediarã, irire weremasima erã.

⁶ I dipuwaja ta yũre weresãmũrima. Gũa ñecũ sumarãre “Sĩrinirãre masugũra,” Goãmũ ĩgu arĩ apirare “Diaye ta ãhraa,” yũ arĩri waja oã yũre weresãmũrima.

⁷ Yũ acawererã judio masa, arĩpehrerã doce cururi majarã Goãmũ masare ĩgu masuborore mucubiri cohrema. Eropirã Goãmũre umupeoniguicãma. Eropa corerã arĩrã yũ iiro dopa ta iima erã sã. Opũ Agripa, eropa yujuropa gũa iirã arĩquerecũ ta erãpu yũhu ĩgu masuborore ii coreri waja yũre weresãmũrima judio masa.

⁸ ¿Duhpirã sĩrinirãre Goãmũ ĩgu masuborore peediabeari mũa judio masa? arĩ werepu Pablo.

Pablo Jesu yarãre ĩgu ñero iirare werepu

⁹ Eroparĩtuhaja ðpa werenemopũ:

—Jesu Nazare majagũre ñanibigu dohpa ñeri dihtare iidiaribũ yũhu ĩgu yarãre.

¹⁰ Eropigu Jerusalengue eropa iimũribũ yũhu. Pahia oparã yũre erã dorera pũhrũ bajarã Jesu yarãre peresu iimũribũ yũhu. Eropigu oparã erãre erã wejẽdorecũ, wejẽmũribũ yũ sã.

¹¹ Bajasuburi arĩpehreri judio masa erã buheri wirigue Jesu yarãre ñero iidoremũricarabũ. Eropigu Jesu yarã Jesure erã cõacũ iidiaribũ yũhu. Erã mera bũrigã guabũ yũhu. Eropigu gaji macarigue sãre erãre ñero iigu ejamũricarabũ yũhu, arĩ werepu Pablo.

Pablo Jesu yagu ĩgu warare werepu

¹² Eropa arĩtuhaja ðpa werenemopũ:

—Eropigu Damascogue Jesu yarãre ñero iidiaigu ejaribũ. Erãre yũhu ñero iidiacũ ñarã pahia oparã yũre wadorema.

13 Ōpa árībũ, opũ Agripa: Goeri boje árĩcũ gohra mague yũ wacũ umaro maja goesiriri, abe umũ majagu tauro yũre yũ mera warã sãre goesiribũ.

14 Gũa árĩpehrerã yebague mehmerejabũ. Judio masa ya mera yũre ĩgu wereniguicũ peebũ. “Saulo, Saulo, ¿duhpigu mũhu yũre ñero iiri? Mũhu yũ mera guagu yũre yũhribigũ, mũ basi ñero taria,” arĩmi yũre.

15 “Opũ, ¿nihino ãhriri mũhu?” arĩ serẽpibũ yũpũ. “Yũhu Jesu ta ãhraa mũ ñero iigu.

16 Wahgãnuɗgajaque mũhu. Yũ pohro majagu mũre iibu dohpague dehyoa yũhu. Dohpagãre mũhu yũre ĩarare, pũhrũ mũre yũ ĩhmuburi sãre gajirãre weredorebu apigũca mũre.

17 Judio masare, judio masa árĩbirã sãre mũre buhedoregu obeogũra. Erã pohro mũ árĩcũ, mũre erã ĩhaturicũ mũre itamugũra.

18 Yahare erãre masicũ iique mũhu. Eropigu erã ñerire duhucũ iique mũhu. Ōaripũre gohrotocũ iique erãre. Watĩre erãre gamebircũ iique mũhu. Eropigu Goãmu yapũre iicũ iique mũhu erãre. Mũhu eropa iicũ erã yũre umupeorãcoma. Erã eropa umupeocũ ĩagu erã ñeri iirare cãdijigũca. Eropirã erã Goãmu ĩgu beyenirã mera majarã mera árĩrãcoma. ĩgu oburire opamorã árĩrãcoma erã,” arĩmi Jesu yũre, arĩ werepũ Pablo.

Pablo ĩgu iirare ĩgu mohmerire werepũ

19 Eroparĩtuhaja ōpa werenemopũ:

—Opũ Agripa, umaro maja yũ peerire tarinũgabiribũ.

20 Damascogue buhemũhtabũ. Pũhrũ Jerusalén buhebu daja. Pũhrũ Judea yeba, judio masa árĩbirã pohrogue sãre masare erã ñero iirare bujaweredore, Goãmu yare gamedorebũ. “Ōarire mũa iicũ ĩarã mũa ñeri iirare mũa bujawererare gajirã masirãcoma,” arĩgu, erãre ñarire iidoregu buhebu.

21 Goãmu ya wihi yũ árĩcũ yũ eropa arĩ wereri waja judio masa yũre ñeha wejẽdiarima.

22 Eropigu umuri nũcu Goãmu ĩgu itamuro mera eropa buheniguicãa. Eropigu dohpaguere mũa árĩpehrerãre oparãre bu árĩrã sãre ĩgu yare weregu iiaa. Iribojegue majarã Goãmu yare weremũhtanirã Moise mera erã wereyudiro dopa ta werea yũ sã. Ōpa arĩ wereyũñorã erã:

23 “Cristo Goãmu ĩgu obeodigũpũ ñero tarigũcumĩ. Eropigu sĩrigũ masa mũriamũhtagũ árĩgũcumĩ ĩgu. Eropigu masare ĩgu itamuborore judio masare judio masa árĩbirã sãre masicũ iigũcumĩ,” arĩ wereyu gojamũriñuma

iribojegue majarã. Yũ sã erã werediro dopa ta werea, arĩ werepũ Pablo Agripare.

Pablo Agripare Jesu yagũ iidiaripũ

24 Īgũ eropa arĩ werera pũhrũ Festo ĩgũre bũrigã gaguinigui wereniguipũ:

—Pablo, mũhũ goroweregũ āhraa. Mũhũ baja buhegu goroweregũ wahaa, arĩ gaguiniguiipũ Pablöre.

25 Īgũ eroparĩcũ peegũ õpa yũhripũ Pablo Festore:

—Opũ, goroweregũ árĩbeaa yũhũ. Yũ wereri diaye ta āhraa. Eropigũ yũhũ ire gũhyadiaro mera arãa.

26 Opũ Agripapũ i yũ wererire õaro masimi. Eropigũ yũhũ ĩgũre gũiro mariro werea. I wererire árĩpehrerã masa masima. Eropigũ árĩpehreri ire yũ arĩrare opũ Agripa ĩgũ masicũ masia yũhũ, arĩpũ Pablo Festore.

—Īgũ eropa arĩtuhaja õpa arĩpũ Agripare:

27 —Opũ Agripa, Goãmũ ya weremuhtanirã erã wererare peea mũhũ. Erã wererire mũ peecũ masia yũhũ, arĩpũ Pablo Agripare.

28 —¿Ire yũre weregũ merogã mũ wereri Jesu yagũ yũ wacũ iidiaqu iiri mũhũ? arĩpũ Agripa Pablöre.

29 Īgũ eroparĩcũ Pablo yũhripũ.

—Merogã wereniguigũ o yoari boje wereniguigũ mũa árĩpehrerãre yũhũ árĩro dopa ta Jesu yarã árĩcũ gahmea. Irire serēbasaa Goãmũre. Eropigũ yũ iro dopa ta peresugue mũa árĩcũ tamerare gamebeaa yũhũ, arĩpũ Pablo.

30-31 Īgũ eropa arĩra pũhrũ Agripa, Festo, Berenice árĩpehrerã gajirã mera wahgãnũga wiria, erã basi wereniguiñorã:

—Ihĩ ĩgũ iira waja ne peresu iimasibeeaa mari. ¿Eropirã mari ñeheno dipuwaja ĩgũre wejēbocuri? arĩ wereniguiñorã erã erã basi.

32 —Ihĩ “Árĩpehrerã weca opũre yũ iirare werediaca,” ĩgũ arĩbircũ mari wiuboaya ĩgũre peresugue árĩgũre, arĩpũ Agripa Festore.

27

Pablo ĩgũre weresãrare Romague weregũ wapũ

1 Pablöre Italiague árĩpehrerã weca opũ pohrogue dohodiru mera obeorã, ĩgũ mera gajirã peresu árĩrã sãre obeoñorã. Eropirã Julio waĩcũgũre erãre ñhadibudorerã obeoñorã erã. Julio cien surara opũ árĩpũ. Īgũ ya curu Augusto yarã surara waĩcũñorã.

2 Yũ sã Pablöre wapicugãbũ. Eropirã Adramitio waïcuro majaru dohodiru mera ñajabũ gua. Iriru Asiague waburiduru árĩbũ. Ñajatuhaja, iriru mera wabũ. Aristarco Tesalónica waïcũri maca majagũ gua mera wami. Tesalónica Macedonia yeba árĩbũ.

3 Gajinũ gua Sidóngue ejabũ. Erogue ejagũ Julio Pablöre õaro iimi. Eropigũ Pablöre ĩgũ mera majarã pohrogue ĩagũ wadoremĩ. Eropigũ Pablo mera majarã ĩgũre ĩgũ gamerire erã ocũ “Õaroca,” arĩmi Julio.

4 Dohodirugue ñajarã daja gua taribujacũ burigã miruñe guare gajipugue weãtaribujubũ. Eropirã Chipre waïcũri nũguro cãhmotarogue diayerũ wabũ gua.

5 Pũ Ciliciare taria, Panfilia sãre taria, Mira waïcũri macague Licia yebague árĩri macague tuhajabũ gua.

6 Erogue ejarã, Alejandriague aridirure, Italiague wadirure dohodirure bocabũ. Eropigũ surara opũ guare irirugue wadoremĩ.

7 Bajanũri dabero waro waha, “Ñe yeboca,” arĩ, waha, Gnido waïcũri maca diaye ejabũ gua. Erogue eja taria, miruñe burigã weã, gua wadiadireore guare weãbeobiribũ. Eropirã gua copugue majipa wabũ. Eropirã Creta waïcũri nũguro iri nũguro cãhmotari masepũ gua taribuja waha, Salmón waïcũri ñorore tariabũ gua.

8 Erogue tari, iri nũguro pohro waha, “Ñe yeboca,” arĩ waha, “Õari peramaha” waïcũrogue tuhajabũ. Peramaha Lasea waïcũri maca pohrogue árĩbũ.

9 Erogue gua yoari boje árĩra pũhrũ, gua waboropũ guhyataribũ. Eropiro erã ba duhurinũ bosenu tarira pũhrũ, Pablo dohodiru majarãre weremi.

10 —Peeque mũa. Ba duhurinũ bosenu pũhrũ mari wacũ marire mirimaja guhyataria. Iru dohodiru, dohodiru maja, mũa doberi sã mari mera majarã sã mari dedereboca warã, arĩrimi Pablo.

11 ĩgũ eroparĩquerecũ surara opũ dohodiru opũpũre peegũ, autugũ sãre peegũ, Pablo ĩgũ wereripũre peediabirimi wadiagũ.

12 Erã payari peramaha puhiró árĩcũ õari payari peramaha árĩbiribũ. Ero eropa árĩri peramaha árĩcũ dohodiru majarã bajarã wadiarã, Fenicegue mũriadiarima puhiró waboro core. Fenice Creta waïcũri nũguro maja peramaha árĩro, miruñe ero aridirogue abe mũrĩroguepũ copugue diayerũgue sãre ĩhabeo miruñe aricũ õaro cãhmotari maca árĩbũ. Ero eropa árĩri peramaha árĩcũ masirã erã erogue yuju puhibũgũ árĩrisubu árĩdiarima.

Wuariryague miruñe, deco wwaro ariyoro

13 Eropii docapũ surgue daberogã miruñe arinugabũ. “Dohpagãre ðarinũ mari waburinũ ãhraa,” arĩ pepiriñorã erã. Miruñe ero aricũ erã comeyere tarawahgũ, Creta nũguro pohrogã mũriabũ gũa.

14 Eropii pũhrũñari miruñe gohroto noreste waĩcũri miruñe bũrigã weãbũ.

15 Eropiro dohodirure miruñe bũrigã weã erabũ. Miruñe ero weãbeoro wamasibiri, majipa, miruñe mera wabũ gũa.

16 Clauda waĩcũri nũgurogã pohrogue docapũgue waha, iri nũgurogã gũare merogã cãhmotabũ. “Marire yebo ãhraa,” arĩrã erore dohodiru majaru miridirugã gasĩrure ðaro tarapeo diribũ gũa.

17 Iirĩrure dohodirugue gũa tarasã diripehora pũhrũ wwarida mera erã waĩñea peoma. Libia yeba tũro pohro arĩri imipororire “Iriru gasiru dohodiru iri mehtuhajari,” arĩrã gũi arĩma erã. Eropirã erã miru ñeari suhrire erã aĩdijura pũhrũ dohodiru dihtare miruñe weãbeobũ.

18 Miruñe, deco mera bũrigã aribũ. Gajinũ sãre miruñe mũraro ta daja aricũ ãarã erã erã doberire diague duhrimeyura pũhrũ taribujabũ gũa.

19 Gajinũ dohodiru majare diague cóãma erã erã basi.

20 Bajanũri ñĩpirinũri arĩcũ, abe umũ majagũ necã sã ne deyobirima. Eropiro bũrigã miruñe aribũ. Eropirã “Miria wahaa mari. Eropirã sĩria warãca,” arĩ pepiribũ gũa.

21 Eropigũ Pablo yoari boje erã ba duhura pũhrũ ãgũ erã core nũgaja, weremi erãre.

—Mũare yũ werecũ peebirabũ mũa. “Cretague arĩrã mari wacũ gũhya arĩca,” yũhũ arĩcũ peebirabũ mũa. Yũre peerã, iru maja arĩpehrerire dedeobiriboaya mũa.

22 Eropigũ dohpague mũare werea. Guñaturaque. Eropirã gũibiricãque. Arĩpehrerã mari tarirãca. Iru dohodiru dihta marire wahribasaro.

23 Dohpagã ñamire Goãmũ anyu yũre dehyoami. Goãmũ yagũ ãhraa yũhũ. Eropigũ ãgũre umupeoa yũhũ. Anyurũ yũ pohro arĩgũ wereami.

24 “Pablo, gũibita. Arĩpehrerã weca opũre mũ iirare mũre werero gahmea. Goãmũ ðagũ ãhrimi. Eropigũ ãgũre mũ serẽro dopa ta dohpague mũa mera majarã sãre itamugũcumi,” arãmi yũre anyu. Eropirã gũibirãta mũa.

25 Anyu yũre ãgũ arĩdiro dopa ta eropa waroca. Goãmũre umupeoa yũhũ. Eropigũ ãgũ werediro dopa ta “Diaye ta ãhraa,” arĩ pepia yũhũ.

26 Marire nũgurogue miruñe weãbeo cóãroca, arĩ weremi Pablo erãre.

27 Yuju ñami pe semana pũhrũ wũariya Adria waĩcũriya miruñe guare bũrigã weãbũ. Irisubure ñami deco dohodiru majarã Ʃmapũ “Tũrogue ãhraa mari,” arĩ pepima erã.

28 Erã eropa arĩ pepirã yurada nũcũdiru comerure dihri, duhmiumediju queoñama. Treinta y seis metro gohra ũhcãbũ. Mero ta waha, queoma daja. Irisubure veintisiete metro gohra ũhcãbũ.

29 Eropirã Ʃtãre mehtuhajari arĩrã dohodiru auturogue wapicũriye comeyerire dirimiu dijuma erã diague dabero wacũ gamerã. Eropirã “Yojarõ boyoporo,” arĩrã, bũrigã serẽma erã.

30 Dohodiru majarã Ʃmapũ erã dihta duhririma. Erã miridirugãre dohodiru majarure diague taradijupo dohodiru ĩguiru come dipure erã dijudiro dopa ta iirima erã miridirugã marire ĩhari arĩrã.

31 Erã eropa duhridiaquerecũ Pablo erã eropa iicũ masigu surara opãre, ĩgũ surara mera weremi:

—Oã, Ʃma miridirugã mera erã wacũ mũa árĩpehrerã sĩrirãca, arĩmi Pablo.

32 ĩgũ eroparĩcũ peerã surarapũ miridirugãre diriridarire wirita, irirure cóãcãma.

33 Boyoboro coregã Pablo erãre badoremi.

—Pe semana gohra mũa ne babeaa.

34 Eropirã dohpaguere barã arique. Eropigũ mũare badorea. Mũa ojocaridiarã baque. Árĩpehrerã mũa tarirãca, arĩmi Pablo erãre.

35 ĩgũ eropa arĩra pũhrũ Pablo panre aĩ, árĩpehrerã erã pohro Goãmũre “Õhaa,” arĩ, duhpeo, irire bami ĩgũ.

36 ĩgũ eropa bacũ ĩha erã sĩporã turarã waha, árĩpehrerã erã sã bama.

37 Gũa árĩpehrerã doscientos setenta y seis masa dohodirugue árĩbũ gũa.

38 Eropirã erã árĩpehrerã yapia waha “Iru dohodiru nũcũ arĩca,” arĩ, baja trigo barire diague cóãma daja.

Dohodiru imiporogue mehbejayoro

39 Boyocũ dohodiru majarã Ʃma nũgũrore ĩarã, “Õpa waĩcũri nũgũro ãhraa i nũgũro,” arĩ ĩha masibirima. Eropirã erã dipatũgure imiporo árĩcũ ĩarã, “Mari iritũgugue warã, erogue mehmejaboca imiporogue,” arĩma erã.

40 Eropa arĩrã, come dipure diriridarire wirita medijucãma erã. Erã eropa iira pũhrũ dohodiru ĩguiru maja suhriro aĩ wahgũ nuguma diaye miruñe weãbecũ gamerã.

⁴¹ Eropiro dohodirupɔ ĩguirupɔ imiporogue sĭmaja mere-jamasibiribɔ. Eropiro auturore bɔrigã pãgũri pamehtucũ iriru auturo wahria wabɔ.

⁴² Eropa wacũ ĩarã õpa arĭma surara.

—Iru miricũ mari peresu iinirã turogue baatuhaja duhricãrãcoma. Eropirã erãre wejẽpehocãrã, arĭma surara.

⁴³ Eropigɔ surara opɔpɔ Pablora wejẽdiabigɔ árĩpehrerã peresu árĩrãre wejẽdorebirimi. Eropigɔ árĩpehrerã baamasirãre surara opɔ mata turogue baatujadoremĩ.

⁴⁴ Eropirã gajirã dohodiru maja wahrira mijiri mera yuuriñaja, iri mijiri weca peya baa majama. Gɔa eropa iirã gɔa árĩpehrerã turogue tuhajabɔ õaro.

28

Pablo Malta waĩcɔri nɔgɔro árĩpɔ

¹ Eropii iri nɔgɔrogue gɔa árĩpehrerã majajanɔgajara pɔhrɔ iri nɔgɔro waĩre masibɔ. Malta waĩcɔri nɔgɔro árĩbɔ.

² Iri nɔgɔro majarã masa õarã árĩrã, õaro iima gɔare. Eropirã deco gɔa weera pɔhrɔ yusatariabɔ gɔare. Eropirã ero majarãpɔ peame dihutuhaja, gɔare sõhmadorema.

³ Pablo peare aĩgãri aĩtĩami. ĩgɔ aĩtĩara pɔhrɔ iri pea pohecague árĩdigɔ aña coñorpore wirigɔ, Pablo mojoto curĩtuhajami yahawearo mariro.

⁴ ĩgɔ curĩtuhajacũ ĩarã, iri nɔgɔro majarã erã basi wereniguima:

—Ihĩ masa wejẽdigɔ árĩbocumi. Eropigo mari turago dipuwaja moago amaro majago ĩgɔre dipuwaja moago, ojocaridorebeamõ. ĩgɔ wɔariyague mirigɔ tarituhajadigɔ árĩrami. Dohpaguere igopɔ ĩgɔre ojocaridorebeamõ, arĭma erã basi.

⁵ Eropigɔ Pablo añare peamegue wejẽsiri mehpeomi. ĩgɔ aña pũribirimi.

⁶ “Bijiroca,” arĭrã, corerima erã. Ne bijibiribɔ ĩgɔre. “ĩgɔ sĭria wagɔcumi,” arĭrã erã ĩha corerima. ĩgɔre pũribirimi. Yoari boje ero bijibiricũ ĩarã, ĩgɔre pũribiricũ ĩarã, gajiropa pepirima erã. “Ihĩ goãmarã mera majagɔ árĩbocumi,” arĭma erã.

⁷ Erã baa tuhajadiro pohro Publio waĩcɔgɔ ya poeri árĩbɔ. ĩgɔ iri nɔgɔro majagɔ opɔ árĩmi. Eropirã ĩgɔ gɔare õaro iicũ uhrenɔ gohra ĩgɔ ya wihigue árĩbɔ gɔa.

⁸ Publio pagɔ yojorocɔ, nimacɔricɔgɔ árĩmi. Eropigɔ ĩgɔ camague oyami. Eropigɔ Pablo dorecɔgɔ ya taribugue ñaja,

Goãmure serẽ, ãgu mojotorire ãgu weca duhpeo, õagu wacũ iimi ãgure.

⁹ ãgu õagu wacũ ãarã árĩpehrerã gajirã iri nũguro majarã dorecurãre Pablo pohrogue aĩgãrĩma. Erã eropa aĩ eracũ ãagu Pablo erãre õarã wacũ iimi erã sãre.

¹⁰ Pũhrũ erã baja sãre waja mariro oma. Gũa waboro coregã árĩpehreri gũa gamerire, gũa warã gũa baburire dohodirugue durisãbasama erã.

Pablo Romague ejaru

¹¹ Ærerã abe iri nũgurogue gũa árĩra pũhrũ dohodiru mera wabũ gũa daja. Iriro dohodiru ãguiru perã goãmarã Cástro, Pólux waĩcurã erã wéanirã niguima. Alejandriague aridiru árĩbũ iriru. Puhirópẽ iri nũgurogue iriru dohodiru payabũ.

¹² Waha, Siracusa waĩcũri macague ejarã, ÷hrenũ gohra iri macare árĩbũ gũa.

¹³ Iri macare wiri waha, Regio waĩcũri macague ejabũ gũa. Gajinũ surgue miruñe ahri gũare weãbeobũ. Penũ pũhrũ Puteoli waĩcũri macague ejabũ.

¹⁴ Erogue Jesu yarã bajamerãgã gũare bocatĩrima.

—Yuju semana gohra gũa mera dujaque, arĩma erã gũare.

Erã eroparĩcũ peerã yuju semana gohra erã mera dujanibũ. Pũhrũ mague majaa, Romague ejabũ gũa pare.

¹⁵ Ero majarã Jesu yarãpũ gũa ejarare peerã, Apio waĩcũrogue doberi duarogue gũare bocatĩrima. Gajirã Jesu yarã “Æhre wihi” waĩcũrogue gũare bocatĩrima erã sã. Erã eropa bocatĩricũ ãagu Pablo mucubiriri mera Goãmure “Õhaa,” arĩ, õaro sĩñaja wami.

¹⁶ Romague gũa ejara pũhrũ erã peresu erã iinirãre ero majagũ peresu coreã opãre weremi. Eropirã Pablopũre yujugũ ta apima ero majarã oparã. Eropigũ ãgure yujugũ surara coremi.

Pablo Romague buherũ

¹⁷ Æhrenũ pũhrũ Pablo judio masa buherã mera gamenerebu, erãre sihumi. Erã gamenerera pũhrũ ãgu erãre weremi:

—Acawererã, mari acawererãre, mari ñecũ sumarã erã iimũrirare, marire erã buhera sãre tarinũgabirimũrabũ yũhũ. Yũ eropa tarinũgabiriquerecũ ta Jerusalén yũre ñehama Asia majarã judio masa. Erã eropa iira pũhrũ Roma majarãre yũre peresu iidorema erã.

¹⁸ Erã eropa iicũ Roma majarã yũre serẽpi, yũhũ ñero iibigũ yũ árĩcũ yũre “Dipuwajacũgũ ãhrimi,” arĩmasibirama. “¿Ñehe dipuwaja dipuwaja wejẽbocuri

mari ñgure?" arãma erã yure. Eropirã yure serẽpirãpu yure wiudiarama.

¹⁹ Judio masapu yure wiudorebirama. Eropigu yu acawererãre judio masare weresãdiabiriqueregu ta, "Árĩpehrerã weca opure yu iirare diaye werediaca yuhu," arĩ serẽabu. Judio masa yure erã wiudorebiricũ ñagu "Roma majagu opure weregu waro gahmea yure," arãbu.

²⁰ Eropii mũare ire werediagu sihuabu. Cristo marire taubu judio masa erã coredigu ñgu yare yu wereri waja yuhu peresugue ãhraa. Eropigu irire mũare werebu sihuabu, arĩmi Pablo judio masa oparãre.

²¹ Ñgu eroparĩcũ peerã erãpu ñgure werema.

—Judio masa mũare quere wereripũrire guare ne obeobirama. Eropirã erogue arinirã sã gua acawererã guare mũ eropa warare werebirimurama. Erã "Ñgu ñero iigu ãhrimi," arĩ mũare werebirimurama.

²² Mũa ya curure árĩpehrerogue masa erã ñero wereniguicũ gua masia. Eropa masirã mũ buherire mũ werecũ peediaa gua, arĩma erã ñgure.

²³ Eropa arĩtuhaja, "Gajinu árĩrã," arĩma erã. Gajinugue Pablo mera gameneremũhtanirã tauro masa bajarã ñgu árĩroguere erama. Ñamiñarigã Goãmu ñgu opu árĩrare ñari buherire ñgu buhenuga, pu ñamigue buhe duhúmi. Goãmu dorerire Moisegue ñgu apirare, Goãmu ya weremũhtanirã erã gojarare buhemi. Eropa buhegu, erãre Jesure masicũ iidiagu iirimi Pablo.

²⁴ Yujurãyeri ñgu buherire gamema. Eropirã gajirãpu peediabirima.

²⁵ Eropirã erã basi pe curu game dũca wari wama. Erã wiriaboro core Pablo Isaia ñgu wereniguirare weremi. Ōpa arĩmi erãre:

—Isaia Goãmu yare weremũhtadigu ñgu werera diaye ta ãhraa. Mari ñecũ sumarãre weregu árĩgu Espiritu Santo Isaiare ōpa arĩ were gojadoreñumi:

²⁶⁻²⁷ Ire oãre weregu waque: "Dipu burirã ãhraa mũa.

Eropirã yahare peediabeaa mũa. Gamiri toyobirã dopa ta peediabeaa mũa. Eropirã yahare peequererã peesome mũa. Mũa eropa árĩbirã ñaro peeboaya mũa. Eropirã ñaripure gohrotoboaya mũa. Eropigu mũare peame wabonirãre tauboaya yuhu," arĩmi Goãmu, arĩ gojañumi Isaia, arĩmi Pablo erãre.

²⁸ Ñgu eropa arĩra puhru Pablo werenemomi:

—Ire masique mũa. Goãmu buherire masare ñgu ñaro taurire judio masa árĩbirãre buherãca gua. Erãpu peerãcoma, arĩmi Pablo judio masare.

²⁹ Īḡu eroparĩcũ peerã judio masa irire erã basi b̄urigã game d̄uyaso wiriama.

³⁰ Pe bojori gohra Pablo ĩḡu eropa wajayeniguiri wihigue árĩp̄u. Ero árĩḡu, árĩpehrerã ĩḡu ya wihigue warãre mucubiriri mera bocatĩrim̄urip̄u ĩḡu.

³¹ Eropiḡu ĩḡu güiro mariro Goãm̄u ĩḡu op̄u árĩrare, mari Op̄u Jesucristo ya sãre buhem̄urip̄u. ĩḡu eropa buhequerecũ ta ne gajirã ĩḡure “Buhebircãque,” arĩbiriñorã.

Romanos

Pablo Roma majarãre Jesu yarãre gojabeoñumi

¹ Yũhũ Pablo mũare Roma majarãre gojabeoa. Yũhũ Jesucristo pohro majagu ãhraa. Eropigu õari buherire buhedoregu apimi ãgu yũre.

² Iri õari buherire iribojegue Goãmũ “Õpa masare õaro iigũra,” arĩ wereyuñumi ãgu yare weremũhtanirã merague. Erã irire gojañuma.

³ Iri buheri ta ãgu magũre wereri ãhraa. ãgu Jesucristo masa dehyoagu árĩgu Davi mũrũ pãrami árĩturiagu árĩdigũ árĩmi.

⁴ ãgu ta Goãmũ magũ ãgu árĩrire ãhmudigu árĩmi Goãmũ ãgu Espĩritu Santo mera. Eropigu ãgu Jesu sĩrira pũhrũ Goãmũ ãgu turari mera ãgũre masa mũriacũ iidigu árĩmi. Eropigu Jesucristo diaye ta Goãmũ magũ ãgu árĩrire ãhmudigu árĩmi masare. ãgu Goãmũ magũ ta mari Opũ Jesucristo ãhrimi.

⁵ ãgu ta gũare mojomoro ãagu gũaũ magũre wereri ãhraa. ãgu Jesucristo masa dehyoagu árĩre ãgu yare buhedoregu obeomi árĩpehrero majarãre ãgu yare pee masi, Jesucristore erã umupeocũ iimorãre.

⁶ Eropirã mũa sã Jesucristo yarã árĩmorã ãgu beyenirã ãhraa.

⁷ Mũare Goãmũ ãgu mahirãre, ãgu yarã árĩmorãre iidi árĩmi ãgu mũare. Eropigu mũare Romague árĩrãre ipũre gojabeoa. Eropigu Goãmũ mari Pagũ mari Opũ Jesucristo mera mũare õadoreã. ãgu itamuri mera õaro árĩque mũa.

Pablo Romaguere ãagu wadiarica, arĩ gojañumi

⁸ Ire weremũhtagũra mũare. Árĩpehrerogũre Jesucristore mũa umupeora querere werema. Erã eropa arĩ werecũ peerã “Õhaa,” arĩ serẽa yũhũ Goãmũre. Jesucristo ãgu itamuro mera eropa arĩ serẽbasaa.

⁹ Goãmũre serẽgu mũa ya árĩburire árĩpehrerinũri serẽbasaniguicãa. Mũa ya árĩburire eropa yũ serẽbasaniguicũ Goãmũ masimi. ãgu dorerire turaro mohmea ãgu magũ ya buherire buhegu.

¹⁰ Eropa serẽgu Goẽrã judio masa árĩbirã Jesure umupeoama. Erã umupeodiro dopa ta mũa mera majarã sã erã umupeoborore mũa pohrogue wadiarabũ yũhũ. Eropa bajasuburi wadiaqueregu ta wamasibirimũrabũ yũhũ.

11 Goãmũ yare mũare buhediacã Jesure mũa umupe-onemoburire. Eropigũ mũare buriã ĩadiaca yũhũ.

12 Jesucristore umupeorã aħraa mari. Eropigũ mũare ĩadiaca Jesucristore mari umupeori mera pepuri majarã mari game mucubiricũ iiborore.

13 Yũ acawererã, ire mũa masicũ gahmea. Gajipũgue õari buherire yũ buhera pũhrũ gajirã mũa acawererã judio masa arĩbirã Jesure umupeoama. Erã umupeodiro dopa ta mũa mera majarã sã erã umupeoborore mũa pohrogue wadiarabũ yũhũ. Eropa bajasuburi wadiaqueregũ ta wamasibirimurabũ yũhũ.

14 Arĩpehrerãre õari buherire buhero gahmea yũre. Wũari maca majarãre, noho gamero arĩrãre, masirãre, masibirã sãre buhebu arĩgũ iiaa yũhũ.

15 Eropa arĩgũ, arĩgũ mũa sãre Roma majarãre õari buherire buriã buhediaa.

Õari buherire masa peerã Jesure umupeonũgama, arĩ gojañumi Pablo

16 Õari buherire peerã masa Jesure umupeonũgama. Eropigũ arĩpehrerãre Jesure umupeorãre Goãmũ ĩgũ turari mera erã peamegue wabonirãre tuami. ĩgũre umupeorã õaro waborore masigũ iri buherire õari buherire buhegũ gũhyasiuro taribeaa. Iri buherire judio masapũre buhemũhtanirã arĩma. Pũhrũ judio masa arĩbirã sãre gũa buheabũ.

17 Iri buheri õpa werea: Jesucristore umupeiorãre "Ñeri marirã õarã aħrima," arĩ ĩhami Goãmũ. Jesucristore umupeorã dihtare eropa arĩ ĩhami Goãmũ. ĩgũ eropa arĩ ĩarire iribojegue erã arĩ gojadiro dopa ta arãa: "Õarã aħrima," arĩ ĩgũ ĩarã Goãmũre 'Diaye ta iigũ aħrimi,' arĩ umupeorã aħrima. Eropa umupeorã arĩpehrerinũri Goãmũ mera arĩrãcoma," arĩ gojañuma.

Masa erã ñero iiri mera dipuwajacũrã aħrima, arĩ were gojañumi Pablo

18-19 ĩgũ arĩricũrĩre masare õaro masicũ iipũ Goãmũ. Eropirã ĩgũre ĩgũ arĩrĩre masicũ diasabeaa masare. ĩgũ arĩrĩre masare masicũ iiquerecũ masapũ erã ñerire iirã Goãmũre masidiabeama. Erã iri ñeri iiri mera gajirãre Goãmũ yare peebiricũ iima erãpũ. Eropigũ Goãmũ umarogue arĩgũ masa arĩpehrerã erã ĩgũre tarinũgarire, eerã ñero iiri sãre ĩagũ eerã eropa iiri dipuwaja guami. Eropa ĩgũ guarire masicũ iimi erãre.

20 Goãmũ ɯmaro majagu ɨgu árĩrire turagu ɨgu árĩrire mari ɨabiriquerecũ ta, ɨgu basi ɨgu árĩrire masicũ iimi ɨgu marire. I yebare ɨgu iira pũhru árĩpehrerire ɨgu ɨhacũnugurare ɨarã, “Goãmũ ɨgu iira ta ãhraa. ɨgu turagu ta ãhrimi,” arĩ guñama masa. Eropirã “Goãmũ ãhrimi,” arĩ masima masa árĩpehrerã. Eropirã masa “Goãmũ ãhrimi,” arĩ masiquererã eropa ñerire iiniguicãrã, dipuwajacũma. “Mũre masibirabũ. Eropigu ñerire iiabũ,” masa arĩmasisome Goãmũre.

21 Goãmũ ɨgu árĩricurire masiquererã ta erã ɨgure umupebeama. “Mũhũ Goãmũ, turagu ta ãhraa,” arĩbeama. Eropirã ɨgu erãre õaro iiquerecũ ta “Õhaa,” arĩbeama ɨgure. Eropirã pee masibirã árĩrã, ñeri dihtare pepima erã.

22 “Pee masirã ãhraa,” arĩquererã ta pee masibirã wahama erã.

23 Eropa warã Goãmũre eropa árĩniguigure õagure umupebeama. Eropa umupeobirã “Goãmũ ãhrimi,” erã arĩrãpũre erã wéanirãpũre umupeonũgama erã. Eropirã masare, mirimagũ porãre, pĩruare, waimũrãre wéanugu umupeoma erã, “Mari Goãmũ ãhrimi,” arĩrã.

24 Erã eropiicũ ɨagu “Erã gamero dopa ta ii curaporo,” arĩgu Goãmũ erãre cohãmi. ɨgu eropa cóãra pũhru, erã ñeri dihtare ɯaribejarã erã basi ñeri dihtare iiniguicãma.

25 Eropirã Goãmũ yare peebiri, gũyaripũre õaro peema. Goãmũ yapũre gũyari iro dopa ta wacũ iima erã. “Diaye ta Goãmũre árĩpehrerãre iidigure umupeoro gahmea,” mari arĩquerecũ erãpũ ɨgure umupebeama. Eropa Goãmũ gohrare umupeobirã ɨgu iirãpũre umupeoma erã.

26 Erã eropiiniguicãcũ ɨagu “Erã gamero ñerire ii curaporo,” arĩgu Goãmũ cohãmi erãre. Eropirã erã mera majarã nome marapũcũrã nome iro dopa árĩbeama. Eropirã erã nome seyaro ñero iima erã basi.

27 Erã iro dopa ta árĩrã ɯma sã nomere gamebirã erã basi ta erã dũpũrĩre ɯaribejarã ãhrima. Eropirã erã basi ta erã ñero iira dipuwaja erã dũpũre ñero goroweoma.

28 Eropa Goãmũre masidiabirã ɨgure gamebirira dipuwaja Goãmũ “Erã gamero ii curaporo,” arĩgu erãre cohãmi. ɨgu eropa cóãcũ erãpũ ñerire guñanigui, ñerire ɯaribejarire iiniguicãma.

29 Eropirã erã bũrigã ñero iiniguima. Nome mera ñero iiniguirã, erã ñerire ɯaribejaniguirã, gajirã yare gametarirã, gajirãre ñero iiniguirã, gajirã gajĩnore opacũ ɨhaturirã, masare wejẽrã, game dũyatorã, gũyaricũrã, masare ɨhaturirã, ñeri quere iirã ãhrima erã.

30 Gajirã erã iibiriquerecũ ta ñero arĩ werewuarã, Goãmure ñaturirã, gajirãre papũro yũhrirã, “Gua tamera gajirãre tarinugarã ãarã ãhraa,” arĩ pepirã, gajirãre eropa arĩ weremaacãrã, gaji ñerire iinugarã, erã pagu sumarãre tarinugarã ãhrima.

31 Pee masibirã ãhrima. Erã werediro dopa ta iibirã, masare ne umupeobirã, erãre ñero iirare ne cãdijibirã, ne gajirãre mojomoro ñabirã ãhrima.

32 Eropa arĩrãre Goãmũ erãre dipuwaja moa peamegue cóãgũcumi ñgu erãre. Eropa ñgu cóãburire masiquererã erã ñerire iiniguicãma. Eropirã gajirã erãre ñhacũcũ, erã iiro dopa ta ñero iicũ ñarã “Gua iiro dopa ta iima,” arĩ mucubirima.

2

Masare erã ñero iira dipuwaja moadoregu ñerire diaye ta iigũcumi Goãmũ, arĩ were gojañumi Pablo

1 Erã eropa ñerire iicũ ñarã gajirã õpa arĩbocoma: “Erã ñetariarã ãhrima. Goãmũ erãre dipuwaja moaporo,” arĩbocoma. Eropa arĩrãre õpa arĩ werediaca. Mũa sã erã iiro dopa ta iiaa. Eropirã “Erã ñetariarã ãhrima,” gajirãre arĩ werewuabiricãro gahmea mũare. Eropa arĩ wererã mũa basi ta erã ñerire iiro dopa ta iirã dipuwajacurãca. Iri ñerire masiquererã iirã mũa ñero dipuwajacurãca.

2 “Goãmũ diaye ta dipuwaja moagu ãhrimi,” arĩ masia mari. Arĩpehrerãre ñerire iirãre dipuwaja moagũcumi.

3 Eropigu mũa ñero iira dipuwaja arĩcũ mũa sãre dipuwaja moagũcumi. “Gajirã dipuwajacurãcoma,” arĩ werewuarã, “Gũarũre dipuwaja moasome,” arĩ pepiboca mũa. Arĩbeaa. Mũa sãre mũa ñero iira pũhrũ dipuwaja moagũcumi.

4 Goãmũ mũare mojomoro ñagu mata dipuwaja moabeami. Eropirã “Goãmũ yũ mera guabeami,” arĩ pepiboca mũa ñerire iira pũhrũ. Arĩbeaa. Goãmũ mũare mojomoro ñagu mata mũa ñero iira pũhrũre dipuwaja moabeami. Mũa ñero iirire bujawerecũ ñadiagu, ñgure mũa yũhricũ gamegu mata dipuwaja moabeami.

5 Eropa mata dipuwaja moabiriqueregu. mũa Goãmure peebiriniguicãcũ, mũa ñero iirire bujawerebiricũ ñagu dipuwaja moagũcumi. Mũa eropa ñero iiniguirãre ñgu dipuwaja moarinũ arĩcũ bũrigã dipuwaja moagũcumi mũare Goãmũ. Irinũre Goãmũ masare dipuwaja moacũ arĩpehrerã ñarã “Diaye ta erã ya dipuwaja ãhraa,” arĩ masirãcoma.

⁶ Eropigu árīpehrerā n̄c̄u erā ñero iira dipuwajare dipuwaja moaḡucumi Goām̄u. Eropigu erā ðarire iirā s̄are ðarire erāre oḡucumi.

⁷ Yujurāyeri ðarire iima. Erā ðarā árīdiarā, Goām̄u ĩgu gamero dopa iidiarā ɯm̄uri n̄c̄u Goām̄u mera árīdiarā āhrima. Erā tamerare ɯm̄uri n̄c̄u ĩgu mera erā árīborore iiḡucumi Goām̄u.

⁸ Gajirāp̄u erā iro dopa árībeama. Erā erā gamero iirā árīcāma. Diaye majare gamebirā ñerire iiniguirā āhrima. Goām̄u erā mera turaro guaḡucumi.

⁹ Árīpehrerā ñerire iirā ñero tarirācoma. Judio masare eropa wam̄htaroca. Eropirā judio masa árībirā s̄are eropa ta waroca.

¹⁰ Árīpehrerā ðarire iirāp̄ure “Ōaro m̄ua iiaa,” arī ĩaḡucumi Goām̄u. Eropirā erāp̄u Goām̄u mera ðaro mera árīrācoma. Judio masare eropa ta wam̄htaroca. Eropiro judio masa árībirā s̄are eropa ta waroca.

¹¹ Goām̄u mari iirare ĩagu queoro beyemi árīpehrerāre. Judio masare, judio masa árībirāre Goām̄u yujuropa ĩhami marire.

¹² Gajirā Moise dorerire erā mooquerec̄u erā ñerire iic̄u erāre dipuwaja moaḡucumi Goām̄u. Iri doreri oparāp̄u ñerire erā iic̄u erā dorerire erā tarin̄ugari waja dipuwaja moaḡucumi Goām̄u erā s̄are.

¹³ Moise dorerire peequererā ta ȳhribirāre “Ōarā āhrima,” arībeami Goām̄u. ĩgu dorerire iirāp̄ure “Ōarā āhrima,” arī ĩhami Goām̄u.

¹⁴ Judio masa árībirā Moise dorerire mooquererā erā pepiro mera ðarire iirā Goām̄u dorerire iirā iima. Eropirā Moise dorerire gojarap̄ure mooquererā erā, erā pepirigue iri dorerire opama.

¹⁵ Eropirā Goām̄u dorerire erā pepirigue diaye opama. Eropa oparā ñerire ii mata erā ñero iirare masima erā basi. Eropigu ñerire iidigu, “¿Duhpiḡu ñerire iayuri ȳh̄u?” arī pepimi ĩgu. Eropigu ðari s̄are ĩgu iirare masimi ĩgu.

¹⁶ Eropigu Goām̄u Jesucristore ĩgu obeoc̄u masa erā iirare ĩaḡucumi. Masa erā iiric̄urire gajirāre werebirirare erā duhrare Jesucristo masipehoḡu ĩgu erā iiric̄urare ĩaḡucumi. Eropa ta ĩha beyeḡucumi, arī buhea ȳh̄u ĩgu ya ðari buherire buhegu.

Goām̄u Moisere ĩgu apira dorerire were gojañumi Pablo

¹⁷ M̄uap̄u judio masa árīrā, Goām̄u Moisere ĩgu apira dorerire umupeorā árīrā, “Goām̄u yarā āhraa ḡua,” arī pepiraa m̄ua.

18 Eropirã Goãmũ dorerire masirã árĩrã, ìgũ gamerire masia mũa. Eropa masirã árĩrã “Ōarire gũa iiborore beyemasia,” arĩ pepiraa mũa.

19 Eropa arĩ pepirã òpa arĩ pepinemoa mũa judio masa: “Gajirã ne masibirãre òaro masicũ iiaa gũa. Erãre gũa buhebiricũ ne Goãmũre masibiriboñuma. Eropirã ñerire ne duhubiriboñuma,” arĩ pepiraa mũa.

20 Eropirã “Pee masibirãre òarire buhea gũa judio masa. Majirãgã sãre buherã ãhraa gũa,” arĩ pepiraa mũa. Eropirã “Goãmũ dorerire oparã diaye árĩrere masipehoa gũa,” arĩ pepiraa mũa.

21 ¿Mũa eropa arĩ pepirã árĩquererã ta duhpirã mũapũ mũa buhediro dopa ta iibeari? ¿Gajirãre yajadobiriquererã duhpirã mũapũ yajari?

22 ¿Gajigũ marapo mera ñero iidobiriquererã duhpirã mũapũ gajigũ marapo mera ñero iiri? “Goãmũ ãhrimi,” erã arĩ wéanirãre umupeorire doorã árĩquererã ¿duhpirã Goãmũ gohrapũre òaro umupeobeari mũapũ?

23 “Goãmũ Moiserere ìgũ apira dorerire opaa gũapũ,” arĩrã árĩquererã ta ìgũ dorerire tarinũgaa mũa. Eropa tarinũgarã Goãmũre erã umupeobiricũ iirã iica mũa gajirãre.

24 Eropa ta werea Goãmũ yare erã gojarapũgue: “Judio masa árĩbirãpũre ñero Goãmũre wereniguicũ iiaa mũa judio masapũ,” arĩ gojañuma Goãmũ yare erã gojarapũgue.

25 Mũa judio masa Goãmũ dorerire iiniguirã árĩrã gasiro merogã wiri aĩsũnirã circuncisión iinirã árĩcũ òapũrica. Ìgũ dorerire iibiricũ mũa judio masa árĩricũri duhpiburi árĩbeaa.

26 Eropiro judio masa árĩbirã merogã gasirogãre wiri aĩsũbirinirã erã árĩquerecũ ta Goãmũ dorerire erã iirã árĩcũ ìagũ, “Yaharã masa ta ãhrima,” arĩ ãbocumi Goãmũ erãre. Judio masapũre ìgũ eropa arĩ ãadiro dopa ta judio masa árĩbirã sãre eropa ta arĩ ãbocumi.

27 Bajarã judio masa Goãmũ yare gojarapũre Moise dorerire opaquererã irire iibeama erã. Eropirã gajirã judio masa árĩbirãpũ Moise dorerire opabiriquererã gasiro merogã wiri aĩsũbirinirã árĩquerera Goãmũ dorero dopa ta iima. Eropa iirã árĩrã judio masare erã ñero iirire masicũ iirã iima.

28 “Gũa judio masa Goãmũ yarã ãhraa,” arĩ pepiraa mũa. Eropigũ Goãmũ yagũ gohra árĩgũre weregũra mũare. Ìgũ dupũpũre merogã gasirogãre wiri aĩsũdigũ árĩqueregũ ta Goãmũre umupeobigũ árĩgũ diaye ta Goãmũ yagũ árĩbeami. Judio masu gohra árĩbeami.

29 Espíritu Santore opagurpũ, ĩgure yũhrigũ ĩgu ta judio masũ gohra Goãmũ yagũ gohra āhrimi. Eropirã Goãmũ yarã gasiro merogã wiri aĩsũnirã dihta árĩbeama. Erã Espíritu Santo mera erã pepirigue õari mera gohrotorã āhrima Goãmũ yarã. Eropa árĩrãre “Õarã āhrima,” arĩ ĩhami Goãmũ. Masa erãre eropa arĩ ĩabiriquerecũ ta eropa arĩ ĩhami Goãmũpũ erãre.

3

1 Yũ eropa arĩquerecũ judio masa erã árĩricuri, gasiro merogã wiri aĩsũnirã erã árĩri õapũricãa.

2 Judio masa erã árĩri yuju diaye gohra árĩbeaa. Goãmũ ĩgu wereniguirĩ judio masare were apimũhtatuhañumi. Erã ĩgu yare erã gojarapũre opamũhtañuma. Eropirã judio masa erã árĩcũ õapũricãa erãre.

3 Eropirã bajarã judio masa Goãmũre erã peebiriquerecũ ta ĩgu werera diaye ta āhraa. Eropigũ ĩgu arĩ werediro dopa ta ĩgũcumĩ ĩgu.

4 Eropa ta āhraa. Árĩpehrerã masa erã gũyaricurã erã árĩquerecũ ta Goãmũpũ ne gũyabeami. ĩgu yare gojarapũgue eropa ta arĩ gojara āhraa: Diaye ta eropa ta arĩ wereniguigũ āhraa mũhũ Goãmũ. Eropirã masa mũre ne weresãmasibeama, arĩ gojañuma iribojegũere.

5 Masa erã pepiri mera õpa arĩ pepimaacãbocoma: “Mari ñeri iiri árĩcũ, Goãmũ ĩgu õari ĩripũ deserea. Eropiro mari ñeri iiri mera Goãmũ ĩgu õaro iiri deserecũ ĩgu marire mari ñeri iiri dipuwaja moagũ queoro iibeami,” arĩ pepimaacãbocoma.

6 Eropa árĩbeaa. Mari ñeri iirapũ õari árĩcũ Goãmũ mari ñeri iira waja dipuwaja moamasibiriboañumi.

7 Masapũ gũyaricurã āhrima. Goãmũpũ ne gũyari marigũ āhrimi. Gũyari marigũ ĩgu árĩcũ õaro masia mari. Eropirã masa yujurãyerĩ õpa arĩ pepirima: “Gũa gũyari mera Goãmũ ĩgu diaye árĩripũ deserea. Eropiro gũa gũyaripũ õha āhraa. ¿Eropiro gũa gũyari õacũ duhpigũ gũa gũyari waja dipuwaja moabocuri gũare Goãmũ?” arĩ pepimaacãma yujurãyerĩ erã basi.

8 Eropirã õpa arĩ gũyama yujurãyerĩ gũare: “Mari ñerire iiri mera Goãmũ ĩgu õagũ árĩripũ deserea. Eropirã ñerire iiro gahmea,” arĩma. “Pablo sã eropa ta arĩ buhemi,” arĩ gũya weresãma erã gũare. Erã eropa arĩ gũyari dipuwaja Goãmũ erãre dipuwaja moagũcumĩ. Eropa ta iiporo erãre.

Árĩpehrerã ñeri iira dipuwajacurã āhraa mari, arĩ gojañumi Pablo

⁹ ¿Eropirã dohpa pepiri mua? ¿Mari judio masa gajirã tauro òarã árĩcuri? Árĩbeaa mari. Judio masa, judio masa árĩbirã sã árĩpehrerã dipuwajacurã àhraa mari. Eropa ta àhraa yu árĩpehrerãre arĩ buhediro dopa ta.

¹⁰ Eropa ta arĩ gojara àhraa Goãmũ yare erã gojarapũgue sã. Òpa arĩ gojañuma:

Ne yujugu masu òagu marimi.

¹¹ Mari árĩpehrerã masa peediabirã dihta àhraa. Eropirã árĩpehrerã mari masa Goãmũre ne guñabeaa.

¹² Eropirã mari Goãmũ yare gamebirã árĩpehrerã ñerire iirã àhraa. Ne yujugu òarire iigu marimi.

¹³ Mari wereniguiri, ñeri dihta wiria mari disirore. Burigã guyaricua. Eropa wereniguirã aña gucurire igu pũriri wiuro dopa ta pũriro mera wereniguiwiua mari.

¹⁴ Eropirã mari gajirãre ñero wereniguirã, papũro wereniguirã àhraa.

¹⁵ Eropirã mata guarã masare mata wejẽa mari.

¹⁶ Eropirã noho mari waro, masare ñero ii, ñero taricũ iiaa mari gajirãre.

¹⁷ Eropirã gajirã masa mera òaro árĩbeaa mari.

¹⁸ Eropirã Goãmũre ne umupeobeaa, arĩ gojamũriñuma iribojeguere mari masare.

¹⁹⁻²⁰ Eropirã òpa masia mari: “Mari masa ñerã àhraa,” eropa arĩ gojarã judio masa sãre Moise doreri iirã sãre arĩ wereniguimũriñuma. Eropirã árĩpehrerã mari judio masa sã “Gua tamera ñeri dipuwaja mara guare,” arĩmasibeaa. Goãmũ doreripũre mari masa ne iibeaa. Eropirã iri dorerire iibirã Goãmũ mera òamasibeaa mari. Igu dipuwaja moamorã àhraa. Eropiro mari ñerã árĩriri igu doreripu masicũ iiaa marire. Iri dorerire masirã “Gua iiricuri ñeri àhraa,” arĩ masia.

Jesucristore òaro umupeocũ Goãmũ marire “Òarã àhrima,” arĩ ìhami, arĩ gojañumi Pablo

²¹ Dohpaguere Jesucristore umupeorãre “Dipuwaja moorã, òarã àhrima,” arĩ ìhami Goãmũ pare. Igu eropa arĩ ìaborore Goãmũ yare weremũhtanirã Moise sã weremũhtañuma. Eropigu masare erã ñero iira wajare igu taurare weremi marire Goãmũ. Moise dorerire mari iira mera mari ñerire taubeami. Òpa àhraa:

²² Árĩpehrerã Jesucristore umupeorãre, igu yare peerãre, “Òarã àhrima,” arĩ ìhami Goãmũ. Erã ñero iira dipuwajare taumi. Eropa iigu árĩpehrerãre yujuropa òaro iimi.

²³ Mari masa árĩpehrerã ñerire iirã àhraa. Eropirã Goãmũ igu gamero dopa ne iibeaa mari.

24 Mari eropa iiquerecũ Goãmũ árĩpehrerã masare ĩgu mojomoro ĩadigu árĩmi. Eropigu Jesucristo mari masa ñeri iirare wajayebasadi árĩmi. ĩgu eropa iira pũhrũ “Dipuwaja moorã ãhrima,” arĩ ĩhamĩ Goãmũ Jesure umupeorãre. Waja gamero mariro mari ñerire cohãmi.

25 Iribojegue majarã erã ñero iirare ĩagu Goãmũ mata dipuwaja moabiriñumi erãre. ĩgu eropa dipuwaja moabigu erã ñero iirare bu gohra pepicãgu iibiriñumi. Eropigu erã ñerire cãdijibu ĩgu Jesucristore obeodigu árĩmi árĩpehrerã masa erã ñeri dipuwajare sĩribasabure ĩgu di cóabure. Eropigu mari masa Jesucristore umupeocũ Goãmũ mari ñeri iirare cãdijigucumi. Eropã iigu “ĩgu diaye iigu ãhrimi,” marire arĩ masicũ iidi árĩmi.

26 ĩgu magure obeodigu árĩmi dohpague majarã sã erã ñeri iira dipuwajare wajayebasabure. Eropiidigu árĩmi “ĩgu õaro diaye iigu ãhrimi,” mari masa arĩ masiborore. Jesure umupeorãre “Õarã ãhrima,” ĩgu arĩ ĩaborore eropiidi árĩmi.

27 Eropirã dohpaguere mari ejatuharo “Õarã ãhraa mari,” ne arĩmasibea mari. “Moise dorerire iirã õarã ãhraa,” iri sãre arĩmasibea mari. Õpa arĩmasia mari: “ ‘Diaye ta yũ ñerire ĩgu cohãmi,’ mari Jesucristore arĩ umupeocũ, ‘Õarã ãhrima,’ arĩ ĩagucumi marire Goãmũpũ,” arĩmasia mari.

28 Õpa masia mari: Moise dorerire mari iiquerecũ, iri mera “Õarã ãhrima,” Goãmũ arĩ ĩabeami marire. Jesucristore mari umupeocũ ĩagu marire “Õarã ãhrima,” arĩ ĩhamĩ ĩgu.

29 Goãmũ judio masa opũ dihta árĩbeami. Judio masa árĩbirã opũ sã ãhrimi.

30 Eropã árĩgu Goãmũ yujugu ta árĩgu, árĩpehrerã wecague opũ ãhrimi. Eropã árĩgu judio masa Jesure erã umupeocũ, “Erã dipuwaja moorã ãhrima,” arĩ ĩagucumi. Eropigu judio masa árĩbirã sãre Jesure erã umupeocũ, erã sãre “Dipuwaja moorã ãhrima,” arĩ ĩagucumi Goãmũ.

31 ¿Eropirã Jesucristore umupeoturarã Goãmũ Moisere ĩgu dorerire cóarã iibocuri mari? Irire cóãbeaa mari. Jesure umupeorã tamera Goãmũ dorerire diaye ta iirã iiaa mari.

4

Abrahã Goãmũre ĩgu umupeorare were gojañumi Pablo

1 Mari ñecũ árĩmũhtadigu Abrahã Goãmũre “Diaye iigu ãhrimi,” arĩ umupeomãriñumi ĩgu sã. ĩgu eropa umupeori mera ðañumi Goãmũ mera.

2 Abrahã õaro ĩgu iiquerecũ “Õagu ãhrimi,” arĩ ĩanibirimuriñumi Goãmũ ĩgure. ĩgu Goãmure umupeocũ tamerare “Õagu ãhrimi,” arĩ ĩamuriñumi ĩgure. Eropigu ĩgu ejatuharo õarire iiqueregu ta ñegu árĩnigu “Yu tamera õagu ãhraa,” arĩmasibiriñumi Abrahã Goãmũ ĩgu ĩacũ.

3 Goãmũ yare gojarapũ õpa ãhraa: “Abrahã Goãmũ ĩgure arĩrare õaro ĩgu peecã, ĩgure ĩgu umupeocũ ĩha Goãmũ ĩgure ‘Õagu ñeri iira dipuwaja moogu ãhrimi ĩgu,’ arĩ ĩañumi ĩgure,” arĩ gojara ãhraa.

4 Õpa ãhraa: Mari masare yuju diaye wajayebeama. Mari õaro mohmera waja marire wajayema. Goãmupũ eropa iibeami.

5 Mari gamero õarire iiro mariro mari Jesucristore umupeocũ ĩha marire yuju diaye ĩgu õarire ocãmi. Eropigu marire “Õarã ãhrima,” arĩ ĩhami marire Jesucristore umupeorãre. Ñerire iinirãre erã ñeri iira dipuwaja maricũ ĩgu ãhrimi. Eropirã masa Jesucristore umupeocũ ĩagu “Dipuwaja moorã ãhrima,” arĩ ĩhami Goãmũ erãre.

6 Masa erã gamero mera õaro iirare Goãmũ ĩabeami. Erã ĩgure umupeocũ tamerare ĩhami. ĩgure umupeorãre “Õarã ãhrima,” arĩ ĩhami. ĩgu eropa arĩ ĩadigupũ ĩgu mucubirire õpa arĩ gojañumi Davi mupũ iribojegue majagu:

7 Erã ñerire ĩgu cãdijinirã tauro mucubirima.

8 “Õarã ãhrima. Erã ñero iirare guñasome yuhũ,” arĩmi Goãmũ erãre. Eropirã burigã mucubirima, arĩ gojañumi Davi.

9 Judio masare merogã gasirogãre wiri aĩsũnirã dihtare erã ñero iirare cãdijibeami Goãmũ. Judio masa árĩbirã sãre erã ñero iirare cãdijimi ĩgu. Dipaturi Abrahãre guñaque mua. ĩgu Goãmure umupeocũ ĩagu ĩgu ñero iirare cãdiji, “Õagu ãhrimi,” arĩñumi Goãmũ.

10 ¿Dohpãricũ eropa arĩyuri Goãmũ Abrahãre mua pepicũ? ĩgu merogã gasirogãre ĩgu wiri aĩboro coregue ta ĩgure “Õagu ãhrimi,” arĩ ĩañumi Goãmũ. Eropigu gasirogãre wiri aĩgu ĩgu ñerire cóãtuhadigugue wiri aĩñumi.

11 Eropigu gasiro merogã wiri aĩboro coregue Goãmure umupeonugatuhãñumi Abrahã. ĩgu eropa umupeocũ “Õagu ãhrimi,” arĩ ĩañumi Goãmũ ĩgure. Eropa ĩgu umupeorire, ĩgu yagu ĩgu árĩrere ĩhmudoregu Goãmũ ĩgu dupure merogã gasirore wiri aĩdoreñumi. Eropigu Abrahã ĩgu gasirogã wiri aĩboro core Goãmupũ “Õagu ãhrimi,” arĩ ĩatuhãñumi ĩgure. Eropigu Abrahã Goãmure “Diaye ta ĩgu ãhrimi,” ĩgu arĩ umupeodiro dopa ta árĩpehrerã Goãmure

eropa arī umupeorāre “Ōarā āhrima,” arī ihami Goām̄. Eropigū judio masa árībirāre gasirogā wiri aīsūya marirā sāre “Ōarā āhrima,” arī ihami Goām̄. Eropirā erā Abrahā pāramerā iro dopa ta dujama.

12 Erā iro dopa ta judio masa sā gasirogā wiri aīsūnirā sā, Goām̄re erā umupeorā árīrā Abrahā pāramerā diaye ta āhrima. Īgū gasirogā wiri aīboro coregue, Goām̄re umupeo ĩgū mera ōañumi. Eropirā ĩgū umupeodiro dopa Goām̄re umupeorā ōaro āhrima Goām̄ mera.

Goām̄ Abrahāre ĩgū werepira diaye ta árīcǎ masiñume Abrahā, arī gojañumi Pablo

13 Iribojegue ōpa arīñumi Goām̄ Abrahāre: “I yebare m̄re, m̄ pāramerā árīturiarā sāre oḡca,” arī werepiñumi Goām̄ Abrahāre. Moise dorerire Abrahā ōaro iira waja eropa arībiriñumi Goām̄ ĩgure. Abrahāpū Goām̄re “Diaye ta iigū āhrimi,” arī umupeora p̄hrū eropa arī werepiñumi. Īgū eropa arī umupeocǎ ĩagu Goām̄ ĩgure “Ōagū āhrimi,” arī ĩañumi.

14 Goām̄ oburire Moise dorerire iirā dihta aībeama. Erā dihta aīcǎ mari Goām̄re umupeori ñehe árīburi árībiriboya marip̄re. Eropiro Goām̄ ĩgure umupeorāre “M̄are oḡra,” ĩgū arī werepira duhpiburi árībiriboya.

15 Goām̄ Moiserē ĩgū apira dorerire iirā bocatiubeaa mari. ĩgū dorerire mari pee tarinūgara waja, dipuwaja moasūmorā āhraa mari. Iri doreri maricǎ tamera ĩgū dorerire tarinūgaro mariboya.

16 Eropirā Goām̄re umupeorā dihta ĩgū oburire aīrācoma. Abrahā Goām̄re “Diaye ta iigū āhrimi,” arī umupeom̄riñumi. Eropirā árīpehrerā Abrahā Goām̄re umupeodiro dopa ta umupeorā ĩgū pāramerā iro dopa dujama. Eropigū “Ire m̄re m̄ pāramerā sāre oḡca,” Goām̄ Abrahāre arīgū árīpehrerāre ĩgure umupeorāre arīgū iīñumi. Eropirā Moise dorerire iirā dihta Goām̄ ĩgū oburire aīsome. Árīpehrerā Abrahā iidiro dopa Goām̄re umupeorā erā ĩgū oburire waja mariro aīrācoma.

17 Irire Abrahāre ĩgū arīdiro dopa ta arī gojañuma iribojegure: “‘Baja yebari majarā ñecū árību apibū m̄re,’ arī, apipū Goām̄ Abrahāre,” arī gojañuma iribojegue ta. Eropigū ĩgū Goām̄re “Diaye ta iigū āhrimi,” arī umupeom̄riñumi. ĩgū eropa umupeocǎ Goām̄re umupeorā ñecū iīñumi Goām̄ ĩgure. Goām̄pū sīrinirāre masugū, árīpehrerire ĩhacūnugudigū āhrimi.

18 “Baja macari majarā m̄ pāramerā árīturiarā árīrācoma,” arīm̄riñumi Goām̄ Abrahāre. Goām̄ ĩgū

eroparĩcũ Abrahãpũ porã marigũ árĩqueregũ, “Diaye ta ãhraa,” arĩ pepimãriĩnumi.

19 Eropigũ cien bojori opagũ árĩqueregũ, ĩgũ marapo sã bũro ne porã marigo árĩquerecũ, “Porãcũsome gũa,” arĩ ne pepibiriĩnumi Abrahã. Eropigũ Goãmũ ĩgũre arĩ werepira “Diaye ta ãhraa,” arĩ pepiĩnumi Abrahã.

20 “Goãmũ ĩgũ arĩdiro dopa ta ne iisome,” arĩ ne pepibiriĩnumi Abrahã. Eropigũ ĩgũ Goãmũ ĩgũre werepirare ðaro peeĩnumi. ĩgũ eropa arĩrare peenijagũ, “Goãmũ turagũ ãhrimi,” arĩ umupeogũ iĩnumi. Eropigũ Goãmũre “Diaye ta iigũ ãhrimi,” arĩ umupeonemoĩnumi ĩgũ.

21 “Goãmũ ĩgũ arĩdiro dopa ta ðaro iigũcumi,” arĩ pepi ðaro masiĩnumi Abrahã.

22 ĩgũ eropa masicũ, Goãmũre ĩgũ umupeocũ ĩha Goãmũpũ “Dipuwaja moogũ ãhrimi,” arĩ ĩaĩnumi Abrahãre. Eropa ta arĩ gojaĩnuma Goãmũ yare erã gojarapũgue.

23 Abrahã Goãmũre ĩgũ umupeora pũhrũ Goãmũ ðaro ĩaĩnumi ĩgũre, arĩ gojaĩnuma. Eropa gojarã “Mũa sãre Goãmũre umupeorãre ðaro ĩagũcumi,” arĩ mari sãre gojajuĩnuma.

24 Irire mari masiburire gojaĩnuma. Eropigũ Goãmũre “Diaye ta iigũ ãhrimi,” mari arĩ umupeocũ “Dipuwaja moorã ãhrima,” arĩ ĩagũcumi Goãmũ mari sãre. ĩgũ tamera mari Opũ Jesu ĩgũ sĩricũ masudigũ ãhrimi.

25 Jesupũ mari ñeri iira dipuwaja sĩridigũ árĩmi. ĩgũ sĩrira pũhrũ masa mũriadigũ árĩmi ĩgũ Goãmũ marire “Dipuwaja moorã, ðarã ãhrima,” arĩ ĩgũ marire ĩaburire.

5

“Dipuwaja moorã ãhrima,” Goãmũ ĩgũ arĩ ĩacũ ðpa waroca marire, arĩ gojaĩnumi Pablo

1 Jesucristore mari umupeoturacũ ĩagũ “Dipuwaja moorã, ðarã ãhrima,” arĩ ĩhami Goãmũ marire. ĩgũ eropa arĩ ĩacũ Goãmũ mera mari ðaro árĩcũ iimi marire mari Opũ Jesucristo.

2 Eropirã mari ĩgũre umupeocũ ĩagũ Goãmũ marire mahigũ, marire aĩmi ĩgũ mera mari ðaro árĩboro dopa. Goãmũ tamera ðatariagũ ãhrimi. Eropigũ ĩgũ iro dopa ta ðarã árĩcũ iigũcumi ĩgũ marire. ĩgũ eropiiburire ðaro masia mari. Eropirã mucubiria.

3 Eropirã ñero tariquererã mucubiria mari. Ñero tarirã irire yujuro bojemasia mari. Eropa yujuro bojerã ñero tariquererã ðaro Goãmũre guñaturarã wahaa mari. Eropirã Goãmũ yare duhubeaa mari.

4 Mari eropa árĩcũ ĩagu, "Ōaro iiabu mũa," arĩgũcumi Goãmũ marire. Ĩgu marire eroparĩcũ, marire ĩgu tauborore ōaro masia mari. Eropirã ñero tarirã sã mucubirimasia mari.

5 Eropigu Goãmũ marire Espĩritu Santore obeomi mari mera árĩdoregũ. Eropigu Espĩritu Santopũ mari mera arĩgu Goãmũ marire eropa mahiniguicãrire masicũ iimi. Eropirã "Goãmũ ōaro taugũcumi marire," arĩ "Ĩgu mera arĩniguicãrãca," arĩ masia mari.

6 Eropigu ero core mari ñeri iirare mari basi mari cóãmasibiricũ ĩagu, ĩgu queodiro sihajacũ mari ñerã árĩra dipuwaja Cristo sĩripũ.

7 Mari masa gajigu ya árĩburire sĩribasadiabeaa. Ōagu arĩgũre yujugu sĩribasabocumi gajisubu arĩgu.

8 Maripũ ñerã mari árĩquerecũ Jesucristo sĩribasadi arĩmi mari ya árĩburire. Ĩgu eropiicũ Goãmũ turaro marire ĩgu mahirare masia mari.

9 Mari ya árĩburire ĩgu sĩricũ, ĩgu di cóãcũ, Goãmũpũ marire "Dipuwaja moorã áhřima," arĩ ĩhami. Ĩgu eropa arĩ ĩara pũhrũ dohpaguepũre marire peamegue wabonirãre taumi Jesucristo. Eropigu ĩgu yarã marire ĩgu iira pũhrũ marire dipuwaja moasome Goãmũ.

10 Eropirã Goãmũre gamebirã mari árĩquerecũ ta ĩgu magũ sĩrigũ mari ñeri iira dipuwaja wajayebasadigu arĩmi. Eropa wajayebasagu ĩgu Pagũre Goãmũre guabiricũ iimi ĩgu mari mera. Eropirã ĩgu yarã wahaa mari. Dohpague tamerare tauro ōaro iigũcumi marire. Ĩgu yarã mari árĩcũ, Jesu ĩgu masa mũriara mera marire peamegue wabonirãre ōaro taugũcumi ĩgu.

11 Pũhrũgue mari tariborore mucubiria mari. Goãmũpũre guña mucubiria. Mari Opũ Jesucristo mari ñeri dipuwaja ĩgu sĩrira pũhrũ Goãmũ yarã áhřaa mari. Eropirã mucubiria.

Adánre Cristo sãre wereñumi Pablo Roma majarãre

12 Jesucristo taunirã árĩrã ōpa masia mari: Adán ĩgu ñerire iinũgarasubugue i yebare ñeri arĩnũgayoro. Ñeri arĩnũgacũ masa sĩrinũgañuma. Mari arĩpehrerã ñerire iiaa. Eropirã arĩpehrerã mari ñerã árĩri waja sĩrirãca.

13 Goãmũ ĩgu dorerire Moiserere apiboro core diaye ta i yeba majarã ñerire iimũriñuma. Eropa ñerire iiquerecũ iri doreri maricũ ĩgu doreri tarinũgari waja dipuwaja moamasibiriñumi dohpa.

14 Ĩgu eropa dipuwaja moamasibiriquerecũ ta Adánpũ ĩgu pũhrũ árĩrã iri doreri mariquerecũ ta sĩrimũriñuma.

Moise ĩḡu árĭboro core iri doreri mariquerecũ ta masa sĭrimariñuma. Gajirã ñerire iirã Adán ĩḡu ñero iimuridiro dopa gohra iibirimariñuma. Eropiibiriquererã erã sã sĭrimariñuma. Eropigũ Adán ñerire iinũgadigũ árĭñumi i yebare. Yoara pũhrũgue i yeba arigũ Jesucristopũ õarire iinũgadigũ árĭmi.

15 Adán ĩḡu iira Jesucristo iira dopa árĭbeaa. Adán yujugũ ta ĩḡu ñeri iira dipuwaja bajarã masa sĭrinũgañuma. Goãmũpũ marire mahigũ Jesucristore obeodigũ árĭmi. Eropigũ Jesucristopũ ĩḡu yujugũ ta mari ya árĭburire sĭribasagũ mari bajarã ĩḡu yarã Goãmũ mera umuri nũcu árĭniguiborore iidi árĭmi.

16 Eropigũ Goãmũ masare ĩḡu mojomoro ĩadiro Adán ĩḡu Goãmũre tarinũgadiro dopa árĭbeaa. Adánpũ ĩḡu yujugũ ta ñerire ĩḡu iira dipuwaja árĭpehrerã masa dipuwaja opama. Erã eropa dipuwaja opaquerecũ, masa wũaro erã ñerire iiquerecũ dohpaguere masare mojomoro ĩagũ Goãmũ erã ñerire cohãmi. Eropa cóãḡũ “Dipuwaja moorã, õarã åhrima,” arĭ ĩhami ĩḡu Jesucristo sĭrira mera.

17 Adán yujugũ ta ĩḡu dipuwaja mera ta árĭpehrerã masa sĭrimorã dihta wañuma. Goãmũ ĩḡu iirañepũ õataria. Dohpaguere masare mojomoro ĩagũ Jesucristo ĩḡu yujugũ sĭrira mera iri ñeri dipuwaja cóãḡũ marire “Õarã åhrima,” arĭ ĩhami. Eropirã árĭpehrerã ĩḡu eropa arĭ ĩanirã ĩḡu mera õaro árĭniguicãrãcoma.

18 Yujugũ Adán ĩḡu ñerire iinũgacũ árĭpehrerã ñerire iinũgañuma. Erã eropiicũ ĩagũ Goãmũ erãre “Dipuwajacurã åhrima,” arĭ ĩañumi. Gajigũ Jesupũ ĩḡu õarire ĩḡu iicũ masa erã ñeri iira dipuwaja sĭribasacũ, árĭpehrerã mari ñeri dipuwaja cóãdigũ árĭmi Goãmũ. Mari ñerire ĩḡu cóãnirã árĭcũ “Õarã åhrima,” arĭ ĩagũcumi Goãmũ marire. Eropirã árĭpehrerinũri ĩḡu mera árĭniguicãrãca mari.

19 Yujugũ Adán Goãmũre tarinũga nũgañumi. ĩḡu eropiicũ bajarã masa ñerire iiricurã wañuma. Jesucristopũ Goãmũ ĩḡu dorediro dopa iipũ. ĩḡu eropiicũ bajarã masa ĩḡu ñerire cóãnirã warãcoma. Erã eropa wacũ “Õarã åhrima,” arĭ ĩagũcumi Goãmũ erãre.

20 Goãmũ ĩḡu dorerire Moisere apiñumi árĭpehrerã masa erã ñero iirare erã masiburire. Mari masa burigã ñerire mari iiquerecũ Goãmũpũ marire burigã mahimi. Eropa mahigũ Jesucristo sĭrira mera mari ñerire cóãdigũ árĭmi.

21 Ero core mari árĭpehrerã mari ñeri iira dipuwaja sĭrimorã árĭmũriribũ. Goãmũ marire turaro mahigũ mari Opũ Jesucristore ĩḡu obeocũ ĩḡu marire ñeri dipuwaja marirã wacũ iimi dohpaguere. Eropirã erã

“Dipuwaja moorã áhrima,” Goãmũ ĩgũ marire arĩ ĩacũ mari árípehrerinũri ĩgũ mera eropa árĩnguicãrãca.

6

Cristo yarã ñerire iiniguibeamã, arĩ gojañumi Pablo

¹ ¿Goãmũ eropa marire mahicũ ĩarã dohpa iirãcuri mari mũa pepicũ? ¿Goãmũre marire mahicũ iinemodiarã ñerire iinemorãcuri mari?

² Áríbeaa. Ñerire iibiricãrã mari. Jesucristo marire sĩribasadi árĩmi mari ñerire cóãgũ. Eropirã Cristo yarã árĩrã marire ñerire iibiricãro gahmea.

³ Eropa ta Jesucristo yarã mari árĩrire masa erã ĩha masiborore deco mera waĩyesũbũ. Jesu mari ñeri iira dipuwaja sĩridigũ árĩmi. Eropirã ĩgũ yarã árĩrã, waĩyesũnirã árĩrã mari ñeri iirare duhucãbũ.

⁴ Mari waĩyeri õpa ĩhmua: Jesucristo sĩrira mera mari ñerã árĩdiro pehrea. Eropa wacũ mari Pagũ ĩgũ turari mera Jesucristo sĩridire masudiro dopa iri turari mera marire õaripũre gohrotomi. Eropirã õarire iirã wahaa.

⁵ Eropirã Cristo yarã árĩrã Cristo sĩrira mera mari ñerã árĩdiro pehrea. Eropirã mari ñeri iirare duhua mari. Eropirã Cristo yarã árĩrã ĩgũ masa mũriara mera õaripũre gohrotorã áhraa mari. Iri diaye ta áhraa.

⁶ Jesucristo crusague sĩrigũ mari ñerã árĩrãre pehrecũ iidĩ árĩmi. Mari ñeri uaribejarire duhumasicũ iidĩ árĩmi dipaturi mari ñerire iibiriboro dopa.

⁷ Mari ñeri uaribejarare cóãnirã árĩrã ñerire iiniguirã árĩsome pare mari. Irire mari masia.

⁸ Eropirã mari gohrotonirã árĩrã mari Jesucristo mera õarire iinũgarã árĩrãca. “Iri diaye ta áhraa,” arĩ pepia mari.

⁹ Ire mari masia: Cristo ĩgũ sĩri, masa mũriara pũhru dipaturi sĩrisome. ĩgũ sĩribodirore tarituhadigũ árĩmi.

¹⁰ Eropigũ Cristo yujusubu sĩrigũ, masa ñerire cóãgũ sĩrimi. ĩgũ masa mũriadigũ dohpaguere Goãmũ gamerire iigũ áhrimi.

¹¹ “ĩgũ iidiro dopa ta yũ sã áhraa,” arĩ pepique mũa: “Jesucristo mari ñerire cóãdiro dopa ta mari sã mari ñerire cohãa. Ñerire iibirã Jesu yarã árĩrã Goãmũ gamerire iimorã árĩrã tiiaa mari,” arĩ pepique mũa sã.

¹² Eropirã ñeri iiniguirã árĩbiricãque. Eropirã ñerire uaribejabiricãque.

¹³ Ñerire iirã árĩbiricãque. Mũa peamegue wabonirãre Jesucristo ĩgũ taunirã áhraa. ĩgũ eropa iinirã árĩrã õpa arĩque Goãmũre: “Mũhũ, yũ Opũ áhraa. Eropigũ yũhũ mũ

gameri dopa iigu, mu dorerire iiniguicãgũca umuri nũcu pare,” arĩque Goãmũre. Eropirã ðarire iirã Goãmũ iigu gameri dihtare iirã árĩque mũa.

14 Dohpagueere Goãmũ mera ðaro árĩborore Moise doreri mũare dorebeaa. Jesucristo mũa ya árĩburire sĩribasara mera Goãmũ mera ðarã áhrraa. Eropiro mũa ñeripũ mũare dorebeaa pare. Eropirã ñerire iiniguisme pare mũa.

Mũa ñerire iiniguicũ iri ñeri mũa opũ iro dopa áhrraa, arĩ gojañumi Pablo

15 ¿Yũ eroparĩcũ dohpa arĩ pepiri mũa? ¿Jesucristo yarã árĩrã, Moise dorerire umupeobirimorã árĩrã, ñerire iiniguibocuri mari? Ñerire iiniguibiricãrã.

16 Mũare doregũ mũa opũ áhrimi. Eropirã iigu pohro majarã áhrraa mũa. Eropa ta ñerire iiniguirã mũa árĩcũ iri ñeri mũa opũ iro dopa áhrraa. Eropirã ñerire duhumasiya mara mũare. Eropirã peamegue wamorã áhrraa mũa eropa iirã. Goãmũre ðaro yũhrirã árĩrã tamera iigu pohro majarã áhrraa. Eropirã iigu yarã ðarire iirã áhrraa mũa. Irire masia.

17 Iribojegue ñerire iiniguirã mũa árĩcũ, iri ñeri mũare doremuriyoro. Dohpaguepũre ðari buherire peerã, Jesure umupeorã, Goãmũ dorerire ðaro iirã wahabũ mũa. Eropa árĩrã Goãmũre “Óhaa,” arĩro gahmea.

18 Eropa warã dohpagueere ñerire doresũrã árĩbeaa mũa. Eropirã Goãmũ doresũrã árĩrã ðarire iiaa.

19 Irire mũare ðpa arĩ gojaa mũa ðaro peeboro dopa. Iribojegue ñerire iipehorã, ñerire iiniguicãrã mũa árĩdiro dopa ta dohpaguepũre ðarire iiniguicãrã árĩque mũa. Eropirã Goãmũ gameri dihtare iirãca mũa.

20 Iribojeguere ñeri dihtare iirã árĩrã, ðaripũre iibirimuriyoro mũa.

21 Irisubure ñerire iira waja ðarire bocabiriyoro mũa. Iri mũa ñeri iirare guñarã dohpagueere gũhyasĩrica mũa. Iri ñerire mũa iira dipuwaja peamegue wabonirã árĩribũ.

22 Dohpaguepũre Jesucristo mũare ñeri doresũnirãre wiucãmi pare. Eropirã Goãmũ dorerire iirã wahabũ mũa. Eropirã Goãmũ gameri dihtare iirã árĩrãca. Eropirã árĩpehrerĩnuri Goãmũ mera árĩrãca.

23 Ñerire mari iira dipuwaja peamegue wabonirã áhrraa mari masa árĩpehrerã. Mari eropa árĩquerecũ Goãmũpũ mari Opũ Jesucristore mari umupeocũ iagũ, árĩpehrerĩnuri iigu mera árĩcũ iigũcumi. Waja mariro marire eropa iigũcumi.

7

Moise dorerire were gojanemoñumi Pablo

¹ Yũ acawererã, Goãmũ Moiserẽ ãgũ dorerare õaro masia mũa. Masũre iri doreri ãgũ ojocaribusu dorea. ãgũ sũrira pũhrũ ãgũre dorebeaa iri. Iri sãre masia mũa.

² Õpa ãhraa: Nomeore igo marapũ mera dihta árdõrea Moise ãgũ doreripũ. Iri eropa dorequerecũ ta igo marapũ sũrira pũhrũ igopũ gajigũ mera marapũcũmasimo. Eropa ta arĩ werea iri doreri.

³ Eropigo igo marapũ árdõquerecũ ta gajigũre marapũcũgo, ñero iigo iimo igoa. Igo marapũ ãgũ sũrira pũhrũgue ta gajigũre marapũcũgo, Moise dorerire tarinũgabeamo igo. Eropigo ñero iigo iibeamo igo.

⁴ Eropa ta mũa sã yũ acawererã, Jesucristo sũrira mera Jesu yarã warã, iri doreri iiri mera Goãmũ yarã wabeaa mũa. Eropirã sũrinirã mũrare iri doreri mera dorebiro dopa ta mũa sãre iri doreri dorebeaa. Mũa Cristo ya curu majarã ãhraa. Eropirã dohpaguere ãgũ yarã ãhraa mũa. ãgũpũ ãgũ sũrira pũhrũ masa mũriadigũ árdĩmi Goãmũ gamerire mari iiboro dopa.

⁵ Jesucristo yarã árdĩbirasubuguere ñerire mari ãaribejarire iimũribũ. Eropirã Moise dorerire mari masira pũhrũ iri dorerire tarinũgadiaribũ. Eropa tarinũgã ñerire iirã, mari peamegue wamorã ta árdĩmũribũ.

⁶ Dohpaguere Cristo yarã árdĩrã iri doreri docague árdĩbeaa pare mari. Goãmũ ãgũ mera õaro mari árdĩborore iri dorerire iidorebeami pare. Espĩritu Santo mari mera árdĩgũ marire õarire gohrotocũ iimi. Eropirã Goãmũ gamerire iirã mari iribojegue maja doreri gojara mera árdĩmasibeaa pare.

Mari ñeri iidiarire were gojañumi Pablo

⁷ ¿Eropirã Goãmũ Moiserẽ ãgũ dorerare dohpa arĩ pepibocuri mari? ¿Iri doreri ñeri árdĩcuri mũa pepicũ? Árdĩbirica. Iri ãgũ doreri ta ñerire yũre masicũ iibũ. Eropirã ãgũ doreri maricũ ñerire mari iirare masibiriboya mari. ãgũ doreri õpa arãa: “Gajirã yaguere turaro ãaribejabiricãque,” arãa Moise doreri. Iri eroparĩbircũ, gajirã yare ãaribejariñe iri ñeri árdĩcũ masibiriboya mari.

⁸ Eropigũ iri dorerire yũ masira pũhrũ gajirã yare bũrigã ãaribejamũribũ. Iri dorerire masibirinigũ gajirã yare bũrigã yũ ãaribejara iri ñeri árdĩcũ masibiriboya yũhũ.

⁹ ãgũ dorerire yũ masiboro core eropa pepicãnibũ dohpa. Dipuwajacũborore guñabiriribũ. Eropigũ ãgũ dorerire yũ masira pũhrũ yũ ãaribejari ñeri árdĩcũ masibũ yũhũ. Eropigũ yũ dipuwajacũborore masibũ.

10 Iri doreri mera mari Goãmũ mera õaro árĩbonirã árĩquerecũ mari iri doreri mera dipuwajacurã dederebonirã árĩribũ.

11 Īgũ Goãmũ Moiserere dorerare masira pũhrũ tarinũgadiaribũ. Ñerire Ʃaribejagu árĩcũ iri ñeri yũre goroweobũ. Ñerire iirã iri dorerire tarinũgara waja dipuwajacũmorã árĩribũ mari. Eropirã iri doreri tarinũgari mera peamegue dederebonirã árĩribũ.

12 Eropiro Moise doreri Goãmũ ya õari ãhraa. Eropiro queoro árĩro iiaa.

13 ¿Eropa árĩquerero iri õari doreripũ peamegue marire wacũ iiri mũa pepicũ? Wadorebeaa. Mari ñeri iiri dipuwaja marire peamegue ñero wacũ iiaa. Īgũ dorerire mari masira pũhrũ iri dorerire tarinũgarã, “Ñerire iiaa mari,” arĩ masia. Eropirã mari ñerã árĩrĩre masirã mari peamegue waboro sãre masia mari. Eropirã ĩgũ dorerire masirã, mari tarinũgara iri ñeri árĩcũ masia mari.

14 Moise doreri Goãmũ ĩgũ apira iri árĩcũ masia mari. Irire masiquererã maripũ ñeri Ʃaribeja iirã i õaripũre iibeaa. Eropirã ñerire iiniguirã ãhraa.

15 Mari õarire iidiaquererã iibeaa mari. Eropirã mari ñerire iidiabiriquererã ta iiniguicãa. Eropirã mari iirire pee masibeaa mari.

16 Eropirã ñerire iidiabiriquererã ñerire iiaa mari. Iri ñerire iidiabirã Moise ĩgũ dorerire “Õari doreri ãhraa,” arĩdiarã iiaa.

17 Eropirã “Yũ basi ñerire dipaturi iisome pare,” arĩquererã ta ñerire iiniguia. Mari pepirigue árĩripũ ñerire marire iicũ iiaa.

18 Õarire turaro iidiaquererã ta, ne bocatĩubirica. Eropirã õpa masia. Ñeripũ marire goroweomũraa. Mari pepirigue ñeri dihta ãhraa. Ne õari mara.

19 Õari mari iidiaripũre ne iibeaa. Ñerire mari iidiabiripũre iiaa.

20 Eropirã “Yũ basi ñerire dipaturi iisome pare,” arĩquererã ta ñerire iiaa daja. Mari pepirigue árĩripũ marire ñerire iicũ iiaa.

21 Eropiro õpa wahaa marire. Õarire mari iidiaquererã ta mari Ʃaribejari mari pepiri ñeri ãhraa. Eropirã õaripũre iibeaa mari.

22 Goãmũ dorerire mari turaro yũhridiarica.

23 Eropirã mari ire masia: Goãmũ dorerire gamequererã mari ñeri pepiri mari Ʃaribejari ãhraa marire. Mari ñeri pepiri tarinũgaa mari õari iidiaripũre. Eropirã mari ñerire duhumasibeaa.

²⁴ Eropa ñerire duhumasibirã ñero dujaa mari. ¿Mari ñeri ñaribejarire duhuboro dopa, mari ñeri pepiri marire dorebiriboro dopa noa marire taugucuri?

²⁵ Jesucristore mari guñaturacũ ĩgũpũ mari ñerire iibiriboro dopa taugucumi. ĩgũ mari Opũ mari ñeri ñaribejarire tautuhajadi árĩmi. ĩgũ eropiicũ Goãmũre “Ōhaa,” arãa mari. Eropirã dohpaguere mari Goãmũ dorerire yũhridiarã ãhraa. Eropa yũhridiaquererã ta mari pepirigue ñero pepiri ãhraa dohpa. Mari eropa árĩrãre Jesucristo marire taumi.

8

Espíritu Santore oparã erã árĩricũre were gojañumi Pablo

¹ Dohpaguere Jesucristo yarãre erã dipuwajacũboro mara. Erã ñerire erã ñaribejarire iiniguibeama. Eropirã Espĩritu Santo ĩgũ dorero dopa ta iiniguicãma erã.

² Eropigũ Jesucristo yarã mari árĩcũ Espĩritu Santo ñero iirire duhucũ iimi marire. Eropigũ Espĩritu Santo árĩpehrerinũri Goãmũ mera árĩcũ iimi marire. Ñerire marire duhucũ iigũ, marire peamegue wabonirãre taumi.

³ Moise dorerire mari gamero iirã ne bocatĩusome. Eropirã iri doreri mera mari Goãmũ mera õaro árĩmasibiribũ. Mari eropa árĩrã árĩquerecũ ta õpa Goãmũ marire õarã árĩcũ iidigũ árĩmi. Irire mari ñeri dipuwajare wajayebasabure ĩgũ magũre obeodigũ árĩmi. ĩgũ magũ mari iro dopa ta dupucudigũ árĩmi. Eropigũ wajayebasagu mari pepirigue ñeri árĩrĩre cóãdigũ árĩmi.

⁴ Marire eropa ta iidigũ árĩmi Goãmũ ĩgũ dorerire õarire ĩgũ turari mera mari iiboro dopa. ĩgũ dorerire iirã árĩrã mari ñaribejarire iibea mari. Eropirã Espĩritu Santo ĩgũ itamuri mera ĩgũ dorero dopa ta iiaa mari.

⁵ Erã gamero ñerire iidiarã, ñeri dihtare ñaribejama. Espĩritu Santo ĩgũ dorero dopa ta iiniguirãpũ õari dihtare iidiana erã.

⁶ Erã gamero ñeri dihtare iidiarã, iri dihtare ñaribejarã peamegue warãcoma. Espĩritu Santo ĩgũ gamerire turaro iidiarãpũ árĩpehrerinũri Goãmũ mera árĩrãcoma. Eropirã erã õaro árĩcãrãcoma.

⁷ Erã gamero iirã Goãmũre gamesũribirã ãhrima. Erã Goãmũ dorerire ne yũhribeama. ĩgũ dorerire ne yũhrimasosome erã.

⁸ Eropirã erã gamero iirã Goãmũre ĩhasuacũ iimasi-beama.

⁹ M̄uap̄u m̄ua gamero iibea. Espiritu Santo m̄ua mera árĩcũ ĩgu gamerire iia. Eropirã Espiritu Santore moorãp̄u Cristo yarã árĩbeama.

¹⁰ I ɯm̄ure masa ñerire iira dipuwaja mari árĩpehrerã s̄ĩrimorã dihta àhraa. M̄ua s̄ĩrimorã árĩquererã ta Cristo yarã m̄ua árĩrã ĩgu mera eropa árĩniguirãca m̄ua. Goãm̄u m̄uare “Ōarã àhrima,” ĩgu arĩ ĩacũ ĩgu mera eropa árĩniguirãca m̄ua.

¹¹ Goãm̄u Jesure masudigu árĩmi. Eropa masudigu árĩgu, Espiritu Santo m̄ua mera ĩgu árĩniguicũ m̄ua s̄ĩrira p̄uhr̄u Goãm̄u m̄ua s̄ãre masuḡucumi. Eropa masuḡu òaro árĩcũ iiḡucumi m̄uare. Jesure ĩgu masudiro dopa ta eropa masuḡucumi m̄uare.

¹² Ȳ acawererã, “Īgu eropa ta iiḡucumi,” arĩrã mari gamero iibiricãrã.

¹³ Mari gamero ñerire iirã, peamegue wamorã árĩcãrã tiiaa mari. Espiritu Santo ĩgu itamuri mera mari ñeri iiric̄urire duhurã, árĩpehrerin̄ari Goãm̄u mera árĩrãca.

¹⁴ Árĩpehrerã Espiritu Santore ȳhrirã Goãm̄u porã ta àhrima.

¹⁵ Espiritu Santo mari mera ĩgu árĩnugacũ Goãm̄u porã árĩnugab̄u mari. Eropigu ĩgu porã árĩcũ marire dipuwaja moasome. Peamegue wadoresome. Eropirã güibea mari iribojeguere mari güidiro dopa. Īgu porã árĩrã, Espiritu Santo ĩgu itamuri mera dohpaguere “Ah̄u,” arãa mari Goãm̄ure mari Paḡure

¹⁶ Eropigu Espiritu Santo mari pepirigue òpa masicũ iimi: “Diaye ta Goãm̄u porã àhraa mari,” marire arĩ masicũ iimi ĩgu.

¹⁷ Eropirã ĩgu porã árĩrã, Goãm̄u árĩpehrerire ĩgu porãre “Oḡura,” ĩgu arĩrare marip̄u oparãca. Jesucristo mera irire oparãca mari. Cristo yare mari iira waja gajirã mera ñero tarinirã árĩrã, mari ĩgu mera ɯmarogue òaro árĩcãrãca. Eropirã Goãm̄u ĩgu porãre “Oḡura,” ĩgu arĩrare oparãca mari.

¹⁸ Dohpaguere i yebare ñero taria mari. P̄uhr̄uguere ɯmaroguere òaro árĩcãrãca. Eropirã dohpaguere ñero tarirã w̄ar̄o b̄ujawere pepibiricãque. Mari ñero tarirap̄u pehrea waroca. P̄uhr̄u òaro árĩcãrãca Goãm̄u pohrogue. Eropirã mucubirãca mari. Iri mucubiririp̄u ne pehresome marire.

¹⁹ Eropirã Goãm̄u porã Goãm̄u pohroguere òaro árĩrãcoma. Mari eropa wacũ, árĩpehreri Goãm̄u ĩgu ĩhac̄unugura sã mama dihta gohroto pehrea waroca.

20 Dohpaguere ĩgu ĩhacũnugura árĩpehreri ñero taria. Iri gamero eropa wabiriyoro. Adán ñeri iinũgara pũhrũ Goãmũ ĩgu ĩhacũnugurare ñero wacũ iĩñumi. Eropigu Goãmũ ĩgu ĩhacũnugurare eropa ta ñero árĩdoreniĩñumi dohpa. Pũhrũ ĩgu ĩhacũnugurare õaripũre gohrotogũcumi daja ĩgu.

21 Eropigu Goãmũ ĩgu ĩhacũnugura boapehreaborare õaripũre gohrotogũcumi. Goãmũ porãre õarã erã gohrotoro dopa ta, i mũmũ maja ĩgu ĩhacũnugura sãre árĩpehrerire õari dihta gohrotogũcumi.

22 Ire mari masia: Ñerire masa iinũgara pũhrũ árĩpehreri Goãmũ ĩgu ĩhacũnugura ñeri wayoro. Eropiro Goãmũ õarire ĩgu gohrotoborore corero iiaa.

23 Maripũ Espĩritu Santore oparã áhraa. ĩgu yarã mari wacũ Goãmũ Espĩritu Santore mata omi marire. ĩgu ĩhacũnugura iro dopa ta mari sã ñero taria. Eropirã õaripũre gohrotoborore bũrigã gamerã cohrea. Eropirã ĩgu porã mari ĩgu pohro waboro sãre bũrigã gamerã cohrea mari. Mama dũpũre ĩgu marire ĩgu oboro sãre bũrigã gamerã cohrea.

24 Mari eropa corerã árĩcũ, ĩgu ta marire peamegue wabonirãre taugũcumi. ĩgu pohrogue árĩnirã árĩrã ĩgu pohrogue mari waborore corebiriboya mari. Marire ĩgu tautuhara pũhrũ árĩcũ irire corenemobiriboya.

25 Eropirã ĩabiriquererã ta dohpa, Goãmũ marire ĩgu tauborore corerã eropa coreniguia õaro yojaro mariro.

26 Eropirã mari Goãmũre õaro guñaturabirã ĩgu gamerire õaro masibirã árĩcũ ĩha Espĩritu Santo marire itamumi. Eropirã Goãmũre queoro serẽmasibiriquerecũ Espĩritu Santopũ mari ya árĩburire Goãmũre serẽbasami. Marire mojomoro ĩagu mari ya árĩburire Goãmũre serẽbasami.

27 Goãmũ ĩgu gamero dopa ta, mari Jesu yarã árĩborore serẽbasami ĩgu Espĩritu Santo. ĩgu eropa arĩ serẽbasacũ Goãmũ mari pepirire masipehogũ árĩgu Espĩritu Santo ĩgu serẽrare masimi.

Cristo ya turari mera ñeri iirire tarinũgarãca mari, arĩ gojañumi Pablo

28 Ire masia: Árĩpehrerã Jesure mahirã mari árĩcũ ĩgu gamerire iimorãre beyepũ ĩgu marire. Eropa beyegu Goãmũ eropa ĩhadibuniguicãmi marire. Eropigu mari ñero taricũ ĩagu Goãmũpũ marire õaro wacũ iigũcumi.

29 Goãmũ marire ĩgu yarã árĩmorãre matague ta mari ne masa dehyoaboro coregue ta guñatuhapũ. Eropa guñagu ĩgu magũ ĩgu õagu árĩro dopa ta marire õarã árĩrare

guñapũ. Īgu magũ iro dopa marire árĩdorepũ bajarã masa ĩgu magũre mari tũgũcũborore. Eropigu árĩpehrero marire eropa wara mera marire õarã gohrotocũ iimi.

³⁰ Matague ta ĩgu yarã ĩgu árĩdorenirã mari árĩcũ, ĩgu porã mari árĩmorã sãre beyepũ marire. Eropigu marire ĩgu beyenirãre “Dipuwaja moorã, õarã åhrima,” arĩ ĩhami. Marire ĩgu eropa “Õarã åhrima,” arĩ ĩagũ ĩgu mera umberoguere õaro árĩcũ iigũcumi.

³¹ ĩIre masirã õpa pepia mari: Goãmũ marire ĩgu mahinirãre, ne gajirã ĩhaturirã bocatũbeama.

³² Goãmũ mari ya dipuwaja sĩribure ĩgu magũre obeodigu árĩmi. “Yũ magũre mahia. Eropigu ĩgũre obeobeaa,” arĩbiridi árĩmi. Eropigu mari ya árĩburire ĩgu magũre obeodigu árĩgu Jesucristo mera árĩpehrerire õari dihtare ogũcumi ĩgu marire.

³³ Goãmũ beyenirã mari árĩcũ, ĩgu marire “Dipuwaja moorã, õarã åhrima,” arĩ ĩhami. Mari ĩgu eropa arĩnirã árĩcũ, gajirã marire “Ñerã åhrima,” ne arĩ weresãmasibeama.

³⁴ Cristo mari ya dipuwajare sĩrira pũhrũ masa mũriadi árĩmi. Eropigu Goãmũ diayepũ dohpaguere ĩgu åhrimi dorebu. Eropigu ĩgu mari ya árĩburire diaye ta umberi nũcũ serẽbasagũ iimi Goãmũre. Eropirã gajirãpũ ne marire “Erã ñeri iira dipuwaja moaque,” arĩmasibeama.

³⁵ Cristo marire ĩgu burigã mahicũ gajirãpũ “Erãre ne mahibiricãque,” arĩmasisome ĩgũre. Eropigu mari ñero tariquerecũ ta, mari gũiquerecũ ta, gajirã marire erã ñero iiquerecũ ta, mari oaboaquerecũ ta, suhri marirã mari árĩquerecũ ta, guhyaro marire árĩquerecũ ta, marire erã wejẽquerecũ ta, Cristo marire eropa mahiniguicãgũcumi.

³⁶ Goãmũ yare erã gojarapũ marire eropa waburire werero õpa arĩ werea:

Goãmũ, mũ yarã gua árĩri waja erã wejẽsũmorã ta árĩniguirã tiiaa gua. Oveja erã wejẽmorã erã árĩro dopa ta, gua sãre eropa ta wahaa, arĩ gojañuma Goãmũ yare erã gojarapũgue.

³⁷ Eropirã mari ñero tariquererã ta, Cristo marire mahigu ĩgu itamuri mera, turaro mera ñerire tarinũgarãca mari.

³⁸⁻³⁹ Goãmũ marire ĩgu mahirare ĩhmudi árĩmi mari Opũ Jesucristo mari ya árĩburire sĩricũ. Eropigu ĩgu marire burigã mahigu ne duhusome. Mari sĩricũ sãre, mari ojocaricũ sãre mahi duhusome. Dohpaguere, pũhrũgue sãre, marire ĩgu ne mahi duhusome. Eropirã anyua, watẽa oparã umbero majarã, i yeba majarã oparã, ñerã deyobirã sã marire Goãmũre “Mũ yarãre mahibiricãque,”

arĩrã, bocatĩusome. Eropiro ne yujungu ne yujuñe ĩgu ĩhacũnugura marire ĩgũpũre mahi duhudoreri ne mara. Marire ĩgu ne mahi duhusome.

9

Judio masa Goãmu ĩgu beyenirã ãhrima, arĩ gojañumi Pablo

¹⁻² Yũ acawererã Israe masare guñagu bũrigã bũjawerea. Cristore gamebeama erã. Eropigu ñero sĩporãcũ pepia yũhũ. Iri yũ eropa arĩri diaye ta ãhraa. Yũhũ Cristo yagu ãhraa. Eropigu mũare diaye arĩgu iiaa. Espĩritu Santo yũ mera árĩcũ dohpaguere yũ acawererãre yũ arĩri iri diaye árĩcũ ðaro masia yũhũ. ĩgu yũre irire ðaro masicã iimi.

³ Israe masa yũ acawererã, yaha curu majarã Jesu-cristore gamebirã peamegue warãcoma, arĩ guñaricũa. Eropigu yũhũ erãre peamegue wamorãre taumasigu ðpa arĩboya Goãmũre. “Erã ya dipuwajare yũpũre peamegue wadoreque,” arĩboya. Eropigu “Erã ya dipuwajare yũpũre cóãporo Cristo,” arĩboya. Yũ eropa arĩborañe wajaye masiya mara erã ya dipuwajare.

⁴ Erã yũ acawererã Goãmũ yare ðarire mata opamũhtanirã árĩma. Israe mũrũ pãramerã árĩturiarã ãhrima. Eropigu Goãmũ ĩgu porã erã árĩburire mata apiñumi Goãmũ erãre. Eropigu Goãmũ ĩgu gosesiriri mera erã watope árĩñumi. Eropiro árĩpehrerire ĩgu masare ðaro iiburire weremũriñumi erãre. Eropigu Moisere ĩgu dorerare mata apimũhtañumi Israe masare. Eropirã Goãmũre umupeoburi wihire iimũhtañuma erã. Eropigu erãre ĩgu ðaro itamuborore weremũriñumi Goãmũ.

⁵ Gũa ya cururi gohra doce cururi ãhraa. Eropirã gũa ñecũ sũmarã Abrahã sã mũrague, erã pãramerã árĩturiarãgue ãhraa gũa Israe masa. Eropigu Cristo masa dehyoanijagu gũa acaweregu Israe masũ gohra árĩmi Cristo. ĩgu Goãmũ ta ãhrimi. Eropigu ĩgu árĩpehrerã weca opu ãhrimi. Árĩpehrerinũri ĩgũre ðaro umupeorã mari. Eropa ta iirã.

⁶ Israe mũrũ ĩgu pãramerã árĩturiarã árĩquererã árĩpehrerã Goãmũ yarã gohra árĩbeama. Eropirã árĩpehrerã Goãmũ ðaro oburire opamorã árĩbeama. Eropirã Israe masare “Õaro iigũra,” arĩdigũ árĩqueregu Goãmũ erãre árĩpehrerãre ðaro iibiricũ ĩarã “Goãmũ ĩgu arĩdiro dopa ta iibeami,” arĩ pepibiricãro gahmea.

⁷ Õpa ãhraa: Gajirã Israe masa Abrahã pãramerã árĩturiarã erã árĩquerecũ ta, “Abrahã pãramerã gohra yaharã gohra ãhrima,” arĩ ĩabeami Goãmũ erãre. Eropigu

õpa arĩñumi Goãmũ Abrahãre. “Mũ magũ Isaa pãramerã árituriarã erã tamera diaye ta mũ pãramerã árituriarã árirãcoma,” arĩmuriñumi Goãmũ Abrahãre.

⁸ Īgũ eropa arĩ werecũ ire masirãca mari: Árípehrerã Abrahã pãramerã erã masa dehyoara pũhrũ, mata Goãmũ porã wasome erã. Goãmũ ĩgũ arĩ werepirare õaro peerã ĩgũre umupeorãpũ erã dihta árirãcoma Goãmũ porã. Eropirã erã ta áhriima Abrahã pãramerã árituriarã gohra.

⁹ Õpa arĩñumi Goãmũ Abrahãre: “Gaji bojori inosubu ta yũ dujaricũ mũ marapo Sara majigũgãre opagocumo mũ magũre,” arĩñumi Goãmũ Abrahãre. Eropa ta arĩ werepiñumi ĩgũre Abrahã magũ Isaa masa dehyoaborore. Eropigũ ĩgũ magũ Isaa masa dehyoañumi.

¹⁰ Pũhrũ Isaa Rebeca mera marapocũcũ igo ũama perã sũhrũanirã porãcũñumo. Erã pagũ Isaa gũa ñecũ mũrũ arĩñumi.

¹¹⁻¹² Eropirã erã porã erã masa dehyoaboro core, õarire, ñeri sãre erã iibiricũ ta Goãmũ erã pago áribore õpa arĩmuriñumi: “Īgũ pagũ magũpũ ĩgũ tĩgũre doregũcumĩ. Eropigũ ĩgũ opũ árigũcumĩ,” arĩmuriñumi igore igo porãcũboro core. Goãmũ ĩgũ gamero dopa ta beyemi ĩgũ. Eropa árigũ, árigũ ĩgũ dehyoaboro core Jacobore Esaú pagũ magũ árigũre opũ áribure beyemuriñumi. Eropigũ masa erã iirire ĩaboro core ĩgũ gamero dopa ta ĩgũ yarã árimorãre beyemi.

¹³ Eropa ta arĩ gojañuma ĩgũ yare erã gojarapũgue: “Jacobopũre mahimuribũ. Eropigũ Esaúpũre mahibirimuribũ,” arĩmi Goãmũ, arĩ gojañuma iribojegũere.

¹⁴ ¿Irire peerã dohpa arĩ pepibocuri mari? “¿Erã iiricũrire ĩaboro core yujugũre eropa beyegũ Goãmũ queoro iibeamĩ,” ¿arĩ pepibocuri?” Áríbeaa. Queoro iigũ ta áhrimi.

¹⁵ Õpa arĩñumi Goãmũ Moise sãre: “Yũ gamegũ dihtare mojomoro ĩagũra,” arĩmuriñumi ĩgũ Moisere. Eropigũ yujugũre ĩgũ gamero beyegũ queoro iigũ iimi Goãmũ.

¹⁶ Eropirã mari gamero Goãmũre marire mojomoro ĩadoremasibeeaa mari. Eropirã mari õarire iira waja sãre ne mojomoro ĩabeamĩ ĩgũ. Īgũ gamero dopa ta mojomoro ĩhamĩ.

¹⁷ Eropigũ eropa ta ĩgũ gamero dopa iĩñumi Egipto majarã opũ sãre. Õpa arĩñumi Goãmũ ĩgũre faraõre: “Egipto majarã opũ áribure apigũ iibũ mũre yũ turarire arĩpehrerãre ĩhmubure. Eropigũ arĩpehreri yeba majarãre, yũre erã masiborore opũ acugũ iibũ yũhũ mũre,” arĩñumi Goãmũ ĩgũre, arĩ gojara áhraa Goãmũ yare erã gojarapũgue.

18 Eropigu ĩgu gamerãre mojomoro ĩhami ĩgu mari masare. Eropigu ĩgure erã gamebircũ ĩagu ĩgu gamero erãre yũhribircũ iimi ĩgu. Eropigu Goãmu ĩgu gamero dopa ta iimi.

19 ĩgu eropiigu árĩcũ ĩarã õpa arĩboca mua: “¿Goãmu erãre ĩgure yũhribircũ iidigu duhpigu ero pũhrũ erã ĩgure yũhribirira dipuwaja moayuri erãre?” arĩ papũri serẽpiboca mua.

20 Eropa arĩbircãque. Mari masa bu árĩrã ãhraa. Goãmu mera papũrimasibea. Mátasoro wéagore “¿Duhpigo yure eropa iiri mũhũ?” iri soro arĩ serẽpimasibea. Eropa ta mua sã Goãmure ĩgu gamero iigure “¿Duhpigu eropa iiri mũhũ?” arĩ serẽpimasibea.

21 Mátasoro wéago máta mera igo gamero dopa iimo. Eropigo õarire dibuburi sorore iimasimo igo. Iri máta mera ta bu árĩri dibuburi soro sãre iimasimo igoa. Igo iiro dopa ta Goãmu sã ĩgu iidiaro dopa ta iimi.

22 Eropigu Goãmu peamegue ĩgu cóãmorãre erã ñero iirare ĩha guagu, erãre dipuwaja moadiaqueregu ta yoari boje erã ñeri iirire eropa ĩacãnimi. Árĩpehrerãre ĩgu turarire ĩhmubu, mata erãre dipuwaja moanibirimi.

23 Eropa ta iimi marire ĩgu mojomoro ĩarãre, ĩgu õatariagu ĩgu árĩrire, ĩgu turari sãre marire masidorebu. Matague ta marire, “Erãre mojomoro ĩagura yũhũ. Yũ õarire ogura erãre,” arĩ apiñumi Goãmu marire.

24 Eropirã maripũ ĩgu beyenirã árĩrã iiaa. Eropirã ĩgu beyenirã judio masa dihta árĩbeama. Judio masa árĩbirã sã ãhrima ĩgu beyenirã.

25 Eropa ta ãhraa judio masa árĩbirãre Goãmu yare Osea waĩcũgu ĩgu õpa arĩ gojadiro dopa ta:

Ero coregue yaharã árĩbirinirãre pũhrũ erãre “Yaharã ãhrima,” arĩgura. Eropigu ero coregue yũ mahibirinirãre pũhrũgue erãre “Yũ mahirã ãhraa mua,” arĩgura, arĩpũ Goãmu.

26 “Yaharã árĩbeaa mua,” Goãmu ĩgu arĩra yeba majarã Goãmu ojocarinigũcãgu porã ta árĩrãcoma, arĩ gojamũhtamũriñumi Osea iribojegure.

27-28 Eropigu iribojegue majagu Isaia Israe masare õpa wereñumi: “Mari Opũ i yeba majarãre bajarã masare yojaro mera diaye ta dipuwaja moa purumujugũcumi. Eropirã wũariya maja imipayeri iro dopa Israe masa bajarã gohra erã árĩquerecũ ta bajamerãgã tarirãcoma erã,” arĩmũriñumi Isaia.

29 Eropigu dipaturi ta wereyugu õpa arĩ gojañumi Isaia:

Mari Opu árīpehrerā weca opu bajamerāgā mari mera majarāre taubigu, marire judio masare árīpehrerāre dederecū iiboñumi ĩgu. Sodoma majarāre, Gomorra majarā sāre ĩgu dedeopehocū iidiro dopa ta mari sāre dederecū iiboñumi ĩgu, arī gojamariñumi Isaia.

Judio masa ðari buherire gamebirima, arī gojañumi Pablo
³⁰ Eropa ta āhraa. Eropirā ire masique m̄a: Judio masa árībirāp̄u Goām̄ure amabiriquererā ĩgure bocama. Jesucristore erā umupeocū, “Ōarā āhrima,” arī ĩhami Goām̄u erāre.

³¹ “Goām̄u dorerire Moiserē ĩgu apirare mari iicū ĩgu marire ðarā ĩagucumi,” arīñorā judio masapu. Eropa ĩgu dorerire erā iiquerēcū ta Goām̄u ĩha s̄abirim̄urip̄u erāre. Eropirā ðarā árīdiaquererā bocatūbirim̄urīñorā.

³² Erā Jesucristore umupeoro mariro erā gamero Moise dorerire iidiarima Goām̄u mera ðaro árīdiarā. Eropirā Cristore erā ñeri iirare cóābure gamebirā Goām̄u pohrogue ne ejasome.

³³ Eropa ta arī gojam̄htañuma Goām̄u ĩgu magure wereyurire:

Ūtāye iro dopa árīgure, yu beyedigure dohpague Jerusaléngue apigu iiaa. ĩgure umupeobirā, ĩgure tarin̄ugarā yu pohrogue ne ejasome. Eropirā ĩgure umupeorāp̄u ĩgu mera ðaro mucubiriniguirācoma. Yu pohro warācoma, arīmi Goām̄u, arī gojañuma Goām̄u yare erā gojarapūguere.

10

¹ Yu acawererā, Israe masare Goām̄u ĩgu tauborore burīgā gahmea yuh̄u yu s̄iporā mera. Eropigu Goām̄u erāre ĩgu tauburire serēbasaa yuh̄u.

² Diaye ta erā Goām̄u gamerire iidiarima. Eropa iidiaquererā ta ĩgu gamerire masibeamā.

³ Eropirā Goām̄u erāre ðacū iiburire masibeamā. Eropa masibirā erā gamero ðarire iiquererā bocatūbirima. Erā eropiicū, erā Goām̄u Jesucristore umupeodorediro dopa erā iibiricū, ĩgup̄u erāre “Ōarā āhrima,” arī ĩabirimi.

⁴ Cristore umupeorāre “Dipuwaja moorā, ðarā āhrima,” arī ĩhami Goām̄u. Eropirā “Mari ñeri iira dipuwaja Goām̄u tauboro dopa Moise dorerire iiro gahmea daja,” arī pepibiricāro gahmea. Cristore umupeorā ĩgu mera taria.

⁵ Moise iribojegue majagu ðpa arī gojañumi: “Goām̄u dorerire mari d̄uhyaro mariro iipehocū Goām̄u marire ‘Dipuwaja moorā, ðarā āhrima,’ arī ĩagucumi,” arī gojañumi ĩgu.

⁶ Īḡu eropa arī gojaquerecū ta dohpaguere masa Cristore erā umupeocū Goām̄u erāre “Ōarā āhrima,” arī ĩhami. Iri buheri “Cristore umupeoque,” i arī buheri ōpa arī werea: “Ōpa arī pepibiricāque m̄a: ‘¿Noa Cristore umaroguere árġgure aĩdijugucuri marire ĩḡu buhecū daja?’ arī pepibiricāque m̄a. Cristo eratuhadigū árġmi marire taugū eragū i yebaguere.

⁷ Eropirā daja ‘¿Noa sġrinerā pohroguere Cristore masu aĩḡaribocuri?’ arī pepibiricāque m̄a. Īḡu sġridigū masa m̄ariadigū árġmi,” arī werea i buheri.

⁸ Eropiro ōpa arī werea Goām̄u yare erā gojarapūgue: “Goām̄u ya buherire mari amacū ĩḡu buheri ohō āhraa. Īḡu buherire masituhaa m̄a. Eropirā ĩḡu buherire wereniguim̄rab̄u,” arī gojañuma. Iri buherire “Cristore umupeoque,” arī buherire masare werea ḡa.

⁹ Iri buheri ōpa arī werea: “Jesu yu opu āhrimi,” arī mari disiro mera werecū, “Goām̄u Jesure sġridigūre diaye ta masuñumi,” arī mari pepicū ĩha Goām̄u marire peamegue wabonirāre taugucumi.

¹⁰ Jesure mari umupeocū ĩha Goām̄uru marire “Ōarā āhrima,” arī ĩagucumi. Eropigū gajirāre “Yuh̄u Jesucristore umupeoa,” mari arī werecū ĩha ĩḡu marire peamegue wabonirāre taugucumi.

¹¹ Ōpa arāa Goām̄u yare erā gojarapū: “Īḡure umupeorā, ĩḡure erā umupeorare ne bujaweresome. ‘Īḡure umupeobiricū ōaboya yure,’ ne arġsome,” arġyoro Goām̄u yare erā gojarapūgue.

¹² Judio masare, judio masa árġbirā sāre Goām̄u yujuro mera ta itamumi. Mari Opu árġpehrerā tauro opu āhrimi ĩḡu. Eropigū árġpehrerāre ĩḡure serērāre itamugucumi ĩḡu.

¹³ Eropa ta arī gojañuma Goām̄u yare gojarapūgue ōpa arī gojarā: “‘Yu ñerire cóāque. Eropigū yure tauque,’ masa erā serēcū erāre peamegue wabonirāre mari Opu taugucumi,” arī gojañuma.

¹⁴ Eropirā masa Cristore “Diaye ta marire taugū āhrimi,” arī umupeobirā ĩḡure eropa serēmasibeama erā. Eropirā ĩḡu buherire Jesucristo erāre tauburi buherire peebirā ĩḡure umupeomasibeama. Eropirā ĩḡu buherire erāre wereḡu maricū Goām̄ure erā masisome.

¹⁵ Eropirā ĩḡu buherire weremorāre erā obeobiricū ĩḡu buherire weremasibeama. Ōpa arī gojañuma Goām̄u yare erā gojarapūgue: “Ōari buherire marire ōarā wacū ĩburi buherire weremorā erā eracū ĩarā ōaro mucubiria mari,”

arĩ gojañuma iribojeguere.

¹⁶ Eropa arĩquerecũ ta masa bajarã Jesucristo yare õari buherire peediabeama. Eropa ta arĩ gojamuriñumi Isaia: “Opũ, erãre mari wererare ne peediabeama,” arĩ weremuriñumi Isaia Goãmure.

¹⁷ Eropirã masa Jesucristo yare õari buherire peerã peeñarã Cristore umupeoma.

¹⁸ Eropigu ire serẽpidiaca mware: ¿Israe masa Jesucristo yare peebiriyuri mua pepicũ? Yuju diaye ta erã peemuririñuma. Eropa ta ahraa Goãmũ yare erã gojarapũ sãre:

Goãmũ yare wererã árĩpehreroguere weresirirã wama. Eropirã árĩpehrero majarãgue igũ yare peema, arĩ gojañuma iribojeguere.

¹⁹ Dipaturi mware serẽpidiaca daja: ¿Israe masa peequererã õaro masibiriyuri mua pepicũ? Masiriñuma. Masiquererã Jesucristore umupeodiabiriñuma. Erã eropa peediabiricũ gaji yeba majarã Goãmũ yarã wahama. Irire werenemogu Moise igũ arĩrare weremũtagura: Õpa arĩ gojañumi igũ:

Õpa arĩ weremi Goãmũ Israe masare: “ ‘Bu arĩrã ahrima,’ mua arĩ ãanirãre yaharã árĩmorã iigura. Yu eropiicũ mwarũ erãre ãhaturirãca. Eropigu mware erã mera guacũ iigũca yũhũ, arĩ weremi Goãmũ,” arĩ gojañumi Moise.

²⁰ Isaia sã doyarõ mariro õpa arĩmuriñumi:

Õpa arĩmi Goãmũ: “Yũre amabirãpũ yũre bocama. Eropigu yũre masibirãre erãre yũre masicũ iibũ yũhũ,” arĩmi Goãmũ, arĩ gojañumi Isaia. Judio masa árĩbirã Goãmũ yarã erã waburire weregu eropa ari gojañumi.

²¹ Israe masa pũre õpa ari gojañumi Isaia: “Õpa arimi Goãmũ: ‘Mua ñeri iirare bũjawereque yaharã wamorã, arimuriribũ erãre. Erãpũ yũre tarinũgarã yũre yũhribirimurima,’ arimi Goãmũ,” arĩ gojañumi Isaia.

11

Yujurãyerire Israw masare taugũcumĩ Goãmũ, ari gojañumi Pablo

¹ ¿Eropigu Israe masare Goãmũ igu beyenirãre erã tarinũgacũ erãre cóãpehocãyuri igu mua pepicũ? Áribeeaa. Erãre cóãbirimi igũ. Yu sã Israe masũ, Abrahã pãrami árĩturiagũ ahraa. Eropigu Benjami ya curu majagũ ahraa.

² Iribojegue Goãmũ Israe masare beyemuriñumi. Igũ eropa beyenirãre cóãbeami. Goãmũ yare erã gojarapũ Elia

ĩgu iirare werea. Iripũ Israe masare Elia Goãmure ĩgu arĩ weresãrare masica mũa. Őpa arĩ weresãñumi ĩgu:

³ “Opũ, erã Israe masa mũ yare weremũhtanirãre wejẽpehocãma. Eropirã mure umupeori mesarire cóãpehocãma. Eropigu erã watope yũ dihta mũ yagu dujaa dohpaguere. Yũ eropa áricũ ĩarã yũ sãre wejẽdiama dohpaguere,” arĩñumi Elia Goãmure.

⁴ ĩgu eroparĩcũ peegu ōpa arĩ yũhriñumi Goãmũ Eliare: “Mũhũ yahagu yujugu ta áribeaa. Siete mil ũama yaharã áhrima dohpaguere. Erãre dihbuabũ yũhũ. Erã sã yure ōaro umupeoma. Baal waĩcũgu wéadigũre ne umupeo-birimurama erã sã. Eropigu güibita mũhũ,” arĩñumi Goãmũ Eliare iribojeguere.

⁵ Irisubure Elia ĩgu áriřisubure ĩgu yarã áriřmorãre Goãmũ ĩgu dibudiro dopa ta dohpague sãre bajamerãgã Israe masare ĩgu yarã áriřmorãre dihbumi. Goãmũ erãre mojomoro ĩagu dihbumi.

⁶ Őarire erã iicũ ĩagu dibubirimi. Erãre mojomoro ĩagu dibugu beyemi. “Őarire mũa iira pũhrũ mũare beyegũra,” arĩgu, ĩgu diaye ta erãre mojomoro ĩagu iibiriboñumi. Őarire erã iira pũhrũ erãre ĩgu beyecũ erãre wajatari áriřboya. Őarire erã iibiriquerecũ ta erãre diaye ta mojomoro ĩagu Goãmũ beyemi erãre.

⁷ Eropa iri ōpa áhrra: Israe masare Goãmũ erãre, “Őarã áhrima,” ĩgu arĩ ĩacũ gamequererã ta erã yujuro bojebeama. Goãmũ ĩgu basi ĩgu beyenirãpũ ōarã wahama ĩgu mera. ĩgũre yujuro bojebirãpũ ĩgu yare peediabeama.

⁸ Eropa ta arĩyoro Goãmũ yare erã gojarapũ: “Goãmũ ĩgũre gamebirãre ĩgu yare peebiricũ iimi. Eropigu diaye áriřire erã peequerecũ erãre ōaro peebiricũ iimi Goãmũ. Eropa ta áriřniguicãma dohpague sãre,” arĩ gojañuma iribojeguere.

⁹ Eropigu ōpa arĩñumi Davi mũrũ iribojegue majagu Goãmure:

Erã Israe masa erã bošenuri mucubiririnuri iirã ñero iima erã. Erã eropa iicũ ĩagu dipuwaja moaque mũhũ erãre.

¹⁰ Erãre ōaro peebiricũ iique mũhũ. Eropirã eropa dipuwajacũrã áriřniguicãporo erã. Eropirã eropa bujawereniguicãrãcoma, arĩñumi Davi Goãmure.

Judio masa áriřbirãre peamegue wabonirãre taugũcumi Goãmũ, arĩ gojañumi Pablo

¹¹ ¿Judio masa Cristore erã gamebiricũ ĩagu Goãmũ erãre cóãcãyuri mũa pepicũ? Cóãgohracãbiriñumi. Eropa erã

Cristore erã gamebircũ dohpaguere judio masa árĩbirãpũ Goãmũ ĩgũ taumorã wahama. Dohpaguere ĩgũ yarã iimi Goãmũ erãre. ĩgũ eropiicũ ĩarã yujurãyeri judio masapũ erãre ĩhacũ erã sã Jesucristore umupeodiana.

12 Judio masa erã Goãmũre tarinũgacũ judio masa árĩbirãpũ Goãmũ ĩgũ õari buherire peema. Eropirã árĩpehrero majarã judio masa árĩbirã Goãmũ taumorã wañorã õaro warã. Pũhrũ judio masapũ Cristore erã umupeonũgara pũhrũ tamerare i yeba majarãre õatariaro warõca.

13 Dohpaguere mũare judio masa árĩbirãre werebu iiaa. Cristo apimi yũre mũare judio masa árĩbirãre buhebure. Eropa buhegũ bu gohra iigũ iibeaa.

14 Yũre eropa buhedoredigũ árĩgũ masare weremũra. Yũ acawererãre judio masare mũa Jesucristo umupeorare ĩhacũcũ iidiagũ werea. Goãmũ taunirã mũa árĩcũ ĩarã erã sã Cristore gahme ĩgũ taumorã wabocoma, arĩgũ werea.

15 Dohpaguere judio masare Goãmũ boje apigũ, gajirãguere õari buherire Goãmũ weredoremi ĩgũ mera erã õaro árĩmorãre. Eropiro judio masare ĩgũ boje apicũ õaro wahabũ i yeba majarãre judio masa árĩbirãre. ĩgũ eropiidiro tauro judio masa sãre ĩgũ yarã árĩmorãre ĩgũ iicũ tamerare õatariaro warõca i yeba majarãre. Goãmũ mera erã õaro árĩcũ bajarã masa Jesure umupeorãre peamegue wabonirãre taugũcumĩ.

16 Õpa ãhraa: Abrahã gũa ñecũ mũrũ Goãmũ mera õaro ĩgũ árĩdiro dopa ta ĩgũ pãramerã árĩturiarãgue sã Goãmũ mera õaro árĩrãcoma Cristore umupeorã árĩrã.

17 Yujurãyeri erã eropa árĩrã árĩquerecũ ta gajirã erã acawererãpũre judio masare Goãmũ boje apinimi dohpa. Judio masa Goãmũ ĩgũ beyemũhtanirã olivo waĩcũdigũ otedigũ dũpũri iro dopa ãhrima. Mũa judio masa árĩbirã ĩgũ beyemũhtanirã árĩbirã nũgũ majagũ dũpũri iro dopa ãhraa. Olivo otedigũ dũpũrĩre yujuyeri dũpũri ĩgũ tabe cóãdiro dopa ta gajirã judio masapũre Goãmũ cóãmi. Eropa cóãgũ ĩgũ yarã árĩbirã wacũ iimi erãre. ĩgũ cóãra dũpũrĩre gajĩ dũpũrĩre nũgũ majagũ dũpũrĩre gohroto tuhboro dopa, Goãmũ judio masare judio masa árĩbirã mera gohrotomĩ. Eropa gohrotogũ mũare judio masa árĩbirãre ĩgũ yarã wacũ iimi.

18 Mũare ĩgũ eropa gohrotocũ, "Judio masa tauro õarã ãhraa pare gũa," arĩ pepibircãque. Ire guñaque: Judio masapũre beyemũhtapũ Goãmũ. Mũapũ erã pũhrũ Goãmũ yarã árĩrã mũa sã Goãmũ õari oburire opaa. Eropirã "Judio masa tauro õarã ãhraa," arĩ pepibircãque.

19 Mũa judio masa árĩbirãpũ õpa arĩboca: “Yujurãyeri dũpũrire ĩgũ cóãdiro dopa ta Goãmũ judio masare cóãmi yujurãyerire. Eropa cóãgũ ĩgũ gaji dũpũrire gohroto ĩgũ tuhdiro dopa ta ĩgũ yarã mari wamorãre apimi,” arĩboca mũa judio masare tarinũgadiarã.

20 Õpa ãhraa. Erã Jesure umupeobirira dipuwaja cóãpũ Goãmũ erãre. Eropigũ mũa sãre Jesure mũa umupeobiricũ ĩgũ yarã árĩmorãre mũare apibiriboañumi. Eropirã “judio masa tauro õarã ãhraa gũa,” arĩ pepibiricãque mũa. Eropa arĩbirã ta Goãmũre õaro umupeoque.

21 Mũhtari dũpũri iro dopa judio masa Goãmũ yarã árĩmũhtañuma. Iri gohroto tuhra dũpũri iro dopa ta erã pũhrũ mũa Goãmũ yarã wabũ. Eropigũ Goãmũ ĩgũ yarã árĩmũhtanirã ĩgũre umupeobiricũ ĩagũ cóãpũ erãre. ĩgũ erãre eropiidiro dopa ta mũa sãre cóãgũcumi mũa ĩgũre umupeobiricũ. Eropirã Goãmũre õaro umupeoque mũa.

22 Goãmũ mũare õaro iigũ ĩgũ árĩcũ masique mũa. Eropirã gũhyadiaro mera, ĩgũ dipuwaja moagũ ĩgũ árĩcũ sãre masique mũa. ĩgũre umupeobirãre ĩgũ dipuwaja moagũcumi. Eropa árĩqueregũ ta mũa ĩgũre umupeoniguicũ mũare õaro iigũcumi ĩgũ. ĩgũre umupeobiricũ ñeri dũpũrire ĩgũ tabe cóãdiro dopa ta mũa sãre cóãgũcumi Goãmũ.

23 Masapũ erã tabe cóãra dũpũrire tuhumasibeamã daja. Goãmũpũ árĩpehrero iimasigũ ãhrimi. Eropigũ judio masa ĩgũ cóãnirã Cristore erã umupeodiacũ Goãmũ ĩgũ yarã árĩcũ iigũcumi daja erãre.

24 Mũa judio masa árĩbirã Goãmũ yarã árĩbirimũriyoro. Eropa arĩbirã mũa árĩquerecũ ta Goãmũ mũare ĩgũ yarã arĩcũ iigũcumi. Eropigũ ĩgũ beyemũhtanirã mũa árĩbiriquerecũ ta ĩgũ yarã árĩcũ mũare iidiami ĩgũ. Eropigũ judio masare ĩgũ beyemũhtanirãpũre ĩgũ yarã árĩcũ ĩgũ tauro iidiağũcumi.

Pũhrũ Israe masare tağũcumi Goãmũ, arĩ gojañumi Pablo

25 Yũ acawererã, ire masa erã masibirirare mũare wereğura. Mũa õpa arĩboca: “Dohpaguere gũa dihtare beyemi Goãmũ. Gũapũ masipehocã,” mũa arĩ pepiboca. Mũa irire arĩ pepibiriboro dopa ire wereğura mũare. Õpa ãhraa masa erã masibirira: Dohpaguere bajarã judio masa Goãmũre peediabirã ãhrima. Eropirã bajarã judio masa arĩbirãre Goãmũ ĩgũ queodiropẽ ĩgũ yarã wacũ iigũcumi. Ero pũhrũ judio masapũ ĩgũre gamerãcoma daja.

26 Erã eropa gamecũ árĩpehrerã Israe masare Goãmũ taugũcumi erã peamegue wabonirãre. Goãmũ yare erã gojarpũgue eropa ta arĩ gojañuma:

Jerusalén waĩcãri macague judio masa ya macague erãre taubu arigũcumi. Eropigũ Jacobo mũrũ pãramerã árĩturiarãre erã ñerire ĩgũ cóãgũcumi.

27 Eropigũ erãre taugũ iribojegue yũ arĩ erãre werepirare iigũcumi, arĩmi Goãmũ, arĩ gojamũhtañuma Goãmũ yare erã gojarapũgue.

28-29 Dohpaguere erã judio masa Cristo yare umupeobirã Goãmũre gamebeama. Erã eropiicũ dohpaguere mũrapũ judio masa árĩbirãpũ Cristore umupeonũgabũ. Judio masapũre Goãmũ beyemũhtañumi. Goãmũ ĩgũ arĩ werepidiro dopa ta masare ĩgũ beyediro dopa ta diaye iimi ĩgũ. Eropigũ judio masa ñecũ sũmarã mũra ĩgũ beyenirã erã árĩcũ dohpague erã árĩturiarã sãre ĩgũ mahimi.

30 Iribojegue mũa sã Goãmũre tarinũganirã árĩriyoro. Dohpaguere judio masa Goãmũre erã tarinũgacũ ĩagũ ĩgũ mũrapũre mojomoro ĩagũ taumi.

31 Dohpaguere judio masa ĩgũre tarinũgarã àhrima. Erã eropa árĩquerecũ ta Goãmũ dohpamasapũre Goãmũ beyemũhtañumi. Goãmũ ĩgũ arĩ werepidiro dopa ta masare ĩgũ beyediro dopa ta diaye iimi ĩgũ. Eropigũ judio masa ñecũ sũmarã guere mũare mojomoro ĩadiro dopa ta erã sãre pũhrũ mojomoro ĩagũcumi.

32 Ōpa àhraa: Árĩpehrerã masare Goãmũ ĩgũre erã tarinũgara waja yujuro mera dipuwajacũdoremi. Eropigũ árĩpehrerã erã dipuwajacũrã erã árĩcũ ĩha árĩpehrerãre yujuro mera mojomoro ĩagũcumi ĩgũ.

33 Ōatariagũ àhrimi mari Goãmũ. Turatariagũ àhrimi. Ōaro masipehogũ àhrimi ĩgũ. Eropiro ĩgũ guñarire, ĩgũ iiburire marire òaro masiya mara.

34 Ōpa arĩ gojañuma Goãmũ yare erã gojarapũgue: "Goãmũ mari Opũ ĩgũ guñarire ne masa òaro masibeama. Eropirã masa ĩgũre 'Ōpa iique,' arĩ weremasibeama.

35 Eropirã masa Goãmũre erã gajino ora pũhrũ 'Īgũ marire wajamomi,' arĩ masiya mara masa," arĩ gojañuma iribojeguere.

36 Goãmũ árĩpehrerire iidi árĩmi. Eropigũ ĩgũ turari mera árĩpehrerire árĩcũ iidoredi árĩmi ĩgũ. Eropiro árĩpehreri ĩgũ iiburi àhraa. Eropirã árĩpehrerinãri ĩgũre umupeorã mari. Eropa ta iirã mari.

Goãmũ gamerire marire iiniguicãdoreñumi Pablo

¹ Goãmũ marire turaro mojomoro ìhami. Ìgũ eropa mojomoro ìagũ áricũ ìarã, yũ acawererã, mũa basi ta Goãmũ gamerire iiniguicãrã árique. “Mũhũ yũ opũ àhraa,” arĩque ìgũre. Eropirã òaripũre gohrotonirã, ñeri marirã árique. Eropa ta iiro gahmea marire Goãmũre umupeorãre. Mũa eropa árirã áricũ ìgũ mucubirigũcumi. Eropigũ mũare irire burigã iidorea.

² I yeba majarã erã gamero dopa ta pepibiricãque mũa. Eropirã mũa pepiriguere Goãmũ gamerire gohrotoque mũa. Eropirã òaripũre gohrotonirã árirãca mũa. Eropa gohrotoã Goãmũ mũare ìgũ iidorerire masirãca mũa.

³ Goãmũ yũre mojomoro ìagũ mũare buhedoregũ beyemi yũre. Eropigũ áripheerãre mũare òpa dorea yũhũ. “Òatariagũ àhraa yũhũ,” arĩ pepibiricãque. Eropa pepicãque. Jesucristore mũa umupeorã “Goãmũ yũre ìgũ itamuro mera iimasia yũhũ ìgũ yare,” arĩ pepique.

⁴ Òpa arĩ werenemogũra yũhũ: Mari mojotori, guburi, cuiri, áripheeri mari dũpũ árirĩ baja àhraa. Mari dũpũ árirĩ sã yuju dũpũ áriquerero gajiropa árirĩ mohmeri opaa. Mari dũpũ mari Jesu yarã iro dopa àhraa. Cristo dũpũ iro dopa árirã yuju curu ta àhraa mari.

⁵ Mari eropa áricũ ìagũ gajiropa árirĩ dihta mohmerire apimi Goãmũ marire. Eropirã bajarã masa áriquererã ta Cristore umupeorã árirã ìgũ dũpũ iro dopa yuju curu àhraa mari.

⁶ Eropigũ marire mari nũcũre gajiropa árirĩ mohmerire mari iimasiburire ìgũ turari mera apidigũ árimĩ. Ìgũ eropiicũ maripũ ìgũ apirare òaro iiro gahmea. Eropirã Jesu yarã òpa game itamuporo: Yujurãyerire Goãmũ ìgũ yare weretaumasimorãre apidi árimĩ. Eropirã erã Cristore erã masiropẽ ìgũ yare òaro weretauporo gajirãre.

⁷ Gajirãre Goãmũ yarãre erã itamumasimorãre apidi árimĩ. Eropirã erãpũ masare òaro mera itamuporo. Gajirãpũre Goãmũ yare buhemorãre apidi árimĩ. Eropirã erã masare òaro buheporo.

⁸ Gajirãre masare mucubiricũ iimorãre apidi árimĩ. Eropirã irire òaro iiporo. Gajirãre erã ya erã gamerire omorãre apidi árimĩ. Eropirã gajinore orã, òaro mera mucubiriri mera oporo. Eropirã gajirãre doremassimorãre apimi. Erã dorerã òaro mera doreporo. Eropigũ daja mojomorocũrãre itamumasimorãre apidi árimĩ. Erãre itamurã mucubiriri mera itamuporo, arĩ werea mũare.

Jesu yarã árirã òpa iirã àhrima, arĩ gojañumi Pablo

9 Gajirãre mahi umupeorã, diaye ta mahi umupeoque. Eropirã ñero iirire doorã árrique mua. Eropirã ñaripure gameniguicãque.

10 Mua pagu porãre mua umupeoro dopa ta Jesu yarã mua mera majarã sãre umupeoque. Eropirã mua mera majarã erã gameripure itamumũhtaque. Pũhũ mũ yare iique.

11 Goãmũ gamerire iirã ne tebiricãque. Eropirã mari Opũ ĩgu dorediro dopa ta ñaro mucubiriri mera iique.

12 Goãmũ muare peamegue wabonirãre ĩgu taunirã ãhraa mua. Irire masirã mucubirique mua. Eropirã ñero tarirã Cristo yare duhuro mariro yujuro bojeque mua. Eropirã Goãmũre eropa serẽniguicãque.

13 Gajino Jesu yarãre duhyacũ ĩarã oque erãre. Eropirã mua ya wirigue masa erã ejacũ ñaro sĩporãcũ erãre bocatĩrique.

14 Muare ñero iirãpũre erã ñaro árĩburire serẽque Goãmũre. Eropa ñadorerã erãre ujapeobiricãque.

15 Gajirã mucubiricũ ĩha erã mera mua sã mucubirique. Gajirã orecũ ĩha erã mera oreque.

16 Mua mera majarã mera ñaro árrique mua. Eropirã "Gajirã tauro ñagu ãhraa," arĩ pepibiricãque. Bu arĩrã mera sãre ñaro árrique. Eropirã "Masitarinũgarã ãhraa guã," arĩ pepibiricãque.

17 Gajirã muare ñero iiquerẽcũ ta, erãre ñero ii gamebircãque. Eropirã ñarire iique. Eropirã ñarã mua árĩrre arĩpehrerã masa ĩha masirãcoma.

18 Mua masiropẽ turaro mera ñarire iique arĩpehrerã mera mua ñaro árĩcãboro dopa.

19 Mua yũ mahirã, yũ acawererã, gajirã muare erã ñero iiquerẽcũ ta erã iro dopa ñero ii gamebircãque. "Erã ñero iira dipuwaja Goãmũpũ dipuwaja moagũcumĩ," arĩ guñarã ñero ii gamebircãque erãre. Goãmũ yare erã gojarapũgue eropa ta arĩ gojañuma: "Yũpũ masa erã ñero iira dipuwaja moagu ãhraa. Eropigu diaye ta dipuwaja moagũra, arĩmi mari Opũ," arĩ gojara ãhraa.

20 Eropirã ñpa iique mua: Muare ĩhaturidigu ĩgu oaboacũ ĩarã ejoque ĩgũre. ĩgu ñemesibucũ deco tĩaque ĩgũre. Eropa iirã muare ĩhaturidigu ĩgu ñero iirare guhyasĩricũ iirãca.

21 Eropirã gajirã muare erã ñero iiquerẽcũ mũapũ erãre ñero ii gamebircãque. Eropirã erãre ñaro iique. Eropa iirã ñeripure tarinũgarã iirãca mua.

13

¹ Árípehrerã oparãre Goãmũ dihta apimi. Eropigu mũa tauro oparã sãre Goãmũ ta beye apidigu árĩmi. Ígu eropa apinirã erã árĩcũ ãarã árĩpehrerã mũa erãre yũhrique.

² Mari tauro oparã árĩrãre tarinũgarã Goãmũ ígu apinirãre tarinũgarã iirãca mari. Eropa tarinũganirãre Goãmũpũ dipuwaja moagũcumi.

³ Ōarire iirãre gũicũ iimorã árĩbeama oparã. Ñerire iirãpũre gũicũ iirã áhřima oparã. Eropirã ōarire iique mũa oparãre mũa gũibiriburire. Eropa iirã gũisome mũa. Ōarire mũa iicũ, opũpũ “Ōarire iiabũ,” arĩgũcumi mũare.

⁴ Oparã Goãmũre itamurã ta áhřima mũa ōaro árĩcãborore. Erã eropa árĩquererã ta erã dorerire tarinũgarãpũre dipuwaja moamorã ta áhřima. Árípehrerã ñerire iinirãre dipuwaja moadoregũ Goãmũ erãre apidi árĩmi.

⁵ Eropirã mari oparãre yũhrique. Goãmũ ígu dipuwaja moaborore gũiro mera yũhrique. Eropirã umupeori mera “Ōaro iiro gameca yũre,” arĩ pepiri mera ōaro yũhrique erãre.

⁶ Mũa oparãre iri mohmerire apidi árĩmi Goãmũ. Eropirã iri mohmerire erã iicũ ãarã mũa oparã ya árĩburire wajaseabasaa mũa erãre.

⁷ Árípehrerãre mũa oparãre ōaro yũhrique. Eropirã oparã erã wajaseadorerare wajayeque mũa. Eropirã oparã gajire wajayedorecũ sãre wajayeque. Eropirã árĩpehrerã oparãre umupeoque, arãa yũhũ mũare.

⁸ Gajirãre wajamobiricãque. Erãre mahi umupeoro gahmea. Ígu pohro árĩgũre mahigu Goãmũ dorerire iipehocãgũ áhřimi. Eropirã mũa pohro árĩrã sãre mahiro gahmea.

⁹ Ōpa arãa Goãmũ doreri: “Gajigu marapo mera ñero iirã árĩbiricãque. Masare wejẽbiricãque. Yajabiricãque. Gajirãre gũya ñeri quere iibiricãque. Gajirã yare turaro Ʃaribejabiricãque,” arĩ werea ígu doreri. Gaji ígu doreri sã áhřaa. Iri eropa árĩquerecũ ta yujuñe dorerĩñere mũare werebu iiaa. Ōpa áhřaa: “Mũ basi mahiro dopa ta mũ pohro árĩrãre mahique,” arĩ werea ígu doreri. Mũa pohro árĩrãre mahirã Goãmũ dorerire árĩpehrerire yũhrirã tiiaa.

¹⁰ Gajirãre mahirã erãre ñero iisome. Eropirã erãre mahi umupeorã Goãmũ dorerire yũhripehorã áhřaa mũa.

¹¹ Eropa gajirãre mahique ōpa masirã: Jesu marire ígu dujariboro merogã duhyanijaa. Ígũre mari ne masinũgarã ōpa arĩ pepiribũ: “Yoara pũhrũgue marire taugũ arigũcumi

Jesu," arĩ pepiribũ. Mari eropa arĩ pepiquerẽcũ ta merogã duhyaa Jesu marire ĩgu taugu ariboro. Eropirã carĩrã iro dopa árĩbircãque. ĩgu yare õaro guñanũque. Jesu ariboro corere õaro pee masi yuque.

¹² Dohpaguere ñerã erã iirinũri árĩro iiaa. Cristo ĩgu aririnũ iri ñeri pehreroca. ĩgu ariboro merogã duhyaa. ĩgu ariboro merogã duhyacũ ĩarã ñerire iibiricãrã mari. Eropirã Goãmũ gameripũre iirã mari. Eropa Goãmũ yare iirã ñeripũre duhucãrãca mari.

¹³ Eropirã õaripũre iirã. Eropa iirã bosenuri árĩcũ mari ɯaribejarire ñeri iibirabiricãrã. Eropirã merebiricãrã. Eropirã nome mera ñero iibiricãrã. Gajirã mera game ĩhaturirã árĩbircãrã. Nome sã ɯma mera ñero iibiricãporo.

¹⁴ Eropirã mari Opũ Jesucristo ĩgu itamuri mera ĩgu gamero dopa ta õaro árĩcãque. Eropirã mũa ɯaribejarire ñerire ne iibiricãque.

14

Mũa acawererãre Jesu yarãre "Ñero iirã iima," arĩ werewɯabiricãque, arĩ gojañumi Pablo

¹ Jesure umupeogũre, Jesu gamerire ĩgu õaro masinibiricũ dohpa, ĩgũre õaro bocatĩrique. Eropa bocatĩrirã Jesu gamerire ĩgu masinibiricũ ĩarã ĩgu masibiririre duyasobiricãque ĩgũre.

²⁻³ Gajirã "Goãmũ árĩpehrerire badoremi marire," arĩ pepima. Eropirã gajirãpũ õaro masinibirã "Waibũgu dihipũre bacũ Goãmũ gamebeami," arĩ pepima. Eropirã oteri dihtare bahama. "Dihire bamasia," arĩrã, "Dihire bamasibea," arĩrã sã erã Jesucristore umupeorã árĩcũ ĩha Goãmũ õarã ĩhami erãre. Eropirã "Árĩpehrerire Goãmũ badoremi," arĩrãpũ "Iri dihire bamasibea," arĩrãre ĩhaturibiricãporo. Eropirã dihire babirãpũ dihire barãre "Ñero iirã iima," arĩ werewɯabiricãporo.

⁴ Mũa Jesure umupeorã yujugũ dorero doca ãhraa mũa. Mũa eropa árĩcũ ĩarã mũa basi game werewɯamasibea. Jesucristo mũa Opũ ĩgu gamerire mũa iibiricũ ĩagu ĩgu dihta irire weresãmasimi. Mũa õaro iicũ sãre irire ĩgu weremasimi mũare. Eropigũ ĩgu dorerire iirãre õarire bocatĩucũ iigũcumi mari Opũ.

⁵ Yujurãyeri yujunũre "Irinũ dihta soorinũ gamenere Goãmũre umupeorinũ ãhraa," arĩ pepima. Gajirãpũ "Ʋmũri nũcu gamenere Goãmũre umupeoro gahmea," arĩ pepima. Eropigũ õpa werea mũare yũhũ: Mũa nũcu mũa

pepirire “¿Dinu áhriri mari gamenere umupeorinũ? ¿Dinu árĩbeari?” arĩ pepi masique mua.

⁶ Gajigu yujunũ iimi ĩgu Goãmũre umupeoburinũre. Eropigu mũri nũcu gamenere umupeobiriqueregu, Goãmũre õaro umupeomi ĩgu sã. Eropigu árĩpehrerire bagũ sã “Õhaa,” arĩ serẽmi Goãmũre. Eropigu ĩgu sã Goãmũre umupeogu ta áhrimi. Eropigu gajinore babi sã ĩgu sã umupeomi Goãmũre. Eropigu ĩgu sã Goãmũre “Õhaa,” arĩ serẽmi.

⁷ Mari gameri dihtare iirã árĩmasibea mari. Cristo áhrimi mari Opũ. Eropigu mari ojocaricũ, mari sĩricũ mari Opũ áhrimi ĩgu.

⁸ Dohpaguere mari ojocaripõ Cristo yare iimorã dihta áhraa mari. ĩgu yarã áhraa. Mari sĩrira pũhrũgue sãre ĩgu yarã árĩniguicãrãca. Eropigu mari ojocaricũ mari sĩricũ sãre Cristo mari Opũ ta áhrimi.

⁹ Eropa ta áhraa. Cristo sĩri, masa mũria, ojocarimi sĩrinirã sãre erã opu árĩbu.

¹⁰ ¿Duhpirã mua acaweregũre Jesu yagũre “Ñero iigu iimi,” arĩ werewuadiari mua? ¿Duhpimorã mua acaweregũre caradiupidiari mua? Mari árĩpehrerã Cristo core mari niguicũ ĩgũpũ mari iirare masipehogũ, mari iirare ĩagũcumĩ. ĩgu eropa ĩabu ĩgu árĩcũ mua acaweregũre “Ñerire iigu áhrimi,” arĩ werewuabiricãque.

¹¹ Goãmũ yare erã gojarapũgue õpa arĩ gojañuma:

Õpa arĩmi mari Opũ: “Yũhũ ojocarigu áhraa. Iri diaye ta áhraa. Eropirã árĩpehrerã yũre gamerã, gamebirã sã yũ core merejarãcoma. Eropirã árĩpehrerã ‘Mũhũ turagu gũa Goãmũ ta áhraa,’ arĩ, yũre umupeorãcoma,” arĩmi mari Opũ, arĩ gojañuma.

¹² Eropigu mari árĩpehreri mari iirare Goãmũ serẽpigũcumĩ. ¿Duhpirã eropa iiri? arĩ serẽpigũcumĩ. ĩgu eropa serẽpicũ yũhrirãca mari.

Mua acaweregu ñero dujacũ iibiricãque mua, arĩ gojañumi Pablo

¹³ Eropirã mari mera majarã sãre “Ñerã áhrima,” arĩ werewuabiricãrã. Eropirã mari acaweregũre Jesu yagũre ñero dujacũ iibiricãrã. ĩgu Goãmũ yare duhucũ iibiricãrã.

¹⁴ Yũhũ Jesucristo yagu áhraa. Eropigu õpa õaro masia yũhũ: “Árĩpehreri Goãmũ ĩgu badorera áhraa,” arĩ masia. Gajigũpũ eropa árĩmasibeamĩ. ĩgũpũ gajinore bagũ “Ñero iigu iiaa,” arĩ pepimi. Eropiro ĩgu irire arĩ pepiqueregu bagũ diaye ta dipuwajacũgu dujami.

15 Iri diaye ta āhraa. Mũa dihire mũa bacũ mũa acaweregũ “Iri Goãmũ badorebirira āhraa,” arĩgũpũ ĩhacũbocumi mũaare. Eropigũ irire bagũ, “Ñero iigũ iica yũhũ,” arĩ wũaro guñaricũbocumi ĩgũ. Eropirã mũa bari mera ĩgũ ñero pepicũ ĩha irire dipaturi babiricãro gahmea mũaare. Mũhũ mũraro ta bagũ mũa acaweregũre umupeosome. Mũa acaweregũ yañe árĩborañe sãre sĩridi árĩmi Jesucristo. Eropirã mũa irire badiaquererã mũa acaweregũre Goãmũ yare duhucũ iibiricãque. Eropirã irire babiricãque.

16 “Ire gua eropa iicũ ðapũricãca,” mũa arĩ pepiquerecũ gajirã mũaare ĩha werewũabocoma. Erã eropa werewũacũ ĩarã dipaturi irire iinemobiricãque guare werewũari arĩrã.

17 Goãmũpũ mari opũ āhrimi. ĩgũ eropa árĩcũ, mari badiari mari ihridiari sã eropa árĩcãro iiaa. Bu gohra āhraa. Eropiro mari Opũ ĩgũ dorerire ðarire mari iicũ iri ðari gohra árĩro tiiaa. Eropiro gajirã mera mari ðaro árĩcãcũ ðari gohra árĩro iiaa. Eropiro Espĩritu Santo ĩgũ itamuri mera mari mucubiricũ ðari gohra árĩro iiaa.

18 Eropa ta Cristo yare ðarire iicũ ĩarã Goãmũ sã, masa sã “Ōaro iiabũ mũhũ,” arĩrãcoma.

19 Eropa ta iirã mari tamera mari ðaro árĩcãborore, mari basi mari game itamuburire. Eropa iiricũrã Jesure umupeonemorãca.

20 Eropirã mũa bari mera Jesu yarãre Goãmũ yare duhucũ iibiricãque. Gajigũ Jesu yagũ “Goãmũ badorebirira bari āhraa,” ĩgũ arĩra barire mũa bacũ ĩagũ ĩgũpũ Goãmũ yare duhubocumi. Eropirã irire babiricãque. Diaye ta árĩpehreri bari Goãmũ ĩgũ badorera bari āhraa. Iri eropa árĩquerecũ gajigũ “Iri barire Goãmũ badorebeamĩ,” arĩ pepimi. Eropigũ mũa iri barire bacũ ĩagũ ĩgũpũ ĩhacũ babocumi ĩgũ sã. Eropa bagũ “Ñero iigũ iiaa,” arĩ pepi Goãmũ yare duhubocumi. Eropirã marire ĩgũ ĩhacũ bacũ iirã mari sã ñero iirã tiiaa. Eropirã iri barire babiricãro gahmea marire.

21 Waimũrã dihire mũa bacũ vinore mũa ihricũ ĩagũ, gajigũ Jesu yagũ ĩabocumi. Eropa ĩagũ ĩhacũ babocumi daja. “Irire bagũ ñero iigũ iica yũhũ,” arĩ pepibocumi. Eropa arĩ pepigũ tamera bagũ ñero iigũ iimi. Eropirã ĩgũ ñero ĩgũ iibiriborore waimũrã dihire, vino sãre mũapũ ba duhucũ ðacãroca. Jesure ĩgũ umupeo duhubiriborore iibiricãro gahmea marire.

22 Eropirã mũa baburire, ihriburire game ðuyasobiricãque. “Árĩpehreri barire Goãmũ marire badoredigũ árĩmi,” arĩ pepirã irire Goãmũ dihtare wereque.

“Ñerire iibigu, ðaro iigu iica,” ĩgu pepirigue arĭ masigu mucubirigu āhrimi.

²³ Gajigupu iri barire bagu, “Ñero iigu iiboca yahu,” arĭ pepigu arĭqueregu iri barire bagu, dipuwajacugū āhrimi ĩgu. ĩgu ta “Ire bagu diaye ta ðarire iigu iiaa,” ĩgu pepirigue arĭmasibeami. Eropā arĭmasibigu irire bagu, ĩgu bara waja dipuwajacumi ĩgu. “Ōarire iigu iiaa,” arĭmasibirinijagu irire iigu dipuwajacugū āhrimi.

15

Mari pohro arĭrāre ðaro umupeorā, arĭ gojañumi Pablo

¹ Eropirā Jesucristore ðaro mari umupeorāpu, ðaro umupeoturabirāre itamuro gahmea. Eropirā mari ya arĭburi dihtare iibiricāro gahmea.

² Mari pohro arĭrāre erā gamero dopa ta iiro gahmea erā ðaro arĭcāborore. Goāmure erā ðaro guñaturanemoburire iiro gahmea.

³ Jesucristo sã ĩgu ya dihtare iibiridi arĭmi. Eropā ta arāa Goāmū yare erā gojarapū. Ōpā arĭ gojañuma: “Cristo ōpā arĭmi Goāmure: ‘Mupure ñero wereniguibonirā yupure ñero wereniguima,’ arĭmi Cristo Goāmure,” arĭ gojañuma iribojegure.

⁴ Iribojegue erā Goāmū yare gojañuma mari ðaro buheborore. Eropirā iri erā gojarapūre buherā sĭporā turarā wahaa mari. Eropā buherā ñero tarirā yujuro bojerāca.

⁵ Goāmū mūare turacū iigu sĭporā turacū iigu mūare game ðaro arĭcācū iiporo Jesucristo ĩgu gamediro dopa ta.

⁶ Eropā ta iiporo ĩgu mūa arĭpehrerā yujuro mera Goāmure umupeoborore, mari Opū Jesu Pagure “Ōagu āhrimi. Turagu āhrimi,” mūa arĭborore.

Judio masa arĭbirāre ðari buherire werenugama, arĭ gojañumi Pablo

⁷ Cristo ĩgu mūare iidiro dopa ta mūa mera majarāre ðaro game bocatĭrique. Mūa eropiicū ĩarā “Diaye ta Goāmure ōagu masa yujuro mera ðaro arĭcācū itamugu āhrimi,” arĭ ĩarācoma masa.

⁸ Mūare ire arĭgu iiaa: ĩgu Pagū ĩgu arĭ werediro dopa diaye ta iigu ĩgu arĭcū ĩhmuḡu, judio masare itamubu aridigu arĭmi Cristo i yebaguere. Eropigu Goāmū Abrahā sāre arĭ werepidiro dopa ta iigu aridigu arĭmi.

⁹ Masare Cristo ĩgu itamucū ĩgu Pagū Goāmū mojomoro ĩagu iidigu arĭmi erāre. ĩgu eropā mojomoro ĩacū ĩarā judio masa arĭbirā sã Goāmure “Ōagu āhrimi. Turagu āhrimi,” arĭ umupeoma dohpaguere. Erā sāre ĩgu yarā

árĩcũ iigu aridigu árĩmi Cristo. Goãmũ yare erã gojarapũgue eropa ta arĩ gojañuma:

Cristo õpa arĩmi ĩgu Pagure: Judio masa árĩbirã watope mũre umupeogura. "Goãmũ õagũ ãhrimi," arĩgura. Eropigu erã watope bayagũ mũ ya árĩburire bayagura, arĩmi Cristo ĩgu Pagure, arĩ gojañuma iribojegure.

¹⁰ Eropirã õpa arĩ gojañuma daja:

Goãmũ ĩgu beyenirã mera judio masa mera game mucubirique mũa sã judio masa árĩbirã, arĩ gojañuma iribojegure.

¹¹ Eropirã õpa arĩ gojañuma daja:

Judio masa árĩbirã árĩpehrerã Goãmũre umupeoporo. Eropirã árĩpehrero majarã ĩgure "Õagũ ãhrimi. Turagũ ãhrimi," arĩ umupeoporo, arĩ gojañuma.

¹² Eropigu Isaia mũrũ sã õpa arĩ gojañumi:

Davi pagũ Isai mũrũ pãrami árĩturiagũ arigucumi. Eropa arigu judio masa árĩbirã tauro opu árĩgucumi ĩgu. Eropirã erãpũ ĩgure umupeorã erãre peamegue wabonirãre ĩgu tauborore masirãcoma, arĩ gojajuñumi iribojegure.

¹³ Goãmũ marire taugũ árĩbu õaro mũare mucubiricũ iiporo. Eropigu Jesure mũa guñaturacũ mũare õaro árĩcãcũ iiporo ĩgu. Mũare ĩgu eropiicũ "Ĩgu pohro mari warãca," arĩ mucubiri masinemorãca mũa Espĩritu Santo ĩgu turari mera, arãa yũhũ mũare.

¹⁴ Yũ acawererã, õaro mera mũare guñaa. Mũa õarã ãhraa. Eropirã Jesu yare õaro masia. Eropa masirã mũa mera majarãre game õaro were, buhemasia.

¹⁵ Mũa eropa masirã mũa árĩquerecũ ta ipũguere mũare gũiro mariro irire õaro werepehobũ yũhũ erãgue cãdijiri arĩgũ. Goãmũ yũre mahigu mũare buhedoregũ apimi yũre. Eropigu ĩgu apidiro dopa ta mũare guñacũ iigu iiaa.

¹⁶ Yũre ĩgu apicũ Jesucristo yare õari buherire judio masa árĩbirãre buhea yũhũ. Eropa buhecũ peerã judio masa árĩbirã Jesure umupeorãcoma. Erã eropa umupeocũ ĩagũ Goãmũ erãre "Õarã ãhrima," arĩ ĩagucumi. Eropigu erãre gamegucumi. Eropigu Espĩritu Santopũ Goãmũ yarã wacũ iigucumi erãre.

¹⁷ Eropigu Jesucristore umupeogu arĩgu Goãmũ yũre buhedore apirare mucubiriri mera werea masare.

¹⁸⁻¹⁹ Judio masa árĩbirãre Cristo itamuri mera erãre yũ buhecũ peerã, Cristore umupeoma. Eropirã masa árĩbirãre buhea yũhũ. Eropa buhecũ peerã judio masa árĩbirã Jesure umupeorãco yũ õaro iiricũrĩre ĩarã, Goãmũ turari mera yũ

deyoro moarare ĩarã, Espírítu Santo ĩgu turari mera erã Cristore umupeoma. I árĩpehrerire mũare diaye werediaca. Gajirã erã iirare werebeaa. Jerusaléngue ne yũ buhenũgara pũhrũ árĩpehreri macarigue buhe curibũ. Yoarogue, Iliria yebague sãre Jesucristo ya buherire õari buherire buhegu ejabũ.

²⁰ Eropigu Cristo yare masibirã dihtare õari buherire turaro buhediabũ. Yũ mera majarã erã buhenirãguere buhediabiribũ.

²¹ Eropa arĩ gojañuma Goãmũ yare erã gojarapũguere. Õpa arĩ gojañuma:

Iribojegue ĩgure ne masibirinirã ĩgure masirãcoma. Eropirã ĩgure ne peebirinirã ĩgu yare õaro peerãcoma, arĩ gojañuma Goãmũ yare erã gojarapũgue.

Pablo Romague ĩgu waborore wereñumi

²² Eropigu árĩpehrero majarãre buhegu árĩgu bajasuburi mũa pohro wadiaqueregu ta wamasibirimurabũ.

²³ Dohpaguere i yebaguere a árĩbirã Jesure umupe-orãcoyũ mohmeri pehrea wahaa. Eropa pehrecũ ĩagu baja bojori mũa pohro wadianiguũ árĩgu, mũa pohrogue wagura.

²⁴ Eropigu Españague wagu mũare ero ĩhatari wahgãgura. Eropigu mũa mera mucubirigura. Eropigu mũa mera árĩdigũ wagu mũa yũre itamuri mera wagura daja.

²⁵ Dohpaguere Jerusaléngue wanibu iiaa. Ero majarãre yũ acawererãre Jesu yarãre niyeru sonigũ wagu iiaa.

²⁶ Macedonia majarã, Acaya majarã, õaro mera Jesu yarã Jerusaléngue árĩrãre mojomorocũrãre niyerure obeoama erãre itamurã. Eropigu erãre obeorare sogũ wagu iiaa.

²⁷ Iri niyerure orã õaro mera ohãma. Erã eropiicũ õapũrica yũ pepicũ. Erãre judio masa árĩbirãre, gũa judio masapũ Goãmũ yare buhemũhtabũ. Eropirã erãre ĩgu tauboro sãre buhemũhtabũ gũa judio masa erãre. Gũa eropa buhecũ ĩagu, Macedonia majarã, Acaya majarã mera judio masapũre Jerusalén majarãre itamucũ õapũrica yũre. Erãre erã buhera waja ahraa iri niyeru yũ pepicũ.

²⁸ Eropigu Jerusalén majarãre iri niyerure yũ ora pũhrũ Españague wagũca. Erogue wagu mũare ĩhatari wahgãgura.

²⁹ Eropigu mũa pohrogue yũ wacũ Cristo yare yũ mũare buhecũ Cristo marire õaro sĩporãcũcũ iigũcumĩ.

³⁰ Mũa, yũ acawererã, mari Opũre Jesucristore umupeoa. Eropirã Espírítu Santo ĩgu turari mera gajirãre umupeoca

mua. Mua eropiirã árĩrã yu sãre turaro serēbasaque Goãmure.

³¹ Ōpa arĩ serēbasaque: Judea yeba majarã Jesure umupeobirã yure erã ñero iidiacũ Goãmũ yure itamuboro dopa serēque. Eropirã Jerusalén majarãre iri niyerure yu ocũ erã irire mucubiriri mera erã ñeaboro dopa serēque.

³² Mua eropa serēcũ Goãmũ gamecũ mucubiriri mera mua pohrogue waguca. Eropigu mua mera árĩgu mucubiriri mera soogura.

³³ Goãmũ marire òaro árĩcãgu ĩgu mua mera árĩporo. Eropa ta iiporo.

16

Pablo òadoreñumi

¹ Mari acawerego Febe waĩcũgo mua pohrogue wabo iimo. Igo Cencrea waĩcũri macague Jesu yarãre itamugo ãhrimo.

² Eropigo bajarãre yu sãre itamugo ãhrimo igo. Eropirã mua igo mera yujuro mera mari Opure umupeorã ãhrraa. Eropirã igore òaro mera bocatĩrique. Eropa ta iiro gahmea marire Jesu yarãre. Eropirã igore igo gamerire gajino duhyacũ igore oque mua.

³ Aquila, ĩgu marapo sã Priscila sã òaporo. Jesucristo yare yu buhecũ erã sã yu mera mohmeama.

⁴ Erãre mero wejēbocurima gajirã erã yure wejēdiacũ itamuri waja. Eropigu erã mera mucubiria yuhũ. Eropirã judio masa árĩbirã Jesu yarã árĩpehrerã erã sã erã mera mucubirima.

⁵ Eropirã Aquila ya wihi gamenererã sã Jesu yarã òaporo. Yu mahigu Epenéta sã òaporo. ĩgu Asia majagu ero árĩgu Cristore umupeomũhtadigu árĩmi.

⁶ María sã òaporo. Igo mua mera turaro mohmeapo.

⁷ Yu acawererã Andrónico, Junia sã òaporo. Peresu yu árĩcũ erã ta yure wapicũnirã ãhrrama. Eropirã yu core Cristore umupeonũgañorã erãpu. Gajirã Jesu ĩgu apinirãpu erãre “Diaye ta òarã ãhrima,” arĩ wereniguima.

⁸ Amplia sã yu mahigu Jesu yagu ãhrimi. ĩgu òaporo.

⁹ Eropigu Urbano sã òaporo. ĩgu sã mari mera Cristo ya árĩburire mohmeami. Eropigu yu mahigu mera majagu Estaqui òaporo.

¹⁰ Eropigu Apele sã òaporo. ĩgu diaye ta òaro Jesucristore umupeomi. ĩgu iiricũrĩre ĩarã irire masia mari. Eropirã Aristóbulo ya wihi majarã árĩpehrerã ĩgu marapo ĩgu porã sã òaporo.

11 Yũ acaweregũ Herodión ðaporo. Eropirã Narciso ya wihi majarã Jesu yarã ðapehrecãporo.

12 Eropirã Trifena, Trifosa sã ðaporo. Erã nome mari Opũ Jesu mohmerire iima. Mari mahigo Pérsida sã ðaporo. Igo mari Opũ Jesucristo yare turaro mohmemo.

13 Eropigũ Rufo mari Opũ Jesure ðaro umupeogũ, ĩgũ yare ðaro iigũ ðaporo. ĩgũ pago sã ðaporo. Igo yũ pago iro dopa ta árigo ãhrimo.

14 Asíncrito, Flegonte, Herma, Patroba, Herme, gajirã Jesu yarã erã mera majarã sã ðaporo.

15 Eropirã Filólogo, Julia, Nereo, ĩgũ pagũ mago sã Olimpa, gajirã erã mera majarã sã Jesu yarã ðaporo.

16 Eropirã mũa mera majarãre bocatĩrirã mucubiriri mera mojoto ñeaque. Árĩpehrerã Jesu yarã árĩpehrero majarã mũare ðadorema.

17 Yũ acawererã, mũa mera yujurãyeri mũare game ĩhaturicũ iirã game dũca waricũ iirã árĩcoma. Eropirã mũare Jesu ya buherire goroweoma. Eropirã eropa iirãre ðaro iique goroweorĩ arĩrã. Eropa árĩrãre wapicubiricãque.

18 Eropa iirã mari Opũ Jesucristo yare iibeama. Ñerire erã ñaribejari dihtare iima. Eropirã ðaro wereniguirã iro dopa gũyama masibirãre erã. Erã eropa gũyacũ erãre ðaro peenũrũma. Eropirã erãre wapicubiricãque mũa.

19 Mũapũ Jesure ðaro yũhrirã ãhraa. Irire árĩpehrerã masima. Eropa ðaro mũa yũhrirã mũa árĩcũ pee mucubiria yũhũ. Eropigũ ðaro mũa iiborore masicũ gahmea yũhũ. Eropigũ ne ñeri sãre mũa iibiricũ gahmea yũhũ.

20 Eropigũ Goãmũ marire ðaro árĩcãcũ iigũ merogã pũhrũ watĩre tarinũgagũ iibasagũcumi mũare. Mari Opũ Jesucristo ðaro mũare itamuniguicãporo.

21 Timoteo yũ mera majagũ mũare ðadoremi. Yũ acawererã Lucio, Jasõ, Sosípate mũare ðadorema.

22 Yũhũ Tercio ipũre gojabasagũ ãhraa Pablõre. Yũhũ Jesu yagũ árĩgũ mũa Jesu yarãre ðadorema.

23 Gayo ya wihi árĩcãgũ iiaa yũhũ Pablo. ĩgũ ya wihigue Jesu yarã gamenerema Goãmũre umupeomorã. ĩgũ sã mũare ðadoremi. Eropigũ Erasto i maca majarã oparãre niyeru dibubasagũ mũare ðadoremi. Mari acaweregũ Jesu yagũ Cuarto sã mũare ðadoremi.

24 Mari Opũ Jesucristopũ mũare árĩpehrerãre ðaro iiporo. Eropa ta iiporo.

Pablo Goãmũre umupeori mera gojatuñumi

25-27 Mari Opu Jesucristo ya buheri mera õari buheri mera Goãmũ mũare ãgũre guñaturanemocũ iimasimi. Iribojegue iri õari buheri ne masa masibiriri buheri árĩriyoro. Dohpaguere Goãmũ yare weremũhtanirã erã gojara mera iri buherire masidoregũ iimi. Yũ sã irire buhea. Iri buherire árĩpehrero majarã dohpaguere masima. Goãmũ eropa árĩniguicãgũ dorero dopa ta erã masima. Iri buherire ãgũ ta weredorepũ masa ãgũre erã yũhriborore, ãgũre erã umupeoboro sãre. Eropirã ãgũre “Diaye ta õagũ, turagũ ãhrimi,” arĩ umupeorã. ãgũ yujugũ ta Goãmũ õaro masipehogũ ãhrimi. Jesucristo ãgũ itamuri mera Goãmũre eropa umupeoniguicãrã mari. Eropa ta iirã. Iripẽta ãhraa.

1 Corintios

Pablo Goãmũ yarãre Corinto majarãre gojabeoñumi

¹⁻² Yũhũ Pablo, Jesucristo yare ãgũ buhedore apidigu ãhraa. Goãmũ ãgũ gamero dopa ta Jesu ãgũ apibure yũre beyerũ ãgũ. Sostene Jesu yagũ mari acaweregũ mera mũare Goãmũ yarãre Corinto majarãre gojabeoa gũa. Jesucristo mera majarã mũa árĩcũ Goãmũ yarã árĩmorãre beye aĩdi árĩmi Jesucristo mũare. Eropirã árĩpehrero majarã gajirã mari Opũ Jesucristore serẽrã árĩrã, erã sã Goãmũ yarã ta ãhrima. Jesucristopũ erã opũ mari Opũ sã ãhrimi.

³ Eropirã Goãmũ mari Pagũ, mari Opũ Jesucristo mera mũare ðadoreã. ãgũ itamuri mera ðaro árĩque mũa.

Jesucristopũ mũare ðaro iibasadigu árĩmi Goãmũre, arĩ gojañumi Pablo

⁴ Jesucristo mũare ðaro iibasadigu árĩmi Goãmũre. ãgũ eropa iicũ ãagũ, Goãmũre yũ mahigure, Õhaa," arãa yũhũ umuri mũcũ.

⁵ Cristo yarã mũa árĩcũ ãagũ Goãmũpũ mũare ðaro árĩcũ iimi. Eropigũ ãgũpũ ãgũ yare mũare gajirãre weremorãre iimi ãgũ. Eropigũ ãgũ, ãgũ yare ðaro masicũ iimi mũare.

⁶ "Cristo mũare ðaro iigũcumĩ," mũare gũa arĩ werediro ta wahabũ mũare Cristo yarã mũa wacũ.

⁷ Eropigũ árĩpehreri ãgũ ya árĩburire mũa iimasicũ iimi Goãmũ mũare. Eropiro ne dũhyabeaa mũare. Mari Opũ Jesucristo i yebague ãgũ dujariborore mũa corerisubũ Goãmũpũ mũare eropa itamuniguicãgũcumĩ.

⁸ Eropigũ Jesucristopũ mũa ãgũre umupeoniguicũ iigu ãhrimi. ãgũ eropa árĩgũ árĩcũ mũapũ i umũ pehrecũ mũa ñeri iira dipuwaja moorã árĩcũ iigũcumĩ.

⁹ Goãmũ "Õpa iigũra," ãgũ arĩdiro dopa ta ãgũ iimi. Eropigũ ãgũ, ãgũ magũ mari Opũ Jesucristo mera yujuro mera árĩmorãre marire beyedi árĩmi.

Jesu yarã Corinto majarã erã game dũca warirare Pablo arĩ gojañumi

¹⁰ Yũ acawererã, mari Opũ Jesucristo ãgũ dorero mera mũare bũrigã serẽbu iiaa: Mũa basi game dũyasobiricãque. Eropirã mũa basi game dũca waribiricãro gahmea. Yuju curu ta árĩque mũa. Eropirã yujuropa ta ðaro árĩniguicãque. Eropa iirã mũa iiburire pepirã, yujuropa iique mũa.

11 Yũ acawererã, mũa basi game dũyatorã iiayoro mũa. Eropa arĩ wereama Cloé ya wihi majarã yũre.

12 Gajirã mũa mera majarã õpa arãñorã: “Pablo ya curu majarã ãhraa gũa,” arĩ wereniguiayoro gajirã mũa. Eropirã gajirã “Apolo ya curu majarã ãhraa gũa,” arãyoro gajirã. Eropirã gajirãpũ daja, “Pedro ya curu majarã ãhraa gũa,” arãyoro mũa. Eropirã gajirãpũ daja, “Gũa tamera Cristo ya curu majarã ãhraa gũa,” arãyoro mũa.

13 Mũa eropa arĩquerecũ ta yũhũ õpa werea mũare: Cristo ya curu majarã yuju curu ta ãhraa mari. Eropirã mari basi yujurãyeri dũca warimasibea mari. Yuju curu ta árĩrã iiaa mari. Yũhũ Cristo árĩbeaa. Īgũ iidiro dopa mũa ya dipuwajare crusague sĩridigũ árĩbeaa. Eropigũ mũare gajigũ waĩyegũ yaha waĩ mera waĩyebeari. Cristo ya waĩ mera waĩyecumi mũare.

14 Mũare mũa mera majarã sãre waĩyebiribũ yũpũ. Crispore, Gayo sãre erã dihtare waĩyebũ yũhũ. “Pablo waĩyenirã dihta ãhraa,” arĩmasibea mũa. Eropigũ gajirãre waĩyebiridigũ yũ árĩgũ “Õhaa,” arĩ pepia Goãmũre.

15 Bajarã masare waĩyedigũ yũ árĩcũ “Pablo ya waĩ mera ĩgũ waĩyemi gũare,” arĩboaya mũa. Eropa arĩrã Jesucristo umupeobirã mũa yũpũre umupeoboaya. Eropigũ irire gamebirabũ.

16 Estéfana ya wihi majarã sãre waĩyebũ yũhũ. Erã nũcu ta waĩyebũ yũhũ. Gajirã yũ waĩyenirãre guñabirica.

17 Cristo yũre obeogu, gajirãre waĩyebure apibirimi ĩgũ yũre. Ōari buherire werebupũre apimi ĩgũ yũre. Iri ōari buheri “Cristo ĩgũ crusague sĩriñumi,” arĩ buheri masare gohrotori buheri ãhraa Goãmũ yare erã iiburire. Eropigũ yũhũ irire buhegũ gajigũ ōaro masitarigũ iro dopa buhebeaa. Masa erã masiri mera buhebeaa. Yũhũ eropa yũ ejatuharo mera buhecũ mũa ōari buheripũre umupeobiriboaya.

Goãmũ ĩgũ turarire ĩgũ masiri sãre opagũ ãhrimi Cristo, arĩ gojañumi Pablo

18 Peamegue dederemorãpũ iri buheri “Cristo crusague ĩgũ sĩridi árĩmi,” arĩ buherire peerã õpa arĩma: “Pee masibirã ya buheri ãhraa,” arĩmaacãma. Maripũ Cristo ĩgũ taumorã árĩrã õpa arãa: “‘Crusague ĩgũ marire sĩridi árĩmi,’ arĩ buheri tura ãhraa. Iri buheri mera Goãmũ marire gohrotomi,” arãa mari.

19 Eropa ta arĩñumi Goãmũpũ ĩgũ yare erã gojarapũgue:

Eropirã i yeba majarã masare “Õaro masirã ãhraa,” erã basi arĩrãre erã masiripũ duhpiburi árĩbeaa, arĩ ãhmugũca yũhũ, arĩñumi Goãmũ.

20 Eropirã i yeba majarã õaro masirã duhpimorã árĩbeama. Erã pepiro dopa buherã sã duhpimorã árĩbeama. Dohpaguere wereniguimehrerã sã duhpimorã árĩbeama. I yeba majarã “Õaro masirã ãhrima,” arĩnirã erã árĩquerecũ ta “Pee masibirã erã ãhrima,” arĩ ãhmumi Goãmũ erãre.

21 Goãmũ tamera õaro masigu ãhrimi. Ìgu eropa árĩcũ i yeba majarã erã ya masiri mera Goãmũ yare ne masisũya marioca erãre. Goãmũ “Erã masiri mera yũre masisome,” ãgu arĩdiro dopa ta eropa wahabũ erãre. Õpa arĩñumi: “Yaha õari buherire werecũ masa yũre masirãcoma,” arĩñumi. Eropigu “Iri buheri pee masibirã ya buheri ãhraa,” gajirã arĩquerecũ, gajirãpũre erã õari buherire peerãpũre Goãmũ taumi. Cristore erã umupeocũ ãagu “Erãre peamegue wabonirãre taugũra,” arĩmũhtarũ.

22 Judio masa deyoro moarire ii ãhmudorema erã iri buherire umupeoboro core. Eropirã griego masa judio masa árĩbirã árĩrãpũ erã pepiro dopa buhecũ gahmema.

23 Maripũ “Jesucristo mari ñeri iira dipuwaja crusague sĩridi árĩmi,” arĩ buherire buhea mari. Iri buherire peerã judio masapũ gamebeama. Eropirã iri buherire judio masa árĩbirãpũ “Pee masibirã ya buheri ãhraa,” arĩma.

24 Goãmũ ãgu yarã árĩmorã ãgu beye aĩnirãpũ iri buherire pee õpa arĩ masima: “Goãmũ masipehogũ turagu ãhrimi. Cristo marire sĩribasara mera marire peamegue wabonirãre Goãmũ taumi,” arĩ masima. Erã judio masa, judio masa árĩbirã sã eropa arĩ masima Jesu yarã árĩrã.

25 Goãmũ õaro masipehogũ ãhrimi. “Goãmũ pee masibigu ãhrimi,” masa arĩ pepiquerecũ ta i yeba majarã tauro õaro masipehogũ ãhrimi. Eropigu “Turabigu ãhrimi,” masa arĩ pepiquerecũ ta erã wecague turatarinũgagu ãhrimi ãgu.

26 Yũ acawererã, Goãmũ mũare ãgu beyeboro core mũa árĩmũhtarare guñaque. I yeba majarã “Õaro masirã ãhrima,” erã arĩnirã watopegue Goãmũ mũare bajamerãgã dihtare beye aĩdi árĩmi. Eropirã masa tĩrã oparã sã arĩnirã bajamerãgã ãhraa mũa Jesu yarã.

27 I yeba majarã “Pee masibirã ãhrima,” erã arĩnirã watopepũre mũare Goãmũ beye aĩdi árĩmi. Eropa beyedi árĩmi “Õaro masirã ãhrima,” erã arĩnirã erã masibirã dujaboro dopa. Eropigu i yeba majarã “Turabirã, doyarã ãhrima,” erã arĩnirãre Goãmũ aĩdigũ árĩmi doyarãrãpũ erã doyarã dujaro dopa.

²⁸ Masa erã ãadiabirãre “Duhpimorã árĩbeama,” arĩma. Erã eropa arĩnirãre bu árĩrãre Goãmũ ãgũ yarã árĩmorãre aĩdigũ árĩmi mũare. Eropa aĩgũ i yeba majarã oparãre, gũhyadiarãre, “Gũarũ bu árĩrã ãhraa,” erã arĩcũ iĩgũ iimi Goãmũ erãre.

²⁹ ãgũ eropa iicũ i yeba majarã ne yujugũ ãgũ gamero mera “Yũ tamera turagũ, ðaro masigũ ãhraa,” arĩ tarinũga-masibeami Goãmũ ãgũ ãacũ.

³⁰ Goãmũrũ marire Jesucristo yarã árĩcũ iimi. ãgũ yarã árĩrã mũmũri nũcũ Goãmũ mera árĩrãca mari. Jesucristopũ Goãmũre ðaro masicũ iimi marire. Eropigũ mari ñerire cóãgũ marire ðarire gohrotocũ iĩgũ ãhrimi. Eropigũ marire peamegue wabonirãre taubu ãhrimi.

³¹ ãgũ eropa iicũ Goãmũ yare erã gojarapũ ãgũ arĩ gojadiro dopa ta eropa waha. Òpa arĩ gojañuma: “ ‘Yũ gamero masipehogũ ãhraa,’ arĩgũ irire arĩbiricãporo. Òpa arĩporo: ‘Mari Opũrũ masipehogũ ta ãhrimi,’ arĩporo ãgũ,” arĩ gojañuma Goãmũ yare erã gojarapũgue.

2

Cristo crusague ãgũ sĩrira buheri ãhraa i, arĩ gojañumi Pablo

¹⁻² Yũ acawererã, mũa pohro wabu ðpa arĩ pepibũ yũrũ: “Erã mera árĩgũ Jesucristo crusague sĩridigũ waĩpeo ãgũre erã masiburi dihtare buhegura erãre,” arĩ pepibũ mũare. Eropigũ mũa pohro árĩgũ Goãmũ yare mũare buhebũ. Goãmũ yare mũare buhegũ, weretarinũgagũ iro dopa “Masitarigũ ãhraa,” arĩ buhegũ iibiribũ.

³ Eropigũ mũa mera árĩgũ bu árĩgũ iro dopa árĩbũ yũhũ. Eropigũ yũre umupeori arĩgũ doyañariro dopa buhebũ yũhũ.

⁴ Eropigũ Goãmũ yare buhegũ “Masipehoa yũhũ,” arĩgũ weretarinũgagũ iro dopa buhebiribũ. ãgũ yare buhecũ Espĩritu Santo ãgũ turari mera mũare iri buherire umupeocũ iimi.

⁵ Eropa ta arĩ buhebũ yũhũ mũare masa erã gamero erã ya masiripũre mũa gamebiriboro dopa. Goãmũrũre mũa umupeoburire eropa arĩ buhebũ yũhũ “Goãmũ turagũ ãhrimi,” mũa arĩboro dopa.

Espĩritu Santopũ Goãmũ ãgũ árĩricũrere buhemi marire, arĩ gojañumi Pablo

⁶ Eropirã Goãmũ ya buherire Jesure ðaro umupeorãguere werea gũa. Iri buheri masiri ta ãhraa. I mũa maja masa erã gamero erã masiri iro dopa árĩbeaa i mũare gũa buheri. I

yebare dorerã ya masiri sã árĩbeaa. Erã masiri i umu mera pehrero iiaa.

⁷ Goãmũ ya masiripũre werea. Iribojegue i buherire ne masisũya mariyoro. Negohraguere mari õaro árĩborore Goãmũ arĩ pepituhajamũripũ. Marire peamegue wabonirãre igũ tauborore, igũ mera mari árĩboro sãre “Masare eropa ta iigũra,” arĩ pepiyupũ.

⁸ Igũ masare õaro arĩ pepirare i umũre dorerã masibiriñuma. Irire õaro masirã, mari Opũre Goãmũ magũ gohrare crusague pabia wejẽbiriboañuma erã.

⁹ Erã eropa masibirirare Goãmũ yare erã gojarapũgue õpa ãhraa:

Árĩpehrerã Goãmũre mahirã ya árĩburire Goãmũ õaro amubasayutuhapũ. Iri igũ amubasarapũre masare masima masiya mara. Ne gajino iro dopa ãaya mara irire, arãa Goãmũ yare erã gojarapũgue.

¹⁰ Iri eropa arĩquerecũ ta Espĩritu Santopũ Goãmũ yare, masisũya marirare masicũ iimi marire. Árĩpehreri Goãmũ yare igũ pepira sãre Espĩritu Santo masipehomi. Eropa masigũ igũ marire irire masicũ iimi.

¹¹ Ne gajirãpũ masũ igũ pepirire masibeama. Masupũ igũ seyaro igũ guñarigue igũ pepirire masimi. Eropa ta masa Goãmũ igũ pepirire ne masibeama. Espĩritu Santo dihta igũ pepirire masimi.

¹² Eropirã mari Jesu yarã árĩrã erã i umu majarã Jesu yarã árĩbirã erã pepiro dopa pepibea. Goãmũ igũ Espĩriture ohomi maripũre igũ pepiro dopa mari pepiburire. Igũ marire õaro igũ orare masicũ iimi Espĩritu Santopũ.

¹³ Eropirã Goãmũ yare mũare buherã, masa ya masiri mera gũa gamero buhebeaa gũa. Espĩritu Santo igũ gamero dopa igũ guare wereniguidoreripũre mũare buhea. Eropa buherã Espĩritu Santo gamero dopa Goãmũ yare õaro buhea gũa igũ yarãre.

¹⁴ Espĩritu Santore opabirãpũ irire Espĩritu Santo yare erãre buhecũ, “Pee masibirã wereniguiri ãhraa,” arĩma erã. Eropirã gamebeama. Espĩritu Santo igũ itamuro mariro igũ yare masima masiya mara masare. Eropirã erã igũ yare ne masibeama.

¹⁵ Espĩritu Santore oparãpũ Goãmũ yare õaro masima. Gajirãpũ erãre “Pee masibirã ãhrima,” arĩmasibeama Espĩritu Santore oparãre.

¹⁶ Õpa arãa Goãmũ yare erã gojarapũgue: “Ne yujugũ igũ gamero mera mari Opũ igũ guñarire masigũ ne marimi. Eropirã igũre masa ne buhemasibeama,” arãa igũ yare erã

gojarapũgue. Maripũ Cristo yarã árĩrã, Cristo iro dopa masia.

3

Jesu yarã yujuro mera Goãmũ mohme corerã ãhrima, arĩ gojañumi Pablo

¹⁻² Yũ acawererã, mũare buhegu Espĩritu Santore ðaro yũhrirãre yũ buhediro dopa buhemasibiribũ mũapũre. Mũa pepiri Espĩritu Santo opabirã pepiro dopa árĩbũ. Cristo yarã mũa árĩquererã ta ĩgũre ðaro yũhrirã árĩbirã majirãgã erã pee masibiro dopa ta Goãmũ yare ðaro pee masibiribũ mũapũ dohpa. Eropa mũa pee masibiricũ ĩagu Goãmũ yare ðarire buhenemomasibiribũ mũare. Eropigu majirãgãre apĩco dihtare mari oro dopa ta diasabiriri buheri dihtare buhebũ daja mũare. Dohpague sãre mũraro ta masinibea dohpa mũa.

³ Őpa iirã iiaa mũa Espĩritu Santore yũhribirã. Mũapũ mũa mera majarãre ĩadiabirã, erã gajinore opacũ ĩhaturirã, mũa basi yujurãyeri cururi Yũ acawererã, mũare buhegu Edũca warirã iiaa. Eropirã Espĩritu Santore opabirã Cristore gamebirã iro dopa iirã iiaa mũa. Eropirã Goãmũ yare ðaro peebea mũa.

⁴ Őpa ãhrayoro mũa. "Pablo ya curu majarã ãhraa gũa," arãyoro mũa yujurãyeri. Eropirã gajirã mũa mera majarãpũ "Apolo ya curu majarã ãhraa gũa tamera," arãyoro mũa. Eropa arĩ dũyatorã Espĩritu Santore opabirã iro dopa arĩ wereniguia mũa.

⁵ ¿Yũhũ Pablo, Apolo mera duhpimorã ãhriri gũa mũa pepicũ? Árĩbeaa. Goãmũre mohme corerã ãhraa gũa. Gũare ĩgu iidorero dopa iimorã ãhraa. Eropirã gũa mũare buhecũ peerã Jesucristore umupeonũgabũ mũa.

⁶ Őari buherire buherã pohegue mohme corerã iro dopa ãhrima mari werenigui queori mera buhecũ. Pohegue ĩgu otemũhtadiro dopa ta yũhũ mũare Goãmũ yare buhemũhtabũ. Eropigu gajigu ĩgu pohere ĩhadiburo dopa ta Apolopũ yũ pũhrũ mũare buhenũrusiami. Gũa eropa buhequerecũ ta pohe maja yucare iri bugacũ ĩgu iidiro dopa ta Goãmũpũ mũare ĩgu yare masinemocũ iimi.

⁷ Eropigu yũ buhemũhtadi árĩqueregu ta bu árĩgu ãhraa. Eropigu Apolo yũ pũhrũ buhenemodi sã bu árĩgu ta ãhrimi. Goãmũ tamera ðagu ãhrimi. ĩgũpũ mũare ĩgu yarã árĩcũ ĩgũre masinemocũ iimi. Eropirã Goãmũpũre umupeoro gahmea mũare.

⁸ Otemũhtagu pũhrũ pohere ĩhadibugu yujuro mera mohme corerã ãhrima erã. Eropirã erã nũcũ erã

mohmediropē ta wajatama erā. Eropa ta āhraa gūa Apolo mera.

⁹ Eropirā gūa Goāmū yare mohme corerā āhraa. Eropa gūa mohme corerā Apolo yū mera majagu āhrimi. Mūapū Goāmū ya pohe iro dopa ta āhraa. Mūa eropa árīcū Goāmū ya pohe iri maja yucūre īgu būganemocū iidiro dopa ta mūare īgu yare masinemocū iimi īgu.

Eropigu Goāmū mūare īgu yarāre ōarā árīcū iigu iimi. Eropirā mūa Goāmū mohmeri wihi iro dopa āhraa mūa gaji werenigui queori mera werediācū.

¹⁰ Yūre Goāmū īgu itamuro mera yūpū wihi iimehregu borari īgu nugumūhtarō dopa ta Jesucristo yare mūare buhemūhtabū. Eropigu iri weca gajigu īgu peoturia mūriaro dopa ta gajigu yū pūhrū buhenemogu iimi. Eropa buhenemogu ōaro gūhyadiaro mera Goāmū yare buhero gahmea īgūre. Queoro buhero gahmea.

¹¹ Wihire iirā borarire nugumūhtabiricū wihi iima masiya mara. Eropa ta Cristore buhebiricū īgu yarā wacū iima masiya mara. Cristo mari ya dipuwajare sīribasarare mūare buhetuhajabū. Eropirā mūa Jesucristore umupearā Goāmū yarā watuhajabū. Mūa eropa árīrāguere gaji buherire buhema masiya mara mūa Goāmū yarā wamorāre.

¹²⁻¹⁵ Goāmū yarāre buhenemorā āhrima. Erā watope gajirā queoro buhema. Gajirā queoro buhebeama. Queoro buheri oro, plata, waja pagari utāyeri iro dopa āhraa. Queoro árībiriri buheripū yucū, taa, űaira pūri iro dopa āhraa. I űmū pehrerinūri árīcū Jesucristo dujarigu mari buhera queoro árīcū īhmugūcumī. Mari buherare soeñagu iro dopa ta queoro árīcū īhmugūcumī. Eropiro oro, plata, waja pagari utāyeri soecū űjubiro dopa ta mari buhera queoro ta árīro dujaroca īgu īacū. Eropa mari queoro buhenirā mari árīcū ōaro mari buhera waja wajayegūcumī. Eropa ta yucū, taa, űaira pūri soecū űjupehrero dopa ta mari buhera queoro árībīro pehreroca īgu īacū. Eropigu queoro buhebirinirā mari árīcū īagu marire wajayesome. Erā eropa árīrā erā wajatabiriquerecū Goāmū erāpūre taugūcumī. Eropirā eropa queoro ōaro buhebirinirā merogā mera tarirācoma. Eropirā wihi űjūrisubu tariro dopa tarirācoma.

¹⁶ Mūa Jesu yarā mera Espīritu Santopū mūa mera āhrimi. Eropirā mūa Goāmū ya wihi iro dopa āhraa. ¿Irire masibeari mūa?

¹⁷ Eropirā mūa Goāmū ya wihi árīro dopa árīrā īgu yarā gohra āhraa. Eropigu īgu yarāre yujugu īgu goroweocū Goāmū peamegue dedeogūcumī īgūpūre.

18 Irire ðaro masique mua. Mua basi pee wisibiricãque. I umu maja buherire opagu "Masitarinugagu ahraa," arĩ pepibocumi. Eropa arĩ pepigu mua mera majagu arĩgu, "Yuhu Goãmu masiri mariro pee masibigu ahraa," arĩ pepiporo igu. Igu Eropa arĩ pepigu diaye ta ðaro masigu wagucumi.

19 I umu maja masa erã gamero erã basi masiri "Bu gohra ta ahraa," arĩ pepimi Goãmu. Eropa ta werenemoa Goãmu yare erã gojarapũ. Ōpa arĩ gojara ahraa: "Erã gamero masirã erã pepiri mera 'Ōpa iirãra,' erã arĩrare gajiropa wacũ Goãmu iimi," arãa Goãmu yare erã gojarapũ.

20 Eropi gajipũgue ōpa arãa daja: "Masa erã gamero 'Masipehorã ahraa,' erã arĩ pepiri duhpihuri arĩbiricũ masimi mari Opu Goãmupu," arãa Goãmu yare erã gojarapũgue.

21-22 Eropirã "Pablo ya curu majarã ahraa gua," arĩrã, "Apolo ya curu majarã ahraa gua," arĩrã, "Pedro ya curu majarã ahraa gua," arĩrã arĩbiricãque mua pare. Gua arĩpehrerã mua ya arĩburire iirã dihta ahraa. Goãmu arĩpehreri mua ya arĩburire otuhajadigu arĩmi. Igu ihacũnugurare mua ya arĩburire odigu arĩmi muare. Muare ojocaricũ iimi mua ya arĩburire. Eropigu sĩricũ sãre iigucumi mua ya arĩburire. Dohpague mua arĩrire, puhrgue mua arĩburi sãre ogucumi. Eropirã arĩpehreri mera ahraa.

23 Eropirã mupu Cristo yarã ahraa igu ya arĩburire iimorã. Eropigu Cristopu Goãmu yagu ahrimi igu ya arĩburire iibu. Eropirã "Gua tamera Pablo ya curu majarã ahraa," arĩbiricãque mua pare.

4

Cristo igu yare igu buhedoregu igu apinirã erã mohmerire werepu Pablo

1 Ōpa arĩ pepique mua yare, Apolo sãre: Eropa ta erã Cristore mohme corerã ahrima. Eropirã "Masa erã masibirirare Goãmu yare buhedore igu apinirã ahrima," arĩ pepique mua.

2 Yujugu igu ya arĩburire iidore apinirãre igu gamero dopa ta ii corero gahmea erãre. Yu sãre Eropa ta ii corero gahmea Cristo igu gamerire.

3 Mua yare werewuacũ eropa pepicãa yuhu. Gajirã masa erã yare werewuacũ sãre Eropa pepicãa yuhu. Yu iirire iarã "I ðari ahraa. I ñeri ahraa," arĩ beyemasibea mua yare. Yu basi arĩqueregu yu iirire ðaro beyemasipehobea yu sã.

⁴ Ōpa arī pepia yuhū. “Mari Opū yare ĩḡu apidiro dopa ĩḡu gamerire ipehorabu yuhū,” arī pepia yuhū. Yū ōpa arī pepiquerēcū ta yū arī pepiri diaye árībiriboca. Mari Opū Cristo dihta yū iiricūrire ĩḡu ōaro masimi yū ĩḡu yare ōaro iicū.

⁵ Eropirā mari Opū ĩḡu dujariboro core masare erā iirare arī werewuabiricāque. ĩḡu dujarigū masa erā iirare iri-bojegue gajirā erā masibirirare Cristo deyoro moagucumi. Eropirā mari iidiarare ĩḡu masicū iigucumi gajirā masare. Irisubu ta mari nūcūre ĩḡu yare mari iidiro dopa ta “Irire ōaro iiabū,” arīḡucumi Goāmū marire.

⁶ Yū acawererā, yuhū Apolo mera gūa árīricūrire werebū yuhū mūare buhebu. Eropa werebū Goāmū ĩḡu yare ĩḡu gojarapū ĩḡu arīdirore mūa tarinūgabiriboro dopa. Eropa tarinūgabirā árīrā mūa yujurāyerire umupeobiricāque. Mūa eropa iibirā árītarinūgadiarā iiaa.

⁷ Mūa eropa iibiriboro dopa gūa iirare werebū mūare. Mūa eropa tarinūgadiaquererā mūapū gajirā tauro ōarā árībeaa mūa. Goāmū mūare ĩḡu ora dihtare opaa mūa. Eropirā ĩḡu mūare masicū iira dihtare masia mūa. ¿Mūa gamero oparā, mūa bocatūuro masirā árībiriquererā ta, duhpīrā “Masipehorā āhraa,” arīri mūa? Eropa arīrā “Goāmū ḡuare obirimi. Eropigū ḡuare masicū iibirimi,” arīdiarā dopa ta iiaa mūa.

⁸ Mūapū “Árīpehrerire opaa gūa. ḡuare ñehe duhyabeaa,” arīraa mūa. Eropirā gūa mūa pohro árībiricū ōpa arī pepiraa: “Oparā iro dopa masirā āhraa gūa,” arī pepiraa mūa. Diaye ta oparā iro dopa mūa masipehorā árīcū mūare ōtariaboya. Mūa eropa árīcū mūa mera gūa sā oparā iro dopa masipehorā árīboya. “Masirā āhraa gūa,” arī pepirā, ¿ōaro arī pepiri mūa? Ōaro pepibeaa yū ĩacū.

⁹ Ōpa arī pepia yū tamera: Goāmū ḡuare Jesu ĩḡu yare buhedore apinirā doca maja curu apimi ḡuare. I yeba majarā masa, anyua sā gūa ñero taricū ḡuare ĩamūrima eropa wacū.

¹⁰ Cristo yare gūa buhecū ĩarā, “Pee masibirā āhrima,” arīma masa ḡuare. ¿Mūapū Cristo yare ōaro pee masirā āhriri mūa? “Turabirā, bu arīrā āhrima,” arīma masa ḡuare. ¿Mūapū ōaro turarā āhriri mūa? Mūa basire umupeoa. ḡuapūre masa ne umupeobeama.

¹¹ ḡuapū dohpaguere ñero tarirā, oaboarā, ñemesiburā, ñeri suhricūrā, wiri moorā āhraa. Eropirā ḡuare gajirā umupeobirā, ḡuare pabiramūrima.

¹² Eropirā gūa buheniguiquererā teboricūrā árīrā gūa árīburi majare gūa baburi sāre mohmea. Eropirā gajirā

guare erã ñero wereniguiquerecũ ta guapũ Goãmure õaro erã árĩburire serẽbasaa. Eropa iirã gajirã guare ñero iimorã erã nuruquerecũ ta eropa pepicãa gũa.

13 Eropirã “Ñero iirã àhrama,” guare erã werewnaquerecũ ta guapũ erãre õaro wereniguia erã õaro árĩburire. Eropirã erã buriãgã dohoma guare. Iribojegue eropa iinũgama. Dohpague sãre muraro ta iima guare.

14-15 Mũare õari buherire buhemũtabũ. Eropa buhecũ mũa peecũ Jesucristo mũare ãgu yarã wacũ iidi árĩmi. Eropa mũare buhedigu mũa pagũ iro dopa ta wahabũ yũhũ. Bajarã mũare Cristo yare buherã erã árĩquerecũ ta mũare buhemũtagũ yũhũ yujugũ ta àhraa. Eropigu yũhũ yujugũ ta mũa pagũ iro dopa àhraa. Eropigu mũare guhyasĩricũ iibu ire gojagũ iibeaa. Yũ porã yũ mahirãre mũare werebu ire gojaa yũhũ.

16 Eropigu ire turaro mũare werebu iiaa yũhũ. Yũre ãhacũque mũa sã.

17 Mũa eropa iicũ gamegũ mũa pohro Timoteore obeogu iiaa. ãgu yũ magũ iro dopa yũ mahigu mari Opũ Jesucristo yagũ àhrimi. Eropigu Cristo gamero dopa iiniguigu àhrimi ãgu. Timoteo mũa pohro ejagũ Jesucristo yare yũ iidiro dopa mũare guñacũ iigucumi mũa sã eropa iiboro dopa. Jesu yarã pohrogue noho wagũ Jesucristo yare erã iiburire buheniguicãa.

18 Yujurãyeri mũa mera majarã oparã árĩdiarã õpa arãñorã: “Pablo mari pohrogue arisome,” arĩ pepirañorã erã.

19 Goãmũ gamecũ mũa pohrogue dohparagã ta ejagũca. Eropa ejagũ erã oparã árĩdiarã mũa mera majarã erã eropa arĩrare ãagũra. Eropigu erã Goãmũ turari opacũ ãagũra yũhũ.

20 Goãmũ mari Opũ àhrimi. Mari arĩ were-tarinũgaquerecũ ta ãgu yare mari iibiricũ mari wereniguiri duhpiburi árĩbeaa. ãgu turari mera ãgu gamero dopa iicũ gahmemi.

21 ¿Mũa pohrogue mũa ya dipuwaja dipuwaja moagu yũ wacũ gahmeri mũa yũre? ¿O mũa õaro iira waja mucubiriri mera waro gahmeri mũa yũre?

5

Corinto majarã erã ñeri iirare werepũ Pablo

1 Gajirã õpa arĩ querecũma guare: Yujugũ mũa mera majagũ ãgu buamore ta marapocũ waĩcũmi. Eropa ta arĩ werema masa guare. Erã eroparĩcũ peemaria wahabũ.

Gajirãpũ Goãmũre masibirã árĩquererã erãpũ eropa iirã árĩbeama.

² Mũa mera majagũ ãgũ eropa iiquerẽcũ ta mũapũ “Õatariarã ãhraa gũa,” arĩ pepiraa. ¿Duhpirã ãgũ eropa ñeri iirare masiquererã ta gũhyasĩrisãbeari mũa ãgũre? Eropa ñero iigũre mũa Jesu yarã mera majagũre cóãcãque mũa.

³⁻⁴ Yũhũ mũa mera árĩbiriqũregũ ta yũ guñari mera mũa mera árĩgũ iro dopa ãhraa yũhũ. Eropigũ mũa mera árĩgũ yũ árĩbodiropo dopa ta ñero iigũre ãgũ eropa ñero iira dipuwaja, dipuwaja moadoretuhã yũhũ. Jesucristo ãgũ dorero mera ta eropa iidorea. Eropa mũa Jesu yarã gamenererã yũ guñabeori merague yũhũ mũa mera árĩcũ, mari Opũ Jesu ãgũ turari mera

⁵ ãgũre ñero iigũre cóãque. Watĩ mera ãgũ ñero tari-borore apique. Eropa ta cóãque ãgũre ãgũ ñero tariri mera ñerire ãgũ ãaribejarire ãgũ gohrotoboro dopa. Mari Opũ Jesucristo ãgũ dujaririnũ ñero iidigũ mũarũ Jesu mera ãgũ õaro tariboro dopa dohpaguere ãgũre eropa apinique, arãa yũhũ.

⁶ “Õaro ãhraa gũa,” mũa árĩquererã ta ñero iirã iica mũa. Ñero iigũ ãgũ ñerire mũa eropa ãacãrã, árĩpehreri ñeri mũare ii ãhmucũ árĩpehrerã ñero iirãca. Eropiro árĩpehreri ñeri sehya wa mũa árĩroque. Panre bugacũ iiri pohga õaro seyanũgajaro dopa ta iri ñeri õaro seyaroca mũaguere. ¿Irire masibeari mũa?

⁷ Yũ acawererã judio masa Pascua árĩcũ ovejare wejẽmurima erã ñeri iira dipuwajare Goãmũre cãdijidorerã. Oveja sĩridiro dopa ta Cristo mari ñeri dipuwajare sĩribasadi árĩmi. ãgũ eropa sĩribasarañe mera mũa ñerire cóãnirã ãhraa. Irire guñarã mũapũ ñero iigũre mũa mera majagũre cóãque ñeri mũa watope mariboro dopa.

⁸ Iribojegue ñerire ãhacũ iinirã árĩribũ mari. Eropirã dohpaguere mari ñerire cóãnirã árĩrã mari ñerire ãaribejaro mariro, ñero iiro mariro árĩrã. Iribojegue mari ñerire iimũridiro dopa ta iibircãrã. Eropirã diaye maja õaro werenigũri mera, õaro iiricũri mera árĩrã pare.

⁹ Mũare yũ gojabeorapũre nome mera ñero iirã, ñerire iimajĩñarã mera ne wapicũdorebiriribũ.

¹⁰ Eropa arĩgũ “Jesu yarã árĩbirã mera árĩbircãque,” arĩbiribũ. Eropigũ “Nome mera ñero iirã mera, gajinore turaro gamenemocãrã mera, yajaricũrã mera, goãmarã wãanirãre umupeorã mera árĩbita,” arĩbeaa. I yebare

eropa árĩrã mariro Jesure gamebirã mariro mari dihta árĩmasibea. Árĩpehrerogue àhrima erãpũ ta.

¹¹ Eropigũ mũare gojabeogũ õpa arĩ doreribũ: “Mũa mera majarã Jesu yarãpũ erãpũ ñerire iicũ ìha erãpure wapicũbircãque,” arĩ goja doreribũ. Eropirã mũa mera majagũ “Jesu yagũ àhraa,” ìgũ arĩgũ árĩqueregũ ta nome mera ñero iigũ, gajinore turaro gamenemogũ, goãmarã wéanirãre umupeogũ, ñero quere moa coregũ, merericũgũ, yajaricũgũ ìgũ árĩcũ ìgũpure wapicũbircãque. Eropirã eropa iigũ mera ne babircãque.

¹²⁻¹³ Jesu yarã árĩbirãpure Goãmũpũ dipuwaja moagũcumĩ. Eropigũ Jesu yarã árĩbirãre erã ñero iiri dipuwaja moadoregũ árĩbeaa yũhũ. Eropa iibircãro gahmea yũre. Eropa arĩquerecũ ta mari Jesu yarã watope mari ñero iira dipuwajare moaro gahmea mari basire. Eropirã mũa Jesu yarãpũ mũa mera gamenererã mũa basi mũa iirare ìha masiro gahmea mũare. Eropirã yujugũ mũa mera majagũ ìgũ ñero iicũ ìarã ìgũre dipuwaja moadorero gahmea mũare. Eropirã Goãmũ yare gojarapũgue arĩdiro dopa mũapũ mũa mera majagũre ñero iigũre dipuwaja moaro dopa iirã ìgũre cóãque.

6

Jesu yarãre weresãrare werepũ Pablo

¹ ¿Mũa basi game dũyatorire duhpĩrã Jesu yarã árĩbirã pohrogue amudorerã wahari mũa? Jesu yarãre mũa mera majarãre weresãdiarã gajirã Jesu yarãre irire werero gahmea mũare. Eropirã Jesu yarãpũ amubasaporo.

² Pehrerinũ árĩcũ mari Jesu yarãpũ mari árĩpehrerã masa erã iirare beyerãca. ¿Irire masibeari mũa? Eropirã pehrerinũ árĩcũ masa árĩpehrerãre beyemorã árĩrã, dohpague sãre amumasia mari. Eropirã dohpague gajiropa waçũ sãre amumasia mari.

³ Anyua erã iira sãre beyerãca mari. ¿Irire masibeari mũa? Mari eropa anyuare beyemorã árĩrã diaye ta dohpague sãre Jesu yarã erã iirare ìarã beyemasica mari.

⁴ ¿Eropirã duhpĩrã mũa mera majarãre weresãdiarã Jesure gamebirã, “Bu árĩrã” mũa arĩrã pohrogue amudorerã wahari mũa?

⁵ Ire arĩgũ iiaa mũa gũhyasĩuro mũa tariborore. Mũa dũyatorire werebu õaro masigũ árĩcumĩ mũa watopere, yũ arãa.

⁶ ìgũ eropa arĩquerecũ ta mũa mera majagũ Jesu yagũ gajigũ ìgũ acaweregũre weresãdiagũ Jesu yarã árĩbirãre beyedoregũ wahami.

7 Masare beyegu pohrogue mua acawereräre weresārã Goãmũ gameripure tarinugarã iiaa mua. Gajigu mua mera majagu mware ñero igu iicũ eropa ñacãboaya mua. Jesu yarã árĩbiräre mua weresãbiriborore mua acaweregure mware igu ñero iirare mua eropa ñacãcũ òatariaboaya. Jesu yagu mware igu yajacũ igure mua weresãboro core igu mware yajarare mua eropa ñacãcũ òaboaya.

8 Mua eropiibea. Gajiräre ñero iirã ãhraa mua sã. Yajarã ta ãhraa mua sã. Jesu yarã mua acawererã erã árĩquerecũ ta eräre ñero iirã, yajarã iiaa mua.

9 Eropã iirã Goãmũ igu opu árĩroguere wamasibeamã. ¿Irire masibeari mua? Pee wisibiricãque mua. Òpa iirã Goãmũ pohrogue wasome: Gajirã nome mera ñero iirã, goãmarã wéaniräre umupeorã, gajigu marapore marapocurã, gajigu marapu mera ñero iirã nome, uma seyaro erã dupuri mera ñero iirã, nome sã eropa ta iirã,

10 yajarã, gajinore turaro gamenemorã, merericurã, gajirã masare ñero quere moa corerã, guyari mera yajarã ne Goãmũ igu opu árĩroguere wamasibeamã.

11 Iribojeguere mua yujurãyeri eropa iirã árĩyoro. Eropã iinirã mua árĩquerecũ ta dohpaguere mua ñero iirare cóãtuhami Jesucristopũ. Eropã igu taunirã mua árĩcũ igu yarã árĩmorã iimi Goãmũ mware. Eropã iigu “Òarã ãhrima,” arĩ ñhami igu mware. Eropã ta iimi mware mari Opu Jesucristo mera, Espiritu Santo mera.

Mari dupũ òarire iiburi dupũ árĩro iiaa, arĩ gojañumi Pablo

12 “ ‘Goãmũ iidorebirira árĩpehreri iimasiri ãhraa yure,’ arĩmi Pablo,” arãa mua yure. Yu iimasipehoqueregu ta, yu iiri yure gajirã sãre itamubiricũ ñha irire iibea. Eropã ta árĩpehreri iimasiri ãhraa yure. Eropã iimasiqueregu ta yujuyerisuburi irire eropa iipogu duhumasibiriboca, arĩgu irire iisome yuhũ.

13 Mari bari mari paru maja árĩburi ta ãhraa. Eropiro “Mari paru bari dicuburidiru paru ãhraa,” arãa mua yujurãyeri. Mua eropa árĩquerecũ ta puhru Goãmupũ mari barire mari paru sãre iri pehrea wacũ iigucumi. Eropirã mua yujurãyeri “Mari dupupũ mari ñaribejari iiburi dupũ ãhraa,” arĩraa mua. Eropã árĩbeaa. Mari dupũ ñaribejari iiburi dupũ árĩbeaa. Mari dupupũ mari Opu ya árĩburire iiburi dupũ ãhraa. Eropigu mari Opu mari mera ãhrimi mari igu yare òaro iiboro dopa.

14 Eropigu Goãmũ igu turari mera mari Opu Cristo dupũ mwarore masupũ. Eropã igure masudiro dopa ta mari dupũ sãre masugucumi igu.

15 ¿Múa ya dɔpɔ Cristo ya dɔpɔ áriri iro dopa árĩcũ masibeari mua? ¿Cristo ya dɔpɔ áriri iro dopa árĩrã nomeo ñero iiricũgo mera mari árĩcũ õhari mua pepicũ? Õabirigohracãca.

16 Ñego mera yujugɔ igo mera árĩcũ ïgɔ dɔpɔpɔ igo ya dɔpɔ mera árĩro yuju dɔpɔ iro dopa ta ãhraa. ¿Irire masibeari mua? Eropa arĩ gojara ãhraa Goãmɔ yare erã gojarapũgue. Õpa arãa: “Nomeo ɔmɔ mera árĩrã perã árĩquererã yuju dɔpɔ iro dopa wahama,” arĩ gojamɔriñumi.

17 Mari Opɔ ïgɔ yarã mera ãhrimi. Eropigɔ yujugɔ ïgɔ mari Opɔ mera perã árĩquererã yujugɔ iro dopa ãhrima erã guñari mera.

18 Eropirã nome mera ñero iirire, ɔma mera ñero iirire ɔaribejabiricãque. Irire mua ɔaribejabiriboro dopa ta irire duhrigã waque. Gaji ñerire mari iira mari dɔpɔrĩre mari goroweobeaa. Nomeo mera ñero iigɔpɔ ïgɔ dɔpɔre ñetariaro goroweomi.

19 Espiritu Santore marire ohomi Goãmɔ. Eropigɔ mari dɔpɔ mera wihicɔmi Espiritu Santo. ¿Irire masibeari mua? Eropirã mua dɔpɔ mua ya dɔpɔ gohra árĩbeaa. Goãmɔ ya dɔpɔ ãhraa.

20 Múa ïgɔ yarã árĩmorãre mua ñeri dipuwajare wajyedigɔ árĩmi Cristo. Eropirã ïgɔ yarã árĩrã mua dɔpɔ mera Goãmɔ ïgɔ gamero dopa ta iique. Eropa iirã Goãmɔre umupeorã iiaa mua. Eropirã gajirã sãre ïgɔre umupeocũ iirã iiaa.

7

Mojoto diririre werepɔ Pablo

1 Dohpaguere mua yure serẽpi gojarare yɔ sã mɔare yuhrigura. Masɔ marapo maricũ sãre õhaa yɔ ïacũ.

2 Iri eropa árĩquerecũ ta ero mua árĩro baja ɔaribejari ãhraa. Eropirã ɔma erã nɔcɔ nome marapocɔporo gajirã nome mera erã ñero iibiriboro dopa. Eropirã nome sã erã nɔcɔ marapocɔporo gajirã ɔma mera erã ñero iibiriboro dopa.

3 Eropigɔ marapocɔgure ïgɔ marapore õaro iiro gahmea. Igo marapɔ sãre eropa ta iiro gahmea.

4 Marapocũgo igo dɔpɔ igo ya dihta árĩbeaa. Igo marapɔ ya sã ãhraa ïgɔ ñhadiburo dopa. Igo marapɔ sãre ïgɔ dɔpɔ ïgɔ ya dihta árĩbeaa. ïgɔ marapo ya sã ãhraa igo ñhadiburo dopa ta.

⁵ Mũa perã árĩburire “Iibiricãrã,” arĩbita. Gajisubu mũa perã Goãmu mera mũa wereniguidiarã “I nũcu nũri duhurnirã dohpa, Goãmu mera wereniguirã dohpa,” yujuro mera eropa arĩrã duhumasia mũa. Mũa eropa duhura pũhrũgã mũa dipaturi mũa eropa árĩniguidiro dopa ta árĩque daja watĩ ñero mũaare iidorebiriboro dopa. “Gajirã mera ñero iiboca,” arĩrã mũa basi duhubita. Mũa árĩmũhtadiro dopa ta árĩniguicãque daja.

⁶ Ire mũaare dohpague yũ arĩrare arĩgu mũaare dore gohrari mera dorebeaa. Eropa weregu iiaa mũa iiburire mũa masima ðaro.

⁷ “Uma marapocũporo,” arĩquerecũ, árĩpehrerã mũa yũ iro dopa ta marapo marirã mũa árĩcũ ðaboaya yũre. Mũa eropa árĩcũ gamequerecũ ta Goãmu mari árĩpehrerãre yujuropa iimasiburire apibeami. Yujurãyerire marapocũmasiburire marapocũmasiburire apimi Goãmu. Eropigu ĩgu gajirãpũre marapocũmasibiriburire marapocũmasibiriburire apimi.

⁸ Eropigu marapo marirãre, marapũ marirãre, wapeweyarãre ðpa arãa: Marapo marirã, marapũ marirã mũa árĩmasirã, yũ árĩro dopa árĩcũ ðhaa.

⁹ Eropa árĩmasibirã turaro nomere gahmema. Irire turaro Ƴaribejarã diaye ta marapocũcãporo. Nome sã marapocũporo. Mũa eropa Ƴaribejarã mũa marapocũcũ ðapũricãa. Eropiro marapocũcũ sãre ðapũricãa.

¹⁰ Mũa marapocũrãre, marapocũrã nomere ðpa dorea: Yaha doreri gohra árĩbeaa i. Mari Opũ Cristo ire doredi árĩmi. Mũa nomerũ mũa marapũ sũmarãre cóãbircãque.

¹¹ Mũa marapũ sũmarãre cóãrã, marapũ marirã dujaque. Dipaturi mũa marapũ árĩdigũ mera ahmu ðaro árĩbircũ daja marapũ marirã dujaque. Eropirã mũa Ƴma sã mũa marasã nomere cóãbircãque.

¹² Eropigu mũa sãre gajirã sãre ðpa arãa yũhũ. Mari Opũ ĩgu dorediro árĩbeaa i. Yũhũ ĩgu apidigũpũ ðpa arãa mũaare: Yujurãyeri mũa mera majarã Jesu yarãpũ Jesure umupeobirã nomere marapocũrã ãhraa. Eropigu ðpa arĩ werea mũaare: Mũa marasã nome mũa mera erã dujadiacũ erã nomere cóãbircãque mũapũ.

¹³ Eropirã yujurãyeri mũa mera majarã nome Jesu yarã nome Jesure umupeobirã mera marapocũrã nome ãhraa. Mũa marapũ sũmarã mũa mera erã dujadiacũ erãre cóãbircãque.

¹⁴ Mũa marapũ sũmarã Jesure umupeobirã erã árĩquerecũ ta Jesu yarã nomere erã marapocũcũ, Goãmu ðarã Ƴma iro dopa ĩhami erãre. Eropirã mũa Ƴmapũ Jesu

yarã mũa áricũ mũa marasã nome Jesure umupeobirã nome árībocoma. Erã eropa árīquerecũ ta mũa mera erã nome marapucũcũ Goãmũ ðarã nome iro dopa ĩhami erãre. Ĩgũ eropa ĩabiricũ mũa porã Jesure umupeobirã porã iro dopa árīboũuma. Eropigũ mũa porã sãre ðarã iro dopa ĩhami Goãmũ.

¹⁵ Eropirã mũa Ʃmarũre mũa marasã nome Jesure umupeobirã nome erãpũ mũare cóãcũ ðaroca. Mũa nome sãre mũa marapũ sũmarã Jesure umupeobirã erãpũ mũare cóãcũ ðaroca. Mari ðaro dujacũ gahmemi Goãmũ. Eropirã erã eropa cóãdiacũ “Yũ mera dujaque,” erãre arĩdorebeami Goãmũ. Eropirã mũa erã marasã nome erã marapũ sũmarã árībeaa pare.

¹⁶ Mũa Ʃma mũa marasã nome mũa mera dujaquerecũ erã peamegue wabiriborore Jesure umupeocũ iimasibiriboca. Mũa nome sã eropa ta Jesucristore umupeocũ iimasibiriboca mũa marapũ sũmarãre. Eropirã erã mũare cóãdiacũ ðaroca.

¹⁷ Őpa ta iiro gahmea mũare: Árīpehrerã mũa mari Opũ Cristo mũare ĩgũ árĩdorero dopa ta árīque. Goãmũ mũare ĩgũ apirare iique mũa. Irire árīpehrero Jesu yarã gamenererãre eropa doreniguica yũhũ.

¹⁸ Jesu yarã mũa árīboro core circuncisión iinirã gasiro mero wiri aĩnirã árĩrã eropa ta dujaque. Eropirã Jesu yarã mũa árīboro core gasiro merogã wiri aĩbirinirã árĩrã mũa árĩro dopa ta dujaque.

¹⁹ Dohpaguere gasiro mero wiri aĩnirã mũa áricũ duhpiburi árībeaa. Irire iibirinirã mũa áricũ sãre gajiropa wasome. Goãmũ dorerire mari iicũpũre iri tamera ðhaa.

²⁰ Eropirã Goãmũ Jesu yarã mũare ĩgũ aĩcũ irisubu mũa árĩmũhtadiro dopa ta dujaque.

²¹ Goãmũ mũare Jesu yarã aĩboro core gajirã pohro majarã mũa áricũ ðaroca. Eropa ta dujanique. Mũa Opũ ĩgũ mũare wiudiacũ wirique mũa. Mũa wiricũ sãre ðaroca mũare.

²² Őpa arĩ pepique mũa: “Yũhũ masũ pohro majagũ wiribiriqueregũ ta dohpaguere Jesu yagũ árĩgũ, ĩgũ wiudigũ iro dopa ãhraa ĩgũ yare iiboro dopa,” arĩ pepique. Eropa ta gajirã Goãmũ Jesu yarãre aĩcũ masa pohro majarã mũa árĩbiriquererã ðpa arĩ pepique: “Dohpaguere Jesu pohro majagũ ãhraa yũhũ,” arĩ pepique.

²³ Mari ĩeri dipuwajare mari ĩgũ yarã árĩmorãre wajayetuhadi árĩmi Cristo. Eropirã ĩgũ dorero dopa iique. Mũa iiburire masa dorebircãporo.

24 Eropirã yu acawererã, Jesu yarã árĩmorã Goãmũ mũare ïgũ aĩcũ irisubu mũa árĩmũhtadiro dopa ta dujaque. Eropa dujarã Goãmũ mera õaro árĩque.

25 Dohpaguere marapo marirãre, marapũ marirã sãre werediaa mũare. Yu wereburi mari Opũ weredorediro gohra árĩbeaa. Eropa árĩbiriquerecũ yũhũ ïgũ mojomoro ïadigũ, ïgũ itamudigũ árĩcũ mũa yu wererire õaro mera peerãca. Õpa werea mũare.

26 Dohpaguere mari ñero tarirã iica. Eropirã mũa árĩro dopa mũa dujacũ õhaa yũre.

27 Eropirã mũapũ marapocurã, marapũcurã sã eropa ta dujaque. Erãre cóãbircãque. Marapo marirã, marapũ marirã sã mũa árĩrã eropa ta dujaque. Marapore o marapũre amabita.

28 Eropa yũhũ mũare arĩquerecũ "Marapocũgũra," arĩcũ gajiropa árĩbeaa mũmare. Eropirã mũa nome sãre marapũcudiacũ õaroca. Õpa ãhraa. Irisubu ñero taririsubu marapocurã, marapũcurã mũare teboricuburi dujaroca. Eropigũ mũare eropa teboricuri arĩgũ, marapo marirã, marapũ marirã dujaque, arãa yũhũ.

29 Yu acawererã, eropa arĩgũ õpa arĩdiagũ iiaa. Mari ñero tariboro merogã duhyaa. Eropirã dohpaguere marapo marirã Goãmũ yare erã õaro mohmemasiro dopa ta, õaro mohmero gahmea marapocurã sãre. Eropirã marapũcurã nome sãre eropa ta Goãmũ yare õaro mohmero gahmea.

30 Eropirã mari ñehamere orequererã Goãmũ yare mohmeboropũre guñaro gahmea. Bosenu árĩrã mucubiriquererã Goãmũ yare mohmeboropũre guñaro gahmea. Mari asũrare opaquererã irire guñabircãro gahmea. Goãmũ yare mohmero gahmea.

31 I yeba dohpague árĩro dopa pehrero iiaa. Eropirã i yeba majare iiburire wũaro guñabircãro gahmea.

32 Mũa gajinore wũaro mũa guñaricũcũ gamebeaa yũhũ. Marapo marigũ Jesu yagũ árĩgũ mari Opũ Jesu yare ïgũ gamerire guñaniguimi.

33 Marapocũgũpũ Jesu yagũ i yeba maja sãre ïgũ marapo gamerire guñami.

34 Eropigũ peñe guñami. Marapũ marigo mari Opũ Jesu yare iiburire guñaniguimo. Eropa guñago igo igo dupũ, igo pepiri mera ta mari Opũ yago õaro árĩdiamo. Marapũcũgopũ i yeba majare igo marapũ gameripũre burigã iidiamo.

35 Ire mũare arĩgũ iiaa mũare itamubu. Teboricuri dorerire mũare cãhmotadiabeaa. Eropa cãhmotadiabiriqueregũ ta õaro mũa iicũ gahmea. Eropigũ

baja guñaricuro mariro Jesu mari Opu İgu gameri dihtare mua turaro iidiacũ gahmea yũhũ.

³⁶ Mua mera majagu İgu mago igo bũro wacũ İagu marapucudoreporo İgu igore. "İgore õaro iibea. Marapucuro gahmea igore," arĩ pepigu İgu arĩdiro dopa ta nomesoporo. Eropigo igo marapucumasimo. Eropa igore marapucudoregu ñero iibeami.

³⁷ Gajigupu İgu magore "Marapucubiricãporo," arĩbocumi. Yujugu umũre wereyudiro mariro, yujuñe ta pepigu arĩgu, "İgo marapucubiricãporo," arĩgu õaro iimi.

³⁸ Eropigo İgu mago marapucudoredigo õaro wagocumo. İgu mago marapucudorebiridigopu gajigo tauro õaro wagocumo dohpaguere ñero taririsubu arĩcũ.

³⁹ Marapucugore igo marapu mera arĩniguicãdoremi Goãmũ. İgo marapu sĩrira pũhrũ igo gajigu mera igo gamegu mera marapucumasimo daja. Jesure umupeogure marapucuro gahmea igore.

⁴⁰ İgo marapu marigo dujago tauro õaro mucubirigo arĩgocumo igo. Eropa ta arĩ pepia yupu. Eropa arĩgu Espĩritu Santo İgu gamero dopa ta arĩgu iiaa.

8

Goãmarã wéanirãre erã umupeomorã waimurã wejẽ erã apira barire Jesu yarã asũ baburire werepu Pablo

¹⁻⁴ "Gua tamera õaro masia," arĩ pepiraa mua. Eropa arĩ pepirã mua masiri mera gajirãre masitarinugadiarã iiaa mua. Eropa iirã gajirãre itamubea mua. Gajirãre umupeori mera mahirãpu erãre itamua erã Jesucristore umupeonemoboro dopa. "Masiphocãa yũhũ," arĩbiricãro gahmea marire. Eropa arĩrã õaro masibea mari. Eopirã "Õaro masinibirica dohpa," arĩ pepiro gahmea marire. Mari Goãmũre mahirãpũre marire masicũ iimi.

Eropigu goãmarã wéanirãre umupeorã erã pohro apira barire "¿Mari bamasicuri?" arĩ weregura mũare: Goãmarã wéanirã ne duhpimorã arĩbeama. Diaye ta erã wéanirãre ne sĩporãri mara. Eropigu Goãmũ yujugu ta åhrimi. Gajirã goãmarã marima. Ire mari masia.

⁵ Gajirã masa õpa arĩma. "Mari goãmarã bajarã åhrima. Erã mari oparã åhrima," arĩ pepirima. "Umũsiguere, i yeba sãre goãmarã åhrima," erã arĩquerecũ ta maripũre yujugu ta Goãmũ gohra åhrimi.

⁶ İgu mari Pagu arĩpehrerãre, arĩpehrerire arĩdoredigu åhrimi. Eopirã İgu ya arĩburire iimorã åhraa mari. Eropigu mari Opu Jesucristo yujugu ta åhrimi. İgu

árípehrerire mari Pagure ìhacũnugubasadigũ àhrimi. Ìgũ yarã árìmorãre iipũ ìgũ marire. Eropirã ìgũ mera eropa árìniguirãca mari.

⁷ Yũ arĩdiro dopa ta eropa arĩquerecũ gajirã Jesu yarã irire masibeama. Iribojegue erã goãmarã wéanirãre umupeorã “Oã goãmarã ojocarirã àhrima,” arĩ pepimuriñorã. Irisubuguere eropa arĩponirã árìrã dohpague sãre erã wéanirãre erã apira barire barã “Goãmarãre umupeorã iiaa,” arĩ pepirima. Eropirã iri barire barã, “Mari ñero iirã iiaa,” arĩ pepirima òaro masibirã. Eropirã “Ñerire iirã iiaa,” arĩ pepiquererã erã irire iicũ erã pepiri gajiropa waca.

⁸ Eropigũ òpa arĩ werea mũare: Iri barire mari bacũ mari babiricũ sãre Goãmũ mera òaro árìcũ iibeaa marire. Irire mari babirã ñero iibeaa. Mari irire barã sã gajirã tauro òarã árìbeaa mari, arĩ werea yũhũ.

⁹⁻¹⁰ Eropa mũare werequerecũ òaro iique mũa. Iri barire barã mũa árìcũ gajirã Jesu yarã mũare ìabocoma. Mũare ìarãpũ òaro masinibirã “Iri barire barã Goãmũre umupeobeama,” arĩ pepirã árìrãcoma. Eropa arĩ pepiquererã mũare ìhacũ erã sã babocoma. Iri barire eropa barã “Ñero iirã iiaa mari,” arĩ pepirãcoma erã. Erã eropa arĩ pepicũ erãpũre ñero iicũ iiboca mũa. Eropirã òaro iique.

¹¹ Mũarũ masirã árìrã, “Gũa iri barire gũa bacũ òaroca,” mũa arĩ pepirã árìrã gajirã òaro masibirinirãre ñero iicũ iiboca mũa mũare erã ìhacũcũ. Erã ya árìburi sãre sĩridi árìmi Cristo. Eropirã mũa bari mera mũa Cristo yarãre mũa acawererãre ñero iicũ iirã erãre goroweoboca mũa.

¹² Òaro masibirãre mũa acawererãre erã arĩ pepiro dopa iibiricũ erã pepiri gajiropa wacũ iiboca mũa. Eropa iirã Cristo sãre ñero iirã iiaa mũa.

¹³ Eropigũ wéanirãre erã ora barire yũ bagũ yũ acaweregure ñero iicũ iiboca yũhũ. Jesu yarã erã ñero iicũ gamebeaa. Eropigũ yũhũ “¿Erãre ñero iicũ iiri?” arĩgũ, iri barire ne dipaturi basome yũhũ.

9

Pablo Jesu ìgũ apidigũ ìgũ árìrare werepũ

¹ Jesu ìgũ yare buhedore ìgũ apidigũ àhraa. Eropigũ gajirã ìgũ apinirã erã iiro dopa ta iimasia yũ sã. Jesu ìgũ apidigũ ta àhraa yũ sã. Mari Opũ Jesure ìadigũ ta àhraa yũ sã. Eropirã Jesu yare yũ buhecũ mũarũ irire òaro peenirã árìrã ìgũ yarã wahabũ mũa. Mũa eropa ìgũ yarã wara pũhrũ Jesu ìgũ apidigũ yũ árìrare masituhabũ mũa.

² Gajirã yure werewuarã “Ìgũ Jesu ìgũ apidigũ árìbeamì,” arìbocoma. Erã eropa arĩquerecũ ta mũarũ eropa

arīmasibeaa. Mũare yu buhera pũhrũ Jesu yarã warã, “Jesu ĩgu apidigu ãhrimi,” arĩ yũre masituhaa mũa. Eropirã gajirã erã werewuãquerecũ ta mũapũ ĩgu apidigu yu arĩricũre mũa masia.

³ Yũre werewuãrãre õpa ta arĩ yũhrigũra.

⁴ Mũare yu buheri waja yu baburire, yu ihriburire yũre oro gahmea mũare.

⁵ ¿Eropigu marapocũgu arĩgu yu marapo Jesu yago igo arĩcũ igo mera aĩ curimasibiribocuri yũhũ mũa pepicũ? Gajirã Jesu ĩgu apinirã, Jesu pagu porã, Pedro sã erã marasã nome mera erã curiro dopa ta yu sã curimasiboaya. Yũ eropa curicũ yu marapocũgu arĩcũ, igo sãre barire oboaya mũa.

⁶ Yũhũ Bernabé mera mũare õari buherire gũa buhequerecũ ta gũare ne gajinore obeaa mũa. Eropirã gũa basi ta gũa baburire mohme wajatabũ gũa. Gajirã Jesu apinirãpũre erã buheri waja oayoro mũa. ¿Gũa dihta eropa buherã, waja mariro buhero gahmeri mũa pepicũ?

⁷ Yujugu surara ĩgu mohmecũ ĩgu oparã ĩgu arĩburire wajayemũrima. ĩgu basi wajayebeamĩ. Barire otegu sã ĩgu otera dũcacũcũ irire ta tea aĩ bamasimi. Eropigu ovejare ĩhadibugũ ĩgu ejorã apĩcore aĩmasimi ihribu ĩgu sã.

⁸ Eropa arĩgu masa erã doreri dihtare mũare werebeaa. Goãmu ĩgu dorerigue ĩgu arĩra sãre mũare weregu iiaa.

⁹ ĩgu dorerire erã gojarapũgue õpa arĩ werea: “Wecu trigo yerire ĩgu guburi mera ĩgu suhri wearisubu ĩgu badiacũ ĩgu disirore cãhmotabiricãque,” arĩyoro Moise dorerigue. Goãmu eropa doregu wecuare ĩhadiburire arĩgu iibiriñumi.

¹⁰ Eropa doregu gũare Goãmu yare buherãre itamu-dorerore weregu iĩñumi marire buhebu. Pohere séanirã sã iri dũcare aĩnirã sã erã mohmera pũhrũ, dũcacũrisubu iri dũca wajataborore cohrema. Eropa mohmerãre barire oro gahmea marire.

¹¹ Mũare Goãmu ya buherire õari buherire buhebu gũa. ¿Gũa eropa buheri waja mũapũre gũare barire obiro gahmeri mũa pepicũ? Oro gahmea mũare. Mũa ocũ õaboaya gũare. Eropa arĩquerecũ mũa obirimũribũ gũare.

¹² Eropa gũare obirã arĩquererã ta gajirã buherã mũare irire odorecũ mũa erãpũre ohayoro. Erã mũare odorecũ gũapũ erã tauro odoremãsiboaya mũare turaro gũa buheri waja.

Eropa dorebonirã arĩquererã ta gũapũ “Gũare oque,” ne arĩbiribũ. “Cristo ya buherire gamebiribocoma gũa dorecũ,” arĩrã gũare dũhyaquerecũ ta mũare ne odorebiribũ.

13 Masa Goãmure umupeorã Goãmũ wihigue bari aĩ apima. I wihi mohmerã iri barire aĩ bahama. Eropirã Goãmure erã umupeori mesa pohro mohmerã waibugure erã soedigure masa erã aĩ apidigure merogã aĩ bahama erã sã. ¿Irire masibeari mũa?

14 Eropa erã iidiro dopa ta õari buherire buherãre erã buhera waja oro gahmea erã baburire. Eropa ta iidorepũ mari Opũ Jesu.

15 Eropigu mũare serẽbodi árĩqueregũ ta yũhũ gajinore ne serẽbiribũ mũare. Eropigu ire dohpaguere gojagu gajinore waja gamebu gojagũ iibeaa. Mũare ne waja seadiabeaa. Sĩribu árĩqueregũ ne waja gamesome yũhũ mũare. Waja mariro buhegũ sũaa. Eropigu mũare iri buhera waja ne wajata basome.

16 Õari buherire buhedoregũ apimi yũre Goãmũ. Irire buheri masũ árĩgũ tiiaa yũhũ. Õari buherire buhebigũ ñero waboaya yũhũ. Eropigu iri buherire buhegũ “Gajirã masitarinagagũ ãhraa,” arĩbodigũ ne arĩbeaa yũhũ.

17 Õari buherire yũ gamero buhegũ yũ buheri waja wajaseaboaya yũhũ. Yũ gamero buhebeaa. Goãmũ ãgũ yare buhedoregũ apimi yũre.

18 Õari buherire buhegũ mũare yũ buhera waja serẽmasiboaya yũhũ. Eropa serẽmasiqueregũ ne gajinore serẽbigũ waja mariro iri buherire buhea mũare. Yũhũ eropa iigu árĩgũ “Õaro wajatagũca Goãmũ mera,” arãa. Iri ta ãhraa yũ wajatari.

19 Eropigu yũhũ masare buhegũ erã yũ buherire peediacũ õpa iigu iiaa Jesu yarã erã waboro dopa. Ne masa pohro majagũ arĩbiriqueregũ ta arĩpehrerãre pohro majagũ iro dopa iiaa yũhũ erã yũ buherire peediacũ iigu.

20 Eropigu yũ acawererã judio masa mera árĩgũ, judio masa iiro dopa ta iiaa yũhũ yũ buherire erã peediacũ iigu. Goãmũ ãgũ dorera Moiserẽ ãgũ apira yũre iri dorebiriquerecũ ta, iri doreri dihtare umupeorã mera árĩgũ erã dorerire umupeogu iro dopa ta ãhraa yũ sã. Eropa ta iiaa yũhũ erã yũ buherire erã peediacũ iigu Jesu yarã erã waboro dopa.

21 Moise dorerire umupeobirã mera árĩgũ iri dorerire umupeobigu iro dopa ta iiaa. Yũ buherire erã peediacũ eropa ta iigu iiaa yũhũ erã Jesu yarã erã waboro dopa. Eropa iiqueregũ Goãmũ dorerire umupeoniguia. Cristo dorerire iiaa.

22 Eropigu õaro masibirã mera árĩgũ erã iro dopa ta ãhraa. “Masipehogũ ãhraa,” ne arĩbeaa yũhũ erãre. Eropa ta iiaa yũhũ erã sã Jesu yarã erã waboro dopa. Eropigu

árīpehrerã masa erã árīricuro dopa ta iiaa yũhũ erãre yũ buherire peediacũ iigu. Yujurãyeri Jesu taurã erã waboro dopa iiaa.

²³ Eropa iiaa õari buherire árīpehrerã erã õaro pee-burire. Erã eropa peera pũhrũ Jesucristo erãre peamegue wabonirãre taumi. Eropigu yũhũ erã mera õaro mucubiri-borore eropa iiaa.

²⁴ Mũare werenigui queori mera õpa werea. Omabirarã erã omarã árīpehrerã omama. Erã eropa omapehrequerecũ ta bũrigã omaturagũ omajamũhtami. Eropa ejamũhtagũ wajatami. Eropirã erã bũrigã omadiro dopa ta mua sã Goãmũ gamerire bũrigã iique mua wajataboro dopa.

²⁵ Árīpehrerã omamorãpũ yũ dũpũre gajiropa iiri arĩrã gajinore duhucãma erã omaboro core. Eropa ta iima erã pũri berore erã wajataboro dopa. Iri pũri bero erã dipuru peyama masa erã wajatarare ĩaboro dopa. Eropiro erã eropa ii erã wajatara bero mata pehrea wahaa. Mari sã Goãmũ yare õaro buhemorã gajinore duhucãrã mari wajataboro dopa. Iri mari wajatari tamera ne pehrebeaa.

²⁶ Eropigu omabiragu ĩgu noho gamero omaro dopa iibeaa yũpũ. Yũ gamero iimaacãbeaa. Goãmũ gamerire masigu iiaa gajirãre itamuboro dopa.

²⁷ Eropigu yũ gamero dopa iibeaa. Yũ ũaribejari yũre dorebeaa. Masa erã Goãmũ mera taricũ itamuburi dihtare iiaa. Eropa iibigu gajirãre Goãmũ yare buhedigu yũ árīquerecũ ta Goãmũ yũre “Õaro iibũ,” arĩbiribocumi.

10

“Goãmũ āhrimi,” erã arĩ goãmarã wéanirãre umupeodorebiripũ Pablo

¹ Eropirã yũ acawererã, ire masique mua. Mari ñecũ sumarã mura iribojegue majarã árīpehrerã murgue mera Goãmũ árĩmuriñumi. ĩgu imica curu mera erãre wamũhtañumi. Erã ĩgũre eropa nũrũsia wahgãrã wũariya deco diariya waĩcũriya eja õaro taribuja wañuma.

² Erã árīpehrerã imica curu doca árĩnirã wũariya taribujanirã Moise yarã wañuma.

³ Eropirã erã árīpehrerã ũmaro maja dijuri barire bamuriñuma. Goãmũ ĩgu orire bamuriñuma.

⁴ Eropa barã erã árīpehrerã Goãmũ ĩgu ori deco sãre ihrimuriñuma. Irisubuguere erã ihriburi decore Goãmũ ĩgu apira ũtãyegue iri decore wiridoreñumi. Erã iri deco ihridiro dopa Cristo iri ũtãye iro dopa ĩgu ta erãre ojocariro odi árĩñumi. ĩgu erã mera árĩmuriñumi.

⁵ Erã eropa wanirã erã árĩquerecũ ta erã mera majarã bajarã ñero erã iicũ ñagũ Goãmũ erãre ñhasuabiriñumi. Eropigũ erãre masa mariogue boacũ iĩñumi Goãmũ.

⁶ Erãre eropa wara marire gũisãburi ãhraa erã iidiro dopa ta mari ñerire ñaribejabiriborore.

⁷ Eropirã goãmarã wéanirãre erã umupeodiro dopa iibita mũa. Wecũre erã wéadigũre erã umupeodirore Goãmũ yare erã gojarapũ werero õpa arãa: “Masa erã ba doaja ihrituha, wahgãñugaja, bosenu iĩñuma,” arĩ gojamũriñumi iribojegure.

⁸ Pũhrũ gajirã erã mera majarã nome mera ñero iĩñuma. Erã iidiro dopa iibiricãro gahmea marire. Erã eropa ñero iira dipuwaja yujunũ ta erã veintitrés mil gohra masa sãria wañuma.

⁹ Gajisubugue gajirã erã yujurãyeri Goãmũ erã gamero dopa iicũ gamerã õpa ñgũre arĩ turiñuma. “Mari Opũ itamumasibeami marire,” arĩñuma Goãmũre turirã. Eropa arĩ turirã ñgũre guacũ iĩñuma. Erã iidiro dopa iibiricãro gahmea marire. Erã eropa iira dipuwaja Goãmũ erãre añaa mera cũri wejẽdoreñumi.

¹⁰ Gajisubu daja erã mera majarã gajirã ñerã erã basi Goãmũ iirare dũyasocũ anyu masare wejẽgũpũ erãre wejẽñumi. Eropirã erã iidiro dopa iibiricãro gahmea.

¹¹ Eropa iĩñumi Goãmũ marire buhebu. Maripũ pehrerinũ coregã árĩrã ãhraa. Mari eropa árĩrã árĩcũ iribojegue majarã erã eropa warare Goãmũ gojadoreñumi marire gũisãgũ.

¹² Eropirã mũapũ “Yũ tamera õaro iiaa yũhũ,” arĩ pepirã árĩrã õaro iique ñerire iiri arĩrã.

¹³ Mari árĩpehrerã yujugũ dũhyaro mariro yujuyerisuburi ñerire guñaa. Eropa guñarã iri ñerire iidiaa. Mari eropa iidiaquerecũ ta Goãmũpũ marire itamuniguicãgũ iimi. Ñgũ arĩdiro dopa iigũ ãhrimi. Eropigũ marire iri ñerire iidiarare tarinũgacũ itamumi. Marire guñaturacũ iimi. Eropa guñaturarã warã iri ñerire iidiasome. Eropirã árĩpehreri ñeri iidiaquererã iri ñerire tarinũgarãca.

¹⁴ Eropirã mũa yũ mahirã yũre peeque. Ne merogã goãmarã wéanirãre ne umupeobiricãque.

¹⁵ Mũa õaro pee masirã mũa árĩcũ mũare werea. Eropirã yũ arĩri diaye árĩcũ masique mũa.

¹⁶ Mari gamenere bocatĩrirã Goãmũre “Õhaa,” arĩra pũhrũ iri vino deco dicũripare ihria mari. Eropa ihrirã “Cristo mari ya ñero iira dipuwajare ñgũ di cóãra mera ñgũ mera árĩrã ãhraa mari,” arĩ masia. Eropirã panrure mari Cristo yarã nuha barã iiaa mari. Eropa barã “Mari

ya árĩburire ĩḡu dũpũ crusague sĩrira mera mari ĩḡu mera árĩrã yuju dũpũ iro dopa ãhraa mari,” arĩ masia.

17 Eropirã mari yujuru panrure nuha baro dopa árĩpehrerã mari Cristo yarã yuju dũpũ iro dopa ãhraa. Eropirã yuju curu ta ãhraa.

18 Moise dorerire iirã erã iirire guñaque mũa. Goãmũ wihigue erã waibũḡure wejẽ soema Goãmũre umupeomorã. Erã eropa wejẽ soera pũhrũ erã soedigũre bahama. Eropa barã yuju curu ta Goãmũ yarã árĩrã ta iima.

19 Ōpa ta arĩḡũ goãmarã wéanirã diaye ãhrima, arĩbeaa. Goãmarã marima, arãa. Eropirã goãmarã wéanirã eropárĩcãrã iima. Eropiro goãmarã wéanirã pohrogue erã apira baripũ bu gohra ta ãhraa. Iri bari bacũ marire gajiropa iibeaa, arãa yũhũ.

20 Yũhũ eropa arĩquereḡũ ta iri barire mũa bacũ gamebirica. Ōpa ãhraa iri: Jesu yarã árĩbirã goãmarã wéanirã pohrogue waibũḡure wejẽburire apirã Goãmũre umupeobeama. “Ḡũa goãmarãre umupeorã iiaa,” arĩrã watẽapũre umupeorã iima erã. Erã eropa umupeocũ erã umupeori wihigue erã mera mũa batamurã watẽa mera árĩrã iro dopa iirã iica mũa. Mũa eropa iicũ tamerare ne gamebeaa.

21 Bocatĩrirã vino deco dicũripare ihrirã panrure nuha barã “Cristo mera ãhraa,” arãa mari. Mari eropa iirã árĩrã, watẽa yapũre ihri, bamasibeaa mari. Eropirã goãmarã wéanirã pohro apira barire erãre umupeorã mera iri barire batamumasibeaa mari.

22 Mari Opũ ĩḡu yarãre mahimi. Eropirã eropa barã watẽa yarã iro dopa iirã ĩḡure guacũ iirãca. ĩḡu guacũ mũa turabeaa ĩḡu dipuwaja cãhmotaboro dopa.

Goãmũ ĩḡu gameri dihtare iique, arĩ gojañumi Pablo

23 “Goãmũ iidorebirira árĩpehreri iimasiri ãhraa yũre,” arĩboca mũa. Mũa iiri ñeri iri árĩbiriquerecũ ta irire iirã gajirãre itamubiriboca mũa. Eropirã Jesure umupe-onemocũ iibiriboca mũa gajirãre.

24 Mari ya õaro árĩburi dihtare iibiricãro gahmea. Gajirã ya árĩburi sãre õaro itamuque mũa.

25-26 Eropirã gajirãre itamuburire õpa iique: Bari duaroguerẽ barire asũrã warã “¿I bari goãmarã wéanirã pohrogue erã apira bari ãhriri?” arĩ, serẽpiñabiricãque. “¿Ñerire iiri?” arĩrã, serẽpiñaboca mũa. Goãmũ yare gojarapũgue õpa ãhraa: “I yeba árĩri árĩpehreri Goãmũ ya ãhraa,” arĩ gojañuma. Eropirã iri barire “Goãmũ badorebirira bari ãhraa,” arĩbiricãque.

27 Jesure umupeobigu mũare badoregu ĩgu sihucũ wadiarã waque. Eropa warã mũare ĩgu ejorire baque. “¿I bari goãmarã wéanirã pohro erã apira bari ãhriri?” arĩ serẽpiñabita.

28 Gajigu ero árĩgu òpa arĩbocumi mũare: “I bari goãmarã wéanirãre erã wejẽ apira dihi ãhrra,” arĩbocumi ĩgua. ĩgu eropa arĩ werecũ iri bari tamerare babita. Mũare eropa arĩ weredigu “Iri barire barã ñerire iirã iica,” arĩ pepibocumi. ĩgu eropa arĩ pepibiriboro dopa “Babita,” arãa yũhũ mũare.

29 Eropa arĩgu mua ya árĩburire weregu iibea. Mũare iri barire weredigu ya árĩburipũre arĩgu iiaa mũare. Irire mua bacũ ĩha mũare ĩhacũ ĩgu sã babocumi. ĩgũpũ eropa bagu “Ñero iigu iiaa,” arĩ pepibocumi. Eropirã “¿Eropa iibocuri ĩgu?” arĩ iri barire babita.

“Babita,” yũ arĩcũ òpa arĩ yũhriboca mua yũre: “¿Dohpa árĩrono gajigu gajiropa pepiri arĩrã gua gamero iimasibiribocuri gua?”

30 Goãmũre gua ‘Õhaa,’ gua arĩra pũhrũ gua bacũ gajigu irire gua barare gũare weresãmasibeami,” arĩboca mua yũre. Yũpũ òpa yũhria.

31 I árĩpehrerire mũare yũ wererare weregu òpa arĩgu iiaa mũare: Ûmũri nũcũ mua mohmerã, barã, ihrirã, árĩpehrerire iirã irire Goãmũ ya árĩburi dihta iique. Eropirã árĩpehrerã masa Goãmũre “Õagũ, turagu ãhrimi,” erã arĩ umupeoboro dopa iique.

32 Ne mua iiri mera judio masare, judio masa árĩbirãre, Goãmũ yarã sãre goroweobiricãque.

33 Òpa iiaa yũpũ. Masa árĩpehrerã erã sũaboro dopa iiaa árĩpehreri mera. Eropigu yũ gamero dopa iiniguicãbeaa yũ. Gajirã masa ya árĩburipũre òaro iiaa. Erãre Jesucristore umupeoborore eropa iiaa. Erã ĩgũre umupeora pũhrũ erãre peamegue wabonirãre taugũcumi.

11

1 Cristo gajirã ya árĩburire árĩpehrerire iimi. Eropirã Cristore yũ ĩhacũdiro dopa ta mua sã yũ iidiro dopa ta yũre ĩhacũque.

Corinto majarã erã gamenererogue nome erã iiborore wererũ

2 Mũare yũ árĩpehrerire buherare, buhe turiarare guñapeo waĩcũabũ. Eropa guñarã mũare yũ arĩrãre yũ iidorediro dopa ta ii waĩcũabũ mua. Eropa iirã òaro iiaa mua.

3 Dohpaguere i sãre mũa masicũ gahmea: Árĩpehrerã ume opũ Cristo ãhrimi. Eropigu nomeo opũ umũ ãhrimi. Eropigu Cristo opũ, ĩgu Pagũ Goãmũ ãhrimi.

4 Mũa Goãmũre umupeo gamenerecũ yujugũ Goãmũre serẽgũ dipuru bũa serẽgũ õaro ĩgu opũre umupeogũ iibeami. Goãmũ yare weretaugũ sã dipuru buagũ ĩgu opũre umupeobeami ĩgu sã. Eropirã umapũ Goãmũre serẽrã dipu buabiricãporo.

5 Eropigo nomeopũ dipuru buabigo Goãmũre serẽgo igo marapũre umupeogo iibeamo. Goãmũ yare werego sã dipuru buabigo eropa ta igo sã umupeobeamo. Eropirã nomepũ Goãmũre serẽrã dipu buaporo. Dipuru buabigo igo poarire erã õaro wũapehodigo iro dopa ta ãhrimo igo.

6 Dipuru buadiabigore igo poarire seapehoporo. "Yũ poarire sea wũapehodiabeaa. Gũhyasĩriboca," arĩgo igo dipurure buaporo.

7 Mũa umapũ Goãmũ iro dopa oparã ãhraa. Eropirã Goãmũ õagũ, turagũ, ĩgu árĩricũre ĩhmuma erãpũ. Eropirã erã dipu buabiricãporo. Nomepũ "Gũa oparã ume ãhrima," arĩ ĩhmuma. Eropirã erãpũ dipure buaporo.

8 Goãmũ umũre iigũ, nomeo ya dũpũ mera umũre iibiriĩnumi. Nomeopũre iigũ, umũ ya dũpũ mera igore iĩnumi.

9 Eropigu umũre iigũ sã nomeo yagũ árĩbure iibiriĩnumi. Nomeopũre iigũ umũ yago árĩbore iĩnumi Goãmũ igore.

10 Eropirã mũa Goãmũre umupeorã gamenerecũ nome dipure buaporo anyua sã erã ĩhasũaboro dopa. Eropa buarã "Uma gũa oparã ãhrima," arĩ ĩhmurã iima.

11-12 Goãmũ nomeore iigũ, umũ dũpũ maja mera iĩnumi. Dohpaguere ume masa dehyoarã nome dũpũgue masa dehyoama. Eropiro umũ ĩgu árĩmũhtabiricũ nome mari-boĩnuma. Eropi nome maricũ ume sã mariboĩnuma. Eropirã erã Jesu yarã árĩrã, ume seyaro nome seyaro árĩmasibeama. Goãmũpũ árĩpehrerire apidi árĩmi. I yeba árĩrire i yeba iiburire apidi árĩmi.

13 ¿Mũa basi dohpa pepiri? ¿Nomeo igo dipuru buabigo, Goãmũre igo serẽcũ õhari mũa pepicũ? Õabeaa.

14 Eropirã umũ ĩgu poa ñapo ĩgu ómacũ ĩha masa werewũama. Árĩpehrerã masa irire masima.

15 Nomeopũ poa ñapo ómago árĩcũ õapũrica. Igo poari igo dipuru buari iro dopa ta ãhraa. Iri sãre árĩpehrerã masima.

16 Mũa mera majagũ ire yũ wererare dũyasodiagũ õpa masiporo ĩgu: Irire yũ arĩdiro dopa ta eropa dihta iinigu-icãa mari. Gajirã Jesu yarã sã erã gamenererogue eropa

dihta iiniguicāma.

Bocatīrirā erā barisubu goroweoñorā Corinto majarā

17 Dohpaguere m̄are gajinore werebu, “Ōaro iirā āhraa,” arībeaa ȳh̄ m̄are. M̄aa gamenererā ōaro iirā iibeaa. Eropirā m̄aa gamenererore goroweorā iiaa.

18 Ōpa arī werem̄htagura m̄are: M̄aa gamenererogue eropa game d̄ayasorā m̄aa basi yujurayeri cururi d̄uca wariayoro m̄aa. Gajirā ȳre irire erā eropa arī werecū “Diaye ta árīca,” arī pepia ȳh̄.

19 Eropa d̄uca warirā ōpa arīca m̄aa: “D̄uca wari wiriaro gameca marire Jesu yarā gohra árīr̄p̄ure ihmuborore,” arīca m̄aa basi.

20 M̄aa basi gamenere barā m̄aa yujuro árībirā mari Op̄u Jesucristo dorediro dopa diaye ta bocatīrirā iibeaa.

21 M̄aa gamenere barā yujurāyeri m̄aa seyaro bam̄hta, ihrim̄hta gajirāre corero mariro. M̄aa eropiicū gajirā oaboa wahama. Gajirāp̄u merea wahama.

22 ¿M̄aa seyaro badiarā duhp̄irā m̄aa ya wirigue babeari? ¿Eropirā duhp̄irā dohpaguere Goām̄u yarā gamenererore “Duhp̄iburi árībeaa,” arīdiari? ¿Eropirā duhp̄irā Jesu yarāre mojomoroc̄r̄are bari moor̄p̄ure m̄aa guhyas̄iuro taricū iiri? ¿Dohpa arī wereḡucuri ȳh̄ m̄are? Ōaro iirā iiaa m̄aa, arībeaa ȳh̄.

Goām̄u yare bocatīrirā diaye erā iiburire werep̄u Pablo

23 Goām̄u yare bocatīriburire mari Op̄u Jesu weremi ȳre. Eropa ĩgu wererare ȳp̄u m̄are irire wereb̄u. Iri ōpa āhraa: ĩḡure ĩhaturirāre Juda ĩgu sihurisubu iri ñami ta mari Op̄u Jesucristo panrure aĩ,

24 Goām̄ure “Ōhaa,” arīp̄u. ĩgu eropa arīra p̄h̄ru iriru panrure nuha, ĩgu buherāre guerep̄u. Eropa guereḡu ōpa arīp̄u: “I ȳ d̄up̄u āhraa. M̄aa ya árīburire s̄iriḡuca. Ȳre m̄aa guñaburire ȳh̄ dohpaguere m̄are ihmuro dopa aĩ baque,” arīp̄u Jesu mari Op̄u.

25 Erā bara p̄h̄ru ĩgu panrure aĩdiro dopa ta ihriripare aĩgu ōpa arīp̄u: “M̄aa ñeri iirare cóābu s̄iriḡuca. Eropa ĩgu ȳ dire cóāḡuca. Ȳ di cóāra mera Goām̄u masare ‘M̄aa mera amugura,’ ĩgu arīdiro ojogoroc̄uroca. Ipa dic̄urire ihrirā ȳ di cóārare guñarāca. Ire ihrirā m̄aa ȳre guñaburire ȳh̄ m̄are ihmudiro dopa iique,” arīp̄u Jesu.

26 Ȳ wereديو dopa ta iru panrure m̄aa barā, ihririre ihrirā, Jesu mari Op̄u mari ya árīburire ĩgu s̄irirare ihmurā iiaa m̄aa. Eropa ihmuniguirāca m̄ap̄u ne ĩgu i yebague ĩgu dujarac̄gue.

Goãmũ yare bocatĩrimorã õpa iique, arĩ gojañumi Pablo

²⁷ Mũa Goãmũ yare bocatĩrimorã gamenere baha, ihrirã, umupeoro mariro guhyadiaro mariro iirã dipuwajacurãca. Eropa iirã mari ya árĩburire Jesucristo ĩgu dũpũre ĩgu di cóãra sãre wereyaro dopa iirã iiaa mũa.

²⁸⁻²⁹ Õpa arĩ guñaro gahmea: “Mari Jesu yarã gamenererã yuju curu yuju dũpũ iro dopa ãhraa. Mari Jesucristo yarã ãhraa,” arĩ guñaro gahmea. Irire queoro guñabirã, mari iri panrure baha, ihriripare ihrirã queoro iibirã mari dipuwajacumorã árĩrãca. Eropirã mari bocatĩriboro core mari árĩricurire guñamũhtarõ gahmea ñero iiri arĩrã. Eropa iira pũhrũ bocatĩri ihri bamasia mari.

³⁰ Eropa guña amubirira waja bajarã mũa mera majarã dorecurã árĩcoma. Erã yujurãyeri turabirã árĩcoma. Eropirã gajirã erã eropa iira dipuwaja sĩria wañuma.

³¹ Erã baha, ihriboro core erã árĩricurire õaro guña, erã ñeri iirire duhunirã, erã ñeri dipuwajare dipuwajacubiriboñuma.

³² Mari Opũpũ marire ĩgu yarãre dipuwaja moagu mari ñeri iirire duhucũ iigu iimi. Jesure gamebirãre ĩgu dipuwaja moaboro dopa marire dipuwaja moabiriborore eropa iimi. Mari peamegue wabiriborore dohpaguere marire dipuwaja dabero moami mari Opũ.

³³ Eropirã yũ acawererã, bocatĩrimorã gamenererã, mũa basi corenique.

³⁴ Eropirã mũa mera majarã oaboarã, erã ya wihigue bamũhtarõ. Eropirã bocatĩrimorã õaro gamenere baque mũa ñero dipuwajacurã wabiriborore. Gajinore weredi-arabũ mũare. Pũhrũ yũ basi ejagu mũare weregũra irire.

12

Goãmũ ya árĩburire mari mohmeburire apigu marire irire iimasicũ iimi Espĩritu Santo, arĩ gojañumi Pablo

¹ Yũ acawererã, õpa mũare weregũ ire mũare masicũ gahmea. Goãmũ ya árĩburire mari mohmeburire apigu marire árĩpehrerãre irire iimasicũ iimi Espĩritu Santo.

² Mũa Jesu yarã árĩnibirã gajiropa árĩri buherire pee nũrũrã árĩrã, mũarũ goãmarã wéanirãre umupeoyoro. Noho mũa bocarãre wereniguibirãre umupeoyoro. Irire masia mũa.

³ Eropa arĩnirã mũa árĩcũ dohpaguere õpa arĩ werediaca mũare. Espĩritu Santo itamuri mera wereniguirã “Jesu ñero waporõ,” ne arĩmasibeama. Eropirã Espĩritu Santo itamuri mariro wereniguirãpũ “Jesu árĩpehrerã wecague opũ mari Opũ ãhrimi,” arĩmasibeama.

4 Goãmũ ya árĩburire mohmemasiburi baja áhraa. Irire marire iimasicũ iigũpũ yujugũ ta áhrimi. Ígũ Espírítu Santo áhrimi.

5 Eropiro Goãmũ ya árĩburire iimasiri mera mari mohmeburi baja áhraa. Irire mari iiburire doregũ yujugũ ta mari Opũ Jesu áhrimi.

6 Mari ígũ yarã ígũ ya árĩburire iimasiri mera mari mohmeri yujuropa ta árĩbeaa. Iri mohmeri ðaro wacũ iigũ yujugũ ta Goãmũ áhrimi.

7 Espírítu Santo marire Jesu yarã nũcũre mari iimasiburire apigũ Goãmũ turarire íhmuğũ iimi. Ópa ta iimi ígũ Jesu yarãre árĩpehrerã mari ðaro mohmeboro dopa.

8 Yujurãyerire ðaro masiri mera werecũ iimi Espírítu Santo ta. Eropigũ gajirãre Goãmũ yare ðaro buhecũ iimi ígũ Espírítu Santo.

9 Eropigũ gajirãre “Mari Goãmũ mera ðaro iimasia,” arĩ Goãmũre guñaturacũ iimi Espírítu Santo ta. Eropa iigũ gajirãre turarire Espírítu Santo ta ohomi ígũ. Iri turarire ígũ ocũ erãpũ dorecũrãre ðarã wacũ iima. Espírítu Santo yujugũ ta árĩgũ iri turarire ohomi.

10 Eropigũ ígũ gajirãre deyro moarire iimasicũ iimi ígũ. Eropa iigũ Goãmũ yare ðaro weretaumasicũ iimi ígũ gajirãre. Eropa iigũ gajirã Jesu yarãre buherire ðaro beyemasicũ iimi ígũ. Eropa masirã watĩ ya buheri árĩcũ masima erã. Espírítu Santo gohra ya iri buheri árĩcũ sãre masima erã. Eropigũ gajirãre erã peeyamarirã yare wereniguimasicũ iimi ígũ. Eropigũ peeyamarirã yare erã wereniguicũ gajirãre weretaumasicũ iimi.

11 Iri árĩpehrerire iimasirire apigũ ta Espírítu Santo ta yujugũ ta áhrimi. Ígũ gamero dopa ta marire yujurãyerire mari mohmeburire apimi.

Cristo yarã árĩrã yuju curu ta áhraa mari, arĩ gojañumi Pablo

12 Werenigui queori mera mũare weregũra: Mari dũpũ yuju dũpũ árĩquerecũ ta, mojotori, cuiri, guburi, gamiri, iri tamera baja áhraa mari dũpũre árĩri. Eropa áhraa mari Cristo yarã. Bajarã árĩquererã ta yuju dũpũ iro dopa ta yuju curu ta áhraa ígũ mera.

13 Eropirã Cristo yarã árĩrã ígũ dũpũ iro dopa yuju curu ta áhraa mari. Judio masa, judio masa árĩbirã, pohro majarã, pohro majarã árĩbirã, baja cururi árĩquererã ta yujugũ árĩgũ ígũ dũpũ iro dopa yuju curu ta áhraa mari. Espírítu Santo yujugũ ta árĩgũ ígũ turari mera waĩyesũnirã marire yuju curu Cristo yarã árĩcũ iimi. Eropirã mari árĩpehrerã yujugũ Espírítu Santore opaa Cristo ya curu majarã árĩrã.

Eropirã mari Cristo yarã yuju dũpũ iro dopa ãhraa.

14 Mari dũpũ yuju dũpũ árĩquerecũ ta mojotori, cuiuri, guburi, gamiri iri mari dũpũ árĩri baja ãhraa.

15 Mũ guburo wereniguiri guburo árĩro õpa arĩboya mũre gajiropa arĩro: “Mũ mojoto árĩbeaa yũhũ. Eropiro mũ dũpũ maja árĩbeaa yũhũ,” arĩboya. Mũ guburo eropa arĩquerero ta mũ dũpũ maja árĩro ta iiaa.

16 Mũ gamiro wereniguiri gamiro árĩro õpa arĩboya mũre: “Mũ cuiuru árĩbeaa yũhũ. Eropiro mũ dũpũ majaru árĩbeaa yũhũ,” arĩboya. Mũ gamiro eropa arĩquerero ta mũ dũpũ maja gamiro árĩro ta iiaa.

17 ¿Mari dũpũ cuiuru dihta árĩcũ dohpa peebocuri mari? Masiya mara. ¿Eropirã mari dũpũ gamiro dihta árĩcũ dohpa ii wĩji pepibocuri mari? Masiya mara.

18 Eropa árĩbeaa mari dũpũ. Õpa ãhraa. Mari dũpũ árĩrinore árĩpeherrerire Goãmũ ĩgũ gamero dopa ta apidi árĩmi mari dũpũre.

19 ¿Mari dũpũ árĩri maricũ dohpa waboyuri mari dũpũ? Mariboya.

20 Mari dũpũ õpa ãhraa: Yuju dũpũ árĩquerecũ ta mari dũpũ árĩri baja ãhraa. Eropa ta mari Jesu yarã yuju dũpũ iro dopa árĩquererã bajarã ãhraa mari basi game itamumorã.

21 Eropiro mũ cuirupũ mũ mojotore “Mũ itamucũ gamebeaa,” arĩmasibea. Eropiro mũ dipuru mũ guburire “Mũ itamucũ gamebeaa,” arĩmasibea.

22 Gaji mari dũpũ árĩrĩre “Bu árĩñariri ãhraa,” mari arĩripũre upũtũ gahmea mari.

23 Eropirã gaji mari dũpũ árĩrĩre “Bu árĩñariri ãhraa,” arĩ pepia. Eropirã irire õaro deyoporo arĩrã õaro ahmua. Eropirã gaji mari dũpũ árĩrĩre mari gũhyasĩrisãrĩre õaro ahmua õaro árĩboro dopa.

24 Gaji mari dũpũ árĩrĩre mata õari deyoripũre eropa amubeaa mari. Goãmũ mari dũpũ árĩri yujuũe gajĩnere gamebircũ iibiridi árĩmi. ĩgũ mari dũpũ árĩrĩre árĩpeherrerire õaro amudigũ árĩmi yuju dũpũ õaro dũpũcũburire. Eropa iigũ “Bu árĩñariri ãhraa,” mari arĩripũre mari õaro gamecũ iimi. Eropa ta ne yujugũre Jesu yagũre “Bu árĩgũ ãhrimi,” arĩmasibea mari.

25 Eropa ta árĩdorede árĩmi Goãmũ mari dũpũ árĩri yujuro mera iri basi game itamuboro dopa.

26 Mari dũpũ árĩri yujuũe ñero taricũ gaji mari dũpũ árĩri sã ñero taria. Eropiro mari dũpũ árĩri yujuũe õaro árĩcũ mari dũpũ árĩpehrero õaro pepia.

²⁷ Eropa arĩgu õpa arĩdiagu iiaa muare: Muapu Cristo ĩgu dupu iro dopa árĩrã yuju curu ta ãhraa. Eropirã árĩpehrerã mua ĩgu dupu árĩri iro dopa ãhraa ĩgu yarã árĩrã.

²⁸ Eropigu Jesu yarã gamenererã watope mari game itamuburire apidigu árĩmi Goãmu marire. Õpa apipu ĩgu marire: Yujurãyeri guare buhedoregu Cristo apimũhtadigu árĩmi. Ero puhru gajirãre ĩgu yare weretaumorãre apidi árĩmi. Ero puhru gajirãre Jesu yarãre buhemorãre apidi árĩmi. Eropigu gajirãre deyoro moarire iimorãre, gajirãre dorecurãre erã taricũ iimorãre, erã puhru gajirãre masare itamumorãre, gajirãre oparã árĩmorãre apidi árĩmi. Ero ojogoro peeyamarirã yare wereniguimorãre apidigu árĩmi marire.

²⁹ Eropa ĩgu apicũ árĩpehrerã yujuropa iimorã árĩbeaa mari. Mari árĩpehrerã Jesucristo yare buhedore ĩgu apinirã árĩbeaa mari. Eropirã Goãmu ĩgu yare weretaurã mari árĩpehrerã árĩbeaa. Eropirã árĩpehrerã masare buherã árĩbeaa. Eropirã mari árĩpehrerã deyoro moarire iimasirã árĩbeaa mari.

³⁰ Eropirã mari árĩpehrerã dorecurãre taumasirã árĩbeaa mari. Eropirã mari árĩpehrerã peeyamarirã yare wereniguimasimorã árĩbeaa. Eropirã gajirã erã wereniguirire weretaumasimorã mari árĩpehrerã árĩbeaa.

³¹ Eropirã Goãmu ya árĩburire mohmemasiburiñere gamerã õaripure turaro gameque mua. Eropigu árĩpehreri yu arĩra tauro õaro mua iiburire dohpaguerẽ weregura yuhu.

13

Gajirãre erã õaro mahiburire, umupeoburire wereñumi Pablo

¹ Peeyamarirã yare masa ya wereniguirire, anyua ya sãre wereniguimasiquererã ta gajirãre mahibirã, duhpimorã árĩbiriboya mari. Eropiro mari wereniguirĩ sã eropa busumaacãboaya mari gajirãre mahibirã árĩrã.

² Goãmu yare õaro weremũhtamasiquererã ta gajirãre mahibirã bu árĩmaacãrã árĩboya mari. Eropirã masa erã masibirirare Goãmu yare árĩpehreri masiri masipehoquererã ta gajirãre mahibirã, bu árĩmaacãrã árĩboya mari. Goãmure õaro umupeotariri mera utãgu "Gajipugue waporo," arĩrã wadoremasicquererã, mari gajirãre mari mahibirã bu árĩrã árĩboya.

³ Mari yare árĩpehrerire mojomorocurãre oquerecũ ta erãre mahibiricũ iri mari ora duhpiburi árĩbiriboya. Eropirã Goãmu ya árĩburire mari iira dipuwaja mari

dupure gajirãpũ soequerecũ ta, gajirãre mari mahibiricũ iri duhpiburi árĩbiriboya.

⁴ Gajirãre mahirã mata guabees erã mera. Erãre mahirã õaro iiaa. Eropirã gajirãre mahirã erã marire opanemocũ ìhaturibees. Eropirã mari mahigũ mera árĩrã “Mũ tauro árĩgũ ãhraa yũhũ,” arĩrã iibees mari. Gajirãre mahirã, “Erãre masitarinũgaa,” arĩ pepibees.

⁵ Eropirã gajirãre mahirã erãre umupeori mera queoro iiaa mari. Gajirãre mahirã mari ya árĩburi dihtare guñabees. Erã ya õaro árĩburi sãre guñaa. Eropirã erãre mahirã disitĩri wereniguibees mari. Eropirã marire erã ñero iicũ sãre erã mera guawajabees mari.

⁶ Gajirãre mahirã erã ñero iire mucubiribees mari. Diaye majapure erã iicũ ãarã burigã mucubiria erã mera.

⁷ Gajirãre mahirã erã ñeri iicũ gajirãre ne quere moabees. Eropirã gajirãpũ erãre erã werewuacũ peequererã ta iire peediabees mari. Õari dihtare peediaa mari. Gajirãre mahirã “Õarire iirãcoma,” arĩ cohrea mari erãre. Gajirãre mahirã erã iira mera mari ñero tariquererã ta erãre mahi duhusome mari.

⁸ Gajirãre game mahiri ne pehresome. Goãmũ yare weretauripũ pũhrũ duhpiburi árĩsome. Peeyamarirã ya wereniguiri sã pehrea waroca. Goãmũ yare masitariri waja-mariroca pũhrũgue. Mari masipehora pũhrũgue duhpiburi gohra árĩsome iri.

⁹ Dohpaguere Goãmũ yare mari merogã masia. Eropirã mari ãgũ yare wererã mari merogã weremasia.

¹⁰ Pũhrũgue ta mari masipehorãca. Eropiro mari merogã masira duhpiburi árĩsome. Irisubugue masipehorãca.

¹¹ Iri õpa ãhraa: Majigũ árĩgũ majigũ dopa wereniguiribũ yũhũ. Eropigũ majigugã dopa pepiribũ. Eropigũ bugũ wagũ majigũ iro dopa árĩrare duhucãbũ. Eropa ta pũhrũguere mari dohpaguere merogã masirare duhura pũhrũ masipehorãca.

¹² Diuru õaro masure deyocũ iibiro dopa ta dohpaguere õaro masipehonibees dohpa mari. Pũhrũ Goãmũre mari õaro ìhamasirãgue mari masipehorãca. Dohpaguere mari merogã dihta masia dohpa. Goãmũ marire ãgũ masipehodiropã dopa ta pũhrũ mari sã õaro masipehorãca.

¹³ Eropirã dohpaguere mari iimasiburi ùhreñe dujaroca. Goãmũre “Diaye ta árĩgũ ãhrimi,” arĩ umupeoniguirãca. Eropirã marire ãgũ mera õaro árĩniguiburire mucubiri coreniguirãca. Eropirã gajirãre game mahiniguirãca. Goãmũre umupeori, ãgũ mera árĩborore mucubiri coreri tauro ãhraa game mahiripũ.

14

Peeyamarirã yare wereniguirire wereñumi Pablo

¹ Eropirã gajirãre game mahirã árrique mua. Eropirã Goãmũ ya árburire mua mohmemasiburire Espíritu Santo ïgũ apirare turaro gameque. Goãmũ yare mua weremasiburi tamerare buringã gameque mua.

² Peeyamarirã yare wereniguigũ Goãmũ dihta peeborore wereniguimi. Eropa arĩ wereniguigũ masa peeborore wereniguigũ iibeami ïgũ. ïgũ Eropa arĩ wereniguicũ peerã masapũ ne peebeama ïgure. Masa erã masibiririre Espíritu Santo ïgũ turari mera wereniguigũ iimi ïgũ.

³ Goãmũ yare weretaugupũ masapũ peeburire weremi. Eropa weregũ ïgũ masare itamugũ iimi ïgũ. Eropigũ erãre Jesucristore umupeonemocũ iimi. Eropigũ ïgũ erã ñero taricũ ïgũ erãre òaro sîporãcucũ iimi.

⁴ Peeyamarirã yare wereniguigũ ïgũ basi dihtare Jesucristore umupeonemocũ iimi. Gajirãre Jesucristore umupeonemocũ iibeami. Goãmũ yare weretaugupũ gajirãre Jesu yarã gamenererãre Jesucristore umupeonemocũ itamumi ïgũ.

⁵ Peeyamarirã yare árïpehrerã mua wereniguicũ òaboya yũ pepicũ. Eropa árïquerecũ ta Goãmũ yare mua weretaucũ tamerare turaro gahmea. Goãmũ yare weretaugupũ peeyamarirã yare wereniguigũ tauro òagũ àhrimi. Eropa árïquerecũ ta peeyamarirã yare wereniguigũ ïgũ wereniguirire gajigũ ïgũ weretaucũ ïgũ sã òagũ dujami. ïgũ wereniguirire weretaugũ Jesu yarã gamenererãre Jesucristore umupeonemocũ iimi.

⁶ Eropigũ, yũ acawererã, yũhũ mua pohrogue peeyamarirã yare wereniguigũ wagũ mũare itamumasibiriboya yũhũ. Goãmũ ïgũ yure wererare weregũ itamua. ïgũ yare Espíritu Santo yure masicũ iirare buhegũ mũare itamugũ iiaa.

⁷ Peeyamarirã ya wereniguigũ ïgũ wereniguiri mari peebero òpa iro dopa àhraa. Tarasure purirã, mari buamutëriñere irire mari queoro iibiricũ, iri bayarire gajirãre masima masiya mara.

⁸ Eropigũ cornetare purigũ surara árïgũ erã gamewejëboro corere queoro ïgũ puribiricũ gajirã surarapũ masisome erã gamewejëboro gamenererore. Eropirã erã gamewejëboro core erã wejëburi mojore amuyubirã àhrima erã.

⁹ Eropa ta mua sã peeyamarirã yare wereniguicũ peerã gajirã irire peebeama. Eropa peebiricũ mua wereniguiri duhpiburi árïbeaa erãre.

10 I yebare baja wereniguiri árīca. Eropirā irire wereniguirā erā basi erā eropa wereniguirire ōaro peema.

11 Īgũ ya wereniguirire yũ peebiricũ ĩagũ irire wereniguigũpũ “Gajirā yare wereniguimi,” arĩ pepicumi yũre. Eropigũ yũ sã eropa ta arĩ pepica ĩgũre.

12 Eropirā mũa peeyamarirā yare wereniguirā, Espíritu Santo ĩgũ yare mohmemasi apira mera turaro mohmedi-araa mũa. Irire eropa iidiarā Jesu yarā gamenererāre ōaro itamuburipũre bũrigā mohmediaque mũa.

13 Eropigũ peeyamarirā yare wereniguigũ “Yũ wereniguirire gajirāre ōaro weretaumasiburire itamuque yũre,” Goãmũre arĩ serẽporo ĩgũ.

14 Peeyamarirā ya mera Goãmũre serẽgũ yũ pepiri mera serẽgũ iiaa. Eropa serẽgũ yũ pepirire masibigũ yũ wereniguirire masibea. Eropa iigũ gajirāre itamubea yũhũ.

15 Ire masirā, ōpa iirāca mari: Espíritu Santo ĩgũ turari mera peeyamarirā ya mera Goãmũre serērāca. Eropirā gajisubu ōaro masi pepirā gajirā erā ōaro peeboro dopa erā ya mera Goãmũre serērā iri sãre serērāca mari. Espíritu Santo ĩgũ turari mera peeyamarirā ya mera Goãmũ yare bayarāca. Eropirā gajisubu ōaro masi pepi gajirā erā ōaro peeboro dopa erā ya mera Goãmũre bayarāca.

16 Mari eropa iibiricũ peeyamarirā ya mera wereniguirā Espíritu Santo ĩgũ turari mera Goãmũre, “Ōagũ turagu āhrimi,” mari arĩquerecũ ta gajirā ne peebeama. Erā eropa peebirā “Diaye ta āhraa,” arĩmasibeama.

17 Peeyamarirā ya mera Goãmũre “Ōhaa,” arĩmasia mari. Mari eropa arĩri ōaro arĩquerecũ ta gajirā peebeama. Eropirā erāre Jesucristore umupeonemocũ itamubea mari.

18 Árĩpehrerā mũa tauro yũpũ peeyamarirā yare wereniguia. Eropigũ Goãmũ yũre eropa wereniguimasigu ĩgũ iicũ ĩgũre “Ōhaa,” arāa yũhũ.

19 Eropa wereniguigũpũ yũ arĩquerecũ Jesu yarā gamenererā watope peeyamarropa peebirā “Diaye ta āirā ya mera yoari boje yũ wereniguiquerecũ duhpiburi árĩbeaa erāre. Yũhũ masa erā ōaro peemasiboro dopa buhegu merogā yũ buhequerecũ ta iri tamera ōapũrica erāre.

20 Yũ acawererā, majirāgā pee masibirāgā iro dopa árĩbiricāque mũa. Mũrā erā pee masirā árĩro dopa árĩque mũa. Eropirā ne masa dehyoarā erā ñeri iirire erā masibiro dopa ta árĩque mũa.

21 Goãmũ yare erā gojarapũ ōpa āhraa Goãmũ wereniguirire: “Gajirā ya queo wererāre oã masare yahare were-doregũra. Eropigũ gaji yeba majarā masare ōarire yahare

weredoregura oã masare. Yũ eropa weredorequerecũ ta erã yũre peesome yũ wererire,” arĩmi Goãmũ mari Opũ, ãhraa Goãmũ yare erã gojarapũgue.

²² Peeyamarirã yare wereniguiri Goãmũre umupeobirãre erãre ãhmuri ãhraa. Eropiro peeyamarirã yare wereniguiri Jesu yarãpũre Goãmũ turarire ãhmuri áríbeaa. Eropiro Goãmũ yare wereripũ Jesure gamebirãre Goãmũ turarire ãhmuri áríbeaa. Goãmũ yare wereripũ Jesu yarãpũre Goãmũ turarire ãhmuri ãhraa.

²³ Eropirã mũa Jesu yarã gamenerecũ, peeyamarirã yare mũa árípehrerã wereniguicũ, Goãmũ yare masibirã gajirã Jesure umupeobirã sã ñajari peebocoma. Mũa eropa wereniguicũ peerã, erã mũare “Cue, goroweorã wahama,” arĩbocoma erã.

²⁴ Árípehrerã mũa Goãmũ yare mũa werecũ tamera Goãmũ yare masibigu, Jesure umupeobigu sã ñajari peegu, ãgu ñero iirare masigũcumĩ ãgu. Eropigu ãgu ñeri iirare bujawerebocumi ãgu.

²⁵ Eropigu ãgu áríricũre ãgu pepiri sãre guñagũcumĩ ãgu. Eropigu mereja Goãmũre “Yũ opũ ãhrimi,” arĩgu umupeogũcumĩ. Eropigu “Goãmũ diaye ta mũa mera ãhrimi,” arĩgũcumĩ ãgu mũare Goãmũ yare werecũ peegu.

*Mũa gamenererã ðaro iique goroweoro mariro, arĩ go-
jañumi Pablo*

²⁶ Eropigu, yũ acawererã, mũare ire arĩgu iiaa: Mũa gamenerecũ yujurãyeri mũa mera majarã Goãmũ yare bayadiama. Eropirã mũa gajirã buhediaa. Eropirã gajirã Goãmũ mũare ãgu wererare werediaa. Eropirã mũa gajirã peeyamarirã yare wereniguidiaa. Eropirã mũa gajirã iri wereniguirire weretaudiaa. Mũa eropa iirã gajirãre erã Jesucristore umupeonemoboro dopa irire iique.

²⁷ Eropirã peeyamarirã yare mũa wereniguirã mũa perã o ãrerã, erã nũcũ ta wereniguique mũa gamenererisubu. Eropirã yujurãyeri wereniguique. Mũa eropa wereniguicũ, yujugu mũa mera majagu mũa wereniguirire gajirãre weretauporo.

²⁸ Mũa wereniguirire weretaubu maricũ mũa gamenererogue peeyamarirã yare wereniguibiricãque. Eropirã mũa seyaro peeyamarirã yare Goãmũ mera wereniguique.

²⁹ Eropirã Goãmũ yare werediarã perã o ãrerã iripẽta wereque mũa. Mũa eropa werecũ gajirã mũare peerã mũa wererire Goãmũ ya áricũ ðaro masiporo. Eropirã Goãmũ ya áribiricũ sãre ðaro masiporo.

30 Eropigu Espíritu Santo Goãmu yare gajigure ero doagure ãgure wereri ocũ, ãgu sã Jesu yarãre werediami. ãgu werediacũ ãha Goãmu yare weremũhtagupũ werenigui duhuporo.

31 Eropirã mũa árĩpehrerã Goãmu yare wererã, yu- jurãyeri wereque mũa árĩpehrerã gajirã erã õaro peeboro dopa, erã õaro mucubiriboro dopaa.

32 Eropirã Goãmu yare wererã árĩrã, õaro pee masirã, õaro peeñanugu wereniguirã árĩque.

33 Goãmu ãgu yarã erã gamenererogue erã game wisicũ gamebeamĩ ãgu. Goroweoro mariro erã õaro árĩcũ gah- memi ãgu. Eropirã õaro iique mũa árĩpehrerogue Jesu yarã gamenererã.

34 Árĩpehrero Jesu yarã gamenererore nomere were- niguibiricãro gahmea. Erã nomere maripũ werenigui- dorebeaa. Goãmu yare erã gojarapũ sã arĩro dopa ta nomere mũare õaro yũhrirã nome árĩro gahmea. Eropirã mũa gamenererore nome masare werebiricãporo.

35 Jesu yarã erã gamenererore nome erã wereniguicũ õabeaa. Eropigo gajinore masidiago nomeo igo ya wihigue ta igo marapũre serẽpiporo.

36 Ire yũ wereburi õaro masique mũa. Goãmu yare weremũhtarã árĩbeaa mũa. Eropirã ãgu yare peenirã mũa dihta árĩbeaa. Gajirã sã ãgu ya buherire opama.

37 Mũa mera majagu "Yũ tamera Goãmu yare weregu ãhraa," arĩ pepibocumi. Eropa arĩ pepigu i yũ mũare gojarare "Goãmu doreri ta ãhraa," arĩ masiporo ãgu. Eropigu gajigu, "Espíritu Santo iimasiburire ãgu apirare õaro opaa yũhũ," arĩ pepibocumi. Eropa arĩ pepigu ãgu sã i yũ mũare gojarare "Goãmu ya doreri ta ãhraa," arĩ masiporo.

38 Irire ãgu masidiabiricũ yũ gojarare "Diaye árĩbeaa," ãgu arĩcũ ãgure duhucãque. Peebiricãque ãgure.

39 Eropirã yũ acawererã, Goãmu yare weremasiburire burigã gameque mũa. Eropirã mũa mera majarã mũa gamenererogue peeyamarirã ya erã wereniguidiacũ, "Wereniguibiricãque," arĩbiricãque erãre.

40 Eropa iirã õaro iique. Eropirã gamenererã õaro game, goroweoro mariro iique mũa.

15

Cristo ãgu masa mũriarare werepũ Pablo

1 Dohpaguere yũ acawererã, õari buherire yũhũ mũare wererare mũare guñacũ iidiaca. Iri buherire õaro peebũ

m̄aa. Eropa peerã iri buherire umupeonijarã õaro ãhraa m̄aa.

² M̄aa eropa umupeocũ irire m̄aa cóãbiricũ Cristo m̄aare peamegue wabonirãre taugucumi. M̄aa eropa peera p̄hr̄u Cristo yare m̄aa duhucãcũ iri m̄aa peera duhpiburi ár̄ibiriboya.

³ Õpa arĩ werem̄htagura m̄aare. Bu gohra ár̄ibeaa. M̄aare buhegu ȳre Cristo ãgu wererare õpa arĩ werebũ: Goãm̄ yare erã arĩ gojayudiro dopa ta mari ñeri wajare Cristo s̄iripũ.

⁴ Eropigu Goãm̄ yare erã arĩ gojayudiro dopa ta Cristo ãgu s̄irira p̄hr̄u gajirã ãgure erã yaara p̄hr̄u ÷hrene waboro ãgu masa m̄ariapũ.

⁵ ãgu eropa masa m̄ariara p̄hr̄u Pedrore dehyoapũ. ãgu eropa dehyoara p̄hr̄u ãgu buherãre doce mera majarãre dehyoapũ daja.

⁶ Erãre dehyoara p̄hr̄ure yujusubu ta quinientos weca ár̄irãre ãgu yarãre dehyoapũ daja. Gajirã ãgure ãanirã s̄irituhañorã. Gajirã ãgu ãanirã bajarã erã mera majarã ár̄inirã dohpaguere ár̄inima.

⁷ P̄hr̄u Cristo Santiagore dehyoapũ daja. Eropa ãgu dehyoara p̄hr̄u ár̄ipehrerã ãgu buhedore apinirãre dehyoapũ daja.

⁸ Ár̄ipehrerã gajirãre ãgu dehyoara p̄hr̄u yũ sãre dehyoami daja. Majigugã queoro masa deyobigugã ãgu masa dehyoanarusiadiro dopa ta yũ sã Jesure umupeo nurusiagu ãhraa. Yũ eropa ár̄icũ erã p̄hr̄ure dehyoami Jesu yũ sãre. Ȳre ta ãgu dehyoatumi pare.

⁹ Ero coregue Jesu yarãre ñero iiribũ. Eropa iidigu ár̄igu gajirã Jesu ãgu apinirã ár̄ipehrerã erã docague gohra ãhraa yũhũ. Eropigu dohpague sãre Jesu ãgu buhedore ãgu apibodigu ár̄ibiriribũ yũhũ.

¹⁰ Eropa ár̄iqueregu ta Goãm̄ ãgu ȳre mahicũ dohpaguere Jesu ãgu apidigu ãhraa yũ sã. Eropigu ãgu ȳre mahicũ dohpaguere ãgu gamerire iipehoa. Eropigu ãgu ȳre mahicũ ãgu yagu eropa ár̄icãgu iibeaa. Ár̄ipehrerã gajirã ãgu apinirã tauro ȳpũ turaro mohmeabũ. Eropa mohmegu yũ gamero iri mohmerire iibirabũ. Goãm̄ ȳre mahigu ȳre itamuami.

¹¹ Yũhũ m̄aare õari buherire buhegu yũ ár̄icũ erã m̄aare buherã ár̄icũ sãre yujuropa ãhraa. Guapũ ire buherã ár̄iquererã ta bu gohra ár̄irã iiaa. Ḡua buheripũ bu ár̄iri ár̄ibeaa. Eropirã m̄apũ i buherire õaro peeabũ.

S̄irinirã m̄ura erã masa m̄ariaborore werepũ Pablo

12 Cristo ïgu sîrira pũhrũ ïgu masa mũriarare gũa buhequerecũ “Sîrinirã mũra ne masa mũriabeama,” arĩma mũa mera majarã yujurãyeri. ¿Dohpa arĩrono eropa arĩri erã irire?

13 Ōpa masiporo erã. Sîrinirã mũrare Goãmũ masa mũriacũ iibigu Cristo sãre ne masa mũriacũ iibiriboñumi.

14 Eropigu Cristo ïgu masa mũriabiricũ õari buherire gũa werera ne waja mariboya. Mũa ïgure umupeori sã waja mariboya.

15 Masa mũriari maricũ gũapũ Goãmũ yare wererã gũyarã iiboya. Sîrinirã mũra erã masa mũriabiricũ Goãmũpũ Cristore masa mũriacũ iibiriboñumi. ïgu eropa iibiricũ gũa “Goãmũ Cristore masa mũriacũ iipũ,” arĩrã gũyarã iiboya.

16 Sîrinirã mũrare Goãmũ masubigu, Cristo sãre ïgu masubiriboñumi.

17 Eropiro Cristo ïgu masa mũriabiricũ ïgure mũa umupeori waja mariboya. Eropiro mũa ñeri dipuwajacũrã árĩboya dohpa peamegue wamorã.

18 Masa mũriariñe maricũ Cristo yarã mũra sîrimũhtanirã mũra peamegue wamorã árĩboñuma.

19 Cristore mari umupeora pũhrũ mari sîrirãgue mari masa mũriamasibirimorã árĩrã árĩpehrerã masa tauro mojomorocũrã árĩboya maripũ. Eropirã ïgure umupeorã bu gohra árĩrire umupeorã iiboya mari.

20 Eropa árĩbeaa. Diaye ta Goãmũ Cristore õaro masa mũriacũ iicãdi árĩmi. Cristo ïgu masa mũriara pũhrũ mari sã sîrirãgue masa mũriamorã ta ãhraa. ïgu eropa masa mũriagu, Cristo masa mũria gubuyecũñumi marire.

21 Ōpa ta ãhraa i: Adán masũ árĩmũhtadigu ïgu ñerire iinũgara pũhrũ masa sîrinũgañuma. Eropigu gajigu masũ Jesucristo õarire ïgu iira pũhrũ sîrinirã mũra masa mũriamasima.

22 Adán yarã árĩnũrusiarãgue mari árĩpehrerã sîrirãca. Eropa ta Cristo yarã mari árĩcũ mari sîrira pũhrũ marire masa mũriacũ iigũcumi Goãmũ.

23 Yujurãyeri cururi marire Goãmũ sihurisubu masa mũriarãca. Cristo marire árĩmũhtadigu masa mũriamũhtapũ. Pũhrũ ïgu i yebague dujaricũ ïgu yarã sã masa mũriarãcoma.

24 Irisubu ta i mũmũ pehrerinũ árĩroca. Eropigu árĩpehrerã ñerã oparãre, dorerãre, turarãre Cristo cóãgũcumi. ïgu eropa iira pũhrũ árĩpehrerã weca opũ ïgu árĩrare wiagũcumi Goãmũre mari Pagure.

25 ïgu wiaboro core mari Pagũ Cristore ïhaturirãre ïgu

tarinugapehoboro core Cristo tamera árīpehrerã weca opu árīgucumi. Eropa iibu ta árīro gahmea ĩgure.

26 ĩgure ĩhaturirãre ĩgu cóãra pũhrũ sīririñe sãre pehrecũ iīgucumi ĩgu.

27 Goãmũ yare gojarapũgue õpa ãhraa: “Árīpehrerã weca dorebure apipũ Goãmũ Cristore. Árīpehreri sãre apipũ ĩgure.” Eropa ta arãa Goãmũ yare erã gojarapũgue. “Árīpehrerã weca dorebure apipũ Goãmũ Cristore,” arĩ gojagu, “Goãmũ weca doregu Cristo ãhrimi ĩgu,” arĩdiabiriñumi. Goãmũpũ Cristore eropa apiñumi.

28 Árīpehrero Goãmũre ĩhaturirãre ĩgu cóãra pũhrũ árīpehrerã weca doregu Cristo Goãmũ magũ ĩgu árĩtuhagu ĩgu opu árĩrare Goãmũre ĩgure apidigupũre wiagucumi. Eropiīgucumi “Goãmũpũ árīpehrerã weca opu árīpehreri opu gohra ãhrimi,” árīpehrero árīpehrerã arĩmasiboro dopa.

29 “Sīrinirã masa mũriasome,” arĩma gajirã. ¿Erã arĩri diaye árĩcũ duhpimorã gajirã masa sīrinirã mũra ya árĩburire erã waĩyebasanirã ãhriri mũa pepicũ? Sīrinirã mũra masa mũriabiricũ erã ya árĩburire gajirã waĩyebasara duhpiburi árĩbiriboya.

30 Guapũ guã buheri dipuwaja umũri nũcu gajirã guare erã ñero iidiacũ guhya ãhraa guã sãre. Guare eropa guhyaquerecũ ta masa mũriari árĩcũ masirã eropa buheniguicãa guã.

31 Mari Opu Jesucristo yarã mũa árĩcũ ĩgure umupe-onemorã mũa wacũ yũpũ turaro mucubiri pepia yũhũ mũare. Iri diaye ta ãhraa. Eropigu “Yũre noho erã gamerinũ wejẽmaja guhya ãhrima,” yũ arĩcũ iri sã diaye ta ãhraa.

32 Efeso majarã guarã õari buherire yũ buhera waja yũre pama. Masa mũriariñe maricũ Jesu yagu yũ árĩbiricũ, yũ ñero tarira waja duhpiburi árĩbiriboya. Sīrinirã mũra erã masa mũriabiricũ õpa arĩboya mari: “Pũhrũñari sīrirãca. Dohpa wasome mari. Eropirã bania, ihrirã, mari gamero dopa iirã,” arĩboya mari.

33 Eropa arĩ guyarire pepibiricãque mũa. “Ñerãre wapicũrã, õarire mũa iirare cãdijirãca mũa,” arĩma masa. Iri diaye ta ãhraa.

34 Õarire pepirã árĩque mũa. Eropirã õarire iirã árĩque daja. Eropirã ñerire iinemobiricãque daja. Gajirã mũa mera majarã ne Goãmũre masibeamã. Mũa guhyasīriburire mũare eropa arãa.

Sīrinirã mũra erã masa mũriaborore werenemopũ Pablo

35 Eropi m̄aa mera majagu ōpa arī serēpibocumi yure: “¿Dohpa ii sīrinirā m̄ra masa m̄riarācūri? ¿Dohpa bejari d̄p̄c̄urā masa m̄riarācūri? arī serēpibocumi yure.

36 Eropa arī serēpigū pee masibigū āhrimi. Oteriyere mari oterā iriye boacū gohra puhri wiria. Boabiricū ne puhri wirimasibeaa. Irire masia m̄aa.

37 Puhritaridigū yucuguguerē otebeaa mari. Dipayeri dihtare otea mari. Iriyeri trigo yeri árīro āhri, o gajiyeri árīro árīca.

38 Iriyerire mari otera p̄hr̄ Goām̄p̄ ūgū gamediro dopa ta iriyerire b̄ga m̄riacū iimi. Eropigū ojed̄cayerire ojed̄cañu wacū iimi ūgū. Trigo yerire trigo sari wacū iimi. Eropa ta puhridoremi Goām̄.

39 Árīpehrerā d̄p̄c̄urī yujuropa deyobeaa. Masa d̄p̄p̄ yujuropa ta āhraa. Waimurā d̄p̄ s̄a gajiropa ta dehyoa. Mirimagū porā d̄p̄ s̄a gajiropa ta dehyoa. Eropirā wai s̄a gajiropa ta d̄p̄c̄ama.

40 Eropirā ūmaro majarā s̄a āhrima. Eropirā i yeba majarā s̄a āhrima. Eropirā ūmaro majarā d̄p̄ gajiropa dehyoma. Eropiro i yeba majarā ūmaro majarā iro dopa árībeama.

41 Ōpa ta āhraa. Abe ūm̄ majagu gosemi. Eropi ñami majagu s̄a boje āhrimi ūgū s̄a. Yuju diaye ta boyomi. Eropirā necā s̄a gajiropa bejari goesirima. Necā majarā s̄are mari ĩacū gajī dipu daberogā goesiriri dipu dehyoa. Eropiro gajī dipu turaro goesiriri dipu dehyoa.

42 Eropa ta āhrima sīrinirā m̄ra erā masa m̄riacū. Masū ūgū d̄p̄re mari yaara p̄hr̄ ūgū d̄p̄ boa waroca. Eropiro gajī d̄p̄ gajiropa árīri d̄p̄ ūm̄ri n̄c̄u ojo-cariburi d̄p̄ masa m̄riaroca.

43 Ūgū d̄p̄re mari yaacū sīridigū d̄p̄ ñeri d̄p̄ āhraa. Goām̄ ūgūre masucū ūgū d̄p̄ ōtariari d̄p̄ árīroca. Eropiro ūgū d̄p̄ mari yaara d̄p̄ turari mariri d̄p̄ āhraa. Eropiro Goām̄ ūgūre ūgū masucū d̄p̄ turatariari d̄p̄ árīroca.

44 I yeba maja d̄p̄re mari yaarāca. Ūgū sīridigū m̄r̄ ūgū masa m̄riacū ūgū d̄p̄ ūmaro maja d̄p̄ ta árīroca. I yeba maja d̄p̄re mari opaa dohpaguere. P̄hr̄ ūmaro maja d̄p̄ s̄are oparāca.

45 Eropa ta arī werea Goām̄ yare erā gojarapūgue: “I yeba árīm̄htadigū Adán waīcūgū Goām̄ ūgūre iicū ojocarigū wañumi,” arī gojañuma. Adán iro dopa árīḡp̄r̄ ūj̄t̄yaḡp̄r̄ Cristop̄ ojocaririre ogū āhrimi.

46 I yeba maja d̄p̄ árīm̄htara d̄p̄ āhraa. P̄hr̄gue ūmaro maja d̄p̄ árīroca.

47 Ōpa ta āhraa: Árīmũhtadigu Adánpu i yeba maja nicu mera Goãmũ ĩgu iira dũpũre dũpũcũñumi. Ĩgu pũhrũ aridigũpũ Cristopũ umaro majagu árĩpũ.

48 Nicu mera dũpũcumũhtadigu Adán árĩdiro dopa ta mari árĩpehrerã nicu mera iira dũpũcũrã āhraa mari. Eropirã umarogue aridigu Jesucristo ĩgu árĩdiro dopa ta ĩgu yarã árĩpehrerã ĩgu iro dopa dũpũcũrãca mari.

49 Mari Adán iro dopa ta dũpũcũrã árĩrã pũhrũ Cristo iro dopa dũpũcũrãca.

50 Yũ acawererã, mũare ire werediaa: I yeba maja dũpũ di mera diro mera árĩri dũpũ Goãmũ ĩgu opu árĩroguere umaroguere ne wasome. Mari dũpũ boaburi dũpũ āhraa. Eropiro umarogue umari nũcũ mari árĩboroguere i dũpũ wasome.

51-52 Iribojeguere masa erã masibirirare dohpaguere mũare werediaa: Mari mera majarã yujurãyeri sĩrisome. Eropirã mata erã dũpũre gohrotorã árĩrãcoma. Corneta ĩgu puriturinũ eropa ta waroca marire. Ōpa waroca: Corneta bũsũra pũhrũ sĩrinirã mũrare Goãmũ masugũcumĩ umari nũcũ erã árĩmorãre. Eropirã dũpũre gohrotonirã árĩrãca mari sã.

53 Dohpaguere mari dũpũ boaburi dũpũ āhraa. Eropigu mari Goãmũ mera árĩniguicãburire mari dũpũre gohrotogũcumĩ Goãmũ. Eropigu mari sĩriburi dũpũre gohrotogũcumĩ mari ne sĩribiriburi dũpũpũre.

54 Mari dũpũre ne boabiriburi dũpũre gohrotogũcumĩ. Eropigu marire sĩribiriburi dũpũre eropa árĩniguiburi dũpũre gohrotogũcumĩ. Iri eropa marire gohrotocũ iribojegue Goãmũ yare gojarapũgue arĩ gojadiro dopa ta eropa waroca: Goãmũ sĩririñere cóãcãmi.

55 Dohpaguere ne dipaturi sĩrisome. Eropiro sĩririñe mera dipaturi mari ñero tarisome.

56 Mari ñeri iira waja árĩcũ tamera sĩririñe mera ñero tarirãca. Eropiro Goãmũ doreri mari iimasibirira waja dipuwajacũca mari. Eropa dipuwajacũrã peamegue mari masa wamorã āhraa.

57 Mari eropa árĩquerecũ ta mari Opũ Jesucristopũ marire peamegue wabiricũ iimi. Ĩgu eropa iigu árĩcũ masirã Goãmũ mera mucubiri “Ōhaa,” arãa mari.

58 Eropirã yũ acawererã, yũ mahirã, Cristore mũa umu-peorire duhubiricãque. Eropirã gajirã mũare õari buherire erã cóãdorecũ ne cóãbiricãque irire. Eropirã umari nũcũ mari Opũ Jesucristo ĩgu iidorerare õaro iiniguicãque mũa. Mari Opũ Jesucristo yare mari iicũ bu gohra ta ne árĩbeaa. Ire masirã ĩgu iidorerire õaro iiniguicãque mũa.

16

Gajirãre Jesu yarãre Corinto majarã niyeru erã oburire werepũ Pablo

¹ Dohpaguere gajirãre Jesu yarãre mũa niyeru oburire weregũra mũare. Galacia yeba majarãre Jesu yarãre yũ dorediro dopa ta mũa sã iique.

² Semanari nũcũ soorinũ árĩcũ árĩpehrerã mũa Jesu yarãre gajirãre mũa oburi niyerure merogã gameneoque. Merogã oparã merogã oque. Eropirã wũañariro oparã wũañariro oque. Semanari nũcũ mũa eropa iique mũa pohrogue yũ ejacũ mũa obeoburi niyeru opayutuhaboro dopa. Eropigũ erogue ejagũ iripẽ niyeru wahasõ arĩripũre gojabasagura.

³ Eropigũ iripũre iri niyeru aĩgãmorãre mũa beyenirãre ogũra. Eropa otuhagũ Jesu yarãre mũa obeoburi niyerure aĩgãmorãre erãre obeogũra Jerusalengue.

⁴ Iri macaguere yũ iiburi árĩcũ yũ sã wagũca. Yũ eropa wacũ yũ mera ta erã sã warãcoma iri niyeru orã warã.

Ĩgu erogue curiborore werepũ Pablo

⁵ Macedonia yeba majarãre ĩhatari wahgãgũca yũhũ erãre. Tariagũ mũa pohro Corintogue ejagũca.

⁶ Erogue ejagũ mũa mera bajamenũri árĩboca yũhũ gajisubu iigũ. Yoañariri boje puhiró dihta mũa mera árĩboca yũhũ. Eropirã gajipugue yũ wacũ mũa sã yũre itamubeomasia.

⁷ Mũare bajamenũrigã ĩadiabirica yũhũ. Eropigũ Goãmũ gamecũ yoañariri boje mũa mera árĩgũca yũhũ.

⁸ Eropa árĩdiaqueregũ ta pentecoste bosenu árĩcũgue Efeso árĩnigũca dohpa.

⁹ Ohõ Efesogue dohpaguere mari Opũ Jesu yare peediarã bajarã aħrima. Erã eropa árĩrã árĩcũ erãre werea. Yũhũ erãre eropa werecũ yũre ĩadiabirã bajarã aħrima. Eropigũ Efesogue árĩnigũca dohpa.

¹⁰ Timoteo yũ iro dopa ta mari Opũ yare iimi. ĩgu eropa iigũ árĩcũ mũa pohrogue ĩgu ejacũ õaro mera ĩgure bocatĩri, ĩgu mera õaro mucubiriri mera árĩque mũa.

¹¹ Eropirã ĩgure tarinũgabiricãque mũa. Eropirã ĩgu mũare goeriserecũ õaro mera ĩgure itamuque ĩgu yũ pohrogue dujaricũ. Gajirã Jesu yarã mera gũa ĩgure corerã ĩiaa. Eropirã õaro mera itamubeoque ĩgure.

¹² Apolo mari acaweregũ Jesu yagũ mũare ĩgu ĩagũ wacũ turaro gamerabũ. Eropigũ ĩgure wadorerabũ gajirã Jesu yarã mera ĩgu waborore. Yũ eropa wadorequerecũ ta ĩgu

dohpaguere wadiabeami. Eropigu p̄hr̄u ĩḡure iiri maricũ m̄a pohrogue waḡcumi ĩḡu daja.

Pablo ðadoretu

¹³ Ōaro pee masiyurã áríque m̄a. Cristore umupeorã duhubiricãque. Ōaro guñaturarã áríque. Eropirã Goãmu ya turari mera turarã áríque m̄a.

¹⁴ Árípehrerore iirã gajirãre mahiri mera irire iique.

¹⁵ ¿Estéfana ĩḡu ya wihi majarã mera guñari m̄a? Erã Acaya yeba majarã ðari buherire peem̄htarã, iri yebare Cristore umupeom̄htanirã áríma erãp̄. Eropirã gajirãre mari acawererãre Jesu yarãre erã ðaro itamuniguicãma.

¹⁶ Eropigu erã iro dopa árĩrãre, gajirãre Cristo yare itamurãre m̄a ðaro ȳhricũ gahmea ȳh̄u.

¹⁷ ĩḡu Estéfana, Fortunato, Acaico sã ȳ pohrogue er-
atuhama. Ohõ erã árĩcũ w̄aro mucubiria ȳh̄u. M̄a maricũ m̄a mera mucubirimasibirib̄u ȳh̄u. Eropigu erã eracũ mucubiria ȳh̄u.

¹⁸ Erã mera árĩḡu ðaro s̄iporãc̄ḡu wahab̄u ȳh̄u. M̄a sãre eropa ta mucubiricũ iiañuma ȳ pepicũ. M̄a pohrogue erã dipaturi wacũ daja erãre ðaro umupeoque m̄a. Eropirã gajirãre erã iro dopa árĩrã sãre umupeoro gahmea m̄are.

¹⁹ Asia majarã Jesu yarã m̄are ðadorema. Eropirã Aquila, Priscila, erã ya wihi gamenererã mera Cristo ĩḡu mahiri mera m̄are w̄aro ðadorema.

²⁰ Ō majarã Jesu yarã árĩpehrerã m̄are ðadorema. M̄a mera majarãre bocat̄irirã ðaro mera mojoto ñeaque.

²¹ Ȳh̄u Pablo, ȳ basi i dihtare gojaa. M̄are ðadorema.

²² Mari Op̄u Jesucristore gajigu ĩḡu mahibiricũ, Goãmu ĩḡure dipuwaja moaporo. Mari Op̄u duru dujariporo.

²³ Mari Op̄u ĩḡu mahiri mera m̄are ðadorema.

²⁴ M̄are árĩpehrerãre burigã mahia Jesucristo mera. Eropa ta árĩporo. Irip̄eta ãhraa.

2 Corintios

Õpa gojabeoñumi Pablo Corinto majarãre

¹ Yũhũ Pablo Jesucristo yare ïgũ buhedore ïgũ apidigu ãhraa. Mari Pagũ ïgũ gamero dopa ta apimi yũre Jesu. Yũhũ, mari acaweregũ Timoteo mera mũare Goãmũre umu-peorãre Corinto majarãre gojabeoa. Árĩpehrerã Jesucristo yarãre Acaya majarãre mũa sãre gojabeoa.

² Eropirã Goãmũ mari Pagũ, mari Opũ Jesucristo mera mũare ðadoreã. ïgũ itamuro mera ðaro árĩque mũa.

Pablo ïgũ ñero tarirare ðpa arĩ wereñumi

³ Mari Opũ Jesucristo Pagũ Goãmũ marire mojomoro ïhami. Eropigu ïgũ dihta marire árĩpehrerinũri ðaro sĩporãcũcũ iimi. “Õatariagu ãhrimi ïgũ,” arãa mari.

⁴ Mari ñero taricũ ïagu marire ïgũ yarãre itamumi ïgũ gajirãre mari itamuboro dopa. Eropirã gajirã erã ñero taricũ erãpũre itamuro gahmea marire. Goãmũ marire ïgũ itamuro dopa ta mari sã erãre itamurã.

⁵ Cristo yarã mari árĩrã ïgũ ñero taridiro dopa ta mari sã bũrigã ñero taria. Mari ñero taridiro dopa ta ïgũ itamurire wũaro opaa.

⁶ Gũapũ mũare itamurã ñero taria. Eropirã Cristo mera mũa ðaro árĩboro dopa gũa mũare werera dipuwaja gajirã ñero iima guare. Gũa ñero tariquerecũ Cristo guare itamumi. Eropirã Cristo guare itamucũ gũapũ mũa sãre itamumasia. Eropirã gũa ñero taridiro dopa ta mũa sã ñero tarirã ðaro mera yujuro bojerãca.

⁷ Õaro mera mũa yujuro bojerã árĩborore gũa masia. Gũa ñero taridiro dopa ta ñero taria mũa sã. Eropirã Goãmũ ïgũ itamuri mera gũa yujuro bojediro dopa ta mũa sã yujuro bojerãca.

⁸ Gũa acawererã, dohpaguere ire mũa ðaro masicũ gũa gahmea. Asia yebaguere ñetariaro taribũ gũa. Gũa gamero iirã ne bocatĩubiriboya. Õpa arĩ pepiribũ gũa: “Ne bocatĩusome mari. Eropirã mari sĩrirãca,” arĩ pepiribũ gũa.

⁹ Eropirã “Marire wejẽcãrãcoma,” arĩ pepiribũ gũa. Gũa eropa ñero taribũ Goãmũ dihtare gũa guñaturaboro dopa. ïgũpũ sĩrinirãre masugũ ãhrimi. Eropa ïgũre guñaturarã gũa gamero gũa bocatĩubirirare masia. “Goãmũ ta marire itamumi,” arãa pare.

¹⁰⁻¹¹ Gũare guhyaquerecũ ta ïgũ itamuro mera taribũ. Pũhrũgue sãre dipaturi guare taugũcumi. Mũa sã guare

itamumorã mua Goãmure serêbasacũ sãre ãagu ãgu guare taugucumi. “Ígu ta guare taugucumi,” arĩ masia mari. Eropirã ãgu guare taucũ ãarã, ãgure “Õhaa” arĩrãca muaꝑũ. Mua bajarã serêrare ãgu yuhricũ ãarã “Õhaa, diaye ta ãhraa,” arĩrãca mua bajarã Goãmure.

Pablo Corintogue ãgu wadiarare wereñumi

12 Eropirã gua iirare guñarã mucubiriri mera õpa arĩ pepia gua: I yebare Goãmũ ãgu itamuro mera ñeri mariro õari mera masare wapicũ buhebũ. Mua sãre õaro wapicũ buhebũ. Õpa iirã gua masiri mera iibiribũ. Goãmũ guare ãgu mahicũ ãgu turari mera eropa iibũ gua.

13-14 Eropirã õaro were muare gojabeorã diaye ta werebũ muare õaro mua masiburire. Dohpague guare õaro masinibea mua. Gua árĩricurire mua turaro masicũ gahmea gua. Eropirã mari Opũ Jesucristo dujaricũ gua mera mucubirirãca mua. Mua mera gua mucubiridiro dopa ta mua sã gua mera mucubirirãca.

15-16 Eropa arĩ pepigũ Macedonia yebague wagu mua pohroque wamũhtadiarabũ. Eropigũ muare ãhatariwahgãboya. Eropigũ erogue ejadigũ dujarigũ dipaturi mua mera bajamenurigã árĩboya yuhũ. Eropirã pesubu mua mera yũ árĩcũ ãarã turaro mucubiriboya mua. Mua pohroque yũ árĩcũ ãanirã Judea yebague yũ wacũ ãarã yure itamuboya mua.

17 “Wagura,” yũ arĩcũ peenirã árĩrã, yũ wabiricũ ãarã “Pablo Jesure umupeobirã iro dopa guyagu iĩñumi,” ¿arĩ pepiri mua? “ ‘Wagura,’ arĩqueregu ãgu gamero mari pohro aridiabiriñumi ãgu,” ¿arĩ pepiri mua yure? “Ígu arĩdiro dopa iibeami,” ¿arĩ pepiri mua?

18 Eropa arĩ guyagu iibea yuhũ. Eropigũ “Ígura,” arĩgu yũ arĩdiro dopa ta diaye ta ãaa yuhũ. Irire masimi Goãmũ.

19 Yuhũ, Sila, Timoteo mera Jesucristo Goãmũ magũ yare muare werebũ. Ígu Jesucristo “Ígura,” arĩgu, diaye ta iigu ãhrimi. Goãmũ ãgu arĩdiro dopa ta Cristo iimi.

20 Árĩpehreri ãgu Pagũ ãgu masare “Õpa õaro iigura,” arĩ wererare Cristo iipehocãdi árĩmi. Ígu eropa iigu arĩcũ gua ãgu yare gajirãre werea Goãmure erã umupeoboro dopa.

21 Cristo yarã marire árĩniguicũ iigu Goãmũ ta ãhrimi. Eropigũ ãgu yare weremorãre marire apimi ãgu.

22 Eropigũ ãgu yarã mari arĩcũ ãagu irire marire masicũ iimi ãgu. Eropigũ ãgu Espĩritu Santore mari mera arĩdoremi ãgu. Mari mera arĩcũ ãha Goãmũ ãgu marire õaro iiburire masia mari.

²³ Dohpaguere yũhũ mũa pohro wabirirare diaye ta weregura mũaare. Yũ wereri diaye árĩcũ Goãmũa masimi. Ĩgũ ta yũ pepirire masimi. Mũa ñero iira dipuwaja turidia-bigũ mũa pohroguere wadiabiribũ. Erãre bũjawerecũ iiri, arĩgũ mũa pohroguere Corintoguere wabiribũ.

²⁴ Eropirã “Mũaare dorerã ãhraa gũa,” arĩrã iibeaa. Eropirã “Õpa Cristore umupeoro gahmea mũaare,” arĩrã iibeaa gũa. Mũa Cristore õaro umupeotuhabũ. Mũaare umupeonemocũ iirã mũa õaro mucubirirã árĩcũ iidiaca gũa.

2

¹ Wabigũ õpa arĩ pepibũ: “Dipaturi erãre bũjawerecũ iidiabeaa. Eropigũ dohpaguere wabeaa,” arĩ pepibũ.

² Mũaare bũjawerecũ iidiabeaa. Mũa bũjawerecũ ĩagũ yũpũ mucubiribiriboya. Eropirã yũre mucubiricũ iimorã árĩbiriboya mũa sã.

³ Eropigũ mũa pohroguere wabiribũ. Wabigũ mũa árĩricũre amuboro dopa mũaare gojabeobũ. Mũa yũre mucubiricũ iibonirã árĩquererã ta yũre bũjawerecũ iiboya mũa mũa pohroguere yũ wacũ. Mũa mera yũ mucubiricũ mũa sã yũ mera mucubirirãca. Irire masia yũhũ. Eropigũ mũa mera bũjawnerediabigũ “Wabeaa,” arĩ, carta gojabeobũ.

⁴ Eropigũ mũaare gojagũ wũaro pepigũ ñero sĩporãcũgũ, turaro co deco wiriri mera mũaare gojabeobũ. Eropa gojagũ mũaare bũjawerecũ iidiabiribũ. Mũaare yũ bũrigã mahirare mũaare masicũ iidiagũ mũaare eropa gojabeobũ.

Erã mera majagũ ĩgũ ñero iirare cãdijidoreñumi Pablo Jesu yarãre

⁵ Mũa mera majagũ ĩgũ ñero iira mera yũre bũjawerecũ iimi ĩgũ. Mũaare ĩgũ turaro bũjawerecũ iidiro dopa ta yũ sãre wũaro bũjawerecũ iimi ĩgũ. ĩgũ marire eropa bũrigã bũjawerequerecũ ta wũatariaro dipuwaja moadorebeaa dohpaguere.

⁶ Bajarã mũa mera majarã ĩgũ ñero iira dipuwaja moatuhãnorã. Iripẽta dipuwaja moa duhuro gahmea ĩgũre.

⁷ ĩgũre mũa dipuwaja moaniguicũ bũrigã bũjawerebocumi ĩgũ. Eropigũ Cristo yare duhubocumi. Eropirã ĩgũ ñero iirare cãdijique mũa. ĩgũre itamuque ĩgũ õaro sĩporãcũboro dopa.

⁸ Eropirã ĩgũre õaro iique mũa ĩgũre mũa mahirare ĩgũ masiboro dopa. Mũa eropa iicũ bũrigã gahmea yũhũ.

9 Ero core mũare gojabeogu “¿Diaye ta yũre yũhrirãcuri?” arĩ pepigu gojabeobũ mũare. Yũre mũa yũhricũ ãadiagu gojabeobũ.

10-11 Dohpaguere ãgu ñero iirare mũa cãdijicũ ãagu yũ sã ãgu ñerire cãdijigũra. Yũre ñero iibirimi ãgu. Mũapũre ñero iidi árími. ãgu eropa iidigu áríquerecũ ta ãgu ñero iirare cãdijia yũ sã. Mũare õaro itamudiagu Cristo ãgu ãhabeoro ãgu ñero iirare cãdijia. Iirere cãdijia Satana marire ãgu tarinũgabiriboro dopa. ãgu mari ñerire iicũ gahmemi. Iirere õaro masia. Eropirã Jesu yarã erã ñeri iirare guñaniguibea mari Satana yapũre iiri arĩrã.

Troa waĩcũri maca árígu Titore bocabigu mũaro bujawere pepĩũmi Pablo

12 Eropigu Troa waĩcũri macague Cristo yare buhegu ejaribũ. Eroque yũ ejacũ bajarã masa õari buherire peediarã áríma. Mari Opũ ãgu itamuri mera ãgu yare yũ buherire peerã bajarã masa áríma.

13 Eropa áríquerecũ ta mari acaweregu Titore bocatĩribirinijagu mũaro bujawere pepigu erore árímasibiribũ, Eropigu ero majarãre goeriseretuhagu Macedonia yebague waha wabũ ãgũre amagu.

Goãmũ marire tarinũgacũ iimi, arĩ gojañũmi Pablo

14 Goãmũre mucubiriri mera “Õhaa,” arãa. Goãmũ ñerire árípehrerire tarinũgagu ãhrimi. Cristo yarã mari áricũ ãagu marire tarinũgacũ iimi. Poresudiro poresu sehyaboro dopa ta ãhraa mari. Poresu sehyaro dopa ta Goãmũ dorero mera árípehrerogũre Cristore masicũ iiaa mari. Eropa ãgũre masirã erã õaro pepima.

15 Cristo yarã arĩrã masare Cristore guñacũ iiaa mari. Mari eropiicũ ãha Goãmũ mucubirimi. Masare Cristore guñacũ iicũ erã ãgu árírere masima. Goãmũ ãgu taumorã Cristo árírere masima. Gajirã erã peamegue wamorã sã Cristo árírere masima mari mera.

16 Cristo árírere masirã erã peamegue wamorãpũ peamegue erã waborore masima erã. Goãmũ ãgu taumorãpũ árípehrerinũri ãgu mera erã áríburire masima. Eropirã ire Cristo yare mari mari gamero mera buhe ojogorocũmasibea. Goãmũ ãgu itamuri mera ta mari ãgu yare buhe ojogorocũmasia.

17 Bajarã gajirã Goãmũ yare buhemaacãma niyerure wajatadiarã. Gũapũ erã iro dopa ta iibeaa. Gũyaro mariro Cristo ãgu turari mera ãgu yare buhea gũa. Goãmũ guare ãgu obeorã arĩrã ãgu ãhurore õaro buhea gũa.

3

“Ōpa iigura,” Goāmũ ĩgu arĩ wererirare mama buherire wereñumi Pablo

¹ ¿Dipaturi gũa árĩricurire mũare wererã iiri gũa mũa pepicũ? Gajirã mũare erã buheboro core erã buheri queoro árĩrire masidiarã erã gojarapũre serẽmũhtabũ mũa erãre. ¿Gũare masituaquererã ta iripũnore serẽri mũa gũare? ¿O gajirã pohrogue gũa buherã warã iripũnore gũare aĩgãro gahmeri mũa pepicũre?

² Iripũnore gamebeaa gũa. Mũapũre õari gohro-tonirãre árĩpehrerã gajirã ĩarã mũare gũa õaro buherare masirãcoma. Mũare gũa buhecũ Cristore umupeorã ĩgu yarã árĩnũgabũ mũa.

³ Cristo yarã mũa árĩcũ ĩarã masa mũare Goāmũ ya buheri gohrare gũa queoro buherare masituhama. Mũare buherã Goāmũ yagũ Espĩritu Santo ĩgu itamuri mera buheabũ. ĩgu Goāmũ ojocarigũ gohra ãhrimi. Gũa eropa buhecũ peerã Cristore õaro gahmeabũ mũa. Eropa gamerã mũa árĩcũ gajirã mũare ĩarã Cristo yarã mũa árĩrire õaro masima. Eropa masirã mũare Goāmũ ya buheri gohrare gũa queoro buherare masima masa.

⁴ Eropa wacũ masia gũa Goãmũre guñaturari mera. Cristo ĩgu itamuri mera eropa guñaturanĩguia mari.

⁵⁻⁶ “Gũa gamero i mohmerire iiaa gũa,” arĩmasibeeaa. Goāmũ ĩgu itamuri mera ire iiaa gũa.

Eropigu dohpaguere ĩgu wererire õari buherire Goãmũpũ õaro gũare buhemasicũ iimi. Eropa buherã iribojegue ĩgu doreri Moisere ĩgu apira dorerire buhebeaa. Espĩritu Santo mera mari Goãmũ mera õaro árĩburipũre buhea gũa. ĩgu dorerare mari gamero mera ne bocatĩubeaa. Eropa mari bocatĩubirira dipuwaja peamegue waboya mari. Espĩritu Santopũ mari Goãmũ mera árĩpehrerĩnũri õaro árĩnĩguicũ iimi. Ōari buheri buhecũ peeñanirãre õaro árĩnĩguicũ iimi.

⁷ Goãmũ ĩgu dorerire utãmijirigue gojanijagũ Moisere apĩñumi. ĩgu eropa apira pũhrũ ĩgu árĩro gosesiriri dehyoamũriyoro Moisere “Goãmũ ĩgu apira õari ãhraa,” arĩro dopa. Eropiro Moise diapo bũrigã gosesiriyoro. Cuimiju árĩyoro. Pũhrũ ĩgu gosesiriri pehrerĩsubu ĩgu árĩquerecũ ta masa ĩgũre ne ĩamehtumasibiriñuma. Iri dorerire ĩgu apira pũhrũ iri dorerire iibirã masa dipuwajacũrã peamegue wamorã wañuma. Eropiro iri doreri masare peamegue wadorequerero ta, Goãmũ ĩgu árĩro gosesiriri mera árĩnũgayoro.

⁸ Iri doreri tauro òari buheripũ “Jesucristo masare taumi,” arĩ buheri òataria. Iri buherire gajirãre mari buhecũ erã òaro peecũ Goãmũ ta erã mera árĩgũcumi ĩgũ Espĩritu Santo mera. Eropiro iribojegue maja doreri tauro Cristo ya buheripũ òataria.

⁹ Goãmũ Moisere apira doreri iribojegue maja masare peamegue wadoreyoro. Eropa dorequerero Goãmũ ĩgũ gosesiriri mera árĩnũgayoro. Iri tauro òari buheripũ Goãmũ ĩgũ turari mera ãhraa. Iri buheri mera òarã wahama masa Goãmũ ĩgũ ĩacũ.

¹⁰ Iribojegue Goãmũ ĩgũ doreripũ turari árĩquerero dohpaguere bu gohra ta ãhraa. Òari buheripũ iri tauro turatariari ãhraa. Iri buheri mera ƣmaroguere mari wamasia.

¹¹ Iribojegue Goãmũ ĩgũ doreri Moisere ĩgũ apira doreri Goãmũ gosesiriri mera árĩnũgaquerero ta pehreburi árĩyoro. Òari buheripũ “Jesu marire taugũcumi,” arĩ buheripũ árĩniguicãroca. Eropiro “Iri doreri tauro òari buheripũ òataria,” arĩ masia mari.

¹² Irire eropa masirã, gũiro mariro òari buherire òaro werepehocãa gũa.

¹³ Moise gũa iro dopa árĩbiriñumi. ĩgũre Goãmũ ĩgũ gosesiriri pehrerore yũ acawererã masiri arĩgũ dopa ĩgũ diapore suhri gasiro mera cãhmotacãñumi Moise.

¹⁴ Moise ĩgũ diapore ĩgũ cãhmotacũ Goãmũ gosesiririre ĩgũ òarire erã ñecũ sũmarã ĩhamasibiridiro dopa ta erã dohpaguere òari buherire òaro masibeama. Goãmũ wererire iribojegue erã gojarapũrere erã buherã ne masibeama erã Israe masapũ. Cristore gamebirã masisome erã. ĩgũre umupeorã tamera ĩgũ yare masirãcoma.

¹⁵ Dohpague sãre Israe masa Goãmũ dorerire Moisere ĩgũ apirare buhequererã, erãre cãhmotaro dopa ta ne masibeama erã.

¹⁶ Erã mari Opũre Jesucristore erã gamecũ ĩgũ ta erãre masicũ iimi. Iri cãhmotariñere aĩro dopa ta mari Opũ marire ĩgũ yare òaro masicũ iimi.

¹⁷ “Mari Opũ,” arĩrã Espĩritu Santore arĩrã iiaa. Mari Opũ ĩgũ Espĩritu Santo mari mera ĩgũ árĩcũ ĩgũ yarã ãhraa. Eropa arĩrã “Iribojegue maja dorerire iiro gahmea Goãmũ yarã árĩmorã,” arĩbeaa mari.

¹⁸ Eropirã Jesu yarã árĩrã, Jesucristo ĩgũ òarire ĩhmurã iiaa mari. Eropigũ mari Opũ Espĩritu Santo marire gohrotocũ iimi. ĩgũ eropa iicũ Cristo òagũ árĩdiro dopa ta òarã warã iiaa mari sã.

4

1 Goãmũ guare mojomoro ãagũ, õari buherire were-morãre apimi guare. Ìgũ eropa apicũ masirã ìgũ yare buherã duhudiabeaa.

2 Masa ãabiro ñerire iicoreri guhyasĩuri ãhraa. Irire guapũ ne iibeaa. Ìgũ yare buherã guyarire buhebiribũ. Eropirã gũa Goãmũ yare ne gohrotobeaa. Eropa iibirã õari buherire õaro diaye buhea gũa Goãmũ ìgũ ìhuro árĩrã. Gũa eropa árĩricũre árĩpehrerã õaro masima guare ãarã gohra.

3 Gũa iri buherire õari buherire werea. Gũa irire buhequerecũ ta gajirã masibeama. Eropa masibirãpũ peamegue wamorã ãhrima.

4 Satana ñegũ i yeba majarã opũ erãre Goãmũ yare masibiricũ iimi. Cuirĩ ìhajabirã erã ìhajabiro dopa ta masibirã wacũ iimi erãre. Õari buherire Cristo ìgũ turarire erã masibirã wacũ iimi ìgũ erãre. Cristo Goãmũ ìgũ árĩricũre opami. Ìgũ Cristo Goãmũ gohra ta ãhrimi.

5 Gũa buherã “Guapũre umupeoque,” arĩ buhebeaa. Õpa arĩ buhea gũa: “Jesucristopũ ãhrimi mari Opũ,” arĩ buhea gũa. Guapũ Jesure yũhrirã ãhraa. Eropirã mũare itamurã ãhraa gũa.

6 Negohraguere õpa arĩ dorepũ Goãmũ i mũũ naitĩaro árĩcũ: “Boyoro árĩque,” ìgũ arĩcũ boyoa wayoro. Eropigũ dohpaguere ìgũ ta iri turari mera marire masicũ iimi boyoro árĩro dopa. Eropa marire masicũ iigũ ìgũ õaro árĩricũre marire masicũ iimi. Jesucristore masirã ìgũ Pagũ ìgũ õaro árĩricũre masia mari.

Cristo turari mera mari ãhraa, arĩ gojañumi Pablo

7 Eropa masirã árĩrã, Goãmũ ìgũ turarire gajirãre masicũ iiaa. Eropa iirã árĩquererã ta turabirã ãhraa guapũ. Mátasoro mata wahrirasoro iro dopa ta gũa sã turabirã ãhraa. Gũa eropa turabirã árĩquererã ta gũa masare Goãmũ yare werecũ ãarã, gũa gamero mera iimasibirirare ãarã õpa arĩ masirãcoma erã. “Goãmũ turari mera eropa arĩ wereniguima marire,” arĩrãcoma masa. Eropirã Goãmũpũre umupeorãcoma.

8 Árĩpehrerã gajirã guare ñero iiquererã ta Goãmũ guare taucũ erã guare tarinũgabeama. Eropirã gũa gariborequererã ta ne Goãmũ yare buhe duhudiabeaa.

9 Guare erã ñero iiniguiquererã ta Goãmũ guare eropa itamuniguicãmi. Guare erã pamehpiquererã ta ìgũ itamuri mera sĩribeeaa gũa.

10 Erã wejẽsũmorã árĩcãrã tiiaa gũa Cristo i yeba-guere ñero ìgũ taridiro dopa ta. Erã wejẽsũmorã

áríquererã eropa áríniguirã tiiaa gua sã Cristo ïgu ojo-caririre ïhmumorã.

¹¹ Eropirã umuri nucu gajirã guare wejẽmaja guhya ãhrima Cristo yarã gua áriri dipuwaja. Opa ta ñero tariquererã áríniguiã gua Cristo ïgu ojocaririre ïhmumorã.

¹² Eropirã mware gua buheri dipuwaja guare gajirã wejẽmaja guhya ãhrima. Gua buherire mua peenirãpu umuri nucu Goãmũ mera árĩmorã ãhraa.

¹³ Goãmũ yare erã gojarapũ opa ãhraa: "Goãmũre umupeobũ. Eropigũ ïgu yare werebũ," arĩ gojañumi iribojegue majagu. Gua sã yujuropa ta ãhraa. Goãmũre umupeorã ïgu yare werea.

¹⁴ I sãre õaro masirã ïgu yare werea gua. Cristo ïgu sãrira puhru Goãmũ ïgure masudi árĩmi. Eropigũ Cristo yarã mari árĩcũ ïagu ïgu mari sãre masugucumi. ïgu eropa masura puhru ïgu pohrogue aĩgãgucumi marire.

¹⁵ Eropirã mware itamudiarã ñero taria gua. Eropirã Cristo yarã mua bajarã warã, bajarã mua Goãmũre mucubiriri mera umupeorãca. ïgure "Õhaa," arĩrãca.

¹⁶ Mua eropa umupeocũ ïarã, gua ñero tariquererã ta bujawerebeaa. Eropirã Cristo yare were duhubeaa. Gua dupũ umuri nucu turabiri wahgãro iiaa. Eropa turabiri wahgãquererã ta õaro siporãcua Jesucristore guñaturari mera.

¹⁷ Dohpaguere ñero tariquererã ta puhru ñero tari-some. Eropirã Cristo yare were duhubeaa. Iri ñero mari tariri pehrea waroca. Eropirã marire merogã ñero tariro gahmea. Eropa mari ñero tarinirã árĩrã, puhraguere wãaro mucubiriri mera áríniguirãca Goãmũ mera. Eropirã mari ñero taridiro tauro burigã mucubiriri mera eropa árínigucãrãca.

¹⁸ Eropirã mari ïarire dohpaguere mari warore guñanurubeaa. Mari ïabiriripure puhru mari Goãmũ mera áríniguiburire guñanurua. Mari dohpaguere ïari pehrea waroca. Mari ïabiriripũ árínigucãroca.

5

¹ I sãre masia mari: Wihire mari cóãdiro dopa ta mari dupure cóãrãca. Eropigũ mama wihi iibodiro dopa ta Goãmũ mama dupure iigucumi. Eropigũ iri dupure marire ogucumi. Eropirã umaroguere eropa áríniguirãca iri dupũ mera. Irire masirã ñero tariquererã Goãmũ yare duhubeaa.

² Eropirã iri dupure umaro maja dupure turaro gamerã, mari eropa coreniguirã iiaa.

³ Suhrirore turaro mari sañadiaro dopa ta iri dũpũre turaro gahmea mari. Eropa ta cohrea mari iri dũpũ marirã árĩdiabirã.

⁴ Dohpague maja dũpũre cóãdiabiriquererã umuri nũcu Goãmũ mera mari árĩburi dũpũre bũrigã gahmea mari. Eropirã i mari dũpũ sĩriburi dũpũ iri árĩcũ masirã, mama dũpũ mera Goãmũ mera eropa árĩniguiddiaa mari.

⁵ Mari ĩgũ mera árĩniguiborore amuyudi árĩmi Goãmũpũ. Eropa amuyugũ ĩgũ Espĩritu Santore omũhtami marire. Eropigũ ĩgũ Espĩritu Santo mari mera árĩcũ ĩha marire Goãmũ ĩgũ iiborore, "Diaye ta ãhraa," arĩ masia mari.

⁶ Eropirã Goãmũ mera sĩporã turarã ãhraa. Gũiro mariro ãhraa mari. I sãre mari masia. I dũpũ mari árĩmũhtara dũpũ mera árĩrã, mari Opũ pohro árĩnibeaa.

⁷ Umaro majare Goãmũ sãre mari ĩabiriquererã ta "Ĩgũ diaye ta ãhrimi," arĩ masia mari. Eropirã ĩgũre umupeoa.

⁸ Eropirã mari Goãmũ pohro waborore masia. Mari dũpũre i yeba maja dũpũre cóãrã mari Opũ mera umarogue mari árĩdiaa.

⁹ Eropirã Cristore mucubiricũ iidiaa mari. I yeba maja dũpũ mera árĩrã ĩgũre mucubiricũ iidiaa mari. Umarogue árĩrã sã ĩgũre mucubiricũ iidiaa.

¹⁰ Árĩpehrerã Cristo pohroque mari wacũ ĩagũ ĩgũ mari iirare beyegũcumi. Eropiro mari iira masisũroca. Eropigũ marire õarire mari iira wajare ogũcumi. Ñerire mari iira waja sãre ogũcumi. ĩgũ eropa beyegũ árĩcũ masirã ĩgũre mucubiricũ iidiaa mari.

Goãmũre mari mera õaro árĩcũ iimi Cristo, arĩ gojañumi Pablo

¹¹ Eropirã gũhyadiaro mera mari Opũre umupeoro gahmea marire. ĩgũ marire eropa beyeburire masirã, Cristo yare masicũ iiaa gũa masare. Erãre gũisãrã, ĩgũre umupeocũ iidiaa gũa. Gũa õarã árĩrire Goãmũ õaro masimi. Gũa eropa iirire mũa sãre õaro masicũ gahmea yũhũ.

¹² Dipaturi gũa õarã árĩrire mũare wererã iibeaa. "Gajirãre tarinũgaa," arĩmaacãnrãre mũa wereburire eropa wererã iiaa gũa mũare. Erã basi eropa arĩ pepirãpũ erã pepiriguere ñerã, gũyaricũrã árĩquererã ta masa erã ĩhuro dihtare õarã iro dopa iirima. Eropirã mũa gũare mucubiriboro dopa, "Õaro iirã iima," gajirãre mũa gũare arĩ cãhmotaburire i árĩpehrerire mũare were gojarã iiaa.

¹³ ¿Gũa õpa arĩ wererã pee masibirã ãhriri gũa mũa ĩacũ? Masa gũare ĩarã pee masibirã iro dopa ĩhama gũare. Goãmũ yare gũa werecũ ĩarã eropa ĩabocoma gũare. Erã

eropa arĩ ãabonirã árĩquererã ta pee masirã ta ãhraa gũa mũare eropa itamumorã.

14 Cristo ãgũ gũare mahicũ ãarã masare eropa itamua. ãgũ eropa mahicũ ãarã ãgũ yare eropa buheniguia gũa. Marire mahigũ yujugũ ta Cristo mari árĩpehrerã ya ñeri dipuwajare sĩridi árĩmi. Eropigũ árĩpehrerã mari ñeri dipuwajare sĩrimorã árĩnirãre sĩribasadi árĩmi. Irire guñarã ãgũ yare iiniguia gũa.

15 Árĩpehrerã mari ñeri dipuwajare sĩridi árĩmi ãgũ mari gamero dopa mari iibiriboro dopa. Eropigũ ãgũ gameripũre iidoregũ sĩridigũ árĩmi ãgũ. Maripũre Goãmũ pohrogue mari ejaborore eropa sĩridi árĩmi. ãgũpũ mari ya árĩburire sĩrira pũhrũ masa mũriadi árĩmi. Eropirã mari gamero dopa mari ãaribejarire iibirã ãgũ yare iiro gahmea pare marire.

16 Eropirã dohpaguere Jesure gamebirã gajirã erã árĩricũrere ãha werewũaro dopa ne arĩ ãabeaa gũa. Iribojeguere gũa Cristore eropa ãaquererã dohpaguere ãgũre õaro masia.

17 Eropirã árĩpehrerã Cristo yarã warã õaripũre gohrotoa mari. Iribojegue mari gamero mari árĩrare duhucãa mari. Dohpaguepũre õaripũre corerã iiaa mari.

18 Goãmũpũ marire õarire gohrotocũ iimi. Iribojegue mari Goãmũ mera õaro árĩbirimũrribũ. Eropigũ Jesucristo mari ñeri iira dipuwaja sĩribasara mera Goãmũ marire ãgũ mera õaro árĩcũ iidi árĩmi. Eropa iigũ gũare ãgũ yare buhedoregũ apimi. Eropa buherã, gajirãre Goãmũ mera erã õaro árĩcũ iiaa gũa sã.

19 Õpa arĩ masare weredoremi Goãmũ gũare: “Mari masa ãgũ mera õaro árĩbirinirã árĩquerecũ Goãmũ Cristo sĩrira mera marire ãgũ mera õaro árĩcũ iimi. Eropigũ Cristore mari umupeocũ ãagũ mari ñeri dipuwajare dipuwaja moabemi Goãmũ marire,” arĩ weredoremi Goãmũ gũare.

20 Eropirã Cristo yare weremorã ãgũ obeonirã ãhraa gũa. Goãmũ ãgũ basi mũare ãgũ werebodiropo dopa ta gũapũ mũare õpa arĩ werea: Cristore werebasarã iiaa. Eropirã mũare werea. Goãmũre mũa ãhaturirare iripẽta duhuque.

21 Cristo ãgũ ñerire iibiriquerecũ ta Goãmũ ãgũre mari ñeri dipuwajare sĩridoredi árĩmi. Eropa iigũ mari ñeri dipuwajare dipuwaja moadi árĩmi Goãmũ ñeri dipuwajare dipuwaja moabemi Goãmũ marire,” arĩ Jesucristore. ãgũ eropa iidi árĩmi Cristo yarã mari wacũ, Goãmũ iro dopa õarã mari árĩboro dopa.

6

¹ Goãmũ eropa iigu ĩgu mũare ĩgu ðaro mojomoro ĩarare ĩhmumi. Eropirã Goãmũ yare mohmebasarã árĩrã ire turaro mũare iidorea gũa. Goãmũ ðaro iirare ðari buherire mũa peediro dopa ta iique mũa. Mũa peediro dopa ta mũa iibiricũ mũa peera duhpburi árĩbeaa.

² Őpa arĩmi Goãmũ ĩgu yare erã gojarapũgue: beami Goãmũ marire,” arĩ Mũaare yũ ðaro iiburinũri árĩcũ mũa serẽrire pee yũhrigũra. Eropigu mũare peamegue wabonirãre yũ tauburinũri árĩcũ ita-mugũra, arĩmi ĩgu.

Peeque mũa. Dohpaguere Goãmũ masare ĩgu ðaro iiburinũri ãhrra. Dohpaguere masa Jesucristore umu-peoburinũri ãhrra Goãmũ erãre tauboro dopa. Eropirã dohpaguere ĩgũre umupeoro gahmea, arĩ werea gũa.

³ “¿Őari buheripũre gamebiribocuri?” arĩrã, ne merogã gajirãre ñero iibea gũa. Gajirãre ne ñero arĩ werenigu-ibeaa.

⁴ Irire iibirã Goãmũ pohro majarã gũa árĩrire mũare masicũ iidiaa. Eropirã ĩgu yare buherã ðpa ãhrra gũa: Ñero tarirã gajino moorã bocatũua. Gũare erã ñero iiquerecũ ta guaro mariro ãhrra.

⁵ Őpa ñero taribũ gũa: Masa gũare pacũ, peresu erã iicũ, masa bajarã gũare wejẽdiarã erã gaguiniguicũ peerã ñero taribũ gũa. Gũa turaro mohme oẽarã sã, wũja pũriquerecũ ta carĩbirã sã, oaboarã sã ñero taribũ.

⁶ Eropirã ðaro árĩricũri mera diaye buhebũ. Eropirã Goãmũ yare buherã ðaro masiri mera buhebũ mũare. Eropirã ne guabiribũ gũa. Eropirã ðaro mera buhebũ gũa mũare. Eropa iirã Goãmũ pohro majarã gũa árĩrire ĩhmurã iibũ gũa mũare. Espĩritu Santo ĩgu itamuri mera eropa ta Goãmũ pohro majarã gũa árĩrire ĩhmurã iibũ gũa mũare. Eropirã diaye mũare gũa mahicũ ĩarã ĩgu pohro majarã gũa árĩrire masia mũa.

⁷ Eropirã ðari buherire diaye mũare werecũ ĩarã, Goãmũ turari mera gũa iicũ ĩarã, ĩgu pohro majarã gũa árĩrire masia mũa. Őaripũ árĩpehreri gũa iira gũa mojo iro dopa ãhrra gũa ðaro cãhmotaboro dopa. Iri ðarire iirã gũa watĩre cãhmotarã iiaa. Eropirã iri ðari gũa iira mera gũa ĩgũre tarinũgaa.

⁸ Eropa iirã gajirã gũare umupeoma. Gajirãpũ gũare umupeobeama. Gajirã ðaro wereniguima gũare. Gajirãpũ ñero arĩ wereniguima gũare. Diaye gũa werequerecũ ta “Gũyarã ãhrima,” arĩ weresãma gajirã gũare.

⁹ Gajinũre guare masirã dopa iima. Gajinũre guare masibirã dopa iima. Guare erã wejẽdiaquerecũ ta ojocarinia gua. Erã burigã panirã arĩquererã ta ojocaria gua.

¹⁰ Gua yujuyerinũri bujawererã arĩquererã ta, eropa mucubiriniguia. Mojomorocurã arĩquererã ta erãre õari buherire buherã erãre wũaro doberire gua obodiro dopa ta iirã iiaa erãre. Gajino moorã arĩquererã ta, diaye ta Goãmũ yare opapehocãa gua.

¹¹ Corinto majarã, yũ acawererã, mũare õaro mera werepeho gojabũ gua mũare. Mũare turaro mahirã eropa werebũ.

¹² Guapũ mũare mahi duhubirabũ. Mũapũ guare mahibiriñaria.

¹³ Eropigũ yũ porãre yũ werebodiro dopa ta mũare weregura: Mũare gua pepidiro dopa ta mũa sã eropa ta õaro pepique guare. Eropirã guare mahique mũa.

Cristore umupeobirãre wapicudorebiriñumi Pablo

¹⁴ Eropirã Cristore umupeobirã mera eropa wapicũniguibiricãque. Erã mera majagũ arĩbita. Yujuro mera arĩbeaa mũa. Õarire iigũ, ñerire iigũ mera õaro arĩmasibeami. Boyoro iro dopa arĩrã Goãmũre gamerã ãhrima. Naitĩaro iro dopa arĩrã Goãmũre gamebirã ãhrima. Eropirã erã perã game wapicũmasibeama.

¹⁵ Eropigũ Cristo watĩ mera yujuro pepibeami. Eropigũ Cristo yagũ, Cristore umupeobigũ mera õaro game wapicũmasibeami.

¹⁶ Goãmũre umupeori wihigue goãmarã wéanirãre mari apicũ queoro wabeaa. Eropa ta Cristo yarã Cristore gamebirã mera wapicũniguicũ queoro wabeaa. Erã pe curu majarã yujuro mera erã arĩmasibeama. Goãmũ wihĩ iro dopa ãhraa mari. Igũ wihĩ arĩro dopa ta mari mera ãhrimi igũ. Õpa arĩñumi Goãmũ igũ yare erã gojarapũgue:

Erã mera ta arĩgũra yũhũ. Eropigũ erã watope ta eropa arĩniguigũra. Yũhũ Goãmũ erã opũ arĩgũra. Eropirã erãpũ yaharã masa arĩrãcoma, arĩñumi igũ.

¹⁷ Eropigũ õpa arĩnemoñumi igũ mari Opũ:

Erã ñerã mera ne dujabita. Eropirã erãre wapicũbita. Yũre gamebirã yare ñerire ne iibiricãque. Eropigũ yũpũ mũare wapicũgũra.

¹⁸ Eropigũ mũa pagũ arĩgũra. Mũapũ yũ porã arĩrãca, arĩñumi mari Opũ turatariagũ.

7

¹ Yũ acawererã, yũ mahirã, mũare ire weregura: I arĩpehrerire Goãmũ marire igũ eropa arĩ werecũ ãarã

árĩpehrerire mari dũpũre goroweorire duhurã. Eropirã mari pepiri sãre goroweorire duhurã. Eropirã Goãmũre õaro umupearĩ mera ñero iiro mariro árĩrã mari.

Pablo mucubiriri mera wereñumi Corinto majarãre

² Õaro gũare mahique. Ne merogã mera ñero iibiribũ gua mũare. Eropirã gua buheri mera mũare ñero iicũ ne iibiribũ gua. Ne yujugũre mũa mera majagũre gũyari mera waja gamebiribũ.

³ Eropa arĩgũ “Dipuwajacurã ãhraa mũa,” arĩgũ iibeaa mũare. Mũare mahia gua. Irĩre mũare weretuhabũ. Ojocarĩrã yuju curu ta ãhraa mari. Mari sĩrira pũhrũgue sãre yuju curu ta árĩrãca mari.

⁴ Õaro mũa iirare masia yũhũ. Eropigũ mũare guñabeogũ mucubiria. Eropirã gua ñero taririsubure mũa õaro iira querere pee bũrigã mucubiribũ yũhũ.

⁵ Eropi Macedonia yebague gua ejara pũhrũ, erogũe ejarã ne soobiribũ gua. Eroguere ñero taribũ gua. Gajirã gua mera game dũyasoma. Eropirã “Cristo yare duhubocoma,” arĩrã Cristo yarãpũre wũaro guñaricabũ gua.

⁶ Gũa eropa ñero taricũ Goãmũpũ gũare õaro sĩporãcũcũ iimi. Ĩgũ marire bũjawererãre mucubiricũ iigũ ãhrimi. Eropigũ Tito gua pohrogũe ĩgũ dujariro mera gũare mucubiricũ iimi Goãmũ.

⁷ Tito ĩgũ eracũ ĩarã mucubiribũ. Iri dihtare mucubiribiribũ. Mũare ĩgũ õari quere werecũ sãre turaro mucubiribũ. Yũre mũa ĩadiarare weremi gũare. Yũre mũa bũjawerera sãre weremi ĩgũ. Yũre “Goãmũ yare iigũ iimi Pablo,” mũa gajirãre arĩ werera sãre weremi ĩgũ. ĩgũ eropa arĩcũ peegũ turaro mucubiribũ yũhũ.

⁸ Ero core yũhũ mũa ñero iirare were gojabeorapũ mera mũare merogã bũjawerrecũ iiribũ. Eropa iidigũ árĩqueregũ ta “Iri carta mera ñero iibũ,” arĩbeaa. Iripũre mũa buhera pũhrũ bũjawereyoro mũa. Eropigũ ne gojabeora pũhrũ ta “¿Ñero iiarĩ yũhũ?” arĩ pepiribũ. Eropa arĩqueregũ ta “Ñero iibũ,” arĩbeaa dohpagũre.

⁹ Dohpagũ tamerare mucubiria yũhũ. Mũa bũjawererare peegũ mucubiribea. Mũa bũjawererã õaripũre gohrotorapũre peegũ mucubiria yũhũ. Mũa ñero iirare bũjawerrecũ ĩagũ Goãmũpũ mũare õarĩre gohrotocũ iidi árĩmi. Eropirã mũare bũjawerrecũ iirã ñero ĩi goroweorã iibiribũ gua mũare.

¹⁰ Eropirã Goãmũ ĩgũ gamero dopa ta bũjawererã, mari ñerĩre bũjawere õaripũre gohrotorãca. Eropa ta mari bũjawerrecũ ĩagũ mari peamegũe wabonĩrãre taumi

Goãmũ. Eropiro mari eropa bujawerecũ õha ãhraa marire. Cristore gamebirãpũ erã bujawerequererã erã ñerire duhubirã peamegue wamorã árĩnima.

¹¹ Mũapũ Goãmũ ãgũ gamero dopa ta bujawereayoro. Mũa eropa bujowererã õpa iirã waĩcuabũ mũa: Dohpague ñerire iirãre eropa ãacãbirã waĩcuabũ mũa. Ne iri ñerire gamebirigohracãyoro mũa. Erã ñeri iira mera guayoro. Erãre ñerire iirire duhudorerã waĩcuabũ mũa. Eropirã erã ñerire gũirã waĩcuabũ mũa erã iro dopa iiri arĩrã. Eropirã yũre mahirã yũre ãadiayoro mũa. Eropirã ñeri iigũre dipuwaja moayoro. Iri árĩpehrerire mũa iira mera iri ñeri dipuwaja marirã mũa árĩrĩre ãhmuabũ mũa guare.

¹² Iribojegue ñero iigũre mũare were gojabeoqueregũ ta ãgũre itamubu eropa arĩ gojabeobiribũ yũhũ. ãgũ ñero iidigũ sãre itamubu eropa arĩ gojabeobiribũ. Mũapũre itamubu iripũre gojabeobũ. Goãmũ ãgũ ãhurore guare õaro umupeoa mũa. Irĩre mũa umupeorare mũa õaro gunãboro dopa iripũre gojabeobũ mũare.

¹³ Eropirã Tito mũa iira quere guare werecũ peerã bũrigã mucubiria gũa.

Tito sã mũa mera turaro mucubiricũ ãha gũa sã mucubiribũ. ãgũre mũa õaro mera bocatĩricũ peerã, mũa mera ãgũ mucubirirare peerã, gũa sã õaro mucubiribũ.

¹⁴ Negohraguere mũa pohro ãgũ waboro corere mũa mera yũ mucubirirare, õarã mũa árĩrãre werebũ ãgũre. Eropirã yũ arĩdiro dopa ta õaro iayoro mũa ãgũre. Eropigũ ãgũre yũ arĩrãre gũhyasĩribirabũ. Titore mũare gũa werera diaye ta árĩbũ dohpague ãgũ ãadiro dopa ta.

¹⁵ Mũa pohrogue ãgũ ejacũ umupeori mera bocatĩriayoro mũa. Eropirã gũhyadiaro mera ãarã tarinũgaro mariro mũa yũhrirã árĩcũ ãapũ ãgũ. Eropigũ mũare mahinemogũ iimi ãgũ.

¹⁶ Dohpague õaro yũhrirã Goãmũ ãgũ gamero dopa ta mũa õaro mũa ipehorã árĩcũ õaro masia yũhũ. Eropa masigũ bũrigã mucubiria.

8

Cristo yarã árĩrã gajirãre eropa ocãro gahmea marire, arĩ gojañumi Pablo

¹ Gũa acawererã, ire mũare masicũ gahmea gũa. Cristo yarã Macedonia yeba majarã Goãmũ mahiri mera ãgũ mojomoro ãari mera erã iirare mũare weregũra.

² Erã ñero tariquererã ta, niyeru moorã árĩquererã ta mahiro mariro eropa ocãma gajirãre. Cristo mera turaro

mucubirirã árĩrã, erã gajirãre õaro mera erã oparire eropa ocãma.

³ Mũare arĩgu iiaa. Erã erã oparopẽ orã, tauñariro oma. Erã gamero oma erã.

⁴ Goãmũ yarãre mojomorocũrãre turaro itamudiarã, erãre erã obeerire aĩdorema guare.

⁵ "Ipẽ orãcoma erã," arĩ gua pepidiro tauro oma erã. Õpa iima erã: Negohraguere niyerure erã oboro core mari Opũ ĩgu gamerire iidiarã árĩtuhama. Eropirã Goãmũ ĩgu gamero dopa ta gua sãre umupeori mera yũhrinirã árĩma. Eropa iirã árĩrã erã niyeru sãre oma.

⁶ Erã eropa ocũ ĩarã Titore guapũ õpa arĩbũ: "Erãre mũ buhenugadiro dopa ta Corinto majarã sãre erã mojomorocũrãre oburire wereque," arĩbũ gua ĩgure. Mũa sã gajirãre mojomoro ĩarã mũa itamuboro dopa eropa arĩbũ ĩgure.

⁷ Eropirã mũapũ árĩpehrerire õaro iirã árĩtuhaa. Cristore diaye ta õaro umupeoa mũa. Eropirã ĩgu yare õaro werea. Eropirã Goãmũ yare õaro masia mũa. Eropirã Goãmũ ĩgu gamero dopa ta turaro iidiaa. Eropirã guare mahia mũa. Eropa ta õaro iirã árĩtuhaa mũa. Mũa eropa õaro iirã árĩquerẽcũ ta merogã duhyania mũa iipehoburi. Mojomorocũrã tamerare mũa mojomoro ĩacũ gahmea gua. Eropirã erãre mũa õaro mera wũaro ocũ gahmea gua.

⁸ Eropa arĩgu mũare doregohragũ iibea yũhũ. Eropa arĩ weregu iiaa mũare. Gajirã mojomorocũrãre erã turaro itamurare mũare weregu iiaa. ¿Mũa diaye ta gajirãre mojomoro ĩhari? arĩ masidiagu iiaa.

⁹ Mari Opũ Jesucristopũ marire ĩgu mojomoro ĩarare masia mũa. Iri diaye ta ãhraa. ĩgu mũmaroguere wũaro opagu árĩqueregu ta i yebaguere arigu mojomorocũro wapũ. Eropigu mũa ya árĩburire sĩrigũ sã mojomorocũro wapũ. Õpa ta wapũ mũapũ mũa wũaro opaboro dopa, ĩgu mera mũa õaro árĩniguicãborore.

¹⁰ Mũaare weregu iiaa. Õpa pepia yũpũ: Yuju bojori wahaa mũa mojomorocũrãre odiara pũhrũ. Mũaapũ mojomorocũrãre odiamũhtaribũ. Eropirã erãre omũhtabonirã arĩbũ mũa.

¹¹ Eropirã mũa odiarare dohpaguere oho ojogorocũque. Mũa odiamũhtadiro dopa ta dohpaguere õaro opehoque. Eropirã pagari oparã árĩrã wũaro oque. Merogã oparã árĩrã merogã oque.

¹² Bũrigã mũa odiari mera irire mũa orare Goãmũ mucubirigũcumi. Eropirã õaro mũa omasiropẽ oque. Mũa oropẽ

ta mucubirigũcumi. Mũa opabirirare mũa ocũ gamebeami ĩgu.

13 “Mojomorocũrãre oque,” arĩgu erãre wũaro opadoregu iibeaa. Eropigu mũapũre mojomorocũrã dujacũ iidiabeaa.

14 Mũare yujuro mera opadoregu eropa arĩgu iiaa. Dohpaguere mũapũ wũaro opaa. Eropa oparã gajinore moorãre omasia mũa. Pũhrũ mũare gajino moocũ erã sã mũare omasima. Mũa eropa game orã yujuropa oparãca árĩpehrerã Cristo yarã.

15 Eropa ta ãhraa Goãmũ yare erã gojarapũ: “Wũaro aĩgu sã gajigu tauro opabeami. Merogã aĩgu sãre ne merogã duhyabeaa,” arãa Goãmũ yare erã gojarapũ.

Tito ĩgu mera majarã mera Corintogue wañumi

16 Eropi mũare yũ itamudiro dopa ta Tito sã mũare itamudiami. Goãmũpũ ĩgu itamudiacũ iimi ĩgũre. ĩgu eropa iicũ ĩagu “Õhaa,” arãa Goãmũre.

17 Titore gũa mũa pohrogue wadorecũ ĩgu õaro mera yũhriami. Eropigu ĩgũre mũa pohrogue gũa wadoreboro coregue ta mũa pohrogue “Wagũra,” arĩ guñatuhadi ãhrami ĩgu.

18 ĩgu gajigu Jesu yagu mera wapimoo obeobũ gũa. Tito mera majagu árĩpehrerã gajirã Jesu yarã erã umupeogu ãhrimi. Õari buherire õaro ĩgu mohmegũ arĩcũ ĩarã ĩgũre õaro umupeoma.

19 Eropirã Jesu yarã ĩgũre ta gahmeama gũa mera curibure. Iri niyerure mojomorocũrã pohrogue gũa aĩcũ gũa mera curibure gahmeama ĩgũre. Iri niyerure mũa gameneorare gũa mojomorocũrãre orã wacũ ĩarã mojomorocũrãpũ “Marire mari Opũ itamugu iimi,” arĩrãcoma. Gũa eropa ocũ, erãre bũrigã mari itamudiarare masirãcoma.

20 Eropirã i niyerure wũaro Jesu yarã erã odorerare gũa aĩrã õaro ĩhadiburãca erã orare guare weresãri arĩrã.

21 Mari Opũ ĩgu ĩhabeoro diaye õaro iidiaa gũa. Eropirã masa erã ĩhuro sãre õaro iidiaa.

22 Eropa iimorã gajigũre mari acaweregũre obeorãca Tito sã mera. Gũa ĩgu mera obeogũre bajasuburi gajirãre ĩgu õaro itamucũ ĩabũ gũa. Eropigu dohpaguere mũapũ gajirãre mũa itamudiacũ ĩagu ero core ĩgu iidiro tauro õaro mũare itamudiami.

23 Tito sãre mũare weregũra. ĩgu yũ mera majagu ãhrimi. Mũare yũ itamucũ ĩgu yũ mera mohmegũ ãhrimi. Gajirã ĩgu mera wamorã Jesu yarã erã beyenirã erã obeorã ãhriima. Erã Cristo yare iima gajirã Cristore erã umupeoboro dopa.

²⁴ Erã eropa árĩrãre mahiri mera õaro erãre bocatĩrique mua. Mua eropa iicũ ãarã gajirã Jesu yarãpũ õarã mua árĩricurire masirãcoma. Mari obeonirãre “Õaro mera bocatĩrirãcoma Corinto majarã,” arĩ weretuhabũ gua mera majarãre. Mua eropa õaro bocatĩricũ ãarã gua werera diaye árĩcũ ãha masirãcoma gajirã Jesu yarã.

9

Jesu yarãre mojomorocurãre erã oburire wereñumi Pablo

¹ Eropirã Goãmũ yarãre mua itamuborore mua oburire masituhaa mua.

² Gajirãre mua itamudiarire masia yũ sã. Eropa masigu Macedonia majarãre õpa arĩ werebũ: “Corinto majarã Jesu yarãpũ gajirãre itamudiatuhama. Yuju bojori taria erã itamudiadiro,” arĩ weretuhabũ erãre mua. Mua eropa itamudiacũ peerã bajarã erã sã mojomorocurãre itamudiana.

³ Mua mojomorocurãre oborare gajirãre werequeregu “Iri niyerure gameneobiribocoma yũ ejaboro core,” arĩ pepia mua. Eropigu dohpaguere oãre mari acawererãre mua pohrogue obeomũhtagũ iiaa. Mojomorocurãre mua oburire gameneo mua opayuboro dopa oãre obeomũhtagũ iiaa.

⁴ Erãre obeobigu Macedonia yeba majarã mera mua pohrogue yũ ejagu, mua oburire mua opabiricũ ãagu guhyasĩrisãboya yũhũ mua. “Mojomorocurãre orãcoma,” yũhũ mua arĩra puhũ mua obiricũ ãagu guhyasĩrisãboya yũhũ mua. Mua sã guhyasĩriboya.

⁵ Eropigu mua pohrogue yũ ejaboro core erãre mari acawererãre obeomũhtagũ iiaa. “Mojomorocurãre wũaro orãca,” mua arĩrare mua opayuboro dopa erãre obeomũhtagũ iiaa. Mua oburire mua gameneocũ erãpũ mua weresererãcoma. Eropigu yurũ eja mua oburire mua opayutuhacũ ãha mucubiriri mera mua odiarare masigũra. Mua gua odorera árĩsome iri.

⁶ Eropirã ire guñaque mua: Bajameyerigã otedigu bajamegã dũcare aĩgũcumi. Bajayeri otedigu baja dũca Eropigu mua pohrogue yũ ejaboro core erãre mari acawererãre obeomũhtagũ iiaa. “Mojomorocurãre wũaro orre aĩgũcumi. Eropa ta ãhraa mojomorocurãre mari ocũ. Merogã mari ocũ, Goãmũ merogã ogũcumi marire. Wũaro mari ocũ wũaro marire ogũcumi.

⁷ Eropirã yujurãyeri mua “Ipẽ ogũra,” arĩ oque. Mahĩnari obiricãque. “Marire odoreama,” arĩro mariro oque. Mucubiriri mera orãre gahmemi Goãmũ.

⁸ Īguru m̄ua gameri tauro m̄uare ogucumi. Eropirā árīpehrerire m̄ua gameri d̄uhyarire opapehorāca. Eropirā gajirāre m̄ua oburi s̄a ōaro sihajaroca m̄ua opari.

⁹ Eropa ta āhraa Goām̄u yare erā gojarapū:

Mojomorocurāre w̄uaro ohomi ĩgu. Ōaro mera masare itamuniguimi ĩgu, āhraa ĩgu yare erā gojarapū.

¹⁰ Eropiro oteri d̄ucacura p̄hr̄u oteri masu ĩgu oteburi coyere ohomi Goām̄u. P̄hr̄u ĩgu oterare d̄ucacucū iimi ĩgu baburire. Mojomorocurāre m̄ua w̄uaro ocū oteri masure ĩgu coyere oro dopa ta m̄ua s̄are w̄uaro ogucumi Goām̄u. Eropa ta m̄uare ogucumi mojomorocurāre m̄ua onemoboro dopa.

¹¹ Eropa ta āhraa. W̄uaro ogucumi gajirāre w̄uaro m̄ua eropa oniguicāboro dopa. Eropirā m̄ua iri niyerure odorere ḡua ocū erā ñear̄pu mucubiriri mera Goām̄ure "Ōhaa," arīrācoma.

¹² Eropirā mojomorocurāre Goām̄u yarāre orā, erāre itamurā iiaa m̄ua. I dihtare iibeaa m̄ua. I s̄are iirā iiaa m̄ua. M̄ua eropa orā bajarā masa Goām̄ure mucubiriri mera "Ōhaa," arīcū iirāca m̄ua.

¹³ Eropa m̄ua gajirāre itamucū ĩarā, Goām̄ure umupeori mera wereniguirācoma masa. Eropirā erāre gajirā s̄are w̄uaro m̄ua ocū ĩarā Goām̄ure "Ōatariagu āhrimi," arīrācoma masa. Eropa arīrācoma Cristo ya buherire ōari buherire m̄ua ōaro ȳhricū ĩarā.

¹⁴ Eropirā Goām̄u ĩgu mojomoro ĩadiro dopa ta m̄ua s̄a erāre mojomoro ĩacū er̄pu m̄uare gamerācoma. Eropa gamerā m̄uare serēbasarācoma Goām̄ure.

¹⁵ Goām̄u marire ōatariaro iigucumi. ĩgu eropa iiborore masirā "Ōataria," arāa mari ĩgure.

10

Jesu ĩgu apidigu ĩgu árīrre wereñumi Pablo

¹ Dohpaguere ȳhu Pablo m̄uare weregura. Cristop̄u ne guabigu, masare ōaro iigu árīñumi. ĩgu iidiro dopa ta ȳ s̄a m̄uare werediaa ōari mera. Yujurāyeri m̄ua mera majarā ōpa arāyoro ȳre. "Mari mera árīgu eropa pepicāgu bu árīgu iro dopa árīmi Pablo. Eropa árīqueregu ta gajipugue árīgu marire doyarō mariro turibeomi," arāyoro m̄ua yujurāyeri ȳre.

² Eropigu m̄uare ire burigā dorea: M̄ua pohrogue ȳ ejacū ōaro iique m̄ua, "¿Pablo ḡuare turiri?" arīrā. Yujurāyeri ȳre ōpa arāyoro: "Īgu, ĩgu gamero, Goām̄u

dorebiriquerēcũ iimi," arãyoro mũa yũre yujurãyeri. Eropa arĩrã tamerare turiboca yũhũ.

³ Gũa sã i yeba majarã ta árĩrã iiaa. Eropa árĩquererã ta i yeba majarã erã gamero iiro dopa ta iibeaa gũa.

⁴ Surara erã tarinũgaro dopa ta gũapũ ñerire tarinũgadiaa. Surara erã mojo oparo dopa ta gũa sã mojo opaa. Gũa mojo i yeba majarã erã masiri, erã wereniguitarinũgari, erã turari árĩbeaa. Gũa mojo Goãmũ ya turaripũ ãhraa. Iri turari mera masa Goãmũre erã umupeodorebirirare duhucũ iiaa gũa. Eropirã erã gamero erã masirire iri duhpiburi árĩbircũ masicũ iiaa gũa iri turari mera.

⁵ Eropirã árĩpehrerã erã gamero pepirare Goãmũre erã masidorebirirare duhucũ iiaa gũa. Eropirã iri turari mera Goãmũre gamebirãre Cristore õaro yũhrirã erã árĩcũ iiaa gũa. Cristo ãgũ gamero dopa ta erãre pepicũ iiaa gũa.

⁶ Eropirã gajirã mũa mera majarã Cristore tarinũgacũ ãarã erãre dipuwaja moamorã árĩrãca gũa. Mũa õaro yũhrira pũhrũ Cristore tarinũgarãpũre eropa dipuwaja moamorã árĩrãca gũa.

⁷ Yũ árĩricũri dihtare masia mũa. Yũ pepiripure ne masibea mũa. "Cristo yarã ãhraa," arĩrã árĩrã õpa masique mũa: Gũa sã mũa iro dopa ta Cristo yarã ta ãhraa.

⁸ "Mari Opũ ya buherire õari buherire buhedoregũ apimi gũare," arĩgũ bajasuburi mũare iri dihtare eropa arĩ werequeregũ ta gũhyasĩribea yũhũ. Gũare eropa buhedoregũ mũare itamumorãre apimi gũare. Mũare goroweomorãre apigũ iibirimi gũare.

⁹ I yũ gojabeoripũre mũa ãha ucacũ gamebeaa yũhũ.

¹⁰ Yujurãyeri mũa mera majarã õpa arãyoro: "Pablo gojabeogũ pũriro dihta gojabeomi marire. Eropa árĩqueregũ ta mari mera arĩgũ eropa árĩcãgũ ãhrimi. Bu arĩgũ iro dopa ãhrimi. Eropiro ãgũ marire wereniguiiri duhpiburi árĩbeaa," arãyoro mũa yujurãyeri.

¹¹ Eropa arĩrãre õpa arĩ weregũra: Mũa arĩdiro dopa ta iibeaa gũa. Mũare gũa arĩ gojabeodiro dopa ta eropa ta arĩ wererãca mũa pohro árĩrã. Eropirã "Õpa iirãca," gũa arĩ gojabeodiro dopa ta eropa ta iirãca mũa pohro árĩrã sã.

¹² Yujurãyeri mũa mera majarã "Õaro masipehorã ãhraa gũa," arĩ wereniguimaacãma erã basi. Erã game ãha bocatĩrã "Maripũ õatararã ãhraa," arĩma erã. Eropa arĩmaacãrã "¿Gajirã õarã iro dopa ãhriri mari?" arĩbeama erã basi. Gũapũ erã iro dopa iisome.

¹³ Goãmũ gũare ãgũ buhedore ãgũ apira dihtare werea gũapũ mũare. Gajirã erã mohmerare "Iibũ gũapũ," arĩrã

iibeaa. Goãmũ mũa sãre buhedoregũ gũare apimi.

¹⁴ Eroparĩrã gũyarã iibeaa gũa. Ōari buherire Cristo yare mũare buhemũhtarã ta ejabũ gũa. Eropirã Goãmũ gũare buhedore ĩgũ apira dihtare wererã iiaa mũare.

¹⁵ Eropirã gajirã mũare itamucũ ĩha “Gũapũ irire iibũ,” ne arĩbeaa gũa. Cristore mũa umupeonemocũ iiburipũre gahmea gũa. Eropa gamerã mũare buhenemodiaa gũa. Eropa gũa buherã Goãmũ ĩgũ apirañe pẽta buhediaa gũa mũare.

¹⁶ Eropa buhediaa mũa ya yeba core majarãre ōari buherire peebirãre ōari buherire wererã waboro dopa. Eropa warã gajirã erã buhera pũhrũ ejarã, “Gũapũ erãre buhemũtabũ,” arĩsome gũa.

¹⁷ Goãmũ yare gojarapũgue ōpa ãhraa: “Mari iirire ĩarã mucubiribiricãro gahmea. Mari Opũ ĩgũ iiripũre ĩarã mucubiriro gahmea. Iripũre gajirãre werero gahmea,” arĩ gojara ãhraa.

¹⁸ Masa erã basi “Gũapũ iiabũ,” erã arĩcũ ĩha mucubiribeami Goãmũ. Mari Opũ Cristo Goãmũre “Oã ōaro iima,” ĩgũ arĩrãpũre sũami Goãmũ.

11

“Jesu ĩgũ apinirã ãhraa gũa,” arĩ gũyarãre wereñumi Pablo

¹ Yũ basi yũ árĩricũre weregũ pee masibigũ iro dopa weregũ iiaa, arĩ pepia. Yũ árĩricũre mũare weregũ gũhyasĩriñaria. Yũ eropa arĩ werecũ peenique mũa yũre dohpaguere.

² Goãmũ mũare ĩgũ mahiro dopa ta turaro mahia yũ sã mũare. Nómeo gajigũ mũmũ mera igo ñero iibigo igo yujugũre ta gamedigo iro dopa mũa Cristo dihtare gamecũ gamerabũ yũhũ mũare.

³ Eropa gamequeregũ “Erã Cristo yare cóãbocoma,” arĩ guñaricũa mũare. Gajirã ñerã mũare gũyarã, gajiropa arĩri buherire gamecũ iibocoma mũare. Pĩru ĩgũ masiri mera Evare gũyacũ igo Goãmũre tarinũgañumo iribojeguere. ĩgũ eropa iidiro dopa ta dohpaguere ñerã mũare gũyarã, Cristore mũa ōaro umupeorire goroweobocoma. Eropigũ mũare gũisãa.

⁴ Erã gũa mũare buhediro dopa ta buhebiriqerrecũ mũa peeraa. Eropirã erã “Ōpa árĩdi árĩmi Jesu,” erã gamero gajiropa arĩ werequerecũ ta peea mũa. Watĩ ĩgũ pepiro dopa arĩ erã werequerecũ ta peea mũa. Mũare gũa weregũ Espĩritu Santo gohra ãhrimi. ĩgũpũre erã werebiriqerrecũ ta mũare gũya buherãre peea mũa. Erã gajiropa arĩri

buherire erã buhecũ õari buherire erã buhebiriqrecũ ta irire peea mua.

⁵ Erã “Jesu ïgu apinirã ãhraa,” arĩnirã yure mäsitarinugabeama. “Erãre doca merebeaa,” arĩ pepia yũhũ.

⁶ Õaro weretarinugagu árĩbiriboca yũhũ. Õaro weretarinugabiriqregeu Goãmũ yare õaro masia. Yũ eropa masirire bajasuburi mũare masicũ iibũ.

⁷ Õari buherire Goãmũ yare mũare buhegu ne waja gamebiribũ. Mũare itamudiagu waja gamebiribũ. Bu árĩgu iro dopa árĩbũ yũhũ. ¿Yũ eropa waja gamebiriçũ õabeari mua pepicũ?

⁸ Mũare yũ buhecũ gaji macari majarã Jesu yarã yure itamura. Erã eropa orare ñeabũ mũare itamubu. Mũare yure oborare erãpũ yure oma.

⁹ Mua mera árĩgu gajino yure duhyaquerecũ ta mũare niyerure ne serẽbiribũ. Mari acawererã Macedonia yeba majarã Jesu yarã árĩpehrerã yũ gamerare aĩ erama yure. Iribojeguere mũare ne garibobiribũ yũhũ. Pũhrugue sãre mũare ne garibosome.

¹⁰ Cristo diaye ïgu werediro dopa ta yũ sã mũare dohpague diaye weregu iiaa. Árĩpehrero Acaya yeba árĩrãre i mũare yũ serẽbirirare eropa wereniguigũra.

¹¹ ¿Mũare yũ serẽbirirare gajirãre yũ eropa wereniguicũ peerã dohpa pepiri mua? “Pablo guare eropa arĩ weregu guare umupeobigu iimi,” ¿arĩ pepiri mua? Árĩbeaa. Mũare umupeoa. Goãmũ irire masimi.

¹² Waja mariro yũ mũare buhenugadiro dopa ta buhe ojo-gorocũgũra. “Jesu ïgu apinirã ãhraa,” arĩ guyanirãre yure tarinugacũ iibiriboro dopa waja mariro buheniguigũra. Erãpũ “Gua sã Pablo iro dopa Jesu yare buherã ãhraa,” arĩma. Eropa árĩbeama. Yũpũ waja mariro buhea. Erãpũ waja gamerã buhema.

¹³ Erã diaye ta Jesu ïgu apinirã gohra árĩbeama. Erãre ne apibiriñumi ïgu. “Jesu ïgu apinirã ãhraa,” arĩ guyarã gua iro dopa árĩrima erã.

¹⁴ Erã eropa iicũ ïagu ïhamariabeaa yũhũ. Satana sã anyu Goãmũ yagu õagu iro dopa dehyoacumi masare.

¹⁵ Eropigu erã Satanare itamurã õarã Goãmũre itamurã iro dopa erã iicũ ïagu, ïhamaria wabeaa yũhũ. Dohpaguere erã eropa iiquerecũ ta pehrerinũ árĩcũ árĩpehreri erã ñero iira dipuwaja dipuwaja moagucumi Goãmũ erãre.

Ïgu ñero tarirare wereñumi Pablo

¹⁶ Dipaturi mũare ire weregũra. Ne “Pee masibigu ãhrimi,” yure arĩbiriçãque. Yũ eropa arĩdorebiriqreçũ

ta yure mua eropa arĩ pepicũ ðaroca yure. "Pee masibigu āhrimi," arĩ yure pepiquererã ta peenique mua yure. Merogã yu árĩricurire yu basi werecũ peenique mua.

17 Mũare eropa weregu gũhyasĩriñaria yũhũ. Pee masibigu iro dopa iigu iiaa, arĩ pepia. Mari Opũ Jesu yure irire "Eropa wereque," arĩbirimi.

18 Īgu eropa arĩbiriquerecũ ta ire weregura mũare. Erã gamero "Õarã āhraa," arĩmaacãrã erã árĩcũ ĩagu yu sã yu árĩricurire mũare weregura.

19 Mũarũ eropa arĩmaacãrãre peerã mucubiriri mera ĩhaa mua erãre. ¿Õaro masirã āhriri mũarũ eropa peerã?

20 Mũare erã pohro majarã moacũ, mua yare erã emacũ eropa ĩacãa mua. Eropirã mũare erã docapicũ mua wayuporãre erã pacũ eropa pepicãa mua.

21 ¿Õapũricãri mũare erã eropiicũ? Cue, ¿turatariarã āhriri erã? Gũarũ erã iro dopa turarã árĩbeaa. Eropirã erã iro dopa ñerire iibeaa.

Erã iro dopa arĩbiriqueregu ta erã "Õpa árĩrã āhraa," erã árĩcũ peegu yu sã eropa arĩ wereboca. Dipaturi gũhyasĩriqueregu ta õpa arĩgura mũare.

22 Erã "Hebreo masa āhraa," arĩma gajirãre tarinũgadiarã. Hebreo masu ta āhraa yu sã. "Israe masa mari Pagũ ĩgu beyenirã āhraa," arĩma daja erã. Erã iro dopa ta ĩgu beyedigũ ta āhraa yu sã. "Abrahã pãramerã āhraa," arĩma daja erã gajirãre tarinũgadiarã. Erã iro dopa ta Abrahã pãrami ta āhraa yu sã.

23 "Cristo yare itamurã āhraa," arĩma daja erã. Yu sã Cristo yare itamugu ta āhraa. Erã tauro Cristo yare ðaro iiaa yũhũ. Eropa yu basi arĩ wereniguigu gũhyasĩriñaria yũhũ. Pee masibigu iro dopa wereniguigu iiaa, arĩ pepia yu basi. Erã tauro mohmebu yũhũ Cristo yare iigu. Bajasuburi erã tauro Cristo yagu yu árĩri dipuwaja peresu iima yure gajirã. Erã tauro bajasuburi tãrama masa yure. Erã tauro Cristo yare yu iira dipuwaja masa yure wejẽdiarima. Eropigu merogã mera taribu yu siribodirore.

24 Cinco suburi judio masa yure ñeama. Yure erã ñeari nũcu suburi treinta y nueve suburi yure tãrama.

25 Ëhresubu gajirã yure ñeama. Eropa ñearã erã tamera yure ñero yucũgu mera pama. Gajisubu yure gajirã utã mera deama. Ëhresubu dohodiru mera utãyegue mehtuhaja miribu. Eropigu yujunũ, yuju ñami taboamiji wecague wũariya decoguere baa payabũ.

26 Bajasuburi macariguere buhe curigu ejabũ. Yu eropa buhe curicũ gũhyatariacãbu yure. Yure mirimaja gũhya árĩbu. Yure yajamaja gũhya arĩma. Yaha yeba majarã

judio masa, judio masa árĩbirã sã yũre ñero iimaja guhya árĩma. Macarigue, masa marirogue, wũariyague sãre yũre sĩrimaja guhya árĩbu. “Mũ mera majarã áhraa,” arĩ guyarã sã yũre ñero iimaja guhya árĩma.

²⁷ Cristo yare iibu bũrigã mohmebu. Eropa mohmegu ñero wabu. Bajasuburi wũja yũre ñero pũriquerẽcũ ta eropa mohmeniguicãmuribu. Ñero oaboamuribu. Eropiro yũre ñemesibumuribu. Bajasuburi barire bocabirimuribu. Yũhu yũsaro sãre pepimuribu. Suhri sañaburi sã ne marimuribu yũre.

²⁸ Eropa ñero tarigu ta umuri nũcu gajirã Cristo yarãre, mũa sãre bũrigã guña.

²⁹ Eropigu Cristo yagu ĩgu turabiricũ ĩagu bujawerea yũhu. Gajirã Cristo yagure ñero iidorebocoma. Erã eropa iicũ ĩagu Cristo yagure guhyasĩrisãgu, erã ñero iidorerã mera guaa yũhu.

³⁰ Werediabiriqueregu ta yũ árĩricurire weregu, yũhu turabigu yũ árĩre mũa masiboro dopa mũare weregura.

³¹ Goãmũ mari Opũ Jesu Pagũ umuri nũcu mari umupeobu ĩgu ta mũare yũ guyabiricũ masimi. Ire mũare diaye weregura.

³² Damasco waĩcari macague yũhu Jesucristo yare buhecũ ĩagu árĩpehrerã masa tauro opũ Areta waĩcũgu ĩgu doca árĩgu opũ yũre ñeadiaripũ. Eropa ñeadiagu iri maca maja sãriro disiporori nũcu surarare coredoreripũ.

³³ Erã eropa corero watope ta yũ mera majarã wũari puibugue yũre duhusã iri sãriro pũrũpũgue yuju gobegue yũre duhu dijuma. Erã eropa duhu dijura pũhrũ duhrigã wabu.

12

Cristo ĩgure ĩhmurare wereñumi Pablo

¹ Yũ árĩricurire mucubiriri mera yũ werecũ duhpiburi árĩbeaa. Duhpiburi árĩbiriquerẽcũ ta werenemogura mũare. Mari Opũ Jesu ĩgu yũre ĩhmurare ĩgu yũre masicũ iirare weregura mũare.

² Ōpa ĩhmunugami ĩgu yũre: Catorce bojori gohra wahaa yũre Cristo yagure umarogue ĩgu aĩ mũariara pũhrũ. Ũmarogue necã wecague yũre aĩ mũariami. Yũ sĩporã dihtare ĩgu aĩgãcũ masibeeaa yũhu. O yũ dũpũ sãre ĩgu aĩgãcũ sãre ne masibeeaa yũhu. Goãmũ dihta irire masimi.

³⁻⁴ Eropigu paraíso waĩcurogue yũre aĩ mũarijami. Irire masia yũhu. Yũ sĩporã dihtare ĩgu aĩgãcũ masibeeaa yũhu. O yũ dũpũ sãre ĩgu aĩgãcũ masibirica. Goãmũ dihta irire masimi. ĩgu eropa aĩ mũariacũ ejagu eroguerẽ ĩgu wererire

peebũ. Iri yũ peerare masa ne masibeama. Iri wererire gajirãre weredorebirimi yũre.

⁵ Eroguere ïgu yũre eropa wererare mũare weregu, “Yũhũ yujugu ta gajirãre tarinũgagu ãhraa,” arĩboya yũhũ. Eropigu irire werebeaa yũhũ. Yũ masibirira dihtare yũ turabirira dihtare mucubirigu mũare weregũra.

⁶ “Gajirãre tarinũgaa yũhũ,” mũare arĩ werediacũ yũ arĩra diaye árĩboca. Eropigu eropa arĩ weregu eropa arĩmaacãbiriboya yũhũ. Eropa árĩbiriqueregu ta “Õpa gajirãre tarinũgaa,” arĩ weresome yũhũ mũare, gũhyadiaro yũre ïhari arĩgu. Yũ árĩro tauro mũa yũre umupeocũ gamebeaa.

⁷ Cristo ðatariarire umaroguere ïgu yũre ïhmucũ ïadigu árĩgu, “Gajirãre tarinũgaa yũhũ,” arĩboca yũrũ. Eropa yũ arĩbiriboro dopa Satana ïgu yũre dore moacũ ïagu “Õaroca,” arĩ apidi árĩmi Goãmũ. Eropigu yũ ñero tariboro dopa yũre dore moadi árĩmi Satana. Iri dore poraru ñajaro dopa ta yũre pũribũ.

⁸ Iri dore yũre taridoregu serẽmũriribũ mari Opũre. Æhresubu serẽribũ.

⁹ Yũ eropa serẽquerecũ ta i dore tamerare yũre taricũ iibirimi ïgu. Õpa arĩ yũre yũhrimũrimi ïgu: “Mũre mahia. Yũ mahiri mera ðaro árĩgũca mũhũ. Pũriniguicãsũgu, turabigu árĩgu yũ turarire ðaro ïhmugũca mũhũ. Turarã tauro mũhũ yũ turarire masare masicũ iigũca,” arĩ yũhrimũrimi Goãmũ yũre. ïgu eroparĩcũ peegu turabigu yũ árĩrare masigu mucubiria. Eropigu yũ turabirirare masare mucubiriri mera weregũra. Eropa arĩ weregũca Cristo ïgu turaripũre yũhũ gajirãre ðaro masicũ iiboro dopa.

¹⁰ Eropigu Cristo yagu yũ árĩri dipuwaja yũre pũriro árĩquerecũ ta, gajirã ñero yũre wereniguiquerecũ ta, ñetariaro tariqueregu ta, yũre erã ñero erã iiniguiquerecũ ta, yũre bujawerecũ erã iiquerecũ ta mucubiria yũhũ. Eropa ñero tariqueregu ta, eropa turabigu árĩqueregu ta Cristo turari mera bocatũua ïgũre guñaturagu. Eropigu mucubiria.

Corinto majarãre Cristo yarãre wũaro guñaricũñumi Pablo

¹¹ Yũ árĩricũrire yũ basi weregu gũhyasĩriñaria yũhũ. Pee masibigu iro dopa weregu ïaa, arĩ pepia yũhũ. Yũ eropa werequerecũ ta iri mũa ya dipuwaja ãhraa. Mũarũ yũ árĩricũrire gajirãre ðaro werecũ yũ basi werebiriboaya. Yũhũ bu árĩgu árĩqueregu ta “Jesu ïgu apinirã ãhraa,” arĩ gũyarãre doca merebeaa yũhũ.

12 Diaye ta ñero tarigu árĩqueregu mũare Goãmũ turari mera deyro moarire ii ãhmuribũ. Eropa ii ãhmugũ Cristo ãgu apidigu yũ árĩrire ãhmugũ iiribũ mũare.

13 Gaji macari majarãre Jesu yarãre mũa sãre yujuro mera ãhmuribũ yũhũ. Mũapũre gajiropa ñari iiribũ. Mũa dihtare garibobiriribũ. Mũa dihtare gajinore yaha árĩburire serẽbiriribũ. ¿Yũhũ mũare itamurire serẽbircũ ñehe árĩri mũare? Iri ñeri árĩcũ irire cãdijique mũa yũre.

14 Ire peeque mũa. Pesubu mũa pohrogue yũ ejara pũhrũ dipaturi wadiaa daja. Erogue ejagu mũare garibosome yũhũ. Gajinore serẽsome yũhũ mũare. Mũa yare gamebeaa yũhũ. Cristo yapũre mũa yũhrirã árĩcũ gahmea yũhũ. Masa porãpũ erã pagũ sũmarãre erã gamerire obeama. Erã pagũ sũmarãpũ erã porã gamerire ohoma. Eropa ta mũa yũ porã iro dopa árĩrã yũ gameripũre osome mũa.

15 Eropigu yũ tamera yũ oparipũre odiaa mũare itamubu. Mũa pohro majagu iro dopa árĩdiaa mũare itamubu. Mũare yũ turaro mahiquerecũ ta mũapũ yũre daberogã mahia yũ pepicũ.

16 Eropigu mũa mera árĩgu mũare garibobiribũ. ¿Eropa ta iiari yũhũ mũa pepicũ? Eropa iiquerecũ ta yujurãyeri mũa mera majarã õpa arĩrãcoma: “Pablo gajinore marire aĩdiagu gũyami,” arĩrãcoma.

17 ¿Erã arĩro dopa ta iigu árĩgu dohpa irire iiboyuri yũhũ? ¿Mũa pohrogue yũ obeonirã ñehenore yũre gũyabasayuri erã mũare mũa ãacũ?

18 Sohõ árĩrasubugue Titore mũa pohrogue wadore-tuhabũ ãgũre. Eropigu gajigũre Jesu yagũre ãgu mera obeobũ. ¿Tito mũare gajinore gũya aĩri mũa ãacũ? ãgu yũ iro dopa ta Goãmũ ãgu gameri dihtare iigu ãhrimi. ¿Eropigu yũ iro dopa ta iibiriri ãgu mũa ãacũ?

19 ¿Ipũ mera gũa basi arĩ cãhmotarã iiri gũa mũa pepicũ? Árĩbeaa. Cristo yarã ãhraa. Eropirã Goãmũ ãgu ãhuro mũare wererã iiaa. Yũ acawererã, yũ mahirã, mũapũre eropa arĩ werea mũare itamudiarã.

20 Yũ erogue ejacũ yũ gamero dopa iirã árĩbiriboca mũa. Eropigu mũare turaro guñaricua. Eropigu mũa gamero dopa iigu árĩbiriboca yũ sã erogue ejagu. Gajiropa mũa iicũ ãagu weregũca mũare. Erogue yũ ejacũ mũapũ mũa basi game dũyatorã, gajino erã opacũ ãarã ãhaturirã, mata guarã, mũa gamero gajirãre tarinũgadiarã, gajirãre ñero wereniguirã, ñeri quere moarã, “Gũa tamera gajirãre tarinũgaa,” arĩrã, mũa gamenererore goroweorã árĩboca mũa. Mũa eropa iicũ bocaboca arĩgu, guñaricua yũhũ mũare.

²¹ Erogue yu ejacũ muare yure guhyasĩrisãcũ iibocumi Goãmu yure. Eropigu árĩpehrerã iribojegue ñero iinirãre erã ñerire bujawerebircũ iãgu turaro bujaweregũca yũhũ. Nome mera ñero iirãre, ñerire uaribejarãre iãgu bujaweregũca yũhũ.

13

Pablo weretuñumi

¹ Dohpaguere mũa pohrogue wagũ uhresubu ejagũca eroguerẽ. Pesubu ero coreguere ejatuhabu. Eropigu muare ire weregũra. Ōpa aãhraa Goãmu yare erã gojarapũ: “Yujugure mari dipuwaja moaboro core perã, uerẽã igure weresãro gahmea. Erã eropa weresãra puhrũ dipuwaja moamasia mari,” aãhraa Goãmu yare erã gojarapũ.

² Iribojeguere ñero iirã mũa árĩcũ muare árĩpehrerã gajirã ñero iirã sãre dipaturi guhyadiaro mera weregũra. Yujusubu ejadi mũa pohro dipaturi ejagũ muare ire werebu. Dohpaguere mũa mera árĩbigũ dipaturi muare ire werebeogu iiaa daja: Dohpaguere mũa pohroguere ejagũ, ñero iirãre diaye ta dipuwaja moagũra yũhũ.

³ Yu eropa iicũ iãrã, Cristo igũ apidigu igũ turari mera yu buhecũ masirãca masidiarã. Cristopũ muare doregu turatariagu aãhrimi. Eropigu igũ turarire iãhmumi muare.

⁴ Mari iro dopa dupũcũgu, igũ turabigu árĩgu, crusague sĩripũ. Eropa sĩriquerẽgu ta Goãmu igũ turari mera ojocarimi igũ dohpaguere. Gũa sã igũ iidiro dopa ta turabirã aãhraa. Eropa turabirã árĩquererã Cristo mera ojocarirã Goãmu ya turari mera árĩrãca muare itamumorã.

⁵ Eropi muarũ mũa basi õpa arĩ pepique. “¿Diaye ta Cristore umupeogu aãhriri yũhũ?” arĩ pepique mũa. Diaye ta Cristo mũa mera majagu igũ árĩbircũ igũ yarã gohra árĩbeaa mũa.

⁶ ¿Mũa guapũre “Jesu yarã igũ apinirã árĩbeama,” arĩ pepiri? Igũ yarã gohra aãhraa gũa. Irire mũa masicũ gahmea yũhũ.

⁷ Eropigu mũa ñero iibiriboro dopa Goãmure serẽbasaa muare. Eropa serẽbasaa gũa mũa õarire mũa iiboro dopa. Mũa Goãmũ itamuri mera eropa õarire iicũ iãrã õpa arĩboca: “Guapũ erãre õarã wacũ iibũ,” arĩboca gũa gajirãre guare umupeocũ iimorã. Eropa arĩ umupeodorẽbeaa gũa. Iri duhpiburi árĩbeaa. Eropirã muare eropa Goãmure serẽbasarã mũa ya árĩburire serẽbasarã iiaa. Ōarire mũa iicũ tamerare gahmea gũa.

⁸ Eropa dihta gahmea gũa. Goãmũ ya diaye árĩrire goroweomasibea gũa.

⁹ Eropirã mũa ðarire iicũ gamerã turabirã iro dopa árĩquererã gũa mucubiria. Õarire iirãpũ mũaapũ turarã árĩcũ õhaa. Eropirã mũa ðarã waborore Goãmure serëbasaniguicãrãca gũa mũaare.

¹⁰ Eropigu mũa mera árĩbigũ mũaare ipũre gojabeoyugu iiaa. Mũa pohrogue ejagũ mũa ñero iirã árĩcũ ãagũ mũaare dipuwaja moagũca. Cristo yũre ãgũ dorediro dopa ta mũaare dipuwaja moagũca. Yũ eropa dipuwaja moabiriboro dopa ipũre mũaare gojabeoyugu iiaa. Mũa ðarire gohrotocũ ãadiagũ gojabeoyugu iiaa. Cristo ãgũ dorediro dopa mũaare itamudiaca. Mũaare dipuwaja moadiabeaa.

¹¹ Dohpaguere yũ acawererã, mũaare ðadorea. Cristore guñaturanemoque. Eropa iirã ðarã árĩque. Mũaare yũ wererare ðaro peenũque. Mũa mera majarã mera yujuro mera pepique. Mũa basi ðaro mera árĩque. Mũa eropa árĩcũ ãagũ mũa mera Goãmũ árĩgũcumi. ãgũ marire game mahicũ iigu, marire ðaro mera árĩcũ iigu ãhrimi.

¹² Eropirã mũa mera majarãre bocatĩrirã erãre ðaro mera mojoto ñeaque mũa.

¹³ Árĩpehrerã õ majarã Goãmũ yarã mũaare ðadorema.

¹⁴ Mari Opũ Jesucristo mera mũaare árĩpehrerãre ðadorea. Eropigu Goãmũ ãgũ mahiri mera árĩpehrerã mũaare ðadorea. Eropigu Espĩritu Santo árĩpehrerã mũa mera ðaro ãhrimi. Eropa ta árĩporo. Iripẽta ãhraa.

Gálatas

Pablo Galacia majarãre Jesu yarãre gojabeopu

1-2 Yũhũ Pablo mũa Galacia majarãre ipũre gojabeogu iiaa. Yũhũ Goãmũ yare buhedore Jesucristo ãgu apidi ãhraa. Masa ne yũre buhedore apibirima. Jesucristopũ ãgu Pagũ Goãmũ mera yũre apimi. Goãmũ ãhrimi Jesucristo sãridire masudigu. Eropigu yũhũ yũ mera majarã mera Jesucristo yarã mera mũare ðadorea.

3 Goãmũ mari Pagũ mari Opũ Jesucristo mera mũare ðadorea. ãgu mũare itamuri mera ðaro árĩque mũa.

4 Jesucristo, ãgu Pagũ Goãmũ gamediro dopa ta iigu, ãgu basi mari ñeri iira dipuwaja sãribasadigu árĩmi. Eropiidi árĩmi i umũ majarã ñero árĩricũre mari iibiriboro dopa.

5 ãgu eropiicũ ãha mari Goãmũre “Mũhũ ðagũ ðaro iiaa,” umũri nũcũ arĩro gahmea. Eropa ta iirã.

Jesucristo masare ãgu tauburi yujuñe ta buheriñe ãhraa, arĩ werepu Pablo

6 Mũa mata Goãmũ yare duhurã iica. Goãmũ mũare ãgu yarã árĩmorãre aĩdigu árĩmi Jesucristo ãgu marire sãribasara mera. ãgu mũare eropa aĩquerecũ muapũ ãgure duhu gajirã ya buherire peenũgarã iica. “Gaji ãhraa marire tauburi buheri,” erã arĩ werecũ peerã iica mũa gajirãre. Mũa eropiira querere peegu pee uca wahaa yũhũ.

7 Ōpa waro iica mũa árĩrore. Gajirã mũa pohro eja mũare were goroweorã iicoma. “Jesucristo marire taumi,” arĩ buherire gohrotodiarã, “Gaji ãhraa marire tauburi buheri,” arĩ buherã iicoma mũare. Eropigu mũare ire werediaca. Gaji buheri marire tauburi buheri marica.

8 “Gaji buheri ãhraa mari tauburi buheri,” mũare arĩ were goroweorãre Goãmũ bũrigã dipuwaja moagu peamegue wadoreporo. Yũ basi ta were gorowecũre Goãmũ yũ sãre dipuwaja moaporo. Anyu umaro majagu ãgu eropa buhecũ ãgu sãre dipuwaja moaporo.

9 Gũa gajisubu arĩrare dipaturi yũhũ werea daja mũare. Yujugu mũare ðari buherire gajiropa buhecũ, gũa mũare buhediro dopa werebigũre ãgure Goãmũ bũrigã dipuwaja moaporo. Peamegue wadoreporo.

10 Yũhũ masare buhegu Goãmũ gamero dopa ta diaye majare buhea. Masa peesuacũ, peesuabiricũ sãre buhea.

Eropigu dohpaguere yũhũ masa peediari dihtare werenigu-ibea. Cristo gamero dopa ta buhediaca. Īgu pohro majagu õagu árĩdiagũ eropa buhea yũhũ.

Pablo ĩgu Jesucristo yare buhebure apirare werepũ

¹¹ Ōpa weregũra mũare: Yũhũ mũare õari buheri eropa arĩ buhera masa ya pepiri árĩbeaa.

¹² Ne yujugu masũ iri buherire yũre weredorebirimi. Ne yujugu masũ yũre buhebirimi iri buherire. Jesucristo ĩgu basi yũre irire masicũ iimi.

¹³ Iribojegue yũ árĩricũrare yũhũ judio masa buherire peenũrũrasubu yũ iirare mũa peetuhabũ. Yũhũ Jesucristo yarãre bũrigã ĩhaturigũ nũrusiamũribũ erãre ñero iibu. Eropigu Jesu yarãre bũrigã ñero iigu erãre wejẽpohocã-diaribũ.

¹⁴ Eropigu gũa judio masa ya buherire yũ mera masanirã tauro umupeomũricaribũ. Gũa ñecũ sũmarã árĩricũrire bũrigã iimũricaribũ.

¹⁵ Yũ eropa iirisubu õpa wabũ yũre. Goãmũ ĩgu õaro mahiri mera yũre sihumĩ pare. Īgu yũ dehyoaboro coregue beyetuhapũ yũre.

¹⁶ Eropigu ĩgu magũre Jesucristore yũre masicũ iimi. Īgũre masicũ iigu yũre judio masa árĩbirãre buhebure apimi. “Jesucristo marire taumi,” arĩ buherire werebure apimi yũre. Eropa Goãmũ yũre masicũ iira pũhrũ gajirãre serẽpigũ wabiribũ.

¹⁷ Jerusalẽgue árĩrãre yũ core Jesu ĩgu apinirã sãre serẽpigũ wabiribũ. Erore eropa wabigũ Arabia yebaguepũre diaye wabũ. Pũhrũguere Damascogue dujaa wabũ.

¹⁸ Ũhre bojori pũhrũ Jerusalẽgue wabũ. Pedrore ĩagu wabũ. Pe semana ta árĩbũ ĩgu mera.

¹⁹ Gajirã Jesu ĩgu apinirãre ne ĩabiribũ irisubure. Mari Opũ Jesucristo pagũ magũ Santiago dihtare ĩabũ.

²⁰ Yũhũ mũare eropa arĩgu diaye weregũ iiaa. Yũ õpa arĩrire Goãmũ masimi. Eropa arĩgu õpa arĩdiaca mũare. Jesucristo dihta yũre masicũ iimi ĩgu buherire.

²¹ Jerusalẽgue árĩra pũhrũ Siria yebague Cilicia yebague ejabũ.

²² Irisubu Judea yeba majarã Jesucristo yarãpũ yũre ĩha masibirima dohpa.

²³ Yũhũ Jesucristo yagu árĩri quererẽ peenirã árĩma. “Īgu Pablo marire Jesu yarãre ñero iidianũrũ curidigũ dohpaguere Jesucristo yare buheguã áhrimi. Mari Jesucristore umupeorire dedeodiadigũ dohpaguere irire Jesucristore

umupeoburire buhegu wahami," gajirã erãre eropa arĩ werecũ peenirã árĩma Judea yeba majarã.

²⁴ Eropa peerã Goãmũ mera mucubiriñorã.

2

Gajirã Jesucristo ïgu apinirã gameñorã Pablo buherire

¹ Catorce bojori pũhrũ Jerusalenguere wabũ daja. Bernabé wami yũ mera. Tito sãre aĩgãbũ. Goãmũ yũre wadoremi Jerusalenguere. Eropigu erogue wabũ.

² Eropigu erore eja Jesure umupeorã gamenererogue yũhũ erã oparãre boje sihuu werebũ erãre. Judio masa árĩbirãre Jesucristo marire tauburi buherire yũ buherare werebũ oparãre. Eropa weregu erã yũ buherire òaro masicũ erãre "Õapũrica," arĩcũ iidiabũ erãre. Erã yũ buherire gamebirã yũ buheri sãre "Waja mariri ãhraa," arĩbocoma, arĩ pepirabũ yũhũ. Erã gamema.

³ Eropirã erã Titore ïgu judio masa árĩbiriqerogũ ïgu Jesure umupeogũ arĩcũ ïha erã judio masa dorero dopa iidorebirima ïgũre. Eropirã ïgũre gasiro merogã wiri aĩdorebirima ïgũre.

⁴ Gajirãpũ Jesure umupeorã gamenererogue ñajajanirãpũ ïgũre circuncisión gasiro merogã wiri aĩcũ gamerima. Erã Jesure umupeorã gohra árĩbirima. Erã gũa sihubiriquerecũ gũa pohrogue peedurirã ñajajanirã árĩma. Gũare weresãdiana. "Erã Jesu yarã Moise dorerire iibirã ãhrima," arĩdiana gũare. "Goãmũ pohro wadiarã gũa dorerire iiro gahmea marire," arĩ dorediarima daja. Gũa Jesucristo yarãpũre Jesucristo tautuhajami gũa Goãmũ mera òaro árĩborore.

⁵ Eropirã erã eropa gũare dorecũ ïarã erãre ne yũhribiribũ. Erãre yũhrirã iri Jesucristo marire tauburi buherire queoro buhemasibiriboaya mũare. Eropirã erã dorediarire cãhmotacãbũ.

⁶ Eropirã Jesu yarã oparã yũ buherire erãre weretuhajara pũhrũ "Mũ buheri òhaa," arĩrã, yũ buherire yũre gohrotodiabirima. Gũa judio masa dorerire iiburi sãre buhedorebirima. Erore erã oparãre masa umupeoquerecũ erã iiro dopa iibiribũ. Goãmũ árĩpehrerãre oparã árĩrã sãre bu árĩrã sãre yujuropa ta ïhami. "Erãre beyediro dopa ta yũ sãre Goãmũ beyemi," arĩ pepibũ.

⁷ Eropirã oparã yũ buherire gohrotodiabirã judio masare árĩbirãre yũ buhe curirare peema. Eropirã yũhũ Jesucristo ïgu yare buhebure apidigu arĩcũ ïha masima yũre. Eropirã òpa arĩma yũre: "Ïgu Goãmũ judio masare iri òari buherire buhebure ïgu Pedrore apidiro dopa ta mũ sãre

apiñumi. Judio masa árĩbirãpũre iri buherire buhebure mãre apiñumi," arĩma yũre.

⁸ Eropigũ ĩgu Goãmũ Pedrorẽ judio masare buhebure obeodigu ta yũ sãre obeomi judio masa árĩbirãre buhebure.

⁹ Eropirã erã oparã urerã Santiago, Pedro, Ñu mera yũre ĩha masima. Goãmũ ĩgu mahiri mera ĩgu yũre beyedigu yũ árĩcũ masima. Eropirã yũre Bernabé sãre õaro bocatĩrima. "Eropa ta iirã mari. Mari yujuro mera buherã. Mũapũ judio masa árĩbirã pohrogue buherã warãca. Guapũ judio masare buherã warãca," arĩma yũre Bernabé sãre.

¹⁰ "Iri dihta iiro gahmea," arĩma guare. "Mojomorocũrãre itamuniguicãro gahmea," arĩma. "Eropa ta iiaa," arĩbu gua erãre. Eropigũ eropa ta yũ buhe curirogue Jesu yarã mera niyerure gameneo erã mojomorocũrãre ohaa dohpa.

Antioquíague Pablo Pedrorẽ werẽpũ ĩgu õaro iibirirare

¹¹ Ero pũhrũ gua Antioquía macague árĩcũ Pedro curigu erami gua arĩrore Jesure umupeorã gamenererogue. Erogue erara pũhrũ Pedro queoro iibiricũ ĩha ĩgu eropa iira dipuwaja bũrigã werebũ ĩgure Jesure umupeorã peeuro.

¹² Eropigũ Pedro Antioquíague ne eragũ gamenere bamũrimi judio masa árĩbirã Jesure umupeorã mera. Irisubũ gajirã judio masa Santiago obeonirã erama. Erã eranirã õpa arĩ pepirã arĩma. "Árĩpehrerã Jesure umupeorã judio masa árĩbirã sã gua dorerire iiro gahmea Goãmũ erãre õaro ĩaborore. Eropirã arĩpehrerã judio masa iiro dopa gasiro merogã wiri aĩro gahmea. Eropa árĩbirã mera babiricãro gahmea," arĩrã arĩma eranirãpũ. Eropigũ Pedro erã eracũ ĩha judio masa árĩbirãre dũca wami. Erã gasiro merogã wirisũbirinirã árĩcũ erãre dũca wami erã eranirã weresãrĩre güigu. Erã mera babirimi pare.

¹³ ĩgu eropiicũ ĩha ero majarã gajirã judio masa erã sã dũca wama judio masa árĩbirãre. Bernabé sã erã iiri queoro árĩbircũ masiqueregu erãre ĩhacũ ĩgu sã dũca wami erãre.

¹⁴ Erã eropiicũ ĩha gamebirigohracãbũ yũhũ. Erã judio masa árĩbirãre dũca warã "Jesu dihta marire taumi," arĩ ĩhmubirima. "Moise doreri sãre umupeoro gahmea," arĩ ĩhmurima erã judio masa árĩbirãre. Eropigũ yũhũ arĩpehrerã Jesure umupeorã peeuro bũrigã arĩbũ Pedrorẽ. "Mũhũ judio masũ arĩqueregu õguere ne eragũ judio masa árĩbirã mera yujuro mera bagũ gua judio masa árĩricũrĩre guñabirabũ. ¿Duhpigũ mũhũ dohpaguere gohrotodiari? ¿Eropigũ duhpigũ dohpaguere erã judio masa árĩbirãpũre gua árĩricũrĩre iidorediari?" arĩ werebũ ĩgure ĩgu queoro iibirira waja.

Árĩpehrerã Jesure umupeocũ Goãmũ taumi erãre, arĩ werepũ Pablo

¹⁵ Gũa judio masa porã áhraa. Eropa árĩrã gajirã Moise dorerire tarinugarã iiro dopa árĩbeaa.

¹⁶ Eropa árĩbiriqererã gũa Jesure umupeorã dohpaguere õpa masirã áhraa. Yujugũ Moise dorerire iicũ Goãmũ pohro waburi árĩbeaa. Ígu Jesucristore umupeonijagu ígu ñeri iira dipuwajare cãdijisũdigũ wahami. Iri mera dihta õhami Goãmũ mera. Eropirã gũa judio masa árĩqererã Goãmũ mera õaro árĩmorã Jesucristore umupeobũ. Goãmũ mera õaro árĩmorã Moise dorerire iibiribũ. Ígu mera õaro árĩmorã gũa dorerire umupeorã Goãmũ mera õaro árĩbiriboaya. Eropirã Jesucristore umupeobũ gũa ñeri iira dipuwaja pehrebro dopa.

¹⁷ Eropirã gũa Jesucristore umupeori mera gũa Goãmũ mera õaro árĩrãca. Eropa Jesucristore umupeorã Moise dorerire iibiriqererã Goãmũ dorerire tarinugarã iibeaa. Jesucristo sã Goãmũ dorerire tarinugadoregũ ne árĩbeamĩ.

¹⁸ Eropigũ masare õpa arĩ buhea yũhũ. Goãmũ mũare “Õarã áhrima,” ígu arĩ ñaboro dopa Jesucristopũre umupeoro gahmea. Eropigũ “Mũa Goãmũ mera õaro árĩdiarã Moise doreri sãre umupeoro gahmea,” arĩbeaa. Yũhũ Moise dorerire doregũ Goãmũ dorerire tarinugagũ árĩboya.

¹⁹ Ero corere Moise dorerire iimũriribũ Goãmũ mera õaro árĩdiagũ. Eropa iiqueregũ dipuwajacugũ árĩmũriribũ. Dohpaguere Jesucristo mera dipuwajacũbeaa. Eropigũ “Iri Moise dorerire iiro gahmea,” arĩbeaa pare. Eropigũ yũhũ Goãmũ ígu dorero dopa ta iigũ iiaa.

²⁰ Jesucristo crusague sĩrigũ yũ ñegũ árĩrare gohrotodigũ árĩmi. Eropigũ yũ ero coregue árĩdiro dopa árĩbeaa pare. Cristo yũ mera árĩgũ yũre ígu dorerire õaro iimasicũ iimi. Eropigũ yũ árĩricũrare iibeaa. Jesucristo yapũre iiaa. Ígu Jesucristo yũre mahitarigũ yũre yũ ñero iira dipuwaja sĩribasadi árĩmi. Eropigũ ígũre guñaturagũ ígu dorerire iiaa.

²¹ Goãmũ mera õaro árĩmorã mari ñecũ sumarã árĩricũrire, Moise dorerire iicũ Jesucristo mari ñero iira dipuwaja sĩribasara wajamariboya. Eropigũ ne umupeogu duhusome “Jesucristo marire taumi,” arĩ buherire.

3

Jesucristore umupeori mera Goãmũ marire “Õarã áhrima,” arĩ ñhami, arĩ werepũ Pablo

¹ Mũa pee masibirã áhraa dohpaguere. Mũare Jesucristo ígu basi mari ñeri iira dipuwajare sĩribasarare mũare

werecũ mũa ðaro ïha masiribũ. ¿Mũa eropa ðaro masicũ noa mũaare goroweoari dohpaguere iri ðiaye maja mũa umupeoborañere?

² Eropigũ ðpa serēpidiaca mũaare. ¿Mũa Moise dorerire umupeori mera Espiritu Santo mũaare eranũgari? Erabirimi. Mũa “Jesucristo marire taumi,” arĩ buherire peecũ Jesucristore umupeocũ ïgũ Espiritu Santo mũaare erami. ïgũ yarã mũa árĩmorã árĩcũ erami.

³ ¿Mũa duhpirã pee masibirã iiro dopa wahari dohpaguere? Mũa ne Jesucristore umupeorã Espiritu Santo itamuri mera ïgũ yare iimũribũ. ¿Eropirã duhpirã dohpaguere mũa turari mera iidari?

⁴ ¿Mũa Jesucristo yarã árĩnũgarã mũa Jesucristore umupeora waja mũa ñero tarirare guñabeari? ¿Mũa eropa umupeora “Bu gohra ãhraa,” arĩ pepiri mũa dohpaguere?

⁵ Õpa ðaro guñaro gahmea. Goãmũ mũaare ïgũ Espiritu Santore odigũ árĩmi. Espiritu Santo mũa mera árĩgũ mũa watope deyoro moarire mũaare ðarire iimi. ïgũ eropiigũ Moise dorerire mũa umupeori mera eropa iibeami. Mũa “Jesucristo marire taumi,” arĩ buherire ðaro pee ïgũre umupeocũ eropa iimi.

⁶ Gũa judio masa ñecu Abrahãpũ Goãmũre “Diaye ta árĩgũ ãhrimi,” arĩ ðaro umupeoñumi. ïgũ eropa umupeocũ ïha Goãmũ ïgũre “Ñeri dipuwaja marigũ ðagũ ãhrimi,” arĩ ïañumi.

⁷ Eropirã ðpa masique mũa. Goãmũ ðpa arĩmi: “Árĩpehrerã masa judio masa árĩbirã sã Abrahã umupeodiro dopa ta yũre umupeorã Abrahã pãramerã ãhrima. Eropirã yaharã ãhrima,” arĩmi Goãmũ.

⁸ Iribojegue irire Goãmũ arĩ wereyutuhanũmi. ïgũ werepira ðpa ãhraa ïgũ yare gojarapũgue: “Árĩpehrerã masa judio masa árĩbirã sã yũre umupeorãre ‘Õarã ãhrima,’ arĩ ïagũca. Ñero iira dipuwaja marirã ïagũca erãre,” arĩñumi. Eropigũ iri ðari buherire Abrahãre arĩ wereyũñumi. “Árĩpehrerã masa mũhũ yũre umupeoro dopa ta yũre umupeocũ ‘Õarã ãhrima,’ arĩ ïagũca yũhũ erãre. Erãre ðaro ïigũca,” arĩñumi Goãmũ Abrahãre.

⁹ Abrahã Goãmũre ïgũ umupeocũ Goãmũ ðaro iĩñumi ïgũre. Eropigũ árĩpehrerã masa mari sã ïgũre umupeocũ Goãmũ ðaro ïigũcumĩ mari sãre.

¹⁰ Gajirã ðpa arĩrã ãhrima. “Moise dorerire ðaro iicũ Goãmũ ‘Õarã ãhrima,’ arĩ ïagũcumĩ marire,” arĩrima. Eropa arĩrã dipuwajacũrã ãhrima dohpa. Goãmũ yare gojarapũgue ðpa arĩ werea. “Moise dorerire iirã erã

iri dorerire árīpehrerire queoro iipehobirā dipuwajacurā āhrima,” arī gojara āhraa. Eropirā iri dorerire iipehomasi-birira waja dipuwaja moasūmorā āhrima árīpehrerā.

¹¹ Ne yujugure iri dorerire iipeho masiya mara. Eropirā Moise dorerire iiri mera Goām̄ mera ōamasibeama. Ōpa arī gojañuma Goām̄ yare gojarapūgue. “Īgure umupe-orāre Goām̄ ‘Ōarā āhrima,’ arī ĩhami. Ñero iira dipuwaja marirā ĩhami. Eropirā erā ōaro árīniguicārācoma Goām̄ mera,” arī gojañuma. Eropirā mari masia. Ne yujugure iri dorerire ĩḡu iiri mera Goām̄ ĩḡure “Ōaḡu āhrimi,” arī ĩabeami. Goām̄ure umupeoḡu dihta ōaro árīḡucumi ĩḡu mera.

¹² Goām̄ure umupeoḡur̄u, “Goām̄u yare yu ñero iira dipuwaja maric̄ũ iiḡucumi,” arīmi. Moise dorerire iiḡur̄u “Ȳu basi iri dorerire iiḡu ñero iira dipuwaja mariro ōaro árīḡuca,” arīrimi. Eropiḡu ĩḡu iri dorerire iipehomasi-biḡu árīḡu ñero iira dipuwajacuḡu dujami.

¹³ Eropirā mari árīpehrerā iri doreri mera ñero iira dipuwajacurā dujam̄iririb̄u. Mari eropa árīc̄ũ ĩha, Jesucristo mari ñero iira dipuwaja ĩḡu basi wajayemi ĩḡu crusague s̄iriḡu. Goām̄u yare gojarapūgue ōpa werea: “Īḡu yucuḡuḡue dirisiudiḡu Goām̄u ĩḡu ñero iira dipuwaja moadiḡu āhrimi,” arī gojañuma iribojegue. Eropiḡu Jesucristo crusague dirisiudiḡure mari ñero iira dipuwajap̄ure Goām̄u ĩḡure dipuwaja moadiḡu árīmi. Eropirā marip̄u ñero iira dipuwaja marirā dujaa pare.

¹⁴ Jesucristo eropiic̄ũ Goām̄u Abrahāre ōaro ĩadiro dopa ta judio masa árībirā s̄are ōaro ĩanuḡami. Eropiḡu ĩḡu arīdiro dopa ta ĩḡu obeodiḡu Espiritu Santop̄u erami marire Jesucristo umupeorāre.

Īḡu buherare werenemop̄u Pablo

¹⁵ Mari masa mari iiro dopa ta werem̄htaḡura m̄are. Perā “Ōpa iirāca,” erā arī weretamura p̄hr̄u gajiḡu gohro-tomasibeami.

¹⁶ Eropiḡu Goām̄u Abrahā mera weretamura p̄hr̄u Abrahāre ĩḡu arīrare gohroto masiya mara. Ōpa arī werepiñumi ĩḡure: “M̄u p̄arami árīturiaḡu mera árīpehrerā masare ōaro iiḡura,” arī wereñumi. Eropa arīḡu ĩḡu p̄amerā árīturiarāgue mera arīḡu iibiriñumi. Yujuḡu ta ĩḡu p̄arami árīturiaḡu dihtare arīḡu iin̄umi. Eropa arīḡu ĩḡu p̄arami árīturiaḡu Jesucristo ariburire arī wereyuḡu iin̄umi.

¹⁷ Eropiḡu ōpa arī werea m̄are: Iribojegue Goām̄u Abrahā mera weretamuḡu masare ĩḡu ōaro iiburire

wereñumi. Īḡu eropa weretamura pūhrū yoari boje pūhrū cuatrocientos treinta bojori árīturiagū mera árīpehrerā masare õaro iigūra,” arī wereñumi. Eropā arīḡu ĩḡu pāramerā árīturiarāgue mera arīḡu iibiriñumi. Yujugi pūhrū Moiserē ĩḡu doreri apiñumi. Moise doreri árīnūgaquerecū Goāmū Abrahāre werēpira pehrecū iibiriyo-ro.

¹⁸ Goāmū Abrahāre mahiḡu õpa ĩḡure arī weretuhāñumi. “Árīpehrerā masare mū yūre umupeoro dopa ta yūre umupeorāre õaro iigūca,” arī weretuhāñumi. Eropiro Moise doreri árīnūgaquerecū Goāmūpū iri dorerire iiri mera masare taubeamī. Moise doreri iiri mera mari taricū Goāmū mūare “Waja mariro õaro iig mera arīḡu iibiriñumi. Yujugūca,” ĩḡu arīrapū duhpiburi árībiriboaya.

¹⁹ ¿Eropiḡu duhpiburire iri dorerire Moiserē apiyuri Goāmū? Masa erā ñerire masiborore apiñumi iri dorerire erā ñero iira dipuwaja masiborore. Abrahā pārami árīturiagū Jesucristo ĩḡu eracūgue árītuya iri doreri. Eropiḡu Jesucristo ĩḡu eracū Goāmū Abrahāre ĩḡu werediro dopa ta masare õaro iññumi. Goāmū iri dorerire apigū anyuare weremūhtañumi. Erā anyua wereñuma Moiserē. Īḡu Moisepū masare wereñumi.

²⁰ Īḡu masare õaro iiburire Goāmū ĩḡu basi ta werepiñumi Abrahāre. Gajirā mera werebeobiriñumi ĩḡu iri dorerire apidiro dopa ta. Eropiḡu ĩḡu Abrahāre werepirapū Moise doreri tauro õhaa.

Moise dorerire werepū Pablo

²¹ Goāmū Moiserē ĩḡu dorerire apigū, ero coregue Abrahāre ĩḡu arīrare “Yū arīdiro dopa iisome pare yūhū,” arīḡu iibiripū ĩḡu. Abrahāre ĩḡu arīmūhtadiro dopa iibu iipū. “Masare õaro iigūca,” ĩḡu arīrare iibu iipū dohpā. Moise dorerire iiri mera mari Goāmū mera õaro árīmasirā mari iri dorerire õaro iirā ñero iira dipuwaja opabiriboya.

²² Eropā árīquerecū Goāmū yare gojarapūgue õpa āhraa: “Masa árīpehrerā erā ñero iira dipuwaja opama, arī gojara āhraa. Eropā dipuwajacūrāre erā Jesucristore umupeocū Goāmū õaro iigūcumī erāre. Īḡu Abrahāre werediro dopa ta iigū erāre ñero iira dipuwaja marirā ĩagūcumī.

²³ Jesucristore umupeori mera masare tauburi árīboro core gūa Moise doreri doca árīmūribū. Eropā Moise dorerire iirā peresugue árīro dopa árīmūribū. Jesucristo guare tauboro core eropa árīmūribū.

²⁴ Ōpa sā árīburi árībū Moise doreri: Moise doreri mera Jesucristore mari masiburi erabū. Mari porāre erā buherogue soro dopa ta Moise doreri marire Jesucristore

masicũ iibũ. Eropirã mari Jesucristore umupeocũ ïgu marire taumi. Mari ñero iira dipuwaja maricũ iimi.

²⁵ Eropirã dohpaguere mari Jesucristore umupeorãre Goãmũ “Ōarã àhrima,” arĩ ìhami. Gũa Jesucristore masirã ïgũre umupeorã ářĩrã dohpaguere Moise doreri doca árĩbeaa pare.

²⁶ Mũa sã árĩpehrerã Jesucristore umupeorã ïgu yarã árĩrã Goãmũ porã àhraa.

²⁷ Eropirã mũa árĩpehrerã Jesucristore umupeorã ïgu waĩ mera waĩyesũnirã árĩrã Jesucristo ïgu iro dopa ta àhraa. Jesucristo Goãmũ magũ árĩro dopa ta mũa sã Goãmũ porã àhraa.

²⁸ Eropirã árĩpehrerã Jesucristo yarã yujuro mera àhraa. Yujugũ porã iro dopa àhraa. Eropigũ gũa judio masare mũa judio masa árĩbirã sãre Goãmũ yujuro pa ta ìhami. Masa pohro majarãre erã oparã sãre yujuro pa ta ìhami. Ùmare nome sãre yujuro pa ta ìhami.

²⁹ Eropirã mũa Jesucristo yarã árĩrã Abrahã pãramerã sã àhraa. Eropigũ Goãmũ Abrahãre “Mũre õaro iigũra,” arĩrare mũa sãre iimi. Cristo yarã mũa árĩcũ ïagũ mũare õaro iigũcumi.

4

¹ Mari iri doreri doca árĩbiriborore mari Jesu yarã árĩborore weregũra daja. Yujugũ majigũ ïgu pagũ yare wũaro opapehobu árĩqueregũ majigũ árĩgũ pohro majagũ iro dopa àhrimi. Gajirã dorero doca àhrimi dohpa.

² Gajirã ïgu pagũ apinirã ïgu ya árĩburire ìhadibuma dohpa. Ìgu pagũ gameranũ árĩcũgue ïgu basi ïgu yare doremi pare.

³ Ìgu majigũ gajirã dorero doca ïgu árĩro dopa ta mari masa mari ñecũ sumarã árĩricũri doreri doca árĩmũriribũ. Pohro majarã iro dopa ta árĩmũriribũ.

⁴ Mari eropa árĩnirãre mari Pagũ Goãmũ ïgu gameranũ ejacũ ïgu magũre ïgu pohro árĩdigũre obeodigũ árĩmi. Ìgũre obeocũ ïgu nomeoguere dehyoadigũ árĩmi. Eropa dehyoagũ judio masũ árĩdigũ árĩmi Moise dorerire iigũ. Eropigũ Goãmũ obeodigũ árĩmi ïgu magũre.

⁵ Gũa iri doreri doca árĩrãre taubure obeodigũ árĩmi ïgu magũre. Ìgu marire taugũ mari pohro majarã iro dopa árĩnirãre wiugũ ïgu porã árĩcũ iimi.

⁶ Eropiituhaja mũa sã ïgu porã árĩcũ ïgu Jesucristo mera Espĩritu Santore obeomi mũare. Eropirã Espĩritu Santo marire ïgu itamuri mera Goãmũre mari Pagũre “Ahũ,” arãa mari pare.

⁷ Eropirã mũa Goãmũ porã ta ãhraa. Īgu porã árĩrã mũa ñecũ sũmarã doreri doca, pohro majarã iro dopa árĩbeaa pare. Goãmũ magũ Jesucristo wiunirã ãhraa. Mũa eropárĩrã ĩgu porã árĩrã Goãmũ oburire oparãca mũa árĩpehrerire.

Pablo Galacia majarã Jesu yarãre guñaricũpũ

⁸ Mũa ero core Goãmũre masibirã árĩrã gajirã goãmarãre umupeomũriribũ. Eropirã erã pohro majarã iro dopa árĩmũrirabũ. Goãmũ gohrare umupeobirimũribũ.

⁹ Eropa árĩquererã ta dohpaguere Goãmũre masia. Goãmũpũ mũare ĩha masimi. ¿Īgu eropa masiquerecũ ta duhpirã i yeba majarã erã pepirire gahmeri daja? ¿Duhpirã iribojegue mũa ñecũ sũmarã doreri mũa iidiro dopa ta mũraro ta Cristo mariro dopa ta iidiari daja? ¿Eropirã duhpirã dohpaguere Moise dorerire mũa iinũgarã, pohro majarã iro dopa árĩdiari daja mũa?

¹⁰ Judio masa erã bosenuri iro dopa mũa sã iica Goãmũ mera õadiarã. Soorinũri nũcũ, aberi nũcũ, bosenurire eropiica. Bojori nũcũ bosenurire õaro iica. Mũa eropiiri queoro árĩbeaa.

¹¹ Mũa eropiicũ pee ñero sĩporãcũca yũpũ. Mũare yũ turaro buhequerecũ ta “Iri waja mariboca,” arĩ pepia.

¹² Eropigu yũhũ mũare bũrigã õpa arĩ werea. Mari Jesucristore umupeoturadiro dopa ta umupeoque daja. Yũ Jesucristore umupeogu gũa judio masa doreri yũre taubiricũ ĩha irire umupeobiribũ pare. Eropirã mũa sã Jesucristore umupeorã iri dorerire umupeobiricãro gahmea Goãmũ mera õaro árĩmorã. Yũhũ mũa pohro ne árĩcũ mũa ne ñero iibiribũ yũre.

¹³ Mũa masia yũhũ mũa pohro ne árĩdirore. Yũhũ Jesucristo marire tauburire ne mũare buhegu ejagu dorecũgu árĩbũ.

¹⁴ Yũ dorecũgu ñero taribũ. Yũ eropa dorecũgu árĩquerecũ mũa yũre doobiribũ. Yũre õaro umupeo õaro bocatĩribũ. Goãmũ obeodigu anyu árĩro dopa yũre ĩabũ. Yũre Jesucristore iiro dopa õaro iibũ.

¹⁵ Yũre bũrigã gamebũ. Yũre bũrigã gamerã yũ serẽropẽ ta árĩpehrerire omorã árĩbũ yũre. ¿Mũa eropa árĩcũ dohpa wahari dohpaguere? Mũa negohraguere yũre mucubiridiro dopa ta dohpaguere mucubiribea.

¹⁶ ¿Mũare diaye majare yũ werera waja mũa ĩhaturigu wahari dohpaguere?

¹⁷ Mũa pohrore gaji buherire buherã mũare õaro umupeocoma. Erã eropa umupeoquererã mũare sĩporã mera mahibiricoma. Mũa yũre yũ buheri sãre gamebiricũ

gahmema erã. Mũa erãpũre umupeocũ gahmema. Eropirã mũare umupeocoma.

18 Masare umupeocũ ðapũrica. Erã weca dihta umupeocũ ðabeaa. Yũ árĩcũ dihtare umupeocũ ðabeaa. Árĩpehrerãre yujuropa ta ðari mera umupeoniguicãro gahmea.

19 Mũa yũ porã iro dopa ãhraa. Eropigũ mũare guñaricũa. Mũare bũrigã guña teboricũa. Yujugo porãcũbo teboricũro dopa ta yũ sã teboricũa mũare guñagũ. Igo magũ ðaro dehyoacũ gamego teboricũmo. Mũa Goãmũ porã ðaro árĩcũ gamegũ teboricũa yũ sã. Mũa Jesucristo árĩricũrĩre ðaro opacũ gahmea.

20 Mũa pohro bũrigã wadiarica. Yũ mũa mera árĩgũ yũ basi mũare ðaro weremasiboya gojaripũ gojaro mariro. Eropigũ mũare dohpaguere ïabigũ mũa Jesucristore ðaro umupeoturanemoborore masibirica.

Agar Sara mera erã árĩrare werequeogu mari Goãmũ porã árĩrare werepũ Pablo

21 ¿Mũa Goãmũ mera ðaro árĩmorã Moise dorerire iiniguicãdiarã mũa Moise arĩ gojarare masibeari?

22 Ōpa arĩ gojañumi Moise: Abrahã porã ũama perã árĩñuma. Īgũ marapo pohro majago Agar waĩcũgo yujugũ porãcũñumo. Pũhrũ Abrahã maraporũ Sara waĩcũgo gajigũ porãcũñumo.

23 Īgũ pohro majago magũ mari masa iro dopa ta masa dehyoañumi Īgũ. Abrahã igore porã moara pũhrũ mata nijipo ãhri porãcũñumo. Īgũ maraporũ mata porã bocamasibiriñumo. Eropigũ Goãmũ Īgũ arĩdiro dopa ta igore porã bocacũ iĩñumi.

24-25 Erã perã nome iribojegue eropa warare ðpa buhegũra mũare. Goãmũ Abrahãre wererare iirã Sara árĩro dopa ãhrima. Gajirã Moise dorerire iirã Agar iiro dopa ãhrima. Agar igo porã sã gajirã dorero doca árĩmũriñuma. Pohro majarã árĩmũriñuma. Erã arĩdiro dopa ãhrima Moise dorerire iirãpũ. Eropirã Moise doreri doca árĩmũrirã ãhrima pohro majarã iro dopa árĩrã. Iri dorerire iirã "Goãmũ mera ðaro árĩrãca," arĩmũririma. Iri dorerire Goãmũ Moiserẽ apiñumi Sinaí waĩcũdigũ utãgũgue Arabia yebague. Dohpaguere iri dorerire Jerusalengue judio masa umupeoma. Eropirã iri doreri doca ãhrima.

26 Ōpa ãhrima Goãmũ Abrahãre wererare iirãpũ. Erã Jesucristore umupeorã ãhrima. Sara arĩdiro dopa ãhrima. Sarapũ pohro majago árĩbirimũriñumo. Mari Jesucristore umupeorã "Moise doreri mera taribea," arãa. Jesucristo

marire taucũ Goãmũ porã árĩrã mama Jerusalén maca majarã ãhraa.

²⁷ Eropirã Jesucristore umupeorã Goãmũ porãpũ bajarã árĩrãcoma. Moise dorerire iirãpũ bajamerã árĩrãcoma. Eropa ta arĩ werea Goãmũ yare gojarapũgue:

Mũhũ ne porã opabigo, porãcũri pũririĩne pepibigo ðaro mucubirique. Gajigo igo marapũ mera árĩgo igo porã árĩquerecũ igo pãramerã árĩturiarã bajamerã árĩrãcoma. Mũpũre dohparagã mũ porã mariquerecũ mũ pãramerã árĩturiarã tauro bajarã árĩrãcoma. Eropigo mucubirique, arĩñumi Goãmũ.

²⁸ Isaa Abrahã magũ árĩdiro dopa mari Goãmũ porã ãhraa. Isaa Abrahã magũ dehyoagũ Goãmũ ĩgũ werediro dopa ta dehyoañumi. Mari Goãmũ porã árĩrã Goãmũ ĩgũ werediro dopa ta ĩgũ porã ãhraa.

²⁹ Eropirã Abrahã porã perã arĩñuma. Pohro majago magũ Ismael árĩpehrerã masa iro dopa dehyoañumi. Isaapũ ĩgũ pago igo porã bocamasibiricũ Espĩritu Santo itamuri mera porãcũñumo. Erã dehyoara pũhrũ Ismaepũ pohro majago magũpũ Isaare Abrahã marapo magũre ĩgũ ñero taricũ iimũriñumi. ĩgũ iidiro dopa dohpaguere eropa wahaa. Erã Moise dorerire iidorerãpũ marire ñero taricũ iima. Mari Espĩritu Santo itamuri mera Goãmũ porã ãhraa. Mari eropa árĩrãre marire ñero taricũ iima.

³⁰ Eropa wacũ Goãmũ yare gojarapũgue irire dohpa arĩrire buherãca. Ōpa Goãmũ arĩñumi Abrahãre. “Mũ pohro majago magũ mũ oparire ne opasome, arĩñumi. Mũ marapo magũ dihta opapehogũcumĩ. Eropigũ mũ pohro majago igo magũ mera cóãque mũ pohrore,” arĩ wereñumi Goãmũ Abrahãre.

³¹ Eropirã, yũ acawererã, mari Goãmũ porã árĩrã pohro majago magũ iro dopa árĩbeaa. ĩgũ pagũ oburire opamasibiriñumi. Maripũ mari Pagũ Goãmũ ĩgũ oburire opamasirãca. Marire ĩgũ mera ðacũ iimi.

5

Cristo marire ĩgũ taura pũhrũ turarã árĩro gahmea marire, arĩ gojapũ Pablo

¹ Eropigũ marire mari ñecũ sũmarã árĩricũri dorero doca árĩnirãre Jesucristo tautuhajami. Mari ñero iira dipuwajare Jesucristo ĩgũ basi wajayebasami mari Goãmũ mera ðaro árĩboro dopa. Eropirã mari Goãmũ porã árĩrã Jesucristore guñaturaniguicãro gahmea. Eropirã pebircãro gahmea erã Moise dorerire iidorerãre.

² Ōaro peeque yure. Yuhū Jesucristo ĭgu apidigu āhraa. Eropigu mūare ōpa werea. Mūa Goāmū mera ōaro árīmorā mūa gasiro merogā wiri aīcū Jesucristo mūare ĭgu sīribasara waja mariboya.

³ Eropigu gūhyadiaro mera werea daja. Goāmū mera ōaro árīborore erā gasiro merogā wiri aīrā Moise dorerire árīpehrerire iiro gahmea erāre.

⁴ Eropirā mūa “Goāmū marire taugūcumi Moise dorerire iicū,” mūa arīdiarā, mūa Jesucristore cóārā iiboca. Mūa eropiirā Goāmū ĭgu mera ōaro árīburire mūare ōaro ĭgu iiburire cóārā iiboca.

⁵ “Maripū Goāmū mera ōhaa,” arīmasia Jesucristore umupeori mera, Espiritu Santo ĭgu itamuri mera. “Goāmū guare ‘Ñero iira dipuwaja mariro ōarā āhrima,’ arī ĭagūcumi,” arīmasia.

⁶ Eropiro gasiro merogā wiri aīnirā árīcū sāre, wiri aībirinirā árīcū sāre ĭabeami. Mari Jesucristore umupeorā árīcū gajirāre mari mahi umupeocū ĭhami Goāmū.

⁷ Mūa ne Jesucristore umupeorā ĭgu yare ōaro diaye iimuribū. Eropirā dohpaguere mūa Jesucristo yare diaye majare ōaro iibiricū gajirā mūare cāhmotañorā.

⁸ Goāmūpū eropa iibirimi. ĭgu mūare Jesucristo yarā árīmorāre beyegū āhrimi.

⁹ Eropigu ōpa werea mūare. Yujugu masū ĭgu gūyarire buhenūgacū peerā masa árīpehrerā ĭgure peerā gūyarire umupeorā wahama ōaripūre peediabirā.

¹⁰ ĭgu mūare eropa gūyarire buhenūgaquerecū ōpa arī pepia. “Erā Jesucristore umupeorire oparā erā iri gūya buherire umupeosome,” arī pepia yuhū mūare. Mūare goroweocoregure noho árīgure ĭgu eropa iira dipuwajare Goāmū dipuwaja moagūcumi ĭgure.

¹¹ Ōpa arī werewñañorā gajirā yūpūre: “ ‘Mari Goāmū mera ōaro árīmorā mari gasiro merogā wiri aīro gahmea,’ arī buhemi Pablo,” arāñorā yure. Yuhū eropa arī ne buhebeaa. Yuhū dohpaguere “Gasirogā wiri aīro gahmea,” yū arī buhecū irire iidorerāpū yure ñero taricū iibiriboañuma. Yū ōpa arī buhea: “Mari ñero iira dipuwajare Jesucristo wajayebasadi árīmi crusague sīrigū. Eropirā mari Goāmū mera ōaro árīmorā Jesucristore umupeoro gahmea,” arī buhea yuhū. Yū eropa arī buhecū judío masa pee guama. Yure ñero taricū iima.

¹² Erāpū mūare goroweorāpū gasiro merogā wiri aīdorerāpū erā basi wiri aīpehocāporo.

¹³ Mūapūre Goāmū mūa ĭgu porā árīmorāre aīgu mūa Moise dorerire iimorāre beyebiripū. Mūare iri dorerire

iidorebiriqerēcũ mũa mũa Ƴaribejarire iibiricãro gahmea. Õpa iiro gahmea. Mũa árípehrerãre õaro mahi umupeorã erãre itamuniguicãro gahmea. Mũa gajirãre umupeorã Moise dorerire árípehrerire iirãca.

¹⁴ Eropa ta arĩ gojara áhrraa: “Mũa basi mahiro dopa ta mũ pohro árírãre mahique,” arĩ gojara áhrraa.

¹⁵ Eropirã mũa game íhaturicũ, papũri, mũa disitĩri wereniguicũ mũa basi õaro mũa game umupeoro pehreboca. Eropirã mũa basi õaro áríro gahmea.

Masa erã gamerire iirire Espíritu Santo ígũ gameri sãre werepũ Pablo

¹⁶⁻¹⁷ Õpa arĩ werediaca mũare. Mari Jesucristo yarã árícũ mari pepirigue õpa áhrraa. Mari ñeri Ƴaribejari áhrraa. Espíritu Santo ígũ gameri sã áhrraa. Mari Ƴaribejari Espíritu Santo ígũ gameri mera yujuro mera áríbeaa. Eropiro marire masiya mariro wahaa. Eropirã mũa Espíritu Santopũre yũhrirã mũa Ƴaribejaripũre iisome. Eropirã Espíritu Santo ígũ gamerire iiniguicãque.

¹⁸ Eropirã Espíritu Santo gamerire iirã árírã “Moise doreri mera mari tarirãca,” arĩ pepibeaa mũa.

¹⁹ Masa erã ñeri Ƴaribejarire erã iicũ õaro íhamasica mari. Õpa iima erã Ƴaribejarire iirã: Ëma gajirã nome mera ñero iima. Nome sã gajirã Ƴma mera ñero iima. Diayea iiro dopa iiricũma. Ñerire pepima. Ñerire wereniguima.

²⁰ Eropirã goãmarã wéanirãre umupeorã “Mari goãmũ áhrimi,” arĩ umupeoma. Gajirãre dojama. Eropirã masare doho áhrima. Íhaturima. Disitĩri wereniguima. Gajirãre doéma. Mata guama. Gajirãre tarinũgadiama. Yujuro mera árídiabeama. Yuju curu majarã gajĩ curu majarãre íhaturima.

²¹ Eropirã gajirãre gajinore erã opacũ íhaturima. Gajirãre wejẽdiarã wejẽma. Merericurã áhrima. Mererã ñerire Ƴaribejama. Eropa iirã gajino ñeri sãre iima. Eropigũ yũhũ mũare werediro dopa ta werea daja gũhyadiaro mera. Iri ñerire iiniguigũ Goãmũ ígũ opũ áríroguere ejamasisome.

²² Espíritu Santo yapũ õpa áhrraa. Erãre õpa iirã árícũ iimi. Árípehrerãre mahi umupeoma. Mucubirima. Gũiro mariro áhrima. Gajirã erãre ñero iiquerēcũ erã mera guabeama. Mojomoro íhama. Duhuro mariro Goãmũ ígũ gamerire õaro iima. Erã mohmediarire erã mohmediabiriri sãre õaro iima.

²³ Eropirã nijiyajaro mera iima. Erã ñero iidiaquererã iibeama. Eropa ta iima Espíritu Santore yuhrirã. Eropa iirãre “Eropa iibiricãque,” ne arĩbeami gajigũ.

²⁴ Eropirã mari Jesucristo yarã árĩrã mari ñero árĩdirore duhucã mari gamerire mari ñaribejarire iiniguicãbeaa.

²⁵ Eropirã mari Espíritu Santo itamuri mera iirã árĩrã ĩgũre yuhriniguicãro gahmea.

²⁶ Eropirã mari “Yũhũ gajirãre tarinũgaa,” arĩ pepibiricãrã. Eropirã gajirãre game ĩhaturicũ iibiricãrã. Gajirã erã ðari oparire obobiricãrã.

6

Mũa mera majarãre itamuque, arĩ werepũ Pablo

¹ Acawererã, mũa mera majagũ Jesu yagũ ĩgũ ñerire iicũ ĩha ĩgũre itamuro gahmea mũa Espíritu Santo dorerire iirãpũre. ĩgũ iri ñerire duhucã ðaro mera werero gahmea. Eropa itamurã mũa ðaro pee masique mũa sã ñerire iiri arĩrã.

² Eropirã mũa basi game itamuque árĩpehrero. Mũa eropa itamurã Jesucristo dorediro dopa ta iirãca.

³ Yujugũ “Yũpũ ðarire iigu aħraa,” arĩ pepigũ, ĩgũ ðarire iibiriqueregũ ðpa arĩgũ ĩgũ basi gũyagũ iimi.

⁴ Eropirã marire ðpa iiro gahmea. Mari basi mari iiricũrĩre ðaro queoñanũrusiaro gahmea. Eropa ĩara pũhrũ mari árĩricũri ðari árĩcũ ĩha “Yũhũ ðarire iiaa,” arĩmasia. Eropirã mari ðari árĩricũri mera mucubirimasia gajirã árĩricũrĩre ĩaro mariro.

⁵ Eropigũ mari árĩricũrĩre Goãmũ beyegũcumi. Eropirã mari gajirã erã iiricũrĩre ĩhanũrubiricãro gahmea. Eropirã mari yujurãyeri iiripũre ĩaro gahmea.

⁶ Eropirã Jesucristo yare ðari buherire peerãpũ erãre buherãpũre erã gamerire itamuporo árĩpehrerire ðarire.

⁷ Eropirã “Goãmũ yũ ñerire iira dipuwaja dipuwaja moasome yũre,” arĩ pepi masiya mara. Őpa arĩ pepirã mũa diaye arĩ pepibirica. Eropiro Goãmũre gũya masiya mara. Eropirã mari dohpaguere iira waja pũhrũgue bocarãca.

⁸ Eropirã mari ñaribejarire iiniguirã iri ñeri iira waja dipuwajacũrãca. Eropirã peamegue warãca. Mari Espíritu Santo gameripũre iirã ðaro wajatarãca. Eropirã Goãmũ mera mũmũri nũcũ ðaro árĩniguirãca.

⁹ Eropirã mari Espíritu Santo gamerire iiniguicãrã. Gari-borebiricãrã. Goãmũ gamerinũ mari wajatarãca ðarire duhubirã. Eropirã ðarire iiniguicãro gahmea.

¹⁰ Eropirã árĩpehrerisubure õaro umupeoro gahmea árĩpehrerãre. Eropirã Jesucristore umupeorãre buringã mahi umupeoro gahmea yujungu porã iro dopa.

Pablo ĩgu weretura

¹¹ Īata. Yũ basi mũare gojagu pagari deyori mera gojagu iiaa.

¹² Eropigu õpa werea mũare. Erã mũare gasiro merogã wiri aĩdorerãpũ õpa gahmema. Erã dorerire mũa iicũ ĩha gajirã judio masa erã mera õaro árĩbocoma. Eropirã erãre ñero taricũ iibiribocoma daja erã Jesucristo yare umupeoquerecã.

¹³ Erã basi gasiro merogã wiri aĩquererã Moise dorerire gajire iibeama. Erã eropa iibiriquererã, mũapũre erã dorerire iidorerã mũa gasiro merogã wiri aicũ gahmema erã. Eropa gahmema gajirã judio masare õpa erã arĩboro dopa mucubiriri mera. “Gũa dorero mera Galacia majarã judio masa árĩbirã mari árĩricũre iiaa,” erã arĩboro dopa mũare erã dorerire iicũ gahmema.

¹⁴ Yũ tamera erã eropa mucubiridiaro dopa ta ne mucubirisome. Mari Opũ Jesucristo iira mera dihta mucubiria. ĩgu mari ñero iira dipuwajare wajayebasadigu árĩmi crusague siringũ. Iri dihtare mucubiria. Jesucristo eropa iira mera yũhũ ĩgu taudigu árĩgu masa erã ùaribejarire guñabeaa pare. I mũmũ maja masa erã ùaribejari sã doremasibeaa yũre.

¹⁵ Eropiro gasiro merogã wiri aicũ, wiri aĩbircũ sãre Goãmũ ĩabeami. Masa Jesucristo mera õari mera gohrotorã árĩcũ ĩhami.

¹⁶ Erã eropa gohrotonirã árĩpehrerã iri buherire Jesucristo yare yũhrirãre “Erã õaro árĩporo,” arĩ serẽa Goãmũre. “Erãre mũ ya curu majarã gohra árĩrãre mojomoro ĩaque,” arĩ serẽbasaa yũhũ Goãmũre.

¹⁷ Yũhũ Jesucristo doreldiro dopa ta iigu ĩgu yare buhera dipuwaja gajirã yũre ñero taricũ iima. Erã eropa iira cami mũra aħraa yũre yũ dũpũre. Eropigu õpa gahmea: Iripẽta yũre bujawerecũ ĩporo Jesucristo yarãre goroweorã.

¹⁸ Mũare árĩpehrerãre õaro árĩcũ gahmea. Mari Opũ Jesucristo mũare árĩpehrerãre õaro ĩporo. Eropa ta ĩporo. Iripẽta aħraa.

Efesios

Efeso majarãre gojabeoñumi Pablo

¹ Yũhũ Pablo Goãmũ ïgũ gamero dopa ta Jesucristo yũre ïgũ yare buhedore apidigũ áhraa. Eropigũ mũare Efeso majarãre gojabeoa. Mũare Jesucristore õaro umupeorãre gojabeoa yũhũ.

² Goãmũ mari Pagũ mera Jesucristo mari Opũ mera mũare õadoreo. ïgũ mũare itamuri mera õaro árĩque mũa.

Cristo yarã mari árĩcũ ïagũ Goãmũ õaro iimi marire, arĩ gojañumi Pablo

³ Goãmũ mari Opũ Jesucristo Pagũ marire õaro iiniguicãmi. Árĩpehreri ïgũ ya õari mera ïgũ mari pepirire õarire ohomi mari ïgũ pohro árĩro dopa. Marire sĩporã turacũ iimi. Cristo yarã mari árĩcũ ïagũ eropa marire õaro iimi. Gũa ïgũ eropiicũ ïha õaro umupeoa. ïgũre õaro wereniguia.

⁴ Őpa iipũ ïgũ marire ïgũ yarãre: I yeba árĩboro coregue ïgũ yarã árĩmorãre beyemũhtapũ ïgũ marire. Eropa beyegũ ïgũ marire ïgũ ïarore ñeri iiro marirã mari árĩmorãre iipũ. Eropigũ ïgũ marire “Ñerã áhrima, arĩsome.

⁵ Marire mahigũ mojomoro ïagũ iribojegue õpa arĩmũhtapũ ïgũ marire: “Yũ magũ Cristo ïgũ itamuro mera erã yũ porã õaro árĩrãcoma,” arĩ apipũ marire iribojegue ta. ïgũ gamediro dopa ta eropa iipũ ïgũ marire.

⁶ Marire ïgũ eropa õaro iicũ ïarã umupeoa. ïgũre õaro wereniguia. ïgũ magũ ïgũ mahigũ Jesucristo yarã mari árĩcũ ïagũ, õaro iimi ïgũ marire.

⁷⁻⁸ Eropigũ ïgũ magũ Jesucristo ïgũ di cóãgũ sĩrigũ mari ñeri iira dipuwajare wajayebasadi árĩmi. ïgũ eropa wajayebasacũ mari ñeri iirare cãdijidi árĩmi Goãmũ. Eropigũ marire turaro mahigũ, marire mojomoro ïagũ eropa iipũ Goãmũ. Eropigũ marire peamegue wabonirãre taudi árĩmi. ïgũ õaro masipehori mera eropiipũ ïgũ. Eropirã ïgũre õaro wereniguia.

⁹⁻¹⁰ Eropigũ ïgũ marire ïgũ iiborore marire masicũ iimi. Iribojegue majarãre irire masicũ iibirimũripũ ïgũ. Őpa áhraa marire ïgũ iiboro. ïgũ gamediro dopa ta ïgũ pepidiro dopa ta árĩpehrerãre Cristo dorero doca árĩcũ iigũcumĩ. Eropigũ árĩpehrerire ïgũ ya árĩcũ iigũcumĩ. ïgũ

queorasubu árĩcũ umaro majarãre, i yeba majarã sãre ĩgu dorero doca árĩcũ iigucumi ĩgu. Eropigu umaro maja sãre i yeba maja árĩcũ sãre ĩgu ya dihta árĩcũ iigucumi. Eropigu Jesucristopũ árĩpehrerã weca opũ árĩgucumi. Eropiro árĩpehreri ĩgu ya dihta árĩroca. Eropa árĩbure árĩdorepũ Goãmũ ĩgure.

¹¹ Eropi Cristo yarã mari árĩborore masiyugũ Goãmũ marire beyetuhapũ ĩgu yarã árĩmorãre. I árĩpehrerire apipũ ĩgu, ĩgu pepidiro dopa ta ĩgu gamediro dopa ta iibu.

¹² ĩgu eropiipũ ĩgu yare gũa iiborore. ĩgu yare gũa õaro iicũ ĩarã gajirã sã ĩgure umupeorã “Turagũ àhrimi,” arĩrãcoma. Gũapũ judio masa Cristore gamenuganirã árĩrã ĩgure umupeomũhtanirã árĩbũ.

¹³ Mũa sã diaye wereniguirire, õari buherire peeabũ. Iri buheri mera ta Goãmũ pohrogue warãca mũa. Irire peerã ĩgure umupeoa. Eropirã ĩgu yarã wahabũ mũa. Őpa arĩpũ Cristo: “Yũre umupeorãre Espĩritu Santore obeogũra,” arĩ werepipũ. Eropigu ĩgure mũa ũa iiborore. ĩgu yare gũa õaro iicũ ĩarã gajirã sã ũmupeocũ ĩagu ĩgu Espĩritu Santore odigu árĩmi mũare. Eropigu ĩgure mũa opacũ, “Jesucristo yarã àhraa,” arĩ masicũ iimi ĩgu mũare.

¹⁴ Goãmũ marire taricũ iiami. Eropigu pũhrũ ĩgu pohrogue aĩagucumi marire ĩgu oburire marire obu. Marire aĩaboro core Espĩritu Santopũ mari mera àhrimi. ĩgu mari mera árĩcũ Goãmũ mera mari árĩborore õaro masia. Goãmũ marire ĩgu eropiicũ ĩarã ĩgure umupeori mera, “Őagũ àhrimi,” arãa mari.

Pablo Goãmũre serẽbasañumi Jesu yarãre

¹⁵⁻¹⁶ Eropigu Jesucristore umupeorã mũa árĩcũ peebeo, árĩpehrerã ĩgu yarãre mũa umupeo mahirire peebeogu Goãmũre “Őhaa,” arãa. Eropigu umũri nũcũ serẽbasaa mũare Goãmũre.

¹⁷ Mari Pagũ umaro majagũ ĩgu yare mũare õaro masicũ iidoregũ serẽbasaa. Eropigu ĩgure mũa õaro masinemoboro dopa serẽbasaa. ĩgu Goãmũ Jesucristo mari Opũ Pagũ àhrimi.

¹⁸ Eropigu mũa õaro masiboro dopa mũare serẽbasaa Goãmũre. ĩgu mũare taugũ, ĩgu yarã árĩmorãre iimi ĩgu mũare. Eropigu mũare ĩgu yarãre ĩgu pohro õaro wacũ iigucumi. Irire mũa õaro masiboro dopa serẽbasaa yũhũ Goãmũre. Eropigu ĩgu marire oburi sãre “Őataria àhraa,” iri mũa arĩ mũa masiboro dopa serẽbasaa. Őpa mũa masiboro dopa serẽbasaa mũare Goãmũre.

19 Mari Jesucristore umupeoräre ĩġu itamugũ, ĩġu turari mera ĩġu iimi. ĩġu gajirã tauro turagũ ährimi. Muare iri säre ôaro masiboro dopa serêbasaa mari Pagũ Goãmũre.

20 ĩġu turari mera Cristo sĭridigũre masudigũ árĭmi. Eropigũ ĩġu turari mera ımarogue ĩġu diayepũ Cristo ĩġu doacũ iidi árĭmi Goãmũ árĭpehreräre ĩġu doreboro dopa.

21 Ero doagũ árĭpehrerã ımaro majarã oparã weca, árĭpehrerã dorerã weca ährimi Cristo. Eropigũ i ımu majarã weca opũ, gajipũ majarã sä weca opũ, árĭpehrerã dohpague majarã, gajisubu majarã sä, pãhrũgue majarã sä erã weca opũ árĭbu ta ährimi ĩġu.

22 Eropigũ árĭpehrerã weca, árĭpehreri weca apipũ Goãmũ Cristore. Eropigũ árĭpehrerire opucıcũ ĩpũ ĩġũre. Eropiro Cristo yarã yuju curu árĭrã erã opũ árĭbure acupũ ĩġũre. Erã dipuru iro dopa árĭġũ ährimi ĩġu.

23 Cristo yarã yuju curu árĭrã ĩġu dũpũ iro dopa árĭrã ähraa mari. Cristo árĭpehrerogue árĭniguimi. Eropigũ mari ĩġu yarã mera árĭniguigũ marire itamuniguicãmi.

2

Goãmũ marire mahigũ, mojomoro ĩagũ taupũ marire, arĭ gojañumi Pablo

1 Ñeri dipuwajacubonirã peamegue dederebonirã árĭquerecũ ta Goãmũ muare taumi.

2 Iribojeguere i yeba majarã Goãmũ tarinũgarã iro dopa iimũrinirã árĭribũ mũa. Eropirã watĭ ĩġu gamero dopa ta iimũrinirã árĭbũ mũa. ĩġu watĭ i yeba doregũ Goãmũre tarinũgarã opũ ährimi.

3 Iribojegue árĭpehrerã mari ôpa dihta iinirã árĭribũ. Mari ñeri dihtare ıaribejaribũ. Mari ejatuharo mari pepiro dopa iimũriribũ. Eropa árĭrã gajirã árĭpehrerã iro dopa ta mari sä ñerã árĭmũriribũ. Mari árĭpehrerã masa mera eropa árĭrã árĭcũ ĩagũ Goãmũ mari mera guagũ dipuwaja moadiaripũ.

4 Eropa iidiaqueregũ ta marire turaro mahigũ mojomoro ĩapũ.

5 Eropa mahitarigũ mari ñeri iira waja peamegue dederebonirã mari árĭquerecũ ta marire ĩġu mera árĭniguimorã árĭcũ iimi. Jesucristo ĩġu sĭribasara mera mari ĩġu yarã árĭcũ marire iimi. Marire mojomoro ĩagũ taumi ĩġu marire.

6 Goãmũ Jesucristo sĭridire masugũ ĩġu pohro apidigũ árĭmi árĭpehreräre dorebu. Eropigũ ĩġu mari säre ĩġu yaräre Cristo dorerire opacũ iimi. Eropirã ĩġu pohro ĩġu mera árĭrãca mari.

⁷ Eropiimi ĩġu p̄hr̄gue majarã marire ĩġu mojomoro ĩarare erã masiboro dopa. Jesucristo marire ĩġu õaro ĩtamura mera ĩġu masare turaro ĩġu mahirire ĩhmumi.

⁸ Cristore mari umupeocũ Goãm̄p̄u marire taricũ iimi. Marire mahigũ ĩġu pohro ejacũ iiḡcumi. Mari gamero õaro iiricuri mera Goãm̄u pohro ejadiarã ejamasisome. Mari iibiriquerecũ apimi mari ĩġu pohro ejaburire. Eropiro waja mariro ım̄uri n̄c̄u ĩġu mera mari árĩburire ohomi marire.

⁹ Mari basi tarimasibirica. Mari iiri mera mari gamero mera tarirã mari “Gua basi taria,” arĩboca. Goãm̄p̄u marire taumi ĩġu pohro mari wamorãre.

¹⁰ Jesucristo yarã árĩcũ iimi marire Goãm̄p̄u. Eropigũ Jesucristo yarã mari árĩcũ ĩagũ õarire iirã dihta wacũ iimi marire. Iribojegue ĩañumi marire õarire iimorãre.

Cristore oparã õaro ãhraa, arĩ gojañumi Pablo

¹¹ Eropirã m̄ua ero coregue árĩric̄urare dohpague sãre guñaque. M̄uare judio masa árĩbirãre gua judio masapũ ĩhaturim̄ribũ. Gua circuncisión iinirã gasiro merogã wiri añinirãp̄u m̄uare gasiro merogã wiri aĩbirãre “Goãm̄u yarã árĩbeaa m̄uap̄u,” arĩm̄ribũ m̄uare.

¹² Irisubure m̄ua Cristo yarã árĩbirã boje majarã árĩm̄ribũ. Goãm̄u beyenirã judio masa iro dopa árĩbirim̄ribũ m̄uap̄u. M̄ua eropa árĩnirã ĩġu beyenirã mera pep̄uri majarã ĩhaturirã árĩm̄ribũ. Goãm̄u m̄uare “Masare õaro iiḡura,” ĩġu arĩ apinirã árĩbirinirã árĩribũ m̄ua. M̄ua ñeri dipuwaja peamegue wabonirã árĩrã árĩribũ m̄ua. Goãm̄u moorã árĩnirã peamegue dederebonirã árĩnirã árĩribũ.

¹³ Dohpaguep̄ure Jesucristo yarã ãhraa pare m̄ua. Iribojegue boje majarã árĩnirã árĩquererã, dohpaguere ĩġu yarã ãhraa pare m̄ua. Cristo m̄ua ñeri dipuwaja crusague ĩġu di cóara p̄hr̄u Goãm̄u yarã árĩcũ iimi m̄uare.

¹⁴ Eropigũ judio masare m̄ua ĩhaturirã árĩcũ Cristo marire bosadigũ árĩmi. Masare bosagũ ãhrimi ĩġu. Judio masa, judio masa árĩbirã mera pe curu mari árĩcũ ĩagũ ĩġu marire yuju curu ta árĩcũ iidi árĩmi. Mari ĩhaturiri duhucũ õaro mera árĩcũ iimi ĩġu marire.

¹⁵⁻¹⁶ Õpa iimi ĩġu marire. Mari ñeri dipuwaja crusague s̄rigũ, marire peamegue wabonirãre taugũ iimi. Eropa taugũ ĩġu yarã ĩġu iimi marire. Eropigũ mari ĩġu yarã wacũ pe curu mari árĩquerecũ ta yuju curu ta mama curu iimi marire. Eropigũ iribojegue mari game ĩhaturinirã árĩquerecũ ta marire crusague s̄ribasagũ bosadigũ árĩmi. Eropigũ judio masa doreri pehrecũ iimi ĩġu. Erã doreri

marire dūca wayoro pe curu majarā wacū. Eropigu yuju curu ta árīcū iimi pare. Eropigu Cristo Goāmū yarā árīcū iimi marire.

¹⁷ Eropigu marire bosagu arigu ōari buherire Goāmū mera ōaro árīburire weregu aridi árīmi. Mūa judio masa árībirā Goāmūre opabirā boje majarā árīnirā árīribū. Mūa eropa árīcū īagu mūare ōari buherire weregu aridi árīmi. Gūa judio masa sāre Goāmū yare oparā sāre weregu aridi árīmi. Eropigu árīpehrerāre marire bosagu aridi árīmi īgu.

¹⁸ Dohpaguere árīpehrerā gūa judio masa, mūa judio masa árībirā sā mari Pagū mera ōaro árīmasia mari. Espiritu Santo īgu itamuri mera Cristopū marire eropa árīcū iimi.

¹⁹ Eropirā dohpaguere mūa boje majarā árībeaa. Īgu ya curu majarā ta āhraa. Goāmū yarāre īhaturirā árībeaa. Goāmū yarā mera majarā āhraa pare.

²⁰ Goāmū yare weremuhtanirā iribojegue majarā īgu ya wereniguirire goja, masare weremūriñuma. Gūa sā īgu yare buhedore apinirā Jesucristo ya ōari buherire werea masare. Gūa árīpehrerā eropa werecū peerā Cristore umupeonūgabū mūa. Cristopū āhrimi mari árīpehrerāre īgu yarā árīcū iigu. Īgu eropa iibiricū mari īgu yarā árīmasibiriboya.

²¹ Eropigu īgu turari mera marire īgu yarāre yuju curu ta árīcū iimi īgu marire. Eropirā īgu turari mera ōarā wahaa mari. Mari eropa árīcū īagu īgu mari Opū ta mari mera āhrimi.

²² Eropirā Cristo yarā árīrā árīpehrerā gajirā mera īgu yarā mera yuju curu wahabū mūa sā. Mūa eropa wacū Goāmū īgu Espiritu Santo mūa mera āhrimi.

3

Judio masa árībirāre ōari buherire wereñumi Pablo

¹ Mūa judio masa árībirā eropa īgu ya curu majarā árīburire yū werera dipuwaja peresugue āhraa yūhū.

² Mūare judio masa árībirāre Jesucristo yare buhebure Goāmū yūre apimi. Yūre mojomoro īagu, yūre mahigu ōari buherire yūre weredoregu, yūre apimi. Irire peetuhabū mūa.

³ Iribojegue masa erā masibirirare Goāmū dohpaguere yūre masicū iimi. Ire merogā were mūare gojabeotuhabū.

⁴ Yū eropa gojabeorare buherā Cristo īgu yare yū masirare masirāca mūa sā.

⁵ Iri īgu wererare iribojegue majarāre īgu erā masipehocū iibiripū. Dohpaguepūre gūare Jesu īgu

apiniräre Goãmũ yare weremũhtarã säre irire masipehocũ iimi Goãmũ. Īgu Espírítu Santopũ gũare masicũ iibasami.

⁶ Ōpa ähraa ĩgu werera gajirã masibirira: Judio masa dihtare Goãmũ itamubeami. Judio masa árĩbirã säre ĩgu itamumi. Ōari buherire erã ðaro peecũ itamugucumi ĩgu eräre. Eropirã gũa judio masa, mũa judio masa árĩbirã mera yuju dũpũ iro dopa yuju curu ta ähraa mari. Eropirã mari árĩpehrerã Jesucristo yarã árĩrã yujuro mera Goãmũ ĩgu masare “Ōaro iigũra,” ĩgu arĩ werepirare oparãca mari.

⁷ Goãmũ mojomoro ĩagũ yäre mahigũ ire ðari buherire werebure yäre apimi. ĩgu masiri mera apimi ĩgu yäre.

⁸ Árĩpehrerã gajirã Jesucristo yarã erã doca árĩrã erã docague majagũ gohra ähraa yũhũ. Yũ eropa árĩquerecũ ta judio masa árĩbiräre ðari buherire werebure apimi Goãmũ yäre. Iri buheri Cristo ðatariagũ ĩgu árĩrĩre, ðatariari ĩgu oparire, ðaro ĩgu oburire werebure apimi yäre.

⁹ Yüre eropa apigũ Goãmũ “Ōpa masare taugũca,” arĩgũ, árĩpehrerã masare dohpã ĩgu itamuborore ðaro werepehobure apimi yäre ĩgu. Goãmũ árĩpehrerire ĩhacũnugudigũ ährimi. Iribojegue majaräre irire masare ĩgu tauborore masare werepehobirinipũ Goãmũ. Dohpague yäre iri ðari buherire weredoregũ apimi masare ĩgu ðaro tauborore masicũ iibu.

¹⁰ Eropirã iri buheri mera masa ĩgu yarã wahama. Erã eropa wacũ ĩha ÷maro majarã oparã anyua Goãmũ masipehogũ ĩgu árĩricũrĩre masima. Erã eropa masicũ gamepũ Goãmũ.

¹¹ Eropigũ i yeba árĩboro coregue ta “Masare peamegue waboniräre taugũra,” arĩtuhapũ Goãmũ. Eropa arĩdigũ árĩgũ dohpague mari Opũ Jesucristo ĩgu sĩriro mera ĩgu arĩdiro dopa ta marire taudĩ árĩmi.

¹² ĩgu eropa taucũ dohpaguere Cristore umupeorã ĩgu yarã wahaa mari. ĩgu yarã árĩrã gũiro mariro Goãmũ mera wereniguimasia mari. Eropirã gũibiricãque mũa.

¹³ Eropirã ðari buherire yũ wereri waja dohpaguere peregue árĩgũ yũ ñero taricũ ĩarã bujawerenijarã Goãmũ yare duhubiricãque. Ōari buherire yũ werecũ peerã Goãmũ yarã wahabũ mũa. Yũhũ eropiira dipuwaja peresugue ähraa. Eropa árĩgũ mũa ĩgu yarã árĩburire ñero tarigũ iiaa. Eropigũ turaro mucubiridorea mũare.

Cristo masare turaro mahimi, arĩ gojañumi Pablo

¹⁴ Eropigũ i árĩpehrerire mari Opũ Jesucristo Pagũ ĩgu ĩirare guñagũ mereja ĩgure serẽbasaa mũare.

15 Árĩpehrerã ĩgu yarã Pagu āhrimi. ĩgu árĩpehreri cururi majarã ĩgu yarã ĩgu pohroque árĩrã i yeba árĩrã sã erã Pagu āhrimi.

16 ĩgu masipehogu āhrimi. Turatarĩgu āhrimi. Eropĩgu ĩgure õpa serēbasaa mũare. Mũare sĩporã ĩgu masiri mera õaro turacũ iiboro dopa serēbasaa mũare. Eropĩgu Espĩritu Santo ĩgu itamuri mera eropa iigucumi.

17 Eropĩgu Cristore “Diaye iigu āhrimi,” mũa arĩ umupeonemoboro dopa ĩgu mũa mera õaro árĩboro dopa serēbasaa mũare. Eropĩgu gajirãre õaro mahirã mũa árĩboro dopa, Cristo ĩgu turaro mahirire mũa masiboro dopa serēbasaa mũare.

18-19 Mũa árĩpehrerã gajirã Goãmũ yarã mera “Cristo ĩgu marire turaro mahimi,” mũa arĩmasiborore serēbasaa mũare. ĩgu mari masare turaro mahĩgu āhrimi. ĩgu mahiri eropa õatariari árĩcũ mũa õaro masiboro dopa serēbasaa mũare. Eropĩgu ĩgu mahirire mũa masicũ gahmea Goãmũ mũa mera ĩgu õaro árĩboro dopa. Eropĩgu irire serēbasaa mũare Goãmure.

20 Eropirã Goãmure wũaro umupeori mera “ĩgu turagu āhrimi,” arĩrãca. ĩgu turari mera õarĩpũre gohrotomasimi ĩgu marire. Marire õarã árĩcũ iimasimi. Mari serẽra tauro iimasimi ĩgu. Mari gamerire, mari pepira tauro iimasimi ĩgu.

21 Jesucristo yarã mari árĩcũ ĩha Cristo ĩgu árĩricũri sãre ĩha árĩpehrerinre. Eropĩgu ĩgu mahirire mũa masicũ gahmea Goãmũ mũa mera ĩgu õaro árĩboro dopa. Eropĩgu irire serēbasaa mũarũri árĩpehrerã Goãmure umupeoporo. Eropa ta iiporo.

4

Cristo yarã árĩrã yuju curu ta āhraa mari, arĩ gojañumi Pablo

1 Mari Opũre yũ itamuri waja peresugue árĩgu mũare turaro werea yũhũ. Goãmũ ĩgu yarã árĩmorãre mũare beyerũ. Eropirã ĩgu beyenirã árĩrã ĩgu árĩdoreldiro dopa ta õarã árĩque mũa. Irire mũare werea yũhũ.

2 Őpa iirã õarã árĩque mũa: “Gajirãre masitarinũгаа yũhũ,” arĩ pepibircãque. Gajirãre õaro mera iique. Eropirã guabircãque. Mũa mera majarã mũare garĩboquerecũ ta erãre umupeori mera yuju diaye ĩacãque.

3 Eropirã Espĩritu Santo ĩgu itamuri mera õaro mera yujuro mera árĩnĩguique mũa. Eropirã gamequeãro mariro árĩcãque mũa.

4 Yuju dũpũ iro dopa yuju curu ta ãhraa mari. Eropigu Espĩritu Santo yujugũ ta ãhrimi marire. Eropigu Goãmũ ĩgu yarã árĩmorãre marire beyemũripũ marire itamubu. Eropirã ĩgu itamuborore masia mari. Iri mari masirañe yujuñe ta ãhraa.

5 Mari Opũ Cristo mari umupeogu yujugũ ta ãhrimi. ĩgu buheri sã yujuñe ta ãhraa. ĩgu yarãre waĩyeriñe sã yujuñe ta ãhraa.

6 Eropigu Goãmũ yujugũ ta ãhrimi. ĩgu árĩpehrerã Pagũ ãhrimi. Eropigu árĩpehrerã weca mari Opũ ãhrimi. Eropigu árĩpehrerãre marire itamumi ĩgu. Árĩpehrerã mari mera ãhrimi ĩgu. Eropigu árĩpehrerogue ãhrimi ĩgu.

7 Yuju curu mari árĩquerecũ ta árĩpehrerã marire yujurãyerire mari mohmemasiburire apidi árĩmi marire Cristo. ĩgu eropa apidiro dopa ta mohmemasia mari. ĩgu marire eropa apigu gajinore ĩgu eropa ocãbodiropã dopa ta apidi árĩmi ĩgu marire.

8 Eropã ta ãhraa Goãmũ yare erã gojarapũgue sã: Goãmũre ĩhaturirãre ĩgu tarinũgara pũhrũ ĩgu dipaturi mũria wagũcumĩ. Eropigu masare baja eropa ocãgũcumĩ, arĩ gojañuma iribojegue Jesucristo ĩgu eraboro coreguere.

9 Erã eropa arĩ gojarã õpa werediarã iiriñuma: Jesucristo umũsigue mũria wadigu árĩgu ĩgu ero coreguere dijarimũhtadigu árĩmi. I yebaguere dijaridigu árĩmi.

10 Eropigu ĩgu dijaridi mũria wadi ta árĩmi Goãmũ pohrogue. Árĩpehrero weca mũria wadi árĩmi ĩgu árĩpehrerogue árĩbu.

11 Eropigu ĩgu yarãre baja eropa ocãgu erã Goãmũ ya árĩburire mohmemasiburire apidigu árĩmi. Erã mohmemasiburire õpa apidigu árĩmi ĩgu yarãre. Yujurãyerire Cristo ĩgu buherare buhemorãre apidi árĩmi. Gajirãre Goãmũ yare weretaumorãre apidigu árĩmi. Õari buherire buhe curimorãre gajirãre apidi árĩmi. Cristo yarã gamenerã oparã árĩmorãre erãre õaro buhemorãre apidi árĩmi gajirãre.

12 Eropã dihta apidigu árĩmi marire gajirã ĩgu yarãre mari game itamuboro dopa. Eropã apidigu árĩmi marire ĩgu yarãre, ĩgure mari umupeonemoboro dopa, sĩporã turarã mari waboro dopa.

13 Eropirã mari árĩpehrerã õaro mera, yujuro mera árĩrãca. Eropã ta árĩro gahmea marire Cristore umupeorã árĩrãre. Eropirã mari árĩpehrerã Goãmũ magure Jesucristore õaro masirãca. Eropirã Cristo turagu, pee masigu ĩgu árĩro dopa ta, mari sã pee masia warãca.

14 Mari eropa warã majirãgã iro dopa árísome mari. Majirãgã iro dopa ta árĩrã õaro pee masinibeama dohpa. Eropirã gajirã gũyarã erãre buherã eracũ “I diaye ãhraa,” erã arĩcũ erã peema. Pũhrũ gajirã gajiropa árĩri buherire buherã eracũ erã sãre peema. Erã iro dopa árísome mari.

15 Eropa árĩbirã mari mera majarã mera game mahirã diaye ta wererire game wererãca mari. Eropirã majirãgã erã buga erã pee masirã erã waro dopa ta mari sã Goãmũ yare pee sĩporã turarã Goãmũ yare õaro masirã warãca. Cristo ãgũ árĩro dopa ta warãca. Ñgũ ãhrimi mari dipuru.

16 Ñgũ yarã árĩrã ãgũ dũpũ iro dopa yuju curu ta ãhraa mari. Mari bajarã árĩquererã ta yujuro mera õaro árĩrã iiaa. Mari eropa árĩborore Cristo itamumi. Eropirã mari yuju dũpũ iro dopa õaro gamesurirã mari õaro itamua gajirãre Cristo yarãre. Eropirã mari mera majarãre Cristo yarãre õaro mahirã, erãre õaro itamurã, turarã, Cristore umupeonemorã árĩrãca mari.

Cristo yarã warã mari ñerire duhu, õaripũre gohrotoa mari, arĩ gojañumi Pablo

17 Eropi mari Opũ Cristo ãgũ dorero mera õpa werea mũare. Goãmũre gamebirã gohra iiro dopa iibiricãque mũa. Erã, erã pepiripũ ñeri dihta ãhraa. Eropiro erã pepiri duhpiburi árĩbeaa.

18 Eropigũ watĩpũ Goãmũ yare erãre peebiricũ iimi. Eropirã Goãmũ yapũre peebirigohracãma. Peediabeama erã. Eropirã Goãmũ ãgũ õaro árĩdoreldiro dopa ta árĩbeama erã.

19 Eropirã erã ñerire iirã ne gũhyasĩribirigohracãma. Eropirã ne bujawerebeama. Ñerire erã ãaribejari dihtare iiniguicãma. Árĩpehreri ñerire erã iirire ne duhudiabirã iinemoniguicãma.

20-21 Mũarũ diaye ta ãgũ yare peerã mũa árĩcũ, Jesucristo yare õaro masirã mũa árĩcũ mũarũre erã ñero iiro dopa iidorebeami Goãmũ.

22 Iribojegue ñerire iiniguicãrã mũa árĩcũ iri ñeripũ mũare goroweoro iidiro árĩbũ. Iri ñeri iiri mera mucubiridiaquererã ta ne mucubirimasibirimũribũ mũa. Eropirã “Iribojegue mũa árĩrãre duhucãque,” yũ mũare arĩ buhecũ peebũ mũa.

23 Eropirã mũa pepiripũre õaripũre gohroto gahmea mũare.

24 Ero core mũa ñero iirare duhucãque. Eropirã õaripũre gohrotonirã árĩque mũa. Goãmũ ãgũ õagũ árĩldiro dopa mũare õarã árĩcũ iimi. ãgũ eropa iinirã árĩrã õarire iiniguicãrãca. Eropirã ñerire gamebirãca.

25 Mari yuju dɔpɔ iro dopa yuju curu majarã ta árĩrã iiaa. Eropirã mɔa basi ɔuyabita. Mɔa mera majarãre diaye wereque ɔuyaro mariro.

26 Gajirã mera guarã, erãre ñero iibiricãque. Mata irinɔ ta amucãque gua wajaro mariro.

27 Yoari boje guarã watĩ ĩɔu gamero dopa iirã iiaa. Eropa iibiricãque.

28 Gajirã mɔa mera majarã Jesu yarã erã árĩboro core yajari masa árĩnirã árĩñorã. Dipaturi yajabiricãporo. Eropirã dohpaguere ðaro mohmeporo. Mojomorocurãre oburire mohmeporo.

29 Ne ñero wereniguibiricãque. Óarire wereniguirã gajirãre itamua mɔa. Erã bujawererã erã árĩcũ ĩarã eropa ta mucubiricũ iicãque erãre. Eropirã ðari dihtare wereniguique.

30 Ñerire iirã Espĩritu Santore bujawerecũ iirã iiaa mɔa. Eropa iibiricãque. Dohpaguere ne i umɔ pehrerinɔ core, Cristo marire ĩɔu aĩgãboro core, Espĩritu Santo marire ĩhadibumi. Ñerire mari iibiriboro dopa ĩhadibumi. Eropigu Cristo yarã mari árĩrire masicũ iimi ĩɔu marire. Eropirã ĩɔure bujawerecũ iibiricãque mɔa.

31 Eropirã ne papũriniguibiricãque. Guanemobiricãque. Game dɔyasonemobiricãque. Erãre ñero arĩ gaguiniguibiricãque. Gajirãre quere moanemobiricãque. Gajirãre ĩhaturinemobiricãque.

32 Eropi mɔa mera majarãre ðaro mera ðaro iique. Cristo yarã mɔa árĩcũ ĩagɔ mɔa ñerare cãdijicãmi Goãmɔ. Eropa ta mɔa sã gajirã mɔare erã ñero iicũ ĩarã erã ñerire cãdijicãque.

5

Goãmɔ porãre ðpa árĩro gahmea, arĩ wereñumi Pablo

1 Eropirã Goãmɔ porã ĩɔu mahirã árĩrã ĩɔure ĩhacũque mɔa.

2 Eropirã gajirãre mahi umupeoniguicãque. Cristo marire mahigu, mari ñeri iira waja sĩripɔ. Eropa sĩrigɔ Goãmure mucubiricũ iipɔ ĩɔu. Eropirã marire ĩɔu mahidiro dopa ta mɔa sã gajirãre game mahique.

3 Eropirã Goãmɔ yarã árĩrã ne nome mera ñero iibiricãque. Nome sã umɔ mera ñero iibiricãque. Gaji ñerire eropa árĩrire ne iibiricãque. Gajinore gametaribiricãque. Ne eropa iibiricãro gahmea Goãmɔ yarã árĩrãre.

4 Eropirã ɔuhyasĩuro wereniguibiricãro gahmea mɔare. Pee masibirã iro dopa wereniguibiricãro gahmea mɔare. Eropirã ñero arĩ wereyabiricãro gahmea. Ipure iiro

gahmea mũare: Goãmure serẽro gahmea mũare. Eropa serẽrã ãgure, "Õaro iibũ mũũ guare," arĩro gahmea.

⁵ Gajinore gametarĩrã goãmarã wéanirãre erã umupeoro dopa iirã iiaa mari irire. Eropirã nome mera ñero iirã, ñeri dihtare pepirã, gajinore gametarinũgarã Goãmũ Cristo mera ãgu opu arĩroguere ne wasome erã. Irire õaro masia mari.

⁶ Õpa iirãre erã iira dipuwaja, turaro dipuwaja moagucumi ãgure tarinũganirãre. Eropirã gajirã mũare gajiropa arĩmaacãcũ erã guyarire peebiricãque.

⁷ Eropirã eropa ñerire iiniguicãrãre wapicubiricãque.

⁸ Cristo yarã mũa arĩboro core mũa sã eropa ta iinirã arĩribũ. Dohpaguepũre ãgu yarã arĩrã, Goãmure õaro masia mũa. Goãmũ yarã õarire iima. Eropirã eropa ta iiro gahmea mũare.

⁹ Eropirã Cristo yarã arĩrã õarire, Goãmũ gamerire, diaye maja arĩrãre iirãca mũa.

¹⁰ Õarire mari iicũ ãagu mari Opu Cristo mucubirimi. Eropa õarire iiburire õaro masique mũa. Eropa masirã irire iique.

¹¹ Cristore gamebirã ñeri erã iimaacãri ñeri gohra ãhraa. Eropa erã iiro dopa ta mũapũ iibiricãque. Õari buherire Cristo yare wereque erãre. Eropirã erã ñeri iirare erãre masicũ iique.

¹² Masa erã ãabiro erã ñero iicorema. Erã eropa iirare mari wereniguirã guhyasĩriboca. Eropirã ñetariaro iirã iima erã.

¹³ Eropirã erãre õari buherire mari wererã, ñetariarã erã arĩricũrãre erãre masicũ iirã iiaa mari. Erã ñeri iirire erãre masicũ mari iicũ erã ñeri iirire bujawerebocoma. Eropirã õaripũre gohrotobocoma.

¹⁴ Iri diaye ta ãhraa. Eropirã õpa wereñorã Goãmũ yare wererã:

Ne, yũre peediabirã, yũre peeque. Mũa ñero iirare bujawereque. Irire ñero iirire duhuque. Eropigu Cristo mũa ñeri iirire masicũ iigu, mũare õarire masicũ iigucumi, arĩñorã.

¹⁵ Eropirã mũari nũcũ õaro iique mũa. Pee masibirã iro dopa arĩbiricãque. Pee masirã arĩque.

¹⁶ Dohpague majarã masa ñetariaro iiniguima. Eropirã mũapũ õarire, Cristo yare mũa iiniguirã mata erã Cristo yarã arĩcũ itamuque.

¹⁷ Eropirã pee masibirã arĩbiricãque. Goãmũ ãgu gamerore õaro masique. Eropirã irire iique.

18 Eropirã ne merebircãque. Mererã erã basi ñero goroweoma. Eropirã merediabirã, Espiritu Santopure burigã gameque. Igure ðaro yãhrirã áríque.

19 Eropirã mũa basi Goãmure umupeori bayarire game bayaque. Eropirã Salmo gojaripũre, Goãmũ yare bayarire, gaji igure umupeori bayari sãre igure bayapeoque. Õaro guña umupeori mera bayapeoque. Eropirã mari Opure "Õagũ áhrimi," arĩ ðaro umupeoque.

20 Goãmũ mari Pagũ árĩpehrerire mũare igũ ðaro iirire guñaniguicãque mucubiriri mera. Mari Opũ Jesu yarã árĩrã igure "Õhaa," arĩniguicãque mũa.

Mũa yuju wihi majarã Jesu yarã árĩrã, ðpa iique, arĩ wereñumi Pablo

21 Mũa mera majarãre game umupeo yãhrique. Mũa eropa game umupeo yãhrirã Cristo sãre umupeo yãhrirãca.

22 Mũa marasã nomere weregũra dohpaguere. Mari Opure Cristore mari yãhriro dopa ta mũa marapũ sũmarãre ðaro yãhrique.

23 Jesucristo marire taudigu arĩmi igũ ya curu majarã mari árĩboro dopa. Eropirã mari igũ ya curu majarã árĩcũ mari Opũ igũ árĩro dopa ta mũa marapũ sũmarã mũa marasã nomere weca oparã áhrima.

24 Eropirã Cristo yarã árĩrã igure yãhria. Eropirã mari Cristore yãhriro dopa ta mũa marapũcũrã nome mũa marapũ sũmarãre ðaro yãhrirã nome arĩque.

25 Mũa marapũ sũmarã sãre weregũra dohpaguere. Cristo marire igũ yarãre mahigũ mari ya árĩburire sĩridigũ arĩmi. Eropirã marire igũ mahidiro dopa mũa sã mũa marasã nomere eropa mahiniguicãque.

26 Cristo marire igũ yarã árĩcũ iibu sĩripũ mari ñeri marirã árĩcũ iibu. Eropigũ mari ñerire coeweadĩ arĩmi igũ werenigũiri mera deco mera igũ waĩyeri mera.

27 Eropa coeweadĩ arĩmi igũ marire igũ yarã ðarã árĩmorãre iigũ. Igũ eropiicũ ñeri dipuwaja marirã árĩrãca igũ iacũ. Ne merogã eropa árĩri ñeri árĩsome marire. Eropirã ðarã Cristo iro dopa árĩrãca.

28 Eropirã mũa marasã nomere mahi umupeorã, mũ basi mũ dũpũre mũ umupeoro dopa ta mũa mũ marapũre umupeoque. Igũ marapũre umupeogũ igũ basi umupeogũ iimi.

29-30 Ne mari dũpũre ñero wacũ gamebeaa mari. Mari basi mari ya dũpũre ihadibua. Cristo yarã árĩrã igũ dũpũ iro dopa áhraa. Eropigũ marire igũ ðaro ihadibumi. Eropirã Cristo marire igũ ðaro iidiro dopa ta mari sã mari

dɔpɔre ɔaro iiaa. Mari marasã nome sãre eropa ta ɔaro iiro gahmea marire.

³¹ Eropa ta ãhraa Goãmɔ yare erã gojarapũgue: Ɔpa gojara ãhraa: “Eropi ɔmɔ ãgu pagɔ sɔmarãre wirigu, ãgu marapo mera áricãgɔcumi. Eropirã erã perã áriquererã ta yuju dɔpɔ iro dopa árirãcoma,” arĩ gojañumi iribojegue.

³² I gojarare ɔaro peebirinirã árima. Eropigu irire ɔaro weregura mɔare. Ɔpa werero iica: Cristo ãgu yarã mera yuju dɔpɔ iro dopa ta yuju curu ta ãhrima.

³³ Eropigu mɔare ɔpa arĩ werenemogura daja: Mɔ basi mɔ mahiro dopa ta mɔ marapo sãre mahi umupeoque. Eropirã nomepɔ mɔa marapɔ sɔmarãre ɔaro gɔhyadiaro mera umupeoque mɔa.

6

¹ Dohpaguere majirãre weregura: Mari Opɔ Cristo yarã árirã mɔa pagɔ sɔmarãre ɔaro yɔhrirã árique. Mɔa eropiirã ɔaro iirã iiaa.

²⁻³ Ɔpa arĩñumi Goãmɔ doregɔ: “Mɔa pagɔ sɔmarãre ɔaro umupeoque,” arĩ doreñumi ãgu. I doreriñe mera Goãmɔ werenemoñumi. Ɔpa arĩñumi: “Mɔa pagɔ sɔmarãre umupeorã i yebaguere yoari boje mucubiriri mera árirãca mɔa,” arĩ wereñumi. Eropa arigu iñe doreriñe mera, “Mɔa eropa iirã ɔaro árirãca,” arĩ weremɔhtañumi Goãmɔ. Eropirã ãgu arĩdiro dopa mɔa pagɔ sɔmarãre umupeoque mɔa.

⁴ Dohpaguere erã pagɔ sɔmarãre weregura. Mɔa porãre eropa turiniguibiricãque guacũ iiri arĩrã. Mari Opɔ Cristo ãgu mahiri mera ãgu itamuri mera erãre ɔaro mera masuque. Eropirã erãre masurã ɔaro wereque.

⁵ Dohpaguere pohro majarãre weregura. Gɔhyadiaro mera umupeori mera i yeba majarãre mɔa oparãre ɔaro yɔhrirã árique. Gɔyaro mariro ɔaro yɔhrirã árique. Cristore mɔa yɔhribodiro dopa ta yɔhrique erãre mɔa.

⁶ Erã ihuro dihtare yɔhrirã áribiricãque yure ihasaporo arĩrã. Erã ihurore mɔa yɔhriro dopa ta erã ãbiro sãre ɔaro iirã árique. Cristo ãgu pohro majarã mɔa áribodiro dopa ta mɔa oparã sãre eropa yɔhriniguicãque. Eropirã Goãmɔ ãgu gamero dopa ta ɔaro mucubiriri mera mɔa oparãre ɔaro yɔhrirã árique.

⁷ Eropirã “Cristopɔre yɔhrirã iiaa,” arĩ pepirã mucubiriri mera yɔhrique mɔa oparãre.

⁸ Eropirã ire guñaque: Áripeherrerã mari áripehერი ɔarire mari iicũ ãagu Goãmɔ ɔaro iigɔcumi marire. Pohro majarãre, pohro majarã áribirã sãre ɔaro iigɔcumi ãgu.

⁹ Eropigũ oparã sãre weregura: Mũa pohro majarãre õaro iique. Erãre õaro yũ iidoreldiro dopa ta iique erãre õaro. Őpa masique. Őmũsi majagũ Goãmũ diaye ta erã opu ãhrimi. Mũa yagũ opu ãhrimi igũ. Eropirã mũa árĩpehrerã igũ pohro majarã dihta ãhrraa. Eropigũ igũ yujuropa ihami mũare árĩpehrerãre. Eropirã turibiricãque mũa pohro majarãre.

Cristo yarã watĩre erã cãhmotarire wereñumi Pablo

¹⁰ Őpa weretugura mũare. Őaro guñaturarã árĩque mũa. Mari Opu Cristo mũa mera ãhrimi. Eropirã igũ ya turari mera guñaturarã árĩque.

¹¹ Watĩ marire igũ pepiri mera guyagũ ñero iidoremi marire. Mari Jesucristore umupeorire goroweodiami. Goãmũpu marire cãhmotami ñerire mari iibiriboro dopa. Marire igũ cãhmotaro surara igũ cãhmotari suhriro come suhriro iro dopa ãhrraa. Eropirã iri suhri mera erã cãhmotaro dopa ta Goãmũ igũ yare iirã cãhmotaque watĩ igũ ñero iidorerire.

¹² Jesu yarã mari árĩcũ marire goroweodiarã masa gohra árĩbeama. Erã bajarã umaro majarã, ñerã, turarã, oparã erãpu ãhrima. Watĩ igũ mera majarã mera i umũ majarãre Jesucristo yarã árĩbirãre dorema erã. Eropirã erã mari Jesucristo yarã árĩcũ marire goroweodiana.

¹³ Eropirã erã marire goroweobiricũ dohpaguere Goãmũ yare opapehoque mũa cãhmotaborore. Eropirã watĩ mũare ñero goroweodiacũ, mũare igũ ñero iidorecũ igũre cãhmotarãca. Eropirã tarinũgarãca. Eropa igũre tarinũgarã, turarã dujarãca mũa.

¹⁴⁻¹⁷ Eropirã turarã árĩque Goãmũ ya mera. Surara gamewejẽrã warã erã come suhri sañarã erã dupure õaro cãhmotama. Erã coretihbi cãhmotama erã come suhriro sañarã. Come zapatu sañama. Erã diapore cãhmotama comese mera. Come sãpea peyama. Ñoserimijire opama erã cãhmotaboro dopa. Erã surara cãhmotaro dopa ta mũa watĩre õaro cãhmotapehoborore õpa Goãmũ yare iique. Diaye majare Goãmũ yare õaro peeque. Eropirã Goãmũ gamero dopa õarire iiniguicãque mũa watĩre cãhmotamorã. Jesucristo ya õari buherire peerã õaro ãhrraa. Eropirã iri õari buherire õaro wererã waque gajirãre. Watĩ mũare ñero iidorediarimi. Eropirã igũre cãhmotamorã Jesucristore "Diaye iigũ ãhrimi," arĩ umupeoniguicãque. Cristopũ marire peamegue wabonirãre taumi. Mũa igũ taunirã árĩrã watĩ ñero iidorerire yuhribiricãque. Eropirã watĩre tarinũgamorã Goãmũ yare õaro masique mũa Espĩritu Santo igũ itamuri mera.

18 Eropirã mũa watĩre cãhmotarã Goãmũre eropa umuri nũcu serẽniguicãque. Espĩritu Santo ĩgu itamuri mera serẽniguicque. Eropirã õaro guña masique. Eropa serẽrã gariborebircãque. Árĩpehrerã Goãmũ yarãre eropa serẽbasaniguicãque.

19 Eropirã yũ sãre serẽbasaque Goãmũre. Õpa arĩ serẽbasaque: Õari buherire iribojegue masa erã õaro masibirirare õaro erãre masicũ yũ iiborore serẽbasaque. Eropirã gũiro mariro yũ wereboro dopa serẽbasaque yũre.

20 Cristo ĩgu yare weredoregu yũre obeomi. Yũ eropa werera waja peresugue ãhrraa dohpaguere. Yũhũ ohõ árĩqueregu ta gũiro mariro ĩgu yare yũ wereboro dopa serẽbasaque yũre. ĩgu yare werebu árĩgu tiiaa.

Pablo õadoretuñumi

21 Tĩquico yũ mera majagu mũa pohrogue ejagu yũ árĩricũrire mũare werepehogũcumi. ĩgu mari acaweregu mari mahigu ãhrimi. Eropigu mari Opũ yare õaro itamugu eropa árĩniguicãmi.

22 Gũa árĩricũrire mũare weredoregu ĩgũre obeogu iiaa mũa pohrogue mũa õaro mucubiriboro dopa.

23 Goãmũ mari Pagũ mari Opũ Jesucristo mera mũare árĩpehrerãre gũa acawererãre õadorea. Cristore mũa õaro umupeori mera mũa game mahiboro dopa Goãmũre serẽbasaa mũare.

24 Árĩpehrerã mari Opũ Jesucristore eropa mahiniguicãrãre Goãmũ mera õadorea. Eropa ta árĩniguicãporo. Iripẽta ãhrraa.

Filipenses

Peresugue árĩgũ ipũre gojabeopũ Pablo

¹ Gũa Pablo Timoteo mera Jesucristo pohro majarã ãhraa. Eropirã árĩpehrerãre mũare ðarãre Jesucristo yarãre Filipino majarãre gojabeoa gũa. Mũa oparã sãre mũare itamurã sãre gojaa.

² Eropirã Goãmũ mari Pagũ mari Opũ Jesucristo mera mũare ðadoreã. Ĩgũ itamuri mera ðaro árĩque mũa.

Pablo Jesu yarãre Goãmũre serẽbasapũ

³⁻⁶ Goãmũ mũare ðaripũre gohrotocũ iigũ iimi. Eropigũ mũare ĩgũ iinũgadiro dopa ta ii ojogorocũgũcumi. Eropirã Jesucristo i yebaguere ĩgũ eracũguere ñeri marirã árĩrãca mũa. Negohraguere Jesu yarã mũa wara pũhrũ, dohpague sãre itamua mũa yũre ðari buherire yũ buhecũ. Mũa eropa iirã árĩcũ Goãmũre “Õhaa,” arãa yũhũ. Mũare guñagũ ðpa dihta arãa yũhũ. Mũare Goãmũre serẽbasagũ mucubiriri mera serẽbasaa.

⁷ Eropigũ mũare yũ ðaro mera eropa pepicũ ðapũrica. Õari buherire “Diaye ta ãhraa,” oparãre yũ arĩtarinũgacũ mũa yũre itamubũ. Iri buherire diaye ta iri árĩrĩre masare yũ wercũ itamubũ mũa. Peresu yũ árĩcũ sãre itamubũ. Eropa mũa itamucũ mari yujuro mera Goãmũ itamurire opaã. Eropigũ yũ sĩporã mera turaro mahia yũhũ mũare.

⁸ Jesucristo ĩgũ mahiri mera burigã mũare guñaã yũhũ. Yũ eropa guñacũ Goãmũ irire masimi.

⁹ Mũare ðpa arĩ serẽbasaa yũhũ Goãmũre. Goãmũ yare ðaro masiri mera ðaro pee masipehori mera Goãmũre masa sãre mũa mahinemoburire serẽbasaa yũhũ Goãmũre.

¹⁰ Õarire mũa masiburi sãre serẽbasaa mũare. Mũa eropa masirã Cristo i yebague ĩgũ dujaricũ ðarire iinirã árĩrã, dipuwaja marirãca mũa.

¹¹ Eropa ðarire iirã Goãmũ gamerire iirãca mũa. Eropa iimorã wacũ iigũcumi Jesucristopũ mũare. “Goãmũ ðagũ, turagũ ãhrimi,” árĩpehrerã ĩgũre erã arĩ umupeoburire ĩgũ gamerire mũa iicũ iigũcumi mũare.

Pablo Jesucristo yagũ ĩgũ warare werepũ

¹² Yũ acawererã, ire mũa masicũ gahmeã. Yũ dohpague peresu yũ árĩquerecũ ta ðari buheripũ eropa mũhtaniguicãa.

13 Eropigu Cristo yagu yu áriri waja peresu yu warare masipehrema opu ya wihi majarã surara. Árìpehrerã gajirã sã òre irire masima.

14 Eropirã peresu yu árìcũ ìarã, bajarã mari acawererã Jesu yarã mari Opure Jesure umupeonemoma. Eropa umupeorã güiro mariro òari buherire gajirãre buhema erã.

15 Yujurãyeri Cristo yare buhebonirã árìquererã yure ìhaturima. Cristo yare buherã erãpure masa ìhasuacũ gahmema. Gajirãpu òaro mera Cristo yare buhema.

16-17 Òari buherire yu werenigui turaburire Goãmu yure ìgu apirare òaro masima. Oãpu eropa masirã yure umupeorã Cristo yare buhema. Gajirãpu yure ìhaturirã masare erãpure ìhasuacũ gamerã Cristo yare buheama. Eropirã yu peresu árìcũ erã yure bujawerecũ iidiaa.

18 Òaroca. Cristo yare ta buherã iima. Erã yure umupeobiriquererã Cristo yare buhema. Gajirãpu òari mera buhema. Árìpehrerã erã ìgu yare buhecũ mucubiria.

19 Eropigu mucubiriniguicãgũca yũhũ. Goãmure mua yure serêbasara mera, Jesucristo ìgu Espiritu Santo itamuri mera Goãmu yure òaro taricũ itamugacumi. Irire masia.

20 Òpa ta burigã iidiaa yũhũ dohpa. Ne yu iirare ñero pepidiabeaa. Ñero pepibigu árìgu doyarò mariro árìgupu masare Cristore òaro umupeocũ burigã iidiaa. Òmuri nũcu yu iidiro dopa ta dohpague sãre erã Cristore "Òagu, turagu àhrimi," erãre arì umupeocũ iidiaa. Ojocarigu gohra eropa ta iidiaa. Erã yure wejediaquerecũ ta eropa ta iidiaa.

21 Ojocarinigugu gohra Cristo yare iiniguica dohpa. Siringue tamera ojocarirã tauro òaro dujagũca yũhũ.

22 Ojocarinigugu Cristo yare yu inemoboro dopa ojocarinigucãdiaca. Eropa iidiaqueregu ta siri sãre gahmea. ¿Dipure yu gamebocuri? Masibirica yũhũ.

23 Yu òpa arì wereniguicã masisũya mara yure. Cristo mera burigã árìdiaa. Eropigu dohpaguere ìgu pohroguere wadiaca. Ojocariri tauro siri ripu òatarinugacãroca.

24 Eropa árìquerecũ ta mure yu itamuboro dopa ojocarinemoro gahmea yure.

25 Irire masigu ohõ mua mera yu árìborore masia yũhũ. Eropa árìniguicãgũca yũhũ mua Cristore umupeonemoboro dopa, iri umupeoturari mera mua mucubiriborore.

26 I yebague árìnigu mua pohroguere dipaturi yu wacũ mua mucubirirãca. Eropa yũhũ mua pohro ejacũ Cristo Jesu yure ìgu itamurire masirã, "Turagu àhrimi ìgu," arì umupeorãca mua ìgure.

²⁷ Dohpaguere i dihtare iique. Cristo ya buheri iri arĩro dopa ta árĩricuque mua. Guñaturarã árĩque. Eropirã game dũca wariro mariro õari buherire yujuro mera burigã buheque. Eropa ta yu mua pohro wabiricũ sãre yu wacũ sãre mua eropa iicũ gahmea. Eropa mua yujuro mera árĩrã árĩcũ peebeodiaa yuhũ.

²⁸ Mũare ìhaturirãre gũibiricãque. Mua eropa gũibiricũ ìarã Goãmũ yarã mua árĩcũ masirãcoma erã. Eropa masirã erã peamegue waboro sãre masirãcoma. Eropirã Goãmũ ìgu tauboro sãre masirãcoma. Õpa ta masicũ iimi Goãmũ masare.

²⁹ Cristore mua umupeobure Goãmũ apidi árĩmi. I sãre apidi árĩmi. "Cristo yare mua werera waja ñero tarirãca," arĩ apidi árĩmi Goãmũ mũare.

³⁰ Eropirã Cristo yarã mua árĩri waja gajirã mũare ñero iima. Mũare erã iidiro dopa ta yu sãre ñero iima erã. Mua mera yu árĩcũ yure erã eropiicũ ìabu. Dohpague sãre erã yure eropiicũ pee waĩcua mua. Eropirã mari yujuropa ta ñero tarĩa.

2

Cristo bu árĩgu iro dopa eradigu árĩpehrerã weca opu arĩbu wapu, arĩ gojañumi Pablo

¹⁻² Cristo mũare õaro sĩporãcũcũ iinirã, Cristo ìgu mahiri mera mua mucubirirã, yũpũre õaro mucubiricũ iique. Eropirã Espĩritu Santo árĩpehrerã mua mera ìgu árĩcũ gajirãre mahirã, mojomoro ìarã árĩrã, yure õaro mucubiricũ iique mua. Ire mua iicũ mucubirigũca. Yujuropa ta õaro sĩporãcũque mua. Eropirã mua basi game mahique. Õari mera árĩricũque. Eropirã árĩpehrerã yuju diaye õaro árĩque.

³ Gajirãre tarinũgadiarã árĩbiricãque. Eropirã eropa ta pepi árĩcãque. Eropirã gajirãre õaro umupeo õpa arĩ pepique: "Erãpu yu tauro õarã àhrima," arĩ pepique.

⁴ Gajigu gajirãre itamudiabiribocumi. ìgu iro dopa iibiricãque. Gajirã sãre itamuque.

⁵ Jesucristo ìgu eropa pepicãdiro dopa ta mua sã eropa ta pepicãque.

⁶ Ìgupu Goãmũ gohra árĩqueregu ta "Goãmũ yu árĩrire ne duhosome yuhũ," arĩbiripu ìgu.

⁷ Eropigu ìgu Goãmũ ìgu árĩrare duhu, masu ta masa dehyoadigu pohro majagu iro dopa árĩnũgapu i yebaguere.

⁸ Eropigu ìgu masu dũpũcũgu bu árĩgu gohra árĩnũgapu. Eropa árĩnũgagu "Crusague wejẽque ìgure," erã arĩcũ ìgu

Goãmure yuhriḡu tarinugabiripũ. Crusague ta ḡuhyasĩuro mera sĩribu árĩquereḡu ta ĩḡu tarinugabiripũ ĩḡu Pagure.

⁹ Eropiḡu ĩḡu eropiicũ ĩha mari Pagũ árĩpehrerã masa erã umupeobure apipũ Jesure. Eropiḡu árĩpehrerã gajirã weca opu acupũ Goãmũ ĩḡure.

¹⁰ Eropirã árĩpehrerã umaro majarã, i yeba majarã, sĩrinirã mura sã Jesu waĩre peerã erã mereja muju ĩḡure umupeorãcoma pare.

¹¹ Eropa ĩḡure opu acugucumi mari Pagũ árĩpehrerã Jesucristore “Mari Opu ãhrimi,” erã arĩbure. Eropa arĩrã mari Pagũ Goãmure umupeorãcoma.

Cristo yarã ðarire wererã masare masicũ iima

¹² Eropirã, yu mahirã, mua mera yu árĩcũ mua yuhridiro dopa ta, dohpaguere yu yoarogue árĩcũ sãre ðaro yuhrique yure. Eropirã peamegue wabonirã mua Goãmũ taunirã árĩrã Cristo ĩḡu itamuro mera ĩḡu gamero dopa ii purumujuque. Eropirã umupeori mera biraro mariro Goãmũ yare iique.

¹³ Goãmũ ðaripure muare gamecũ iigu iimi. ĩḡu eropa gamero dopa ta mua iiborore iimi. Eropiḡu irire mua ĩḡu yare ðaro iiborore itamuniguicãmi Goãmũ. ĩḡu eropa iicũ irire yu arĩdiro dopa ta iique mua.

¹⁴ Árĩpehrerire iirã turiro mariro, mua basi gajinore werericuro mariro iique.

¹⁵ Eropiique mua ñeri dipuwaja marirã, ñerire iibirã Goãmũ porã ðaro mua árĩmorã. Eropiique mua masa ḡuyarã, ñerã watopere goroweoro mariro mua árĩmorã. Erã ñerã watope mua árĩrã ðari buherire buherã masicũ iiaa mua i yeba majarãre.

¹⁶ Iri buherire mua peeñanirã Goãmũ mera eropa árĩniguimorã wabu mua. Iri buherire i yeba majarãpũre mua eropa buhecũ ĩagũ mua mera mucubirigũca yuhũ. Eropiḡu yu muare buherare ḡuñagũ, “Bu gohra ta muare buhebiriya yuhũ,” arĩḡũca yuhũ. Eropiḡu Cristo ĩḡu i yeba ĩḡu dujaricũ mua mera mucubirigũca yuhũ. Eropiḡu ḡuhyasĩuro tarisome yuhũ.

¹⁷ Cristore mua umupeoturacũ Goãmũ muare ĩhasuagucumi. ĩḡu eropa ĩhasuacũ ĩagũ muare Cristo yare yu buheri waja yure erã wejẽdiaquerecũ ta mucubirigũra. Eropirã mari árĩpehrerã yujuropa ta mucubirirãca.

¹⁸ Eropa ta mua sãre yu mera mucubiriro gahmea pũhru yu sĩricũ ĩarã.

Timoteore, Epafrodito sãre werepu Pablo

19 Mari Opu Jesu İgu gamecũ vojaro mera Timoteore mua pohrogue obeodiaa yuhu mua arĩricũre masibu. Eropa masiguge ta mucubirigũca.

20 İgu Timoteo mua oaro arĩborore diaye ta burigã guñami muare. Gajigu İgu iro dopa ta arĩgu marimi yure.

21 Gajirãpu arĩpehrerã erã gameri dihtare iidia, Jesucristo İgu gameripure iidiabeama.

22 Timoteopu İgu oaro iirire masia mua. Yu magu iro dopa ta arĩgu İgu yu mera oari buherire weremurimi. Eropirã gu yujuropa ta Cristo yare buhemurabu.

23 Eropigu o majarã oparã yure erã duhpiburire masira puhru, Timoteore mua pohrogue obeodiaraa.

24 Eropigu mari Opu Jesu İgu itamuri mera vojaro mera yu sã mua pohrogue waguca.

25-26 Yure itamudorerã mua Epafroditore obeoabu yu pohrogue. İgu yu acaweregũ, yu mera mohmegũ, yu wapi, Goãmu yare buheturagu ahrimi. İgu muare turaro guñabeomi. Eropigu İgu dorecurare mua peecũ masigu İgupũ "Erã yure guña bujawerecoma," arĩ guñaricũmi. Eropa İgu wũaro guñaricũcũ İagu İgure mua pohrogue omedujuro gahmea yure, arĩ pepia yuhu dohpaguere.

27 Arĩro ta İgu turaro dorecũami. Mero siribocuri tariami İgu. İgu eropa dorecũquerecũ ta, Goãmu İgure mojomoro İagu taricũ iiami. İgu siricũ yupu burigã bujawereboaya. Eropigu yu sare Goãmu mojomoro İami İgure taricũ iigu.

28 Eropigu dohpague tamerare vojaro mera İgure mua pohrogue obeodiaa dipaturi mua İgure İha sĩajaboro dopa. Mua eropa mucubiricũ peegu yu sã mucubirigũra.

29 Eropirã İgure Epafroditore mari Opu yagure oaro mucubiriri mera bocatĩrique. Eropirã gajirãre İgu iro dopa arĩrãre umupeoque.

30 İgu Cristo yare itamudiagu sirirami. Murpu yure itamumasibiricũ İgupũ yure itamubasamurami. Eropigu dorecu sirirami İgu.

3

Ōaro arĩri gohrare wereñumi Pablo

1 Dohpague tamerare ire weregũra. Mari Opu mera mucubirique. I buherire ero coregue yu wererare dipaturi opa arĩ gojabeogu mucubiria yuhu. Eropigu ire werenemogu itamugu iiaa muare.

2 Gorowerebirã ta arĩque mua. Ñerire iiniguicãrã, diayea iro dopa ta arĩrã, ñerã, gasiro merogã wiri aĩdorerã mua

ya dupure wiridiana. Eropa iidorerã áricũ ñha “Queoro buheri árĩbeaa,” arĩrã ðaro iique mua.

³ Erã circuncisión gasiro merogã aĩdorediarã “Deyoro maja mera Goãmure umupeocũ õhaa,” arĩrima. Maripũ eropa arĩbeaa. Espiritu Santo ñgũ itamuri mera diaye ta Goãmure umupeoa mari. Mari deyoro maja iiri mera mucubiribea. Jesu yarã mari arĩri mera mucubiria mari.

⁴ Eropa mucubiriquerẽgũ ta, yũ iirare erã iro dopa arĩdiagũ, erãre docapicãboya yũ sã. Gajigũ õpa ta arĩ tarinũgacãdiami. Yũpũ ñgũ tauro eropa árĩboaya.

⁵ Õpa iigũ árĩribũ yũhũ: Ocho nũri yũ masa dehyoara pũhrũ gasiro merogã wiri aĩnirã árĩma yũre. Israe masũ árĩgũ Benjami ya curu majagũ ãhraa yũhũ. Yũ pagũ sũmarã hebreo masa erã áricũ diaye ta hebreo masũ gohra ta masa dehyoabũ. Moise dorerire diaye ta iipehodiagu fariseo curu mera ñajaribũ yũhũ.

⁶ “Goãmũ ya árĩsaca,” arĩgũ ðaro iiribũ yũhũ. Eropigũ Jesu yarãpũre ñero iimũricarabũ yũhũ. Diaye ta Moise dorerire iigũ irire tarinũgaro mariro iipehomũriribũ yũhũ.

⁷ Iribojeguere “Iri ðari árĩsaca,” arĩ pepimũriribũ. “Iri yũ eropa arĩ pepira iribojegue yũ eropa árĩra duhpiburi árĩbirigohracãdiro árĩbũ,” arĩ pepia dohpaguere. Õpa ta arĩ pepinũgabũ yũhũ Cristore umupeonũgagũ.

⁸ Jesucristo yũ Opũre yũ masicũ tamerare õataria. Eropigũ gaji doreripũre duhpiburi árĩbeaa, arĩ pepia yũhũ. Iri árĩpehrerire cóãcãbũ Cristo yapũre iibu. Eropigũ iribojegue yũ iirare cóãgũ “Ñeri gohra ãhraya,” arĩ pepia. Cristo yare ðaro masibu ñgũ mera majagũ árĩbũ eropa pepia.

⁹ Eropigũ yũ ejatuharo ðaro yũ iira waja “Õagũ ãhrimi,” arĩ ñabeami Goãmũ. Eropiro Goãmũ dorerire Moiserẽ ñgũ apirare yũ iira waja sãre “Õagũ ãhrimi,” arĩ ñabirami. Cristore yũ umupeora pũhrũ “Õagũ ãhrimi,” arĩ ñami pare ñgũ yũre. Goãmũpũ marire dipuwaja marirã áricũ iimi ñgũre mari umupeocũ.

¹⁰ Eropigũ ero coregue yũ árĩmũhtarare duhucãbũ Cristore ðaro masigũ wabu. Goãmũ ñgũ turari mera Cristo masa mũriapũ. Iri turari mera árĩdiaca yũhũ. Eropigũ iri turari mera ðarire iidiaca. Cristo crusague sĩripũ mari ñeri iirare cóãbũ. Eropigũ ñgũ yare iigũ ñgũ iidiro dopa ta ñero taridiaa yũ sã.

¹¹ Eropigũ Cristo ñgũ masa mũriadiro dopa ta, yũ sã masa mũriadiaca.

¹² I árĩpehreri eropa arĩgũ “Cristo iro dopa ñeri marigũ árĩtuhajaa,” arĩ pepibea. Yũ eropa arĩ pepibiriquerecũ ta

Cristo ĩḡu yagũ árĩbure õagũ árĩbure iiami yũre. Eropigũ ĩḡu yare ĩḡu sãre õaro masinemodiagũ turaro mera ĩḡu yare iidiaa yũhũ.

13 Yũ acawererã, yũhũ mũare eropa arĩḡũ, “Jesucristore õaro masipehotuhajaa yũhũ,” arĩḡũ iibeaa. Eropa arĩbiriqeregũ ta i tamerare iiaa. Yũ iribojegue iirare cãdijigũ dohpaguere “¿Goãmũ dohpa iicũ gahmeri yũre?” arĩḡũ bũrigã irire iidiaa.

14 Omabiragũ pohbegũ ejamũhtadi ĩḡu wajatadiaro dopa ta bũrigã iiaa yũhũ yũ wajataborore yũ ñeaboro dopa ta. Cristo ĩḡu yagũ yũ árĩcũ ĩagũ yũhũ wajataborore obu umarogue sihubeomi yũre.

15 Õpa yũ arĩro dopa ta pepique mũa sã Cristore õaro masirã árĩrã. Eropirã mũare yũ wererare mũa peediabiricũ gajiropa mũa pepicũ Goãmũ mũare õaro masicũ iigũcumĩ.

16 Eropirã ĩḡu yare mari masirare õaro ii ojogorocũrã.

17 Yũ acawererã, mũa árĩpehrerã yũre ĩhacũque. Eropirã gajirã gũa iiro dopa iirãre ĩhanũrũque mũa erã sãre mũa ĩhacũboro dopa.

18 Bajasuburi gajirãre ñerãre wereabũ yũhũ mũare. Dohpague sãre bũrigã bũjaweregũ erãre ta werea mũare daja. Erã ñero iiri mera “Cristo crusague ĩḡu sĩridi árĩmi,” arĩ buherire ĩhaturirã ãhrima.

19 Erã peamegue wamorã ta ãhrima. Erã uaribejaripũre bũrigã gahmema. Eropirã iri mũare guhyasĩrisãborare erãpũ “Mari iiri õari ãhraa,” arĩma erã. I umũ maja dihtare pepima erã.

20 Maripũre mari ejaburi maca umarogue ta ãhraa. Eropigũ erogue ta marire taubu mari Opũ Jesucristo dujarigũcumĩ. Eropirã ĩḡu dujariborore corerã iiaa mari.

21 ĩḡu dujarigũ mari dũpũre bu árĩri dũpũre gajiropa árĩri dũpũre gohrotogũcumĩ ĩḡu. Eropigũ ĩḡu ya dũpũ iro dopa ta õari turari dũpũre gohrotogũcumĩ marire ĩḡu turari mera. Árĩpehrerã opũ ñajami ĩḡu iri turari mera. Eropigũ árĩpehreri Opũ ãhrimi ĩḡu iri turari mera.

4

U mũri nũcũ mari Opũ mera mucubirique, arĩ gojañumi Pablo

1 Eropirã yũ acawererã, yũ mahinirã, bũrigã yũ guñarã, yũre mucubiricũ iirã, mũa guñaturadiro dopa ta mari Opũre bũrigã guñaturaniguique mũa.

2 Ire weregũra mũare Evodiare, Síntique sãre: Jesu yarã nome ãhraa mũa. Eropirã mũa game dũyasorire duhu õaro mera árĩricũ árĩque mũa basi.

³ Mupɔ diaye ta yɔ wapi gohra āhraa. Mɔ sãre weregura: Erã nome yɔ mera, Clemente mera, gajirã yɔ wapicurã mera mohmeama ðari buherire gɔa buhecũ. Goãmɔ erã waĩ sãre gojatutuhañumi ïgɔ yapũgue. Ɛmuri nɔcɔ ojocariburire ïgɔ onirã waĩre ïgɔ gojaturipũgue gojatutuhañumi erã waĩ sãre. Eropigɔ erã nomere bosaque mɔhɔ.

⁴ Mɔa árĩpehrerã ɔmuri nɔcɔ mari Opɔ mera mucubirique. Dipaturi ta weregura daja: Mucubirique.

⁵ Ōaro iiniguicãque mɔa ðaro iinirã árĩrare árĩpehrerã masa ïhamasiborore. Mari Opɔ Cristo ïgɔ ariboro merogã duhyaa.

⁶ Mɔa árĩricurire ne bujawere guñaricubiricãque. Mɔa guñaricɔ bujowererire Goãmɔre ðaro werepehocãque. Eropirã ïgɔre ðaro serẽque. Eropirã mɔa serẽrã ïgɔre “Ōhaa,” arĩque ïgɔre.

⁷ Mɔa eropiicũ, ðaro árĩcũ guñaricuro mariro iigɔcumi Goãmɔ mɔare. ïgɔ eropa iiri ðataria. I mari ðaro árĩri ðataria. Eropiro Jesucristo yarã mari árĩcũ marire ðaro árĩcũ iigɔcumi Goãmɔ. Marire ðaro siporãcɔcũ iigɔcumi. Eropigɔ bujowererire guñaniguicãcũ iisome ïgɔ marire mari ïgɔre serẽra pɔhrɔ.

Ōarire pepique, arĩ gojañumi Pablo

⁸ Acawererã, ire weretubu iiaa mɔare. Queoro árĩrire, masa erã umupeorire, ðaro iirire, ñero marirore, suarire, masa “Ōari āhraa,” erã arĩrire pepique mɔa. Ōatariari iri árĩcũ iripure pepique. Masa ðarire ïarã erã mucubiririre mɔa sã mucubiri pepique. Iri árĩpehrerire guñaque irire mɔa iiboro dopa.

⁹ Mɔare yɔ buhediro dopa ta eropa ta iiniguicãque mɔa. Eropirã yure ïhacũque mɔa. Mɔa eropa iicũ Goãmɔ mɔare ðaro árĩcũ ïgɔ mɔa mera árĩgɔcumi.

Filipo majarã Pablora erã orare wereñumi ïgɔ

¹⁰ Dohpague tamerare yoara pɔhrũgue mɔa dipaturi yure guñarã mɔa itamurare mucubiria. Eropa mucubirigɔ mari Opɔ Cristore “Ōhaa,” arãa. “Yure cãdijia wabɔ mɔa,” arĩbeaa yɔhɔ. Iribojeguere yure itamudiaquererã itamumasibirinirã árĩbɔ mɔa.

¹¹ Yure mɔa itamurare weregɔ “Yure duhyaa dohpa,” arĩ werebu iibeaa yɔhɔ. Mɔare gajinore gamegɔ eropa arĩgɔ iibeaa. Yɔ opari mera árĩmasia yɔhɔ.

¹² Gajinore moogɔ sã ðaro árĩmasia yɔhɔ. Eropigɔ baja opagɔ sã ðaro árĩmasia yɔhɔ. Ɛmuri nɔcɔ oaboagu sã oare nɔgapoa waca. Yapigɔ arĩgɔ sã ðaro árĩpoa waca. Dabero

opagu sã árĩpoa waca. Yũre gajino maricũ sãre õaro árĩpoa waca.

¹³ Cristo yũre turacũ iigu mera árĩpehrerire yũ eropa warire ii bocafũmasia yũhũ.

¹⁴ Yũ eropa árĩpoadigu árĩquerecũ ta yũ ñero taricũ mua itamurã yũre õaro iiabu mua.

¹⁵ Õari buherire yũ buhediacũ Macedonia yeba mua ya yeba árĩdigũ yũ wacũ gaji maca majarã Jesu yarã yũre itamubirama. Mua dihta yũre itamuabu. Irire masia mua. Mũare yũ buhecũ yũpũre mua itamucũ mari yujuropa ta Cristo yare iirã iiabu.

¹⁶ Eropirã Tesalónicague yũ árĩnicũ ñarã yũre itamubeobũ. Yujuyerisuburi yũre dũhyacũ ñha yũ gamerire obeoabu mua.

¹⁷ Gajinore serẽgu eropa arĩgu árĩbeaa. Gajirãre mua itamucũ Goãmũ mũare õaro itamugũcumi. Īgũre mua itamuri waja Goãmũ mũare ĩgu õaro iicũ gahmea yũhũ. Mua eropa itamurã guñaturarã wacũ sãre gahmea yũhũ. Eropigu yũre mua itamurare guñacũ iiaa mũare.

¹⁸ Dohpaguere yũre õaro opehoabu mua. Yũ gamera tauro ohabũ mua yũre. Yũre Epafrodito mera mua obeora pũhrũ gajino ne dũhyabeaa yũre. Mua yũre ora Goãmũre ora iro dopa ãhrra. Yũre mua ora Goãmũre õaro suacũ iiaa.

¹⁹ Jesucristo marire õaro iidi árĩmi. Eropigu árĩpehrerire mũare dũhyarare ogũcumi mari Pagũ mũare. Õatariari ĩgu oparire ogũcumi.

²⁰ Æmũri nũcu mari Pagũre Goãmũre umupeorã. Eropa ta iiporo.

Pablo õadorepũ

²¹ Árĩpehrerã Goãmũ mera árĩrã Jesucristo yarã õaporo. Mari acawererã Jesu yarã yũ mera majarã sã mũare õadorema.

²² Árĩpehrerã õ majarã õarã Jesu yarã õadorema. Roma majarã weca opu ya wihi majarã tamera burigã õadorema.

²³ Mari Opũ Jesucristo mera mũare õadorea. Eropa ta árĩniguicãporo. Iripẽta ãhrra.

Colosenses

Colosa majarãre gojabeoñorã Pablo sã

1-2 Yũhũ Pablo Jesu yagũ mari acaweregũ Timoteo mera mũare Colosa majarãre gojabeoa gũa. Jesucristo ãgũ yare buhedoregũ ãgũ apidigũ ta ãhraa yũhũ. Goãmũ ãgũ gamero dopa ta Jesucristo yũre ãgũ yare buhebure apimi. Eropirã mũare gũa acawererãre Cristore umupeorãre gojabeoa. Eropirã mari Pagũ Goãmũ mera mũare õadoreã. Eropirã ãgũ mera õaro árĩque mũa.

Jesu yarãre Pablo serẽbasapũ Goãmũre

3-8 Mũa ya árĩburire Goãmũre serẽrã mucubiriri mera eropa serẽbasaniguicãa gũa. ãgũ mari Opũ Jesucristo Pagũ ãhrimi. Árĩpehrerinãri mũa umũsigue õaro árĩcũ iigũcumi Cristopũ. ãgũ eropa iibu árĩcũ mũa mucubirimũhtarã waĩcũa. "Jesucristo diaye iigu ãhrimi," arĩ ãgũre umupeorã waĩcũa mũa. Eropirã ãgũ yarãre mahi waĩcũa mũa. Mũa eropa árĩrã árĩcũ Goãmũre "Õhaa," arĩ mucubiriri mera serẽbasaa gũa. Árĩpehreroguerẽ Jesu yarã diaye árĩri buherire õari buherire erã werẽcũ peerã masa õaripũre gohrotoma. Goãmũ yare masinemorã wahama. Õpa ta mũa sãre Epafra õari buherire weredi árĩmi. ãgũ gũa mera Cristore mohme coregũ ãhrimi. Iri mohmerire duhubeami ãgũ. Mũare ãgũ eropa werẽcũ peerã, mata Goãmũ yare õaro iiniguicãmũrayoro mũa. Eropirã Goãmũ mũare mahirire diaye ta masirã mata õaro iiayoro mũa. Mũa eropa iirare ãagũ Epafra weremi gũare. Espĩritu Santo itamuri mera Jesu yarãre mũa mahirare weremi ãgũ gũare. ãgũ eropa arĩ werẽcũ peerã "Õhaa," arãa gũa Goãmũre.

9 Eropirã mũare guñarã eropa Goãmũre serẽbasaniguicãa. Goãmũ ãgũ gamerire mũa masipehoboro dopa serẽbasaa gũa. ãgũ yare õaro masirã mũa árĩboro sãre serẽbasaa gũa.

10 Õpa ta serẽbasaa gũa mari Opũ Cristo ãgũ gamero dopa ta õaro mũa iiburire. Mũa eropa iicũ ãagũ ãgũ mũare sũagũcumi. Eropa ta mũa árĩpehrerire õarire mũa iiburire serẽbasaa. Goãmũre mũa masinemoboro dopa serẽbasaa.

11 I sãre serẽbasaa gũa. Goãmũ ãgũ õaro turari mera mũa õaro sĩporã turarã árĩboro sãre serẽa. Eropa ta serẽa ñero tariquererã mũa Goãmũ mera yujuro bojeboro dopa. Ñero

tariquererã mũa eropa pepicãburire mũa mucubiriri mera eropa árĩnguiboro sãre serẽbasaa daja gua.

12 Goãmũ ĩgu yarã árĩcũ marire iimi. Eropa iigu ĩgu orire mari opamorã mari árĩcũ sãre iimi ĩgu. ĩgu árĩrogue õarogue mari árĩborore amutuhajami ĩgu. ĩgu eropa iicũ ĩarã mucubiriri mera mari Pagure “Õhaa,” mũa arĩborore serẽbasaa gua mũare.

13 ĩgu ta marire peamegue wabonirãre taricũ iidi árĩmi. Iribojegue ñerire duhumasibiriribũ mari. Ñegupũ marire doredi árĩnirimi. Eropigu Goãmupũ marire taudi árĩmi. ĩgu magũ ĩgu mahigure opũ acugũ ĩgu dorero dopa marire árĩcũ iimi.

14 ĩgu magũ mera marire peamegue wabonirãre taudi árĩmi Goãmũ. ĩgu magũ ĩgu sĩrirañe mera mari ñeri iirare cãdijidi árĩmi Goãmũ.

*Masa Goãmure gamebircũ ĩha Cristo amupũ, arĩ go-
jañumi Pablo*

15 Goãmure mari Pagure ĩaya mara. Cristo ĩgu magũ ĩgu Pagũ ĩgu árĩricurire ĩhmudigu árĩmi masare. ĩgu ĩgu magũ árĩpehrerã core, árĩpehreri core árĩtuhadigu árĩmi. Eropigu tauro opũ ãhrimi ĩgu.

16 Goãmũ ĩgu dorecũ ĩgupũ ĩgu Pagũ mera árĩpehrerire ĩhacũnuguñumi. ðmũsigue árĩrere i yebague árĩri sãre ĩhacũnuguñumi. Mari ĩarire mari ĩabiriri sãre ĩhacũnuguñumi. I yeba majarãre, ðmũsi majarã oparãre, árĩpehrero dorerãre, mari ĩarãre, mari ĩabirã sãre, árĩpehrerãre ĩhacũnuguñumi. ĩgu árĩpehrerire, árĩpehrerãre ĩhacũnuguñumi. Eropirã árĩpehrerã ĩgu iinirã ãhrima. Árĩpehrerigue ta ĩgu iira ãhrraa.

17 Árĩpehrerã core árĩpehreri core Cristo árĩmũhtañumi. Eropiro ĩgu turari mera árĩpehrerã dohpaguere árĩrã iima. Árĩpehreri sã árĩro iiaa.

18 Mari ĩgu yarã árĩpehrerã ĩgu ya curu majarã árĩrã ĩgu dupũ waĩcũa. Eropigu ĩgupũ mari dipuru ãhrimi. ĩgu sĩrigũ masa mũriamũhtadigu árĩmi árĩpehreri weca árĩpehrerã weca árĩbu.

19 Cristo mari Pagũ Goãmũ mera yuju dupũ ta árĩro dopa ta ãhrimi. ĩgu eropa árĩcũ ta gamepũ mari Pagupũ.

20 Árĩpehrerã masa erã ĩgure gamebirimũricũ ĩagũ erã ĩgu mera amubure Cristore obeopũ. ĩgure eropa obeogu ĩgu Cristo crusague sĩri ĩgu di cóãra mera amupũ. Eropigu ðmũsi majarãre, i yeba majarã sãre ĩgu mera õaro árĩcũ

iipɔ. Ʋmɔsi maja i yeba árĩri sã ðaro árĩcũ iipɔ. Eropigu ãgu guñadiro dopa iipɔ.

²¹ Mɔa sãre eropa ta ãgu mera ðaro árĩcũ iidi árĩmi. Mɔa sã ñerire iiniguinirã Goãmure boje majarã árĩrã mɔa pepiri mera ãgure gamebirinirã árĩmɔriribɔ.

²² Mɔa eropa árĩnirãre Cristo sĩriro mera ãgu Pagure mɔa ãgu mera ðaro wacũ iipɔ ãgu. Eropa iipɔ ãgu mɔa ãgu yarã ðarã ñeri marirã, dipuwaja marirã mɔa árĩbororo dopa. Mɔa eropa árĩcũ ãgu árĩroguere mɔa árĩbororo eropa iipɔ.

²³ Eropa ta iigɔcumi ãgu mɔa ãgure duhuro mariro umupeoturaniguicãcũ. Mɔa ðari buherire mɔa Goãmɔ mera árĩniguibororo mɔa cãdijibiricũ, ãgu mera mɔa árĩcũ iigɔcumi mɔare. Iri mɔa peera buherire ðari buherire árĩpehrerã i yeba majarã peenirã árĩma. Eropigu yɔhɔ Pablo sã iri ðari buherire weregu ta ãhraa.

Jesu yarãre itamubure apipɔ Goãmɔ Pablora

²⁴ Cristo mari ãgu yarã árĩbororo crusague sĩrigɔ ñero taripɔ. Eropigu yɔ sã mɔa ãgu yarã árĩburire ñero tarigɔ mucubiria. Eropa ñero tarigɔ Cristo marire ãgu apirare ii ojogorocɔgu iiaa. Eropigu mucubiria. Cristo yare mari iira dipuwaja mari ñero tarinemoboro dɔhyania dohpa. Eropigu ãgure mɔa guñaturabororo ñero tari mucubiria yɔhɔ. ãgu dɔpɔ iro dopa árĩrã ãgu ya curu majarã ãhraa mɔa.

²⁵ Jesu yarãre itamubure apimi Goãmɔ yure. Mɔa ya árĩburire iibure yure apimi ãgu. ãgu yare mɔare werepehobure apimi ãgu yure.

²⁶ Iri ãgu yare iribojegure baja cururi majarãre erã masipehocũ iibirimɔriñumi mari Pagɔ. Dohpaguere dohpague majarãre ãgu yarãre irire ðaro masipehocũ iimi pare.

²⁷ Eropigu "Judio masa árĩbirã sãre yaha buheri ðataria," arĩ ãgu yarãre irire weremi. Iribojegue erã masibirirare weremi Goãmɔ. Ōpa ãhraa dohpague ãgu werera: Cristo ãgu yarã mera ãhrimi. ãgu eropa árĩcũ ãgu yarã ɔmɔsiguere ðatariaroguere árĩrãcoma. Iri ãhraa iribojegue erã masibirira mari Pagɔ ya.

²⁸ Cristore ta werea. Árĩpehrerãre gũisãgu erãre werea yɔhɔ. Ōaro masiri mera buhea yɔhɔ ðaro Cristore masare masicũ iibu. Eropa buhea yɔhɔ erã ãgu yare ðaro iirã erã árĩcũ iibu.

²⁹ Iri ta ãhraa yɔ mohmeri. Jesucristo ãgu ya turari mera yure ãgu ora turari mera turaro mohmea yɔhɔ ãgu yare buhegu.

2

¹ Ire mũa masicũ gahmea. Mũa ya árĩburire, Laodicea majarã ya árĩburire, árĩpehrerã ya árĩburire turaro mohmea yũhũ. Árĩpehrerã masa yũre ĩabirã ya árĩburi sãre turaro mohmea yũhũ.

² Ōpa ta mohmea yũhũ mũa árĩpehrerã ōaro sĩporãcuborore. Mũa mera majarãre mũa yujuro mera game umupeoburi sãre eropa mohmea yũhũ. Iribojegue majarãre Goãmũ werebirira Cristore masicũ iiri āhraa. Īgũ yare masirã Cristore umupeoa mũa. Mũa ĩgũre ōaro masiborore mũa ĩgũ mera ōaro árĩborore burigã itamua yũhũ mũare.

³ Cristo dihta masipehocãmi gajirã masibirirare. Īgũ árĩpehrerire ōaro masigũ āhrimi. Īgũ masiri ōatariaro āhraa.

⁴ Irire werea mũare gajirã mũare peesuari wereniguiiri mera gũyari arĩgũ.

⁵ Yũhũ mũa watope árĩbiriqweregũ yũ guñari mera mũa watope arĩgũ dopa āhraa. Erogue árĩbiriqweregũ Cristore mũa ōaro umupeoniguirare mũa ōaro iirare peegũ mucubiria yũhũ.

⁶ Eropirã mari Opũ Jesucristore opamorã ĩgũre mũa umupeonũgadiro dopa ta umupeoniguicãque. “Eropa ta yũre itamugũcumĩ,” arĩrã mũmuri nũcũ ĩgũ mera ōaro árĩniguicãque.

⁷ Īgũre ōaro masirã arĩque mũa. Eropirã mũmuri nũcũ ĩgũre masinemoque gajirã erã ero core mũare erã buhediro dopa ta. Eropirã Cristore mucubirirã “Ōhaa,” arĩniguicãrã arĩque mũa.

Cristo yarã arĩrã ōaripũre gohrotoa mari, arĩ gojañumi Pablo

⁸⁻¹⁰ Ōaro pee masique mũa. Masa erã gamero erã buherire erã gũyarire peebiricãque. Erã iribojegue majarã árĩricũrare buhema. Masa erã pepiro dopa pepirã arĩrã i doreri dihta buhema. Cristo yapũre buhebeama. Cristo mari Pagũ árĩro dopa ta arĩgũ Goãmũ gohra ta āhrimi. Eropigũ Jesucristo Goãmũ arĩgũ i yebague masa dehyoadigũ Goãmũ ta arĩmi. Eropirã ĩgũ yarã arĩrã Goãmũ mera ōaro árĩniguia mari. Īgũ ta árĩpehrerã deyobirã oparã tauro opũ arĩgũ āhrimi. Mũsi majarãre i yeba majarãre árĩpehrero majarãre doremi. Eropirã gũyari buherãre peebiricãque.

¹¹ Eropirã Cristo yarã arĩrã circuncisiõnre iinirã gasiro merogã wiri aĩnirã iro dopa arĩrã āhraa mũa. Masa erã

dupure merogã gasirogãre erã wiri cóãro árĩbiriya. Mũa pepiripure Cristopũa mũa ñeri ùaribejarire cóãmi.

¹² Īgũ yarã árĩra pũhrũ waĩyesũnirã árĩnirã árĩbũ mũa. Eropa waĩyesũnirã árĩrã õpa ĩhmurã iinirã árĩbũ mũa: Iribojegue mũa ñero iirare duhurare ĩhmurã iibũ mũa. Jesucristo sĩridigũ mera mũa ùaribejarare cóãnirã árĩbũ mũa. Eropirã Jesucristo sĩridigũ masa mũriara mera õaripure gohrotonirã árĩbũ mũa. Īgũ Goãmũpũ Cristore masudigũ árĩmi. “Īgũ turagũ àhrimi,” arĩrã ĩgũre umupeorã árĩrã õaripure gohrotonirã árĩbũ mũa.

¹³ Iribojegue mũa ñerã árĩra dipuwaja peamegue wabonirã árĩriyoro mũa. Eropa wabonirã árĩriyoro mũa Goãmũ yarã árĩbirã. Īgũ dorerire opabirã árĩriyoro mũa. Dohpaguere mari Pagũ marire ĩgũ mera eropa õaro árĩniguimorã iimi. Cristo ĩgũ sĩridiro mera eropa iimi ĩgũ marire. Eropa iigũ mari árĩpehreri ñeri iirare cãdijicãdi árĩmi ĩgũ.

¹⁴ Goãmũ ĩgũ dorerire gojarare mari tarinũganirã mari árĩquerecũ ta ĩgũ marire dipuwajacũdorebeamĩ. Cristo crusague ĩgũ sĩridiro mera Goãmũpũ mari ñeri dipuwajare cãdijipehocãdi árĩmi.

¹⁵ Īgũ Cristo crusague sĩricũ watẽa ya dorerapure Goãmũpũ tarinũgacãpũ. Eropirã bu árĩrã dujacãñorã erã watẽapũ. Eropa iigũ erãre gũhyasĩuro wacũ iipũ erã ĩhuro.

Ʋmũsi majare Goãmũ yare gameque, arĩ gojañumi Pablo

¹⁶ Eropirã gajirã erã dorerire dorediaricoma mũare. “Mũare irire barã, irire ihrirã ñerire iirã iiaa mũa,” arĩ werewũama mũare. Erã eropa arĩ werewũacũ eropa ĩacãque erãre. Bojori nũcũ árĩrinũri, aberi nũcũ árĩrinũri, semanari nũcũ árĩrinũri, bosenũri mũa iidia-biricũ werewũama. Erã eropa werewũacũ eropa pepicãque erãre.

¹⁷ Erã mũare doreri iri bojegue Goãmũ apira doreri Jesucristo mari ñeri iira dipuwaja sĩriburire ĩhmumũhtarañe árĩyoro. Dohpaguere Cristo arĩmi marire. Eropirã ĩgũre umupeorã iri doreripure umupeobea pare.

¹⁸ Erã dorerire iidorerã mũare dipuwajacũrã dujacũ iidiana erã. Erã eropiicũ eropa ĩacãque erãre. “Gajiropa dehyoarire ĩabũ gũa,” arĩmaacãrã erã anyuare umupeorima Goãmũre umupeoboro dopa. Erã eropa pepicãrã iro dopa iirima. Gajirã masa iro dopa erã ñeri ùaribejarire pepirima erã. Eropa pepirã árĩrã “Masipehocãa gũa,” arĩ pepirima erã.

¹⁹ Eropa iirã árĩrã Cristopure umupeobeama. Cristo dihta ĩgũ yarãre doregũ àhrimi. Cristopũ mari ĩgũ yarã dipuru

ãhrimi. Īḡu yarāpū ĩḡu ya curu majarā árĩrā ĩḡu dūpū waĩcūa. Mari dipuru mari dūpūre gamesūriro dopa ta ãhrimi Jesucristo ĩḡu yarāre. Īḡu yarāre itamugū marire ĩḡūre umupeonemocū iimi. Goāmū gamero dopa ta ĩḡu yarāre ĩḡūre masinemocū iimi.

²⁰ Marire ñero iira dipuwajacūnirāre Cristo taudigū árĩmi crusague sĩrigū. Eropirā Cristore umupeorā ĩḡu yarā ãhraa. Mūa eropa árĩrā i yeba maja buherire anyuare umupeori buherire gamebiro gahmea mūare. ¿Duhpirā gajino buherā erā dorerire iidiari mūa?

²¹ Ōpa arĩ dorema erā basi erā gamero: “Irinore babiricāque. Irinore pēhrebiricāque,” arĩma. ¿Erā eropa arĩdorecū duhpirā yāhriri mūa?

²² Erā doreriñe bari iro dopa ta pehrea waroca. Erā doreriñe i ũmū maja dihta ãhraa. Masa erā suaro erā buheri dihta ãhraa i buheri. Eropiro duhpiburi árĩbeaa.

²³ Erā dorerire iirā Goāmūre umupeorā iro dopa árĩrima. Eropirā eropa pepicārā iro dopa ii ĩhmuma. Erā dūpūre ñero taricū iirā “Goāmūre umupeorā iiaa,” arĩrima. Erā eropa iirā erā doreripū masipehorā ya doreri iro dopa iirima. Eropa árĩbeaa. Erā dorerire iiquererā erā ñeri ũaribejarire duhubeama. Eropiro erā doreripū duhpiburi árĩbeaa.

3

¹ Eropirā Cristo yarā ãhraa mūa. Eropirā mūa ero core mūa ñeri iirare duhunijarā ōaripūre gohrotonirā ãhraa mūa. Eropa gohrotorā árĩrā ũmūsi majare Cristo yare gameque mūa. Erogue Cristo ĩḡu Pagū diayerū doagu árĩpehrerore doregū ãhrimi.

²⁻³ Mūa ũaribejari cōānirā árĩrā Cristo gamerire opaa. Īḡu Cristo mūa ōaro iiborore ōaro ĩhadibumi. Eropirā iri ñerire guñabeaa mūa. Eropirā ũmūsi majare Goāmū yare guñamūhtaque. I yeba majare guñaniguibiricāque.

⁴ Eropirā ũmūsigue Cristo marire eropa árĩniguimorāre aĩḡu ĩḡu aricū ĩḡu mera warāca. Eropa warā ĩḡu mera ũmūsigue Goāmū yare oparāca.

Cristo yarā árĩbirā ñerire iiribu mari, arĩ gojañumi Pablo

⁵ Eropi i yeba maja ñerire duhucāque. Ne yujugū mojoto diribiriqueregū nomeo mera árĩbiricāque. Ne yujugo mojoto diribiriquerego ũmū mera árĩbiricāque. Eropa ñeri mūa iirire iripēta duhucāque. Ñeri ũaribejarire iibiricāque. Mūa opaburire gajinore gametaribiricāque. Mari gajinore būrigā gamerā goāmarā wéanirāre erā umupeoro dopa iirā iiaa mari irire.

⁶ Iri ñerire iirã Goãmure tarinugarã àhrima. Erã eropa áricũ ãgũ ãgũpũ erãre gamebeamí. Eropigũ erãre burigã dipuwaja moagucumi.

⁷ Iribojeguere mũapũ iri ñerire iinirã mera majarã áriiya mũa.

⁸ Dohpaguere i ñerire duhupehrecãque mũa. Guarire, disitĩri wiarire, gajirãre ñero arĩ pepirire, gajirãre ñero quere wereniguirire, ñero wereniguirire iri áripehrerire duhucãque.

⁹⁻¹⁰ Mũapũ Jesu yarã warã ñerã mũa áridiro dopa ta iri ñeri ñaribejarire duhutuhajanirã áribũ. Eropirã õaripure gohrotonirã àhraa mũa. Mũare õaripure gamecũ iigũ iimi Goãmũ. ãgũ áriro dopa mũa áriboro dopa eropa iimi. Eropa ta iimi ãgũ mũa ãgũre õaro masiboro dopa. Eropirã ãgũ eropiicũ mũa mera majarãre gũyabiricãque.

¹¹ Cristo yarã mũa áriã judio masa, judio masa áribirã sã yujuropa dihta àhraa mũa Goãmũ ãgũ ãacũ. Gasiro merogã wiri aĩnirã, irire aĩbirinirã sã Cristo yarã áriã yujuropa àhraa Goãmũ ãgũ ãacũ. Gaji yeba majarã sã, masibirã sã, mũa ya yeba majarã sã Cristo yarã áriã yujuropa àhraa Goãmũ ãgũ ãacũ. Pohro majarã, erã pohro majarã áribirã sã, Cristo yarã áriã yujuropa ta àhrima Goãmũ ãgũ ãacũ. Jesucristo tamera áripehrerã ãgũ yarã mera àhrimi. ãgũ yarã erã ãacũ bu áriãgũ áribeamí ãgũ.

¹²⁻¹³ Eropi Goãmũ ãgũ beyenirã, õarã, ãgũ mahirã áriã õpa árique mũa: Gajirãre mojomoro ãarã, gajirãre õaro iirã áriro gahmea. Mũare ñero iiquerẽcũ ta eropa pepicãrã áriro gahmea mũare. Mũa mera majarã mera guarã, erãre quere iirã áribiricãro gahmea mũare. Eropirã “Yũhũ bu áriãgũ àhraa,” arĩ pepique. Mari Opũ mũa ñeri iirare cãdijimi. ãgũ eropa cãdijidiro dopa ta mũa sã mũa mera majarã erã ñero iirare cãdijique.

¹⁴ I doreri tauro õpa arĩ dorea mũare: Gajirãre mahi umupeoque. Mũa eropa iirã áripehrerã gajirã mera yujuro mera áriãca.

¹⁵ Cristo marire õaro áricũ iimi gajinore mari wereniguibiriboro dopa. ãgũ eropa iicũ õaro árique mũa. Mari ãgũ yarã yuju curu ta àhraa. Mari eropa áriãre mari Pagũ marire õaro árimorãre ta apimi. ãgũ eropa iicũ õaro árique mũa mũa basi. Eropirã Goãmure “Õhaa,” arĩ mucubirirã árique mũa Goãmũ mera.

¹⁶ Cristo ya buherire õaro guñaniguicãque mũa. Õaro pee masiri mera ãgũ yare gajirãre buheque. Gũhyadiaro irire wereque. Eropirã Salmo gojaripũre, Goãmũ yare bayarire, gaji ãgũre umupeori bayarire ãgũre bayapeoque.

Õaro guña umupeori mera bayapeoque. Eropa bayarã ïgu yare ðaro guñaque mua. Eropirã Goãmure "Õhaa," arĩ mucubirirã árĩque mua Goãmura mera.

17 Árípehleri mua iirire ðaro síporãcũ iique mari Opũ Jesu ïgu mucubiriboro dopa. Mua wereniguirã ïgu ya árĩburi dihtare wereniguique. Eropirã Cristo ïgu itamuri mera Goãmura mari Pagure serẽrã "Õhaa," arĩ mucubirique ïgure.

Jesu yarãre yujuro mera árĩburi doreri ðpa ãhraa, arĩ gojañumi Pablo

18 Mua marapucurã nome, mua marapũ sumarãre ðaro yũhrique. Eropa ta iiro gahmea mari Opũ yarã Cristo yarã nome árĩrã.

19 Mua marapocurã, mua marasã nomere mahi umupeoque. Igore turibiricãque.

20 Mua erã porã sã mua pagũ sumarãre tarinugabirã dihta árĩque. Mua eropa iicũ ïagu mari Opũ ðaro suagu árĩgucumi.

21 Mua erã pagũ sumarã sã mua porãre eropa turinugibiricãque bujawerecũ iiri arĩrã.

22 Mua pohro majarã, mua oparãre i yeba árĩrãre eropa yũhrirã árĩque. Erã ïhurore erã dorero dopa ta mohmeque. Erã maricũ sãre mohmeque. Mari Opure Cristore guhyadiaro mua ïadiro dopa ta ðaro mera yũhrique mua oparã sãre.

23 Diaye ta Cristo yarã árĩrã ðaro yũhrirã ãhraa mua ïgure. Eropirã mua oparãre õ majarã sãre yũhrirã, Cristore mua yũhriro dopa ta yũhrique mua. Eropirã mua oparã erã dorero dopa ta turaro mera mohmeque "Cristo ya doreri ãhraa," arĩrã.

24 Mua eropa iicũ Cristo mũare wajayegucumi. Mũare ïgu oburire mũare ogucumi mari Opũ. Iirire masia mua. Mari Opũ Cristo ïgu pohro majarã ãhraa mua. Eropigu ïguru mua Opũ gohra ãhrimi.

25 ïgure tarinugarãre dipuwaja moagucumi mari Opuru. Árípehlerã tarinugarãre ne yujugu duhyaro mariro yujuro mera dipuwaja moagucumi ïgu. Eropa yure iiri arĩrã ðaro yũhrique mua.

4

1 Mua oparãru, mua pohro majarãre diaye ta ðaro iique erãre. Mua sã opu opa. Mua opuũ umusi majagu Goãmũ ãhrimi.

² Mũa árĩpehrerã ı̄muri nı̄cı̄ Goãmı̄re serẽniguique. Őaro guña pee masi serẽniguique. Eropirã mari Pagı̄ ōaro iirare guñaque.

³⁻⁴ Gũa ya árĩburipı̄re serẽque daja. Cristo yare iribojegue majarã erã masibirirare buherã iiaa gũa. Masare gũa ōaro buheboro dopa serẽbasaque mari Pagı̄re. Yı̄hı̄ Goãmı̄ yare wereniguiiri waja dohpaguere peresugue āhraa. Eropigı̄ mũa eropa serẽcı̄ gahmea igı̄ yare yı̄ ōaro iiboro dopa. Cristo igı̄ dorediro dopa ta yı̄ wereburire serẽque.

⁵ Jesu yarã árĩbirã mera árĩrã ōaro iique mũa. Cristo yare wereque erãre. Erã mera mũa árĩropẽ ta eropa ta ōaro iique erã Jesu yarã árĩboro dopa.

⁶ Gajirã mera weretamurã ōaro sı̄aro mera weretamuque. Őari dihtare wereniguique. Mũa eropiirã gajirã erã Jesucristo yare mı̄are serẽpicı̄ ōaro masiri mera yı̄hrirãca erãre.

Őadoretupı̄ Pablo

⁷ Tı̄quico mari acaweregı̄ Jesu yagı̄ āhrimi. Igı̄ yı̄ árĩricı̄re mı̄are weregı̄cumı̄. Igı̄ mari mahigı̄ āhrimi. Cristo yare buhegı̄, gũa mera mohmegı̄ āhrimi. Ne iri mohmerire duhubeami igı̄.

⁸ Mũa pohrogue igı̄re obeogı̄ iiaa yı̄hı̄ gũa árĩricı̄re mũa masiboro dopa. Igı̄re obeogı̄ iiaa yı̄hı̄ mı̄are mucubiricã iibure.

⁹ Onésimo mari acaweregı̄ mera wapimoa obeogı̄ iiaa. Igı̄ sã Cristo yare ne duhubeami. Mũa mera majagı̄ āhrimi. Erã perã yı̄ dohpa tarirare wererãcoma mı̄are.

¹⁰ Aristarco peresugue árĩgı̄ yı̄ mera majagı̄ mı̄are ōadoremi. Marco sã ōadoremi. Igı̄ Bernabé pagı̄ magı̄ āhrimi. Mũa pohrogue igı̄ ejacı̄ ōaro mera igı̄re bocatĩrique yı̄ mı̄are werebeodiro dopa ta.

¹¹ Jesu waı̄cugı̄ “Justo,” erã arı̄ piyugı̄ ōadoremi igı̄ sã. Oã ta yı̄ mera mohmerã judio masa gohra āhrima. Judio masa gohra erã dihta Goãmı̄ yare yı̄ mera buhema. Őpa buhea gũa Goãmı̄ yarã masa waboro dopa. “Jesucristo yı̄ Opı̄ āhrimi,” erã árĩboro dopa buhea gũa. Erã yı̄re ōaro itamunirã āhrima.

¹² Epafra mũa mera árĩdigı̄ mı̄are ōadoremi. Igı̄ Jesucristo dorerire ōaro iigı̄ āhrimi. Goãmı̄re serẽgı̄, turaro mũa ya árĩburire serẽbasaniguicãmi igı̄. Goãmı̄re ōaro guñaturaniguimorãre, igı̄ gamero dopa iimorã mũa árĩboro dopa eropa Goãmı̄re serẽbasaniguicãmi igı̄.

¹³ Īḡu m̄ua ya árĩburire turaro serēbasami. Laodicea majarā ya árĩburire, Hierapoli majarā ya árĩburi sãre ĩḡu turaro serēbasami. Īḡu eropa iiḡu árĩcũ ĩaḡu m̄uare wereḡu iiaa.

¹⁴ Duhturu Luca waĩc̄ḡu mari mahiḡu m̄uare ðadoremi. Dema sã ðadoremi.

¹⁵ Ōaporo mari acawererā Laodicea majarā. Ninfa sã ðaporo. Jesu yarā igo pohro gamenererā sã ðaporo.

¹⁶ Ipũre ȳu gojabeorapũre buhetuha Laodicea majarā sãre obeoque. Eropirā erãre Laodicea majarãre ȳu gojabeorapũre m̄ua sã buheque.

¹⁷ Eropirā ðpa arĩque Arquipore: “Mari Op̄u Jesu yaḡu m̄u árĩcũ ĩḡu mohmerire apidi árĩmi m̄ure. Īḡu eropa apicũ iri mohmerire ðaro mohme ojogoroc̄que m̄uh̄u,” arĩque ĩḡure.

¹⁸ Ȳuh̄u Pablo, ȳu mojoto mera ire gojaa. M̄uare ðadorea ȳuh̄u. Peresugue ȳu árĩr̄ire guña serēbasaque Goãm̄ure. Ōaro arĩque m̄ua. Goãm̄u ĩḡu mahiri mera m̄uare ðadorea. Iripēta āhraa.

1 Tesalonicenses

Pablo gojañumi Jesu yarãre Tesalónica majarãre

¹ Yꝰ Pablo, Silvano, Timoteo mera ipũre mũare gojabeoa. Mũarꝰ Tesalónica majarã mari Pagꝰ Goãmꝰ yarã árĩrã mari Opꝰ Jesucristo yarã sã áhraa mũa. Eropigꝰ Goãmꝰ mari Pagꝰ, Jesucristo mari Opꝰ mera mũare òadoreaa. Íꝰꝰ itamuri mera òaro árĩque.

Jesu yarã Tesalónica majarãꝰ Jesure erã òaro umupeorare wereñumi Pablo

² Goãmꝰre serẽrã mũa árĩpehrerãre guña mucubiriri mera. Mũa Jesure umupeorire guñarã “Òatariari áhraa,” arĩ serẽniguicãa gꝰa Goãmꝰre.

³ Mũa Jesucristore “Diaye iigꝰ áhrimi,” arĩ umupeoniguicã waĩcꝰa. Eropã umupeoniguicãrã Jesucristo ya árĩburire òaro iirã waĩcꝰa. Jesucristore, gajirã sãre mũa òaro mahi umupeorã waĩcꝰa. Eropã mahirã Jesucristo ya árĩburire burigã iirã waĩcꝰa mũa. Eropirã Jesucristo íꝰꝰ itamurire corerã waĩcꝰa mũa. Íꝰꝰre eropã corerã íꝰꝰ yare iirã duhubirã waĩcꝰa. Eropã iirã mũa Goãmꝰ mari Pagꝰ íacũ òaro iiaa. Goãmꝰre gꝰa serẽrã irire mũa eropã òaro ii waĩcꝰrãre guñaniguicãa.

⁴ Gꝰa acawererã, òpa peeque. Mũare Goãmꝰ mahimi. Eropigꝰ mũare íꝰꝰ yarã árĩmorãre beyerꝰ. Irire masia gꝰa.

⁵ Gꝰa sohõ árĩrasubu mũa mera árĩrã òari buherire mũare gꝰa wererã gꝰa pepiri mera werebirabꝰ. Espiritu Santo íꝰꝰ doreri mera íꝰꝰ yare wereabꝰ gꝰa mũare. Eropã wererã iri buheri diaye ta árĩrãre òaro masiabꝰ mũa.

⁶ Eropã masirã mũa iri òari buherire òaro pee ñeabu mũa mucubiriri mera. Eropirã mũa eropã peecũ ñha gajirã gamebirã mũare ñero iima. Erã mũare ñero iiquerecũ ta mũa Espiritu Santo itamuri mera òaro mucubiriabꝰ. Eropirã gꝰa mũa watope árĩrã gꝰa òaro árĩricurire masiabꝰ mũa. Eropirã mũa gꝰa diaye maja iirare ñarã guare ñhacũbꝰ. Eropirã Jesu mari Opꝰ íꝰꝰ iidiro dopa ta iiabꝰ mũa.

⁷ Mũa eropiicũ pee Jesu yarã Macedonia yeba majarã, Acaya yeba majarã sã mũa eropã òaro iirare peeañorã. Eropã peerã erãꝰ mũa iidiro dopa ta iiañorã erã sã.

⁸ Eropirã mũaguere Jesucristo mari Opꝰ yare peesũyoro. Goãmꝰre mũa umupeorare Macedonia majarã Acaya majarã sã peeañorã. Erã dihta peebirañorã. Árĩpehrero

majarã mũa umupeorare peeãnorã. Eropirã gũa mũa umupeorare gajirã masituhajacũ ãha werebirica erãre gũapũ. Erãpũ guare werema.

⁹ Ōpa arĩma guare mũa iirare wererã. “Tesalónica majarã mũaare ðaro bocatĩriñorã mũa erogue ejacũ. Erã Jesucristo yare pee erã goãmarã wéanirãre umupeonirã árĩrã gohrotoañorã. Gohrotorã Goãmũ gohra ojocarigũre diaye iigũre umupeonũgañorã. Eropirã dohpague Goãmũ yare iirã iiañorã.

¹⁰ Eropirã Goãmũ magũ Jesucristo ãgũ umũsigue ariburiñe ðaro corerã ãhrañorã,” arĩ werema guare. Jesure sĩridigũre Goãmũ masupũ. Eropigũ Jesupũ marire ñetariaro dipuwajacũbonirãre taudigũ ãhrimi.

2

Pablo Tesalónica gũe ãgũ buherare wereñumi

¹ Mũa pohro gũa árĩrã eropa árĩcãrã iibirabũ. Mũaare ðaro itamurã árĩmũrabũ gũa. Irire ðaro masia mũa, gũa acawererã.

² Ero core Filipino maca gũa árĩrã ñero taribũ. Guare ñero erã iirare masia mũa. Guare erã eropa ñero iiquerecũ ta Goãmũ itamuri mera gũiro mariro Goãmũ yare ðari buherire wereniguirã gũa ejabũ mũa pohroguere. Mũa árĩro sãre guare masa bajarã erã ãhaturiquerecũ ðari buherire buheabũ gũa mũaare.

³ Eropirã mũa pohro árĩrã mũaare gũa werera ðaro diaye majare buheabũ gũa mũaare. Eropa wererã mũaare ñero iidiarã árĩbirimũrabũ gũa. Mũaare gũyadيارã buhebirimũrabũ gũa mũaare.

⁴ Goãmũ gamero dopa ta buhea gũa. Ōari buherire buhemorãre Goãmũ beyemi guare. Eropa beyegũ ãgũ ya buherire guare weredoremĩ. Eropirã masa guare erã ãhasũaburire buherã iibeaã gũa. Goãmũpũ guare ãgũ ãhasũaburire ãgũ yare buhea gũa. Goãmũ mari pepirire dohpa mari iidiarire ðaro masimi.

⁵ Eropirã gũa mũaare ðari buherire wererã gajinore amarã ejabirimũrabũ. Eropirã werenigui gũyarã iibirimũrabũ gũa mũaare. Eropirã gũa buherã mũaare niyerure aĩmorã iibirimũrabũ. Irire gũa mũa pohro eropa ðaro iirare mũa masia. Goãmũ sã irire masimi.

⁶ Gũa eropa buherã mũa guare umupeoburire dorebirimũrabũ. Gajirã sãre eropa ne dorebirimũrabũ.

⁷ Gũa Cristo ãgũ apinirã árĩrã mũaare doremãsiyoaya. Ne eropa dorebirabũ gũa. Gũa dorebirã majirãre nijisoro dopa ta mũaare ðaro iimũrabũ mahiri mera.

⁸ Eropirã mũare ðaro gamerã Goãmũ yare ðari buherire weremurabũ gua mũare. Gua basi ta árĩpehrero gua iimasiburire mũare itamumurabũ. Gua mahirã mua árĩcũ eropa itamuabũ mũare.

⁹ Eropirã mũare mahirã burigã itamumurabũ. Irire guñaã mua, gua acawererã. Goãmũ yare ðari buherire wererã árĩrã, mua oparire serẽ garibobirimurabũ mũare. Eropirã gua basi mohmemurabũ gua baburire wajatamorã. Eropirã mũare, ñamigue sãre mohmemurabũ gua.

¹⁰ Eropirã ðaro Goãmũ gamero iirã ñeri dipuwaja mariro diaye ta iimurabũ mũare Jesu yarãre. Eropirã gua mua mera eropa queoro árĩrare masia mua. Goãmũ sã irire masimi.

¹¹ Eropirã erã pagũ ãgu porãre ãgu ðaro were ãgu mucubiricũ iidiro dopa ta gua mua sãre árĩpehrerãre wererã mucubiricũ iiabũ mũare. Irire masia mua.

¹² Goãmũ mũare ãgu opu árĩroque ãgu ðatariaro árĩroque mua árĩmorãre beyedigũ árĩmi. Eropirã mua ãgu yarã árĩrã ãgu árĩro dopa ta ðaro iiniguicãro gahmea, arĩmurabũ.

¹³ Eropirã Goãmũ yare mũare gua wererare mua peerã ðpa pepibũ mua: "Masa erã pepiri mera iri buheri árĩbeaa. Goãmũ ya buheri ta ãhraa," arĩ pepibũ mua. Irire mua eropa pepicũ masirã mucubiria gua. Eropirã Goãmũre serẽrã, "Õhaa," arãa gua ãgure. Eropa ta ãhraa. Mũare gua buheri, Goãmũ wereniguiri diaye ta árĩri ãhraa. Eropigu mua Goãmũ yare ta peecũ ãgu ya buheri mera ðaripũre gohrotocũ iimi mũare.

¹⁴ Eropirã Jesucristo yarã mua árĩcũ ãarã i yeba majarã Jesure gamebirãpũ ñero iiañorã mũare. Mua eropa wadiro dopa ta Judea yeba majarã sãre wayoro. Eroque sãre Jesucristore umupeorãre erã ya yeba majarã sã ñero iiañorã. Judio masa Jesure gamebirã erãre ñero taricũ iiañorã.

¹⁵⁻¹⁶ Mata judio masapũ iribojegue majarã Goãmũ ya weremuhtanirãre wejẽmurinirã árĩma. Eropirã mari Opu Jesucristo sãre wejẽñorã erã. Eropirã erã Jesucristo yare gamebirã gua sãre ñero ii cohãma guare erã ya yebare. Eropirã erã judio masa árĩbirãre erã dederebiri-borore gua erãre Goãmũ yare werecũ guare judio masa cãhmotamurima. Goãmũ yare weredorebirima guare. Erã Jesu yarãre ãhaturi arĩmurima. Erã eropiirare Goãmũ gamebirigohracãmi. Eropero erã judio masa ñero iira dipuwaja wuaro arĩtuhaya. Erãre Goãmũ burigã dipuwaja moagucumi.

*Pablo Tesalónica majarã pohrogue dipaturi curigũ wadi-
aripũ*

17 Gũa acawererã, mũa mera dohpaguere áribiriquererã ta mũare guñarã iiaa. Eropirã mũare burigã ñadiarã mũa pohrogue wadiarabũ gũa.

18-19 Bajasuburi yũhũ mũare ñagũ wadiarabũ. Watĩpũ gũa wabodirore goroweoami. Eropirã gũa wabiricarabũ. Gũare mucubiricũ iirã mũa áricũ mũare ñadiarabũ. Mari Opũ Jesucristo i yebague dujaricũ turaro mucubirirãca mũa mera. Eropirã mucubirirã mũa mera Jesu core niguirãca.

20 Eropa ta ãhraa. Mũare ñagũ Jesupũ “Õaro buhenirã ãhraa mũa,” arĩgũcumĩ gũare. Eropirã õaro mucubirirãca gũa.

3

1-2 Eropii mũare yoari boje gũa ñabirã mũare burigã peediarã irire guñarã Timoteore mũa pohrogue obeoabũ. Ñgũ mari acaweregũ Jesu yagũ Goãmũ pohro majagũ gũa mera õari buherire buhegũ ãhrimi. Eropirã ñgũre obeoabũ Jesucristore mũa õaro umupeoburire mũa mucubiriburi sãre. Ñgũre obeorã gũa seyaro Atena maca dujabũ.

3 Mũa Jesucristore umupeora waja gajirã mũare ñero iiañorã. Eropirã mũa Jesu yare mũa cóãbiriboro dopa itamubure obeoabũ Timoteore mũa pohrogue. Mari Jesu yarã árirãre eropa ta gajirã marire ñero taricũ iirãcoma. Irire masia mũa.

4 Mũa mera ero coreguere árirã õpa arĩ weretuhajabũ mũare: “Mari Jesucristore umupeora waja gajirã marire ñero iirãcoma,” arĩ weretuhajabũ mũare. Eropirã gũa werediro dopa ta erã ñero iima mũare. Irire mũa õaro masia.

5 Eropigũ mũare mahitariagũ mũare yoari boje ñabigũ mũare burigã peediabũ yũhũ. Eropigũ Timoteore obeoabũ yũhũ mũa Jesure umupeorire masibu. “Watĩ mũare ñero iidoreri,” arĩgũ, “Mũare gũa buherare mũague duhuri,” arĩgũ ñgũre obeoabũ yũhũ.

6 Eropigũ dohpaguere Timoteo mũa pohrogue áridi gũa pohrogue dujarami. Eropa dujaragũ õari querere gũare wereami ñgũ. Jesure mũa õaro umupeorare mũa gajirã mera õaro mahira sãre ñgũ wereami gũare. Eroparĩgũ gũare mũa õaro guñara sãre wereami. “Erã sã mũare burigã ñadiama,” arĩ wereami ñgũ gũare. Ñgũ eropa arĩ werecũ peerã mucubiria.

7 Eropirã gũa dohpaguere ñero tarirã áriquererã mũa Jesure õaro umupeocũ peerã gũa mucubiria.

⁸ Jesure mũa ðaro umupeorare pee ĩgu yare mũa cõãbirirare peerã ðaro pepia gũa.

⁹ Eropa pepirã Goãmũ ĩaro gũa bũrigã mucubiria. Eropa mucubirirã Goãmũre serẽa, "Õhaa," arĩrã.

¹⁰ Eropirã gũa basi mũare ĩaburire Goãmũre serẽniguia. Òmuri ñamiri sãre serẽniguicãa. Mũare ĩadiarã Jesucristo yare mũa ðaro masipehocũ itamudiaca ĩgũre mũa ðaro umupeonemoboro dopa.

¹¹ Goãmũ mari Pagũ ĩgu basi mari Opũ Jesu mera gũare itamuporo mũa pohrogue gũa waburire.

¹² Eropigu mari Opũ Jesu árĩpehrerã mũa mera majarãre árĩpehrerã gajirã sãre mahinemoburire iiporo mũare. Gũa mũare mahi umupeodiro dopa ta mũa sã bũrigã mahinemocũ iiporo mũare.

¹³ Mũare ĩgu ðaro itamuri mera mũa dipuwaja marirã ñeri marirã árĩrãca Goãmũ mari Pagũ ĩacũ. Eropa ta árĩrãca mũa mari Opũ Jesu dujaricũ árĩpehrerã ĩgu yarã ðarã mera i yebague.

4

Goãmũre mucubiricũ iidiarã ðpa iique, arĩ were gojañumi Pablo

¹⁻² Dohpaguere Jesu mari Opũ ĩgu dorero mera mũare ðpa werea: "Goãmũre mucubiricũ iidiarã ðpa iique," arĩ buheabũ gũa mũare. Gũa eropa buhera pũhrũ gũa buhediro dopa ta iayoro mũa. Iri buherire ðaro masia mũa. Eropirã mũa Goãmũ yare ðaro iirã ãhraa. Eropirã mũa eropa iidiro dopa ta duhubirã ta. Mũraro ta iinemoque daja. Irire bũrigã werea mũare.

³ Irire mũare werenemogũra. Mũa ðpa árĩcũ gahmemi Goãmũ. Ñerire iibirã Goãmũ yare iirã árĩque. Eropirã nome mera ñero iiro mariro árĩque mũa ũaa. Mũa nome sã ũaa mera ñero iiro mariro árĩque.

⁴ Ñero iibiraro mariro umupeori mera mũa marasã nomere opaque. Mũa irire masicũ gahmemi Goãmũ.

⁵ Goãmũre gamebirã Goãmũre masibirã ñerire ¼aribejarã nomere erã gamero dopa ta iibiricãque mũa.

⁶ Òpa ta mũa iibiricũ gahmemi Goãmũ: Ne yujugũ mũa acaweregũ marapore yajabiricãporo. Eropa yajagũ ĩgu acaweregũre umupeobigu iimi ĩgu. Eropigu eropa iigũre mari Opũ iri ñerire ĩgu ya dipuwaja moabu árĩgu tiimi. Eropirã mũare gũisãrã irire wereabũ mũare.

⁷ Ñerire pepimorãre, ñerire iimorãre beyebirimi marire Goãmũ. Ñerire iibirimorãre ðarire iimorãre beyemi Goãmũ marire.

⁸ Eropigu õarire mari iimorã áricũ ĩgu Espírítu Santo odigu árími marire. Eropirã iri ñerire iibiricãro gahmea. Eropigu yujugu i gua wererare yuhribigu Goãmu yapu sãre yuhribigu áhrimi.

⁹⁻¹⁰ Mũa acawererãre, Jesu yarãre mũa game mahiburire Goãmu mũare buhetuhajami. ĩgu eropa buhecũ mũa diaye ta Jesu yarãre Macedonia majarã sãre árĩpehrerãre õaro mahi umupeo waĩcũa. Mũa eropa mahicũ peegu “Mũa acawererãre mahique,” arĩ buhebeaa daja mũare. Eropigu õpa dorea daja yũũ. Mũa gajirãre mahiro dopa ta erãre mahinemoque.

¹¹ Eropirã mũa basi game ĩhaturiro mariro árĩque. Gajirãre gajiropa arĩ wereniguibiricãque. Eropa ĩacãque erãre. Eropirã mũa ya mohmeripũre õaro mohmeque. Ero coregue ta mũare eropa iidoreabu.

¹² Mũa eropa mohmerã gajirãre barire amasome. Eropirã erã mũare õaro wereniguirãcoma.

I yebaguere Jesucristo ĩgu dujariborore werepu Pablo

¹³ Jesure gamebirã Jesu pohroguere wasome. Eropirã erã mera majarã erã sĩricũ ĩarã burigã bujawerema. Sĩrinirã mũa erã waborore diaye ta õaro mũa masicũ gahmea gua. Gajirã erã bujawerediro dopa mũa bujawerebiriboro dopa mũare masicũ iidiaa.

¹⁴ Jesu ĩgu sĩrira pũhrũ masa mũriadigu arĩmi. “Iri diaye ta áhrra,” arãa mari. Eropa arĩrã arĩrã i sãre “Diaye ta áhrra,” arãa mari. Goãmũpu ĩgu yarã sĩrinirã mũrare erã masa mũriacũ Jesu mera aricũ iigucumi. Iri sãre “Diaye ta áhrra,” arãa mari.

¹⁵ Mari Opũ ĩgu buhediro dopa ta ire werea. Jesucristo ĩgu dujaricũ ĩgu yarã ojocarirã sĩrinirã core masa mũriamũhtasome. Sĩrinirã mũrapũ ojocarirã core masa mũriamũhtarãcoma.

¹⁶ Ópa árĩroca Jesu ĩgu dujaricũ: Mari Opũ ĩgu basi dijarigucumi umũsigue árĩdigũ. Dijarigu busũro mera werenigui, doregucumi. ĩgu dorecũ ĩgu anyua opu burigã piyugucumi. Eropa ĩgu piyucũ Goãmu ya corneta busũmũriroca. Erã eropiicũ Cristore umupeonirã sĩrinirã mũa masamũria mũhtarãcoma.

¹⁷ Erã pũhrũ mari ojocarirãre sĩrinirã masanirã mera Goãmu aĩ mũriagucumi. ĩgu eropa iicũ mari Opũ Jesure bocatĩrirãca mari. Eropirã mari Opũ Jesu mera árĩniguicãrãca.

¹⁸ Eropirã i yũ wererare mũa mera majarãre wereque. Eropa arĩ wererã mucubirirãca mũa árĩpehrerã. Mari Opũ Goãmu ĩgu wereri ta áhrra i.

5

¹ Jesu ĩḡu dujariburinũre “Inũri árĩcũ ĩḡu dujarigũcumi,” arĩ mũare were gojabeosome.

² ĩḡu dujaririnũre marire masima masiya mara. Yajari masũ ñamigue guñaña mariro ĩḡu yajagũ ariro dopa ta i yebaguere mari Opũ guñaña mariro dujarigũcumi. Iri sãre masia mũa.

³ Eropirã masapũ “Dohpaguere mari õaro árĩcãa. Guhyari mara marire,” erã eropa arĩ pepirisubu mata ñero waroca erãre. Ero eropa wacũ ne nohogue gohra duhri wiria masisome. Dederea warãcoma. Niji wahgũgo guñaña mariro igo pũriro pepiro dopa guñaña mariro eropa waroca masare Jesu ĩḡu dujaricũ.

⁴ Yũ acawererã, mũapũre eropa wasome. Yajari masũ wihi opũre ĩḡu ucudiro dopa ta mũapũre eropa wasome. Jesu arigũ mũare ucusome. Naitĩarore erã ĩha masibiro dopa gajirã Jesure ne masibeama. Mũapũ erã iro dopa árĩbeaa.

⁵ Mũa árĩpehrerã Jesu yarã ãhraa. Eropirã boyorore erã ĩha masiro dopa ta Jesu ĩḡu ariborore masia mũa. Gajirã ĩḡure masibirã iro dopa árĩbeaa mũa. Eropirã ucasome ĩḡu dujaricũ.

⁶ Eropirã carĩrã iro dopa árĩbircãro gahmea. Õaro pee masirã ãhri Goãmũ yare õaro pepiro gahmea. Eropirã Jesucristo dujariborore õaro corero gahmea.

⁷ Ñamire carĩrã dopa árĩbircãro gahmea. Ñamire mererã dopa árĩbircãro gahmea.

⁸ Ũmũre árĩro dopa õaro pee masi árĩro gahmea. Eropirã marire watĩ ñero iidoreburire iibircãro gahmea. Surara gamewejẽḡu wagũ come suhriro saña, come sãpea peya ĩḡu cãhmotaboro dopa mari sãre watĩ ñero goroweoborore cãhmotaro gahmea. Őpa iiro gahmea watĩre cãhmotabure: Jesucristore “Diaye iĩḡu ãhrimi,” arĩ umupeoniguicãro gahmea. Goãmũre masa sãre mahiniguicãro gahmea. Eropirã Jesu mera mari Goãmũ pohro mari árĩburire masi corero gahmea. Mari eropiirã ñero iibiriburire cãhmotarã árĩrãca.

⁹ ĩḡu dipuwaja moamorãre marire beyebiripũ Goãmũ. Jesucristo mari Opũ marire dipuwaja marimorãre, peamegue wabonirãre ĩḡu taumorãre beyepũ marire.

¹⁰ ĩḡu Jesu mari ya árĩburire ta sĩribasadiḡu árĩmi ĩḡu mera mari árĩburire. Eropirã ĩḡu dujaricũ ojocarirã árĩrã sĩrinirã sã yujuropa ta ĩḡu mera árĩrãca mari ĩḡu yarã árĩrã.

¹¹ Eropirã mũa mera majarãre dohpague mũa mucubiricũ iidiro dopa ta mũa basi mũa mucubiricũ iique daja. Eropirã

mua basi ta Goãmure umupeonemocũ iique mua mera majarãre Goãmũ yare wererã.

Jesu yarãre Pablo weretuñumi

12 Jesucristo yare buherã mua õaro iiburire wererã ãhrima mua pohro. Erãre mari Opũ Jesucristo buhedoregu beyeñumi. Erã ãgu beyenirã árĩcũ õaro umupeoque erãre. Mua erãre eropa umupeocũ gamegu burigã dorea muare.

13 Erã mohmerire erã iicũ erãre mahiri mera õaro umupeoque. Eropirã gamequeãro mariro árĩrã gahmea.

14 Gua acawererãre, muare, õpa burigã werea daja. Mohmediabirãre mohmedoreque mua. Duhudiarãre “Goãmũ itamuri mera duhubiricãque,” arĩque erãre. Jesure merogã umupeorã sãre itamuque. Erã mata pee masibiricũ ãha guabiricãque erã mera.

15 Yujugu muare ãgu ñero iiquerẽcũ muapũ dipaturi ãgure ñero ii gamebiricãque. Mua mera majarãre árĩpehrerã gajirã sãre õaro mera umupeoque.

16 Eropirã umuri nucũ Goãmũ mera eropa mucubiriniguiçãro gahmea muare.

17 Eropirã Goãmure eropa serẽniguiçãro gahmea.

18 Mua õaro tarirã, mua ñero tariquererã Goãmure “Õhaa,” arĩro gahmea. Goãmure “Õhaa,” arĩrã, Goãmũ ãgu gamediro dopa ta iirãca mua Jesucristo yarã árĩrã.

19 Eropirã Espĩritu Santo muare ãgu wererire yuhribirã árĩbiricãque.

20 Espĩritu Santo ãgu masiri mera gajirã muare buheama. Erã eropa buhecũ erã buherire gamebirã árĩbiricãque.

21 Eropirã gajirã muare gajiropa erã arĩ buhecũ iri Goãmũ ya árĩbiricũ masique mua. Eropirã Goãmũ ya buheri iri árĩcũ sãre masique mua. Eropirã õari dihtare gameque.

22 Eropirã iri ñerire árĩpehreri ñerire gamebiricãro gahmea.

23 Eropigu Goãmũ marire õaro iirã árĩcũ iigu ãhrimi. ãgu ãgu basi muare ãgu yarãre mua õarã ñeri marirã árĩcũ iinemoporo muare. Mua dupũ sãre mua sĩporã sãre õaro ãhadibuporo muare. Mari Opũ Jesucristo i yebaguere ãgu dujariboro core Goãmũ muare õaro ãhadibuporo mua ñerire iibiriboro dopa. ãgu eropa iicũ Jesucristo dujaricũ ñeri marirã árĩrãca mua.

24 Eropa ta iigucumi Goãmũ. ãgu muare beyedigũ ãgu arĩdiro dopa ta iimi.

Pablo erãre õadorebeoñumi

25 Gua ya õaro árĩburire Goãmure serẽbasaque mua sã, gua acawererã.

²⁶ Jesu yarãre bocatĩrirã árípehrerãre mahiri mera mo-
joto ñeaque m̃a.

²⁷ Jesu mari Op̃u ĩg̃u doreri mera m̃are werea yuh̃u.
Árípehrerã Jesu yarã gamenererãre ip̃ure buheque m̃a.

²⁸ Jesucristo mari Op̃u ĩg̃u mahiri mera m̃are b̃urigã
õadorea. Eropa ta árĩniguicãporo. Irip̃eta ãhraa.

2 Tesalonicenses

Pablo ïgu mera majarã mera gojabeoñumi daja Jesu yarã Tesalónica majarãre

1 Yũhũ Pablo, Silvano mera, Timoteo mera ipũre mũare gojabeogu iiaa. Mũa Tesalónica majarã mari Pagũ yarã ãhraa. Mari Opũ Jesucristo yarã ãhraa mũa.

2 Eropigu mari Pagũ Goãmũ, Jesucristo mari Opũ mera mũare ðadoreã. ïgu itamuri mera ðaro árĩque mũa.

I yebaguere Jesucristo dujarigu dipuwaja moagũcumi, arĩ gojañumi Pablo

3 Mũa Jesucristore “Diaye ta iigu ãhrimi,” arĩ umupeorã umupeonemorã árĩ waĩcuabũ. Eropirã mũa gajirãre mahi umupeorã turaro mahi waĩcuabũ. Mũa eropa árĩcũ pee Goãmũre ðaro mera serẽro gahmeã guare. “Mũhũ erã mera ðaro iiaa,” arĩro gahmeã Goãmũre.

4 Mũa Jesure umupeora waja gajirã mũare erã ñero iiquerecũ mũa ñero tariquererã Jesure umupeonigui waĩcuabũ. ïgũre umupeorã duhubirã waĩcuabũ. Mũa eropa iicũ pee mucubiriri mera wereã guã gajirãre Goãmũ yarãre.

5 Eropirã mũa Jesure umupeora waja gajirã mera ñero tariquererã Goãmũre umupeoniguicã waĩcuabũ. Goãmũpũ diaye iigu ãhrimi. Eropigu ïgu mũa ïgũre eropa umupeocũ ïha ïgu Opũ árĩroguere wadoregũcumi mũare.

6 ïgu Goãmũ diaye iigu árĩgu gajirãpũre mũare ñero iinirãpũre erãpũre ñero taricũ iigũcumi Goãmũ.

7 Eropigu mari ñero tarinirãre marire soocũ iigũcumi mari Opũ Jesu dujarigu. ïgu dujarigu anyua turarã mera peame ãjũro iro dopa dehyoagu arigũcumi umarogue.

8 Eropa arigu Goãmũre masibirãre erã ya dipuwaja moagũcumi. Mari Opũ Jesucristo ïgu ðari buherire tarinũganirãre dipuwaja moagũcumi erãre.

9 Eropirã erã erã ya dipuwaja dedererãcoma. Peamegue ñero tariniguirãcoma. Eropirã erã mari Opũ Jesu ïgu dorerogue ïgu ðari árĩroque ne wamasisome. Eropa ta waroca irinũre Jesucristo ïgu dujaricũ.

10 Irinũ ta ïgu aricũ ïgu yarã ïhamariarã “Diaye ta turagu, ðagu ãhrimi,” arĩ wereniguirãcoma. Eropirã ïgũre ðaro peenirã ïgũre ïarã umupeorãcoma ðaro ïgũre. Mũapũ Jesu yare guã buherare ðaro peeabũ. Eropirã mũa sã ïgu mera árĩrãca.

¹¹ Eropirā Goāmure serēniguica gūa mūa ya árīburire. Ōpa arī Goāmure serēbasaa ĩgure mūare itamudorerā. “Erā mū beyenirā mū árīro dopa ta erā árīcū iique,” arī serēbasaa. “Goāmū, mū doreri mera erā ōaro iidiarire erā iicū itamuque. Erā mūre umupeorā mū gamerire erā iicū iique,” gūa arī serēbasaa Goāmure.

¹² Mūa eropa Goāmū gamerire iicū ĩha gajirā sā umupeorācoma mari Opū Jesucristore. Eropigū Jesucristopū mūare ōaro ĩagūcumi. Eropigū Goāmū marire mahigū gūa arī serēbasaro dopa ta iigūcumi mari Opū Jesucristo mera.

2

Ñeri mera masare weresāgū dehyoagūcumi, arī gojañumi Pablo

¹ Dohpague mari Opū Jesucristo i yebaguere ĩgū dujariborore werenemodiaca yūhū mūare. ĩgure mari gamenere bocatīriburire werediaca. Eropigū ōpa arī buringā werea mūare, gūa acawererāre.

² Gajirā mūare ōpa arībocoma: “Mari Opū ĩgū dujariburinū, pehrerinū árīroque iiaa,” arībocoma mūare. Erā eroparīcū peerā pee ũcabiricāque. Eropirā peerā peewisibiricāque. “Goāmū yūre eropa ta arīdi árīmi,” arībocumi mūare gajigū. Gajigū sā mūare buhegū eropa ta arībocumi. Gajigū sā eropa ta arī gojabeobocumi, “Yūhū Pablo ta āhraa,” arī gūya gojabeogū. Irire mūare weregure masibea yūhū.

³ Eropirā gajirā mūare gūyacū ne peebiricāque. Irinū Jesucristo dujariburinū árīboro core ōpa waroca. Bajarā masa Goāmure cóārācoma. Eropigū ñeri mera masare weresāgū dehyoamūhtagūcumi. ĩgū dederebu árīgū āhrimi.

⁴ ĩgū Goāmure umupeorire, goāmarā sāre umupeorire gamebigūcumi. ĩgū dihtare umupeodoregū “Árīpehreri weca opū āhraa yūhū,” arīgūcumi ĩgū. Eropigū ĩgū Goāmū ya wihi doagū, “Yūhū ta Goāmū āhraa,” arīgūcumi ĩgū masare ĩgure umupeodoregū.

⁵ Yūhū mūa mera árīrasubure irire ta werebū. ¿Irire guñari mūa?

⁶ Dohpaguere ĩgure ñeri mera masare weresāgure árīdorebeami dohpa. ĩgure árīdorebigure masica mūa. Queorinū árīcū ĩgū ñeri mera masare weresāgū dehyoagūcumi.

⁷ Dohpaguere ĩaro mariro ĩgū ñerire mohmenūgatuhajacumi. ĩgū ñeri iidiarire árīpehrerire

iimasibeami dohpa. Īgure árĩdorebigu ĩgu wara pũhrũ árĩpehrerire ñerire iigu ĩgu ñeri mera masare weresãgu dehyoagũcumi.

⁸ Eropiira pũhrũ mari Opũ Jesucristo ĩgu wereniguiiri mera ĩgure wejẽcãgũcumi. Eropigu Jesupũ dujarigu ĩgu dehyoari mera ĩgure wejẽ dedecãgũcumi ĩgure.

⁹ ĩgu ñeri mera masare weresãgũpũ watĩ dorero mera arigu baja deyoro moaro dopa árĩrĩre ii gũyagũcumi masare.

¹⁰ ĩgu eropa árĩpehrerire ii gũyacũ peamegue wamorãpũ ĩgure peerãcoma. Erã diaye árĩrĩre gamebirã áhřima. Erã eropa gamebircũ Goãmũ erãre dederemorãre tausome.

¹¹ Eropigu diaye árĩrĩre gamebirãre Goãmũ erãre gũyaripũre peecũ iigũcumi.

¹² Goãmũ árĩpehreri diaye árĩrĩre peediabirinirãre, ñerire iidianirãre erã ya dipuwaja moagũcumi.

Goãmũ mũarũre beyeñumi ĩgu taumorãre, arĩ gojañumi Pablo

¹³ Acawererã, mari Opũ mahirã, matague ta Goãmũ mũarũre dederebonirãre ĩgu taumorãre beyepũ mũare. Mũa Espĩritu Santo itamuri mera ñeri mariro mũa árĩmorã sãre beyepũ. Mũa ĩgu yare peemorã árĩmorãre beyepũ. Eropirã ĩgu mũare beyerare guñarã Goãmũre serẽrã "Ōhaa," arĩnigũicãro gahmea gũare.

¹⁴ Eropigu iri õari buherire gũa buhera mera Goãmũ mũare ĩgu yarã árĩcũ iimi mari Opũ Jesucristo ĩgu õari oparire mũa sã opaboro dopa.

¹⁵ Eropirã õaro guñaturãrã árĩque mũa. Eropirã gũa wereniguiiri mera gũa gojabeorapũri mera iri buherire õaro guñaque mũa. Eropirã iri buherire tarinũgabircãque.

¹⁶ Mari Opũ Jesucristo ĩgu basi Goãmũ mari Pagũ mera marire mahigũ, mũmuri nũcũ marire mucubircũ iimi. Marire mahigũ peamegue wabonirãre taugũcumi marire. Eropirã Goãmũ ĩgu tauborore õaro masi mucubiria mari.

¹⁷ Eropigu Jesucristo mari Pagũ mera mũare sĩporã turanigũicũ iiporo. Eropigu mũa ĩgu yare duhubircũ iiporo. Árĩpehreri õari iirire õari wereniguiiri sãre mũare iicũ iiporo.

3

Gũa ya árĩburire Goãmũre serẽbasaque, arĩ gojañumi Pablo

¹ Acawererã, dohpague gũa ya árĩburire Goãmũre serẽbasaque. Mari Opũ buheri cãhmotaro mariro bajarã masare buheburire serẽbasaque. Eropirã ĩgu buherire

mua õaro gamediro dopa ta gajirã bajarãpu iri buherire umupeori mera erã gameboro dopa serẽbasaque mua Goãmure.

² Gajirã Jesure umupeobeama. Eropirã erã Jesure umupeobirã ñerã masa guare erã ñero iidiarire Goãmure serẽbasaque guare igu itamuboro dopa.

³ Mari Opu õagu igu werediro dopa ta iimurimi igu. Eropigu muare igure umupeocũ iigacumi. Eropigu mua ñero iibiriburire igu muare cãhmotagucumi.

⁴ Igu muare igu eropa cãhmotarare masia gua. Eropirã muare gua dorediro dopa ta iiaa mua. Eropirã irire iirãca daja muraro ta. Iri sãre masia gua.

⁵ Eropigu mari Opu Goãmũ igu muare mahirire muare masicũ iiporo. Eropigu Cristo ñero taririsubu igu sãporã turadiro dopa ta mua sãre sãporã turaniguicũ iiporo mari Opu.

Marire turaro mohmero gahmea, arĩ gojañumi Pablo

⁶ Jesucristo mari Opu igu dorero mera õpa dorea muare: Mua Jesu yarã mera majarã mohmediabirãre gua dorerire iibirãre wapicubiricãro gahmea. Eropa ñacãque erãre.

⁷ Sohõ árĩrasubu mua mera gua árĩrasubure gua turaro mohmecũ ñabu mua. Eropirã gua iidiro dopa ta mua sãre mohmero gahmea. Mua basi irire õaro masia.

⁸ Eropirã mua barire waja mariro ne babirabu. Eropirã umuri nucũ, ñamiri sãre burigã mohmemurabu gua muare barire serẽri arĩrã.

⁹ Gua muare buhera waja muare wajayedoreboaya gua. Wajayedorebirã gua basi burigã mohmeabu mua guare ñacuburire.

¹⁰ Mua mera árĩrasubu õpa arĩ buheabu muare: "Mohmebigu babiricãporo," arĩ buhemurabu gua muare.

¹¹ Yujurãyeri mua mera majarã ne mohmebirañorã. Eropirã gajirãre serẽrã garibotariañorã erã.

¹² Eropirã mohmediabirãre mari Opu Jesucristo dorero mera õpa arãa: "Erã yare ñha erã basi mohmeporo erã baburire," arãa yuhũ.

¹³ Gua acawererã, muapu õarire iiniguirã gariborebiricãque.

¹⁴ Eropirã ero majarã yujugu ire gua gojabeo dorere tarinugacũ ñha masi igure wapicubiricãque. Igu ñero iira mera igu guhyasũuro pepiboro dopa igure wapicubiricãque.

¹⁵ Iguare wapicubiriquererã igure ñaturibiricãro gahmea. Igu mua acaweregu Jesu yagu ta ahrimi. Eropirã

ĩgũ tarinũgagũre õaro wereque ĩgũre ĩgũ dipaturi irire iibirimaja õaro dopa.

Pablo gojatuñumi

¹⁶ Mari Opũ marire õaro árĩcũ iigũ mera umari nũcu õaro árĩque mũa. Eropigũ “Mari Opũ mũa árĩpehrerã mera árĩporo,” arĩgũ mũare õadorea.

¹⁷ Dohpaguere yũ basi ta gojatugũ iiaa. Eropigũ mũare õadorea. Árĩpehreri pũrire yũ gojabeori pũrire õpa ta arĩ gojatuhaa yũhũ. Eropa gojatura pũhrũ yũ basi iripũre arĩ gojagũ árĩcũ masirãca mũa.

¹⁸ Mari Opũ Jesucristo ĩgũ mahiri mera bũrigã õadorea mũare árĩpehrerãre. Eropa ta árĩniguicãporo. Iripẽta ãhraa.

1 Timoteo

Pablo Timoteore gojabeopu

¹ Yũhũ Pablo mũre Timoteore ire gojabeogu iiaa. Goãmu marire peamegue wabonirãre taudigu ãhrimi. Jesucristo yare buhedoregu igu apidigu ãhrraa yũhũ. Mari Pagu Jesu mera igu dorediri dopa igu apidigu ãhrraa. Jesu ta marire itamumi. Eropirã marire igu tauborore masirã irire mucubiri cohrea mari.

² Yũhũ mũre Jesucristo yare buhecũ peegu Jesure umupeonugabu. Eropigu mũhũ diaye ta yu magu iro dopa arĩgu ta ãhrraa. Eropigu Goãmu mari Pagu mera, mari Opu Jesucristo mera ðadorea mũre. Eropigu igu itamuri mera ðaro arĩque mũhũ.

Pablo guya buherire buhedorebiripu

³ Sohõ arĩrasubure Macedonia yebague wagu mũre Efeso macague api tari wahgãbu. Ero yujurãyeri gaji buherire guya buherã arĩma. Iri buherire buhedorebiribure apibu yũhũ mũre.

⁴ Erã guyarã erã gamero buhemaacãma. Erã acawererã iribojegue majarã erã arĩ bocarare eropa buheniguicãma. Iri buheri mera gajirãre dũyasocũ iima. Eropirã Goãmu igu dorerare gajirãre iicũ iibeama erã eropa buherã. "Goãmu yũre itamugucumi," arĩ umupeorã igu dorerare iima. Eropigu erã gamero buhedorebiribure apibu yũhũ mũre.

⁵ Goãmu õpa gahmemi. Neri dipuwaja mariri mera, õari guñari mera, diaye Jesucristore umupeori mera, gajirãre mari mahi umupeoburire gahmemi. Irire erã iiboro dopa apibu mũre.

⁶ Erã yujurãyeri i õari buheripũre cóãtuha gaji buheripũre gahmema daja. Eropirã iri buheripũre dũyaso gorowerema. Iri erã buheri erã game dũyasori duhpiburi arĩbeaa.

⁷ Erã Moise dorerire masare buherã arĩdiaquererã ta erã basi ne ðaro masibeama. Eropirã guhyadiaro mera buhequererã erã buherire ne masibeama erã.

⁸ Moise dorerire diaye ta mari buhecũ õari doreri ãhrraa. Irire mari ðaro masia.

⁹ Iri dorerire buherã ire masiro gahmea: Iri doreri ðaro iirãre erãre buheburi arĩbeaa. Nero iirãpũre erãre buheburi ãhrraa. Õpa ta iirãre buheburi ãhrraa: Dorerire tarinugarãre, Goãmũre tarinugarãre, ñeri dihtare iirãre,

Goãmure gamebirãre, ñero werenigui corerãre, erã pagu sumarãre wejẽrãre, erã pago sã nomere wejẽrãre, gajirã masare wejẽrãre,

¹⁰ nome mera ñero iirãre, uma mera ñero iirã nomere, uma seyaro ñero iirãre, nome seyaro árĩquererã ñero iirãre, masa porãre yaja duarãre, guyaricurãre, Moise dorerire erãre buhehuri áhraa ii. Eropiro gajirã árĩpehrerãre õari buherire tarinugarãre buhehuri áhraa Goãmũ ĩgu doreri.

¹¹ Goãmũ õagu ĩgu õari buheri mera iri ñeri iirare cóãdoremi. Iri buheripure yure Goãmũ buhedoremi.

Goãmũ ĩgu marire mojomoro ĩarire wererũ Pablo

¹² Eropa yu buhecũ, Jesucristo mari Opũ turarire ĩgu ogu itamumi. "Pablo õaro buhegucumi yahare," arĩ pepiñumi Jesu yure. Eropigu yure beyegugue ta ĩgure itamubure apimi yure. ĩgu eropa iicũ "Õhaa," arãa yũhu ĩgure.

¹³ Iribojegue yu Jesucristore ñero wereniguiquererã ta, ĩgu yarãre ñero iiquererã ta ĩgu yure beyemi. Eropigu ĩgure masinibigu ĩgu yarãre ñero iigu "Ñero iigu iica," arĩ pepibirimãricarabũ. Yu eropa masibiricũ ĩagu ĩgu mojomoro ĩami yure.

¹⁴ Eropigu Goãmũ mari Opũ yure burigã mahigu õaro iimi yure. Eropigu Jesucristore umupeocũ iimi ĩgu yure. Eropigu ĩgure masa sãre mahicũ iimi yure.

¹⁵ Yu gajirã tauro ñetariagu árĩribũ. Ñerã mari árĩquererã ta Jesucristo mari ñerire cóãbu i yebaguere erami. Marire peamegue wabonirãre taubu erami. Iri diaye ta áhraa. ĩgu eropa árĩgu árĩcũ árĩpehrerã irire masiporo.

¹⁶ Ñetariagu yu árĩquererã ta ĩgu yure mojomoro ĩami. Eropa mojomoro ĩagu Jesucristo guaro mariro, ĩgu yure õaro iirare masicũ iigu iimi. Pũhrũ ĩgure umupeomorã erã sã ĩgu õaro mojomoro ĩaburire erã masiboro dopa õaro iimi yure. ĩgure eropa umupeorã árĩpehrerĩnũri umaroguere eropa õaro árĩniguiicãrãcoma.

¹⁷ Goãmũ árĩpehrerĩnũri masa tauro opũ áhrimi. ĩgu ne sĩribeamĩ. Mari mera ĩgu árĩquererã ta ĩgure ĩabeaa mari. Eropigu ĩgu dihta Goãmũ gohra áhrimi. Eropirã "Diaye ta õagu, turagu áhrimi ĩgu," arĩrã ĩgure. Umũri nũcu ĩgure umupeorã. Eropa ta iirã.

¹⁸ Timoteo yu magũ iro dopa ta áhraa mũhũ. Eropigu dohpaguere ire mũre dorea. Jesu yarã Goãmũ ya weremũhtarã erã mũre werediro dopa ta mũre dorea. Cristo yare õaro wereniguique. Eropigu ñero tariqueregu ta ĩgure umupeo duhubiricãque mũhũ.

¹⁹ Jesure eropa umupeoniguicãque. Ñeri dipuwaja mariro árĩque. Eropigu õari dihtare iique. Yujurãyeri irire iibirã Jesu yare erã cohãma. Eropa cóãrã ãgure umupeo duhucãma.

²⁰ Eropa ta iياما Himeneo, Alejandro mera. Eropigu "Watĩ ãgu gamero erãre iiporo," arĩgu eropa apicãbu erãre Goãmure erã ñero werenigunemobiriboro dopa.

2

Goãmure serẽbasarire werepu Pablo

¹ Dohpaguere õpa arĩ doremũhtaa mũare: Árĩpehrerã ya árĩburire Goãmure serẽbasaque. Eropa serẽrã "Õhaa," arĩque Goãmure.

² Oparã, gajirã masa tauro dorerã sãre, erã õaro doreburire Goãmure serẽbasaque erãre mari õaro árĩricũ árĩboro dopa. Eropirã gamequeãro mariro ñeri marirã Goãmure umupeorã mari õaro árĩboro dopa erãre serẽbasaque.

³⁻⁴ Eropa ta gajirã ya árĩburi sãre mari Goãmure serẽbasacũ õapũricãa. Irire mari iicũ ãagu Goãmu marire taubupu marire õaro ãhasuami. Árĩpehrerã masa peamegue wabonirãre ãgu taumorã dihta árĩcũ gahmemi Goãmu. Eropigu õari buherire diaye majare erã masicũ gahmemi ãgu. Eropigu gajirã ya árĩburire mari ãgure serẽbasacũ mucubirimi Goãmu.

⁵ Yujugu ta ãhrimi Goãmu. Eropigu Goãmu mera mari õaro árĩcũ amubasagu yujugu ta ãhrimi. ãgu ãhrimi Jesucristo. Jesucristo sã masu ta ãhrimi.

⁶ Eropigu árĩpehrerã erã ñeri iira dipuwajare wajayebasadigu árĩmi ãgu crusague sãridigu. Eropigu Goãmu ãgu queorasubu masare ire masicũ iimi.

⁷ Masa masicũ iibure ãgu yare werebure irire Goãmu yure apimi. Eropigu judio masa árĩbirãre Jesure umupeoburire õari buherire buhebure beyemi yure. Diaye ta mũre weregu iiaa yũhu. Guyabeaa.

⁸ Árĩpehrero majarãpu Goãmu yare õaro iirã Goãmure erã serẽcũ gahmea. Eropa Goãmure serẽrã erã guaro mariro, game duyasoro mariro erã árĩcũ gahmea.

⁹⁻¹⁰ Nomezure Jesu yarã erã õaro árĩricurire iicũ gahmea. Eropirã queoro erã ejatuharo suhri sañarã árĩporo. Eropirã gajiropa bejari poaricũ "Yũhu õago ãhraa," arĩ ãmubiricãporo. Eropirã õari dari oro dari waja pagari buyarire, õari suhri waja pagari suhri sañarire guñabiricãporo. Eropirã õaro erã iira mera, erã õarã nome Jesu yarã nome erã árĩrere ii ãmuporo.

11 Ejarimariro umupeori mera peerā ōari buherire peeporo erā nome.

12-14 Eropirā nome m̄ua gamenererogue ʘmare buhebir-icāporo. Eropirā ʘmare dorebiricāporo. Erā nomep̄u ejarimarirā nome árīporo. Goām̄u Adánre ihacūnugum̄htañumi. Īḡu p̄hr̄u Evare ihacūnuguñumi. Eropiḡu watī ĩḡu ḡuyacū peediḡu Adán árībiriñumi. Īḡu ḡuyacū peedigop̄u Eva árīñumo. Eropa ĩḡu ḡuyacū peego Goām̄ure tarinugago wañumo igo. Eropirā nomep̄u ʘmare dorebir-icāporo.

15 Nomeo árīm̄htadigo igo tarinugaquerecū ta nome erā porāre ōaro opacū ĩaḡu erāre Goām̄u peamegue wabonirāre tauḡucumi. Eropirā nomep̄u Goām̄ure erā umupeoniguicācū, Goām̄u erāre itamuḡucumi. Eropiḡu masare Goām̄u sāre erā mahiniguicū pee masirā nome erā árīniguicū Goām̄u itamuḡucumi erāre.

3

Jesu yarā tauro oparā erā iiburire werep̄u Pablo

1 Jesu yarā doreḡu árīdiaḡu ōarire iidiaḡu āhrimi ĩḡu. Iri diaye ta āhraa. Eropiḡu Jesu yarā doreḡure apiḡu ōpa árīḡup̄ure beyeque.

2 Dipuwaja marigure beyeque. Eropirā gajirā ĩḡure weresā masiya mara. Eropiḡu yujugore ta marapocuḡu árīḡure beyeque. Eropiḡu ōaro pee masigure, ḡuhyadiagure, masare ōaro mera ĩḡu wihire ñajaridoregure, gajirāre ōaro buhemehregure beyeque m̄ua.

3 Eropa beyeḡu ne merebigure, gamequeābigure, masare ōaro iiḡure, game d̄uyasobigure, niyerure gamebigure beyeque.

4 Īḡu porāre ĩḡu marapo sāre ĩḡure umupeori mera erā ȳhrirā árīcū iiḡure beyeque Jesu yarāre dorebure.

5 Īḡu porāre ĩḡu marapo sāre ōaro ȳhricū iimasibiḡu árīḡu Goām̄u yarā sāre ōaro ȳhricū iimasibiribocumi.

6 Jesu yarā op̄u árībure beyeḡu ne Jesu yaḡu ñajagure beyebita. Ne ñajagure beyecū ĩḡu “Jesu yarāre tauro āhraa ȳh̄u,” arī pepibocumi. Īḡu eropa arī pepicū Goām̄u ĩḡure dipuwaja moadorebocumi watire ĩḡu iidiro dopa ta. Watī Goām̄u tauro árīdiari waja Goām̄u ĩḡure dipuwaja moap̄u. Eropiḡu ne Jesure umupeoḡu árīḡure beyebita.

7 Jesu yarā doregure beyeḡu Jesu yarā árībirā “Ōaḡu āhrimi,” erā arīḡu dihtare beyeque erā ĩḡure werew̄abiriborore. Ōaro iiḡu ĩḡu árībiricū ĩarā gajirā

ĩgũre werewuabocoma. Eropigũ ĩgũ watĩ gamero dopa ta ĩgũ árĩbocumi.

Jesu yarãre itamurã diáconoare erã iiburire werepũ Pablo

⁸ Eropirã Jesu yarãre itamurãpũre beyerã òarã árĩrã sãre beyeque. Erã guhyadiaro árĩrãre, òaro diaye ta wereniguirãre, merebirãre, niyerure gamebirãre beyeque muhũ.

⁹ Eropa ta Jesucristore òaro umupeorã “Goãmũ yare òaro diaye ta ãhraa,” arĩrã árĩrãre beyeque.

¹⁰ Eropirã Jesu yarãre itamurã árĩdiarãre erã iirare ĩamuhtaque mua. Mua eropa ĩara pũhrũ erãpũ dipuwaja marirã árĩrã Jesu yarãre itamurã ñajaporo erã.

¹¹ Eropirã erã marasã nomepũ òpa árĩporo: Pee masirã nome, ñeri quere iibirã nome, guhyadiarã nome árĩporo erã nome sã. Eropirã árĩpehreri òarire iiniguirã nome árĩporo erã nome.

¹² Eropirã Jesu yarãre itamurãre beyerã yujurãyeri nome ta marapocurã árĩrãre beyeque. Erã porãre gajirã erã ya wihi majarã sãre òaro ĩhadiburã árĩrãre beyeque.

¹³ Mũ eropa beyenirã Jesu yarãre òaro erã itamucũ gajirã erãre òaro ĩhasuarãcoma. Eropirã òari buherire, Jesucristore erã umupeoburi sãre gũiro mariro buherãcoma erã.

Goãmũ ya buherire werepũ Pablo

¹⁴⁻¹⁵ Dohpaguere mũ pohrogue wadiagũ iiraa. Eropa wadiaqueregũ dohpaguere wanibigũ ipũ mera mũre were gojabeogũ iiaa. Jesu yarã gamenererã watope mua dohpa iiborore mũre were gojabeogũ iiaa, “Dohparagãre wabiri-boca,” arĩgũ. Jesu yarã Goãmũ ojocarigũ yarã ãhrima. ĩgũ yarã diaye árĩri buherire Goãmũ ya buherire òaro opama. Eropa oparã irire buheniguima.

¹⁶ I diaye ãhraa. Marire Goãmũ ĩgũ buhera mari òaro iiburi buheri ãhraa. Goãmũ iri buherire marire masicũ iimi. Iribojegue mari masibirira mũra òatariari buheri ãhraa. I buheri òpa ãhraa:

Ĩgũ Cristo mari dũpũ iro dopa ta dũpũcũgũ masa de-hyoadigũ árĩmi. Ōagũ ñeri marigũ ĩgũ árĩcũ ĩhmudi árĩmi Espĩritu Santopũ. Anyua sã ĩgũre ĩanirã árĩma. Eropirã gũa ĩgũ buhedore apinirã gaji yeba majarãre ĩgũ yare buhebũ. Eropirã i yebare masa bajarã ĩgũre umupeoama. Pũhrũ umarogue Goãmũ aĩadi árĩmi ĩgũre. Iri ta ãhraa òari buheri.

4

Òari buherire cóarãcoma arĩ werepũ Pablo Timoteore

1 Espíritu Santo ire ðaro weremi: Pehrerinũ coregã ujurãyeri masa Jesu ya buherire cóãrãcoma. Eropirã gũyari buheripũre watĩ yare buherãpũre peenũrũrãcoma erã.

2 Iri buherire buherã gũyaniguirã wererãcoma masare. Erã gũyaniguirãpũ “Gua tamerare dipuwaja mara,” arĩ pepirã arĩrãcoma. Erã ñero iirapũre ne guñasome.

3 Ōpa arĩ buherãcoma erã: “Marapocũbircãque. I barire babircãque,” arĩ buherãcoma erã. Erã eropa badorebiriqerēcũ ta Goãmũ barire ñhacũnugudi árĩmi mari baburire apigũ. Mari Cristore umupeorã árĩcũ ðari buherire mari masirã árĩcũ, mari ya árĩburire ðarire iri barire apipũ ñgũ. Iri barire oparã ñgũre “Ōhaa,” mari arĩcũ gahmemi ñgũ.

4 Árĩpehleri Goãmũ ñgũ ñhacũnugura ðari ãhraa. Eropirã ñgũ ñhacũnugurare barire arĩã. Goãmũre “Ōhaa,” arĩã, “Irire basome,” arĩbircãro gahmea. Iri barire basuaro gahmea marire. Eropirã “Irire babircãque,” gajirã erã arĩcũ peebircãque erãre.

5 ñgũ ñhacũnugura iri ðari árĩcũ weretuhapũ Goãmũ. Eropirã ñgũre “Ōhaa,” mari arĩra pũhrũ “Iri bari ðari bari ãhraa,” arĩ baro gahmea marire.

Jesu pohro majagũ ðagũre werepũ Pablo Timoteore

6 I yũ wererare diaye majare Jesu yarãre buhegũ Jesu-cristo pohro majagũ ðagũ ãhraa mũhũ. Eropa buhegũ ðari buherire peenũrugũ árĩgũca. Ōaro mũ peerare peenũru masipehogũ árĩgũca mũhũ.

7 Eropigũ eropa erã arĩ bocarare, Goãmũ ya maja árĩbirirare peebircãque. Eropigũ Goãmũ gameri dihtare iinigiãcũgũ árĩque mũhũ.

8 Mũ mohmepocũ ðañaria. Mũ mohmepodiro tauro Goãmũ gamerire mũ iipocũ ðataria mũre. Goãmũ gamerire iipogũ dohpaguere ðaro ãhraa mũhũ. Eropigũ mũ sĩrira pũhrũgue sãre masa mũriagũ ðaro árĩgũca mũhũ. Eropigũ Goãmũ gamerire iinigiãcũque.

9 Iri diaye ta ãhraa. Árĩpehlerã irire yũ arĩrãre masirã, “Diaye ta ãhraa,” arĩro gahmea erãre.

10 Eropigũ árĩpehlerã yũ arĩrãre masirã “Diaye ta ãhraa,” erã arĩburire Goãmũ gahmemi. Eropirã erã eropa iiburire mari turaro mohmea. Eropirã ñero taria mari gajirã marire ñero erã iicũ. Goãmũ ojocarigũ árĩpehlerãre peamegue wabonirãre taugũ ãhrimi. ñgũre umupeorã tamerare ñgũ taumi. Goãmũ marire ðaro iiburire masirã ñgũre

mucubirirã iiaa. Eropa mucubirirã Goãmũ gameripũre masa iiburire bũrigã buhe mohmea mari.

¹¹ Iri árĩpehřeri yũ arĩrare doreque Jesu yarãre. Eropigũ irire buheque mũhũ.

¹² Mamũ mũ árĩcũ ĩarã gajirã Jesu yarã mũre peediabiri-bocoma. Erã mũre peeboro dopa õpa ii ĩhmuque erãre: Masare mahique. Eropigũ Jesure umupeoturaniguicãque. Eropa árĩgũ dipuwaja marigũ árĩque. Mamũ árĩqueregũ ta mũ irire iicũ ĩarã mũre peerãcoma erã. Eropirã mũ wereniguirire peerã, mũ iirare ĩarã mũre ĩhacũrãcoma.

¹³ Eropigũ mũ pohrogue yũ ejaboro core õpa ii õaro mohmeyuque. Jesu yarã gamenererãre Goãmũ yare gojarapũre buhe ĩhmuque erãre. Eropigũ erãre irire buhetuha werenemoque daja. Eropigũ erãre õaro masinemocũ iique.

¹⁴ Ero core Jesu yarã oparã Goãmũ dorecũ erãpũ mũ weca erã mojotorire duhpeoma. Erã mũre eropa duhpeocũ Goãmũ ĩgũ turarire odi árĩmi mũre. Eropigũ Goãmũ ya árĩburire mũ mohmemasiburire apidigũ árĩmi mũre Goãmũ. ĩgũ mũre eropa mohmemasiburire apirare cãdijibita.

¹⁵ Yũ eropa wererare guña eropa ĩiniguicãque mũhũ. Mũ eropiira pũhũ õarire mũ ĩinemocũ árĩpehřerã ĩarãcoma.

¹⁶ Mũpũ õaro iique. Eropigũ õaro buheque mũhũ gajiropa buheri arĩgũ. Mũhũ eropiigũ ĩgũ taudigũ árĩgũ Goãmũ mera árĩniguicãgũca. Eropirã mũre peenirã sã ĩgũ taunirã árĩrã Goãmũ pohro árĩrãcoma.

5

“Jesu yarãre õpa iique mũhũ,” arĩpũ Pablo Timoteore

¹ Ne bũgũre turibiricãque. Mũ pagũre mũ õaro iidiro dopa ta, bũgũ sãre õaro mera wereque. Eropigũ mũ pagũ porãre mũ õaro iidiro dopa ta, mamarã sãre õaro umupeori mera erãre wereque.

² Eropigũ mũ pagore mũ õaro iidiro dopa ta mũrã nome sãre õaro umupeori mera wereque. Eropigũ mũ pagũ porã nomere mũ õaro iidiro dopa ta, nĩme sãre ñero ĩaribejaro mariro õaro umupeori mera wereque erãre.

³ Eropigũ wapeweyarã nomere diaye ta mojomorocũrã nomere umupeori mera itamuque erã nome sãre.

⁴ Wapeweyo porãcũgo igo árĩcũ pãramerãcũgo igo árĩcũ sãre, erãpũ igore itamuporo erã masura waja. Eropa itamurã Goãmũ masare erã acawererãre ĩgũ itamudorediro dopa ta iirã iima erã. Erã eropiicũ ĩagũ õaro Goãmũ mucubirimi.

5 Mojomorocũgo wapeweyo acawererã moogo árigo, Goãmũ igore itamuburire cohremo igoa. Eropigo ñamiri nũcũ, Ʃmũri nũcũ igo Goãmũre eropa serẽniguicãmo.

6 Gajigopũ wapeweyo árigo eropa iimaacãgo árigo ojo-carigo árĩquerego igo sĩporã dederebo sĩridigo iro dopa ta iimo.

7 Eropigũ i árĩpehreri yũ werera wapeweyo itamuburire Jesu yarãre iidoreque mũhũ. Őpa wereque erãre õari dihtare erã iiburire gajirã erãre werewũabiriburire.

8 Eropigũ yujugũ ĩgũ acawererãre ĩhadibubigũ, ĩgũ porã erã pago sãre õaro ĩhadibubigũ “Jesu yagũ ãhraa,” arĩmasibeami. Goãmũ dorediro dopa iibeami. Eropigũ Goãmũ ya buherire yũhribigũ ãhrimi. Jesure gamebirã tauro ñetariagũ ãhrimi ĩgũpũ.

9 Wapeweyarã nome mũa itamumorã árĩcũ erã waĩre gojaturãca. Mũa eropa gojaturã õpa árĩrãre erã waĩre gojatuque. Sesenta bojori ejabigo igo waĩre gojatubiricãque. Eropirã wapeweyo yujugũ ta marapũcũdigore gojatuque.

10 “Igo õarire iigo ãhrimo,” masa erã arĩgore gojatuque. Eropirã igo porãre õaro masugo árĩdigore gojatuque. Eropirã igo ya wihire gajirãre õaro mera ñajaridoregore gojatuque. Eropirã pohro majago iro dopa Jesu yarãre itamugore ñero tarirãre itamugore, árĩpehrerãre mojomoro ĩagore, õari dihtare iidiagore gojatuque. Eropa árĩrãre ĩagũ iripũ ta erã waĩre gojatuque mũa erã mũa itamumorã árĩborore.

11 Wapeweyarã nóme, nómeñari erã árĩcũ erã waĩre gojatubiricãque erã Jesu yarãre itamumorãre. Pũhrũ erã waĩre mũa gojatura pũhrũ erã gamero iidiarã Cristo yare duhu, dipaturi mojoto diribocoma.

12 Eropirã erã mojoto dirirã Cristore “Mũ yarãre itamugora,” erã arĩdirore iibiribocoma. Erã eropa iibirira dipuwaja dipuwajacũrãcoma.

13 Erã nómeñari eropa itamurã árĩrã tericũrã nome wahama. Eropirã wirigue ñajacurirã ñeri querere werenigui curima. Erã weredorebirirare werema erã nome.

14 Eropirã erã Jesu yarãre itamumorã ñajabiricãporo. Eropigũ erã õpa iicũ gahmea yũhũ: Wapeweyarã nome, nómeñari árĩrã mojoto diriporo daja. Eropirã erã porãcũporo. Eropirã erã ya wihi majare õaro ĩhadibuporo. Erã nome wapeweyarã nome eropa ta iicũ marire Jesu yarãre ĩhaturirã “Ñerire iirã iima,” arĩmasibeami marire.

15 Dohpague tamerare yujurãyeri nome wapeweyarã nome Cristo yare duhu watĩ gameripũre iinũgatuhama. Eropigũ õpa werea mũre.

16 Jesu yarã erã acawerego wapeweyo igo árĩcũ erã igo acawererãpũ igore itamuporo. Gajirã Jesu yarãpũre igore itamudorebircãporo. Eropirã erã Jesu yarã igore acawererã opagore itamubirã, gajirã nome wapeweyarã nomerũre itamumasima.

17 Jesu yarã oparãre erã mohmerire erã ðaro iicũ ïarã umupeoque erãre. Eropirã ðaro wajayeque. Yujurãyeri mũa mera majarã Goãmũ yare wererã mũare buherã sã ãhrima. Erã tamerare tauro umupeo wajayeque.

18 Goãmũ yare erã gojarapũgue mohmegũre mũa wajayeborore ðpa werea: "Wecũ trigo yerire cãhratĩacũ ïgũ disirore cãhmotabircãque. ïgũ gamero baporo," arĩ gojañorã. Eropiro gajipũ ðpa arãa: "Mohmegũre ïgũ mohmeri wajare oro gahmea," arãa Goãmũ yare erã gojarapũgue. Goãmũ ya gojarapũ eropa arĩcũ peerã oparãre ðaro umupeoque mũa. Eropirã ðaro wajayeque erãre.

19 Jesu yarã mera majagũ opũre yujugũ ta ïgũre weresãcũ peebircãque. "Opũ ïgũ ðpa ñeri iirare ïabũ," perã o urerã arĩ weresãra pũhrũ peeque.

20 Eropa peerã ïgũ ñero iira arĩcũ ïatuhaja Jesu yarã gamenererogue turique ïgũre, gajirã ïgũre ïha masi gũiporo arĩrã.

21 Eropigũ Goãmũ Jesucristo ïgũ beyerã anyua erã ïhabeoro ire dorea mũre. Dohpague yũ mũre dorerare iipehoque. Eropa iigũ gajigũre gajiropa, gajigũ sãre gajiropa iibircãque. Yujuropa ta iique arĩpehrerãre Jesu yarãre.

22 Gajirãre Goãmũ mohmerire mũ beyemorãre erã weca mũ mojotorire duhpẽoboro core ðaro ïaque mũhũ ïha masiri mera yojaro mariro. Ñerire iirã arĩbocoma. Eropigũ mũ erãre beyera pũhrũ erã ñerire iicũ erã ñeri iira dipuwaja opagũca mũ sã. Eropigũ erãre beyeboro core erã arĩricũrĩre ðaro masique. Eropigũ arĩpehreri ñeri mariro arĩque mũhũ.

23 Bajasuburi paru pũrisũgũ ãhraa mũhũ. Eropigũ dohpaguere deco dihtare ihrĩgũ arĩgũ, merogã vino sãre ihrĩque mũhũ ococũgũ.

24 Yujurãyeri erã ñerire iicũ mari ïhaa. Eropirã Goãmũ erãre dipuwaja moaborore masia mari. Gajirãpũre erã ñeri iirare mari ïha masibea. Pũhrũ erã ñeri iirare masirãca Goãmũ dipuwaja moarinũ arĩcũ.

25 Eropa ta yujurãyeri ðarire erã iirare masia mari. Gajirã erã ðarire erã iirare dohpaguere masibirĩquererã ta pũhrũ masirãca mari. Mari ïabirirare arĩpehrerã erã iirare pũhrũ iri dehyoacũ ïarãca.

6

1 Pohro majarã Jesu yarãpũ erã oparãre õaro umupeo-
poro. Erã eropa umupeocũ ãarã gajirã Goãmũre mari arĩ
buheri sãre ñero werewũamasibeama.

2 Erã oparã Jesu yarã árĩcũ ãarã erã pohro majarãpũ gũa
oparã sã Jesu yarã ta ãhrima. Eropirã “Erãre umupeobiricũ
õaroca,” arĩbocoma. Eropa iibiricãro gahmea. Erã oparã
Jesu yarã árĩrã erã mahirã yujugũ porã iro dopa ãhrima.
Eropirã erã tamerare turaro itamuporo.

Goãmũre umupeori sãre, õaro árĩri sãre werepũ Pablo

3 I yũ wererare buheque. Eropigũ ire doreque. Gajiropa
árĩrire gũyarire buherã mari Opũ Jesucristo ya buherire
umupeobeama. Erã Goãmũre umupeori buherire gamebirã
õpa iirã ãhrima.

4 “Masipehogũ ãhraa,” arĩquererã ta diaye majare ne
masibeama. Eropirã pee masibirã iro dopa ta turaro
game dũyasodiama erã. Eropirã Goãmũ yare arĩmaacãa
dũyasorã ãhrima. Eropa dũyasorã, game ãhaturirã wa-
hama. Eropirã gajirãre ñero quere moamasibiriquererã
masare ñero arĩ pepima erã.

5 Eropirã erã ñeri dihtare pepiniguirã, diaye árĩrire ne
masibirã eropa dũyasoniguicãma. Eropirã “Goãmũ yare
buherã niyerure wajatarãca,” arĩ pepirima. Erã eropa
árĩrãre wapicubiricãro gahmea.

6 Mari ya mari opari mera mucubirirã Goãmũre umupe-
orã diaye ta wajatarã ta iiaa.

7 I yebaguere masa dehyoarã ne gajinore aĩgãribiribu
mari. Eropirã mari sĩrirã warã ne gajinore aĩgãmasibeaa
mari daja. Eropirã mũa opari mera dihta mucubirique.

8 Eropirã mari barire, mari suhri sãre oparã, gajire
gamenemobiricãrã. Iri nũcũ mera ta mucubiricãrã mari.

9 Niyerure gamerã doberi wũaro oparã árĩdiarã wafĩ
ñerire iĩgũ iidorerire árĩpehreri ñerire iirã árĩbocoma.
Eropirã erã bajasuburi pee masibirã iro dopa ta gajinore
gametarirã, ñeri uaribejari duhubirã, erã basi ta ñero
tarima. Eropa dedererã wacãrã iima.

10 Niyerure gametarirã árĩpehreri ñerire iinũgama masa.
Yujurãyeri niyerure gametarirã, Jesure umupeo duhura
pũhrũ bajasuburi erã ñero iira waja turaro bujawerema
erã. Eropirã mari opariñepẽ ta mucubiriro gahmea marire.

*Goãmũ ya árĩburire iiboro dopa ñerire tarinũgaque, arĩ
gojañumi Pablo*

11 Mũ tamera Goãmũ yagũ ta ãhraa. Eropigũ i ñerire
iibiricãro gahmea. Eropigũ õaripũre gameque. Goãmũ
yare iique. Eropa iĩgũ Jesure “Diaye iĩgũ ãhrimi,” arĩ

umupeoque. Eropigu gajiräre mahique. Ñero tariqueregu ta bocatiuque. Nijiyajagu árrique masa mera. Eropigu gajiräre tarinugadiagu árribircãque.

12 Ìgu mera árripehrerinuri mu òaro árñiguicãburire Goãmu beyemi mure. Eropigu Jesucristore mu umupeorire bajarã masare òaro werebu muhu. Eropigu ñero tariqueregu ta ìgure umupeo ìgu yare duhubita umarogue ìgu mera eropa mu árñiguicãboro dopa.

13 Goãmu árripehreräre árripehrerire árriçũ iigu àhrimi. Jesucristopu Poncio Pilatore Goãmu yare òaro wereru. Eropigu Goãmu Jesucristo sã erã ìhabeoro ire mure iidoregura:

14 Mure Goãmu ìgu dorerare iipehocãque. Jesucristo ìgu dujariboro core ñeri mariro, dipuwaja mariro ìgu dorero dopa ta iiniguicãque.

15 Ìgu queoranu árriçũ Goãmu Cristore dujaricũ iigucumi. Goãmuru òagu ìgu dihta masare doregu àhrimi. Eropigu árripehrerã gajirã oparã erã tauro opu árriçu àhrimi.

16 Eropigu ìgu dihta ne sribigu àhrimi. Ìgu goesiriri mera árriçu àhrimi. Eropirã masa ìgu goesirirogue ejamasibeam. Eropigu masa erã ne ìabigu àhrimi. Eropirã dohpague sãre ìgure ìabeama. Ìgu eropa árriçure umupeorã. Eropirã árripehrerinuri “Turagu àhrimi ìgu,” arirã ìgure. Eropa ta iirã.

17 Eropigu i yeba majaräre doberi oparäre òpa arì doreque muhu: “Gajiräre tarinugaa yuhu,” ne arì pepibiricãporo. Erã doberi erã opari pehrea waroca. Eropirã “Yuhu wuaro opari mera òaro árriçuca,” arì pepibiricãporo. “Goãmu yaru mera òaro árriçuca,” arì pepiporo. Árripehreri diaye ta mari gameripure ogu àhrimi ìgu Goãmu. Ìgure umupeoturaporo erã doberi oparã.

18 Eropirã erã òaripure iiporo òarire erã iirã árriboro dopa. Eropirã erã oparire mojomorocuräre orã árriporo.

19 Erã eropiicũ umusigue Goãmu pohrogue erã ya árriroca. Erogue árriçũ iri ne pehresome. Eropirã erogue òaro árriñiguicãrãcoma erã.

Pablo Timoteore doretupu

20 Mahgu, mure Goãmu ìgu apirare ìgu buhedorerare duhubita. Yujurãyeri masa Goãmure gamebirã iro dopa ta guyarire, pee masibirã ya buherire wereniguima. Eropa wereniguirã “Òaro masirã buheri àhraa,” aririma erã. Eropa erã wereniguirire peenurãbiricãque.

21 Gajirã yujurãyeri erã wereniguirire peenurã Cristo ya buheripure cóacãma.

Goãmũ ãgũ mahiri mera mære turaro õadorea. Eropa ta
árĩniguicãporo. Iripêta ãhraa.

2 Timoteo

Pablo Timoteore dipaturi gojabeopu

¹⁻² Mũhũ Timoteo yũ magũ iro dopa ta yũ mahigu āhraa. Yũhũ Pablo mũre ire gojabeoa. “Árĩpehrerã Jesucristore umupeorã ƣmũsigue ðaro árĩniguicãrãcoma,” arĩ apimi marire Goãmũ. Īgu eropa arĩ apirare werebure yũre beye apimi Jesucristo Goãmũ ĩgu gamero dopa ta. Eropigu Goãmũ mari Pagũ Jesucristo mari Opũ mera mũre ðadorea. Eropigu ĩgu itamuri mera ðaro árĩque mũhũ.

Masare Cristo yare erã wererare werepu Pablo

³ Goãmũ mera wereniguũ mũ ya árĩburire serẽniguicãa ƣmũri nũcũ. Eropa serẽgu Goãmũre “Õhaa,” arãa yũhũ. Iribojegue majarã yũ acawererã ñeri dipuwaja mariro ĩgu Goãmũre ta umupeoñuma. Erã umupeodiro dopa ta dohpaguere yũ sã ĩgu Goãmũre ta umupeoa. Īgu Goãmũ gohra ta āhrimi yũ mũre serẽbasagu.

⁴ Sohõ árĩrasubure yũ wacũ mũ orenũrsiarare guñagu mũre turaro ĩadiaca daja mũ mera ðaro mucubiridiagu.

⁵ Eropigu Jesure diaye ta mũ umupeorire guñaa yũhũ. Mũ ñeco bũro Loida, mũ pago Eunice sã Jesure umupeomũhtama mũ core. Eropigu dohpaguere ĩgũre mũ umupeocũ ðaro masia yũhũ.

⁶ Eropigu ire mũre guñacũ iidiaa. Mũ dipuru weca yũ duhpeocũ Goãmũ ĩgu ya turarire omi mũre. Īgu ya árĩburire mũ mohmemasiburire mũre omi. Iri mohmemasiburi mera mohmeque mũhũ.

⁷ Goãmũ marire ĩgu Espĩritu Santore omi. Mari mera árĩgu masare marire guicũ iibeami Espĩritu Santo. Eropigu turarã, masare mahirã, pee masirã mari árĩcũ iimi ĩgu.

⁸ Eropigu mari Opũ ya árĩburire gajirãre weregu gũhyasĩribita mũhũ. Yũhũ ĩgu yare iicũ ĩha gajirã gamebirã yũre peresugue doboma. Peresu yũ árĩcũ sãre ĩagu yũre gũhyasĩrisãbircãque. Mũhũ sĩporãguere ñero bũjawerebircãque. Õari buherire mũ buheri dipuwaja mũ sã eropa wagũ “Õaroca,” arĩ pepique mũ sã. Mũ eropa ñero taricũ ĩagu Goãmũ mũre itamugũcumi.

⁹ Eropigu Goãmũpu marire peamegue wabonirãre taumi. Eropigu ðarã ĩgu yarã árĩmorãre beyepũ ĩgu. “Õarã āhrima erã. Eropigu erãre beyegũra,” arĩbiripũ marire beyegu. Īgu marire mahigu ta negohraguere marire beyepũ ĩgu

gamero dopa ta iigu. "Eropigu Jesucristore erãre taubure obeogura," arĩ beyepu marire.

¹⁰ Eropigu dohpaguere Jesucristore marire taubure obeodigu arĩmi marire diaye ta igu mahirire ihmugu. Eropigu Jesucristo marire taugu marire igu yarãre dederebiricũ iimi. Eropa iigu "Yure umupeorã Goãmũ mera õaro arĩniguicãrãcoma," arĩgu õari buherire marire weregu aripu igu.

¹¹ Eropigu i õari buherire werebure igu apimi yure.

¹² Eropa igu yare buhegu arĩgu dohpaguere ñero taria yũhũ. Eropa ñero tariqueregu ta siporã mucubirigu ahraa. Yu guñaturagure Jesure masia yũhũ. Turagu ahrimi igu. Eropigu igu yare buhedore apigu õaro itamugucumi. Eropigu igu yure apirare yure buhe ojo-gorocucũ ihadibugucumi yure. "Yure itamugucumi," arĩ irire õaro masigu siporã mucubirigu ahraa.

¹³ Mure yu wererare ipehocãque. Jesucristo mure igure õaro umupeocũ iimi. Eropigu igure gajirã sãre õaro mahicũ iimi mure. Eropigu "Diaye ahraa," arĩ irire guñaniguicãque mũhũ.

¹⁴ Eropigu Espiritu Santo mari mera arĩgu igu itamuri mera õari buherire õaro buheque. Queoro buheque gajiropa arĩro mariro.

¹⁵ Yu peresugue arĩcũ ãarã yure cóãgãpehrea wama. Arĩpehrerã Asia yeba majarã Jesu yarã yure itamudibirã cóãgãpehrea wama. Erã mera majarã perã Figelo, Hermógene eropa ta iima erã sã. Erã eropa cóãgãrãre masituhaca mũhũ.

¹⁶⁻¹⁷ Erã eropa cóãquerecũ ta Onesíforopu bajasuburi yure itamugu õaro siñajacũ iimi. Eropigu igu yu peresu arĩcũ igu yure guhyasĩrisãbeamĩ. Eropigu Romague eragu yure amaniguicãdi arĩmi. Eropa amaniguigu yure bocami. Efesogue sãre igu marire itamurare õaro masia mũhũ. Igu eropiira waja igu porãre, erã pago sãre mojomoro ãagucumi mari Opu Jesucristo. Goãmũ eropa iiboro dopa igure serẽbasaa.

¹⁸ Eropigu i yebague Jesu mari Opu dujaririnũ arigu igure mojomoro ãagucumi. Iguere eropa iiboro dopa ta serẽbasaa Goãmure.

2

Ñero tariqueregu ta Jesu yagure bocatũuro gahmea

¹ Mupu yu magu iro dopa ta Jesucristo igu itamuri mera turagu arĩque.

² Eropigu bajarã masare yu buherare mu peerare gajirã sãre wereturiaque muhu. Erã mu buherã Goãmu gamerire iinigucãrã árïporo. Eropirã gajirãre buheturiarã árïporo erã sã.

³ Surara ñero tarigu ïgu yujuro bojero dopa ta Jesu yagu árïgu ñero tariqueregu yujuro bojeque. Eropa iigu gajirã Jesu yarã iiro dopa iigu iiaa muhu.

⁴ Surara ïgu opu ïgu doreripure iimi. Eropigu ïgu surara árïbirã erã iiripure iibeami ïgu. Mu sã eropa ta mari Opu ïgu dorera dihtare iique.

⁵ Omabiragu erã dorediro dopa queoro iibigu ïgu omataria-ara waja wajatabeami. Eropa ta mu sã Goãmu dorediro dopa ta iibigu Goãmu mera wajatasome.

⁶ Eropigu pohere ðaro mohmedigupu ïgu mohmera waja iri pohe majare aïmuhtami. Eropa ta mu sã Goãmu yare ðaro mohmera waja Goãmu oburire aïmuhtaguca.

⁷ Irire ðaro masicũ iigucumi Jesu mari Opu mre. Eropigu dohpaguere yu mre arïdirore ðaro guñaque.

⁸ Jesucristore guñaque. ïgu opu Davi muru pãrami ïgu árïpu. Eropigu sïridigu masa muriapu ïgu. ïgu eropa sïri masa muriara marire tauburi buheri ta ãhraa. I ðari buherire buhegu iiaa.

⁹ Iri buherire buhegu ñero taria yuhu. Eropirã irire yu buhecũ ïha gajirã gamebirã ñegu iro dopa ta yure dipuwaja moa yure peresugue doboama. Masa yure cãhmotaquererã Goãmu ya ðari buherire cãhmota masiya mara.

¹⁰ Eropigu Goãmu ïgu beyenirãre buhegu bajasuburi ñero taria yuhu erã Jesucristo yarã erã árïburire. ïgu yarã árïborore erã peamegue wabonirãpu tauborore ñero tarigu yujuro bojea. Eropigu erã Goãmu mera ðaro árïinigucãborore ñero taria ïgu yare buhegu.

¹¹ I diaye ta ãhraa:

Cristo ya árïburire mari iira dipuwaja gajirã marire wejẽquerecũ ïgu mera umusigue ðaro árïinigucãrãca.

¹² Eropirã ïgu yare mari iira dipuwaja ñero tariquererã ta ïgu yare duhubirã árïrã ïgu opu árïroguere ïgu mera dorerã árïrãca mari sã. "Cristore yu masibea," mari gajirãre aricũ ïgu sã marire eropa ta arïgucumi.

¹³ ïgure mari tarinugacũ ïagu ïgu arïdiro dopa ta marire dipuwaja moagucumi. ïgu arïro dopa ta iigu ãhrimi ïgu. Ne guyabeami ïgu. I árïpehreri ïgu werera diaye ta ãhraa.

Goãmu ïgu ïhasarãre, ïgu yare buherãre wereru Pablo Timoteore

14 Ire yu wererare mu mera majarãre masicũ iique. Erã ejatuharo game dũyaso wereniguiiri duhpihuri árĩbeaa. Eropirã erãre peerãre ñero wacũ iima. Eropigu mari Opu ïgu ïhuro õpa arĩ wereque erãre. “Mũa eropa wereniguiiro dopa wereniguibiricãque,” arĩque erãre.

15 Mũpũ Goãmũ yare õaro buheque. Eropigu Goãmũ ya árĩburire turaro iique. Mu eropa iicũ ïagu “Õaro iibu mũhũ,” arĩgũcumi Goãmũ mũre. Eropigu mu buherare ïgu ïacũ gũhyasĩrisome mũhũ. ïgu buheri diaye ãhraa. Eropigu ïgu buherire õaro masique. Eropigu ire queoro buheque.

16 Erã ejatuharo bu árĩrire wereniguirã ñerire eropa iiniguiçãma. Eropigu erã eropa arĩ wereniguirire ïha gamebiricãque mũhũ.

17 Erã wereniguiiri camiro boagãro iro dopa ta ãhraa. Erã wereniguiiri gajirã Jesu yarãre ñerã wacũ iiaa. Eropa wereniguirã mera majarã Himeneo, Fileto sã ãhrima.

18 Eropirã erã õari buherire cóarã, “Jesu yarã sĩrinirã erã ya dũpũ mũra masa mũriatuhanirã ãhrima,” arĩ buhemaacãma. Eropa gajiropa buherã bajamerãgã Jesu yarãre goroweorã iima.

19 Erã eropa ñero buhequerecũ ta, Goãmũ ya buheripu ne gohrotobea. ïgu ya diaye maja árĩro pehrebeaa. Õpa arĩ gojara ãhraa: “Mari Opu ïgu yarãre masimi. Eropirã árĩpehrerã ‘Jesu yarã ãhraa,’ arĩrã ñerire duhucãporo,” arĩ gojañuma.

20 Jesu yarã watope ãhrima Goãmũ yare õaro iirã. Gajiropa iirã sã ãhrima ñeri buherire wereniguirã.

21 Eropigu yujugũ Goãmũ ya árĩburire õaro itamu-diagu iri ñeri buherire pebiricãporo. Árĩpehreri ñerire duhucãporo. ïgu eropiigu õagu árĩgu árĩpehreri Goãmũ yare õaro iimasimi. Goãmũ gamegu õaro árĩgũcumi.

22 Eropigu mu mamũ árĩgu mamarã erã ñeri uaribejari iro dopa iibiricãque. Eropigu õarire iique. Jesure umupeoturaniguicãque. Eropigu ïgure masa sãre mahi umupeoque. Eropigu gamequeãro mariro gajirã mera õaro árĩque mũhũ. Eropa ta iique gajirã ñeri dipuwaja marirã mera Goãmũre game serẽniguirã mera árĩgu.

23 Eropigu pee masibirã erã arĩ dũyatorire mu sã peenũrubita. Eropigu mu sã dũyasobita. Eropa arĩ dũyatorã masa game gameturinũgama.

24 Mari Opu pohro majagure dũyasobiricãro gahmea. Eropigu árĩpehrerãre õaro iigu buhemehregũ, mata guabigu ïgure árĩro gahmea.

²⁵ Eropigu gajirã ĩgu mera duyasocũ ĩgu erãre weregu õaro mera yojaro mariro mera yũhriro gahmea ĩgure. ĩgu õaro yũhricũ ĩarã erãpũ Goãmũ ĩgu itamuri mera erã ñeri iirire bujawerebocoma. Eropirã õari buherire diaye majare masinũgabocoma.

²⁶ Erãre watĩ oparimi ĩgu gamerire iimorãre. Eropirã erã ñero iirare bujowerera pũhrũ õari buheripũre masirã, watĩre cóarãcoma.

3

Pehreburinũ majare werepũ Pablo Timoteore

¹ I mũmũ pehreburinũ coregã ñero tarirãcoma masa. Iirire õaro masique mũhũ.

² Irisubure masa gajirãre guñabirã, erã ya árĩburi dihtare guñarã, niyerure gamerã, “Gajirãre tarinũgaa gũa,” arĩ erã basi pepirã, masare ñero turirã, erã pagũ sũmarãre tarinũgarã, erãre oquerecũ ta “Õhaa,” arĩbirã, Goãmũre umupeobirã árĩrãcoma.

³ Eropirã masare mahibirã, mojomoro ĩabirã, ñeri quere iirã, ñeri ñaribejarire duhumasibirã, masare eropa paniguirã, õarire gamebirã árĩrãcoma.

⁴ Erã mera majarãre ñero iirã, pepiri moorã, “Masipehorã ãhraa,” arĩ pepirã árĩrãcoma masa. Eropirã erã, erã ñaribejarire iisuarã árĩrã Goãmũre umupeo sũabeama.

⁵ Eropirã erã masa erã ĩhabeoro Goãmũre umupeoquererã ta “Goãmũ duhpibu árĩbeamĩ,” arĩ pepirima erã.

Eropa árĩrãre wapicũbircãque mũhũ.

⁶ Erã mera majarã pee masibirã nome pohro ñaja, erã nomere gũyarire buhema. Erã nomepũ turaro ñerire iiniguirã árĩrã, turaro ñerire iidiarã ãhrima.

⁷ Erã nome eropa peeniguirã nome árĩquererã ta, diaye majapũre ne masibeama.

⁸ Iribojegue Jane, Jambre sã yeea árĩnirã Moise wererare gamebiridiro dopa ta erã sã õari wereniguirire diaye majare gamebeama. Erã ñeri dihtare pepirã ãhrima. Eropirã Jesure umupeorã gohra árĩbeama.

⁹ Eropa iirã gũyari mera erã iidiarire yujuro bojesome. Pũhrũ erã gũyarire, erã pee masibiriri sãre árĩpehrerã ĩha masirãcoma. Jane, Jambre mera erã gũyarire iribojegue masa erã ĩha masidiro dopa ta eropa ta masirãcoma masa pehreburinũ coregã árĩrã erã gũyarire.

Pablo Timoteore doretupũ

¹⁰ Mũpũ yũ buherare, yũ árĩricũrãre, yũ iidiarare, Jesure yũ umupeorare õaro ĩhabũ. Eropiguũ guaro mariro yũ iirare,

masare yu mahi umupeorare, ñero tariqueregu yu yujuro bojerare masia mũhu.

¹¹ Eropigu Jesucristo yare yu iira waja yure erã ñero iirare, yu ñero tarirare masia mũhu. Eropigu Antioquague, Iconiogüe, Listrague yure ñetariaro erã iira sãre masia mũhu. Eropa yu wacũ ñha mari Opu Jesucristopu yure itamumurimi.

¹² Árĩpehrerã Jesucristo yarã árĩdiacũ Goãmũ gamerire iiniguidiacũ gajirã erãre ñero iirãcoma. Iri diaye ta ãhraa.

¹³ Eropirã ñerãpu, gũyarã sã, ñetariarã árĩniguicãrãcoma erã. Gajirãre gũyarã, erã basi sã gũyarire peerã eropa ta ñetariarã árĩniguicãrãcoma.

¹⁴ Mũpu yũhu mũre buherare ðaro mũ peerare eropa iinigucãque. Mũre buhenirãre masia mũhu.

¹⁵ Mũ majigu árĩgugüe ta, Goãmũ yare erã gojarapũre masinugayoro. Īgu yare erã gojarapũ mũ buhegu masia Jesucristo marire tauburire. Eropa buhegu "Jesucristore umupeorã dihtare peamegüe wabonirãre taumi Goãmũ," arĩ masia.

¹⁶ Goãmũ yare erã gojarapũre árĩpehrerire Goãmũpu gojadorepu erãre. Eropirã iripũre buherã mari masinemoa. Iripũre buherã mari ðaro iiburire masia. Eropirã mari ñeri iirire masia iripũre buherã. Eropiro iripũ marire ðaripũre gohrotodorea. Eropiro mũmũri nũcu mari ðarire mari iiniguiburire werea iripũ.

¹⁷ Eropigu Goãmũ yagu ĩgu yapũre buhegu, masipehocãgũcumi. Eropa masigu árĩpehrerire ðarire iimasigũcumi ĩgu.

4

¹ Jesucristo árĩpehrerãre doregu arigu dujarigũcumi. Eropa dujarigu ojocarirãre, sĩrinirã sãre dipuwaja moagũcumi. Eropigu ĩgu ñhabeoro ire mũre dorea yũhu: Goãmũ sã ĩgu ñhabeoro ire dorea mũre.

² Mũmũri nũcu masa erã peediacũ, erã peediabiricũ sãre Goãmũ yare wereque. Eropa weregu masare erã ñeri dipuwajare masicũ iique erãre. Eropigu "Mũa ñeri iirire iinemobiricãque," arĩ wereque erãre. ðaripũre iidoreque. Eropa weregu ne guabigu gariborebigu árĩque mũhu. Eropigu gajirãre buhe duhubita.

³⁻⁴ Pũhra, gajisubuguere masa ðari buherire peediasome. Eropa peediabirã erã gamero dopa ta iirã, erã peediari dihtare buhemorãre amarãcoma erã. Eropirã gũyari buherire buherã bajarã oparãcoma erã. Erã eropa iirã

ōari buheri diaye majapure cohã, erã eropa arĩ bocara buheripure peenururãcoma.

⁵ Eropigũ mupũ diaye majare buhe duhubita. Eropa iigũ umuri nũcũ ðaro pee masigũ árĩque. Eropigũ ñero tariqueregũ ta yujuro bojeque. Eropigũ ðari buherire eropa buhenigũique masa Jesu yarã waboro dopa. Goãmũ mure igũ iidorerare iipehocãque mũhũ.

⁶ Yũhũ Goãmũ yare yũ iira dipuwaja yũ sĩriboro merogã duhyaa. Eropigũ bajamenurigã árĩnigũca. Eropigũ dohpague mure dorea.

⁷ Yũ sĩriboro coregã ire weregũra: Jesucristo yare ðari buherire buhedoregũ igũ apirare ðaro buhe ojogorocubũ. Igũ dorerire ðaro iipehocãbũ. Eropigũ ñero tariqueregũ ta igũre ne umupeo duhubiribũ.

⁸ Yũ eropa ðarire iira wajare umusigue dibugũcumi yure. Eropigũ mari Opũ árĩpehrerãre masipehogũ, diaye ta dipuwaja moabu árĩgũ, queoro weregũ igũ dujaririnũ yũ wajatarare ogũcumi yure. Gajirã sãre igũ dujariborore corerãre, igũre mahirãre erã wajatarare ogũcumi Jesu.

Pablo werenemopũ Timoteore

⁹ Yũ pohroque yojaro iagũ arique mũhũ.

¹⁰ Dema waĩcũgũ i yeba majare árĩpehrerire gamegũ yure cóãgã waha wami Tesalónicague. Crescentepũ yure cóãbiriqueregũ Galacia yebague wahãmi Goãmũ yare buhegũ. Tito sã eropa ta Dalmaciague wahãmi.

¹¹ Luca dihta yũ mera ãhrimi. Marco yure ðaro itamubu ãhrimi. Eropigũ igũre aĩgãrique mũhũ.

¹² Tĩquicore Efeso macague obeobũ.

¹³ Eropigũ mũhũ õgue arigũ, yũ weca sañari suhrirore, Troa maca Carpo ya wihi yũ apirañere aĩgãrique. Eropi sohõ árĩra gojara turirire aĩgãrique. Sohõ árĩra gojara gasiri tamerare turaro gahmea yũhũ. Eropigũ iri gasiri sãre aĩgãrique.

¹⁴ Alejandro comere mohmegũ yure ñetariaro iimi. Eropigũ igũ eropa iira dipuwaja Goãmũ dipuwaja moagũcumi.

¹⁵ Igũ Alejandro mari buherire ne gamebirimi. Eropigũ mũare ñero iiri arĩgũ ðaro igũre guña masique.

¹⁶ Peresu iidoregũre yũ iirare igũre yũ ne werecũ ne yujugũ Jesu yagũ yure itamudiabirimi. Árĩpehrerã yure itamubirã cóãgãpehrea wama. Erã eropa cóãquerecũ ta yure erã cóãra dipuwaja Goãmũre "Erãre dipuwaja moabita," arĩbũ.

17 Yũ yujugũ ta árĩquerecũ ta Goãmũ ðaro ãhrimi yũ mera. Eropigũ ãgũ buherire yũ ðaro wereburire were-masicũ ãgũ turari mera itamumi yũre. Árĩpehrerã Judio masa árĩbirã iri buherire erã peeburire werecũ itamumi. Eropigũ masa erã yũre ñero iidiaquerecũ ta yũre erã ñero iibodigũre itamumi mari Opũ.

18 Árĩpehrerire erã yũre ñero iirire yũre taugũcumi mari Opũ. Eropigũ Ƶmũsigue ãgũ Opũ árĩrogue yũ árĩborore ita-mugũcumi ãgũ. Eropirã “Mari Opũ ðatariagũ, turatariagũ ãhrimi,” árĩpehrerĩnũri arĩrã mari. Eropa ta arĩrã.

Pablo ðadorepũ Timoteo pohro árĩrãre

19 Priscila, igo marapũ Aquila, Onesiforo ya wihi majarã sã ðaporo.

20 Erasto Corintogue dujami. Trófimo dorecua wahámi. Eropigũ Miletogue apiabũ ãgũre.

21 Puhiró core yojaro arique mũhũ. Eubulo, Pudente, Lino, Claudia sã, árĩpehrerã Jesu yarã mũre ðadorema.

22 Mari Opũ Jesucristo mũ mera árĩporo. Eropigũ mũare Goãmũ mera turaro ðadorea. Eropa ta árĩniguicãporo. Iripẽta ãhraa.

Tito

Pablo Titore gojabeorũ

¹ Yũhũ Pablo mũre Titore gojaa. Goãmu pohro majagu, Jesucristo yare igũ buhedore igũ apidigu aħraa. Goãmu igũ beyenirã Jesure erã umupeoburire, õari buherire erã masiburire Jesu buhedoregu yũre apimi. Iri buheri Goãmu igũ dorediro dopa ta mari iiburire werea.

² Eropigu arĩpehrerinũri Goãmu yarã umarogue erã õaro arĩniguiboro sãre buhea erãre. Goãmu ne gũyari marigu i yebare igũ ihacũnuguboro core “Yũ pohrogue eropa õaro arĩniguicãrãcoma,” arĩ apirũ marire.

³ Eropigu igũ queoranũ arĩcũ igũ eropa arĩ apirare masidoredigu arĩmi masare. Eropa ta masidoregu yũre erãre weredoremi igũ marire taugũ.

⁴ Mũre Jesu yare buhebũ. Yũ eropa buhecũ peegu, Jesure umupeonũgabũ mũhũ yũ umupeoro dopa. Eropigu mũhũ yũ buhedigu arĩgu diaye ta yũ magũ iro dopa arĩgu ta iiaa. Mũre ire gojabeogu iiaa. Eropigu Goãmu mari Pagũ, Jesucristo marire taugũ itamuri mera mũre õadoreã. Igũ itamuri mera õaro arĩque mũhũ.

Creta waĩcũri nũgũro majarãre Tito igũ wereburire werepũ Pablo

⁵ Creta waĩcũri nũgũro yũ mũre apicũ Jesu yarã erã buheborõ duhyanibũ irisubure. Eropigu erã iiburire werebure apibũ yũhũ mũre. Eropigu macari nũcũ majarã Jesu yarã oparã arĩmorãre beyedoregu apibũ mũre.

⁶⁻⁸ Erã oparã Goãmu pohro majarã aħrima. Eropigu erãre beyegu õarãre beyeque gajiropa iibirãre. Eropigu yujugo ta marapocũrã arĩrãre beyeque. Eropigu “Bu arĩgu aħraa yũhũ,” arĩ pepirãre beyeque. Eropigu mata guabirãre, merebirãre, masa mera gamequeãbirãre, niyerure gamebirãre beyeque. Eropa beyegu erã ya wihire ñajarãre õaro ihadiburãre, õaripũre suarãre, pee masirãre, õaripũre iiniguirãre, ñeri marirãre, erã ñaribejarire iibirãre, teborõ mariro mohmerãre, õarire iiniguirãre beyeque. Eropirã mua beyerã porãre õpa arĩro gahmeã. Jesure umupeorã, õarire iiniguirã, arĩpehrerãre õaro yũhrirã arĩro gahmeã oparã porãre.

⁹⁻¹⁰ Eropirã õari buherire queoro mari buhediro dopa ta ne duhubirã arĩporõ oparã mũ beyenirã. Eropirã õari

buherire wererã árĩrãcoma. Eropa iirã õari buherire gamebirãre buherã erã ya gũyari árĩcũ masicũ iirãcoma erã. Eropigu õaro beyeque Jesu yarã weca oparã árĩpehrerãre.

Bajarã erã oparãre tarinũgarã, õaro pepi wereniguibirã, gũyarã áhřima dohpaguere. Eropa iirã yujurãyeri Moise dorerire iidorerã tamera ñetariaro iirã iima. Erã buheri iri diaye árĩbircũ erãre masicũ iiro gahmea.

¹¹ Erã Moise dorerire iidorerãpũ gũyarire buherã niyerure wajatadiarã buhema. Eropa buherã yujuyeri wiri majarãre árĩpehrerãre Goãmũ yapũre cóãcũ iirã iicoma erã. Erã eropa iicũ erãre iidorebircãro gahmea.

¹² Iribojegue weredigũ Creta majagũ árĩqueregũ ta õpa arĩ wererũ: “Creta nũgũro majarã eropa gũyaniguirã waĩcũma. Ñerire iirã diayea iro dopa iirã áhřima. Eropirã pagari barã árĩrã ne mohmediabeama,” arĩpũ ĩgũ ĩgũ ya nũgũro majarãre.

¹³ ĩgũ eropa arĩra diaye ta áhřaa. Erã eropa árĩcũ ĩagũ erãre turaro wereque Jesu ya buheripũre erã õaro pee masiboro dopa.

¹⁴ Eropigu “Judio masa iribojegue majarã erã arĩ bocarare peebircãque,” arĩ wereque erãre. Jesu yare gamebirã erã doreri sãre Creta majarã erã peenũrũbiriborore wereque erãre.

¹⁵ Őpa áhřaa. Dipuwaja marirã õari dihtare pepima. Ñerire iiniguirãpũ ñeri dihtare pepima. Erã pepiripũ ñetaria. Eropirã õaripũre beyemasibeama.

¹⁶ Erã “Goãmũre masia gũa,” arĩquererã ta ñerire iima. Eropa iinirã erã árĩcũ ĩarã Goãmũre masibirã erã árĩcũ masia mari. Eropirã erã ñetariarã, Goãmũ yare tarinũgarã áhřima. Eropirã õarire iimasibeama.

2

Õari buherire weredorepũ Pablo Titore

¹ Mũpũ buhegũ õari buheri arĩdiro dopa ta õaro buheque.

² Mũrãpũre õpa wereque: “Mũa gũhyadiarã, masa erã umupeorã, pee masirã, ‘Goãmũ diaye iigũ áhřimi,’ arĩ umupeorã, õari buherire õaro iirã, Jesure masa sãre mahirã, ñero tariquererã ta yujuro bojerã árĩque,” arĩ wereque erãre.

³ Mũrã nome sãre eropa ta arĩ wereque: “Gũhyadiarã nome, ñeri quere werewũbirã nome, merebirã nome árĩque,” arĩ wereque erã nome sãre. Eropirã erã nome õarire gajirãre buheporo.

⁴ Eropā iirā ōpa arī buheporo mūrā nome nómeñaripure: “Mūa marapū sūmarāre mūa porā sāre mahique,” arī buheporo.

⁵ “Eropirā mūa pee masirā nome, gajirā ūma mera ñero iibirā nome, mūa ya wihi majare ōaro ñhadiburā nome, ōaro iirā nome, mūa marapū sūmarāre ōaro yūhrirā nome árīque,” arī buheporo mūrā nome nómeñaripure. Erā eropiicū ñarā gajirāpū “Goāmū yare umupeorā ñero iirā āhrima,” arīmasibeama mūare.

⁶ Eropigū mamarā sāre ōpa wereque: Pee masirā árīporo erā.

⁷ Eropigū mūpū ōari dihtare iiniguicāque mūre erā ñhacūburire. Buhegū ne gūyaro mariro buheque. Eropā buhegū gūhyadiaro mera buheque mūhū.

⁸ Eropā buhegū ōaro pee masiri mera buheque ne gajirā mūre erā weresāmasibiriburire. Mū eropā buhecū ñarā marire ñhaturirā árīquererā ta marire bu gohra ta werewūamasibeama. Marire eropā werewūamaacārā gūhyasīuro warācoma erā.

⁹ Eropigū pohro majarāre ōpa doreque: Erā oparāre ōaro yūhrirā árīporo. Eropirā erā oparāre ōaro mucubiricū iiporo. Eropā dihta iiporo. Eropirā erā oparāre pūriro mera yūhribiricāporo.

¹⁰ Eropirā erā oparā yare yajabiricāporo. Eropirā ōarā erā oparā dorerire ōaro iiniguicārā árīporo. Erā eropā ōaro yūhrirā árīcū ñarā Goāmū marire taugū ñgū buherire pee sūarācoma gajirā.

¹¹ Masare ñgū mahirire Goāmū mari masare masicū iituhajami. Mari masare eropā mahigū árīpehrerā peamegue wabonirāre Goāmū turaro taudiami.

¹²⁻¹³ Masare eropā mahigū Goāmū marire ōpa doremi: Ñeri iirire, ñerire ūaribejarire duhucādoremi marire. Goāmū turagū, Jesucristo marire taugū ñgū ōarire mari ñaburinūre, ñgū ōaro mera dujariburinūre mari corerā iiaa. Eropigū mari corerinū mari corerisubu, mari pee masirā, ōarire iiniguirā, Goāmūre umupeoniguirā marire árīdoremi Goāmū.

¹⁴ ñgū Jesucristo mari ya árīburire ta sīridi árīmi. Árīpehrerā mari ñeri iirire duhucū iibu, marire ñgū yarā wacū iibu sīridi árīmi. Mari ñerire ñgū eropā cóacū mari ñerire iira dipuwaja marirā árīrāca. Eropirā turaro ōarire iidiarā árīrāca.

¹⁵ Ire árīpehrerire iri nūguro majarāre Jesu yarāre buheque mūhū. Erā opū árīgū ta iiaa mūhū. Eropigū erāre wereque. Eropigū erā ñerire iicū ñagū wereque erāre. Eropirā árīpehrerā gajirā mūre cóadiabiricāporo.

3

Jesu yarã erã iiburire werenemopu Pablo

¹ Ōpa guñacũ iique ero majarã Jesu yarãre: Erã oparãre õaro yuhrirã árĩporo. Eropirã árĩpehrerire õari dihtare iirã árĩporo.

² Eropirã gajirãre ne quere goroweobiricãporo. Game dũyasobiricãporo. Eropirã masa õarã, árĩpehrerãre umupeorã árĩporo.

³ Iribojegue mari sã pee masibirã, tarinugarã, gũyarire peenurãrã, ñerire iisuarã, ñerire ñaribeja duhumasibirã, umuri nũcu ñerire iiniguirã, gajirãre erã gajinore opacũ ñaturirã árĩmũriribũ mari sã. Eropirã marire gajirã ñaturimũrima. Eropirã mari sã erãre ñaturimũriribũ.

⁴⁻⁵ Eropã árĩnirã árĩquerecũ ta Goãmũ marire peamegue wabonirãre taumi. Eropã taugũ ñũ ñũ õagũ árĩrere, masare ñũ mahirire marire ñhmudi árĩmi. Ōaro mari iira mera taubirimi marire. Marire mojomoro ñagũ mari ñeri iirare coegũ Espĩritu Santo mera marire taumi. Eropã ñũ marire ñũ porã wacũ iimi. Eropĩgũ Espĩritu Santopũ mari õarã árĩburire marire gohrotomi.

⁶ Jesucristo mari ñeri iira dipuwaja ñũ sĩri, masa mũriara mera Goãmũ ñũ Espĩritu Santore omi marire wũaro ñũ turarire mari opaboro dopa.

⁷ Marire mahigũ, marire õaro iidiami. Eropĩgũ ñũ, ñũ Espĩritu Santore omi, ñeri iira dipuwaja marirã mari árĩborore, ñmarogue mari eropa õaro árĩniguicãborore. Mari eropa árĩniguiburire masirã irire mucubiri corerã iiaa mari.

⁸ Iri yũ werera diaye ta ãhraa. Eropĩgũ irire yũ werediro dopa ta masare buhegũ iri dorerire iipehodoreque mũhũ. Eropĩgũ Goãmũre umupeorãre irire buheque õarire erã õaro iiboro dopa. I yũ arĩ buhera õari buheri ãhraa. Eropirã masa i buherire erã peenurãcũ õaro itamuri árĩroca erãre.

⁹ Gajirã wereniguiripũ duhpiburi árĩbeaa. Erã masibiri-quererã ta erã arĩ dũyasoma. Erã ñecũ sũmarã arĩ bocarare game dũyasoma. Moise dorerire arĩ dũyasoma. Erã eropa arĩ dũyasori iri árĩpehreri duhpiburi árĩbeaa. Eropĩgũ irire peenurãbiricãque. Mũ sã dũyasobiricãque.

¹⁰ Mũa mera majagũ eropa game dũyasogũ mũa basi game dũca wacũ ñũ ñũ ñagũ "ñibiricãque," arĩque ñũre. Yujusubu, pesubu irire ñũre mũ iidorebirira pũhũ ñũ yũhribiricũ ñagũ ñũre wapicũ duhucãque.

11 Eropa d̄uyasogu ñeri dihtare ɰaribewaniguigu ãhrimi. Eropa ãgu iicũ ãarã ãgu ñegu áricũ masi, ãgure wapicubiricãro gahmea.

Pablo doretupũ

12 Nicopoligue puhirópẽ áribu iiaa. Eropigu Artemare o Tíquicore m̄ pohrogue yũ obeom̄htacũ erogere yũre bocat̄irigu árique m̄hũ.

13 Eropigu dorerire õaro mehregure Zena waicugure, Apolo sãre õaro itamuque erã waborore. Eropigu erã gamerire áripehrerire oque erãre d̄hyaro marirõ.

14 Eropirã Jesu yarã mari mera majarã õarire iipoporo. Gajinore opapehobirãre erã itamuboro dopa, õarire iinigu-irã erã áriboro dopa eropa iiporo.

Pablo õadorebeopũ Jesu yarãre

15 Áripehrerã yũ mera majarã m̄re õadorema. Ero árirã Jesu yarã guare mahirã õaporo. Áripehrerãre m̄are Goãmũ ãgu mahiri mera turaro õadorea. Eropa ta áriniguicãporo. Iripẽta ãhraa.

Filemón

Pablo Filemo waĩcũgũre gojanũgapa

¹ Yũhũ Pablo Jesucristo yagũ yũ árĩri dipuwaja peresugue árĩgũ iiaa. Yũhũ, mari acaweregũ Jesu yagũ Timoteo mera mũre Filemore gojabeoa gũa. Mũhũ gũa mahigũ Cristo yare gũare mohmetamugũ āhraa mũhũ.

² Eropirã Jesu yarã mũ ya wi gamenererã sãre gojabeoa gũa. Mari mahigo mari acawerego Jesu yago Apia sãre gojabeoa gũa. Arquipo sãre gojabeoa gũa. Arquipopũ gũa iro dopa Cristo yare weregũ āhrimi.

³ Eropirã Goãmũ mari Pagũ, mari Opũ Jesucristo mera mũare òadoreã. Īgũ itamuri mera òaro árĩque mũa.

Filemo gajirãre ĩgũ mahirire, Cristore ĩgũ umupeorire werepũ Pablo

⁴⁻⁵ Yũ acaweregũ, Filemo, mũre guña Goãmũre mũre serēbasamũraa. Eropa serēbasagũ “Ōhaa,” arãa yũhũ ĩgũre. Cristore mũ mahicũ ĩgũre mũ umupeocũ gajirã Jesu yarãre mũ mahicũ peeabũ yũhũ. Eropigũ Goãmũre “Ōhaa,” arĩ mucubiria.

⁶ Cristore mari umupeorire gajirãre weregũ āhraa mũhũ. Mũ eropa árĩgũ árĩcũ ĩ sãre serēbasaa Goãmũre. Jesucristo yarã árĩrã wũaro òarire oparãca mari. Irire mũ opaburire òaro mũre masipehodoregũ serēbasaa Goãmũre.

⁷ Acaweregũ, gajirãre mũ mahicũ peegũ mucubiria yũhũ. Árĩpehrerã Goãmũ yarãre òaro sĩporã turacũ ĩgũ waĩcũa mũhũ. Mũ eropa iicũ peegũ mucubiria yũhũ.

Pablo Onésimo ya árĩburire serēpũ Filemore

⁸⁻¹⁰ Eropigũ dohpaguere Onésimore mũ pohro majagũ árĩdigũre mũre serēbasadiaa. Peresugue gũa árĩrã Cristo yare werebũ yũhũ ĩgũre. Irire peegũ Cristore gahmeami ĩgũ. Eropigũ ĩgũ Goãmũ yagũ wahámi. Eropa wagũ yũ magũ iro dopa āhrimi. Eropigũ yũ bugũ árĩgũ Cristo yare yũ buhera dipuwaja peresu árĩgũ mũre Onésimo mera werebeogũra ĩgũre mũ iiburire. Cristo ĩgũ buhedore ĩgũ apidigũ āhraa yũhũ. Eropa árĩgũ, árĩgũ ĩgũre mũ iiburire mũre dorebu āhraa yũhũ. Eropa árĩgũ árĩqueregũ ta mũre doresome yũhũ. Mahiri mera mũre werebeogũra iripēta.

¹¹ Cristo yagũ ĩgũ árĩboro core Onésimo mũ pohro majagũ árĩgũ duhpibu árĩbiridigũ árĩmi. Mũre òaro ita-mubiridigũ árĩmi. Dohpague tamerare yare òaro itamugũ

ãhrimi. Mũ sãre õaro itamugũ árĩgũcumi. Dohpaguere bu árĩgũ gohra árĩbeami.

¹² Eropigũ dohpaguere ãgũre mũre wiagũ iiaa. ãgũre turaro mahia. ãgũ yũ turaro mahigũre mũre wiagũ iiaa.

¹³ ãgũre mũre wiabiricũ ãgũ yũ pohro dujaboñumi. Õari buherire yũ buheri dipuwaja peresu yũ árĩrisubu ãgũre yũre itamudoreboya yũhũ. Eropigũ yũ mera dujadoreboya yũhũ. Mũpũ yũre itamumasibiricũ ãgũpũ mũre gohrotogu árĩboñumi.

¹⁴ Eropa árĩquerecũ mũre wiagũ iiaa ãgũre. Mũhũ ãgũre “Dujaque,” mũ arĩbeocũ, ãgũre dujadoreboya. Yũpũ mũre “Yũ pohro ãgũre apique,” arĩdiabirica. Eropigũ ãgũre mũre wiagũ iiaa.

¹⁵ ãgũ Onésimo mũre bajamenurigã ãgũ mũre duhrigãra pũhrũ dipaturi mũ mera árĩgũcumi daja. ãgũ mũre duhricũ Goãmũ gamero dopa ta wahabũ, arĩ pepia yũhũ, ãgũ Jesu yagũ ãgũ árĩborore. Eropigũ mũ pohro árĩgũ daja õaro árĩniguigũcumi.

¹⁶ Eropigũ ãgũ dohpaguere mũ pohro majagũ gohra árĩbeami. Pohro majarã tauñariro árĩgũ ãhrimi ãgũ yũ pepicãre. Dohpaguere ãgũ mũ acaweregũ Jesu yagũ ãhrimi. Eropigũ ãgũre turaro mahia. Mũpũ yũ tauro ãgũre mahique. Mũ eropa mahigũ mũ pohro majagũ ãgũ árĩqueregũ ta mũ pohro majagũ gohra árĩbeami ãgũ. ãgũ mũ acaweregũ Jesucristo yagũ ãhrimi.

¹⁷ Eropigũ yũre mũ bocatĩridiro dopa ta ãgũ sãre õaro bocatĩrique. Mũ mera majagũ yũ árĩcũ ãgũ sãre õaro bocatĩrique.

¹⁸ Eropigũ gajiropa mũre ãgũ iicũ, mũre ãgũ wajamogu árĩcũ yũpũ irire wajayegũra.

¹⁹ Yũhũ Pablo yũ basi ire were gojagũra: Yũpũ wajayegũra mũre. Mũre yũ buhera pũhrũ Cristo yagũ mũ wacũ árĩpehrerinuri Goãmũ mera árĩbu ãhraa mũhũ. Mũre yũ eropa buhera waja mũ sã yũre wũaro wajamogu árĩboca. Mũ eropa árĩquerecũ ta mũre wajayegũra ãgũ mũre wajamorire.

²⁰ Eropigũ yũ acaweregũ, yũ mahigũ, mari Opũ Cristo yagũ ãhraa mũhũ. Mũ eropa árĩgũ Onésimore õaro bocatĩrique. Cristo yagũ árĩgũ yũ acaweregũ ãhraa mũhũ. Eropa árĩgũ, árĩgũ yũre õaro mucubiricũ iique.

²¹ I yũ wererare õaro iigũca mũhũ. Eropigũ yũ werera tauro iigũca mũhũ. Irire masigũ mũre gojabeogu iiaa.

²² I sãre weregũra mũre: Mũa pohrogue yũ waborore Goãmũre mũa serẽbasarare ãgũ yũhribocumi. “Áh,” ãgũ

arĩcũ gahmea yũhũ. Eropigũ mũa pohrogue yũ ejaburi toẽre amuyuque mũhũ.

Pablo ðadoretupũ Filemore

²³ Erafra mũre ðadoremi. Ĩgũpũ Cristo yare ĩgũ iira dipuwaja yũ mera peresu árĩgũ ãhrimi.

²⁴ Eropirã Marco, Aristarco, Dema, Luca yũ mera mũre ðadorema. Cristo yare yũ buhecũ erãpũ yũre itamurã ãhrima.

²⁵ Mari Opũ Cristo mera ðadorea mũare. Ĩgũ mũare ðaro iigũcumi. Eropa ta iiporo. Iripẽta ãhraa.

Hebreos

Goãtmu magu Goãtmu yare werepũ marire

¹ Iribojegue Goãtmu masare werenũgarũ. Īgu bajasuburi mari ñecũ sũmarãre iribojegue majarãre Īgu gamerire weremũripũ. Īgu yare weremũhtanirã mera erãre weremũripũ Īgu. Gajirãre Īgu dehyoa weremũripũ. Gajirãre Īgu bocatĩro weremũripũ. Gajirãre quẽroque weremũripũ. Eropa weremũripũ Īgu mari acawererãre.

² Dohpaguere pehreburiũ coregã árĩrinũre Īgu magure Īgu yare Īgu weredore obeocũ Īgũpũ marire wereami. Jesucristo Īgu Pagũ iidorero mera i yebare umaro sãre iidigu árĩmi. Īgu Pagũpũ pehrerĩnũ árĩcũ árĩpehrerire opabure apĩpũ Īgure.

³ Eropigu Īgu magũpũ Īgu Pagũ õarire opagu árĩgũ, Īgu turari mera marire ii ĩhmudi árĩmi. Eropigu yujuro mera Īgu Pagũ mera árĩgũ, Īgu Pagũ árĩricũre marire ĩhmudi árĩmi. Eropigu Īgu turari mera Īgu dorecũ i yeba, umaro sã eropa árĩniguia. Eropiro dederebeaa Īgu doreri mera. Eropigu mari ñero iirare Īgu coera pũhrũ Īgu Pagũ turatarigu diayepũ doapũ Īgu opũ Īgu árĩre ĩhmubu.

Goãtmu magu anyua tauro aħrimi

⁴ Īgu Goãtmu magu waĩcũmi. Eropa waĩcũgu gajirã tauro opũ aħrimi. Eropigu Īgu anyua weca tauro opũ aħrimi.

⁵ Īgu anyuare Goãtmu ne õpa arĩ werebirimũripũ Īgu magure werediro dopa ta:

Yũ magu aħraa mũhũ. Dohpagãre mũre dehyoacũ iabũ, arĩpũ Goãtmu Īgu magure.

Anyuapũre ne eropa arĩ werebirimũripũ. Eropigu erãre i sãre ne werebirimũripũ:

Īgu pagũ aħraa yũhũ. Eropigu Īgu yũ magu árĩgũcũmi, arĩpũ Goãtmu Īgu magure.

Anyuapũre ne eropa arĩ werebirimũripũ. Eropigu Īgu magu anyua tauro árĩpũ.

⁶ Eropigu gajisubu Īgu magure masa dehyoagure i yeba apõpa aigũ õpa arĩpũ Goãtmu Īgure:

Árĩpehrerã yaharã anyua yũ magure mereja, Īgure umupe-orãcoma erã, arĩpũ Īgu.

⁷ Eropigu Īgu anyuapũre werebu õpa arĩpũ Īgu:

Yaharã anyuare mirũne iro dopa dũpũcũrãre iiaa yũhũ. Erã yũ pohro majarã aħrima. Eropigu erãre peame iro dopa árĩcũ iiaa yũhũ, arĩ werepũ Goãtmu mari Pagũ.

⁸ Erāre ĩġu eropa arĭquereġu ta ĩġu maguþure õpa arĭþu: Muħu Goāmũ árĭpehrerā tauro opu eropa árĭniguicāġuca.

Diaye ta doreġuca muħu mu yarāre.

⁹ Diaye árĭrire, õaro iirire turaro gahmea muħu. Eropiġu ñero iirire gamebeaa muħu. Muħu eropa árĭġu árĭcũ ĩaġu, yuħu mu Paġu árĭpehrerā ġajirā tauro mure mucubiricũ ĩiabũ, arĭþu Goāmũ.

¹⁰ I säre arĭþu ĩġu ĩġu magure “Opu,” arĭ piyugũ:

Opũ, negohraguere i yebare, umaro säre ĩhacũnugubu muħu.

¹¹ Iri árĭpehreri pehrea waroca. Muþu eropa árĭniguicũca. I yeba árĭpehreri suhriro iriñe boaro dopa ta pehrea waroca.

¹² Iri árĭpehreri i yebare umaro säre gohrotocũ iigũca muħu. Murañe suhrirore mu cohã ġajiñe mera gohrotoro dopa ta árĭpehrerire gohrotocũ iigũca muħu. Muþu mu árĭdiro dopa árĭniguicāġuca. Eropiġu ne gohrotosome. Eropa árĭniguicũca muħu, arĭþu Goāmũ ĩġu magure.

¹³ Ģajisubu õpa ĩġu magure arĭġu iri säre anyuapure ne werebirimurĭþu Goāmũ:

Yu diayerũ doaque muħu. Eropiġu mure ĩhaturirāre tarinũġabasadoreġura. Eropiġu erā weca opu árĭque muħu, arĭþu Goāmũ ĩġu magure.

¹⁴ Árĭpehrerā anyuapũ Goāmũ pohro majarā dihta āhrima. Eropi ro Cristo ĩġu taumorāre itamudoreġu Goāmũ obeomurimi erāre.

2

Goāmũ yare õari buherire marire eropa pepibiricāro gahmea

¹ Eropiġu Goāmũ magu gohra marire wereġu ĩġu árĭcũ masirā ĩġu wererare mari peerare õaro ġuñaro gahmea marire irire cādjiri arĭrā.

²⁻³ Anyua masare erā wererare masapũ erā tarinũġacũ ĩaġu Goāmũ masare dipuwaja moapũ. Eropiġu erā anyua werera iri diaye árĭcũ ĩhmugũ iipũ. Eropi ro anyua erā werera iri diaye árĭcũ marire irire peero gahmea. Erā tauro Cristopure peero gahmea marire. ĩġu mari Opu ĩġu marire tauborore weremuħtapũ. Eropirā ĩġure peenirāþu ĩġu wererare marire wereturiañorā marire õaro masicũ iirā. Eropiġu iri buherire “Jesucristo marire ĩġu taugũcumi,” arĭ buherire mari eropa pepicācũ Goāmũ marire dipuwaja moagũcumi. ĩġu dipuwaja moaborore duhrimasibea mari.

⁴ Irire peemuħtanirā erā buhe weca peero watope Goāmũþu iri buherire diaye ta árĭcũ ĩhmudi árĭmi. Eropiġu erā irire buherā ĩġu turari mera baja deyoro moari erā ĩi

ĩhmucũ iri buherire diaye ta árĩcũ ĩhmudi árĩmi masare. Eropigu ĩgu Espĩritu Santo mera iri buheri diaye ta árĩcũ ĩhmudi árĩmi. Espĩritu Santo Jesu yarãre yujurãyerire Goãmu yare erã mohmemasiburire apidi árĩmi erã game itamuboro dopa. ĩgu gamediro dopa ta apidi árĩmi erã mohmemasiburire erãre.

Jesucristo mari iro dopa ta durũcũgu masa dehyoapu, arĩ gojañumi

⁵ I mũmu pehrerinũ árĩcũ Goãmu pohro árĩrã tauro oparã árĩsome anyuapu. Erãre oparã acusome Goãmu.

⁶ Anyuare oparã acubiriquerecũ Goãmu yare weremũhtadigu õpa arĩ gojañumi iribojeguerẽ Goãmu ĩgu oparã acumorãre:

Gua masa bu gohra gua árĩrã árĩquerecũ ta guare guñaamũhu. Gua masare õaro árĩcũ iiaa mũhu.

⁷ Bajamenũrigã anyua doca masare apiyoro mũhu. Eropa apiqueregu ta guare turari ogu oparã acuyoro mũhu.

⁸ Mũhu eropa acucũ i yeba maja weca árĩpehreri weca ãhraa gua masa, arĩ gojañumi iribojeguerẽ majagu mari Pagure.

Goãmu masare apigu i yebaguere árĩpehrerã waimurã sãre masa dorero doca árĩmorãre apiñumi. Masare ĩgu eropa oparã acuquerecũ ta erã waimurãre árĩpehrerãre doremasibeama dohpa.

⁹ Jesupu árĩpehrerã weca opu ãhrimi. Bajamenũrigã anyua doca mari Pagu ĩgu sãre apipu. Mari yañe árĩborañere sĩribasabure ĩgure eropa apidi árĩmi. Mari Pagu marire mahigu Jesure mari ya árĩburire ĩgu sĩricũ gamepu. Eropigu ĩgu eropa sĩricũ ĩagu ĩgure turarire ogu, opu acupu ĩgure pare árĩpehrerã ĩgure umupeoborore.

¹⁰ Goãmu árĩpehrerire ĩhacũnuguñumi. Eropiro árĩpehreri ĩgu ya dihta ãhraa. Eropigu Jesure sĩridoregu masa erã ñerire cãdijicũ iipu ĩgure. ĩgu masa bajarã ĩgu porã árĩmorãre umarogue õarogue aĩgãbu eropa iipu. ĩgu eropiicũ tamera õapũrica. Eropigu Jesupu marire taugu mari opu ta ãhrimi.

¹¹ Árĩpehrerã masa erã ñerire cóãdi árĩmi Jesucristopu. Eropigu ĩgu ñerire cóãnirã mera Pagucumi Goãmure. Eropigu mari Pagu yujugu ta ãhrimi. Mari Pagu ĩgu árĩcũ Jesu marire ĩgu ñerire cóãnirãre "Yũ acawererã ãhrima," arĩ piyugu ne guhyasĩribeamĩ.

¹² Opa arĩgu iipu ĩgu Pagure:

Mũ árĩricurire werẽgura yũ acawererãguere. Árĩpehrerã yaharã gamenerã pohro mũre umupeogu "Turagu

ãhrimi," arĩ weregura yũhũ erãre, arĩpũ ãgũ ãgũ Pagure, arĩ gojara ãhraa.

13 Eropigũ õpa arĩpũ daja:

Yũ Pagure guñaturagũca yũhũ, arĩpũ, arĩ gojara ãhraa.

I sãre arĩpũ ãgũ Jesucristo:

Ohõ ãhraa yũhũ. Goãmũ porã ãgũ yũre apinirã yũ acawererã mera ohõ ãhraa, arĩpũ ãgũ. ãgũ yarãre "Yũ acawererã," arĩ piyugũ eropa arĩpũ.

14 "Yũ acawererã," ãgũ arĩ piyurã dũpũcũrã mari áricũ ãgũ, Jesupũ mari ya dũpũ mari iro dopa árigũ aripũ. Eropa árigũ arigũ ãgũ crusague sãrigũ aripũ watĩre dederecũ iibu. ãgũ watĩpũ sãridoregũ ãhrimi marire.

15 Eropa ii ãgũre dederecũ iidi árimi marire tauboro dopa. Maripũ mũmũri nũcũ mari sãriborore gũiribũ. Eropa gũirã gũiro doca árirã, ñero sãporãcũrã áriribũ mari. Eropa árirã mari áricũ ãgũ ãgũ marire taumi.

16 Eropa taugũ anyuapũre itamugũ aribiripũ ãgũ. Abrahã pãramerãre maripũre itamugũ aripũ.

17 Eropigũ ãgũ mari acaweregũ iro dopa aripũ. Yujuropa ta mari iro dopa ta dũpũcũgũ aripũ. Eropa arigũ mari masa ya áriburire sãribasagũ mari ñeri iurare Goãmũre cóãdoregũ aripũ. Eropigũ pahia oparã erã Goãmũ ya áriburire serẽbasaro dopa ta õaro itamuboro dopa mari iro dopa dũpũcũgũ arigũ iipũ. Erã tauro marire ãgũ mojomoro ãhami. Eropigũ marire õaro itamuniguicãmi.

18 ãgũ ñero taripũ. Eropigũ watĩ ãgũre ñero iidoreripũ. Iibiripũ ãgũ. Eropa ñerire tarinũgadigũ árigũ, ãgũ mari sãre ñerire tarinũgacũ iimasimi. Watĩ ãgũ ñerire iidorecũ ãgũ marire ñerire iibiricũ iimasimi.

3

Jesu Moise tauro árigũ ãhrimi

1 Jesu ãgũ eropa árigũ áricũ ãrã ãgũre bũrigã guñaque mũa. Yũ acawererã, Jesu yarã, Goãmũ ãgũ yarã árimorãre mũare beyedigũ árimi ãgũ. ãgũ Jesupũ Goãmũ ãgũ apidigũ árigũ mari pahia opũ ãhrimi. I yeba majarã pahia oparã tauro ãgũpũ mari ya áriburire Goãmũre serẽbasagũ ãhrimi marire. Eropirã ãgũre õaro guñaque mũa umupeodigũre.

2 Goãmũ ãgũre marire ãgũ tauborore ãgũ apicũ ãgũpũ ãgũ apidiro dopa ta iipũ. Ne tarinũgabiripũ. Moise sã iribojegue majagũ Goãmũ yarã Israe masare itamugũ ne tarinũgabiripũ. Eropa ta iipũ Jesu sã.

3 Eropiro Moisere erã umupeodiro tauro Jesupũre umupeoro gahmea marire. Õpa ãhraa iri. Wihire mari "Õari wihi

ãhraa," arĩro tauro wihire iidigupure "Ōapũricãmi," arĩro gahmea marire. Eropigu Jesupũ wihi iidigu iro dopa ãhrimi. Īgu eropa arĩgu arĩcũ ĩgupure Moise tauro umupeoro gahmea marire.

⁴ Masapũ wirire iirã ãhrima. Goãmupũ arĩpehrerire iigu ãhrimi.

⁵ Moisepũ Goãmũ mohme coregũ arĩgu Goãmũ ya curu majarãre itamuniguigu arĩmũripũ. Pũhrũgue Goãmũ ĩgu masare wereborore weremũripũ masare.

⁶ Cristopũ Goãmũ magũ arĩgu ta, Goãmũ yare iiniguicãgu arĩgu Goãmũ ya curu majarã tauro opũ ãhrimi. Eropirã Moise tauro Cristopũre umupeoro gahmea marire. Eropirã maripũ Cristore guñatura duhubirã arĩrã marire ĩgu tauborore eropa mucubiri coreniguicãrã ĩgu ya curu majarã ãhraa mari.

Goãmũ ĩgu yarãre ĩgu mera õaro soocũ gameñumi

⁷ Eropirã Jesucristore mari umupeo duhubiriborore õpa iro gahmea marire. Irire weremĩ Espĩritu Santo Goãmũ yare gojarapũguere.

Dohpagãre yũhũ Goãmũ mũare yũ werecũ yũhridiagirã arĩbircãque mũa.

⁸ Eropirã õaro yũhrique yũre mũa. Iribojegue Israe masa masa marirogue arĩrã yũ werequerecũ ta umupeodiagirã yũre yũhribirimũrima. Eropa iirã yũre ĩhasuabircũ iima. Eropirã erã iidiro dopa iibircãque mũapũ yũre.

⁹ Eroguere cuarenta bojori gohra erãre deyoro moarire ii ĩhmuribũ erãre itamuũ. Yũ eropa ii ĩhmuquerecũ ta erãpũ õpa arĩ pepimũrima yũre duyasorã. "Goãmũ marire itamumasisome," arĩ pepimũrima. Eropa arĩ pepirã ñero iimũrima.

¹⁰ Erã eropiicũ ĩagu erã mera guabũ. Eropa guagu õpa arĩbũ: "Erã yahare peediagirã gajiropa arĩri buherire eropa guñamaacãrã ãhrima," arĩbũ. "Yahapũre ne buhediablema," arĩbũ erãre.

¹¹ Eropigu erã mera guagu õpa arĩ werebũ: "Erã yũ mera majarã ne arĩsome. Eropirã yũ mera õaro soosome erã," arĩ werepũ Goãmũ.

¹² Eropirã, yũ acawererã, õaro iique mũa Goãmũre cohmorĩ arĩrã. Mũa ñerire pepirã, Goãmũ ojocarigure "Diaye iimi ĩgu," arĩ umupeobirã, ĩgũre cóãboca mũa. Ne yujugu mũa mera majagu eropa iibircãporo.

¹³ Eropirã ipũre iiro gahmea: Mũa mera majarã mũmũri nũcũ Goãmũ yare mũa basi game wereniguigue ñerire iiri arĩrã. Ñerire iirã "Iri mera mucubiria," arĩrã, gũyarire pepirã iiaa mari. Eropa pepibircãque. Ñeripũre iiniguirã

Goãmũ yapũre suabeaa mari. Eropa iirã ñerire duhudiabirã wahaa. Eropa iiri arĩrã mũa mera majarãre Goãmũ yare mũa basi game wereniguique. Jesucristo ïgũ dujariboro core eropa game wereniguique.

¹⁴ Eropirã negohrare Cristore mari umupeonũgadiro dopa ta eropa ta mari umupeoniguicãrã, mari ojocaripõẽ ïgũ yare duhubirã ïgũ mera majarã ãhraa.

¹⁵ Goãmũ yare erã gojarapũ yũ dohparagã werediro dopa werea daja mũare Goãmũ wereniguirire:

Dohpagãre yũhũ Goãmũ mũare werecũ õaro yũhrique mũa yũre. Iribojegue majarã Israe masa erãre yũ werequerecũ ta umupeodiabirã yũre yũhridiabirima. Eropirã erã iidiro dopa iibiricãque mũa, arĩmi Goãmũ, arĩ gojañuma iribojegure.

¹⁶ Eropirã Goãmũ ïgũ wererare peenirã árĩquererã erã ïgũre yũhribirimuriñorã. Erã árĩpehrerã Egiptogue ñero tarinirãre Goãmũ Moise mera ïgũ wiunirã árĩñorã. Erã eropa árĩquererã ïgũre ne yũhribiriñorã.

¹⁷ Eropigũ erã ñero iicũ ïagũ cuarenta bojori gohra Goãmũ erã mera guarũ. Erã ñero iira dipuwaja erogue masa marirogue erãre dujadorepũ. Eropirã erore sĩa wamuriñorã erã.

¹⁸ ïgũre erã eropa yũhridiabiricũ ïagũ õpa gũhyadiaro mera arĩpũ ïgũ: “Erã yũ mera majarã ne árĩsome. Eropirã yũ mera ne õaro soosome erã,” arĩpũ ïgũ.

¹⁹ ïgũ eropa arĩcũ peerã ire masia mari: Erã Goãmũre erã umupeobiriri waja, ïgũ mera majarã árĩmasibiriñorã. Eropirã ïgũ mera õaro soomasibiriñorã.

4

¹ Eropigũ iribojegue majarãre ïgũ mera õaro erã sooborore gamegũ erãre “Yũ mera soorãca,” arĩ apipũ Goãmũ. Mari sãre eropa ta arĩ apipũ ïgũ. Eropirã gũhyadiaro mera Goãmũre õaro yũhrirã mari wieri marigue arĩrã. Eropa wierã ïgũ mera õaro soosome mari.

² Iribojegue majarã Goãmũ yare erã peediro dopa ta mari sã õari buherire peebũ. Erãpũ peerã “Goãmũ diaye iigũ ãhrimi,” arĩ pepibirimuriñorã. Goãmũre umupeobirimuriñorã. Eropiro Goãmũ yare peequererã yũhribiricũ erã peera ñehe árĩburi árĩbiriyoero erãre.

³ Maripũ ïgũre umupeorã dihta Goãmũ mera majarã árĩrãca. Eropirã ïgũ mera õaro soorãca. Goãmũ õpa arĩpũ: Erã mera guagũ gũhyadiaro mera õpa arĩ werebũ: “Yũ mera ne soosome erã,” arĩ werebũ, arĩyoero Goãmũ yare erã gojarapũgue.

Eropa arĩpũ ĩġũ. I yebare ĩġũ ĩhacũnugura pũhrũ soopũ ĩġũ. Eropigũ masa sã ĩġũ mera sooborore amuyupũ. Amuquereġũ erãpũre “Yũ mera ne soosome erã,” arĩpũ Goãmũ.

⁴ Seis nãri ĩġũ ĩhacũnugura pũhrũ ĩġũ soorare õpa arĩ gojañuma Goãmũ yare erã gojarapũġue:

Seis nãri pũhrũ árĩpeherrerire ĩġũ iirare pehogũ, Goãmũ mohmeduhu soopũ, arĩ gojañuma ĩġũ yare erã gojarapũġue.

⁵ Eropiro Goãmũ yare erã gojarapũ õpa arĩ werea daja ĩġũ mera õaro árĩbirinirãre:

Yũ mera majarã ne árĩsome erã. Eropirã ne yũ mera soosome, arĩpũ Goãmũ.

⁶ Eropirã õari buherire peemũhtanirã, ĩġũre erã tarinũgara dipuwaja ĩġũ mera majarã árĩbirã ĩġũ mera soobiriñorã erã. Gajirãpũ ĩġũ mera majarã árĩrãcoma. ĩġũ mera soorã árĩrãcoma.

⁷ Eropigũ masa ĩġũ mera õaro árĩburire erã ĩġũ mera sooburire apigũ daja, “Dohpaguere ãhraa,” arĩ apipũ Goãmũ. Israe masa Goãmũre erã tarinũgara pũhrũ baja bojori pũhrũ irire weredorepũ Davire. Davi were gojarare mũare weretuhajaquereġũ wereġura daja yũhũ. Eropigũ õpa arĩ gojañumi Davi Goãmũ wereniguirire:

Dohpagãnũre yũhũ Goãmũ mũare yũ werecũ, tarinũgaro mariro õaro yũhrique mũa yũre, arĩ gojañumi iribojegũ.

⁸ Ero coreġue Josuẽ Israe masare Goãmũ ĩġũ ora yebague aĩ ejarũ. “Yũ mera soorã árĩrãcoma,” arĩġũ iri yebague erã sooborore arĩġũ iibiripũ Goãmũ. Iri yeba soodoreġũ gajinũ erã sooburire apibiriboñumi ĩġũ.

⁹ Seis nãri pũhrũ i yebare ĩġũ iira pũhrũ Goãmũ ĩġũ mohmeduhu soodiropã ta mari ĩġũ yarã sã ĩġũ mera mari sooburiñe ãhraa. ĩġũ mera mari õaro árĩburiñe ãhraa.

¹⁰ Eropigũ Goãmũ soogũ, ĩġũ mohmerare duhucãnipũ. Eropa ta ĩġũ mera soorã mari gamero mera iirire duhucãrãca.

¹¹ Eropirã mari ĩġũ yarã õaro iirã. Goãmũ yare õaro yũhrirã ĩġũ mera mari sooboro dopa. Iribojegue majarã mari acawererã erã tarinũgara pũhrũ Goãmũ mera majarã ne árĩmasibirimãriñorã erã. Erã iidiropã dopa iibiricãrã mari.

¹² Goãmũ ya wereniguirire marire Goãmũ mera õaro árĩnigũicũ iiaa. Õaripũre marire gohrotocũ iiaa. Eropiro ĩġũ ya wereniguirire bu árĩri árĩbeaa. Eropiro matamiji pepũripũ usirimiji mera dirore erã wiri ĩha erã masiro dopa

ta, ĩġu ya wereniguri mari árĭricurire mari pepirire ôaro masicũ iiaa marire. Eropa masirã mari iiricuri ôaro árĭcũ, ôaro árĭbiricũ sãre masia ĩġu wereniguirire peerã. Iri mari buhecũ mari árĭricurire ôaro masipehocũ iiaa marire.

¹³ Ne Goãmure mari árĭricurire mari iirare duhmasibea mari. Árĭpehrerire ĩġu ĩhacũnugurare ĩġu ĩhacũnugunirã sãre ĩhami ĩġu. ĩġu tamerare mari iirare mari pepirire werepehorãca mari.

Jesu turagũ mari pahia opu àhrimi

¹⁴ Jesu Goãmũ magũ ĩġu sĭrira pũhrũ ĩġu Pagũ pohrogue dujadigũ árĭmi. ĩġu turagũ mari pahia opu àhrimi. Eropigũ mari ya árĭburire Goãmure serẽbasami. ĩġu eropa árĭġu árĭcũ ĩarã maripũ ĩġu yare ôaro yũhrirã árĭrã ĩġure ôaro umupeoniguicãrã.

¹⁵ ĩġu Jesucristo mari pahi árĭġu mari ñero taricũ ôaro mojomoro ĩagũ àhrimi. Mari ñerire ƣaribejarire masimi ĩġu. Watĭ árĭpehreri ñerire ĩġu marire iidorero dopa ta Jesu sãre ñerire iidoreripũ. ĩġu eropa iidorequerecũ ĩġu ñerire iibiripũ. ĩġu eropa ñerire iidorerire iidoredigũ árĭġu marire mojomoro ĩagũ marire itamumasimi.

¹⁶ Eropirã “Yũre yũhrigũcumi,” arĭrã Goãmure serẽrã. ĩġu marire mahimi. Eropigũ mari ĩġure serẽcũ marire mojomoro ĩagũ marire itamugũcumi. Eropigũ mari ñero iidiacũ sãre ĩġu marire itamugũcumi.

5

¹ Árĭpehrerã pahia oparã, masa mera majarã àhrima. Beyenirã àhrima erã mera majarã yare Goãmure serẽbasamorã. Eropirã masa ñerire erã iira dipuwajare Goãmure serẽbasama erã mera majarãre. Eropa serẽbasarã waibũgure wejẽ soe mujuma Goãmure.

² Pahia oparã gajirã masa iro dopa ôaro masipehobirã àhrima. Gajisubu ôarire iibirã àhrima erã sã. Eropa masibirã árĭrã gajirã masibirãre itamumasima nijiyajaro mera. Eropirã ôarire iibirã sãre ôaro mera itamumasima.

³ Eropirã ôaro masipehobirã ñeri iira dipuwajacurã àhrima erã sã. Eropirã erã basi erã ñerire erã iira dipuwaja waibũgure wejẽ soe mujuma Goãmure. Gajirã masa ya árĭburire erã ñeri iira dipuwaja erã serẽbasadiro dopa ta, erã basi erã ya árĭburi sãre serẽma Goãmure.

⁴ Eropigũ ĩġu ĩġu gamero pahia opu ñajabeami. Goãmũpũ ĩġure beyegũ, pahia opu acumi. Iribojegue majagũ Aarõ mũrũre ĩġu apidiro dopa ta gajirã pahia oparã sãre apimi ĩġu.

⁵ Eropa ta Cristo sã ĩgu basi ĩgu gamero pahia opu ñajabiripu. Goãmuru ĩgure opu acugu õpa arĩpu: Yu magu ahraa muhu. Dohpagãre mare dehyoacũ iibahu yahu, arĩpu Goãmu.

⁶ Gajisubu õpa arĩpu Goãmu Cristore:

Árĩpehrerire pahi árĩniguicãgũca muhu. Melquisede ĩgu árĩdiro dopa ta pahi árĩniguicãgũca muhu, arĩpu ĩgu magure.

⁷ Cristo i yeba árĩgu burigã gaguinigui, co deco mera Goãmure turaro serẽpu ĩgu, "Yure masuque," arĩgu. Mari Paguru Goãmuru ĩgure sĩridigure masumasigu arĩpu. ĩgu eropa serẽcũ Goãmu peepu ĩgure. Goãmu gameri dihtare ĩgu iidiacũ ĩagu Goãmuru ĩgu serẽrare peegu yuhripu.

⁸ Eropigu Cristo Goãmu magu árĩqueregu ñero taripu ĩgu. Eropa ñero tarigu yuhripu Goãmure. Eropa yuhrigu õaro yuhrire masituhapu.

⁹ Eropa yuhridigu crusague sĩrigu masa erã ñerire cãdijigu árĩpehrerã ĩgure yuhrire taubu wapu.

¹⁰ Eropigu Goãmuru ĩgure pahia opu masa yare serẽbasabure apipu. Eropigu Melquisede pahia opu ĩgu árĩdiro dopa ta ahrimi Cristo.

Cristo yarã ĩgure umupeo duhucũ gũhya ahraa

¹¹ Baja õpa árĩre mare werenemodiaa gua. Gua eropa werenemodiaquerecũ ta muru peediabirã ahraa. Eropirã mare gua werẽcũ mmasumasigu arĩpu. ĩgu eroasiya mara.

¹² Yoari boje Cristo yarã árĩraa mua. Eropa árĩrã dohpaguere gajirãre buherãgue árĩboca mua. Mua eropa árĩbonirã árĩquerecũ ta gajirã murure buherãcoma. Goãmu yare mare buhemũhtarare mare buhero gahmea daja. Ne buhenugarã iro dopa ta ahraa mua.

¹³ Apĩco mihrirã majirãgã árĩnima. Erã iro dopa ta mua sã ahraa õaro masibirã árĩrã. "I ñeri ahraa. Ipu õari ahraa," arĩ ĩha masibea mua.

¹⁴ Barire barãpu murã ahrima. Erã iro dopa árĩrã õaro buhenirã õaro pepi masirã mua árĩcũ õaboaya. "I ñeri ahraa. I õari ahraa," mua arĩ ĩha masirã árĩcũ õaboaya.

6

¹⁻² Eropirã Goãmu yare õaro masirã, õaro yuhrirã árĩrã. Cristo yare negohraguere buhenugarã õpa masinugabu mari: Mari gamero mera mari iiri duhpburi árĩbeaa. Mari iiri mera tarisome mari. Tarimorã Goãmure umupeoro gahmea marire. Ire negohraguere buhenugama marire. Eropirã marire waĩyema. Mojotorire marire erã

duhpeorire buhe, sīrinirā erā masa mūriborore buhe, i umu pehrera pūhrū Goāmū ĩgū dipuwaja moaborore buhe, ĩgū dipuwaja moamorā erā ñero tariniguiboro sāre buhe, i sāre marire negohraguere buhenugama. Eropa árīri buherire mari masituhajarare buhenemobirā gaji buherire ōaro buhenemorā.

³ Eropirā Goāmure, ĩgū ya sāre masinemorā. Goāmū ĩgū gamecū eropa ta iirāca mari.

⁴ Goāmū yare masinirā irire duhurāre ne dipaturi erāre erā ñeri iirare erāre bujawerecū iimasiya mara daja. Eropa árīrā, Cristo ĩgū taunirā árīrā Espírītu Santore oparima.

⁵ Eropirā Goāmū ya wereniguirire peerā ōari wereniguiri iri árīcū masirima. Eropirā pehrerinū pūhrūgue Goāmū ĩgū turari mera mari eropa árīniguiborore, masare ĩgū dipuwaja moaboro sāre erā masirima.

⁶ Eropa árīrā Cristo yare erā duhurā Goāmū magure dipaturi crusague erā pabiadiro dopa ta ĩgure iirā iima. Erā eropiicū ĩarā gajirā masa Cristore wereyama. Eropirā dipaturi erāre, erā ñeri iirare erā bujawere ōarire gohrotocū iimasiya mara.

⁷ Ōpa āhraa iri mari werenigui queori mera buhecū: Ōari yebare wuaro deco aricū erā oteri ōaro puhri ducacua. Eropigū iri pohe opu ducare opami ĩgū baburire. Iri yeba ōari yeba árīcū ĩha mucubirimi. Eropa ta Goāmū iimi ĩgū yare peenirā sāre. Erā ĩgū yare ōaro iicū ĩha mucubirimi erā mera.

⁸ Gaji yebapū añapora mera, taa mera iri yeba tiaro duhpiburi yeba árībeaa. Eropa árīri pohere cóacāro gahmea. Eropa ta Goāmū iimi ĩgū ĩgū yare peequererā iibirāre. Erāre dipuwaja moa peamegue cóagucumi.

Cristore eropa umupeoniguirāre taumi Goāmū

⁹ Yū mahirā, mūare eropa arī werequeregū ta mūapure “Cristore duhuristo yare erā duhurā Goāmū mā āhraa,” arīgū iibeaa. Mūapū Cristo ĩgū taurā āhraa. Eropirā ōarire iirā iica mūa. Irire masia yuhū.

¹⁰ Mari ōaro iira waja Goāmū queoro marire ōaro iigū āhrimi. Eropigū ĩgū ya árīburire mūa turaro mohmerare cādijisome ĩgū. Mūa ĩgure mahirā ĩgū yarāre itamuabū mūa. Dohpague sāre erāre itamuniguia mūa. ĩgure mūa eropa mahirare cādijisome ĩgū.

¹¹ Mūa ojocarinigucāropē gajirāre mūa umupeocū, mūa itaisto yare erā duhurā Goāmū mmunigucū sāre gahmea gūa. Mūa eropiicū ĩagū ōaro iigucumi mari Pagū mūare.

¹² Eropirā mūa tericūrā árīcū gamebeaa gūa. Gajirā Cristo yarā ñero tariquererā Goāmure “ĩgū diaye ta árīgū

āhrimi," arī umupeoniguicāma. Erā eropiicū īagu Goāmū "Masare ōarire ogura," īgu arīdiro dopa ta erāre opehogucumi. Eropirā mūa sā erāre īhacūrā erā iro dopa ta iiniguicāque.

13-14 Iribojegue Goāmū Abrahāre ōpa arī apipū: "Ūu wāi mera diaye ta ire arīgu iiaa mūre. Mūre ōaro iigura. Eropigu mū pāramerā arīturiarāre bajarā masa árīcū iigura," arī werepipū Goāmū. Eropa arī werepigū īgu ya wāi mera wāipeorū. Gajigu īgu tauro árīgu ne maricū īgu ya wāi mera eropa wāipeorū.

15 "Mūre ōaro iigura," Goāmū īgu arī apirare Abrahāpū ōaro īgu umupeoyura pūhrū Goāmū īgu arīdiro dopa ta īgure ōaro iipū.

16 "Goāmū mera diaye arīgu iiaa," masapū arīrā, erā erā tauro árīgu wāi mera wāipeorā iima. "Goāmū mera diaye arīgu iiaa yūhū," yujugū īgu árīcū gajigu peegū "Diaye āhraa," arīgucumi. Dūyasomasibeami.

17 Eropigu Goāmū Abrahāre "Mūre ōaro iigura," arī apigu "Ūu wāi mera diaye ta arīgu iiaa," arī wāipeorū. Īgu eropa wāipeo wererare peerā "Diaye ta āhraa iri," arī masia. Eropirā "Īgu arīrare ne gohrotosome," arī masia mari. Irire mari masiboro dopa īgu arī apira mera īgu wāipeogu eropa werepipū.

18 Eropigu īgu arī apira mera, īgu wāipeora mera diaye īgu arīrare masicū iipū Goāmū marire. Eropiro īgu wāipeocū īgu arī apira ne gohrotosome. Eropigu Goāmū ne gūyabeami. Īgu eropa árīgu árīcū masirā, mari marire īgu tauborore mucubiri corerāca, "Eropa ta iigucumi," arīrā.

19-20 Eropa īgu tauborore corerā guñaturarā āhraa mari. Eropa arīrā "Mari sīrirā Goāmū pohro warāca," arī masirā gūibeaa. Pahia opū Goāmū īgu árīri taribu gohrague űajagu, cāhmotariñe suhriro pohecague tariñajami. Eropa űajagu masa ya árīburire serēbasami Goāmūre. Īgu eropiidiro dopa ta Jesu sā űmarogue Goāmū árīroque űajamūhtadi árīmi. Eropa űajamūhtagū mari sāre erogue űajaburire ahmu serēbasami. Eropigu árīpehrerinūri nūcū serēbasagu iimi pahia opū árīgu. Melquisede pahi īgu arīdiro dopa ta pahia opū āhrimi īgu Jesu.

7

Melquisede pahi īgu arīdiro dopa ta Jesu pahia opū āhrimi, arī gojañumi

1 Melquisede iribojegue majagu Salem wāicūri maca majagu opū árīmūripū. Eropigu pahi árīgu Goāmū

turagure umaro majagure masare serēbasagu árīmuripū. Eropigu gajirā oparāre Abrahā gamewejētuhā, ĩgu dujaricū gohra, Melquisede ĩgu ya maca árīdigu waha, Abrahāre bocatīripū. Eropā bocatīrigu ĩgure serēbasapū Goāmure: “Ōaro iique ĩre,” arī serēbasapū Abrahāre.

² Abrahāpū ĩgu gamewejē tarinugara pūhrū gajirā oparā yare aĩ dujarū. ĩgu eropa aĩ dujarare merogā dūhapū ĩgu Melquisedere. Diez ĩgu aĩ dujara árīcū yujuñe ópū Melquisedere. Melquisede ĩgu waĩ mari ya mera arīro “Tauro opū ōaro iigu āhrimi,” arīdiaro iiaa. Eropigu ĩgu Salem waĩcūri maca majarā opū ĩgu árīcū iri maca maja waĩre waĩcūpū. Salem waĩ ōpā arīdiaro iiaa: “Tauro opū masare ōaro game mahicū iigu āhrimi,” arīdiaro iiaa.

³ Ne Melquisede pagū sumarāre, ĩgu core árīmūhtanirāre, ĩgu acawererāre erā were gojatura mara. ĩgu masa dehyoarare, ĩgu sīrira sāre were gojatura ne mara. Eropigu eropa árīniguigu iro dopa árīpū ĩgu. ĩgu eropa árīgu árīcū Goāmū ĩgu magū ĩgu pahī ĩgu árīrāre marire buhemi. Melquisede pahī eropa árīniguigu iro dopa ta āhrimi ĩgu Jesucristo Goāmū magū. ĩgu iro dopa ta Cristo sā pahī árīgu eropa árīniguicāgu āhrimi.

⁴ Eropigu Melquisede turagu árīrāre guñaque. Abrahā mari ñecū mūrū opū gohra árīqueregu ta Melquisedepure ĩgu duja aĩrāre dūhapū. Diez ĩgu duja aĩra árīcū yujuñe ópū Melquisedere. Eropā ta ĩgu duja aĩ ĩgu dūharare ópū ĩgure.

⁵ Eropiro Moise ĩgu doreri mera árīpehrerā gajirā Israe masare iripēta wajayedorepū erā pahiare. Eropā doregu Leví pāramerā árīturiarāre erā acawererā árīturiarā erā wajayerire ñeadoregu apimūripū. Leví pāramerā ya curu majarā pahia dihta wamūriñorā. Eropirā gajirā ya curu majarā sā Leví pāramerā mera Abrahā pāramerā árīturiarā árīmūriñorā. Erā acawererā árīquererā erā Leví pāramerāre wajayemūriñorā.

⁶ Melquisedepū Leví pārami árīturiagu árībiriqueregu ta wajaseapū Abrahāre. Eropigu “Mure ōaro iigura,” ĩgu Goāmū arī apidigu árīqueregu Abrahāpū Melquisedere wajayerū. Eropigu Melquisedepū Goāmure Abrahāre serēbasagu ōaro árīdoremūripū.

⁷ Ōaro árīdoregu Melquisedepū ĩgu ōaro árīdoredigu Abrahā tauro árīpū. Irire mari ōaro masia.

⁸ Mari mera majarā pahia marire merogā wajasearā mari iro dopa ta masa āhrima. Eropā árīrā sīrimorā ta āhrima erā sā. Ihī Melquisedepū iribojegue Abrahāre merogā

wajaseadigu eropa árĩniguigu iro dopa àhrimi ìguᵑᵑ. “Ìgu sĩaria wañumi,” arĩ werera ne mara. Eropo ta àhraa Goãmᵑᵑ yare erã gojarapũgue.

⁹ Dohpague majarã Levĩ pãramerã árĩturiarã pahia árĩrã masare merogã wajaseamũrima. Eropo árĩrã erã árĩquerecũ ta Abrahã erã ñecũ árĩgu Melquisedere merogã wajayegu árĩpehrerã Levĩ pãramerã ya árĩburi sãre wajayebasagu iimũripũ. Eropirã Levĩ pãramerã sã Melquisedere wajayenirã iro dopa àhrima.

¹⁰ Melquisedere Abrahã ìgu wajayerasubure Levĩᵑᵑ masa dehyoanĩbiripũ dohpa. Eropo masa dehyoabiriqueregu ta ìgu ñecũ Abrahã dũpũgue ìgu árĩbodiropo dopo ta Levĩᵑᵑ árĩtuhagu iipũ. Eropigu Melquisede Abrahãre ìgu bocatĩricũ Levĩ sã ìgu ñecũ mera ìgu árĩboropo dopo árĩgu iipũ. Eropo árĩgu Levĩ, ìgu pãramerã mera Melquisedere merogã wajayenirã iro dopo árĩrã erã ìgu doca árĩrã iĩñorã.

¹¹ Ìgu dorerire apigu Goãmᵑᵑ Aarõ pãramerã árĩturiarã Levĩ ya curu majarãre pahia árĩdoremũripũ. Eropirã ìgu dorero dorediro dopo ta erã pahia waimũrãre soe mujurã masa ya árĩburire serẽbasamũriñorã Goãmũre. Erã pahia erã eropiiquerecũ masa Goãmᵑᵑ mera õaro wamorã árĩbirimũriñorã dohpa. Erã pahia erã iira mera masa õarã wacũ Goãmᵑᵑ erãre gohrotobure Cristore obeobiriboñumi. Eropigu ìgu obeodigu marire Goãmᵑᵑ mera õaro árĩcũ iigu aridi árĩmi Cristopũ. Ìgu Levĩ ya curu majagu Aarõ mũru iro dopo árĩbiripũ. Melquisede iro dopo árĩpũ.

¹² Eropigu pahiare gohrotogu, marire dorero sãre gohrotoro gãmemi ìguere. Pahia erã itamuri mera mari taribiro dopo ta iri dorero mera mari taribea. Eropiro iri dorerire gohrotopehoro gãmemi.

¹³ Aarõ Levĩ sã, erã ya curu majarã dihtare pahiare acumũripũ Goãmᵑᵑ ìgu dorerire apigu. Ìgu eropa acuirecũ ta dohpaguere mari Opũre Cristore pahire Goãmᵑᵑ ìgu acudigu gajĩ curu majagu àhrimi.

¹⁴ Ìgu mari Opũ Cristo Judã ya curu majagu masa dehyoapũ. Moise pahiare acugu, Judã ya curu majarãre ne acubirimũripũ. Irire õaro masia mari.

¹⁵ Ire masirã, õpa mari õaro masia: Dohpaguere ne ìgu acudigu pahi Cristo Melquisede iro dopo árĩgu àhrimi.

¹⁶ Iribojegue maja dorero dorediro dopo ta Levĩ ya curu majarã dihta pahia ñajamũriñorã. Jesucristopũ Goãmᵑᵑ ne ìgu acudigu gajirã pahia erã iro dopo pahi ñajabiridigu árĩmi. Ìgu Goãmᵑᵑ turari mera árĩpehrerinari árĩgu àhrimi. Eropigu iri turari mera pahi ñajadi árĩmi ìgu.

17 Õpa āhraa Goāmũ yare weremũhtanirā erā go-jarapũgue:

Árĩpehrerĩnũrire pahi árĩniguigũca mũhũ. Melquisede ĩgũ pahi ĩgũ árĩniguĩdiro dopa pahi árĩniguicāgũca mũhũ, arĩpũ Goāmũ ĩgũ magũre, arĩ gojañuma iribojegũre.

18 Goāmũ ĩgũ doreri Moisere ĩgũ apimũhtara doreri turari árĩbiribũ. Eropigũ iri dorerire duhucādi árĩmi Goāmũ.

19 Moisere ĩgũ apira doreri mera ne õaro tariburire opabirimũribũ mari. Eropigũ dohpaguepũre Goāmũ marire ĩgũ taubore marire apidigũ árĩmi. ĩgũ eropiicũ dohpague ĩgũ pohrogue wamasia mari. Eropirā ĩgũ mera wereniguimasia.

20 Eropigũ Cristore pahi acugũ, “Yũ waĩ mera mũre acugũ iiaa,” arĩpũ Goāmũ. Gajirā pahia ñajacũ ĩgũ iro dopa waĩpeo acubiripũ erāre.

21 Cristopũ ĩgũ Pagũ waĩ werepira mera pahi ñajapũ. Õpa arĩ werepipũ ĩgũ Pagũ Cristore:

Yũhũ mũ opũ yũ waĩ mera mũre weregũ diaye weregũra.

Eropigũ ire ne gohroto mariro werea mũre.

Árĩpehrerĩnũrire pahi árĩniguicāgũca mũhũ, arĩ werepipũ Goāmũ ĩgũ magũre.

22 Eropa werepigũ mama buherie marire apigũ, marire ĩgũ taubore apigũ iipũ. Iribojegũ maja doreri tauro mari õaro árĩborore apigũ iipũ. Eropigũ Goāmũ masare “Õaro iigũra,” ĩgũ arĩdiro dopa ta iibu, Jesure obeodigũ árĩmi marire taubure.

23 Árĩmũhtanirā pahia erā sĩricũ ĩarā gajirā gohroto ñajamũriñorā daja. Eropirā erā bajarā pahia wañorā.

24 Jesupũ eropa árĩniguicāmi. Eropirā ĩgũre gohroto ne marima pahia.

25 Eropigũ ĩgũ eropa árĩniguigũ, Goãmũre eropa serēbaniguicāmi ĩgũ ĩgũ yarā ya árĩburire. Eropigũ Goāmũ mera erā eropa árĩniguĩboro dopa masare taumasimi ĩgũ. Árĩpehrerā ĩgũre umupeorā Goāmũ pohrogue warāca. Eropigũ Jesu āhrimi mũpũta marire taubu.

26 Eropigũ Jesu āhrimi mari pahia opũ. ĩgũ tamerare burigā gahmea mari. Ne ñeri dipuwaja marigũ āhrimi ĩgũ. Eropigũ masa iro dopa ñerire iibiridi árĩmi. Eropigũ Goāmũ ĩgũre ñerā watope árĩdigũre aĩgũ, umarogue api, árĩpehrerā gajirā tauro árĩgũ opũ acupũ.

27 Gajirā pahia iro dopa árĩbeamĩ ĩgũ. Erāpũ mũmũri mũcũ waibũgũre wejē, soe muju serēmũrima Goãmũre masa ñeri iira dipuwaja cādiidorerā. Erā basi erā ñeri

dipuwajare serēmuhtamurima. Puhru gajirā ñeri dipuwaja sãre serēbasamurima erã. Eropirã erã bajasuburi eropa Goãmure serēbasamurima. Jesupu pahĩ árĩgu, yujusubu ta masa ñeri dipuwajare Goãmure serēpu. Īgu waibugure wejēbiri ĩgu basi sĩridigu árĩmi mari masa ñeri iira dipuwajare taubu.

²⁸ Goãmũ doreri Moisere ĩgu apira mura pahia oparã ñajadorea. Eropa erã ñajaquererã, ñeri marirã árĩbeama pahia ñajarã. Iri doreri puhru Goãmũ ĩgu magure pahire acugu “Diaye ta pahĩ árĩniguicãgucumi,” arĩ acupu. Īgupu ñeri mariro eropa árĩniguicãmi.

8

Goãmũ masare “Mũare taugũra,” arĩ apĩpu daja ĩgu Moiserere arĩ apirare gohrotogu. Īgu mama apirare werebasagu āhrimi Jesu

¹ Iri árĩpehrerire arĩ wererã i tamerare mũare arĩrã iiaa: Mũare guã weredigu pahia opu ĩgu tamera mari yagu gohra āhrimi. Mari ya árĩburire Goãmure serēbasagu ta āhrimi. Ũmarogue Goãmũ turatarigu ĩgu opu doaro pohro ĩgu diayepu doami ĩgu Cristo mari pahia opu.

² Eropigu Goãmũ wihi i yeba maja wihi, masa erã iira wihigue mohmebeamĩ. Ũmarogue árĩri wihire mari Opu ĩgu iira wihire Goãmũ ya árĩburire mohmebasami. Iri wihi tamera Goãmũ ya wihi gohra āhrraa.

³ Eropirã árĩpehrerã i yeba majarã pahia oparã waimurãre wejē soe muju Goãmure omurima masa ñero iira dipuwajare cãdijidorerã. Eropa ta iimorãre apidigu árĩmi Goãmũ. Eropigu mari yagu pahĩ Cristo sãre apigu eropa ta iidorepu. Eropigu mari ñeri iira dipuwajare Jesucristo ĩgu basi sĩridi árĩmi.

⁴ Moise doreri dorediro dopa ta i yebague pahia masa erã ñeri dipuwaja cóãburire mohmebasama. Eropirã i yebague pahia árĩtuhama. Erã eropa árĩtuhajacũ Jesupu mari yagu pahĩ i yeba árĩniguigu, pahĩ árĩbiriboñumi ĩgu.

⁵ I yeba majarã pahia erã mohmerire i yeba maja wihi ta Goãmũ wihi mohmerã árĩtuhajama. Goãmũ wihi gohra ũmarogue āhrraa. Eropiro Goãmũ wihi i yeba maja wihi ũmaro maja wihi ĩhacũ iira wihi āhrraa. Eropigu Moise iri wihire i yeba maja wihire ĩgu moaboro coregã Goãmũ ōpa arĩpu ĩgure. “Ũtãgugue árĩgu mũre yu ĩhmudiro dopa ta yaha wihire ōpa iique. Yũhũ dorediro dopa ta yaha wihire queoro iique,” arĩmũripũ Goãmũ ĩgure.

⁶ Dohpaguepũre Jesu pahĩ árĩgu ĩgure apira mohmeri i yeba majarã pahia mohmeri tauro ōaro āhrraa. Bu gohra

áríbeaa. Goãmũ masare “Cristo mera mũare ðaro iigũra,” ïgũ arĩ apira iribojegue maja doreri Moise doreri tauro ðari ãhraa. Marire ïgũ arĩ were apira iri doreri tauro marire ðaro árĩcũ iiroca. Eropigũ marire Goãmũ mera amubasagũ árĩgũ, Cristopũ gajirã tauro pahi ãhrimi.

7 Negohrague Moise dorera mera mari Goãmũ mera õamasibirimũribũ. Iri doreri mera mari ðacũ gaji buherire apibiriboñumi Goãmũ. Iri doreri mera mari ðacũ, “Cristo mera mũare ðaro taugũra,” arĩ werebiriboñumi marire.

8 Iri dorerire erã bocatũbirirare weregũ õpa arĩpũ ïgũ yarãre Israe masare:

Õpa arãa yũhũ mũa Opũ: “Õaro peeque. Pũhrũgue gaji buherire weregũra yaharãre Israe masare, Judá ya curu majarã sãre.

9 Iri buheri erã ñecũ sũmarãre erãre werepira iro dopa ne árĩsome. Yũ basi erãre Egipto yebague árĩnirãre wiugũ erãre werepiribũ. Yũ eropa arĩ werepirare tarinũgama erã. Erã eropiicũ ïagũ negohrare erãre yũ wererare duhucãbũ.

10 Eropigũ pũhrũgue Israe masare õpa arĩ weregũra: Yũ dorerire erãre guñacũ iigũra. Erãre yũ dorerire yũhridiacũ iigũca. Eropigũ yũ Goãmũ erã opũ árĩgũra. Eropirã erãpũ yaharã masa árĩrãcoma, arĩ weregũra.

11 Eropirã irisubure erã mera majarãre erã acawererãre ne erã õpa erã basi game arĩsome: ‘Dohpaguere mari Opũre Goãmũre masique mũa,’ ne arĩ game buhesome. Erã árĩpehrerã yũre masituharãcoma. Majirãgã, mũrã sã yũre masirã dihta árĩrãcoma.

12 Eropigũ erã ñeri iirare cãdijigũca yũhũ. Eropigũ erãre dipuwaja moasome yũhũ,” arãa yũhũ mũa Opũ, arĩpũ Goãmũ ïgũ ya wereniguiiri erã gojarapũgue.

13 Eropa arĩgũ mama buherire apigũ, iribojegue maja dorerire duhucũ iigũ iimi. Eropiro mũara doreri ïgũ duhucũ iira pũhrũ iri doreri mũara gohrotopehrea waro iiaa.

9

I yeba maja taribure mũmaro maja taribu sãre Goãmũre umupeori taribure werepũ

1 Negohraguere Goãmũ ïgũ dorerire Moisere apigũ masa ïgũre umupeoburi sãre werepirũ. Eropigũ Goãmũre erã umupeoburi wihi sãre iidore apĩpũ.

2 Iri wihi waimũrã gasiri wihi árĩyoro. Pe taribu opayoro. Wũari taribu erã ñajamũhtari taribu Goãmũ ya taribu waĩcũyoro. Iri taribure erã sihãgori yucũ duhpeodigũ árĩyoro. Eropárĩcũ mesa sã árĩyoro. Iri mesa weca Goãmũre erã ori pan peyayoro.

³ Gaji taribu suhri mera erã cãhmotara taribu árĩyoro. Iri taribu Goãmũ ĩgũ árĩri taribu gohra waĩcũyoro.

⁴ Iri taribugue oro mera erã iira mesa, incienso erã soeri mesa árĩyoro. Eropiro oro õari mera erã sũra comoro ero oyayoro. Iri comoro waĩcũyoro Goãmũ arĩ werepira gojara dicũri comoro. Iri comoro pohecague dicũyoro. Yuju coro oro coro dicũyoro. ĩgũ masare ejorañegã mana waĩcũriñegã dicũri coro árĩyoro. Eropiro iri comoro pohecague Aarõ yagũ ĩgũ tuadigũ pũcũdigũ árĩyoro. Eropiro pemiji utãmiji Goãmũ ĩgũ doreri ĩgũ gojatura mijiri iri comoro pohecague dicũyoro.

⁵ Iri comoro weca perã anyua wéanirã árĩñorã. Erã wéanirã Goãmũ ĩgũ gosesiriri mera, "Iri taribure ĩgũ ãhrimi," arĩ werero iiyoro. Iri comoro buariñe erã quẽdũpũri mera buasũyoro. Iri comoro buariñe weca masa ñero erã iira dipuwajare cãdijidoregũ waimũrã di Goãmũre erã orare wejẽsiripeopũ pahi opũ. Iripẽta weregũra i wihi majare dohpaguere.

⁶ Eropirã iri wihire eropa erã õaro erã amura pũhru pahia umũri nũcũ erã ñajajamũhtari taribu erã mohmerire iimũriñorã.

⁷ Eropigũ pahia opũpũ dihta gaji taribuguerẽ ñajapũ. Bojori nũcũ ĩgũ iri taribure yujusubu ta ñajapũ ĩgũ. Eropa ñajagũ erã wejẽdigũ waibũgũ dire aĩ ñajagũ, Goãmũre umupeopũ. Iri di mariro ne ñajabiripũ. ĩgũ basi ĩgũ ñeri iira wajare, árĩpehrerã gajirã Israe masa erã ñero iira dipuwaja sãre cãdijidoregũ dire aĩ ñaja apimũripũ ĩgũ Goãmũre.

⁸ Árĩpehreri i mera Espĩritu Santo marire õpa arĩ buhebu iimi: Iri wihi Moiserẽ ĩgũ apira wihigue Goãmũre umupeoburi árĩrisubu masapũ Goãmũre umupeorã iri wihigue ñajamasibiriñorã. Pahia opũ dihta Goãmũ ĩgũ árĩri taribu gohraguere ñajamasimi masare serẽbasagũ.

⁹ I árĩpehreri Goãmũre umupeori wihi majare masare apira, marire dohpague majarã buheburi dihta árĩyoro. Pahia erã ñeri dipuwajare waimũrãre wejẽra mera masa ne Goãmũ mera tarimasibiriñorã. Pahia erã eropa soe mujuquerecũ masa erã ñeri erã pepirigue ne pehresũbiriñorã.

¹⁰ Goãmũ Moiserẽ apira doreri deyoro maja iiri dihta ãhraa. Erã õpa baburi, erã õpa ihriburi, erã õpa coeburi, erã õpa iiri dihta árĩyoro. Eropiro iri doreri marire õarã wacũ iibiriyoro. Goãmũ iri dorerire masa erã iiburire apiñumi Cristo ariboro core.

¹¹ Dohpaguere Cristopũ mari pahi opũ árĩgũ arituhadigũ ãhrimi. Eropigũ marire sĩribasara mera marire õarã wacũ

iituhadi árīmi. Eropigũ Goãmũre mari ñeri dipuwajare cóãdoregũ Goãmũ árīroque ñajaja i yeba maja taribure ñajabiripũ. Ũmaro maja wihi ñajapũ. Iri wihi i yeba maja wihi tauro āhraa. Eropiro masa erã iira wihi árībeaa.

¹² Eropigũ Cristo ũmarogue Goãmũ ĩgũ árīro gohrague yujusubu ta mari ñeri dipuwajare ñajatupũ. Eropa ñajagũ cabritoa dire, wecũa dire Goãmũ árīri taribugue erã aĩ ñajaro dopa iibiripũ ĩgũ. ĩgũ basi sīrigũ ĩgũ di gohrare cóãgũ árīpehrerinũri Goãmũ mera mari õaro árīniguicãborore iipũ.

¹³ Ñeri oparãre gũhrraricũrãre coewearã erãre wejēsiri-peomũriñorã cabritoa di mera, wecũa di mera, wecũare erã soera niti mera.

¹⁴ Eropa iĩnorã masa erã dũpũre ñerire coewea cóãrã. Iri tauro Cristopũ ĩgũ di mera mari pepirigue mari ñerire õaro coewea cóãcãdi árīmi. Iri ñeri dipuwaja oparã peamegue wabonirã árīribũ mari. Jesucristopũ ñeri marigũ árīgũ ta ĩgũ basi crusague sīrigũ Goãmũre õpũ. Espiritu Santo eropa árīniguigũ ĩgũ itamuri mera eropa õpũ ĩgũ ĩgũ basi. Eropigũ ĩgũ mari ñerire ĩgũ coeweadĩ árīmi, Goãmũ ojocarigũ ya árīburire mari õaro iimasiboro dopa.

¹⁵ Eropigũ “Õpa mũare õaro iigũra,” Goãmũ arĩ ĩgũ mama werepidiro dopa ta Cristopũ iidigũ árīmi. Eropa iidi árīmi ĩgũ Goãmũ ĩgũ beyenirãre taubu. ĩgũ eropa taucũ árīpehrerinũri ĩgũ mera õaro árīrãca mari ĩgũ yarã. Eropirã Goãmũ ĩgũ yarãre ĩgũ oburire oparãca mari. Moise doreri dihta árīcũ masa erã ñeri iira dipuwajacũrã árīmũriñorã dohpa. Eropa ñeri iira dipuwajacũrãre taubu ĩgũ crusague sīribasadi árīmi. ĩgũ eropa sīricũ mari ĩgũ yarãre ĩgũ oburire oparãca.

¹⁶⁻¹⁷ Õpa āhraa mari masare. Yujugũ ĩgũ sīriboro core ĩgũ acawererã ĩgũ yare aĩ gueremasibeama. Eropiro ĩgũ oparire ĩgũ acawererãre ĩgũ oburire ĩgũ gojatuyurapũ ĩgũ sīriboro core iripũ wajacũbeaa dohpa. ĩgũ sīricũ ĩarã iripũ ĩgũ arĩ gojadiro dopa ta ĩgũ yare guererãcoma erã.

¹⁸ Eropa ta Goãmũ masare werepimũhtara Moiserẽ ĩgũ apira doreri sīriro mariro di cóãro mariro ne duhpiburi árībiriyo. Eropigũ waibũgũ dire Moise wejēsirira pũhrũ ĩgũ dorerire diaye ta iigũ iipũ.

¹⁹ Eropigũ õpa iimũhtapũ Moise: Goãmũ ĩgũ apira dorerire masare werepehopũ. Pũhrũ cabritoa dire, wecũa dire deco mera morepũ. Eropigũ isopo waĩcũdigũ dũpũ mera oveja poari diari poari mera erã ñimurare turãpũ. Iri dũpũ mera dire yosogũ, Goãmũ dorerire ĩgũ gojarapũ weca wejēsiripũ. Árīpehrerã masa weca sãre wejēsiripeonũ.

20 Eropā iigū ōpā arīpū īgū: “Goāmū marire īgū werepīra īgū dorera i di mera iri diaye árīcū masia mari. I dire ĩarā diaye ta īgū arīdiro dopa ta īgū marire iiburire masia. Maripūre irire yūhridoremi,” arīpū Moise.

21 Eropigū masare īgū iidiro dopa ta Goāmū umupeori wihi waimūrā gasiri wihire, árīpehreri iri wihi árīri sāre wejēsiripeopū.

22 Eropā ta āhraa. Īgū doreri iri dorediro dopa ta baja űerire di mera coeweadoreyoro. Eropigū di cohoro mariro Goāmū mari űeri iirare ne cādijisome.

Cristo īgū dire cóāgū, īgū yarā erā űeri iirare coeweapū

23 Eropiro i yeba maja wihire, iri wihi árīri sāre űerire coewearo dopa ta waimūrā di mera wejēsiripeomūripū. Eropiro iri tauro űmarogue wamorāre erā űeri dipuwaja oparare coero gahmea. Eropiro waimūrā di tauro árīgū ya dī mera erā űerire coero gahmea. Eropirā Jesucristo ya di mera coenirā wabū maripū.

24 Eropigū Cristo mari űeri iira dipuwajare Goāmūre cóādoregū Goāmūre erā umupeori wihi masa erā iira wihire űajabiripū. I yeba maja wihi űmaro maja wihi ĩhacū iira wihi āhraa. Goāmū ya wihi gohra űmaro maja wihi āhraa. Eropigū mari űeri iira dipuwajare cóādoregū Goāmū árīro gohrague űajapū Cristo. Ūmarogue wapū īgū Goāmū core mari ya árīburire serēbasabu.

25 Pahia opū bojori nūcū Goāmū īgū árīri taribugue erā űeri iira dipuwajare cóādoregū űajamūripū waimūrā di mera. Cristopū sīrigū īgū dire cóādigū Goāmūre mari űeri iira dipuwajare cóādoregū erā iiro dopa bajasuburi űajabiripū.

26 Bajasuburi īgū dire cóābu árīgū, i yeba árīropē baja-suburi īgū űero sīriniguicāboñumi. Yujusubu ta dehyoapū īgū i yebaguere i űmū pehrerinū coregā. Īgū dehyoagū īgū yujusubu ta sīribasara mera mari árīpehrerā űeri iirare cóābu dehyoapū.

27 Árīpehrerā mari masa sā yujusubu ta sīrirāca. Mari eropa sīrira pūhrū, ōarāre, űerā sāre beyegūcumi Goāmū.

28 Yujusubu ta mari sīriro dopa ta Cristo sā yujusubu ta sīripū bajarā masa erā űero iirare cóābu. Pūhrū dipaturi dujarigūcumi. Mari űerire cóādigūgue dujarigūcumi. Eropigū irire dipaturi cóāgū arisome. Eropā arigū mucubiriri mera īgūre corerāre taugū arigūcumi. Īgū pohroque erāre aīgābu arigūcumi.

10

¹ Moise doreri p̄hr̄u Cristo masare ĩgu ōaro iiburire ĩhmura dihta árĭb̄u. Eropiro Cristo masare erã ñeri iirare ōaro cóãboro dopa iri doreri erã ñerire cóãmasibiriyoro dohpa. Eropiro iri doreri iri iidorero dopa ta pahia bojori n̄ucu Goãmure waimurãre wejẽ, soe muju, iiniguquerecũ masa erã ñerire cóãmasibiriyoro. Goãmure umupeomorãre ōarã árĭcũ iimasibiriyoro iri doreri.

² Iri mera masa erã ñerire cóãcũ, yujusubu ta Goãmure erã waimurã wejẽ di cóãra p̄hr̄u erã ñerire cóãpehosũboñuma. Eropirã irisubu majarã, “Dipuwaja mara guare,” arĩ pepiboñuma masa. Eropirã iripẽta dipaturi Goãmure waimurã wejẽburire duhucãboñuma.

³ Ōabirimuriñorã dohpa. Eropirã bojori n̄ucu Goãmure waimurãre wejẽ di cóãcũ masa erã ñeri dipuwajare guñaniguicãñorã.

⁴ Wecua di mera, cabritoa di mera ne mari ñeri dipuwajare cóãmasiya mariyoro dohpa.

⁵ Iri eropa árĭcũ ĩagu Cristo i yebaguere ĩgu ariboro core ōpa arĩp̄u Goãmure ĩgu Pagure:

Waimurãre erã soe muju ocũ, trigo pogare erã ocũ sãre mu ĩagu ĩhasuabeaa m̄hu. Eropigu masa dehyoacũ iibu m̄hu yure. M̄hu yure iira d̄upu m̄re mucubiricũ yu iiburi d̄upu árĭroca.

⁶ Ñerire erã cóãborore waimurãre wejẽ erã soe mujucũ ĩagu ĩhasuabirabu m̄hu.

⁷ Mu eropa ĩhasuabiricũ ĩagu ōpa arĩb̄u m̄re: “Mu gamerire yebague iigu wagura. Yu eropiiburire arĩ gojara ãhraa mu yare erã gojarapũgue,” arĩb̄u yuh̄u, arĩmurip̄u Cristo ĩgu Pagure.

⁸ Negohraguere Goãm̄u ĩgu doreri waimurãre trigo poga sãre erã ori mera erã ĩgure umupeodorequerecũ ta ōpa arĩp̄u Cristo ĩgure. “Waimurãre soe muju erã ocũ, trigo pogare erã ocũ sãre gamebiribu m̄hu,” arĩp̄u ĩgu.

⁹ Eropa arĩtuhaqu ōpa arĩnemop̄u: “Mu gamerire yebague iigu wagura,” arĩp̄u. ĩgu eroparĩcũ ōpa masia mari. Iribojegue Goãmure erã ñerire cóãdorerã waimurãre wejẽ di cóãrare gohrotogu iip̄u Goãm̄u. Eropa gohrotogu Cristo ĩgu s̄iridiro mera masare erã ñeri dipuwajare taugacumi Goãm̄u.

¹⁰ Jesucristo ĩgu d̄upure ogu s̄irigu arĩpehrerã mari ñero iirare cóãdigu árĩmi. Yujusubu ta Goãmure ĩgu d̄upure ogu marire dipuwaja maricũ iidi árĩmi. Eropa iigu Goãm̄u ĩgu gamediro dopa ta iidi árĩmi.

11 Árípehrerã pahia umuri nucu Goãmure umupeori wihi mohmeniguima. Eropa mohmeniguirã muraro ta waimurãre wejẽ soe mujuma Goãmure masa ñerire cãdijidoremorã. Erã eropa iiquerecũ ta erã ñero iirire cãdijibeami igu.

12 Cristopu yujusubu ta mari ñeri dipuwajare sãrigu, mari ñero iirare ðaro cãdijipehocãcũ iidigu árĩmi. Iirire cãdijipehocũ iituha waha wapu igu Pagu pohrogue igu diayepu doagu wagu. Opu árĩgu erogue doacumi.

13 Eroguere doagu coregu iimi. Igure ñaturirãre igu Pagu igu tarinugabasaborore coregu iimi.

14 Yujusubu ta igu sãridiro mera igu coenirãre ðarã ñeri mariro erã árĩniguicũ iidi árĩmi. Eropigu Goãmũ pohro doami pare.

15 Jesucristo eropa iiboro core erã arĩ gojamũhtarare arĩ weremi Espiritu Santo marire. Ōpa arĩ weremi igu:

16 Ōpa arĩmi mari Opu: “Pũhruguerẽ ðpa arĩ weregura Israe masare. ‘Yu dorerire erã yũhridiacũ iigu erã pepirigue apigura,’ arĩ weregura,” arĩmi igu.

17 Ōpa arĩnemomi Goãmũ:

“Erã ñero iirare dipaturi guñanemosome yũhu,” arĩmi igu, arĩ weremi marire Espiritu Santo Goãmũ yare gojarapũgue.

18 Mari ñeri iirare igu cãdijicũ dipaturi mari ñeri dipuwajare sãribure gamebeaa mari.

Goãmũ pohro mari ejaro dopa ta igu mera güiro mariro mari wereniguimasia

19 Cristo igu sãriro mera igu di cóãro mera mari sã dohpaguere güiro mariro Goãmũ mera wereniguimasia. Eropirã igure serẽmasia.

20 Iribojegue Goãmũ igu árĩri taribugue Goãmure serẽbu pahia opu dihta ñajamasimi. Iri taribure Goãmũ árĩrore cãhmotara suhrirore igu dihta tari ñaja serẽmasimi. Dohpague ta mari basi Goãmũ árĩro ñajaro dopa ta Goãmure serẽmasia. Pahia opu igu iri taribugue igu dire aĩ ñajaro dopa ta Cristopu Goãmũ pohrogue eja pu mari ñeri iirare cãdijidoregu eja gu. Eropa iigu Goãmũ mera mari wereniguibodirore cãhmotadirore cóãdi árĩmi.

21 Goãmũ pohrogue serẽbasagu mari Goãmũ yarã yagu pahia opu turatariagu ahrimi Jesucristo.

22 Eropirã, yu acawererã, Cristo mari pahia opu árĩcũ ñha mari Goãmũ mera wereniguimasirã árĩrã Goãmure serẽrã. Diaye pepirã árĩrã, “Igu yũhri gucumĩ,” arĩ umupeorã igure serẽrã. Cristo mari ñerire igu di mera coenirã ahraa.

Eropirã “Dipuwajacurã ähraa,” arĩ pepirã árĩbeaa mari. Eropirã guhrari mariri deco mera coeweasünirã iro dopa ähraa. Eropa árĩrã Goãmure sererã.

²³ “Mũare taugura,” ïgu arĩdiro dopa ta iigucumi. Eropirã ïgu marire ïgu tauborore ôaro mucubirimũhtayua mari. Irire mucubirimũhtayurã ne cãdijibiricãrã. Goãmure eropa guñaturaniguicãrã. Eropa guñaturarã irire gajirãre wererã mari.

²⁴ Mari mera majarãre mahirã itamurã mari árĩpehrerã mari game mahi mari itamuboro dopa.

²⁵ Eropirã ôaro gamenererã Goãmure umupeomorã. Gajirãpũ gamenerebeama Goãmũ yare buhemorã. Erã iiro dopa iibiricãrã. Mari mera majarãre Jesucristore umupeonemocũ iirã. I yebaguere mari Opũ ïgu dujariboro merogã duhyaa. Irire masirã turaro itamurã mari mera majarãre, Jesu yarãre erã Jesucristore umupeorire.

²⁶ Diaye árĩri buherire mari masiquererã ta irire cóãrã ñerire mari eropa iiniguicã, Jesucristo sĩrira mera mari ñerire cóãnemoboro ne mara.

²⁷ Eropiro eropa iirãre guhyaro dujaa. Árĩpehrerã ïgure ïhaturirãre dipuwaja moagu turaro ãjurogue cóãgucumi Goãmũ erãre. Eropirã ïgu dipuwaja moaborore güirã dihta ährima ïgu yare cóãnirã.

²⁸ Moise dorerire tarinũganirãre dipuwaja moarã erãre wejẽmuriñorã. Ne mojomoro ïaro mariro wejẽmuriñorã erãre. ðrerã erã ñero iirare weresãcũ peerã erã tarinũgarare masima. ðrerã maricũ perã erã ñero iirare weresãcũ peerã erãre wejẽmuriñorã Goãmũ dorero dopa ta.

²⁹ Erã iidiro tauro Goãmũ magure ïhaturirã dipuwaja moasũmorã árĩrãcoma. Cristo ïgu di cóãro mera marire mari ñeri iirare cóãdi árĩmi Goãmũ. ïgu eropa cóãborore wereyupũ ïgu. Eropirã ïgu cóãnirã erã árĩquererã ta, pũhrũ ïgu di cóãrãre “Bu gohra ähraa,” arĩrã ïgu dipuwaja moamorã gohra árĩrã ta iirãcoma. Eropa árĩrã Espiritu Santore ñero arĩ wereniguirã ährima. ïgu erãre mahigu ährimi. Erã eropa ñero wereniguicũ ïagu turaro dipuwaja moagucumi Goãmũ erãre.

³⁰ Goãmũ eropa iigu árĩgure masia. Goãmũ ïgu basi ta ôpa arĩpũ: “Yũhu ähraa dipuwaja moabu. Erã ñerire iira dipuwaja, dipuwaja moagura yũhu,” arĩpũ ïgu. Ôpa arĩnemopũ: “Yaharãre ñero iirãre dipuwaja moagura,” arĩpũ ïgu, arĩ gojañuma ïgu yare gojarapũgue.

³¹ Goãmũ ojocarigu marire dipuwaja moacũ guhyataria.

³² Iribojegue mũa árĩrãre guñaque mũa. Irisubure

Goãmũ yare ne masinugarã ñero tariquererã bajasuburi ñero tariquererã ne ïgu yare cóãbiribũ mũa.

³³ Yujuyerisuburi masa erã ïhuro gajirã mũaare ñero arĩ, ñero pabirama mũaare. Eropirã gajirã Jesu yarãre erã ñero iicũ ïarã erãre mojomoro ïabũ mũa.

³⁴ Erã Cristo yarã erã árĩra waja erã peresugue árĩrãre mojomoro ïabũ mũa. Eropirã mũa yare erã emaquerecũ ta mucubiriri mera “Ôaroca,” arĩmaribũ mũa. I yeba maja tauro ðarire ɔmaroguere mũa opaburire masimaribũ. Iri ðari pehrebiriborore masibũ mũa. Irire masirã mũa oparire erã emacũ bujawerebiribũ mũa.

³⁵ Eropirã irire guñatura duhubiricãque. Goãmũre eropa umupeoniguicãque. Mũa eropa iira waja mũaare ðaro iigũcumĩ.

³⁶ Goãmũ yare ðaro iiniguicãro gahmea ne duhuro mariro. Goãmũ yare iirã bocatũuro gahmea. Eropa iirã árĩrã ïgu gamerire mũa iira puhũ ïgu “Mũaare ðpa ogura,” ïgu arĩ apirare oparãca.

³⁷ Ôpa ãhraa Goãmũ yare erã gojarapũgue: Merogã dũh, ñero pabirama mũaare. Eropiryaa Cristo ïgu eraboro. Eropa eragũ mata erapurumujugũcumĩ.

³⁸ Yaharã ðarãpũ yũre umupeoniguicãrãcoma. Eropirã yaharã árĩniguicãrãcoma. Yũ mera eropa árĩniguirãcoma. Yahare cóãnirãpũre ïhasũasome yũhũ, arĩmi Goãmũ, arĩ gojañuma.

³⁹ Maripũ Goãmũ yare cóãrã árĩbeaa mari. Eropirã peamegue wamorã árĩbeaa mari. Goãmũre umupeoa mari. Eropirã ïgu taunirã ãhraa ïgu pohro wamorã.

11

Umupeorire werepũ

¹ Ôpa ãhraa umupeori: Goãmũre umupeorã, marire ïgu ðaro iiburire ðaro masia. ïgũre ïabiriquererã ïgũre umupeorã “Diaye ta iigu ãhrimi,” arĩ pepia mari.

² Iribojegue majarã Goãmũre “Diaye ta iigu ãhrimi,” erã arĩ umupeocũ ïagũ ïhasũapũ Goãmũpũ.

³ Goãmũ ïgu wereniguiiri mera árĩpeherrerire ïhacũnugupũ. Eropigũ ïgu mari ïabirirare árĩpeherrerire mari dohpague mari ïari sãre ïhacũnugupũ. Irire mari ðaro masia Goãmũre umupeorã.

⁴ Goãmũre umupeogu Abelpũ cordero wejẽ, soe mujupũ Goãmũre umupeogu. Eropa iigu ïgu tĩgu tauro ðaro umupeorũ ïgu Goãmũre. Eropigũ Goãmũ ïgu orare mucubiripũ. Eropa mucubirigũ “Ôagũ ãhrimi,” arĩ ïapũ ïgu Abelre

Goãmure umupeogure. Abel iribojegue s̄iridigu m̄aru ár̄iquerẽcũ ĩgu Goãmure eropa ii umupeorare guñaã mari sã. Eropa guñarã. Goãmure umupeoa mari sã.

⁵ Enoco Goãmure ĩgu umupeocũ ĩagu mucubirim̄irip̄u Goãm̄u. Eropa mucubirigu ĩgure ĩgu pohrogue aĩm̄ariap̄u. Eropa ta werea Goãm̄u yare wereniguirire erã gojarapũgue. ĩgu eropa aĩm̄ariara p̄hr̄u masa ĩgure ne bocabiriñorã. ĩgu eropa aĩm̄riadigu ár̄igu ne s̄iribirip̄u.

⁶ Goãmure umupeobirã ĩgure mucubiricũ iimasibeaã mari. Goãmure serẽdiarã òpa ĩgure ar̄i pepiro gahmeã marire. “Diaye ta ĩgu Goãm̄u gohra àhrimi. Eropigu ĩgure mari umupeocũ marire òaro iimi ĩgu,” ar̄i pepiro gahmeã. Mari eropa ar̄i pepibirã mari ĩgure serẽmasibeaã.

⁷ Noé Goãmure umupeogu ĩgure ĩgu wererare òaro ȳhr̄ip̄u. P̄hr̄u erã ñero waborore Goãm̄u ĩgure werecũ peegu òaro ȳhr̄ip̄u ĩgu. Eropa ȳhr̄igu wuadiru dohodiru ĩip̄u ĩgu acawererã dia miririñere tarimorã. Noé eropa umupeogu ár̄igu i yeba majarã ñerã erã umupeobirirare, erã taribiriboro sãre ĩhmugu iim̄irip̄u. Eropigu ĩgu umupeocũ ĩagu “Òagu àhrimi,” ar̄i ĩam̄irip̄u Goãm̄u ĩgure.

⁸ Abrahã sã Goãmure umupeogu ĩgure ȳhr̄ip̄u. Gaji yebaguere ĩgure ĩgu oburi yebaguere Goãm̄u ĩgure wadocẽ ĩgure ȳhr̄ip̄u. ĩgu ya yebare wirigãgu ĩgu masibiriri yebague ejaip̄u.

⁹ “I yebare m̄ure ogura,” Goãm̄u ĩgu ar̄icũ peegu ĩgure umupeogu iri yebague eja ar̄imerejap̄u ĩgu. Ero ar̄imerejaqueregu ĩgu gaji yeba majagu ár̄iro dopa waimurã gasiri wiri mera wihicũ curim̄irip̄u m̄urano ár̄ibirinijagu ár̄igu. ĩgu magu Isaa sã ĩgu pãrami Jacobo sã ĩgu iiro dopa ta iim̄riñorã. “M̄ure i yebare ogura,” ar̄i werem̄irip̄u Goãm̄u erã sãre.

¹⁰ Eropigu i yebare curigu macari iibirim̄irip̄u Abrahã. Gaji macague Goãm̄u ĩgu ár̄iri macague ñmarogue ĩgu waborore coregu ĩip̄u Abrahã. Iri maca Goãm̄u iira macaũ. Eropigu ĩgu umupeocũ ĩ ar̄iyoro. Eropigu iri macare ne pehrebiriburi macare coregu ĩip̄u.

¹¹ Goãmure umupeogo Sara waĩcugo, buro gohra ár̄iquerego porã marigo ár̄iquerego ta porãcupo. “Goãm̄u ĩgu ar̄idiro dopa ta iigucumi,” ar̄igo ĩgure umupeogo porãcupo.

¹² Eropigu Abrahã bugu gohra ár̄iqueregu ta porãcup̄u. Eropirã ĩgu pãramerã ár̄ituriarãgue bajarã wacãñorã. Necãre, imipa yerire mari queorã yujuro bojeya mariro dopa ta, ĩgu pãramerã ár̄ituriarã sãre queo bocat̄iuya mariñorã.

13 Árīpehrerā oā yu werenirā muraque Goāmure umu-peotuhajanirāgue sīriñorā. Goāmū “Mware ogura,” ĩgu arīrare opanibirāgue sīriñorā. Eropa opabiriquererā “Goāmū ĩgu arīdiro dopa ta puhrugue ogucumi guare,” arī masiñorā. Eropa masirā mucubirimuhtañorā. Eropirā opa arīñorā erā: “I yebague curirā āhraa. Gaji yeba majarā āhraa,” arīmuriñorā erā.

14 Eropa arīrā gaji yebare erā ya yeba árīborore corerā iñorā. Irire oaro masia mari.

15 “Gaji yeba majarā āhraa,” erā arīrā iribojegue erā cóara yebare guñarā iibiriñorā. Iri yebague dujaa wadiarā dujaa waboñuma.

16 Ōari yebapure gahme corerā iñorā. Iri yeba umarogue āhraa. Erā eropa gahme corecū ĩagu Goāmure “Gua opu āhrimi,” erā arīcū peegu ne guhyasīribiripu Goāmū. ĩgu pohro erā ya maca árīborore iibasatuhadi árīmi ĩgu. Eropigu guhyasīribiripu.

17-18 Goāmū Abrahāre ĩgu magure Isaare wejē soe mujodorepu. ĩgure ĩadiagu eropa dorepu, “¿Diaye ta yure umupeori?” arīgu. Eropigu Goāmure umupeogu ĩgu arīdiro dopa ta iiripu Abrahā. “Mu magu Isaa mera mu pāramerā árīturiarāre opaguca muhu,” Goāmū ĩgu arīdiro árīquerecū ĩgu magure wejēbu iiripu Goāmū dorero dopa ta.

19 “Yu magure Isaare yu wejēcū Goāmū ĩgure masugucumi,” arī pepigu ĩgure wejēbu iiripu. Eropigu Goāmū ĩgure cāhmota ĩgure wejēdorebiripu. ĩgu pagu ĩgu eropa wejēbu arīgu Isaa sīribudigu arīpu. Eropigu sīridi masadigu iro dopa arīpu ĩgu. Eropigu Abrahā ĩgure ojocarigu dipaturi opapu ĩgure.

20 Isaa Goāmure umupeogu ĩgu porāre Jacobore, Esau säre “Puhrugue Goāmū mware oaro iigucumi,” arīpu.

21 Goāmure umupeogu Jacobo ĩgu sīriboro coregā wahgānugaja ĩgu tuadigu mera tuañanugaja Goāmure serē umupeoru. Eropa serēgu José porāre umare “Goāmū mware oaro iigucumi,” arīpu Jacobo.

22 Goāmure umupeogu José ĩgu sīriboro coregā Israe masa Egipto arīrā erā wiriaborore weremuhtarpu. Eropa erā wiriaborore masiyugu ĩgu sīrira dupu mwarore aīgādorepu ĩgu porāre.

23 Goāmure umupeorā urerā abe gohra Moisere dibuñorā ĩgu pagu sumarā ĩgu masa dehyoara puhru. Ōagugā ĩgu arīcū ĩarā ĩgugāre dibuñorā. Iri yeba majagu tauro arīgu opu ĩgu majirāre wejēdorerire tarinugarā ĩgure dibuñorā erā. Erā erā opure güibiriñorā.

24 Moiserere masudigo i yeba majarã opu mago árïpo. Eropa igo masudigu árïqueregu, Goãmure umupeogu “Opu mago magu ahrimi,” erã arï piyucũ gamebiripũ ïgu Moise. Oparã mera majagu árïdiabigu Goãmũ yarã mera majagu árïdiapu.

25 Goãmure tarinugadiagu árïgu ïgure masudigo pohogue bajamenurigã õaro árïboñumi. Eropa õaro árïbu árïqueregu ïgu Goãmũ yarã mera ñero taridiapu.

26 Eropigu Egipto majarã ya õarire tauro Cristo ya árïburire ñero tariburire gamepu. Puhrugue Goãmũ ïgure ïgu õarire oborore masigu ñero taridiapu.

27 Goãmure umupeogu Egipto majagu tauro opu, ïgu mera ïgu guacũ güibiripũ. Eropa güibigu iri yeba árïdigu iri yebare cóacã waha wapũ. Goãmure ïabiriqueregu “Goãmũ árïcumi,” arï pepipũ ïgu. Eropigu ïgu iiborore ne duhubiripũ.

28 Goãmure umupeogu Moise Israe masare Goãmũ ïgu tauborore masipũ. Eropa masigu Goãmũ ïgu dorediro dopa ta Israe masa erã disiporore erã tura mijirire di mera wejësiri tuhdorepu. Eropa dorepu anyu masare wejëgu erã masa tĩrãre wejëbodigu Israe masa erã masa tĩrãre wejëbiriboro dopa.

29 Goãmure umupeorã Israe masa deco diariya waïcuriya deco watope árïri maha deco mariri maha taribujañorã. Erã eropa taribujacũ ïarã Egipto majarãpu erãre nurusiarã erãre ïhacũ taribujanirã miri sĩria wañorã.

30 Goãmure umupeorã Israe masa Jericó maca sãriro, wãari sãriro purupũ majisora curiñorã. Siete nuri gohra iri macare majisora curiñorã erã. Iri nucu nuri erã majisorara puhru iri sãriropũ dijapehrea wayoro.

31 Iri maca majago uma mera ñero iidigo Rahab waïcugo Goãmure umupeogo Israe masare itamupo. Iri macare erã cóãboro core bajamerãgã Israe masa erogue erã ñaja duhricũ ïha igo erãre itamupo. Eropirã Israe masa iri maca majarãre Goãmure tarinuganirãre wejëpehoquererã ta igopure wejëbiriñorã.

32 Gajirãre Goãmure umupeonirãre werenemoboya yũhũ. Eropa werediaqueregu ta bajarãre eropa Goãmure umupeorã sãre were gojapehomasibirica yũhũ. Gedeõ, Baraca, Sansõ, Jefté, Davi, Samue, Goãmũ yare weremũhtanirã sã árïpehrerã yã werebonirã ahrima.

33 Goãmure umupeorã yujurãyeri gaji yebarigue árïri macari majarãre gamewejë tarinugañorã. Eropirã gajirã diaye dorenirã árïñorã. Gajirã Goãmũ erãre “Mũare itamugũra,” ïgu arïdiro dopa ta ïgu itamurire bocañorã.

Eropa ïgure umupeorã yeea erãre badiacũ erãre erã babiricũ iĩnorã erã.

³⁴ Turaro ẽjuri peameri árĩquerecũ ta ẽjubiriĩnorã erã Goãmure umupeonijarã. Gajirã erãre ñose wejẽdiacũ duhrigã waĩnorã erã Goãmure umupeorã. Turabirã árĩquererã Goãmure umupeo, turarã waĩnorã. “Goãmure umupeorã ãhraa. Gamewejẽ turarã ãhraa,” eropa arĩrã árĩcũ gajĩ yebari majarã surara erã wejẽrã arirã ne yujuro bojebiriĩnorã.

³⁵ Goãmure erã umupeocũ ïagu yujurãyeri nome erã acawererã sĩricũ ïagu Goãmurũ erãre masurũ.

Gajirãpũre “Goãmure gamebircãque,” erã arĩ peresu iicũ erãpũ Goãmure duhudiabiriĩnorã. “Mũa Goãmure duhucũ mũare taurãca,” arĩĩnorã erãre. Erãpũ duhubiriĩnorã Goãmũ mera erã ðaro masaborore gamerã. Eropirã erãre erã ñero iicũ sĩria waĩnorã.

³⁶ Gajirãre Goãmure umupeorãre ñero arĩ wereya erãre tãramuriĩnorã. Eropirã gajirãre guburire, mojotorire diricãa peresu iĩnorã.

³⁷ Goãmure umupeorãre ñerã utã mera dea wejẽmuriĩnorã. Gajirãre erã dupũre seroti mera wiritamuriĩnorã. Gajirãre ñoserimijiri mera ñose wejẽmuriĩnorã. Erãre Cristore cóadorerã erã ñero iimuriĩnorã. Gajirã erãre ñero iicũ oveja gasiri mera, cabra gasiri mera suhricũrã mojomorocũrã árĩmuriĩnorã.

³⁸ Erã ðatarĩarã erã árĩcũ i yeba majarã ñerã erã mera majarã árĩbonirã árĩbeama. Wiri marirã árĩrã, masa marirogue utã yucũgue árĩgãri siaricãmuriĩnorã. Eropa árĩgãri siarirã utã yucũgue árĩri goberigue, yebague árĩri goberi sãre carĩgãri siaricãmuriĩnorã.

³⁹ Oã árĩpehrerã Goãmure erã umupeocũ ïagu mucubiripũ ïgu. “Õaro iiabũ mũa,” arĩpũ. Erã eropa ðaro umupeoquerecũ Goãmũ erãre “Mũare taugũra,” ïgu arĩdiro ejanibiriya dohpa.

⁴⁰ Õpa arĩ pepipũ Goãmũ: “Oãre yaharãre, pũhrũgue árĩrã yaharã mera yujuro mera taugũra,” arĩ pepipũ. ïgu eropa arĩ pepidiro dopa ta iigũcumi. ïgu eropiicũ ðatarĩaro árĩroca ero core ïgu iidiro tauro.

12

Jesure eropa umupeoniguicãrã mari

¹ Eropirã oãre yũ werenirãre bajarã Goãmure umupeonirãre, ñerire iibirinirãre masirã árĩpehreri ñero iirire duhucãrã mari sã. Õpa ãhraa mari queoriĩne mera werecũ: Nũcũrĩre opagũ omari masũ turaro omamasibeami. Eropa

ta mari Goãmũ gamerire iimasibea mari ñerire iicũ. Eropirã irire duhucãrã mari. Eropirã Goãmũ ïgu gamero dopa ta ðarire iiniguicãrã.

² Eropirã Jesure eropa guñaniguirã. ïgu ta ãhrimi marire umupeo guñaturacũ iigu. Eropigu marire umupeonemocũ sãre iimi ïgu. Crusague sãrigu yujuro bojeru. Pãhrũ ïgu mucubiriborore masigu crusague sãripu. Eropa sãrigu guhyasãribodigu áriqueregu guhyasãribiripu ïgu. Eropa iira pãhrũ dohpaguere Goãmũ ïgu opu ïgu doaro diayepu doanijagu ïgu dorebu iimi.

³ Ñerã masa ïgure ñero erã iicũ yujuro bojeru ïgu. ïgu eropa iidigure guñaque mua, mua sã ñero tarirã “Yujuro bojebiriboca,” arĩrã. Irire guñaque mua ïgure umupeo duhuri arĩrã.

⁴ Ñerire mua tarinugaboro dopa Jesu iro dopa ñetariaro gohra tarinibea mua. Ñerã muare wejẽnibeama.

⁵ ¿Goãmũ muare ïgu porãre ïgu wererare cãdijicãri mua? Õpa arĩpu ïgu:

Yu magu, yũhu mũre werecũ eropa pepicãbita. Yũhu mũre turicũ peegu bujawerebita.

⁶ Áripehrerã yu mahirãre werea. Eropigu áripehrerã “Yu porã ãhraa mua,” yu arĩ ïarãre tarinugadorebea. Eropigu erã tarinugacũ ïha erãre yu porãre merogã dipuwaja moaa, arĩpu Goãmũ.

⁷ Ñero tarirã yujuro bojeque “Goãmũ yure weregu iimi,” arĩrã. ïgu yare duhubiricãque. Goãmũ muare ïgu porãre merogã dipuwaja moagu iimi. Erã pagu sumarã erã porãre eropa werema. Eropirã erãre dipuwaja moama. Eropa ta iimi Goãmũ sã marire ïgu porãre.

⁸ Goãmũ áripehrerãre weremi. Goãmũ muare ïgu werebiricũ ïgu porã gohra áribea mua. Eropirã ïgu porã áribirã yujugu majigu ïgu pagure ïgu masibiro dopa ta ïgu weresũya marigu áriro dopa ta ãhraa mua. Eropirã Goãmure “Yu pagu gohra ãhrimi,” arĩmasibea mua ïgu muare werebiricũ.

⁹ Mari pagu sumarã marire erã werecũ peerã erãre umupeoa mari. Mari pagu sumarãre mari umupeoro tauro umupeoro gahmea mari Pagu Goãmũ ïgu werecũ. Eropirã ïgure yũhriro gahmea marire. Eropa yũhrirã áripehrerinuri ïgu mera áriãca.

¹⁰ Bajamenurigã mari pagu sumarã erã gamero dopa marire were dipuwaja moama. Goãmũpu marire ðaro weremi. Eropigu ïgu masiri mera marire dipuwaja moami marire ðarã masadoregu. Eropa iimi ïgu marire ïgu iro dopa ðarã mari áriboro dopa.

11 Marire ĩġu dipuwaja moacũ mucubiribea mari. Mari bu bujawerea. Eropa bujawerequererã ta ĩġu eropa dipuwaja moara puhrũ õarã árĩrãca mari. Eropirã ĩġu wererire peenirã árĩrã gajiropa iiro mariro õaro árĩrãca.

Goãmũ marire ĩġu dorerire mari yuhribiricũ ġuhya ahraa marire

12 Eropirã ġuñaturabirã árĩquererã ta Goãmũre õaro ġuñaturarã árĩque. ĩġure duhubiricãque.

13 Õaro diaye maja mare mũa waro dopa ta pee gorowero mariro õaro diaye ta Goãmũre yuhrique. Mũa eropiicũ ĩhacũrã gajirã Jesu yarã gajiropa árĩrere iisome. Eropirã turabirã turarã warãcoma.

14 Árĩpehrerã masa mera õaro árĩque gamequeãro mariro. Eropirã ñero iibiricãque. Ñeri marirã dihta mari Opũ Cristore ĩarãcoma.

15 Õaro iique mũa. Goãmũ mũaare ĩġu itamucũ õaro yuhrique. Ñeri tiari iri oterire iri goroweoro dopa ta mũa sã Cristo yare duhu ñerire ġuñaniguibiricãque gajirãre goroweori arĩrã.

16 Ne nome mera ñero iirã árĩbiricãque. Eropirã Goãmũ yare gamebirã árĩbiricãque. Eropa árĩġu árĩpu Esaú. ĩġu masa tĩġu árĩripũ. Eropiġu ĩġu pagũ yare ĩġu sĩrira puhrũ opabu árĩripũ. Eropa árĩqueregũ yujunũ barire gametarĩġu iri bari mera ĩġu pagũ magũre ĩġu tĩġu opaborore bu gohrotopũ.

17 Puhrũ ĩġure warare masia mũa. ĩġu eropiira puhrũ ĩġu pagũ ĩġure Esaúre õaro árĩdoreburire Goãmũre serẽbasarire turaro gameripũ daja Esaúpũ. ĩġu eropa gamequerecũ ta ĩġu pagũ magũpũre ĩġu tĩġu opaburire gohrotora dipuwaja ĩġjiropa árĩrere iisome. Eropirũ pagũ ĩġure obiripũ. Eropa gameġu turaro orequeregũ ĩġu pagũre serẽqueregũ irire opamasibiripũ Esaú.

18 Goãmũ dorerire Moiserẽ ĩġu apicũġue mari acawererã Israe masa mũa Goãmũ pohro ejaboro ġuhya árĩyoro. Dohpaguere mũapũre eropa árĩbeaa. Õpa wayoro erãre. Goãmũ ĩġu dorerire Moiserẽ iri dorerire apĩġu erã árĩri yeba majagũ utãġũġue árĩpu. Irĩġupũ Sinaí waĩcũdĩġu árĩyoro. Eropiro erã Goãmũ pohro ejamorã irĩġũġue erã ejacũ turaro peame ãjũyoro. Eropiro naitĩaro, imica curu, turaro miru sã árĩyoro irĩġũ utãġũre.

19-20 Eroġue erã ejacũ corneta buşũyoro. Eropiro werenĩġuiro cariyoro. ĩġu eropa werenĩġui ri ejaricacũ peerã masa yujuro bojebiriñorã. Goãmũ erãre ġuhyaro

mera õpa arĩ dorepu erãre: “Árĩpehrerã irigu utãgure pẽhrerãre utã mera dea wejẽque erãre. Irigu utãgure pẽhregu waibugu gohra ïgu árĩquerecũ ïgu sãre utã mera dea wejẽcãque. O ñoserimiji mera ñose wejẽque ïgure,” arĩpu Goãmũ. ïgu eroparĩcũ peerã yujuro bojebiriñorã erã.

²¹ Eropigu árĩpehrerire utãgugure guhyaro árĩrire ïagu õpa arĩpu Moise: “Bũrigã güigu naragãgu iiaa,” arĩpu ïgu.

²² Iribojegue Israe masa Goãmũ ïgu árĩdigu utãgugue eja-masibiriñorã sĩriri arĩrã. Dohpaguere mũapu Jesu yarãpu Goãmũ árĩdigu utãgugue, Sión waĩcudigugue, umaro majagugue mũrijaro dopa ta diaye ta Goãmũ mera werenigu-imasia. Goãmũ ojocarigu ïgu ya macague mũrijaro dopa ta diaye ta ïgu mera wereniguia mũa. Iri maca gaji maca mama maca Jerusalén umaro maja maca ãhraa. Ero anyua bajarã gohra ãhrima. Goãmũre umupeorã mucubiriri mera gamenererã ãhrima.

²³ Eropirã mũapu ïgu ya maca majarã árĩrã, erogue Goãmũ porã árĩmũhtarã mera mũa gamenere árĩbodiro dopa ta ãhraa. ïgu porã erã waĩre ïgu gojaturapũgue umarogue erã waĩre gojatunirã ãhrima. ïgupũ mari Pagupũ árĩpehrerã beyebu ãhrimi. ïgu mera majarã ãhraa mũapu. Eropirã gajirã õarã Goãmũ yarã mera gamenererã dopa ta ãhraa mũa sã. Erãre ta ñeri marirã iituhapũ Goãmũ.

²⁴ Eropirã Jesu mera majarã ãhraa mũapu. Negohraguere ïgu dore apirare gohrotogu “Mũare õaro iigura yũhũ,” arĩ apĩpu Goãmũ marire. ïgu eropa arĩ apidiro dopa ta iidigu árĩmi Jesu. ïgu dire cohã ïgu sĩrirañe mera marire õaro taricũ iimi ïgu. Abelre ïgu di cóãrare ïagu Goãmũ Abelre wejẽdigure dipuwaja moapu. Jesucristo ïgu di cóãrapure ïagu marire dipuwaja marirã árĩcũ iipu. Eropiro Abel ïgu di cóãra bu gohra árĩya. Cristopũ ïgu di cóãra puhũ õatariaro iipu Goãmũ marire. Eropiro Cristo ïgu di cóãra bu gohra árĩbiriya.

²⁵ Eropirã õaro iique mũa. Goãmũ yare mũare weregure õaro yũhrirã árĩque. Iribojegue i yeba árĩdigu Moise Goãmũ yare ïgu werecũ peerã, bajarã irire peediabiriñorã. Erã eropa peediabirira dipuwaja, dipuwaja moapu Goãmũ erãre. Erã tauro dipuwaja moagucumi Cristore cóãrãre. Cristopũ umarogue árĩgu Goãmũ yare weregu ãhrimi.

²⁶ Irisubure Moisere ïgu dorerire ïgu apirasubure Goãmũ ïgu wereniguiro mera yeba ñohmecũ iipu. Dohpaguepũre õpa weremi ïgu: “I yeba ñohmecũ yujusubu ta iinemogũra. I yeba dihta ñohmecũ iisome yũhũ. Umarogue sãre ñohmecũ iigura,” arĩ werepu ïgu.

27 “I yeba ñohmecũ yujusubu iinemogura,” arĩgu, “Árĩpeherrerire yu ñhacũnugurare cóãgura,” arĩgu iipũ. Goãmũ ĩgu opu árĩroguerpare cóãmasiya mara. Eropiro ĩgu ñhacũnugurare ĩgu cóãcũ ĩgu opu árĩro dihta dujaroca.

28 ĩgu opu árĩrogoe warãca mari. Eropirã ĩgu opu árĩrogoe ĩgu cóãbircũ ĩarã, Goãmũre “Õhaa,” arĩrã mari. Eropirã umupeori mera, guhyadiaro mera ĩgu yare iirã mari ĩgure mucubircũ iimorã.

29 Peame ñjuro guhyaro dopa ta Goãmũ guhyaro dipuwaja moagu ãhrimi. Eropirã ĩgure guhyadiaro mera umupeorã.

13

Õpa Goãmũre mucubircũ iique

1 Mũa mera majarãre mahi duhubircãque.

2 Masa mũa masibirã árĩquerecũ erãre ðaro mera mũa ya wirigue ñajaridoreque. Gajirã eropiirã, masibiriquererã anyuare erã ya wirigue ñajaridoreñorã. Eropirã mũa sã eropa ta iique.

3 Peresu árĩrãre mojomoro ĩaque. Mũapu erã mera peresugue árĩrã mũa árĩboro dopa ta erãre mojomoro ĩaque. Gajirã erã ñero tarirã sãre mojomoro ĩaque. Erã iro dopa mũa sã ñero tariro dopa ta erãre mojomoro ĩaque.

4 Mũa mojoto dirinirãre árĩpeherrerã ðaro game umupeoque mũa. Eropirã mojoto dirinirã gajirã mera ñero iirã árĩbircãque. Árĩpeherrerã uma nome mera ñero iinirãre, nome uma mera ñero iinirã sãre dipuwaja moagucumi Goãmũ.

5 Niyerure gamerã ne árĩbircãque. Õpa arĩpu Goãmũ: “Mũare ne cóãsome. Eropa itamuniguigura,” arĩpu ĩgu. Eropirã mũa opari mera iripẽta mucubirique. Wũaro gamenemobircãque.

6 Eropirã güiro mariro ðpa arĩ pepirãca marmera mũa ya wirigue ñajaridori:

Mari Opu marire itamugu ãhrimi. Eropirã ne güisome mari. Masa marire erã ñero iiborore güisome mari, arĩ pepirãca mari.

7 Goãmũ yare mũare werenirãre mũare dorenirãre guñaque mũa. Eropirã ðaro erã árĩricurare guñaque. Eropa guñarã, Cristore erã umupeorare ñhacũque mũa.

8 Jesucristo ne gohrotobeami. Iribojegue, dohpague sãre, puhrgue sãre ĩgu árĩdiro dopa ta árĩniguicãgucumi ĩgu.

9 Baja buheri gajiropa árĩri buherire peebircãque ðari buherire guague cohãri arĩrã. “Ire baque. Ire babircãque,” arĩ buhemaacãma gajirã. Eropa arĩrire mari yuhricũ iri marire itamubeaa. Eropiro eropa arĩ buherire mari iicũ bu

gohra ta āhraa. Iri marire guñaturarã árĩcũ iibea. Goãmu marire guñaturacũ iimi.

¹⁰ Cristo mari ñeri dipuwajare s̄iridi árĩmi mari ñerire cóabu. Pahiapu opa arĩrã āhrima: “Waibugũ yu Goãmure wejẽ soe mujucũ, Goãmũ mera tarigũca,” arĩrã iirima erã. Eropa arĩrã erã ñeri iirare ne cóānirã árĩmasibeama.

¹¹ Pahia opu Goãmũ ĩgu árĩri taribu gohrague waibugũ wejẽdigũ dire aĩ ñajagu Goãmure opu masa erã ñerire cóādozegũ. Eropigũ ĩgu wejẽdigũ waibugũre iri maca turogue soe cóācãñorã.

¹² Eropa ta Jesu sã maca turogue s̄iripu. ĩgu di cóāri mera masa ñeri marirã wacũ iibu s̄iripu.

¹³ Maca turogue ĩgu s̄iricũ ĩarã, erã buherire ĩgu cóācũ ĩarã judio masa ĩgũre ĩhaturiñorã. Eropirã mari sã ĩgu mera majarã arĩrã. Mari eropa árĩcũ ĩarã masa mari sãre ĩhaturirãcoma.

¹⁴ Erã marire ĩhaturiquerecũ āhraa. I yebague mari arĩwajaburi maca arĩbeaa. Mari puhrugue arĩburi macare corerã iiaa mari.

¹⁵ Eropirã Jesu ĩgu itamuro mera ĩgu Pagũ mera wereniguia mari. Eropirã ĩgũre ðaro serēniguicārã. “Mari Pagũ turagu āhrimi,” arĩ umupeoniguirã gajirãre wererã. Mari eropa arĩ wererã ĩgu mucubirigũcumĩ.

¹⁶ Mũa mera majarãre ðaro iique. Mũa oparire gajirã sãre oque. Irire cādijibiricãque. Mũa eropa ðaro iirã Goãmure umupeorã iica. Eropa iirã ĩgũre mucubiricũ iirãca.

¹⁷ Mũa oparãre ðaro yuhrique. Erã dorero dopa ta yuhrique. Goãmũ mũare ĩhadibu buhedoregũ apimi erã oparãre. ĩgu eropa apinirã arĩrã eropa mũare ĩhadibuniguirã iima Goãmure tarinugadiabirã. Eropirã erãre ðaro yuhrique mũa erã mucubiriri mera mũare itamuboro dopa ta. Mũa yuhribiricũ ĩarã erã bujawererãcoma. Eropa yuhribirã ðaro arĩsome mũa.

¹⁸ Gũare serēbasaniguique Goãmure. Umũri nucũ ðari dihtare iidiaa gũa. Eropirã “Ñerire iirã iiaa,” arĩ pepibea gũa.

¹⁹ I tamerare turaro serēbasaque Goãmure yure: Yojaro mera yu mũa pohrogue wamasiborore serẽque Goãmure.

Ipũ gojabeodigũ ðadoretupũ

²⁰ Goãmũ marire ðaro árĩcũ iigu āhrimi. ĩgu mari Opu Jesucristo s̄iridigũre masupu. ĩgu “Mũare ðaro iigũra,” marire arĩ apidigũ āhrimi. ĩgu eropa arĩrãre iinijagu Jesupu marire taugũ āhrimi. Mari ñeri dipuwajare ĩgu di cohã s̄iripu ĩgu. Eropigũ ĩgu turagu, ovejare ĩhadibugũ iro dopa arĩgu, marire ĩgu yarãre ðaro ĩhadibumi.

²¹ Eropigu Goãmũ ãgũre masudigu mũa sãre itamuporo árĩpehreri ãgũ gamerire mũa iiboro dopa. Eropigu Jesucristo ãgũ itamuri mera Goãmũ ãgũ gamero dopa ta árĩpehrerã marire õarire gohrotocũ iiporo. Eropirã árĩpehrerinũri Cristore umupeorã. Eropa ta iirã.

²² Yũ acawererã, ire turaro mũare doregũra: Ipũ mũare yũ wererare õaro mera peeque mũa. I yũ mũare gojabeoripũ wuaripũ árĩbeaa. Eropirã ire õaro peeque.

²³ I sãre mũare weregũra: Mari acaweregũre Timoteore peresu árĩdigũre wiuañorã. Dohpagohragã ãgũ aricũ yũhũ ãgũ mera mũare ãagũ wagũra.

²⁴ Mũa oparãre, árĩpehrerã gajirãre Goãmũ yarãre ero árĩrãre õadorea. Italia majarã Jesu yarã sã mũare õadorema.

²⁵ Árĩpehreri mera Goãmũ mũare õaro iiporo. Eropa ta iiporo. Iripẽta ãhraa.

Santiago

Santiago Israe masare macari wasirininirãre gojabeoñumi

¹ Yũhũ Santiago ipũ mera mũare ðadore gojabeogu iiaa. Goãmũ mari Pagũ pohro majagũ ãhraa. Mari Opũ Jesucristo yare mohmegũ ta ãhraa yũhũ. Eropigu mũare Israe masare doce cururi majarãre Jesu yarãre macari wasirininirãre yũ acawererãre gojabeogu iiaa.

Goãmũ ðaro pee masirire ohomi marire, arĩ gojañumi Santiago

² Yũ acawererã, baja árĩroca mũa ñero tariburi. Mũa ñero tariquererã ðaro mucubiriri mera pepicãque.

³ Eropa ñero tarirã, Jesure mũa umupeorire diaye ta árĩcũ ìhmurã iica. Eropirã ñero tariquererã Jesure mũa ðaro umupeoniguicãnirã ìgũre umupeonemorã warãca. Eropa warã mũa ñero taririre bocatiurãca.

⁴ Eropirã eropa bocatiurã árĩque mũa duhuro mariro ðaro pee masirã mũa árĩboro dopa.

⁵ Goãmũ duhyaro mariro árĩpehrerãre ohomi. Eropa ogũ ìgũre serẽrãre turibeami ìgũ. Ìgũ eropa árĩgũ árĩcũ masirã mũare pee masiri duhyarire ìgũre serẽque. Mũa eropa serẽcũ mũa masiburire onemogũcumi ìgũ mũare duhyaro mariro.

⁶ Eropa serẽrã Goãmũre ðaro guñaturanijarã serẽque mũa. “Gũa serẽcũ Goãmũ gũare obiribocumi,” arĩ pepibiricãque. Eropa arĩ pepirã wũariya maja pãgũri iro dopa ãhrima. Pãgũri iri dũrũro gohroto ro dopa ta erã sã erã guñarire dũrũro gohrotoma. Eropirã Goãmũre “Diaye ta ìgũ ãhrimi,” arĩ umupeobeama.

⁷ Eropa arĩ pepirãre erã serẽquerecũ ta ne merogã erã serẽrire osome erãre mari Opũ.

⁸ Dohpagãre ire gamedigu árĩqueregũ daja ñamigãre gajiropa guña wahgãmi daja. Eropa guñagũre ero wabeaa.

⁹ Jesu yarã bu árĩrãre mojomorocũrãre Goãmũpũ oparã iro dopa ìhami erãre. Ìgũ eropa ìarã árĩrã mucubiriri mera árĩporo.

¹⁰ Eropirã Jesu yarã doberi oparã árĩrãpũ erã doberi pehborore masirã mucubiriporo. Erã doberi bu árĩri ãhraa Goãmũ ìgũ ìacũ. Doberi oparã erã doberi taa gori iro dopa pehrea waroca. Eropirã erã sã mucubiriporo.

¹¹ Abe mũarigũ ìgũ turaro asicũ taapũ ñañia wahaa. Eropiro goripũ ñañi dija wa, ðari gori iri árĩra pehrea

wahaa. Eropa ta waroca doberi oparã erã doberire erã aĩ gameneoro watope. Erã iri doberi mera ta dederea warãcoma.

Ñero iidorerire tarinugagu mucubirigu ãhrimi, arĩ gojañumi Santiago

12 Ñero tarigu bocatĩugu, ñero iidorerire tarinugagu mucubirigu ãhrimi. Īgu eropa bocatĩucũ, ĩgu ñerire tarinugacũ árĩpehrerinuri nũcu umaro maja ojocaririre ĩgure ogucumi Goãmũ. "Iri ojocaririre oguca," arĩ apĩpu Goãmũ árĩpehrerã ĩgure mahirãre.

13 Mũa ñerire iidiarã "Goãmũ yure ñero iidoregu iimi," arĩ pepibita. Ñerire iidorebeamĩ Goãmũ marire. Eropigu ĩguru masare ñero iidoregu árĩbeamĩ.

14 Masa erã turaro ñerire erã ñaribejari ta iri ta erãre ñero iicũ iiaa.

15 Eropirã iri ñerire ñaribejama masa. Eropirã iripure pepima. Eropa pepirã iri ñeripure iiniguicãma erã. Erã eropa iiniguiri dipuwaja Goãmũ erãre peamegue cóãgucumi.

16 Eropirã yu acawererã, yu mahirã, ne yujugu mu basi guyabita. "Goãmũ yure dorecũ ñero iiaabũ," arĩ pepibita. Diaye árĩbeaa iri.

17 Mari Pagu umaro majagu marire õari dihtare ohomi. Īgu tamera abe umu majagure, ñami majagure, necã sãre ĩhacũnugudigu árĩgu, ĩguru ne gohrotobeamĩ. Eropigu ĩgu árĩniguidiro dopa árĩniguicãmi.

18 Īgu gamediro dopa ta ĩgu õari buheri mera marire ĩgu porã wacũ iimi mari ĩgu yarã árĩmũhtarã árĩboro dopa.

Diaye maja Goãmure umupeori õpa ãhraa, arĩ gojañumi

19 Yu mahirã, yu acawererã, ire õaro peeque mũa. Goãmũ yare õaro peeque mũa. Eropa peerã, pepiro mariro wereniguibiricãque. Eropirã guabiricãque.

20 Yujugu ĩgu guagu árĩcũ suabeamĩ Goãmũ.

21 Eropirã árĩpehreri mũa ñeri iirire, mũa ñerire ñaribejarare duhuque mũa. Eropirã Goãmure õaro yũhrirã árĩrã ĩgu buherire peeñaque mũa. Īgu ya buherire mũa peecũ Goãmuru mũare peamegue wabonirãre taugucumi.

22 Īgu yare peequererã ta yũhribirã ñerire guyarire pepirã iiaa mũa. "Yũhribiricũ õaroca," arĩ pepirã guyarire pepirã iica mũa. Eropirã ĩgu yare peerã iripure iique.

23 Goãmũ yare peequererã ta yũhribirã, ĩgu diapore diuru mera aĩ ĩaro dopa ãhraa mũa.

24 Īgu ĩgu diapore ĩara puhrũ waha, ĩgu ĩarare cãdijiro dopa ta mũa Goãmũ yare peequererã irire cãdija wahaa.

²⁵ Eropigu gajigupũ ĩgu peerare cãdijibigupũ Cristo ĩgu dorerare õaro guñagũ irire iigu mucubirigu árigucumi. ĩgu tamera ĩgu peerare iicũ Goãmũ õaro iimi ĩgure. Iri doreri "Cristo ĩgu mahiri mera masare taumi," arĩ buheri áhrraa. Iri buherire ne cóãbigũ mucubirigu árigucumi.

²⁶ Yujugu ĩgu gamero arĩmaacãgu, diaye ta Goãmure umupeobeami. "Goãmure õaro umupeoa," arĩ pepibodigu áriqueregu ta ĩgu basi ta gũyagu iimi. "Goãmure umupeoa," arĩgu áriqueregu ĩgu Goãmũ yare yuhribiricũ ĩgu umupeori ne duhpiburi árĩbeaa.

²⁷ Diaye ta Goãmũ mari Pagure mari umupeorã, ĩgu gamero dopa ta umupeorã õpa iiaa mari: Pagũ sumará marirãre, wapeweyarã sãre erã ñero taricũ ĩarã, erãre itamua mari. Eropirã i yeba majarã ñeri erã iirinore iidiabeaa mari. Eropa iirã diaye ta Goãmure umupeorã iiaa mari.

2

Masare yujuropa õaro iiro gahmea marire, arĩ gojañumi

¹ Yũ acawererã, õatariagure Jesucristo mari Opure peerã, ĩgure umupeorã áhrraa mũa. Eropa umupeorã árĩrã masare yujuropa õaro iiro gahmea mũare.

²⁻³ Eropi doberi opũ oro berorire, mojoto sañari berorire opagu, wajasurire suhricũgu mũa Jesu yarã gamenerero pohrogue ĩgu aricũ ĩarã ĩgure õaro mera bocatĩriboca. "Ohõ doaro áhrraa," arĩboca mũa ĩgure. Eropa ĩgure arĩquererã ta irisubu ta gajino moogu mojomorocũgu sã ñeriñe suhricũgu sã mũa pohro ĩgu aricũ ĩarã ĩgupure õaro bocatĩribiriboca mũa. "Ohõ niguique. Ohõ yeba doaque," arĩboca mũa ĩgure.

⁴ Mũa eropa iirã masare yujuropa iibirã iiaa mũa. Eropirã ñerire pepirã masare beyerã iro dopa árĩrã iica mũa. "Īpũ niyerucũgu õagu áhrimi. Īpũ gajino moogu ñegu áhrimi," arĩ beyea mũa.

⁵ Yũ acawererã, yũ mahirã, yare peeque. Bajarã mojomorocũrũpũre Goãmure erã õaro umupeomorãre, ĩgu opũ árĩroguere árimorãre beyepũ Goãmũ. "Eroguere warãca mũa," arĩ apipũ Goãmũ ĩgure mahirãre.

⁶ Erãre ĩgu beyequerecũ ta mũapũ mojomorocũrãre õaro umupeobeaa. Doberi oparãpũ mũare ñero iimurima. Eropirã erã opũ pohrogue mũare aĩ taragãma mũare weresãmorã.

⁷ Mũapũ "Cristo õagu yarã," masa erã arĩrã áhrraa. Baja doberi oparãpũ Cristore ñero arĩ wereniguima.

⁸ Goãmũ mari Opũ doreri tauro doreri õpa arãa: “Mũ basi mahiro dopa ta mũ pohro árĩrã sãre mahique,” arãa. Iñe doreriñere iirã, õarire iiaa mũa.

⁹ Masare yujuropa umupeobirã ñero iirã iiaa mũa. Eropa iirã Goãmũ dorerire tarinũgarã ãhraa mũa. Eropa ta arãa Goãmũ yare erã gojarapũ.

¹⁰ Goãmũ dorerire iirã árĩquererã ta yujuñe dorerinegãre mũa iibirã ñeri dipuwajacurã wahaa. Mũa yujuñegãre tarinũgarã árĩpehreri ãgũ dorerire tarinũgarã wahaa. Eropa iirã ñeri dipuwajacurã árĩnia mũa dohpa.

¹¹ “Gajigũ marapo mera ñero iibita,” arĩgũ Goãmũ ta ãhrimi. “Masare wejẽbita,” arĩ doregũ ãgũ ta ãhrimi Goãmũ. Gajigũ marapo mera ñero iibiriqueregũ ta masure wejẽgũ Goãmũ ãgũ dorerire tarinũgagũ ãhrimi ãgũ.

¹² Cristo marire turaro mahigũ, marire doremi taubu. ãgũ dorerare mari iirare, mari iibirira sãre ãagũ marire beyegũ arigũcumi. ãgũ eropa beyemorã árĩrã ãgũ dorerire õaro iirã. Eropirã ãgũ gamero dopa ta wereniguirã mari.

¹³ Dohpaguere mari gajirãre mojomoro ãabiricũ Goãmũ mũare ãgũ masare beyerinũ árĩcũ mũare mojomoro ãasome. Eropigũ mari mojomoro ãacũ ãagũ Goãmũpũ marire dipuwaja moasome.

Cristore umupeorãpũ õarire iima, arĩ gojañumi

¹⁴ Yũ acawererã, peeque mũa yũre. “Cristore umupeoa yũhũ,” yujugũ ãgũ arĩ pepiquerecũ ta gajirãre ãgũ õaro itamubiricũ ãgũ “Cristore umupeoa yũhũ,” ãgũ arĩrapũ ne duhpiburi árĩbeaa. Eropa arĩ pepimaacãgũre Goãmũ tausome.

¹⁵⁻¹⁶ ¿Jesu yagũ, Jesu yago ñeri dihta erã suhri opacũ ãarã erã bari moocũ ãarã dohpa iiri mũa erãre? “Õaro árĩque mũa. Eropirã õaro suhricũque. Õaro bari mera yapĩ wahgãque,” arĩquererã erã gamerire mũa obiricũ mũa eropa arĩri ne duhpiburi árĩbeaa.

¹⁷ Eropirã “Cristore umupeoaa yũhũ,” mũa arĩquererã ta õarire mũa iibiricũ Cristore mũa umupeori ne duhpiburi árĩbeaa.

¹⁸ Gajigũ i yũ wererire ãgũ peediabiricũ õpa arĩnemoboya yũhũ ãgũre. Õarire iibiriqueregũ ta “Cristore umupeoa yũhũ,” arĩraa mũhũ. Mũhũ õarire iibigũ Cristore mũ umupeorire ãhmupiburi árĩbeaa. Eropa arĩ pemasibeaa mũhũ. Yũpũ yũ õari iiri mera Cristore yũ umupeorire ãhmua, arĩnemoboya yũhũ ãgũre.

¹⁹ “Goãmũ yujugũ ta ãhrimi,” arĩ pepima masa. Mũa eropa arĩ pepicũ õapũricãa. Eropa árĩquerecũ ta iripẽta mũa Goãmũre yũhribiricũ “ãgũ Goãmũ ãhrimi,” mũa arĩri

duhpiburi árĭbeaa. Watĕa sã mũa pepiro dopa ta “Goãmu ta àhrimi yujugu ta,” arĭ pepima. Eropirã Goãmu ĩgu árĭricũre masima erã. Eropa masirã gũi naragãma.

²⁰ Yujugu ðarire iibiriqueregu ta “Cristore umupeoa,” arĭ pepigu árĭgu pee masibigu àhrimi. “Cristore umupeoa,” arĭguño gajirãre ðaro iibigu diaye ta Cristore umupeoami. Ōpa arĭ weregura mũare irire:

²¹ Iribojegu Abrahã mari ñecu ĩgure umupeorire Goãmu masidiañumi. Eropigu ĩgu magure Isaa waĩcugure aĩgã wejĕdoreñumi. “Yũre umupeogu yũre yũhribocumi,” arĭ ĩgu árĭricũre masima erã. Eropa masirã gũi naragãmagu wejĕdoreñumi. Eropigu Abrahã Goãmu ĩgu dorediro dopa ta ĩgu magure aĩgã Goãmure obu ĩgure wejĕbu iiriñumi. ĩgu eropa yũhricũ Goãmu ĩgure “Wejĕbita,” arĭñumi. ĩgu dorediro dopa ta iibocuricũ ĩagu “Diaye ta ðagu àhrimi,” arĭ ĩañumi Goãmu ĩgure.

²² ĩgu eropa arĭ ĩacũ ire masia mũa: Abrahã Goãmure umupeogu ĩgu dorerire yũhriñumi. Eropa yũhriugu Goãmure ĩgu umupeorire ii ĩhmuñumi.

²³ Eropigu erã Goãmu yare erã gojarapũ erã arĭ gojadiro dopa ta eropa wayoro: “Abrahã Goãmure umupeopũ. ĩgu eropa umupeocũ ĩagu “Ōagu àhrimi ĩgu,” arĭ ĩapũ Goãmu ĩgure,” arĭ gojañuma Goãmu yare erã gojarapũguere. ĩgu eropa arĭ ĩacũ masirã “Abrahã Goãmu mera majagu àhrimi,” arĭñuma masa ĩgure.

²⁴ Eropirã ire masia mũa: “Goãmure umupeoa,” arĭgu, ĩgu ðarire iibiricũ ĩagu Goãmupũ ĩgure “Ōagu àhrimi,” arĭ ĩabeami. Goãmure umupeogupũ diaye ta ĩgu ðaro iicũ ĩagu “Ōagu àhrimi,” arĭ ĩhami Goãmu ĩgupũre.

²⁵ Eropa ta arĭ ĩañumi Goãmu Rahab waĩcugore uma mera ñero iimuridigore. Josué ĩgu obeonirãre ðaro bocatĩri “Ōaro ñajarique,” arĭñumo igo erãre. Eropa iigo erã dujadiacũ igopũ erãre gaji mare ĩhmuñumo erãre ĩhaturirã wejĕri arĭgo. Eropa Goãmu yarãre itamugo Goãmure igo umupeorire ĩhmuñumo. Igo eropa iicũ ĩagu “Ōago àhrimo,” arĭ ĩañumi Goãmu igore.

²⁶ Eropa ta àhraa. Mari dũpũre sĭporã maricũ ojo-caribea mari. Eropiro sĭporã mariro mari dũpũ duhpiburi dũpũ árĭbeaa. Eropa ta “Goãmure umupeoa,” arĭquererã ta gajirãre ðaro iibirã mari árĭcũ diaye árĭbeaa mari umupeori. Eropiro mari umupeori duhpiburi árĭbeaa. Sĭporã mariro erãre ĩhaturirã wejĕri arĭgo. Eropa Goãmu yarãre itami dũpũ iro dopa ta àhraa.

3

Mari disiro wiririre wereñumi

¹ Goãmũ yare masare buherãre ìgũ yare erã buhe-maacãcũ, erã òaro iibiricũ ìagũ erã tamerare gajirã tauro dipuwaja moagũcumĩ Goãmũ. Iririre mũa masia. Eropirã mũa mera majarã masare buherã bajarã árĩbita.

² Árĩpehrerã mari bajasuburi ñerire iiaa. Yujugũ ñerire ne wereniguibigũ Goãmũ gamerire òaro iigũ àhrimi ìgũ. Eropigũ gajĩ ñeri sãre iibeami.

³ Mari werenigui queori mera buhecũ òpa àhraa i: Cabayure ìgũ disiro comemiji ìgũ nerore ñehadiuburimijire mari apia ìgũre majinũgacũ iimorã. Eropirã irimiji comemiji mera ìgũre ìgũ waborore mari taramajinugua. Irimijigã mirimijigã árĩquerecũ ta irimiji mera ìgũ dupũre wacũ iiaa. Eropa ta mari disiro mera miri disirogã árĩquerecũ ta wũaro wacũ iiaa mari.

⁴ Dohodiru queoriñere werenemogũra mũare: Gasiru wũadiru iriru árĩquerecũ ta irirure miruñe turaro weãquerecũ ta autugũpũ miri mijigã mera iriru waborore autumi.

⁵ Eropa àhraa mari wereniguiri. Mari disiro miri disirogã árĩquerecũ ta baja wereniguiri wiria. Miri peamegã wũaro ùjũ wahgũro dopa ta mari disiro mera wũaro ñero wacũ iiaa.

⁶ Eropiro mari wereniguiri peame iro dopa àhraa. Mari wereniguiri árĩpehrerire ñerire iicũ iiaa marire. Peame ùjũnũgaro 4 Dohodiru queoriñere werenemogũra mũare: Gasiru wũadiru iriru árĩquerecũ ta irirure m dopa ta mari wereniguiri mera mari òaro árĩbodiore goroweoa mari. Mari ñerire wereniguirã watĩ dorero dopa ta eropa iirã iiaa.

⁷ Árĩpehrerãre nũgũ majarãre waimũrãre, mirimagũ porãgãre, waimũrã paharãre, waire mari masa seyacũ iimasia. Eropirã mari bajarã erãnore masa seyacũ iituhabũ. Eropirã erã òaro masa seyacoma.

⁸ Erãre masa seyacũ iiquererã ta mari wereniguiri mera mari basi pee masiri mera wereniguicũ iimasibea. Mar-riru árĩquerecũ ta irirure mi ejorãre nijiyajaro dopa ta mari disiropũ ne nijiyabirigohracãa. Mari wereniguiri ñetariari àhraa. Eropiro aña gajirãre ìgũ wejẽro dopa ta marire gajirã sãre ñetariaro wacũ iiaa mari disiro.

⁹ Mari disiro mera mari Pagũ mari Opũ Goãmũre mari òaro arĩ wereniguia. Eropa wereniguiquererã ta masapũre ñero arĩ wereniguia. Goãmũ iro dopa árĩrã ìgũ ìhacũnugunirã árĩquerecũ ta erãre ñero arĩ wereniguia mari.

10 Yuju disirorriru áríquerecũ ta irirure me ta ñeri wereniguiri sã, õari wereniguiri sã wiria. Yũ acawererã eropa arĩ wereniguibircãro gahmea.

11 Maugã dipa ohma wiuri gobere yuju gobere õari dihta wiria. Gaji gobere ñeri dihta wiria. Eropirã Goãmũ yarã sãre õari dihtare wereniguero gahmea.

12 Yũ acawererã, iguigu poegu dũcare dũcacũmasibea. Eropiro poegũpũ iguigu dũcare dũcacũmasibea. Eropi maugã dipa ohma wiuri gobere moayũari deco wiricũ, imisĩri deco sã wirimasibea. Eropa ta mari disirore õari wereniguiri, ñeri wereniguiri mera wiricũ gamebircãro gahmea.

Diaye maja masiri õpa ãhraa, arĩ gojañumi Santiago

13 Yujurãyeri mũa mera majarã masirã ãhrima. Eropirã "Gajirã tauro gũa masirã ãhraa," arĩbircãporo. Eropa arĩbirã ta õarire iique mũa. Eropa õarire iirã diaye ta masirã ãhraa mũa.

14 Eropirã gajigu gajinore igũ opacũ ãhaturirã, mũa ya árĩburi dihtare iidiarã árĩrã, "Goãmũ yare õaro masia gũa," arĩbircãque. Mũa eropa arĩrã árĩrã gũyarã ãhraa mũa.

15 Eropa ñerire pepirã erã ya pepiri Goãmũ ya pepiri árĩbeaa. Erã pepiri i yeba majarã erã ñero pepiri ãhraa. Erã pepiripũ watĩ ya ãhraa.

16 Masare ãhaturirã, erã ya árĩburi dihtare iidiarã eropa game dũyasoniguicãma. Árĩpehreri ñerire iima.

17 Gajirãpũ Goãmũ yare õaro masiri oparãpũ erã tamera eropa iimaacãrã iibeama. Eropirã erã ne game dũyasobeama. Eropa iirã masa õarã, dorerire õaro yũhrirã, mojomoro ãarã, masare itamurã, masare yujuropa iirã ãhrima erã. Irire iirã gũyaro mariro iima erã. Eropirã pee masirã gohra ãhrima.

18 Eropirã gamequeãro mariro árĩrã, gajirãre "Gamequeãbircãrã mari," arĩ bosarã õarã wacũ iirã iiaa mari masare.

4

I yeba maja ñerire gamerã, Goãmũre gamebirã ãhraa mũa, arĩ gojañumi igũ

1 ¿Duhpirã mũa game dũyasori? ¿Eropirã duhpirã gamequeãri mũa? Ñerire ãaribejarã gamequeãdiaa mũa.

2 Gajinore mũa gahmea. Eropa gamerã masare wejã mũa mũa erã yare emamorã. Eropirã gajigu gajinore igũ opacũ ãarã irire mũa bũrigã gahmea. Eropa gamerã irire aĩmasibea mũa. Eropirã irire game dũyaso gamequeã mũa. Goãmũre serẽbirã, mũa gamerire bocabeaa.

³ Eropirã serērã mua ya árĩburi dihtare serēa mua mua gamero dopa ta iiniguicãmorã. Eropa mua serēcũ Goãmũ mua serēire obeami.

⁴ Goãmũre cóarã ũa mua. I yeba maja ñerire gamerã, Goãmũpũre gamebirã ãhraa mua. ¿Irire masibeari mua? Eropigu i yeba majarã ñerire gamegu Goãmũre gamebigu árĩtuhami.

⁵ Ōpa arĩñumi Goãmũ yare erã gojarapũ: “Goãmũ ĩgu Espĩritu Santore mari mera árĩbure apimi. Eropigu Espĩritu Santopũ marire mahigu ñerire mari uaribejarire gamesãbeami ĩgu. Eropigu doero dopa ta marire turaro mahimi erãgue ñerire iiri arĩgu,” arĩ gojañumi iribojeguere. ĩgu eropa arĩ gojara bu gohra árĩbeaa. Diaye árĩro tiiaa.

⁶ Eropigu Goãmũ marire õaro itamumi mari ñerire iibiriburire. Ōpa ãhraa Goãmũ yare erã gojarapũ: “ ‘Yũ tamera gajirãre masi tarinũgaa,’ arĩgũre Goãmũ ĩhaturimi. Gajigũpũre ‘Ñegu bu arĩgu ãhraa yũhũ,’ arĩgũpũre Goãmũ itamumi ñerire ĩgu iibiriborore,” arãa ĩgu yare erã gojarapũ.

⁷ Eropirã Goãmũre õaro yũhrirã árĩque mua. Eropirã watĩre yũhribircãque. Mua eropa yũhribircũ ĩagu ĩgũpũ mũare duhucãgũcumi.

⁸ Goãmũre õaro yũhrique mua. Mua eropa iicũ ĩgũpũ mũare mahi itamugũcumi. Ñerã ãhraa mua. Eropirã ñerire iinemobircãque. Ñeri sãre gahme, õari sãre gamerã ãhraa mua. Eropirã mua ñeri iirare bujawereque. Mua eropa iicũ ĩagu Goãmũ mua ñeri iirare cãdijigũcumi.

⁹ Mua ñeri iirare turaro bujawereque. Eropirã mua ñeri iira dipuwajare oreque. Mucubirã arĩbircãque. Eropirã mua ñeri iirare ñero sĩporãcũ, irire guhyasĩriñariro pepique.

¹⁰ “Ñegu bu arĩgu ãhraa yũhũ,” arĩã Goãmũre umupeoque. Mua eropa iicũ ĩagu ĩgũpũ mua ñeri iirare cóãgu “Ōarã ãhraa,” arĩ ĩagũcumi mũare.

Erã acawererãre Jesu yarãre erã basi ñeri quere iidorebiriñumi

¹¹ Yũ acawererã, Jesu yarã arĩrã, mua basi ñeri quere iibircãque. Mua acaweregũre ñeri quere iirã ĩgũre dipuwaja moadorediarã árĩca mua. Cristo doreripũ masare dipuwaja moadoreri árĩtuhã. Eropirã masare ñeri quere iirã Cristo ya dorerire õpa arĩrã iica: “Marire õaro dorebeaa Cristo ya. Eropirã mari gamero dipuwaja moadorerã,” arĩrã iica masare ñero werewuarã. Eropa arĩrã Cristo dorerire

ñero arĩ wereniguirã dujaa mũa. Eropirã iri dorerire yuhribirã dujaa.

¹² Masare dorerire oꝝ, masare beyegu Goãmũ ta ãhrimi. Eropigu masare peamegue wabonirãre iꝝ ta taumasimi. Eropigu iꝝ ta masare peamegue cóãmasimi. Eropirã maripũ masare “Ñerã ãhrima,” arĩmasibea. Mari acawererãre beyebu Goãmũ dihta ãhrimi.

Ñamigãguere dohpa marire waborore masibea mari

¹³ Dohpaguere yure peeque mũa. Ōpa arĩboca mũa Goãmũre guñaro mariro: “Dohpagãre o ñamigãre gaji macague árĩrã warãca. Eroguere yuju bojori árĩrã, gajinore dua, asũ iirãca. Eropa iirã wajatarãca mari,” arĩboca mũa. Eropa arĩrã árĩrã, yũpũre peeque mũa. Eropa arĩrãre ire werebu iiaa:

¹⁴ Ñamigãguere dohpa marire waborore masibea mari. Imica ãhri, mata pehremaaro dopa ta ãhraa mari árĩricuri. Imica merogã árĩniguiuri pehrea wahaa. Eropa mari sã merogã árĩniguiuri sĩria warãca.

¹⁵ Eropirã ōpa arĩ pepiro gahmea mũare: “Goãmũ iꝝ gameropẽ árĩrãca mari. Eropirã iꝝ gamero mera iirãca mari,” arĩ pepiro gahmea mũare.

¹⁶ Mũapũ “Dohpaguere mari gamero ōpa iirãca,” arĩniguiraa mũa Goãmũre guñaro mariro. Eropa arĩ wereniguirã ñerire iirã iiaa mũa.

¹⁷ Eropirã ðarire mari iiburire masiquererã ta irire iibirã ñerire iirã iiaa mari.

5

Doberi oparãre wereñumi Santiago

¹ Doberi oparã mũa dohpaguere peeque yure. Pũhrũguere mũa ñero tarirãca. Eropirã gaguinigui orerãca mũa.

² Mũa doberi boapehrea waroca. Eropiro mũa suhrire sũrirã sã bapehocãrãcoma.

³ Mũa niyerure mũa wũaro dibura ne duhpiburi árĩbeaa. Mũa eropa dibucũ iagũ mũa niyerure mahicũ masimi Goãmũ. Eropirã niyerure mũa mahira dipuwaja ñero tarirãca. Iri dipuwaja peamegue warãca.

⁴ Mũa ya poerire mohme corerãre wajayebeaa mũa. Eropirã mũa erãre gũyaa. Eropigu erãre mũa wajayebirira niyerure iagũ, mũa gũyarare masimi Goãmũ. Mũare mohme corerã wajaseadiarã, gaguiniguima erã. Erã eropa arĩ gaguiniguicũ mari Opũ turatarigu peemi erãre.

⁵ I yebaguere baja doberi mera árĩricua mũa. Árĩpeherrerire oparã mũa gameri dihtare mũa uaribejarire

iiāa m̄ua. Eropirā w̄uagu wecu erā ōaro ejogu iro dopa árīricua m̄ua. Eropirā w̄uagu wecu īgu diserecū ĩarā ĩgure erā wejēburi gorogue aĩ wahgāma. Eropa ta m̄ua s̄are w̄uaro m̄ua opara p̄hru m̄uare īgu dipuwaja moarogue aĩgāgucumi Goām̄u m̄uare.

⁶ Ōarāre peresu iidore wejēdoreb̄u m̄ua erāre. M̄ua eropa iicū erāp̄u duhri wiriamasibirama.

Cristo īgu dujariborore ōaro coredorep̄u marire Santiago

⁷ Eropirā yu acawererā, mari Op̄u Cristo īgu i yeba īgu dujariborore ōaro coreyuque. Pohe op̄u īgu oteri d̄ucac̄uburisubure īgu ōaro corero dopa ta ōaro coreyuque Cristo dujariborore. Īgu oteriguere “Deco ariporo,” arīgu īgu pohere ōaro puhriburire ōaro cohremi īgu.

⁸ Eropa ta m̄ua s̄a ōaro coreyuque. Mari Op̄u īgu dujariboro merogā d̄uhyaa. Eropirā Goām̄ure eropa guñaturaniguicāque m̄ua. Eropirā eropa coreniguicāque m̄ua.

⁹ Yu acawererā, m̄ua basi d̄uyasobiricāque Goām̄u m̄uare dipuwaja moabiriboro dopa. Eropirā ire guñaque m̄ua. Dipuwaja moabu īgu dujariboro merogā d̄uhyaa.

¹⁰ Yu acawererā, ñero tariquererā ta yujuro bojeque Goām̄ure cóaro mariro. Goām̄u yare werem̄htanirā m̄ura erā Goām̄u ya árīburire iirā ñero tariquererā duhubirim̄riñuma. Erā duhubiridiro dopa ta duhubiricāque m̄ua s̄a.

¹¹ Eropirā ire guñaque m̄ua. Ñero tariquererā ta Goām̄ure duhubirāre Goām̄u ōaro iigucumi. Iribojegue majagu Job waĩc̄ugure peeb̄u m̄ua. Īgu ñero tariqueregu ta Goām̄ure duhubiriñumi. Eropigu īgu ñero tarira p̄hru, Goām̄u ĩgure ōaro iĩnumi. Goām̄u mari Op̄u marire ōaro mojomoro ĩagu árīgu eropa iĩnumi ĩgure. Iri árīpehrerire masia m̄ua.

¹² Yu acawererā ire masique. Ōpa arīma waĩpeo piyurā: “Ūmaro majagu mera diaye arīrā iiāa,” arī waĩpeoma masare peedorerā. Erā iro dopa arī waĩpeo piyubiricāque. Ire m̄uare turaro dorea. M̄ua gajirāre wererā, ōaro diaye wereque erāre ḡuyaro mariro. Arīnemopeobiricāque. Eropa m̄ua diaye werecū ĩagu Goām̄u m̄ua gajiropa arīra dipuwajare dipuwaja moasome.

¹³ M̄ua mera majagu ñero tarigu árīgu, Goām̄ure serēporo īgu. Gajigu mucubirigu árīgu Goām̄ure mucubiriri mera bayaporo.

¹⁴ M̄ua dorec̄urā, Jesu yarā oparāre sihubeoque m̄ua. M̄ua eropa sihubeocū erāp̄u m̄uare uȳu mera s̄urācoma.

Eropa iirã Goãmure mari Opure mua dorecurare serēbasarãcoma erã.

¹⁵ Eropa arĩ serēbasarã “Mari serēro dopa ta ĩgu iigucumi,” erã arĩ pepicũ muare dorecurãre Goãmũ ita-mugucumi. Eropa iigu muare õarã wacũ iigucumi mari Opũ. Eropigu mua ñeri iira dipuwaja mua dorecurã árĩcũ ĩarã muare serēbasarãcoma. Erã eropa serēbasacũ ĩagu mua ñeri iirare cãdijigucumi Goãmũ.

¹⁶ Eropirã mua mera majarãre mua ñeri iirare game pepuri weretarique. Eropirã mua basi Goãmure game serēbasaque. Mua eropa arĩ serēbasacũ mua serēbasanirãre Goãmũ taugucumi. Õarire iirã mua árĩcũ Goãmure mua turaro serēbasadiro dopa ta iigucumi Goãmũ. Eropiro mua erãre serēbasari bu árĩri árĩbeaa.

¹⁷ Goãmũ ya weremũhtadigu murũ Elia murũ mari iro dopa masũ árĩñumi. Eropigu masa ñero iira dipuwaja “Deco aribiricãporo,” arĩ turaro serēñumi Goãmure. ĩgu eropa arĩ serēcũ ÷hre bojori gohra gaji bojori deco deco aribiriyoro i yebaguere.

¹⁸ Eropigu dipaturi Goãmure deco ĩgu aridore serēcũ deco mereyoro daja. Eropiro dipaturi i yebaguere yucũ bugũ dũca dũcacũyoro. Eropiro Goãmure mari serēri bu árĩri árĩbeaa.

¹⁹ Yũ acawererã, mua mera majagũ Goãmũ yare diaye maja árĩrire duhudigu Goãmũ yare dipaturi ĩgu gameborore ĩgure wererã, õaro iirã iiaa mua.

²⁰ Eropirã ire masique mua: Goãmure duhudigure Goãmure dipaturi gamecũ iirã, peamegue wabodigure taricũ iirã iica mua. Eropigu baja ĩgu ñeri iirare Goãmũ cãdijicũ iirãca mua ĩgure.

1 San Pedro

Jesu gaji macari wanirãre gojabeoñumi Pedro

¹ Yũhũ Pedro Jesucristo ïgũ buhedore apidigũ ta ãhraa. Eropigũ mũare yoaro maja macarigue wanirãre, Ponto yebague wanirãre, Galacia yebague, Capadocia yebague, Asia yebague, Bitinia yebague wanirã sãre mũare árĩpehrerãre gojabeogũ iiaa yũhũ. Mũare ðadore gojabeoa yũhũ.

² Negohraguere Goãmũ mari Pagũ “Õpa iigũra,” ïgũ arĩdiro dopa ta mũare beyerũ. ïgũ beyera pũhrũ ïgũ Espiritu Santo mera mũare Goãmũ yarã árĩmorãre acupũ. Õpa ta acupũ ïgũ Jesucristore ðaro yũhrimorã mũa árĩboro dopa. ïgũ di cóãro mera ñerire coenirã mũa árĩboro dopa iipũ. Eropirã Goãmũ ïgũ mahiri mera ðaro árĩque mũa.

Jesu yarã árĩrã marire ãmarogue ïgũ aĩgãborore corerã iiaa mari, arĩ gojañumi Pedro

³⁻⁵ Goãmũ marire turaro mojomoro ïagũ, Jesucristo sĩridigũ ïgũ masa mũariaro mera marire ðarã gohrotocũ iimi. Eropa iigũ ïgũ gohrotori mera Goãmũ porã ta wahaa mari. Eropa warã ïgũ mera eropa mari ðaro árĩniguicãborore ðaro masia mari. Eropigũ mũare ïgũ ðari opaburire odiagũ mũare coregũ iimi. Iri mũare ïgũ oburi ne pehresome. Eropigũ ïgũre mũa umupeorãre Goãmũ ïgũ turari mera mũare ïhadibugũ, taricũ iigũcumi. Pehrerinũ árĩcũ mũare ïgũ taurare masicũ iigũcumi ïgũ. Eropirã ïgũ marire ðaro mojomoro ïacũ ïarã, ïgũre Goãmũre mari Opũ Jesucristo Pagũre “Õagũ, turagũ ãhrimi,” arĩ umupeoro gahmea marire.

⁶ Eropa ïgũ taumorã árĩrã bũrigã mucubiro gahmea. Mero i yeba mũa árĩropẽ, bajasuburi mũa ñero tariquererã ta bũrigã mucubiro gahmea.

⁷ Eropa ñero tariquererã ta Goãmũre cóãbirã mũa árĩrã “Queoro Jesucristore umupeoa gũa,” arĩmasia mũa ïgũre. Mũa ñero tariquererã Jesucristore umupeoniguicũ mũa umupeoripũ yuju diaye árĩbeaa. Eropigũ mũa ñero taricũ ïagũ “¿Árĩro ta mũa yũre umupeori?” arĩ queoñagũ iimi Goãmũ mũare. Mũa eropa ñero tarirã diaye ta Cristore ðaro umupeoniguicũ “Õaro iiabũ mũa,” arĩgũcumi Cristo mũare. Eropigũ Jesucristo dujarigũ mũa ïgũre ðaro umupeoniguinirãre ðaro ïagũcumi mucubiriri mera.

⁸ Īġure Jesucristore ĩabiriquererã mahia mũa. Eropirã dohpaguere ĩġure ĩabiriquererã ta ĩġure “Diaye ta iġu ãhrimi,” arĩ umupeoa. Eropa umupeorã turaro mucubiria mũa. Mũa eropa mucubirirã mũa Goãmũ pohro mucubiriboro dopa ta mucubiria. Mũare eropa mucubiricũ iimi Goãmũ. Eropirã turaro mucubiria.

⁹ Eropiġũ Goãmũ mũare peamegue wabonirãre taricũ iġucumi mũa ĩġure õaro umupeoro mera.

¹⁰ Goãmũ ĩġũ masare eropa tauborore iribojegue Goãmũ yare weremũhtanirã irire masidiarã serẽpi ĩamũriņuma.

¹¹ Cristo ĩġũ ñero tariborore, ĩġũ sĩridiġũ masa mũariaborore, arĩpehrerã tauro opa ĩġũ arĩborore erã ero coregue ta weremũhtaņuma. Jesucristo ĩġũ Espĩritu Santo ĩġũ itamuri mera eropa wereņuma erã. Erã eropa weremũhtaquererã erã wererare masibiriņuma. Eropirã erã wererare õaro masidiarã serẽpi ĩamũriņuma erã Goãmũre.

¹² Iri erã werera Jesucristo ariburi erã ya arĩburi arĩburiyoro. Mari õaro arĩburi arĩyoro. Irire erãre masicũ iĩņumi Goãmũ. Eropirã dohpaguere ƣmarogue obeodiġũ Espĩritu Santo ĩġũ itamuri mera õari buherire mũare ġũa werea. Iribojegue mũa ya arĩburire erã weremũhtara iri ta arĩcãro tiiaa dohpaguere ġũa mũare wereri. Iri buherire anyua sã burigã masidiariņuma.

Goãmũ marire ñeri marirã arĩdoremi, arĩ gojaņumi Pedro

¹³ Eropirã õarire ġũa masi arĩyũque mũa. Eropirã ġũhyadiaro arĩque. Cristo ĩġũ dujaricũ Goãmũ mũare ĩġũ õaro tauborore ġũaque. Eropirã irire õaro mucubirimũhtarã coreque.

¹⁴ Iribojegue Goãmũre masinibirãgue ñerire ƣaribejarã arĩmũrinirã arĩribũ mũa. Dohpaguere irire iibiricãque. Eropirã majirã erã pagũ sũmarãre õaro yũhriro dopa ta Goãmũre õaro yũhrique daja.

¹⁵ Eropirã ĩġũ yarã arĩmorãre mũare sihubeodiġũ ñeri marigũ ĩġũ arĩro dopa ta mũa sã ñeri marirã ta arĩque. Eropirã õari dihtare iirã arĩque.

¹⁶ Eropa ta arĩ gojaņuma Goãmũ yare erã gojarapũgue: “Ñeri marigũ ãhraa yũhũ. Yũ eropa arĩcũ mũa sã ñeri marirã arĩque,” arĩmi Goãmũ, arĩ gojaņuma.

¹⁷ ĩġũ Goãmũ mari Pagũ yujurãyeri arĩpehrerã erã iirare ĩaġũ yujuro mera beyemi ĩġũ erãre. ĩġũ eropiġũ arĩcũ ĩġure “Ahũ,” arĩdiarã õaro iġqunerire ƣaribejarã arĩmũrine. I yeba mũa arĩropẽ ġũhyadiaro mera õaro iique mũa.

18 Mũa ñecũ sũmarã mũra erã árĩricũri ne duhpiburi árĩbiriyo. Mũa sã erã iidiro dopa ta iinirã mũa árĩquerecũ ta Cristo mũare ĩgũ yarã árĩmorãre iimi. Mari wajamorire ĩgũ wajayebasaboro dopa ta mari ñeri iirare cãdijiborore mari ñeri iira dipuwajare wajayebasami. Irire õaro masia mũa. Eropa wajayebasagũ ĩgũ niyeru mera, oro mera wajayebasabirimi. Niyeru, oro sã dederea waroca.

19 ĩgũ di cóãra mera ta wajayebasami mari ñeri iira dipuwajare. Ovejagã erã Goãmũre obodigũ õagũ ĩgũ árĩdiro dopa ta Jesucristo õagũ ñeri marigũ árĩdigũ árĩmi.

20 Iribojeguere i yebare ĩgũ ĩhacũnuguboro coregue Jesucristo ĩgũ eropa waborore masituhapũ mari Pagũ Goãmũ. Dohpaguerũre pehrerinũ coregã árĩcũ, Cristo sĩribasami mũare mũa ya árĩburire.

21 Eropirã Jesucristo ĩgũ itamuro mera Goãmũre umupeoa mũa. Goãmũpũ Cristore sĩridigũre masudigũ árĩmi. Eropigũ ĩgũre umarogue apigũ, árĩpehrerãre ĩgũre umupeocũ iipũ mari Pagũ. ĩgũ eropiicũ ĩgũre mari Pagũre "Diaye ta iigũ ãhrimi," arĩ umupeoa mũa. Mũa eropa umupeocũ õaro iimi mũare. Eropirã mũa ĩgũ mera õaro árĩniguiborore õaro masia mũa.

22 Õari buherire diaye majare yũhrirã mũa ñerire duhurnirã ãhraa mũa. Eropa árĩrã, diaye ta mari acawererã Jesu yarãre mahi umupeomasia mũa. Eropirã mũa mera majarãre mũa sĩporãri mera turaro mahi umupeoque.

23 Mũa dipaturi masa dehyoaro dopa ta Goãmũ porã wahabũ mũa. Mari pagũ sũmarã mera masa dehyoanirã árĩrã, pũhrũ sĩria warãca. Iri iro dopa árĩbeaa Goãmũ porã mũa wacũ. Goãmũ mera árĩnigũicãrãca. Goãmũ ĩgũ buheri mera ĩgũ porã wahabũ mũa. Iri buheri pehrebiriburi buheri marire Goãmũ mera eropa árĩnigũicũ iiaa.

24 Õpa ãhraa Goãmũ yare erã gojarapũ:

Árĩpehrerã masa taa iro dopa wahama. Eropiro õari erã opari sã gori iro dopa ãhraa. Taa masa, sĩria wahaa.

Gori sã masa, sĩria wahaa. Iri taa iro dopa ta mari masa sã wahaa.

25 Mari Opũ ya buheripũ ne pehresome. ĩgũ arĩdiro dopa ta eropa waroca, arĩ gojañuma.

Iri buheri mũare erã werera õari buheri ta Jesucristo marire tauburi buheri ta ãhraa.

2

1 Eropirã árĩpehreri ñeri iirire, erã pũrũpũpũ erã ñero ii corerire, gajirã gajinore opacũ ĩhaturirire, gajirã ñeri quere

moarire, irire duhuque m̄aa.

²⁻³ Mari Op̄u m̄aare ðaro ĩgu iirire dabero masituhaa m̄aa. Eropirã ne masa dehyoarãgã apĩcore erã gamero dopa ta m̄aa sã ðari buherire Goãm̄u yare turaro gameque. Eropa ĩgu yare gamerã m̄aa ĩgure m̄aa guñaturanemorãca. ĩgu yarã ðaro pee masirã árĩrãca.

Cristo ojocaricũ iigu utãye iro dopa árĩgu ãhrimi, arĩ gojañumi Pedro

⁴ Cristo ojocaricũ iigu utãye iro dopa árĩgu ãhrimi. Masa Cristore gamebirima. Erã gamebiriq̄recũ Goãm̄up̄u ĩgu Pagup̄u ĩgure beyedigu árĩmi. Ôatariagu ãhrimi. ĩgu eropa árĩgu árĩcũ ĩgure gameque.

⁵ Eropirã m̄aa Jesu yarã árĩrã mera Goãm̄u ãhrimi. Eropirã yujuro mera ĩgu yare ðaro iirã árĩque m̄aa. ĩgu ya árĩburire m̄aa iimorãre beyedigu árĩmi. Eropirã m̄aa Jesucristo itamuri mera ĩgu yare ðaro iirã ĩgu Goãm̄ure mucubiricũ iiaa.

⁶ Ôpa ãhraa Jesucristore Goãm̄u yare erã gojarapũ: Cristo utãye iro dopa yu beyedigu ãhrimi. Eropigu ôatariagu ãhrimi. ĩgu mariro yaharã wamasibeam̄a. Eropigu ĩgure Jerusalengue dohpague apigu iiaa. ĩgu masare ðaro árĩcũ iigucumi. Eropirã ĩgure umupeorã mucubiriniguirãcoma, arĩmi Goãm̄u, arĩ gojañuma Goãm̄u yare weremũhtanirãgue.

⁷ ĩgure umupeorãp̄u "Ôatariagu ãhrimi," arĩrãcoma. ĩgure umupeobirãp̄u ñero warãcoma. Erãre ôpa ãhraa Goãm̄u yare erã gojarapũgue:

Ihĩ Cristo utãye iro dopa ta Goãm̄u beyedigu ãhrimi. ĩgu Goãm̄u beyedigu árĩquerecũ masa ĩgure gamesome. ĩgure gamebiriq̄recũ Goãm̄u ĩgure op̄u acumi árĩpehrerãre dorebure, arĩ gojañuma.

⁸ Ô sãre arãa Goãm̄u yare erã gojarapũ:

ĩgu utãye iro dopa árĩgure gamebirã dederea warãcoma, arĩ gojañuma iribojeguerẽ.

Eropa gojarã Jesucristore masa gamebiriburire ôpa arĩ gojamũhtañuma. Erã ĩgure gamebirã Goãm̄u ya buherire yũhribirima. Cristore gamebirã, ĩgure tarinũgarã, Goãm̄u pohrogue ejasome erã. Erã eropa waborore apip̄u Goãm̄u erãre.

Ôpa ãhrima Goãm̄u yarã, arĩ gojañumi Pedro

⁹ M̄nar̄u Goãm̄u ĩgu beyenirã ãhraa. ĩgu mari Op̄u ĩgu yarã pahia ĩgu yare itamurã ãhraa m̄aa. Eropirã ĩgu ya curu majarã ñeri marirã Goãm̄u yarã ta ãhraa m̄aa.

Eropigu mũare naitĩaro árĩbonirãre boyoropu árĩmorãre, ñerire iibirimorãre, ðaripure iimorãre aĩdigu árĩmi mũare. Eropa ta aĩdigu árĩmi Goãmũ mũa ĩgu ðarire ĩgu ðaro iirare gajirãre weremorãre.

¹⁰ Ero coregue duhpimorã árĩbirimuriribu mũa. Dohpague tamerare Goãmũ yarã áhraa mũa. Ero core mũare mojomoro ĩaburũ marinimi mũare dohpa. Dohpaguepũre mũare Goãmũ mojomoro ĩagu áhrimi.

Goãmũ yare iirã árĩque mũa, arĩ gojañumi

¹¹ Ү mahirã, mũa i mũure wari masa iro dopa áhraa dohpaguere. Goãmũ pohro wamorã ta áhraa. Mũa eropa árĩrã árĩcũ, ire turaro werea mũare: Mũa ñeri uaribejarire iibiricãque. Iri ñerire uaribejarã, ñerã warã iica mũa.

¹² Goãmũre gamebirã watope árĩrã ðaro iirã árĩque mũa guare werewuuri arĩrã. Mũa eropa iirã árĩcũ mũare dohpaguere ñero werewuadiaquererã mũa ðaro iirire masirãcoma erã. Eropa masirã erã Goãmũre “Óagu, turagu áhrimi,” arĩrãcoma. Ópa ta arĩrãcoma Cristo ĩgu i yebague ĩgu dujaricũ.

¹³ Mari Opũ yare iirã árĩrã ð majarã oparã sãre yuħrique mũa. I yeba majagũre mũa árĩpehrerã tauro opu árĩgũre ĩgu sãre yuħrique.

¹⁴ Goãmũ erã oparãre apipũ tarinũgarãre dipuwaja moamorãre. Eropigu ðaro iirãre “Óaro iabũ mũa,” arĩdoregu apipũ erãre. ĩgu eropa apicũ erãre yuħrique mũa.

¹⁵ Mũa ðaro iicũ ĩarã, pee masibirã erã sihajaro mũare weresãdiaquererã ta weresãmasibeama. Eropigu mũa ðaro iicũ gahmemi Goãmũ.

¹⁶ Mũa ñecu sumarã árĩricuri doça árĩnirãre Goãmũ mũare taudigu árĩmi. Eropa taunirã árĩquererã ta, “Guare doreri mara. Eropirã guã ñerire iirãca,” arĩ pepibiricãque ñerire iiri arĩrã. Eropirã “Goãmũ pohro majarã áhraa guã,” arĩ pepique mũa. Eropa arĩ pepirã ĩgu dorerire iique mũa.

¹⁷ Árĩpehrerã masare mahi umupeoque. Mari acawererã Jesu yarãre mahi umupeoque. Goãmũre guhyadiaro ĩaque. I yeba majagũ opu sãre umupeoque.

Cristo ñero tarigu ĩgu yujuro bojediro dopa ta yujuro bojeque mũa sã, arĩ gojañumi Pedro

¹⁸ Mũa pohro majarãre weregũ iiaa dohpaguere. Mũa ðaro umupeori mera mũa oparãre yuħrirã árĩque. Óarã, mũare ðaro iirã mera dihtare yuħrirã árĩbiricãque. Mũa mera guarã sãre yuħrique mũa.

19 Mũa ñero iibiriquerecũ, mũare erã dipuwaja moabocoma. Erã eropa dipuwaja moarare Goãmũ ĩgũ gamero dopa ta irire mũa yujuro bojecũ “Ōaro iiabũ mũa,” arĩgũcumĩ Goãmũ mũare.

20 Mũa ñero iira wajapũ erã mũare dipuwaja moasũcũ irire mũa yujuro bojequerecũ Goãmũ “Ōaro iiabũ mũa,” arĩsome. Mari ñaro iiquererã erã dipuwaja moasũcũ irire mari ñaro mera guaro mariro árĩcũ yujuro bojecũ Goãmũ marire ñaro ĩhasuagũcumĩ.

21 Eropa iimorãre ĩgũ yarã árĩdoremi Goãmũ mũare. Cristo sã mũa ya árĩburire ñero tarimi mũa ĩgũre ĩhacũboro dopa.

22 ĩgũ ne ñero iibirimi. Eropigũ ne gũyabirimi.

23 ĩgũre turicũ, ĩgũpũ erãre ne turi gamebirimi. ĩgũre erã ñero iiquerecũ ta “Mũare ñero iigũra,” ne arĩbirimi ĩgũ. Eropigũ “Ahũ queoro dipuwaja moagũ ãhrimi. ĩgũgue amugũcumĩ,” arĩ pepĩnumĩ ĩgũ. Eropirã mari sãre ĩgũ iidiro dopa ta iiro gahmea.

24 ĩgũ Cristo ĩgũ basi crusague mari ñeri dipuwaja sĩrimi. Eropa sĩrimi dipaturi mari ñerire iibiriboro dopa, Goãmũ gameripũre mari iiboro dopa. ĩgũ ñero camicũmi marire peamegue wabonirãre marire taricũ iibu.

25 Oveja erã dedereboro dopa ta mũa sã peamegue dederebonirã árĩribũ. Dohpaguepũre Cristore umupeorã ĩgũ yarã wahabũ pare. Eropigũ ovejare ĩhadibugũ iro dopa Cristo mũare ĩhadibumĩ. Mũa sĩporã mera dederebiriborore ñaro ĩhadibumĩ.

3

Mojoto dirirãre õpa iiro gahmea erãre, arĩ gojañumi Pedro

1 Eropigũ pohro majarãre yũ dorediro dopa ta mũa marasã nomere doregũra. Mũa marapũ sũmarãre ñaro yũhrique erã Goãmũ buherire erã gameboro dopa. Yujurãyeri mũa marapũ sũmarã Goãmũ buherire gamebirã ãhrima. Erãre mũa yũhricũ ĩarã Goãmũ ya buherire gamebocoma erã. Eropirã iri buherire mũa erãre werebiri-querecũ ta ĩgũ yare gamebocoma erã.

2 Eropa ta gamebocoma mũa erãre ñaro iirire, mũa umupeori sãre ĩarã.

3 Mũa nome, mũa poarire wũapuwea seapatanirã nome, oro dari bũyanirã nome, ñari suhri sañanirã nome árĩdiarire guñabiricãque mũa. Mũa ya dũpũ masare ĩhasuacũ iibiricãque.

⁴ Eropa iibirã õpa iique. Mũa pepiri õaro árĩcũ guñaque. Eropirã mũa guhyadiarã nome iro dopa gajirãre nijiyajaro mera iirã nome árĩque. Guhyadiaro mera weretamurã árĩrã ipure masare ñhasuacũ iique. Iripũ pehresome. Iri õatariari ãhraa Goãmũ ñacũ.

⁵ Õpa ta iimuriñuma iribojegue majarã nome Goãmũ yarã nome. Erã nome Goãmũre umupeorã nome árĩrã, erã marapũ sũmarãre õaro yũhrimuriñuma.

⁶ Eropa Sara igo marapũre Abrahãre õaro mera yũhrimuriñumo. Eropigo ñgũre “Opũ,” arĩ piyumuriñumo. Eropirã mũa õaro iirã nome árĩrã, gũiri marirã nome árĩrã, Sara árĩdiro dopa ãhraa mũa.

⁷ Õpa ta mũa marapũ sũmarã sã mũa marapo sãre õaro iique. Erã nome mari ũama iro dopa turarã árĩbeama. Eropirã umupeori mera õaro iique erã nomere. Goãmũ árĩpehrerĩnuri ñgũ mera mari árĩniguiborore ñgũ mũare odiro dopa ta ogũcumĩ erã nome sãre. Erã eropa árĩmorã árĩcũ erã nomere õaro iique. Goãmũre mũa serẽrire ñgũ yũhriboro dopa erã nomere õaro iique mũa.

Õaro erã iiquerecũ ta gajirã erãre erã ñero iirire werepũ Pedro

⁸ I mera weretugũra: Mũa árĩpehrerã yujuro mera õaro árĩque. Eropirã mũa mera majarãre õaro mojomoro ñarã árĩque. Mũa acawererã Jesu yarãre pepũri majarã game umupeoque. Eropirã õaro iique erãre. Eropirã “Gajirãre masitaugũ ãhraa,” arĩ pepibirã erã gamero dopa ta iique.

⁹ Gajirã mũare erã ñero iicũ erãre ñero ii gamebircãque. Mũare erã turicũ erãre turi gamebircãque. Mũare erã eropa iiquerecũ ta õaro iique erãre. Eropirã õaro yũhrique erãre. Iirire iimorãre ta apimi Goãmũ mũare õaro iibu.

¹⁰ Eropa ta ãhraa Goãmũ yare erã gojarapũ: Mũa õaro mucubiriri mera árĩdiarã ne ñero wereniguibircãque.

¹¹ Árĩpehreri ñeri iirire duhucãque. Õaripũre iique. Game mũa basi ñhaturiro mariro árĩque. Iirire turaro iique.

¹² Õarãre mari Opũ eropa ñhadibuniguicãgũ iimi. Eropigu ñgũre erã serẽrire eropa peeniguicãgũ iimi. Ñero iirãpũre ñgũ gamebeamĩ, arĩ gojañuma Goãmũ yare gojarapũgue.

¹³ Õarire mũa turaro iidiacũ gajirãpũ mũare ñero iidiaquererã ta ne yujuro bojesome.

¹⁴ Õaro mũa iiquerecũ ta mũare erã ñero iicũ ñagu Goãmũpũ mũare õaro iigũcumĩ. Eropirã mũare ñero iidiarãre, “Mũare wejẽrãca,” arĩrãre gũibircãque. Eropirã bujawerebircãque. Iirire pee guñaricũbircãque.

15 Eropirã mũa Cristore “Gũa Opũ ãhrimi,” arĩ pepirã, umupeoque ãgũre. Eropirã Cristore mũa umupeorire, Goãmũ mera mũa árĩborore, gajirã mũaare serẽpibocoma: Erã mũaare serẽpiboro core erãre yũhriburire õaro guñayuque. Eropa erãre yũhrirã nijiyajaro mera, õaro umupeori mera wereque erãre.

16 Õarã árĩque. Eropirã “Ñerire iiaa,” arĩ pepisome mũa. Eropirã Cristo yare mũa õaro iirã árĩcũ gajirã mũaare ñeri quere moarã guhyasũuro warãcoma.

17 Ñerire mari iira dipuwaja mari ñero taricũ õabeaa marire. Eropiro Goãmũ gamecũ õarire mari iira dipuwaja mari gajirã mera ñero taricũ õapũrica iri tamera.

18 Eropa ta ñero tarimi Cristo. Yujusubu ta árĩpehrerã ñeri dipuwajare sĩrimi ãgũ. Õagũ árĩmi. Eropa árĩgũ ñerã mari árĩcũ mari ya árĩborare ñero tarimi ãgũ. Ñero tarimi ãgũ Goãmũ yarã mari wacũ iibu. ãgũ sĩria wami. Eropa sĩriquerẽcũ ta ãgũ sĩporã ojocariyoro.

19 Eropigũ ãgũ sĩporã mera sĩrinirã mũa erã dipuwaja moaburire corerã erã pohroque Goãmũ yare werepũ erã sĩporãrere.

20 Erã mũarapũ iribojegue Goãmũre yũhribirimãriñuma. Irisubuguerẽ Noé ãgũ árĩrasubuguerẽ, wũadiru dohodirure dohogũ iĩñumi. Irirure ãgũ dohorisubu Goãmũre yũhribirinirã mũa erã yũhricũ gameriñumi. Eropigũ erã yũhriborore yoari boje dipuwaja moabigũ coreriñumi Goãmũ. Yũhribirimãriñuma. Eropigũ erãre dipuwaja moañumi. Eropirã bajamerãgã ocho dihta dia miririñere tariwereñuma.

21 Miricũ erã taridiro dopa ta marire waĩyecũ peamegue wabonirãre mari tariborore ãhmua. Deco mera marire waĩyecũ mari dũpũre mari guhrrarire tu coero dopa árĩbeaa. Marire waĩyecũ ñeri marirã mari árĩborore Goãmũre mari serẽa. Eropirã Jesucristo ãgũ masa mũriara mera peamegue wabonirã taria mari.

22 ãgũ Jesucristo umarogue wadi árĩmi Goãmũ mera dorebu. Eropigũ ãgũ anyua tauro, umaro majarã oparã tauro, árĩpehrerã dorerã tauro erãre doregũ ãhrimi.

4

Cristo yarã árĩrã õarire gohrotonirã árĩrãca, arĩ wereñumi

1-2 Mari ñero tarirã mari ñero iirire duhucãa mari. Eropa duhucãrã mari dipaturi mari ãaribejarire iibeaa. I yeba mari árĩropẽ Goãmũ gamerire iinquirãca. Eropirã Cristo

ĩḡũ ñero tarĩḡũ ĩḡũ güibiridiro dopa ta mũa sã ñero tariborore güibiricãque.

³ Iribojegue Goãmure gamebirã erã ñerire ùaribejadiro dopa ta iimariyoro mũa. Gũhyasĩriro mariro ñerire iirã, ñeri ùaribejarire iirã, mereri bosenuri iirã, Goãmũ dorerire tarinũgarã, goãmarã wéanirãpũre umupeorã iimariyoro. Eropirã iripêta iri ñerire iipurumujucãque pare.

⁴ Eropirã erã mũraro ta iirãpũ mũa dohpaguere iri ñerire erã mera iibiricũ ĩarã erãpũ ĩha ùca wahama. Eropirã erã mũapũre ñero wereniguirã, querere goroweoma.

⁵ Erã eropiicũ ĩagũ erã ñeri iirare Goãmũpũ serẽpi ĩagũ, weretaridoregũcumi erãre. ĩḡũ ojocarirãre, sĩrinirã sãre beyebu àhrimi.

⁶ ĩḡũ eropa beyebu árĩḡũ erã sĩrinirãpũre õari buherire werepũ Goãmũ mera erã õaro árĩniguiborore. Eropirã i yebare erã árĩpehrerã masa iiro dopa sĩrinirã árĩquerecũ Goãmũ ĩḡũ mera erã õaro árĩniguiborore werepũ erãre.

⁷ Pehreburinũ merogã dũhyaa. Eropirã õaro pee masirã árĩque. Eropirã Goãmure serẽniguicãque.

⁸ Gajirãre mari õaro mahirã baja gajiropa erã marire ñero iiquerecũ ta eropa ĩacãa mari. Eropirã mũa mera majarãre bũrigã umupeo mahiniguicãque.

⁹ Mũa mera majarãre mucubiriri mera mũa ya wirigue ñajaridoreque.

¹⁰ Goãmũ ĩḡũ yarã nũcũre ĩḡũ yare mũa mohmemasiburi nũcũre apimi. ĩḡũ eropa apicũ mũa iimasiro dopa ta mũa mera majarãre irire õaro itamuque. Goãmũ mũa nũcũre mũa ĩḡũ yare mohmemasiburi nũcũre apimi. ĩḡũ apirañe mera gajirãre õaro itamurã, Goãmũ ĩḡũ apidiro dopa ta õaro iirã iiaa mũa.

¹¹ Eropirã mũa õaro wererã árĩrã, Goãmũ ĩḡũ werebodiro dopa ta õaro wereque mũa sã. Masare itamurã árĩrã, Goãmũ ĩḡũ apira turari mera gajirãre itamuque. Árĩpehreri mũa iira nũcũ Goãmure masa erã umupeoboro dopa irire iique. Jesucristopũ mũa irire iicũ itamugũcumi. ĩḡũre árĩpehrerĩnuri umupeoque. “Õagũ, turagũ àhrimi,” arĩro gahmea árĩpehrerãre. Eropa ta arĩporo.

Jesu yarã erã árĩri dipuwaja erã ñero tarĩre were gojañumi Pedro

¹² Yũ mahirã, dohpaguere ñetariaro tarirã, “Gajiropa arĩro wãca yũre,” arĩ guña iibiricãque. Mucubirirã árĩque.

¹³ Bũjawerebirã ta mucubirirãpũ árĩque. Eropirã “Cristo ĩḡũ ñero taridiro dopa ta gũa sã eropa ta wahaa,” arĩ

mucubirique mũa. Eropa mucubirirã Cristo ïgu ðarire ïgu ïhmugu dujaricũ mũa turaro mucubirirãca.

¹⁴ Cristo yarã mũa árĩri dipuwaja gajirã mũare erã turicũ Goãmũ ïgu Espĩritu Santo ïgu ðagu mũa mera árĩgu iimi. Eropirã ðaro mucubirirã àhraa mũa.

¹⁵ Eropirã masare wejẽra waja dipuwajacurã, yajara waja dipuwajacurã, ñero iira waja dipuwajacurã, gajiroa arĩ goroweora waja dipuwajacurã árĩbircãque. Iri dipuwaja mũa ñero taricũ ñehe àhraa.

¹⁶ Cristo yarã mũa árĩra wajapu ñero taricũ ðhaa. Eropirã Cristo yarã mũa árĩcũ ïha ñero iima mũare. Erã eropiicũ guhyasĩribircãque. Ñero tariquererã ta Cristo yarã mũa árĩrire mucubirirã, Goãmũre "Õhaa," arĩ umupeoque mũa.

¹⁷ Goãmũ ïgu yarã erã iirare ïgu beyerisubu árĩro iiaa dohpaguere. Árĩpehrerã mari ïgu yarã mari iirare ïha serẽpimãhtagucumi. ¿Eropa marire serẽpimãhtagu dohpa iigucuri ïgu yarã árĩbirãpũre mũa pepicũ? ïgure yuhribirinirãpũre turaro dipuwaja moagucumi.

¹⁸ Eropirã ðarã ïgu yarã eropa ñero tarira pũru Goãmũ erãre tau erãre ïgu pohro aĩagucumi. Goãmũre gamebirãpũ ñetariaro tarirãcoma. Eropirã dederea wa peamegue warãcoma.

¹⁹ Eropirã Goãmũ ïgu gamecũ mũa ñero tarirã árĩrã, ðarire mũa iirare duhubircãque. Eropirã mũare ïhacũnugudigũre mũare ne duhubigũre ïgure umupeoro gahmea. "Yũre ïhadibugucumi," arĩro gahmea.

5

Jesu yarã erã iiborore were gojañumi Pedro

¹ Dohpaguere mũare Jesu yarã oparãre weregũra: Yũhũ Jesu yarã opu àhraa. Mũa sã erã oparã ta àhraa. Mũare yũ iro dopa oparã árĩrãre ire werebu iiaa yũhũ: Cristo ïgu ñero tarirare ïadigu árĩgu, mũa mera umarogue Cristo mera ðaro árĩniguibu árĩgu ire mũare weregũra:

² Goãmũ yarã oveja iro dopa àhrima. Mũapu ovejare ïhadiburã iro dopa àhraa. Eropirã Goãmũ mũare ïgu apinirãre ïgu yarãre ðaro ïhadibuque mũa. Eropirã Goãmũ ïgu gamediro dopa ta ðaro sĩporãcũri mera erãre ïhadibuque. Eropirã erãre ïhadiburã "Niyerure wajatarãca," arĩ pepibircãque mũa.

³ Eropa ïhadiburã erãre pũriro mera dorebirabircãque. Eropirã ðaro iique mũa Jesu yarã mũare erã ïhacũboro dopa.

4 Mũa eropa iirã Cristo marire árĩpehrerãre ìhadibugũ ìgũ dujaricũ ìgũ mũare ðarire oburire oparãca. Iri mũa opaburi ne pehresome.

5 Erãre yũ dorero dopa ta mũa mamarã sã erãre mũa oparãre yũhrirã árĩque. Eropirã mũa Jesu yarã árĩpehrerã game yũhri árĩque.

“Ôatariagũ ãhraa,” arĩ pepirãre Goãmũ gamebeami. Gajirãre umupeorãpũre “Bu árĩrã ãhraa,” arĩ pepirãpũre ðaro mahi itamumi ìgũ, arĩ gojara ãhraa.

6 Eropirã Goãmũ turagupũre mũare dorecũ yũhrique. Eropirã mũa basi “Yũ ðagũ ãhraa,” arĩ pepibiricãque. Mũa eropa ðarire iicũ ìagũ Goãmũ ìgũ queoranũ árĩcũ masa ìhuro mũare “Ôarã ãhrima,” arĩ ìhmugũcumi.

7 Ìgũ mũare wũaro pepi ìhadibumi. Eropirã ìgũre guñaturarã, ne wũaro bũjawere guñaricũbiricãque mũapũ.

8 Mũare ìhaturigũ watĩ yee guagũ ìgũ ehma baro iro dopa ta ãhrimi. Mũare ñero iidoregũ goroweodiami. Eropirã pee masi árĩque.

9 Árĩpehrerogue sãre gajirã Jesu yarã eropa dihta teboricũma watĩ goroweodiari mera. Irire masirã ìgũre yũhribiricãque. Eropirã Cristore umupeorã turaro guñaturaque mũa.

10 Mũa i yeba árĩrisubu dihta watĩ ñero iidorediari mera teboricũrãca. Merogã ãhraa. Pũhrũ mũa Jesucristo pohro árĩrã, mũare ðarã turarã árĩcũ iigũcumi. Eropigũ mũa siñajarã ðaro árĩcũ iigũcumi mũare. Ìgũ Jesucristo iira mera árĩpehreriniũri umũsigue mũa ðaro árĩborore mũare apigũcumi. Ìgũ Goãmũ ãhrimi árĩpehrerãre mojomoro ìagũ.

11 Eropirã umũri nũcũ “Ìgũ turagũ ãhrimi,” arĩ umupeorã ìgũre. Eropa ta iirã.

Ôadoretũnumi Pedro

12 Ipũgãre miripũgãre yũ mũare gojabeocũ Silvanopũ yũre gojabasami. Silvano Jesu yagũ yũ acaweregũ Jesure duhubigũ ãhrimi yũ pepicũ. Mũare ðaro werediaa. Eropigũ “I buheri diaye ta Goãmũ mũare ìgũ mahiri buheri ãhraa,” arĩ weregũ mũare ipũre gojabeoa. Eropirã i buheri mera siporã turarã árĩque mũa.

13 Mũare ìgũ beyediro dopa ta Jesu yarã Babilonia majarã sãre beyedigũ árĩmi Goãmũ. Erã mũare ôadorema. Marco sã yũ magũ iro dopa árĩgũ sã mũare ôadoremĩ.

14 Mũa mera majarãre bocatĩrirã ðaro mera mojoto ñeaque.

Árĩpehrerã muare Jesucristo yarãre gua õadorea. Eropa
ta árĩque. Iripẽta ãhraa.

2 San Pedro

Jesu yarãre gojabeoñumi daja Pedro

¹ Yũhũ Simo Pedro Jesucristo ïgũ buhedore ïgũ apidigu ãhraa. Eropigũ ïgũ pohro majagũ ta ãhraa. Eropigũ mũare gojabeoa yũhũ. Goãmũ marire taudigũ Jesucristo mera marire árĩpehrerãre diaye iigũ ãhrimi. Eropa iigũ árĩgũ Cristore umupeocũ, ïgũ yarã wacũ iimi mũare. Eropa warã mũa sã gũa iro dopa ta ïgũ yarã ãhraa. Mari yujuro mera ïgũ yarã árĩrãre mũare gojabeoa.

² Eropirã Goãmũ sãre mari Opũ Jesucristo sãre masinemorã ïgũ mahiri mera õaro árĩrãca mũa. Eropa õaro mũa árĩboro dopa mũare serẽbasaa Goãmũre yũhũ. Eropa arĩgũ mũare õadoreaa.

Õpa ãhrima Cristo yarã, arĩ gojañumi Pedro

³⁻⁴ ïgũ yarã árĩmorãre Cristo marire aĩdigũ árĩmi. ïgũ eropa aĩcũ peerã, ïgũre yũhribũ mari. Eropa yũhrirã Jesucristo õagũ, õarirepa ta ïgũ yarã ãhraa. Mari yujuro mera ïgũ yarã árĩrã iimasigũ árĩro dopa ta mari sã ïgũ iro dopa ta árĩmasia. Eropa Goãmũre mari masinemorã, ïgũ turari mera ïgũ gamero dopa ta õarã árĩrãca. ïgũ ãhrimi ïgũ yarã árĩmorãre marire aĩdigũ. Õagũ õarire iimasipehogũ ïgũ árĩro dopa ta marire árĩpehrerãre aĩdigũ árĩmi. Eropa ta iri ïgũ turari mera marire õatariaro wahaũ. "Õpa ta mũare õaro iigũra," ïgũ arĩdiro dopa ta marire õatariaro iimi ïgũ. Marire ïgũ eropiicũ i yeba maja ñerire mari ãaribejarire mari duhucãa. Iri ñeripũ marire goroweotariaca. Eropirã ïgũre yũhrirã árĩrã Goãmũ ïgũ arĩdiro dopa dujarãca mari.

⁵ Eropirã Cristore umupeorã árĩtuhaa mũa. Eropirã ïgũ turarire oparã õpa iinemoque daja: Õarã árĩque mũa. Eropa õarã árĩrã õaro pee masirã árĩque mũa.

⁶ Eropa pee masirã árĩrã ñerire iidiaquererã ta Goãmũ ïgũ gameripũre iiniguicãrã árĩque. Eropa iirã Cristo yarã mũa árĩri dipuwaja gajirã mũare ñero iiquerecũ ta eropa yujuro bojeniguicãque mũa. Eropa yujuro bojerã Goãmũre umupeorã, ïgũ gamerire iirã árĩque mũa.

⁷ Eropa iirã mũa mera majarãre mahi umupeoque. Erãre õaro itamurã árĩque. Eropa iirã árĩpehrerã gajirã sãre mahi umupeoque.

⁸ Mũa eropa iinemocũpũre õataria. Mũa eropa iinemorã, õaro iirã árĩrãca. Eropirã mari Opũ Jesucristore õaro

guñaturarã ĩgu gamerire ðaro iiniguirã árĩrãca mũa. Bu árĩrire iisome.

⁹ Mũa eropa iinemobirã Goãmũ yare ne masibirigohraboya mũa. Eropirã Cristo mũa ñeri iirare ĩgu coerare ne guñabiriboya mũa. Eropa ta cãdijicãdiaboya mũa.

¹⁰ Eropirã yũ acawererã, Goãmũ yarã árĩmorãre mũare ĩgu árĩdorecũ yũhrinirã árĩbũ mũa. Eropa yũhrirã árĩrã, ĩgu yare guña duhudiabirã ĩgu gamerire turaro eropa iiniguicãque. Mũa eropa iirã diaye ta Goãmũ mera árĩrãca mũa. Eropirã diaye ta ĩgu beyenirã árĩrãca mũa. Eropirã ñerire iiniguirã árĩsome.

¹¹ Mũa eropa ĩgu gamero dopa ta iirã árĩrã mari Opũ marire taudigu Jesucristo ĩgu árĩroque ðaro warãca mũa. Diaye ta ĩgu yarã mũa árĩcũ ĩagu “Õaro mera yũ mera árĩque mũa,” arĩgũcumĩ Jesu mũare.

¹² Eropigu mũare ire eropa guñaniguicũ iigura. I mũare yũ wererare masituhabũ mũa. Eropa masirã Goãmũ yare mũa peediro dopa ta ðaro iirã iiaa mũa. Eropa iirã mũa árĩquerecũ ta i mũare yũ wererare eropa guñanemocũ werenemogũra.

¹³⁻¹⁴ “Merogã duhyaa mũ sĩriboro,” arĩ weremi yũre mari Opũ Jesucristo. Eropigu ojocarinigũ ire yũ mũare wererare eropa guñaniguicãcũ iiniguigũra. Yũ eropa iicũ ðapũrica.

¹⁵ Eropigu i yũ were gojara mũare gojapipehogũra yũ sĩrira pũhrũ mũa ðaro masiboro dopa. Eropirã i yũ wererare eropa guñaniguirãca mũa.

Cristo ĩgu turagu árĩricũre ĩabũ yũhũ, arĩ gojañumi Pedro

¹⁶ Eropirã mari Opũ Jesucristo ĩgu turari sãre, ĩgu dujariboro sãre mũare wererã, gũa gamero gũa arĩ bocarĩre wererã iibiribũ. Turagu ĩgu árĩrire gũa basi ta ĩabũ.

¹⁷ Cristo ĩgu turatariagu ĩgu árĩrire gũare ĩhmumi Goãmũ mari Pagũ. ĩgu eropa ĩhmucũ Cristo ðaro gosesiricũ ĩabũ. ĩgu eropa gosesiricũ ðpa arĩro caribũ: “Ihĩ yũ magũ yũ mahigu ãhrimi. ĩgu mera ðaro mucubiria,” arĩro caribũ gũa peecũ.

¹⁸ Hmarogue eropa arĩro caricũ peebũ gũa. Htãgu wecague Goãmũ yagu utãgu wecague Cristo mera ejarã eroparĩcũ peebũ gũa irire.

¹⁹ Irire ĩanirã árĩrã, Goãmũ yare weremũhtanirã iribojegu majarã erã gojara diaye árĩcũ ðaro masia gũa. Erã gojarare mũa ðaro buheniguirã ðaro iirã iica mũa. Iri erã gojara mũare sihãgodiru iro dopa ãhraa. Naitĩaroguere ðaro sihãgodiru mera mari ĩhamasiro dopa ta erã gojarapũ

marire Goãmũ yare õaro masicũ iiaa. Eropirã ãgũ yare eropa buheniguique ne ãgũ Jesucristo dujaricũgue. Jesucristo dujaricũ ãgũ yare masipehorãca mari pare.

20-21 Yũ werediro tauro ipãre õaro masique mũa: Iribojegue majarã õarã Goãmũ yare erã weremũhtarã erã guñabocarire wereniguibiriñuma. Espiritu Santopũ erã Goãmũ yare wereniguiburire erãre masicũ iĩnumi. Eropirã mari erã wereniguiuri gojarare buherã mari pepiri mera ãrãre buherã “Õpa arĩro iica,” arĩmasibirica. Espiritu Santo ãgũ itamuri mera mari masia.

2

Goãmũ yare diaye buhebirãre were gojañumi Pedro

¹ Iribojegue mari acawererã judio masa mera majarã gajirã “Goãmũ yare weremũhtarã ãhraa,” arĩ gũyamuriñuma. Erã iidiro dopa ta dohpague sãre mũa mera majarãre eropa ta arĩ gũyarã árĩrãcoma. Erã diaye Goãmũ yare buherã arĩ buheboro dopa ta gũyaripũre buherãcoma. Eropa buherã Cristo yapũre goroweorãcoma. Eropa iirã Cristo erã ya dipuwajare sãribasadigũre guñabirãcoma. Eropirã ãgũre “Gũa Opũ ãhrimi,” arĩ ne pepisome. Iri árĩpehrerire erã eropa iira dipuwajare mata Goãmũ erãre peamegue wadoregũcumi.

² Eropa erã gũya buhecũ peerã erã, erã ñerire ãaribejaro dopa ta bajarã masa erãre ãhacũ ñero iirãcoma. Erã ñero iicũ ãha gajirã Jesucristo yare diaye majare ñero wereniguirãcoma.

³ Eropirã erã gũyaricũrã niyerure waja gamerã gũyari buherire buherãcoma mũare. Eropa buhera dipuwaja Goãmũ erãre peamegue wadoregũcumi. Iribojegue ta eropa iinirãre dipuwaja moadoretuhañumi ãgũ.

⁴ Eropa ta iribojegue dipuwaja moadoreñumi ñerã anyua sãre. Erãre peamegue peresu iĩnumi. Eropa iigũ i ãmũ pehrerinũ árĩcũ erãre dipuwaja moagũcumi.

⁵ Eropa ta iribojegue majarãre Goãmũre gamebirinirãre dipuwaja moañumi ãgũ. Eropigũ árĩpehrero i yebare miugũ, árĩpehrerã ñerã masare miu wejẽpehocãñumi. Noé dihtare gajirã siete masa mera tauñumi. Noépũ irisuba majarãre Goãmũ yare õarire buhemũririñumi.

⁶ Eropa ta Sodoma waĩcũri maca majarãre Gomorra waĩcũri maca majarã sãre Goãmũ dipuwaja moañumi. Iri macarire pa iinirãre dipuwaja moadoretupeame mera õaro soepehocãñumi. Eropigũ pũhrũgue árĩmorãre ãgũre gamebirinirãre ãgũ dipuwaja moaborore ãhmugũ iĩnumi. Ñerãre ãgũ dipuwaja moaborore ãhmugũ iĩnumi “Gũiporo,” arĩgũ.

7 Eropigu Lote waicugure tauñumi. Lotepu òagu árĩñumi. Eropa árĩgu árĩgu Sodoma majarã Goãmu dorerire tarinugarã ñetariaro erã iicũ ñagu gariborea wañumi. Eropigu uma erã basi erã ñero iicũ ñagu gariboretaria wañumi ñgu.

8 Ñgu òagu ñerã watope árĩñumi. Eropigu umuri nucu ñetariaro erã iicũ ñagu ñero erã wereniguicũ peegu ñero siporãcũñumi.

9 Ñgure Goãmu taucũ ñarã ire masia mari. Goãmu mari Opu marire ñgure gamerãre mari ñerã watope árĩcũ marire taugucumi mari ñero iibiriboro dopa. Eropigu ñerãpũre erã ñero iira dipuwajacurã árĩcũ apigucumi. Pehrerinu árĩcũguere erãre dipuwaja moagucumi.

10 Ñerire turaro ñaribejarã Goãmu dorerire tarinugarã erã tamerare ñero dipuwaja moagucumi ñgu. Oã mua mera majarãre gũya buherã ñeri ñaribejarire iirã ne mari Opũre umupeobeama. "Gajirãre mari tarinugaa," arĩ pepirã àhrima erã. Eropa arĩrã erã deyobirãre umaro majarãre, ñerã turarãre ne gũibirã ñero arĩ wereyama erãre. Erãpũre tauro dipuwaja moagucumi Goãmu.

11 Goãmu yarã anyuapu ne erã iiro dopa iibeama. Erã tauro turarã àhrima. Eropa turarã árĩquererã ta erã ne wereyari mera umaro majarãre ñerã turarãre "Peamegue waporo," arĩ weresãbeama mari Opũre.

12 Erã gũya buherãpu nugũ majarã waimurã iro dopa pee masibirã àhrima. Erã gamero dopa ta iima erã. Eropirã erã masibirirare wereya ñero arĩ wereniguicorema. Eropa iirã erã árĩcũ waimurãre mari wejẽro dopa ta Goãmu erãre peamegue cóagucumi.

13 Eropigu erã ñero iira dipuwaja dipuwaja moagucumi Goãmu. Erã ñerire ñaribejataricãma. Eropirã ñerire ñero iiniguicãma. Mua mera bosenu iiquererã iri bosenu iri ñerire iidiana. Erã eropiirã gũhyasĩricũ iima erã querecurã árĩrã.

14 Eropirã nomere ñarã ñeadiama erã. Eropirã ñerire eropa iiniguidiama. Goãmu yare dabero masinugarãre ñerire iidorerã, eropa arĩrãre erã ñhacũcũ iima. Eropirã erã seyaro gajinore, niyeru sãre gũya emamehrerã àhrima. Eropirã erã Goãmu ñgu dipuwaja moamorã àhrima.

15 Erã diaye majare duhu Balaam ñgu iidiro dopa iirã iima. Balaam murũ Beor murũ magũ árĩñumi. Ñgu iribojegue ñgu ñeri iiri mera niyerure wajatadiariñumi.

16 Ñgu eropa iigu wacũ ñgu burropũ ñgure turiñumi. Ñgu burro wereniguimasibigu ñgu árĩquerecũ ta Goãmu ñgure

wereniguicũ iĩñumi. Īḡu eropa wereniguicũ peegu Balaam turaro Īḡu ñeri iidiarare duhucãñumi.

17 Erã ḡuyaricurã maũ dipague deco mariro iro dopa ãhrima. Deco mariri maũri dipari iri duhpiburi árĩbiriro dopa ta erã ḡuyaricurã ne duhpimorã árĩbeama. Eropirã imica cururi miruñe weãbeori cururi gohroto dopa ta erã ḡuyaricurã sã erã wereniguirire gohrotoniguima. Eropigu naitfarogue erã warore amutuhapũ Goãmu erogue erãre dipuwaja moabu.

18 Erã ḡuyaricurã erã wereniguirire duhpiburi gohra árĩbeaa. Masirã iro dopa masare eropa buhemaacãma. Ōpa arĩ buhema erã: “Mari gamero dopa ta mari iicũ õapũrica,” arĩ buherima erã. Erã eropa arĩ buhecũ masa peerã, erã ñaribejarire iidiarã erã ya buherire gahmema. Gajirã masa Goãmure ne umupeonugarã erã ḡuyaricurire peerã ãhrima. Erã ñerire erã duhura pũhrũgã erã ḡuyarire peenũgama daja. Eropa peerã Goãmu yapure erã peeborapure peebeama daja. Ñeripure gohrotoma daja Goãmu yarã árĩbonirã.

19 Erãre õpa arĩ buhema ḡuyarã: “Mari iidiaro dopa ta mari iimasia,” arĩrima erã. Erã eropa arĩ buhequerecũ ta erã arĩdiro dopa wabeaa erãre. Ōaripure iidiaquererã iimasibeama. Ñerire yoari boje duhudiabirã, pũhrũ irire duhudiaquererã duhumasibeama. Iri ñeri erãre dorea. Erã ñeri ñaribejari erãre dorea. Eropiro yujugure ñeripũ tarinũgacũ ĩḡupure ñerire duhumasiya mara.

20 Mari Opũ Jesucristore marire taugure ne masinugarã i yeba maja ñerire duhucãma. Erã eropa duhura pũhrũ dipaturi ñerire gohrotorã daja, ñero gohra dujaboñuma erã. Cristore erã masiboro core erã árĩmũhtadiro tauro ñetariaro dujama pare dipaturi ñerire gohrotorã daja.

21 Eropa ñero dujarã õari buheripure erã ne masinũgabiricũ õatariaboya erãre. Erã Goãmu dorerire masira pũhrũ irire cóãnirã ñetariaro dujarãcoma.

22 Eropirã dipaturi ñerire gohrotorã, masa nũcu erã õpa arĩ wereniguiddiro dopa ta iirã iima erã. “Diaye etocapi ĩḡu etocapirare dipaturi ĩḡu basi ta bahami daja. Eropigu yese ĩḡure guhbura pũhrũ dipaturi ĩḡu ñeri tarague oyami daja,” arĩ wereniguima masa. Eropa ta iima õarire ne gamenugarã dipaturi ñerire gohrotorã daja.

3

Cristo ĩḡu i yeba ĩḡu dujariborore were gojañumi Pedro

1 Yũ mahirã, mũare yujupũ gojabeotuhabũ. Eropigu ipũre daja dohpaguere mũare gojabeogũ iiaa. Eropigu

mũare pesubu gojabeogu i árĩpehrerire guñacũ iidiagu iiaa õari dihtare mua iiboro dopa.

² Irire guñaque mua: Iribojegue majarã õarã Goãmũ yare weremũhtanirã erã were gojarare guñaque. Eropirã mari Opũ marire taugũ Cristo ĩgu doreri sãre guñaque. Iri dorerire gua ĩgu apinirã mũare buheabũ.

³⁻⁴ Eropirã negohrare ire guñamũhtaque: Pehrerinũ coregãgue Goãmũ yare wereyarã árĩrãcoma. Erã ñerire ñaribejaniguirã árĩrãcoma. Ōpa arĩ wereyarãcoma: “ ‘Cristo dujarigũra,’ ĩgu arĩqueregu ne dujarisome. ¿Dujaridiaqueregu duhpigu ne deyobeari ĩgu? I yeba árĩnũgara pũhrũ mari ñecũ sumarã mura erã sĩrira pũhrũ árĩpehrero muraro ta árĩniguia. Eropigu i yebague dujaribu ne ñmaroguere marimi,” arĩ wereyarã árĩrãcoma.

⁵ Eropa arĩ wereyarã ipũre ne guñadiabeama erã: Iribojeguerẽ Goãmũ ĩgu dorediro mera i yebare ñmũsi sãre ĩhacũnugũumi. Eropa ĩhacũnugugũ deco mera i yebare iĩũumi. Eropigu i yeba deco mera árĩcũ iĩũumi.

⁶ ĩgu eropiira pũhrũ i yebare miũũumi. Miugũ i yeba maja dederephecũ iĩũumi.

⁷ Eropigu ĩgu ta ñmũsire, i yeba sãre dipaturi dederephecũ iigũcumĩ ĩgu. Peame mera dederecũ iigũcumĩ. Dohpaguere ĩgu ĩgu dorero mera i yebare ñmũsi sãre árĩniguicũ iimi dohpa. Eropigu coregu iimi pũhrũ árĩpeherrerore soebu. Eropa coregu iimi Goãmũ ĩgure gamebirãre dipuwaja moabu. Eropigu ĩgu beyerinũ árĩcũ soepohocãgũcumĩ. Irisubu erã ñerãre dedeogũcumĩ.

⁸ Yũ mahirã, ipũre guñaque mua: “Yoatariari boje ãhraa,” mari arĩ pepiquerecũ ta, mil bojori yujunũ iro dopa ta ãhraa Goãmũ ĩgu ĩacũpũre.

⁹ “Goãmũ ĩgu arĩdiro dopa ta ne yojaro mera iibeami,” arĩma masa. Eropa árĩbeaa. Masare õaro iidiagu corenigu iimi. Ne yujugũ masure peamegue cóãdiabeami ĩgu. Eropigu árĩpeherrerã erã ñeri iirire bujawerecũ, ñerire ii duhucũ corenimi ĩgu dohpa.

¹⁰ Ñamigue yajari bugu, ĩgu guñaña mariro yajagu ñajariro dopa ta Cristo i yebaguere guñaña mariro arigũcumĩ. ĩgu aricũ ñmũsi maja pehrea waroca turaro busuro mera. Ejupehrea waroca. I yeba maja sã ñjupehrea waroca.

¹¹ “I árĩpehneri pehrea waroca,” Goãmũ ĩgu eroparĩcũ peerã ñerire duhu, Goãmũ gameripũre iirã árĩro gahmea marire.

¹² Mari Opu i yebague ĩgu dujariborore mua corerã árĩrã vojaro mera ĩgu aricũ iique mua. Irinũre umusi maja ũjũpehrea waroca.

¹³ Eropa guhyaro watope adopa maripu Goãmu ĩgu arĩ apidiro dopa ta árĩpeherrerire ĩgu gohrotoburire cohre mucubiriyua mari. Árĩpehneri iri ũjũra pũhrũ opa árĩroca: Umusi i yeba sã gaji dihta árĩroca. Eropirã irisubuguere õari dihtare iirãcoma árĩpehnerã. Irire ta cohrea mari.

¹⁴ Eropirã yu mahirã, mari Opu ĩgu dujariborore corerã Goãmu ĩgu ĩarore ñeri marirã, ñerire iibirã árĩque mua. Eropirã Goãmure ĩadiabirã árĩbircãque mua. Eropirã Goãmũ mera õaro árĩque.

¹⁵ Eropirã yoañariri boje ĩgu deyobiricũ ĩarã opa masique mua. Masa erã ñerire bujawerecũ corenigũ iimi dohpa Goãmũ erãre tauborore. Eropa ta arĩ muare gojabeodigũ árĩmi mari mahigũ mari acaweregu Pablo. Goãmũ masiri mera irire gojabeodigũ árĩmi ĩgu.

¹⁶ Eropa dihta arĩ gojabeodi árĩmi Pablo ĩgu gojabeora nucũ. Cristo ĩgu dujariborore, ñerire iibirã mari árĩboro sãre weregu opa dihta arĩ gojabeodigũ árĩmi ĩgu. Yujuyerisuburi diasarire were gojabeodigũ árĩmi. Gajirã ne masibirã, pee masibirã guyarĩ mera ĩgu eropa arĩrare gohrotomũrima. Eropirã ĩgu eropa werera árĩquerecũ ta gajiropa arĩ gohroto werecãma erã. Goãmũ yare erã gojarapũgue gaji sãre eropa ta iima erã. Erã eropiicũ ĩagu Goãmũ erãre dipuwaja moagu peamegue cóãgucumi.

¹⁷ Yu acawererã, yu mahirã, i árĩpeherrerire i eropa waboro core weretuhabu muare. Eropirã ire masirã õaro iique mua. Ñerã muare erã gajiropa arĩ buhecũ, peeigu árĩmi. Gajirã ne masibirã, pee masibirã guyarĩ mera ĩgu eropa arĩrare gohrotomũrbircãque erãre Cristo yare duhuri arĩrã.

¹⁸ Eropa duhubirã mari Opure marire taudigũre Cristore õaro umupeonemoque mũaru. ĩgũre õaro masinemoque. Árĩpehnerinũri ĩgũre õaro umupeorã mari. "Õagu turagu ãhrimi," arĩrã mari ĩgũre. Eropa ta arĩrã. Iripẽta ãhraa.

1 San Juan

Ñu Jesucristore were gojara āhraa

¹ Dohpague ta gwa Jesucristo yare were gojarā iiaa mware. Mata negue ta árīdigu āhrimi ĩgu. ĩgu masare mari Pagu mera eropa árīniguicũ iigu āhrimi. ĩgure ĩabu gwa. ĩgu wereniguirire pee gwa ya cuiri mera ĩabu gwa ĩgure. Eropirā ĩgure ĩarā, gwa ya mojotori mera mohmeribu ĩgure.

² ĩgu masare mari Pagu mera árīniguicũ iibu árīgu ĩgu i yebague ĩgu dehyoami. ĩgu masa dehyoacũ gwa ĩabu ĩgure. Eropirā ĩgure werea gwa mware. ĩgu umuri nucu mari Pagu mera árīniguicādigu mari pohro erami. Eropirā ĩgure gwa ĩarare werea mware.

³ Mari Pagu mera gwa ōaro āhraa. ĩgu magu Jesucristo mera sāre gwa ōaro āhraa. Eropirā mua sã gwa mera, mari Pagu mera, ĩgu magu mera mua ōaro árīburire gwa mua sāre Jesucristore werea. Gwa ĩarare gwa peerare werea.

⁴ Irire ta gwa gojaa mua ōaro mucubiriburire.

Goãmũ mera ōaro árīburi āhraa

⁵ Dohpague ta Jesucristo wereniguirare werea gwa mware. Iri buherire Jesucristo guare buhecũ gwa peebu. Ōpa āhraa. Goãmũ ōagu dihta āhrimi. Ñeripu ne mara ĩgure. Irire werea mware.

⁶ Eropirā mari ñeri iirire iiniguirā, “Goãmũ mera ōaro árīcãa yuhũ,” arīquererā mari guyarā iiaa. Eropirā diaye majare iibea.

⁷ Eropirā mari Goãmũ iidiro dopa ta mari ōarire iiniguirā tamera, Goãmũ mera ōaro árīrā iiaa. Mari basi sã ōaro árīrā iiaa. Eropigu Jesucristo Goãmũ magu mari ñeri iirire árīpehrerire coegu āhrimi. ĩgu crusague sīrigu ĩgu dire coãmi. ĩgu eropiigu mari ñeri iirire coeniguicãmi.

⁸ Yujugu “Yu tamera ne ñerire iibea,” eropa arīgu ĩgu basi ta guyami. Eropigu diaye majare pepibeami.

⁹ Eropirā mari ñero iirare werero gahmea Goãmũre. Eropa wererā mari ñero iira puhru Goãmũre mari were-taripehocãcũ, ĩgu mari ñero iirare cãdijipehocãgucumi. ĩgu arīdiro dopa ta diaye ta iigu ōagu āhrimi. Eropigu daja mari ñeri árīpehreri sāre coeweagucumi.

¹⁰ “Árīpehrerā ñerire iirā āhrima,” arītuhajaru Goãmũ. Eropirā “Ne ñerire iibea yuru,” mari arīrā ōaro arībea

mari. Mari eropa arĩrã “Goãmũ gũyaricũgũ àhrimi,” arĩdiarã iiaa. Ōpa arĩrã ĩgũ ya buherire gamebirã àhraa.

2

Jesucristo marire itamumi, arĩ wereñumi Ñu

1-2 Yũ porã, mũa ñerire iibiriboro dopa ire gojagũ iiaa. Yujugũ ñero iirare iicũ Jesucristo itamumi marire mari Pagũ iri ñero iirare cãdijiboro dopa. Īgũ Jesucristo òagũ Pagũ pohro árĩgũ ĩgũ Pagũre òpa arĩ serẽbasacumi mari ñero iira pũhrũ: “Ihĩ ñero iira dipuwaja moabita ĩgũre,” arĩrã “Goãmũ gũyaricũgũ àhrimi,” arĩdiarã iiaa. Ōpa arĩrã ĩgũ ya buhe arĩcumi mari Pagũre. Eropigũ Jesucristo mari ñero iira dipuwaja wajayebasadi árĩmi. Mari ñero iira dihtare wajayebasabiridigũ árĩmi. Áripehrero majarãguere erã ñero iirare wajayebasadi árĩmi.

3 Maripũ Goãmũ dorerire iirã árĩrã “Goãmũre diaye ta masia yũhũ,” arĩ masia mari.

4 Yujugũ Goãmũ dorerire iibigũ, “Yũ sã Goãmũre diaye ta masia yũhũ,” arĩgũ gũyagũ àhrimi. Eropigũ Cristo yare masibeami. iiaa. Ōpa arĩrã ĩgũ ya buhe

5 Goãmũ dorerire iigũpũ ĩgũ Goãmũre òaro mahigũ àhrimi. Eropa árĩgũ ta “Yũhũ Goãmũ mera òaro árĩcãgũ àhraa,” arĩ masimi ĩgũ.

6 Mari “Goãmũ mera òaro àhraa,” arĩrã Jesucristo ĩgũ òaro árĩricũdiro dopa ta iiro gahmea.

Goãmũ doreriñe àhraa

7 Yũ acawererã, yũhũ mũare dohpaguere werebeoburi mama doreriñe árĩbeaa. I doreriñe mũa negohraguere Jesu buherire peerañe ta àhraa. Eropirã iriñe doreriñere peetuhajabũ mũa.

8 Iri doreriñe “Gajirãre mahi umupeoque,” arãa. Cristo iri doreriñere iigũ masare umupeomi. Eropiro dohpaguere iri doreriñe mũrañe doreriñe árĩquerero ta mama doreriñe sã àhraa. Dohpaguere mũa pee masibirirañe pehre wahgãro iiaa òaro. Jesucristo mũare pee masicũ iigũ eratuhajami. Eropirã mũa sã masare umupeorã iiaa.

9 Eropigũ yujugũ gajigũre ĩhaturigũ árĩgũ ñerire iigũ àhrimi. Īgũ ta “Yũhũ òarire iigũ àhraa,” arĩmasibeami ĩgũ gajigũre ĩhaturinijagũ.

10 Eropigũ yujugũ gajirãre mahi umupeogu tamera òarire iigũ òaro àhrimi. Eropigũ ñerire iibeami.

11 Gajirãre ĩhaturigũpũ ñerire iigũ àhrimi. Eropigũ ĩgũ òaro iiburire pee masibeami ĩgũ.

12 Yũ porã, Goãmũ mũa ñeri dipuwajare cãdijipehodi árimi Cristo ĩgũ sĩrirañe mera. Eropa mũa ñerire cãdijisũrã áricũ mũare wegũ árigũ ñerire iigũ áhrimi. ĩgũ ta “Yũhũ õarire iigũ áhraa,” arĩmasibre gojagũ iiaa.

13 Mũa pagũ sũmarã sã, mũa Cristore negohraguere áridigũre masirã áhraa pare. Mũa eropa masicũ mũa sãre were gojagũ iiaa. Mũa mamarã, mũa watĩre tarinũgabũ mũa. Mũa eropa tarinũgarã áricũ mũare were gojagũ iiaa.

Yũ porã, mũa mari Pagũre masia. Mũa eropa masirã áricũ were gojagũ iiaa.

14 Mũa pagũ sũmarã, mũa Cristore negohraguere áridigũre masia mũa. Mũa eropa masirã áricũ mũare were gojagũ iiaa. Mũa mamarã, mũa Goãmũ yare umupeoturã áhraa. Eropirã ĩgũ yare diaye majare iiaa. Goãmũ werenigũirire masia. Mũa eropiirã watĩre tarinũgabũ. Eropigũ mũare were gojagũ iiaa.

15 I yebare, i yeba majare gamebircãque. I yeba majare gamerã maripũ mari Pagũre gamebeaa mari.

16 I yeba maja áhraa: Masa erã ñerire ñaribejari, ñero ĩha iidari áhraa. Eropáricũ masa erã ya dihta guña mucubiriri áhraa. Iri Goãmũ mari Pagũ ya árĩbeaa. Iri árĩpehreri i yeba maja áhraa.

17 Eropirã i yeba majare iirã erã ñero iidari mera dederea wahama i yeba mera. Goãmũ yapũ pehresome. Eropirã Goãmũ yare iirãpũ Goãmũ mera árĩniguicãrãcoma.

Diaye maja árĩri, diaye maja árĩbiriri áhraa, arĩ gojañumi Ñũ

18 Yũ porã, i ãmũ pehrebro merogã dũhyaa. “Cristore ĩhaturidigũ gohra arigũcumi,” arĩ Jesu yarã mũare weretuhajama. Dohpaguere Cristore ĩhaturirã bajarã árituhajama. Eropirã dohpaguere i ãmũ pehreburiñũ merogã ero dũhyacũ mari masia.

19 Oã Cristore ĩhaturirãpũ mari mera árĩquererã mari yarã diaye árĩbeama. Eropirã marire cohã wiriama. Erã mari yarã árĩrã mari mera dujaboañuma. Eropirã marire cohã wiriama. Erã eropa wiriacũ mari mera majarã erã árĩbirirare masia mari.

20 Mũapũre Cristo Espĩritu Santore mũare otuhajadi árimi. Eropigũ Espĩpehreri i yeba maja áhraa. ĩritu Santo mũa mera áhrimi. ĩgũ árĩro mera mũa árĩpehreri diaye maja árĩrere masia.

21 Eropigũ yũ mũare weregũ, “Diaye maja árĩrere masibeaa mũa,” arĩbeaa yũhũ. Mũa diaye maja árĩrere masirã gũyacũ sãre masia. Eropigũ mũare werea yũhũ.

22 Ihĩ diaye majare masibigu āhrimi guyagupũ. “Jesu-cristo Goãmũ magũ árĩbeami,” arĩgupũ guyagu āhrimi. Īgu Cristore ĩhaturigu āhrimi ĩgu. Eropigu mari Pagure ĩgu magũ sãre “Erã diaye ta árĩbeama,” arĩgu Cristore ĩhaturigu ta āhrimi.

23 Ōpa āhraa: Jesure gamebigupũ mari Pagũ sãre game-beami. Jesure umupeogu mari Pagũ sãre umupeomi.

24 Negohraguere mũa Goãmũ yare peebe. Irire õaro guñaque. Irire guñarã Jesucristo mera õaro árĩrãca. Eropirã mari Pagũ mera sãre õaro árĩrãca.

25 Jesucristo marire weremi: Ōpa āhraa ĩgu werera: “Mũa umuri nũcu Goãmũ mera árĩrãca,” arĩ werepimi Jesu marire.

26 Gajirã mũare guyadiarima. Eropigu mũare were gojaa.

27 Mũapũre Cristo Espĩritu Santore otuhajami. Espĩritu Santo mũa mera árĩniguimi. Eropigu Espĩritu Santo mũa mera árĩgu diaye majare mũare masicũ iimi. Espĩritu Santo mũare buhecũ ĩha gajigu mũare buhegure amabeaa mũa. Árĩpehrerire diaye maja árĩrĩre buhemi mũare Espĩritu Santopũ. Gũyarire ne buhebeami ĩgu. Eropirã Espĩritu Santo ĩgu mũare buhediro dopa ta Jesucristo yare peerã ĩgu mera õaro árĩque.

28 Eropirã, yũ porã, Jesucristo mera majarã árĩque. Mũa eropiirã Cristo ĩgu dujaririnũ árĩcũ ne gũisome ĩgure. Eropirã ĩgu dujaririnũ árĩcũ mũa gũhyasĩriri mariro árĩrãca.

29 Cristo Goãmũ magũ ĩgu õari dihta iidigu árĩcũ mũa masia. Irire masirã iri sãre masia mũa. “Árĩpehrerã diaye maja õarire iirã Goãmũ porã ta āhrima,” arĩ masia mũa.

3

Mũa ta Goãmũ porã āhraa, arĩ werera āhraa

1 Goãmũ mahitaricãmi marire. Eropigu ĩgu marire “Mũa yũ porã ta āhraa,” arĩmi. Eropirã ĩgu porã ta āhraa mari. I yeba majarã ñerã Goãmũre masibeama. Eropirã erã mari sãre masibeama Goãmũ porã mari árĩcũ.

2 Yũ mahirã, dohpague Goãmũ porã āhraa mari. Pũhrũgue mari dohpa árĩburire mari õaro masibeaa dohpa. Cristo dehyoacũ daja diaye ta irire masirãca. Īgu árĩricũrĩre ĩha masirãca. Eropirã Cristo marire dehyoacũ daja ĩgu iro dopa ta mari gohroto árĩrãca. Eropirã ĩgu õagu iiro dopa ta iirãca pare. Irire masia mari.

3 Eropa masirã ñerire duhu Cristo ĩgu árĩro dopa ta õarire iidiaa dohpague sãre.

4 Árĩpehrerã ñerire iirã Goãmũ dorerire tarinũgarã àhrima. Ñero iiri Goãmũ dorerire tarinũgari àhraa.

5 Cristo márĩburire mari õaro masibeaa dohpa. Cristo dehyoacũ daja diaye ta irire masirãca. Īgũ árĩricũre ĩha masirãca. Eropirã Cristo marire dehyoacũ daja ĩgũ iro dopa ta mari gohroto árĩrãca. Eropirã ĩgũ õagũ iiro dopa ta iirãca pare. Irire ari masa ñerire cóãbu erami. Īgũpũre ñeri ne mara. Mũa irire masia.

6 Eropirã árĩpehrerã Cristo mera majarã árĩrã erã sã ñerire eropa iiniguicãbeama. Ñerire eropa iiniguicãrã Cristore ne masibeama. Eropa iirã Cristo yarã árĩbeama.

7 Yũ buherã, mũare gũyarãre peebericãque. Árĩpehrerã diaye majare iirã, Cristo iro dopa õarã àhrima.

8 Ñerire eropa iiniguicãgũ watĩ yagũ àhrimi. Watĩ tamera mata ñerire iinũgadigũ árĩñumi. Eropigũ Goãmũ magũ Jesucristo watĩ dorerire cóãgũ erami.

9 Eropirã Goãmũ porã ĩgũ árĩrire opama. Eropirã erã ñerire eropa iiniguicãbeama. Goãmũ erã Pagũ árĩcũ erãpũ ñerire iiniguicãmasibeama.

10 Õpa Goãmũ porã árĩrãre, watĩ porã árĩrã sãre masirãca. Watĩ porã Goãmũ porã iro dopa ta árĩbeama. Diaye maja árĩrire iibirã, gajirãre umupeobirã Goãmũ porã árĩbeama.

Mũa mera majarãre mahi umupeoque, arĩ werera àhraa

11 "Mari mera majarãre mahi umupeoro gahmea," ne arĩ buhecũ peeabũ mũa.

12 Eropirã mari Caĩn iribojegue majagũ ĩgũ ñero iidiro dopa ta ñerire iibiricãrã. Īgũ Caĩn watĩ yagũ árĩdi ĩgũ pagũ magũre wejẽcãñumi. Caĩn ñerire iimũriñumi. Īgũ pagũ magũpũ õarire iimũriñumi. Īgũ eropa õarire iira dipuwaja Caĩnpũ ĩgũre ĩhaturiñumi. Eropigũ ĩgũre wejẽcãñumi.

13 Eropirã i mũmũ majarã ñero iiricũrã mari õarire iicũ ĩha ĩhaturima marire. Eropirã "¿Duhpirã yãre ĩhaturiri erã?" arĩrire masirãca.

14 Negohrare mari Goãmũ yare iibirã árĩnirã mari dederebonirã árĩribũ. Dohpaguere pare Goãmũ yare iirã árĩrã ĩgũ mera árĩniguimorã àhraa. Eropirã ĩgũ itamuri mera Jesu yarãre mahi umupeorã àhraa. Eropa umupeorã árĩrã "Goãmũ yarã àhraa," arĩ masia mari. Masare mahibirã peamegue wamorã àhrima.

15 Eropirã erã erã mera majarãre ĩhaturirãpũ masare wejẽrã iro dopa ta iima Goãmũ ĩgũ ĩacũ. Masare wejẽrã umarogue árĩmorã árĩbeama. Irire õaro masia mũa.

16 Cristo ĩḡu sĭrirañere guñarã marire ĩḡu mahira gohrare masia. Cristo mari masare mahitarigũ mari dipuwajare aĩ mari Goãmũ mera árĭniguiborore sĭrimi. Mari sã gajirãre itamugũ sĭribu ta árĭquereḡu mari acawererãre mahi itamuro gahmea.

17 Yujugũ baja opagũ Jesucristo yagũre mojomorocũḡure ĩaquereḡu ta ĩḡure mojomoro ĩabigũ Goãmũre mahibeami ĩḡu.

18 Үһ porã, mari “Үһһһ masare umupeoa,” mari arĭ wererã erãre itamuro gahmea. Erãre itamubirã erãre mahi umupeobirã iiaa.

Gũiro mariro Goãmũ pohro árĭmasia mari

19 Eropa gajirãre mahi umupeorã, “Mari diaye ta Goãmũ yarã ãhraa,” arĭmasia.

20 Eropirã mari basi “Gajino yһ ñero iira dipuwaja árĭca yure,” arĭ pepiquererã ta Goãmũ mera õaro sĭporãcurã árĭmasia. Goãmũpũ árĭpehrerire masigũ õaro masimi mari sĭporãrire.

21 Eropirã mari “Ñeri dipuwaja marica yure,” arĭ pepirã õarire iirã Goãmũ mera mari gũiro mariro árĭmasia.

22 Goãmũ ĩḡu dorerire ĩḡu gamerire mari iicũ ĩḡure mari serẽri nũcure ogũcumi marire.

23 Õpa doremi ĩḡu marire: “Goãmũ magũ Jesucristore umupeoque. Eropirã mũa mera majarãre mahi umupeoque Cristo marire ĩḡu dorediro dopa ta,” arĭ doremi marire.

24 Goãmũ dorerire iirã Goãmũ mera õaro árĭcãa mari. ĩḡu Goãmũ sã mari mera õaro ãhrimi. Goãmũ ĩḡu Espĭritu Santore obeomi marire. Mari mera árĭḡu “Goãmũ yһ mera ãhrimi,” mari arĭ masiburire Espĭritu Santo marire masicũ iimi.

4

Goãmũ yarã gohrare masiro gahmea marire, arĭ werera ãhraa

1 Үһ mera majarã, dohpaguere i Һмуре bajarã ḡuyarã ãhrima, “Goãmũ yare wererã ãhraa,” arĭquererã. Eropirã gajirã mũa watopegue Goãmũ yare buherã aricũ õaro ĩaque erãre. “¿Erã buheri noa buheri ãhriri?” arĭ ĩaque. “¿Erã Goãmũ yarã ãhriri?” arĭ ĩaque.

2 Õpa masique erãre serẽpirã: “¿Jesucristo i yebague aridigũ diaye ta masũ gohra árĭyuri?” arĭ serẽpiñaque erãre. Mũa eroparĭcũ pee erã Goãmũ yarã árĭrã “Masũ ta árĭñumi Jesu,” arĭ yührirãcoma.

3 Erã Goãmũ yarã árĭbirãpũ “Jesucristo masũ gohra árĭbiriñumi,” arĭ yührirãcoma. Erã eropa arĭ yühricũ “Erã

ya pepiri Cristore ïhaturigũ ya dorero dopa ta ãhraa," arĩ masirãca mũa. "Cristore ïhaturigũ arigũcumĩ," peetuhajabũ mũa. Eropigũ ïgũ ya buheri i yebaguere árĩtuhajaa.

⁴ Yũ porã, Goãmũ yarã ãhraa mũapũ. Eropirã mũa Goãmũ yare were gũyarãre tarinũgatuhaabũ. Mũa mera árĩgũ Espĩritu Santopũ watĩ tauro ãhrimi. Watĩ i mũmũ majarã yagũ ãhrimi. Eropirã mũare gũyarãre tarinũga, erãre peebirabũ mũa.

⁵ Gũyarãpũ i mũmũ majarã ãhrima. Eropirã erã i mũmũ majare gũyarire buhecũ i mũmũ majarã dihta erãre peema.

⁶ Maripũ Goãmũ yarã ãhraa. Eropirã Goãmũre masirãpũ marire peema. Gajirãpũ Goãmũ yarã árĩbirãpũ marire peebeama. Eropirã õpa arĩ masia mari. "Erã Goãmũ yare peerã Goãmũ doreri diaye majare opama. Erã Goãmũ yare peebirãpũ watĩ doreri gũyari majare opama," arĩ masia mari.

Goãmũ árĩpehrerãre bũrigã mahiniguigũ ãhrimi, arĩ werera ãhraa

⁷ Yũ mahirã, mari gajirãre mahicũ Goãmũ iigũ ãhrimi. Ïgũ eropárĩcũ ïarã mari mera majarãre mahirã. Masare õaro mahirãpũ Goãmũ porã ãhrima. Eropirã erã Goãmũre õaro masima.

⁸ Masare árĩpehrerãre Goãmũ bũrigã mahiniguigũ ãhrimi. Ïgũ eropa mahiniguigũ árĩcũ masare mahibirãpũ Goãmũre masibeama.

⁹ Goãmũ marire ïgũ mahirare ïhmudi árĩmi ïgũ magũre obeogũ. Ïgũ magũre yujugũ ta árĩgũre marire taubu obeodi árĩmi i yebaguere. Eropa obeogũ marire ïgũ mahirire masicũ iidi árĩmi.

¹⁰ Ïgũ magũre obeora mahiri gohra ãhraa. Mari masa Goãmũre mahibiriquerecũ ïgũ Goãmũpũ marire bũrigã mahidi árĩmi. Eropigũ ïgũ magũre obeodi árĩmi mari ñerire cóãbure. Ïgũ magũre obeora iri ta ãhraa marire ïgũ mahiri gohra.

¹¹ Eropirã, yũ mahirã, Goãmũ bũrigã marire mahicũ ïarã mari sã mari mera majarãre mahirã.

¹² Masapũ ne mari Pagũre Goãmũre ïabeama. Ïgũre ïabirã mari árĩquerecũ ta mari mera majarãre mari mahicũ Goãmũpũ mari mera õaro eropa árĩniguicãmi. Eropigũ ïgũ mari mera árĩgũ marire gajirãre õaro mahinemocũ iimi.

¹³ Goãmũ marire ïgũ Espĩriture ohami. Eropirã ïgũ Espĩriture mari oparã "Goãmũ mari mera õaro ãhrimi," arĩ masia mari.

14 Mari Pagu İgu magure i yeba majaräre taubure İgu obeocũ gua İabu. Eropirã irire İanirã gajirãguere irire werea gua.

15 “Jesucristo Goãmũ magu ta ährimi,” arİgu İgu ta Goãmũ mera õaro árİgu iimi. Eropigu Goãmũ sã İgu mera õaro árİcãgu iimi.

16 Eropirã Goãmũ marire mahirire masia mari. Eropirã marire diaye ta mahİgu İgu árİcũ masia mari. Goãmũ masare árİpehreräre bürİgã mahiniguicãgu ährimi. Eropirã masare mahiniguirãpu Goãmũ mera õaro ährima. Goãmũ sã erã mera õaro ährimi.

17 I yeba árİdigu Cristo Goãmũre gajirã sãre İgu mahidiro dopa ta mari sã Goãmũre gajirã sãre mahia. Eropirã mari eropa mahirã mahinemoa, dipuwaja moarinu árİcũ mari güibiriboro dopa.

18 Eropirã mari Goãmũre mahirã güibeaa. “Goãmũ marire bürİgã mahimi,” arİ õaro masirã güisome pare. “Mata Goãmũ yũre dipuwaja moagucumi,” arİ pepirãpu güia mari. Mari eropa pepirã Goãmũ marire İgu mahirire õaro masibeaa.

19 Marire Goãmũ mahimũhtami. Eropirã mari sã İgũre mahia.

20 Yũjugu masu gajigũre İhaturİgu árİqueregu “Yu sã Goãmũre mahia,” arİgu guyagu ährimi. Gajigũre İhaturİgu Goãmũre mahibeami İgu. Gajigũre İgu masİgu árİqueregu ta mahibİgu Goãmũ sãre İgu ne İabİgũre mahimasibeami İgu.

21 Eropa ähraa marire Cristo İgu doreri: Goãmũre mahirã árİrã mũa pohro árİrã sãre mahi umupeoque.

5

Goãmũ porã árİrã Goãmũ dorerire iima, arİ werera ähraa

1 Árİpehrerã Jesupũre “Cristo ährimi. Goãmũ obeodigu ire bürİgã mahimi,” arİährimi,” arİrã Goãmũ porã ta ährima. Gajirã pagũre mahirã İgu porã sãre mahia mari. Eropa ta mari mari Pagũre Goãmũre mahirã, İgu porã sãre mahia.

2 Eropirã Goãmũ porãre mari mahirire mari õpa masirãca: Goãmũre mahi, İgu dorerire õaro ii, İgu porã sãre mari mahirã iiaa.

3-4 İgu dorerire õaro iirã Goãmũre mahirã iiaa mari. Marire Goãmũ İgu dorerire iicũ teboricũsũya mara. Eropirã mari árİpehrerã Goãmũ porã árİrã, i mũa maja ñerire eropa iiniguicãsome. Goãmũre umupeorã ne ñerire gamebeaa. Eropirã İgũre mari umupeora puhru ñerire iidibeaa.

⁵ Ñerire gamebirã õpa arĩrã ãhraa mari Jesucristore. “Jesu Goãmũ magũ ta ãhrimi,” arĩ umupeorã ta ãhraa. Eropa arĩrã árĩrã ñerire gamebirã ãhraa mari.

Goãmũ magũ árĩricurire werera ãhraa

⁶ Jesucristo i yebague erami. I yebaguere árĩgũ deco mera waĩyesũmi. Deco dihta árĩbeaa. Pũhrũ sĩrigũ ãgũ di cóãmi. Eropirã Jesucristore ãgũ deco mera waĩyecũ ãha ãgũ ya di cóãcũ ãha “Ãgũ Goãmũ magũ ta ãhrimi,” arĩ masia mari. Jesucristo árĩricurire diaye ta marire árĩpehrerãre masicũ iimi Espĩritu Santo. Espĩritu Santo diaye majare marire masicũ iimi.

⁷⁻⁸ ðmarogue sãre irire “Jesucristo Goãmũ magũ ta ãhrimi,” arĩ wererã werrerã ãhrima. Mari Pagũ, ãgũ magũ, Espĩritu Santo erã ta ãhrima. Erã werrerã ta ãhrima. Eropirã yujugũ iro dopa ta ãhrima. I yebague sãre “Jesucristo Goãmũ magũ ãhrimi,” arĩ masisũa. ãgũ magũ ãgũ árĩricurire Espĩritu Santo marire masicũ iimi. Eropi Jesure deco mera ãgũ waĩyerare masirã “Ãgũ Goãmũ magũ ãhrimi,” arĩ mari masia. Eropirã mari árĩburire Jesu sĩrigũ ãgũ di cóãrañere ãha masirã “Goãmũ magũ ta ãhrimi,” arĩ masia mari. Iri mera marire masiro gahmea.

⁹ Mari masa dihta wereniguicũ mari peea. Eropirã marire Goãmũpũ ãgũ magũ árĩricurire wereniguicũ õaro peero gahmea.

¹⁰ Eropirã Goãmũ magũre umupeorã ãgũ Jesure were buherire õaro peema. “Diaye ta ãhraa,” arĩ pepima erã Jesu yare buherire. Goãmũ ãgũ magũ yare “Diaye árĩbeaa,” arĩ pepirãpũ “Goãmũ gũyagũ ãhrimi,” arĩrã ãhrima erã. Goãmũ ãgũ magũre arĩ wererire peebirã ãhrima.

¹¹ Goãmũ marire wũmũri nũcũ ãgũ mera mari árĩniguicũ iigũcumĩ. Goãmũ magũre gamerã árĩrã mari árĩcũ ãgũ mera eropa árĩniguicũ iigũcumĩ marire. I ãhraa Goãmũ magũre ãgũ wereri.

¹² Eropirã Goãmũ magũre umupeorã Goãmũ mera árĩniguicãrãca. Eropirã gajirã ãgũre gamebirãpũ ãgũ mera árĩsome.

Weretu ãgũ gojara ãhraa

¹³ Mũa Goãmũ magũre umupeorã ãgũre peerã mũa Goãmũ mera eropa árĩniguicãrãca. Mũa Goãmũ mera árĩburire õaro masicũ mũare were gojagũ iiaa.

¹⁴ Mari, mari dohpa árĩrĩre Goãmũre serẽrã ãgũ gamediro dopa ta mari serẽcũ ãgũ marire õaro peenũrugũcumĩ. Eropa mari serẽrã, “Diaye ta õaro peemi ãgũ,” arĩ masia mari.

15 Īgure mari eropa serēcũ ĩgũ marire peemi. Īgũ pee mari serēropẽ ta ogũcumi. Īgũ eropa peecũ masirã ĩgure mari serēropẽ ta ĩgũ obu árĩcũ sãre masia mari.

16 Mari mera majagũ gajigũ Jesucristore umupeogũ ñerire ĩgũ iigũ árĩcũ ĩha ĩgure Goãmure serēbasaro gahmea. Eropa serēcũ Goãmũ ĩgure taugũcumi ĩgũ dedereborañere. Gaji ñero iiri ãhraa. Iri ñero iirire gajigũ ĩgũ iigũ árĩcũ ĩha Goãmũ ĩgure dedereburiñere taubeami. Eropigũ mũ acaweregũ iri ñerire iicũ Goãmũ taubiriburire iicũ “Īgure Goãmure serēbasaque,” arĩbeaa yũhũ mũare.

17 Árĩpehreri ñero iiri ñetariari ãhraa Goãmũ ĩgũ ĩacũ. Eropa árĩquerecũ gaji ñeri iiri peamegue wacũ iibeaa mašare.

18 Goãmũ magũ Jesucristo Goãmũ porãre õaro cãhmotami. Eropigũ watĩpũ Goãmũ porãre ñero iirire doremasibeami. Eropirã Jesucristo cãhmotari mera Goãmũ porã ne ñero iirire eropa iiniguicãbeama. Irire mari masia.

19 Mari Goãmũ porã ãhraa. Watĩ i mũmũ majarã opu ãhrimi. Iri sãre masia mari.

20 Goãmũ magũ i yebague aridi Goãmure õaro masicũ iimi ĩgũ marire. Eropirã Goãmure “Diaye ta ãhrimi,” arĩ masia mari. Eropirã Goãmũ magũ Jesucristo yarã ãhraa mari. Eropirã Goãmũ mera mari õaro árĩniguicãrã iiaa. Ihĩ diaye ta Goãmũ gohra ta ãhrimi. Eropirã ĩgũ mera árĩniguicãrãca.

21 Yũ buherã, goãmarã wéanirãre “Goãmũ ãhrimi,” arĩ umupeobiricãque. Goãmũ dihtare umupeoque. Iripẽta ãhraa.

2 San Juan

Gajirãre were gojañumi Ñu. Jesu yare, diaye mahiri sãre wereñumi

¹⁻² Yũhu buçu mure Goãmũ beyedigore mũ porã sãre ipũre gojabeoa. Jesucristo yare diaye majare opaa mari. Iri mari mera árĩniguicãroca. Eropigũ diaye ta mahia yũhu mũare. Yũ dihta mahibea mũare. Gajirã Jesu yare masirã sã diaye ta mũare mahima.

³ Goãmũ mari Pagũ, Jesucristo ïgũ magũ mera diaye ïgũ mahiri mera marire õaro iigũcumi. Eropigũ marire mojomoro ïagũcumi. Eropigũ marire õaro árĩcũ iigũcumi ïgũ.

⁴ Mari Pagũ marire ïgũ dorediro dopa ta mũ porã yujurãyeri ïgũ yare õaro yũhrirã árĩcũ peebũ. Eropa peegu mucubiriabu.

⁵ Eropigũ, acawerego, mari mera majarãre mahi umupeodorea marire. Yũ doreri mama doreriñe árĩbeaa. Iri doreriñe marire mata árĩtuhaya.

⁶ Eropirã Goãmũ dorerire iipehorã mari ïgũre mahia. Eropiro iri doreriñe ãhraa mũa negohrare peerañe. Gajirãre eropa mahiniguicãrã árĩque.

Bajarã gũyaricũrã árĩrãcoma, arĩ werera ãhraa

⁷ Bajarã gũyarã i mũmũ majarãre buherã wahama. "Jesucristo i yebaguere aridigũ masũ dupũ gohra árĩgũ aribiriñumi," arĩma. Erã gũyarã Cristore ïhaturigũ iro dopa ta iima.

⁸ Eropirã õaro pee masique mũa. Mũare gũyarãre peebiricãque Goãmũ mũare ïgũ õaro iiburire cóari arĩrã. Erãre peebiricũ Goãmũ mũa õari iira waja obeogũcumi mũare.

⁹ Árĩpehrerã Jesucristo buherire peenirã irire cóarã Goãmũ yarã árĩbeama pare. Jesucristo buherire õaro peenũrũrãpũ Goãmũ mari Pagũ yarã ãhrima. Goãmũ magũ Jesucristo yarã sã ãhrima.

¹⁰ Eropirã mũa yujugũ Jesucristo ya buherire gamebigũ gaji buherire buhegũ mũa pohro eracũ ïgũre game bocatĩribiricãque. Mũa ya wirigue ñajadorebiricãque.

¹¹ Gaji buherire buhegũ Jesucristo yare umupeobigũ ñero iigũ ãhrimi. Eropirã mũa ïgũre bocatĩri serẽrã ñero iidigũre itamurã iiaa. Eropirã ïgũre bocatĩri serẽbiricãque.

Were gojatura ãhraa

¹² Baja yũhũ mũare werediaqueregu ta irire paperapũgue gojabeodiabirica. Yũ basi ta mũare ãagũ wadiaca. Mũare ãagũ weretamugũca mari õaro mucubiriburire.

¹³ Mũ pagũ mago Goãmũ beyedigo igo porãpũ mũare õadorema. Iripẽta ãhraa.

3 San Juan

Gaji carta gojañumi daja Ñu. Gayo ïgu ðaro iirare wereñumi

¹ Yuhũ bugu mure Gayore diaye ta yũ mahigure ipũre gojabeoa.

² Yũ mahigu, mũhũ Goãmure ðaro umupeocũ masia yuhũ. Mũhũ Goãmũ mera ðaro árĩro dopa ta mũ dũpũ sã ðaro árĩcũ serēbasaa yuhũ Goãmure.

³ Gajirã Jesucristo yarã yũ pohro erarã mũ árĩricũre yũre wereama. Cristo gamerire diaye mũ iirare wereama erã yũre. Erã eropa werecũ peegu bũrigã mucubiriabũ yuhũ.

⁴ Jesucristo yarã yũ buhenirã Jesucristo yare diaye ta árĩre erã iicũ pee bũrigã mucubiria yuhũ.

⁵ Yũ mahigu, mũhũ Jesucristo yarãre itamugu ðaro iiaa mũhũ. Jesucristo yarã mũ ïha masibirã sãre itamugu ðatarario iiaa.

⁶ Erãpũ erãre mũ umupeorare wereama guare Jesucristo yarã gamenererogue. Eropigu Goãmũ yare buhe curirãre mũ pohrogue erarã erã gajipũ wacũ itamuque erãre. Mũ eropa iigu ðaro iigu árĩgũca mũhũ. Eropa ta marire itamuro gahmea Goãmũ yare buherãre.

⁷ Erã Jesucristo ya árĩburire buhe curirã warã, Jesucristo umupeobirãpũre erã itamurire ne serēbeama.

⁸ Eropirã marire Jesucristo yare buhe curirãre itamuro gahmea. Erãre eropa itamurã erã iiro dopa ta mari sã Goãmũ yare buherire itamurã iiaa.

Diotrefe ïgu ñero iira ãhraa

⁹ Eoãmũ yare buhe curirãre mũ pohrogue erarã erã gajipũ wacũ itamuque erãre. Mũ eropa ro majarãre Jesucristo yarãre yũ gojarapũre gojabeorabũ. Diotrefepũ ïgu basi erã opũ árĩdiagũ yũ wererare peediabiripũ.

¹⁰ Eropigu mũa pohro yũ ejara pũhrũ ïgu iirare werepehogũra. Guare ñero wereniguipũ. Eropigu Jesucristo yare buhe curirãre bocatĩribiripũ. Gajirã ero árĩrã erãre bocatĩridiacũ gamebiripũ. Gajirãpũ erã buhe curirãre bocatĩricũ ïha ïgu Diotrefe erã bocatĩrira waja erãre cohã wiupũ Jesucristo yarã gamenereri wihigue.

¹¹ Yũ mahirã, ñero iirãre ïhacũbircãque. Õaro iirãre ïhacũque. Õarire iirã Goãmũ yarã ãhrima. Ñerire iirã Goãmũre masibeama.

Demetrio ĩgũ õari iira ãhraa

¹² Árípehrerã “Demetrio õagũ ãhrimi,” arĩma. Eropirã ĩgũ iirire ĩarã õaro ĩgũ iira árĩcũ masima masa. Gũa sã ĩgũ õaro iirare eropa ta werea. Gũa wereniguiripũ diaye árĩcũ masia mũa.

Ñu weretura ãhraa

¹³ Mũare baja werediarabũ. Irire gojasome.

¹⁴ Merogã pũhrũ mũare ĩagũ wadiaca. Eropirã mari basi weretamurãca.

¹⁵ Õaro árĩque mũhũ. Mari mera majarã Jesucristo yarã mũre õadorema. Ero majarã mari mera majarã sã õaporo. Iripẽta ãhraa.

San Judas

Juda Jesu yarãre gojabeoñumi

¹ Yuhũ Juda Santiago pagũ magũ Jesucristo pohro majagu mũare Jesu yarãre ipũre gojabeoa. Mũare mari Pagũ Goãmũ ĩgu beyenirã ãhraa. Eropirã ĩgu mahiri mera õaro ãhraa mũa. Eropigu mũare Jesucristo ĩhadibumi mũa ñerire iibiriborore.

² Oadorea mũare. Goãmũ itamuro mera õaro árĩque mũa. Eropigu Goãmũre mojomoro ĩhadore, mũare mahidoregu serẽbasaa yuhũ Goãmũre. Mũa gajirã mera õaro ãhri erãre mahiborore serẽbasaa Goãmũre.

Gũyarã erã buherire werenũgañumi Juda

³ Goãmũ marire peamegue wabonirãre ĩgu itamuripũre turaro gojabeodiarabũ mũare, yũ mahirãre. Eropa gojadiaqueregu ta dohpaguere gũyari buherire gamedorebigũ mũare gojabeoa. Gajirã mũa pohro ejanirã erã gũyari buherire mũa peebiriboro dopa mũare gojabeoa dohpaguere. Eropirã Jesucristo ya buheripũre buhe tarinũgaque. I buheripũre peerã, mari Goãmũre õaro umupeoa. I buheripũ Jesu ĩgu apinirã ĩgu yarãre erã buhera eropa árĩniguicãro iiaa gohroto mariro.

⁴ Bajamerãgã masa ñerã ĩha masiya marirã mũa pohro ejanirã árĩma. Mũa mera árĩrã erã buherire buhe gũyama gũare ĩha masiri arĩrã. Opa arĩ buhema: "Goãmũ yarã mũa árĩcũ, ĩgu mahimi mũare. Eropigu nome mera mũa ñero iicũ ĩgu mũare ne dipuwaja moasome," arĩ buherima erã. Eropirã mari Opũre yujugu ta árĩgũre Jesucristore "Goãmũ magũ árĩbeamĩ," arĩ buherima erã. Eropa arĩ buherãre Goãmũ ĩgu dipuwaja moaborore wereñumi iribojeguere ĩgu yare erã gojarapũgue.

⁵ Dohpaguere gajire guñacũ iidiaa mũare. Ire mũa masiquerecũ ta dipaturi mũare ire guñacũ iidiaa. Goãmũ ĩgu yarãre Egipto árĩnirãre ĩgu wiura pũhrũ erã mera majarã ĩgũre umupeobirininãre Goãmũ wejẽñumi.

⁶ Eropirã mũa gajirã sãre guñaque. Gajirã anyuapũ Goãmũ doreri iinirã, pũhrũ iidiabiriñuma. Eropirã erã ĩgu árĩdore apidiro sãre erã árĩdiabiriñuma. Eropirã erã árĩdirore cóacãñuma erã. Erã eropa cóacũ ĩagu Goãmũ erãre naitĩarogue erãre peresu iĩñumi. Eropirã erã pehrerinũ core comedare dirinirã iro dopa

árīniguicārācoma. Eropigu pehrerinu árīcũ dipuwaja moagucumi Goãmu erāre.

⁷ Eropa ta ñero iĩnuma gajirã sã. Erã sãre guñaque mua. Erã Sodoma waĩcũri maca majarã, Gomorra waĩcũri maca majarã iri macari pohro árĩri macari majarã sã nome mera ñero iimuriĩnuma. Eropirã gajiropa árĩri sãre iĩnuma. Erã umapu erã basi ta erã dupu mera ñero iĩnuma. Nome sã eropa ta iĩnuma erã seyaro. Erã eropa iira dipuwaja Goãmu erāre soepehocãnumi. Erāre soegu Goãmu árĩpehrerã ĩgure tarinugarāre ĩgu dipuwaja moaburire ĩhmuġu iĩnumi. Erāre ĩgu dipuwaja moari peame ne yarisome.

⁸ Erã Goãmure tarinuganirã iidiro dopa dohpague sã eropa ta iiniguicāma ġuyarire buherã. Erã pee masibirã iro dopa ta erã dupu mera ñero iima. Eropirã mari Opu dorerire gamebeama erã. Eropirã deyobirāre, umaro oparāre, turarāre erāpu ñero werenigui corema.

⁹ Ōagu anyua opu Migue waĩcũgu ĩgu turagu árĩqueregu ta watĩpũre ñero werenigui corebiripu. ĩgu Moise dupu murarore gamegu, watĩ mera game dũyasopu. Turagu árĩqueregu ta ĩgu watĩ tauro “Yu tamera turaa,” arĩ pepibiripu. Eropigu ĩgu gamero watĩre “Peamegue waporo,” arĩ weresābiripu Goãmure. Eropigu ōpa arĩpu watĩre. “Goãmugue mũre turiporo,” arĩpu Migue watĩre.

¹⁰ Oã ġuyarāpu erã masibirare ñero werenigui corema. Eropirã waimurã pee masibirã erã gamero ñero iiro dopa ta erã ġuyari wererāpu eropa iimaacāma. Eropa iirã árĩrã peamegue warācoma.

¹¹ Erã ta ñero tarirācoma. Caĩn iribojegue majagu iidiro dopa ta ñero iima erã. Eropirã Balam sã ĩgu iidiro dopa ta erã niyerure mahi, aĩdiarã ġuyarire buhema. Eropirã niyeru aĩri dihtare pepima erã. Eropirã iribojegue majagu Coré waĩcũgu ĩgu opu Moisere ĩgu cóãdorediagu ĩgu iidorediro dopa ta erã sã Jesure eropa ta cóãdorediam. Eropirã ĩgu iidiro dopa ta erã sã peamegue warācoma.

¹² Erã mũare ġuya wererāpu mua game mahi ii ĩhmuburi bosenuire barã, umupeori mariro erã erã gamero bira, erã seyaro ta barire bapehocāma gajirāre oro mariro. Eropirã ñerire iirã erã mua bosenuire ōarinuri wobañere goroweoma. Deco mariri imica cururi iri mari otera itamubiro dopa ta erã ġuyarire buherã ne mũare itamubeama. Eropiro iri imica cururi miruñe weãcũ eropa gohrotoniguiro dopa ta erã ġuyarã sã erã wereniguirire gohrotoniguicāma. Yucu ducacubiriri yucu duhpiburi árĩbiro dopa erã duhpimorã árĩbeama. Erã buheri mera

gajirāre Goāmure umupeocū iibeama. Yucugū dūca maricū īha mari duha peamegue soe cóācāa irigure. Eropa ta Goāmū erāre gūyarāre peamegue cóāgucumi.

13 Pāgūri pumarare pamujupira iro dopa erā űerire guhyasīurire wereniguima. Necāmū yuridija īgū pehrero dopa ta erā sā pehrea warācoma. Erā eropa űero iira dipuwaja dederea warācoma. Goāmū erāre dipuwaja moacū naitīarogue árīniguicārācoma.

14-15 Enoco iribojegue majagū Adán pūhrū siete cururi pūhrū majagū ōpa arīmariñumi. “Peeque yure. Goāmū bajarā īgū anyua ōarā mera árīpehrerā űerāre erā űerire iira dipuwaja moagū arigucumi. Eropigū árīpehrerā Goāmure īhaturirāre erā űeri iira dipuwajare erāre masicū iigū arigucumi Goāmū. Eropigū Goāmure erā űero wereniguira dipuwaja sāre erāre masicū iigū arigucumi,” arīmariñumi Enoco mūru.

16 Erā gūyarā gajirāre dūyaso űero werenigui corerā, erā űero űaribejari dihtare iirā āhrima erā. Eropirā “Gajirāre masitarinūgaa gūa,” arīrima erā. Eropirā erā gamero dopa iidiarā gajinore emadiarā, peemaja ōaro wereniguima māsure.

Jesu yarāre werenemoñumi Juda

17 Mari Opū Jesucristo buhedore īgū apinirā erā buherare guñaque mūapū, yū mahirā.

18 Ōpa arīma erā mūare. “I yeba pehrebro coregā Goāmure űero arī wereyarā árīrācoma. Eropirā erā Goāmure gamebirā, űerire erā űaribejarire iirācoma erā,” arī werema Jesu īgū apinirā mūare.

19 Jesu yarāre erā basi erā game īhaturicū iima erā gūya wererāpū. Eropirā űerā erā űeri űaribejarire iirā árīrā, Espíritu Santore ne opabeama erā.

20 Mūapū yū mahirā, Jesucristo ya buherire ōaro peenemoque guñaturarā mūa árīboro dopa. Iri buheripū ōataria. Espíritu Santo itamuri mera Goāmū mera wereniguique mūa.

21 Goāmū mūare būrigā mahimi. Eropirā īgū mūare mahiniguiboro dopa űeri mariro árīniguicāque Goāmū īgū dorero dopa. Eropirā Jesucristo mera mūa eropa árīniguiburire coreque. Īgū marire mojomoro īagū űmaroguere eropa árīniguicū iigucumi.

22 Cristo yare peediabiriñarīre mojomoro īaque. Eropirā erāre Jesucristo ya diaye árīrire wereque.

23 Erāre peamegue wabonirāre Goāmure itamucū iique mūa. Gajirā űerire iirā wahama. Erā űerire dooque. Erāpūre mojomoro īaque mūa. Erāre itamurā mūa sā ōaro

iique erã ñeri iirire ñhacũri arĩrã. Gũhraricũri suhrirore mũa gamebiro dopa ta, gajirã erã ñeri iirire gamebircãque iirire pẽhreri arĩrã.

Juda Goãmũre ĩgũ umupeori ãhrũ ɯmarogueere eropa árĩnguicaa

²⁴⁻²⁵ Goãmũ mari Opũ marire ñhadibumasimi ñerire mari iibiriboro dopa. Eropigũ ĩgũ marire ñeri dipuwaja marirãre ɯmarogue ĩgũ pohroque apimasimi. Eropa marire ĩgũ erogque apicũ mari mucubirirãca. ĩgũ Goãmũ yujugũ ta ãhrimi. Eropigũ peamegue wabonirãre taugũ ãhrimi ĩgũ. ĩgũpũ iribojegue dohpague sãre õatariagũ, mari tauro opũ árĩgũ, turatariagũ, árĩpẽhrerãre doregũ ãhrimi. ĩgũ eropa árĩgũ árĩcũ Jesucristo yarã árĩrã ĩgũre umupeorã. Eropa ta iirã. Iripẽta ãhraa.

Apocalipsis

Puhrugueru I utu dohpa waborore marire masicũ iimi Jesucristo, arĩ gojañumi Ñu

¹ Ipũ mera Jesucristo ĩgu yarãre masicũ iirare were gojabeogu iiaa. Mari Pagu Goãmuru irire weredoregu apĩru Jesucristore. ĩgu yarãre ĩgu pohro majarãre masicũ iidoregu apĩru. Eropigu puhrũ waburire marire masicũ iidoregu apĩru Jesucristore. Eropigu Jesucristo marire eropa masicũ iibu ĩgu anyure obeodigu árĩmi yare Ñure irire weredoregu.

² Eropigu yuhu Ñu baja ĩamũtabu Goãmu ĩgu dohpa iiburire. Goãmu ĩgu wereniguiiri sãre peeabu. Eropigu árĩpehreri yu ĩarare yu peerare were gojabeogu iiaa. Jesucristo ĩgu basi ta diaye arĩrare were gojabeogu iiaa.

³ Ipũ mera puhrugue dohpa waburire were gojagu iiaa. Merogã duhyaro iiaa iri árĩpehrero eropa waboro. Eropirã árĩpehrerã ipũre buherã, yu wererire õaro yuhrirã õaro mucubirirã árĩrãcoma.

Siete iglesia majarãre Jesu yarã gamenererãre gojabeopu Ñu

⁴ Yuhu Ñu mũare siete cururi majarãre Jesu yarãre Asia yeba majarãre gojabeoa. Goãmu ĩgu mahiri mera mũare õadorea. Eropirã ĩgu itamuri mera õaro árĩque mua. ĩgu negohraguere eropa árĩniguidigu árĩñumi. Dohpague sãre eropa ta árĩniguiimi. Puhrugue sãre eropa ta árĩniguiigucumi. Goãmu ĩgu opu doaro core Espĩritu Santo ãhrimi. Siete suburi maja turari árĩpehreri opagu ãhrimi. ĩgu mera sãre yu mũare õadorea daja.

⁵ Cristo ĩgu mahiri mera mũare õadorea daja. ĩgu Cristo Goãmu yare guyarõ mariro weregu ãhrimi. Eropigu ĩgu sĩridigu ĩgu masa mũriadigu ne dipaturi sĩrisome ĩgu. ĩgu yarã waborore masa mũriamũhtadigu ãhrimi. Eropigu i yeba majarã árĩpehrerã oparã tauro opu ãhrimi ĩgu. Marire mahigu ĩgu di cóãra mera mari ñeri iirare cóãdi árĩmi ĩgu.

⁶ Eropa cóãgu marire oparã wamorãre wacũ iidigu árĩmi ĩgu. Eropigu marire pahia masare Goãmure serẽbasarã wamorã sãre wacũ iidigu árĩmi. Eropigu Goãmu mari Pagu yare iimorãre wacũ iidigu árĩmi ĩgu eropa sĩrigu. ĩgu eropa iidigure õaro werenigui umupeoro gahmea árĩpehrerinuri.

Árīpehrerā tauro opu eropa árīniguimi ĭgu. Eropā ta árīporo.

⁷ Ōaro pee masi coreque m̄ua. Imica cururi weca dijarigucumi Cristo. ĭgu eropa aricū ĩarācoma árīpehrerā. ĭgure crusague pabia wejēnirā m̄ura sã ĩarācoma. Eropirā ĭgu aricū ĩarā i yeba majarā árīpehreri cururi majarā orerācoma güirā. Eropā ta árīporo.

⁸ Ōpa arīmi mari Opu Goām̄u: “Yuh̄u árīpehrerire ĩhacūnugudigu āhraa. Eropigu árīpehrerire pehrecū iibu āhraa, arīmi. Iribojegue sãre eropa árīniguim̄urib̄u. Dohpague sãre eropa āhraa. Puh̄rugue sãre árīgura,” arīmi Goām̄u.

Jesucristore gosesirigure yu ĩhabu, arī werepu Ńu

⁹ Yuh̄u Ńu m̄ua acaweregu Jesu yagu āhraa. Eropigu m̄ua iro dopa ta yu sã Jesu ya árīburire yu iira dipuwaja ñero tarib̄u. Eropigu m̄ua iro dopa ta yure erā ñero iiquerecū ĭgu itamuri mera Jesure cóābirib̄u. Mari yujuro mera ĭgu Opu árīro majarā árīmorā āhraa. Yaha yeba majarā erā cóādigu árīgu Patmo waĩc̄uri n̄ugurogue āhraa. Goām̄u yare Jesucristo ĭgu werera sãre gajirāre yu wereri dipuwaja ōgue erā cóābeodigu āhraa.

¹⁰ Ohō yujun̄u soorin̄u árīcū Espírītu Santo yure quēroque ĩhmuami. ĭgu eropa ĩhmucū yu puh̄rupu burigā wereniguiri busuro dopa carabu. Corneta turaro busuro dopa eropa ta busuro carabu ĭgu wereniguicū.

¹¹ Ōpa arīgu carami yu peecū:

—Yuh̄u árīpehrerire ĩhacūnugudigu āhraa. Eropigu yuh̄u árīpehrerire pehrecū iibu āhraa. Dohpague m̄u ĩaburire gojaripūgue goja aĩque. M̄u eropa goja aĩra puh̄ru siete cururi majarāre Goām̄u yarāre obeoque iripūre. Erā siete cururi majarā Asia yeba árīri macari majarā āhrima. Eropigu Efeso majarāre, Esmirna majarāre, Pérgamo majarāre, Tiatira majarāre, Sardis majarāre, Filadelfia majarāre, Laodicea majarāre m̄u ĩaburire gojabeoque, arīgu carami yure.

¹² ĭgu eroparīcū peegu majinugajabu yure wereniguigure ĩabu. Eropā majinugajagu siete sihāgori yucure erā duhpeora yucure oro mera erā iira yucure ĩhabu.

¹³ Iri yucu watope masu iro dopa bejagure ĩhabu yuh̄u. ĭgu yoari suhriro sañagu āhrami. ĭgu guburigue dijimerejabu ĭgu suhriro. Eropigu oro mera erā iira gasiro mera ĭgu coretihbire tuādiudigu āhrami.

¹⁴ Eropiro ĭgu poari yaji poari iro dopa boreabu. ĭgu cuiri peame porā iro dopa goseabu.

¹⁵ Īgũ guburi bronçe waĩcũri come timura come iro dopa gosesiriabũ. Eropiro ĩgũ wereniguiri baja Ʃtã dipabu iro dopa busũro carabũ.

¹⁶ Īgũ mojoto diaye maja mojtopũ siete necã opãmi. Eropiro ĩgũ disirore ñoserimiji pepũri usirimiji cuñuami. Eropiro abe Ʃmũ majagu ĩgũ cuimijuro dopa ĩgũ diapo turaro gosesiriami.

¹⁷ Eropigu ĩgũre ĩagu Ʃca waha ĩgũ guburi pohro mehmerejabũ sĩrigũ iro dopa. Yũ eropa mehmerejacũ ĩagu ĩgũ, ĩgũ mojoto diayepũ mera yũre duhpeo õpa arãmi:

—Ʃcabita. Yũ arĩpehrerire ĩhacũnugudigu ãhraa. Eropigu arĩpehrerire pehrecũ iibu ãhraa.

¹⁸ Ojocarinigũgu ãhraa yũhũ. Sĩridigu arĩribũ. Dohpa-guere ĩaque. Arĩpehrerinũri eropa ojocarinigũicãa yũhũ. Sĩridi dipaturi masagu dipaturi masare sĩribiricũ iimasia yũhũ. Eropigu masare peamegue wabiricũ iigu ãhraa yũhũ.

¹⁹ Eropigu dohpague mũ ĩarare gojaque. Pũhrũgue eropa waboro sãre ĩagu gojaque.

²⁰ Oã siete necãre yũ mojoto diayepũ oparãre weregũra mũre. Eropigu siete sihãgori yucũre erã duhpeora yucũ oro yucũ sãre weregũra. Yũ õpa arĩ wererire iribojegue majarãre ne werebirimũribũ. Õpa ãhraa iri: Siete necã siete cururi majarã yaharã oparã arĩrã iro dopa ãhrima. Eropiro siete sihãgori yucũre erã duhpeora yucũ siete cururi majarã yaharã iro dopa ãhrima, arãmi yũre Jesucristo.

2

Efeso majarãre Jesu yarãre gojanũgadoreñumi Ñũre

¹ Eropa arĩtuhaja õpa arĩnemoami yũre gojadoregũ:

—Efeso majarã yaharãre, erã opũ sãre õpa yũ arĩrire arĩ gojabeoque mũhũ. Yũhũ mojoto diayepũ siete necãre opagu ãhraa. Eropigu siete sihãgori yucũ watope curigu ãhraa. Eropa curigu arĩgu mũare õpa arĩ werea:

² Arĩpehreri mũa iirare masipehoa. Yaha arĩburire turaro mohmeabũ mũa. Yũre mũa umupeo duhubirabũ. Ñerire iirãre mũa ĩadiabirabũ. Eropirã “Jesu buhedoregũ ĩgũ apinirã ãhraa,” arĩmaacãnirãre queoro erã buhebiricũ ĩarã, gũyarã erã arĩcũ masiabũ mũa.

³ Yahare mũa iira dipuwaja mũa ñero tariquererã erã gũyarãre tarinũgabũ mũa. Eropirã yũre ne duhubirabũ mũa. “Irire gariborea waca pare,” arĩbirabũ mũa.

⁴ Eropa mũa õarã arĩquererã ta yujuñere õaro iibea mũa. I ãhraa iri: Yũre õaro mũa mahimãhtadiro dopa dohpague iibea mũa.

⁵ Yũre mũa umupeomũhtarare guñaque mũraro ta daja. Dohpaguere mũa yũre umupeobiriqueyarire guñaque. Eropirã mũa irire mũa ñeri iirare bũjawereque. Irire duhuque. Eropa duhurã yahare mũa iimũhtadiro dopa ta iique daja. Mũa ñeri iirare mũa duhubiricũ ñagũ, yujugũ mũa yagũre sihãgodigũre aĩ cóãgũra. Eropa iigũ mũa yuju curu majarãre cóãgũra. Mũa ñeri iirare duhubiricũ mũa yaha curu majarã árĩnirãre duhupehrecũ iigũra.

⁶ Yũre umupeobiriqueyarã árĩquererã ta ire õaro iibabũ mũa: Nicolaita yare buherãre ñerãre ñadiabeaa mũa. Yũ sã erãre ñadiabeaa.

⁷ Gamiricũrã ãhraa mũa. Eropirã peeque. Mũare yaha curu majarãre Espĩritu Santo ñgũ wererare peeque mũa sã. Õpa arĩmi ñgũ: “Árĩpehrerã Jesure umupeo duhubirãre Goãmũ ya pohe majagũ dũcare paraĩso majagũ dũcare badoregũra. Irigũ dũca ojocaririre odigũ ãhraa,” arĩmi Espĩritu Santo, arĩ were gojabeoque Efeso majarã yaharãre erã opu sãre, arãmi yũre Jesucristo.

Esmirna majarãre Jesu yarãre gojabeodoreñumi Ñure

⁸ —Esmirna majarã yaharãre erã opu sãre õpa yũ arĩrere gojabeoque mũhũ, arãmi yũre Jesucristo. Yũhũ árĩpehrerire ñhacũnugudigũ ãhraa. Eropigũ árĩpehreri pehrecũ iibu ãhraa. Sírĩa wabũ. Dipaturi ojocaria daja. Eropigũ õpa arĩ werea mũare:

⁹ Mũa ñero tarirare masia. Mojomorocũrã mũa árĩcũ sãre masia. Eropa mojomorocũrã árĩquererã ta ñgũ werenigu-irire peerã Goãmũ yare õarire wũaro opaa mũa. Gajirãpũ mũare ñhaturirã mũare erã ñero quere moarare masia. Erã “Gũa judio masa Goãmũ yarã ãhraa,” arĩquererã gũyarã iima. Erã Satanare umupeorã ãhrima.

¹⁰ Dohpaguere mũa ñero tariburire gũibiricãque. Peeque mũa. Watĩ mũare Goãmũre duhudoregũ yujurãyeri mũa mera majarãre peresu iidoregũcumĩ. Diez nũri gohra ñero tarirãca mũa. Erã eropa ñero iicũ mũare erã wejẽdiaquerecũ ta yũre yaha sãre ne cóãbiricãque. Mũa yũre eropa cóãbiricũ ñagũ árĩpehrerinũri mũare õaro árĩcũ iigũra.

¹¹ Gamiricũrã ãhraa mũa. Eropirã peeque. Mũare yaha curu majarãre Espĩritu Santo ñgũ wererare peeque mũa. Õpa arĩmi ñgũ: “Árĩpehrerã Jesure umupeo duhubirã peameguere wasome,” arĩmi Espĩritu Santo, arĩ gojabeoque Esmirna majarã yaharãre erã opu sãre, arãmi Jesucristo yũre.

Pérgamo majarãre Jesu yarãre gojabeodoreñumi Ñure

12 —Pérgamo majarã yaharã erã opu sãre ôpa yu arĩrire gojabeoque mũhũ, arãmi yure Jesucristo. Yũhũ ñoserimijire pepari usirimijire opagu ãhraa. Mũare ôpa arĩ weregura:

13 Mũa arĩrore masia. Erogue mũa ya maca majarã opu Satana áhrimi. Erã Satanare umupeoquerecũ mũapu yure umupeoa. Erã mũa mera majagu mũrũre Antipa mũrũre yahare ôaro weredigũ mũrũre wejẽma. Īgũre erã wejẽcũ ĩaquererã ta yure ne umupeo duhubirabũ mũa.

14 Mũa eropa umupeo duhubiriquerẽ merogã yure tarinũgabũ mũa. Yujurãyeri mũa mera majarã Balaam ya buherire gahmema. Iribojegue majagu ĩgũ Balaam waĩcũgũ ôpa arĩmũriñumi Israe masare ĩhaturirã erã opũre: “Israe masare tarinũgadiagu ôpa iique. Goãmarã wéanirãre mũa orare barire badoreque erãre. Eropigu nome mera ñero iicũ iique erãre,” arĩ weremũriñumi Balaam gajirã opũre Balaco waĩcũgũre. Iribojegue ĩgũ eropa ñero iidorediro dopa ta dohpague sãre ñero iicũ iima yujurãyeri mũa mera majarãre.

15 Eropirã erã iro dopa ta gajirã mũa mera majarã Nicolaita buherire gahmema. Iri buheri sãre ĩadiabea yũhũ.

16 Eropirã mũa iri ñeri iirire duhuque mũa. Mũa eropa duhubiricũ ĩagu yojaro mera mũa pohrogue wagũ, eropa ñero iirã mera gamequeãgũca. Yũhũ disirogue cuñurimiji ñoserimiji mera gamequeãgũca erã mera.

17 Gamiricũrã áhraa mũa. Eropirã mũa ya curu majarãre yaharãre Espĩritu Santo ĩgũ wererare peeque mũa. Ôpa arĩmi ĩgũ: “Árĩpehrerã Jesure umupeo duhubirãre mana waĩcũri barire umaro maja barire ogura. Utã boreriyeri sãre ogura erãre. Iri utãyeri mama waĩre yu gojaturayeri arĩroca. Gajirã iri waĩre ne masisome. Iri utãyerire aĩrã dihta iri waĩre masirãcoma,” arĩmi Espĩritu Santo, arĩ gojabeoque Pérgamo majarãre erã opu sãre, arãmi yure Jesucristo.

Tiatira majarã sãre Jesu yarãre gojabeodoreñumi Ñure

18 —Tiatira majarã yaharã erã opu sãre ôpa yu arĩrire gojabeoque mũhũ, arãmi daja yure Jesucristo. Yũhũ Goãmũ magũ yu cuiiri peame porã iro dopa gosesirigu ãhraa. Eropiro yu guburi bronce waĩcũri come erã timura iro dopa gosesiria. Mũare ôpa arĩ werea:

19 Mũa iirare masia yũhũ. Goãmũre masa sãre mũa umupeorare, yure mũa cóãbirirare, gajirãre mũa itamura,

ñero tariquererã mua yure duhubirirare masia. Negohraguere mua iidiro tauro dohpaguepure ðaro iinemorã iiaa mua. Iri sãre masia yuhũ.

²⁰ Mua eropa ðaro iirã árĩquererã ta ðpa yure tarinugabu mua: Jezabe waĩcũgo “Goãmũ yare werego ãhraa,” arĩ guyago mua watope ta ãhrimo. Mũare igo ñero buhecũ peerã igore turibirabu mua. Eropa guya buhego yaharãre yu pohro majarãre nome mera ñero iicũ iimo. Eropigo goãmarã wéanirãre erã orare barire badoremo igo yaharãre.

²¹ Igo ñerire igo bujawereborore coreniribu. Yu eropa corequerecũ igo ñero iirire duhudiabiramo.

²² Eropirã yure peeque mua. Igore dorecucũ iigura. Igo mera ñero iinirã sãre dorecucũ iigura. Eropirã erã burigã ñero tarirãcoma. Eropa ta iigũca erãre igo mera erã ñero iirare erã bujawerebircũ, irire erã duhubiricũ.

²³ Eropigu igo porãre wejẽgũra. Yu eropa iicũ ãarã árĩpehrerã yaharã yu ðaro masirire masirãcoma. Masa erã pepiri sãre erã ñaribejari sãre masia. Yu eropa masicũ masirãcoma erã igore yu eropa dipuwaja moacũ. Árĩpehrerã mua ñerire iira dipuwaja, dipuwaja moagũra mũare. Eropigu mua ðarire iira wajapure ðaro iigura mũare.

²⁴ Mua Tiatira majarã gajirã mua mera majarã igo ya buherire gamebirabu. Mũapũ Satana ya buherire “Wũaro ãgũ masiri ãhraa,” erã arĩrare gamebirabu mua. Eropigu mũapure gajino mua iiburire dorenemosome yuhũ.

²⁵ Dorenemobiriqueregu iñe dihtare dorea mũare: Mua pohrogue yu dujariboro core yu buherire mua masirare ne merogã mera cãdijibircãque.

²⁶⁻²⁷ Árĩpehrerã ñerire tarinuganirãre, yu gamerire eropa iiniguirãre oparã árĩmorãre acugũra. Yu Pagũ ãgũ yure opu acudiro dopa ta mũare oparã acugũra yu sã. Árĩpehreri yeba majarã tauro árĩrã oparã árĩmorã acugũra mũare. Eropa oparã ñajarã, mua doca árĩrãre árĩpehreri yeba majarãre turaro dorerãca. Eropa turaro dorerã mũare tarinuganirã mata pehrea wacũ iirãca mua erãre.

²⁸ Eropigu mũare yahare ne duhubirininirãre boyomuriridirure ogũra. Eropigu mua mera árĩgũca yuhũ.

²⁹ Gamiricũrã ãhraa mua. Eropirã mua ya curu majarãre yaharãre Espĩritu Santo ãgũ wererare peeque mua, arĩ gojabeoque Tiatira majarãre, arãmi yure Jesucristo.

Sardis majarãre Jesu yarãre gojabeodoreñumi Ñure Jesu-cristo

¹ —Sardis majarã yaharãre erã oparã sãre òpa yu arĩrire gojabeoque mũhu, arãmi daja yure Jesucristo. Yũhu ïgu Espĩritu Santo siete suburi maja turarĩre opaa. Eropigu siete necãre opaa. Mũare òpa arĩ werea: Mũa iirare masia. Òpa arĩ pepirima mũare gajirã: “Erã Goãmu yare òaro iipehorã àhrima,” arĩ pepirima mũare. Erã eropa arĩ pepiquerecũ, Goãmu yare òaro iibeaa mũarũ.

² Eropirã mũa iirare òaro guñaque mũa. Goãmu yare mũa masirare òaro guñaque daja cãdijiro mariro. Goãmu ïgu ïacũ òaro iipehobirabũ mũa.

³ Eropirã yahare mũa peemũhtarare mũraro ta òaro guñaque mũa daja. Eropa guñarã yahare iique mũa daja. Mũa ñeri iirare duhuque. Yu arĩro dopa mũa iibiricũ guñaña mariro mũare dipuwaja moagũra. Yajari masũ ïgu guñaña mariro ïgu yajagũ ñajaro dopa ta mũare guñaña mariro dipuwaja moagũ arigũca.

⁴ Yujurãyeri mũa mera majarã Sardis majarã ñero erã iirire ïhacũbeama. Eropa òarã árĩrã, boreri suhriro sañarã yu mera curirãcoma.

⁵ Árĩpehrerã yahare duhubirã eropa ta boreri suhri sañarã árĩniguirãcoma. Eropirã yu mera eropa árĩniguiomorã erã waĩre yu gojaturipũgue erã sã erã waĩre gojatunirã árĩrãcoma. Erã erã waĩre yu gojaturare coesome yũhu. Yu Pagũ ïgu ïhabeorogue, anyua sã erã ïhabeorogue, “Yaharã àhrima,” arĩ weregũca erãre.

⁶ Gamiricũrã àhraa mũa. Eropirã mũa ya cururi majarãre yaharãre Espĩritu Santo ïgu wererare peeque mũa, arĩ gojabeoque Sardis majarãre yaharãre erã opu sãre, arãmi yure Jesucristo.

Filadelfia majarãre Jesu yarãre gojabeodoreñumi Ñure

⁷ —Filadelfia majarã yaharã erã opu sãre òpa yu arĩrire arĩ gojabeoque mũhu, arãmi daja yure Jesucristo. Yũhu ñeri marigu àhraa. Diaye maja weregũ àhraa. Davi mũrũ iribojegue majagũ opu masare ïgu dorediro dopa ta turari mera doregũra yu sã. Iri turari mera iidorecũ ne gajirã irire cãhmotamasibeama. Yu iidorebiricũ ne gajirã irire iimasibeama.

⁸ Árĩpehreri mũa iirire masia yũhu. Guñaturabiriñarirã árĩquererã ta yaha buherire òaro peeabũ mũa. Yure waĩpeo duhubirabũ mũa erã mũare ñero iidiaquerecũ ta. Eropigu yahare iimorã apiabũ mũare. Eropirã yu dorerire mũa iicũ gajirã cãhmotamasibeama mũare.

9 Gajirã mũa pohro árĩrã “Gũa judio masa Goãmũ yarã ãhraa,” arĩquererã ta gũyarã ãhrima. Goãmũ yarã árĩbeama. Satanare umupeorã ãhrima. Eropigũ erãpũre mũa core mereja mũare erã umupeocũ iigũra erãre. Yũ eropiicũ ĩarã yũ mũare mahirire masirãcoma erã.

10 Mũaare yahare yũ duhudorebircũ peerã ðaro yũhriabu mũa yũre. Mũa eropa iicũ ĩagũ i yeba majarã árĩpehrerã erã ñero tariburisubu árĩcũ mũare ĩhadibugũra. Irisubu árĩpehrerã erã ñero tariburisubu árĩroca.

11 Merogã duhyaa i yebague yũ dujariboro. Yahare mũa masirare cãdijibircãque. Eropirã yũre eropa yũhriniguicãque mũa wajataborore dedeori arĩrã.

12 Eropigũ yahare duhubirãre yũ Pagũ ya wihi majarã apigũra erãre. ĩgũ ya wihi maja borari iro dopa árĩcũ apigũra erãre. Eropirã Goãmũ mera majarã eropa árĩniguirãcoma. Eropirã Goãmũ yũ Pagũ yarã waĩcũrã, ĩgũ ya maca majarã waĩcũrã sã árĩrãcoma. ĩgũ ya maca mama maca Jerusalén árĩroca. Iri maca mũmarogue Goãmũ pohrogue dijariri maca árĩroca. Yũ waĩ sãre mama waĩ opagũca. Iri waĩ sãre waĩcũrãcoma yaharã.

13 Gamircũrã ãhraa mũa. Eropirã mũa ya cururi majarãre, yaharãre Espĩritu Santo ĩgũ wererare peeque mũa, arĩ gojabeoque Filadelfia majarãre yaharãre erã opu sãre, arãmi yũre Jesucristo.

Laodicea majarãre Jesu yarãre gojabeodoreñumi Ñure Jesucristo

14 —Laodicea majarãre yaharã erã opu sãre ðpa yũ arĩrĩre gojabeoque mũhũ, arãmi daja yũre Jesucristo. Yũ arĩro dopa ta iigũ ãhraa yũhũ. Eropigũ gũyaro mariro yũ ĩarare eropa wereniguigũ ãhraa. Árĩpehrerire mari Pagũ ĩgũ ĩhacũnugurare iibasagũ ãhraa yũhũ.

15 Árĩpehreri mũa iirare masia yũhũ. Mũa “Jesu yarã ãhraa gũa,” arĩquererã yũre merogã umupeoa. Yũre mũa merogã umupeorã mũa árĩcũ yũhũ gamebeaa mũare. Mũa “Jesure umupeobea gũa,” arĩbeaa mũa. “Jesure umupeorã ãhraa gũa,” arĩquererã ta yũre ðaro umupeobea. Mũa yũre umupeodiaro dopa ta yũre wũaro umupeocũ ðaboaya.

16 Mũa eropa yũre ðaro umupeobircũ ĩagũ mũare gamebirigohracãgũra.

17 Eropirã ðpa arĩ pepiraa mũa: “Árĩpehrerire opa. Ne gajino duhyabeaa gũare,” arĩ pepiraa mũa. Eropa arĩquererã mojomocũrã iro dopa ta ãhraa mũa yũ ĩacũ. Duhyataria mũare. Eropirã ne moonjarã, suhri marirã,

cuiiri ñhajibirã iro dopa ãhraa mua yu ñacũ. Mũare dũhyarire masibea mua.

¹⁸ Mũa eropa masibirã áricũ ñagu õpa arĩ weregura mũare: Mũare dũhyarire masique. Eropirã yũre serẽque. Oro gohrare mua asũro dopa ta õarire yu oparire yũpũre aĩque mua. Mũare yũre õaro umupeocũ iigura. Eropirã diaye ta Goãmũ ya mera wũaro oparãca mua. Eropirã yu sũrira mera mua ñero iirare cóãñirã áricque mua. Eropirã suhri sañarã erã gũhyasĩribiro dopa ta mua ñeri iirare cóãñirã õarire iimorã áñrã gũhyasĩrisome mua. Eropirã mua cuiiri ococũra pũhrũ õaro mũare deyoro dopa ta Goãmũ yare õaro peeque mua õaro masiboro dopa.

¹⁹ Áñrĩpehrerã yu mahirãre erã ñero iirare werea. Eropigũ yu mahirãre dipuwaja moaa gajisubu erãre itamubu. Eropirã yũpũre turaro gameque. Eropirã mua ñerire bũjawere duhuque.

²⁰ Peeque yũre. Mũa wirire bihara wirire yu ejanũgaja ñajadiabodiro dopa ta mua mera áñrdiagu coregũ iiaa. Yũ eropa áñrdiacũ peerã yũre mua mera áñrdoreque. Yaharã áñricque. Mũa eropa áñrdorecũ mua mera áñrigura. Eropigũ mari sihu baro dopa ta mua mera õaro áñrigura. Eropirã yu mera õaro áñrãca mua.

²¹ Ñerire yu tarinũgara pũhrũ yu Pagũ opu ñgu doaro pohro doaa yu sã dorebu. Eropa ta mua sã ñerire mua tarinũgara pũhrũ yu opu doaro pohro doarãca doremorã. Mũare yu pohro doacũ iigura.

²² Gamiricũrã ãhraa mua. Eropirã mua ya cururi majarãre yaharãre Espĩritu Santo ñgu wererare peeque mua, arĩ gojabeoque Laodicea majarãre yaharã erã opu sãre, arãmi Jesucristo yũre.

4

Umarogue Goãmũre erã mereja umupeorare ñapũ Ñũ

¹ Yũre ñgu eropa arĩ werera pũhrũ umũsiguere pãgũra disiporore ñhabũ. Dipaturi corneta turaro bũsũro watope turaro wereniguiiri bũsũro carabũ yu peecũ. Õpa arĩro carabũ yũre:

—Õgue mũeririque. I yu wereburi pũhrũguere waroca. Eropa waborore mũre ñhmugũra. Yũ arĩdiro dopa ta eropa waroca, arĩro carabũ umarogue.

² Ñgu eropa arĩ werecũ ta erogue mũerijagu Espĩritu Santo ñgu turari mera ñagu iiabũ. Eropigũ opu doarore umarogue ñhabũ. Ero yujugũ doãmi.

³ Eropigũ õaro gosesirigũ doãmi. Jaspe waĩcũri utãye gosesiriro dopa ta, cornalina waĩcũri utãye gosesiriro dopa

ta ðaro gosesirigũ doámi ïgũ. Eropigũ ðaro gosesiriri bero esmeralda iro dopa gosesiriri bero pohecague doámi ïgũ.

⁴ Eropigũ ïgũ doaro tũrore yuju bero ïhabũ oparã doari berorire. Veinticuatro gohra ãhrabũ. Iri oparã doarire veinticuatro gohra Jesu yarã oparã doáma. Boreri suhricurã ãhrama. Eropirã oparã erã peyari berorire oro berorire peyanirã ãhrama erã.

⁵ Doariñe yũ ïamũhtarañegue miamaabũ. Eropiro gajiropa wereniguri busũro carabũ. Bupu sã busũgu carami. Iri doaro core siete sihãgori yucũ ãhrabũ. Iri siete sihãgori yucũ Espĩritu Santo ïgũ siete suburi maja turari opari iro dopa ãhrabũ.

⁶ Eropiro ïgũ doaro core wũariya ãhrabũ. Vidrio iro dopa árĩriya ãhrabũ. Õaro deco sũririya ãhrabũ.

Ïgũ doaro pohro wapicurã gajiropa bejarã ãhrama. Ojocarirã ãhrama. Erã diaporire erã pũrupũrere baja cuiricurã ãhrama.

⁷ Yũ ïamũhtadigũ gajiropa bejagũ yee diagũ iro dopa bejagũ ãhrami. Ïgũ pũhrũ árĩgũ wecũ iro dopa bejagũ ãhrami. Erã pũhrũ árĩgũ masũ diapo iro dopa diapocũgũ ãhrami. Erã urerã pũhrũ árĩgũ gaa ïgũ quẽ dũpũre sũegu iro dopa ãhrami.

⁸ Erã wapicurã nũcũ seis quẽ dũpũricurã ãhrama. Eropiro erã quẽ dũpũri pepũrigue ta baja cuiricuri quẽ dũpũri ãhrabũ. Eropirã mũuri nũcũ, ñamiri nũcũ eropa bayaniguirã iiama. Ne baya duhubirama. Õpa arĩ bayáma: Õagũ, ðagũ, ðagũ Goãmũ mari Opũ turatariagũ ãhrimi.

Ïgũ iribojegue eropa ta árĩniguicãpũ. Dohpague sãre eropa ta árĩniguimi. Pũhrũgue sãre eropa árĩniguicãgũcumĩ, arĩ bayaniguirã iiama.

⁹ Eropa bayarã erã wapicurã gajiropa bejarã ïgũ turarire bayarã iiama. Eropirã ïgũre árĩpehrerinũri árĩniguigũre "Õhaa," arĩrã umupeorã iiama.

¹⁰ Erã eropa baya umupeocũ ïarã veinticuatro Jesu yarã oparãpũ opũ doaro core mereja, ïgũre umupeoama. Ïgũ árĩpehrerinũri árĩniguigũ ãhrimi. Eropa umupeorã erã oparã erã peyari berorire ïgũ doaro core mehpeoama. Eropa mehpeorã õpa arãma erã:

¹¹ Mũhũ Goãmũ gũa opũ gohra ãhraa. Turagũ õagũ ãhraa mũhũ. Mũhũ gũa umupeogu árĩgũ ta iiaa. Mũre eropa umupeoro gahmea gũare. Árĩpehrerire ïhacũnugudigũ ãhraa mũhũ. Mũ gamediro dopa ta iri árĩpehrerire ïhacũnuguyoro mũhũ, arãma erã Goãmũre ero doagũre.

5

Gojarapũ tũrara tũrure cordero sãre werepũ Ñu

1 Pũhrũ ero doadigũ ĩgũ mojoto diayerũ ĩgũ oparipũre gojarapũre ĩhabũ. Iripũ pepãri ĩgũ gojarapũ ĩgũ tũrara tũru ãhrabũ. Eropiro siete suburi pihañari mera ĩgũ pihañara tũru ãhrabũ.

2 Eropigũ turagũ anyure ĩhabũ. ĩgũ turaro wereniguirĩ mera õpa arĩ wereami:

—I tũrure pihañarare õagũ dihta pãñamasimi. ¿Nihipũ ãhriri iripũre pãbu? arãmi ĩgũ anyu.

3 Eropa arĩqueregũ ta iri tũrure pãñabure bocabirami. Eropa õagũre bocabirami. Ñmarogue i yebague ojocarĩrã watope, sĩrinirã watope ne iri tũrure pãñabu marami. Eropigũ iri tũru majare buhebu marami.

4 Eropigũ iripũre pãñabodigũre erã bocabiricã ĩagũ turaro oreabũ yũpũ.

5 Yũ eropa orecũ ĩagũ yujugũ erã Jesu yarã oparã mera majagũ õpa arãmi yũre:

—Orebiricãque. Iri tũrure ñearire yujugũ pãñamasimi. ĩgũ Juda ya curu majagũ turagũ ãhrimi. ĩgũ opũ Davi pãrami arĩturiagũ ãhrimi. Watĩre tarinũgadigũ ãhrimi ĩgũ. Eropigũ ĩgũ iri tũrure siete ñearire pãmasigũ ãhrimi, arãmi ĩgũ yũre.

6 ĩgũ eroparĩcũ peegũ opũ ĩgũ doaro core Cordero ĩgũ niguicũ ĩhabũ. Wapicũrã gajiropa bejarã, Jesu yarã oparã sã erã watope niguiami ĩgũ Cordero. ĩgũ eropa niguiqueregũ ĩgũ masa erã wejẽdigũ mũrũ dopa dehyoami. Siete cusaricũgũ, siete cuiricũgũ ãhrami. Iri siete cuiri ĩgũ Espĩritu Santo ĩgũ siete suburi maja turari ãhrabũ ĩgũ arĩpehrero ĩhamasiburi. Espĩritu Santo arĩpehrero i yebaguere Goãmũ ĩgũ obeodigũ ãhrimi.

7 Eropigũ Corderopũ opũ doaro pohrogue ejagũ, ero doagũre ĩgũre ĩgũ diayerũ opara tũrure tũaweã aĩami.

8 ĩgũ eropa tũaweã aĩcũ ĩarã wapicũrã gajiropa bejarã, veinticuatro Jesu yarã oparã sã Cordero core mereja ĩgũre umupeoama. Erã Jesu yarã oparã arĩpehrerã arpa waĩcũri bũamũtĩrĩre opãma. Oropari sãre opãma. Iripari incienso mũjũturiripari dihta ãhrabũ. Iri incienso Goãmũ yarã ĩgũre erã serẽra ãhrabũ.

9-10 Eropa ĩgũre umupeorã õpa arĩ mama bayarire bayãma erã Corderore:

Erã wejẽdigũ mũhũ ãhraa. Eropigũ mũ ya di mera masa ñeri iirare coeabũ mũhũ Goãmũ yarã erã arĩboro dopa. Eropigũ masare arĩpehreri cururi

majarāre yujurāyerire, árīpehrerā yare werenigu-irāre, árīpehreri yeba majarāre erā ñero iirare wajayebasabũ. Eropa iigu erāre oparā árīmorā, pahia masare Goāmure serēbasarā árīmorā sã árīcũ iiabũ. Eropigu i yeba majarā weca oparā árīmorā acubũ mũhũ guare. Eropa iigu árīdigũ iri tũrure aĩ pãñamasibu āhraa mũhũ, arĩ bayáma erā Corderore.

¹¹ Yu iagu daja bajarāre millones anyua majarāre ihabũ. Opu doarore, wapicũrā gajiropa bejarāre, veinticuatro Jesu yarā oparāre anyuapu erāre gāhrisianugajáma. Erā anyua majarā turaro mera erā bayacũ ihabũ.

¹² Ōpa arĩ turaro bayapeoama erā: Cordero, mũhũ erā wejēdigũ árīgu árīpehrerāre doremasibu, árīpehrerire opamasibu āhraa. Eropigu masipehogũ, turatariagu āhraa mũhũ. Mu eropa árīgu āhraa masa erā ñerire erā iira dipuwaja erā wejēdigũ. Eropirā gua mure umupeorāca. “Ōatariagu āhrimi,” arĩrāca mure. Mure ōaro wereniguirāca, arĩ bayáma anyua majarā.

¹³ Eropigu gajirā erā bayacũ peeabũ. Árīpehrerā i yeba majarā, umaro majarā sã, ojocarirā, sīrinirā, wũariya majarā sã, árīpehrerogue árīrā ōpa arĩ bayarā carama: Goāmure iigu doarogue doagure, Cordero sãre ōaro wereniguirāca. Mũare umupeorāca. “Ōatariarā āhrima. Turatariarā āhrima,” arĩrā árīpehrerinũri eropa arĩniguicārāca mũare, arĩ bayapeorā carama.

¹⁴ Eropirā erā wapicũrā gajiropa bejarā erā eropa arĩ bayacũ peerā “Eropa ta arĩ bayaporo,” arāma. Eropirā Jesu yarā oparāpu mereja Goāmure, Cordero sãre umupeoama.

6

Papera tũrure iigu aĩra tũrure pihañarare pãmi Cordero, arĩ werepu Ñu

¹ Pũhrũ papera tũrure iigu aĩgāra tũrure Cordero pihañamũhtarañere pãmi. Igu eropa pãcũ ihabũ. Igu eropa pãra pũhrũ yujugu gajiropa bejarā mera majagu “Iagu arique,” arāmi. Eropa arīgu bupu bũsũro dopa ta wereniguiami.

² Igu eropa arĩra pũhrũ ihabũ yũhũ. Boregu cabayure ihabũ. Igu weca peyagu buiri berore opãmi. Iguere opu peyari berore ohami gajigupu. Igu eropa ora pũhrũ igupu iguere ihatuirāre tarinugagu wahãmi.

³ Pũhrũ yujuñe pihañarañere pãtuhaja Cordero gajiñe pihañarañere pãmi daja. Igu eropa pãra pũhrũ gajigu

gajiropa bejarã mera majagu “Ílagu arique,” Ígu arĩcũ peeabu daja.

⁴ Eropigu gajigu cabayure diagure Íhabu daja. Ígu weca peyagure turarire ohami gajiguru. I yeba majarãre erã basi gamewejẽcũ iibure apiami Ígure. Eropirã árĩpehrero majarã gamewejẽrãcoma i yebague. Eropigu wuarimiji ñoserimijire ohami Ígure.

⁵ Pũru peñere pãtuhaja Cordero gajiñere pãmi daja. Eropigu gajigu gajiropa bejarã mera majagu Ígu sã “Ílagu arique,” arĩcũ peeabu daja. Ígu eropa arĩra pũru cabayu ñigure Íhabu. Ígu weca peyagu nũcuri queoriñere opãmi.

⁶ Ígure yu Íara pũru gajiropa bejarã watope õpa busuro carabu:

—Trigo cebada sã pehrea waroca. Eropiro iri waja pagari árĩroca. Eropirã yujunũ mohmeri waja mera trigore yuju kilo ta asũrãcoma. Yujunũ mohmeri waja mera cebada yerire uñre kilo ta asũrãcoma. Bari moari uyrũ, vino sã baja árĩcãniroca, arĩro carabu.

⁷ Pũru uñreñere pãtuhaja Cordero gajiñere pãmi daja. Ígu eropa pãra pũru gajigu gajiropa bejarã mera majagu árĩtugũ Ígu sã “Ílagu arique,” Ígu arĩcũ peeabu daja.

⁸ Ígu eroparĩcũ peegu borewijigu cabayure Íhabu. Ígu weca peyagu sĩririñe waĩcuami. Eropigu Ígu pũru arigu peame waĩcuami. Eropigu erãre cabayua weca peyarãre turarire ohami corderopũ. Wapicurã masa árĩcũ yujugu erã mera majagure wejẽdoreami. Eropa ta árĩpehrero i yebaguere yujurãyeri masare wejẽdoreami. Gamewejẽri mera, oaboari mera, dorecuri mera, waimurã nũguri majarã guarã mera, yujurãyeri masare erã wejẽburire apiami erã perãre.

⁹ Pũru wapicuriñere pãtuhaja gajiñere pãmi daja Cordero. Ígu eropa pãcũ Goãmure umupeoburi mesa doca Jesu yarãre erã wejẽnirãre erã sĩporãrere Íhabu. Goãmũ yare erã werera dipuwaja, “Jesu yarã aħraa,” arĩ erã werera dipuwaja gajirã erã wejẽnirã aħrama.

¹⁰ Erã gaguiniguirã õpa Goãmure erã arĩcũ peeabu:

—Mũhu gua Opũ ñeri marigu, gũyaro mariro mũ arĩro dopa ta iigu aħraa mũhu. ¿Eropigu i yeba majarãre gũare wejẽnirãre dohpãrĩcũ dipuwaja moagũcuri mũhu erãre? arĩ gaguiniguiama erã.

¹¹ Eropigu erãre boreri suhri yoari suhrire ohami. Erãre eropa ogũ õpa arãmi erãre:

—Soonique dohpa. Gajirã mũa acawererã Jesu yarã mũa iidiro dopa ta dohpague sãre õari buherire buhenirã

iima masare. Mũare wejẽdiro dopa ta erã sãre erã wejẽpehoboro duhyaa dohpa. Eropirã erãre árĩpehrerãre erã wejẽboro core merogã corenique mũa, arãmi erãre.

¹² Pũhrũ cinco ñearire pãtuhaja Cordero gajiñe ñeariñere pãcũ ñhabũ daja. Iriñere ñgũ pãcũ ta, turaro yeba ñohmeabũ. Eropigũ umũ majagũ abe ñigũ guhyaro wahámi. Ñiriñe suhriro iro dopa ta bejagũ ñgũ guhyaro wahámi. Eropigũ abe ñami majagũ di iro dopa ta diagũ guhyaro wahámi.

¹³ Eropirã necã yebague yuhridija waháma. Yucũgu dũcare miruñe weãburiboro dopa ta necã yuhridija waháma.

¹⁴ Eropiro umũsi dederea wahabũ. Paperapũre mari tũrabeo dedeodiro dopa ta dederea wahabũ umũsi. Eropiro árĩpehreri utã yucũ sã árĩpehreri nũgũrori sã gajipũgue ejanũgaja waha wahabũ.

¹⁵ Eropa wacũ ñarã i yeba majarã tauro oparã, utã yucũ maja wiri poheca maja goberigue duhrirã waháma. Gajirã oparã, surara oparã, doberi oparã, turarã, árĩpehrerã erã pohro majarã, erã pohro majarã árĩbirã sã yujuro ta duhrirama.

¹⁶ Eropirã duhrirã utã yucũre utã sãre õpa arĩrama:

—Gua weca yuhridijari wejẽcãque. Sihĩre opũre ñgũ doaro doagũre gũitaria. Cordero gũare ñero dipuwaja moagũcumi.

¹⁷ Gũare árĩpehrerãre turaro dipuwaja moaburinu árĩtuhajaa. Eropirã ñgũ dipuwaja moaborore ne bo-cãtũsome gua. Eropa dipuwaja moari arĩrã gua weca yuhridijari wejẽcãque, arĩrama utã yucũre árĩpehrerã.

7

Israe masa diaporire Goãmũ ñgũ waĩ tuhuborore werepũ Ñũ

¹ Pũhrũ wapicũrã anyuare ñhabũ. Erã árĩpehrerogue waháma. Yujugũ nor tepũ wagũ erogue arirañere miruñere aribiricũ iiami. Gajigũ surgue, gajigũ abe mũririrogue, gajigũ abe ñajarogue waha ñgũ iro dopa ta miruñere aribiricũ iama erã sã. Eropiro i yebague, wũariyague sãre ne miruñe aribiricũ iama. Ne yujugũ yucũgũre miruñe weã ñohmecũ iibirama.

² Eropigũ gajigũ anyure ñhabũ daja. Abe mũririrogue arigũ iiami ñgũ. Goãmũ ojocariniũgũ ñgũ waĩ aĩturiñere sello waĩcũriñere aĩgãrigũ iiami ñgũ. Eropa aĩgãrigũ gajirã anyua wapicũrãre ñgũ gaguiniũgũiami. Erã anyuapũ

i yebare, wuariya sãre ñero wacũ Goãmũ ĩgu iidorenirã ãhrama erã.

³ Erãre gaguinigũ òpa arãmi ihĩ anyu:

—Corenique. Goãmũ pohro majarãre erã diaporire ĩgu waĩ aĩturiñere tuhunimorã iiaa gua. Gua eropa tuhuboro core i yebare, wuariyare, yucũ sãre ñero wacũ iibiricãque mũa dohpa, arãmi ĩgu gajirã wapicurã anyuare.

⁴ Eropigũ Goãmũ ĩgu waĩ mera erã diaporire erã tuhumorã “Oã nũcũ ãhrima,” arĩ wereami yãre yujugũ. Israe masa doce cururi majarã ciento cuarenta y cuatro mil gohra masa erã tuhumorã árĩñorã.

⁵ Oã árĩñorã erã tuhumorã: Doce mil masa Judá pãramerã árĩturiarã erã tuhumorã árĩñorã. Doce mil masa Ruben pãramerã árĩturiarã árĩñorã erã tuhumorã. Gajirã doce mil masa Gad pãramerã árĩturiarã árĩñorã erã tuhumorã.

⁶ Gajirã Aser pãramerã árĩturiarã doce mil gohra, gajirã doce mil gohra Neftalí pãramerã árĩturiarã, gajirã doce mil Manase pãramerã árĩturiarã erã tuhumorã árĩñorã.

⁷ Gajirã doce mil masa Simeo pãramerã árĩturiarã, gajirã doce mil masa Leví pãramerã árĩturiarã, gajirã doce mil masa Isaca pãramerã árĩturiarã árĩñorã erã tuhumorã.

⁸ Gajirã doce mil masa Zabulón pãramerã árĩturiarã, gajirã doce mil masa José pãramerã árĩturiarã, gajirã doce mil masa Benjami pãramerã árĩturiarã, erã tuhumorã árĩñorã. Erã nũcũ árĩpehrerã masa ciento cuarenta y cuatro mil gohra árĩñorã erã tuhumorã.

Bajarã boreri suhricurãre wereru Ñu

⁹ Pũhrũ masa bajarãre ĩhabũ. Árĩpehreri yeba majarãre, árĩpehreri cururi majarãre, árĩpehrerã yare wereniguirãre, árĩpehreri macari majarãre, yujurãyerire Cristo gamerã dihtare erã niguirãre ĩhabũ. Opũ ĩgu doaro pohro, Cordero core niguiama erã masa. Bajarã masa ãhrama. Eropirã erãre queorã bocatĩurã mejeta ãhrama. Boreri suhricurã ãhrama erã. Eropirã mijipũrire opãma.

¹⁰ Eropirã erã árĩpehrerã òpa arĩ gaguiniguiama:

Goãmũ ãhrimi marire taugũ. ĩgu, ĩgu doaro doagu ãhrimi.

Cordero sã marire taugũ ãhrimi, arĩ gaguiniguiama erã.

¹¹ Eropirã árĩpehrerã anyua, Jesu yarã oparã, gajiropa bejarã mera Opũ ĩgu doaro tũrore yuju bero niguiama. Eropa niguirã ĩgu doaro core mereja, Goãmũre umupeoama.

¹² Òpa arĩ umupeoama erã:

Eropa ta ãhraa. Goãmũ gua Opũre mũre òaro wereniguia.

Òatariagu ãhraa mũhũ. Masipehogũ ãhraa mũhũ.

Mure "Ōhaa," arāa. Mure umupeoa. Turatariagu āhraa mūhū. Mū turari mera iigu āhraa mūhū. Mure eropa arīrā ārīpehrerinūri eropa mure arīniguirāca. Eropa ta iirā, arī umupeoama erā Goāmure.

13 Eropigu yujugu Jesu yarā oparā mera majagu yure wereami:

—¿Oā boreri suhricūrāre masiri mūhū? ¿Erā aridirore masiri mūhū? arī serēpiami yure.

14 Īgu eroparīcū peegu,

—Masibea, arī yūhriabu yūpū.

—¿Noa āhriri erā? arī serēpiabu īgure.

Yū eroparīcū peegu ōpa arāmi yure:

—Oā űetariaro taririnūri árīcū yujuro bojerā āhrima, arāmi īgu yure. Erā suhrire coewearo dopa ta Cordero īgu di cóāra mera erā űerire coenirā āhrima. Eropirā ōari boreri suhricūrā āhrima.

15 Eropa īgu coenirā árīrā Goāmū īgu doarō core īgure eropa umupeoniguicāma. Ūmūri űamiri nūcū īgure eropa umupeoniguicāma pahia Goāmū wihigue erā iiro dopa ta. Eropigu erā mera eropa árīniguigu erāre itamugūcumī Goāmū gajiropa wari arīgu.

16 Eropirā ne dipaturi oaboasome erā. Eropirā ne űemesibusome. Ne abe ūmū majagu asiriűere pabusome erā. Turaro asiri erā űero taricū iisome.

17 Opū doarō core niguigu Cordero erāre īhadibugūcumī. Ovejare īhadibugū iro dopa erāre īhadibugūcumī. Eropigu maurīgā dipague ojocaricū iiriyarīgā dipague erāre mūhta wahgāgūcumī oveja īhadibugū iiro dopa ta. Eropigu eropa mucubiricū iigūcumī erāre. Eropirā ūmarogue árīrā ne dipaturi oresome erā, arāmi Jesu yarā oparā mera majagu yure.

8

Seis papera erā pihañarare pātuhaja gajīñere pāpehopū Cordero

1 Seis papera erā pihañarare pātuhagu dūhyarañere pātuhami Cordero. Īgu eropa pātuhacū yuju hora deco ūmarogue ne ejarimaria wahabū.

2 Eropigu siete anyuare Goāmū pohro niguirāre īhabū. Eropigu erāre siete cornetarire ohami gajigu.

3 Gajigu anyu oropari incienso dicūburipari opadigu Goāmure umupeori mesa pohrogue eja, niguiami. Ero īgu niguicū baja inciensore īgure ohama. Árīpehrerā Goāmū yarā īgure erā serēra mera moreburi inciensore ohama. Eropigu oro mera iira mesague, Goāmū īgu doarō pohro árīri mesague iri incienso Goāmure soe mujuburi āhrabū.

⁴ Eropigu anyu ĩgu oparapari maja inciensore mesa weca pohsiri peo soeami. ĩgu eropa soera pũhrũ iri incienso maja ĩmica Goãmu yarã ĩgure erã serẽra mera mũria wahabu Goãmu pohrogue.

⁵ Eropa wara pũhrũ ĩgu anyu i mesa maja nitire iriparigue aĩ pohsãtuhaja, yebague pohmehdijucãmi. ĩgu eropa pohmehdijucũ miãmi. Turaro bupu paãmi. Eropiro gajiropa busũmaa, yeba ñohmemaabu.

Cornetarire werepu Ñu

⁶ Pũhrũ siete anyua yujurãyeri erã cornetarire purimorã iiama.

⁷ Yujugu anyu ĩgu yarure purimũhtami. ĩgu eropa puricũ decoveri yũsariyeri peame mera, di mera moreriyeri yebague yurimerejabũ. Iriyeri yurimerejacũ ta yeba ũjũa wahabu. Ipẽ ũjũabu: I yeba deco ejaboro pohro gohra ũjũa wahabu. Eropiro iripẽta yucu sã taa yahsari sã ũjũa wahabu.

⁸ Anyu yujugu ĩgu eropa purimũhtara pũhrũ gajigu anyu ĩgu yaru cornetare puriami daja. ĩgu eropa puricũ wũadigu utãgu iro dopa bejadigu õaro ũjuniguidigu wũariyaguere mihrua dijabu. Eropiro yeba ũjũdiropẽ ta wũariya diya poya wahabu.

⁹ Eropirã wũariya majarã wai sã deco mera ejarã gohra yujupu majase majarã sũria wahãma. Eropiro iri nũcu gasi ta dohori gasi miria wahabu wũariyaguere.

¹⁰ Perã anyua erã purira pũhrũ gajigu anyu sã ĩgu yaru cornetare puriami daja. ĩgu eropa puricũ wũadiru necãru, sihãdiru dopa ta bejadiru yebaguere yurimereja wahabu. I yeba maja diarire mau diparire yujupu majase majare yurimerejabũ necãru.

¹¹ Eropiro iri nũcu mauri ta sũiriyari dujabũ. Eropa wacũ bajarã masa iri decore sũiri decore ihrinjarã sũria wahãma. Iriru necãru sũidiru waĩcũabu.

¹² Ñrerã anyua erã purira pũhrũ gajigu anyu sã ĩgu yaru cornetare puriami daja. ĩgu eropa puricũ abe umu majagu, ñami majagu sã deco erabonirã gohra poya wahãma. Necã majarã sã deco erabonirã dipuru ta poya wahãma. Eropiro umugue wapicũri horari gohra abe ne boyobirami. Ñami sãre wapicũri horari gohra abe ñami majagu, necã sã ne boyobirama.

¹³ Pũhrũ ĩhamemujuabu daja. Ñmarogue gaa wũwahgãgure ĩhabũ. Eropigu ĩgu gaguiniguicũ peeabu. Őpa arãmi ĩgu:

—Ñetariaa. Ñetariaa. Ƴrerã anyua purinibeamo dohpa. Erã purira puhru ñetariaro waroca. Eropa wacũ i yeba árĩrã ñetariaro warãcoma, arĩ dijuami ĩgu.

9

¹ Puhru wapicurã anyua erã purira puhru gajigu anyu ĩgu yaru cornetare puriami daja. ĩgu eropa puricũ necãru iro dopa bejagu árĩgu anyu umarogue árĩdigu yebague yuhridijaricũ ĩhabũ. Eropigu ĩgure peame gobe ũhcãri gobe maja sawire ohami gajigu.

² Eropigu ĩgu iri gobere pãgũcũ peame imica wiriabũ. Wuarĩ peame imica iro dopa ta wũaro imica wiriabũ iri gobere. Eropiro iri imica mata abe umu majagure, umaro sãre dederea wacũ iiabũ.

³ Eropirã iri imica pohecague árĩrã poreroa yebague wudijarama. Eropirã coreba erã burigã pũriro dopa ta erã burigã pũriama.

⁴ Eropigu taare, yucure, gaji taare ñero iidorebirami erãre. Masa dihtare ñero iidoreami erãre. Goãmu ĩgu waĩ aĩturiñere erã diaporire tuhuya marirã dihtare ñero iidoreami erãre poreroare.

⁵ Eropa ñero iidorequeregu ta erãre wejẽdorebirami. Erãre wejẽdorebiriqueregu ta cinco aberi gohra masare burigã pũricũ iidoreami. Coreba toarã erã pũriro dopa ta pũricũ iirã ãhrama poreroa sã.

⁶ Irinũrire erãre erã pũriro iicũ masa sĩridiarãcoma. Erã eropa sĩridiaquerecũ ta erãre sĩridoresome Goãmu.

⁷ Oã poreroapũ cabayua iro dopa dehyoama. Surara cabayuare erã come suhri cãhmotari suhri sãnirã dopa ta dehyoama erã poreroa. Erã dipu weca oparã erã peyari berori oro berori iro dopa peyãma. Erã diapori masa diapori iro dopa bejãma.

⁸ Erã poari nome poari iro dopa ãhrabũ. Eropirã erã gũcũri yeea gũcũri iro dopa ãhrabũ.

⁹ Sĩporã cãhmotari gasiro come gasiro iro dopa cãhmotama erã coretihbire. Eropiro erã wũucũ bajarã cabayua omarã erã omaro dopa erã wũuri dũpũri busuabũ. Cabayua tũruri gasire tararã erã gamewejẽrogo warã erã busuro dopa ta busuabũ poreroa wũuri dũpũri.

¹⁰ Eropirã coreba ĩgu pĩgurucũro dopa ta toadiru ĩgu oparo dopa ta ãhrabũ erã poreroa. Eropirã erã pore mera masare cinco aberi gohra pũricũ toãma.

¹¹ Eropirã erã opu ãhrami. Ƴhcãri gobe opu ãhrami erã opu. ĩgu anyu mũru ãhrami. Hebreo ya mera Abadón

waĩcũami ĩġu. Griego ya mera Apolión waĩcũami. Apolión, mari ya mera arĩrã, “Ñero goroweogu” waĩcũgu iimi.

12 Poreroa masare erã ñero pũricũ toara pũhrũ i ñero erã tarimũhtadiro pehrea wahabũ. Iri pũhrũ pesubu ñero tarinirãcoma daja masa.

13 Pũhrũ yuju mojtocũ majarã anyua erã purira pũhrũ gajigũ anyu ĩġu yaru cornetare puriami daja. ĩġu eropa puricũ Goãmũ core niguiri mesague oro mera iira mesague wereniguiri bũsũro carabũ. Iri mesa maja sari wapicũri sarogue wereniguiri bũsũro carabũ.

14 Eropa wereniguiri cornetare purigũre anyure õpa wereniguiri mera bũsũro carabũ:

—Wũariyague Eufrate waĩcũriyague peresu árĩnirãre anyuare wiuque. Erã wapicũrã anyua ãhrima, arĩro carabũ.

15 Eroparĩcũ peegũ anyupũ erãre wapicũrãre wiuami bajarã masare wejẽmorãre. I bojorire, inũre, i horare queoro corerã iiama erã wiumorã wapicũrã anyua. Erã corediro sihajaa. Eropirã wejẽnũgagãrirã iiama. Árĩpehrerã deco mera erabonirãre masare wejẽmorã ãhrama.

16 Eropigũ erã anyua yarã surara, “Oã nũcũ ãhrima,” erã arĩcũ peeabũ. Erã cabayua weca peyarã ãhrama. Doscientos millones surara ãhrama.

17 Eropigũ cabayua erã weca peyarã yũ ãanirã õpa dehyoama. Erã sĩporãrĩre cãhmotari suhri come suhri diari suhri, yahsari suhri, boreri suhri suhricũama. Eropirã cabayuapũ erã dipu yeea diarã iro dopa dehyoama. Erã disirogue peame, imica, azufre ãjũri imica sã wiriabũ.

18 Eropiro cabayua disiro wiriri mera masare wejẽabũ. Árĩpehrerã masa deco erabonirãre masa bajarãre wejẽama. Eropirã peame mera imica mera, azufre ãjũri imica mera bajarã masare wejẽama.

19 Erã cabayua erã disiro wiriri mera wejẽama. Eropirã erã pore mera sã wejẽama daja. Erã pore ojogorogue añaa dipu dopa bejabũ. Eropirã iri pore mera camicũcũ iiama erã masare.

20 Bajarã masa erã wejẽ duhanirãpũ erã mera majarãre wejẽcũ ĩaquererã erã ñeri iirare ne duhubirama. Watẽare umupeo duhubirama. Erã goãmarã wéanirãre umupeo duhubirama. Erã wéanirãpũ oro mera, plata mera, bronce mera, utã mera, yucũ mera erã wéanirã ãhrama. Erã wéanirã ojocaribirama. Peebirama. Ñohmebirama. Erã eropa árĩquerecũ ta erãre masa umupeoama.

21 Eropirã erã wejẽ duhanirã gaji ñeri sãre ne bujawerebirama. Masare erã wejẽrare, erã nome mera erã ñero iirare, erã yajara sãre ne bujawere duhubirama erã.

10

Miri tũrugãre papera tũrugãre aĩgãrimi anyu

1 Pũhrũ gajigũ turagũ anyu Ʃmarogue dijaricũ ñhabũ. Imica curu watope ãhrami. Eropigũ buibugũda ñgũ dipuru weca peyabũ. Ñgũ diapo Ʃmũ majagũ abe iro dopa gosesiriabũ. Ñgũ ñigari peame iro dopa goseabũ.

2 Eropigũ miri tũrugãre papera tũrugãre ñgũ pãra tũrugãre opãmi ñgũ. Ñgũ guburu diayerũ maja guburu mera wũariyague Ʃhraphi niguiami. Ñgũ guburu copũ maja guburupũ yebague Ʃhraphi niguiami.

3 Eropa niguigũ yeea erã gaguiniguero dopa ta ñgũ turaro gaguiniguami. Ñgũ eropa gaguiniguira pũhrũ siete bupua wereniguirã carirama.

4 Erã eropa wereniguicũ peegũ gojanug arabũ yũhũ. Yũ eropa gojanugacũ ta Ʃmarogue yũre wereniguero carabũ.

—Siete bupua erã arĩrare gajirãre werebita. Eropigũ irire goja aĩbita, arĩro carabũ yũre.

5 Ñgũ eropa arĩra pũhrũ wũariyague niguidigũ, yeba niguidigũ anyu ñgũ mojoto diayerũ mera sĩme mujuami Ʃmarogue.

6 Eropa sĩme mujugũ Goãmũ eropa ojocariniguigũ waĩ mera waĩpeoami. Ñgũ Goãmũpũ arĩpeherrerire, Ʃmũsire, Ʃmũsi majarãre, i yebare, i yeba arĩrãre, pagayarire, pagayari majarãre iigũ ãhrimi. Eropigũ õpa arãmi anyu:

—Goãmũ mera diaye arĩgũ iiaa. Iripẽta corerãra.

7 Seis anyua erã corneta dipurure erã purira pũhrũ gajigũ anyu ñgũ puritucũ Goãmũ iribojegue ñgũ “Õpa iigũra,” ñgũ arĩdiro dopa ta iigũcumĩ. Iribojegue masare irire õaro werebiripũ. Pũhrũ ñgũ pohro majarãre, ñgũ yare weremũhtarãre õaro werepehopũ ñgũ. Iri ñgũ werepirare dohpaguere iigũcumĩ, arãmi anyu.

8 Ñgũ eropa arĩra pũhrũ Ʃmarogue yũre wereniguero dopa ta dipaturi wereniguigũ carami daja. Õpa arĩgũ carami yũre:

—Wũariyague niguigũ yebague niguigũ sihĩ anyu pohrogue waque. Eropa wagũ papera tũrugãre ñgũ opari tũrugãre aĩque, arĩgũ carami yũre.

9 Ñgũ eroparĩcũ peegũ anyu pohrogue wahabũ. Ñgũre papera tũrugãre yũ serẽcũ peegũ õpa arĩ yũhriami yũre:

—Aĩque. Eropigũ i papera tũrugãre baque mũhũ. Mũ ne bacũ mome iro dopa õaro imisĩroca. Mũ parugue mũ acura pũhrũ sũia waroca, arãmi yũre.

¹⁰ Īgũ eroparĩcũ peegũ iri tũrugãre anyure yũ aĩra pũhrũ bahabũ. Yũ ne bacũ mome iro dopa imisĩabũ. Yũ ba acura pũhrũ yũ parugue sũiro carabũ yũre.

¹¹ Yũ eropa bara pũhrũ õpa arãmi yũre:

—Dipaturi bajarã masare, macari majarãre, yebari majarãre, baja disirori wereniguirãre, erã tauro oparã sãre pũhrũ erã dohpa waborore wereyumũhtaque, arãmi yũre.

11

Perã Goãmũ yare weremorãre were gojapũ Ñũ marire

¹ Pũhrũ yũre queodigure odoreami Goãmũ. Tuadigupẽ yoadigũ ãhrabũ irigũ. Irigure odoregũ õpa arãmi yũre:

—Yaha wihire queogu waque. Iri wihi majañe yũre umupeori mesa sãre queoque. Eropigũ iri wihiguere masare yũre umupeorã sãre queoque.

² Disiporo wirinũgaropũre queobita. Iripũ yũre gamebirã erã cũhrapirapũ ãhraa. Erã cuarenta y dos aberi gohra Goãmũ ya macare iri maca majarã sãre ñero iirãcoma. Eropigũ queobita iripũre.

³ Eropigũ yahare wererãre perãre obeogũra. Mil do-scientos sesenta ñeri gohra yahare wererãcoma. Co suhri sañanirã árĩrãcoma erã yũ weredorenirã, arĩ wereami yũre.

⁴ —I yeba majarã tauro opũ pohro pegũ olivo waĩcũri yucũ nigũia. Pegũ sihãgori yucũ sã iri yucũ pohro nigũia. Iri yucũ oã perã yahare weremorã iro dopa ãhraa, arĩ wereami daja yũre.

⁵ Eropirã erãre ñhaturirã erãre erã ñero iidiacũ erã disirogue pea porã wirimaaro soe wejẽpehocãroca erãre ñhaturirãre. Eropa ta erãre ñero iirãre wejẽrãcoma erã perã.

⁶ Eropiro erã perã erã deco aridorebiricũ deco arisome. Eropiro yahare erã wereropẽ deco arisome. Eropirã maũrire diyari poyacũ iirãcoma erã. Eropirã i yebare ñero wacũ iirãcoma erã. Árĩpehreri dohpa árĩrore, dohpa árĩrãre, masare ñero wacũ iirãcoma erã. Erã noho gamero iidiaropẽ eropa ñero wacũ iirãcoma i yebare.

⁷ Erã Goãmũ yare weretuhajacũ ãhcãri gobegue árĩgũ ñegũ ñũgũ majagũ wirigũcumĩ. Eropigũ Goãmũ yare wererã erã perã mera gamequeãgũcumĩ. Eropa gamequeãgũ turatarinũgagũ erãre wejẽcãgũcumĩ.

⁸ Īḡu eropa wejēra pūhrū erā ya dūpuri mura wuari maca maja mague oyaroca. Mari Opure Jesucristore erā pabia wejēra maca āhraa iri maca. Iri maca majarā űerā árīrā, Sodoma majarā mura, Egipto majarā mura iro dopa āhrama.

⁹ Erā dūpuri mura oyaro űhrenū ōaro oya, gajinū deco erā ya dūpuri mura iri mare oyaroca. Eropirā árīpehreri yeba majarā yujurāyeri, árīpehreri cururi majarā yujurāyeri, árīpehrerā yare wereniguirā yujurāyeri iri nūcū nūri gohra erā ya dūpuri murare iarācoma. Eropirā iri nūcū nūri gohra erāre yaadoresome.

¹⁰ Erā perā Goāmū yare weremuhtanirā i yeba majarāre erā űero iira dipuwaja moanirā árīrācoma. Eropirā erā eropa sīrinirā árīcū iarā árīpehrero majarā mucubirirācoma. Eropa mucubirirā bosenu ii, erā basi gajinore eropa ocārācoma.

¹¹ Erā eropa iiquerecū űhrenū pūhrū gajinū deco gohra Goāmū erāre masugūcumī daja. Īḡu eropa masucū erā dipaturi wahgānūgajarācoma. Erā eropa wahgānūgajacū iarā árīpehrerā būrigā gūirācoma erāre.

¹² Pūhrū űmarogue būrigā erāre perāre wereniguicū peerācoma masa. Ōpa arīri būsuroca erāre:

—Ōgue mūririque mūa, arīri būsuroca.

Erāre eropa arī wereniguirire būsucū peerā imica cururi watope mūria warācoma. Erāre doonirā mura erā mūriacū iarācoma.

¹³ Erā eropa mūriarisubu yeba turaro űohmeroca. Eropa űohmecū ta iri maca maja wiri baja wiri mihrua dija waroca. Eropirā yeba űohmero mera siete mil masa sīria warācoma. Gajirā dūhyarāpū űca wa, Goāmūre űmaro majagūre “Turagū āhrimi,” arī umupeorācoma pare ĩḡure.

¹⁴ I árīpehreri eropa wara pūhrū pesubu masa erā űero tarituhajanirā árīrācoma. Eropa tarira pūhrūgā ta dipaturi masa mata daja űero tarirācoma.

Seis corneta dipurure erā purira pūhrū gajigū puripū

¹⁵ Pūhrū seis corneta dipurure erā purira pūhrū gajigū anyu ĩḡu yarure puriamī. Īḡu eropa puricū űmarogue turaro wereniguiro carabū. Ōpa arīro carabū:

Dohpague mari Pagū, Cristo mera i yeba majarā tauro opū árīḡūcumī. Eropigū eropa opū árīniguigūcumī Goāmū, arīro carabū.

¹⁶ Eropirā Goāmū core oparā doarigue doarā veinticuatro Jesu yarā oparā Goāmū core mereja, ĩḡure umupeoama.

¹⁷ Eropa umupeorā ōpa arāma:

Gua opa Goãmu, turatariagu ahraa muhu. Muhu negohraguere eropa arĩmuriyoro. Eropigu dohpague sãre eropa arĩniguia. Puhrugue arĩgaca muhu. Mu turari mera masa erã opa mu arĩnugacũ, "Õhaa," arãa gua mure.

¹⁸ Arĩpehrerã i yeba majarã mure gamebirã mu mera guarima. Dohpaguere erãre mu dipuwaja moaburibusu ahraa. Sĩrinirã sãre mu dipuwaja moaburibusu ahraa. Eropiro mu yarãpãre õarire erã iira wajare mu oburinosubu ahraa. Yujurãyeri erã mu yare weremũhtanirã arĩma. Eropirã erã gajirã mu yarã mera arĩpehrerã mure õaro umupeonirã arĩma. Eropigu oparãre, bu arĩrã sãre mu yarã erã arĩcũ iha õaro iiguca muhu erãre. Eropiro i yeba majarãre goroweocorerãre mu cóaburibusuno arĩro iiaa dohpaguere, arĩ umupeoama Jesu yarã oparã Goãmure.

¹⁹ Erã eropa arĩ umupeora puhru umaro maja wihi Goãmũ ya wihi igu pãgũra wihi ihabũ. Eropirã iri wihi arĩri comoro ihabũ gua. Iri comoro pohecague Goãmũ "Masare itamugũra," igu arĩ werepirapũ sañabũ. Gua eropa iacũ ta miamaa, bupu paamaa, gajiropa bũsumaa, i yeba ñohmemaa wahabũ. Deco yũsariyeri deco bũrigã umarogue dijaribũ.

12

Nomeore, pĩru sãre werepũ Ñũ

¹ Puhru i yeba dohpa waborore umarogue dehyoabũ yure. Eropa dehyoari gũhyadiaro maja ahrabũ. Õpa iamũhtabũ: Õmarogue nomeore ihabũ. Igo suhriro abe umu majagu iro dopa goesiriabũ. Eropigo abe ñami majagu weca niguiamo. Opa igu peyarino berore doce necã opari berore peyadigo niguiamo.

² Eropiro igo porãcũboro merogã dũhyabũ. Eropigo igo niji wahgũgo pũriro mera gaguiniguamo.

³ Puhru dipaturi ihabũ daja umarogue: Wũagu pĩrure diagũre ihabũ. Siete dipu dipucũgu ahrami. Arĩpehreri igu dipu oparã erã peyarino berorire peyara dipu dihta ahrabũ. Eropigu diez cusaricũgu ahrami igu.

⁴ Igu pĩguru mera necã dipurure wejẽsiri medijuami. Arĩpehrerã necãre deco gohra wejẽsiri medijuami. Eropigu nomeo porãcũgo pohro niguiami pĩru. Igo magugã dehyoacũ babu iirami.

⁵ Merogã puhrugã ta masa dehyoatuhami majigugã. Arĩpehreri yeba majarã opa arĩbu ahrami igugã. Igu eropa opa turagu arĩcũ masa igũre tarinũgarã yujuro bojesome.

Īġu eropa masa dehyoacũ ta Goãmũ ĭġu doarō pohroġue ĭġuġãre aĩbeocãmi.

⁶ Īġu eropa iicũ nomeorũ masa mariroġue pĩrure duhrigã wahãmo. Goãmũ ĭġu amuyudiroġue duhrigã wahãmo igo. Eroġuere mil doscientos sesenta nũri gohra Goãmũ igore ĩhadibumi.

⁷ Eropirã ũmaroġue gamewejẽnũġãma. Migue waĩcuġu anyu ĭġu yarã anyua sã pĩru mera gamequeãma. Erã eropa gamequeãcũ pĩru ĭġu yarã anyua mera Miguere gamequeãmi.

⁸ Eropirã Migue sã pĩrure tarinũġãma. Eropiġu pĩrure ĭġu yarãre anyuare ũmaroġuere árinemodorebirami.

⁹ Eropiġu wũaġu pĩrure cóãcãmi Goãmũ. Īġu pĩru watĩ ta árĩġu iiami. Satana waĩcuġu áhrimi. Iriboġuere ĭġu pĩru dũpũ dopa deyogũ árĩñumi. Eropiġu árĩpehreri yeba majarãre ġũyagũ áhrimi. Goãmũ ĭġure cóãġu ĭġu yarã anyua mera yebague cohã dijuami.

¹⁰ Pũhrũ ũmaroġue turaro wereniġuicũ peeabũ:

—Dohpague mari Paġu masare taumi pare. Dohpague tamerare mari Paġu mari Opũ árĩġu áhrimi ĭġu turarire ĩhmubu. Eropiġu ĭġu obeodiġu Cristo sã ĭġu opũ árĩrĩre ĭġu turarire ĩhmumi árĩpehrerãre. Watĩre ũmaroġue árĩdigũre cohã dijuami i yebague. Eropiġu ĭġu turarire ĩhmumi mari Paġu. Īġu watĩpũ ũmuri nũcũ, ñamiri nũcũ Jesu yarãre, “Oã ñerã áhrima,” arĩ weresãġu iimi mari Paġure. Eropiġu mari acawererãre Jesu yarãre weresãġu árĩmi.

¹¹ Cristo Cordero waĩcuġu ĭġu di cóãro mera mari acawererã ĭġure umupeorã erã ñeri iirare cóãsũnirã árĩma. Eropa árĩrã watĩre tarinũġãma. Eropirã õari buherire wererã, watĩre tarinũġãma. Īġu yare werera dipuwaja ġajirã erãre wejẽdiaquerecũ ta, Cristo yare duhubirã árĩrã ĭġure tarinũġãma.

¹² Eropirã mũa ũmaro majarã mucubirique. Watĩre ĭġu yebague cohã dijucũ ĩarã mucubirique. Mũa yeba majarãpũ, wũariya majarã sã mojomorocũrã warãca mũa. Mũa pohroġue dijami watĩ. Īġure dipuwaja moaboro merogã dũhyaa. Eropiġu ġuataricãmi ĭġu. Mũa pohroġue ĭġu ejacũ mojomorocũro dujacũ iĩġucumi ĭġu mũare, arĩ ġaġuiniġuero caricũ peeabũ.

¹³ Eropiġu pĩrupũ cohã dijudiġu nomeore, majiġuġã ġagore nũrũsia wahġãmi.

¹⁴ Eropiġu Goãmũ ġaa wũaġu quẽ dũpũre ohami igore masa mariroġue igo wũũ duhri wahġãboro dopa. Eroġue igo ejara pũhrũ ũhre bojori õaro ġaji bojori deco gohra õaro

ĩhadibuami Goãmũ igore. Ĩgũ eropa ĩhadibucũ pĩru igore ñero iimasibirami.

¹⁵ Ero igo árĩcũ ĩagũ pĩru igore miudiagũ wũaro decore etocabeocãmi.

¹⁶ Ĩgũ eropa iiquerecũ yebapũ igore itamuabũ. Pĩru ĩgũ disiro wiriri decore yebapũ yehrimaa wa uju aĩbeocãbũ.

¹⁷⁻¹⁸ Eropã wacũ ĩagũ pĩru guatariami. Eropã guagũ yujurãyeri igo pãramerã árĩturiarã mera gamewejẽgũ wahãmi. Erãpũ Goãmũ dorerire iirã ãhrama. Jesu yare õari buherire ne duhubirã ãhrama. Erã mera gamewejẽgũ wahãmi. Eropigũ pĩru wũariya tũro pohro niguiami.

13

Perã nũgũ majarãre werepũ Ñũ

¹ Wũariya tũro niguiũ, nũgũ majagũ iriya árĩgũre ĩgũ wahgãpacũ ĩhabũ. Ĩgũ siete dipu, diez gohra cusaricũgũ ãhrami. Ĩgũ cusari oparã erã peyarino berori peyãmi. Eropiro ĩgũ dipure ĩgũ waĩre ĩgũ gojatura ãhrabũ. Ĩgũ waĩ iri ñeri waĩ árĩro Goãmũre ĩhaturiri waĩ ãhrabũ.

² Eropigũ ĩgũ nũgũ majagũ yee dorogũ guagũ iro dopa bejãmi. Eropigũ bugu iro dopa guburicũgũ ãhrami. Eropigũ yee wũagũro iro dopa disirocũgũ ãhrami. Eropigũ pĩrupũ ĩgũ turarire ohami nũgũ majagũre. Eropã ogũ ĩgũre ĩgũ opũ doaro apigũ ĩgũ iro dopa ta masa bajarãre dorecũ iiami pĩru nũgũ majagũre.

³ Ĩgũ nũgũ majagũ dipuru yuju dipuru camirocãri dipuru dopa bejabũ. Iri camiro ĩgũre wejẽbocurira camiro árĩquerero yarira camiro ãhrabũ. Iri dipuru ojocaricũ ĩarã, uca wahãma i yeba majarã árĩpehrerã. Eropã ĩha ucarã, nũgũ majagũre “Turagũ ãhrimi,” arĩ umupeoama. Eropirã ĩgũ yarã wahãma masa.

⁴ Eropirã nũgũ majagũre pĩru ĩgũ turarire ocũ ĩarã masapũ ĩgũre pĩrũre mereja umupeoama. Eropirã nũgũ majagũ sãre mereja ĩgũre umupeoama. Eropã umupeorã õpa arãma:

—Ne gajigũ mũ iro dopa turagũ marimi. Gajigũ mũre ne tarinũgamasibeami, arĩ umupeoama masa nũgũ majagũre.

⁵ Eropigũ ĩgũ nũgũ majagũ “Turatariagũ ãhrimi,” erã ĩgũre arĩquerecũ ta, ĩgũ Goãmũre ñero wereniguiquerecũ ta eropa pepicãnimi Goãmũpũ. Eropigũ cuarenta y dos aberi gohra ĩgũ nũgũ majagũ masare dorenigũcumi. Iripẽta ĩgũ opũ árĩcũ gahmemi Goãmũ.

⁶ Eropigũ Goãmũre ñero wereniguiami ĩgũ. Ĩgũ waĩre, ĩgũ wihire, umarogue ĩgũ árĩro, ĩgũ pohro majarã sãre ñero wereniguiami nũgũ majagũ.

⁷ Eropigu Goãmũ yarãre gamewejẽgu erãre tarinũgãmi. Ìgu eropa tarinũgaquerẽcũ ta eropa ìacãniami Goãmũ. Goãmũ ìgu eropa iidorebircũre iisome ìgu. Eropigu áripehrerã i yeba majarã tauro opu árinirami nũgu majagu. Áripehreri cururi majarã, áripehreri yebari majarã tauro, áripehreri macari majarã tauro, áripehrerã yare werenigu-irã tauro opu árinirami ìgu.

⁸ Eropirã áripehrerã i yeba majarã ìgu nũgu majagu pohro mereja ìgũre umupeorãcoma Goãmũ yarã áribirãpũ. I yebare Goãmũ ìgu ìhacũnuguboro core ìgu yarã árimorãre ìgu mera áriniguimorãre erã waĩre gojatutuhañumi. Iripũ ìgu eropa gojaturapũ Cordero erã wejẽdigu yapũ ãhraa. Iripũ erã waĩre gojatubirã dihta Goãmũ yarã áribirã nũgu majagũre umupeorãcoma.

⁹ Gamiricũrã ãhraa mũa. Eropirã peeque mũa Jesu yarã árirã.

¹⁰ Áripehrerã mũare peresu iinirãre erã sãre peresu iigucumi pũhrũ. Áripehrerã masare ñose wejẽnirãre erã sãre ñose wejẽgucumi pũhrũ. Irire masirã mari Goãmũ yarã ñero tariquererã ta ìgũre cóãbircãrã. Eropirã yujuro boje ìgũre guñaturãrã.

¹¹ Pũhrũ gajigu nũgu majagũre ìhabũ daja. Yeba pohecague ìgu áridigu ìgu wiriricũ ìhabũ. Pcusaro oveja cusaro iro dopa bejari cusaro cusarocũgu ãhrami. Eropa áriquerẽgu pĩru iro dopa wereniguĩami.

¹² Eropigu nũgu majagu árimũhtadigupũ pũhrũ áridigũre opu acuami. Ìgu eropa opu acugupũ áripehreri yeba majarãre árimũhtadire umupeodoreami. Árimũhtadi nũgu majagu erã wejẽbocuridi camiro yaridigu ãhrami.

¹³ Eropigu pũhrũ áridigu deyoro moarire ii ìhmuami masa erã ìha ucaboro dopa. Eropa iigu masa erã ìaro peame wũari peame umarogẽ dijericũ iiami.

¹⁴ Eropigu árimũhtadigu ìgu ìhuro gajigu nũgu majagupũ deyoro moari mera masare gũyãmi, "Ìhĩ mũa umupeobu ãhrimi," arĩgu. Eropigu ìgu gajigu nũgu majagu árimũhtadigũre wéadoreami masare. Ìgu árimũhtadigu ñoserimiji mera erã ñosedigu áriquerẽgu ta ojocarigu ãhrami. Ìgu iro dopa bejagũre ta wéadoreami gajigu nũgu majagu masare. Erã eropa iicũ ìagu Goãmũ dooquerẽgu ta eropa ìacãniami.

¹⁵ Eropigu pũhrũ áridigu nũgu majagupũ árimũhtadire wéadigũre ojocaricũ iiami masare ìgu doreboro dopa. Eropigu wéadigupũ erã ìgũre umupeobirãre wejẽdoreami.

¹⁶ Eropigu árīpehrerāre erā mojtotori diayepu sāre ĩgu waĩre gojatudoreami nuġu majagu puhru árīdigu. Erā mojtotorire gojatubirininirāre erā diaporire gojatudoreami ĩgu waĩre. Bu árīrāre, oparāre, doberi oparāre, mojomorocurāre, erā pohro majarāre, erā pohro majarā árībirāre, árīpehrerāre ĩgu waĩre gojatudoreami.

¹⁷ ĩgu árīmūhtadigu nuġu majagu ĩgu waĩre, ĩgu numerore gojatubirāre ne asūdorebirami. Eropigu erāre duadorebirami.

¹⁸ Irire ōaro masique m̄ua. Pee masirā árīrā nuġu majagu ĩgu numerore ōaro ĩha masique. Iri numero ūma waĩ iro dopa āhraa. Iri numero seiscientos sesenta y seis gohra āhraa.

14

Goām̄u ĩgu taunirā mama bayariñere bayañorā

¹ Puhr̄u Sión waĩcudigu utāgu weca niguigure Corderore ĩhabu. ĩgu mera ciento cuarenta y cuatro mil masa āhrama. Erā ĩgu ya waĩre ĩgu Pagu ya waĩ sāre erā diaporire erā gojatunirā āhrama.

² Erāre yu ĩacũ ta ūmarogue busuro carabu. Wuari utāmu busuro dopa ta, bupu ĩgu wuaro busuro dopa ta busuro carabu. Eropigu arpa waĩcurire erā buamutēro dopa ta busuro carabu.

³ Erā ciento cuarenta y cuatro mil masa bayarā āhrama. Ero opu ĩgu doaro pohro wapicurā gajiropa bejarā, Jesu yarā oparā sã core bayarā āhrama erā. Erā bayariñe mama bayariñe āhrabu. Iri bayarire erā dihta masiama. Cristo ĩgu taunirā dihta iri bayarire masiama. Erā i yeba árīnirā m̄ura ĩgu aĩ mujunirā āhrama.

⁴ “Ne ñerire iisome,” arīnirā ñerire iibirinirā āhrama. Ne erā yujusubugā nome mera ñero iibirinirā āhrama. Eropirā Corderore ĩhacūnirā árīrā, ĩgu yare eropa iiniguimurama. Eropigu erāre ñerā watope árīnirāre ĩgu taumorāre aĩami Goām̄u. Eropa ĩgu taunirā árīrā, Goām̄u yarā árīmorā, Cordero yarā sã árīmūhtanirā āhrama.

⁵ Eropirā erā mera majarā ne yujugu guyagu marami. Eropirā Goām̄u ĩgu pepicũ ñeri iira dipuwaja marirā āhrama erā.

Urerā anyua weremedijuñorā

⁶ Puhr̄u ūmarogue wuagure anyure ĩhabu. ĩgu i yeba majarāre árīpehreri cururi majarāre, árīpehrerā yare wereniguirāre, árīpehreri yebari majarāre ōari buherire werebu āhrami. Iri buheri ne gohrotobea. Eropa árīnigucāa.

⁷ Eropigu anyu gaguinigu òpa arĩ medijuami:

—Goãmure güique. “Turatariagu, òatariagu àhrimi,” arĩ umupeoque ìgure. Dohpaguere masare ìgu dipuwaja moaburibusu árĩro iiaa. Ìgu umusire, yebare, pagayarire, mutayarigã sãre iidigu àhrimi. Eropirã ìgure mereja umupeoque, arĩ gaguinigi dijuami anyu.

⁸ Ìgu eropa arĩra pũhrũ gajigu anyu umaro wũũgu òpa arĩ medijuami:

—Erãre cóãcãmi. Wũari maca Babilonia waĩcũri maca majarãre cóãcãmi Goãmũ. Erã ìgu cóãnirãpu árĩpehrerã gajirãre ñero iicũ iima. Masa erãre ìhacũrã, ñerire ùaribejarã, goãmarã wéanirãre umupeoma. Merericũrã vinore erã turaro ùaribejaro dopa ta erã ñerire turaro ùaribejama Babilonia majarãre ìhacũrã, arĩ were medijuami gajigu anyu.

⁹⁻¹⁰ Erã perã anyua eropa arĩra pũhrũ gajigu anyu erã pũhrũ wũũgu gaguinigi òpa arĩ medijuami ìgu sã:

—Árĩpehrerã nũgu majagure umupeorãre, ìgure wéadigure umupeorãre erã diaporire, erã mojotorire ìgu waĩre gojatunirãre dipuwaja moagũcumi Goãmũ. Erã mera guagu erã tamerare turaro dipuwaja moagũcumi Goãmũ. Eropigu Goãmũ erãre bũrigã dipuwaja moaniguigũcumi cãdijiro mariro. Nũgu majagure umupeorã árĩpehrerã peamegue warãcoma. Eroque bũrigã pũriroca erãre. Azufre waĩcũri mera erã dihura peame árĩroca. Goãmũ yarã anyua, Cordero sã erã ìhuro ñero tarirãcoma erã.

¹¹ Iri peame eropa imicacũniguicãroca. Ne yarisome. Erãre eropa pũriniguicũ iiroca. Árĩpehrerã nũgu majagure mereja umupeorãre eropa pũriniguicroca. Ùmarĩ sãre, ñamiri sãre eropa pũriniguicãroca sooro mariro erãre. Ìgu nũgu majagure ìgu wéadigure umupeorã, ìgu waĩre erã gojatunirã sã, eropa ta ñero tarirãcoma, arĩ medijuami anyu.

¹² Eropigu òpa arĩ werea mũare ire: Mũa erã eropa ñero tariborore masirã, Goãmũ yarã ìgu dorerire iirã, Jesure cóãbirã árĩrã, ìgu yare duhubiricãque. Ñero tarirã árĩquererã ta Goãmũ yare duhubiricãque, arãa yũhũ mũare.

¹³ Pũhrũ umarogue yãre wereniguicroca caracũ peabũ daja. Òpa arãmi yãre:

—Ire gojaque mũhũ. Goãmũ yarã ìgure cóãbirã árĩnirã dohpaguere mũa sĩrira pũhrũ sãre òaro mucubirirã árĩrãca mũa, arĩ medijugũ carami yãre. Ìgu eropa arĩra pũhrũ Espĩritu Santopũ òpa arĩnemoami daja:

—Eropa ta āhraa. Diaye ta āhraa. Erā turaro erā mohmerire duhpiicā soorācoma. Ūmarogue erā wacū ōaro erā iirare guñagucumi Goāmū. Eropigū erāre ōaro iigucumi. Eropirā erā mucubirirā árĩrācoma, arĩnemoami Espĩritu Santo.

Pohe maja oteri dũcare mari beye aĩro dopa ta Goāmū ĩgū yarāre beye aĩgucumi. Nērāpũre boje beye dobogucumi, arĩ gojañumi Nũ

¹⁴ Pũhrū imica curu boreri curure ĩhabū. Iri curu weca masū dopa bejagū doámi. ĩgū oro bero opū ĩgū peyarino berore peyámi. Eropigū matamiji usiri mijire opámi ĩgū.

¹⁵ Pũhrū gajigū anyu Goāmū wihigue árĩdigū wirirami. Eropa wiririgū turaro gaguiniami imica curu weca doagũre:

—Mũhū matamiji mera pohe maja dũcare i yeba maja dũcare tabe aĩpehocāque. Dohpaguere mũ queodiro ejaa. Dũca boretuhabū, arāmi anyu.

¹⁶ ĩgū eroparĩcū peegū ĩgū matamiji mera i yebare tārānugami ĩgū imica curu weca doagū. Eropa tārānugagū i yeba maja dũcare aĩro dopa iiami.

¹⁷ Pũhrū gajigū anyu sã Goāmū wihigue árĩdigū wirirami. ĩgū sã matamiji usirimijire opámi.

¹⁸ Eropigū gajigū anyu Goāmũre umupeori mesa pohrogue árĩdigū wirirami. ĩgũpũ mesa maja peamere ĩhadibugū āhrami. Eropa wiririgū matamiji usirimiji opagũre gaguiniguiami:

—Mũhū matamiji mera i yeba árĩri pohere, igui pohe maja dũcare aĩque. Iguipũ ñiituhabū, arĩ gaguiniguiami.

¹⁹ ĩgū eroparĩcū peegū anyu ĩgū matamiji mera i yebare tārāgū, iguitõrĩre wĩrita aĩami. ĩgū eropa iira pũhrū iritõrĩre iguitõrĩre ĩgū ñatĩarogue cõhámĩ. ĩgū eropa ñatĩaro dopa ta Goāmū ĩgũre gamebirāre turaro guagū, dipuwaja moagucumi.

²⁰ Iri maca tũro pohro erā ñatĩaro iri iguitõrĩre ñatĩama. Ero erā ñatĩacū igui deco wiriro dopa di wiriabū. Tre-scientos kilõmetros yoariya, yuju metro metro ōaro gajĩ metro deco ũhcāriya āhrabū di mera. Irĩre ĩha masiabū. Yujunū anyu Goāmũre gamebirāre ñerĩre iinĩrāre gameneo erā ñeri iira dipuwaja moagucumi. ĩgū eropiicū masa bajarā sĩrirācoma. Eropa sĩrirā di pagari cõārācoma, arĩ masiabū yuhū.

15

Masa erā ñero tarĩborore anyua apituñorā masare

1 Pũhrũ Ʃmarogue gajiropa árĩrore ĩhabũ. Gũhyadiaro árĩro i yebague dohpa waborore ĩhmuriĩe āhrabũ. Ōpa ĩhabũ: Siete anyua āhrama. Goāmũ guagu siete suburi masare dipuwaja moatubu iiami. Eropirā erā siete anyuapũ dipuwaja moadore ĩgũ apimorā āhrama.

2 Anyuare yũ ĩara pũhrũ wũariyare ōaro deco sũririya dopa árĩriyare ĩhabũ. Iriya peame mera árĩriya āhrabũ. Eropigũ iriya pohro niguirāre nũgũ majagũre ĩgũre wéadigũ sāre tarinũganirāre ĩhabũ. Erā nũgũ majagũ numerore ĩgũ ya waĩ maja numerore gojatudorebirinirā āhrama. Ero niguirā arpa waĩcũri bũamutĩre opāma. Iri bũamutĩri Goāmũ ĩgũ ora āhrabũ.

3 Eropirā Goāmũ pohro majagũ Moise ya bayarire bayarā iياما. Cordero ya bayariĩe sāre bayarā iياما. Ōpa arĩ bayāma:

Gũa opu mũhũ Goāmũ turatariagu āhraa. Mũ iirare ĩarā ĩha Ʃca wahaa gũa. Mũ iira ōataria. Mũhũ árĩpehreri yeba majarā tauro opu āhraa. Ōaro gũyaro mariro diaye iiaa mũhũ.

4 Árĩpehrerā mũre gũima. Árĩpehrerā mũre “Turagu āhrimi,” arĩrācoma. Mũ dihta ñeri marigũ āhraa. Árĩpehrerā i yeba majarā mũ pohroque ejarā mereja mũre umupeorācoma. Eropa ta iirācoma erā árĩpehrerā ōaro mũ iirare ĩarā, arĩ bayarā iياما erā.

5 Pũhrũ Ʃmarogue ĩhamemujugũ, Goāmũ ya wihire pāgũra wihire ĩhabũ. Iri wihigue Goāmũ ĩgũ doreri ĩgũ gojara mijiri Ʃtā mijiri erā dibura mijiri āhrabũ.

6 Iri wihire yũ ĩacũ ta siete anyua iri wihi pohecague árĩnirā wirirama. Erā Goāmũ ĩgũ dipuwaja moadoregũ ĩgũ apimorā āhrama. Erā nũcũ erā dipuwaja moaburire opāma erā anyua. Ōari suhri, boreri suhricũrā āhrama. Eropiro erā coretihbi weca oro gasiro mera tuādiunirā āhrama.

7 Iri wihigue árĩnirā erā wiriricũ wapicũrā gajiropa bejarā mera majagũ erāre siete anyuare oroparire ohami. Iripari Goāmũ gua ĩgũ dipuwaja moadoreburi mera ōaro Ʃjũtũriabũ iripari. ĩgũ Goāmũ eropa árĩniguigũ āhrimi.

8 ĩgũ iriparire erāre ocũ ta Goāmũ wihi pohecague ĩgũ gosesiriri mera ĩgũ turari mera imicacũ sehya wahabũ. Iri wihi eropa imicacũ sehya wacũ iri wihire ne yujugũ ñaja masiya marabũ. Siete anyua Goāmũ dipuwaja moadoregũ ĩgũ apidiro dopa ta erā masare dipuwaja moatura pũhrũ dipaturi iri wihigue ñajamasirācoma daja. ĩgũ dipuwaja moaboro core ñaja masiya mara. apidiro dopa ta erā masare dipuwaja moatura pũhrũ dipaturi iri wihigue

ñajamasirācoma daja. Īḡu dipuwaja moaboro core ñaja masiya mara.

16

Goām̄ masare ĩḡu dipuwaja moaborore werep̄u

1 P̄h̄r̄u Goām̄ wihigue turaro wereniguiro carab̄u. Siete anyuare wereḡu iḡu carami:

—Goām̄ ĩḡure tarin̄aganirā mera guami. Eropirā ĩḡu dipuwaja moadorerare iique. Eropirā dohpaguere siete pari dic̄urire yebague pisiri medijurā waque i yeba majarāre, arī wereniguiḡu carami.

2 Eroparīc̄ū peeḡu ár̄im̄uhtadiḡu anyu ĩḡu oparipa dic̄urire yebague pisiri medijuami. Īḡu eropa pisiri medijuc̄ū n̄ḡu majaḡu waire gojatunirā ĩḡure wéadiḡure umupeonirā ñero camic̄uama. Iri camī turaro p̄ūriyoro erāre.

3 Īḡu eropa pisirira p̄h̄r̄u gajiḡu anyu daja ĩḡu oparipa dic̄urire pisiri medijuami daja w̄ariyague. Īḡu eropa pisiric̄ū iriya diya wahab̄u. S̄iridiḡu di iro dopa āhrab̄u iri di. Eropa wac̄ū iriya pohecague ár̄inirā s̄iripehrea waháma.

4 Perā eropa pisiri dijura p̄h̄r̄u gajiḡu anyu ĩḡu oparipa dic̄urire pisiri medijuami daja maurigue, iri mauri diparigue s̄are. Īḡu eropa pisiric̄ū mauri diyari dihta wahab̄u.

5 Eropa wac̄ū ĩaḡu gajiḡu anyu maurire coreḡu ōpa arīḡu carami:

—Goām̄, m̄h̄u ñeri mariḡu āhraa. Dohpague s̄are eropa ár̄iniguic̄aḡu āhraa m̄h̄u. Iribojegue s̄are eropa ár̄iniguic̄am̄urib̄u m̄h̄u. Eropiḡu dipuwaja moaḡu diyarire iḡu diaye iib̄u m̄h̄u.

6 N̄ḡu majaḡu yarāp̄u m̄u yarāre wejērā di cóāc̄ū iima. M̄u yare wererā s̄are wejērā di cóāc̄ū iima erā. Erā eropa wejēra dipuwaja iriyari diyari wahab̄u erā ihriburi. Ōpa ta m̄u iic̄ū gahmeama erā, arīḡu carami maurire coreḡu anyu.

7 Īḡu eropa arīra p̄h̄r̄u Goām̄ure umupeori mesague wereniguiro carab̄u daja:

—Eropa ta āhraa. Goām̄ ḡua op̄u turatariaḡu āhraa m̄h̄u. Ḡuyaro mariro, queoro masare beye, dipuwaja moaa m̄h̄u, arī wereniguiro carab̄u.

8 Ūrerā anyua erā pisirira p̄h̄r̄u gajiḡu anyu ĩḡu oparipa dic̄urire pisiri medijuami daja. Abe ūm̄u majaḡu weca pisiri medijuami. Īḡu eropa pisiric̄ū abere masare turaro asic̄ū iiami Goām̄.

9 Eropiḡu abe ūm̄u majaḡu masare turaro asiami. Erāre eropa asic̄ū erā Goām̄ erāre ĩḡu dipuwaja moadorec̄ū

masirã, ïgure ñero wereniguiama masa. Eropa ñero tariquererã ta erã ñero iirare ne bujawerebirama. Eropirã duhubirama. Goãmure “Turagu ãhrimi,” arĩ umupeodiabirama.

¹⁰ Wapicurã anyua erã pisirira pũhrũ gajigũ anyu daja ïgu oparipa dicũre pisiri medijuami daja. Nũgu majagu ïgu doaro weca pisiri medijuami. Opũ doaro ãhrabũ ïgu doaro. ïgu eropa pisirira pũhrũ ïgu yarã árĩri yebague naitĩaro wahabũ. Eropirã ïgu yarã masa ñero pũricũ gũcũre cũridihuama.

¹¹ Erãre ñero pũricũ ta, erã ñero camicurã ta Goãmure umaro majagure ñero wereniguiama. Erã ñero iirapure bujawerebirama. Eropirã irire duhubirama.

¹² Yuju mojotocũ majarã anyua erã pisirira pũhrũ gajigũ anyu daja ïgu oparipa dicũre pisiri medijuami daja. Eufrate waĩcũriya wũariyague pisiri medijuami. ïgu eropa pisiricũ iriya bojomerea wahabũ. Abe mũririro majarã oparã erã gamewejẽrã warã erã iriya taribujariboro dopa eropa iiami.

¹³ Pũhrũ urerã watẽare tarumurã iro dopa bejarãre ïhabũ. Yujugũ tarubũgu pĩru pohecague árĩdigũ ïgu disirogue wirirami. Gajigũ tarubũgu watĩ nũgu majagu disirogue wirirami. Gajigũ tarubũgu watĩ daja “Goãmũ yare weregu ãhraa,” arĩ gũyadigũ ya disirogue wirirami.

¹⁴ Eropirã erã urerã watẽa tarumurã iro dopa bejarã deyoro moarire ii ïhmurã ãhrama. Eropirã árĩpehrero majarã oparãre gamenerecũ iama erã basi Goãmũ mera gamewejẽdorerã. Erã eropa gamewejẽburinũ Goãmũ turatariagu árĩpehrerãre ïgu dipuwaja moaburinũ, pehreburinũ árĩroca.

¹⁵ Ero coregue õpa arĩmi Jesu gũare: ïaque mũa. Yajari masũ ïgu yajagu ariro dopa ta yũ sã guñaña mariro arigũca. Yũ ariborore õaro coredigũ mucubirigũ árĩgũcumĩ. ïgu yaha árĩburire iinigidigũ ñeri marigũ mucubirigũcumĩ. Yũ mera árĩgũcumĩ. Eropa iidigũ árĩgu yũ dujaricũ gũhyasĩrisome ïgu, arĩmi Jesu gũare.

¹⁶ Eropirã urerã watẽa i yeba majarã tauro oparãre gamewejẽcũ iituhãma. Erã gamewejẽro Hebreo ya disiro mera Armagedón waĩcũa.

¹⁷ Seis anyua erã pisirira pũhrũ daja gajigũ anyu ïgu oparipa dicũre imica cururi weca pisiri medijuami daja. ïgu eropa pisirira pũhrũ Goãmũ wihigue ïgu opũ doarogue turaro wereniguiro carabũ:

—Iripẽta árĩroca, arĩro carabũ.

18 Īḡu eroparīcū ta miamaa, bupu pamaa, gajiropa busūmaa, guhyaro yeba ñohmeabu. I yeba masa erā árīnugara pūhrū eropa siari ñohmehirabu i yeba. Gajisubu ñohmediro tauro guhyaro yeba ñohmemaabu.

19 Eropa ñohmecū wuari macare Babilonia waĩcūri macare uhrema yehremaa wahabu. Eropiro paga macari i yeba árīri macari dija wahabu. Eropigu Babilonia waĩcūri maca majarāre wuari maca majarāre guñami Goāmū erāre dipuwaja moabu. Erā ñerire iiri dipuwaja erā mera turaro guāmi. Eropa guagu erāre burigā dipuwaja moāmi.

20 Īḡu eropa iicū árīpehreri nūguri, utā yucu sã pehrea wahabu. Eropiro ne marabu.

21 Eropiro decoyeri pagayeri yusariyeri yebague masa weca dijarabu. Árīpehreri decoyeri cuarenta kilo nūcūriyeri āhrabu. Erā weca iri eropa dijaricū Goāmū erāre ĩḡu turaro dipuwaja moacū masirā ñero wereniguiama masa Goāmure.

17

Ñerire iigore dipuwaja moadoregucumi, arĩ werepu Ñu

1 Pūhrū siete parire oparā anyua mera majagu yu pohrogue eragu ōpa arāmi yure:

—Īagu arique. Diari bajayari weca doagore ūma mera ñero iiricudigore Goāmū ĩḡu dipuwaja moaborore ĩagu arique mūhū.

2 I yeba majarā oparā igo mera ñero iiro dopa ta igo yapure gamema. Goāmūpūre gamebirama. I yeba majarāre igo sihu merēcū iiro dopa ta, erā mera igo ñero iiro dopa ta igo masare ñero iirire ūaribejacū iimo igo. Eropa iigo árīpehreri ñerire erā iicū iimurimo igo masare, arĩ wereami anyu yure.

3 Īḡu eropa arīra pūhrū Espiritu Santo yure deyoro moarire ĩacū iiami. Eropigu anyu masa marirogue aĩ wahgāmi yure. Ero igo nomeore ĩhabū. Igo nūgu majagu diagu weca peyago āhramo. Nūgu majagupu ĩḡu dupu baja waĩ erā gojatudigu āhrami. Iri waĩ ñeri waĩ Goāmure ñeri wereniguiiri waĩ āhrabu. Eropigu siete dipucūgu, diez gohra cusaricūgu āhrami nūgu majagu.

4 Eropigo nomeopū ōaro yahsari suhri oparā erā sañarino suhrire sañadigo āhramo. Diari suhri sãre sañadigo āhramo. Baja orore, wajacūri utāre, perlayeri sãre tuhura suhrirore sañadigo āhramo igo. Eropigo oropare opámo igo. Iripare dicūri ñeri igo iira āhrabu. Ñero iigo burigā ñero iidigo árīmo igo. Iri ñeri Goāmū ĩḡu ĩadiabirira āhrabu.

⁵ Igo diapo igo waĩ erã gojatudigo ãhramo. Iri waĩre õaro masibea mari. Õpa arĩ gojatura ãhrabu igo diapogue: “Wuari maca Babilonia ãhrimo. Igo árĩpehreri ñeri iinugadigo ãhrimo. Árĩpehrero majarã erã ñerire, Goãmure erã gamebiririre iinugadigo ãhrimo. Eopirã erã igore ñhacũrã ñetariaro iirã iima,” arĩ, igo diapore erã gojatudigo ãhramo.

⁶ Eropa igore ñagu igo bajarã Goãmũ yarãre igo wejẽdigo árĩcũ masiabũ yũhũ. Mererã erã mucubiro dopa ta igo erãre wejẽgo erã di cóacũ ñago mucubiridigo ãhramo igo. Jesure erã cóãbiriri dipuwaja erãre wejẽdigo ãhramo igo.

Igore ñagu, ñha uca wahabu.

⁷ Eropigu ñgu anyu arãmi yũre:

—¿Duhpigu ñha uca wahari mũhũ? arãmi yũre. —Mũ masibirirare mũre ñhmugũra. Igo nomeore mũre weregũra. Igo peyagu sãre weregũra. ñgu nũgu majagu ãhrimi. Eropigu siete dipucũgu, diez cusaricũgu ãhrimi.

⁸ ñgu mũ ñadigu iribojegue árĩdigũ árĩmi. Dohpaguere marimi ñgu. Pũhrũ ñgu ñhcãri gobegue árĩdigũ wiriri dehyoagũcumi daja. ñgu eropa wiririra pũhrũ dederebu peamegue wagũcumi. I yeba majarã ñgu dehyoacũ ñha uca wa, ñgure umupeorãcoma. I yeba árĩboro core Goãmũ ñgu yarã árĩmorãre erã waĩre gojatudigu árĩmi. ñgu gojatubirininã ãhrima nũgu majagure umupeorã. ñgũpũ iribojegue árĩdi árĩmi. Dohpaguepũre marimi. Pũhrũ dipaturi dehyoagũcumi daja. Eopirã masa ñgu dehyoacũ ñarã, ñha uca warãcoma.

⁹ “Dohpaguere yũ wereburire õaro masidiarã, õaro peerãca mũa, arĩnemoami yũre daja. Eopirã pee masirã árĩque mũa. Nũgu majagu dipu, siete dipu siete utã yucũ iro dopa ãhraa. Iri utã yucũ weca peyamo igo ñero iiricũgo.

¹⁰ Iri dipu siete oparã sã iro dopa ãhraa. Bajarã masa tauro oparã ãhrima. Cinco oparãre cóãtuhama. Gajigu erã pũhrũ árĩgu opu ãhrimi dohpaguere. Gajigũpũ pũhrũ opu ñajagũcumi. Eropa ñajagu merogã opu árĩgũcumi ñgu.

¹¹ Eropigu nũgu majagu diagu core árĩdigũ, dohpaguere marigu erã siete oparã pũhrũ opu árĩgũcumi. Siete oparã mera majagu ãhrimi. Pũhrũ peamegue dederea wagũcumi.

¹² “Nũgu majagu cusari diez cusari diez oparã iro dopa ãhraa. Bajarã masa tauro oparã ãhrima. Erã oparã ñajanibeama dohpa. Pũhrũgue oparã ñajarã merogã oparã árĩrãcoma. Yoari boje oparã árĩdoresome erãre. Eropa oparã árĩrã nũgu majagu mera oparã árĩrãcoma.

¹³ Erã diez oparã yujuro mera pepirã árĩrãcoma. Eropirã erã nũgũ majagũre erã ya yebari majarã tauro opu acurãcoma.

¹⁴ Eropirã Cordero mera gamewejẽ warãcoma erã. Erã eropa gamewejẽquerecũ ta Cordero ĩgũ beyenirã mera ĩgũre ne cóãbirinirã mera erãre tarinũgarãcoma. ĩgũ árĩpehrerã gajirã tauro opu ãhrimi. Eropigũ erãre tarinũgagũcumi," arãmi anyu yũre.

¹⁵ Ire yũre werenemoami anyu:

—Ñero iiricũgo mauri weca doago iimo. Iri mauri õpa iro dopa ãhraa: Baja yebari majarã, baja cururi majarã, baja disiri wereniguirã iro dopa ãhraa iri mauri. Erã bajarã weca ãhrimo igo.

¹⁶ Nũgũ majagũ, diez oparã mera ñero iiricũgore ĩhaturirãcoma. Erã diez oparã nũgũ majagũ mera igore goroweopeho igo yare emapehocã, suhri marigo cóãrãcoma igore. Eropa iirã igo dũpũre barãcoma. Erã eropa iira pũhrũ igore soepehocãrãcoma.

¹⁷ Erã diez oparã yujuro mera pepirã nũgũ majagũre erã ya yeba majarã tauro opu acurãcoma. Erã eropa iicũ apimi Goãmũ ĩgũ gamediro dopa ta iibure. Eropigũ nũgũ majagũ opu árĩgũcumi. Árĩpehreri Goãmũ ĩgũ iribojegue ĩgũ werediro dopa ta ĩgũ iira pũhrũ nũgũ majagũre cóãgũcumi.

¹⁸ Igo mũ ĩadigo mera õpa arĩ buhema: Igo wũari maca Babilonia waĩcũri maca iro dopa ãhrimo. Árĩpehrerã gaji macari majarã tauro ãhrima iri maca majarã, arãmi anyu yũre.

18

Babilonia waĩcũri maca cohoyoro

¹ Pũhrũ gajigũ anyure umarogue دچارigũre ĩhabũ. ĩgũ opu gohra ãhrami. Eropigũ ĩgũ gosesiriri árĩpehrerogũre õaro boyoro wahabũ.

² ĩgũ eropa dijara pũhrũ turaro gaguinigui wereami:

—Cóãcãmi. Babilonia waĩcũri macare wũari macare iri maca majarã sãre cóãcãmi. Dohpagũre watẽa bajarã ñerã dũpũ deyobirã sã iri maca mũraro árĩrã iima. Ñerã mirimagũ porã majarã sã masa erã ĩha doorã iri maca mũrarore árĩrã iima.

³ Iri maca majarã mũra árĩpehreri yeba majarãre goroweonirã árĩma. Eropirã baja yebari majarã tauro oparã iri maca majarãre pee Goãmũre cóãnirã árĩma. Erã ñeri mũaribejarire iidiarã cóãnirã árĩma Goãmũre. Iri maca majarã baja gajinore wajapagari duarire gamenirã

árīma. Eropirā gaji macari majarā erāre duarā pagari dihta wajatanirā árīma, arī wereami anyu.

⁴ Puhru dipaturi umarogue wereniguicū peeabu. Ōpa arīro carabu iri macare cóāboro core īgu wereniguirire:

—Mua yaharā, iri maca majarā mera árībiricāque mua. Iri maca majarā mera mua árīcū mua sāre dipuwaja moagucumi. Eropirā iri macague ñero iirire ihacūbiricāque.

⁵ Ero ñero iira baja árīcāa. Iri maca majarā yoari boje burigā ñerire iituhajama. Eropigu yuhū Goāmū iripēta erā ñero iicū gahmea. Eropigu erāre dipuwaja moaguca.

⁶ Iri maca turaro dipuwajacūporo. Ero majarā masare erā ñero iidiro dopa ta erā sāre ñero taricū iiporo. Masare erā ñero iidiro dopa ta erā tauro erāre ñero dipuwaja moaporo, arīro carabu.

⁷ Iri maca majarā “Ōarā āhraa gua,” arī pepirima. Eropa arī pepirā, wajapagarire wuaro opāma erā. Erā wajapagarire wuaro erā oparopē ta turaro ñero taricū iiporo. Eropirā erāre bujawerecū iiporo. Erā basi ōpa arī pepirima erā: “Gua i yeba majarā oparā árīrā iiaa. Mojomorocurā árībeaa. Eropirā ne ñero tarisome gua,” arī pepirima erā.

⁸ Eropa arī erā pepirā árīcū yujunū erāre guñaña mariro dipuwaja moaburinū árīroca, arīro carabu. Irinū sīriri, dorecūri, co oreri, oaboari árīroca. Eropigu iri macare soepehocāgucumi, arīro carabu. Mua opu Goāmū iri macare dipuwaja moadoregu turatariagu āhrimi. Eropigu eropa ta īgu arīdiro dopa ta iri macare dipuwaja moadoregucumi, arīro carabu umarogue.

⁹ Eropirā Goāmū iri macare īgu dipuwaja moacū iha i yeba majarā oparā burigā bujawere orerācoma. Erā iri maca majarā mera ñerire iirā ōaro mucubirirā árīmūrinirā árīma. Eropirā iri maca ūjucū iārā orerācoma erā.

¹⁰ Īgu iri macare eropa soecū iārā oparā gaji yeba majarā yoarogue ihabeoniguirācoma gua sāre dipuwaja moari arīrā. Ero ihabeoniguirā ōpa arīrācoma:

—Ade. Mojomorocūri maca āhraa Babilonia. Si maca wuari maca turari maca árīrabū. Mata yojaro mera si macare dipuwaja moami, arīrācoma erā.

¹¹ I yeba majarā doberi duarā iri maca ūjucū iārā burigā bujawere orerācoma erā sā. Iri maca pehrecū iārā, erā ya doberire asūrā maricū iārā bujawere orerācoma. Eropirā orerācoma.

¹² Erā aīgārirare, orore, platare, wajacūri utāre, perla waicūri dipu sāre asūrā marirācoma. Eropi gaji erā

aĩgārirare suhri ōarire wajapagarire, yahsari suhrire, oparā erā sañari suhri dopa bejarire, seda waĩcūri suhrire, diari suhrire asūrā marirācoma. Eropi gajī erā aĩgārirare yucū poresuri yucūre asūrā marirācoma. Eropi gajire erā aĩgārirare marfil waĩcūri mera erā iirare, wjacūri yucū mera erā iirare, bronce mera erā iirare, come mera erā iirare, marmol mera erā iirare asūrā marirācoma.

¹³ Eropi erā aĩgārirare canela waĩcūrire, gajī bari usūricū iirire, inciensore, mirra waĩcūri poresurire, gajī poresurire asūrā marirācoma. Eropi gajī erā aĩgārirare vinore, ūyūre, trigo pogare, trigore, wecūare, ovejare, cabayuare, tūruri gasire, pohro majarāre asūrā marirācoma. Eropirā bŭjawererācoma doberi duari masa.

¹⁴ Eropirā ōpa arĩrācoma erā iri maca majarā mūrare:

—Ade. Ñetariaro wahari erā. Árĩpehreri erā mahira mura pehrea wahaa. Eropi arĩpehreri erā ōarire erā wajapagari opara pehrea wahaa. Eropirā iri dipaturi bocosome mari, arĩrācoma doberi duari masa.

¹⁵ Erā iri macare doberi duarā wūaro wajatamūrinirā árĩma. Eropirā erā iri macare yoarogue ĩhu niguirācoma gua säre dipuwaja moari arĩrā ūcarā. Eropa ĩhabeorā iri macare bŭrigā bŭjawere orerācoma.

¹⁶ Ōpa arĩrācoma iri macare:

—Ade. Ñetariaro wahaa iri maca wūari maca. Si maca majarā ōarire opamūririma. Nomeo ōari suhrire, wajapagari suhrire, yahsari suhrire, diari suhri säre sañago dopa ōarire opamūririma. Eropirā oro wajapagari ūtā, perla dipu waĩcūri tuhura suhriro sañamūrima. Wūaro opamūrima si maca majarā.

¹⁷ Eropi mata si maca wūaro dobericūri maca dederea wahaa, arĩrācoma iri macare.

Eropirā árĩpehrerā dohori gasi mera curirā, iri gasi oparā, erā ūma, gajirā wūariyague mohme wjatarā sã iri macare yoarogue ĩhu niguirācoma erā sã.

¹⁸ Ero ĩhabeorā iri macare ūjŭcū ĩarā ōpa arĩ gaguinigurācoma:

—Paga macari si maca iro dopa árĩri macari ne gajī maca mara, arĩ gaguinigurācoma erā.

¹⁹ Eropa bŭjawererā árĩrā erā dipu weca nicure ñaji peorācoma. Eropirā co orerā ōpa arĩrācoma:

—Ade. Ñetariaro wahaa si maca mūraro. Ōari maca árĩribŭ. Árĩpehrerā dohori gasi oparā wūariyague curirā si maca maja doberi mera ōaro wjataribŭ mari. Eropi mata si maca dederepehrea wahaa, arĩrācoma gasi majarā, arĩ werero carabŭ yŭre ūmarogue.

20 —Iri macare ĩġu cóăcũ ĩarã mucubirique mũa, umbero majarãpũ, arĩro carabũ. —Goãmũ yarã, Jesu ĩġu apinirã, ĩġu yare weremũhtanirã árĩpehrerã mũa mucubirique. Iri maca majarã mũare ñero taricũ iima. Erã eropa iira dipuwaja, dipuwaja moami Goãmũ. Eropirã mucubirique mũa, arĩro carabũ.

21 Eropa arĩ wereniguirare peera pũhrũ òpa ĩhabũ yũhũ. Turagũ anyu wũariye utãyere aĩ wahgũ, wũariyague mehyuami. Eropa mehyugũ òpa arãmi:

—Iye utãyeyuriñajadiro dopa ta wũari maca Babilonia waĩcũri maca turaro yuhridijaro bũsũroca. Eropa yuhridijara pũhrũ iri macare dipaturi ĩasome mũa.

22 Iri macare dederea wacũ iigũcumi. Eropiro ne iri macare bayarire mũa peediro dopa árĩsome. Arpa bũamutẽri, flauta dipurure, corneta sãre ne dipaturi peeya mariroca. Eropirã iri maca maricũ ero mohmenirã dipaturi erore mohmesome. Eropiro trigo yeri utã mera erã oera sã ne peeya mariroca.

23 Iri maca boyo oyadiro dopa ne árĩsome. Eropirã mojoto dirinirã erã mucubiri wereniguidiro dopa ne dipaturi árĩsome. Iri maca majarã doberi duarã asũrã mera gajirã tauro opamũrima erã. Eropirã iri maca majarã yeea erã purisiriri mera árĩpehrero majarãre ġũyamũrima. Eropirã ñerire umberbeja, Goãmũpũre gamebirimũrima masa, arãmi yũre turagũ anyu.

24 Iri maca majarã Goãmũ yare weremũhtanirãre gajirã ĩġu yarã sãre árĩpehrero majarãre wejẽmũrinirã arĩma. Erã eropa wejẽra dipuwaja, gaji ñero iira dipuwaja sãre dipuwaja moãmi Goãmũ iri macare.

19

1 Babilonia macare ĩġu cóãrãre yũ ĩara pũhrũ umberogue bajarã gaguiniguirã carama yũ peecũ. Òpa arĩ gaguiniguirã carama:

Aleluya. Goãmũre òaro wereniguirã. Goãmũ marire taugũ ãhrimi. ĩġũre òaro umupeorã. Turatariagũ ãhrimi ĩġu.

2 Ģũyaro mariro queoro iigũ masare dipuwaja moami ĩġu. Ñeri dipuwaja moorãre erãre dipuwaja moabeami. Igo nomeo ñerire iiricũgo Babilonia waĩcũri maca ãhrimo. Iri maca majarãre ĩhacũrã i yeba majarã ñero iimũrima. Eropigũ iri maca majarãre dipuwaja moami Goãmũ. Eropigũ ĩġu dorerire iinirãre ĩġu pohro majarãre erã wejẽra dipuwaja dipuwaja moami ĩġu, arĩ gaguiniguirã carama.

3 Dipaturi gaguiniguirã carama daja:

—Aleluya. Goãmure ðaro wereniguirã. Iri maca ñero iira maca ïgu soera maca eropa imicacãniguicãroca, arĩ gaguiniguirã carama.

⁴ Eropirã veinticuatro Jesu yarã oparã, wapicurã gajiropa bejarã mera mereja, Goãmure mari Pagure ïgu doaro doagure umupeoama. Õpa arĩ umupeoama erã:

—Amén. Aleluya. Eropa ãhraa. Mari Pagure ðaro wereniguirã, arãma erã.

⁵ Pũhrũ opu doarogue ðpa arĩro carabũ:
Mari Opu Goãmure umupeoque. Mũa ïgu pohro majarã,
ïgure umupeorã bu árĩrã, oparã sã árĩpehrerã mũa
ïgure ðaro wereniguique, arĩro carabũ.

Cordero ïgu mojoto diriburinu bosenure wereru Ñu

⁶ Pũhrũ bajarã masa erã wereniguirã caracũ peebũ. Erã utãmu iro dopa bupu iro dopa bũsurã carama yũ peecũ. Õpa arĩ gaguiniguirã carama:

Aleluya. Goãmure ðaro wereniguirã. ïgu mari Opu opu ñajatuhami. Turatariagu ãhrimi ïgu.

⁷⁻⁸ Cordero ïgu mojoto diriburi bosenũ ãhraa dohpaguere. ïgu mojoto diribo ðaro amudigogue ãhrimo. Igo ðari suhrirore gũhrari mariri suhrirore sañatuhamo. Iri suhriro Goãmũ yarã ðarire erã iira iro dopa ãhraa. Eropirã mucubirã mari. Goãmure “Õatariagu ãhrimi,” arĩ umupeorã mari ïgure, arĩ wereniguirã carama.

⁹ Erã eropa arĩra pũhrũ anyupu arãmi yũre:

—Ire goja aĩque. “Cordero ïgu mojoto diriri bosenure ïgu sihubeonirã mucubirã ãhrima,” arĩ goja aĩque, arãmi yũre anyu.

Eropa arĩgu ta ðpa arĩnemoami:

—Diaye ta ãhraa i yũ werera. Goãmũ ya wereniguirã ãhraa, arĩnemoami yũre.

¹⁰ ïgu eroparĩcũ peegu ïgure mereja umupeobu iirabũ. Yũ merejacũ gohra ðpa arãmi yũre:

—Yũre mereja umupeobita. Mũ arĩro dopa ta Goãmũ pohro majagu ta ãhraa yũ sã. Mũ acawererã Jesu yarã árĩpehrerã ïgu ya buherire werenirã iro dopa yũ sã Goãmũ pohro majagu ãhraa. Eropigu Goãmũpũre mereja ïgũpũre umupeoque, arãmi yũre anyu.

Goãmũ yare weremũntanirã iribojegue majarã Espiritu Santo ïgu itamuro mera Jesu ya buherire ta wereyuñuma.

Cabayu boregu weca peyagure wereru Ñu

¹¹ Pũhrũ umaro pãrimaacũ ñhabũ. Ero cabayu boregu ãhrami. ïgu weca peyagu ðpa waĩcũami: ïgu arĩro dopa ta

iigu diaye iigu waĩcuami ĩgu. Eropigu masare dipuwajare moagu ĩgu ĩhaturirã mera gamewejẽgu ðaro guýaro mariro iiami.

¹² ĩgu cuiri peame porã iro dopa ãhrabu. Eropiro ĩgu dipuru weca baja oparã peyari berori ãhrabu. Eropigu ĩgu dũpũre ĩgu waĩre gojatudigu ãhrami. Iri waĩre ĩgu dihta masiami. Gajirã masibirama.

¹³ ĩgu sañariñe yoariñe di tuyariñe ãhrabu. ĩgu òpa waĩcuami: Goãmũ ya wereniguirire weregu waĩcuami ĩgu.

¹⁴ Eropirã ĩgu yarã surara ɯmarogue majarã ĩgũre nurusiãma. Borerã cabayua weca peyarã ãhrama. Òari suhrire boreri suhrire, guhrari mariri suhrire sañanirã ãhrama.

¹⁵ ĩgu erã opu wamũhtadigu ĩgu disiro ñoserimiji usirimiji cuĩuami. Irimiji i yeba majarãre ĩgu tarinũgaburimiji ãhrabu. Eropigu ĩgu turari mera ĩgu dorecũ ne yujugu ĩgũre tarinũgagu ĩgũre bocatiũsome. Igui dipurure erã ñatiãcũ igui deco wiriro dopa ta i yeba majarã ñerãre di wiriroca ĩgu erãre dipuwaja moacũ. Goãmũ erã mera guami. ĩgu eropa guagu áricũ cabayua weca peyagu dipuwaja burigã moagucumi.

¹⁶ ĩgu suhriro, ĩgu ñigagu sãre iri waĩre gojatudigu ãhrami: “Árĩpehrerã gajirã tauro opu waĩcumi,” arĩ gojatudigu ãhrami.

¹⁷ Pũhrũ abegue niguigũre anyu niguigũre ĩhabũ. Árĩpehrerã ɯmarogue wũrãre goro porã majarãre gaguiniguibeoami ĩgu. Òpa arĩ turaro gaguiniguibeoami erãre:

—Gamenererã arique. Goãmũ ĩgu bosenu wũari bosenu barã arique.

¹⁸ Baja yebari majarã tauro oparã mũrare, surara oparã mũrare, surara bajarã mũrare, cabayua mũrare, erã weca peyarã mũrare, árĩpehrerã gajirã masa mũrare, pohro majarã mũrare, pohro majarã árĩbirã mũrare, gajirã oparã mũrare, bu árĩrã mũrare barã arique. Erã árĩpehrerã dũpũ mũrare barã arique, arĩ gaguiniguibeoami anyu goro porã majarãre.

¹⁹ Eropigu nũgu majagũre, i yeba majarã tauro oparã erã surara bajarã sãre ĩhabũ. Erã gamenerenirã ãhrama cabayu weca peyagu mera ĩgu surara bajarã mera gamewejẽmorã.

²⁰ Erã eropa gamewejẽcũ cabayu weca peyagu nũgu majagũre peresu iiami. Gajigu “Goãmũ yare wereniguigu ãhraa,” arĩ guýadigu sãre peresu iiami. ĩgu guýadigupu nũgu majagu ĩgu ĩhuro deyoro moarire iibasadigu ãhrami.

Īḡu deyoro moari mera nuḡu majagu ĩḡu waĩre tuyanirāre, ĩḡu masu wéadigure umupeorāre ḡuyadigū āhrami. “I Goāmū ya āhraa,” arīḡu ḡuyamuridigū āhrami. Erāre perāre ĩḡu peresu iira puhrū erāre ojocarirāre ta peamegue cōhāmi. Iri peame wuāriya iro dopa wuāri peame azufre mera ūjuri peame āhrabū.

²¹ Eropigū duhyarāre erā surara árĩnirāre ñoserimiji mera ĩḡu disiro cuñurimiji mera wejēami cabayua weca peyagupū. Eropa ĩḡu wejēra puhrū goro porā majarā erā dupū murare barā yapitaria wahāma.

20

Mil bojori gohra Cristo ĩḡu yarā mera masare doreḡucumi, arī gojañumi Ñu

¹ Puhrū gajigū anyu umarogue ĩḡu دچارicū ĩhabū. Ūhcāri gobe maja sawire, wuārida comeda sāre opāmi ĩḡu.

² Eropa دچارigū pĩrure ñeāmi ĩḡu. Īḡu pĩru iribojegue pĩru dupucugū árīḡu, watĩ Satana waĩcugū āhrami. Īḡure ñeagū dihriami mil bojori gohra peresu iibu.

³ Eropa dirituha ūhcāri gobegue cohā dijuami ĩḡu i yeba majarāre mil bojori gohra ĩḡu ḡuyamasibiriborore. Eropa cóātuhagu iri gobere biha, sawi biacāmi. Eropigū mil bojori puhrū dipaturi ĩḡure bajamenarigā wiunigucumi daja.

⁴ Puhrū oparā doarire ĩhabū. Iri doarire doarā sāre ĩhabū. Erāre masare erā beyedoboborore apiami Cristo. Gajirā sāre ĩhabū. Erāpū Jesu yare Goāmū yare erā werera dipuwaja erāre dipure tabe cóānirā āhrama. Nuḡu majagure, ĩḡu wéadigū sāre ne umupeobirininā āhrama. Eropirā erā diaporire erā mojotori sāre ĩḡu waĩre gojatu-dorebirininā āhrama erā. Eropirā gajirā erāre wejēnirā árĩma. Erāre wejēra puhrū masa mūria wanirā árĩma. Masa mūriarā erā mil bojori gohra Cristo mera oparā árĩrācoma.

⁵ Gajirā Cristo yarā sĩrinirā mūra masa mūrianibirama dohpa. Erā wejenirā erā masa mūriara puhrū mil bojori oparā erā árĩra puhrū gajirā sã masa mūriarācoma. Eropirā erā wejēnirā mūra Cristo puhrū masa mūriamūhtarā árĩrācoma.

⁶ Īḡu masumūhtanirāpū turaro mucubirirā árĩrācoma. Ñeri marirā árĩrācoma erā. Eropirā peamegue wasome erā. Eropirā Goāmū yare Cristo yare erā sã serēbasarā pahia árĩrācoma erā. Eropirā erā masa mūriamūhtarā mil bojori gohra Cristo mera masa tauro oparā árĩrācoma.

Satana dederea wagucumi, arī gojañumi Ñu

⁷ Mil bojori pũhrũ Satanare peresu árĩgũre wiugũcumi.

⁸ Īgũ eropa wirira pũhrũ árĩpehrero i yeba majarãre gũyagũ wagũcumi ĩgũ, "Ina gamewejẽrã warã," arĩgũ. Gog waĩcũrãre, Magog waĩcũrã sãre gũyagũ wagũcumi. Eropirã erã ĩgũ gũyarire peerã, erã surara majarãre gameneorãcoma gamewejẽmorã. Erã surara majarã bajarã gohra árĩrãcoma. Wũariya maja imipa árĩro Ƴtãburuyeri nũcũ dopa erã surara bajarã árĩrãcoma

⁹ Eropirã i yebaguere wasirirã, Goãmũ yarã erã árĩri macare Goãmũ ĩgũ mahiri macare cãhmotanũgajarãcoma. Erã eropa cãhmotanũgajara pũhrũ Goãmũ erãre Ƴmaro maja peame mera soe mehdijucãgũcumi.

¹⁰ Eropa wara pũhrũ watĩre erãre gũyagũre peamegue cõãgũcumi. Iri peame wũariya iro dopa árĩri peame azufre mera Ƴjũri peame ãhrabũ. Erogue nũgũ majagũre "Goãmũ yare weregũ ãhraa," arĩ gũyagũre cõãtuhajami. Ero erã árĩcũ Ƴmũri nũcũ pũriroca erãre.

Masare Goãmũ dipuwaja moatugũcumi, arĩ gojañumi Ñu

¹¹ Pũhrũ wũaro opũ ĩgũ doarore ðaro borero ĩhabũ. Iri doarore weca doagũ sãre ĩhabũ. Eropiro ĩgũ árĩrogue mata i yeba Ƴmaro sã dederea wahabũ. Ne deyobirabũ pare.

¹² Eropigũ opũ pohro sĩrinirã mũra erã niguicũ ĩhabũ. Erã bu árĩrã, oparã mũra sã ãhrama. Ero erã niguicũ ĩgũ gojaturapũrire pãgũami. Iripũri masa erã iirare ĩgũ gojaturapũri ãhrabũ. Eropigũ ĩgũ opũ beyegũ iripũre ĩatuha erã iirare masiami. Irire masigũ sĩrinirãre beyeami ñerã, ðarã. Pũhrũ gajipũ sãre pãgũami. Iripũ Goãmũ mera eropa árĩniguimorãre erã waĩre erã gojaturapũ ãhrabũ.

¹³ Wũariyague miri sĩrinirã mũra, diague erã cõãnirã mũra sã masa mũria wahãma. Eropirã yeba pohecague árĩnirã mũra, sĩrinirã erã árĩrogue árĩnirã mũra sã masa mũria wahãma. Erã eropa mũrijacũ ero doagũ erã iirare masigũ erãre beyeami. Õarãre, ñerãre beyeami.

¹⁴ Pũhrũ sĩririñere, sĩrinirã erã árĩro sãre cõãcãmi Goãmũ dipaturĩ marĩ sĩribiriboro dopa. Peamegue irire cõãcãmi. Iri peame wũariya iro dopa árĩri peame ãhrabũ. Goãmũre gamebirãpũ peamegue warã dipaturĩ sĩrirã dopa wahama.

¹⁵ Eropigũ ĩgũ mera árĩniguimorã erã waĩre Goãmũ ĩgũ gojaturapũ árĩpehrerã gojatusũya marirãpũre peamegue cõhãmi ĩgũ.

21

Umaro, yeba sãre mamare gohrotogucumi Goãmũ, arĩ gojañumi Ñu

¹ Pũhrũ umaro, yeba sãre mamare ĩgu gohrotorare ĩhabũ. Ářĩmũhtara mũra umaro, yeba, pagayari sã pehrea wahabũ. Marabũ.

² Eropigu yũhũ Ñu ðari macare, mama macare Jerusalén waĩcũri macare ĩhabũ. Iri maca umarogue Goãmũ pohrogue dijaricũ ĩhabũ. Őaro dehyoabũ iri maca. Mojoto diribo igo marapũre mucubiriborore ðari suhri sã igore ðaro amuro dopa ãhrabũ iri maca. Őpa iro dopa ta iri macare amuyudi ářĩmi Goãmũ ĩgu yarãre mucubiricũ iibu.

³ Irire yũ ĩara pũhrũ opũ doarogue gaguiniguicũ peeabũ: —Īaque. Dohpaguere masa watope ářĩgu iimi Goãmũ. Erã mera ářĩgucumi ĩgu. Eropirã ĩgu yarã ářĩrãcoma erã. Eropigu Goãmũ ĩgu basi erã mera majagu ářĩgu, erã yagu Goãmũ ářĩgucumi.

⁴ Eropigu eropa mucubiriniguicũ iigucumi ĩgu erãre. Eropirã dipaturi bũjaweresome erã. Eropirã ne dipaturi sĩrisome erã. Ne ñero sĩporãcũri, co oreri, pũriri sã mariroca erãre. I ářĩpehleri iribojegue maja pehrea waroca erãre, arĩ gaguiniguigu carami.

⁵ Pũhrũ opũ doarogue doagu ðpa arãmi:

—Īaque. Ářĩpehlerire mama gohrotocũ iigũca, arãmi.

Īgu eropa arĩra pũhrũ yũre ðpa arãmi daja:

—Yũ arĩrire goja aĩque. Yũ arĩri diaye ta ãhraa. Eropiro yũ arĩdiro dopa ta eropa waroca. Eropigu yũ arĩrire goja aĩque, arãmi yũre.

⁶ Pũhrũ ðpa arãmi daja yũre:

—Iripẽta ářĩca. Yũ ářĩpehlerire ĩhacũnugudigu ãhraa. Eropigu ářĩpehlerire pehrecũ iibu ãhraa daja. Ñemesiburã erã turaro ihridiaro dopa ta yũ pohrogue wadiarã Jesure gamerãcoma. Eropirã Jesure yũhrirãcoma. Īgu ojocaririre oro deco iro dopa ãhrimi. Īgũre gamerãre waja gamero mariro yũ mera eropa ářĩniguiborore ogũra erãre.

⁷ Ářĩpehlerã ñero tariquererã yũre umupeoduhubirãre ðpa iigũra: Erã Goãmũ ářĩgũra. Eropirã erãpũ yũ porã ářĩrãcoma.

⁸ Erã eropa ářĩquerecũ masare gũi yaharare duhurã, yahare gamebirã, ñetariarire iirã, masare wejẽrã, nome mera ñero iirã, umã mera ñero iirã nome, yeea, goãmarã wéanirãre umupeorã, ářĩpehlerã gũyarã peamegue warãcoma. Ero wũariya iro dopa ářĩri peame azufre

mera ũjuri peame āhraa. Eroque warā dipaturi erā sīriro dopa ta warā iirācoma, arāmi yure.

Mama maca Jerusalénre werepũ

⁹ Pũhrũ yujugũ anyu yũ pohroque erāmi. Īgũ siete pari opanirā mera majagũ āhrami. Īgũ dipuwaja moadoregũ ĩgũ apinirā mera majagũ sã ĩgũ anyua mera majagũ āhrami. Eropo eragũ ōpa arāmi yure:

—Īagũ arique. Cordero ĩgũ mojoto diribore ĩhmugũca mure, arāmi anyu yure.

¹⁰ Eropigũ Espiritu Santo yure Goāmũ ya macare ĩacũ iiami. Eropigũ ũmadigũ utāgũ wecague yure aĩ muriāmi. Eroque Goāmũ ya macare Jerusalénre ōari macare ĩhmuami yure. Iri maca ĩgũ mojoto diribo iro dopa āhrabũ. Goāmũ pohroque ũmaroque دچارiro iibũ iri maca.

¹¹ Goāmũ ĩgũ goesiriri mera goesiriabũ iri maca. Wajacuri utā iro dopa goesiriabũ. Jaspe waĩcũri utā goesiriro dopa goesiriabũ. Eropiro vidrio iro dopa ōaro deco sũriabũ iri maca.

¹² Eropiro wũari sãriro ũmari sãriro erā sãri sãra maca āhrabũ. Doce gohra disipororicũabũ iri sãriro. Iri disiporore cohreama anyua. Iri maca disiporori bihariserigue Israe masa cururi doce cururi nũcũ erā waĩ tuhyabũ.

¹³ Abe mũriroropũ iri sãriro opabũ ũhre disiporo. Surpũ ũhre disiporo opabũ. Nortepũre ũhre disiporo opabũ. Abe ñajaropũ sãre ũhre disiporo opabũ. Árĩpehrero doce disiporori gohra opabũ iri sãriro.

¹⁴ Iri sãriro doce utā weca peyabũ. Iri utā nũcũ Cordero ĩgũ apinirā doce ĩgũ apinirā gũa yujurāyeri waĩ tuhyabũ.

¹⁵ Eropigũ anyu yure weregũ queodigũ oro mera erā iidigũre opāmi. Iri macare, iri maca maja disiporori sãre, iri sãriro sãre queobu iiami.

¹⁶ “Iri maca yoaropẽ ta ehya,” arāmi queotuhagũ. “Ūmaro sã iripẽta ũmaa,” arāmi. Eropigũ anyu ĩgũ queodigũ mera iri macare queoami. Iri maca dos mil doscientos kilómetros yoari maca āhrabũ. Iripẽta ehvari maca āhrabũ. Iripẽta ũmaro āhrabũ.

¹⁷ Eropigũ iri maca maja sãrirore queoami anyu. “Sesenta y cuatro metros ũmaa,” arāmi. Mari masa queoro dopa ta queogũ iiami ĩgũ.

¹⁸ Iri sãriro jaspe waĩcũri utā mera ĩgũ iira sãriro āhrabũ. Eropiro iri macapũ oro mera ĩgũ iira maca āhrabũ. Iri oro gũhrari mariri árĩro ōaro deco sũriabũ.

¹⁹ Iri sãriro doca árĩri utāre baja gajiropa árĩriyeri tuhyabũ ōaro deyoboro dopa. Iriyeri wajapagariyeri

ãhrabũ. Iriyeri tuyara utã sãriro doca oyari utã doce utã ãhrabũ. Árimũhtari yegue jaspe waĩcũri utãyeri tuhyabũ. Iriye pũhrũ maja yeguere safiro waĩcũri utãyeri tuhyabũ. Peye pũhrũ maja yeguere ágata waĩcũri tuhyabũ. Uhreye pũhrũ yeguere esmeralda waĩcũri utãyeri tuhyabũ.

²⁰ Wapicũriye utãye pũhrũ maja yeguere ónice waĩcũri utãyeri tuhyabũ. Yũju mojtocũ maja pehreri utã pũhrũ maja yeguere cornalina waĩcũri utãyeri tuhyabũ. Seis pũhrũ majaye utãyeguere crisólito waĩcũri utãyeri tuhyabũ. Siete pũhrũ árĩriye utãyeguere berilo waĩcũri utãyeri tuhyabũ. Ocho pũhrũ árĩriyeguere topacio waĩcũri utãyeri tuhyabũ. Nueve pũhrũ árĩriyeguere crisoprasa waĩcũri utãyeri tuhyabũ. Diez pũhrũ árĩriyeguere jacinto waĩcũri utãyeri tuhyabũ. Once pũhrũ árĩriyeguere amatista waĩcũri utãyeri utjutuyabũ.

²¹ Eropiro doce disiporori doce perla mera ĩgũ iiraseri ãhrabũ. Iriseri nũcũ yujuye perlaye mera ĩgũ iira dihta ãhrabũ. Eropiro iri maca wari maha oro mera ĩgũ iira maha ãhrabũ. Iri oro gũhrari mariri oro ãhrabũ. Eropiro õaro deco sũriri maha ãhrabũ iri maha.

²² Iri macare Goãmũ wihire ĩabirabũ. Marabũ. Iri maca árĩpehrerogue mari Opũre Goãmũ turatariagũre, Cordero sãre umupeoama masa. Eropiro iri maca árĩpehrero Goãmũ ya wihi iro dopa ãhrabũ.

²³ Eropigũ iri maca Goãmũ ĩgũ gosesiriri mera õaro boyoabũ. Cordero sã sihãgodiru iro dopa boyoami. Eropirã abe umũ majagũ sãre ñami majagũ sãre ero boyocũ gamebirama.

²⁴ Eropirã i yeba majarã Goãmũ Cordero sã boyori mera árĩrãcoma Goãmũ ĩgũ taunirã. Eropirã árĩpehreri yeba majarã oparã iri macague õatariari erã oparire aĩrã erarãcoma.

²⁵ Eropiro umũre iri maca maja disiporori pãgũra disiporori árĩroca. Eroguere ne ñami mariroca. Eropirã iri disipororire ne bihasome. Eropiro toyonigũia.

²⁶ Eropirã baja yebari majarã õarire erã oparire iri macague aĩrã erarãcoma.

²⁷ Ñeripũre iri macaguere ne aĩsome. Gũhyasĩricũ iirã, ñerire iirã, ne iri macaguere wasome. Gũyarã sã wasome. Cordero ĩgũ gojarapũ erã waĩ gojatusũnirã dihta iri macaguere warãcoma. Iripũ ĩgũ taurã erã waĩre ĩgũ gojaturapũ ãhraa. Iripũgue erã waĩ gojatusũnirã eropa árĩnigũicãrãcoma ĩgũ mera.

22

¹ Pũhrũ õariyare ojocaricũ iiriyare ĩhmuami yũre anyu.

Iriya deco sʉririya Goāmʉ, Cordero sã erã doarogue aririya āhrabʉ.

² Eropiro iri maca deco yuriabʉ iriya. Iriya pepʉri masegue ojocaricã iiri yucʉ niguiabʉ. Iri yucʉ aberi nʉcʉ dʉcacʉa. Yuju bojorire doce suburi dʉcacʉa. Eropirã iri yucʉ maja pũri mera õaro ocosʉrãcoma masa i yeba majarã.

³ Iri macare ne pũriri mariroca. Iri maca Goāmʉ ĩgu opʉ árĩro árĩroca. Cordero ĩgu opʉ árĩro sã árĩroca iri maca. Eropirã ĩgu pohro majarã árĩrã ĩgu pohro mereja ĩguʉre umupeorãcoma.

⁴ Erã Goāmʉre õaro ĩaniguicãrãcoma. Eropirã erã diaporire erã ĩgu waĩre tuyasũrã árĩrãcoma.

⁵ Eroguere ñami ne mariroca. Eropirã sihãgori dipurure gamesome ero árĩrã. Abe ĩgu boyocũ sãre gamesome. Mari Opʉ Goāmʉ ĩgu boyoro árĩroca. Eropirã iri maca árĩrã gajirã tauro oparã eropa árĩniguirãcoma.

Jesucristo i yebague ĩgu dujariboro merogã dʉhyaa, arĩ gojañumi Ñu

⁶ Pʉhrʉ anyu yʉre õpa arãmi:

—Árĩpehrerire mʉ ĩha gojara diaye āhraa. Eropiro gʉa mʉre eropa arĩdiro dopa ta eropa waroca. Mari Opʉ Goāmʉ ĩgu yare weremʉhtarãre masicũ iigu āhrimi. ĩguʉpʉ dohpaguere yʉre ĩgu yagu anyure obeomi ĩgu pohro majarãre masicũ iibu. Pʉhrʉ maja dohpa waborore masicũ iibu, ĩgu yʉre ĩgu yagu anyure obeomi, arãmi anyu yʉre.

⁷ Jesupʉ õpa arãmi:

—Peeque mʉa. Merogã dʉhyaa yʉ dujariboro. Ipũ maja weremʉhtarire tarinʉgabirinirã mucubirirã árĩrãcoma, arãmi Jesu.

⁸ Yʉhʉ Ñu i árĩpehrerire yʉ goja aĩrare peeabʉ. Eropigu irire ĩhabʉ. Eropigu yʉ peera pʉhrʉ, yʉ ĩara pʉhrʉ yʉre ĩhmudigu anyu pohro merejarabʉ umupeobu.

⁹ Yʉ eropa iicũ ĩagu õpa arãmi yʉre:

—Yʉre mereja umupeobita. Mʉ iro dopa ta yʉ sã Goāmʉ pohro majagu ta āhraa. Mʉ acawererã Goāmʉ yare weremʉhtarã, árĩpehrerã ipũ maja dorerire iirã sã erã árĩro dopa ta yʉ sã Goāmʉ pohro majagu ta āhraa. Eropigu Goāmʉpʉre mereja ĩguʉre umupeoque, arãmi anyu yʉre.

¹⁰ Eropigu õpa arĩ werenemoami yʉre:

—Ipũ mʉ goja aĩrapũ pʉhrʉ maja dohpa waborore werea. Eropa waboro merogã dʉhyaa. Eropa árĩcũ ipũ wererare dibubita mʉhʉ.

11 Irisubu yu wererisubure ñerāpū eropa iiniguicoma ñerire. Ōarāpū ōaro iiniguima. Eropirā erāpū ñeri marirā árīrācoma, arāmi yure anyu.

12 Ōpa arāmi Jesu:

—Peeque m̄aa. Merogā d̄uhya yu dujariboro. M̄are yaharāre yu wajayeborore aīgāribu iiaa. Eropigu ōarire m̄aa iira waja m̄are ōaro iigura.

13 Yuh̄u árīpehrerire ĩhacūnugudigu āhraa. Eropigu árīpehrerire pehrecū iibu āhraa.

14 “Árīpehrerā ḡuhrari mariri suhrire sañanirā árīro dopa ta erā ñeri iirare coenirā iri macaguere ejarācoma. Eropirā iri maca maja yuc̄u ojocaricū iiri yuc̄u d̄ucare barācoma. Eropirā mucubirirā árīrācoma erā.

15 Iri macague ejabirāpū ōpa āhrima: Ñetariarā, yeea s̄a, nome mera ñero iirā, ūma mera ñero iirā nome, masare wejērā, goāmarā wéanirāre umupeorā, ḡuyaricurā s̄a āhrima iri macague ejabirā, arāmi Jesu.

16 Eropigu ōpa arīnemoami Jesu yure:

—Yuh̄u Jesu yahagu anyure obeoabu m̄are yaharāre ipū majare werebure. Opū Davi árīturiagu p̄arami āhraa yuh̄u. Yuh̄u boyom̄aririduru iro dopa árīgu m̄are ōaro árīcū iigu āhraa, arī werenemoami Jesu.

17 Espírītu Santo Jesure “Dujarique,” arīmi. Jesu yarā s̄a ĩgu mojoto diribo dopa árīrā, “Dujarique,” arīma. Árīpehrerā erā “Dujarique,” erā arīcū peerā s̄a, “Dujarique,” arīporo Jesure. Ñemesiburā decore erā turaro gamero dopa ta Goām̄u pohrogue wadiarā Jesure turaro gameporo. ĩgu ojocaricū iiri deco iro dopa āhrimi. ĩgu gamerāre waja gamero mariro ūmarogue erā eropa árīniguicāborore oḡucumi Goām̄u.

18 Yuh̄u Ñu árīpehrerā ipū maja wererire, Goām̄u yare werem̄htarare peenirāre ōpa arī m̄are ḡuhyadiaro mera weregura. I buheri mera gaji buheri mera moresū werenemorā Goām̄ure tarinugarā iima. Erā eropa tarinugacū ĩagu árīpehreri ipū ĩgu dipuwaja moaburire ĩgu werero dopa ta apiḡucumi erā s̄are. Eropigu eropa erā s̄are dipuwaja moaḡucumi.

19 Eropirā ipū maja wererire i Goām̄u yare werem̄htarare goroweorā Goām̄ure tarinugarā árīrācoma. Erā eropa tarinugacū ĩagu ojocaricū iiri yuc̄u d̄ucare erāre badoresome. Eropirā Goām̄u mera árīniguissime erā. Eropirā ĩgu ya macague ōari macague wasome erā. Iri yuc̄ure, iri maca s̄are ipū mera erā wererague āhraa.

²⁰ Árípehreri ipũ majare weregũ Jesucristo õpa arĩmi.

—Eropa ta ãhraa. Merogã dahyaa yũ i yebague dujari-
boro, arĩmi ãgũ.

Eropigũ yũpũ õpa arĩtugũ iiaa.

—Eropa ta iique. Gũa Opũ Jesu dujarique, arãa yũhũ.

²¹ Mari Opũ Jesu ãgũ itamuro mera árípehrerã mũa
Goãmũ yarã õaro áríque. Eropa ta árĩrã. Iripẽta ãhraa.